

攻 媿 集

楼
钥

文硕阁

wenshuoge.com

目录

关于我们	6
提要	8
原序	9
卷一	10
卷二	22
卷三	34
卷四	45
卷五	53
卷六	61
卷七	66
卷八	76
卷九	89
卷十	102
卷十一	114
卷十二	227
卷十三	238
卷十四	249
卷十五	265
卷十六	270
卷十七	277
卷十八	285
卷十九	291
卷二十	297
卷二十一	303
卷二十二	308
卷二十三	314
卷二十四	318
卷二十五	322
卷二十六	327
卷二十七	333
卷二十八	337
卷二十九	341
卷三十	347
卷三十一	352
卷三十二	356
卷三十三	364

卷三十四		373
卷三十五		386
卷三十六		398
卷三十七		408
卷三十八		418
卷三十九		428
卷四十		440
卷四十一		451
卷四十二		462
卷四十三		469
卷四十四		475
卷四十五		482
卷四十六		487
卷四十七		493
卷四十八		506
卷四十九		517
卷五十		521
卷五十一		525
卷五十二		532
卷五十三		541
卷五十四		548
卷五十五		555
卷五十六		561
卷五十七		565
卷五十八		571
卷五十九		574
卷六十		579
卷六十一		584
卷六十二		593
卷六十三		599
卷六十四		605
卷六十五		612
卷六十六		618
卷六十七		623
卷六十八		630
卷六十九		637
卷七十		644
卷七十一		653

卷七十二	663
卷七十三	671
卷七十四	680
卷七十五	688
卷七十六	698
卷七十七	705
卷七十八	712
卷七十九	719
卷八十	724
卷八十一	731
卷八十二	740
卷八十三	749
卷八十四	759
卷八十五	765
卷八十六	772
卷八十七	777
卷八十八	783
卷八十九	790
卷九十	797
卷九十一	804
卷九十二	812
卷九十三	821
卷九十四	830
卷九十五	837
卷九十六	845
卷九十七	853
卷九十八	860
卷九十九	869
卷一百	876
卷一百一	882
卷一百二	888
卷一百三	896
卷一百四	905
卷一百五	913
卷一百六	920
卷一百七	928
卷一百八	934
卷一百九	941

卷一百十	948
卷一百十一	957
卷一百十二	970

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

攻媿集 别集类三【宋】

提要

【臣】等谨案攻媿集一百一十二卷宋楼钥撰钥有范文正年谱已着録其集载於诸家书目者或作百卷或作八十五卷而世所传钞本有仅存四十二卷者盖流传既久多所佚脱此本原作一百二十卷与宋史艺文志及陈振孙书録解题所载相同犹为旧帙惟中缺第七十七卷据原目为宣王内修政事光武大度同高祖二赋玉卮为壽宅道炳星纬二诗用人安民治兵三策又缺第七十八卷据原目为御试进士举人台试馆职阁职省试别试解试上舍州学诸试所拟策问十五篇又缺第七十九卷据原目为宴会庆贺致语十五篇上梁文四篇劝农文二篇其第七十三卷据原目缺跋王伯奋所藏文苑英华跋清閤居士临修禊序二篇第七十四卷据原目缺跋刘元城江谏议任谏议邹道乡陈了斋五谏帖一篇而第五十六卷中扬州平山堂记亦缺其後半诸家所藏刻本钞本并同今俱无从校补至第四十八卷第八十卷第八十一卷第八十二卷有青词朱表斋文疏文之类凡一百六十七篇均非文章之正轨谨禀承

圣训槩从删削重编为一百一十二卷用聚珍版摹印以广其传钥居官持正有守而学问赅博文章淹雅尤多为世所传述本传称其代言坦明得制诰体叶绍翁四朝闻见録载钥草光宗内禅制词有虽丧纪自行於宫中而礼文难示于天下二语为海内所称此言其工於内外制也本传又称钥试南宫以犯讳请旨冠末等投贄诸公胡铨称为翰林才今集中谢省闈主文啓一首即是时所作此言其工于启劄也王应麟困学纪闻取其门前莫约频来客坐上同观未见书二句载入评诗类中此言其工於声偶也而袁桷延佑四明志称其于中原师友传授悉穷渊奥经训小学精据可传信尤能尽钥之实盖宋自南渡而後士大夫多求胜于空言而不甚究心於实学钥独综贯今古折衷考校凡所论辨悉能洞澈源流可谓有本之文不同浮议王士禛居易録称其行尽松杉三十里看来楼阁几由旬一百五日麦秋冷二十四番花信风水真緑净不可唾鱼若空行无所依诸句而病是集多丛冗谓表状内外制之类删去半部亦可然贪多务博即诚斋剑南平园诸集亦然盖一时之风气不必以是为钥病也至於题跋诸篇尤多原原本本证据分明不止於居易録所称三笑图赞吴彩鸾玉篇钞唐昭宗赐懌实勅书三篇毛晋辑津逮秘书摘録宋人题跋共为一集而独不及钥其偶未见此书欤乾隆四十六年六月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

攻媿集原序

鄮山参政楼公攻媿先生文集一百二十卷建安真德秀伏读而叹曰呜呼此可以观公立朝事君之大节矣盖公之文如三辰五星森立天汉昭昭乎可观而不可穷如泰华乔岳蓄泄云雨岩岩乎莫测其巅际如九江百川波澜荡潏渊渊乎不见其涯涘人徒覩英华发外之盛而不知其本有在也庆元初韩侂胄除知合门事忠肃彭公力谏改侂胄内祠彭公予郡公在琐闼极论之云去者不复侍左右留者召见无时终不能远时侂胄之恶未着也既而窃弄国柄以党论尽锢天下贤士挑敌弃盟中外骚然天下始服公先见朱文公侍经筵内批予祠公持其命不下曰当今人望儒宗无出熹之右者奏虽寢然当邪说充塞之时首倡学者共尊朱公後卒赖其言而学禁遂开道统有续然则观公平生大节而後可以读公之文矣公生于故家接中朝文雅博极羣书识古文奇字文备衆体非如他人窘狭僻涩以一长名家而又发之以忠孝本之以仁义其大典册大议论则世道之消长学术之废兴善类之离合繫焉方淳熙间鸿硕满朝每以奏篇出其援据该洽义理条达者学士大夫读之必曰楼公之文也一诏令下其词气雄浑笔力雅健者亦必曰楼公之文也呜呼所谓有本者如是非耶公既齟侬侂胄之锋退居却扫者十有四年嘉定初起为内相俄辅大政向来俦辈凋丧略尽而公岿然独存遂为一代文宗德秀尝窃论南渡以来词人固多其力量气魄可与全盛时先贤并驱惟钜野李公汉老龙溪汪公彦章及公三人而已念昔校艺南宫自事东府或清言竟日或极论达旦德秀退而书绅终身诵之其所以犹爲当世善人君子所与而不遂为涂人之归者公之教也公季子治以集序见命德秀何敢辞建安真德秀谨序

卷一

钦定四库全书

攻媿集卷一

宋 楼钥 撰

古体诗

攻媿斋

余以攻媿名斋俞致翁惠书谓若无媿可攻者读之悚然不敢当以谢之

圣贤不得见道散固已久学者多自贤鲜肯事师友顛冥声利中悔吝皆自取动言无媿忤未知果然否寡过云未能先圣欣善诱凛凛孟氏言几希异禽兽参乎病知免遂使启足手宁知起易簣又在此段後吾侪况小人气质素凡陋以其所以养孝道亦何有勉前类水马立处只如旧倘复不自立其末当愈谬每思攻所媿扁鵲铭座右三诵故人书慙汗几欲溜夫岂爲戏言知君于我厚因之更加警补过尚无咎

谢湖山居士示和陶诗【吴给事芾】

渊明千载人风节仰孤峭岂惟辞督邮莲社不得召书不求甚解眼高得玄要诗亦本无意但写胸中妙齐梁纷衆作嘈杂春禽叫稚子候檐隙文通剧搜绍矫矫玉局翁尚友谢浮漂饱吃惠州饭追和欲同调湖山老居士宏才盖廊庙出入官五纪怀归自年少屡賡归来辞吾行有先兆老龙卧林壑年高德弥劭向来批勅手甘心事耕钓筑室据仙居泉石造深奥亭榭望堂皇蓬萊对圆峤涉园日成趣遇客酒频醕岩岩鸾鹤姿炯炯双眸了堕体黜聪明坐忘乐遗照西畴时告春东臯快舒啸襟期古暗合此事不容诏尽和靖节诗笔走追风骠又如斐旻剑腾空径投鞘人生嗜欲深山林不供烧何当从公游翛然宁荷篠小子敢言诗未免事华影西施难效顰邯鄲恐貽笑思欲焚旧藁世味轻咀嚼稍寻韦苏州旁引孟贞曜絶去翰墨畦母凿浑沌窍尚或庶几焉未暇期速肖

送袁和叔尉江阴

澄江少日曾经行高城傍有长江横君山特立江之汀下瞰淮甸一堂平中港引潮深无声万顷灌注滋农耕战国今几二千龄黄歇此地犹垂名旧以邑属南兰陵疲于奔命吏失宁今焉裂地为专城独当一面行双旌井市虽小民厚生四十万缗输赋征舶商辐凑衆货赢牒诉简省官曹清一邑负郭相依凭守宰同僚齐弟兄脉络贯通易尽情尉职无卑近编氓坐閱是否真权衡傍郡孔道困将迎我乃静趣如郊垧安輿并行人子荣况有海错供庖烹河鲀鲋 鲜

不鯨车螯蛤蟹均藜羹夫君传家有典刑父子知己人一经诗书满门不慙卿岂羨汉士黄金
羸荐口久已彻帝京九万自此开鹏程平生寒牕照短檠兴亡千古无遁形妙年射策当彤庭
归领後生为主盟友朋讲习诚专精世故多端须饱更京口直下连沧溟官府濶稀行旅惊边
头久无夕烽青要在弹压潢池兵簿书期会勤经营人物酬应审重轻一言行之可终身谨毋
失己毋失人赠人以言岂吾能颇尝于此三折肱举以送君君试聽

登育王山望海亭

瘦藤拄破山头云山溪尽处开危亭平田万顷际大海海无所际空冥冥乾端坤倪悉呈露飞
帆去鸟无遗形蓬萊去人似不远指点水上三山青褰裳濡足恐未免倘有飈驭吾当乘是中
始觉宇宙大眼力虽穷了无碍云梦八九不足吞回视尘寰一何隘曾闻芥子纳须弥漫说草
庵舍法界看我振衣千仞冈笑把毫端卷烟海

林景思雪巢

四时不皆雪陆居本非巢高人兴寄远表此一把茅吾非二祖可夜立寒齐腰吾非鸟巢师结
庐置树梢白日照我心不以见晛消两脚踏实地风雨无漂摇作诗穷益工寒瘦逼岛郊落笔
句惊人不复寻推敲客至不问谁淡若君子交直气干霄上不视鄙斗筭富贵顷刻花畴能等
幻泡附离如幕燕自谓漆与胶先生閱世熟兀坐山城叻春阳会有时岂曰终系匏锡山寄雄
文凜然?髮毛我非敢言诗为君聊解嘲

题龙眠画骑射抱球戏

綠杨几枝插平沙柔梢裊裊随风斜红绡去地不及尺锦袍壮士斫髻射横磨箭锋满分靶一
箭正截红绡下前骑长纓抱绣球後骑射中如星流绣球飞?最难射十中三四称为优元丰策
士集英殿金门应奉人方倦日长因过卫士班飞骑如云人马健驾幸宝津知有日穷景驰驱
欣纵观龙眠胸中空万马骇目洞心千百变追图大槩写当时至今想象如亲见静中似有叱
咤声墨淡犹疑锦绣眩闲牕抚卷三太息五纪胡尘暗几旬安得士马有如此长驱为决单于
战

题罗春伯所藏修禊图序

东游登会稽只见兰亭不见碑北过中山府欲访此碑不知处间从故家看墨本如此二者絕
难遇曾经耶律毡裹去至今薊北犹知慕时将一二馈北使持归往往快先覩未知玉石真在
否要比江南终近古他日缚取呼韩作编户勒铭归来过定武只问君王乞此碑打向人间莫
论数

题孟东野聽琴图因次其韵

谁欵住前溪夜深以琴鸣天高颢气肃日斜映疎星橡林助萧瑟泉声激琮琤弹者人定佳能使东野聽束带不立朝遥夜甘空庭龙眠发妙思神交穷杳冥不见弹琴人画出琴外声郊寒凜如对作诗太瘦生恨不从之游抚卷空含情

寿安抚伯父

东楼德泽流无穷我公挺生庆所鍾琼枝玉树莹精彩迥然不堕风尘中少年慷慨吐虹气文彩元不减侪辈胸中妙蘊经纶才剴剧裁繁特余事曾从莲幕试牛刀举城但识刘功曹瀾翻荐口动天聽一语便逾华袞褒上方欲革岭南弊柬才果得吴刺史不妨一勺饮贪泉清德泠泠今可纪凭轼雍容安七闽列郡合词称得人从兹十载秉麾节坐令万里回阳春洞庭风月潇湘雨君王无复忧南顾抗章乞得半生闲遥指山家赋归去庙堂未肯闲宏才大开东阁需公来朝随召节赴天阙夜驰使駟归长淮广陵卧治要汲直金节荧煌照熊轼底用腰纏十万钱且看身享二千石忽思鲈脍寒菹羹拂衣欲遂乡关情视去西阳如脱屣意色萧然同鬪生画船重泛西湖上水光山色都恙恙主人管领东风回故园桃李倍清爽六鳌背负三山归轮囷老桧苍龙姿了无尘俗败人意斐儿长物皆瑰奇横岸纶巾披鹤氅神情直出羲皇上尘事到头曾不闻卧聽歌台传缓响百花堂前手自栽兴来一杯复一杯人生亦欲自适尔富贵于我何为哉仲春况属悬弧旦使君亭榭风光煖东君豫借一分春不许芳菲作春殿绮罗香深初肆筵弟兄酬酢盃相传此时更复借一醉君从何处拌垂莲五侯贵盛德未美簪纓不满高阳里何如清白传家风奕世青毡尽朱紫燕居今喜相比隣其如四海须陶钧羽书鼎来在朝夕何数羔雁徒成羣芙蓉城中有仙室十洲三岛环其侧此中乐不减商山功成归作茹芝客

送伯舅汪运干【大雅】

人生自古悲别离今日何足悲试问今日行者谁鄞江名族真男儿虬须燕颌軀十围凜凜端有熊豹姿毅然刚立不怒威笑视鼠輩何脂韦州县小试囊中锥政绩今在衆口思姓名通籍黄金闺便泛王俭红莲池平时幕府多素尸坐縻公粟邀以嬉只今方当多事时正要名士同驱驰森森百万虎与貔荷戈分驻淮东西两淮千里双使麾幕中僚吏皆耀犀惟公婉画明蓍龟辯如悬河不可堤胸中武库深难窥决策固有堂上奇朔风吹空黄草齐正恐秋高胡马肥万人相顾目睽睽见公此去多腹非公独襆被行不疑单车西去征马嘶平生气槩冲虹霓恨无尺箠笞羌夷方今天相中兴期黠虏戴头来边陲顾公速蹈功名机匈奴不灭何家为出门千里何足辞但愿满引金屈卮

夜月泛舟姚江

秋暑不可耐几思泛中川晚来兴有适溪船偶及门凉月才上弦平湖可黄昏倚楫纵所如卧看龙泉山长虹跨空濶过之凜生寒坐稳兴亦佳夜气方漫漫草虫鸣东西飞鸟相与还仰头数明星垂手摇碧澜主客惜此景不及携清樽无酒要不恶徜徉足幽欢幽欢有何好扣舷澹无言

送王正言守永嘉

江头潮生江月小暝烟绿暗垂杨道有客扁舟送使君道傍不怕揶揄笑向来一别三换岁正喜亲情得倾倒吏民引领望推麾空有离愁满怀抱使君读残万卷书古事今事俱了了便应珥笔侍天陛不然代言登凤沼瀛壖山水久寂寥为屈朱轡来坐啸岾嶂峰高旧题咏赤城所在经行饱永嘉名郡太守尊灵运後來诗絕少天作雁荡地为藏蜡屐穿山未曾到改辕却向个中去更得江山助诗好斋铃静处定得句不待池塘梦春草去年海水上平地大风驾浪从天杪苍生泯泯生鱼头聚落随波迹如扫今年二麦连野秀田家扶犁事秔稻使君忧国眉不开叱馭径行仍及早哀哉千里方更生县官租钱酒力晓纵民自恐上不足诛取何怜下无告邦储邦本孰轻重肯使疲民困征扰君不见岩岩千古阳道州政拙催科自书考

游龙瑞宫

隔山望危石老面凜如铁路回两屏开见此高巒岬伟哉名公卿峩冠会朝列又如鼓迅霆玄云助击烈痴云不作雨空翠袭冰雪野水不知源遶径几万折子长真爱奇万里探禹穴我家甬水东扁舟轻入越窃此半日闲到处辄清絕传闻古洞天琼台照金阙神仙杳难问一笑山石裂相逢客路中翻手数年别胜地更跻扳莫厌屐齿折

三日不得过都泗堰

南朝何公栖禹穴嘉遯悠然老高洁一朝送人都泗埭归叹此途於此絕我亦何为走尘埃数年不记几往来船横三日不得度愧想高风安在哉

宿佛日山

平生临平山知诵藕花句轻帆几来往山色澹如故宁知千万峯中间着佳趣萧萧苍髯翁为指花城路我来春正浓天寒日将暮云深钟呗鸣自喜得胜具缅怀玉局仙老笔扫朝雾玉槩俨相持珠旒竟何所惟余渥洼水苍龙角牙露人间翻覆手烈日变烟雨俗子眩炎凉三四错赋芋道人笑视之万化随所寓深坐十笏地一息了千虑个中谁得知幽鸟背人去

求仲抑招游山归途遇雨

竹輿遶湖滨宿露尚厌浥径到玉岑下坐久客始集起穿灵石山万松介而立梅天气清润空翠行可挹古藤几百年枝蔓两山及见说暮春时花紫光熠熠直疑老潜虬初起夜来蛰俯玩岁寒泉齿冷不敢吸相将上龙泓尘鞅谢羈?洞有灵兽居临深心岌岌鱼游明镜中巨浪无三级寒苔载水去万顷润原隰蒙蒙山雨来归仆鸟飞急野兴殊未已日昃不暇给冲泥上湖船雨阵遽奔袭飘风将急点回旋惊四入中流益荡兀短篷不当笠停篙亦久之怒势不少戢我徒方啸歌弗谓改豪习但苦瓶罍罄莫问衣裳湿

吴江舟中

阿连久已共一被小别愁生夜无寐风帆将我上征途回首江中日千里小舟横卧吴江水梦回依约萧斋里五更漏急月黄昏鸟散一声人未起

读范吏部三高祠堂记

三高之风天与高三高之灵或可招小山以後无此作具区笠泽空寥寥几从垂虹荡双桨寓目沧浪独怊怅笔端不倒三峡流欲遽招之恐长往前身陶朱今董狐襟抱磊落吞江湖瑰词三章妙天下大书深刻江之隅我来诵诗凜生气若有人兮在江水扁舟独钓脰鲈鱼茶竈笔牀归南里先生同是丘壑人只今方迫功与名谢公捉鼻恐未免便看林藪生风云他年事业满彝鼎乞身归来坐佳境不嫌俗士三斗尘容我渔蓑理烟艇

仙都独峯

汉家武彻求神仙方士搯掌多夸言蓬莱隔海不可到属车徜徉上乔山传闻黄帝久仙去胡为有石高漓岏游谈不经理欲屈谩言此地藏衣冠缙云自是仙窟宅万壑千岩比如栳突然一石摩青云造化应劳巨灵擘仙风吹堕碧莲花玉井半空人不识望之不计几千尺八柱擎天此其一伯夷制行高且孤万世犹能立懦夫英魂凜凜今不死化作此石山之隅横斜辙迹依然在我亦何能穷古初

灵壁道傍怪石

饱闻兹山产奇石东南宝之如尺璧谁知狼籍乱如麻往往嵌空类鐫刻长安东南万岁山搜抉珍怪穷人间汴流一舸载数辈径上艮岳增孱颜当时巧匠斲山骨寘之江干高突兀干戈动地胡尘飞坐使奇材成弃物君不见黄金横带号神运不数台城拜三品只今零落荒草中万古凄凉有遗恨木人漂漂不如土坐閱兴亡知几许行人沈叹马不前石虽不言恐能语

括苍溪涨

雨余大溪触山流气势直欲凌沙洲浮梁中分断蟠螭流沫东去行蛟虬人家嘈嘈避新涨云稼苒苒添平畴渔翁轻生有如此小艇横絕随飞鸥

石门洞

扁舟百里遶城回青山中断立两崖清都虎豹隐不见但见阊阖排云开峯回失喜大飞瀑声震万壑惊春雷掀髯目极九霄外玉虹千丈飞空来一冬青女靳天雪不知聚此山之隈传闻神龙卧其上宝藏击碎真琼瑰胸中先自无尘埃到此更觉心崔嵬天风为我噀空翠春水泻入骚人怀谪仙曾来写胜句刘郎又为开天台我慙笔无挽牛力醉墨满壁谁为裁或言龙湫

更奇絕鴈山高处深云埋我方携筇往寻访未知比此何如哉

大龙湫

北上太行东禹穴鴈荡山中最奇絕龙湫一派天下无万衆赞扬同一舌行行路人两山间踏碎苔?屐将折山穷路断脚力尽始见银河落双阙矩罗宴坐看不厌骚人弄词困搜抉谢公千载有遗恨李杜复生吟不彻我游石门称胜地未信此湫真卓越一来气象大不侔石屏倚天惊鬼设飞泉直自天际来来处益高声益烈溟池倒泻三峡流到此谁能定优劣鴈山佳趣须要领一日尽游神恶?骊龙高卧唤不应自愧笔端无电掣轮囷萧索湍不怒非雾非烟亦非雪我闻冻雨初霁时喷击生风散空濶更期雨後再来看净洗一生烦恼热

连云亭望海中诸山

鴈山本在云海中波涛千古相撞春泥沙洗尽见山骨岩壑所在皆玲珑是谁一口汲水尽平地卓立成奇峯至今往往有遗迹相传渺漭何能穷我乘单车来自东佳处十数一览空晚登四十九峯顶旷望巨海烟蒙蒙羣山错立不知几朝日照耀天霞红是间瑰奇定多有鲸波掩蔽深莫通我无太真燃犀法安得一闯冯夷宫会闻沧海变成陆却与鴈山争长雄

寄题张法曹瞻云轩

张侯名轩意可知如登太行看云移我虽未得登轩墀不鄙要我巴人词尔时膝下邀以嬉欲斲数语语不随娱侍东嘉乐无涯官舍偃仄亲不怡安輿相将甬水湄日日东望劳支颐秋风得檄欣星驰归拜亲下聊信眉官事有程不得违欲去故国行迟迟重来橘柚黄金垂霜着新蟹双螯肥海鱼甘鲜一尺围欲奉色养春为期瞻云之思今同之慨然落笔成新诗人间至乐在庭闱何用自缚微官为君方欲解左顾龟我亦日思投檄归相望百里俱莱衣从他天外闲云飞

次韵翁处度同游北山

两夫持鎌行我先巧寻径路其智专我扶枯藤衣短後意气已出层峯巅何郎鲍叔饱经历胜处一一手自编我携旧纪访陈迹止恐急景不得延徜徉共登青云梯今日邀我为击鲜始观神龟闯青泚上有石壁来飞泉隐蹟遗基平可坐下顾乱石如磨鋌悬崖双瀑洒空雪来自一握孤云天郤从下流泝深险崎岖直到青潭边朝阳射光破幽閤断虹上下遮潺湲传闻高山更高处雅有行路从西偏同行无乃深好事盃酒自犒脚力全诛锄荆棘穷鸟道欲进不得意愈坚旋呼童仆累危石笑采野菊聊盘旋扞萝腾身上苔磴往往欢呼争着鞭侧行危步汗浹背石角或使衣裳褰少焉身在双瀑上又见高派冲泓渊自笑泉石成膏盲爱赏不减蚁慕膻巉岩数峯巧遮护妙处二老初无传脱迹尘埃到此地便觉神思飘飘然回首江南尘一聚城郭历历眼欲穿相期更看水流处步履未倦夸轻翩一上千尺穷山椒碧涧靡迤流苍烟寻源不能且忘返石貌巍距惊神镌退求归径惘难问藤萝所在相萦纆我方踟蹰风烟表披披衣

袂身欲仙晚归招提各痛饮读尽屋壁长短篇截筒环山覽清驶穹出珠穗心亦怜棊枰相与论瓜葛横琴不妨挥五弦人生易老费扶掖胜具大率须少年伊余历聘佳山水爱奇切慕太史迁明年炎暑袭故步与君共枕清流眠

游白石岩

我游仙都观独峯辙迹虽在车不通鼎湖望极几怊怅无羽翮凌天风兹来乐成望白石玉甑突兀摩苍穹人言真人老聃裔凿开洞府遗仙踪无人共登青云梯跻攀伴我惟枯筇萦回约略三十里踏遍万叠高崕崕断崖泠泠落残雨双石凜凜亭孤松卻从山椒下谷口石栏屈曲遮碧椶颇疑山高气凝凜古来积雪今未融是谁玉斧妙镌斲仙洞双辟惊神工岩深白日尚幽閤别有石窍开天聪传闻峯头贮清泚苔罅涓滴声冬珑奋身便与上虚阁海山错立烟蒙蒙脚?千山行伏龙手挥五弦俯冥鸿霜林摇落当玄冬长啸一览万象空解衣寄宿旦过寮魂梦亦堕水壶中晓看日出沧海东蜡炬百万烧天红眼高不数鴈荡雄行田下笑康乐公未能辟穀追仙翁颇亦有意栖琳宫三山不觉去人远安期羡门宜相从骖鸾驾鹤太多事但欲御气游无穷

约诸公再游龙湫

昨暮与君上龙湫天久不雨无湍流笑呼拊掌唤不应怅望颇亦令人愁夜来雷鼓惊龙起溪声已觉乱人耳莫辞重访尊者居坐看倒翻三峡水

送刘仲起主簿

刘郎鸾栖海濒邑不减向来人性习凜然躯干即之温语恐伤人中有立论交虽厚笑甘醴御史以严无束湿公余黄卷频卷舒艺圃工夫日加葺永嘉数多君子僚休沐新盟有清集伯伦忽去谁鲸吸欲挽不留情悒悒君年方盛才有余逸骥宁容在羈?期君欲蹈功名机塞草连云朔风急

王侍御壽诗

使君威名闻四方南牀凜凜凝秋霜使君和气到瓯越幕府初开夜飞雪颇闻此雪近岁无定知来随御史车黄堂洗印未多日庆朝况此当悬弧明年丰登日可数父老儿童争起舞迟明贺版拥譙门试拾欢謡作诗语使君风度神仙人相门出相宁非真妙龄两科谈笑得脱趋严召依风云台端敢言奸聽聳至今说论时传诵踏遍巫山十二峯却寻春草池塘梦人传使君威棱棱我知威爱元兼行苍髯如戟面如铁惠养自有循良称高牙入境纷进谒宾属庭趋躬磬折民生共喜爱日温吏行独畏春水裂向来夔州妙筹边夷蛮落胆皇灵宣还朝奏课居第一夜半帝席为之前东嘉今为股肱郡小试望之三辅近会循故事入三公致君要使登尧舜东风未动春先回梅花照眼歌筵开吏民合词诵难老一笑千里传银杯佳儿恂恂受衣鉢玉树芝兰俱秀发江南世胄比长淮更看云来萃簪笏平生知己今上天敢复作叹寒无毡巴言

未足赞公壽载诵峻极崧高篇鲍清卿病目不赴竹院之集诗寄坐客次韵

鲍侯少年老文学艺苑优游富耕获胸中涵养自成趣妙处正恐儿辈觉我惭门巷非尺五字欲问奇谁与?开樽竹院望同醉遮眼脑脂何太虐圓圈十客踏雨来相从不负东风约投壶雅歌了无恨祇恨公车一前却海棠春深照眼明风物融融悟非昨从教雨洗臙脂淡小摘何妨供把握夜阑烧烛照何睡靚妆如在结绮阁墙头西望烂蜀锦嫣然一笑无声乐飞红点地绣作茵正须席地天为幕要知富贵出天姿艳杏夭桃何足録主人小筑真好事肯学区区专一壑洞门不锁要客来笑君太似羊公鹤雨余珠泪色惨凄一顾正嫌无伯乐忽惊新诗来叩门妙语天然不烦琢坐中传观字欲漫我?降幡甘面缚清明已过雨不休云雾犹屯四山脚揩摩病目不应迟及此红英半零落枝头尚有未开花纵已离披亦何恶知君既负西岑游可使一春终落寞会须来此共赋之正要重闻诵新作

赠光孝益老

光孝长老师益苏魏公诸孙兄延寿为台州判官别四十余年一见欢甚林吏部有诗次韵

原鵠鸿雁行此理悬诸天万事可变灭天性难推迁显庵幼出家洁饮同玄蝉一鉢寄西东悠悠经几年外慕等浮云百念灰无烟难兄忽相逢触动欢喜缘光陰信可惜征袂何翩翩叱胥掩簿领来问妙峰禅刺刺道家世客泪如迸泉玉堂与黄阁衣鉢亲相传游宦非为贫不敢替所先老师虽晏坐至情岂唐捐此会非偶尔絶倒秋风前手持诗卷来谓予得无言晓以天性语人生要有原嗟哉伪日薄其荳本同根一旦成讐敌釜中急相煎宁知有佳人芳草梦阿连相见无几时瞥见鱼跃渊固知出世法惜别诟不然又当作大观勿为爱网牵千山原不隔毋庸对牀眠

送王道州

九疑之南为舂陵瀟木清驶山为城郡斋正据山直上一览万家无遗形家君顷年入莲幕我不得往空驰情先生分符此中去心旌摇扬随双旌先生平生饱文学身上着作承明庭奥篇隐帙亦如响一时自许文章鸣高辞坐夺造化巧凜凜韶濩声铿锵把麾江海非无意亲扶版輿赋南征颇闻楚俗未苏息糟糠不厌嗟疲氓正资儒术饬吏事拔去强薤摩孩婴政成环召事未晚天子日夜开延英风流千古三刺史往继聲叟阳先生毋庸自书追科考但愿寄我舂陵行

哭王知几墓

知几少也爽万事谈笑了自谓颇寡合见我辄倾倒百年能几见一别迹如扫父子俱埋璧呜呼何其早向来论文酒和泪倾宿草此意谁复知寤叹令人老

仲舅尚书生朝

去年生朝燕稽山馆舍朗朗屋百间红裙合乐饮彻旦坐上衆客皆酩酊今年生朝半归路竹
舆潇潇晓冲雨回头风景非去年当时宾客今何处仕已喜愠曾何分适齐未减楚子文鼻间
栩栩固自若世情物态徒纷纷平生知足志闲退归老乡关了无悔但欲年年醉西风坐閱人
间百千岁人间万事日不同尚书人望方颀颀明年举酒拜公壽安知不在槐庭中

送郑惠叔司封江西提举

君名切斗魁步武上霄极蓬莱羣玉府图书照奎壁郎官应列宿寢觉象纬逼胡为作使星烟
烟向江国仰奉鹤发亲版舆映莱服昔日红莲池帅垣资婉画方将散余润连城被膏泽官榷
与民繇丰俭烦振籩小试活国手疲氓赖休息便归侍玉皇拱立香案侧富贵殊未已行行上
鸾掖君其妙演纶三能看齐色

次韵胡元川茉莉花

残暑未尽秋欲来玉刻万叶琼英开孤标雅韵一枝足江上紫翠空成堆素娥尝与明月约青
女细把轻绡裁主人好事趁时买买真此地真宜哉墙间闲地方丈所几年累甃装层台春花
秋卉纷互发胡葵芍药参徘徊眼明忽见此奇絶弟畜素馨兄事梅夜深飞香性幽独未许蜂
蝶来相陪糖餠封余有闽土会须扫取添花栽吾闻闽山千万本人或视此齐蒿莱何如航海
上天阙玉色照映琉璃盃新凉徙倚看不足坐见日影敲庭槐

同官登勅局小楼观雪

去年岁丰登雨阳应时须所欠惟一雪祈禳遍精庐晚亦粗飘瞥六花舞空虚云气不待簇风
伯随驱除残春寒尚深忽见云馍糊撒盐压衡茅晨兴粟生肤随班上廊庙恍若登蓬壶迢嶢
宫殿深朱扉黄金铺百神卫灵居半天散琼琚又疑守护严宝网络明珠参差鸳鸯行簪笏皆
沾濡退归冷局中牕间竹扶疎为思此絶景往往终年无不应憚凌寒闭门守红炉为君登危
楼深盃泛醪酥崔巍瞻吴山莽苍望西湖琼枝宿饥鹰玉阶走韩卢酒兴万里远容我歌且呼
坐欲斲五言所媿李与苏君与工属聯灞桥去骑驴

久不作诗喜仲兄迁隣因成长句

宦游各天涯皇州今鴈行官居半里所相过复相望西邻得老屋往来连户牕水竹占幽胜风
雨对一牀十年短擎灯今夜分余光儿曹亦可乐洛诵声洋洋天边有白云随风正飞扬相期
奉甘旨莱衣戏亲傍轩冕皆倘来此意可暂忘诗成喜可知且复釂此觴

送林宗丞浙东议幕【劄】

先生风骨天与清孤松野鹤何瘦生胷中落落筭五经大篇短章笔纵横壮年文場诸老惊俯
仰世故双鬓星万事不理诗自鸣笑视轩冕秋毫轻市者争利朝争名著脚往往遭讥评先生

四五官神京又复归去鸿冥冥台家急贤理不应况复寮旧离觞倾先生自喜行此行禄粟可以号号声秦望之山高且平卧龙横亘环州城镜湖千顷波不兴晋宋遗迹多豪英议幕了无尘务萦抚物吊古皆关情我亦久矣怀沧溟旦夕欲乘缇油屏相望纵复三四程诗筒尚得寻前盟

临海县治琴堂

子贱弹琴真是琴我今无弦知琴心使我不得琴中趣弦以修绠谁知音才术高低不自由单父二子心则俸後人不得弹琴暇勿以戴星为可羞

送石应之司户归剡以室迕人远为韵

捷径指终南索价讥少室穷达岂无命踏地胡不实之人吏海隅所吐百未一夷途澹无营君其有终吉年来叹离羣磨琢殆无几资凡学益落駑骀费尺箠美君富春秋发轫方自迕骅骝更着鞭洗眼日千里南明千古秀庆源久益新剡谿照人清况复屈斯人掺祛不容留椒觞思拜新他年风雪中扁舟倘知津平生企贤心山川恨悠缅宁知日相见怀抱竟不展樽酒了无暇离情果深浅室迕犹许疎况今乃真远

送王仲矜倅兴元

蜀道难难于上青天蜀道易易于履平地蜀山天险固自若视难为易在人尔王尊真有四方志叱馭径行了无累早登岷峨仕阴城谈笑动行千万里汉中由来说鷄肋意谓弃之为可惜君今此去良似之更欲远游寻故迹汉都南郑启炎图秦置石牛山径辟淮阴拜将余高台武伯葬处空松柏大笑出门何慨慷天涯离愁各尽觞荷君走马却送我李侯参语夜未央君方往蹈功名机何止别驾歌王祥先正九年遗爱在更携故笏访甘棠【仲矜象简乃参政入蜀时所用】

巾山

两螯鼉鼉随西行势欲吸尽西江清是谁縈以千丈城欲去不去岂不灵化为青山镇东溟首冠窳堵双崢嶸安輿从东喜逢迎笑指螯背同来登春残雨足緑阴成山鸟相和声咿嚶自从半山经小亭仰望巨石扶轩楹千山万山拥翠屏阴霾归静纤云兴翠微下有长江横滚滚不尽千古情横轩俯瞰万瓦平佳处历历堪指名雪蓬蹙云连曲肱蜂房蚁垤栖残僧扶栏更上三两层一览衆物无遗形徙倚未厌茗椀倾长啸两腋清风生亲顔甚怡轮为停我亦色笑喜不胜愿我双亲俱遐龄方瞳链顔华发星如此两峯相对青

沿檄柯山归别张特秀

我昔志学年侍亲宦西安弟兄游庠校见君平生欢君才独颀出逸驾不可攀夜牕共檠灯春

游合盃盘虚堂卧雪岭杰阁横云盘烂柯上危磴乌巨沿溪湾是时气相高辩论俱澜翻一别三十年天街见峩冠殿庑看决科蓝袍立清班黄牒墨犹湿大弨力能弯尔来又五载短书能几番兹焉捧檄来吏牒方挈烦室还叹人远一朝脱笼樊满意纵剧谈痛饮到夜阑十步九太息此事亦孔艰进哭老先生画图惨青纶特显顾何爲一昔成大还回思我伯氏人琴有余叹感今念畴昔相与涕泪漉故人怅无几恍如春梦残有酒不得饮有琴不成弹复归坐冷屋使我凋朱颜我归不可迟倚门梦连环君言欲舂粮伴我行路难欲去不得去僧房话闲关年各几半百後会鬓亦斑何处更有待此心匪石顽羣忧发孤笑属联不当慳气岸有如君着身簿尉间盐车复长鸣会当上天闲掺祛不忍别雨声为潺潺君有门户责殷懃愿加餐

次韵沈使君怀浮冈梅花

玉人迴立山谷里不有使君谁与怜毋庸高牙煞风景为着佳句增孤妍寒溪照影漫千树横笛吹残又一年传闻年後更多发便须跃马趋平川

送王木叔推官分韵得锦字

王郎天下士中和自生稟澹然初无营见者辄敛衽幕中资婉画处事极精审与人如恐伤律已渊氷懔深恐马駈輿要使鶡食甚一寸忧国心几年不甘寝此意大未酬退静若已甚使之行所学庶几人奠枕向来孰闲之未免斯立噤川咏而云飞赖有东阳沈露章极推轂分韵句裁锦风流有如许不复叹蹕蹕如君岂蓬蒿人物妙流品才应奉香火为养谋禄廩与君幸瓜葛心交今十稔岂惟我惜别行道情苒苒红莲色何似翠柏风愈凜愿君疏药裹一意护茵飴弃鼎宝康瓠浮名如拾渾行矣无多言临岐且剧饮

彭子复临海县斋

乾道癸巳冬此邦我经行郁攸气未殄千家真赤城来访临海令瓦砾纷纵横翹然二尺高问是戒石铭徘徊重太息更闻愁叹声试询来者谁共言令姓彭我时语傍人此邑其将兴迨予来赘倅客馆方暂停夜闻箫鼓沸厅事先落成起望轮奂美壮观耸连薨百堵日已作斧斤喜丁丁层楼度敕书两庑环中庭久乃游其间宏大使我惊位置既深稳斲削仍工精田里不知役纖粟无输征安得屋朗朗突兀有宁馨退食不苟处扁榜皆佳名中虚物自照政平由心平櫨柏已可悦况有贤弟兄小亭真吏隐县拥高山青琴堂虽增旧此意宜细评智调天下理夸言笑後生大弦可以急小弦恐弗胜举意属俄顷立言如所营手足民无措吏奸意相乘不如疎节目示以信与诚施行有次第幽远无隐情上下始相应温和亮以清子贱意不传仅许胜戴星彭令盖得此所以千里称此非以政学渊源甚分明行笑解印去衆心已先倾太守荐之朝一鶚飞青冥傍无蚍蚁援日夜思归耕我无荐贤柄直书气填膺安得采诗官取以彻明廷

送虞仲房赴潼川漕

我来丹丘乘贰车送客往往万里余盛山使君别寢久汉中郡丞今寄书公指四明喜邻境典

午何知成画饼扬旌忽作梓潼行去路六千抑何迴余杭名家多俊奇君于辈行尤白眉雍容
音韵足夷旷百家到手无停披向来郎曹天咫尺引山闽山接商舶贾胡叹仰清节高雾中亲
见越王石此行叱驭不作难手遮西日又长安长安日近公应往未放使星临蜀山不然一行
亦不恶潼川应如锦城乐邓侯功名凛如在拾遗风采今犹昨流马木牛诸葛公飞挽正欲修
前功蜀民险远日凋瘵抚摩要令畿甸同况公五絶追鼻祖隶古真有两汉风归来富贵固未
晚为传此学川西东

奉口遇雨

七月欲尽八月初天久不雨暑未徂下田焦卷上田槁愁叹不止田间夫呕哑水车日夜响漕
河扬尘成坦途喜见此溪深且广玄云忽起西北隅林间槭槭水沕起两岸人物欢欲呼未闻
滂沛润龟坼且使万物聊沾濡船牕飘洒疎篷漏客意自适凉襟裾引身东望云气薄未知帝
城有此无传闻今日方奏告便有响应来斯须人家百万苦炎燄君王斋祷几月余君王斋祷
几月余云师雨师其疾驱

游天台石桥

两龙争欲起深壑触破山骨成修梁滔滔共出一门去凛凛直落千丈强初疑鞭石跨沧海絶
胜乘鹄横银潢要须高蹶前峯过往叩山中真宝坊

攻媿集卷一

<集部,别集类,南宋建炎至德佑,攻媿集>

卷二

钦定四库全书

攻媿集卷二

宋 楼钥 撰

古体诗

史少师赐第赏芍药分韵得木字

帝城有僊山双径森万王洞户入深窈突兀见华屋相君领衆客红药想芬馥霜刀妙裁翦
臙点冰穀枝弱不胜花翠叶共斜矗向来争春风桃李媿粗谷百卉纷何在庭树拥新緑此花
丈人行俨立见幽独相君戴花笑和气俱可掬人言此花胜相君意倾属谁知心广大何物不
蒙幅岂以庭中花而肯弃凡木君看择胜具所可可追逐自言居闲时情话会亲族一花有可
观烂赏费银烛此心何拣择寓意本无欲以此宰天下以此镇藩服儿童与走卒人人歌相国
有能達此观春风四时足

送钱伯同寺丞守严陵

严陵钱使君丐外得请外府同僚相与饮钱於钱塘之津某病疹弗得预方得请之初某叹曰
去年送君来今年送君归君笑曰此节送行诗也卧病枕上口占

去年送君来今年送君归君善全去就我独念别离君是忠孝家袭紫传金龟门户二百年所
寄在一夔少年便老苍况今更险夷不独妙言语理窟深莫窥健笔照手泽典刑从可知向来
御祥琴欲把江海麾促召归旧班退食方委蛇世事等飘瓦人情叹然其向非浑金质百鍊岂
不衰浩然赋归欬洁身而去之为寮曾未几弃我忽若遗君既弃我去谪僊复追随陡去二良
友操袂重分岐前别易再会後见当何时才具素絶伦涵养日以滋且为牧严陵赤手磨疮痍
归来应不晚青毡当属谁愿君厚自爱岁寒尚相期

送杨嗣勲校书守眉山

我生东南陬不识蜀道难观君眉宇秀想见峨眉山汉廷射策时连璧照鸳班伯氏书万言逸
驾不可攀兹焉从君游颇得窥一斑僊凡隔弱水接辞良亦艰矧兹万里别望望何当还三苏
骑鲸去词章满人问岂无後來者遗珠有余叹愿君效乐全飞章達天关报国此最急余事付
等闲宜室行见思朝暮当予环别语敢言诗属联不容慳

送何道夫秘监守潼川

妙龄冠蜀士名声振王畿晚随召节来天朝增羽仪我昔倅丹邱鹿侯挂冠归羣公俱祖送见公四三诗颇恨着鞭先自言乞身迟拳拳慕下风直欲梦见之还朝挹高致气宇清且奇称者不容口往往同一词始见荷倾倒笑谈欲忘疲况当秋风高濫吹参试闱鼎脔得一尝豹班容管窥叔度真似道庄生信忘机亲疎皆不可况容磷与缁诸生得公来叹曰真吾师叩帘或三请响答了不疑私谓如此人定应备论思胡为归兴勇抗章气不衰鼓盆万里外抱孙更成悲拥麾东川去无人留孔戔别怀不自胜别酒听淋漓他时念老成追风且复西公能重来否此意非吾私

送赵子直贰卿帅三山

一蹴登从班人胡谓公迟建牙帅七闽人胡为公疑公今第一流志操古与期雨州有遗爱江西愴霜威重来长道山批勅兼琐闥一片忧国心辗转中夜思正色抗危言传诵满绅綏造膝有启沃削藁知者谁此心与天通此意上所知所以名愈尊万口同一词进用恐不速小却成叹咨天语自昭然更欲试望之况彼三山重谋帅皆衮衣兹行岂细事报政不待期登门恨最晚臭味忘贱微自慙空惜别不解留孔戔十连终敛惠居中乃其宜试问行道入但知望公归

玉版鲜次陆子亢郎中韵

鲟黄不减鲸与鱣迎风鼓鬣喷腥涎渔人不顾浪如山谈笑坐致扁舟前不钩香饵不得去何用大网相索纒挥刀纷纭脔肉骨巨口噉喁诚可怜珍鲈万瓮不论钱头颅万里赧行肩星郎日参玉版禅颇厌蔬食供盘筵尚书亲作孟宗寄坐觉匕箸生春妍却笑多事张茂先光怪异说空十年

走笔送僧义冲

一气行太虚流行纷不齐要之本无物洞然无是疑梵志有至言还我未生时烧了似不曾亦有毛僧词冲师名家子少年习裘箕谈吐霏木屑落笔皆珠玑自称十年来不复念作诗空门坐枯禅绮语知昨非闻之意已消谈笑到日西习气终未尽旧编还自携秀句堪供佛古作力可追爱玩不去手未免成一痴又欲上西湖驻锡来语离我生堕宿业笔砚置藩篱拔擢困胃肾未老神已疲几欲焚故稿要使清夷君诗既不化作何不等弃之万事都放下一意控玄机语罢复自笑无使高人知作诗固无用参禅亦胡为劝人反自蹈此纸何必挥不知两俱忘他时体体归

催老融墨戏

古人惜墨如惜金老融惜墨如惜命濡毫洗尽始轻拂意匠经营极深窈人非求似韵自足物已忘形影犹映地蒸宿雾日未高雨带寒烟山欲暝中含太古不尽意笔墨超然絶畦迳画家安得论三尺身世生缘俱堕甑人言可望不可亲夜半叩门寧复听三生宿契谁得知一见未言心已应岩倾千丈雪散空上有清池开锦镜意行忽发虎溪笑许作新图写幽胜归寻一纸

五十尺傳以硃胶如练净自知能事难促迫卷送松窗待清兴笔端肤寸今何如西抹东涂应略定何当一日快先睹洗我昏眸十年病

独旦葦次九五从叔韵

朝菌晦朔虽不知食之实冠东南味庾郎二十有七品一见流涎惊絶异擷蔬剪韭皆可却味苦应无夏虫避大阮哦诗声未了又索蒸芝今再遗迓来枯枿尚未茁拳拳颇媿台无馈倘容小摘寄情亲会见长髮见芹意

雪

丙午九月才入冬晦日忽惊雪堕空传闻都城更复早万官入贺明光宫自从开霁更不雨和气真似青春浓斗柄插子日丁卯夜煽裂缺鞭雷公从以雷霆至三四惊破蛰户纷昆虫寧知玄冥全未究翻手作云千里同暗牕初听洒珠雹巽二胜六方施工一日喜见瓦沟积忍寒待伴炯不融二日三日遂盈尺高润四海恩无穷古来诗人咏不尽巧思横出昌黎公少时奋笔不肯已老矣?手便疎慵儿曹作戏记昨梦舞狻猊踞金双瞳谁人若欲撩诗思更作玉山高数峯移将刘义两水柱晖映愈觉清心胸见之跃跃忽技养起呵冻笔寻诗筒开门一见天宇濶弃蛻百万飞长空琼楼玉宇满妙略干林宝树春玲珑恨无高台三百尺从观万象凌空蒙固知幻景有变灭一时如入崑阆中僊家俄顷閱尘劫安知此际非神功賸喜年来米价贱便欲扶犁随老农墙头浊醪走过来相与痛饮歌年丰

少潜兄真率会

昼锦坊中作真率羣从相过无俗物主人就树折杨梅醉倒薰风凉拂拂小舟傍城登雉堞坐看白鸟苍烟没须臾撑出洞天去杰阁三层高突兀樽前赋诗贵神速十分钝似辽天鹄从他银漏促残更要见林间红日出

送元声弟赴水阳监镇

吾翁积德厚九子官其六不幸失二人孤嫠纷在目三弟尚白丁升沈犹未卜吾人扶门户参立如鼎足脱死忧患余偏亲须水菽阿连先着鞭去去长江曲弱冠承赏延十载荷衣緑间关困家食才就五斗粟要知官无卑毫发当畏肃督耕两丈圩受输十万斛处之诚未易勉?直自勗执别动万感酌酒再三祝吾子素解自涉世要未熟意行须揆理言轻恐招辱王事究一心言玷复三复细行累大德陰财损阳禄岂惟赠尔言余亦每自慙公余稍有暇更取故书读行矣更自爱家声要人续

伯中弟生朝赋荼蘼

春日足风雨不知艳阳天桃李俱成尘懒上西湖船春余忽微和荼蘼发清妍池塘芳草梦况

复向阿连中庭月方午密林澹清烟蒙蒙青罗帔粲粲白玉钿幽欢久不讲羣从俱讙然银烛
烦高烧妃子浴温泉花以酒为名我以杯相传烂醉不复辞此会期明年

黄岩令郑仁叔索委羽洞府诗

君不见王君羽化脱寻厄故山至今名落翮又不见乌程野鹤投髦毛佞臣称瑞民斯劳何如
奉林控鹤凌青霄荡然委羽登山椒青衣出入洞方杳紫气氤氲风尚飘今君颇似丁令威鹤
驭久去双鳬归山川良是人民非一新琳宫还旧规黄山父老歌循良诵君诗句游云房更将
山名比坚操百岁犹能彻骨芳

青林

郡斋偶休沐驱车出西城依依山水佳潇潇松柏声雪余春意动新绿生?泓行行到青林老眼
增双明主人喜客来倒屣欣逢迎幽居迹甚遐健笔诗方鸣回首几年别千里摇心旌相见又
睽隔此意犹未平不如造斋阁四座酒重倾风流陶彭泽肮脏阮步兵看剑引三尺论文驱六
丁绿野秀横檻山寺傍连蔓石罅幽泉溢脚底轻云生诗盟忝予会奕道从君争哦诗谷禽应
列炬林雅惊清叹未云足累句忽已成环坐粲十眉举酒酬三英满壁洒醉墨归梦含余清我
方媿此集君欲寻前盟吏鞅才缚我秋风为君行

隐清

右军访文君遁迹入深竹我来寻歔歔人亡但空谷灵龟闯澄潭华宇对我瀑若人今何之尚
想旧茅屋吾闻古君子千载守孤独楚些不可招怀我怆乔木

送刘晋父监岳

济南刘夫子生来逢百罹乃翁负长才宦游至京西时当建炎间寇盗纷不齐转徙入湘广一
家屡阽危五羊买海舟万里向鲒埼舟破投永嘉有如鸟择栖哀哀老治中藁葬山之陲母家
在衡阳孤嫠往相依久卧漳滨疾羈穷命如丝事母以孝闻执丧礼无亏庐墓屏葷茹至行彻
丹墀有诏宠数蕃得官祇奉祠行年六十二霜髯照顰眉慨然念防墓千里来海涯西山如莲
华古今冢累累况此久宿草芜秽不复治孝思虽甚切冥漠何从催行道为兴叹智力无所施
有僧几九龄自言记当时君闻亟叩请东岗指荒墓吾师慕泓公少也从吾师墓中有版识仓
猝不暇碑素棺无石椁灰炭周四围君方感斯言鑽穴从旁窥其言皆可验自此不知疑惟余
盖棺木遗骨不堪移斲石表故阡遂塞无穷悲此僧老而壮斗酒如覆卮与君登山椒下上几
如飞竣事才数日溘然不可为孝感人益仰真有神相之君曰某不孝迂奉致失期未得如有
失既得滴滴颐嗟我诚寡陋识君顾已迟一朝来短札谓我从此辞皎皎真白驹安得施絜维
戴侯旧山长参语心相知谓余当此时颓风激浇漓世出世间法君方控玄机引证即牘语焉
用骀馵词衡阳尚寄书当有鸿鴈归後会渺无日为赋古别离

王成之给事囿山堂

烟雨望丽阳前山罗紫翠照水挹南明不与巾子对
竭来登囿山一览万山会莲城山固多此地要
为最主人意轩豁物景供旷快山椒涌华屋回立
风埃外一物无遁形所在皆鲜芥清霜肃天壤佳
树隔闐闐俯仰随取舍左右从盼睐门墙寻故步
杖屨许从迈恍然至絶顶更觉宇宙大樽酒屡劝
酌棃杯更胜败秋高月色皎浮云了无碍不俟攀
僊掌徒手吸溪瀨兹堂极崇敞意若欠深邃先植
易生木徐待松柏兑望远仍可喜意满聊自晦无
使山下人或得窥外内但恐趣赐环树艺或不逮
先生味斯言一笑相领解吾将饬园丁随我添医
茶他时遶扶疎吾庐益可爱

游初阳谷及白岩

重来游僊都止欲访独峯寧知一峯外佳境无终
穷何处颍川子镜岩便相逢约我游白岩轻舟借
溪翁斋余寻宿诺秋霁波溶溶清彻见石底鑱刻
惊神工昨登初阳谷但见石嵌空兹浮悬崖下万
石森巖嵒上有胜絶地古语留郭公鬼神谨呵护
雷霆扫尘踪换船到白岩修篁摇清风紫回进石
屋孤竹攢沙蜂洞府僊所閤无由辨西东扣船过
岩下数仞如崇墉石趾平如秋奇怪遮苍穹更寻
小蓬莱俯瞰冯夷宫篙师进深窈扞萝舍枯筇游
子非不多无人解从容我因一日留幽寻极山中
秋旻快排荡日暖如春融归坐独峯下石影横空
蒙急呼醺醪清浇此磊砢胸幸有济胜具未能上
金龙为君挥五弦决眦送飞鸿

夜游独峯下

峯背正白月舒光峯影横野万丈强仰之弥高立
卓尔蔽遮星斗摩穹苍半秋风露清彻骨望望直
欲随风翔归寻玉虚步松径月轮正涌门中央

送顏希圣尚书守泉南

圣朝宝运开虞唐太平天子垂衣裳恢张治具崇
儒良孰不愿依日月光用之则行舍则藏孔门贤
德遥相望朝望方隆位文昌跬步可到中书堂问
公拥麾何太忙公独三清志益刚俞音一下冥鸿
翔行李径出临涛翔争留公戮动朝行公更伛俯
不敢当老成全德真圭璋温如春风严如霜栢台
戢豸肃朝纲贤关之风士气扬大天小天称公方
五年吏奸盖而彰金华劝讲言加详明主倾听谈
皇王盍膺枋除任赞襄名遂身退天所臧明哲保
身身更康高风可仰不可量泉山壤土接临漳建
牙千里开封疆老龙负图宠煌煌何殊衣锦还故
乡贱子薄宦接王杨曾陪御史临文场风帘官烛夜
未央剧谈独记声琅琅兹来误忝尚书郎始寻故
步依门墙西风津头望归艎挽公不留远予将两
宫念公未讎忘公虽远去如在旁庶几重来上钱
塘夹辅大业恢中邦倘有重事须平章

陈顺之灵壁石砚山

陈顺之吏部灵壁石砚山中有双涧低处为砚下米元章题云唐弘文馆校书李羣玉有诗南唐李重先故物也蒋教授文会有诗次韵

名画法书环四壁中有米家真宝石壁峯森耸外涧流他物虽奇敢争席旧属半山老僊人佛印乞之如乞邻阿章有力负之走一时攘取成纷纭此石天然非琢磨是时有水生岩阿至今砚池尚余润岁月既久惜不多几年徒见士夫说一旦喜看形偃月傍连玉立两於菟主人照映冰壶澈陈侯之富可敌国会有宝光惊四塞呼童吸尽砚中水更为轻翻玩奇刻不堪回首江南李空唱多愁似春水不如此石千载传玉砌雕栏等糠粃宝晋得之真不易身後寧知亦轻弃只今传玩知几人当日琐窗空自秘端歎争名南北部勿向雷门扬布鼓铜台渴瓦更不须祗合觚棱?风雨

跋汪季路所藏修禊序

永和岁癸丑羣贤会兰亭流觴各赋诗风流见丹青右军草禊序文采粲日星选文乃见遗至今恨昭明字画最得意自言胜平生七传到永师袭藏过金籀辩才画秘重名以彻天庭屡诏不肯献托言堕戎兵妙选萧御史微服山陰行谲诡殆万径径取归神京辩才恍如失何异敕六丁文皇好已甚丁寧殉昭陵当时冯赵辈临写赐公卿惟此定武本谓出欧率更采择独称善遂以鑄瑶琨流传迨五季皆在御寝局耶律残石晋睥睨不知名意必希世宝毡里载輜輶帝昶既北去弃与朽壤并久乃遇知者龔置太守厅或云政宣间此石归绍彭又言入内府宣取恐违程焚膏继知晷拓本手不停叠纸至三四肥瘠遂异形南渡愈难得得者辄相矜我见十数本对之心欲醒汪侯端明子嗜古自弱龄锦囊荷倾倒快覩喜失声带流及右天往往字不成而此独全好护持如有灵尤王号博雅异论谁与评硬黄极摹写唐人若无称贗本满城南琐琐不足呈犹有婺与抚砮砮近璜珩右军再三作已觉不称情心摹且手追安能效笔精响摺固近似形似神不清不如参其意到手随纵横况我笔素拙何由望羣英近亦得旧物庶几窥典型此本更高胜着语安敢轻孤风邈难继怅望冥鸿征

送刘德修少卿潼川漕

清朝重诤臣选取妙一世矫矫刘御史一鹗胜百鹭顾瞻最有力步武亦严毅一生忧国心千古敢言气气足充所学文能行其意遇事辄奋发触邪无顾忌乘驄行且止斂手已知避但思补袞阙何暇为身计独立当雷霆三进气弥厉去鲁固迟迟出昼岂濡滞上终行其言羣贤挽挽致将输向潼川寓直尚书秘风裁仰清峻进退审难易伊昔聯周行睽违十余岁来为同舍郎愈笃金兰契洗眼盼腾上寧知揽征袂抗章叹高絶勇退尤知愧去无穷日力予环日月冀承君送道乡硬语吁可畏毋以此自满当为不止是临别提斯语少尽交朋谊万里句同心吴蜀安有异

次韵李季章监簿泛湖

僊舟共泛沧波去且向苏公堤下住西风吹就芙蓉城青镜闲妆两呈露皇家家法常俭素宸

心但欲乘商辂离宫别殿无兴作天以西湖共一豫吾侪公退得清赏酒醖棃杯不知暮深知
夕照恋狎鸥又恐听朝追振鹭自怜三人凤凰城岁月黄尘等闲度湖光正欲卷帘看风色更
烦褰幙护孤山不见处士庐司马空寻苏小墓酒乾人醉欢有余联骑还趋涌金路归路健倒
浑不知睡觉灯前裊香雾文人公子真冰玉曾为出游挥妙句匆匆借韵仅成章敢托尊前鸚
鵡赋

送杨廷秀秘监赴江东漕

平生杨诚斋可仰不可见去年尺一书老忽忽同传道山故僊伯再上右文殿蓬莱几清浅笔
力愈雄健独挟风雅翰孰敢当白战一官定一集流传殆千卷拙工见大匠有技不敢献谁持
所鬚篇径掣岩下电诵之百寮上慙汗几被面公今欲何之江左去乘傳鼻间长栩栩仕已忘
欣怨英英日暮云荐绅极追恋挽公不得留觴豆纷祖饯惟应三山高须公和江练君王念畴
昔临遣尤纒纒公乎遂来归密侍清闲燕坐寝淮南谋如彼雪帷见睥睨从容处侵疆归古汴

送曾无玷寺丞守池阳

我朝衣冠盛名家数三曾南丰暨颍川後起参温陵迺来骡川族駸駸着簪纓春风雁塔中参
差见姓名君才素穎出健笔泛纵横江右两壮县谈笑政已成河阳桃李花武城弦歌声入朝
八九载去拥池阳旌年家有旧好一见意气倾更因刘御史为君写先铭去年少省郎君转为
寺丞中都但交谒名纸空毛生惟因候宾庠接膝倾交情分陰尤可惜翻恐到履迎阿连幸为
寮庶几多合并寧知成勇退拂袖寻归程秩满素简静不足烦公行要当试盘错操刀新发硎
似闻有剧部或已荐长卿君其少停驂有诏来皇局

刘望之国録惠示文卷次韵为谢

君闻三峡江湍流下无底吾闻岷峨山耸秀且千里坤维气淑灵所产多名士高文既监然特
立亦卓尔久慕黄中刘近有贡公喜气从蜀士问人物定谁比少年负奇节论事如翻水万里
见张胡义激非气使贤关遂为寮八尺见英伟诸君皆敛避相与推德齿惠我春容篇句法参
子美再诵平生言作者真近似战国信徒劳秦贪不知止汉唐取与守反覆皆造理藩镇论加
详河朔分鼎峙词源既渊深浩博渺无涘从今使诸生教育均蒙被论议归正平辞章扫浮靡
古人去已远时母分彼此君其挽之回续弦须凤髓

饯李君亮着作守眉山分韵得翠字

天下大峨山雄秀盘厚地山虽不在眉所在拥空翠矫矫三苏公挹此淑灵气文章垂日星照
映盖一世李侯起广汉射策叩丹陛袞然出羣英东南藹名字来上着作庭行入甘泉侍胡为
把一麾西归寻药市吾闻此州俗乘法更陈义厚德坐镇之近古翻易治君家义槩堂活人百
万计老亲怀故山色养谨承志还家万里余赴镇夕可至不作题柱骄岂有昼绣意班班老莱
衣人间真乐事忠孝两无心出处固一致他日上思君命驾当不俟此别谅非久毋庸操征袂

送张定叟尚书镇襄阳

武部尚书张公镇襄阳士夫莫不惜其去昔韩昌黎送郑尚书诗韵必以来字祝使成政而来归疾去而愿归盖人之至情也而公自受隆委谓边事非可趣办愿加久任庶有成绩忧国而不为身谋闻者壮之某尝陪郎省钱别分韵得壤字未能措辞继又随西蜀诸贤之後始得详闻临遣奏请之言被酒夜归亟述长韵

公家忠献公勲名照穹壤南轩传圣学後进斗山仰尚书天分高百闻真朗朗日坐四益堂濡染助涵养小出辄惊世发誉自英荡两朝倚才办三接承睿獎堂堂尹京手风采汉张敞九街寝桴鼓终朝清讼龕污流化清沟開市锄巨馭铃斋昼无人士友厚吾党政成化自行浑笑挥浩穰皇家重阃寄拊髀劳注想颇牧起禁中帝曰汝其往人多惜公去地位切台两惟公不择地引义犹慨慷度更周询千里若寻丈再拜受临遣因得进忠说边臣固多事备御当素讲要须久其任百弊随剗礅愿假臣岁月表里如指掌人材固不乏第一戒欺罔朴拙胜巧心好佞寧不强愿求忠信士枉植谨诛赏更须寬?策奏请应如响上问卿何先安静最为上上忧襄汉间吴楚欠遮障公因论形势袞袞到逊抗是时晋在洛武昌势相向是为必争地南北谨堤防今虽居上游事与古殊状狂寇纵欲来无处可传向况今三垂静皇灵方远畅与蜀相倚角国势自争壮尚期效尺寸才疎意非广忠肝气凛凛秋旻足排荡上喜忧顾寬趣行开玉帙捐金示优宠谕赐烦上相惟公最得士离别俱惘惘荐绅纷祖饯直欲倾家酿赋诗写胸臆一一成技痒家声与国事负荷有余量边头十万兵公临如挟纊吾闻胡运穷羣酋欲争长不戢将自焚前轍有狂飈当为不可胜有和谨毋倡千载羊叔子制敌恢天网行将友斯人山川固无恙备成抚机动应烦护诸将功高归未晚会见登弼亮他时名父子继踵凌烟像

送郑惠叔尚书守建寧

十五年前送别诗道山持节向江西今年又见送公别大天拥麾镇闽越向来惜别固已深今日操袂尤动心尚书自是第一人气义相许披胸襟南宫平表平明入列辟传闻俱耸立壽皇圣孝冠百王三复高文天为泣擢处螭?宠数新果然百日掌丝纶拭圭修聘称应变握节不挠威殊邻直上银台尤振职李藩气槩时批敕嗣皇銳意新百度笔端真有回天力星辰听履冠文昌急流勇退惊朝行望之正欲试冯翊长儒寧肯薄淮阳孤拙自怜销壮志三入修门空负媿荐人不进终不已独赖当时言有味公在犹叹一居州公去无人为王留公乎行归佐天子肯休管晏卑微休

送苏壽甫少卿赴潼川漕

老坡送江直入海君今归寻江之源外台去乡若不远为持使节临潼川君家家世四海闻单于一问惊胡尘归来便合上清禁胡为日念横峨岷贤哉羣从传家风夕郎名节世所宗诸卿亦复载清德况君又似尚书公壽皇念旧久更深圣明亲擢传王音君归寧能及黔突定应召驿来追寻清猷入蜀携一龟君今数鹤同载归他时未免蕙帐怨人在西清鹤自飞

分韵送孙从之司业使湖南得千字

夫君静而敏十人已则千读破万卷书操笔思涌泉古事与今事一一探本源蚤蜚场屋声作吏志益坚竭来上清班汉庭在在先雍容行必书史馆躬檠铅片言寤明主立使登谏垣拳拳忧国心倾倒十三篇司成天下选归志已浩然赤日送妻子襆被寻豁船诸生慕阳城欲挽不得专竟持湖南节征袂何翩翩忆昨忝同登于今三十年朝行喜相会终恨非官联请益殊未餍匆匆启离筵始以长官来来以绣衣还书生素安分岂问却与前第惟公辈流自应留日边德星聚南楚予环当茹连事体有关系临岐欲无言

送王恭甫仓部知洋州

天清无云秋气明好风丛桂传芳声乃於此时送君行江空日短难为情蚤从两川驰大名眉宇莹彻春壶冰语辄倾倒心地平大篇小篇韶钧鸣壽皇一见喜不胜璧水边山照羣英潼川题輿远有声痛洗盐筴疲民醒天子呼来再登瀛典领着作承明庭絕域往陪苏子卿马上谈笑胡人惊归来期君侍西清胡为西去谋专城士友重叹君不鹰视此进退秋毫轻洋川风物天下称文翁流咏人载赓当时犹待羣政成君今未到意已倾岢峨大鰲秋江澄图史万卷鸥与盟残编断轴恐飘零数辈装潢手不停我亦重来预影纓三日不见鄙吝生况此操袂将长征欲挽不留鸿冥冥赐环勿惮万里程江山多助笔纵横黼藻王度扶中兴

题范寬秋山小景

山高最难图意足不待大尺楮眇千里长江浸横翠画家杂云烟懔懔徒意会苟或森三尺便若俗子对此画格律严兴寄独超迈洗眼映牕明妙处乃不昧流泉见原委着屋分向背推车度危桥指路向关隘轻舟最渺茫浦屿如有待山棱瘦露骨汀洲横若带木蒂黄欲脱秋容俨然在霜余无片云历历数沙界搜寻因力疲欲赋无可奈近山才四寸万象纷纳芥欲识无穷意耸翠更天外

江西李君千能和墨及画梅良斋许以三奇而诗非所长也

游艺无小大要皆知本原後人率意作终当媿前贤老潘妙对胶法从玉局传或假季心名空扫千鐙烟补之貌梅花疎瘦仍清妍折枝映月影真态得之天李君信雅尚二者将求全诸公竞称许试之乃诚然江西有诗派皎皎俱成编兹事未易窥属君尚加鞭

分韵送卢国华福建提刑得华字

卢侯场屋声天马腾渥洼残膏沾後人奇芬吐天葩来踏九陌尘去种河阳花向来再去国盛山建高牙平生长者誉静笃语不譁古井絶微波璞玉无纖瑕使星照蜀道惠爱流三巴吏奸赖刮磨民瘼烦搔爬田里诵虚公儿童知国华白首尚郎潜坐曹如如麻翩翩拥轺车去去向合沙朝行惜君去与酒相邀遮共登狮子峯巨石临啥呀卻来登湖边野梅访萌芽老柳扫黄

叶枯荷蠹寒茄碁枰战文楸醉?欹乌纱倚昔送君行相去万里賒荷君远寄书得得来东嘉一见又成别感念成咨嗟羡君径褰帷往戍不待瓜先寻上水船何殊泛仙槎作粥喜奉姊上冢仍过家此计正未疎所恨成天涯尚几或留行船鼓毋庸挝

题老融画牛溪烟雨

暝烟吹雨冥冥两牛半渡深清京尘久污巾履颇思归濯吾缨

慧元画寒林七贤

旧有唐人出游图谓宋之问王维李白高适史白岑参六人多画七贤不知第七人为谁或云是潘赵遥然未见所据病起坐攻媿斋元公忽作寒林七贤相寄余方梦寐故山见之洒然戏作数语谢之

羣贤俱诗豪世代不同处安得寒林中聯鑣睇相语谁欵创妙意臭味无今古吾闻顾陆辈寓意或如许桃李并芙蓉雪中蕉叶吐元师师老融淡墨扫风雨作此寄攻媿归兴渺烟渚旧六今则七未知果谁与我欲从之游讵敢厕俦侣画我往执鞭欣为李君御

李文綬和所赠老融诗复次韵为谢

邺侯插架书最多笔力雄奇天所命万人深中深闭门理窟搜寻到幽夔我诗无律如山讴形秽岂?珠玉映时时归入梦故山曳杖松间记投暝因君佳句撩秋思便欲归寻旧三径兼旬足痺不良行况复炎蒸如釜甑夜来一雨洗河汉檐溜涓涓清入厅晨兴剥啄谁叩门乃有同声喜相应读之恍若濯清风自觉昏眸怯明镜伊余何幸点班行结交往往多名胜夫君平处顾清新解道澄江如练净从今我乃得四友不特官梅动诗兴推枕裁诗谢高致扶惫摇毫心靡定旧闻读檄愈头风今赖长篇起衰病

次韵六和塔秀江亭壁间留题

江外参差列万山我家深在万山间好山正不用钱买但要未老身先闲长江比愁终似少江水能回愁不了扁舟何日过西陵鄮山佳处吾归老

跋袁起岩所藏修禊亭

怅望当时真蹟临慕所在支分千载但称合作谁能有感斯文

定本为世第一此又在定定前今日锦标玉轴向来不直一钱

送陈君举舍人东归

皇天生人物千载非偶然冲和兼万人始得一美贤夫君乃其人人一已百千飞黄欲追风况复勤着鞭文阵蚤奔放气欲摩青天短褐东海滨名贯斗牛躔闻道更独蚤自言若坠渊出登龙虎榜径上鸛鹭联中间几流落清湘穷泝沿自首始为郎一见意已传登临上麟台授简游兔园擢为柱下史遂居紫微垣去天真尺五朝纲赖扶颠龙楼阙问寝万口争进言惟君最涌决螭头屡直前危言破人胆三进加勤拳天高听亦高归决何翩翩高风激颓波同列空惭颜君虽未必去一去胜九迁我欲留孔戣有怀不得专况我自欲去何心挽归船嗟我生何为与君幸齐年先後才九日相与同气然几年若契阔班心忽差肩判花同代庖君思如涌泉上房草数制一房时一篇一篇辄高妙隗始媿余先春秋隐公传国史建隆编周官授大旨所得俱未全聚散不可料钱别沧江边君将处於陵我耕绵上田君行无疾驱中途恐传宣不然遂能别孤帆渺风烟梦魂不可制随君堕中川

次韵赵子野石城钓月图

石城江头可怜月曾照六朝清夜猎古往今来知几何长江衮衮萧萧叶谪僊去後诗盟寒王孙诗瘦清柔柔诗情浩荡坐无奈扁舟笑把礪溪笑江平风轻波瑟瑟宿霭卷空天一色东风吹句入长安一卷风流坐中得初得神意清再读胷次平回顾明月祗如故世上兴废徒分更想君一叶方掀舞夜静水寒谁与语船头有酒且孤斟莫向金陵重怀古

戍溪道中

寒潮高于埭黄流濯西河人牛俱力壮相与冲流过潮落势回御转櫂依丘阿暮霭起平楚陰云翳寒莎夜分潮复上櫓声相击摩大江渺无津不知身在何余生一虚舟兀然听风波吾亲白云下况尔方卧疴远游非吾事归矣毋蹉跎

哭表弟汪去伪墓

内弟幼而敏抗志欲决科一行试曹掾吏才犹患多谓当为时用舌在如命何通籍已难阻入幕终蹉跎我生依外家侵寻閱羲娥视君如同气竹马声相和少长联砚席词场深琢磨相期到晚岁杖履俱婆娑寧知五年别君随东逝波忆同戍溪行我马君乘羸马弩费十驾羸俊已倍过重来意惨怆树拥山嵯峨嗟君父与兄相望空山阿宿草埋白璧寒风撼林柯沈吟痛畴昔有泪如悬河

次韵蒋德要三径

居山或称囚得闲乃赋谪我方乐静退来作三径客西山致朝爽膏肓在泉石况当秋空静万里看一碧

吴参议達观斋

君不见大鹏与鷺鸕自适俱是逍遥游又不见大椿视朝?一修一短终期尽况乎秋毫为大泰山小莫壽殇子彭为天漆园老子超衆作立论虽奇定非矫鳬脰从短鹤脰长蜚触亦能成战场誉尧非桀两置之读书博箴俱亡羊世人颠倒名利途跻攀分寸争锱铢河伯犹惊北海若井蛙醯鸡何足诛试同万衆走城市跃马途行分贱贵却登高处望尘中但见纷纷如聚蚁暂高犹尔况真高神游八表非矜豪寧能高举去人世勿以役役随滔滔是知達人有大观蝶梦为周聊自玩翛然无入不自得处若终身仕成漫吴侯晚到东海滨饱谙世故无戚欣相逢一笑成莫逆似知我亦个中人

送姜子谦丞於潜

处则有超莲出则将哦松眉宇无一尘出处皆雍容君看妙莲花本出污泥中两松痛扫溉下有簿书丛污洁无二致喧寂本亦同於潜今畿邑蜀道里通通至今存古意民风尚醇醲一邑既当问尤宜抚疲癯蓝田文最高後学仰韩公彼言盖有激昧者但称工成案漫不省丞哉岂真聳姜氏太岳後夷门慕家风教子延名师列碑多儒宗官庠既开荒书种庆所鍾换桂双枝秀益见笔砚功後生日加勉衣鉢传无穷君才有余刃壮行气方充功名此椎轮劲翮看摩空我归幸同社基酒时相从尊前不忍别吟愁夕阳春我家老扬州五记有遗踪向来耕织图为烦访溪翁

送从弟叔韶尉东阳

阿连少也爽孤立生气焰壮年淬词锋倾心事铅槩胶庠困蠶盐世科终稳占再兴兰桂堂尔祖真不忝况将尉东白士友尚歆艳惟我爱子深老矣犹不厌固知为子喜颇亦动吾念赠子当以言苦口当针砭此邑子旧游历历数行店棠陰见郎君遗老喜窥覩其民最服义情伪靡容掩莫恃彩棒威要使慕巾垫子文多立就词采更华贍吾闻得隼者塞门差反玷前贤最加谨临用更重检他时可待取天庭得锦□吾家有素风耳目久濡染毋庸慕豪举助廉先以俭酒更宜戒平地有深堑酣畅当有时勿习盃潏灑将论母过高斯言却防玷立节母务奇躡等恐成僭外物思过分检身但多欠勿嫌一尉卑封清尚为廉仕途固嶮巖大要进以渐不须若求知真知奏应剡向来湖海豪四十可收敛寧为处囊锥莫作露刃剑匆匆操袂别鱼鲜酒方醺刮目待子归罔俾吾言验

攻媿集卷二

卷三

钦定四库全书

攻媿集卷三

宋 楼钥 撰

古体诗

送制帅林和叔归

使君一何清鹤骨天与瘦少年场屋声六艺饱芳淑一行起作吏所立已不苟立朝凜大节论事几及溜发言必体国平正无矫揉藜藿为不采风采照宇宙出入有本末眼见凡三就来不为苟合荐召乃结绶去亦不好高三宿除出昼天官岂不贵陈义坚素守赣川尝报政复来守鄞鄞不求赫赫名实出龚黄右情为千万端到眼辄空透抚民过婴儿间里息争鬪奸胥及强吏时用霹雳手人诵南山判情通理亦究六合俱帖静称赞不容口律身至严冷无能掣吾肘吏事精且勤呼烛侵夜漏公退入家塾诸孙後來秀吏卒不识面雒诵出牕牖几年南塘路来往困僵仆一朝平似掌行歌纷老幼公心信如水古井波不皱荣观处超然轩冕亦何有翩翩欲赋归排云屡腾奏庙论终不许斯民方借寇上心重闵劳词官向庐阜闔境极攀恋人人怀杜母君看卧辙人谁能使奔走挽须不得留百拜愿公壽老我幸同朝倾盖已如旧聯事东西省交情久益厚我归公亦来门户托云覆黄堂间参语惟我甥与舅扬旌鸣鼓吹赍此蓬荜陋清谈不及私翁归况不受义命孰不知践履或差谬惟公见善明力行真耐久有时相与言心同兰茝臭操袪寧忍别追送列觴豆公虽不好饮勉为引醇酎公去我亦隐菽水翻彩袖花溪渺何许望望几双堠千里共月明怀人重搔首惟应折梅花临风为三嗅

赋扬州伯父海陵

潜虬拔地径天矫腾挐势出青云表为谁犹向此中蟠坐閱春秋昏复晓团团圆盖月轮平矗矗苍丛衆星小枯槎当面结生香外有霜皮细匀遶乃知造化有神巧散觉樛枝穷树杪虽非直干栋梁材怪怪奇奇乐幽窈独秀海山临浩漾骇浪翻空云缥缈茁芽自有甘露滋弄影几经霜月皎峥嵘老气本天然後生矫揉何时了我家扬州真好事买归但觉千金少夜半有力欲负之护持和璧终归赵从来写照无髣髴画师欲快毫端扫解衣盘礴意惨澹卷起生绡色徒悄我来青边立寒峭自怜气与秋高杏倚筇一笑宾亦欢开尊相与倾清醪谓当好此如好贤为君三复緇衣笑时时来前看不足终待结屋平湖道

跋綦北海扈从书事诗

晋阳固自有高共奉天岂可无宣公当时扶日沧海东尚想健笔驱长风指挥诸将如奴童中

兴内相当推功终待毋庸詫诗工制藁具在銚坡中

送万耕道帅琼管

黎山千仞摩苍穹颢颢独在大海中自从汉武置两郡黎人始与南州通历历更革不胜计唐设五筦如容邕皇朝声教久渐被事体全有中华风生黎中居不可近熟黎百洞蟠疆封或从徐闻向南望一粟不见波吞空灵神至祷如响答征帆饱挂轻飞鸿晓行不计几多里彼岸往往夕阳春琉球大食更天表舶交海上俱朝宗势须至此少休息乘风径集番禺东不然舶政不可为两地虽远休戚同古今事变无定论难信捐之与扬雄四州隅分各置守琼台帅困尤尊崇高牙大口拥方伯鼓吹振响惊蛇龙汉家威名两伏波卢丁以来几宗工卫公精爽尚如生妙语况有玉局翁使君吏事素高了明若古镜磨青铜叱驭行行不作难平生惟仗信与忠布宣王灵万里外益使向化来蛮貊顽犷未率宜以渐勿示骇政先含容平平之策用定远下下之考书阳公吏臣生长固安土尚当摩抚如童蒙属僚宦游岂得已士多失职悲途穷名分尊卑不可紊更念何处不相逢官事既了两无间可使和气俱冲融乡闾惜别情所鍾临岐为倾琥珀浓手遮西日念远去欲留奈何鼓逢逢愿君稳度三合溜早归入侍明光宫

寄题高汝一少卿识山堂

庐山之高谁不识欲识其真了难得往来山中最亲切岭为横看峯是侧曾从彭蠡望山外识得山南昧山北山体如一本不动人苦求之愈多惑君构一堂据湓城香炉五老皆嘉宾莫问前後与向背面目还君多识真君今与山如故人慎毋忽作白头新堂中燕坐静且壽君其於此知吾心

侍仲舅同诸表游山

来游大梅山陟山几百重平行十仞冈俯瞰他山峯一步一步高势欲凌虚空左顾九地底楼台鸣鼓钟蓬萊反在下直恐船引风又疑海水竭洞见冯夷宫行行愈就顺故步寻苔封十年旧主人相对如梦中清谈虚阁上坐到夕阳春年来颇畏影掣身慕冥鸿入山非不深犹有行人纵安得更深处尚友荷衣翁未问梅子熟寧能瞰青松庶几适吾心余生得从容

大梅山

此山名大梅驱车入山麓试问山中人山名竟谁属禅家开道場为说梅子熟僊家指为岩曾此隐梅福或云古有梅其大蔽山谷至今二梅梁灵乡皆其族他山抗惊湍禹祠横殿屋三者尚谁凭禅师有遗族余皆不可辨安得究图録但爱山又山乔林间修竹

金峨漱石亭

溪声真是广长舌历劫谈空声不絶不知来自何处山一意倾东忘万折我欲漱石向水滨无

奈牙齿摇落频夜半寒声到客枕只疑身是枕流人

寄题台州倅厅云壑图

顷年登临赤城里江邊城中万家市治中寄我云壑图快读新诗眼如洗回思岁月如星流念
念飞空寻旧游披图哦诗想幽致直欲携筇上山头闻有於菟在芩蔚晚径寒鷗敢翔集几年
榛棘蔽颺颺一朝絕境从中出细路虽非五達康萦回自觉阻且长万壑风烟开絕顶一丘曲
折於中藏老砂射日银星炯梅峡含风襟袖冷千岩高下各异状如障如锋亦如领天景须凭
意匠营山不在高僊则名规樞已定力未暇他时会有滕王亭风涛隔濶天垂幕安得扣门应
剥啄吟诗梦到故山川睡美不知钟鼓传

王原庆新迁居南堂以古风求写恕斋二大字并石刻次韵

三槐诸孙有奇士才高特未遇时尔作诗犹能备衆体短章大篇仍杂拟解纷便掉三寸舌随
陆苏张何足比鵬鷖犹未离风尘蛟螭尚尔蟠泥滓平生曳裾向侯门豪杰闻风亲瞻企只今
交游亦凋落凜凜一身嗟独峙槐陰满庭渺何在久寓瀛壖成故里濒湖小楼太孤露何殊玉
川洛城里还来深入作郊居高屋好山成二美未能拔剑斩楼兰几欲袖椎摧晋鄙便将拂袖
武陵溪谁能着脚长安市西门性急佩柔韦柳子气高戕曲几衡宇全似归柴桑茅茨大胜居
儋耳我诗非工字尤拙荷子爱忘刚见喜夜来纵笔写恕斋自笑黔驴技止此更求古刻访少
作颇记醉中曾诺唯旧书纷沓费搜寻鱼钥未开尘事起呼童卷送三数轴仅可障风同故纸
新诗鼎来亟予和颠字敢追张长史不须更投苦海中一笑以还随弃毁径须?酒登南堂朗咏
白驹三四章

又次韵

投老归称前进士时与田夫相汝尔渊明赋归何敢望曼容自免差可拟门前爵罗真可设老
圃灌畦聊自比恕斋空洞最相亲笑谈颇觉清无滓时时过我共衔杯望望不来予为企丈夫
未遇困泥涂谁识鸾停兼鹄峙方期从容结诗社相与浮沈向闾里一朝别我欲远游欲入桃
源深洞里为言半隐欲偕行一子风流真俚美向来早有四方志行尽东南到边鄙只今名利
遂两忘争心无复於朝市祇有哦诗兴未阑连得新诗照尘几调高韵险不易和白雪阳春惊
俚耳年登六十髮未斑乘兴一人若可喜宗盟莫逆素相忘并轡笑谈无彼此湖海豪气尽收
斂以恕名斋几一唯匆匆操袂不得留卮酒未乾人欲起寄声半隐不容言空有语离书满纸
归时赓和必盈箱写尽山川诗作史送子才归深闭门莫问是非并誉毁但期远归亦升堂西
湖仍访老知章

送郑楚客司法之岳阳

先生作赋真八吟高处独步无古今少从三山来四明一衿士子多青郡我尝学仕六七载膏
腹沾句资之深窃名文场掌帝制至今不敢忘指南英英二子俱秀爽遗以一经无羸金长公

奉母上巴陵念君远去因论心见君诗编笔虽敏三叹未见朱弦音【○此下似尚有数句为传写者脱去】史清翁次前韵覓酒以金川玉女一枕瓶西安酒一斗送之次韵

社中日相从此意岂不真其初定要约深期往来频今年苦多故孤负四郊春清和到新秋其间足良辰而我独抱疴未能会嘉宾道人得玉友风味尤可人思与君痛饮欲招复逡巡忽焉得新酒亟遣径入唇别有酒一斗使使君意申我虽不敢尝为洗胷中尘

陈天成用东坡赵清献高斋诗韵赋适斋次韵

二公晚辞轩冕劳两斋莫辨适与高尝登云山仰清献平地着屋山周遭白头适过适斋下钓游尚想随儿曹方从家舅与俱隐野鹤谁能鸣九臯加我数年未纳禄解去簪绂甘同袍世间此事要识破差去不可容一毫颍川尉僂赋长句数寸之管烦君操欲追险韵继老老词锋尾銳真吹毛舅家见诗勉续貂长松相倚慙青蒿我今无复望禄仕不应招我更由敖

送元卫弟赴长亭堪场

阿连生而秀二亲所甚爱仲兄勤抚养遇时辄加诲干蛊静而办胷次无卑隘今焉?牢盆官宇临渤海毋谓官为小要使所居大母言才可了检身到纖芥我家门户重衣冠绵数代当以诚心求子视勿自懈亭民亦良民孰谓俱无赖官吏既扰之兼并责逋债熬波亦良苦乐岁色犹菜输盐不得钱何以禁私卖所在积蠹久良法寢多坏吾闻不无述更当审利害熟视不为谋空餐媿难盖不应行一切遽使絶称贷富者能寡取倍息久仍在贫者庶少寬公私可缓带母年登九十家居幸康泰其家不从政礼经有深戒幸子去不远时时可归拜小别不足惜轻舟送前迈

送从子沆宰鄆乡

小阮幼鍾爱长乃遭百罹风木既深痛棣华更纏悲所赖有吾子独立守家规上有门户托傍有孤与嫠忽为磨国行泝江秋为期冬滂与夏涨汉水足险巘操祛送子去风帆不可羈城中楮为币邑下尤可知定知公事少不必事作为用智正恶凿大道本自夷家无壮子弟宗族各天涯幸有知己人方且把一麾四海皆兄弟言寮善待之眠食谨调摄家务须自持俸薄用宜啬无使实漏卮此别动深念毋忘故乡思一书抵万金何时宾鸿归

送高仲远赴滁倅

高氏在四明於今为清门貳卿道素高夫人德尤尊子弟皆恂恂夫君更春温昔年奉慈亲定省严晨昏今日当门户有爱深弟昆伉俪信缘合端良由性根门中有孤嫠极意均抚存与我亲儿女次第了嫁婚不可解於心肯自以为恩不言而躬行後生熟见闻诸郎已秀发穎异有佳孙乡评共归重内外无间言公勤官业广所至治不烦僂舟何遽西行行佐侯藩环滁皆好山风月当平分醉翁与乐全遺蹟今尚存况有贤使君易镇方北轅公余陪嘯咏相映如瑤琨

生来仕平进自此朱两轡从兄今鼎贵螯禁兼掖垣君其继英躅复收旧青毡老我得投闲
平年接清欢同社操君祛恋恋倾离樽梅风吹溽暑祝君尚加餐

秋雨兀坐王原庆携孙吉甫菊花倡和见过有分遗之意次韵

五载杜门居海角无复及堦赋红药自怜荒径菊犹存夕餐空待秋英落眼明喜见绿丛丛始
也抽芽今满握扶筇着意养孤芳荆棘旁连细开斫天香入骨徐吐芬中有秋风非外铄传闻
南堂有佳种愿过屠门思大嚼颇亦有意欲见之此意未容儿辈觉乃知便许移芳根不止园
官供小摘要令壽客来骈肩何用潭水求延年有时采之东篱边不觉南山在眼前渊明千载
幸同调老我此际方悠然西风吹花日夜急散金坐看开田田两诗先到衡门下思向平台寻
戏马从君九日去行乐莫为登高泪盈把

送王粹中教授入蜀

王粹中教授赴新蜀帅尚书黄公之招万里有行古调一篇赠别因诵所闻以求益杂然陈叙
不暇较工拙也

万山四塞围平陆大为关中次为蜀我生东南未曾到蜀土游从闻颇熟自从襄阳上峻途高
欲登天下临谷女媧大山塞空虚麻綫名堆千万曲行人一升鹿头关下瞰平川如画幅幅员
二百四十里里出万縵民自蹙向来陕西五路兵退守诸关疆地促计臣权宜重增赋民力尚
寬随所欲尔来因仍七十年鬼不输钱无雨粟民生哀哉不堪命外若富饶中不足益梓尚有
繁盛夔夔峡穷民几比屋侧耕危获供税租饭多稊稗无嘉谷朝廷谋帅弄印久宣谕尚书剖
符竹尚书当今第一流翁壻相望冰映玉贻书挽君为此行古人义槩非流俗君亦慨然挈家
去操袪未免再三祝君行岂为温饱计一举高飞快鸿鹄丈夫生有四方志登览山川非碌碌
顷为假吏到燕山未行先取山经读所至访寻多得力中原至今在吾目北征西征昔有赋何
肯从行空逐逐子西尝因过岷山遐想羊公欲相沃关右放贾眼拔镞表留卒使痛溃肉试推
此意向前去到处前人有遗躅五丁开山果何在赞皇筹边言可覆剑门石角皆北向雪岭界
天望身毒高皇将台在汉中武侯八阵留鱼复栈阁绳桥世称嶮威茂渡竿来夷族李冰离
如底柱大宁盐泉若飞瀑四路尤多未见书买归何止三万轴黄松次功蜀檣机石湖居士吴
船録君宜豫考经行地却见所见书之牋幕中便可资筹策远业因兹增蕴蓄又闻渡泸不在
泸南在沈黎叩嶮九折是君家世尤当知艺祖按图挥玉斧大渡河外等弃之本朝独无南诏
患一语决定无敢违成都郡庠千白袍後来之秀日益奇周公礼殿岿然在画像盘古继宓牺
春秋奠谒用旧乐想见节奏并威仪谈经酌史各专门学问可以相发挥康节遗书有传者不
惜师问穷精微先天仅得十二三声音律吕无由窥更有异闻多细事试因余暇质所疑青城
大面访仙迹普贤多变穷峩峩街名碁盘路九逵江号濯锦如污池古栢参天二千尺水汧鼎
立三石犀药有珂贝说尤诡字书不见珥与桤金堂鸚鵡扫塔苍溪橘柚五出棣嘉陵梵像为
最巨阆州城南天下稀少陵入蜀往来久须行万里方知诗我慙寡闻言又拙君其更为加询
咨老我无复为世用但当杜门待君归归期未知果何时时寄尺楮寬吾思

山行归来喜栽新竹

平生好看竹每见觉相与小大或疎密一一皆媚妩恨无地可种所至造竹所近方辟门径得地寻丈许乞邻栽百个参差正当户天公有老眼惠以三日雨山行不厌泥但喜竹无苦归来报平安翠叶多楚楚不妨来子猷奚必希蒋诩何当遶扶疎岁寒与君侣

小溪道中

晚出城西门循墙过南境夏桥日沈辉旅店月成影纳纳出路遥聒聒水声冷敲枕拥衾裯乐此寒夜永

醉题鱼屏

五干买得见屏风白鱼相逐菰蒲中俊尾泼刺有生意旁人未易分雌雄屏後诸孙更雍容濺濺无数迷西东我虽非鱼知鱼乐乐处未必鱼知依

范牛

人问吾何爱一牛范僊真笔倍风流绳牵虽未如自放犹胜更着金笼头

白醉

陶内翰清异録首载开元时高太素隐商山起六逍遥馆各制一铭其三曰冬日初出铭曰折胶堕指梦想炙背金锣腾空映檐白醉余爱其言取以名阁陈进道惠示大篇次韵

处世难独醒时作映檐醉年少足裘马安知老夫味天梳与日?且免供酒事谪居幸三适得更惭愧向来六逍遥特书见清异君家老希夷相求谅同气曲身成直身朝寒俄失记醉中知其天不饮乃同意书生暂奇温难与纯绵丽

赠范纬文秀才

括苍范牛自题云中兴道士范子珉异人也淳熙间武昌罗端良使君远寄诗篇有赠画牛范秀才一诗爱玩不能去手时时诵之以写云亡之悲今十八年矣有范纬文叩门初谈风鉴旋及墨戏事自言视子珉为大父行罗使君赠诗即其人也既试其说草数语畧之

中兴道士以牛鸣淡墨百果尤着声妙入神品仍有灵我不识之钦其名曾得乌犍两横轴又有石榴才一幅武昌使君旧寄诗末言秀才乃其族忽有纬文来款门自言真是当家孙口诵罗诗若翻水他诗历历俱能言一见前画叹真蹟愿得生绡畚吾笔为作来禽对石榴一扫横枝生意出我诗不工人已陈有诗岂复能动人为君一写使君语更求知己如罗君

送陈表道宰南丰

与君出西郊送子之南盱子为名父子才器真璠璵乃翁老从臣循吏追两都益公工拟人谓比王仲舒积善必余庆於公大门闾子能传家学何止读父书执丧真有闻孺慕久不渝弹琴不成声西上何徐徐文场尝得隼一跌重叹吁通籍金闺中夷庚因少迂邑中有三曾声名照堪舆士夫秀面文比屋多为儒万里此发轫胸中有全模将别更求言老马从问途乃翁同注出亲谊崇终初以规不以颂不自知其愚民社非细事况此壮大区不饮第一策精神长有余以此奉尘刹以此当万殊何官不可为祸福皆在吾剧邑最为难谨畏可无虞试看悔吝者实惟予之辜民力久已困未免索税租欲如古什一攻琴难吹竽古意行今法自应知乐输有弊勿遽革有奸勿亟锄责已重以周检束到锱铢两脚踏实地处事随精粗顽不在斯民猾不在吏胥苟以明恕行久之定交孚为善无近名实着名与俱饮啄信前定富贵不容图三年报政成明时其舍诸老我世无用人情亲肯自疎尽此一杯酒惘然操子祛相依忽成别加餐意何如

陈天成诗多和陈坡韵兹因寄喜雨诗走笔谢之

一春垂垂困多雨虽曰如膏反成苦自知潦後必成旱果见晴天雨黄土连旬不雨已叹嗟滌滌山川云不吐未闻鶉鴉鸣屋角但有蚊蝇争振羽一梅无望望重梅旱魃为妖无术御闲居忧国傒云霓夜夜三星正当户君王侧身叹凉德云汉之诗无媿古避殿减膳率以躬已债纵囚真有补使君精祷尽诚意千里归心称杜母四郊神物招螭蛇所在疲氓加手抚风伯在今诚可讼已闻石燕空中舞时时小雨慰人心渴瓦流膏仅儿乳传言望日当通济老巫已得灵神语霏然三日果应期靡神不举谁为主河流顿已复旧痕良苗喜见兴南亩中宵愁念不成梦摩挲便腹眠清午从今一饱便可望坻京行见曾孙庾陈侯忽就春容篇径遣长须入城府叹君健笔今已老不草敕书招赞普坡翁相去已百年时出新诗追步武

六月十六夜观月翼早纪所见成长謡

海云涌立双铁山明月正在山中间初疑溪陂蓝田出水面又似长风吹度玉门关须臾云过月愈上太虚点缀从飞翻白衣苍狗不足究千变万态俱可观忽焉横卧如苍龙骊珠颌下光团圆山河清影见历历桂枝扶疎若可攀夜深醉到鷄鸣起光景不类居尘寰长庚睥然朝曦发望舒犹挂西林端我欲呼吸晶华驻朱颜左有金丹右玉丹昔闻两曜在天如磨蚁日行日止一度慳太陰行速朔必会金饼旋复成弓变八卦万物尽关系历古不已真跳丸急景恂恂难控抟但见霞彩生斓斑老我已复卦气阌学道无成空自叹不如安坐委天顺一听运化更循环

它山堰

它山吾乡絶境也屡游而不及赋近过其上得前四句而归季夏郁蒸午寂无事因足成篇写罢长哦遐想胜地寢觉风生两腋污垢俱清比之陵阳冷语尤为消暑上策也

它山堰头足奇观百万雷霆声不断谁把并州快剪刀平剪波澜成两段四明山深水源远衆
壑会谿长漫汗滔天狂潦不少留泻入长江势奔窜贤哉唐家王长官欲图永利输长算想得
惨澹经营时下上山川应饱看西偏千岭相属联惟有兹山拥东岸遂於此地筑横埭截取衆
流心自断斟酌利害不全取高下参差仅强半水大十分七入江徐挹三分供溉灌支流弥弥
穿郡城脉络贯通平且缓旱时反此水亦足坐使千年忘旱暵无穷庙祀报元?像设森严人敢
玩梅梁夭矫有冥助大患於今尚能扞前辈所作多神灵日月真成赤心贯後人小智或更易
费尽工夫随破散河堙壅浚谋不集堤断河倾流甚悍富民缩手人受殃仰望古人重兴叹老
木号风波湛碧画屏俯仰丹青焕更须积雨看惊湍濡足褰裳何足惮去家不远时一游短艇
垂纶流可乱八月倘有仙槎来便欲乘之沂天汉

林复之求为僧陈君举为写山谷与俞清老诗而和之次韵

归墨气何锐为儒意何阑劝沮皆不可要惟心所安何必收澄观强欲加市冠余看饮光衣以
次传阿难

送秦仲防制干

秦郎相家子被服一寒士不味膏粱珍嗜书如嗜芟仕途乐平进欲上行或止制使护瀛壖婉
画幕中试不避痴儿讥但欲了官事君贤他可及好善无与比公余仍进学访问无巨细片言
苟有闻必欲穷根柢一介有可观穷阎必躬履老我甘投闲衡门人所弃惟君异时好时来访
生死淡交久而敬清谈或移晷一朝语余别操袂不容已向来二三公颇亦同臭味去去羣欲
空今君又行矣欲归投金瀨尚眷甬东水结交多老苍要路有知己青毡我家旧勉旃取上第
先听传除书使我喜不寐别後未相忘母爱书一纸

送蒋德常宰鄱阳

某社颇寥落聚会多差参矧如夫君贤贵重双南金岂可无此君周旋相与深一别归未久征
輶又駸駸老我苦多病别酒难重斟操袂不可留赠言効规箴吾闻古番君甚得江湖心官无
崇与卑时无古与今古人乃能尔敛衽当致钦我亦一丈夫母谓力难任未暇言偃歌肯弹宓
贱琴明恕加抚摩细故多亲临网密吏易奸赋重民弗禁飞鶚怀桑椹烹鱼溉釜鬻此邦熟往
来当有慰黎黔君能践世科朝行仁朋簪公余昌远业书读松竹林故家未见书校讎如向歆
时时为寻访归来共书淫勿以三径荒间作庄舄吟勉哉赴功名莫待二毛侵数年倘加我寒
盟尚能寻

题家藏二画

一龙

老龙卧海沙觉来未欠伸珠光发海底闯然目有神画龙不画全必杂烟与云此龙未尝动具

见爪与鳞一龙望见之争心生怒嗔奋迅勇欲前便尔云满身不知出谁笔定非尘中人若非
亲见之何由写其真云涛方汹涌恍若渺无津为霖会有时正尔良苦辛乃知青云高不如寂
寞滨深虞或飞去什袭聊自珍

一虎

一虎弭耳行一虎立而顾猛鸷乃天资亦尔相媚妩媚妩尚耽耽况复逢其怒吾闻宣城包今
古称独步投老笔愈精利牙爪可怖方其欲画时闭户张绢素磨墨备丹彩饮酒至斗许解衣
恣盘礴手足平地踞顾盼或腾拏窥之真是虎捉笔一挥成神全威不露此其真是欤为我振
蓬户藜藿将不采何止警狐兔

送陈进道倅三山

陈侯少有场屋声岁在壬午联荐名晚年倦游安里居君亦怀绶归家庭齐年连姻更同社臭
味相与如弟兄一朝话别欲远去洗盏更酌歌渭城金沙乐土宜宦游或谓不减洛与京平分
风月信可乐人家弦诵几连薨岂惟帅阃赖关决定知秋闱望陶成西都外司掌宗盟须君共
二为之丞勿谓为丞但虚称享途要当自此升惟君儒雅闻簪纓种学岁久笔纵横奥篇隐帙
了如响清谈吐屑四座倾诗筒来往附邮传时出妙语人为惊梅花万树照山白荔子百种辉
空明九门雄尊盛官府三山森耸多地灵长乐一志书不尽平生颇恨未经行烦君杰句为摹
写远寄使我心神清

送姜子谦宰锺离

濠梁自古扬州域禹娶涂山城尚留锺离虽尝作楚县子男之国书春秋卑梁争桑起吴衅陰
陵失道除汉讎嬴秦属之九江郡典午置郡任愈优萧梁尤重北徐镇高齐又为西楚州贞观
割淮疆理失元和加水号名修阳冰篆虎书户册奇画於今照譙楼浮山筑堰谁与谋漫引童
謡为激沟役工沈铁不胜计欲灌壽阳为废邱雾昏三日水怪出一决空贻千古羞上格下格
果何在西濠东濠犹并流守边在人不在险险阻如故事不侔元魏拥兵数十万义兵坚守甯
其酋向来横涧一失据凛凛重贻宵旰忧刺史旧带两城使涡口两城今不在君侯妙年笔为
投名位诤肯卑微休世科高挹更膺仕哦松壮志未足酬欲効金城上方略宦游直到穷边头
三光五岳气犹分故疆慨想何时收邑事不足烦大手往访古今资远猷老我无用重多病为
君相与数觥筹棊社冷落故人少况复临风送行舟看君径赴功名会努力自取公与侯又闻
鱼台在近境谁知鱼乐如庄周烽沈柝静若多暇从容何惜观游鱣

送瀟丞剡川

工部丞崐邱我生丁巳年比吾既逾冠再转丞金阊年龄过半百奏子哦松轩亲见覲小物如
彼少壮然受输导行费略不取一钱飞糠至眯目犹恐劳弗宣汝方壮有室行行貳剡川地近
即便亲俸外有圭田惟当念尔祖奉职罔不?邑无不当问事亦不得专退无为避事进勿至侵

权庄生才不才其间要求旃去年苦旱歉谷熟殊颇偏未知催科时何取何当蠲一十七乡民
户口富人烟去天曾不远媿恶易以传大宁九十余父母俱华颠况子勤干蛊岂不深爱怜食
禄须尽瘁母叹我独贤不应频往来恃有檄可治时时寄安书何殊在目前秋赋已复近公余
更加鞭金疊喜接境一水通乡船他时尚少病尚能催击鲜

送王知复宰建德

筮仕一何早字民一何迟历历三十年中间多险巇宦途祗平进分寸穷攀跻最後官胄监一
蹴黄金闺祗由能自爱风鷁甘退飞宁为红莲幕往寻武陵谿亲党多劝止君去独不疑治家
有贤媛应门委佳儿安居舍大厦列屋闲歌姬风霜登客路单车如鸡栖勇决有如此端是英
雄姿有志事竟成不後一年期明诏趣鵷班壮县催瓜时赢得为君子否泰相因依古郡足潇
洒年来困征迫守宰俱贤明斯民其庶几杭苇欲走别有足如系维举酒向西望离愁渺天涯
惟君才素高邑若不足为谓难易将至谓易後难支老我百念冷安能效良规犹记簿领初过
庭闻旧诗惟畏为过寡惟勤无功亏遗训俨如在终身当诵之

题赵尊道渥注图

赵尊道制干以龙眠渥注图示余余曰误矣本韩干马东坡曾为赋诗者此龙眠所临而以後
为前俾易之为书坡诗於後而次其韵马实十六坡集诗云十四四岂误耶

良马六十有四蹄腾骧进止纷不齐权奇倜傥多不羁亦有顾影成骄嘶或行或涉更相顾交
颈相靡若相语画出老杜沙苑行将军弟子早有声中间名种鸡羣鹤无复瘦疮鸟暮啄当时
玉花可媒龙後曰去尽乌呼风开元四十万匹马俯仰兴亡空见画龙眠妙手欲希韩莫遣铁
面关西看

题高丽行看子

高丽贾人有以韩干马十二匹质於乡人者题曰行看子接处黄绫上书韩干马表饰以绫尾
以精纸皆丽物也闻有怀金来取因命工临写而归之再用东坡韵书临本之後

竹批双耳风入蹄霜鬣剪作三花齐相随西去皆良种撼首势甯迎风嘶丹青不减陆与顾丽
人传来译通语装为横轴看且行云是韩干非虚声圉人乘马如乘鹤人马相语同呼啄中有
二匹真游龙爬梳回立綠杨风贾胡携金赎此马亟呼工人临旧画我诗无分到三韩写向新
图时自看

跋李少裴修禊序

唐文皇之赐韩王有崔润甫之题为可考若李重光拨镫书断然无能效之者其为真笔何疑
朱徐开皇之记则已见少裴之辨开元去贞观未远润甫又职校定四部图书以为最善本则

真善矣辯才之本既殉昭陵今世止以定武本为第一又出欧阳率更所临石本自应在墨迹之下则知此本信为冠絕盖希代之宝也然考之新旧唐史崔湜弟液洙及从兄淮并有文翰居清要液至殿中侍御史液弟洙明皇用为秘书监出入禁中後赐名澄如此则液为湜之亲弟而为秘书监者洙也又宰相世系表博陵安平崔氏仁师相太宗高宗次子擢擢之子液吏部员外郎第四子挹挹之子湜相中宗湜之弟洙秘书监如此则液为湜之从弟又不为秘书监传之与表已自不同而洙之亲笔乃尔於是知作史与考古之难也因并述之仍赋长句以副少裴好古之意

兰亭修禊永和中羣贤高会俱雍容右军作序亦寓尔藁草乃致传无穷自言疑若有神助他日屡书终不同历代传宝在秘府尤其甚者唐太宗当时搜取极心力摹本一一颁羣公惟此真迹最奇絕萧梁开皇有遗踪亲御奎文赐元嘉龙蟠凤翥何其工辯才所取秘昭陵此本一洗凡马空崔家兄弟列清要晦子况复称龟龙图书四部资校讎当时尚有贞观风白云此为最善本冰衔臣液题甚恭李王深得拨鐙法笔力絕劲雄江东右军以来皆妙笔名胜异代如相从病余扶惫行扫松李君携来为发蒙平生多看旧墨本一见使我开心胸摩挲叹息不自已至宝盍入明光宫隐居怀宝正不恶异气或能牛斗冲叩门有客勿倾倒恐有御史来乘骢送郑楚客司法之岳阳【○原本脱去此首据集目在本卷第十二首今从他本録补於此】

先生作赋真八吟高处独步无古今少从三山来四明一郡士子多青衿我尝学事六七载膏馥沾丐资之深窃名文场掌帝制至今不敢忘指南英英二子俱秀爽遗以一经无羸金长公奉母上巴陵念君远去因论心见君诗编笔虽敏三叹未见朱弦音海滨熬波幸解组未知宦路多岖嶽先生赋编更熟读非止骈俪夸词林其中关键妙一世字字谐协如鸣琴谈经况有诸述在持论肯为向与歆青箱但能世其业前躅隳轨将駸駸君家曾无锥可卓迟次幸此突不黔不惟母老身非少廉介又务循官箴量入为出可不谨斤斤饥食寒有衾非求多藏第约已瓶储纸裹迹可寻法曹持平守三尺平反一笑神所临谨毋失已毋失人同列当和时盍簪上官善事免旷职首上尻高宜致钦岳阳楼号天下稀地圻吴楚连衡郴洞庭漫汗天立壁君山当中出青岑向来命名以楚宦游直到重湖浔登楼谈笑领僚属风流欣遇贤候任君行应得江山助新篇寄我毋浮沈操袪欲言不尽意更取浊酒从君斟【太守任洙道原】

攻媿集卷三

<集部,别集类,南宋建炎至德佑,攻媿集>

卷四

钦定四库全书

攻媿集卷四

宋 楼钥 撰

古体诗

赵资政建三层楼中层藏书

危楼杰立潭府雄仰望惊瞿何穹窿擎以八柱真良工恍如水天移海东扶阑三级横复纵八牕交映光玲珑更上一层迥不同历览万象俱空蒙东南太白金钱峯西山千叠青芙蓉环遶不断如犀风平畴弥望禾芄芄城郭市井聚螳蜂烟树高低知几丛澄湖一片磨青铜潮来江涨银在熔海市三垂属提封四山寛围城在中地平楼小望易穷安得高卧陈元龙丽谯公府难从容二阁均在道佛宫江山得助无遗踪眼前突兀忽此逢主人干国成栋隆鼎彝久书柱石功名遂身退兹明农卜筑深静依高墉百间朗朗罗心胷咄嗟不待馨鼓冬最後奇观凌虚空牕户未须湿青红似闻卢陵周益公亦作此楼高于崧相望落落见两翁心匠不谋如影从我欲效顰意方浓一朝登眺若发蒙不愿侍公饮十锺不愿舞女纷歌僮挿架三万牙千重此身愿为书蠹虫不然相陪夕阳春与公凭栏送冥鸿

再题行看子

先引护栏球子骢九马远近俱相从黑驹騊黄骝素骝亦有笏面仍银骃夏国一种青于蓝五明错靴皆如龙或骖或引恣驰骤坐觉隐耳声珑珑人间安得有此辈一一必自天闲中不惟骨相异凡马圉人贵介多雍容三花翦鬣自宫様空鞍更以香罗幪中间二者盖天马齿虽已老气尚雄不知几出横门道双立柳下青陰浓擻缰捩颌刷背膂旋梳鬣尾摇清风人人生意马欲动态度曲尽各不同韩生去我几百年藻色尚湿青与红不知何时堕鸡林万里远在东海东贾人携来得寓目一见絶叹丹青工千金可买真不惜忽复携去何匆匆亟令临写得形似如此神骏那得逢开元内外马盈亿色别为羣从登封韩生所貌定杰出七尺为騄八尺駉向来莺边系金绒归乘款段头已童伏枥宁能忘千里却笑区区据鞍矍铄翁

寄题吴汉英玩芳亭

吴侯奕奕天分高历记万卷无差毫青云垂上忽归去年来益收湖海豪志同三闾时则异玩此芳物亭之臯视彼憔悴亦何苦鼻间栩栩忘郁陶诗文满轴寄海峽灵均细论无乃劳与君齐年况同袍祗今衡门没蓬蒿有芳可玩便自适草间野卉时一遭藟芷辛夷兰杜若未暇一一追离骚【诗文皆以屈平异同为言】

送孙子祥赴新昌主簿

高士不为簿子严论独殊不遭何不可而况主簿乎夫君岂其裔南明筮仕初要知官无卑禄可代耕锄正须勾小稽使民能乐输矧复兼尉曹鼠窃随除驱两职去民近亨途此权舆君诚吾里秀质厚素有余埋蛇有阴德映雪读古书起家决儒科乡评足名誉妻以兄之子相与久相娱小别不足惜未免掺子祛邑境连台剡好山环四隅二子丞邻封川陆通舟车乘舆或一往径欲造庭除公余想续文尤当惜居诸会看兴公赋掷地金声如

送□丞上虞

我老不复仕行将挂衣冠两子俱贰令官职恪一般剡川且书考上虞亦之官人言易捧檄归奉重亲欢我意正不尔期汝政可观食焉怠其事古训戒舍镒汝职与民亲簿书当细看一邑无不问正尔良独难江海市三垂长堤扞惊湍埭高几如山潮至不留残宣和有遗迹能使潮浸滩陂湖谨蓄泄可以救旱乾长沟济漕运浚治令通宽此皆丞所职勿惮心力殫江头有东山永怀谢家安邑有李与丰况复居二潘尚友更从游问学加研钻平时固知汝廉谨无欺谩涉世终未深送汝能忘言故乡去帝乡舟馭多往还失已固不可待人亦多端罔求违道誉善遣非意干穷达自有时此理真如丹聚散不足较岂得长团圞闲静我所便汝其自加餐有时或乘兴往来二子间踏雨送汝行浮家当游般走笔如家书谁能苦雕剜

送伯中弟尉新喻

伯父盛德人伯中实暮子不惟能象贤气貌亦相似幼日读父书结字得皮髓粹然金玉姿少日期千里宁知游上庠蹉跎困门第晚始着青衫酸寒就一尉歛然报瓜时往戍真乐事自惟羣从希惜别不能已中年重离别况我衰如此亲故例作恶况复于吾弟兹行岂得休雅怀聊漫仕勿惮三年留江南富山水尉曹官虽卑去民最密迹一日斯必葺职务毋少弛善保金石躯离觞且同醉归来毕婚嫁相从期暮齿教子以义方忍贫授经史素业俱有传进未见止大儿方决科如摘颌髭耳子尚徐其驱中途聴捷喜

送张子宓分教澧阳

澧阳渺何许远在天尽头顷为郡楼记图志不可求王侯録故实颇亦费冥搜忠以申明着学有车公优外挹兰江水下俯僊明洲读书记羣玉采药思浮丘况得子厚语谓冠汉南州见谓颇详尽丰碑照城陬可怜城与楼百姓不知修乃知尚有遗家传载邳侯张君将客授盖尝叙其由为我谢澧人聊以遮前羞君家世为儒青箱袭箕裘太玄泊潜虚探蹟深可钩君才兼数器博洽谁与俦南庙推第一鵬鹗快九秋得官愈嗜学手抄不能休馆殿要人物衆宝登琳璆演纶及视草如君真胜流兰芷生顔色暂烦为远游君方俟瓜时相依意绸缪樽酒接从客诗篇更唱酬论文?今昔析理到孔周老我澹无伴掺祛不容留别乘澹庵子倾盖当相投公余文字饮能思故人不

送周君可宰会稽

作邑诚匪易况子之稽山银茜视两赤朝家知其难鼎鼎数万户赋重民生艱山陵五云飞办护力更殫豫买万世弊法贪至于残越人瘠已甚当馈几发叹名臣为竭力減額宜少寬不齐物之情兹事终变翻箕敛及鷄豚诡户多容奸竟未得要领导条令何其烦通才善治剧南康遂通班诚心试求之要使後可观古仕不出乡习俗皆素?东嘉尝客授寻乃乘朱轡略如仕故乡非意不得干况昔摄邑久疾苦知民间故吏想犹在疲民知长官宜若差易牙未免送以言权虽与正同事体终两般趣办不计久为真事多端遇事勿生风三思庶能安试登寬简堂取我前碑看六一真格言坐右当铭盘向来难奉母版輿今似潘外尽抚字劳退公悦慈顏莲峯声望重待子兴门闌勉哉发政誉行矣闻天关

钱清王千里得王大令保母甄刻为赋长句

书家千载称兰亭兰亭真迹藏昭陵只今定本夸第一贞观临写镌瑶琼黄閨冈下得宝墨古人烧甄坚于石大令亲书保母铭况是当时晋人刻甄虽破裂文多全妙画远过兰亭镌其间曲水悲夫字駸駸欲度骅骝前我家阿连缚虎手更得退堂方外友王君系出三槐家参坐会文真耐久田丁初来献小砚寻见津津若微溜细看背刻晋献之永和彷彿在傍右亟访田家叩所从始知墓崩随意取大甄支牀得前段掀倒浮屠全尾首字为十行行十二百十有七二字漏交螭方壶不复见贞石摧藏松亦朽我得此碑喜不寐摩娑三叹叹未已兴宁甲子十四周更閱三年仍乙丑若非洞晓未来数安知八百余年後坡翁应未见此志金蟬之铭何絶类又知文章有暗合智谋所见略相似二王遗踪无所遗谁知地下此段奇三君共为成胜事至宝呈露端有时越山盘屈献与羲付与儿孙世守之烦君更为护幽竈或恐意如犹有知

赵资政招赏川海棠次袁和叔韵

少陵千古诗人杰每见名花辄题絶锦棠无如蜀川盛见说千林天染纈大篇短草合无数忍对此花舌如结黄鹄衔子万里来春光颇向东南泄棹间老子携春归移石郁林表高洁崇桃炫昼不足言红艷烧林疑益烈棠梨小红自退聽不待骚人定优劣两登蜀道归海滨一琴一龟全晚节嘉招容我到花下春酒新筇公自挈攀翻乱插入共醉十二金钗不成列袁安参坐为长哦同气相求磁石铁不须高烛映红妆佳月自能明作哲红潮满颊卧林间风流谁敢来分别

泉口净明院昼寝

沙头古招提往来几经行兹来当春昼解衣愒西楹玉立青琅玕小牕虚且明纸帐白如雪牀輓枕更平偃仰四体适欠申困思生须臾右脇卧径入华胥城无人梦自觉閶然四无声林间婆饼焦悠悠时一鸣翻身更从容意泰气亦清连朝走丘壑百拜不遑宁老我久倦游幸兹息营营衰相益已迫世念日愈轻自欣天与闲身是半髮僧未能遂高隐庶几保余龄

赋蒋生若水番马图

何处驱来良马六骝黄参错如花簇胡为不作腾骧去各有游缰繫前足胡人下马俱少休背倚毡裘眠正熟酋豪拣箭奚奴捻意欲射鼙不遗镞琵琶横倚续续弹一夫坐聽胡中曲卧拥提壶将引饮英气虬须皆贵族沙磧坡陀高复低天寒不见寸草綠我行燕冀颇见之狼帽乌靴乃其俗勿云恃勇不知义要以赤心置其腹呜呼安得壮士健马咸作使坐令戎虏为臣仆

陈表道惠米缆

平生所嗜惟汤饼下箸辄空真隽永年来风痺忌触口厌闻来力勅正整江西谁将米作?卷送银丝光可监僊禾为饼亚来侔细剪暴乾供健啖如来螺髻一毛拔卷然如蜃都人髮新弦未上尚盘盘独茧长縑犹轧轧盱江珍品推南丰荷君归来携来东知君正直如羔羊贻我素丝踰五总僊禾本出从嘉穀色味俱同无饼毒鼎深熟煮葱豉香大美元来加胾肉有时饭素笔以蠶馋口属餽味更奇束皙一赋不及此为君却作补亡诗

卢甥申之自吴门寄顔乐闲画牋

年来吴门牋色泽胜西蜀春膏最宜书叶叶莹栗玉贤甥更好奇惠我小画副开緘粲殷红展玩光溢目巧随研光花傅色湿丹绿桃杏春共妩兰桂秋始肃赵昌工折枝露华清可掬妙手真似之藏去不忍触苟非欧虞辈谁敢当简牋又闻乐闲君古篆颇絶俗并求数纸书寄我慰幽独

题申之寄示春郊画轴

郊原膴膴春意足细草凄迷芳树綠雁鹭无数泛陂塘牛羊相与随刍牧几年不泛浙西船恍如苏台俯平川闲人忧国无他策但愿好雨成丰年

六言问天池宝华

昔年曾赋虎丘犹恨灵岩未游天池之景絶胜宝华有水倒流老矣不复西去梦入陶朱扁舟烦君为我寻访能以新诗寄不

赠成都鲁讲书【焯字叔献】

君家江发源我生瀛之壖相望万里外中间几山川近闻今子敬文价惊鸾鹄何由梦见之失喜瞻在前幅巾耸英标衔袖出文编倒屣平生欢剧谈河汉悬老我三入朝广识两蜀贤相与论诸公与君最周旋自言隐青城读书三十年城中竹谿居肥遯远市?清谿拥屋後綠树环前轩一舟号横雪可泝复可沿拂衣下三峡非为名利牵灔澦追古作海潮赋新篇旧依棹闲公来乘甬东船顾我何所取有怀俱尽言老亲苦多病尝药冀少痊佳客不容留欲着归驂鞭间

为恶草具愿君少流连报无锦绣段赠有朱丝弦一别无复会掺祛意茫然蜀山渺何许同声惟杜鹃

赵资政当山堂

我公仁存心乐山心如丹平生经行处不厌行路难青城及大面万叠连百蛮扪参仰脇息亦尝坐长叹功成归四明得地数亩慳城隅路穷际小桥水汪湾萧条渔家市中有屋百间危楼俯人世一看山四环堂深无他景犹以城当山城荒披绿莎青青透棹间秀润长满门坐对无跻攀日夕气亦佳飞鸟相与还终日看不厌徙倚十二栏有如拥泰华管窥见一斑况兹绿成阴连朝雨潺潺浓翠真欲滴秀色几可餐我家但环堵穷年困弯跽出门得旷远遥碧罗烟鬟有时碧云涌半空耸高颜须臾辄变灭欲驻良亦艰美公得佳趣容我游其藩悠然时见之重门勿令关

风琴

渊明有琴本无弦白傅偏喜听人弹不如空中风度曲随风往来声断续非宫非商从君听不中律吕无亏成大如角韵来孤城细似蚓窍苍蝇声华亭夜鹤圆吭清颤动长引寒蝉鸣或疑凤咮叫霄汉又恐僊佩云中行使具似曲无别调安得自在声泠泠蛙喧尚谓胜鼓吹牛鸣犹以黄钟称丝不如竹亦漫语赖此七窍俱珑玲幽人院静新凉生八风不问来纵横短簟六尺午睡足拂拂神来传广陵

送袁恭安赴江州节推

袁氏四世凡五公唐朝三相传家风君家九代擅儒业高曾艺苑俱称雄大父谦尊古君子诸父名高表吾里一门子弟更竞爽挹取乙科自君始九江需次今年去去淥水依红莲忘年论交正相与叱驭欲往难流连老我秋来抱病久临岐无由置尊酒祇从卧内叙离怀恋恋掺祛仍握手鹏程万里兹权舆平时义方师有余送人以言古所重虽诵所言宁启予君看公孝与孟博太守坐啸仍画诺一郡之政赖关决千里应须念民瘼乡州义事烦主盟纤悉于余无隐情处事条理亦为政知君出仕当有声尊公亦手闽中幕公退着书端不恶君才更得江山助简书既练寻家学君行远业未可量弟兄丹桂终齐芳老諄无庸况多病尚能留眼看翱翔

赵南仲寄王朴画猫犬戏为之赋

□髣两狻猊胡为到庭户细观画手妙摹写真态度意足谢繁笔不待丹青污乱扫腹背毛头足巧分布彪也如愁胡眉攒眼光注岂惟足生髯垂耳纷败絮掉尾固自若狸奴为惊惧侧耳寔畏之冲目犹敢怒诚知取形似不吠亦不捕对之辄一笑聊用慰沈痼

朱季公寄诗有怀真率之集次韵

伊昔羊尹临丹阳真率之名初滥觞香山尚齿当会昌卧云不羨坐岩廊七人各列官与乡年德俱高世所臧丙午同甲遥相望清谈生风想琅琅耆英人物尤轩昂赋诗远追白侍郎文富归休壽而康衣冠十二何锵锵吾乡五老如雁行至今月旦尚推扬家舅仕宦接王杨眉壽遂及渭水姜我如伤禽趁鸾凤忽惊骑箕归银潢向来雅约犹宝藏菜羹草具烹彘肪四皓中间有夏黄蕩蕩义风夸句章年来抱病久在牀同社阔别如河梁君尝远宦踰沅湘又向封川憇甘棠瘴雨蛮烟暗桃榔何时归安朝士坊忽传新诗几生光敛衽正色而寒芒诗境几成破天荒徐为续貂未须忙静揣归期应未央归纵未衰亦老苍暮年甘与子同裳何事相望天一方吴少由惠诗百篇久未及谢又以委贶勉次来韵

江右一世称名公首出刘惔与王蒙自高直以天自况何止数仞言高壖虚声一传实何在但知景附而风从我朝诸公门户濶普纳万象如虚空羣才俱入大鑪鞴铸人端如金在熔又如东君一布令白者自白红自红岩岩千载玉局老少年径以吾道东首干乐全次六一三公自是燕许宗奏篇六论初流传四海一日俱承风其间杰出六君子香薰班马犹为浓涪翁又分江西派作图序次由本中哦诗作文各务实荐鄂不愧北海融坐令文物掩前代主盟岂非诸老功固知文气僵湜籍亦许诗律沾徐洪宛丘诸黄接前辈宜有此甥风味同蚤尝决胜翰墨场笔端豪健谁争工新篇句句多洒落妙画字字真玲琅惜哉生晚百余载欧苏之门久登龙尚兹蹉跎未濶步吞舟之鱼沟岂容我方投老与世隔映牕爱景方瞳矐十年屏居可罗雀何人来顾一秃翁俨然衣冠见吾子文书衔袖名自通向来两卷余百篇讽咏至今未能穷更携大篇如拱壁刻画无盐赍孤踪人言霜蹄骋夷路我今秋水凌三峯爱余过厚拟前良此事如何着得侂老我不入杞梓林峰阳高隐如孤桐平生习气扫欲尽只有媿处着力攻子归求之有余师惟知叹息锦绣胸时时杖屨许来往庶可岁寒相始终龙潭丈室一笋穿入露满其上因赋之

一笋入屋照座寒凌晨仍有清露漙益信露珠自根起正如真水潮泥丸厦屋不应为汝穿不肯屈节斜倚栏干霄拂云已在望且复自保青琅玕

旱久无水王伯容分惠桃源大谿泉将以长篇水至已雨走笔次韵

七十老翁门昼闭终日萧然无一事却因不雨动衰怀拥笏黄堂与祠祀兼旬旱涸舟不通井泉欲竭知无计僮奴抱瓮叩比邻水不得清仅无滓旧时见说横谿源有水侧出万竹前考之尔雅名丸泉颇思走介分微涓去之一驿不易到午暑坐想空垂涎不知何人剥啄叩我门惠以小罍童稚惊相传启封一勺挹清泚烹试茗碗真增妍况当精祷已孚应三日檐溜倾潺湲病中一笑诚莞尔城闉安有泉如此吴松四桥思陆羽白帝城西歌子美何用中 取扬子已觉清甘水入齿前人所品殊不定一下一高随所喜老我住世能几年引饮一瓢几子渊行见甫田取十千坐使远近俱安然欲和大篇不觉沈吟久击鉢成章慙敏手

送萧宰富阳

富春富山水地胜雄三吴壮哉十万户畿邑拱行都大江横吾前上下万贾趋吾子丞剡川掇

事奸已鉏试县力愈难勉旃立规橰治县古有谱近颇多着书棹闲爱汝厚海语皆良图老我不惜别所望安官居汝亦颇练事正恐才尚疎我以热肺肠有求应所须遇事费十思一跌真不虞虽当从心年兢兢矩不踰况汝年方壮勿恃才有余据轮始窺井任诞宁失居三年待汝归二亲真倚闾

又送从子灌

二孙吾所爱别去殊关情阿剡将赏延伴子性亦灵烦子善诱之他日使有成公余松竹林共勉雒诵声

寄题林宗山巢龟

彼泽之陂蒲与荷有美一人伤如何洁清如许岂不好纫兰缀葛何足多七十二钻无遗策不灵于已徒遭厄人生何用千岁为愿似巢莲足清白

送赵仲礼守天台

棹间社稷臣卷藏经济手功名付诸郎秀出诸公右大见倅东嘉洗印去未久次子镇赤城急流去何骤二者皆为亲欲奉乔松壽况有戏彩堂可继清猷後邻封尤便养荣侍各锦昼春风扇微和安輿云出岫家传吏师法从政于何有还归鸳鹭行金印当系肘向来尝佐郡山川若僚友南渡多北客风味中都旧士夫喜公来纷然送马首其中多故知颇问老夫否

赠相手文李道

生有文在手纵横殆天予其间动成字往往传自古舜褒梁武武老十子贡五季友太叔虞仲子竟归鲁仲弓有鈎文宰我亦握户敏士自文雅习道本因辅邓渊彭城符琐琐不足数李合陶士行三公皆定数白帝矜奇瑞见笑汉世祖何为言祸福历历如君语自言传希夷妙处胜貌取见手知国封况此细纹缕研油燎梅檀始见掌中房何如一覽顷坐谈乐与苦老我缩袖间不复烦推步子其访城中英杰在何许

跋余子壽所藏山谷书范孟博传

山谷晚在宣州或求作字山谷问欲何书则曰惟先生之意山谷许以书范孟博传或谓南方无复书山谷曰平时好读此传遂默诵而书之旧闻此说又知在上饶大夫家愿见不可余子壽来入制幕博记善属文偶谈及此又出摹本及尊公跋语始知其为先世旧物也爲赋长句

宜人初未宜於人菜肚老人竟不振承天院记顾何罪一斥致死南海滨贤哉别驾眷迁客不恤罪罟深相亲攘攘不容处城闉夜遣二子从夫君一日携纸丐奇画引笔行墨生烟云南方无书可寻阅默写此传终全文补亡三篋比安世偶熟此卷非张巡岩岩汝南范孟博清裁千

载无比伦坡翁侍母曾启问百谪九死气自伸别驾去官公亦已身虽既衰笔有神我闻此书久欲见摹本尚尔况其真辍公清俸登坚珉可立懦夫羞佞臣

叶处士写照

顷在朝行叶处士光远为余写照置于山林中欣然自赞有云山林如许盍归去盖志于归也一归十三年既挂冠再寄一图为老人星状形容变尽非复固吾矣戏作长句谢之

我老旧曾官日边随衆年除仍岁迁母子日夜望乡国但欲共耕绵上田弃官写照妙一世画我形模在山水有如虎头貌幼輿正合置之岩石里犹记有客为谀言盍更野服为貂蝉我笑不答心不然拂衣径得归林泉归来岁月不知久十余年中何不有此心炯炯尚如丹只为幽忧成老丑久矣与世俱相忘荷君念我应老苍新图白髭添一二岂知双鬓皆成霜两图对挂耿相照顾盼从容成一笑更添松竹作壽星我已甘心就枯槁人言姿态与真同如照止水窥青铜明知已非故吾矣小孙指点能呼翁君居天街号称首侯王生面罗左右边头飞将新立功飒爽英气照牕牖名满四方求者多千金造门君不呵能事固不受促迫应酬虽繁可奈何胡为有暇及衰朽楚楚装潢意尤厚我今已是行路人不须重累丹青手

送宣宗禹保宁军掌书记

宣之为姓世所稀暇日试为君家推宋之宣公舍与夷子孙相承此为基或云出自鲁宣伯元和姓纂言则非西京功臣虎与义侯封累世皆宗枝盛哉云阳宣巨公光武称其胜二龚鄴为司空怀在赵遥遥久矣无亢宗君家本自太未来世以儒术为家风尚及瞻识诸父行君方髻亂成孤童艰难历徧屹中立五行俱下攻时习自从一登贤士庭贵名日起人谁及舍选真似青铜钱一跃龙门浪三级吾乡惊喜破天荒归见朋俦愈谦抑宝婺古郡名浙东往泛緑水依芙蓉如君入幕假途尔及今民事宜加工亨途万里才发轫掺祛勿使金樽空从今家声当愈大坐使宣氏崔卢同

攻媿集卷四

卷五

钦定四库全书

攻媿集卷五

宋 楼钥 撰

古体诗

林和叔侍郎龟潭庄

林和叔侍郎永康别墅龟潭庄以蜀中乌丝栏为寄使赋诗而书之

顷年曾记游花谿宗枢潭府谿之湄徘徊其上叹秀爽宜有英才瑞明时岩岩林公天与奇劲气不为金石移少以六艺鸣上庠游宦所至英声驰澜翻荐口彻旒冕通籍直上黄金闺出宰长城如卓鲁至今遗爱人歌之入朝一冠御史豸台纲振厉先光辉光宗圣度如天度俾承旧制形宸奎言所当言公不屈上书抗直深倚毗历居三院上横榻首尾独击及四期擢居小天不肯仕远指章贡把一麾政成召节不旋踵神与清涨促公归代言批勅节弥励藜藿不采非公谁竟以松班分制闽海邦虽陋不鄙夷抚摩赤子厘一稔功利及物难周知公方在台我立螭台省相望心事齐皇上初政公赐环我居青琐公紫薇时平论事同努力寄名雷霆如恐迟我求外补径投闲公亦出关喜相随受?亲见贤郡侯攀辕卧辙同旄倪公时自谓二宜去吏民犹诵三不欺棠阴蔽芾勿翦伐万人来往城南堤书来不复说余事颇言别墅躬鉏犁频年日涉愈成趣去家三里共游嬉首崇御札极尊合又以副墨登之碑非欲自诧稽古力铺张圣德彰仁慈犹记殿上争挽衣咫尺龙颜犯天威坐以汉法当粉蠹廷臣就列仍绅綬篋藏常裾不容毁如以折檻存轩墀公严十袞我书榜老臣追往空涕洟吾闻一潭浩深绿上有怪石形如龟是为古丽最佳处地藏天作公发挥大谿横贯地坦平演迤明秀山四围十峯历历可名数余如芙蓉耸天涯独此一山亘里许中立壁峻难攀跻堂名娱老正东南比汉二疏公庶几海棠炫画遶栏檻细数嫣红遍繁枝杂花满地秀而野何殊迂□居洛师千岁灵龟巢莲叶祝公耆寿登龐眉桃花源杳号霞隐木奴霜後黄金垂深可藏书旷可射初篁细香临月池狎鸥渚边鸥为下观鱼梁上鱼不疑悬崖石横笋斜出拒霜为城媚清漪公既垂车弃轩冕鸿飞冥冥不受羈超然但欲适吾意抱瓮直欲心忘机我虽未到景略序尽録无心图画为花朝月夕景何限想见晴好雨亦宜落霞孤鹜映西日多少空翠仍烟霏此虽见之咏不足强欲着雨是耶非两守宝婺行或止无由往叩山中扉旧闻赵公访欧阳千里命驾如吕稽清风明月两闲人万口犹传乐府诗我虽挂冠病双足颂系一榻当炎曦荷公虽若鱼相忘尺书时来自緘题屡索鄙书懒未暇又恐境胜难为词兹来督我语益峻远寄蜀绢栏乌丝为吾赠诗仍就写欲待相好无时衰想像试作高堂赋身知难往心欲飞才固不多老更尽况此病瘁神亦疲不如及今为公作语成不工不敢辞两家子弟向後日庶几二老同襟期

次韵黄文叔正言送日铸茶

龙图正言年兄寄日铸贡品且以东坡诗中妖邪奴隶等语为病使为直之既与佳客品尝比平日所得者絶不同仰叹鉴赏之精也细观坡公和钱安道寄惠建茶诗一时和韵反爲双井所牵後在北方和蒋夔寄茶则云沙谿北苑强分别水脚一线争谁先又云老妻稚子不知爱一半已入姜盐煎人生所遇无不可南北嗜好知谁贤死生祸福久不择更论甘苦争媿妍则是此老初亦无定论似不必深较辄次前韵聊为日铸解嘲以资一笑

古人养老食而醕後人既饱须啜茗唐称阳羨顾渚茶惠建之名犹未省小团花????番云龙竞巧争妍动天聽要之造化生万物甘苦酸盐适其性古来水品多异同茶品知谁得其正芽新火活善调汤种类虽殊俱隼永坡翁立论亦疲当一贬一褒何太猛北苑固为天下最未必余茶尽邪憤越山日铸名最高种在阳坡性非冷父老不堪痛摧抑待以奴隶心若鯁草木端有地所宜此品标奇惟一岭祇应杂取应人须寢使虚名成画饼坡公殆未识吾真真者如珠光自炯白头拾遗辨真贋非是容心为乡井寄来双缶妙絶伦病□新尝信侥幸七盃自煎成水厄笑看腹似支离癭

长生草

我方髫髻时已复见兹草仲舅尉江阳奉亲顔色好牕门挂经冬珠丝罩轻縞意为霜雪残白花乃明臬世间三友外此有岁寒操年至十七八童心如木槁随时到柯山逢人细访考买之野人手何须访蓬岛尝为伯氏壽作诗颂难老经今五十年得自江南道老我日就衰岁月岂长保一笑哦子诗犹将伴梨枣

又次王?叔韵

仲冬方寒荔挺出仲夏方炎靡草死若将朝菌北大椿相去何啻千万里金芝僊草不可见长生之草略相似少时曾识青青色今日得之乃真是天工矜悯轻丧生故出珍苗普相示若言神僊可学致自是未得养生理人爲天地最灵物野卉无情犹若此石间薜荔水昌阳卷柏生崖并葛藟是皆草中号长久未见悬空解葩蘂柯叶不改耐岁寒土着青松那可拟不须丹砂访葛洪毋用僊方传李耳未知此种谁为传乌有先生子虚赋

寄题阆风刘允叔月波

浮海思乘桴拾月或挂席何如阆风僊渤海坐中得隐几时观澜黏天四无壁清夜水不摇孤蟾净沈璧飘风一过之波光湛空碧万顷玻璃田荡以黄金液我欲从之游尚恐一层隔何当携珍茶石井试余滴

题杨子元琪所藏东坡古木

东坡笔端游戏槎牙老气横秋笑揖退廉博士信酷似文湖州

同倪正甫尚书游西湖

灵芝寺临西湖倪正甫尚书曰此湖如贤者别久再见俨然如昨感其言而作

旧说西湖比西子君言西湖似贤士吁嗟契濶十五年一日相逢只如此南山北山两高峯春波灩灩摩青铜未能荡桨穷胜处倚栏一望开心胸老我挂冠隐田里岂知再见烟连水小须夏日醉满荷脱屣东归甘已矣

赠犁春谢耕道

归耕十三年此来殊欲然一犁正春雨君行欲何处我方买红船重归寻旧?君亦早归来勿荒负郭田

访李国器于包山同登寺後山庵

访客包家山相与登层巔嶙峋巨石中屈曲扶栏干夜来雨初过石罅时涓涓轻輿到冈头大江横吾前亭午潮方盛千艘散平川道人茅三间花木罗後先竭来汨京尘旷望为洗煎山断塔层层西陵渺苍烟此道走邯郸归心更翩翩

谢林德久正字惠诗次韵

老我甘投闲晏然十三秋兹来何所似反衣狐白裘京尘素为缁梦想思首丘低徊未成去龟勉终自羞久闻歌楚骚欲见知无由诗文惠盈轴一诵消百忧便当细论文夜雨同春葛平生万事了此去复何求尚贪未见书痛洗千斛愁得此不翅足携归老先畴

次韵东坡武昌西山诗

说论一兴谁可回贤路荆棘争先栽窜流多能擅笔墨囚拘或可为盐梅雪堂先生万人敌议论磊落心崔嵬向来罗织脱一死至今诗话存乌台凭高望远想宏放眼界四海空无埃黄冈踏遍兴未尽絶江浪破琉璃堆漫郎神交信如在石为罍樽胜金罍邓侯先曾访遗迹铭文深刻山之隈山荒地僻分埋没二公前後分莓苔元佑一洗人间怨天地清宁公道开玉堂同念旧游胜笔端万物挫欲摧时哉难得复易失弟兄远过崖与雷北归天涯望阳羨买田不及归去来我为长歌吊此老恸哭未抵长歌哀

盛山十二诗俱在石刻而不见于诸公集中唱和之盛未有如西山者旧轴既不知所在後來跋语亦仅存録本尔辄不揣和韵以寓吊古之意仍效周益公用翰苑印章重叹二公俱曾佩此也

次韵雷知院观因诗因叙家中铜像之详

鼻祖家住江东边推择为吏心静渊朝朝趋邑过圯上时见暗磧光煜然平时奉佛心至谨建立塔庙崇诸天试令便介识所在退公始得来其前挥鋤去沙若有物微见铜像伤其顛须臾衆覩全体见端严相好巧且坚迎归供养备精洁我家旧物犹青毡铢衣飘摇俱梵相珠缨垂袞穿淮蠃虽非丈六黄金身他处像设无能先不知何人妙陶冶?用五色增华妍自兹累叶永为宝如以衣鉢更相便是时承平最盛际正在景德咸平间画工难貌天人妙劫风不动神光圆益知佛教来已远徧满震旦尊金僊慈悲无量应成涛影响若与人周旋耳则闻音目可观此有妙理谁能诤宝光焰焰拥身後贝花叶叶俱成全顶戴天冠工莫及中有一佛立不偏有孙是为乡先生决科衣冠遂蝉聯大父持丧久庐墓曾以此事形碑镌起身月卿出为郡殿上寤主以一言易守乡邦凡五年宠光赫奕当政宣移至湖心值兵毁精庐灰灭因亡焉初闻诸父话遗迹兴叹欲见无因缘扬州伯父初赋归慨念孝感如参寥零丁募以十万钱里巷响应庆愈绵木工先为小台殿居以古像小之旃後人事之加笃敬日裊香篆长蜿蜒衰宗幸有此奇特信知福利非唐捐安得东归奉香火晏坐终老甘三椽

桃园图

夷坚丙志载桃园图画事甚详曾茂昭尚书以所藏墨本题识其上後见遗余益信夷坚之说
不诬作长句以谢

桃园初传武陵谿靖节作记人不疑其先深避嬴政虐嘉遯与世真相违尚不知汉况晋魏子孙绵远无终期正如三韩有秦语传为神僊愈难知桃园洞府渔人窥别有天地均四时意必志者塞其谿不然将为世所羈後人想像作图画但见耄稚咸嬉嬉人家随处成井市畎亩颇亦分塍畦井鬼不照坤之维方士异人多崛奇筠笼二版坚如铁能刻景物穷纤微净室给以酒盈斗一昔图成了无亏同寮欲求第二本版忽震裂人已非夷坚作怪言历历何意今乃亲见之未知桃源有此否此事茫昧不可稽初疑长房缩地脉又似照影归摩尼巨丽写成阿房赋牵连貌出连昌辞采女细数七十二人言霓裳舞羽衣楼阁玲珑在缥缈其间恐有太真妃刻画工巧世固鲜磨以岁月或可为彩鸾唐韵已甚捷未见神速能如斯尚有渔舟傍阶迟咫尺安知前路迷天圣已踰三甲子何人宝藏至今兹南丰丈人惠墨本老眼增明失昏眊固知凡踪不可到一梦游僊犹庶几秘之十袭何以报赠子相好无衰时

吴山井

寒泉堂道流王德正屡求吴山井记而临安图经所载甚略无可考证赋长句以遗之

钱塘东南一都会西湖宛在高城外凿为六井引入城唐相邺侯功尚在吴山横亘城中央左右江湖尽襟带寒泉迸溢清且甘发自灵源匪分派天目两乳龙凤来秀气所鍾此其最海滨斥卤润作醎安得一泉独滂沛四朝驻蹕八十年民聚五方真衆大抱瓮桔槔万夫汲飞泉仰流筒吸快大旱不乾潦不溢数里頽肩竞分卖人言神龙宅其下济物阴功至今在川泽固多

资灌溉此井犹能济闾闾皇家德泽如此泉福祚与之俱不改

代书寄内弟耐翁总干

我昔生外家半世犹相依至今连墙居日日相闻知诸表如羣从休戚真同之耐翁生而秀爱惜从儿时文采既俊发吏才人共推低徊久选调每每为叹咨兹行佐王人未到声已蜚邮置屡得书论事语益奇使长首推荐婉画多所资近观会稽编分析及毫厘益知足心计荐书徧诸司正欲助才选非敢请以私惜君年欲侵正以远大期得书再三读惘然增愕眙非所望于子所言何背驰江湖两路间弄兵分潢池羽檄以时至庙堂日三思调度供军需发兵币四垂吾事诚可虑彼亦安能为岂曰白头贼指日当诛夷使子任贼冲尚望羽扇挥如何隔千里遽来奉檄归长沙屹巨镇洞庭渺无涯鄂渚屯重兵上游藉兵威当思深远谋胡为先自萎此言及同寮必为人所窥归以语闺门徒惊妾与妻无端使稟议在此何为辞望子置私忧志立官无卑张巡起县令力拒百万师逆徒哽喉牙蔽遮赖涣澼韦寛守玉璧臧质全盱眙丈夫立节义有才尤当施杀身以成仁致命须见危读书不念此万卷终何裨但当安义命前定无参差勉哉尽所职造物不汝遗况复受国恩当与相维持今子仕高沙偶然脱危机正须加义方岂应使同斯向也未得禄遑遑不自支既入红莲幕图进亦其宜今日宁为民此乃无聊词归来事若定又思登王畿胸中空扰扰祸福不在兹倘能悟愚言便可知昨非着枕必安寝食淡甘如飴老諄非强聒鄙见不可移少安常毋躁通籍看金闺

题汪季路家藏吴彩鸾唐韵後

旧说僊人吴彩鸾日书切韵归毫端不应神速有如此令人至今疑稗官相传此事三百载谁知真蹟俨然在笔精墨妙信入神间以朱丹倍晶彩法言初为此韵时臆衰文字觉後知宁知遂经谪僊手讳字曾阙民与基经生矻矻尽精力摩以岁月或可得动翰如飞犹恐迟一日一挥出心画神僊之说云渺茫僊凡配耦尤荒唐箫史弄玉乘风去蓝田空说容裴航文箫之遇真是否岂比虚名传不朽五篇历历为全书始信传闻是真有当时所直才五缗于今千金价未均十年盖有数百本未知几本传今人惜哉字画太纖细後日传之知几岁祇今已有字不全欲镌翠珉固非易我踰七十方见之暂借一观聊自怡平生愿见心便足何必更谋身後为隋开皇初陆法言与刘仪同等八人论具音韵烛下握笔略记纲纪至仁壽元年始成切韵五卷比之前人韵集韵略音谱等书已不羣矣後有郭知立等九人各有增加惟天宝十载孙愐唐韵最着今世所行广韵则皇朝景德祥符重修遂至二万六千一百九十四言而集韵又在其後也今以广韵较彩鸾所书东有十七而此本止三字同有四十五而此止十九公有十三而此止于八蒙有二十七而此止于十二注文亦多不全况法言及愐二序今该立于唐韵之前彩鸾所书既名曰切韵又首书法言之序则其为法言之切韵明矣传记已误曰孙愐唐韵今亦多以三书为一或至谓广韵为唐韵而彩鸾能书之是皆非也且五篇其四皆于其首书凡若干韵而于上声独阙序中辛得源偶言旁有阙文後人遽以东字足之为谏议非也盖谂议云

题汪宏辅三马图

玉花流云照夜白开元尚想行九街韩李郑君俱已矣健笔谁能如顺斋

枢密府雪後作故韩氏子舍也

平生好流水雅欲临流赋涧谿或过之眷眷不能去青山围故乡不肯入城府宁知开八表重来寻故步势家遗故居传舍偶成寓轩楹立奇石巉岩高丈许三面立屏障曲沼水深贮荏苒将半载未见有时雨新春积雪余檐声夜如注晓起推闲窗石穴水喷吐下穿玲珑余数尺成瀑布髣髴小龙湫虽微体略具退公辄对之相逢欢迟暮有客与同赏酌酒更告语虽云京尘深燕坐得幽趣悬崖挂长藤絶顶列佳树微风一披拂坠点纷无数吾方谋乞身信美难久驻未能写成图聊用赋长句

谢文思许尚之石函广陵散谱

余好弹广陵散比见周待制清真集序石函中谱叹味不已念无从可得文思许尚之中行云家有此本後自武昌録寄深叹雅尚又以知然诺之不轻也因作是诗以谢之

叔夜千载人生也当晋魏君卑臣寢强駸駸司马氏幽愤无所泄舒写向桐梓慢商与宫同惨痛声足备规橈既弘濶音节分巨细拨刺泊全扶他曲安有是昌黎赠颖师必为此曲制昵昵变轩昂悲壮见英气形容泛丝声云絮无根蒂孤凤出喧啾或失千丈势谓此琵琶诗欧苏俱过矣余生无他好嗜此如嗜芡清弹五十年良夜或无寐向时几似之激烈至流涕素考韩臯言神授托奇诡别姊取韩相多用聂政事近读清真序始知石函秘贤哉许阿讷自言家有此文君昔宝藏人亡琴亦废荷君重然诺写谱远相寄按拍三十六大同小有异此即名止息八拍信为贄君远未能来我老从此逝何当为君弹更穷不尽意

韩文公聽颖师弹琴诗几为古今絶唱前十句形容曲尽是必为广陵散而作他曲不足以当此欧公以为琵琶诗而苏公遂櫟括为琵琶词二公皆天人何敢轻议然俱非深于琴者也丁卯夏秋间尝有一词謾録呈所谓激烈至流涕者也

正声第一拍名取韩相第十三拍名别姊又一本序五拍亦有名第一拍名井里史记刺客传聂政軹深井里人也刺杀韩相侠累为姊曰荣韩臯知叔夜之托于神授以避祸而不知名拍以聂政事又以见古有此曲也鲜有知者故及之

王叔达以尉彭泽潜玉洞述见示

书岩已奇甚潜玉尤伟哉李君漫盘谷元子空岵台神不得自秘天应为君开渊明如得此应不赋归来

题董亨道八景图

钱塘怒涛天下无谁将尺纸为新图贺家湖上如镜净屡向烟波逢钓徒彩虹横卧吴淞上洞庭一螺浮具区亦曾泛舟彭蠡湖插立千剑名大孤庐山高哉不得到历历五老聯香炉上鍾下鍾夹湖口半江清浊泾渭如多景雄据金焦间夕阳微照海门山其余知名不知处赤壁但歌前後赋江汉至鄂始合流黄鹤楼前鸚鵡洲潇湘见说青如染道林岳麓横清秋我欲远游嗟暮齿蝶梦翩翩漫千里但欲絕江寻越山归老故山吾已矣

鱼计亭

平生信天公颓然不作计顾我虽非鱼想见亦相似潜深本其性鱼亦非有意浮阳或在渚不能终自秘或为饥所驱危机在香饵轻丝引纖鈎性命困刀几鱼以味得烹我以名自累安得两相忘容我从此逝

跋卢申之所藏韦偃三马

名画记言韦鑒工龙马妙得精气从子鸚善小马有小马放牧图传于代思陵亲为再书尤为可宝申之求诗感而有作

嗟哉马之生驰骤乃其性一为人所羈寸步不得骋局促闲廐中专俟圉人令调服无踴啮始可用朝请战骑冒锋鏑或致陨其命绣羈非不华金羈号为盛青黄木之此此亦马所病立仗尤贵重一鸣辄斥屏何如在牧时卧起玩烟景丰草胜刍荳清波恣游泳韦侯擅笔精幻出无人境思陵赐珍题昭回光炳炳身方缚名繯三年慙负乘细窥乐寬闲悠然动归兴

宇文枢密借示范寬春山图妙絕一时以诗送还

范生本以寬得名不学关仝与李成笔端自出一机杼理通神会真其能横披小轴屡到眼颇亦时能辨真贋未见弘大如公藏茂树乔山春烂漫此图不是江南山寒空青嶂疑商顔高高下下几佳处庄家时有茅三间桥梁楼观各有趣一夫驱驴何处去安得随入杳霭间布袜青鞋踏空雾近山忽断见遥碧天涯一望无中极胸中丘壑谁测知铁屋石人惊笔力驚谿六幅高堂空终日坐对心神融看罢为我卷还客自此归余境梦中钱文季少卿以蜀中织成山谷书庐山高为壽次韵

七十衰翁年愈高意气销尽湖海豪平生万事不翅足但欲乞身归故巢几番挂冠不容去归梦屡涉沧浪涛纵使不去岂能久命如槁叶风将飘一阳来复值初度方念吹棘心夭夭何期老友加记录乃爲衰朽亲挥毫庐山高哉山谷字蜀女织就新水绡安得东归抱四絕双鳧飞舄追王乔张图痛饮信一快更须传宝留儿曹庆朝非远却图报别当作颂齐崧高

以太湖石响板为季文壽

太湖中心洞庭山千岩万壑高孱顔风涛春撞自太古漱成乐石如雕剜玲珑中空穷变态奇

奇怪怪罗沧湾良工巧手琢威凤片云承足同飞翻叩之五声八音足疑有僊风摇佩环月?蜚声塞宇宙文如九苞瑞世间祇今在治真若凤朝阳一鸣闻九关先从鹄阁掌帝制径上鸾台领朝班德既不衰石不泐祝君遐壽如彭鏹

次韵章枢密赋吴彩鸾玉篇

文箫蹑彩鸾夜半恐不逮山深忽呼名惊喜不得退僊谪无所逃士贫何可耐乃以三生缘遂为二姓配至人与凡夫伉俪岂其辈鬻书以自给细字如玉碎一一存楷法明珠蔑瑕纇初出鹄比翼久若鱼同队终日了韵编心画无罣碍人间八百本终古知敬爱玉篇尤可珍何必赠杂佩倘邀千黄金虽贫亦当贷摩挲惜见晚老眼看茫昧墨妙饶精神笔劲含姿态次第部居中盘曲法库内九龄美风度孟博信清裁书拙无合作见此增愧慨尤物难久假雪牕暂相对遗踪虽已邈真蹟俨然在辄效西子顰小楷书牋背

题太乙宫武林山赠易高士

易居求赋武林山日困尘劳无暂间我求挂冠欲归去念此诗债须当还武林山出武林水灵隐後山无乃是此山亦复用此名细考其来真有以天目两乳到钱塘一山环湖万龙翔扶輿磅礴拥王气皇居壮丽环宫墙湖阴一峯如怒猊势临城北尤瑰奇吴越大作緇黄庐为穿百井以厌之从来有龙必有珠此虽培塿千山余中兴南渡为行都崇列原庙太乙庐曾因祀事来登眺闐闐尘中有圆峤薰风时来洗袪暑緑树阴阴隐残照我得暂来犹醒心羨君清福住年深长安信美非吾土倦翼惟思归故林

寄题王以道【宁】兰墅

百卉生深林无人皆自芳楚骚发妙意惟兰乃能当我欲效潞公賸种坡之阳不须强披拂风来味愈长君乃先为之滋畹双雁乡正欲生阶庭聚书教诸郎父子自同心久之不闻香老我行西归一造君子堂勉哉笃义方双雁看高翔

蕉庵杂言

环植芭蕉数十株幻成方丈一屠苏几重青苍两边合四壁穿空一物无早凉日薄坐其下爽气肃飒风来徐此为天下易生物不多岁月真可庐王恺谩夸紫步障石崇安得青珊瑚寓居得地不亩许好事便可传规模顾余老矣岂久处後来得此自足娱若谓霜雪成摧枯琼台瑶室今何如

攻媿集卷五

<集部,别集类,南宋建炎至德佑,攻媿集>

卷六

钦定四库全书

攻媿集卷六

宋 楼钥 撰

古体诗

石时亨饱山阁

乾道七年冬见时亨相与登饱山阁淳熙七年秋又过之今三十有三年矣时亨书来索诗老矣日困忧责之重应酬之繁何处有此慨念旧游况昔止斋陈君举洎薛象先诸公往来必游焉此阁名因以传黄文叔则又里人也存者无几并于末章见之率尔有作芜拙媿甚

层层得好山是处足饱看君真乐山者心地尤平寬生长山水县惯见青漓岷筑室欲饫赏凭虚着危栏天亦遂君意俾君老其间塲屋早得名晚始就一官官又不得进甘心乐瓢簞官少家食多知更几暑寒朝见山嵐高暮喜山云还山气日夕佳秀色几可餐晴雨各变态雪月更万端于山真属餍清明流肺肝膏粱与刍豢与世殊咸酸久矣谢世纷屏息专内观鬢无一茎白八十顏如丹所得不既多愈饱天不慳此阁本不华何处无此山苟为名利驱人境无相关吾乡山苦远可望不可攀东楼快登眺耸翠罗烟鬢年来勇欲归匏系未许闲君索饱山诗南明恍在前十年两访君共醉苜蓿盘向时多名流与君平生欢祇今几人在一见良独难叔度镇金陵道衡处瀛壖旧游如晨星相望可长叹归梦遶故丘非晚再挂冠何当泛剡谿往从子于盘

林德久秘书寄楚词故训传及叶音草木疏求序于余病中未暇因以诗寄谢

平时盛叹屈灵均离骚三诵涕欲零向来传注赖王逸尚以舛陋遭讥评河东天对最杰作释问多本山海经练塘後出号详备晦翁集注尤精明比逢善本穷日诵章分句析无遁情林侯忽又示此帙正欲参考摹华英属余近岁方苦疾笔砚废堕几尘生尝鼎一脔已知味始知用工久已成况复身到荆楚地详?兰芷闻芳馨前此同朝幸相与锦囊诗文为我倾惜哉不早见此书病中欲续神不宁年老耄及屡求去倘得挂冠早归耕尚当一一爲寻绎期以爇火裨明星漫挥斐语塞厚意深媿所报非琼莹

赠黄真护道人游茅山

少年曾上三茅山千岩万壑穷跻攀烟霏空翠不可状弟兄聯骑欣清闲回头五十有余载至今梦境犹班班初从崇禧入僊境元符玉晨纷幢幡草庵精舍不知数各占山麓清溪湾蓑衣

相见黑虎谷苍然白发犹朱顏延之土窟款清论桃皮酿酒无留残达道所居更奇絕万山开豁如重关一山巉巖似笔格耸秀正矗湖中间白马真人尚生气长史旧井藏余丹异石若碎还复合豢龙几处多澄澜华阳洞门闭已久传闻亦有游其藩抚掌浮汹涌如沸僊人捧石手可扳最奇无如大茅峯千寻直上天市坛中峯小峯如雁行下视堆阜罗烟鬟三君司命时归降往往天风吹佩环人言春日羽衣会胎禽终日来飞翻玄帝大鼎秦皇璧丹砂六千在流泉地无虺虎与荆棘但有衆药堪延年洞天凡踪不易到我欲再往良独难有时慨想旧游处陟冈惘惘涕为漣江夏僊人有僊骨卓尔拔俗甘瓢箪摇铃真能彻帝所挥鑊自足驱神奸曾入金华访初平今往地肺求洞元游经都城道价重拂袖忽厌拘尘烦径登紫芝绣衣亭咫尺衆真相往还神僊渺茫信可学祇恐涓尘天意怪但见茅君极僊品谁知求道越岨艰至今丰碑载锡文舟堕千劒如指弹君得此居宜勇退勿使学步讥邯鄲我欲休官未容去归梦遇觉多愁叹终当挂冠四明隐扪罗采石纫芝兰江东日暮云生处安得羽化同霞餐舅氏适斋汪公尚书慕香山之高续达哉行集香山诗句次韵

脱衣典酒曲江边不作闲游即醉眠大抵浮云何足道生理何曾得自全朝廷雇我作闲人髣髴缗钱二三千一种共君官职冷收得身来已五年五年炎凉凡十变老後谁能惜酒钱尘纓世网重重缚七十八十百病纏千万人中无一人自喜天教我少缘六十三翁头雪白贫家强健亦天怜每愧尚书情眷眷为君一醉一陶然其间气味多相似犹在病羸昏耄前月夜徐行石桥上累累栋宇相连延岁种薄田一顷余薄产处置有後先更无俗物当人眼游鱼泼泼荷田田为君举酒歌短歌不妨兼有散花天

适斋示池水大篇效元白体相答

适斋一片心世人难与比少时发此念乐施到暮齿婚姻成者衆葬埋不知几义气追古人仁风动桑梓利益及物物方便形事事先正有此言源流固有自外家有天池清波照丛桂来者不问谁小大聽盈器及其旱将涸一雨复清泚我舅为欣然作诗自言志平生欲济人往往多割已向来俸可分挂冠踰一纪心勤力不逮不得尽如意安得有赀财如此池中水来求则应之吾心斯足矣长篇笔余力亶亶遂满纸病足正僵卧三诵为之起韵险不容次愚言不能止公曰汝答我只用元白体公心与天通言合孟軻氏菽粟如水火此意岂不美黄金土同价但恐无此理求水易足用近止及隣里土不过饮水下亦止濯洗求财则无厌来不问远迩应者力已竭求者殊未已有如一富翁独处百家市终焉遂什一贫富本相济余波被四隣人情皆可喜久之责望重争讼随谤毁不言理曲直但谓富者鄙尧舜有至仁独病在博济所以汉昭烈其言有深旨富者民之怨百万辄散弃贫富各有分取予尤不易生长在舅侧义事熟于耳颇亦知为人缓急力不计舅言出于仁甥言裁以义二者若不同同归于一际爱苟无差等兼爱等墨子岂惟道非中安有力及此仁民而爱物要自亲亲始

适斋约同社往来无事形迹次韵

舅氏年益高何止七十稀神明曾未衰发黄齿如儿义概同古人间里咸归依度量海深濶仁爱佛慈悲居然三达尊後生愿影随为作真率集率以月为期平生持谦柄自牧何太卑善学

柳下惠不欲慕伯夷一乡有善士收拾略不遗以此娱我老今是胜昨非何必汗漫游据龟食蛤蜊但欲客长满痛饮真吾师乡党既恂恂朋友亦僊僊凡我同盟人共当惜此时间或造竹所宁容掩柴扉耆英古有约不劝亦不辞此意岂不美谨当守良规达哉杜陵客从他人见嗤

代魏丞相为钱参政寿

天台杰立沧海东古今名士长相从神游八极司马子掷金作赋孙兴公松牕先生千载士文价道骨相与同芙蓉为裳兰为佩一笑坐断千山峯向来羽扇挥羣雄貔貅给使如奴僮淮南草木识姓字烽燧一扫边庭空勲名巍峩谢不有天子神圣非臣功黄扉安坐断国论精神自折千里冲东山之志意不改归来碧落称僊翁调元老手自燮理鬢鬢緑发双方瞳苍生顙望谢公起中兴事业须宗工新冬五日记穀旦霜余和气回春风门墙老生系郡绂欲借壽筇斟吴松祝公壽考与家世山河带砺俱无穷

代仲舅尚书赋江山得助楼

江山信美非吾土王粲登楼意凄楚丽谯井干高则高未免绮罗相滓污君家华屋照城隅丹壁重重不知数谁令作此三层楼雪脊干霄千尺所几番遗书来索诗只许归田为君赋快哉今日真得归无复黄尘浣巾屨试凭栏干俯人世城郭村畦可枚数四山云物任卷舒大江波涛恣吞吐晓看红日上沧溟夜见冰蟾转天宇四明山水秀东南祇恨青山不肯入城府我家朗朗屋百间欲创一楼兄未许羨君轮奂日日新馨鼓一声纷郢斧眼明见此高突兀骚人当得江山助我久欲归未得闲门巷相望才尺五赋诗幸不负前盟但慙笔?无风雨从今造门不复问主人醉倒楼上君莫嗔

代求子绍上魏邸壽诗

皇家基业天与隆金枝玉叶盘石宗我皇圣德摩苍穹朱邸森列庆所鍾仲氏吹箎何離離云梦八九罗心胸羣经读遍巾箱中笔端豪气舒长虹殿前玉佩声冬珑天人眉宇辉宸枫大名起魏茅土封黄旛豹尾双镇雄宣城名郡烦凭熊政绩越过黄与龚楼前叠嶂横云空佳句不减玄晖工贤王易镇甬水东阳春有脚皆仁风百蛮面内文轨同坐清聚蚁驱屯蠹碧海万里楼船通天子神圣非臣功薰风入弦槐阴浓新荷泛緑榴花红晓来佳气飞青葱惊詫野老田家翁箫鼓动地光融融堂上帝子方雍容清旦燕贺簪笏丛负弩小吏随登龙由来降灵自神崧难老何用齐乔松年年箕翼壽两宫捧觴戏彩俱无穷

代毛崇夫贺妇翁黄圯老生朝

东都竞风节清裁称巨贤焱驰不自定相与扶其顛独立黄微君道周性具全辟举既不就言论亦无传当时论笃士比之孔与顔陈蕃为三公自媿不敢先丈人岂苗裔德高静而专不清复不浊量陂渺无边学问粹然正师友承渊源词章玉无瑕作者当摩肩向来登王畿悟主在一言校讎天禄阁朱黄手自研郎潜不啻足肯羨岁九迁清朝獎廉退擢居先府员廕仕皆坐

致高怀越拘挛出乘使者车径归卧林泉出处无戚欣鼻间栩栩然谢公恐未免召駟行着鞭
松山介闽浙淑气常蜿蜒隆冬正疑沍爱日回春妍悬弧庆生申飘若区中僊僊风自难老何
须记椿年贱子托粉榆扫门如宿缘叨在玉润迭得窥乐广天川涂阻拜壽春容陈大篇孺子
倘可教愿受书一编

赠吏部壽诗集老杜句

刺史诸侯贵春城海水边层城临媚景水合数百源山色佳有余云门吼瀑泉游山忆谢公频
游任履穿三寸如黄金朱橘不论钱潇洒到江心石濑月娟娟翠华拥吴岳谁扶黄屋尊御榻
在嵎峨佳气拂周旋多除南省郎一麾出守还城中贤府主今之黄颍川笔落惊风雨谈论淮
湖奔羣书一万卷分明在眼前老气横九州黄鹄摩苍天历职汉庭久磊落映时贤否臧太常
议正直朱丝弦东下姑苏台戮力效鹰鹯谒帝似冯唐明公独妙年列宿顿辉光馨香粉署妍
卿月昇金掌等级敢比肩巢许山林志虚心味道玄此邦承平日接近与名藩时节立复度水
旱其数然百波漏波涛狂风大放颠江流气不平地轴为之翻人烟眇萧瑟茅茨寄短椽凋瘵
满膏盲诛求何多门至尊方旰食鸿雁美周宣平生方寸心穷年忧黎元恐辜明主恩筋力不
辞烦晨趋闾阖内应对如转环制可题未乾御札早流传斯人亦何幸已闻动行轩滯务兹一
扫烦苛法令蠲抚养甚分明连樯并米船蜂蛭不敢毒歌笑轻波澜骄阳化为霖江鸣夜雨悬
公镇踰岁月人安若泰山且如今年冬祈寒为之暄萧萧理体静迴出诸侯先何时降玺书谁
能叫帝阍丝纶实具新载渥照乾坤借问今何官蓬莱汉阁连鸳鹭回金阙会是正陶甄烜赫
旧家声风流今尚存严家聚德星文雅见天伦曾参与游夏寔为亲弟昆潘舆送喜频堂後自
生萱国与大名新中堂有神僊令子各清标芝兰叠璵璠今朝乌鹄喜僊鹤下人间甘作老人
星晨霞朝可餐但求椿壽永何曾藉偃佺献寿更称觴肃肃秩初筵烂漫倒芳樽华烛蟠长烟
清朝燕贺人佳句染华牋吾非文人特不敢废诗篇顾惟鲁钝姿喧争懒着鞭出游翰墨场常
受衆目怜尚为诸侯客坐客寒无毡未见有知音非理谁与论始知贤主人见我顔色温包容
忻有击豁达露心肝窃效贡公喜兼尽宾主欢吹嘘人所羨推轂期孤骞

琴操

七月上浣游裴园醉翁操

茫茫苍苍青山遶千顷波光新秋露风荷吹香悠扬心地翛然生清凉古岸摇垂杨时有白鹭
飞来双隐君如在鹤与翱翔老先何处尚有流风未忘琴与君兮宫商酒与君兮杯觴清欢殊
未央西山忽斜阳欲去且徜徉更将霜髯临沧浪

和东坡醉翁操韵咏风琴

泠然轻圆谁弹向屋山何言清风至阴德之天悠扬余响婵娟方昼眠迴立八风前八韵相宣
知孰贤有时悲壮铿若龙泉有时幽杳彷彿猿吟鹤怨忽若巍巍山颠荡荡几如流川聊将娱
暮年聽之身欲僊弦索满人间未有逸韵如此弦

楚辞

雪谿僊隐

余读丛桂堂记而知双流宋氏之盛观登科记而知四川类元仲正之名忽过余于寂寞之滨问其所以来则怀阆风之绶而访其大父阆中君雪谿之僊踪也其详见于杨献子之记矣又言其先君讳庶俊特才多艺阆中素所鍾爱年止四十于是时正仲之生始九阅月尔少长女兄淑仲告之曰汝之生也卜人曰弃之先君不然取洪范攸好德之言作诗以名汝谓壽富康宁考终是有命焉惟好德在人爲可勉诗末以世科为属自尔刻本誓断絶世故将从雪谿为物外游不幸志不克就汝其识之则又泣曰先君已矣大父之来四明不知其果何在万里来游志在此也余闻其言而哀其意为作楚辞以招之

君之生兮天之西望雪山兮名之以雪谿君之游兮海之湄隐於雪窦兮杳然何归子从其父兮孙访吾祖子志不遂兮孙之心良苦嗟嗟阆中君兮弃家而远游蹇胡为乎不久留其遂蟬蜕尘埃而僊耶其亦肥遯得道不死而隐于四牕之幽耶扪萝以寻于烂平兮既不可见莽白云之廿里兮欲进兮焉求青棣兮实繁莎罗兮花稠鞠侯兮相与羣白鸛兮嘯其俦谓为远兮何景物之良是谓在迤耶将径之何由肖君像兮兹堂谨奉尝兮良畴君其来兮庶几其见之君之不来兮徒相羊以夷犹【是集传写多讹缺处因无善本参校每仍其旧此首青棣句原缺棣字鞠侯句原缺鞠字今据陆龟蒙四明山诗小序云有青棣子味极甘有猿谓之鞠侯补入又考宁波府志宋耕号雪谿世家双流绍兴中为阆中令後仙去其孙德之闻其在四明来访至雪窦山遇蜀僧告以山後烂平山有宋宣教居焉德之攀跻至巔果见丹竈而终不得耕所在乃置祠其上而归云足补楼钥是序所未详谨附注于此】

攻媿集卷六

卷七

钦定四库全书

攻媿集卷七

宋 楼钥 撰

今体诗

姚江高风阁【邑有严先生墓】

不从文叔作三公归着羊裘大泽中石濂钓台非故地云山江水自高风烟迷宿草古遗恨树
拥危楼新奏功僊馭飄飄疑不远翩然独鹤度寒空

夜坐

重云烟雨日冥冥柱础流津意未晴赖得溪风送云出放开山月照人明纷纭世态长松影荏
苒时光流水声坐久萧然转琴轴为君更作九臯鸣

山阴道中

昨望山阴古道中戴山直上最高峰今朝更踏山阴道卻向云间认八松

卷上疎帘莫放垂迎眸景色自淋漓有云更觉千山秀不雨争知万壑奇古道经行尽遗迹羣
贤风度想当时奚囊莫怪新篇少应接山川不暇诗

兰亭别于果乡

山陰巖壑妙人寰十载扁舟空往还赞府端能慰牢落连朝相与上孱顔龙蟠凤翥无奇画霞
蔚云蒸有旧山吊古凄凉更离别满怀秋思到眉间

早行

水余枯枿尚栖直催促征夫趁晓鸦细路繚山穿乱石轻輿掠树得飞花柔桑弥望两三里修
竹深藏四五家径处不容行客恋可怜一步一天涯

水涨乘小舟

一番冻雨洗郊丘冷逼征衫四月秋只喜青山泻悬瀑不知黄潦涨平畴登途已厌频舆轿得意何妨且榜舟处顺安贫聊自适未应坎止愧乘流

绣川道中

伏波莫作古胡留雨意垂垂未肯休不憚征衫有微湿只愁平地又横流行人自厌冲泥苦野老方当得意秋倦仆如何致千里登天徒笑传鸣鸠

过苏谿

处处谿还舍家家石累墙有时逢老稚无事只耕桑野色撩诗思村醪引醉乡山川已如许急雨更斜阳

东阳遇雨

万壑千巘已饱看更寻佳处为开颜无端早上一番雨遮尽东阳县里山

即事

雨外山光淡烟中草色鲜断桥依古岸流水自斜川紫榘余桑表青藤绕树颠人情兼物态只合付天然

荆坑道中

古涧随山转征人趁水行悬崖当步险空翠逼人清石路无寻直沙田不亩平千巘得一二亦足慰平生

冯公岭

百级山田带雨耕驱牛扶耒半空行不如身倚市门者饱食丰衣过一生

括苍烟雨楼

莫为看山只凭栏远怀犹恨两山间坐深却得无穷趣祇看平川一半山

晚步少微阁

落日谢虚阁横琴相对闲片云将急雨一笑失前山

夜坐烧香台

长昼苦炎热夜分凉始生电中千嶂立琴外一蛩鸣急雨催诗思遥空打鼓声谁知一府地得此意凄清

即事

睡重不知晓山高意得秋风来已落叶潦去忽中洲幽閒素所愿登临尽自由濒溪千万壑何日上扁舟

卜雨

好风先雨到危栏卻送残云过别山不用开襟强披拂自然凉意满人间

烟雨楼夜坐

暮靄横空黯未收晚来凉动满怀秋澹云影里千山月残角声中百尺楼参坐共为文字饮高谈不见古今愁夜阑半醉意方适径欲乘风汗漫游

晚自拟滁亭转烟雨楼聽角

两寺疎钟夹岸闻荒烟无数乱前村山衔落日云生彩谿溜孤舟水不痕虫羽凄凄鸣绿暗星晖隐隐照黄昏欲归重到层楼上更为梅花一断魂

重阳

佳处逢佳节寧辞望眼劳有楼皆眺远无日不登高野栗炊新秬寒萸泛浊醪黄花何太晚篱落上萧骚

北行雪中渡淮

风卷清淮夜不休晓惊急雪遍郊丘坐令和气三边满便觉胡尘万里收瑟瑟江头辉玉节萧萧马上点貂裘归来风物浑相似二月杨花遶御沟

泗州道中

宿雪助寒色相看汴水滨轻车兀残梦羣马溅飞尘行役过周地官仪泣汉民中原陆沈久任责岂无人

灵壁道中

古汴微流絕余民尚子遺高丘祠漢祖荒草葬虞姬垓下空陳迹鴻溝愴近時膏腴滿荊棘傷
甚黍離離

陈留柏

驛門深閉柏參天月可中庭夜影圓人靜好風喧客枕坐令歸夢到林泉

湘州道中

千古興亡一夢驚就中物理似持衡茜花空染朝歌血荒草猶祠羗里城但見反身知自咎誰
言修政欲相傾知音只有昌黎操臣罪當誅主聖明

即事

行盡窮邊歲亦殫倚門應是念衣單寧知今日幕南地不似去年江上寒乘馬惟欣日可愛逢
人長說雪初乾三衾四袄半無用何必重歌行路難

腊月二十五日大人生朝

去年沙岸倚歸舟今日驅車古涿州彩服難陪萊子戲巴詞應付雪兒謳客途行及五千里壽
宴須開十二樓南望飛云天樣遠太行山外久凝眸

初出燕山

去國三千里還家第一程都緣人意樂便覺馬蹄輕落日催心速飛云逐望生莫嫌歸去晚猶
得趁清明

春雨

石斗微微覆淺沙蘭叢短短茁青芽春花着眼未云久花事于人漸有涯

漫漫平湖接遠天蒙蒙細雨濕輕烟野橋橫着草深外何處渡頭人上船

送人之官池州

春空吹雨作余寒去去扁舟不可扳伊昔曾游三大水到今獨記九華山想君脉脉征途遠屬
我悠悠夢境間回首江山固無恙懷人倚待好詩還

春游遇雨

公子喜青春欢游弗厌频久晴都不问好雨卻成嗔桃杏红方入禾苗绿未匀请君停杖履俯念耦耕人

粮料院葵向亭

结屋苍崖画不譁峻嶒乱石绕帘牙涛江渺莽三千顷烟瓦参差百万家雉堞环山余暮雪龙楼耸阙焕朝霞登临可是望都省但有葵心向日华

廨舍小轩

袞袞羣山尾横窗更此岑尘埃遮物外风物宛山阴作吏何妨隐寻山不用深居然一丘壑便足快登临

尺五亭

旧说城南社今登山外亭宫墙步可到御柳望中青引啸千岩响哦诗过鸟听曲栏频徙倚归思渺东溟

挈从子涤归乌戍外家

五年不泛浙西船今日重来倍黯然苇席不重寒刺被菱歌孤唱月摇川呶哑回橹鳬鸥狎来往轻帆风雨便点检湖山固无恙鹄原遗恨到黄泉

乌戍道中

田在港西家港东断桥春水步难通束芦挟瓮稳来去不碍小船分钓筒

重阳寄雪牕从叔

秋意未教篱菊知不妨乌帽着风吹絶怜对酒君归矣更欲登高谁共之风雨满城千里梦茱萸缀席一年期君非俗物败意者莫为催租便不诗

次伯舅汪运干【大雅】所寄韵

遥忆牢之舅功名志欲成离思满方寸望眼费双明揽笔四愁咏登楼千里情贤劳休自叹幢下本书生

佛日山

晓出都城暮入山杖藜萧散易开颜松风五里未行尽隐隐疎钟紫翠间

游香山次王正言【迷】韵

四山过雨翠光流境胜心闲自点头野鸟叫春多格磔晚风吹鬓故飏飏三年几作旧山梦一笑喜成今日游独叹寒泉本无意强随机械走溪沟

过西兴

几载京尘浣客裘江村乍入倍清幽柔桑穉麦寒犹在流水落花春又休苍狗浮空惊易失白驹过隙若为留细思谁似垂纶者真酒烹鱼百不忧

携家再游姚江

又作泛舟行浮家一叶轻潮生江外晚月比夜来明云尽天容彻风高水气清五湖乘兴去何苦慕功名

渡扬子

江豚吹浪雨飏飏望断天涯人白头一舸乘风渡扬子数鸥导我过瓜州

晓雾

晓雾冥蒙水拍堤棱嶒乱石与云齐扁舟不用兼程去到得稽城日已西

登戢山

晚步戢山上休辞脚力穷八松不碍眼万里欲乘风逸兴浮沧海高歌彻太空羲之不可见犹得想胸中

永嘉试院谢曾使君送酒

一帘疎雨洗尘埃满架酴醾自在开正恨烹茶杀风景忽惊门外白衣来

脱身场屋几春秋故步重寻我自羞闭置有如三日妇画成应遣一生愁与钱谁是老司业送酒更无贤郡侯掩卷出门花下坐真成一酌散千忧

木蘊之国博迁居

寄斋今日又迁居门巷相过五尺余王子何妨借人屋渊明不必爱吾庐大千眼里无非寄三十乘中皆是书祀竈卜邻无用尔祇今天上有锋车

名大人称屈心闲我自余言诗今子贡作赋古玄虚凤沼定平进鸥盟殊未疎潭潭府中去只作寄斋居

次南真宫龚道士壁间韵

幽舍足留客疎簟不用林相过几樽酒清坐一瑶琴野鹤伴僊隐闲云寄此心黄冠如有许来者为低簪

送乐清姚令行可

长官清政玉无瑕卓鲁循良不足夸前席有期吾党喜挽须无路邑人嗟才高雁荡千峰石惠足河阳一县花欲信三年浑不扰游山今日始携家

入雁山过双峯

眼前未见古龙湫望望前山景自幽红日一门千嶂晓翠峯双耸半空秋风高落木无边下气劲闲云逐处收要识雁山真面目直须霜後一来游

灵峯

老筇扶我转林丘直到僧房最上头地拥双峯遮胜境天分半石閤灵湫空中大士澹相对山罅清泉空自流人谓石崖宜置我不知来此有缘不

龙湫

地耸峰峦秀天开气象寛九霄银汉落千古玉龙寒壮观供尊者幽居称冷官何时遂肥遯不厌白头看

又次王瑞安韵

云锁千峰碧泉飞百尺湫山蹊惊险絶洞府足深幽谷静摇虚箔巖高卧老虬贾胡还似我到处辄迟留

忘归亭

一峯凜凜插烟霏谁筑新亭占石矶标榜未应专一壑此山何处不忘归

登马鞍岭

轧轧轻舆上马鞍半天岚翠逼人寒从教宿霭迷清嶂明日晴空取意看

游西山次范丞【公兴】韵

东风吹我上西冈更觉僧房白昼长草色已翻新岁碧梅花祇是去年香好山围绕屏三面野竹萧森玉数行千里同游逢范叔绨袍他日未相忘

喜雪

晓风吹起雪漫漫来兆丰年喜有端玉树琼枝无限好雪牕高阁不胜寒直疑天上梅花落莫作人间柳絮看我欲乘风游汗漫倚栏空自羡飞翰

同年翁处招游北山次韵

不嫌屐齿碎莓苔祇要吾人得得来见说飞泉高落涧待寻曲水作流杯竹林素约羣贤集鸡黍相过一笑开政恐清游自忘返不应空棹酒船回

丈茂先烟蓑亭

人生逆旅困风波大似寄居鸚鵡螺月白江空无一事不须更作钓鱼蓑

红梅

南枝零落北枝残失喜新蕤苦耐寒莫道北人浑不识南人几作杏花看

秋意次林致甫宗丞韵

河汉秋来净飞星一点过好风吹暑尽疎雨送凉多纨扇收團月桃笙卷细波自知恩到骨欹枕梦无何

送春

飞花一片减风光不待红稀意已伤今岁余春能几许浮生此日更须忙陇头有雨麦初秀林下无人兰自芳夜倚疎棂诵佳句好风如水月如霜

花披催蝶舞柳暗受莺迁过眼忽新梦回头谁少年溪云随笋供山雨近梅天诗思正无赖一声来杜鹃

病目初愈张子家有诗次韵

年来视物隔褰帷?祇有昏花似退之强起归鸿聊自放妙穿悬虱恐难为相亲黄奶交亲絶见代青姑事寝危写照苦添云蔽日不应更诮虎头痴

许深父饷酒覆於舟中

千里贻书慰寂寥更将尊酒饷今朝先生忽已成乌有用事何因见白超醉里谩思鲸吸海梦回谁悟鹿藏蕉何时痛饮论心曲云满江东望眼遥

送朝臣济宰湘潭

君向潇湘忽语离江城离思乱云飞传闻楚俗尤凋□勿以秦人视瘠肥宰县要寻行志处监州空有负丞讥此行得句须频寄直到衡阳有鴈归

即事

芸芸物态见天机静里工夫得细微堦下秋红千万点游蜂一一采香归

正月庚申朔【淳熙六年】

春来节物一番新今岁仍逢腊里春莫讶连宵清不寐祇缘守岁守庚申

国清寺

夹道青松引客来五峰双涧拥楼台丰干饶舌留公案隋帝遗书暗占煤最喜亲知来里社真成春月上天台阴云扫尽寻幽去佳处端疑为我开

山中怀仲兄

雁山曾御九秋风更喜春深到此中芳草绝怜随意绿野花真是映山红未知方丈景何似直恐桃源路已通起聽朝鸡无恙否兹游恨不与君同

天台道中口占

路上人家短竹篱缫蚕刈麦自熙熙可怜日对千寻瀑不解闲吟半字书

宿仙居民家

投暝人家欲睡时雨声不断水平池回头已过三江渡醉看车中总不知

寄管仪通判并同官

执别僧房日未斜别离愁绪满天涯清宵已落柔桑叶小雨顿开乔麦花醉里不知身是客【江南李玉词】酒阑无奈客思家【欧公梦中句】凭谁寄语三夫子归路还须好句夸

赠宝藏老道源

骨相昂藏涧底松平生禅窟尽从容几年大隐清晖阁今日来瞻独秀峰打破画瓶无罣碍大开饭店喜迎逢今朝且逐征途去何日重来聽晓钟

过苍岭

黄云满坞沙田稻白雪漫山荠菜花路入缙云频借问碧香酒好是谁家

崇朝辛苦上孱顔泥径初平意暂闲苍岭东头移野步眼前便得处州山

婺女极目亭

危楼雄据郡城东扫尽秋云快碧空目力不容山隔断诗情长与酒无穷先分楼下双溪水高挹人间万里风兴逸不知真近远五弦声里送归鸿

自阿山归再过苍岭

雨後过苍岭平生行路难危层惊步滑絶涧觉心寒就岭山逾险趋平谷更盘年来轻世故不作险涂看

攻媿集卷七

卷八

钦定四库全书

攻媿集卷八

宋 楼钥 撰

今体诗

鹿伯可郎中园池杂咏

见一堂

灵澈清诗千载传始闻林下有斯贤傍人只道休官早见一名堂已十年

止室

流行坎止事无多举世营营自网罗珍重主人真止矣直如古井更无波

小东山

安石东山志不渝归来寻得静工夫从教更为苍生起携妓何妨且自娱

桂堂

芳树丛生庭砌间高枝更许後來攀主人勿恋山中桂招隐还应看小山

云龕

浮云舒卷原无定此意谁能为饱参出岫无心归亦尔不妨今日与同龕

柑隅

霜着芳苞翠作围数椽潇洒映斜晖木奴何必须千树乞得闲身径且归

桃蹊

几树桃花相映开主人归路入天台凭谁寄语玄都观前度刘郎不更来

月沼

玉洁冰清一壑专箴龙何处引涓涓深知月满还亏缺祗学蟾光一半圆

星潭

山头分下一泓清石甃团团瞰小亭身在赤城名绛阙至今潭影照郎星

三友径

公是端人友必端世情冷暖不相干虽云门外可罗雀三益还能耐岁寒

竹坞

几年种竹未成丛一日归来翠扫空尽好闭门高枕卧从今日日是清风

梅坡

江梅留待主人还见说归时得饱看回首残花飞作雪一峯当户正高寒

松岭

翠云深处曳枯筇插碧堂堂十八公全似华阳隐君子挂冠归去聽松风

戏赠张汉卿

张侯理窟妙无穷雅谑于人亦有功渺渺江湖千万顷未闻饿死信天公

陪沈虞卿使君游钱园

休沐无官事公庭且放衙城中寻胜地上引高牙潭府临芳径东巘玩物华山林真箇絕栋宇谢豪奢陶令亲栽菊秦侯晚种瓜裴公余綠野六一醉琅玕幽阪森三友飞桥粲百花树深藏曲折谷险路谿谿道院罗星斗禪房供释迦峰思御气画舸想乘槎佳处城环雉吟边路遶蛇登山携翠袖喝道屏银樨井市花相映湖陂柳半遮高歌惊野鸟叠鼓乱鸣蛙陞级青珉滑秋千彩旆斜丛篁穿嫩笋芳草绽新葩静憩方开宴徐行更试茶僊醪斟玛瑙玉指奏琵琶清絕嚣尘远苍茫望眼賒诗情弥海峽饮兴渺天涯贤尹民同乐名郎子克家才高修月户笔妙补天娲挥麈风流胜凭栏笑语夸追风慙款段倚玉媿蒹葭逸韵迷春蝶清欢接暮鸦舞茵收地锦画烛照笼纱耄稚欣相告輿台靖不譁微风朝趁马好雨夜随车土脉兴原隰霖膏润甲芽相将劝耕去和气满桑麻

巾山曲肱斋

山立青冥外人行紫翠间小牕开木末孤塔映江湾平楚一何远白云相与闲我来不暇寝冷坐对前山

广轩夜望

点点万家灯风清醉复醒广轩高絶处俯瞰一天星

玉霄亭玩雪

羣斋高晏雪浮空同上山城第一重今日无非银色界此亭真是玉霄峯云迷野路舞轻鹤风急瓦沟嘘老龙便欲相将游汗漫剡溪何必访遗踪

倅厅云水亭

山绕澄江江遶城水云径接海冥冥万家曲折在吾目一郡登临属此亭今日诗题随处有几番醉眼望中醒风流郑老知何在回首苍茫岛屿青

再过鹿伯可

又上先生见一堂澹然宾主两相忘不知海内清风满但觉山中白昼长小雨络林妨蜡屐靓妆环坐快瑶觞曲终扶杖欲归去即咏白驹三四章

天姥峰

剡水迂回彻底清滥觞从此一泓澄晓来蜡屐冲寒上?碎山头十里冰

虎丘

望望古招提兹游恨已迟池深惊地裂野旷觉天垂聽法人千数谈空松一枝从谁访遗迹惟有石头知

洛杜老僧聽琴

宴坐萧斋不作劳谓予何事走蓬蒿从容试问今年几手植黄杨三丈高

自言几载不闻琴屡聽清弹苦契心少待庭柯蝉噪静为师更作醉翁吟

中秋

岁岁当秋半人人待月明絕怜今夜赏更胜去年晴光彩澄高露氛埃廓太清衆心方闵雨却望暮云生

又次丁端叔韵

好风凉月湛中秋自笑何为作远游不有诸君故人恋未应连日贾胡留三千银界俱呈色十二珠帘总上鉤饮罢客归清不寐谁知心折大刀头

游惠山

石径萦回入翠林廿年故步喜重寻千山直上云扉启万木阴中古殿深泉水泓澄风拂拂洞门幽杳昼沈沈调琴淪茗清无限倦客忘归到夕阴

游洞霄宫

宿雨顽云拨不开紫霄佳处访楼台青山九锁固奇甚古洞一深如此哉拔地千林俱秀润擎天一柱最崔嵬出山爽气尚相属数里清溪送我回

游径山

起看海日晓团团更挹神灯照夜阑百万杉松双径杳三千楼阁五峰寒蛰龙何在渺难问古井于今竟不晷但觅灵泉归洗眼谁能故把细书看

送苏伯昌大卿

禁路迢嶢欲问津抗章便自乞闲身闵劳剧部皇情厚寓直中奎宠数新飞挽正资经济手典刑终念老成人赤松未许长为伴归取青毡继颢滨

甬东曾幸拜苏天外府官僚复备员前辈风流真在眼名公谈笑辱忘年浙江相对一卮酒婺港欲行双桨船门键马街难作远西风停立但茫然

送刘淳叟博士倅豫章

熟知明主可忠言奏牍方陈意已传人言能逊千乘国我自能补九重天拔山转石孰难易烂额徙薪谁後先不用更论如许事把君征袂且茫然

送吕周辅宗丞守崇庆

从昔傅家学当今良史才声名冠西蜀风节象东台朝蹟收何速归心挽不回一麾从此去万里可能来【吕为四川类试省元曾祖陶为给事中】

旧矣唐安郡龙潜府号新当年一绦帐今日两朱轮民意来何暮仁声煖似春剑南毋恋却鰲禁要词人秘甚先天学谁传陆士龙上方留自近天岂不相容契托君家厚情惟我辈锺殷懃训犹子他日使追踪

上魏丞相

梦庵深坐宴朝曛祇有梅花对此君今日衣冠有巢许向来元凯佐华勲入山谁解访洪景载酒时应问子云童讽写成心未懒可因贪佛赞论文

次韵蒋德言游太白玉几两山

西山不到几经春玉几犹能一再临太白峯前成梦境直从总角到于今

少日游山不要归老来腰脚不相宜羡君胜具了无勸踏雪寻幽更一奇

賸欲扶筇随意行要令心迹得双清何时同入翠微去丈室先参老净名

落花影里步春阑飞鸟翩翩相与还若得把茅成小隐等闲来往两山间

谁能饶舌强参禅何用谈因更说缘生死本来无大事晨朝须起夜须眠

谢僧道全惠诗并菖蒲

楚楚芳荪诗様清翠苗低护小峥嵘一泓功借幽根润六月能令凉意生雁荡浑如梦边事龙湫顿觉眼中明闲牕坐对思无限何日随君遶涧行

赵安国梅坡

隆暑倦行役梅坡得暂闲卷帘南浦岸终日对成山竹里清风远碁边夕照还岁寒重卜醉觅句暗香间

资圣寺

野溪清浅度危桥径策枯筇上紫霄晓雾暗燕山寺雨松风深隐海门潮浮杯水涨人何在洗鉢池清意已消又上乐亭基上望云山万里更逍遥

次韵蒋德言壁间旧题

一铃檐角自吟风两面松篁翠扫空山卉更藏无尽意枝头未作去年红

上史太傅

一坡烟水绿湾环竹树楼台缥缈间但说一丘藏曲折谁知更有四明山

二十里云随步生潺湲洞里访青棂山中要识无穷趣看取南雷问答经

袞绣堂中语夜分几将经史细评论不知世上三公贵祇是东湖八行孙

赠郑相士

知君冰监照人寒我相儒酸未足观东甬从来多俊秀为烦着眼细寻看

雪窦道中

城居久矣厌尘劳来访名山写鬱陶客路行随流水远征人与坐白云高千林舞翠吹蓬鬓二
麦摇青照紵袍努力共登天尺五要看飞雪喷云涛

锦镜

两溪赴壑若奔虬此地端能截衆流三版放开千丈雪一匳清彻四山秋几年空自存公案今
日重新指路头珍重老师成胜事清名当与此山留

妙峰亭

一峯高出白云端俯瞰天涯千万山试向冈头转圆石不知何日到人间

隐潭

灵潭深入白云堆带雨春云为我开乳石半空浑欲堕瀑泉千尺正中来两军酣战鼓鼙急一
雨生寒霹雳催中有卧龙君勿狎有时平地起风雷

游大梅山护圣寺

江东东畔更东山又过东山数里间试问招提在何处万山深处白云环

寒云片日忽吹开历井扪参得得来行尽高山天欲半不知平地有楼台

常禅师塔【旁有虎冢】

当时道价极光华鸢兽相随共一家象去虎亡师亦老不须百鸟更衔花

从来猛虎性坚刚据石依林死不僵何待寒林班侍者千年陪葬祖师傍

梅僊巖

梅山遗迹若为寻怪石峻嶒一径深未必当时真隐处清风自觉袭衣襟

云岩

但见云生谷初无石似巖得名非旧观买地作精蓝境胜环修竹门深拥翠杉禅林自家处莫问後三三

启霞冰壶亭

拍拍新漪彻底清两山写照翠光凝笑看风动縠纹起坐我玉壶春夜冰

天童玲珑巖

扪萝历栈上层峰寢觉芒鞋踏半空七窍几时开浑沌八窗无处不玲珑已欣古洞容身过直恐丹丘有路通俯视人间懒归去拂衣径欲御天风

送内弟汪作德赴建德主簿

今日望春下送春还送行簿书须着意家世有余清潇洒桐庐郡文章陆士衡【时陆务观为守】公余定多暇无废读书声

南江酒家

南江舟楫饱经行桥外人家最可人腴种寒杉映修竹快沽村酒趁鲜鳞潮痕落草橹声动日脚衔山凉意新酷爱老樟横卧处他时来此坐垂纶

宿登山

竹舆来访小梅山山在空蒙紫翠间岚雾满林朝漠漠溪声和雨夜潺潺峯头丹井随潮信松

下禪房旧祖关谁是无生谁不死晨钟未响梦先还

羣从泛湖次叔韶弟韵

倚遍瀛洲十二栏老蟾推出烂银盘絶怜千顷波澜阔更觉满身风露寒境胜能令诗兴逸夜深自喜酒肠宽离离挂影清如许莫惜终霄作意看

送陈君举守桂阳

重寻漫壁认题名十五年来一梦惊谁料今朝携客至却成此地送君行桂阳卧治真谈笑鲁史遗编赖发明文定南轩僊去後湖湘又得一先生

永嘉天庆观

斗口横安华盖山茂林修竹路湾环琳宫迴出沧瀛表羽士如游崑阆间东挹江山穷望眼西临闾阖笑尘寰自知去此无多日着意来寻一饷闲

次许深甫寄陈颐刚韵

博物曾经辨实沈论兵更觉用功深九阍未进六奇计万卷空催一寸心流水高山谁复会寒松春柳解相寻如君岂是长贫者作计无令岁月侵

前朝折戟尚沙沈志士私忧意向深谋国未须先问陈平戎要且务攻心衣冠旧老知谁在禾黍遗宫尚可寻骑省再新人有望一言坐复故疆侵

劝农

一番好雨润桑麻和气欢声十万家太守劝农才出郭老农含哺竞随车土膏泽泽地宜稻云物阴阴天养花愿得四方无旱潦尽教乐岁似东嘉

书吴梦予古乐府後

古来乐府近来无笔力如君郤有余日恐遗音亡正始喜闻新作过黄初不夸艺苑徒工瑟应免侯门久曳裾更向江西诗窟去他年时寄一行书

谢景英送郑景元篇末见属次韵

张罗清似翟公门门外都无野雀喧可但风流追鲍谢直教高论到羲轩絶怜父子为知己时把文章得细论个里是非何足较乍贤乍佞一王尊【○一本此首後尚有一首云触暑相过

忆去年汝南又得见先贤向来乔木今亡矣祇有灵光尚岿然
【賸记暮年专一壑想闻高咏和流泉两公直谅浑相似其末一句缺载不可考今附注于此】

喜雨次甄云卿监簿韵

四郊苗槁勃然兴顿觉欢声满郡城行且刈云成岁事敢因喜雨记亭名
昔如鱼在釜中活今见龙从地上行忧国愿丰同此乐读君佳句欲风生

又次徐仲宗通判韵

老龙破蛰斩幽关乱滴天瓢不复悭可但甘霖驱旱魃自然凉气满人寰
民心徒切焦熬甚神力每劳指顾间遥想清都应表贺紫宸轩陛晓催班

又次郑性之县尉韵

槁项疲农病夏畦喜闻烟雨四天垂旋寻秔稻供糜粥惊见新香玉满匙

闵雨才宽又畏风从朝愁到夕阳春谁教官到二千石不学当年邴曼容

几番好雨应先占欣见堦庭绿草纖秋後阴晴犹未定更看新月卧磨鎌

爰居集鲁要先知飞雪侵春久已疑惭愧风师幸安静敢将虎口鬪龙痴

游隐清

簿领丛中偷得闲轻舆相与出乡关乱流先已登孤屿采蕨还来上北山
藤遶龟身增鼃黠水涵虹影照孱颜老农拥道迎人笑今日使君来破悭

瀑泉奔放石坡陀回首清游岁几何脚力不知前日健诗盟还喜故人多
滕王阁上无韩子远景楼中欠老坡不谓鄙言成宿?偶因晚泣得波波

穷冬吏鞅解纷纒重入兹山忆少年千里幸同丰岁乐三生曾结郡人缘
几番山色望空外今日水声来耳边坐上何须聽丝竹与君啸咏和风前

富覽亭

城郭占佳胜眼高贞白翬霜天开浩荡云屋涌嵯峨四面山总好东窗江最多
脚跟盘巨石吞吐任风波

赠陈居靖道人

为汭道人身御风弃家求静慕僊踪僊都有石立天半特立要当如此峯

雪中简林景思刘振之

骤寒忽变雪花飞抱膝长吟况可知襍被可能来过我忍寒相与话新诗

谢林景思和韵

黄昏门外六花飞困倚胡牀醉不知冻合玉楼犹强项拥衾方咏雪巢诗

送赵子固吏部帅合肥

少年文价重神京游宦还闻政有声南省但推韩吏部北方犹问赵先生人传殿上三千牍上喜胸中十万兵暂辍望郎分帅阃淮南草木更知名

老韩同传我多慙意气相倾自不凡忧患饱更俱白髮班行独立见青山羨君真有虎头相顾我方为马口衔同舍几何俄话别可堪目力送风帆

襟带长淮地望崇勲名当继古英雄吴人止解依濡坞晋将才能过八公可但绥怀边境静直须经略朔庭空折冲不必居遐徼颇牧尤当在禁中

曲竹

放出一头地出墙梢更新傍人为称屈素志肯求伸苦节变甘节曲身成直身青霄看直上莫忘手援人

寄题汪端明坟庵真如轩

山藏佳处竹藏庐见说离家百里余已矣空求真学士伤哉闲杀老尚书後生自恨登门晚壮岁寧忘跪履初怅望九京郡可作此心徒切慕相如

万个簣簞一草庐伤心埋壁十年余革声谁聽尚书履金榜空悬少保书无复遗音追正始尚传新作过黄初真成一代风流尽叹息浮生信六如

题汪季路太傅所藏龙眠阳关图

离觞别泪为君倾行李匆匆欲问程不用阳关寻旧曲图中端有断肠声

画出阳关古别离萧疎柳质不胜悲行人顾叹离人泣柳下渔翁总不知

题陈简斋寄夫人书

行书满纸遗君丈可见闺门敬若宾应与少丈能协趣定因元亮遂忘贫

题韩氏所藏元佑选尚诏草

禁裔当年选尚初难兄辞宠意何如裕陵遗旨知难改元佑湛恩信有余今日犹存卯君笔向来谁造粉昆书韩门世宝宜无坠史有遗文尚取诸

秋日怀国仲观

四明耸秀一溪流曾记经行十里秋行李今从何处住宦游自笑几时休儿时故旧今谁在老去光阴不借留赢得东归访邱壑约君同上钓鱼舟

客省聽燕乐

晓入金门拜紫宸门前错立士如云未容密侍君王晏祇许钧天隔殿闻

次李季章监簿韵

跪履巽巘今几年见君风度喜翬然长编固已翻青简老墨犹能宝漆烟游宦自欣天影近思家犹在夕阳边时从甥馆追清赏賸写新诗继谪僊

贺雪八盘岭上作

平时卧雪似袁安谁肯凌晨犯苦寒百辟班中因族贺八盘岭上得遥看层层观阙琼楼耸纳乾坤玉宇寛怅望僊山何处是欲从此地径骖鸾

送林子方吏部将漕江东

光尧三纪焕文章宝阁迢巍谨秘藏寓直到君才第四皇华礼乐远增光

望郎三度到长安垂上青云作好官暂向江东一澄按却归径着侍臣冠

自说嵇康七不堪上教持节向江南江南父老应相贺见说清明似晦庵

殿庖官烛对风帘郎舍修篁共一檐别日苦多良晤少掺祛不耐雨纖纖

子方移守四明见于浙江亭

春初送别欠诗篇岁晚还欣受一廛都骑始闻临浙水先声久已讐鄞川里人见说俱延颈海峤从今定息肩夜夜故山频入梦为君端欲买归船

寄题蜀李氏义槩堂【君亮着作之祖】

养气非为侠轻财弗市恩仁声高月旦义槩彻天阍称美推贤嗣扬名有顺孙活人几百万何止驷容门

送卫清叔着作提举淮东

汉庭早已冠羣僊阔步登瀛最少年窃叹岂惟年叵及人门才业总翹然

通泰牢盆亘海滨宅家专欲用儒臣淮南草木生顔色又见龙头第一人

虎榜先登到凤池前良多以十年期虽知勇退急流去壮岁功名会及时

羨君持节拜庭闱未老双亲看彩衣若过盖公烦问信坐曹日念旧游稀【外府旧为敕局卫乃盖侍郎壻】

屡从樽酒接从容叔宝风姿照座中他日相逢年益老棊坛尚可角雌雄

送黄景声秘丞提举浙西

江夏无双第一人清明久矣动簪绅心平气劲无偏党好在皇朝作争臣

宅家亲擢得真才柏府兰堂更外台未问遄驱向沟壑半途应有诏书催

从来轩冕一毫轻朝蹟初收去玉京打破画瓶无个事不妨游戏绣衣行

论诗才了便谈禅鄙吝冰消更豁然稽首心空先及第敢将癸未论同年

玉节光华照日曦扬清激浊正当时阿连幸出百僚底正恐翁归不受私

雪中迎驾

都人久不望威顔惊喜鸣鞘风雪间万井欢声迎晓仗九天和气下人寰龙楼笑启瑶池晏鵷序欣趋玉笋班道上峰头皆见日絶胜衔烛照崑山

题尤延之给事所藏葛僊翁徙居图

莫言家具少于车药裹衣囊自有余老妇亲携三稚子僊翁独玩一篇书
羊牛相与趋新筑鸡犬无因恋故庐到处山头有丹井不知如此几迁居

又题杨妃上马图

金鞍欲上故徐徐想见华清被宠初後日延秋门下路不应有暇作踟蹰

题老融归牛图

薄宦六年辞故山故山祇在梦魂间簪绅何苦自纏缚却羡归牛自在间

天竺祷晴

早奉天香祷白衣迟明宿雾故凄迷忽惊红日穿林薄无数碧山明
涧溪上天竺寺连中天竺寺苏公堤映白公堤湖光一碧几千顷
賸卷荷香送马蹄

具美堂

明光殿里早催班亭午天街从驾还已聽欢声传市井更看喜气满湖山
聯鑣远去闲寻胜烂醉归来夜叩关但愿两宫千万壽退公时得过云间

水月园

具美盃残意未休相将重上望湖楼楼台忽已居平地风月何曾识旧游
更挈酒樽过水月坐增诗兴满沧洲春风共约新桥畔遥拜双龙万斛舟

三月九日从驾

昨日为亲壽今朝从驾行君亲俱有喜家国共增荣淑气浮黄屋欢声动玉京
人心真易感翻手作昇平

湖山次袁起巖安抚韵

同年紫陌再寻春力主斯盟赖尹京山外斜阳湖外雪夜来阴霭晓来晴
平波灩灩新添綠冻木欣欣欲向荣此日此身清洁甚软红何苦太忙生

攻媿集卷八

卷九

钦定四库全书

攻媿集卷九

宋 楼钥 撰

今体诗

试俞珣长头笔

倦游俞老入中州霜兔抽毫饱盛秋平日相亲管城子结交今得贾长头

访留昭文于范村山间不得见

黄扉处士掩松关小立松风去住难可叹山中真宰相未容神武挂衣冠

送倪正甫侍郎出使

经帷亲见犯天颜口伐何劳抗可汗故国应悲周黍稷遗黎犹识汉衣冠殊邻谍报终难测累岁要盟恐易寒驰至京城上方略始知颇牧在金銮

送王仲言添倅海陵二首

万卷诗书老雪谿欣然二子和坝箴絶怜伯氏久亡矣犹幸夫君及见之来上鹄行人未晚往舒骥足自嫌迟他时还向云门否布韞青鞋尚可期

遂初陈迹遽凄凉击叹青箱极荐扬谈笑于依情易厚典刑使我意差强重屏旧画论中主古殿遗文话阿章旧事从今向谁得尺书时许到淮乡

寄题延平范氏六桂堂

高门儒效许谁同秀气于今照演峯家学一椿连五桂地灵两劒化双龙三人衣鉢清名接累世簪纓庆事重彼茁孙枝更林立不须万户羡侯封

京仲远尚书为澹然子作二大字

浓墨新题付澹然松坡为子老谈天凭君推我行年看何日归耕绵上田

送李伯和吏部题举浙东伯珍寺丞将漕夔门

奕奕君家好弟兄皇华交映棣华明几年并列金闺彦同日俱持玉节行万里往临夔子国一江先到越王城会闻归取青毡旧都似当年老贰卿

送范文叔礼部守彭州

忧国鬓先雪爱君心似丹旌麾虽自适怀抱未全宽直道任三黜故人怜一寒蒙阳毋久驻旋复箴鵷鸾

送赵德老端明帅蜀

身名俱泰老尚书叱驭宁辞万里途两地恩荣真赫奕四川父老定欢呼乖崖袍带今重见清献琴龟我更无频向筹边楼上望归来方略上新图

次卢国华提刑所寄韵

持节归来上粉围祗今一节又何之乐天好句追长庆元亮高风挹义熙我恨别多仍会少君虽去速岂来迟闽山荔子熏晴昼莫惜登临賸赋诗

古梅遗张时可

枝封苍藓澹花疎一种风流高更孤试问约斋三百树林中还有此枝无

李才翁贺除天官次韵

九年奔走只思闲归梦时时堕故山已媿演纶词禁上更堪曳履侍臣间官曹顾我空无补世事惟君了不关但欲相从游物外不应久此玷清班

我居铨部鬯簪裾终羨寒臆只蠹鱼每念故交今有几况如盛德岂容疎京尘共叹催人老市道谁知有隐居久苦笔端枯渴甚楚波正欲借君余

刘德修右史去国示所和从父东谿及杨子直诗走笔次韵

无人为辨乐羊书却向空山问草庐世上荣枯无定在眼前毁誉竟何如寸心未彻九重上百口仍行万里余只恐君王思旧学便看飞诏促严徐

东谿诗似老弥明倾盖论诗絶点尘笔墨为供无尽藏江湖乞得自由身出门远送成惆怅无计相留更主臣但愿皇天开老眼不应空谷滞斯人

阁下相期久山中把酒稀未能容我去又复送君归柱史宁终隐威颜暂咫尺壮心谁与语看剑一灯微

谢袁起岩侍郎送盆栀奉老母

翠绡飞盖拥生香水雪精神试晚妆鹤髮慈亲俄一笑玉人何事晚升堂

送曾南仲寺丞守永嘉

六和久坐趣归鞭却送旌麾水竹边无说可俾新令尹有时重送老同年城隅緑竹今安否庭下朱栾定俨然回首东州真梦境羡君此去若登仙

过上虞怀谢驿喜雨

梦回檐溜作惊湍浄洗炎敲百虑寛咫尺东山见膏泽令人更忆谢家安

答杖锡平老

老我平生不愿余归来但欲赋闲居灌园自足供朝膳日奉夫人御版舆

送□尉海陵并寄示瀟

二子俱从宦重亲足自怡汝能行幼学吾岂恨轻离平日自知己真心更与谁临文有遗忘此是忆儿时处已幸寡过居官勿愿余动成经岁别賸寄几行书公退仍多学心清任索居但知行所职通塞聽何如

次潘安叔寄新溪诗韵

曾游明月旧双谿老去情怀百不宜梦绕新谿身不到更休重和寄来诗

送内弟汪强仲赴台州税官

雕鞍去去不容攀柳下门墙辍往还可但征商私龙断不妨挂颊看巾山右军墨妙惟修禊太傅才高亦抱关咫尺亲庭母苦恋有人能作适斋闲

少潜兄再立昼锦坊伯中弟有诗次韵

东楼旧日史君家盛德于今说孟嘉昼锦门墙再兴起乌衣巷口倍辉华虽无崔氏聯三戟肯学杨家簇五花尤喜桂枝香不断藏书满屋是生涯

王原庆诉盘餐萧然走笔次韵

愁絕诗人太瘦生也无北食与南烹君看俚语亦堪笑何日能填鼻下横

莫嗜鰕鱼如老曹但应菜饭学参寥坡翁晚节更清苦玉糝新羹手自调

送赵振文主簿

去去江西不作难片帆双桨荡秋澜已知宦业非时樣尤喜亲情耐岁寒志大自然羞附骥官卑何用叹栖鸾少卿膝上加文度更比年时刮眼看

病足戏效乐天体

课得退连茹药逢新太医居闲幸余暇养病任多时步履虽非便调琴足自怡晚来风雨急高卧到晨炊

叔韶弟上连桂堂榜会羣从

我家簪绂百余年书种于今幸有传折桂时能取黄牒肯堂赖子抱青毡一新扁榜照华屋共集樽罍招衆贤须信後生尤可畏要当争着祖生鞭

题林氏香岩庵

缓步寻佳处林深路欲迷偃松披数亩立竹漱三溪淪茗凭山檻呼灯照石梯轻輿空翠湿投暝喜幽栖

送汪强仲还官所

又向丹丘去安书易往还固因官事了莫放旧书闲问讯雪巢老寄怀巾子山经行皆梦境自笑日苍顔

寄题吴绍古县尉经德堂

问舍玉真下读书经德中心期知共远臭味许谁同吹笛夜凉月舞雩春暮风直须涵泳熟毋负象山翁

送季舅汪江州【大定】二首

清直如公天自知晚年百顺了无亏九城台下方还旆五老峯前又拥麾题坐喜逢陈仲举据

牀好继庾元规太平散吏无由到倚聽中和乐职诗

舅甥相与自垂髫游宦归来鬓已凋坐上可无车武子酒酣时赖盖寬饶喜公自此驱千骑顾
我从今守一瓢闲与适斋同怅望草堂樽酒幸清朝

送内弟汪耐翁随侍因赴临川推官

之子长才盍要津未知此别几经春且爲湓浦过庭子径作临川入幕宾生长外家身已老周
旋中表意尤亲从今家问须情实莫事虚文学外人

环村踏雪

一冬求雪雨还晴賸喜春朝见玉霰不为偶同佳客到谁能深入乱山行云牕雾阁知何限玉
树琼枝到处明更唤轻舟同稳泛小谿何似剡谿清

荀輿冲雪过谿桥流水方东未晚潮白里不知梅夺色青边尤喜麦成苗烟深带雨参差下空
濶随风自在飘可是忍寒请更切故求野路踏琼瑶

又次蒋甥仲愚韵

山色空蒙雪更奇满空擊碎碧瑠璃寒侵茅屋春无寐冻合梅花夜不知泛泛轻舟胜路滑洋
洋流水乐人饥兴来但觉酒肠濶江海安能实满卮

送元积弟赴永嘉酒官

宦游五载住中川似与邦人有夙缘昔日江山知好在旧游人物想依然吾衰无复逢梅福子
去惟应梦阿连或问故侯霜鬓未吾言潘令是齐年

我家清白世相传工部真清更有年百口未曾营活计一生惟喜种心田吾方奉母耕绵上子
更移封向酒泉兄弟凋零期自勉只将家训作青毡

同王原庆知道游天童

旧游曾记梦中身一日重来白发新行尽杉松三十里看来楼阁几由旬狎鸥亭外波澜濶宿
鹭池边草木春自笑赋归如许久始来此地作闲人

东谷

旧说东阿谷兹来到此山树深烟冉冉花落雨潺潺有客礼师塔何人叩祖关天连秋水远此

意尚人间

千佛阁

平横云栋塞空虚倒影仍临碧玉壶千佛威光归宝所九霄宸藻粲河图人天共叹未曾有燕雀相惊不敢踰试问南询童子看化城曾见此楼无

从子涤濯寒纳凉

杨柳阴阴映粉墙密云藏雨晚来凉高荷欲出栏干上笑挹红英吸净香

□谒告归省复还海陵

吾子远归省重闱俱粲然难留毛义檄又送子真仙西去仍千里东归约二年词场期自力收取旧青毡

题少潜兄得闲

亭下水吞空轻舟处处通闲情谁得似逸兴更何穷诗社率相过醉乡时一中我家原不远只在小桥东平日君多暇如今我亦闲人归真得地吏隐胜居山烟浪一千顷茅檐三四间天寒倚修竹空翠湿敲鬟

送从子渊宰浦江

谁云宦路足岖嶽送子之官独放心廉介有余无矫亢谦?已甚自崇深安舆何用资三釜庆问时能抵万金公退读书三子侍县斋松竹已成林

慈溪道中

双橹真成鹅鹳鸣客愁厌苦梦魂惊须臾寢觉耳根热一觉醒来天已明

题惠崇着色四时景物

旧说惠崇真画师生绡四幅见天机鹭翻桃岸韶光妩鹅浴莲塘暑气微风劲宾鸿霜始肃寒欺花鸭雪初飞分明知是丹青卷仍欲沙头唤渡归

送吴参议【襄】

才气勇无前人推季子贤侯藩聯剖竹制幕晚依莲势利从身外风流到酒边四明欣会遇两

载得周旋为记题名石仍吟达观篇留行何及矣执别但茫然我已甘投老君方欲引年未知重见日目断五湖船

即事

十日阴寒雪不成腊残春近更霜晴深山高卧如春暖遶鬓飞蚊自在鸣

吊陈卫道墓

平生学博更加详和会三家尽较量一觉可怜成梦蝶多岐终是易亡羊门前修竹连岩桂道上芙蓉间海棠何似剗除闲草木青松一色荫高冈

游大梅山梅仙岩

为忆西京梅子真人言羽化匪沈沦海濒古墓已无迹山外高风宁有神鯁论至今光汉传清风犹足荡秋旻何须更说神仙事终老市门良可人

虎冢

辛勤玉柙更珠繻或见义牙出骨须鸢兽一心能护法敝帷千载尚全躯余威凛凛空埋骨遗像耿耿若负嵎及见当年梅子熟自应惊倒老妖狐

谢潘端叔惠红梅【有序】

潘端叔惠红梅一本全体皆江梅也香亦如之但色红尔来自湖湘非他种比自此当称为红江梅以别之王文公苏文忠石曼卿诸公有红梅诗意其皆未见此种也感叹不足为赋二十絶

旧家桃李种河阳今日红梅自楚湘根塏送春君意重为移絶艷到吾乡

黄姑曾为点冰肌亦有缁尘染素衣何似臙脂天赐与暗香犹在是耶非

为君手种向南牕误认昌州移海棠元是玉妃生酒晕帐中仍带返魂香

前身施粉忌太白今日施朱恐太红说似旁人刚不信清香万斛在花中

殿後鞦红色漫糴绦桃空自笑春风何人击碎珊瑚树恼得瑶姬面发红

旧见寒花蜡蒂红宁知沁入雪肤中絶怜金谷佳人坠到地余香散晓风

梅花几种尽相闻老矣才欣见此君相与对花文字饮絶胜歌舞醉红裙
人间丹桂亦微黄未见红葩解有香惟喜此花兼衆美麝脐薰彻绦纱囊
初移湘水一枝春賸馥还欣为我分梦入山房三十树何时醉倒看红云
岁晚红英绕冻柯玉人无那醉颜酡广平赋就如逢汝铁石心肠可奈何
少陵年後咏花开未见臙脂一抹腮可惜当时诗兴动止因东阁看官梅
坡翁着意赋三诗漫说浓香已透肌若见此花应絶倒惜君生晚不逢时
花品无庸定等差国香国色属吾家海棠正自惭粗俗莫问漫山桃李花
不学江头玉树寒壽阳红粉旧妆残婵娟可是惭随俗莫作金沙锁骨看
客来试与倚阑干拂拂清香触鼻端尽教北人浑不识不应改作杏花看
全体江梅腊里芳紫绵新拂汉宫妆临川借得江梅句倾国天教抵死香
诗老为花空自忙想应未识此奇芳青枝緑叶何须辨桃杏安能如许香
只说梅花似雪飞朱顔谁信暗香随不须添上徐熙画付与西湖别赋诗
缟翬练帨玉为肌谁点微頰向北枝若是罗虬见顔色定须将此比红儿
自昔梅花雪作团红梅晚出可人看江梅不解追时好祇守冰姿度岁寒

山行

行入春山紫翠中入山深处更桃红一百五日麦秋冷二十四番花信风千顷摇青几蔽地四
山耸翠欲浮空野桥横跨溪如练待买轻舟下钓筒

金蹄

金蹄垂耳小韩卢饰以重环驯可呼谁系冬青碧阴下恍然如见擊桐图

次吴伯华韵

一身遇坎复乘流景物当前亦自由
浅草人行回作径水来沙聚看成洲
哦诗首为钩棘句适意即是逍遥游
烂醉不知门外事夕阳日日下西头

从子颢送梅枝戏作

向来地暖见东嘉带叶江梅殿岁华
不似青春三月暮南枝梅子北枝花

菁江迓客

菁江十里路透迟两岸平畴接翠微
赢得闲中乘画舫随潮西上趁潮归

午睡聽雨

老年乐事莫如闲午睡醒来梦已阑
枕上欠伸犹懒起更聽檐外雨珊珊

放鹤送潘?叔司理

冲霄六翮困蓬蒿清唳时时发九臯
鹄立固应能独出鸡羣未免叹徒劳
相投顾我怜冰玉欲去知君刷羽毛
幸脱樊笼随所适平平飞去不须高

宿育王山涵秋

清秋来此尚涵秋雨後山泉自在流
夜暗声寒鏘玉佩灯明清影粲珠旒
枕流正自怜孙楚洗耳何须访许由
我亦暂来专一壑倚栏耽玩不知休

长女涪归夫家寄以小诗

胡笳未了遽成归妇职如何敢失期
弹到佳声重入塞伯喈未免念文姬

太湖响石

何处飞来一段云太湖风急到江城
云中疑有羣仙过时聽丁东环佩声

送朱季公倅严陵

朱家族裔甲龙舒循吏清名史特书
正为嗇夫思所部至今庙食盛乡闾
舍人曾赋严公濂季子方题仲举輿
但向棠阴增蔽芾桐乡今却在桐庐

以十月桃杂松竹寘餅中照以镜屏用瀟韵

中有桃源天地寬杳然溪照武陵寒莫言洞府无由入试向桃花背後看

次周益公韵【有序】

某比从朱南劔获拜觀丞相益公送行末章齿及舅甥姓氏既又得尽见诗刻文潞公同甲会之盛世所共闻公与王钱三府名丙午坊尤为奇事今欧葛二贤士以布衣交五载与齐年之集壽乐未央高风厚谊古未有也舅氏尚书既已属和命某同赋课成五首以谢厚意

天将间气孕山川名世还当五百年已是有官居鼎鼐不妨平地作神仙书林尚欲校三豕笔力犹能驱两肩前日勲名身既退斯文留与後人传

六一先生葛稚川两孙俱并相君年词场鏖战今成梦潭府齐盟望若仙政路三公旧同甲洛阳四老信差肩坊名丙午真奇事写入诗编盍并传

顷尝假守向中川公在黄扉已数年每念夔龙容接武自期鸡犬亦登仙入朝终叹一交臂问道几思偏袒肩数仞宫墙天樣远此心何日遂亲传

别驾归来自赣川相迎方叹别经年为言相国珠玑语寄问洞庭山泽仙妙句耸观亲盥手满城争玩日骈肩退怜母子方偕隐却恐虚名似此传

舅甥相与老鄞川况值慈亲九十年画舫时追唐贺监笋輿聯访汉梅仙官名自媿偶同轍才望如何敢并肩误辱品题称酷似此声梁楚更堪传

题施武子所藏老融二牛图

佳哉淡墨扫人牛一笛横风各自由平日深知焉用稼如今但欲老西畴

乌犍离立意透迟鞭策俱忘取次归駉犊跳风仍却顾老融于此露天机

谢少微兄惠牡丹

乍观泉石分新种想为黟山忆旧葩病後不妨风韵在此花之外更无花

方翦栏干第四花玉人聯袂过吾家捻红玉翼皆名品醉眼相看到月斜

箫鼓声中醉九旬落红万点正愁人眼明忽见倾城色更向尊前作好春

戏和□诗卷

琴奕心偏好丹铅手自磨衰翁会同社吾子楫余波歌动玉条脱酒倾金叵罗好为文字饮行乐未宜多山色蓝初染湖光镜始磨竹梢轻坠雨花片乱随波麈尾挥东晋龙舟吊汨罗莫愁春易老畅饮一春多澄江如练净新月似鎌磨老柳飘轻絮良苗颭细波歌声追古郢诗价怯新罗到处还成醉芳醪旨且多暮年甘散诞壮志久消磨自媿今摩诘谁怜老伏波清新惭庾信敏慧谢甘罗惟有诗情在犹能益辨多

过从子泽家

楚楚初篁脱绿苞城居约略似荒郊土膏更得春风力直引蔷薇上竹梢

题陆放翁诗卷

沙画初惊渴骥奔新诗熟读叹微言四明知我岂相属一水思君谁与论茶竈笔牀怀甫里青鞋布襪想云门何当一棹访深雪夜语同倾老瓦盆

送内弟汪庄仲赴浙西仓幕

家食八经秋兹焉喜宦游往依王仲宝况事薛居州寄信凭鸿羽题诗寄虎丘飞云亲舍近时望海东头

赠龙游术士胡杲

方笑刘郎问大钧从来祸福本无门世间生老病死苦时至即行何足论

夜坐

晚来徐步出柴扃万变浮云在窈冥浓似铁山擎缺月薄于春絮透疎星正欣夜久沈天籁尤喜空明鬱帝青雨气未平龙欲动电光前後射中庭

再送潘?叔

我似冥鸿弋犹慕君如放鹤去还归我空今日真成去好伴闲云自在飞

以六经左氏传庄子遗伯中弟有诗来谢次韵

手披欲究百家编奴婢年来识郑玄顾我幸多千卷蓄念君未有一经全诗书心醉不容醒父子笔耕期有年此但古人糟粕尔更须从此悟真筌

书种传来直到今读书几似孝标淫欲君终就九经库与子平分一片心更向漆园穷妙旨何

殊清庙奏遗音中郎书籍付王粲想得知余此意深

中秋无月

凉意秋将半深期月影清昨霄云点缀今夜雨纵横睡久何曾着更阑喜暂晴起来聊旷望终欠十分明

赠丁相士

相形何似且论心眼力工夫见浅深古怪清奇任君说灵台一片若为寻

送叔韶弟赴官钱清

蕞尔钱清镇兹行正为贫九夷犹可处十室岂无人官守无卑小城居缓卜邻老夫平日事所至若终身

净明方丈

云深宿雨未忺晴短艇还来叩晓扃山溜拥溪侵石磴天风吹雾暗空庭茵铺野草滋新绿玉立修篁洗旧青老我时时假僧榻梦魂直向醉中醒

新辟门径或谓太窄

门外顿空旷双眸豁太虚谁欵列佳树正尔对吾庐蚤岁曾修业衰年得定居买邻贤伯仲衣锦旧门闾未辨三间屋先栽数席蔬欢娱戏菜服晨夕奉潘舆驷马容虽狭斋郎任有余牀金知己尽瓶粟岂无殊细草沿堦嫩新篁得雨初窃希仁者静未觉故人疏昼永翻名画更长理旧书何妨抱琴醉尽好带经锄耄穉同甘苦儿孙共卷舒眼花多掩卷鬓雪不堪梳少饮无求醉徐行可当车此生千万足祇愿老樵渔

小溪道中

簇簇苍山隐夕晖遥看野雁着行归久之不动方知是一搭碎云寒不飞

後衙环村尽遡游凤山寺下换轻舟舟人努力双篙急引得清溪逆岸流

送从子渊葬

晨起霜如雪天寒水欲冰引舟拖急濑扶杖立危层北阮苦多事二疏俄丧明山阿埋白璧悲恻不能胜

早起戏作

枕稳衾温梦乍回闲居不怕漏声催天明更欲从容睡长被孙儿恼觉来

午睡戏作

早起三朝当一工老来贪睡不相同偶然一次五更起却用重眠到日中

攻媿集卷九

<集部,别集类,南宋建炎至德佑,攻媿集>

卷十

钦定四库全书

攻媿集卷十

宋 楼钥 撰

今体诗

南山广莫轩

广莫垂风隘九州乱山无数点平畴一千里外在吾目三十年来无此游地下天高俱历历鸢
飞鱼跃两悠悠昌黎费尽南山句旷远还能似此不

送赵至道节推

君来入幕恰三年我幸投闲识此贤婉画时时因事见素风凛凛信家传易林律本君须寄月
□天根语是圆问讯难兄无恙否相忘千里各瀛壖

湖亭观竞渡

涵虚歌舞拥邦君两两龙舟来往频闰月风光三月景二分烟水八分人锦标赢得千人笑画
鼓敲残一半春薄暮游船分散去尚余箫鼓绕湖滨

龙潭方丈

又因寒食此中来牕户虚明絶点埃山里春风无间断海棠开过棣棠开

吊仅老塔

仅老相从五十期来瞻遗塔我心悲当时旧话无人说空有门前洗鉢池

夜携家登南渡桥

几过长桥下清宵得意行风高江水急月上海潮生空迴寒逾峭更深境过清扁舟难久驻转
桡问归程

题梦月上人送鸿小楼

雨洗春山空翠新登楼不见送鸿人薜萝清夜月依旧无复新诗泣鬼神

赠于湖刘相士

自笑今年卦气阑壮心销尽鬓毛残明知七十无多子只问何时可挂冠

五月望月蚀历家又言六月朔日蚀

间巷夜争呼相传救望舒偶因风暂破真似月之初孰谓蟊能睹端知历不疎太阳交蚀近试看更何如

题贺监李谪仙二像

不有风流贺季真更谁能识谪仙人金龟换酒今何在相对画图如有神

斗酒浇诗动百篇监湖牛渚两俱仙早知今日犹相对不向稽山回酒船

病後戏作

河鱼腹疾未全除一饭充饥不愿余纵有珍羞难下饬真成顿顿食黄鱼

枕上

不守庚申不坐禅老来触事总悠然天明门外无来客尽好萧萧听雨眠

谢蒋行之送菊

秋老怀情尽自寛眼前只欠菊花团分来三径双株秀先得重阳两日看玉輶金轻无限态风高露冷不胜寒幽人相对成清伴正尔落英供夕餐

厅事落成老母置酒喜而成诗

数椽增葺苟全时我爱吾庐喜得归儿辈粗能勤父蛊老天无不费心机年来每愧踰初望病里尤知悟昨非从此萧然无一事但当日舞老莱衣

十月十七日夜

蛰虫坯户六经旬掣电惊雷若暮春震起昆虫千百亿不知何处更容身

织锦綦盘

锦城巧女费心机织就一杼如许齐彷彿回文仍具体纵横方罫若分畦烂柯未易供仙奕画纸何须倩老妻如欲拈綦轻且称当求白象与乌犀

叔韶弟以退堂洪老诗来寄谢

不受人天供甘心乐隐居空穷千里目笑拥一楼书攻媿老无用退堂闲有余相望可杭苇何日访吾庐

寄题正卿通判可高亭

樟坡直上可高亭未见高高祗见名想像岂能胜一览登临安得快双明大龙湫下听雷吼白石岩头看日生咫尺好山随杖屨自应老笔擅诗声

中秋次从子涪韵

雨余不见日西沉将谓中秋又作陰佳月忽开千里影骚人满慰一年心扫除尘翳风难动滓濺太清云尚深坐待寒光谁会此阿咸为我发微吟

杨花

杜门无绪看芳菲见说杨花满路飞谢汝不随人冷暖因风翻舞到柴扉

送赵南仲丞溧水

不用怱怱恨别离版輿春昼彩衣随往题斯立蓝田壁更访清真溧上诗公事毋庸倚牙角邻封真是和埧箴日哦新句频相寄明月清风慰所思

戏题龙眠马性图

狗子已知无佛性马又何曾有性来伯乐若来休着眼任他骐驎混弩骀

他山

素蛭横卧作雷吼日射细鳞银色光安得此身如白鹭翛然终日在梅梁

过尽水禽竝野鳬风标惟许一春鉏可怜久立梅梁上不为谿光祗为鱼

小酌元卫弟听雨

小阁临流暑气清藕花的的照人明移牀更近栏边坐要听棊声杂雨声

瀟再往剡中念之尤切作诗宽之

剡县不为远丞官勿谓卑鼓盆知爱重去国倍行迟堂上森三老房中秀一儿加餐了官事莫
赋悼亡诗

观云寄简讲师

苍狗哦然又白衣来从何处去何归无心出岫还归去莫向秋风说是非

过故家

团团桂树拥檐牙旧日轻黄满树花惆怅秋清无一叶空余枯枿缿寒瓜

题从子浹娱亲

阿戎筑屋为娱亲野草闲花日日新我奉版舆来举酒祈君亲寿似夫人

丹桂

碧云步辇紫金蕤风静秋高千万枝娇额涂黄元自好是谁深傅蜜臙脂

下元日暖甚夜风雨大作早微雪从子灏以醪醑来

眼明喜见早醪醑牕外风号集霰时梅蘂已慙前腊破芳心休用怨春迟纳凉除夜昨几似见
雪芭蕉今不疑若使洛人真得此应须更诧百宜枝

送朱□正守南劔

舍人簪笔旧甘泉家学相传子姓贤未羡夹河为太守阿连剖竹向封川

樵李曾蜚剗剧声贰车仍赞虎头城朱轡小试承流手要继桐乡循吏名

万竹蟠山喉不乾两龙潜水气犹寒郡斋见说真图画公退何妨一倚栏

下水上山腰带州人家无数起危楼遨头不用喧箫鼓祇把清诗纪胜游

同盟东下或西征老我惟知管送迎祇恐政成登省户未容归骑向西城

名画法书知几编捧铨宁复计求田摩挲賸买新文字归满米家书画船

送杓孙随侍上虞

阿斗生来十五年未曾一日去翁前闻诗勿废家庭问习吏仍求城旦篇婚宦有涯真是幸巾箱所蓄要相传荣鬯虽小性非鲁口授诗书加爱怜

戏作

二子为丞分越邑女儿随壻过江南笑言屋里成岑寂匹似当初只住庵

诸茔拜扫晚归长汀

雨意早垂垂寒云晚更低空中时散点道上不成泥綠柳桃相映黄花麦与齐纡回余百里喜见旧松堤

送朱季公守封川

韶阳生长十余年城郭重经固宛然叹息紫薇仙去久尚余遗墨照山川【先舍人居韶十四年季公生于壬戌】

桐乡汉有大司农封守今推陈秀公君向邦人着遗爱近追相业远家风【陈秀公曾守封川有遗爱】

乡评久说鴈行贤剖竹封川与劔川不用对牀风雨约政成问取旧青毡

吾乡基社寢凋零赖有朱家好弟兄举酒看看故人少阳关莫唱断肠声

妙舞清歌有二姝後堂曾见绣罗襦岭南太守风流胜不用归舟载綠珠

以玉兰赠王习甫

一种香兰玉色新仙家分得蕊宫春调高韵胜谁能称付与能言解语人

华屋翬飞庆事縣芝兰玉树喜庭前似闻楚畹芽初茁便看蓝田生晚烟

送赵清臣宰姚江

玉立君家好弟兄蓝田风采照花城
版舆寿母人间盛千里何曾去送迎
鄞江水与舜江通久矣威名满一同
试问何时到封部数声柔橹一帆风
长江东去跨虹桥千丈横堤扞海潮
更向烛谿图永利坐令百里沸歌谣
才刃恢恢妙拨烦邻封抚字尚何难
更能触事加长虑自有甘棠向後看
归家故步懒重寻藏拙年来恐不胜
短棹有时乘兴去径登竹所听鸣琴
杨花

雨压轻寒春较迟春深不见柳绵飞
忽然飞入闲庭院疑是故人何处归
柳绵无数糝枝头日暖随风扑画楼
万象可观惟有雪喜看晴昼满空游
为我轻攀绿柳枝带花低护笑携归
日长深院微风动要看松绵当面飞
野芳庭草是生涯老去祇宜闲在家
几日惜春留不住小鬟为我拾杨花

送王伯奋守筠阳

三槐名德萃清门七叶为州赖有君
道院无忘山谷赋郡斋当继颍滨文
君应膝上邻文度我向东牀忆右军
振起家声差易耳便看奏最蹶青云

别王恭叔

两儿虽近隔江潮赖有王郎慰寂寥
远侍双亲官道院为同尽室饯西桥
脑脂遮眼最关念客路寻仙勿惮遥
别後飞緘问安否数来谷口访山樵

别长女涓

老我年来百念轻文姬助我以琴鸣
等闲相对成三弄游戏俱弹似一声
举酒不堪千里别登途知用几程行
郡斋自是神仙窟会有堦庭玉树生

赵资政园梅篆

小径回环里许长寒梅森列间疎篁
路如古茧萦繆篆身似轻烟縑印香
九折坂中经蜀险八盘岭上趁朝忙
归来游戏通幽处笑看危途几太行

示从子

东院敲棋西院琴固知犹胜别劳心少年不比老痴叔且向书牕惜寸陰

贈画梅吕生

西湖处士赋疎影未似希贞好乐章岂是无情甘澹泊受他风月几凄凉

瀟自剡州寄水晶蒲萄

马乳从他堆满盘未如清嚼水晶寒固知一县蒲萄熟不用劳人数问安

送汪庄仲赴江东仓幕强仲荆門簽判

不见适斋老于今三四秋弟兄登宦路亲党驻行舟老病无诗思衰怀重别愁外家门户盛勉力绍箕裘外氏蒙恩厚文昌独我知居慚酷似舅喜有宁馨儿遇事行方便褫身谨护持公余定多暇黄卷有余师早岁过秋浦贪程不入关君今参俭幕时得上齐山肤使资关决贤侯伴宴闲好音频寄我藉此一开顏之子游何许平州更玉州山川称胜絕幕府信风流翠巘寒逾秀金莲夜不收天涯念乡国少上仲宣楼见说荆門地如門蔽楚荆旧时为内郡今日号边城但守平平策毋求赫赫名勉哉关决际从此振家声

送元积弟赴淮东总属

南徐来往饱经过总饷宾寮入礼罗子去幸陪邹湛輩君今还是伯休那金闺通籍时方可铁瓮名城景最多我有净名遗记在试从万井访维摩

十人兄弟五人存心事方欣得细论可但衰退怜远别只因喜惧有慈尊倚門何止期吾子发策还知望好孙从此三年风雨夜寂寥碁局与清樽

陈君举既亡汪文子携其所作春秋後传及送行诗来次韵

名盛望有备枝披实亦繁无由究贤业犹幸立斯言书在经逾显人亡道更尊九京如可作与子共南辕

送赵伯藏倅永嘉

当代投闲老吏师佳儿官业具而微已烦潘令宰花县正要王祥康海圻得助江山诗兴逸平分风月羽觴挥安车何日迎清献又向堂前戏彩衣

分教分符恰五年异乡每若故乡然归来几作池塘梦送别欲随骑御仙目断甘林应饱熟手栽
栾实想芳鲜邦人若问老州牧为说清霜绕鬓边

昼寝

弹彻悲风更广陵沧浪一为濯尘缨邯郸枕上梦初觉喜听檐间风雨声

唤仙阁

上到危层莫唤仙才凭横槛挹江天江天如许来供眼何用王乔更偃佺

多少寻仙更不还渺茫竟堕有无间使其真有毋庸唤仙自层城我自山

犯暑来登览松风为洒然龙泉登古井虹影卧中川万簇寒林秀四山秋色鲜诗翁不可见况敢唤飞仙

送赵敏之丞彭泽

淮甸归来涉学深孤云又出亦何心公余岩下读书去远继风流石橘林

渊明事晋肯臣刘仁杰忠良不附周见说三贤参羽士【尉斯光】盍将吴簿配苹羞【南唐吴举为彭泽主簿有高节见六一集】

陶令居官八十日始为督邮方赋归君家门户要兴起未用飘然咏式微

阿虞试晬戏作

阿虞匍匐晬盘中事事都拏要学翁最是传家清白处不将双手向顽铜

赠别卢甥申之归吴门

千里何妨命驾迟晤言未厌已西驰子休重赋琼瑰赠我亦懒歌亲戚离好向清江论乐府更从叶子说新诗乐闲引纸五十尺为篆离骚继李斯

又谢申之示诗卷

不见贤甥十一年新诗示我百余篇古风已喜能行意近体尤欣细属联宅相真成珠在侧冷官休叹坐无毡作诗勿谓今余事更下功夫继玉川

送秦仲防通判

清德曾瞻啓庆碑孙曾清更畏人知祗缘一介弗轻取坐使斯民不忍欺
濂水家传御书卦宣城手写送行诗典型尚继金銮旧马氏一门谁白眉

题輿再到海东涯嗜学深于入幕时一字未通终不置五行俱下尚嫌迟
情亲端有卜邻意别後空劳望月思老我无因可重见祝君来此拥旌麾

谢剡中沈元龙惠诗

东阳何事到东州百语曾无一语酬深羨松筠无败叶自言蒲柳已先秋
千金既觉成虚掷双璧还惊又暗投别後未知何日见但将吾道付沧洲

谢舒景叔写照见赠

谁写衰容入画图本来面目旧形模几年老瘦鬓如雪不道今吾非故吾

庭前一莲着花

门外荷莲浥露华緑云平地拥秋霞病夫不耐出门去且看庭前第一花

涓月下鼓琴用□韵

老穉团栾鲤在庭文姬为鼓玉琴声起来同作悲风曲倍觉先秋月影清

国仲观迁居尹阨访别

晚年未定一枝巢到处盖头无把茅又欲浮家过尹阨何殊乐道向莘郊
君今去此难招隐老更从谁可定交见说衡门临野水秋深容我去推敲

仲观有诗来谢次韵

危机屡见劒头炊喜及挂冠神武时从此含藏三寸舌算来插得几张匙
读书牕下频勤习攻媿庵中老住持速办小舟频往返及今精力未全衰

谢王粹中惠白鹤山麟川观斑竹杖竝竹輿

麟川仙馆翠琅玕荷子携来白鹤山未效葛坡龙种化絶胜湘浦泪痕斑
裁为柱杖一寻许巧作乘輿四尺慳儿子门生俱努力病夫欲过虎谿还

曾无逸郎中名燕居曰和三续社有诗次韵【欲和会三家以续双林】

通地通天祇个中千岐虽别大都同两家偶尔流传盛一贯临之内外融欲境扫开心在我浮云散尽月当空感而通者後來语不感须知自有通

老来

老来何以度光陰祇有围棋与鼓琴碁为心劳疎对局琴因臂弱倦调音曲肱时复同尼父面壁何妨学少林气习未除祇自笑又还弄笔动微吟

长生草

玻璃擢叶玉蟠根千里提携寄海滨雨泽不沾仍自润土膏无着自长春岁寒秀色镇衣旧日暖素英能一新我欲饵之求久视恐君灵已不灵人

谢黄汝济教授惠建茶竝惠山泉

几年不泛浙西船每忆林间访惠泉雅好谁如广文老亲携直到病夫前细倾琼液清如旧更瀹云芽味始全或问此为真病否其中自有石如拳

史子仁碧沚

相家本有四明山更葺桃源渺莽间四面楼台相映发一川烟水自弯环

中川累石势嵯峨城上遥岑耸翠螺旧说夕阳无限好此中最得夕阳多

题赵曦远二画

藻飏数尾已如生妙絶鱼儿作队行不是深知濠上趣未应笔底得纵横【鱼扇】

牕前惊见一枝斜照眼英英十数花千载简斋僊去後何人更着好诗夸【墨梅】

送陈表道倅岳阳

垂上青云去如何乘贰车轻为千里别时寄几行书剗剧才无滞传家学有余当涂足知己应不费吹嘘闻说巴陵好楼高占古城湖光千顷白山色一螺明赤壁沈沙戟苍烟老树精好诗收拾下寄我慰离情

元珍弟酌别赋此赠之

归来十暑又三霜衰病那知谒帝傍采菊初期老陶令种桃应是笑刘郎不辞白首登鳌禁正欲青衫及鴈行今夕团栾同醉後未知何日驾归航

灵芝寺

送客灵芝寺凭栏山有无自从朝北阙始得见西湖烟外移轻桨波间浴野鳬清寒不可驻回首又神都闻丘医视脉曰老人之脉如小春有感

老去光陰似小春如何比得少年人君看桃李秋风後纵有花开不是真

贡闱对砚盘发叹

老去未忘黄与朱琢成三砚乐闲居岂能更作诸生业但欲频看後世书视草北门才已尽持衡南省计尤疎便须再挂衣冠去约汝同归故草庐

次韵李孟远使君与林雪巢子季武诗

古梅巨石瞰清池觴咏曾陪老啓期别我遂成千古恨传家空有一篇诗使君尚尔悲陈迹处士惜非同此时若使南楼预清赏胡牀应奉庾元规

玉堂早起

早起多奔走旬休亦往还偶因二士试始得一朝闲灵鹊花枝上金鱼荇蒂间素餐终有媿只忆旧家山

赠徐松

我为浮名媿引年老余八十尚飘然不如合却谈天口归向白云深处眠

经筵讲诗彻章进诗

圣主承丕祚于今岁几迁昭回光饰物刚健位乘乾善治新更化当阳独揽权诛鉏及共鯨擢任列闋颠曩日方谋始宸心最急先未遑亲政理首务关经筵恭俭甘卑室尊严拱细旃书居勤已甚坐侍礼无前讲彻诗三百时逢运半千诸儒深诵说六义极摩研俯阅毛公传旁参郑氏笺慨寻中古意重是素王编旧本三千首终存十二篇虽遭煨烬厄三赖咏歌全开迹因农事安民在井田成功时迈酌兴业大明縣东国思平赋南山乐得贤艰难由后稷劳来美周宣起自绍熙载迨兹嘉定年关雎从肇彼殷武遂终焉宠数传中旨恩光被迹聯神文期继踵元佑信齐肩内厩颁云骑雕鞶绚锦鞞茗分龙焙品香拂御炉烟衆俊咸宣力孤生亦备员少时会学咏老去未忘筌纳禄诚休矣归耕久晏然锋车俄促召梓里谓登僊词禁容挥翰天官命

典铨岂知侵暮境重得侍甘泉朽质何能报孱躯殆欲捐尚思求谏海岳效尘涓

题天竺珪老复庵

路从天竺更微南衲子邀余过复庵八法照人瞻睿藻一峯当户拥晴岚奇文初动玩羲画万物竝观师老聃六用不成均此理楞严容我为同参

为倪正甫尚书题壮怀堂扁以诗来谢次韵

久矣君宜任弼谐果随驿召上天阶几年不作相逢梦一日俄倾积别怀情厚夫君几鲍叔愚如老我类高柴他时户册高悬後直欲扁舟访水涯

攻媿集卷十

卷十一

钦定四库全书 集部四

攻媿集 别集类三【宋】

提要

【臣】等谨案攻媿集一百一十二卷宋楼钥撰钥有范文正年谱已着録其集载於诸家书目者或作百卷或作八十五卷而世所传钞本有仅存四十二卷者盖流传既久多所佚脱此本原作一百二十卷与宋史艺文志及陈振孙书録解题所载相同犹为旧帙惟中缺第七十七卷据原目为宣王内修政事光武大度同高祖二赋玉卮为壽宅道炳星纬二诗用人安民治兵三策又缺第七十八卷据原目为御试进士举人台试馆职阁职省试别试解试上舍州学诸试所拟策问十五篇又缺第七十九卷据原目为宴会庆贺致语十五篇上梁文四篇劝农文二篇其第七十三卷据原目缺跋王伯奋所藏文苑英华跋清閤居士临修禊序二篇第七十四卷据原目缺跋刘元城江谏议任谏议邹道乡陈了斋五谏帖一篇而第五十六卷中扬州平山堂记亦缺其後半诸家所藏刻本钞本并同今俱无从校补至第四十八卷第八十卷第八十一卷第八十二卷有青词朱表斋文疏文之类凡一百六十七篇均非文章之正轨谨禀承

圣训槩从删削重编为一百一十二卷用聚珍版摹印以广其传钥居官持正有守而学问赅博文章淹雅尤多为世所传述本传称其代言坦明得制诰体叶绍翁四朝闻见録载钥草光宗内禅制词有虽丧纪自行於宫中而礼文难示于天下二语为海内所称此言其工於内外制也本传又称钥试南宫以犯讳请旨冠末等投贄诸公胡铨称为翰林才今集中谢省闱主文啓一首即是时所作此言其工于启劄也王应麟困学纪闻取其门前莫约频来客坐上同观未见书二句载入评诗类中此言其工於声偶也而袁桷延佑四明志称其于中原师友传授悉穷渊奥经训小学精据可传信尤能尽钥之实盖宋自南渡而後士大夫多求胜于空言而不甚究心於实学钥独综贯今古折衷考校凡所论辨悉能洞澈源流可谓有本之文不同浮议王士禎居易録称其行尽松杉三十里看来楼阁几由旬一百五日麦秋冷二十四番花信风水真緑净不可唾鱼若空行无所依诸句而病是集多丛冗谓表状内外制之类删去半部亦可然贪多务博即诚斋剑南平园诸集亦然盖一时之风气不必以是为钥病也至於题跋诸篇尤多原原本本证据分明不止於居易録所称三笑图赞吴彩鸾玉篇钞唐昭宗赐懌实勅书三篇毛晋辑津逮秘书摘録宋人题跋共为一集而独不及钥其偶未见此书欽乾隆四十六年六月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

攻媿集原序

鄮山参政楼公攻媿先生文集一百二十卷建安真德秀伏读而叹曰呜呼此可以观公立朝事君之大节矣盖公之文如三辰五星森立天汉昭昭乎可观而不可穷如泰华乔岳蓄泄云雨岩岩乎莫测其巅际如九江百川波澜荡潏渊渊乎不见其涯涘人徒覩英华发外之盛而不知其本有在也庆元初韩侂胄除知合门事忠肃彭公力谏改侂胄内祠彭公予郡公在琐闼极论之云去者不复侍左右留者召见无时终不能远时侂胄之恶未着也既而窃弄国柄以党论尽锢天下贤士挑敌弃盟中外骚然天下始服公先见朱文公侍经筵内批予祠公持其命不下曰当今人望儒宗无出熹之右者奏虽寢然当邪说充塞之时首倡学者共尊朱公後卒赖其言而学禁遂开道统有续然则观公平生大节而後可以读公之文矣公生于故家接中朝文雅博极羣书识古文奇字文备衆体非如他人窘狭僻涩以一长名家而又发之以忠孝本之以仁义其大典册大议论则世道之消长学术之废兴善类之离合繫焉方淳熙间鸿硕满朝每以奏篇出其援据该洽义理条达者学士大夫读之必曰楼公之文也一诏令下其词气雄浑笔力雅健者亦必曰楼公之文也呜呼所谓有本者如是非耶公既齟侬侂胄之锋退居却扫者十有四年嘉定初起为内相俄辅大政向来俦辈凋丧略尽而公岿然独存遂为一代文宗德秀尝窃论南渡以来词人固多其力量气魄可与全盛时先贤并驱惟钜野李公汉老龙溪汪公彦章及公三人而已念昔校艺南宫自事东府或清言竟日或极论达旦德秀退而书绅终身诵之其所以犹爲当世善人君子所与而不遂为涂人之归者公之教也公季子治以集序见命德秀何敢辞建安真德秀谨序

钦定四库全书

攻媿集卷一

宋 楼钥 撰

古体诗

攻媿斋

余以攻媿名斋俞致翁惠书谓若无媿可攻者读之悚然不敢当以谢之

圣贤不得见道散固已久学者多自贤鲜肯事师友顛冥声利中悔吝皆自取动言无媿忤未知果然否寡过云未能先圣欣善诱凛凛孟氏言几希异禽兽参乎病知免遂使启足手宁知起易箠又在此段後吾侪况小人气质素凡陋以其所以养孝道亦何有勉前类水马立处只如旧倘复不自立其末当愈谬每思攻所媿扁榜铭座右三诵故人书慙汗几欲溜夫岂爲戏言知君于我厚因之更加警补过尚无咎

谢湖山居士示和陶诗【吴给事芾】

渊明千载人风节仰孤峭岂惟辞督邮莲社不得召书不求甚解眼高得玄要诗亦本无意但写胸中妙齐梁纷衆作嘈杂春禽叫稚子候檐隙文通剧搜绍矫矫玉局翁尚友谢浮漂饱吃惠州饭追和欲同调湖山老居士宏才盖廊庙出入官五纪怀归自年少屡賸归来辞吾行有先兆老龙卧林壑年高德弥劭向来批勅手甘心事耕钓筑室据仙居泉石造深奥亭榭望堂皇蓬莱对圆峤涉园日成趣遇客酒频醕岩岩鸾鹤姿炯炯双眸了堕体黜聪明坐忘乐遗照西畴时告春东臯快舒啸襟期古暗合此事不容诏尽和靖节诗笔走追风飘又如斐旻剑腾空径投鞘人生嗜欲深山林不供烧何当从公游翛然宁荷篠小子敢言诗未免事华影西施难效顰邯鄲恐貽笑思欲焚旧藁世味轻咀嚼稍寻韦苏州旁引孟贞曜絶去翰墨畦母凿浑沌窍尚或庶几焉未暇期速肖

送袁和叔尉江阴

澄江少日曾经行高城傍有长江横君山特立江之汀下瞰淮甸一堂平中港引潮深无声万顷灌注滋农耕战国今几二千龄黄歇此地犹垂名旧以邑属南兰陵疲于奔命吏失宁今焉裂地为专城独当一面行双旌井市虽小民厚生四十万缗输赋征舶商辐凑衆货赢牒诉简省官曹清一邑负郭相依凭守宰同僚齐弟兄脉络贯通易尽情尉职无卑近编氓坐閱是否真权衡傍郡孔道困将迎我乃静趣如郊坰安舆并行人子荣况有海错供庖烹河鲀鲋 鲜不鯉车螯蛤蟹均藜羹夫君传家有典刑父子知己人一经诗书满门不慙卿岂羨汉士黄金羸荐口久已彻帝京九万自此开鹏程平生寒臆照短檠兴亡千古无遁形妙年射策当彤庭归领後生为主盟友朋讲习诚专精世故多端须饱更京口直下连沧溟官府濶稀行旅惊边头久无夕烽青要在弹压潢池兵簿书期会勤经营人物酬应审重轻一言行之可终身谨毋失己毋失人赠人以言岂吾能颇尝于此三折肱举以送君君试聽

登育王山望海亭

瘦藤挂破山头云山溪尽处开危亭平田万顷际大海海无所际空冥冥乾端坤倪悉呈露飞帆去鸟无遗形蓬莱去人似不远指点水上三山青褰裳濡足恐未免倘有飈驭吾当乘是中始觉宇宙大眼力虽穷了无碍云梦八九不足吞回视尘寰一何隘曾闻芥子纳须弥漫说草庵舍法界看我振衣千仞冈笑把毫端卷烟海

林景思雪巢

四时不皆雪陆居本非巢高人兴寄远表此一把茅吾非二祖可夜立寒齐腰吾非鸟巢师结庐置树梢白日照我心不以见晛消两脚踏实地风雨无漂摇作诗穷益工寒瘦逼岛郊落笔句惊人不复寻推敲客至不问谁淡若君子交直气干霄上不视鄙斗筭富贵顷刻花畴能等幻泡附离如幕燕自谓漆与胶先生閱世熟兀坐山城坳春阳会有时岂曰终系匏锡山寄雄文凜然?髮毛我非敢言诗为君聊解嘲

题龙眠画骑射抱球戏

綠楊几枝插平沙柔梢裊裊随风斜紅綃去地不及尺錦袍壯士斫鬚射橫磨箭鋒滿分靶一
箭正截紅綃下前騎長纓抱綉球後騎射中如星流綉球飛?最難射十中三四稱為優元丰策
士集英殿金門應奉人方倦日長因過衛士班飛騎如雲人馬健駕幸寶津知有日窮景馳驅
欣縱觀龍眠胸中空萬馬駭目洞心千百變追圖大槩寫當時至今想象如親見靜中似有叱
咤聲墨淡猶疑綉綵閑牕撫卷三太息五紀胡塵暗几甸安得士馬有如此長驅為決單于
戰

題羅春伯所藏修禊圖序

東游登會稽只見蘭亭不見碑北過中山府欲訪此碑不知處間從故家看墨本如此二者絕
難遇曾經耶律毡裹去至今薊北猶知慕時將一二饋北使持歸往往快先覩未知玉石真在
否要比江南終近古他日縛取呼韓作編戶勒銘歸來過定武只問君王乞此碑打向人間莫
論數

題孟東野聽琴圖因次其韻

誰欵住前溪夜深以琴鳴天高顥氣肅日斜映疎星橡林助蕭瑟泉聲激琮琤彈者人定佳能
使東野聽束帶不立朝遙夜甘空庭龍眠發妙思神交窮杳冥不見彈琴人画出琴外聲郊寒
凜如對作詩太瘦生恨不從之游撫卷空含情

壽安撫伯父

東樓德澤流無窮我公挺生慶所鍾琮枝玉樹瑩精彩迥然不墮風塵中少年慷慨吐虹氣文
彩元不減侪輩胸中妙蘊經綸才剴劇裁繁特余事曾從蓮幕試牛刀舉城但識劉功曹瀾翻
荐口動天聽一語便逾華袞褱上方欲革嶺南弊柬才果得吳刺史不妨一勾飲貪泉清德泠
泠今可紀凭軾雍容安七閩列郡合詞稱得人從茲十載秉麾節坐令萬里回陽春洞庭風月
瀟湘雨君王無復憂南顧抗章乞得半生閑遙指山家賦歸去廟堂未肯閑宏才大開東閣需
公來朝隨召節赴天闕夜馳使駟歸長淮廣陵卧治要汲直金節熒煌照熊軾底用腰纏十萬
錢且看身享二千石忽思鮪脰寒菹羹拂衣欲遂鄉關情視去西陽如脫屣意色蕭然同鬪生
畫船重泛西湖上水光山色都恁恁主人管領東風回故園桃李倍清爽六鰲背負三山歸輪
困老桧蒼龍姿了無塵俗敗人意斐兒長物皆瑰奇橫岸綸巾披鶴氅神情直出羲皇上塵事
到頭曾不聞卧聽歌台傳緩响百花堂前手自栽興來一杯復一杯人生亦欲自适爾富貴于
我何為哉仲春況屬懸弧旦使君亭榭風光煖東君豫借一分春不許芳菲作春殿綺羅香深
初肆筵弟兄酬酢盃相傳此時更復借一醉君從何處拌垂蓮五侯貴盛德未美簪纓不滿高
陽里何如清白傳家風奕世青毡盡朱紫燕居今喜相比隣其如四海須陶鈞羽書鼎來在朝
夕何數羔雁徒成羣芙蓉城中有仙室十洲三島環其側此中樂不減商山功成歸作茹芝客

送伯舅汪運干【大雅】

人生自古悲别离，今日何足悲。试问今日行者谁，鄞江名族真男儿。虬须燕颌，躯十围，凛凛端有熊豹姿。毅然刚立，不怒威笑，视鼠辈何脂韦。州县小试，囊中锥，政绩今在衆口思。姓名通籍黄金闺，便泛王俭红莲池。平时幕府多素尸，坐縻公粟邀以嬉。只今方当多事时，正要名士同驱驰。森森百万虎，与貔荷戈分驻淮。东西两淮千里双使麾，幕中僚吏皆耀犀。惟公婉画明蓍龟，辩如悬河不可堤。胸中武库深难窥，决策固有堂上奇。朔风吹空黄草齐，正恐秋高胡马肥。万人相顾目睽睽，见公此去多腹非。公独襆被行不疑，单车西去征马嘶。平生气槩冲虹霓，恨无尺箠答羌夷。方今天相中兴期，黠虏戴头来边陲。顾公速蹈功名机，匈奴不灭何家为。出门千里何足辞，但愿满引金屈卮。

夜月泛舟姚江

秋暑不可耐，几思泛中川。晚来兴有适，溪船偶及门。凉月才上弦，平湖可黄昏。倚楫纵所如，卧看龙泉山。长虹跨空濶，过之凛生寒。坐稳兴亦佳，夜气方漫漫。草虫鸣东西，飞鸟相与还。仰头数明星，垂手摇碧澜。主客惜此景，不及携清樽。无酒要不恶，徜徉足幽欢。幽欢有何好，扣舷澹无言。

送王正言守永嘉

江头潮生江月小，暝烟绿暗垂杨道。有客扁舟送使君，道傍不怕揶揄笑。向来一别三换岁，正喜亲情得倾倒。吏民引领望推麾，空有离愁满怀抱。使君读残万卷书，古事今事俱了了。便应珥笔侍天陛，不然代言登凤沼。瀛壖山水久寂寥，为屈朱轡来坐啸。岾嶂峰高旧题咏，赤城所在经行饱。永嘉名郡太守尊，灵运后来诗绝少。天作雁荡地为藏，蜡屐穿山未曾到。改辕却向个中去，更得江山助诗好。斋铃静处定得句，不待池塘梦春草。去年海水上平地，大风驾浪从天杪。苍生泯泯生鱼头，聚落随波迹如扫。今年二麦连野秀，田家扶犁事耘耔。使君忧国眉不开，叱驭径行仍及早。哀哉千里方更生，县官租钱酒力晓。纵民自恐上不足，诛取何怜下无告。邦储邦本孰轻重，肯使疲民困征扰。君不见岩岩千古阳道州，政拙催科自书考。

游龙瑞宫

隔山望危石，老面凛如铁。路回两屏开，见此高嵒崿。伟哉名公卿，峨冠会朝列。又如鼓雷霆，玄云助击烈。痴云不作雨，空翠袭冰雪。野水不知源，遶径几万折。子长真爱奇，万里探禹穴。我家甬水东，扁舟轻入越。窃此半日闲，到处辄清绝。传闻古洞天，琼台照金阙。神仙杳难问，一笑山石裂。相逢客路中，翻手数年别。胜地更跻扳，莫厌屐齿折。

三日不得过都泗堰

南朝何公栖禹穴，嘉遯悠然老高洁。一朝送人都泗埭，归叹此途於此绝。我亦何为走尘埃，数年不记几往来。船横三日不得度，愧想高风安在哉。

宿佛日山

平生临平山知诵藕花句轻帆几来往山色澹如故宁知千万峯中间着佳趣萧萧苍髯翁为指花城路我来春正浓天寒日将暮云深钟呗鸣自喜得胜具缅怀玉局仙老笔扫朝雾玉槃俨相持珠旒竟何所惟余渥洼水苍龙角牙露人间翻覆手烈日变烟雨俗子眩炎凉三四错赋芋道人笑视之万化随所寓深坐十笏地一息了千虑个中谁得知幽鸟背人去

求仲抑招游山归途遇雨

竹舆遶湖滨宿露尚厌浥径到玉岑下坐久客始集起穿灵石山万松介而立梅天气清润空翠行可挹古藤几百年枝蔓两山及见说暮春花紫光熠熠直疑老潜虬初起夜来蛰俯玩岁寒泉齿冷不敢吸相将上龙泓尘鞅谢羈?洞有灵兽居临深心岌岌鱼游明镜中巨浪无三级寒苔载水去万顷润原隰蒙蒙山雨来归仆鸟飞急野兴殊未已日昃不暇给冲泥上湖船雨阵遽奔袭飘风将急点回旋惊四入中流益荡兀短篷不当笠停篙亦久之怒势不少戢我徒方啸歌弗谓改豪习但苦瓶罍罄莫问衣裳湿

吴江舟中

阿连久已共一被小别愁生夜无寐风帆将我上征途回首江中日千里小舟横卧吴江水梦回依约萧斋里五更漏急月黄昏鸟散一声人未起

读范吏部三高祠堂记

三高之风天与高三高之灵或可招小山以後无此作具区笠泽空寥寥几从垂虹荡双桨寓目沧浪独怊怅笔端不倒三峡流欲遽招之恐长往前身陶朱今董狐襟抱磊落吞江湖瑰词三章妙天下大书深刻江之隅我来诵诗凜生气若有人兮在江水扁舟独钓脰鲈鱼茶竈笔牀归南里先生同是丘壑人只今方迫功与名谢公捉鼻恐未免便看林藪生风云他年事业满彝鼎乞身归来坐佳境不嫌俗士三斗尘容我渔蓑理烟艇

仙都独峯

汉家武彻求神仙方士搯掌多夸言蓬莱隔海不可到属车徜徉上乔山传闻黄帝久仙去胡为有石高漓岏游谈不经理欲屈漫言此地藏衣冠缙云自是仙窟宅万壑千岩比如栳突然一石摩青云造化应劳巨灵擘仙风吹堕碧莲花玉井半空人不识望之不计几千尺八柱擎天此其一伯夷制行高且孤万世犹能立懦夫英魂凜凜今不死化作此石山之隅横斜辙迹依然在我亦何能穷古初

灵壁道傍怪石

饱闻兹山产奇石东南宝之如尺璧谁知狼籍乱如麻往往嵌空类鐫刻长安东南万岁山搜抉珍怪穷人间汴流一舸载数辈径上艮岳增孱颜当时巧匠斲山骨寘之江干高突兀干戈动地胡尘飞坐使奇材成弃物君不见黄金横带号神运不数台城拜三品只今零落荒草中万古凄凉有遗恨木人漂漂不如土坐閱兴亡知几许行人沈叹马不前石虽不言恐能语

括苍溪涨

雨余大溪触山流气势直欲凌沙洲浮梁中分断蟠螭流沫东去行蛟虬人家嘈嘈避新涨云稼苒苒添平畴渔翁轻生有如此小艇横絕随飞鸥

石门洞

扁舟百里遶城回青山中断立两崖清都虎豹隐不见但见阊阖排云开峯回失喜大飞瀑声震万壑惊春雷掀髯目极九霄外玉虹千丈飞空来一冬青女靳天雪不知聚此山之隈传闻神龙卧其上宝藏击碎真琼瑰胸中先自无尘埃到此更觉心崔嵬天风为我噀空翠春水泻入骚人怀谪仙曾来写胜句刘郎又为开天台我慙笔无挽牛力醉墨满壁谁为裁或言龙湫更奇絕鴈山高处深云埋我方携筇往寻访未知比此何如哉

大龙湫

北上太行东禹穴鴈荡山中最奇絕龙湫一派天下无万衆赞扬同一舌行行路人两山间踏碎苔?屐将折山穷路断脚力尽始见银河落双阙矩罗宴坐看不厌骚人弄词困搜抉谢公千载有遗恨李杜复生吟不彻我游石门称胜地未信此湫真卓越一来气象大不侔石屏倚天惊鬼设飞泉直自天际来来处益高声益烈溟池倒泻三峡流到此谁能定优劣鴈山佳趣须要领一日尽游神恶?骊龙高卧唤不应自愧笔端无电掣轮囷萧索湍不怒非雾非烟亦非雪我闻冻雨初霁时喷击生风散空濶更期雨後再来看净洗一生烦恼热

连云亭望海中诸山

鴈山本在云海中波涛千古相撞春泥沙洗尽见山骨岩壑所在皆玲珑是谁一口汲水尽平地卓立成奇峯至今往往有遗迹相传渺漭何能穷我乘单车来自东佳处十数一览空晚登四十九峯顶旷望巨海烟蒙蒙羣山错立不知几朝日照耀天霞红是间瑰奇定多有鲸波掩蔽深莫通我无太真燃犀法安得一闯冯夷宫会闻沧海变成陆却与鴈山争长雄

寄题张法曹瞻云轩

张侯名轩意可知如登太行看云移我虽未得登轩墀不鄙要我巴人词尔时膝下邀以嬉欲斲数语语不随娱侍东嘉乐无涯官舍偃仄亲不怡安輿相将甬水湄日日东望劳支颐秋风得檄欣星驰归拜亲下聊信眉官事有程不得违欲去故国行迟迟重来橘柚黄金垂霜着新

蟹双螯肥海鱼甘鲜一尺围欲奉色养春为期瞻云之思今同之慨然落笔成新诗人间至乐在庭闱何用自缚微官为君方欲解左顾龟我亦日思投檄归相望百里俱莱衣从他天外闲云飞

次韵翁处度同游北山

两夫持鎌行我先巧寻径路其智专我扶枯藤衣短後意气已出层峯巅何郎鲍叔饱经历胜处一一手自编我携旧纪访陈迹止恐急景不得延徜徉共登青云梯今日邀我为击鲜始观神龟闯青泚上有石壁来飞泉隐蹟遗基平可坐下顾乱石如磨鋌悬崖双瀑洒空雪来自一握孤云天郤从下流泝深险崎岖直到青潭边朝阳射光破幽閤断虹上下遮潺湲传闻高山更高处雅有行路从西偏同行无乃深好事盃酒自犒脚力全诛锄荆棘穷鸟道欲进不得意愈坚旋呼童仆累危石笑采野菊聊盘旋扞萝腾身上苔磴往往欢呼争着鞭侧行危步汗浹背石角或使衣裳褰少焉身在双瀑上又见高派冲泓渊自笑泉石成膏盲爱赏不减蚁慕羶巉岩数峯巧遮护妙处二老初无传脱迹尘埃到此地便觉神思飘飘然回首江南尘一聚城郭历历眼欲穿相期更看水流处步履未倦夸轻翮一上千尺穷山椒碧涧靡迤流苍烟寻源不能且忘返石猊巍距惊神镌退求归径惘难问藤萝所在相萦纆我方踟蹰风烟表披披衣袂身欲仙晚归招提各痛饮读尽屋壁长短篇截筒环山覽清驶窍出珠穗心亦怜棊枰相与论瓜葛横琴不妨挥五弦人生易老费扶掖胜具大率须少年伊余历聘佳山水爱奇切慕太史迁明年炎暑袭故步与君共枕清流眠

游白石岩

我游仙都观独峯辙迹虽在车不通鼎湖望极几怊怅无羽翮凌天风兹来乐成望白石玉甌突兀摩苍穹人言真人老聃裔凿开洞府遗仙踪无人共登青云梯跻攀伴我惟枯筇萦回约略三十里踏遍万叠高隆嵒断崖泠泠落残雨双石凜凜亭孤松郤从山椒下谷口石栏屈曲遮碧櫺颇疑山高气凝凜古来积雪今未融是谁玉斧妙镌斲仙洞双辟惊神工岩深白日尚幽閤别有石窍开天聪传闻峯头贮清泚苔罅涓滴声冬珑奋身便与上虚阁海山错立烟蒙蒙脚?千山行伏龙手挥五弦俯冥鸿霜林摇落当玄冬长啸一览万象空解衣寄宿旦过寮魂梦亦堕冰壶中晓看日出沧海东蜡炬百万烧天红眼高不数鴈荡雄行田下笑康乐公未能辟穀追仙翁颇亦有意栖琳宫三山不觉去人远安期羡门宜相从骖鸾驾鹤太多事但欲御气游无穷

约诸公再游龙湫

昨暮与君上龙湫天久不雨无湍流笑呼拊掌唤不应怅望颇亦令人愁夜来雷鼓惊龙起溪声已觉乱人耳莫辞重访尊者居坐看倒翻三峡水

送刘仲起主簿

刘郎鸾栖海濒邑不减向来人性习凜然躯干即之温语恐伤人中有立论交虽厚笑甘醴御史以严无束湿公余黄卷频卷舒艺圃工夫日加葺永嘉数多君子僚休沐新盟有清集伯伦忽去谁鲸吸欲挽不留情悒悒君年方盛才有余逸骥宁容在羈?期君欲蹈功名机塞草连云朔风急

王侍御壽诗

使君威名闻四方南牀凜凜凝秋霜使君和气到瓯越幕府初开夜飞雪颇闻此雪近岁无定知来随御史车黄堂洗印未多日庆朝况此当悬弧明年丰登日可数父老儿童争起舞迟明贺版拥譙门试拾欢謡作诗语使君风度神仙人相门出相宁非真妙龄两科谈笑得脱趋严召依风云台端敢言奸聽聳至今说论时传诵踏遍巫山十二峯却寻春草池塘梦人传使君威棱棱我知威爱元兼行苍髯如戟面如铁惠养自有循良称高牙入境纷进谒宾属庭趋躬磬折民生共喜爱日温吏行独畏春冰裂向来夔州妙筹边夷蛮落胆皇灵宣还朝奏课居第一夜半帝席为之前东嘉今为股肱郡小试望之三辅近会循故事入三公致君要使登尧舜东风未动春先回梅花照眼歌筵开吏民合词诵难老一笑千里传银杯佳儿恂恂受衣鉢玉树芝兰俱秀发江南世胄比长淮更看云来萃簪笏平生知己今上天敢复作叹寒无毡巴言未足赞公壽载诵峻极崧高篇鲍清卿病目不赴竹院之集诗寄坐客次韵

鲍侯少年老文学艺苑优游富耕获胸中涵养自成趣妙处正恐儿辈觉我慚门巷非尺五字欲问奇谁与?开樽竹院望同醉遮眼胭脂何太虐圆圜十客踏雨来相从不负东风约投壶雅歌了无恨祇恨公车一前却海棠春深照眼明风物融融悟非昨从教雨洗臙脂淡小摘何妨供把握夜阑烧烛照何睡靓妆如在结绮阁墙头西望烂蜀锦嫣然一笑无声乐飞红点地绣作茵正须席地天为幕要知富贵出天姿艳杏夭桃何足録主人小筑真好事肯学区区专一壑洞门不锁要客来笑君太似羊公鹤雨余珠泪色惨凄一顾正嫌无伯乐忽惊新诗来叩门妙语天然不烦琢坐中传观字欲漫我?降幡甘面缚清明已过雨不休云雾犹屯四山脚揩摩病目不应迟及此红英半零落枝头尚有未开花纵已离披亦何恶知君既负西岑游可使一春终落寞会须来此共赋之正要重闻诵新作

赠光孝益老

光孝长老师益苏魏公诸孙兄延寿为台州判官别四十余年一见欢甚林吏部有诗次韵

原鵠鸿雁行此理悬诸天万事可变灭天性难推迁显庵幼出家洁饮同玄蟬一鉢寄西东悠悠经几年外慕等浮云百念灰无烟难兄忽相逢触动欢喜缘光陰信可惜征袂何翩翩叱胥掩簿领来问妙峰禅刺刺道家世客泪如迸泉玉堂与黄阁衣鉢亲相传游宦非为贫不敢替所先老师虽晏坐至情岂唐捐此会非偶尔絶倒秋风前手持诗卷来谓予得无言晓以天性语人生要有原嗟哉伪日薄其荳本同根一旦成讐敌釜中急相煎宁知有佳人芳草梦阿连相见无几时瞥见鱼跃渊固知出世法惜别诘不然又当作大观勿为爱网牵千山原不隔毋庸对牀眠

送王道州

九疑之南为舂陵潇水清驶山为城郡斋正据山直上一览万家无遗形家君顷年入莲幕我不得往空驰情先生分符此中去心旌摇扬随双旌先生平生饱文学身上着作承明庭奥篇隐帙亦如响一时自许文章鸣高辞坐夺造化巧凛凛韶濩声铿锵把麾江海非无意亲扶版舆赋南征颇闻楚俗未苏息糟糠不厌嗟疲氓正资儒术饬吏事拔去强薤摩孩婴政成环召事未晚天子日夜开延英风流千古三刺史往继声叟阳先生毋庸自书追科考但愿寄我舂陵行

哭王知几墓

知几少也爽万事谈笑了自谓颇寡合见我辄倾倒百年能几见一别迹如扫父子俱埋璧呜呼何其早向来论文酒和泪倾宿草此意谁复知寤叹令人老

仲舅尚书生朝

去年生朝燕稽山馆舍朗朗屋百间红裙合乐饮彻旦坐上衆客皆酡颜今年生朝半归路竹舆潇潇晓冲雨回头风景非去年当时宾客今何处仕已喜愠曾何分适齐未减楚子文鼻间栩栩固自若世情物态徒纷纷平生知足志闲退归老乡关了无悔但欲年年醉西风坐閱人间百千岁人间万事日不同尚书人望方顒顒明年举酒拜公壽安知不在槐庭中

送郑惠叔司封江西提举

君名切斗魁步武上霄极蓬莱羣玉府图书照奎壁郎官应列宿寢觉象纬逼胡为作使星炯炯向江国仰奉鹤发亲版舆映莱服昔日红莲池帅垣资婉画方将散余润连城被膏泽官榷与民繇丰俭烦振采小试活国手疲氓赖休息便归侍玉皇拱立香案侧富贵殊未已行行上鸾掖君其妙演纶三能看齐色

次韵胡元川茉莉花

残暑未尽秋欲来玉刻万叶琼英开孤标雅韵一枝足江上紫翠空成堆素娥尝与明月约青女细把轻绡裁主人好事趁时买买真此地真宜哉墙间闲地方丈所几年累甃装层台春花秋卉纷互发胡葵芍药参徘徊眼明忽见此奇絶弟畜素馨兄事梅夜深飞香性幽独未许蜂蝶来相陪糖餠封余有闽土会须扫取添花栽吾闻闽山千万本人或视此齐蒿莱何如航海上天阙玉色照映琉璃盃新凉徙倚看不足坐见日影敲庭槐

同官登勅局小楼观雪

去年岁丰登雨阳应时须所欠惟一雪祈禳遍精庐晚亦粗飘瞥六花舞空虚云气不待簇风

伯随驱除残春寒尚深忽见云模糊撒盐压衡茅晨兴粟生肤随班上廊庙恍若登蓬壶迢嶢
宫殿深朱扉黄金铺百神卫灵居半天散琼琚又疑守护严宝网明珠参差鸳鸯行簪笏皆
沾濡退归冷局中牕间竹扶疎为思此絶景往往终年无不应憚凌寒闭门守红炉为君登危
楼深盃泛醪酥崔巍瞻吴山莽苍望西湖琼枝宿饥鹰玉阶走韩卢酒兴万里远容我歌且呼
坐欲斲五言所媿李与苏君与工属聯灞桥去骑驴

久不作诗喜仲兄迁隣因成长句

宦游各天涯皇州今鴈行官居半里所相过复相望西邻得老屋往来连户牕水竹占幽胜风
雨对一牀十年短檠灯今夜分余光儿曹亦可乐洛诵声洋洋天边有白云随风正飞扬相期
奉甘旨莱衣戏亲傍轩冕皆倘来此意可暂忘诗成喜可知且复釀此觴

送林宗丞浙东议幕【劭】

先生风骨天与清孤松野鹤何瘦生胷中落落筭五经大篇短章笔纵横壮年文場诸老惊俯
仰世故双鬓星万事不理诗自鸣笑视轩冕秋毫轻市者争利朝争名著脚往往遭讥评先生
四五官神京又复归去鸿冥冥台家急贤理不应况复寮旧离觴倾先生自喜行此行禄粟可
以号号声秦望之山高且平卧龙横亘环州城镜湖千顷波不兴晋宋遗迹多豪英议幕了无
尘务萦扰物吊古皆关情我亦久矣怀沧溟旦夕欲乘緹油屏相望纵复三四程诗筒尚得寻
前盟

临海县治琴堂

子贱弹琴真是琴我今无弦知琴心使我不得琴中趣弦以修綆谁知音才术高低不自由单
父二子心则侔後人不得弹琴暇勿以戴星为可羞

送石应之司户归剡以室迩人远为韵

捷径指终南索价讥少室穷达岂无命踏地胡不实之人吏海隅所吐百未一夷途澹无营君
其有终吉年来叹离羣磨琢殆无几资凡学益落駑骀费尺箠羨君富春秋发轫方自还骅骝
更着鞭洗眼日千里南明千古秀庆源久益新剡谿照人清况复屈斯人掺祛不容留椒觴思
拜新他年风雪中扁舟倘知津平生企贤心山川恨悠緬宁知日相见怀抱竟不展樽酒了无
暇离情果深浅室迩犹许疎况今乃真远

送王仲矜倅兴元

蜀道难难于上青天蜀道易于履平地蜀山天险固自若视难为易在人尔王尊真有四方
志叱馭径行了无累早登岷峨仕阴城谈笑动行千万里汉中由来说鷄肋意谓弃之为可惜
君今此去良似之更欲远游寻古迹汉都南郑启炎图秦置石牛山径辟淮阴拜将余高台武

伯葬处空松柏大笑出门何慨慷天涯离愁各尽觞荷君走马却送我李侯参语夜未央君方往蹈功名机何止别驾歌王祥先正九年遗爱在更携故笏访甘棠【仲矜象简乃参政入蜀时所用】

巾山

两鳌矗矗随西行势欲吸尽西江清是谁縈以千丈城欲去不去岂不灵化为青山镇东溟首冠窳堵双峥嵘安舆从东喜逢迎笑指鳌背同来登春残雨足绿阴成山鸟相和声唧唧自从半山经小亭仰望巨石扶轩楹千山万山拥翠屏阴霾归静纤云兴翠微下有长江横滚滚不尽千古情横轩俯瞰万瓦平佳处历历堪指名雪蓬蹙云连曲肱蜂房蚁垤栖残僧扶栏更上三两层一览众物无遗形徙倚未厌茗椀倾长啸两腋清风生亲颜甚怡轮为停我亦色笑喜不胜愿我双亲俱遐龄方瞳链颜华发星如此两峯相对青

沿檄柯山归别张特秀

我昔志学年侍亲宦西安弟兄游庠校见君平生欢君才独颖出逸驾不可攀夜牕共檠灯春游合盃盘虚堂卧雪岭杰阁横云盘烂柯上危磴乌巨沿溪湾是时气相高辩论俱澜翻一别三十年天街见峩冠殿庑看决科蓝袍立清班黄牒墨犹湿大弨力能弯尔来又五载短书能几番兹焉捧檄来吏牒方拏烦室还叹人远一朝脱笼樊满意纵剧谈痛饮到夜阑十步九太息此事亦孔艰进哭老先生画图惨青纶特显顾何爲一昔成大还回思我伯氏人琴有余叹感今念畴昔相与涕泪漉故人怅无几恍如春梦残有酒不得饮有琴不成弹复归坐冷屋使我凋朱颜我归不可迟倚门梦连环君言欲舂粮伴我行路难欲去不得去僧房话闲关年各几半百後会鬓亦斑何处更有待此心匪石顽羣忧发孤笑属联不当慳气岸有如君着身簿尉间盐车复长鸣会当上天闲掺袪不忍别雨声为潺潺君有门户责殷懃愿加餐

次韵沈使君怀浮冈梅花

玉人迴立山谷里不有使君谁与怜毋庸高牙煞风景为着佳句增孤妍寒溪照影漫千树横笛吹残又一年传闻年後更多发便须跃马趋平川

送王木叔推官分韵得锦字

王郎天下士中和自生稟澹然初无营见者辄敛衽幕中资婉画处事极精审与人如恐伤律已渊冰懔深恐马駮舆要使鶡食甚一寸忧国心几年不甘寝此意大未酬退静若已甚使之行所学庶几人奠枕向来孰闲之未免斯立噤川咏而云飞赖有东阳沈露章极推轂分韵句裁锦风流有如许不复叹蹕蹕如君岂蓬蒿人物妙流品才应奉香火为养谋禄廩与君幸瓜葛心交今十稔岂惟我惜别行道情苒苒红莲色何似翠柏风愈凜愿君疏药裹一意护茵飴弃鼎宝康瓠浮名如拾渾行矣无多言临岐且剧饮

彭子复临海县斋

乾道癸巳冬此邦我经行郁攸气未殄千家真赤城来访临海令瓦砾纷纵横翹然二尺高问是戒石铭徘徊重太息更闻愁叹声试询来者谁共言令姓彭我时语傍人此邑其将兴迨予来赘倅客馆方暂停夜闻箫鼓沸厅事先落成起望轮奐美壮观耸连薨百堵日已作斧斤喜丁丁层楼度敕书两庑环中庭久乃游其间宏大使我惊位置既深稳斲削仍工精田里不知役纖粟无输征安得屋朗朗突兀有宁馨退食不苟处扁榜皆佳名中虚物自照政平由心平櫟柏已可悦况有贤弟兄小亭真吏隐县拥高山青琴堂虽增旧此意宜细评智调天下理夸言笑後生大弦可以急小弦恐弗胜举意属俄顷立言如所营手足民无措吏奸意相乘不如疎节目示以信与诚施行有次第幽远无隐情上下始相应温和亮以清子贱意不传仅许胜戴星彭令盖得此所以千里称此非以政学渊源甚分明行笑解印去衆心已先倾太守荐之朝一鶚飞青冥傍无蚍蚁援日夜思归耕我无荐贤柄直书气填膺安得采诗官取以彻明廷

送虞仲房赴潼川漕

我来丹丘乘贰车送客往往万里余盛山使君别寢久汉中郡丞今寄书公指四明喜邻境典午何知成画饼扬旌忽作梓潼行去路六千抑何迴余杭名家多俊奇君于辈行尤白眉雍容音韵足夷旷百家到手无停披向来郎曹天咫尺引山闽山接商舶贾胡叹仰清节高雾中亲见越王石此行叱馭不作难手遮西日又长安长安日近公应往未放使星临蜀山不然一行亦不恶潼川应如锦城乐邓侯功名凜如在拾遗风采今犹昨流马木牛诸葛公飞挽正欲修前功蜀民险远日凋瘵抚摩要令畿甸同况公五絶追鼻祖隶古真有两汉风归来富贵固未晚为传此学川西东

奉口遇雨

七月欲尽八月初天久不雨暑未徂下田焦卷上田槁愁叹不止田间夫呕哑水车日夜响漕河扬尘成坦途喜见此溪深且广玄云忽起西北隅林间槭槭水沕起两岸人物欢欲呼未闻滂沛润龟坼且使万物聊沾濡船牕飘洒疎篷漏客意自适凉襟裾引身东望云气薄未知帝城有此无传闻今日方奏告便有响应来斯须人家百万苦炎燬君王斋祷几月余君王斋祷几月余云师雨师其疾驱

游天台石桥

两龙争欲起深壑触破山骨成修梁滔滔共出一门去凜凜直落千丈强初疑鞭石跨沧海絶胜乘鹄横银潢要须高蹶前峯过往叩山中真宝坊

攻媿集卷一

<集部,别集类,南宋建炎至德佑,攻媿集>

钦定四库全书

攻媿集卷二

宋 楼钥 撰

古体诗

史少师赐第赏芍药分韵得木字

帝城有僊山双径森万王洞户入深窈突兀见华屋相君领衆客红药想芬馥霜刀妙裁翦
臙点冰穀枝弱不胜花翠叶共斜矗向来争春风桃李媿粗谷百卉纷何在庭树拥新緑此花
丈人行俨立见幽独相君戴花笑和气俱可掬人言此花胜相君意倾属谁知心广大何物不
蒙幅岂以庭中花而肯弃凡木君看择胜具所可可追逐自言居闲时情话会亲族一花有可
观烂赏费银烛此心何拣择寓意本无欲以此宰天下以此镇藩服儿童与走卒人人歌相国
有能達此观春风四时足

送钱伯同寺丞守严陵

严陵钱使君丐外得请外府同僚相与饮钱於钱塘之津某病疹弗得预方得请之初某叹曰
去年送君来今年送君归君笑曰此节送行诗也卧病枕上口占

去年送君来今年送君归君善全去就我独念别离君是忠孝家袭紫传金龟门户二百年所
寄在一夔少年便老苍况今更险夷不独妙言语理窟深莫窥健笔照手泽典刑从可知向来
御祥琴欲把江海麾促召归旧班退食方委蛇世事等飘瓦人情叹然其向非浑金质百鍊岂
不衰浩然赋归欬洁身而去之为寮曾未几弃我忽若遗君既弃我去谪僊复追随陡去二良
友操袂重分岐前别易再会後见当何时才具素絶伦涵养日以滋且为牧严陵赤手磨疮痍
归来应不晚青毡当属谁愿君厚自爱岁寒尚相期

送杨嗣勲校书守眉山

我生东南陬不识蜀道难观君眉宇秀想见岷峨山汉廷射策时连璧照鸳班伯氏书万言逸
驾不可攀兹焉从君游颇得窥一斑僊凡隔弱水接辞良亦艰矧兹万里别望望何当还三苏
骑鲸去词章满人问岂无後來者遗珠有余叹愿君效乐全飞章達天关报国此最急余事付
等闲宜室行见思朝暮当予环别语敢言诗属联不容慳

送何道夫秘监守潼川

妙龄冠蜀士名声振王畿晚随召节来天朝增羽仪我昔倅丹邱鹿侯挂冠归羣公俱祖送见

公四三诗颇恨着鞭先自言乞身迟拳拳慕下风直欲梦见之还朝挹高致气宇清且奇称者不容口往往同一词始见荷倾倒笑谈欲忘疲况当秋风高濫吹参试闱鼎脔得一尝豹班容管窥叔度真似道庄生信忘机亲疎皆不可况容磷与缁诸生得公来叹曰真吾师叩帘或三请响答了不疑私谓如此人定应备论思胡为归兴勇抗章气不衰鼓盆万里外抱孙更成悲拥麾东川去无人留孔戔别怀不自胜别酒听淋漓他时念老成追风且复西公能重来否此意非吾私

送赵子直贰卿帅三山

一蹴登从班人胡谓公迟建牙帅七闽人胡为公疑公今第一流志操古与期雨州有遗爱江西憺霜威重来长道山批勅兼琐闥一片忧国心辗转中夜思正色抗危言传诵满绅绶造膝有启沃削藁知者谁此心与天通此意上所知所以名愈尊万口同一词进用恐不速小却成叹咨天语自昭然更欲试望之况彼三山重谋帅皆衮衣兹行岂细事报政不待期登门恨最晚臭味忘贱微自慙空惜别不解留孔戔十连终敛惠居中乃其宜试问行人但知望公归

玉版鲜次陆子亢郎中韵

鲟黄不减鲸与鱣迎风鼓鬣喷腥涎渔人不顾浪如山谈笑坐致扁舟前不钩香饵不得去何用大网相索纆挥刀纷纭脔肉骨巨口噉嚼诚可怜珍鲈万瓮不论钱头颅万里赧行肩星郎日参玉版禅颇厌蔬食供盘筵尚书亲作孟宗寄坐觉匕箸生春妍却笑多事张茂先光怪异说空十年

走笔送僧义冲

一气行太虚流行纷不齐要之本无物洞然无是疑梵志有至言还我未生时烧了似不曾亦有毛僧词冲师名家子少年习裘箕谈吐霏木屑落笔皆珠玑自称十年来不复念作诗空门坐枯禅绮语知昨非闻之意已消谈笑到日西习气终未尽旧编还自携秀句堪供佛古作力可追爱玩不去手未免成一痴又欲上西湖驻锡来语离我生堕宿业笔砚置藩篱拔擢困胃肾未老神已疲几欲焚故稿要使清夷君诗既不化作何不等弃之万事都放下一意控玄机语罢复自笑无使高人知作诗固无用参禅亦胡为劝人反自蹈此纸何必挥不知两俱忘他时体体归

催老融墨戏

古人惜墨如惜金老融惜墨如惜命濡毫洗尽始轻拂意匠经营极深窈人非求似韵自足物已忘形影犹映地蒸宿雾日未高雨带寒烟山欲暝中含太古不尽意笔墨超然絶畦迳画家安得论三尺身世生缘俱堕甑人言可望不可亲夜半叩门宁复听三生宿契谁得知一见未言心已应岩倾千丈雪散空上有清池开锦镜意行忽发虎溪笑许作新图写幽胜归寻一纸五十尺傅以矾胶如练净自知能事难促迫卷送松窗待清兴笔端肤寸今何如西抹东涂应

略定何当一日快先睹洗我昏眸十年病

独旦葦次九五从叔韵

朝菌晦朔虽不知食之实冠东南味庾郎二十有七品一见流涎惊絶异擷蔬剪韭皆可却味苦应无夏虫避大阮哦诗声未了又索蒸芝今再遗迓来枯枿尚未茁拳拳颇媿台无馈倘容小摘寄情亲会见长髮见芹意

雪

丙午九月才入冬晦日忽惊雪堕空传闻都城更复早万官入贺明光宫自从开霁更不雨和气真似青春浓斗柄插子日丁卯夜煽裂缺鞭雷公从以雷霆至三四惊破蛰户纷昆虫寧知玄冥全未究翻手作云千里同暗牕初听洒珠雹巽二胜六方施工一日喜见瓦沟积忍寒待伴炯不融二日三日遂盈尺高润四海恩无穷古来诗人咏不尽巧思横出昌黎公少时奋笔不肯已老矣?手便疎慵儿曹作戏记昨梦舞狻猊踞金双瞳谁人若欲撩诗思更作玉山高数峯移将刘义两水柱晖映愈觉清心胸见之跃跃忽技痒起呵冻笔寻诗筒开门一见天宇濶弃蛻百万飞长空琼楼玉宇满妙略干林宝树春玲珑恨无高台三百尺从观万象凌空蒙固知幻景有变灭一时如入崑阆中僊家俄顷閱尘劫安知此际非神功臘喜年来米价贱便欲扶犁随老农墙头浊醪走过来过相与痛饮歌年丰

少潜兄真率会

昼锦坊中作真率羣从相过无俗物主人就树折杨梅醉倒薰风凉拂拂小舟傍城登雉堞坐看白鸟苍烟没须臾撑出洞天去杰阁三层高突兀樽前赋诗贵神速十分钝似辽天鹄从他银漏促残更要见林间红日出

送元声弟赴水阳监镇

吾翁积德厚九子官其六不幸失二人孤嫠纷在目三弟尚白丁升沈犹未卜吾人扶门户参立如鼎足脱死忧患余偏亲须水菽阿连先着鞭去去长江曲弱冠承赏延十载荷衣緑间关困家食才就五斗粟要知官无卑毫发当畏肃督耕两丈圩受输十万斛处之诚未易勉?直自勗执别动万感酌酒再三祝吾子素解自涉世要未熟意行须揆理言轻恐招辱王事究一心言玷复三复细行累大德陰财损阳禄岂惟赠尔言余亦每自慙公余稍有暇更取故书读行矣更自爱家声要人续

伯中弟生朝赋荼蘼

春日足风雨不知艳阳天桃李俱成尘懒上西湖船春余忽微和荼蘼发清妍池塘芳草梦况复向阿连中庭月方午密林澹清烟蒙蒙青罗帔粲粲白玉钿幽欢久不讲羣从俱謹然银烛

烦高烧妃子浴温泉花以酒为名我以杯相传烂醉不复辞此会期明年

黄岩令郑仁叔索委羽洞府诗

君不见王君羽化脱寻厄故山至今名落翮又不见乌程野鹤投髦毛佞臣称瑞民斯劳何如
奉林控鹤凌青霄荡然委羽登山椒青衣出入洞方杳紫气氤氲风尚飘今君颇似丁令威鹤
驭久去双鳬归山川良是人民非一新琳宫还旧规黄山父老歌循良诵君诗句游云房更将
山名比坚操百岁犹能彻骨芳

青林

郡斋偶休沐驱车出西城依依山水佳潇潇松栢声雪余春意动新绿生?泓行行到青林老眼
增双明主人喜客来倒屣欣逢迎幽居迹甚遐健笔诗方鸣回首几年别千里摇心旌相见又
睽隔此意犹未平不如造斋阁四座酒重倾风流陶彭泽肮脏阮步兵看剑引三尺论文驱六
丁绿野秀横槛山寺傍连薨石罅幽泉溢脚底轻云生诗盟忝予会奕道从君争哦诗谷禽应
列炬林雅惊清叹未云足累句忽已成环坐粲十眉举酒酬三英满壁洒醉墨归梦含余清我
方媿此集君欲寻前盟吏鞅才缚我秋风为君行

隐清

右军访文君遁迹入深竹我来寻歔歔人亡但空谷灵龟闯澄潭华宇对我瀑若人今何之尚
想旧茅屋吾闻古君子千载守孤独楚些不可招怀我怆乔木

送刘晋父监岳

济南刘夫子生来逢百罹乃翁负长才宦游至京西时当建炎间寇盗纷不齐转徙入湘广一
家屡阽危五羊买海舟万里向鲒埼舟破投永嘉有如鸟择栖哀哀老治中藁葬山之陲母家
在衡阳孤嫠往相依久卧漳滨疾羈穷命如丝事母以孝闻执丧礼无亏庐墓屏葷茹至行彻
丹墀有诏宠数蕃得官祇奉祠行年六十二霜髯照厖眉慨然念防墓千里来海涯西山如莲
华古今冢累累况此久宿草芜秽不复治孝思虽甚切冥漠何从催行道为兴叹智力无所施
有僧几九龄自言记当时君闻亟叩请东岗指荒墓吾师慕泓公少也从吾师墓中有版识仓
猝不暇碑素棺无石椁灰炭周四围君方感斯言鑽穴从旁窥其言皆可验自此不知疑惟余
盖棺木遗骨不堪移斲石表故阡遂塞无穷悲此僧老而壮斗酒如覆卮与君登山椒下上几
如飞竣事才数日溘然不可为孝感人益仰真有神相之君曰某不孝迂奉致失期未得如有
失既得滴滴颐嗟我诚寡陋识君顾已迟一朝来短札谓我从此辞皎皎真白驹安得施絜维
戴侯旧山长参语心相知谓余当此时颓风激浇漓世出世间法君方控玄机引证即臆语焉
用骀馱词衡阳尚寄书当有鸿鴈归後会渺无日为赋古别离

王成之给事囿山堂

烟雨望丽阳前山罗紫翠照水挹南明不与巾子对
竭来登囿山一览万山会莲城山固多此地要为最
主人意轩豁物景供旷快山椒涌华屋回立风埃外
一物无遁形所在皆鲜芥清霜肃天壤佳树隔闌闌
俯仰随取舍左右从盼睐门墙寻故步杖屨许从迈
恍然至絶顶更觉宇宙大樽酒屡劝酌棃杯更胜败
秋高月色皎浮云了无碍不俟攀僊掌徒手吸溪瀨
兹堂极崇敞意若欠深邃先植易生木徐待松柏兑
望远仍可喜意满聊自晦无使山下人或得窥外内
但恐趣赐环树艺或不逮先生味斯言一笑相领解
吾将飭园丁随我添医荟他时遶扶疎吾庐益可爱

游初阳谷及白岩

重来游僊都止欲访独峯寧知一峯外佳境无终穷
何处颍川子镜岩便相逢约我游白岩轻舟借溪翁
斋余寻宿诺秋霁波溶溶清彻见石底鑱刻惊神工
昨登初阳谷但见石嵌空兹浮悬崖下万石森巖嵒
上有胜絶地古语留郭公鬼神谨呵护雷霆扫尘踪
换船到白岩修篁摇清风紫回进石屋孤竹攢沙蜂
洞府僊所閤无由辨西东扣船过岩下数仞如崇墉
石趾平如秋奇怪遮苍穹更寻小蓬莱俯瞰冯夷宫
篙师进深窈扞萝舍枯筇游子非不多无人解从容
我因一日留幽寻极山中秋旻快排荡日暖如春融
归坐独峯下石影横空蒙急呼醺醪清浇此磊砢胸
幸有济胜具未能上金龙为君挥五弦决眦送飞鸿

夜游独峯下

峯背正白月舒光峯影横野万丈强仰之弥高立卓尔
蔽遮星斗摩穹苍半秋风露清彻骨望望直欲随风翔
归寻玉虚步松径月轮正涌门中央

送顏希圣尚书守泉南

圣朝宝运开虞唐太平天子垂衣裳恢张治具崇儒良
孰不愿依日月光用之则行舍则藏孔门贤德遥相望
朝望方隆位文昌跬步可到中书堂问公拥麾何太忙
公独三清志益刚俞音一下冥鸿翔行李径出临涛翔
争留公戮动朝行公更伛俯不敢当老成全德真圭璋
温如春风严如霜栢台戢豸肃朝纲贤关之风士气扬
大天小天称公方五年吏奸盖而彰金华劝讲言加详
明主倾听谈皇王盍膺枋除任赞襄名遂身退天所臧
明哲保身身更康高风可仰不可量泉山壤土接临漳
建牙千里开封疆老龙负图宠煌煌何殊衣锦还故乡
贱子薄宦接王杨曾陪御史临文场风帘官烛夜未央
剧谈独记声琅琅兹来误忝尚书郎始寻故步依门墙
西风津头望归艎挽公不留远予将两宫念公未讎忘
公虽远去如在旁庶几重来上钱塘夹辅大业恢中邦
倘有重事须平章

陈顺之灵壁石砚山

陈顺之吏部灵壁石砚山中有双涧低处为砚下米元章题云唐弘文馆校书李羣玉有诗南唐李重先故物也蒋教授文会有诗次韵

名画法书环四壁中有米家真宝石壁峯森耸外涧流他物虽奇敢争席旧属半山老僊人佛印乞之如乞邻阿章有力负之走一时攘取成纷论此石天然非琢磨是时有水生岩阿至今砚池尚余润岁月既久惜不多几年徒见士夫说一旦喜看形偃月傍连玉立两於菟主人照映水壶澈陈侯之富可敌国会有宝光惊四塞呼童吸尽砚中水更为轻翻玩奇刻不堪回首江南李空唱多愁似春水不如此石千载传玉砌雕栏等糠粃宝晋得之真不易身後寧知亦轻弃只今传玩知几人当日琐窗空自秘端歎争名南北部勿向雷门扬布鼓铜台渴瓦更不须抵合觚棱?风雨

跋汪季路所藏修禊序

永和岁癸丑羣贤会兰亭流觴各赋诗风流见丹青右军草禊序文采粲日星选文乃见遗至今恨昭明字画最得意自言胜平生七传到永师袭藏过金籀辩才画秘重名以彻天庭屡诏不肯献托言堕戎兵妙选萧御史微服山陰行谲诡殆万径径取归神京辩才恍如失何异敕六丁文皇好已甚丁寧殉昭陵当时冯赵辈临写赐公卿惟此定武本谓出欧率更采择独称善遂以鑄瑶琨流传迨五季皆在御寝扃耶律残石晋睥睨不知名意必希世宝毡里载輜輶帝昶既北去弃与朽壤并久乃遇知者龔置太守厅或云政宣间此石归绍彭又言入内府宣取恐违程焚膏继知晷拓本手不停叠纸至三四肥瘠遂异形南渡愈难得得者辄相矜我见十数本对之心欲醒汪侯端明子嗜古自弱龄锦囊荷倾倒快覩喜失声带流及右天往往字不成而此独全好护持如有灵尤王号博雅异论谁与评硬黄极摹写唐人若无称贗本满城南琐琐不足呈犹有婺与抚砮砮近璜珩右军再三作已觉不称情心摹且手追安能效笔精响摺固近似形似神不清不如参其意到手随纵横况我笔素拙何由望羣英近亦得旧物庶几窥典型此本更高胜着语安敢轻孤风邈难继怅望冥鸿征

送刘德修少卿潼川漕

清朝重诤臣选取妙一世矫矫刘御史一鹗胜百鹭顾瞻最有力步武亦严毅一生忧国心千古敢言气气足充所学文能行其意遇事辄奋发触邪无顾忌乘驄行且止斂手已知避但思补衮阙何暇为身计独立当雷霆三进气弥厉去鲁固迟迟出昼岂濡滞上终行其言羣贤挽挽致将输向潼川寓直尚书秘风裁仰清峻进退审难易伊昔聯周行睽违十余岁来为同舍郎愈笃金兰契洗眼盼腾上寧知揽征袂抗章叹高絶勇退尤知愧去无穷日力予环日月冀承君送道乡硬语吁可畏毋以此自满当为不止是临别提斯语少尽交朋谊万里句同心吴蜀安有异

次韵李季章监簿泛湖

僊舟共泛沧波去且向苏公堤下住西风吹就芙蓉城青镜闲妆两呈露皇家家法常俭素宸心但欲乘商辂离宫别殿无兴作天以西湖共一豫吾侪公退得清赏酒醅棹不知暮深知夕照恋狎鸥又恐听朝追振鹭自怜三人凤凰城岁月黄尘等闲度湖光正欲卷帘看风色更烦褰幙护孤山不见处士庐司马空寻苏小墓酒乾人醉欢有余聯骑还趋涌金路归路健倒

浑不知睡觉灯前裊香雾文人公子真冰玉曾为出游挥妙句匆匆借韵仅成章敢托尊前鸚鵡赋

送杨廷秀秘监赴江东漕

平生杨诚斋可仰不可见去年尺一书老忽忽同传道山故僊伯再上右文殿蓬莱几清浅笔力愈雄健独挟风雅輶孰敢当白战一官定一集流传殆千卷拙工见大匠有技不敢献谁持所繫篇径掣岩下电诵之百寮上慙汗几被面公今欲何之江左去乘傳鼻间长栩栩仕已忘欣怨英英日暮云荐绅极追恋挽公不得留觴豆纷祖饯惟应三山高须公和江练君王念畴昔临遣尤繾綣公乎遂来归密侍清闲燕坐寝淮南谋如彼雪帷见睥睨从容处侵疆归古汴

送曾无玷寺丞守池阳

我朝衣冠盛名家数三曾南丰暨潁川後起参温陵迺来骠川族駸駸着簪纓春风雁塔中参差见姓名君才素潁出健笔泛纵横江右两壮县谈笑政已成河阳桃李花武城弦歌声入朝八九载去拥池阳旌年家有旧好一见意气倾更因刘御史为君写先铭去年少省郎君转为寺丞中都但交谒名纸空毛生惟因候宾馆接膝倾交情分陰尤可惜翻恐到履迎阿连幸为寮庶几多合并寧知成勇退拂袖寻归程秩满素简静不足烦公行要当试盘错操刀新发硎似闻有剧部或已荐长卿君其少停驂有诏来皇局

刘望之国録惠示文卷次韵为谢

君闻三峡江湍流下无底吾闻岷峩山耸秀且千里坤维气淑灵所产多名士高文既监然特立亦卓尔久慕黄中刘近有贡公喜气从蜀士问人物定谁比少年负奇节论事如翻水万里见张胡义激非气使贤关遂为寮八尺见英伟诸君皆敛避相与推德齿惠我春容篇句法参子美再诵平生言作者真近似战国信徒劳秦贪不知止汉唐取与守反覆皆造理藩镇论加详河朔分鼎峙词源既渊深浩博渺无涘从今使诸生教育均蒙被议论归正平辞章扫浮靡古人去已远时毋分彼此君其挽之回续弦须凤髓

钱李君亮着作守眉山分韵得翠字

天下大峨山雄秀盘厚地山虽不在眉所在拥空翠矫矫三苏公挹此淑灵气文章垂日星照映盖一世李侯起广汉射策叩丹陛袞然出羣英东南藹名字来上着作庭行入甘泉侍胡为把一麾西归寻药市吾闻此州俗秉法更陈义厚德坐镇之近古翻易治君家义槩堂活人百万计老亲怀故山色养谨承志还家万里余赴镇夕可至不作题柱骄岂有昼绣意班班老莱衣人间真乐事忠孝两无心出处固一致他日上思君命驾当不俟此别谅非久毋庸操征袂

送张定叟尚书镇襄阳

武部尚书张公镇襄阳士夫莫不惜其去昔韩昌黎送郑尚书诗韵必以来字祝使成政而来归疾去而愿归盖人之至情也而公自受隆委谓边事非可趣办愿加久任庶有成绩忧国而不为身谋闻者壮之某尝陪郎省钱别分韵得壤字未能措辞继又随西蜀诸贤之後始得详闻临遣奏请之言被酒夜归亟述长韵

公家忠献公勲名照穹壤南轩传圣学後进斗山仰尚书天分高百闻真朗朗日坐四益堂濡染助涵养小出辄惊世发誉自英荡两朝倚才办三接承睿獎堂堂尹京手风采汉张敞九街寝桴鼓终朝清讼龕污流化清沟閤市锄巨馭铃斋昼无人士友厚吾党政成化自行浑笑挥浩穰皇家重阃寄拊髀劳注想颇牧起禁中帝曰汝其往人多惜公去地位切台两惟公不择地引义犹慨慷度更周询千里若寻丈再拜受临遣因得进忠说边臣固多事备御当素讲要须久其任百弊随剗礮愿假臣岁月表里如指掌人材固不乏第一戒欺罔朴拙胜巧心好佞寧不强愿求忠信士枉植谨诛赏更须寬?策奏请应如响上问卿何先安静最为上上忧襄汉间吴楚欠遮障公因论形势袞袞到逊抗是时晋在洛武昌势相向是为必争地南北谨堤防今虽居上游事与古殊状狂寇纵欲来无处可传向况今三埵静皇灵方远畅与蜀相倚角国势自争壮尚期效尺寸才疎意非广忠肝气凛凛秋旻足排荡上喜忧顾寬趣行开玉帙捐金示优宠谕赐烦上相惟公最得士离别俱惘惘荐绅纷祖饯直欲倾家酿赋诗写胸臆一一成技痒家声与国事负荷有余量边头十万兵公临如挟纊吾闻胡运穷羣酋欲争长不戢将自焚前轍有狂飈当为不可胜有和谨毋倡千载羊叔子制敌恢天网行将友斯人山川固无恙备成抚机动应烦护诸将功高归未晚会见登弼亮他时名父子继踵凌烟像

送郑惠叔尚书守建寧

十五年前送别诗道山持节向江西今年又见送公别大天拥麾镇闽越向来惜别固已深今日操袂尤动心尚书自是第一人气义相许披胸襟南宫平表平明入列辟传闻俱耸立壽皇圣孝冠百王三复高文天为泣擢处螭?宠数新果然百日掌丝纶拭圭修聘称应变握节不挠威殊邻直上银台尤振职李藩气槩时批敕嗣皇銳意新百度笔端真有回天力星辰听履冠文昌急流勇退惊朝行望之正欲试冯翊长儒寧肯薄淮阳孤拙自怜销壮志三入修门空负媿荐人不进终不已独赖当时言有味公在犹叹一居州公去无人为王留公乎行归佐天子肯休管晏卑微休

送苏壽甫少卿赴潼川漕

老坡送江直入海君今归寻江之源外台去乡若不远为持使节临潼川君家家世四海闻单于一问惊胡尘归来便合上清禁胡为日念横峨岷贤哉羣从传家风夕郎名节世所宗诸卿亦复载清德况君又似尚书公壽皇念旧久更深圣明亲擢传王音君归寧能及黔突定应召驿来追寻清猷入蜀携一龟君今数鹤同载归他时未免蕙帐怨人在西清鹤自飞

分韵送孙从之司业使湖南得千字

夫君静而敏十人已则千读破万卷书操笔思涌泉古事与今事一一探本源蚤蜚场屋声作
吏志益坚竭来上清班汉庭在在先雍容行必书史馆躬槃铅片言寤明主立使登谏垣拳拳
忧国心倾倒十三篇司成天下选归志已浩然赤日送妻子襆被寻豁船诸生慕阳城欲挽不
得专竟持湖南节征袂何翩翩忆昨忝同登于今三十年朝行喜相会终恨非官联请益殊未
暇匆匆启离筵始以长官来来以绣衣还书生素安分岂问却与前第惟公辈流自应留日边
德星聚南楚予环当茹连事体有关系临岐欲无言

送王恭甫仓部知洋州

天清无云秋气明好风丛桂传芳声乃於此时送君行江空日短难为情蚤从两川驰大名眉
宇莹彻春壶冰语辄倾倒地平大篇小篇韶钧鸣壽皇一见喜不胜璧水边山照羣英潼川
题輿远有声痛洗盐筴疲民醒天子呼来再登瀛典领着作承明庭絕域往陪苏子卿马上谈
笑胡人惊归来期君侍西清胡为西去谋专城士友重叹君不鷹视此进退秋毫轻洋川风物
天下称文翁流咏人载赓当时犹待羣政成君今未到意已倾岢峩大輶秋江澄图史万卷鸥
与盟残编断轴恐飘零数辈装潢手不停我亦重来预影纓三日不见鄙吝生况此操袂将长
征欲挽不留鸿冥冥赐环勿惮万里程江山多助笔纵横黼藻王度扶中兴

题范寬秋山小景

山高最难图意足不待大尺楮眇千里长江浸横翠画家杂云烟懔懔徒意会苟或森三尺便
若俗子对此画格律严兴寄独超迈洗眼映牕明妙处乃不昧流泉见原委着屋分向背推车
度危桥指路向关隘轻舟最渺茫浦屿如有待山棱瘦露骨汀洲横若带木蒂黄欲脱秋容俨
然在霜余无片云历历数沙界搜寻因力疲欲赋无可奈近山才四寸万象纷纳芥欲识无穷
意耸翠更天外

江西李君千能和墨及画梅良斋许以三奇而诗非所长也

游艺无小大要皆知本原後人率意作终当媿前贤老潘妙对胶法从玉局传或假季心名空
扫干鐙烟补之貌梅花疎瘦仍清妍折枝映月影真态得之天李君信雅尚二者将求全诸公
竞称许试之乃诚然江西有诗派皎皎俱成编兹事未易窥属君尚加鞭

分韵送卢国华福建提刑得华字

卢侯场屋声天马腾渥洼残膏沾後人奇芬吐天葩来踏九陌尘去种河阳花向来再去国盛
山建高牙平生长者誉静笃语不譁古井絕微波璞玉无纖瑕使星照蜀道惠爱流三巴吏奸
赖刮磨民瘼烦搔爬田里诵虚公儿童知国华白首尚郎潜坐曹如如麻翩翩拥轺车去去向
合沙朝行惜君去与酒相邀遮共登狮子峯巨石临哈呀卻来登湖边野梅访萌芽老柳扫黄
叶枯荷蠹寒茄碁枰战文楸醉?欹乌纱倚昔送君行相去万里賒荷君远寄书得得来东嘉一
见又成别感念成咨嗟美君径褰帷往戍不待瓜先寻上水船何殊泛仙槎作粥喜奉姊上冢

仍过家此计正未疎所恨成天涯尚几或留行船鼓毋庸挝

题老融画牛溪烟雨

暝烟吹雨冥冥两牛半渡深清京尘久污巾履颇思归濯吾缨

慧元画寒林七贤

旧有唐人出游图谓宋之问王维李白高适史白岑参六人多画七贤不知第七人为谁或云是潘赵遥然未见所据病起坐攻媿斋元公忽作寒林七贤相寄余方梦寐故山见之洒然戏作数语谢之

羣贤俱诗豪世代不同处安得寒林中聯鑣睇相语谁欵创妙意臭味无今古吾闻顾陆辈寓意或如许桃李并芙蓉雪中蕉叶吐元师师老融淡墨扫风雨作此寄攻媿归兴渺烟渚旧六今则七未知果谁与我欲从之游讵敢厕俦侣画我往执鞭欣为李君御

李文綬和所赠老融诗复次韵为谢

邺侯插架书最多笔力雄奇天所命万人深中深闭门理窟搜寻到幽夔我诗无律如山讴形秽岂?珠玉映时时归入梦故山曳杖松间记投暝因君佳句撩秋思便欲归寻旧三径兼旬足痺不良行况复炎蒸如金甌夜来一雨洗河汉檐溜涓涓清入厅晨兴剥啄谁叩门乃有同声喜相应读之恍若濯清风自觉昏眸怯明镜伊余何幸点班行结交往往多名胜夫君平处顾清新解道澄江如练净从今我乃得四友不特官梅动诗兴推枕裁诗谢高致扶惫摇毫心靡定旧闻读檄愈头风今赖长篇起衰病

次韵六和塔秀江亭壁间留题

江外参差列万山我家深在万山间好山正不用钱买但要未老身先闲长江比愁终似少江水能回愁不了扁舟何日过西陵鄮山佳处吾归老

跋袁起岩所藏修禊亭

怅望当时真蹟临慕所在支分千载但称合作谁能有感斯文

定本为世第一此又在定定前今日锦标玉轴向来不直一钱

送陈君举舍人东归

皇天生人物千载非偶然冲和兼万人始得一美贤夫君乃其人人一已百千飞黄欲追风况

复勤着鞭文阵蚤奔放气欲摩青天短褐东海滨名贯斗牛躔闻道更独蚤自言若坠渊出登
龙虎榜径上鸛鹭联中间几流落清湘穷泝沿自首始为郎一见意已传登临上麟台授简游
兔园擢为柱下史遂居紫微垣去天真尺五朝纲赖扶颠龙楼阙问寝万口争进言惟君最涌
决螭头屡直前危言破人胆三进加勤拳天高听亦高归决何翩翩高风激颓波同列空惭颜
君虽未必去一去胜九迁我欲留孔戡有怀不得专况我自欲去何心挽归船嗟我生何为与
君幸齐年先後才九日相与同气然几年若契阔班心忽差肩判花同代庖君思如涌泉上房
草数制一房时一篇一篇辄高妙隗始媿余先春秋隐公传国史建隆编周官授大旨所得俱
未全聚散不可料钱别沧江边君将处於陵我耕绵上田君行无疾驱中途恐传宣不然遂能
别孤帆渺风烟梦魂不可制随君堕中川

次韵赵子野石城钓月图

石城江头可怜月曾照六朝清夜猎古往今来知几何长江衮衮萧萧叶谪僊去後诗盟寒王
孙诗瘦清柔柔诗情浩荡坐无奈扁舟笑把礪溪笑江平风轻波瑟瑟宿霭卷空天一色东风
吹句入长安一卷风流坐中得初得神意清再读胷次平回顾明月祗如故世上兴废徒分更
想君一叶方掀舞夜静水寒谁与语船头有酒且孤斟莫向金陵重怀古

戍溪道中

寒潮高于埭黄流濯西河人牛俱力壮相与冲流过潮落势回御转櫂依丘阿暮霭起平楚陰
云翳寒莎夜分潮复上櫓声相击摩大江渺无津不知身在何余生一虚舟兀然听风波吾亲
白云下况尔方卧疴远游非吾事归矣毋蹉跎

哭表弟汪去伪墓

内弟幼而敏抗志欲决科一行试曹掾吏才犹患多谓当为时用舌在如命何通籍已难阻入
幕终蹉跎我生依外家侵寻閱羲娥视君如同气竹马声相和少长联砚席词场深琢磨相期
到晚岁杖履俱婆娑寧知五年别君随东逝波忆同戍溪行我马君乘羸马弩费十驾羸俊已
倍过重来意惨怆树拥山嵯峨嗟君父与兄相望空山阿宿草埋白璧寒风撼林柯沈吟痛畴
昔有泪如悬河

次韵蒋德要三径

居山或称囚得闲乃赋谪我方乐静退来作三径客西山致朝爽膏肓在泉石况当秋空静万
里看一碧

吴参议達观斋

君不见大鹏与鸞鵠自适俱是逍遥游又不见大椿视朝?一修一短终期尽况乎秋毫为大泰

山小莫壽殇子彭为天漆园老子超衆作立论虽奇定非矫鳬脰从短鹤脰长蚩触亦能成战场
誉尧非桀两置之读书博塞俱亡羊世人颠倒名利途跻攀分寸争锱铢河伯犹惊北海若
井蛙醯鸡何足诛试同万衆走城市跃马途行分贱贵却登高处望尘中但见纷纷如聚蚁暂
高犹尔况真高神游八表非矜豪寧能高举去人世勿以役役随滔滔是知達人有大观蝶梦
为周聊自玩翛然无入不自得处若终身仕成漫吴侯晚到东海滨饱谙世故无戚欣相逢一
笑成莫逆似知我亦个中人

送姜子谦丞於潜

处则有超莲出则将哦松眉宇无一尘出处皆雍容君看妙莲花本出污泥中两松痛扫溉下
有簿书丛污洁无二致喧寂本亦同於潜今畿邑蜀道里通通至今存古意民风尚醇醴一邑
既当问尤宜抚疲癯蓝田文最高後学仰韩公彼言盖有激昧者但称工成案漫不省丞哉岂
真聳姜氏太岳後夷门慕家风教子延名师列碑多儒宗官庠既开荒书种庆所鍾换桂双枝
秀益见笔砚功後生日加勉衣鉢传无穷君才有余刃壮行气方充功名此椎轮劲翮看摩空
我归幸同社基酒时相从尊前不忍别吟愁夕阳春我家老扬州五记有遗踪向来耕织图为
烦访溪翁

送从弟叔韶尉东阳

阿连少也爽孤立生气焰壮年淬词锋倾心事铅槩胶庠困蠹盐世科终稳占再兴兰桂堂尔
祖真不忝况将尉东白士友尚歆艳惟我爱子深老矣犹不厌固知为子喜颇亦动吾念赠子
当以言苦口当针砭此邑子旧游历历数行店棠陰见郎君遗老喜窥覩其民最服义情伪靡
容掩莫恃彩棒威要使慕巾垫子文多立就词采更华瞻吾闻得隼者塞门差反玷前贤最加
谨临用更重检他时可待取天庭得锦□吾家有素风耳目久濡染毋庸慕豪举助廉先以俭
酒更宜戒平地有深堑酣畅当有时勿习盃潏灑将论母过高斯言却防玷立节母务奇躡
等恐成僭外物思过分检身但多欠勿嫌一尉卑封清尚为廉仕途固嶮巇大要进以渐不须
若求知真知奏应剡向来湖海豪四十可收敛寧为处囊锥莫作露刃剑匆匆操袂别鱼鲜酒
方酺刮目待子归罔俾吾言验

攻媿集卷二

钦定四库全书

攻媿集卷三

宋 楼钥 撰

古体诗

送制帅林和叔归

使君一何清鹤骨天与瘦少年场屋声六艺饱芳淑一行起作吏所立已不苟立朝凛大节论事几及溜发言必体国平正无矫揉藜藿为不采风采照宇宙出入有本末眼见凡三就来不为苟合荐召乃结绶去亦不好高三宿除出昼天官岂不贵陈义坚素守赣川尝报政复来守鄞鄞不求赫赫名实出龚黄右情为千万端到眼辄空透抚民过婴儿闾里息争鬪奸胥及强吏时用霹雳手人诵南山判情通理亦究六合俱帖静称赞不容口律身至严冷无能掣吾肘吏事精且勤呼烛侵夜漏公退入家塾诸孙後來秀吏卒不识面雒诵出牕牖几年南塘路来往困僵仆一朝平似掌行歌纷老幼公心信如水古井波不皱荣观处超然轩冕亦何有翩翩欲赋归排云屡腾奏庙论终不许斯民方借寇上心重闵劳词官向庐阜闾境极攀恋人人怀杜母君看卧辙人谁能使奔走挽须不得留百拜愿公壽老我幸同朝倾盖已如旧聯事东西省交情久益厚我归公亦来门户托云覆黄堂间参语惟我甥与舅扬旌鸣鼓吹賁此蓬荜陋清谈不及私翁归况不受义命孰不知践履或差谬惟公见善明力行真耐久有时相与言心同兰茝臭操袪寧忍别追送列觴豆公虽不好饮勉为引醇酎公去我亦隐菽水翻彩袖花溪渺何许望望几双堠千里共月明怀人重搔首惟应折梅花临风为三嗅

赋扬州伯父海桧

潜虬拔地径天矫腾挐势出青云表为谁犹向此中蟠坐閱春秋昏复晓团团圆盖月轮平矗矗苍丛衆星小枯槎当面结生香外有霜皮细匀遶乃知造化有神巧散觉樛枝穷树杪虽非直干栋梁材怪怪奇奇乐幽窈独秀海山临浩漾骇浪翻空云缥缈茁芽自有甘露滋弄影几经霜月皎峥嵘老气本天然後生矫揉何时了我家扬州真好事买归但觉千金少夜半有力欲负之护持和璧终归赵从来写照无髣髴画师欲快毫端扫解衣盘礴意惨澹卷起生绡色徒悄我来青边立寒峭自怜气与秋高杳倚筇一笑宾亦欢开尊相与倾清醪谓当好此如好贤为君三复緇衣笑时时来前看不足终待结屋平湖道

跋蔡北海扈从书事诗

晋阳固自有高共奉天岂可无宣公当时扶日沧海东尚想健笔驱长风指挥诸将如奴童中兴内相当推功终待毋庸詫诗工制藁具在釜坡中

送万耕道帅琼管

黎山千仞摩苍穹颞颞独在大海中自从汉武置两郡黎人始与南州通历历更革不胜计唐设五筦如容邕皇朝声教久渐被事体全有中华风生黎中居不可近熟黎百洞蟠疆封或从徐闻向南望一粟不见波吞空灵神至祷如响答征帆饱挂轻飞鸿晓行不计几多里彼岸往往夕阳春琉球大食更天表舶交海上俱朝宗势须至此少休息乘风径集番禺东不然舶政不可为两地虽远休戚同古今事变无定论难信捐之与扬雄四州隅分各置守琼台帅困尤尊崇高牙大口拥方伯鼓吹振响惊蛇龙汉家威名两伏波卢丁以来几宗工卫公精爽尚如

生妙语况有玉局翁使君吏事素高了明若古镜磨青铜叱驭行行不作难平生惟仗信与忠布宣王灵万里外益使向化来蛮貊顽犷未率宜以渐勿示骇政先含容平平之策用定远下下之考书阳公吏臣生长固安土尚当摩抚如童蒙属僚宦游岂得已士多失职悲途穷名分尊卑不可紊更念何处不相逢官事既了两无间可使和气俱冲融乡间惜别情所鍾临岐为倾琥珀浓手遮西日念远去欲留奈何鼓逢逢愿君稳度三合溜早归入侍明光宫

寄题高汝一少卿识山堂

庐山之高谁不识欲识其真了难得往来山中最亲切岭为横看峯是侧曾从彭蠡望山外识得山南昧山北山体如一本不动人苦求之愈多惑君构一堂据湓城香炉五老皆嘉宾莫问前後与向背面目还君多识真君今与山如故人慎毋忽作白头新堂中燕坐静且壽君其於此知吾心

侍仲舅同诸表游山

来游大梅山陟山几百重平行十仞冈俯瞰他山峯一步一步高势欲凌虚空左顾九地底楼台鸣鼓钟蓬莱反在下直恐船引风又疑海水竭洞见冯夷宫行行愈就顺故步寻苔封十年旧主人相对如梦中清谈虚阁上坐到夕阳春年来颇畏影掣身慕冥鸿入山非不深犹有行人纵安得更深处尚友荷衣翁未问梅子熟寧能瞰青松庶几适吾心余生得从容

大梅山

此山名大梅驱车入山麓试问山中人山名竟谁属禅家开道場为说梅子熟僊家指为岩曾此隐梅福或云古有梅其大蔽山谷至今二梅梁灵乡皆其族他山抗惊湍禹祠横殿屋三者尚谁凭禅师有遗族余皆不可辨安得究图録但爱山又山乔林间修竹

金峨漱石亭

溪声真是广长舌历劫谈空声不絶不知来自何处山一意倾东忘万折我欲漱石向水滨无奈牙齿摇落频夜半寒声到客枕只疑身是枕流人

寄题台州倅厅云壑图

顷年登临赤城里江邊城中万家市治中寄我云壑图快读新诗眼如洗回思岁月如星流念念飞空寻旧游披图哦诗想幽致直欲携筇上山头闻有於菟在芴蔚晚径寒鷗敢翔集几年榛棘蔽颺颺一朝絕境从中出细路虽非五達康萦回自觉阻且长万壑风烟开絕顶一丘曲折於中藏老砂射日银星炯梅峡含风襟袖冷千岩高下各异状如障如锋亦如领天景须凭意匠营山不在高僊则名规樞已定力未暇他时会有滕王亭风涛隔濶天垂幕安得扣门应剥啄吟诗梦到故山川睡美不知钟鼓传

王原庆新迁居南堂以古风求写恕斋二大字并石刻次韵

三槐诸孙有奇士才高特未遇时尔作诗犹能备衆体短章大篇仍杂拟解纷便掉三寸舌随
陆苏张何足比鵬鸮犹未离风尘蛟螭尚尔蟠泥滓平生曳裾向侯门豪杰闻风亲瞻企只今
交游亦凋落凛凛一身嗟独峙槐陰满庭渺何在久寓瀛壖成故里濒湖小楼太孤露何殊玉
川洛城里还来深入作郊居高屋好山成二美未能拔剑斩楼兰几欲袖椎摧晋鄙便将拂袖
武陵溪谁能着脚长安市西门性急佩柔韦柳子气高戕曲几衡宇全似归柴桑茅茨大胜居
儋耳我诗非工字尤拙荷子爱忘刚见喜夜来纵笔写恕斋自笑黔驴技止此更求古刻访少
作颇记醉中曾诺唯旧书纷沓费搜寻鱼钥未开尘事起呼童卷送三数轴仅可障风同故纸
新诗鼎来亟予和颠字敢追张长史不须更投苦海中一笑以还随弃毁径须?酒登南堂朗咏
白驹三四章

又次韵

投老归称前进士时与田夫相汝尔渊明赋归何敢望曼容自免差可拟门前爵罗真可设老
圃灌畦聊自比恕斋空洞最相亲笑谈颇觉清无滓时时过我共衔杯望望不来予为企丈夫
未遇困泥涂谁识鸾停兼鹄峙方期从容结诗社相与浮沈向闾里一朝别我欲远游欲入桃
源深洞里为言半隐欲偕行一子风流真俚美向来早有四方志行尽东南到边鄙只今名利
遂两忘争心无复於朝市祇有哦诗兴未阑连得新诗照尘几调高韵险不易和白雪阳春惊
俚耳年登六十鬓未斑乘兴一人若可喜宗盟莫逆素相忘并饔笑谈无彼此湖海豪气尽收
敛以恕名斋几一唯匆匆操袂不得留卮酒未乾人欲起寄声半隐不容言空有语离书满纸
归时赓和必盈箱写尽山川诗作史送子才归深闭门莫问是非并誉毁但期远归亦升堂西
湖仍访老知章

送郑楚客司法之岳阳

先生作赋真八吟高处独步无古今少从三山来四明一衿士子多青郡我尝学仕六七载膏
腹沾句资之深窃名文场掌帝制至今不敢忘指南英英二子俱秀爽遗以一经无羸金长公
奉母上巴陵念君远去因论心见君诗编笔虽敏三叹未见朱弦音【○此下似尚有数句为
传写者脱去】史清翁次前韵覓酒以金川玉女一枕瓶西安酒一斗送之次韵

社中日相从此意岂不真其初定要约深期往来频今年苦多故孤负四郊春清和到新秋其
间足良辰而我独抱疴未能会嘉宾道人得玉友风味尤可人思与君痛饮欲招复逡巡忽焉
得新酒亟遣径入唇别有酒一斗使使君意申我虽不敢尝为洗胷中尘

陈天成用东坡赵清献高斋诗韵赋适斋次韵

二公晚辞轩冕劳两斋莫辨适与高尝登云山仰清献平地着屋山周遭白头适过适斋下钓
游尚想随儿曹方从家舅与俱隐野鹤谁能鸣九臯加我数年未纳禄解去簪绂甘同袍世间

此事要识破差去不可容一毫穎川尉僊赋长句数寸之管烦君操欲追险韵继老老词锋尾
銳真吹毛舅家见诗勉续貂长松相倚慙青蒿我今无复望禄仕不应招我更由敖

送元卫弟赴长亭堪场

阿连生而秀二亲所甚爱仲兄勤抚养遇时辄加诲干蛊静而办胷次无卑隘今焉?牢盆官宇
临渤澥母谓官为小要使所居大母言才可了检身到纖芥我家门户重衣冠绵数代当以诚
心求子视勿自懈亭民亦良民孰谓俱无赖官吏既扰之兼并责逋债熬波亦良苦乐岁色犹
菜输盐不得钱何以禁私卖所在积蠹久良法寢多坏吾闻不无述更当审利害熟视不为谋
空餐媿难盖不应行一切遽使絕称贷富者能寡取倍息久仍在贫者庶少寬公私可缓带母
年登九十家居幸康泰其家不从政礼经有深戒幸子去不远时时可归拜小别不足惜轻舟
送前迈

送从子沆宰鄮乡

小阮幼鍾爱长乃遭百罹风木既深痛棣华更纏悲所赖有吾子独立守家规上有门户托傍
有孤与嫠忽为磨国行泝江秋为期冬滂与夏涨汉水足险巘操祛送子去风帆不可羈城中
楮为币邑下尤可知定知公事少不必事作为用智正恶凿大道本自夷家无壮子弟宗族各
天涯幸有知己人方且把一麾四海皆兄弟言寮善待之眠食谨调摄家务须自持俸薄用宜
啬无使实漏卮此别动深念毋忘故乡思一书抵万金何时宾鸿归

送高仲远赴滁倅

高氏在四明於今为清门貳卿道素高夫人德尤尊子弟皆恂恂夫君更春温昔年奉慈亲定
省严晨昏今日当门户有爱深弟昆伉俪信缘合端良由性根门中有孤嫠极意均抚存与我
亲儿女次第了嫁婚不可解於心肯自以为恩不言而躬行後生熟见闻诸郎已秀发穎异有
佳孙乡评共归重内外无间言公勤官业广所至治不烦僊舟何遽西行行佐侯藩环滁皆好
山风月当平分醉翁与乐全遺蹟今尚存况有贤使君易镇方北辕公余陪啸咏相映如瑶琨
生来仕平进自此朱两轡从兄今鼎贵鰲禁兼掖垣君其继英躅复收旧青毡老我得投闲平
年接清欢同社操君祛恋恋倾离樽梅风吹溽暑祝君尚加餐

秋雨兀坐王原庆携孙吉甫菊花倡和见过有分遗之意次韵

五载杜门居海角无复及堦赋红药自怜荒径菊犹存夕餐空待秋英落眼明喜见綠丛丛始
也抽芽今满握扶筇着意养孤芳荆棘旁连细开斫天香入骨徐吐芬中有秋风非外铄传闻
南堂有佳种愿过屠门思大嚼颇亦有意欲见之此意未容儿辈觉乃知便许移芳根不止园
官供小摘要令壽客来骈肩何用潭水求延年有时采之东篱边不觉南山在眼前渊明千载
幸同调老我此际方悠然西风吹花日夜急散金坐看开田田两诗先到衡门下思向平台寻
戏马从君九日去行乐莫为登高泪盈把

送王粹中教授入蜀

王粹中教授赴新蜀帅尚书黄公之招万里有行古调一篇赠别因诵所闻以求益杂然陈叙不暇较工拙也

万山四塞围平陆大为关中次为蜀我生东南未曾到蜀士游从闻颇熟自从襄阳上峻途高欲登天下临谷女娲大山塞空虚麻綫名堆千万曲行人一升鹿头关下瞰平川如画幅幅员二百四十里里出万谿民自蹙向来陕西五路兵退守诸关疆地促计臣权宜重增赋民力尚宽随所欲尔来因仍七十年鬼不输钱无雨粟民生哀哉不堪命外若富饶中不足益梓尚有繁盛风夔峡穷民几比屋侧耕危获供税租饭多稊稗无嘉谷朝廷谋帅弄印久宣谕尚书剖符竹尚书当今第一流翁壻相望冰映玉贻书挽君为此行古人义槩非流俗君亦慨然挈家去操袂未免再三祝君行岂为温饱计一举高飞快鸿鹄丈夫生有四方志登览山川非碌碌顷为假吏到燕山未行先取山经读所至访寻多得力中原至今在吾目北征西征昔有赋何肯从行空逐逐子西尝因过岷山遐想羊公欲相沃关右放贾眼拔镞表留卒使痛溃肉试推此意向前去到处前人有遗躅五丁开山果何在赞皇筹边言可覆剑门石角皆北向雪岭界天望身毒高皇将台在汉中武侯八阵留鱼复栈阁绳桥世称嶮威茂渡笮来夷族李冰离如底柱大宁盐泉若飞瀑四路尤多未见书买归何止三万轴黄松次功蜀檣机石湖居士吴船録君宜豫考经行地却见所见书之牋幕中便可资筹策远业因兹增蕴蓄又闻渡泸不在泸南在沈黎邛崃九折是君家世尤当知艺祖按图挥玉斧大渡河外等弃之本朝独无南诏患一语决定无敢违成都郡庠千白袍後来之秀日益奇周公礼殿岿然在画像盘古继宓牺春秋奠谒用旧乐想见节奏并威仪谈经酌史各专门学问可以相发挥康节遗书有传者不惜师问穷精微先天仅得十二三声音律吕无由窥更有异闻多细事试因余暇质所疑青城大面访仙迹普贤多变穷峨嵋街名某盘路九逵江号濯锦如污池古栢参天二千尺水浒鼎立三石犀药有珂贝说尤诡字书不见珥与桤金堂鹦鹉扫塔苍溪橘柚五出棣嘉陵梵像为最巨阆州城南天下稀少陵入蜀往来久须行万里方知诗我慙寡闻言又拙君其更为加询咨老我无复为世用但当杜门待君归归期未知果何时时寄尺楮宽吾思

山行归来喜栽新竹

平生好看竹每见觉相与小大或疎密一一皆媚妩恨无地可种所至造竹所近方辟门径得地寻丈许乞邻栽百个参差正当户天公有老眼惠以三日雨山行不厌泥但喜竹无苦归来报平安翠叶多楚楚不妨来子猷奚必希蒋诩何当遶扶疎岁寒与君偁

小溪道中

晚出城西门循墙过南境夏桥日沈辉旅店月成影纳纳出路遥聒聒水声冷敲枕拥衾禔乐此寒夜永

醉题鱼屏

五千买得见屏风白鱼相逐菰蒲中俊尾泼刺有生意旁人未易分雌雄屏後诸孙更雍容
濺无数迷西东我虽非鱼知鱼乐乐处未必鱼知依

范牛

人问吾何爱一牛范僊真笔倍风流绳牵虽未如自放犹胜更着金笼头

白醉

陶内翰清异録首载开元时高太素隐商山起六逍遥馆各制一铭其三曰冬日初出铭曰折
胶堕指梦想炙背金锣腾空映檐白醉余爱其言取以名阁陈进道惠示大篇次韵

处世难独醒时作映檐醉年少足裘马安知老夫味天梳与日?且免供酒事谪居幸三适得此
更惭愧向来六逍遥特书见清异君家老希夷相求谅同气曲身成直身朝寒俄失记醉中知
其天不饮乃同意书生暂奇温难与纯绵丽

赠范纬文秀才

括苍范牛自题云中兴道士范子珉异人也淳熙间武昌罗端良使君远寄诗篇有赠画牛范
秀才一诗爱玩不能去手时时诵之以写云亡之悲今十八年矣有范纬文叩门初谈风鉴旋
及墨戏事自言视子珉为大父行罗使君赠诗即其人也既试其说草数语畧之

中兴道士以牛鸣淡墨百果尤着声妙入神品仍有灵我不识之钦其名曾得乌犍两横轴又
有石榴才一幅武昌使君旧寄诗末言秀才乃其族忽有纬文来款门自言真是当家孙口诵
罗诗若翻水他诗历历俱能言一见前画叹真蹟愿得生绡畱吾笔为作来禽对石榴一扫横
枝生意出我诗不工人已陈有诗岂复能动人为君一写使君语更求知己如罗君

送陈表道宰南丰

与君出西郊送子之南盱子为名父子才器真璠璣乃翁老从臣循吏追两都益公工拟人谓
比王仲舒积善必余庆於公大门闾子能传家学何止读父书执丧真有闻孺慕久不渝弹琴
不成声西上何徐徐文场尝得隼一跌重叹吁通籍金闺中夷庚因少迂邑中有三曾声名照
堪輿士夫秀面文比屋多为儒万里此发轫胸中有全模将别更求言老马从问途乃翁同注
出亲谊崇终初以规不以颂不自知其愚民社非细事况此壮大区不饮第一策精神长有余
以此奉尘刹以此当万殊何官不可为祸福皆在吾剧邑最为难谨畏可无虞试看悔吝者实
惟予之辜民力久已困未免索税租欲如古什一攻琴难吹竽古意行今法自应知乐输有弊
勿遽革有奸勿亟锄责已重以周检束到锱铢两脚踏实地处事随精粗顽不在斯民猾不在
吏胥苟以明恕行久之定交孚为善无近名实着名与俱饮啄信前定富贵不容图三年报政
成明时其舍诸老我世无用情亲肯自疎尽此一杯酒惘然操子祛相依忽成别加餐意何如

陈天成诗多和陈坡韵兹因寄喜雨诗走笔谢之

一春垂垂困多雨虽曰如膏反成苦自知潦後必成旱果见晴天雨黄土连旬不雨已叹嗟
滌山川云不吐未闻鶉鴉鸣屋角但有蚊蝇争振羽一梅无望望重梅旱魃为妖无术御闲居
忧国傒云霓夜夜三星正当户君王侧身叹凉德云汉之诗无媿古避殿减膳率以躬已债纵
囚真有补使君精祷尽诚意千里归心称杜母四郊神物招螭蛇所在疲氓加手抚风伯在今
诚可讼已闻石燕空中舞时时小雨慰人心渴瓦流膏仅儿乳传言望日当通济老巫已得灵
神语霈然三日果应期靡神不举谁为主河流顿已复旧痕良苗喜见兴南亩中宵愁念不成
梦摩挲便腹眠清午从今一饱便可望坻京行见曾孙庾陈侯忽就春容篇径遣长须入城府
叹君健笔今已老不草敕书招赞普坡翁相去已百年时出新诗追步武

六月十六夜观月翼早纪所见成长謡

海云涌立双铁山明月正在山中间初疑溪陂蓝田出水面又似长风吹度玉门关须臾云过
月愈上太虚点缀从飞翻白衣苍狗不足究千变万态俱可观忽焉横卧如苍龙骊珠颌下光
团圆山河清影见历历桂枝扶疎若可攀夜深醉到鷄鸣起光景不类居尘寰长庚晬然朝曦
发望舒犹挂西林端我欲呼吸晶华驻朱颜左有金丹右玉丹昔闻两曜在天如磨蚁日行日
止一度慳太陰行速朔必会金饼旋复成弓变八卦万物尽关系历古不已真跳丸急景恂恍
难控抟但见霞彩生斓斑老我已复卦气阌学道无成空自叹不如安坐委天顺一听运化更
循环

它山堰

它山吾乡絶境也屡游而不及赋近过其上得前四句而归季夏郁蒸午寂无事因足成篇写
罢长哦遐想胜地寢觉风生两腋污垢俱清比之陵阳冷语尤为消暑上策也

它山堰头足奇观百万雷霆声不断谁把并州快剪刀平剪波澜成两段四明山深水源远衆
壑会谿长漫汗滔天狂潦不少留泻入长江势奔甯贤哉唐家王长官欲图永利输长算想得
惨澹经营时下上山川应饱看西偏千岭相属聯惟有兹山拥东岸遂於此地筑横埭截取衆
流心自断斟酌利害不全取高下参差仅强半水大十分七入江徐挹三分供溉灌支流弥弥
穿郡城脉络贯通平且缓旱时反此水亦足坐使千年忘旱暵无穷庙祀报元?像设森严人敢
玩梅梁夭矫有冥助大患於今尚能扞前辈所作多神灵日月真成赤心贯後人小智或更易
费尽工夫随破散河堙壅浚谋不集堤断河倾流甚悍富民缩手人受殃仰望古人重兴叹老
木号风波湛碧画屏俯仰丹青焕更须积雨看惊湍濡足褰裳何足惮去家不远时一游短艇
垂纶流可乱八月倘有仙槎来便欲乘之沂天汉

林复之求为僧陈君举为写山谷与俞清老诗而和之次韵

归墨气何锐为儒意何阑劝沮皆不可要惟心所安何必收澄观强欲加市冠余看饮光衣以

次传阿难

送秦仲防制干

秦郎相家子被服一寒士不味膏粱珍嗜书如嗜芡仕途乐平进欲上行或止制使护瀛壖婉画幕中试不避痴儿讥但欲了官事君贤他可及好善无与比公余仍进学访问无巨细片言苟有闻必欲穷根柢一介有可观穷阎必躬履老我甘投闲衡门人所弃惟君异时好时来访生死淡交久而敬清谈或移晷一朝语余别操袂不容已向来二三公颇亦同臭味去去羣欲空今君又行矣欲归投金瀨尚眷甬东水结交多老苍要路有知己青毡我家旧勉旃取上第先听传除书使我喜不寐别後未相忘母爱书一纸

送蒋德常宰鄱阳

某社颇寥落聚会多差参矧如夫君贤贵重双南金岂可无此君周旋相与深一别归未久征輶又駸駸老我苦多病别酒难重斟操袂不可留赠言効规箴吾闻古番君甚得江湖心官无崇与卑时无古与今古人乃能尔敛衽当致钦我亦一丈夫母谓力难任未暇言偃歌肯弹宓贱琴明恕加抚摩细故多亲临网密吏易奸赋重民弗禁飞鶚怀桑椹烹鱼溉釜鬻此邦熟往来当有慰黎黔君能践世科朝行仁朋簪公余昌远业书读松竹林故家未见书校讎如向歆时时为寻访归来共书淫勿以三径荒间作庄舄吟勉哉赴功名莫待二毛侵数年倘加我寒盟尚能寻

题家藏二画

一龙

老龙卧海沙觉来未欠伸珠光发海底闯然目有神画龙不画全必杂烟与云此龙未尝动具见爪与鳞一龙望见之争心生怒嗔奋迅勇欲前便尔云满身不知出谁笔定非尘中人若非亲见之何由写其真云涛方汹涌恍若渺无津为霖会有时正尔良苦辛乃知青云高不如寂寞滨深虞或飞去什袭聊自珍

一虎

一虎弭耳行一虎立而顾猛鸷乃天资亦尔相媚妩媚妩尚耽耽况复逢其怒吾闻宣城包今古称独步投老笔愈精利牙爪可怖方其欲画时闭户张绢素磨墨备丹彩饮酒至斗许解衣恣盘礴手足平地踞顾盼或腾拏窥之真是虎捉笔一挥成神全威不露此其真是欤为我振蓬户藜藿将不采何止饕狐兔

送陈进道倅三山

陈侯少有場屋声岁在壬午聯荐名晚年倦游安里居君亦怀绶归家庭齐年连姻更同社臭味相与如弟兄一朝话别欲远去洗盞更酌歌渭城金沙乐土宜宦游或谓不减洛与京平分风月信可乐人家弦诵几连薨岂惟帅閤赖关决定知秋闱望陶成西都外司掌宗盟须君共二为之丞勿谓为丞但虚称享途要当自此升惟君儒雅闻簪纓种学岁久笔纵横奥篇隐帙了如响清谈吐屑四座倾诗筒来往附邮传时出妙语人为惊梅花万树照山白荔子百种辉空明九门雄尊盛官府三山森耸多地灵长乐一志书不尽平生颇恨未经行烦君杰句为摹写远寄使我心神清

送姜子谦宰鍾离

濠梁自古扬州域禹娶涂山城尚留鍾离虽尝作楚县子男之国书春秋卑梁争桑起吴衅陰陵失道除汉雠嬴秦属之九江郡典午置郡任愈优萧梁尤重北徐镇高齐又为西楚州贞观割淮疆理失元和加水号名修阳冰篆虎书户册奇画於今照譙楼浮山筑堰谁与谋漫引童謡为激沟役工沈铁不胜计欲灌壽阳为废邱雾昏三日水怪出一决空贻千古羞上格下格果何在西濠东濠犹并流守边在人不在险险阻如故事不侔元魏拥兵数十万义兵坚守甯其酋向来横涧一失据凛凛重貽宵旰忧刺史旧带两城使涡口两城今不在君侯妙年笔为投名位讵肯卑微休世科高挹更膺仕哦松壮志未足酬欲効金城上方略宦游直到穷边头三光五岳气犹分故疆慨想何时收邑事不足烦大手往访古今资远猷老我无用重多病为君相与数觥筹棊社冷落故人少况复临风送行舟看君径赴功名会努力自取公与侯又闻鱼台在近境谁知鱼乐如庄周烽沈柝静若多暇从容何惜观游鱣

送瀟丞剡川

工部丞崐邱我生丁巳年比吾既逾冠再转丞金阊年龄过半百奏子哦松轩亲见覲小物如彼少壮然受输导行费略不取一钱飞糠至眯目犹恐劳弗宣汝方壮有室行行貳剡川地近既便亲俸外有圭田惟当念尔祖奉职罔不?邑无不当问事亦不得专退无为避事进勿至侵权庄生才不才其间要求旃去年苦旱歉谷熟殊颇偏未知催科时何取何当蠲一十七乡民户口富人烟去天曾不远燠恶易以传大宁九十余父母俱华颠况子勤干蛊岂不深爱怜食禄须尽瘁毋叹我独贤不应频往来恃有檄可沿时时寄安书何殊在目前秋赋已复近公余更加鞭金疊喜接境一水通乡船他时尚少病尚能催击鲜

送王知复宰建德

筮仕一何早字民一何迟历历三十年中间多险巇宦途祗平进分寸穷攀跻最後官胄监一蹴黄金閤祗由能自爱风鷁甘退飞宁为红莲幕往寻武陵谿亲党多劝止君去独不疑治家有贤媛应门委佳儿安居舍大厦列屋闲歌姬风霜登客路单车如鸡栖勇决有如此端是英雄姿有志事竟成不後一年期明诏趣鵷班壮县催瓜时贏得为君子否泰相因依古郡足潇洒年来困征追守宰俱贤明斯民其庶几杭苇欲走别有足如系维举酒向西望离愁渺天涯惟君才素高邑若不足为谓难易将至谓易後难支老我百念冷安能效良规犹记簿领初过

庭闻旧诗惟畏为过寡惟勤无功亏遗训俨如在终身当诵之

题赵尊道渥注图

赵尊道制干以龙眠渥注图示余余曰误矣本韩干马东坡曾为赋诗者此龙眠所临而以後为前俾易之为书坡诗於後而次其韵马实十六坡集诗云十四四岂误耶

良马六十有四蹄腾骧进止纷不齐权奇倜傥多不羁亦有顾影成骄嘶或行或涉更相顾交颈相摩若相语画出老杜沙苑行将军弟子早有声中间名种鸡羣鹤无复瘦疮乌暮啄当时玉花可媒龙後曰去尽乌呼风开元四十万匹马俯仰兴亡空见画龙眠妙手欲希韩莫遣铁面关西看

题高丽行看子

高丽贾人有以韩干马十二匹质於乡人者题曰行看子接处黄绫上书韩干马表饰以绫尾以精纸皆丽物也闻有怀金来取因命工临写而归之再用东坡韵书临本之後

竹批双耳风入蹄霜鬣剪作三花齐相随西去皆良种撼首势甯迎风嘶丹青不减陆与顾丽人传来译通语装为横轴看且行云是韩干非虚声圉人乘马如乘鹤人马相语同呼啄中有二匹真游龙爬梳回立绿杨风贾胡携金赎此马亟呼工人临旧画我诗无分到三韩写向新图时自看

跋李少裴修禊序

唐文皇之赐韩王有崔润甫之题为可考若李重光拨镫书断然无能效之者其为真笔何疑朱徐开皇之记则已见少裴之辨开元去贞观未远润甫又职校定四部图书以为最善本则真善矣辩才之本既殉昭陵今世止以定武本为第一又出欧阳率更所临石本自应在墨迹之下则知此本信为冠絶盖希代之宝也然考之新旧唐史崔湜弟液洙及从兄淮并有文翰居清要液至殿中侍御史液弟洙明皇用为秘书监出入禁中後赐名澄如此则液为湜之亲弟而为秘书监者洙也又宰相世系表博陵安平崔氏仁师相太宗高宗次子擢擢之子液吏部员外郎第四子挹挹之子湜相中宗湜之弟洙秘书监如此则液为湜之从弟又不为秘书监传之与表已自不同而洙之亲笔乃尔於是知作史与考古之难也因并述之仍赋长句以副少裴好古之意

兰亭修禊永和中羣贤高会俱雍容右军作序亦寓尔藁草乃致传无穷自言疑若有神助他日屡书终不同历代传宝在秘府尤其甚者唐太宗当时搜取极心力摹本一一颁羣公惟此真迹最奇絶萧梁开皇有遗踪亲御奎文赐元嘉龙蟠凤翥何其工辩才所取秘昭陵此本一洗凡马空崔家兄弟列清要海子况复称龟龙图书四部资校讎当时尚有贞观风自云此为最善本冰衔臣液题甚恭李王深得拨镫法笔力絶劲雄江东右军以来皆妙笔名胜异代如

相从病余扶惫行扫松李君携来为发蒙平生多看旧墨本一见使我开心胸摩挲叹息不自已至宝盍入明光宫隐居怀宝正不恶异气或能牛斗冲叩门有客勿倾倒恐有御史来乘骢送郑楚客司法之岳阳【○原本脱去此首据集目在本卷第十二首今从他本録补於此】

先生作赋真八吟高处独步无古今少从三山来四明一郡士子多青衿我尝学事六七载膏馥沾丐资之深窃名文场掌帝制至今不敢忘指南英英二子俱秀爽遗以一经无羸金长公奉母上巴陵念君远去因论心见君诗编笔虽敏三叹未见朱弦音海滨熬波幸解组未知宦路多岖嶽先生赋编更熟读非止骈俪夸词林其中关键妙一世字字谐协如鸣琴谈经况有诸述在持论肯为向与歆青箱但能世其业前蹶隳轨将駸駸君家曾无锥可卓迟次幸此突不黔不惟母老身非少廉介又务循官箴量入为出可不谨斤斤饥食寒有衾非求多藏第约已瓶储纸裹迹可寻法曹持平守三尺平反一笑神所临谨毋失已毋失人同列当和时盍簪上官善事免旷职首上尻高宜致钦岳阳楼号天下稀地圻吴楚连衡郴洞庭漫汗天立壁君山当中出青岑向来命名字以楚宦游直到重湖浔登楼谈笑领僚属风流欣遇贤候任君行应得江山助新篇寄我毋浮沈操袪欲言不尽意更取浊酒从君斟【太守任洙道原】

攻媿集卷三

<集部,别集类,南宋建炎至德佑,攻媿集>

钦定四库全书

攻媿集卷四

宋 楼钥 撰

古体诗

赵资政建三层楼中层藏书

危楼杰立潭府雄仰望惊瞿何穹窿擎以八柱真良工恍如水天移海东扶阑三级横复纵八牕交映光玲珑更上一层迥不同历览万象俱空蒙东南太白金钱峯西山千叠青芙蓉环遶不断如犀风平畴弥望禾芄芄城郭市井聚螳蜂烟树高低知几丛澄湖一片磨青铜潮来江涨银在熔海市三垂属提封四山寛围城在中地平楼小望易穷安得高卧陈元龙丽谯公府难从容二阁均在道佛宫江山得助无遗踪眼前突兀忽此逢主人干国成栋隆鼎彝久书柱石功名遂身退兹明农卜筑深静依高墉百间朗朗罗心胷咄嗟不待馨鼓冬最後奇观凌虚空牕户未须湿青红似闻卢陵周益公亦作此楼高于崧相望落落见两翁心匠不谋如影从我欲效顰意方浓一朝登眺若发蒙不愿侍公饮十锺不愿舞女纷歌僮插架三万牙千重此身愿为书蠹虫不然相陪夕阳春与公凭栏送冥鸿

再题行看子

先引护栏球子骢九马远近俱相从黑驹騊黄骝素骝亦有笏面仍银骠夏国一种青于蓝五明错靴皆如龙或骖或引恣驰骤坐觉隐耳声珑珑人间安得有此辈一一必自天闲中不惟骨相非凡马圉人贵介多雍容三花翦鬣自宫样空鞍更以香罗幪中间二者盖天马齿虽已老气尚雄不知几出横门道双立柳下青阴浓擗缰捩颌刷背臂旋梳鬣尾摇清风人人生意马欲动态度曲尽各不同韩生去我几百年藻色尚湿青与红不知何时堕鸡林万里远在东海东贾人携来得寓目一见绝叹丹青工千金可买真不惜忽复携去何匆匆亟令临写得形似如此神骏那得逢开元内外马盈亿色别为羣从登封韩生所貌定杰出七尺为騄八尺馱向来莺边系金绒归乘款段头已童伏枥宁能忘千里却笑区区据鞍矍铄翁

寄题吴汉英玩芳亭

吴侯奕奕天分高历记万卷无差毫青云垂上忽归去年来益收湖海豪志同三闾时则异玩此芳物亭之臯视彼憔悴亦何苦鼻间栩栩忘郁陶诗文满轴寄海峤灵均细论无乃劳与君齐年况同袍祗今衡门没蓬蒿有芳可玩便自适草间野卉时一遭菖芷辛夷兰杜若未暇一一追离骚【诗文皆以屈平异同为言】

送孙子祥赴新昌主簿

高士不为簿子严论独殊不遭何不可而况主簿乎夫君岂其裔南明筮仕初要知官无卑禄可代耕锄正须勾小稽使民能乐输矧复兼尉曹鼠窃随除驱两职去民近亨途此权舆君诚吾里秀质厚素有余埋蛇有阴德映雪读古书起家决儒科乡评足名誉妻以兄之子相与久相娱小别不足惜未免掺子祛邑境连台剡好山环四隅二子丞邻封川陆通舟车乘舆或一往径欲造庭除公余想续文尤当惜居诸会看兴公赋掷地金声如

送□丞上虞

我老不复仕行将挂衣冠两子俱贰令官职恪一般剡川且书考上虞亦之官人言易捧檄归奉重亲欢我意正不尔期汝政可观食焉怠其事古训戒舍镆汝职与民亲簿书当细看一邑无不问正尔良独难江海市三垂长堤扞惊湍埭高几如山潮至不留残宣和有遗迹能使潮浸滩陂湖谨蓄泄可以救旱乾长沟济漕运浚治令通宽此皆丞所职勿惮心力殫江头有东山永怀谢家安邑有李与丰况复居二潘尚友更从游问学加研钻平时固知汝廉谨无欺漫涉世终未深送汝能忘言故乡去帝乡舟馭多往还失已固不可待人亦多端罔求违道誉善遣非意干穷达自有时此理真如丹聚散不足较岂得长团圞闲静我所便汝其自加餐有时或乘兴往来二子间踏雨送汝行浮家当游般走笔如家书谁能苦雕剜

送伯中弟尉新喻

伯父盛德人伯中实暮子不惟能象贤气貌亦相似幼日读父书结字得骨髓粹然金玉姿少日期千里宁知游上庠蹉跎困门第晚始着青衫酸寒就一尉歛然报瓜时往戍真乐事自惟羣从希惜别不能已中年重离别况我衰如此亲故例作恶况复于吾弟兹行岂得休雅怀聊漫仕勿憚三年留江南富山水尉曹官虽卑去民最密迹一日斯必葺职务毋少弛善保金石躯离觴且同醉归来毕婚嫁相从期暮齿教子以义方忍贫授经史素业俱有传见进未见止大儿方决科如摘颌髭耳子尚徐其驱中途聽捷喜

送张子宓分教澧阳

澧阳渺何许远在天尽头顷为郡楼记图志不可求王侯録故实颇亦费冥搜忠以申明着学有公优外挹兰江水下俯僊明洲读书记羣玉采药思浮丘况得子厚语谓冠汉南州见谓颇详尽丰碑照城陬可怜城与楼百姓不知修乃知尚有遗家传載邳侯张君将客授盖尝叙其由为我谢澧人聊以遮前羞君家世为儒青箱袭箕裘太玄泊潜虚探蹟深可钩君才兼数器博洽谁与俦南庙推第一鵬鸞快九秋得官愈嗜学手抄不能休馆殿要人物衆宝登琳瑯演纶及视草如君真胜流兰芷生顔色暂烦为远游君方俟瓜时相依意绸缪樽酒接从客诗篇更唱酬论文?今昔析理到孔周老我澹无伴掺祛不容留别乘澹庵子倾盖当相投公余文字饮能思故人不

送周君可宰会稽

作邑诚匪易况子之稽山银茜视两赤朝家知其难鼎鼎数万户赋重民生艱山陵五云飞办护力更殫豫买万世弊法贪至于残越人瘠已甚当馈几发叹名臣为竭力减额宜少寛不齐物之情兹事终变翻箕敛及鷄豚诡户多容奸竟未得要领条令何其烦通才善治剧南康遂通班诚心试求之要使後可观古仕不出乡习俗皆素?东嘉尝客授寻乃乘朱輶略如仕故乡非意不得干况昔摄邑久疾苦知民间故吏想犹在疲民知长官宜若差易牙未免送以言权虽与正同事体终两般趣办不计久为真事多端遇事勿生风三思庶能安试登寛简堂取我前碑看六一真格言坐右当铭盘向来难奉母版輿今似潘外尽抚字劳退公悦慈顔莲峯声望重待子兴门阑勉哉发政誉行矣闻天关

钱清王千里得王大令保母甄刻为赋长句

书家千载称兰亭兰亭真迹藏昭陵只今定本夸第一贞观临写镌瑶琼黄閤冈下得宝墨古人烧甄坚于石大令亲书保母铭况是当时晋人刻甄虽破裂文多全妙画远过兰亭镌其间曲水悲夫字駸駸欲度骅骝前我家阿连缚虎手更得退堂方外友王君系出三槐家参坐会文真耐久田丁初来献小砚寻见津津若微溜细看背刻晋献之永和仿佛在傍右亟访田家叩所从始知墓崩随意取大甄支牀得前段掀倒浮屠全尾首字为十行行十二百十有七二字漏交螭方壶不复见贞石摧藏松亦朽我得此碑喜不寐摩娑三叹叹未已兴宁甲子十四周更閱三年仍乙丑若非洞晓未来数安知八百余年後坡翁应未见此志金蟬之铭何絶类又知文章有暗合智谋所见略相似二王遗踪无所遗谁知地下此段奇三君共为成胜事至

宝呈露端有时越山盘屈献与羲付与儿孙世守之烦君更为护幽竈或恐意如犹有知

赵资政招赏川海棠次袁和叔韵

少陵千古诗人杰每见名花辄题絶锦棠无如蜀川盛见说千林天染缬大篇短草合无数忍
对此花舌如结黄鹄衔子万里来春光颇向东南泄棹间老子携春归移石郁林表高洁崇桃
炫昼不足言红艷烧林疑益烈棠梨小红自退聽不待骚人定优劣两登蜀道归海滨一琴一
龟全晚节嘉招容我到花下春酒新筇公自挈攀翻乱插入共醉十二金钗不成列袁安参坐
为长哦同气相求磁石铁不须高烛映红妆佳月自能明作哲红潮满颊卧林间风流谁敢来
分别

泉口净明院昼寝

沙头古招提往来几经行兹来当春昼解衣愒西楹玉立青琅玕小牕虚且明纸帐白如雪牀
輭枕更平偃仰四体适欠申困思生须臾右脇卧径入华胥城无人梦自觉閭然四无声林间
婆饼焦悠悠时一鸣翻身更从容意泰气亦清连朝走丘壑百拜不遑宁老我久倦游幸兹息
营营衰相益已迫世念日愈轻自欣天与闲身是半髮僧未能遂高隐庶几保余龄

赋蒋生若水番马图

何处驱来良马六骥黄参错如花簇胡为不作腾骧去各有游缰繫前足胡人下马俱少休背
倚毡裘眠正熟酋豪拣箭奚奴捻意欲射驪不遗鏃琵琶横倚续续弹一夫坐聽胡中曲卧拥
提壶将引饮英气虬须皆贵族沙磧坡陀高复低天寒不见寸草緑我行燕冀颇见之狼帽乌
靴乃其俗勿云恃勇不知义要以赤心置其腹呜呼安得壮士健马咸作使坐令戎虏为臣仆

陈表道惠米缆

平生所嗜惟汤饼下箸辄空真隽永年来风痺忌触口厌闻来力勅正整江西谁将米作?卷送
银丝光可监僊禾为饼亚来侔细剪暴乾供健啖如来螺髻一毛拔卷然如蜃都人髮新弦未
上尚盘盘独茧长繰犹轧轧盱江珍品推南丰荷君归来携来东知君正直如羔羊贻我素丝
踰五总僊禾本出从嘉穀色味俱同无饼毒鼎深熟煮葱豉香大美元来加胾肉有时饭素笔
以蠶饒口属餽味更奇束皙一赋不及此为君却作补亡诗

卢甥申之自吴门寄顔乐闲画牋

年来吴门牋色泽胜西蜀春膏最宜书叶叶莹栗玉贤甥更好奇惠我小画副开緘粲殷红展
玩光溢目巧随研光花傅色湿丹绿桃杏春共妩兰桂秋始肃赵昌工折枝露华清可掬妙手
真似之藏去不忍触苟非欧虞辈谁敢当简牋又闻乐闲君古篆颇絶俗并求数纸书寄我慰
幽独

题申之寄示春郊画轴

郊原腴腴春意足细草凄迷芳树绿雁鹭无数泛陂塘牛羊相与随
如苏台俯平川闲人忧国无他策但愿好雨成丰年

六言问天池宝华

昔年曾赋虎丘犹恨灵岩未游天池之景絶胜宝华有水倒流老矣不复西去梦入陶朱扁舟
烦君为我寻访能以新诗寄不

赠成都鲁讲书【焯字叔献】

君家江发源我生瀛之壖相望万里外中间几山川近闻今子敬文价惊鸾鹄何由梦见之失
喜瞻在前幅巾耸英标衔袖出文编倒屣平生欢剧谈河汉悬老我三入朝广识两蜀贤相与
论诸公与君最周旋自言隐青城读书三十年城中竹谿居肥遯远市清谿拥屋後绿树环前
轩一舟号横雪可泝复可沿拂衣下三峡非为名利牵灊灊追古作海潮赋新篇旧依棹闲公
来乘甬东船顾我何所取有怀俱尽言老亲苦多病尝药冀少痊佳客不容留欲着归骖鞭间
为恶草具愿君少流连报无锦绣段赠有朱丝弦一别无复会掺袪意茫然蜀山渺何许同声
惟杜鹃

赵资政当山堂

我公仁存心乐山心如丹平生经行处不厌行路难青城及大面万叠连百蛮扪参仰脇息亦
尝坐长叹功成归四明得地数亩怪城隅路穷际小桥水汪湾萧条渔家市中有屋百间危楼
俯人世一看山四环堂深无他景犹以城当山城荒披绿莎青青透棹间秀润长满门坐对无
跻攀日夕气亦佳飞鸟相与还终日看不厌徙倚十二栏有如拥泰华管窥见一斑况兹绿成
阴连朝雨潺潺浓翠真欲滴秀色几可餐我家但环堵穷年困穹跽出门得旷远遥碧罗烟鬢
有时碧云涌半空耸高颜须臾辄变灭欲驻良亦艰美公得佳趣容我游其藩悠然时见之重
门勿令关

风琴

渊明有琴本无弦白傅偏喜听人弹不如空中风度曲随风往来声断续非宫非商从君听不
中律吕无亏成大如角韵来孤城细似蚓窍苍蝇声华亭夜鹤圆吭清颤动长引寒蝉鸣或疑
凤唳叫霄汉又恐僊佩云中行使具似曲无别调安得自在声泠泠蛙喧尚谓胜鼓吹牛鸣犹
以黄钟称丝不如竹亦漫语赖此七窍俱珑玲幽人院静新凉生八风不问来纵横短簟六尺
午睡足拂拂神来传广陵

送袁恭安赴江州节推

袁氏四世凡五公唐朝三相传家风君家九代擅儒业高曾艺苑俱称雄大父谦尊古君子诸父名高表吾里一门子弟更竞爽挹取乙科自君始九江需次今几年去去淥水依红莲忘年论交正相与叱驭欲往难流连老我秋来抱病久临岐无由置尊酒祇从卧内叙离怀恋恋掺袂仍握手鹏程万里兹权舆平时义方师有余送人以言古所重虽诵所言宁启予君看公孝与孟博太守坐啸仍画诺一郡之政赖关决千里应须念民瘼乡州义事烦主盟纤悉于余无隐情处事条理亦为政知君出仕当有声尊公亦手闽中幕公退着书端不恶君才更得江山助简书既练寻家学君行远业未可量弟兄丹桂终齐芳老諄无庸况多病尚能留眼看翱翔

赵南仲寄王朴画猫犬戏为之赋

□髣两狻猊胡为到庭户细观画手妙摹写真态度意足谢繁笔不待丹青污乱扫腹背毛头足巧分布彪也如愁胡眉攒眼光注岂惟足生鼈垂耳纷败絮掉尾固自若狸奴为惊惧侧耳寔畏之冲目犹敢怒诚知取形似不吠亦不捕对之辄一笑聊用慰沈痼

朱季公寄诗有怀真率之集次韵

伊昔羊尹临丹阳真率之名初滥觞香山尚齿当会昌卧云不羨坐岩廊七人各列官与乡年德俱高世所臧丙午同甲遥相望清谈生风想琅琅耆英人物尤轩昂赋诗远追白侍郎文富归休壽而康衣冠十二何锵锵吾乡五老如雁行至今月旦尚推扬家舅仕宦接王杨眉壽遂及渭水姜我如伤禽趁鸾凤忽惊骑箕归银潢向来雅约犹宝藏菜羹草具烹彘肪四皓中间有夏黄藹藹义风夸句章年来抱病久在牀同社阔别如河梁君尝远宦踰沅湘又向封川憩甘棠瘴雨蛮烟暗桃榔何时归安朝士坊忽传新诗几生光敛衽正色而寒芒诗境几成破天荒徐为续貂未须忙静揣归期应未央归纵未衰亦老苍暮年甘与子同裳何事相望天一方吴少由惠诗百篇久未及谢又以委贶勉次来韵

江右一世称名公首出刘惔与王蒙自高直以天自况何止数仞言高墉虚声一传实何在但知景附而风从我朝诸公门户濶普纳万象如虚空羣才俱入大鑪鞴铸人端如金在熔又如东君一布令白者自白红自红岩岩千载玉局老少年径以吾道东首干乐全次六一三公自是燕许宗奏篇六论初流传四海一日俱承风其间杰出六君子香薰班马犹为浓涪翁又分江西派作图序次由本中哦诗作文各务实荐鹗不愧北海融坐令文物掩前代主盟岂非诸老功固知文气僵湜籍亦许诗律沾徐洪宛丘诸黄接前辈宜有此甥风味同蚤尝决胜翰墨场笔端豪健谁争工新篇句句多洒落妙画字字真玲珑惜哉生晚百余载欧苏之门久登龙尚兹蹉跎未濶步吞舟之鱼沟岂容我方投老与世隔映牕爱景方瞳矐十年屏居可罗雀何人来顾一秃翁俨然衣冠见吾子文书衔袖名自通向来两卷余百篇讽咏至今未能穷更携大篇如拱璧刻画无盐赍孤踪人言霜蹄骋夷路我今秋水凌三峯爱余过厚拟前良此事如何着得依老我不入杞梓林峰阳高隐如孤桐平生习气扫欲尽只有媿处着力攻子归求之有余师惟知叹息锦绣胸时时杖屨许来往庶可岁寒相始终龙潭丈室一笋穿入露满其上因赋之

一笋入屋照座寒凌晨仍有清露溥益信露珠自根起正如真水潮泥丸厦屋不应为汝穿不肯屈节斜倚栏干霄拂云已在望且复自保青琅玕

旱久无水王伯容分惠桃源大谿泉将以长篇水至已雨走笔次韵

七十老翁门昼闭终日萧然无一事却因不雨动衰怀拥笏黄堂与祠祀兼旬旱涸舟不通井泉欲竭知无计僮奴抱瓮叩比邻水不得清仅无滓旧时见说横谿源有水侧出万竹前考之尔雅名丸泉颇思走介分微涓去之一驿不易到午暑坐想空垂涎不知何人剥啄叩我门惠以小罍童稚惊相传启封一勺挹清泚烹试茗碗真增妍况当精祷已孚应三日檐溜倾潺湲病中一笑诚莞尔城闉安有泉如此吴松四桥思陆羽白帝城西歌子美何用中 取扬子已觉清甘水入齿前人所品殊不定一下一高随所喜老我住世能几年引饮一瓢几子渊行见甫田取十千坐使远近俱安然欲和大篇不觉沈吟久击鉢成章慙敏手

送萧宰富阳

富春富山水地胜雄三吴壮哉十万户畿邑拱行都大江横吾前上下万贾趋吾子丞剡川摄事奸已鉏试县力愈难勉旃立规橈治县古有谱近颇多着书棹闲爱汝厚海语皆良图老我不惜别所望安官居汝亦颇练事正恐才尚疎我以热肺肠有求应所须遇事费十思一跌真不虞虽当从心年兢兢矩不踰况汝年方壮勿恃才有余据轮始窥井任诞宁失居三年待汝归二亲真倚闾

又送从子濯

二孙吾所爱别去殊关情阿剡将赏延伴子性亦灵烦子善诱之他日使有成公余松竹林共勉雒诵声

寄题林宗山巢龟

彼泽之陂蒲与荷有美一人伤如何洁清如许岂不好纫兰缀蓂何足多七十二钻无遗策不灵于已徒遭厄人生何用千岁为愿似巢莲足清白

送赵仲礼守天台

棹间社稷臣卷藏经济手功名付诸郎秀出诸公右大见倅东嘉洗印去未久次子镇赤城急流去何骤二者皆为亲欲奉乔松壽况有戏彩堂可继清猷後邻封尤便养荣侍各锦昼春风扇微和安輿云出岫家传吏师法从政于何有还归鸳鹭行金印当系肘向来尝佐郡山川若僚友南渡多北客风味中都旧士夫喜公来纷然送马首其中多故知颇问老夫否

赠相手文李道

生有文在手纵横殆天予其间动成字往往传自古舜褒梁武老十子贡五季友太叔虞仲子竟归鲁仲弓有鈎文宰我亦握户敏士自文雅习道本因辅邓渊彭城符琐琐不足数李合陶士行三公皆定数白帝矜奇瑞见笑汉世祖何为言祸福历历如君语自言传希夷妙处胜貌取见手知国封况此细纹缕研油燎梅檀始见掌中房何如一覽顷坐谈乐与苦老我缩袖间不复烦推步子其访城中英杰在何许

跋余子壽所藏山谷书范孟博传

山谷晚在宣州或求作字山谷问欲何书则曰惟先生之意山谷许以书范孟博传或谓南方无复书山谷曰平时好读此传遂默诵而书之旧闻此说又知在上饶大夫家愿见不可余子壽来入制幕博记善属文偶谈及此又出摹本及尊公跋语始知其为先世旧物也爲赋长句

宜人初未宜於人菜肚老人竟不振承天院记顾何罪一斥致死南海滨贤哉别驾眷迁客不恤罪罟深相亲攘攘不容处城闉夜遣二子从夫君一日携纸丐奇画引笔行墨生烟云南方无书可寻阅默写此传终全文补亡三篋比安世偶熟此卷非张巡岩岩汝南范孟博清裁千载无比伦坡翁侍母曾启问百谪九死气自伸别驾去官公亦已身虽既衰笔有神我闻此书久欲见摹本尚尔况其真辍公清俸登坚珉可立懦夫羞佞臣

叶处士写照

顷在朝行叶处士光远为余写照置于山林中欣然自赞有云山林如许盍归去盖志于归也一归十三年既挂冠再寄一图为老人星状形容变尽非复固吾矣戏作长句谢之

我老旧曾官日边随衆年除仍岁迁母子日夜望乡国但欲共耕绵上田弃官写照妙一世画我形模在山水有如虎头貌幼輿正合置之岩石里犹记有客为谀言盍更野服为貂蝉我笑不答心不然拂衣径得归林泉归来岁月不知久十余年中何不有此心炯炯尚如丹只为幽忧成老丑久矣与世俱相忘荷君念我应老苍新图白髭添一二岂知双鬓皆成霜两图对挂耿相照顾盼从容成一笑更添松竹作壽星我已甘心就枯槁人言姿态与真同如照止水窥青铜明知己非故吾矣小孙指点能呼翁君居天街号称首侯王生面罗左右边头飞将新立功飒爽英气照牕牖名满四方求者多千金造门君不呵能事固不受促迫应酬虽繁可奈何胡为有暇及衰朽楚楚装潢意尤厚我今已是行路人不须重累丹青手

送宣宗禹保宁军掌书记

宣之为姓世所稀暇日试为君家推宋之宣公舍与夷子孙相承此为基或云出自鲁宣伯元和姓纂言则非西京功臣虎与义侯封累世皆宗枝盛哉云阳宣巨公光武称其胜二龚鄴为司空怀在赵遥遥久矣无亢宗君家本自太未来世以儒术为家风尚及瞻识诸父行君方髻亂成孤童艰难历徧屹中立五行俱下攻时习自从一登贤士庭贵名日起人谁及舍选真似青铜钱一跃龙门浪三级吾乡惊喜破天荒归见朋俦愈谦抑宝婺古郡名浙东往泛緑水依

芙蓉如君入幕假途尔及今民事宜加工亨途万里才发轫掺祛勿使金樽空从今家声当愈大坐使宣氏崔卢同

攻媿集卷四

钦定四库全书

攻媿集卷五

宋 楼钥 撰

古体诗

林和叔侍郎龟潭庄

林和叔侍郎永康别墅龟潭庄以蜀中乌丝栏为寄使赋诗而书之

顷年曾记游花谿宗枢潭府谿之湄徘徊其上叹秀爽宜有英才瑞明时岩岩林公天与奇劲气不为金石移少以六艺鸣上庠游宦所至英声驰澜翻荐口彻旒冕通籍直上黄金闺出宰长城如卓鲁至今遗爱人歌之入朝一冠御史豸台纲振厉先光辉光宗圣度如天度俾承旧制形宸奎言所当言公不屈上书抗直深倚毗历居三院上横榻首尾独击及四期擢居小天不肯仕远指章贡把一麾政成召节不旋踵神与清涨促公归代言批勅节弥励藜藿不采非公谁竟以松班分制闽海邦虽陋不鄙夷抚摩赤子厘一稔功利及物难周知公方在台我立螭台省相望心事齐皇上初政公赐环我居青琐公紫薇时平论事同努力寄名雷霆如恐迟我求外补径投闲公亦出关喜相随受?亲见贤郡侯攀辕卧辙同旄倪公时自谓二宜去吏民犹诵三不欺棠阴蔽芾勿翦伐万人来往城南堤书来不复说余事颇言别墅躬鉏犁频年日涉愈成趣去家三里共游嬉首崇御札极尊合又以副墨登之碑非欲自诧稽古力铺张圣德彰仁慈犹记殿上争挽衣咫尺龙颜犯天威坐以汉法当粉蠹廷臣就列仍绅綬篋藏常裾不容毁如以折檻存轩墀公严十袞我书榜老臣追往空涕洟吾闻一潭浩深緑上有怪石形如龟是为古丽最佳处地藏天作公发挥大谿横贯地坦平演迤明秀山四围十峯历历可名数余如芙蓉耸天涯独此一山亘里许中立壁峻难攀跻堂名娱老正东南比汉二疏公庶几海棠炫画遶栏檻细数嫣红遍繁枝杂花满地秀而野何殊迂□居洛师千岁灵龟巢莲叶祝公耆壽登龐眉桃花源杳号霞隐木奴霜後黄金垂深可藏书旷可射初篁细香临月池狎鸥渚边鸥为下观鱼梁上鱼不疑悬崖石横笋斜出拒霜为城媚清漪公既垂车弃轩冕鸿飞冥冥不受羈超然但欲适吾意抱瓮直欲心忘机我虽未到景略序尽録无心图画为花朝月夕景何限想见晴好雨亦宜落霞孤鹜映西日多少空翠仍烟霏此虽见之咏不足强欲着雨是耶非两守宝婺行或止无由往叩山中扉旧闻赵公访欧阳千里命驾如吕稽清风明月两闲人万口犹传乐府诗我虽挂冠病双足颂系一榻当炎曦荷公虽若鱼相忘尺书时来自緘题屡索鄙书懒未暇又恐境胜难为词兹来督我语益峻远寄蜀绢栏乌丝为吾赠诗仍就写欲待

相好无时衰想像试作高堂赋身知难往心欲飞才固不多老更尽况此病瘁神亦疲不如及
今为公作语成不工不敢辞两家子弟向後日庶几二老同襟期

次韵黄文叔正言送日铸茶

龙图正言年兄寄日铸贡品且以东坡诗中妖邪奴隶等语为病使为直之既与佳客品尝比
平日所得者絕不同仰叹鑒赏之精也细观坡公和钱安道寄惠建茶诗一时和韵反爲双井
所牵後在北方和蒋夔寄茶则云沙谿北苑强分别水脚一线争谁先又云老妻稚子不知爱
一半已入姜盐煎人生所遇无不可南北嗜好知谁贤死生祸福久不择更论甘苦争媿妍则
是此老初亦无定论似不必深较辄次前韵聊为日铸解嘲以资一笑

古人养老食而醕後人既饱须啜茗唐称阳羨顾渚茶惠建之名犹未省小团花????僞云龙竞
巧争妍动天聽要之造化生万物甘苦酸盐适其性古来水品多异同茶品知谁得其正芽新
火活善调汤种类虽殊俱隼永坡翁立论亦疲当一贬一褒何太猛北苑固为天下最未必余
茶尽邪慳越山日铸名最高种在阳坡性非冷父老不堪痛摧抑待以奴隶心若鯁草木端有
地所宜此品标奇惟一岭祇应杂取应人须寢使虚名成画饼坡公殆未识吾真真者如珠光
自炯白头拾遗辨真贋非是容心为乡井寄来双缶妙絶伦病□新尝信侥幸七盃自煎成水
厄笑看腹似支离癭

长生草

我方髻髭时已复见兹草仲舅尉江阳奉亲顔色好牕门挂经冬珠丝罩轻编意为霜雪残白
花乃明杲世间三友外此有岁寒操年至十七八童心如木槁随时到柯山逢人细访考买之
野人手何须访蓬岛尝为伯氏壽作诗颂难老经今五十年得自江南道老我日就衰岁月岂
长保一笑哦子诗犹将伴梨枣

又次王?叔韵

仲冬方寒荔挺出仲夏方炎靡草死若将朝菌北大椿相去何啻千万里金芝僊草不可见长
生之草略相似少时曾识青青色今日得之乃真是天工矜悯轻丧生故出珍苗普相示若言
神僊可学致自是未得养生理人爲天地最灵物野卉无情犹若此石间薜荔水昌阳卷柏生
崖并葛藟是皆草中号长久未见悬空解葩藁柯叶不改耐岁寒土着青松那可拟不须丹砂
访葛洪毋用僊方传李耳未知此种谁为传乌有先生子虚赋

寄题阆风刘允叔月波

浮海思乘桴拾月或挂席何如阆风僊渤澥坐中得隐几时观澜黏天四无壁清夜水不摇孤
蟾净沈璧飘风一过之波光湛空碧万顷玻璃田荡以黄金液我欲从之游尚恐一层隔何当
携珍茶石井试余滴

题杨子元琪所藏东坡古木

东坡笔端游戏槎牙老气横秋笑揖退廉博士信酷似文湖州

同倪正甫尚书游西湖

灵芝寺临西湖倪正甫尚书曰此湖如贤者别久再见俨然如昨感其言而作

旧说西湖比西子君言西湖似贤士吁嗟契濶十五年一日相逢只如此南山北山两高峯春波灏灏摩青铜未能荡桨穷胜处倚栏一望开心胸老我挂冠隐田里岂知再见烟连水小须夏日醉满荷脱屣东归甘已矣

赠犁春谢耕道

归耕十三年此来殊欲然一犁正春雨君行欲何处我方买红船重归寻旧?君亦早归来勿荒负郭田

访李国器于包山同登寺後山庵

访客包家山相与登层巔嶙峋巨石中屈曲扶栏干夜来雨初过石罅时涓涓轻輿到冈头大江横吾前亭午潮方盛千艘散平川道人茅三间花木罗後先竭来汨京尘旷望为洗煎山断塔层层西陵渺苍烟此道走邯郸归心更翩翩

谢林德久正字惠诗次韵

老我甘投闲晏然十三秋兹来何所似反衣狐白裘京尘素为缁梦想思首丘低徊未成去龟勉终自羞久闻歌楚骚欲见知无由诗文惠盈轴一诵消百忧便当细论文夜雨同春葛平生万事了此去复何求尚贪未见书痛洗千斛愁得此不翅足携归老先畴

次韵东坡武昌西山诗

说论一兴谁可回贤路荆棘争先栽窜流多能擅笔墨囚拘或可为盐梅雪堂先生万人敌议论磊落心崔嵬向来罗织脱一死至今诗话存乌台凭高望远想宏放眼界四海空无埃黄冈踏遍兴未尽絶江浪破琉璃堆漫郎神交信如在石为窰樽胜金罍邓侯先曾访遗迹铭文深刻山之隈山荒地僻分埋没二公前後分莓苔元佑一洗人间怨天地清宁公道开玉堂同念旧游胜笔端万物挫欲摧时哉难得复易失弟兄远过崖与雷北归天涯望阳羨买田不及归去来我为长歌吊此老恸哭未抵长歌哀

盛山十二诗俱在石刻而不见于诸公集中唱和之盛未有如西山者旧轴既不知所在後來

跋语亦仅存錄本尔輒不揣和韵以寓吊古之意仍效周益公用翰苑印章重叹二公俱曾佩此也

次韵雷知院观因诗因叙家中铜像之详

鼻祖家住江东边推择为吏心静渊朝朝趋邑过圯上时见暗磧光煜然平时奉佛心至谨建立塔庙崇诸天试令便介识所在退公始得来其前挥鉏去沙若有物微见铜像伤其顛须臾衆觀全体见端严相好巧且坚迎归供养备精洁我家旧物犹青毡铢衣飘摇俱梵相珠缨垂裊穿淮蠃虽非丈六黄金身他处像设无能先不知何人妙陶冶?用五色增华妍自兹累叶永为宝如以衣鉢更相便是时承平最盛际正在景德咸平间画工难貌天人妙劫风不动神光圆益知佛教来已远徧满震旦尊金僊慈悲无量应成祷影响若与人周旋耳则闻音目可观此有妙理谁能詮宝光焰焰拥身後贝花叶叶俱成全顶戴天冠工莫及中有一佛立不偏有孙是为乡先生决科衣冠遂蟬聯大父持丧久庐墓曾以此事形碑镌起身月卿出为郡殿上寤主以一言易守乡邦凡五年宠光赫奕当政宣移至湖心值兵毁精庐灰灭因亡焉初闻诸父话遗迹兴叹欲见无因缘扬州伯父初赋归慨念孝感如参寥零丁募以十万钱里巷响应庆愈绵木工先为小台殿居以古像小之旃後人事之加笃敬日裊香篆长蜿蜒衰宗幸有此奇特信知福利非唐捐安得东归奉香火晏坐终老甘三椽

桃园图

夷坚丙志载桃园图画事甚详曾茂昭尚书以所藏墨本题识其上後见遗余益信夷坚之说
不诬作长句以谢

桃园初传武陵谿靖节作记人不疑其先深避嬴政虐嘉遯与世真相违尚不知汉况晋魏子孙绵远无终期正如三韩有秦语传为神僊愈难知桃园洞府渔人窥别有天地均四时意必志者塞其谿不然将为世所羈後人想像作图画但见耄稚咸嬉嬉人家随处成井市畎亩颇亦分塍畦井鬼不照坤之维方士异人多崛奇筠笼二版坚如铁能刻景物穷纤微淨室给以酒盈斗一昔图成了无亏同寮欲求第二本版忽震裂人已非夷坚作怪言历历何意今乃亲见之未知桃源有此否此事茫昧不可稽初疑长房缩地脉又似照影归摩尼巨丽写成阿房赋牵连貌出连昌辞采女细数七十二人言霓裳舞羽衣楼阁玲珑在缥缈其间恐有太真妃刻画工巧世固鲜磨以岁月或可为彩鸾唐韵已甚捷未见神速能如斯尚有渔舟傍阶迟咫尺安知前路迷天圣已踰三甲子何人宝藏至今兹南丰丈人惠墨本老眼增明失昏眊固知凡踪不可到一梦游僊犹庶几秘之十袭何以报赠子相好无衰时

吴山井

寒泉堂道流王德正屡求吴山井记而临安图经所载甚略无可考证赋长句以遗之

钱塘东南一都会西湖宛在高城外凿为六井引入城唐相邳侯功尚在吴山横亘城中央左

右江湖尽襟带寒泉迸溢清且甘发自灵源匪分派天目两乳龙凤来秀气所鍾此其最海滨
斥卤润作醴安得一泉独滂沛四朝驻蹕八十年民聚五方真衆大抱瓮桔槔万夫汲飞泉仰
流筒吸快大旱不乾潦不溢数里頽肩竞分卖人言神龙宅其下济物阴功至今在川泽固多
资灌溉此井犹能济闾閻皇家德泽如此泉福祚与之俱不改

代书寄内弟耐翁总干

我昔生外家半世犹相依至今连墙居日日相闻知诸表如羣从休戚真同之耐翁生而秀爱
惜从儿时文采既俊发吏才人共推低徊久选调每每为叹咨兹行佐王人未到声已蜚邮置
屡得书论事语益奇使长首推荐婉画多所资近观会稽编分析及毫厘益知足心计荐书徧
诸司正欲助才选非敢请以私惜君年欲侵正以远大期得书再三读惘然增愕眙非所望于
子所言何背驰江湖两路间弄兵分潢池羽檄以时至庙堂日三思调度供军需发兵币四垂
吾事诚可虑彼亦安能为岂曰白头贼指日当诛夷使子任贼冲尚望羽扇挥如何隔千里遽
来奉檄归长沙屹巨镇洞庭渺无涯鄂渚屯重兵上游藉兵威当思深远谋胡为先自萎此言
及同寮必为人所窥归以语闺门徒惊妾与妻无端使稟议在此何为辞望子置私忧志立官
无卑张巡起县令力拒百万师逆徒哽喉牙蔽遮赖涣澼韦寛守玉璧臧质全盱眙丈夫立节
义有才尤当施杀身以成仁致命须见危读书不念此万卷终何裨但当安义命前定无参差
勉哉尽所职造物不汝遗况复受国恩当与相维持今子仕高沙偶然脱危机正须加义方岂
应使同斯向也未得禄遑遑不自支既入红莲幕图进亦其宜今日宁为民此乃无聊词归来
事若定又思登王畿胸中空扰扰祸福不在兹倘能悟愚言便可知昨非着枕必安寝食淡甘
如飴老諄非强聒鄙见不可移少安常毋躁通籍看金闺

题汪季路家藏吴彩鸾唐韵後

旧说僊人吴彩鸾日书切韵归毫端不应神速有如此令人至今疑稗官相传此事三百载谁
知真蹟俨然在笔精墨妙信入神间以朱丹倍晶彩法言初为此韵时臆衰文字觉後知宁知
遂经谪僊手讳字曾阙民与基经生矻矻尽精力摩以岁月或可得动翰如飞犹恐迟一日一
挥出心画神僊之说云渺茫僊凡配耦尤荒唐箫史弄玉乘风去蓝田空说容裴航文箫之遇
真是否岂比虚名传不朽五篇历历为全书始信传闻是真有当时所直才五缗于今千金价
未均十年盖有数百本未知几本传今人惜哉字画太纖细後日传之知几岁祇今已有字不
全欲镌翠珉固非易我踰七十方见之暂借一观聊自怡平生愿见心便足何必更谋身後为
隋开皇初陆法言与刘仪同等八人论具音韵烛下握笔略记纲纪至仁壽元年始成切韵五
卷比之前人韵集韵略音谱等书已不羣矣後有郭知立等九人各有增加惟天宝十载孙愐
唐韵最着今世所行广韵则皇朝景德祥符重修遂至二万六千一百九十四言而集韵又在
其後也今以广韵较彩鸾所书东有十七而此本止三字同有四十五而此止十九公有十三
而此止于八蒙有二十七而此止于十二注文亦多不全况法言及愐二序今该立于唐韵之
前彩鸾所书既名曰切韵又首书法言之序则其为法言之切韵明矣传记已误曰孙愐唐韵
今亦多以三书为一或至谓广韵为唐韵而彩鸾能书之是皆非也且五篇其四皆于其首书
凡若干韵而于上声独阙序中辛得源偶言旁有阙文後人遽以东字足之为谏议非也盖谂

议云

题汪宏辅三马图

玉花流云照夜白开元尚想行九街韩李郑君俱已矣健笔谁能如顺斋

枢密府雪後作故韩氏子舍也

平生好流水雅欲临流赋涧谿或过之眷眷不能去青山围故乡不肯入城府宁知开八表重来寻故步势家遗故居传舍偶成寓轩楹立奇石巉岩高丈许三面立屏障曲沼水深贮荏苒将半载未见有时雨新春积雪余檐声夜如注晓起推闲窻石穴水喷吐下穿玲珑余数尺成瀑布髣髴小龙湫虽微体略具退公辄对之相逢欢迟暮有客与同赏酌酒更告语虽云京尘深燕坐得幽趣悬崖挂长藤絶顶列佳树微风一披拂坠点纷无数吾方谋乞身信美难久驻未能写成图聊用赋长句

谢文思许尚之石函广陵散谱

余好弹广陵散比见周待制清真集序石函中谱叹味不已念无从可得文思许尚之中行云家有此本後自武昌録寄深叹雅尚又以知然诺之不轻也因作是诗以谢之

叔夜千载人生也当晋魏君卑臣寢强駸駸司马氏幽愤无所泄舒写向桐梓慢商与宫同惨痛声足备规橹既弘濶音节分巨细拨刺泊全扶他曲安有是昌黎赠颖师必为此曲制昵昵变轩昂悲壮见英气形容泛丝声云絮无根蒂孤凤出喧啾或失千丈势谓此琵琶诗欧苏俱过矣余生无他好嗜此如嗜芡清弹五十年良夜或无寐向时几似之激烈至流涕素考韩臯言神授托奇诡别姊取韩相多用聂政事近读清真序始知石函秘贤哉许阿讷自言家有此文君昔宝藏人亡琴亦废荷君重然诺写谱远相寄按拍三十六大同小有异此即名止息八拍信为贄君远未能来我老从此逝何当为君弹更穷不尽意

韩文公聽颖师弹琴诗几为古今絶唱前十句形容曲尽是必为广陵散而作他曲不足以当此欧公以为琵琶诗而苏公遂櫟括为琵琶词二公皆天人何敢轻议然俱非深于琴者也丁卯夏秋间尝有一词謾録呈所谓激烈至流涕者也

正声第一拍名取韩相第十三拍名别姊又一本序五拍亦有名第一拍名井里史记刺客传聂政軹深井里人也刺杀韩相侠累为姊曰荣韩臯知叔夜之托于神授以避祸而不知名拍以聂政事又以见古有此曲也鲜有知者故及之

王叔达以尉彭泽潜玉洞述见示

书岩已奇甚潜玉尤伟哉李君漫盘谷元子空岵台神不得自秘天应为君开渊明如得此应

不赋归来

题董亨道八景图

钱塘怒涛天下无谁将尺纸为新图贺家湖上如镜净屡向烟波逢钓徒彩虹横卧吴淞上洞庭一螺浮具区亦曾泛舟彭蠡湖插立千剑名大孤庐山高哉不得到历历五老聯香炉上锤下锤夹湖口半江清浊泾渭如多景雄据金焦间夕阳微照海门山其余知名不知处赤壁但歌前後赋江汉至鄂始合流黄鹤楼前鸚鵡洲潇湘见说青如染道林岳麓横清秋我欲远游嗟暮齿蝶梦翩翩漫千里但欲絕江寻越山归老故山吾已矣

鱼计亭

平生信天公颓然不作计顾我虽非鱼想见亦相似潜深本其性鱼亦非有意浮阳或在渚不能终自秘或为饥所驱危机在香饵轻丝引纖鉤性命困刀几鱼以味得烹我以名自累安得两相忘容我从此逝

跋卢申之所藏韦偃三马

名画记言韦鑒工龙马妙得精气从子鸚善小马有小马放牧图传于代思陵亲为再书尤为可宝申之求诗感而有作

嗟哉马之生驰骤乃其性一为人所羈寸步不得骋局促闲廐中专俟圉人令调服无踴啮始可用朝请战骑冒锋鏑或致陨其命绣羈非不华金羈号为盛青黄木之此此亦马所病立仗尤贵重一鸣辄斥屏何如在牧时卧起玩烟景丰草胜刍荳清波恣游泳韦侯擅笔精幻出无人境思陵赐珍题昭回光炳炳身方缚名缰三年慙负乘细窥乐寬闲悠然动归兴

宇文枢密借示范寬春山图妙絕一时以诗送还

范生本以寬得名不学关仝与李成笔端自出一机杼理通神会真其能横披小轴屡到眼颇亦时能辨真贋未见弘大如公藏茂树乔山春烂漫此图不是江南山寒空青嶂疑商顏高高下下几佳处庄家时有茅三间桥梁楼观各有趣一夫驱驴何处去安得随入杳霭间布袜青鞋踏空雾近山忽断见遥碧天涯一望无中极胸中丘壑谁测知铁屋石人惊笔力驚谿六幅高堂空终日坐对心神融看罢为我卷还客自此归余境梦中钱文季少卿以蜀中织成山谷书庐山高为壽次韵

七十衰翁年愈高意气销尽湖海豪平生万事不翅足但欲乞身归故巢几番挂冠不容去归梦屡涉沧浪涛纵使不去岂能久命如槁叶风将飘一阳来复值初度方念吹棘心夭夭何期老友加记录乃爲衰朽亲挥毫庐山高哉山谷字蜀女织就新水绡安得东归抱四絕双凫飞舄追王乔张图痛饮信一快更须传宝留儿曹庆朝非远却图报别当作颂齐崧高

以太湖石响板为季文壽

太湖中心洞庭山千岩万壑高孱顔风涛春撞自太古漱成乐石如雕剜玲珑中空穷变态奇奇怪怪罗沧湾良工巧手琢威凤片云承足同飞翻叩之五声八音足疑有僊风摇佩环月蜚声塞宇宙文如九苞瑞世间祇今在治真若凤朝阳一鸣闻九关先从鹄阁掌帝制径上鸾台领朝班德既不衰石不泐祝君遐壽如彭鏹

次韵章枢密赋吴彩鸾玉篇

文箫蹑彩鸾夜半恐不逮山深忽呼名惊喜不得退僊谪无所逃士贫何可耐乃以三生缘遂为二姓配至人与凡夫伉俪岂其辈鬻书以自给细字如玉碎一一存楷法明珠蔑瑕纇初出鵾比翼久若鱼同队终日子韵编心画无罣碍人间八百本终古知敬爱玉篇尤可珍何必赠杂佩倘邀千黄金虽贫亦当贷摩挲惜见晚老眼看茫昧墨妙饶精神笔劲含姿态次第部居中盘曲法库内九龄美风度孟博信清裁书拙无合作见此增愧慨尤物难久假雪牕暂相对遗踪虽已邈真蹟俨然在辄效西子顰小楷书牋背

题太乙宫武林山赠易高士

易居求赋武林山日困尘劳无暂间我求挂冠欲归去念此诗债须当还武林山出武林水灵隐後山无乃是此山亦复用此名细考其来真有以天目两乳到钱塘一山环湖万龙翔扶輿磅礴拥王气皇居壮丽环宫墙湖阴一峯如怒猊势临城北尤瑰奇吴越大作緇黄庐为穿百井以厌之从来有龙必有珠此虽培塿千山余中兴南渡为行都崇列原庙太乙庐曾因祀事来登眺闐闐尘中有圆峤薰风时来洗袪暑緑树阴阴隐残照我得暂来犹醒心羨君清福住年深长安信美非吾土倦翼惟思归故林

寄题王以道【宁】兰墅

百卉生深林无人皆自芳楚骚发妙意惟兰乃能当我欲效潞公賸种坡之阳不须强披拂风来味愈长君乃先为之滋畹双雁乡正欲生阶庭聚书教诸郎父子自同心久之不闻香老我行西归一造君子堂勉哉笃义方双雁看高翔

蕉庵杂言

环植芭蕉数十株幻成方丈一屠苏几重青苍两边合四壁穿空一物无早凉日薄坐其下爽气肃飒风来徐此为天下易生物不多岁月真可庐王恺谩夸紫步障石崇安得青珊瑚寓居得地不亩许好事便可传规模顾余老矣岂久处後来得此自足娱若谓霜雪成摧枯琼台瑶室今何如

攻媿集卷五

<集部,别集类,南宋建炎至德佑,攻媿集>

钦定四库全书

攻媿集卷六

宋 楼钥 撰

古体诗

石时亨饱山阁

乾道七年冬见时亨相与登饱山阁淳熙七年秋又过之今三十有三年矣时亨书来索诗老矣日困忧责之重应酬之繁何处有此慨念旧游况昔止斋陈君举洎薛象先诸公往来必游焉此阁名因以传黄文叔则又里人也存者无几并于末章见之率尔有作芜拙媿甚

层层得好山是处足饱看君真乐山者心地尤平宽生长山水县惯见青漓岷筑室欲饫赏凭虚着危栏天亦遂君意俾君老其间塲屋早得名晚始就一官官又不得进甘心乐瓢簞官少家食多知更几暑寒朝见山岚高暮喜山云还山气日夕佳秀色几可餐晴雨各变态雪月更万端于山真属脍清明流肺肝膏粱与刍豢与世殊咸酸久矣谢世纷屏息专内观鬓无一茎白八十顔如丹所得不既多愈饱天不慳此阁本不华何处无此山苟为名利驱人境无相关吾乡山苦远可望不可攀东楼快登眺耸翠罗烟鬟年来勇欲归匏系未许闲君索饱山诗南明恍在前十年两访君共醉苜蓿盘向时多名流与君平生欢祗今几人在一见良独难叔度镇金陵道衡处瀛壖旧游如晨星相望可长叹归梦遶故丘非晚再挂冠何当泛剡谿往从子于盘

林德久秘书寄楚词故训传及叶音草木疏求序于余病中未暇因以诗寄谢

平时盛叹屈灵均离骚三诵涕欲零向来传注赖王逸尚以舛陋遭讥评河东天对最杰作释问多本山海经练塘後出号详备晦翁集注尤精明比逢善本穷日诵章分句析无遁情林侯忽又示此帙正欲参考摹华英属余近岁方苦疾笔砚废堕几尘生尝鼎一脔已知味始知用工久已成况复身到荆楚地详?兰芷闻芳馨前此同朝幸相与锦囊诗文为我倾惜哉不早见此书病中欲续神不宁年老耄及屡求去倘得挂冠早归耕尚当一一爲寻绎期以爇火裨明星漫挥斐语塞厚意深媿所报非琼莹

赠黄真护道人游茅山

少年曾上三茅山千岩万壑穷跻攀烟霏空翠不可状弟兄联骑欣清闲回头五十有余载至今梦境犹班班初从崇禧入僊境元符玉晨纷幢幡草庵精舍不知数各占山麓清溪湾蓑衣

相见黑虎谷苍然白发犹朱顏延之土窟款清论桃皮酿酒无留残达道所居更奇絕万山开豁如重关一山巉巖似笔格耸秀正矗湖中间白马真人尚生气长史旧井藏余丹异石若碎还复合豢龙几处多澄澜华阳洞门闭已久传闻亦有游其藩抚掌浮汹涌如沸僊人捧石手可扳最奇无如大茅峯千寻直上天市坛中峯小峯如雁行下视堆阜罗烟鬟三君司命时归降往往天风吹佩环人言春日羽衣会胎禽终日来飞翻玄帝大鼎秦皇璧丹砂六千在流泉地无虺虎与荆棘但有衆药堪延年洞天凡踪不易到我欲再往良独难有时慨想旧游处陟冈惘惘涕为漣江夏僊人有僊骨卓尔拔俗甘瓢箠摇铃真能彻帝所挥鑊自足驱神奸曾入金华访初平今往地肺求洞元游经都城道价重拂袖忽厌拘尘烦径登紫芝绣衣亭咫尺衆真相往还神僊渺茫信可学祇恐涓尘天意怪但见茅君极僊品谁知求道越岨艰至今丰碑载锡文舟堕千劒如指弹君得此居宜勇退勿使学步讥邯鄲我欲休官未容去归梦遇觉多愁叹终当挂冠四明隐扪罗采石纫芝兰江东日暮云生处安得羽化同霞餐舅氏适斋汪公尚书慕香山之高续达哉行集香山诗句次韵

脱衣典酒曲江边不作闲游即醉眠大抵浮云何足道生理何曾得自全朝廷雇我作闲人髣髴缗钱二三千一种共君官职冷收得身来已五年五年炎凉凡十变老後谁能惜酒钱尘纓世网重重缚七十八十百病纏千万人中无一人自喜天教我少缘六十三翁头雪白贫家强健亦天怜每愧尚书情眷眷为君一醉一陶然其间气味多相似犹在病羸昏耄前月夜徐行石桥上累累栋宇相连延岁种薄田一顷余薄产处置有後先更无俗物当人眼游鱼泼泼荷田田为君举酒歌短歌不妨兼有散花天

适斋示池水大篇效元白体相答

适斋一片心世人难与比少时发此念乐施到暮齿婚姻成者衆葬埋不知几义气追古人仁风动桑梓利益及物物方便形事事先正有此言源流固有自外家有天池清波照丛桂来者不问谁小大聽盈器及其旱将涸一雨复清泚我舅为欣然作诗自言志平生欲济人往往多割已向来俸可分挂冠踰一纪心勤力不逮不得尽如意安得有貲财如此池中水来求则应之吾心斯足矣长篇笔余力亶亶遂满纸病足正僵卧三诵为之起韵险不容次愚言不能止公曰汝答我只用元白体公心与天通言合孟軻氏菽粟如水火此意岂不美黄金土同价但恐无此理求水易足用近止及隣里土不过饮水下亦止濯洗求财则无厌来不问远迩应者力已竭求者殊未已有如一富翁独处百家市终焉遂什一贫富本相济余波被四隣人情皆可喜久之责望重争讼随谤毁不言理曲直但谓富者鄙尧舜有至仁独病在博济所以汉昭烈其言有深旨富者民之怨百万辄散弃贫富各有分取予尤不易生长在舅侧义事熟于耳颇亦知为人缓急力不计舅言出于仁甥言裁以义二者若不同同归于一际爱苟无差等兼爱等墨子岂惟道非中安有力及此仁民而爱物要自亲亲始

适斋约同社往来无事形迹次韵

舅氏年益高何止七十稀神明曾未衰发黄齿如儿义概同古人间里咸归依度量海深濶仁爱佛慈悲居然三达尊後生愿影随为作真率集率以月为期平生持谦柄自牧何太卑善学

柳下惠不欲慕伯夷一乡有善士收拾略不遗以此娱我老今是胜昨非何必汗漫游据龟食蛤蜊但欲客长满痛饮真吾师乡党既恂恂朋友亦僂僂凡我同盟人共当惜此时间或造竹所宁容掩柴扉耆英古有约不劝亦不辞此意岂不美谨当守良规达哉杜陵客从他人见嗤

代魏丞相为钱参政寿

天台杰立沧海东古今名士长相从神游八极司马子掷金作赋孙兴公松牕先生千载士文价道骨相与同芙蓉为裳兰为佩一笑坐断千山峯向来羽扇挥羣雄貔貅给使如奴僮淮南草木识姓字烽燧一扫边庭空勲名巍峩谢不有天子神圣非臣功黄扉安坐断国论精神自折千里冲东山之志意不改归来碧落称僊翁调元老手自燮理鬢鬢緑发双方瞳苍生顒望谢公起中兴事业须宗工新冬五日记穀旦霜余和气回春风门墙老生系郡绂欲借壽筇斟吴松祝公壽考与家世山河带砺俱无穷

代仲舅尚书赋江山得助楼

江山信美非吾土王粲登楼意凄楚丽譙井干高则高未免绮罗相滓污君家华屋照城隅丹壁重重不知数谁令作此三层楼雪脊干霄千尺所几番遗书来索诗只许归田为君赋快哉今日真得归无复黄尘浣巾屨试凭栏干俯人世城郭村畦可枚数四山云物任卷舒大江波涛恣吞吐晓看红日上沧溟夜见冰蟾转天宇四明山水秀东南祇恨青山不肯入城府我家朗朗屋百间欲创一楼兄未许羨君轮奂日日新馨鼓一声纷郢斧眼明见此高突兀骚人当得江山助我久欲归未得闲门巷相望才尺五赋诗幸不负前盟但慙笔?无风雨从今造门不复问主人醉倒楼上君莫嗔

代求子绍上魏邸壽诗

皇家基业天与隆金枝玉叶盘石宗我皇圣德摩苍穹朱邸森列庆所鍾仲氏吹篴何離離云梦八九罗心胸羣经读遍巾箱中笔端豪气舒长虹殿前玉佩声冬珑天人眉宇辉宸枫大名起魏茅土封黄旛豹尾双镇雄宣城名郡烦凭熊政绩越过黄与龚楼前叠嶂横云空佳句不减玄晖工贤王易镇甬水东阳春有脚皆仁风百蛮面内文轨同坐清聚蚁驱屯蠹碧海万里楼船通天子神圣非臣功薰风入弦槐阴浓新荷泛緑榴花红晓来佳气飞青葱惊詫野老田家翁箫鼓动地光融融堂上帝子方雍容清旦燕贺簪笏丛负弩小吏随登龙由来降灵自神崧难老何用齐乔松年年箕翼壽两宫捧觴戏彩俱无穷

代毛崇夫贺妇翁黄圯老生朝

东都竞风节清裁称巨贤焱驰不自定相与扶其顛独立黄微君道周性具全辟举既不就言论亦无传当时论笃士比之孔与顔陈蕃为三公自媿不敢先丈人岂苗裔德高静而专不清复不浊量陂渺无边学问粹然正师友承渊源词章玉无瑕作者当摩肩向来登王畿悟主在一言校讎天禄阁朱黄手自研郎潜不啻足肯羨岁九迁清朝獎廉退擢居先府员廕仕皆坐

致高怀越拘挛出乘使者车径归卧林泉出处无戚欣鼻间栩栩然谢公恐未免召駟行着鞭
松山介闽浙淑气常蜿蜒隆冬正疑沍爱日回春妍悬弧庆生申飘若区中僊僊风自难老何
须记椿年贱子托粉榆扫门如宿缘叨在玉润迭得窥乐广天川涂阻拜壽春容陈大篇孺子
倘可教愿受书一编

赠吏部壽诗集老杜句

刺史诸侯贵春城海水边层城临媚景水合数百源山色佳有余云门吼瀑泉游山忆谢公频
游任履穿三寸如黄金朱橘不论钱潇洒到江心石濑月娟娟翠华拥吴岳谁扶黄屋尊御榻
在嵎峨佳气拂周旋多除南省郎一麾出守还城中贤府主今之黄颢川笔落惊风雨谈论淮
湖奔羣书一万卷分明在眼前老气横九州黄鹄摩苍天历职汉庭久磊落映时贤否臧太常
议正直朱丝弦东下姑苏台戮力效鷹鷃谒帝似冯唐明公独妙年列宿顿辉光馨香粉署妍
卿月昇金掌等级敢比肩巢许山林志虚心味道玄此邦承平日接近与名藩时节立复度水
旱其数然百波漏波涛狂风大放颠江流气不平地轴为之翻人烟眇萧瑟茅茨寄短椽凋瘵
满膏盲诛求何多门至尊方旰食鸿雁美周宣平生方寸心穷年忧黎元恐辜明主恩筋力不
辞烦晨趋闾阖内应对如转环制可题未乾御札早流传斯人亦何幸已闻动行轩滯务兹一
扫烦苛法令蠲抚养甚分明连樯并米船蜂蛰不敢毒歌笑轻波澜骄阳化为霖江鸣夜雨悬
公镇踰岁月人安若泰山且如今年冬祈寒为之暄萧萧理体静迴出诸侯先何时降玺书谁
能叫帝阍丝纶实具新载渥照乾坤借问今何官蓬莱汉阁连鸳鹭回金阙会是正陶甄烜赫
旧家声风流今尚存严家聚德星文雅见天伦曾参与游夏寔为亲弟昆潘舆送喜频堂後自
生萱国与大名新中堂有神僊令子各清标芝兰叠璵璠今朝乌鹄喜僊鹤下人间甘作老人
星晨霞朝可餐但求椿壽永何曾藉偃佺献寿更称觴肃肃秩初筵烂漫倒芳樽华烛蟠长烟
清朝燕贺人佳句染华牋吾非文人特不敢废诗篇顾惟鲁钝姿喧争懒着鞭出游翰墨场常
受衆目怜尚为诸侯客坐客寒无毡未见有知音非理谁与论始知贤主人见我顔色温包容
忻有击豁达露心肝窃效贡公喜兼尽宾主欢吹嘘人所羨推轂期孤骞

琴操

七月上浣游裴园醉翁操

茫茫苍苍青山遶千顷波光新秋露风荷吹香悠扬心地翛然生清凉古岸摇垂杨时有白鹭
飞来双隐君如在鹤与翱翔老先何处尚有流风未忘琴与君兮宫商酒与君兮杯觴清欢殊
未央西山忽斜阳欲去且徜徉更将霜髯临沧浪

和东坡醉翁操韵咏风琴

泠然轻圆谁弹向屋山何言清风至阴德之天悠扬余响婵娟方昼眠迴立八风前八韵相宣
知孰贤有时悲壮铿若龙泉有时幽杳彷彿猿吟鹤怨忽若巍巍山颠荡荡几如流川聊将娱
暮年聽之身欲僊弦索满人间未有逸韵如此弦

楚辞

雪谿僊隐

余读丛桂堂记而知双流宋氏之盛观登科记而知四川类元仲正之名忽过余于寂寞之滨问其所以来则怀阆风之绶而访其大父阆中君雪谿之僊踪也其详见于杨献子之记矣又言其先君讳庶俊特才多艺阆中素所鍾爱年止四十于是时正仲之生始九阅月尔少长女兄淑仲告之曰汝之生也卜人曰弃之先君不然取洪范攸好德之言作诗以名汝谓壽富康宁考终是有命焉惟好德在人爲可勉诗末以世科为属自尔刻本誓断絶世故将从雪谿为物外游不幸志不克就汝其识之则又泣曰先君已矣大父之来四明不知其果何在万里来游志在此也余闻其言而哀其意为作楚辞以招之

君之生兮天之西望雪山兮名之以雪谿君之游兮海之湄隐於雪窦兮杳然何归子从其父兮孙访吾祖子志不遂兮孙之心良苦嗟嗟阆中君兮弃家而远游蹇胡为乎不久留其遂蟬蜕尘埃而僊耶其亦肥遯得道不死而隐于四牕之幽耶扪萝以寻于烂平兮既不可见莽白云之廿里兮欲进兮焉求青棣兮实繁莎罗兮花稠鞠侯兮相与羣白鸛兮嘯其俦谓为远兮何景物之良是谓在迓耶将径之何由肖君像兮兹堂谨奉尝兮良畴君其来兮庶几其见之君之不来兮徒相羊以夷犹【是集传写多讹缺处因无善本参校每仍其旧此首青棣句原缺棣字鞠侯句原缺鞠字今据陆龟蒙四明山诗小序云有青棣子味极甘有猿谓之鞠侯补入又考宁波府志宋耕号雪谿世家双流绍兴中为阆中令後仙去其孙德之闻其在四明来访至雪窦山遇蜀僧告以山後烂平山有宋宣教居焉德之攀跻至巅果见丹竈而终不得耕所在乃置祠其上而归云足补楼钥是序所未详谨附注于此】

攻媿集卷六

钦定四库全书

攻媿集卷七

宋 楼钥 撰

今体诗

姚江高风阁【邑有严先生墓】

不从文叔作三公归着羊裘大泽中石濂钓台非故地云山江水自高风烟迷宿草古遗恨树拥危楼新奏功僊馭飄飄疑不远翩然独鹤度寒空

夜坐

重云烟雨日冥冥柱础流津意未晴
赖得溪风送云出放开山月照人明
纷纭世态长松影荏苒时光流水声
坐久萧然转琴轴为君更作九臯鸣

山阴道中

昨望山阴古道中戴山直上最高峰
今朝更踏山阴道卻向云间认八松

卷上疎帘莫放垂迎眸景色自淋漓
有云更觉千山秀不雨争知万壑奇
古道经行尽遗迹羣贤风度想当时
奚囊莫怪新篇少应接山川不暇诗

兰亭别于果乡

山陰巖壑妙人寰十载扁舟空往还
赞府端能慰牢落连朝相与上孱顔
龙蟠凤翥无奇画霞蔚云蒸有旧山
吊古凄凉更离别满怀秋思到眉间

早行

水余枯枿尚栖苴催促征夫趁晓鸦
细路縈山穿乱石轻輿掠树得飞花
柔桑弥望两三里修竹深藏四五家
径处不容行客恋可怜一步一天涯

水涨乘小舟

一番冻雨洗郊丘冷逼征衫四月秋
只喜青山泻悬瀑不知黄潦涨平畴
登途已厌频輿轿得意何妨且榜舟
处顺安贫聊自适未应坎止愧乘流

绣川道中

伏波莫作古胡留雨意垂垂未肯休
不憚征衫有微湿只愁平地又横流
行人自厌冲泥苦野老方当得意秋
倦仆如何致千里登天徒笑传鸣鸠

过苏谿

处处谿还舍家家石累墙有时逢老稚
无事只耕桑野色撩诗思村醪引醉乡
山川已如许急雨更斜阳

东阳遇雨

万壑千巖已饱看更寻佳处为开顔
无端早上一番雨遮尽东阳县里山

即事

雨外山光淡烟中草色鲜断桥依古岸流水自斜川紫榭余桑表青藤绕树颠人情兼物态只合付天然

荆坑道中

古涧随山转征人趁水行悬崖当步险空翠逼人清石路无寻直沙田不亩平千巘得一二亦足慰平生

冯公岭

百级山田带雨耕驱牛扶耒半空行不如身倚市门者饱食丰衣过一生

括苍烟雨楼

莫为看山只凭栏远怀犹恨两山间坐深却得无穷趣祇看平川一半山

晚步少微阁

落日谢虚阁横琴相对闲片云将急雨一笑失前山

夜坐烧香台

长昼苦炎热夜分凉始生电中千嶂立琴外一蛩鸣急雨催诗思遥空打鼓声谁知一府地得此意凄清

即事

睡重不知晓山高意得秋风来已落叶潦去忽中洲幽閒素所愿登临尽自由濒溪千万壑何日上扁舟

卜雨

好风先雨到危栏卻送残云过别山不用开襟强披拂自然凉意满人间

烟雨楼夜坐

暮靄横空黯未收晚来凉动满怀秋澹云影里千山月残角声中百尺楼参坐共为文字饮高

谈不见古今愁夜阑半醉意方适径欲乘风汗漫游

晚自拟滁亭转烟雨楼聽角

两寺疎钟夹岸闻荒烟无数乱前村山衔落日云生彩谿溜孤舟水不痕虫羽凄凄鸣绿暗星
晖隐隐照黄昏欲归重到层楼上更为梅花一断魂

重阳

佳处逢佳节寧辞望眼劳有楼皆眺远无日不登高野栗炊新秬寒萸泛浊醪黄花何太晚篱
落上萧骚

北行雪中渡淮

风卷清淮夜不休晓惊急雪遍郊丘坐令和气三边满便觉胡尘万里收瑟瑟江头辉玉节萧
萧马上点貂裘归来风物浑相似二月杨花遶御沟

泗州道中

宿雪助寒色相看汴水滨轻车兀残梦羣马溅飞尘行役过周地官仪泣汉民中原陆沈久任
责岂无人

灵壁道中

古汴微流絶余民尚子遗高丘祠汉祖荒草葬虞姬垓下空陈迹鸿沟愴近时膏腴满荆棘伤
甚黍离离

陈留柏

驿门深闭柏参天月可中庭夜影圆人静好风喧客枕坐令归梦到林泉

湘州道中

千古兴亡一梦惊就中物理似持衡茜花空染朝歌血荒草犹祠羑里城但见反身知自咎谁
言修政欲相倾知音只有昌黎操臣罪当诛主圣明

即事

行尽穷边岁亦殫倚门应是念衣单寧知今日幕南地不似去年江上寒乘马惟欣日可爱逢

人长说雪初乾三衾四袄半无用何必重歌行路难

腊月二十五日大人生朝

去年沙岸倚归舟今日驱车古涿州彩服难陪莱子戏巴词应付雪儿讴客途行及五千里壽宴须开十二楼南望飞云天様远太行山外久凝眸

初出燕山

去国三千里还家第一程都缘人意乐便觉马蹄轻落日催心速飞云逐望生莫嫌归去晚犹得趁清明

春雨

石斗微微覆浅沙兰丛短短茁青芽春花着眼未云久花事于人渐有涯

漫漫平湖接远天蒙蒙细雨湿轻烟野桥横着草深外何处渡头人上船

送人之官池州

春空吹雨作余寒去去扁舟不可扳伊昔曾游三大水到今独记九华山想君脉脉征途远属我悠悠梦境间回首江山固无恙怀人倚待好诗还

春游遇雨

公子喜青春欢游弗厌频久晴都不问好雨卻成嗔桃杏红方入禾苗绿未匀请君停杖履俯念耦耕人

粮料院葵向亭

结屋苍崖画不譁峻嶒乱石绕帘牙涛江渺莽三千顷烟瓦参差百万家雉堞环山余暮雪龙楼耸阙焕朝霞登临可是望都省但有葵心向日华

廨舍小轩

袞袞羣山尾横窗更此岑尘埃遮物外风物宛山阴作吏何妨隐寻山不用深居然一丘壑便足快登临

尺五亭

旧说城南社今登山外亭宫墙步可到御柳望中青引啸千岩响哦诗过鸟听曲栏频徙倚归思渺东溟

挈从子涤归乌戍外家

五年不泛浙西船今日重来倍黯然苇席不重寒刺被菱歌孤唱月摇川呶哑回橹鳬鸥狎来往轻帆风雨便点检湖山固无恙鹄原遗恨到黄泉

乌戍道中

田在港西家港东断桥春水步难通束芦挟瓮稳来去不碍小船分钓筒

重阳寄雪牕从叔

秋意未教篱菊知不妨乌帽着风吹絶怜对酒君归矣更欲登高谁共之风雨满城千里梦茱萸缀席一年期君非俗物败意者莫为催租便不诗

次伯舅汪运干【大雅】所寄韵

遥忆牢之舅功名志欲成离思满方寸望眼费双明揽笔四愁咏登楼千里情贤劳休自叹幢下本书生

佛日山

晓出都城暮入山杖藜萧散易开颜松风五里未行尽隐隐疎钟紫翠间

游香山次王正言【述】韵

四山过雨翠光流境胜心闲自点头野鸟叫春多格磔晚风吹鬓故飏飏三年几作旧山梦一笑喜成今日游独叹寒泉本无意强随机械走溪沟

过西兴

几载京尘涴客裘江村乍入倍清幽柔桑穉麦寒犹在流水落花春又休苍狗浮空惊易失白驹过隙若为留细思谁似垂纶者真酒烹鱼百不忧

携家再游姚江

又作泛舟行浮家一叶轻潮生江外晚月比夜来明云尽天容彻风高水气清五湖乘兴去何

苦慕功名

渡扬子

江豚吹浪雨飏飏望断天涯人白头一舸乘风渡扬子数鸥导我过瓜州

晓雾

晓雾冥蒙水拍堤棱嶒乱石与云齐扁舟不用兼程去到得稽城日已西

登戢山

晚步戢山上休辞脚力穷八松不碍眼万里欲乘风逸兴浮沧海高歌彻太空羲之不可见犹得想胸中

永嘉试院谢曾使君送酒

一帘疎雨洗尘埃满架酴醾自在开正恨烹茶杀风景忽惊门外白衣来

脱身场屋几春秋故步重寻我自羞闭置有如三日妇画成应遣一生愁与钱谁是老司业送酒更无贤郡侯掩卷出门花下坐真成一酌散千忧

木蘊之国博迁居

寄斋今日又迁居门巷相过五尺余王子何妨借人屋渊明不必爱吾庐大千眼里无非寄三十乘中皆是书祀竈卜邻无用尔祇今天上有锋车

名大人称屈心闲我自余言诗今子贡作赋古玄虚凤沼定平进鸥盟殊未疎潭潭府中去只作寄斋居

次南真宫龚道士壁间韵

幽舍足留客疎篁不用林相过几樽酒清坐一瑶琴野鹤伴僊隐闲云寄此心黄冠如有许来者为低簪

送乐清姚令行可

长官清政玉无瑕卓鲁循良不足夸前席有期吾党喜挽须无路邑人嗟才高雁荡千峰石惠足河阳一县花欲信三年浑不扰游山今日始携家

入雁山过双峯

眼前未见古龙湫望望前山景自幽红日一门千嶂晓翠峯双耸半空秋风高落木无边下气劲闲云逐处收要识雁山真面目直须霜後一来游

灵峯

老筇扶我转林丘直到僧房最上头地拥双峯遮胜境天分半石閤灵湫空中大士澹相对山罅清泉空自流人谓石崖宜置我不知来此有缘不

龙湫

地耸峰峦秀天开气象寛九霄银汉落千古玉龙寒壮观供尊者幽居称冷官何时遂肥遯不厌白头看

又次王瑞安韵

云锁千峰碧泉飞百尺湫山蹊惊险絶洞府足深幽谷静摇虚箔巘高卧老虬贾胡还似我到处辄迟留

忘归亭

一峯凜凜插烟霏谁筑新亭占石矶标榜未应专一壑此山何处不忘归

登马鞍岭

轧轧轻舆上马鞍半天岚翠逼人寒从教宿霭迷清嶂明日晴空取意看

游西山次范丞【公兴】韵

东风吹我上西冈更觉僧房白昼长草色已翻新岁碧梅花祇是去年香好山围绕屏三面野竹萧森玉数行千里同游逢范叔绨袍他日未相忘

喜雪

晓风吹起雪漫漫来兆丰年喜有端玉树琼枝无限好雪牕高阁不胜寒直疑天上梅花落莫作人间柳絮看我欲乘风游汗漫倚栏空自羡飞翰

同年翁处招游北山次韵

不嫌屐齿碎莓苔祇要吾人得得来见说飞泉高落涧待寻曲水作流杯竹林素约羣贤集鸡黍相过一笑开政恐清游自忘返不应空棹酒船回

丈茂先烟蓑亭

人生逆旅困风波大似寄居鸚鵡螺月白江空无一事不须更作钓鱼蓑

红梅

南枝零落北枝残失喜新蕤苦耐寒莫道北人浑不识南人几作杏花看

秋意次林致甫宗丞韵

河汉秋来净飞星一点过好风吹暑尽疎雨送凉多纨扇收團月桃笙卷细波自知恩到骨欹枕梦无何

送春

飞花一片减风光不待红稀意已伤今岁余春能几许浮生此日更须忙陇头有雨麦初秀林下无人兰自芳夜倚疎棂诵佳句好风如水月如霜

花披催蝶舞柳暗受莺迁过眼忽新梦回头谁少年溪云随笋供山雨近梅天诗思正无赖一声来杜鹃

病目初愈张子家有诗次韵

年来视物隔襜?祇有昏花似退之强起归鸿聊自放妙穿悬蝨恐难为相亲黄奶交亲絶见代青姑事浸危写照苦添云蔽日不应更谓虎头痴

许深父饷酒覆於舟中

千里贻书慰寂寥更将尊酒饷今朝先生忽已成乌有用事何因见白超醉里漫思鲸吸海梦回谁悟鹿藏蕉何时痛饮论心曲云满江东望眼遥

送朝臣济宰湘潭

君向潇湘忽语离江城离思乱云飞传闻楚俗尤凋□勿以秦人视瘠肥宰县要寻行志处监州空有负丞讥此行得句须频寄直到衡阳有鴈归

即事

芸芸物态见天机静里工夫得细微
堦下秋红千万点游蜂一一采香归

正月庚申朔【淳熙六年】

春来节物一番新今岁仍逢腊里春
莫讶连宵清不寐祗缘守岁守庚申

国清寺

夹道青松引客来五峰双涧拥楼台
丰干饶舌留公案隋帝遗书暗占煤
最喜亲知来里社真成春月上天台
阴云扫尽寻幽去佳处端疑为我开

山中怀仲兄

雁山曾御九秋风更喜春深到此中
芳草绝怜随意绿野花真是映山红
未知方丈景何似直恐桃源路已通
起听朝鸡无恙否兹游恨不与君同

天台道中口占

路上人家短竹篱
缫蚕刈麦自熙熙
可怜日对千寻瀑
不解闲吟半字书

宿仙居民家

投暝人家欲睡时
雨声不断水平池
回头已过三江渡
醉看车中总不知

寄管仪通判并同官

执别僧房日未斜
别离愁绪满天涯
清宵已落柔桑叶
小雨顿开乔麦花
醉里不知身是客【江南李玉词】
酒阑无奈客思家【欧公梦中句】
凭谁寄语三夫子
归路还须好句夸

赠宝藏老道源

骨相昂藏涧底松
平生禅窟尽从容
几年大隐清晖阁
今日来瞻独秀峰
打破画瓶无罣碍
大开饭店喜相逢
今朝且逐征途去
何日重来听晓钟

过苍岭

黄云满坞沙田稻
白雪漫山荠菜花
路入缙云频借问
碧香酒好是谁家

崇朝辛苦上孱颜泥径初平意暂闲苍岭东头移野步眼前便得处州山

婺女极目亭

危楼雄据郡城东扫尽秋云快碧空目力不容山隔断诗情长与酒无穷先分楼下双溪水高
挹人间万里风兴逸不知真近远五弦声里送归鸿

自阿山归再过苍岭

雨後过苍岭平生行路难危层惊步滑絶涧觉心寒就岭山逾险趋平谷更盘年来轻世故不
作险涂看

攻媿集卷七

钦定四库全书

攻媿集卷八

宋 楼钥 撰

今体诗

鹿伯可郎中园池杂咏

见一堂

灵澈清诗千载传始闻林下有斯贤傍人只道休官早见一名堂已十年

止室

流行坎止事无多举世营营自网罗珍重主人真止矣直如古井更无波

小东山

安石东山志不渝归来寻得静工夫从教更为苍生起携妓何妨且自娱

桂堂

芳树丛生庭砌间高枝更许後來攀主人勿恋山中桂招隐还应看小山

云龕

浮云舒卷原无定此意谁能为饱参出岫无心归亦尔不妨今日与同龕

柑隅

霜着芳苞翠作围数椽潇洒映斜晖木奴何必须千树乞得闲身径且归

桃蹊

几树桃花相映开主人归路入天台凭谁寄语玄都观前度刘郎不更来

月沼

玉洁冰清一壑专箴龙何处引涓涓深知月满还亏缺祗学蟾光一半圆

星潭

山头分下一泓清石甃团团瞰小亭身在赤城名绛阙至今潭影照郎星

三友径

公是端人友必端世情冷暖不相干虽云门外可罗雀三益还能耐岁寒

竹坞

几年种竹未成丛一日归来翠扫空尽好闭门高枕卧从今日日是清风

梅坡

江梅留待主人还见说归时得饱看回首残花飞作雪一峯当户正高寒

松岭

翠云深处曳枯筇挿碧堂堂十八公全似华阳隐君子挂冠归去聽松风

戏赠张汉卿

张侯理窟妙无穷雅谑于人亦有功渺渺江湖千万顷未闻饿死信天公

陪沈虞卿使君游钱园

休沐无官事公庭且放衙城中寻胜地道上引高牙潭府临芳径东巖玩物华山林真复絶栋宇谢豪奢陶令亲栽菊秦侯晚种瓜裴公余緑野六一醉琅玕幽阪森三友飞桥粲百花树深藏曲折谷险路谿谿道院罗星斗禅房供释迦鳌峰思御气画舸想乘槎佳处城环雉吟边路遶蛇登山携翠袖喝道屏银槌井市花相映湖陂柳半遮高歌惊野鸟叠鼓乱鸣蛙陞级青珉滑秋千彩旆斜丛篁穿嫩笋芳草绽新葩静憩方开宴徐行更试茶僊醪斟玛瑙玉指奏琵琶清絶嚣尘远苍茫望眼賒诗情弥海峤饮兴渺天涯贤尹民同乐名郎子克家才高修月户笔妙补天娲挥麈风流胜凭栏笑语夸追风慙款段倚玉媿蒹葭逸韵迷春蝶清欢接暮鸦舞茵收地锦画烛照笼纱耄稚欣相告舆台靖不譁微风朝趁马好雨夜随车土脉兴原隰霖膏润甲芽相将劝耕去和气满桑麻

巾山曲肱斋

山立青冥外人行紫翠间小牕开木末孤塔映江湾平楚一何远白云相与闲我来不暇寝冷坐对前山

广轩夜望

点点万家灯风清醉复醒广轩高絶处俯瞰一天星

玉霄亭玩雪

羣斋高晏雪浮空同上山城第一重今日无非银色界此亭真是玉霄峯云迷野路舞轻鹤风急瓦沟嘘老龙便欲相将游汗漫剡溪何必访遗踪

倅厅云水亭

山绕澄江江遶城水云径接海冥冥万家曲折在吾目一郡登临属此亭今日诗题随处有几番醉眼望中醒风流郑老知何在回首苍茫岛屿青

再过鹿伯可

又上先生见一堂澹然宾主两相忘不知海内清风满但觉山中白昼长小雨络林妨蜡屐靓妆环坐快瑶觴曲终扶杖欲归去即咏白驹三四章

天姥峰

剡水迂回彻底清滥觞从此一泓澄晓来蜡屐冲寒上?碎山头十里冰

虎丘

望望古招提兹游恨已迟池深惊地裂野旷觉天垂聽法人千数谈空松一枝从谁访遗迹惟有石头知

洛杜老僧聽琴

宴坐萧斋不作劳谓予何事走蓬蒿从容试问今年几手植黄杨三丈高

自言几载不闻琴屡聽清弹苦契心少待庭柯蝉噪静为师更作醉翁吟

中秋

岁岁当秋半人人待月明絕怜今夜赏更胜去年晴光彩澄高露氛埃廓太清衆心方闵雨却望暮云生

又次丁端叔韵

好风凉月湛中秋自笑何为作远游不有诸君故人恋未应连日贾胡留三千银界俱呈色十二珠帘总上鉤饮罢客归清不寐谁知心折大刀头

游惠山

石径萦回入翠林廿年故步喜重寻千山直上云扉启万木阴中古殿深泉水泓澄风拂拂洞门幽杳昼沈沈调琴瀹茗清无限倦客忘归到夕阴

游洞霄宫

宿雨顽云拨不开紫霄佳处访楼台青山九锁固奇甚古洞一深如此哉拔地千林俱秀润擎天一柱最崔嵬出山爽气尚相属数里清溪送我回

游径山

起看海日晓团团更挹神灯照夜阑百万杉松双径杳三千楼阁五峰寒蛰龙何在渺难问古井于今竟不晷但觅灵泉归洗眼谁能故把细书看

送苏伯昌大卿

禁路迢嶢欲问津抗章便自乞闲身闵劳剧部皇情厚寓直中奎宠数新飞挽正资经济手典

刑终念老成人赤松未许长为伴归取青毡继颍滨

甬东曾幸拜苏天外府官僚复备员前辈风流真在眼名公谈笑辱忘年浙江相对一卮酒婺港欲行双桨船门键马衙难作远西风停立但茫然

送刘淳叟博士倅豫章

熟知明主可忠言奏牍方陈意已传人言能逊千乘国我自能补九重天拔山转石孰难易烂额徙薪谁後先不用更论如许事把君征袂且茫然

送吕周辅宗丞守崇庆

从昔傅家学当今良史才声名冠西蜀风节象东台朝蹟收何速归心挽不回一麾从此去万里可能来【吕为四川类试省元曾祖陶为给事中】

旧矣唐安郡龙潜府号新当年一绦帐今日两朱轮民意来何暮仁声煖似春剑南毋恋却鰲禁要词人秘甚先天学谁传陆士龙上方留自近天岂不相容契托君家厚情惟我辈锺殷懃训犹子他日使追踪

上魏丞相

梦庵深坐宴朝曛祗有梅花对此君今日衣冠有巢许向来元凯佐华勲入山谁解访洪景载酒时应问子云童讽写成心未懒可因贪佛赞论文

次韵蒋德言游太白玉几两山

西山不到几经春玉几犹能一再临太白峯前成梦境直从总角到于今

少日游山不要归老来腰脚不相宜羡君胜具了无勸踏雪寻幽更一奇

賸欲扶筇随意行要令心迹得双清何时同入翠微去丈室先参老净名

落花影里步春阑飞鸟翩翩相与还若得把茅成小隐等闲来往两山间

谁能饶舌强参禅何用谈因更说缘生死本来无大事晨朝须起夜须眠

谢僧道全惠诗并菖蒲

楚楚芳荪诗样清翠苗低护小峥嵘一泓功借幽根润六月能令凉意生雁荡浑如梦边事龙

漱顿觉眼中明闲牕坐对思无限何日随君遶涧行

赵安国梅坡

隆暑倦行役梅坡得暂闲卷帘南浦岸终日对成山竹里清风远碁边夕照还岁寒重卜醉觅句暗香间

资圣寺

野溪清浅度危桥径策枯筇上紫霄晓雾暗燕山寺雨松风深隐海门潮浮杯水涨人何在洗鉢池清意已消又上乐亭基上望云山万里更逍遥

次韵蒋德言壁间旧题

一铃檐角自吟风两面松篁翠扫空山卉更藏无尽意枝头未作去年红

上史太傅

一坡烟水绿湾环竹树楼台缥缈间但说一丘藏曲折谁知更有四明山

二十里云随步生潺湲洞里访青棂山中要识无穷趣看取南雷问答经

袞绣堂中语夜分几将经史细评论不知世上三公贵祇是东湖八行孙

赠郑相士

知君冰监照人寒我相儒酸未足观东甬从来多俊秀为烦着眼细寻看

雪窦道中

城居久矣厌尘劳来访名山写鬱陶客路行随流水远征人与坐白云高千林舞翠吹蓬鬓二麦摇青照紵袍努力共登天尺五要看飞雪喷云涛

锦镜

两溪赴壑若奔虬此地端能截衆流三版放开千丈雪一匳清彻四山秋几年空自存公案今日重新指路头珍重老师成胜事清名当与此山留

妙峰亭

一峯高出白云端俯瞰天涯千万山试向冈头转圆石不知何日到人间

隐潭

灵潭深入白云堆带雨春云为我开乳石半空浑欲堕瀑泉千尺正中来两军酣战鼓鼙急一雨生寒霹雳催中有卧龙君勿狎有时平地起风雷

游大梅山护圣寺

江东东畔更东山又过东山数里间试问招提在何处万山深处白云环

寒云片日忽吹开历井扪参得得来行尽高山天欲半不知平地有楼台

常禅师塔【旁有虎冢】

当时道价极光华鸷兽相随共一家象去虎亡师亦老不须百鸟更衔花

从来猛虎性坚刚据石依林死不僵何待寒林班侍者千年陪葬祖师傍

梅僊巖

梅山遗迹若为寻怪石峻嶒一径深未必当时真隐处清风自觉袭衣襟

云岩

但见云生谷初无石似巖得名非旧观买地作精蓝境胜环修竹门深拥翠杉禅林自家处莫问後三三

启霞水壶亭

拍拍新漪彻底清两山写照翠光凝笑看风动縠纹起坐我玉壶春夜水

天童玲珑巖

扪萝历栈上层峰寢觉芒鞋踏半空七窍几时开浑沌八窗无处不玲珑已欣古洞容身过直恐丹丘有路通俯视人间懒归去拂衣径欲御天风

送内弟汪作德赴建德主簿

今日望春下送春还送行簿书须着意家世有余清潇洒桐庐郡文章陆士衡【时陆务观为守】公余定多暇无废读书声

南江酒家

南江舟楫饱经行桥外人家最可人
賸种寒杉映修竹快沽村酒趁鲜鳞
潮痕落草橹声动日脚衔山凉意新
酷爱老樟横卧处他时来此坐垂纶

宿登山

竹舆来访小梅山山在空蒙紫翠间
岚雾满林朝漠漠溪声和雨夜潺潺
峯头丹井随潮信松下禅房旧祖关
谁是无生谁不死晨钟未响梦先还

羣从泛湖次叔韶弟韵

倚遍瀛洲十二栏老蟾推出烂银盘
絶怜千顷波澜阔更觉满身风露寒
境胜能令诗兴逸夜深自喜酒肠宽
离离挂影清如许莫惜终霄作意看

送陈君举守桂阳

重寻漫壁认题名十五年来一梦惊
谁料今朝携客至却成此地送君行
桂阳卧治真谈笑鲁史遗编赖发明
文定南轩僊去後湖湘又得一先生

永嘉天庆观

斗口横安华盖山茂林修竹路湾环
琳宫迴出沧瀛表羽士如游崑阆间
东挹江山穷望眼西临闾阖笑尘寰
自知去此无多日着意来寻一饷闲

次许深甫寄陈颐刚韵

博物曾经辨实沈论兵更觉用功深
九阍未进六奇计万卷空催一寸心
流水高山谁复会寒松春柳解相寻
如君岂是长贫者作计无令岁月侵

前朝折戟尚沙沈志士私忧意向深
谋国未须先问陈平戎要且务攻心
衣冠旧老知谁在禾黍遗宫尚可寻
骑省再新人有望一言坐复故疆侵

劝农

一番好雨润桑麻和气欢声十万家
太守劝农才出郭老农含哺竞随车
土膏泽泽地宜稻云

物阴阴天养花愿得四方无旱潦尽教乐岁似东嘉

书吴梦予古乐府後

古来乐府近来无笔力如君郤有余日恐遗音亡正始喜闻新作过黄初不夸艺苑徒工瑟应免侯门久曳裾更向江西诗窟去他年时寄一行书

谢景英送郑景元篇末见属次韵

张罗清似翟公门门外都无野雀喧可但风流追鲍谢直教高论到羲轩絶怜父子为知己时把文章得细论个里是非何足较乍贤乍佞一王尊【○一本此首後尚有一首云触暑相过忆去年汝南又得见先贤向来乔木今亡矣祇有灵光尚岿然賸记暮年专一壑想闻高咏和流泉两公直谅浑相似其末一句缺载不可考今附注于此】

喜雨次甄云卿监簿韵

四郊苗槁勃然兴顿觉欢声满郡城行且刈云成岁事敢因喜雨记亭名昔如鱼在釜中活今见龙从地上行忧国愿丰同此乐读君佳句欲风生

又次徐仲宗通判韵

老龙破蛰斩幽关乱滴天瓢不复悭可但甘霖驱旱魃自然凉气满人寰民心徒切焦熬甚神力每劳指顾间遥想清都应表贺紫宸轩陛晓催班

又次郑性之县尉韵

槁项疲农病夏畦喜闻烟雨四天垂旋寻秔稻供糜粥惊见新香玉满匙

闵雨才宽又畏风从朝愁到夕阳春谁教官到二千石不学当年邴曼容

几番好雨应先占欣见堦庭绿草纖秋後阴晴犹未定更看新月卧磨鎌

爰居集鲁要先知飞雪侵春久已疑惭愧风师幸安静敢将虎口鬪龙痴

游隐清

簿领丛中偷得闲轻輿相与出乡关乱流先已登孤屿采蕨还来上北山藤遶龟身增鼃黠水涵虹影照孱颜老农拥道迎人笑今日使君来破悭

瀑泉奔放石坡陀回首清游岁几何脚力不知前日健诗盟还喜故人多滕王阁上无韩子远
景楼中欠老坡不谓鄙言成宿?偶因晚泣得波波

穷冬吏鞅解纷纭重入兹山忆少年千里幸同丰岁乐三生曾结郡人缘几番山色望空外今
日水声来耳边坐上何须聽丝竹与君啸咏和风前

富覽亭

城郭占佳胜眼高贞白翬霜天开浩荡云屋涌嵯峨四面山总好东窗江最多脚跟盘巨石吞
吐任风波

贈陈居靖道人

沔泐道人身御风弃家求静慕僊踪僊都有石立天半特立要当如此峯

雪中简林景思刘振之

骤寒忽变雪花飞抱膝长吟况可知襦被可能来过我忍寒相与话新诗

谢林景思和韵

黄昏门外六花飞困倚胡牀醉不知冻合玉楼犹强项拥衾方咏雪巢诗

送赵子固吏部帅合肥

少年文价重神京游宦还闻政有声南省但推韩吏部北方犹问赵先生人传殿上三千牍上
喜胸中十万兵暂辍望郎分帅阃淮南草木更知名

老韩同传我多慙意气相倾自不凡忧患饱更俱白髮班行独立见青山羨君真有虎头相顾
我方为马口衔同舍几何俄话别可堪目力送风帆

襟带长淮地望崇勲名当继古英雄吴人止解依濡坞晋将才能过八公可但绥怀边境静直
须经略朔庭空折冲不必居遐徼颇牧尤当在禁中

曲竹

放出一头地出墙梢更新傍人为称屈素志肯求伸苦节变甘节曲身成直身青霄看直上莫
忘手援人

寄题汪端明坟庵真如轩

山藏佳处竹藏庐见说离家百里余已矣空求真学士伤哉闲杀老尚书後生自恨登门晚壮岁寧忘跪履初怅望九京郡可作此心徒切慕相如

万个簣簞一草庐伤心埋壁十年余革声谁聽尚书履金榜空悬少保书无复遗音追正始尚传新作过黄初真成一代风流尽叹息浮生信六如

题汪季路太傅所藏龙眠阳关图

离觞别泪为君倾行李匆匆欲问程不用阳关寻旧曲图中端有断肠声

画出阳关古别离萧疎柳质不胜悲行人顾叹离人泣柳下渔翁总不知

题陈简斋寄夫人书

行书满纸遗君丈可见闺门敬若宾应与少丈能协趣定因元亮遂忘贫

题韩氏所藏元佑选尚诏草

禁裔当年选尚初难兄辞宠意何如裕陵遗旨知难改元佑湛恩信有余今日犹存卯君笔向来谁造粉昆书韩门世宝宜无坠史有遗文尚取诸

秋日怀国仲观

四明耸秀一溪流曾记经行十里秋行李今从何处住宦游自笑几时休儿时故旧今谁在老去光阴不借留赢得东归访邱壑约君同上钓鱼舟

客省聽燕乐

晓入金门拜紫宸门前错立士如云未容密侍君王晏祇许钧天隔殿闻

次李季章监簿韵

跪履巽巘今几年见君风度喜跼然长编固已翻青简老墨犹能宝漆烟游宦自欣天影近思家犹在夕阳边时从甥馆追清赏賸写新诗继谪僊

贺雪八盘岭上作

平时卧雪似袁安谁肯凌晨犯苦寒百辟班中因族贺八盘岭上得遥看层层观阙琼楼耸纳乾坤玉宇宽怅望僊山何处是欲从此地径骖鸾

送林子方吏部将漕江东

光尧三纪焕文章宝阁迢巍谨秘藏寓直到君才第四皇华礼乐远增光

望郎三度到长安垂上青云作好官暂向江东一澄按却归径着侍臣冠

自说嵇康七不堪上教持节向江南江南父老应相贺见说清明似晦庵

殿庑官烛对风帘郎舍修篁共一檐别日苦多良晤少掺祛不耐雨纖纖

子方移守四明见于浙江亭

春初送别欠诗篇岁晚还欣受一廛都骑始闻临浙水先声久已讐鄞川里人见说俱延颈海峤从今定息肩夜夜故山频入梦为君端欲买归船

寄题蜀李氏义槩堂【君亮着作之祖】

养气非为侠轻财弗市恩仁声高月旦义槩彻天阍称美推贤嗣扬名有顺孙活人几百万何止驷容门

送卫清叔着作提举淮东

汉庭早已冠羣僊阔步登瀛最少年窃叹岂惟年叵及人门才业总翹然

通泰牢盆亘海滨宅家专欲用儒臣淮南草木生颜色又见龙头第一人

虎榜先登到凤池前良多以十年期虽知勇退急流去壮岁功名会及时

羡君持节拜庭闱未老双亲看彩衣若过盖公烦问信坐曹日念旧游稀【外府旧为敕局卫乃盖侍郎壻】

屡从樽酒接从容叔宝风姿照座中他日相逢年益老棊坛尚可角雌雄

送黄景声秘丞提举浙西

江夏无双第一人清明久矣动簪绅心平气劲无偏党好在皇朝作争臣

宅家亲擢得真才柏府兰堂更外台未问遄驱向沟壑半途应有诏书催
从来轩冕一毫轻朝蹟初收去玉京打破画瓶无个事不妨游戏绣衣行
论诗才了便谈禅鄙吝冰消更豁然稽首心空先及第敢将癸未论同年
玉节光华照日曦扬清激浊正当时阿连幸出百僚底正恐翁归不受私

雪中迎驾

都人久不望威颜惊喜鸣鞘风雪间万井欢声迎晓仗九天和气下人寰龙楼笑启瑶池晏鹄
序欣趋玉笋班道上峰头皆见日絶胜衔烛照崑山

题尤延之给事所藏葛僊翁徙居图

莫言家具少于车药裹衣囊自有余老妇亲携三稚子僊翁独玩一篇书羊牛相与趋新筑鸡
犬无因恋故庐到处山头有丹井不知如此几迁居

又题杨妃上马图

金鞍欲上故徐徐想见华清被宠初後日延秋门下路不应有暇作踟蹰

题老融归牛图

薄宦六年辞故山故山祇在梦魂间簪绅何苦自纏缚却羡归牛自在间

天竺祷晴

早奉天香祷白衣迟明宿雾故凄迷忽惊红日穿林薄无数碧山明涧溪上天竺寺连中天竺寺苏
公堤映白公堤湖光一碧几千顷賸卷荷香送马蹄

具美堂

明光殿里早催班亭午天街从驾还已聽欢声传市井更看喜气满湖山聯鑣远去闲寻胜烂
醉归来夜叩关但愿两宫千万壽退公时得过云间

水月园

具美盃残意未休相将重上望湖楼楼台忽已居平地风月何曾识旧游更挈酒樽过水月坐

增诗兴满沧洲春风共约新桥畔遥拜双龙万斛舟

三月九日从驾

昨日为亲寿今朝从驾行君亲俱有喜家国共增荣淑气浮黄屋欢声动玉京人心真易感翻手作昇平

湖山次袁起巘安抚韵

同年紫陌再寻春力主斯盟赖尹京山外斜阳湖外雪夜来阴霭晓来晴平波灩灩新添绿冻木欣欣欲向荣此日此身清洁甚软红何苦太忙生

攻媿集卷八

钦定四库全书

攻媿集卷九

宋 楼钥 撰

今体诗

试俞珣长头笔

倦游俞老入中州霜兔抽毫饱盛秋平日相亲管城子结交今得贾长头

访留昭文于范村山间不得见

黄扉处士掩松关小立松风去住难可叹山中真宰相未容神武挂衣冠

送倪正甫侍郎出使

经帷亲见犯天颜口伐何劳抗可汗故国应悲周黍稷遗黎犹识汉衣冠殊邻谍报终难测累岁要盟恐易寒驰至京城上方略始知颇牧在金銮

送王仲言添倅海陵二首

万卷诗书老雪谿欣然二子和坝箴绝怜伯氏久亡矣犹幸夫君及见之来上鹄行人未晚往舒骥足自嫌迟他时还向云门否布韞青鞋尚可期

遂初陈迹遽凄凉击叹青箱极荐扬谈笑于依情易厚典刑使我意差强重屏旧画论中主古殿遗文话阿章旧事从今向谁得尺书时许到淮乡

寄题延平范氏六桂堂

高门儒效许谁同秀气于今照演峯家学一椿连五桂地灵两劒化双龙三人衣鉢清名接累世簪纓庆事重彼茁孙枝更林立不须万户羨侯封

京仲远尚书为澹然子作二大字

浓墨新题付澹然松坡为子老谈天凭君推我行年看何日归耕绵上田

送李伯和吏部题举浙东伯珍寺丞将漕夔门

奕奕君家好弟兄皇华交映棣华明几年并列金闺彦同日俱持玉节行万里往临夔子国一江先到越王城会闻归取青毡旧都似当年老贰卿

送范文叔礼部守彭州

忧国鬓先雪爱君心似丹旌麾虽自适怀抱未全寛直道任三黜故人怜一寒蒙阳毋久驻旋复簔鵷鸾

送赵德老端明帅蜀

身名俱泰老尚书叱驭宁辞万里途两地恩荣真赫奕四川父老定欢呼乖崖袍带今重见清献琴龟我更无频向筹边楼上望归来方略上新图

次卢国华提刑所寄韵

持节归来上粉围祗今一节又何之乐天好句追长庆元亮高风挹义熙我恨别多仍会少君虽去速岂来迟闽山荔子熏晴昼莫惜登临賸赋诗

古梅遗张时可

枝封苍藓澹花疎一种风流高更孤试问约斋三百树林中还有此枝无

李才翁贺除天官次韵

九年奔走只思闲归梦时时堕故山已媿演纶词禁上更堪曳履侍臣间官曹顾我空无补世

事惟君了不关但欲相从游物外不应久此玷清班

我居铨部鬪簪裾终羨寒臆只蠹鱼每念故交今有几况如盛德岂容疎京尘共叹催人老市道谁知有隐居久苦笔端枯渴甚楚波正欲借君余

刘德修右史去国示所和从父东谿及杨子直诗走笔次韵

无人为辨乐羊书却向空山问草庐世上荣枯无定在眼前毁誉竟何如寸心未彻九重上百口仍行万里余只恐君王思旧学便看飞诏促严徐

东谿诗似老弥明倾盖论诗絶点尘笔墨为供无尽藏江湖乞得自由身出门远送成惆怅无计相留更主臣但愿皇天开老眼不应空谷滞斯人

阁下相期久山中把酒稀未能容我去又复送君归柱史宁终隐威顔暂咫尺壮心谁与语看剑一灯微

谢袁起岩侍郎送盆栀奉老母

翠绡飞盖拥生香水雪精神试晚妆鹤髮慈亲俄一笑玉人何事晚升堂

送曾南仲寺丞守永嘉

六和久坐趣归鞭却送旌麾水竹边无说可俾新令尹有时重送老同年城隅緑竹今安否庭下朱栾定俨然回首东州真梦境羨君此去若登仙

过上虞怀谢驿喜雨

梦回檐溜作惊湍浄洗炎敲百虑寛咫尺东山见膏泽令人更忆谢家安

答杖锡平老

老我平生不愿余归来但欲赋闲居灌园自足供朝膳日奉夫人御版舆

送□尉海陵并寄示瀟

二子俱从宦重亲足自怡汝能行幼学吾岂恨轻离平日自知己真心更与谁临文有遗忘此是忆儿时处已幸寡过居官勿愿余动成经岁别賸寄几行书公退仍多学心清任索居但知行所职通塞聽何如

次潘安叔寄新溪诗韵

曾游明月旧双谿老去情怀百不宜梦绕新谿身不到更休重和寄来诗

送内弟汪强仲赴台州税官

雕鞍去去不容攀柳下门墙辍往还可但征商私龙断不妨挂颊看巾山右军墨妙惟修禊太傅才高亦抱关咫尺亲庭母苦恋有人能作适斋闲

少潜兄再立昼锦坊伯中弟有诗次韵

东楼旧日史君家盛德于今说孟嘉昼锦门墙再兴起乌衣巷口倍辉华虽无崔氏聯三戟肯学杨家簇五花尤喜桂枝香不断藏书满屋是生涯

王原庆诉盘餐萧然走笔次韵

愁絶诗人太瘦生也无北食与南烹君看俚语亦堪笑何日能填鼻下横

莫嗜鲋鱼如老曹但应菜饭学参寥坡翁晚节更清苦玉糝新羹手自调

送赵振文主簿

去去江西不作难片帆双桨荡秋澜已知宦业非时様尤喜亲情耐岁寒志大自然羞附骥官卑何用叹栖鸾少卿膝上加文度更比年时刮眼看

病足戏效乐天体

课得退连茹药逢新太医居闲幸余暇养病任多时步履虽非便调琴足自怡晚来风雨急高卧到晨炊

叔韶弟上连桂堂榜会羣从

我家簪绂百余年书种于今幸有传折桂时能取黄牒肯堂赖子抱青毡一新扁榜照华屋共集樽罍招衆贤须信後生尤可畏要当争着祖生鞭

题林氏香岩庵

缓步寻佳处林深路欲迷偃松披数亩立竹漱三溪淪茗凭山檻呼灯照石梯轻輿空翠湿投暝喜幽栖

送汪强仲还官所

又向丹丘去安书易往还固因官事了莫放旧书闲问讯雪巢老寄怀巾子山经行皆梦境自笑日苍颜

寄题吴绍古县尉经德堂

问舍玉真下读书经德中心期知共远臭味许谁同吹笛夜凉月舞雩春暮风直须涵泳熟毋负象山翁

送季舅汪江州【大定】二首

清直如公天自知晚年百顺了无亏九城台下方还旆五老峯前又拥麾题坐喜逢陈仲举据牀好继庾元规太平散吏无由到倚聽中和乐职诗

舅甥相与自垂髫游宦归来鬓已凋坐上可无车武子酒酣时赖盖寬饶喜公自此驱千骑顾我从今守一瓢闲与适斋同怅望草堂樽酒幸清朝

送内弟汪耐翁随侍因赴临川推官

之子长才盍要津未知此别几经春且爲湓浦过庭子径作临川入幕宾生长外家身已老周旋中表意尤亲从今家问须情实莫事虚文学外人

环村踏雪

一冬求雪雨还晴賸喜春朝见玉霁不为偶同佳客到谁能深入乱山行云牕雾阁知何限玉树琼枝到处明更唤轻舟同稳泛小谿何似剡谿清

荀輿冲雪过谿桥流水方东未晚潮白里不知梅夺色青边尤喜麦成苗烟深带雨参差下空濶随风自在飘可是忍寒请更切故求野路踏琼瑶

又次蒋甥仲愚韵

山色空蒙雪更奇满空擊碎碧瑠璃寒侵茅屋春无寐冻合梅花夜不知泛泛轻舟胜路滑洋洋流水乐人饥兴来但觉酒肠濶江海安能实满卮

送元积弟赴永嘉酒官

宦游五载住中川似与邦人有夙缘昔日江山知好在旧游人物想依然吾衰无复逢梅福子

去惟应梦阿连或问故侯霜鬓未吾言潘令是齐年

我家清白世相传工部真清更有年百口未曾营活计一生惟喜种心田吾方奉母耕绵上子更移封向酒泉兄弟凋零期自勉只将家训作青毡

同王原庆知道游天童

旧游曾记梦中身一日重来白发新行尽杉松三十里看来楼阁几由旬狎鸥亭外波澜濶宿鹭池边草木春自笑赋归如许久始来此地作闲人

东谷

旧说东阿谷兹来到此山树深烟冉冉花落雨潺潺有客礼师塔何人叩祖关天连秋水远此意尚人间

千佛阁

平横云栋塞空虚倒影仍临碧玉壶千佛威光归宝所九霄宸藻粲河图人天共叹未曾有燕雀相惊不敢踰试问南询童子看化城曾见此楼无

从子涤濯寒纳凉

杨柳阴阴映粉墙密云藏雨晚来凉高荷欲出栏干上笑挹红英吸净香

□谒告归省复还海陵

吾子远归省重闱俱粲然难留毛义檄又送子真仙西去仍千里东归约二年词场期自力收取旧青毡

题少潜兄得闲

亭下水吞空轻舟处处通闲情谁得似逸兴更何穷诗社率相过醉乡时一中我家原不远只在小桥东平日君多暇如今我亦闲人归真得地吏隐胜居山烟浪一千顷茅檐三四间天寒倚修竹空翠湿敲鬓

送从子渊宰浦江

谁云宦路足岖嶽送子之官独放心廉介有余无矫亢谦?已甚自崇深安輿何用资三釜庆问时能抵万金公退读书三子侍县斋松竹已成林

慈溪道中

双橹真成鹅鹳鸣客愁厌苦梦魂惊须臾寢觉耳根热一觉醒来天已明

题惠崇着色四时景物

旧说惠崇真画师生绡四幅见天机鹭翻桃岸韶光妩鹅浴莲塘暑气微风劲宾鸿霜始肃寒欺花鸭雪初飞分明知是丹青卷仍欲沙头唤渡归

送吴参议【襄】

才气勇无前人推季子贤侯藩聯剖竹制幕晚依莲势利从身外风流到酒边四明欣会遇两载得周旋为记题名石仍吟达观篇留行何及矣执别但茫然我已甘投老君方欲引年未知重见日目断五湖船

即事

十日阴寒雪不成腊残春近更霜晴深山高卧如春暖遶鬓飞蚊自在鸣

吊陈卫道墓

平生学博更加详和会三家尽较量一觉可怜成梦蝶多岐终是易亡羊门前修竹连岩桂道上芙蓉间海棠何似剗除闲草木青松一色荫高冈

游大梅山梅仙岩

为忆西京梅子真人言羽化匪沈沦海濒古墓已无迹山外高风宁有神鯁论至今光汉传清风犹足荡秋旻何须更说神仙事终老市门良可人

虎冢

辛勤玉柙更珠纈或见义牙出骨须鸢兽一心能护法敝帷千载尚全躯余威凛凛空埋骨遗像耿耿若负嵎及见当年梅子熟自应惊倒老妖狐

谢潘端叔惠红梅【有序】

潘端叔惠红梅一本全体皆江梅也香亦如之但色红尔来自湖湘非他种比自此当称为红江梅以别之王文公苏文忠石曼卿诸公有红梅诗意其皆未见此种也感叹不足为赋二十絶

旧家桃李种河阳今日红梅自楚湘根塢送春君意重为移絕艷到吾乡
黄姑曾为点冰肌亦有缃尘染素衣何似臙脂天赐与暗香犹在是耶非
为君手种向南牕误认昌州移海棠元是玉妃生酒晕帐中仍带返魂香
前身施粉忌太白今日施朱恐太红说似旁人刚不信清香万斛在花中
殿後鞦红色漫糴绦桃空自笑春风何人击碎珊瑚树恼得瑶姬面发红
旧见寒花蜡蒂红宁知沁入雪肤中絕怜金谷佳人坠到地余香散晓风
梅花几种尽相闻老矣才欣见此君相与对花文字饮絕胜歌舞醉红裙
人间丹桂亦微黄未见红葩解有香惟喜此花兼衆美麝脐薰彻绦纱囊
初移湘水一枝春臙馥还欣为我分梦入山房三十树何时醉倒看红云
岁晚红英绕冻柯玉人无那醉顏酡广平赋就如逢汝铁石心肠可奈何
少陵年後咏花开未见臙脂一抹腮可惜当时诗兴动止因东阁看官梅
坡翁着意赋三诗漫说浓香已透肌若见此花应絕倒惜君生晚不逢时
花品无庸定等差国香国色属吾家海棠正自惭粗俗莫问漫山桃李花
不学江头玉树寒壽阳红粉旧妆残婵娟可是惭随俗莫作金沙锁骨看
客来试与倚阑干拂拂清香触鼻端尽教北人浑不识不应改作杏花看
全体江梅腊里芳紫绵新拂汉宫妆临川借得江梅句倾国天教抵死香
诗老为花空自忙想应未识此奇芳青枝緑叶何须辨桃杏安能如许香
只说梅花似雪飞朱顏谁信暗香随不须添上徐熙画付与西湖别赋诗
缃裙练帨玉为肌谁点微頰向北枝若是罗虬见顏色定须将此比红儿
自昔梅花雪作团红梅晚出可人看江梅不解追时好祇守冰姿度岁寒

山行

行入春山紫翠中入山深处更桃红一百五日麦秋冷二十四番花信风千顷摇青几蔽地四山耸翠欲浮空野桥横跨溪如练待买轻舟下钓筒

金蹄

金蹄垂耳小韩卢饰以重环驯可呼谁系冬青碧阴下恍然如见擊桐图

次吴伯华韵

一身遇坎复乘流景物当前亦自由浅草人行回作径水来沙聚看成洲哦诗首为钩棘句适意即是逍遥游烂醉不知门外事夕阳日日下西头

从子颯送梅枝戏作

向来地暖见东嘉带叶江梅殿岁华不似青春三月暮南枝梅子北枝花

菁江迓客

菁江十里路透迟两岸平畴接翠微赢得闲中乘画舫随潮西上趁潮归

午睡聽雨

老年乐事莫如闲午睡醒来梦已阑枕上欠伸犹懒起更聽檐外雨珊珊

放鹤送潘?叔司理

冲霄六翮困蓬蒿清唳时时发九臯鹄立固应能独出鸡羣未免叹徒劳相投顾我怜冰玉欲去知君刷羽毛幸脱樊笼随所适平平飞去不须高

宿育王山涵秋

清秋来此尚涵秋雨後山泉自在流夜暗声寒鏘玉佩灯明清影粲珠旒枕流正自怜孙楚洗耳何须访许由我亦暂来专一壑倚栏耽玩不知休

长女涪归夫家寄以小诗

胡笳未了遽成归妇职如何敢失期弹到佳声重入塞伯喈未免念文姬

太湖响石

何处飞来一段云太湖风急到江城云中疑有羣仙过时聽丁东环佩声

送朱季公倅严陵

朱家族裔甲龙舒循吏清名史特书正为嗇夫思所部至今庙食盛乡间舍人曾赋严公濂季子方题仲举輿但向棠阴增蔽芾桐乡今却在桐庐

以十月桃杂松竹真餅中照以镜屏用瀟韵

中有桃源天地寬杳然溪照武陵寒莫言洞府无由入试向桃花背後看

次周益公韵【有序】

某比从朱南劔获拜覩丞相益公送行末章齿及舅甥姓氏既又得尽见诗刻文潞公同甲会之盛世所共闻公与王钱三府名丙午坊尤为奇事今欧葛二贤士以布衣交五载与齐年之集壽乐未央高风厚谊古未有也舅氏尚书既已属和命某同赋课成五首以谢厚意

天将间气孕山川名世还当五百年已是有官居鼎鼐不妨平地作神仙书林尚欲校三豕笔力犹能驱两肩前日勲名身既退斯文留与後人传

六一先生葛稚川两孙俱并相君年词场鏖战今成梦潭府齐盟望若仙政路三公旧同甲洛阳四老信差肩坊名丙午真奇事写入诗编盍并传

顷尝假守向中川公在黄扉已数年每念夔龙容接武自期鸡犬亦登仙入朝终叹一交臂问道几思偏袒肩数仞宫墙天樣远此心何日遂亲传

别驾归来自赣川相迎方叹别经年为言相国珠玑语寄问洞庭山泽仙妙句耸观亲盥手满城争玩日骈肩退怜母子方偕隐却恐虚名似此传

舅甥相与老鄞川况值慈亲九十年画舫时追唐贺监笋輿聯访汉梅仙官名自媿偶同轍才望如何敢并肩误辱品题称酷似此声梁楚更堪传

题施武子所藏老融二牛图

佳哉淡墨扫人牛一笛横风各自由平日深知焉用稼如今但欲老西畴

乌犍离立意透迟鞭策俱忘取次归駉犊跳风仍却顾老融于此露天机

谢少微兄惠牡丹

乍观泉石分新种想为黟山忆旧葩病後不妨风韵在此花之外更无花

方翦栏干第四花玉人聯袂过吾家捻红玉翼皆名品醉眼相看到月斜

箫鼓声中醉九旬落红万点正愁人眼明忽见倾城色更向尊前作好春

戏和□诗卷

琴奕心偏好丹铅手自磨衰翁会同社吾子楫余波歌动玉条脱酒倾金叵罗好为文字饮行乐未宜多山色蓝初染湖光镜始磨竹梢轻坠雨花片乱随波麈尾挥东晋龙舟吊汨罗莫愁春易老畅饮一春多澄江如练淨新月似鎌磨老柳飘轻絮良苗颭细波歌声追古郢诗价怯新罗到处还成醉芳醪旨且多暮年甘散诞壮志久消磨自媿今摩诘谁怜老伏波清新慚庾信敏慧谢甘罗惟有诗情在犹能益辨多

过从子泽家

楚楚初篁脱緑苞城居约略似荒郊土膏更得春风力直引蔷薇上竹梢

题陆放翁诗卷

沙画初惊渴骥奔新诗熟读叹微言四明知我岂相属一水思君谁与论茶竈笔牀怀甫里青鞋布韞想云门何当一棹访深雪夜语同倾老瓦盆

送内弟汪庄仲赴浙西仓幕

家食八经秋兹焉喜宦游往依王仲宝况事薛居州寄信凭鸿羽题诗寄虎丘飞云亲舍近时望海东头

赠龙游术士胡杲

方笑刘郎问大钧从来祸福本无门世间生老病死苦时至即行何足论

夜坐

晚来徐步出柴局万变浮云在窈冥浓似铁山擎缺月薄于春絮透疎星正欣夜久沈天籁尤喜空明鬱帝青雨气未平龙欲动电光前後射中庭

再送潘?叔

我似冥鸿弋犹慕君如放鹤去还归我空今日真成去好伴闲云自在飞

以六经左氏传庄子遗伯中弟有诗来谢次韵

手披欲究百家编奴婢年来识郑玄顾我幸多千卷蓄念君未有一经全诗书心醉不容醒父子笔耕期有年此但古人糟粕尔更须从此悟真筌

书种传来直到今读书几似孝标淫欲君终就九经库与子平分一片心更向漆园穷妙旨何殊清庙奏遗音中郎书籍付王粲想得知余此意深

中秋无月

凉意秋将半深期月影清昨霄云点缀今夜雨纵横睡久何曾着更阑喜暂晴起来聊旷望终欠十分明

赠丁相士

相形何似且论心眼力工夫见浅深古怪清奇任君说灵台一片若为寻

送叔韶弟赴官钱清

蕞尔钱清镇兹行正为贫九夷犹可处十室岂无人官守无卑小城居缓卜邻老夫平日事所至若终身

净明方丈

云深宿雨未收晴短艇还来叩晓扃山溜拥溪侵石磴天风吹雾暗空庭茵铺野草滋新绿玉立修篁洗旧青老我时时假僧榻梦魂直向醉中醒

新辟门径或谓太窄

门外顿空旷双眸豁太虚谁欵列佳树正尔对吾庐蚤岁曾修业衰年得定居买邻贤伯仲衣锦旧门闾未辨三间屋先栽数席蔬欢娱戏菜服晨夕奉潘舆驷马容虽狭斋郎任有余牀金知己尽瓶粟岂无殊细草沿堦嫩新篁得雨初窃希仁者静未觉故人疏昼永翻名画更长理旧书何妨抱琴醉尽好带经锄耄穉同甘苦儿孙共卷舒眼花多掩卷鬓雪不堪梳少饮无求醉徐行可当车此生千万足祇愿老樵渔

小溪道中

簇簇苍山隐夕晖遥看野雁着行归久之不动方知是一搭碎云寒不飞

後衙环村尽遡游凤山寺下换轻舟舟人努力双篙急引得清溪逆岸流

送从子渊葬

晨起霜如雪天寒水欲冰引舟拖急濑扶杖立危层北阮苦多事二疏俄丧明山阿埋白璧悲恸不能胜

早起戏作

枕稳衾温梦乍回闲居不怕漏声催天明更欲从容睡长被孙儿恼觉来

午睡戏作

早起三朝当一工老来贪睡不相同偶然一次五更起却用重眠到日中

攻媿集卷九

<集部,别集类,南宋建炎至德佑,攻媿集>

钦定四库全书

攻媿集卷十

宋 楼钥 撰

今体诗

南山广莫轩

广莫垂风隘九州乱山无数点平畴一千里外在吾目三十年来无此游地下天高俱历历鸢飞鱼跃两悠悠昌黎费尽南山句旷远还能似此不

送赵至道节推

君来入幕恰三年我幸投闲识此贤婉画时时因事见素风凛凛信家传易林律本君须寄月

□天根语是圆问讯难兄无恙否相忘千里各瀛壖

湖亭观竞渡

涵虚歌舞拥邦君两两龙舟来往频闰月风光三月景二分烟水八分人锦标赢得千人笑画鼓敲残一半春薄暮游船分散去尚余箫鼓绕湖滨

龙潭方丈

又因寒食此中来牕户虚明絶点埃山里春风无间断海棠开过棣棠开

吊仅老塔

仅老相从五十期来瞻遗塔我心悲当时旧话无人说空有门前洗鉢池

夜携家登南渡桥

几过长桥下清宵得意行风高江水急月上海潮生空迴寒逾峭更深境过清扁舟难久驻转柁问归程

题梦月上人送鸿小楼

雨洗春山空翠新登楼不见送鸿人薜萝清夜月依旧无复新诗泣鬼神

赠于湖刘相士

自笑今年卦气阑壮心销尽鬓毛残明知七十无多子只问何时可挂冠

五月望月蚀历家又言六月朔日蚀

间巷夜争呼相传救望舒偶因风暂破真似月之初孰谓蓂能睹端知历不疎太阳交蚀近试看更何如

题贺监李谪仙二像

不有风流贺季真更谁能识谪仙人金龟换酒今何在相对画图如有神

斗酒浇诗动百篇监湖牛渚两俱仙早知今日犹相对不向稽山回酒船

病後戏作

河鱼腹疾未全除一饭充饥不愿余纵有珍羞难下飭真成顿顿食黄鱼

枕上

不守庚申不坐禅老来触事总悠然天明门外无来客尽好萧萧听雨眠

谢蒋行之送菊

秋老怀情尽自寬眼前只欠菊花团分来三径双株秀先得重阳两日看玉輓金轻无限态风高露冷不胜寒幽人相对成清伴正尔落英供夕餐

厅事落成老母置酒喜而成诗

数椽增葺苟全时我爱吾庐喜得归儿辈粗能勤父蛊老天无不费心机年来每愧踰初望病里尤知悟昨非从此萧然无一事但当日舞老莱衣

十月十七日夜

蛰虫坏户六经旬掣电惊雷若暮春震起昆虫千百亿不知何处更容身

织锦綦盘

锦城巧女费心机织就一杼如许齐彷彿回文仍具体纵横方罫若分畦烂柯未易供仙奕画纸何须倩老妻如欲拈綦轻且称当求白象与乌犀

叔韶弟以退堂洪老诗来寄谢

不受人天供甘心乐隐居空穷千里目笑拥一楼书攻媿老无用退堂闲有余相望可杭苇何日访吾庐

寄题正卿通判可高亭

樟坡直上可高亭未见高高祗见名想像岂能胜一览登临安得快双明大龙湫下听雷吼白石岩头看日生咫尺好山随杖屨自应老笔擅诗声

中秋次从子涪韵

雨余不见日西沉将谓中秋又作陰佳月忽开千里影骚人满慰一年心扫除尘翳风难动滓
濺太清云尚深坐待寒光谁会此阿咸为我发微吟

杨花

杜门无绪看芳菲见说杨花满路飞谢汝不随人冷暖因风翻舞到柴扉

送赵南仲丞溧水

不用忽忽恨别离版輿春昼彩衣随往题斯立蓝田壁更访清真溧上诗公事毋庸倚牙角邻
封真是和埧箴日哦新句频相寄明月清风慰所思

戏题龙眠马性图

狗子已知无佛性马又何曾有性来伯乐若来休着眼任他骐驎混驽骀

他山

素蛻横卧作雷吼日射细鳞银色光安得此身如白鹭翛然终日在梅梁

过尽水禽竝野鳬风标惟许一春鉏可怜久立梅梁上不为谿光祇为鱼

小酌元卫弟听雨

小阁临流暑气清藕花的的照人明移牀更近栏边坐要听碁声杂雨声

瀟再往剡中念之尤切作诗宽之

剡县不为远丞官勿谓卑鼓盆知爱重去国倍行迟堂上森三老房中秀一儿加餐了官事莫
赋悼亡诗

观云寄简讲师

苍狗哦然又白衣来从何处去何归无心出岫还归去莫向秋风说是非

过故家

团团桂树拥檐牙旧日轻黄满树花惆怅秋清无一叶空余枯枿缒寒瓜

题从子浹娱亲

阿戎筑屋为娱亲野草闲花日日新我奉版舆来举酒祈君亲寿似夫人

丹桂

碧云步辇紫金蕤风静秋高千万枝娇额涂黄元自好是谁深傅蜜胭脂

下元日暖甚夜风雨大作早微雪从子湑以醑醺来

眼明喜见早醑醺牕外风号集霰时梅蘂已慙前腊破芳心休用怨春迟纳凉除夜昨几似见雪芭蕉今不疑若使洛人真得此应须更诧百宜枝

送朱□正守南劔

舍人簪笔旧甘泉家学相传子姓贤未羡夹河为太守阿连剖竹向封川

樵李曾蜚剗剧声贰车仍赞虎头城朱轡小试承流手要继桐乡循吏名

万竹蟠山喉不乾两龙潜水气犹寒郡斋见说真图画公退何妨一倚栏

下水上山腰带州人家无数起危楼遨头不用喧箫鼓祇把清诗纪胜游

同盟东下或西征老我惟知管送迎祇恐政成登省户未容归骑向西城

名画法书知几编捧铨宁复计求田摩挲賸买新文字归满米家书画船

送杓孙随侍上虞

阿斗生来十五年未曾一日去翁前闻诗勿废家庭问习吏仍求城旦篇婚宦有涯真是幸巾箱所蓄要相传荣鬢虽小性非鲁口授诗书加爱怜

戏作

二子为丞分越邑女儿随壻过江南笑言屋里成岑寂匹似当初只住庵

诸莹拜扫晚归长汀

雨意早垂垂寒云晚更低空中时散点道上不成泥綠柳桃相映黄花麦与齐纡回余百里喜

见旧松堤

送朱季公守封川

韶阳生长十余年城郭重经固宛然叹息紫薇仙去久尚余遗墨照山川【先舍人居韶十四年季公生于壬戌】

桐乡汉有大司农封守今推陈秀公君向邦人着遗爱近追相业远家风【陈秀公曾守封川有遗爱】

乡评久说鴈行贤剖竹封川与劔川不用对牀风雨约政成问取旧青毡

吾乡基社寢凋零赖有朱家好弟兄举酒看看故人少阳关莫唱断肠声

妙舞清歌有二姝後堂曾见绣罗襦岭南太守风流胜不用归舟载緑珠

以玉兰赠王习甫

一种香兰玉色新仙家分得蕊宫春调高韵胜谁能称付与能言解语人

华屋翬飞庆事縣芝兰玉树喜庭前似闻楚畹芽初茁便看蓝田生晚烟

送赵清臣宰姚江

玉立君家好弟兄蓝田风采照花城版輿寿母人间盛千里何曾去送迎

鄞江水与舜江通久矣威名满一同试问何时到封部数声柔櫓一帆风

长江东去跨虹桥千丈横堤扞海潮更向烛谿图永利坐令百里沸歌谣

才刃恢恢妙拨烦邻封抚字尚何难更能触事加长虑自有甘棠向後看

归家故步懒重寻藏拙年来恐不胜短棹有时乘兴去径登竹所听鸣琴

杨花

雨压轻寒春较迟春深不见柳绵飞忽然飞入闲庭院疑是故人何处归

柳绵无数糝枝头日暖随风扑画楼万象可观惟有雪喜看晴昼满空游

为我轻攀绿柳枝带花低护笑携归日长深院微风动要看松绵当面飞

野芳庭草是生涯老去祇宜闲在家几日惜春留不住小鬟为我拾杨花

送王伯奋守筠阳

三槐名德萃清门七叶为州赖有君道院无忘山谷赋郡斋当继颢滨文君应膝上邻文度我
向东牀忆右军振起家声差易耳便看奏最蹶青云

别王恭叔

两儿虽近隔江潮赖有王郎慰寂寥远侍双亲官道院为同尽室钱西桥脑脂遮眼最关念客
路寻仙勿惮遥别後飞緘问安否数来谷口访山樵

别长女涓

老我年来百念轻文姬助我以琴鸣等闲相对成三弄游戏俱弹似一声举酒不堪千里别登
途知用几程行郡斋自是神仙窟会有堦庭玉树生

赵资政园梅篆

小径回环里许长寒梅森列间疎篁路如古茧紫繆篆身似轻烟繚印香九折坂中经蜀险八
盘岭上趁朝忙归来游戏通幽处笑看危途几太行

示从子

东院敲棋西院琴固知犹胜别劳心少年不比老痴叔且向书牕惜寸陰

赠画梅吕生

西湖处士赋疎影未似希贞好乐章岂是无情甘澹泊受他风月几凄凉

瀟自剡州寄水晶蒲萄

马乳从他堆满盘未如清嚼水晶寒固知一县蒲萄熟不用劳人数问安

送汪庄仲赴江东仓幕强仲荆门签判

不见适斋老于今三四秋弟兄登宦路亲党驻行舟老病无诗思衰怀重别愁外家门户盛勉

力绍箕裘外氏蒙恩厚文昌独我知居惭酷似舅喜有宁馨儿遇事行方便褫身谨护持公余定多暇黄卷有余师早岁过秋浦贪程不入关君今参俭幕时得上齐山肤使资关决贤侯伴宴闲好音频寄我藉此一开颜之子游何许平州更玉州山川称胜絶幕府信风流翠巘寒逾秀金莲夜不收天涯念乡国少上仲宣楼见说荆门地如门蔽楚荆旧时为内郡今日号边城但守平平策毋求赫赫名勉哉关决际从此振家声

送元积弟赴淮东总属

南徐来往饱经过总饷宾寮入礼罗子去幸陪邹湛辈君今还是伯休那金闺通籍时方可铁瓮名城景最多我有净名遗记在试从万井访维摩

十人兄弟五人存心事方欣得细论可但衰退怜远别只因喜惧有慈尊倚门何止期吾子发策还知望好孙从此三年风雨夜寂寥棊局与清樽

陈君举既亡汪文子携其所作春秋後传及送行诗来次韵

名盛望有备枝披实亦繁无由究贤业犹幸立斯言书在经逾显人亡道更尊九京如可作与子共南辕

送赵伯藏倅永嘉

当代投闲老吏师佳儿官业具而微已烦潘令宰花县正要王祥康海圻得助江山诗兴逸平分风月羽觞挥安车何日迎清献又向堂前戏彩衣

分教分符恰五年异乡每若故乡然归来几作池塘梦送别欲随骑御仙目断甘林应饱熟手栽栲实想芳鲜邦人若问老州牧为说清霜绕鬓边

昼寝

弹彻悲风更广陵沧浪一为濯尘缨邯郸枕上梦初觉喜听檐间风雨声

唤仙阁

上到危层莫唤仙才凭横槛挹江天江天如许来供眼何用王乔更偃佺

多少寻仙更不还渺茫竟堕有无间使其真有毋庸唤仙自层城我自山

犯暑来登览松风为洒然龙泉登古井虹影卧中川万簇寒林秀四山秋色鲜诗翁不可见况敢唤飞仙

送赵敏之丞彭泽

淮甸归来涉学深孤云又出亦何心公余岩下读书去远继风流石橘林

渊明事晋肯臣刘仁杰忠良不附周见说三贤参羽士【尉斯光】盍将吴簿配苹羞【南唐
吴举为彭泽主簿有高节见六一集】

陶令居官八十日始为督邮方赋归君家门户要兴起未用飘然咏式微

阿虞试晬戏作

阿虞匍匐晬盘中事事都拏要学翁最是传家清白处不将双手向顽铜

赠别卢甥申之归吴门

千里何妨命驾迟晤言未厌已西驰子休重赋琼瑰赠我亦懒歌亲戚离好向清江论乐府更
从叶子说新诗乐闲引纸五十尺为篆离骚继李斯

又谢申之示诗卷

不见贤甥十一年新诗示我百余篇古风已喜能行意近体尤欣细属联宅相真成珠在侧冷
官休叹坐无毡作诗勿谓今余事更下功夫继玉川

送秦仲防通判

清德曾瞻啓庆碑孙曾清更畏人知祗缘一介弗轻取坐使斯民不忍欺濂水家传御书卦宣
城手写送行诗典型尚继金銮旧马氏一门谁白眉

题輿再到海东涯嗜学深于入幕时一字未通终不置五行俱下尚嫌迟情亲端有卜邻意别
後空劳望月思老我无因可重见祝君来此拥旌麾

谢剡中沈元龙惠诗

东阳何事到东州百语曾无一语酬深羨松筠无败叶自言蒲柳已先秋千金既觉成虚掷双
璧还惊又暗投别後未知何日见但将吾道付沧洲

谢舒景叔写照见赠

谁写衰容入画图本来面目旧形模几年老瘦鬓如雪不道今吾非故吾

庭前一莲着花

门外荷莲浥露华绿云平地拥秋霞病夫不耐出门去且看庭前第一花

清月下鼓琴用□韵

老穉团栾鲤在庭文姬为鼓玉琴声起来同作悲风曲倍觉先秋月影清

国仲观迁居尹阕访别

晚年未定一枝巢到处盖头无把茅又欲浮家过尹阕何殊乐道向莘郊君今去此难招隐老更从谁可定交见说衡门临野水秋深容我去推敲

仲观有诗来谢次韵

危机屡见劒头炊喜及挂冠神武时从此含藏三寸舌算来插得几张匙读书牕下频勤习攻媿庵中老住持速办小舟频往返及今精力未全衰

谢王粹中惠白鹤山麟川观斑竹杖竝竹舆

麟川仙馆翠琅玕荷子携来白鹤山未效葛坡龙种化絶胜湘浦泪痕斑裁为柱杖一寻许巧作乘舆四尺慳儿子门生俱努力病夫欲过虎谿还

曾无逸郎中名燕居曰和三续社有诗次韵【欲和会三家以续双林】

通地通天祇个中千岐虽别大都同两家偶尔流传盛一贯临之内外融欲境扫开心在我浮云散尽月当空感而通者後來语不感须知自有通

老来

老来何以度光陰祇有围棋与鼓琴碁为心劳疎对局琴因臂弱倦调音曲肱时复同尼父面壁何妨学少林气习未除祇自笑又还弄笔动微吟

长生草

玻璃擢叶玉蟠根千里提携寄海滨雨泽不沾仍自润土膏无着自长春岁寒秀色镇衣旧日暖素英能一新我欲饵之求久视恐君灵已不灵人

谢黄汝济教授惠建茶竝惠山泉

几年不泛浙西船每忆林间访惠泉雅好谁如广文老亲携直到病夫前细倾琼液清如旧更
瀹云芽味始全或问此为真病否其中自有石如拳

史子仁碧沚

相家本有四明山更葺桃源渺莽间四面楼台相映发一川烟水自弯环

中川累石势嵯峨城上遥岑耸翠螺旧说夕阳无限好此中最得夕阳多

题赵曦远二画

藻翻数尾已如生妙絶鱼儿作队行不是深知濠上趣未应笔底得纵横【鱼扇】

牕前惊见一枝斜照眼英英十数花千载简斋僊去後何人更着好诗夸【墨梅】

送陈表道倅岳阳

垂上青云去如何乘贰车轻为千里别时寄几行书剗剧才无滞传家学有余当涂足知己应
不费吹嘘闻说巴陵好楼高占古城湖光千顷白山色一螺明赤壁沈沙戟苍烟老树精好诗
收拾下寄我慰离情

元珍弟酌别赋此赠之

归来十暑又三霜衰病那知谒帝傍采菊初期老陶令种桃应是笑刘郎不辞白首登鳌禁正
欲青衫及鴈行今夕团栾同醉後未知何日驾归航

灵芝寺

送客灵芝寺凭栏山有无自从朝北阙始得见西湖烟外移轻桨波间浴野鳬清寒不可驻回
首又神都闻丘医视脉曰老人之脉如小春有感

老去光阴似小春如何比得少年人君看桃李秋风後纵有花开不是真

贡闱对砚盘发叹

老去未忘黄与朱琢成三砚乐闲居岂能更作诸生业但欲频看後世书视草北门才已尽持
衡南省计尤疎便须再挂衣冠去约汝同归故草庐

次韵李孟远使君与林雪巢子季武诗

古梅巨石瞰清池觞咏曾陪老啓期别我遂成千古恨传家空有一篇诗使君尚尔悲陈迹处士惜非同此时若使南楼预清赏胡牀应奉庾元规

玉堂早起

早起多奔走旬休亦往还偶因二士试始得一朝闲灵鹊花枝上金鱼荇蒂间素餐终有媿只忆旧家山

赠徐松

我为浮名媿引年老余八十尚飘然不如合却谈天口归向白云深处眠

经筵讲诗彻章进诗

圣主承丕祚于今岁几迁昭回光饰物刚健位乘乾善治新更化当阳独揽权诛鉏及共鯨擢任列闕颠曩日方谋始宸心最急先未遑亲政理首务关经筵恭俭甘卑室尊严拱细旃书居勤已甚坐侍礼无前讲彻诗三百时逢运半千诸儒深诵说六义极摩研俯阅毛公传旁参郑氏笺慨寻中古意重是素王编旧本三千首终存十二篇虽遭煨烬厄三赖咏歌全开迹因农事安民在井田成功时迈酌兴业大明緜东国思平赋南山乐得贤艰难由后稷劳来美周宣起自绍熙载迨兹嘉定年关雎从肇彼殷武遂终焉宠数传中旨恩光被迓聯神文期继踵元佑信齐肩内廐颁云骑雕鞶纁锦鞞茗分龙焙品香拂御炉烟衆俊咸宣力孤生亦备员少时曾学咏老去未忘筌纳禄诚休矣归耕久晏然锋车俄促召梓里谓登僊词禁容挥翰天官命典铨岂知侵暮境重得侍甘泉朽质何能报孱躯殆欲捐尚思求谏海岳效尘涓

题天竺珪老复庵

路从天竺更微南衲子邀余过复庵八法照人瞻睿藻一峯当户拥晴岚奇文初动玩羲画万物竝观师老聃六用不成均此理楞严容我为同参

为倪正甫尚书题壮怀堂扁以诗来谢次韵

久矣君宜任弼谐果随驿召上天阶几年不作相逢梦一日俄倾积别怀情厚夫君几鲍叔愚如老我类高柴他时户册高悬後直欲扁舟访水涯

攻媿集卷十

钦定四库全书

攻媿集卷十一

宋 楼钥 撰

今体诗

送赵德老观文东归

趣还宗老侍经筵宿望訏谟信伟然引疾屡烦颁汉制赋归先已买吴船去年趋召叨同传今日求闲媿着鞭未得相随出关去羡公徒御若登仙

往还不过酒三行成败同观碁一枰东海敢言成二老西湖自足度余生竭来便觉废兹事归去定须寻旧盟锦里锦坊秋色里梦魂先已到江城

送倪正甫尚书守南徐

君如春柳我如松晚岁重逢意逾通日日公余搜理窟时时史暇乐谈丛友朋罕有心相照兄弟惟应姓不同此别未知何日见掺祛无语对西风

满腔忠膜与嘉谟空洞他无一物余有语莫非忧国志欲行犹上荐贤书已欣勇退成清节更喜高眠即故庐廊庙须公经济手不应歛惠向南徐

几回去国向吴兴出处虽高事不平兹以优恩临北固不妨禁直寓西清羡君决去行何速媿我求归计未成溯水东西又千里壮怀堂上未忘情

戏题十四弦

十四朱弦欲动时泛商流羽看瑶姬弦疏不隔如花面声急还同堕马儿谿蟹霜余索密网檐蛛雨後理轻丝曲终劝客杯无算一吐空喉醉不知

枢密新府

平生苦欲住山间每恨家居不傍山游倦忽来参宥密公余却得对孱颜援琴万壑自同响缓步一丘犹可攀信美终非吾久处乞身惟待老乡关

门号签书府心存攻媿斋倚栏临曲沼拄杖看悬崖槁叶鸣轻雨残山拥半阶退公成吏隐足以畅幽怀大雪赵振文寄诗言乘月泛舟清甚次韵

老我心知笔力衰颇欣腊雪瑞清时三茅奇观亦难遇白玉峯头灯万枝

万玉真妃摇佩琚梁园授简属相如莫嫌一水限吴越两岸交辉合太虚

雪光絶胜水银银未觉仙家隔一尘真境宜君着佳句赏心乐事更良辰

见说中宵泛彩舟何人同赏大江流阳冰伯雪应为伴更约禪人白道猷

旧闻老具擅诗声夜泛钱塘向凤城今日清游更豪逸雪花和月带潮生【法具字圆复绍兴初诗僧也有月夜游钱塘江诗云小舟为我载月白色沙翠竹光相射自从李白下金陵四百年无此豪逸】

酒边戏作

未年六十已言归七十重来自觉痴未报君恩归未许樽前羞听摸鱼儿

叶处士画貂蝉喜神见惠

重烦妙手费丹铅貌出衰容信宛然君看头颅已如许岂堪头上着貂蝉

顷游龙井得一聯王伯齐同儿辈游因足成之

路入风篁上翠微老龙蟠井四山围水真緑净不可唾【一作水从何来不知处】鱼若空行无所依胜处虽多终莫及旧游谁在事皆非祇今匏系何由到徒羡聯鑣带月归

海潮图

钱塘佳月照青霄壮观仍看半夜潮每恨形容无健笔谁知收拾在生绡荡摇直恐三山没咫尺真成万里遥金阙迢嶢天尺五海王自合日来朝

题施武子所藏醉白堂记【有序】

醉白堂记相台旧刻已不多见施武子得太清楼所藏真蹟一代奇宝也魏王尚友香山坡翁词翰两絶昼锦故居昔尝以假吏过其门巷恨不一到其处太清图书流传至此抚卷无非可叹者事至今日叹又不足为之恸哭可也

堂名醉白尚存不词翰辉光射两眸天下曾除苏氏学禁中却有太清楼旧碑于世已难见真蹟惟君乃得收感叹不堪衰泪落林虑山下水空流【魏王以相州城中无水于林虑山引水入城贯第中溢为灌溉之利】

谢雷季仲枢密惠社饼

宠分饼卷荷深情割肉烹鲜不厌精潭府始知严社祭衰门又得诧侯鯖洗杯用荐逡巡酒下

簪如餐骨董羹回首粉榆未能去欲随秋燕问归程

娄彦发参政【八月二十一日】寿诗【有序】

某伏承生申之旦正得秋而万宝成真是一年好处中秋佳月浙江大潮皆每岁所有芙蓉菊桂俱不复重陈今则实惟岩壑所夸一百省岁之时况值合宫大礼储君受册前星诞育昂宿凝祥相去只五十间宾僚惟公为旧学都省後堂祝寿之仪久不讲此公首当之今又以庆朝按试鼓吹严警场辄成唐律发樽前一粲

青宫册宝盛朝章王佩珠旒照日光储案久资三善得生朝相去半旬强五千余卷学尤富一百省年身更康都省先曾同举酒贡闱最喜又传觴易逢皓齿令歌曲难值严更听警场庆事方来真可卜祝公黄髮相虞唐

题孙谷桥墦间图

墦间不足又之他犹自施施骄室家齐国一人如许尔宁知後日事如麻

因知义利本殊途莫笑墦间乞祭徒正使往来多显者此中尤要着工夫

肆赦小雨【时章达之枢密在丽正楼上礼毕戏谓余曰君虽长未免雨立归途成小诗】

端门宣赦乐欣然膏泽还应降九天始觉耳边鸣槭槭渐看笏上溜涓涓我班金阙阑干侧君侍玉皇香案前雨立固知同陛楯一言犹幸赖优旃

题桃源王少卿占山亭

纳纳乾坤一草亭西山尽见若秋屏霜余远水呈天碧雨过遥空现帝青逸叟真成陶令隐高怀长似屈原醒肯堂固赖贤孙子精爽犹疑尚有灵

题汪季路侍郎所藏吴道子天龙八部

妙絶天龙八部图细看真不失鎗铍声名自足高千古题品尤难遇二苏旌旆冕旒犹可想鬼神人物亦何殊君看坐位兰亭草费尽工夫学得无【二苏谓子美子瞻也】

谢顔乐闲篆离骚

乐闲下笔素推高攻媿耽书老更饕顾我好看秦小篆烦君为作楚离骚晚年应悟成濞扁痛饮犹堪写郁陶喜剧但知岁十袭琼瑶无以报投桃

题徐圣可知县所藏杨补之二画

谁种疎梅古岸头推篷瞥见倍清幽君看竹外一枝好真有江南万斛愁

梅花屡见笔如神松竹宁知更逼真百卉千华皆面友岁寒祇见此三人

嵩岳图【有序】

先祖太师齐国公元符中知河南府登封县建炎兵毁先集故物煨烬无遗儿时犹及见扬州伯父藏嵩山图丹青仅存虽传録廿四峯诗以生晚既不逮事不知有石刻也张致远为京西僚属寄登封旧碑得之惊喜唐律为谢

先世前踪不可追君从何处得全碑上横嵩岳三千丈下列齐公廿四诗室号揖仙怀旧事庵名面壁认遗基青毡真是吾家物欲以琼瑶厚报之

写照叶处士求僧

几年依樣画葫芦自作葫芦学佛徒一笔从今勾断了一瓶一鉢任江湖

元日

岁当庚午旦庚寅最喜明朝遇上辛五福来临吴越分更欣三日即颁春

题郭恕先雪霁江行图

妙絕丹青郭恕先幻成雪霁大江船沿流更饱轻帆举上水仍劳百丈牵捩拖长年浑欲动褰帷佳客若将仙侍亲曾泛沧浪月犹记兰成射策年【十八岁时侍先太师行大江】

寄题江西刘氏勤有斋

朴斲敷菑皆用勤况吾儒者务多闻万书插架非关我一卷入心方属君为学从来无止法立身宁只富多文自怜习气今犹在尚欲楚膏到夜分

书葛氏诗卷【诗有致仕心闲十首】

来年六十蚤休官海角投闲尽自安一纪时容奉香火七旬遂许挂衣冠重来深媿妨贤路此去终期保岁寒三上封章归未得葛家诗卷却羞看

殿上闻杜鹃

衰晚三年侍玉墀高梧又擢凤皇枝封章屡上未容去更向殿头闻子规

王伯齐染髭

垂髫相见舜江滨荏苒俄惊过五旬顾我颓龄真似叶讶君长鬣亦如银万金安得神仙药一笑重来旧日春纵使星星还复出不妨时作少年人

乞出过传法闻伯齐归姚江

扶病还朝一秃翁重来宁免笑何公梦魂长是寻云北归路何时向浙东深愿耸身随画鷁空劳举目送飞鸿主人竹所终须到最忆东轩一枕风

行香闻杜鹃

墙西绿柳杜鹃声我老何堪侧耳听我自赋归归不得不须苦语更丁宁

送蒋甥若水使属北行

曾为假吏到燕山送子长征不作难故国能无叹禾黍中原应欲覩衣冠黑甜软饱宜加爱红皱黄团正可观行矣勿为儿女恋指期良月待君还

夜读王承家县丞诗编

向来深夜快挥犀不听清淡又许时净洗昏眸急呼烛为君读尽一编诗

链句工深兴味长固知家学富青箱莫言一啻能尝鼎更欲为余倾锦囊

寒食

辅政无功日歉然佳时颁赉屡传宣已蒙授粢仍分茗既荷贻牟更击鲜流号流香盛宝榼烛然新火散青烟儿孙不识君恩重但觅东宫赐剧钱

夫人携家泛湖

三分春色二分休始见鱼轩泛绿舟诸子待行欢尽日一翁独坐淡于秋满斟美酒应同醉是处名园为少留陰霭在前雷雨後特晴此日称君游

即事

壮志摧颓貌亦衰岂知官舍傍岩隈此身不是京尘里饭了沿山看腊梅

刘寺即事

不到兹山二十年岂知重见旧山川烟深虽不见湖水且看长空万里天

飞泉何事仰空流无数明珠散不收注辇昔时曾撒殿至今抛掷未曾休

淳发漕荐喜而成诗并勉杓

戊辰贡举忝余知曾碍孙儿到省闱欣汝今秋重预荐喜吾即日可言归门闾有庆人争贺父子同登世所希痴望十人俱上第坐令昼锦倍光辉

十月旦尚煖用夹公服二月初吉雪寒甚服单

尚煖先添夹方寒却用单不惟春料峭况值雪飞翻但欲朝仪肃难求已分安衣囊如欲懒归去老江干

从子淮过省寄伯中弟

我家伯父德余辉吾弟风标具体微七叶欣闻五争奋四人先喜一雄飞忍贫老尚甘簞食教子今方擢省闱他日双椿临六桂麻衣俱换绿衣归

赠僧文可往黄州建东坡寺

一坡久矣郡城东居士来游地望崇问舍求田烦作计拈槌竖拂看谈空共分龕老沈江宝要奉儋州秃鬓翁去作开山第一代灯灯相续到无穷

三月七日上赐牡丹并蔷薇露劝酒

几见牡丹东海涯暮年敢谓到京华休论千品洛中谱惊看百枝天上花况有八珍来禁苑更加双榼赐流霞阖门饱暖聊同醉稽首将何报宅家

史清翁谈诗走笔次韵

公退门庭静轻风辊絮球故人惊一见小酌散千忧西上不容久东归又别愁何当附舟尾从此遂归休

以兴安石院底寄颜乐闲

兴安乐石响于桐作院犹堪继仲容茂苑乐闲真好事为君添起玉玲珑

观冷泉亭放水

冷泉浅浊使人愁开板黄波去不休岸侧细泉穿乱石始知别是一清流

赠蜀二史【有序】

绍熙四年蜀士李德秀甫登科求致其事以荣亲先帝诏从其请某时任西掖预草词命今皇帝策士蜀又有二人焉同姓史氏其一絰州司户天应与其子箕同登遂以身之官求封赠父母其一成都府司户公亮自陈素志晚得一官亦为此举上益嘉之各特循从事郎致仕圣朝孝治之盛十九年间见此三人坤维士风于是尤振辄成唐律表赞喜之私仍寄后溪刘德修

老我挂冠惭复弹美君登第遽休官幸哉有子事尤美专以为亲人更难旧说三贤皆特操今看二士倍荣观同归犹及襄阳老一舸清风廿四滩

题汪季路尚书所藏米元晖蒋山出云

龙盘往昔名鍾山云起从龙意自闲肤寸须臾成戴?坐看膏雨满人间

九月十一日杓孙得男

郡斋弧矢记垂门今日衰翁更觉尊生晚不能瞻大父年高却喜有曾孙从今镜镊知无用但喜芝兰近愈繁愿汝孳孳守家法为传衣鉢到仍昆

送叔韶弟宰华亭

试邑云间事最多直将心力细琢磨固知三泖五茸胜其奈千疮百孔何敏手未须施霹雳疲民正欲听弦歌规橈稳作三年计徐土青云鬓未皤

又示从子澶

壮县人歌第一奇过庭为有宁馨儿亲旁色养宜加谨户外分毫勿预知寓意杯觞须自节读书松竹有余师他时刮目相期待连桂家风望一夔

寄叔韶弟

阿连试邑有成规谁谓云间不可为能使瓠汤偏滚处直如官府太平时容容非欲後多福赫赫何如去见思子路当年曾请益更须无倦以终之

朝退

谢事不得去趋朝愈更难谁怜八旬老日冒五更寒指冻怯持笏腰酸强踞鞦细思谁缚汝只合挂衣冠刘德修赴遂宁示和篇改除荆南复寄之

老矣思归铗屡弹七旬望八合抛官我将东去计安出君欲西还事亦难好向渚宫寻故蹟更从雄楚纵遐观上游正倚公为重莫向蓬谿更上滩

李起宗舍人悠然亭

远游蜀道历艰难径上甘泉豹尾间荷橐忽思辞北省拂衣自喜见南山当时旁舍基犹在回首垂髫鬓已斑先友碑陰尽陈迹寒空依旧湿烟鬟

伯中弟可休堂

夫妇老相对闺门贫甚安六儿俱力学一子幸仙官香火祠初奉勲名镜里看更当聯五桂纳禄尚何难

海棠

海棠昨日始萌芽一夜惊雷发万葩老眼恍然何所得凌云庵外见桃花

海棠初发为题诗倏见轻红万点吹已惜落英铺满地更怜几片冒蛛丝

後圃

春雨才晴气已和暖风吹动百花窠絶怜玉屑如吾髮緑者全稀白者多

赠熊道人

十载隐潭衡居然肺腑清枯禅参懒瓚老气激弥明笔底烟云妙人间势利轻款门俄告别江海一浮萍【借韵】题汪季路尚书所藏米元晖湖山瑞雪图

笔力谁能似虎儿思陵亲为御珍题小臣不识湖山好但欲扁舟泛剡谿

扬州琼花

回忆灵根六十年秋深恨不见芳鲜兹从淮上来千里非比人间聚八仙曾有画图称小异谅应后土爱孤妍或言天杖诚虚语荣悴中分亦偶然

题林宗鲁校书所藏宣和御画

周公多艺孔多能徽庙才高更倍增除却万几都不会至今遗老话昭陵

赠别章茂献尚书

我辈重来鬓已皤正元朝士苦无多才堪柱石犹归去奈此摧颓一老何

戏咏戎葵簇成芍药

回首闲来婪尾春横风吹尽已成尘戎葵簇就谁尝巧红药当前太逼真观洧赠人迷冶子翻阶得句误词臣园丁妙手有如许犹胜隋园剪彩人

戏题胆瓶蕉

垂胆新甃出汝窑满中几荚浸云苗瓶非贮水无由罄叶解流根自不凋露缀疑储陶令粟风摇欲响许由瓢相携同到绿天下别是闽山一种蕉

午暑

炎官火伞罩中区病老低垂气不苏难学孙儿频饮冷时将冰水洗霜须

省宿

树满茅山绿正肥昏鸦日日向南归如今身在三茅外却看归鸦正北飞

水蕉

猎猎水芭蕉如将隐士招清风来处远溽暑坐中消

送杨晦叔提举浙西竝寄陈表道

两两郎星映使星老人星彩对晶明褰帷共喜行畿甸洗印仍欣就帝城五马况当恩始拜三吴从此政尤清便看瑞庆求称寿同听崇呼万岁声

八月四日晚霹雳碎大柳木

秋分雷自合收声白露明朝忽震霆怪得坐中惊欲倒邻墙万柳碎中庭

灵光

鲁邦宫殿久芜荒惟有灵光最久长身似灵光终变幻岿然别有一灵光

谢陆伯业通判示淮西小藁

四海诗名老放翁遗编俱在迹成空忽从淮右传诗卷近比劔南真父风暂向壶头追马援何当甫里访龟蒙江山为助多佳句莫惜南来寄断鸿

蕉庵清坐

薄晚归来烟已苍蜜蕉一叶障斜阳不须久住潭潭府始觉山林兴味长

蕉庵暮归

綠蕉陰下遶斑衣饭了从容到夕晖老子才携筇杖去孙儿各捧竹团归

病告

闭户垂帘尽自如兀然终日拥红炉得归足可优游老此地何堪养病躯

殿上侍立寒甚

小雪以来霜气清今朝寒色倍严凝榻前侍立无遮障吹得半身真是冰

齿落戏作

零落残牙齿年来落欲空得鱼惟食冻舍肉只餐葱休忆红绫飫难吞栗棘蓬何须如劔树如解振宗风

重阳淳生日时年四十九矣

汝生四十九年春犹记双亲始得孙当暮知非过能寡敢言学易道弥尊喜吾父子为知己赖尔诗书遂满门但得团栾长似此年年茱菊醉清樽

范叙刚舍人示文正公象笏

千载威名文正公忽瞻遗笏照双瞳敢从象齿窥清裁屡批龙鳞奋大忠秉立定知端若柱至今犹想气如虹舍人接武登廊庙宜宝甘棠振祖风

送黄贞护道人任茅山赠以黑玉虎

少从黑虎谷中行晚得於菟王琢成辍以赠君俱隐处大茅峯顶看风生

赠凌一源道人

知君曾住武当山更解寻幽澗皖闲老矣无缘穷胜处但思归去卧乡关

谢滕宰彦可惠诗

与君相遇海东头明月如何忽暗投自媿重来千岁鹤永怀静对五湖鸥新编不觉成三复妙思诚堪比四愁还肯来游鄮山否与君携手上东楼

芟林雪中过峡图

不土之里无言诗泛雪清图事已非墨隐为君传旧迹宛然兴起剡谿西

贺监湖上

万顷平湖一苇杭此归喜似贺知章上恩赐与西湖曲遂老吾家归照堂

狂客归来终好夸越王城下占烟霞此中信美非吾土不是西湖是我家

攻媿集卷十一

卷十二

钦定四库全书

攻媿集卷十二

宋 楼钥 撰

今体诗

残月如新月

近晦月犹在萧骚夜向晨已残几欲尽忽见恍如新老桂沈清影余辉扣半轮纤纤两头玉皎皎一钩银明似哉生际光疑太逼真妆楼谁起早深拜误佳人

炙背俯晴轩

炙背情方适融霜日正暝何妨凭曲几相与俯晴轩爱景欣亭午闲身得负暄映檐成白醉挟纊谢奇温岂止宽寒色犹思奉至尊桃花满肌骨佳句忆王孙

置酒沛宫

汉祖功成後时因过沛宫还乡上心喜置酒故人同高会延遗老酣歌和衆童穷欢新笑乐起舞旧英雄慷慨悲游子轩昂赋大风永为汤沐邑何用筑新丰

天寒割蜜房

场圃功初毕天寒乐岁穰山居收蜜课檐外割蜂房弱羽依晴日纤腰怯晓霜铅刀开户牖棘七荐甘香作室何时再趋衙未用忙百花辛苦处今日为君尝

黄知橘柚来

一舸放长江遥林底处黄自知来橘柚先已照沧浪緑叶凝烟密金苞射日光相迎苍县雨暗识洞庭霜味诧江陵种庭垂禹庙荒何如船上看数里更飞香

背水阵

十里当勅敌临机事寢危萆山兵已遣背水阵尤奇前泽书诚有行权我独知正须投死地何用惜羣疑拔帜终如约传餐亦应期孙吴非纸上方略要从宜

鲲化为鹏

鲲大几千里扬鬣气二增一时俄化羽万古记为鹏鳞族畴能比龙门不足登天池将转徙云翼快飞腾怪矣齐谐志壮哉庄叟称鸢飞与鱼跃曾不事夸矜

一月三捷

勇甚鹰扬将身从虎穴探六师心不二一月捷凡三戎卒时非久边庭战已酣神戈穷逐北露布屡驰南貔旅弥思奋狼心敢肆贪七旬有苗格较德可无惭

清泉洁尘襟

骚客事幽寻清泉一派深居然浮爽气聊用洁尘襟彻底明苍翠澄波漾碧岑应添山泽趣尽涤市朝心洗耳何妨听吟诗更喜临至哉天下乐稳坐读书林

物色访严光

肥遯推严子招贤仰汉光营求思旧物物色访羣方聘问期终得形容尚未忘羊裘方审识蒲乘遂搜扬不羡云台绘还归钓濑傍高风今尚在江水与俱长

冀北马羣空

冀北虽多马未知伯乐工祗因良种去便觉举羣空遍视千蹄衆先收八骏雄漫闻余布野无复见追风骐驎方奔逸驾骀岂混同倘非承一顾鸣意孰能通

习马长杨

强汉承平後兢兢武不忘整师临五柞习马向长杨冀野来骐驎天闲出驪驪骧腾射熊馆驰骤华山阳辇路千蹄稳瑶池八骏良上方勤阅武愿赋翰林章

飞泉漱鸣玉

翠巘幽深处飞泉触石鸣跳珠无定态漱玉有余情雨落千浔溜风传万壑声玲珑铿璧韵激溅破琼英汉水思遗佩沧浪想濯缨何须韩吏部聯句赋琮琤

表兄陈安行迁右司仲兄迁大理丞余迁太府丞舅氏适斋寄诗为贺次韵

东塾谈经岁年轻外家生长复何营王生此舅若无有杨惲一书安得成首寄新诗钦厚意却思往事念平生当时更荷外祖母幼惠尤怜盛氏甥

为亲敢说宦情轻公退委蛇懒自营朝路一时偕寸进适斋新句已先成圉师况复今同里武子非惟爱外生旧日阿童今欲冠此恩更欲到弥甥

适斋挂冠次韵

致仕吾非不待年礼经自合许求田祗图径取衣冠挂不愿更寻香火缘富贵鼎来先避地是非丛处独翩然鄮峯相对两真隐共仰元台为大天

世事相牵无了期平生待足是何时抛官不作九闾梦纳緑尚余三径资紫绶金章宁复恋黄冠野服自相宜耳根赢得长清净理乱从今不用知

余初除西掖适斋惠诗以二甥相继演纶为喜安行表兄贻书喜溢于辞谨次韵为谢竝属安行

漕台生处寝之牀丛桂还分一叶芳红药阶边怀老谢桃花观里忆刘郎首烦贤舅书增喜想见慈亲色更康无忌安能真酷似愿从外氏借余光

敢谓封伦据此牀幸从科级绍余芳紫薇继直中书贵丛桂犹为同舍郎大史书传得杨惲渭阳情厚为秦康外家宅相君余事鱼目何堪比夜光

余句郡得婺适斋以诗相迎次韵

风际端宜鷁退飞青云高处有危机屡遮西日成何事几向东风咏式微塞马云何真是福鲈鱼正不为知几休论池上翩然举且奉潘舆得赋归

适斋约访王卿正己已而中辍次韵

归来亲戚话通情准拟流光得再行已荷适斋容接武敢从酌古遽渝盟乌衣门巷人非远緑野樽罍计未成官已得闲身未暇因仍恐或过清明

谢太守送雪次适斋韵

一冬祗见晓霜寒未得飞霰万里看多谢黄堂赠圭璧欲从乳窦倚栏杆帘高安有冰成柱坐久空余水在盘岁晚愿呈三白瑞要观积玉满林端

清高阁观雪次适斋韵

冲雪上层阁真成清且高主人风节峻坐客笑谈豪泛棹访安道赋梅思水曹好因牕映夜痛饮读离骚

真率会次适斋韵

喜奉潘舆得退身乌衣相会总情亲樽前正好醉千日林下何妨见两人闲暇止应开口笑诙谐尤称掇皮真夜归更作惊人语舅氏从来笔有神

杨圣可集余方归自桃源不及预次适斋韵

屏处尤便野性慵故人何幸得相逢赋归敢慕陶彭泽自免犹希邴曼容棊酒交欢情正洽江山得助景方浓嗟余误入桃源去归路满城闻晚钟

汪达可招游臧园次适斋韵

城下名园称老怀乳莺飞燕共低徊寒梅送腊曾先到嫩绿留春喜再来眼底芳时能几许楼头衙鼓漫相催主人好事不嫌客素壁挥毫又一回

满架酴醾惬雅怀更添林下紫徘徊平湖不怕重门阻胜赏何妨後日来酒兴已随斜照远诗情无待片云催黄昏鼓棹欲归去望望烟林首重回

士穎弟作真率会次适斋韵

何羨祖希情好隆朱陈累世意交通舅甥巾屨频相接兄弟樽罍喜更同参坐幸容攻媿子主盟全赖适斋翁日来愈得清闲趣斗酒不妨时一中

吊王卿之丧次适斋韵

去岁同登百尺楼相期春晚更重游舟藏大壑夜俄去桥跨清溪花自流五纪情亲真是梦四山风物总成愁一朝千古尚何及空使文皇叹薛收

喜雨次适斋韵并呈郡守吴居甫

一旱祷而雨此心天与通为霖三日足起舞万家同破块朝方爽翻盆夜正中随车真响应巫覡又何功洗印日无几载芟春已移龙神来鄮岭香炷爇流陂自是受?许堪为学稼迟洋洋添野水已足乐吾饥雨师争日效风伯尚何施膏泽由分阡空餐愧奉祠农功今可济水利更无隳喜雨无烦记行人口似碑安行表兄除华文阁直学士奉祠次适斋韵为贺

屡报银台给事中忽闻唤渡浙江东长安幸免手遮日圆峤莫嗟船引风廩继真祠身暂逸班聯内阁眷方隆且归同伴适斋老便看锋车召此翁

送安行表兄葬次适斋韵

深沈仙洞锁神清万壑松声不似晴宿草他年空怅望生刍今日寓精诚山川气象浑如旧剑佩风吹俨若生犹记玉音称酷似始其无忌乃其甥

寻春次适斋韵

一自东皇天上来坐看芽蘖起枯荑化工潜有洪钧转春事何劳叠鼓催晚景鬓凋宁再绿去年花谢又重开赏花携酒那容缓走遍郊原莫便回

晓来陌上雨斑斑同社相将便出关席地亦堪寻酒所得园径与坐花间从教多病须行乐任是清贫也破慳门外红尘深几许谁人能得此身闲

次适斋韵十绝

休官

人生宁问草堂资乞得闲身且径归惭愧舅甥俱就隐淡然相对两忘机

发书

故人惟赖几行书今日谁能更访吾旧日热心今就冷向来已得自揶揄

见客

客至何妨送与迎门前罗雀亦人情可怜寒士犹相望时有饥来柳絮轻

出谒

杜门却扫寢多时闲傍人门亦漫为茶竈笔牀烟浪去自疑身是老天随

赴会

此身未老已先闲到处时时尽醉还更欲相邀莲社客共寻精舍上孱颜

病起

老去情怀百不宜上楼腰脚觉舒迟适斋异禀人难及病起精神略不衰

安心

但使心如水在盘坐令四体自然胖有人来问安心法将汝心来为汝安

读书

佚老无如大字书聊将遮眼度三余有时忠义忽相激间遇包胥与子胥

染须

染须欲学少年时笑杀当年荣啓期公道世间惟此耳年来犹幸不相欺

修养

闻道壶中别有天能将俄顷比千年千年俄顷俱成梦只任天真却晏然

同年郑贵温寺丞直华文阁致仕次适斋韵为贺

先生久矣爱吾庐絶胜扬雄宅一区賸有珠宫来海石不妨茅屋绕畦蔬来书已许寻前诺结社方将约并驱更欲相邀预真率车公岂可座间无

倦游归骑自吴门欲上封章叩帝阍俞旨肆颁旌素节华文进直示优恩渊明妙句羣贤和疏传佳名万古存加我数年祈谢事此心难与俗人论

次适斋韵四絶

初得曾孙女

外子惟知媿可攻美公八十未衰癯曾孙喜见新文褓尚想当年掷镜翁

茉莉花

江南创见喜孤芳见说闽花徧海乡安得一居香盛处帐中巧作宝球妆

从子澡滌筑居荷池上

楼台墙宇家家月杨柳荷花处处风最喜两涯相映带一时倒影入池塘

山亭纳凉

不嫌西照为朝曦城郭谁知住翠微天幸外门才咫尺欲陪杖履夜忘归

次适斋韵五首

山行野老问年

田夫笑把褐衣牵莫问壶中别有天齿髮虽残浑未觉精神愈胜果何缘公言已老偶能尔我本无心只自然再铸百分才及一定因椿寿八千年

坚郑贵温碁社

二公休致我来归尽可同裁隐士衣此已屡谋登竹所君其无吝造城扉人间厌见手翻覆乐处须当颐指挥凉气一新宜近酒盃簪莫似向来稀

秋凉有感

公看鱼跃与鸢飞鹤胫虽长断则悲世事不容人苦较秋风自有叶先知青奴难免交新絶素扇宁须手自持宋玉赋片终未达不如老子笑成诗

谕悲秋者

黄云万顷一时收喜见高空风露秋岁事及今将告毕人生到老盍归休固知景物能兴感亦有痴人苦过忧胸次果然无一累岂容秋月使人愁

舅甥赓酬之乐

神明未觉晋公衰老母尤忻兄弟怡范甯王忱无许寿牢之无忌不闻诗秋风对酒劝酬处夜月乘桥来往时但要两家同此适不须更遣外人知

八月十四夜携家泛月次适斋韵

月到平湖金作波一城惟此占秋多水晶宫里清无比何用重登汉馭娑

九秋风月正分平盛满水晶分外明老子此行端不恶夜深几得圣之清

稍先一日是中秋行遍芙蓉与菊洲作意安排却非适不如乘兴径行舟

犹记年时看水嬉不如此夜月相宜仙翁一醉非尘世为问姮娥知未知

草草真成一段奇比邻非不借余辉板輿何敢侵风露略望檐间且劝归

次适斋韵十首

懒学仙家炼火还但欣晚节在林间
驾行免奏三千牍驾难参十二闲
短艇有时浮绿水轻輿到处赏佳山
莫言冷淡为生活冷淡终然无後艰

秋来病体费支吾深闭柴门卧草庐
药里多寻医者问酒樽寢与故人疏
特须勉强陪来客未免辛勤答远书
此外儒生真气习简编犹欲趁三余

大率舟行岸自移机緘何必更相思
雨余坐见水三尺云净喜看天四垂
荷沼已残霜後盖桂林初绽日边枝
闲中气味深长甚问却西风总不知

幸堪击壤乐清时衰病情怀百不宜
祇好灌畦陪汉叟更欣学圃慕樊迟
逢人草草须倾酒得韵忽忽且和诗
琴意高低犹自适高山流水久心知

甥舅相寻向酒边相忘情话更怡然
人言难遇双延阁自媿叨联两大天
只觉光陰诗里过何妨枕簟醉时眠
此中别有真消息莫为人间醒者传

从来忧道不忧贫晚向闲中得此身
直把宦途如梦过任他世事似碁新
坐间可说旧时话眼底幸多同社人
赓唱本求闲燕乐莫夸末路费精神

自怜鹤髮奉慈亲舅氏还欣托比邻
已向云间收倦翼甘从波底作潜鳞
果然松菊连三径谁谓神仙隔一尘
野服相从成二叟不须更现宰官身

笑他咄咄向空书既老投闲计未疎
釜里有鱼长自足门前无雀是吾居
休论仙子生尘袜莫问高轩织翠裾
百念已如灰様冷更无骄色与人锄

秋宵坐到玉绳低历历明蟾数桂枝
重露半翻蕉叶径好风时飈荳花篱
不妨起舞弄清影何用撞钟夸小诗
浊酒困人垂欲睡更揩病眼一扬眉

秋到先生旧草堂凉飈林叶已飘黄
渐看天宇清霜肃更觉人家白昼长
历世已经三折臂坐愁何必九回肠
世间旧事消磨尽祇有诗情未遽忘

客省中次适斋韵

三年此日绮筵开盛意勤拳不待催
豫约行人须已集先欣数客肯俱来
诗筒才到先赓韵酒兴方浓莫算杯
更欲秋深穷胜迹邹枚後乘可容陪

花若开时定自开芳心深靚不容催
上人又有新诗出佳客应寻旧雨来
楼上已闻香扑鼻堂前尽放酒盈杯
高烧银烛照花睡便到更深亦愿陪

定数无过偶与奇达人循顺更安时不于椿菌量长短岂为彭殇较疾迟虽是一时身有疾行开九秩寿无期外生六十头先白杖履相从最得宜

戏和适斋絶句三首

脱索

纏缚千遭趁酒巡环观巧手竞称神莫言名利如纆锁猛烈抽身亦在人

藏摩

尽教逞技尽多般毕竟甘心受面谩解把人间等嬉戏不妨笑与大家看

傀儡

假合陰阳有此身使形全在气和神王家幼戏犹坚固线索休时尚木人

昼寝正酣适斋以二十韵诗来亟为次韵

老氏正求知我希吾今老矣更何之极知仕宦皆由命纵有功名已过时览镜形容宁复我还乡交友定从谁慈亲多幸方难老舅氏犹欣未觉衰教诲至今仍似旧襟期暗合自相知新诗必使篇篇和胜地还容处处随昼永剧谈俱喜听夜深清坐更忘疲素钦行已初无玷愿学持心不自欺紫橐清班叨预列黄金横带忝同垂六旬顾我犹加懒八秩如公尚自持但仰三尊知共庆孰云十拙敢轻嗤无情到此方为达省病从他不用治世事只将同蝶梦人生几得见鸡皮观书自识非求解策杖徐行莫厌迟俭素何妨贫胜富优游真是乐忘饥虽然调乐无千指尽喜当歌有十眉报谒要须亲自到赴筵直以散为期醉翁雅意非谋醉棊社清欢岂为棊白髮只宜甘散诞红尘任彼自奔驰安輿来往常陪伴此意终身誓不移

次适斋赠少微兄韵

汪楼比屋古城隅彼此清贫不愿余南阮诸贤今有几东牀佳壻竟谁如归乡年亦非全老对酒情犹未觉疏来往两家无倦色此身端合老犁锄

桂花方开约客次适斋韵

久疑岩桂尽迟开留待来朝伴举杯老去欲寻千日醉客来同引百花醅况临高阁枝枝秀好判闲身日日陪家酿尽倾君不惜莫教瓶罄耻为罍

蒋德尚棊会展日次适斋韵

棊社经年能几回身闲深幸屡参陪
一句又见朋簪集三径还应听履开
休苦索居徒面壁何如相遇且衔杯
虽有药裹宽初约不碍重寻旧雨来

太上皇帝圣体清康老母进封信安郡太夫人适斋除敷文阁学士有诗为贺次韵

清朝孝治古无伦通籍推恩总及亲
八秩升班惟二老九龄拜命更何人
春初庆席欢犹在岁晚宸纶喜共新
须信长年多富贵祇因同见会昌春

吾母年高絶等伦痴儿何幸得荣亲
九重锡类真千载八座承恩只一人
共仰外门流庆远喜同介弟宠光新
两家盛事人争贺和气薰为腊里春

题晓上人闲静轩次适斋韵

我居城郭子居山两地相望数里间
我已得闲犹未静子虽处静不曾闲
莫将花与梦相似只用心如石样顽
要识个中真信息孤云僧寺两相关

次适斋韵十首

棊会

归来乡曲大家闲同社仍欣取友端
无事衔杯何不可有时会面亦良难
少曾环坐坐常满赖有主盟盟未寒
琴奕相寻诗间作笑谈终日有余欢

老态

舅甥身退不为迟肥遯犹当未老时
东晋虽惭古元亮晚唐知慕老天随
公开九秩身方健我甫六旬心已疲
不敢自言成酷似腹心惟喜两相知

晨朝懒起

坐见一翁两鬓皤只赢晓梦到无何
牕凉风透真成适日出事生还更多
足弱已难堪蜡屐齿摇初不为邻梭
回思螭陛班心处日日奔趋向駉娑

见客

车辙常多长者临相过肯笑席门深
寒暄固有三分话臭味还倾一寸心
客至自应闲不厌年来寢觉老难禁
应酬既了无余事面壁何妨学少林

昼寝

才尽甘为世所捐不如高卧了余年时逢毁誉心无诤间有诗文手自编老去已知身是梦闲来更得酒中天帘深午寂浑无念只与白鸥相对眠

喜闲

投闲时以醉为乡人既相忘我亦忘雨足已期南亩熟风清更爱北牕凉昼观碧落云千叠夜看中庭月一方时抚素琴聊自遣谁能更作风求凰

杜陵郑老共襟期门外红尘勿预知近日颇荒攻媿课多时不见适斋诗竹深荷静相留处月白风清偶会时地僻衣裳俱自懒黄冠野服淡相宜

读香山诗

诗到香山不计篇相逢佳处辄欣然明知无子可传业每遇为文自入编举世慕名多讽诵惟公着句得纯全胸中相似诗方似一等不为名利牵

即事

旋插杉枝蔽晓曦缓摇轻箑自融怡调琴不用求成曲得句何须凑作诗无复趋炎同襍襍但能寻睡学希夷太仓日籩五升米老矣不嫌人更嗤

西山

两岸杉松翠?长轻輿连日得徜徉絶怜林下朝还暮不问人间炎与凉睡起闲情方自乐斋余归路未须忙何时更向月溪去愿着青鞋走侍旁

燕居

大老今居东海滨燕居晚岁更申中外生但喜长依教一笑相从莫问贫闲里只将诗作活酒边犹有笔如神乞言授几俱休论且做羲皇以上人

子成兄年八十六史子久八十二舅氏八十八会于适斋次适斋韵二絶

堂中三寿喜同时黄髮相逢齿更儿参坐共谈宣政旧风流不许後生知

闾里旧游能几人适斋犹有笔如神莫言二老升沈异各现宰官居士身

攻媿集卷十二

卷十三

钦定四库全书

攻媿集卷十三

宋 楼钥 撰

今体诗

陈文懿公【居仁】挽词

衆口推文伯何人识吏师义襟惟古有心地只天知至死终无玷平生本不欺在公无可憾犹恨哲人萎珍馆径归鄞人犹望秉钧邮传千里讣哀动五州民躃踊森贤嗣攀号感路人公乎不忘矣袞袞看簪绅宅相惟公久伊余忝後尘十年追桂籍两禁踵词臣接武参吾舅承颜奉老亲幸成三学士何意失斯人一别屡经岁归舟已及门方期情话悦空讶语音存善行传千载芜词愧九原伤心歌楚些无地可招魂

邱文定公【密】挽词

谋国规模阔絶人才具高三朝千载遇四海一身劳儒将通鸳序枢庭握豹韬皇家资柱石天遽夺伊臯初拟文翁化谁知怀远图庙谟专制阍世将易兵符养虎竟遗患断蛇由不殊宁同死诸葛空恨失吞吴处事拘挛外锄奸谈笑中几年亡主将全蜀赖明公畏爱盾衰日清和夷惠风屡书终不尽诗意亦何穷

王文忠公【十朋】挽词

夙负敢言气输忠不爱身刘蕡仍遇主绮季更忧民治行真循吏风棱古诤臣搢绅千载恨不得究经纶梁木今其坏谁能问大钧恩深两宫赙哀恻四州民已矣天人策伤哉社稷臣吾生良可耻不及见斯人

娄忠简公【机】挽词

壮岁志先定耆年气不衰治高为县日名重佐州时雅望登朝着忠言彻帝墀亨途日千里阔步不容迟边事衅初开惟公论不回深谋比娄敬极力阻王恢儿戏何堪用冰山忽已摧朝廷始更化大老盍归来共政三年久蜚英四海尊色词无假借风裁弭器喧但欲持公道宁容啓幸门经纶终未究犹有典型存寮案侍储闈如公久任稀载欣商皓起终惜汉疏归问字烦参订谈经赖发挥一书真总要星日重光辉得姓共东楼同朝两故侯文编叨二序诞日颂千秋老矣俱宜去公乎不少留来书墨犹湿展读泪空流

程文简公【大昌】挽词

仕宦接王杨诸公叹老苍门生多紫禁子舍屡黄堂自得垂车乐谁传郤老方桃花千树满空
忆旧刘郎徐邈今非介申枨焉得刚立朝无附丽受谪更芬香戏彩衣冠盛围碁日月长典刑
今已矣无复岵灵光持论真遗直操心本至公羸瘠宁市宠平寇不言功光禄文阶峻嘉兴色
养丰谁能死生际犹得教之忠晚出荷公知登门未觉迟通班依汉橐试郡守萧规藻翰犹频
寄宫墙不再窥新阡何处是西望不胜悲

林正惠公【大中】挽词

爱直赵清献忠文范景仁累朝推旧德今日见斯人正色欲酈上敢言宁顾身紫枢方大用惜
不究经纶去国名逾重还朝道益尊清虚怀骨鲠严冷带春温公绰真无欲臧孙尚立言骑箕
虽永隔精爽俨如存凛凛古循吏堂堂真巨公死生忘度外邪正炯胸中忧世心诚切筹边事
已空龟潭山水流泪与无穷

观文殿学士陈公【騄】挽词

台岳鍾神秀居然社稷臣海涵书万卷魁冠数千人南服频怀绶西垣屡演纶惜哉真汉相不
遂秉洪钧几见衣冠伟终闻羽翼成先皇崇旧学大政任名卿神器亲传授崇朝再太平功成
身自退宠利一毫轻朝着登门久词林辱眷深代言称据古议礼许同心去国临归路还家寄
好音病中闻讣告老泪动盈襟

观文殿学士赵公【彥逾】挽词

千古盛周宗皇朝实比隆谓多担贵爵谁见立王功一语国先定寸心天与通龙飞稽事实信
史诏无穷授受唐虞际从容平勃间宗英谁柄用人望属棹闲晚侍经闱读寢登秘殿班帝乡
留不住归去老湖山麾节称循吏三朝藹政声治如黄霸最心慕伯夷清诸道俱遗爱两川尤
着名起家临制阃更美锦衣荣听履领簪纓忠言彻帝城公方扶日月我亦寄雷霆忧世形辞
色卧家存典刑灵光更陈迹楚些不堪听

端明殿学士汪公【应辰】挽词

制阃诗书帅公朝侍从臣身能全进退人可得疎亲曳履声犹在持衡迹遂陈从今几百载更
复见斯人蚤岁声名大婆娑始遇时难兄屏隔坐令子桂芳枝人望还为用天胡不憖遗成蹊
堪喻大堕泪不须碑道学不尽试功名祗绪余立朝惟正色荐士有遗书百赎嗟无及九京谁
与居莫酬推轂意哀泪湿巾裾端明殿学士张公【杓】挽词【○杓旧訛杓今据宋史本传
改正】

籍甚张京兆精神满腹中才高解牛刃手敏运斤风河浒恩波远麀间狡穴空章台旧时柳无

复映金□英略古无对外庸今最良衆方期共政人已难云亡不听尚书履犹怀太守章匡庐
星忽堕丹旄裊清湘昔幸参朝列于公更有连规櫺恢世界风义薄云天送别诗犹在贻书墨
尚鲜伟人无复见惟务宝青毡

仲舅敷文阁学士汪公挽词

籍甚牢之舅难追宅相风惟公能爱我独我最知公潭府书无继西州事已空形容尽心力庶
或慰幽宫外氏桂成丛诸甥长养中名称无酷似宦达偶相同澹室既长往适斋俄考终絶怜
三学士只賸一衰翁

枢密谢公【廊然】挽词

臣主一意合风云平地生立朝专论谏为国总枢衡行矣登三事悲哉奠两楹辍瓜恩意重终
始备哀荣千古台山秀名流列雁行惟公登政路一旦破天荒故里空华屋佳城映夕阳送车
无路到东望泪浪浪

尚书尤公【袤】挽词

敏甚五行下毫厘耻不知千人挥笔阵万卷纳须弥有夏传追蠡先秦拾断碑邺侯书插架分
付称家儿忧国言多切回天力有余衆推真学士上念老尚书直道终难进高怀只遂初梁溪
钓游处此意竟何如旧学方登用公来领从臣末光依日月听履上星辰共政将图旧腾章屡
乞身甘盘终罔显雨露未沾新北面愿师承东台拜老成忘年容末坐叙契若平生风月吟千
首雷霆寄一名送车无路到寒涕为君倾

尚书汤公【硕】挽词

先正真良弼彤墀四拜麻决科承奕世摘藻擅传家禁路优持橐侯藩几建牙相门宜出相恨
不见堤沙秦邸崇先契周旋古括州殿庭观唱第海郡继承流方快飞腾上俄闻汗漫游凤凰
山下路丹旆想悠悠

尚书张公【抑】挽词

文靖饶风度高皇记曲江贤孙真是似才气号无双几见持英荡终看拥碧幢诚斋主诗社到
此亦心降抚字推循吏论思领从班宏才名北阙高兴属东山同岁叨崇笃比邻足往还旧游
成昨梦哀涕不胜漣

商侍郎【飞卿】挽词

矫矫真御史风生白笔端出持肤使节始着侍臣冠给饗鬓先雪筹边心为寒天乎惊玉折不

及上金銮所至仁声着甘棠几去思敬姜嗟哭子伯道痛无儿郎省伤连璧文闱见刻辞边民
纷堕泪忍读岷山碑

顏侍郎【度】挽词

宴坐勿庵上睇顏亦是顏平心真似水立说信如山屡拥皇华节重登清禁班始终无玷阙风
裁许谁攀祿养嗟何及朝朝饭一僧移忠躬蹇蹇锡类日烝烝报政优吴郡知贤仰阜陵清忠
与公恕余庆啓昆仍贅倅丹邱日眼看康济泉同朝叨獎与侍坐得周旋妙画多传宝遗文合
细编典刑今已矣西望涕漣然

曾侍郎【炎】挽词

文献南丰裔源流曲阜公岩岩双法从凜凜旧家风金玉方交映人琴忽并空平生心地直流
庆尚无穷紫陌寻春日惟公最少年鱣堂慚隗始熊轼媿卢前寄我书犹湿思君迹遽仙同登
今有几挥泪抚遗编

少保李公【孝友】挽词

戚閑疏恩厚勲門积庆余弓弯飞将臂架插邳侯书六纛秦官重三槐汉相如惜哉终半日闻
者为欷歔

钱殿撰【佃】挽词

隲誉蜚庠校孤忠动冕旒救荒心欲断忧国鬓先秋惠满长江水风清八咏楼禁途交一臂人
物等闲休粉社归来晚翛然得故吾哦诗频刻烛点易细研朱有泪悲连璧无阶奠束刍名門
余庆远丹穴看奇雛

赵待制【粹中】挽词

明主昼三接清班岁九迁一居周柱史径入汉甘泉批敕严东省抡材上小天平生经国志惜
不冠貂蝉诗近刘宾客手追欧率更双旌古良吏万卷老书生世諦浮云薄生缘晓梦惊吁嗟
东向议何日遂施行半世谁知已登門意气倾交情忘父行文会忝余盟持论先忠厚谈经叹
老成幽光谁为发落笔泪纵横

吴待制【博古】挽词

御史再乘驄忠言沃帝聰处心平似水疾恶迅如风遇合叹何晚论思信有功惜哉辛佐治竟
不到三公三仕入储闈堂堂来日飞初同四皓起终作二疏归冰玉清班近衣冠盛事稀闻君
忽仙去西望是耶非东甬预宾兴文闱赖主盟菲葑无下体衣鉢有門生劍佩今何处樽罍空

复情自慙无报所老泪为君倾

杨待制【王休】挽词

望重威无怒仁深勇有余百年忧国志满篋荐贤书德政不胜载才猷未尽摅佳儿人物似真可大门间蜀道名天险驰驱敢惮劳劒头悬六印梦里益三刀汉殿联簪橐燕山拥节旄惜哉覩国意不得试龙韬蜀用东南彦皇家属意深贰卿频报政上相最知心泛宅俱杭苇同朝拟断金庙廊期引类疾病两侵寻事契因同荐交情晚益亲半生文会少万里宦游频别後书犹湿归来迹遽陈何能发潜德空有泪沾巾

许待制【尹】挽词

蚤擅文章价名公屡品题碑铭摹谏省邱壑访愚溪得句追飞兔摛毫走怒猊遗编闻好在後学仰筌蹄十载更麾节阳春万里同时逢蜀士一一话文翁到处留遗爱诸郎守教忠庆源知未艾往日有陰功

陈秘撰【举善】挽词

陈氏多名德兹来慕典刑宫端惊宿草【谓邦彦也○邦彦名良翰官太子詹事諡献肃宋史有传】秘撰又泉局自古有遗直祇今谁独醒苍苍何可问耆旧日凋零

跬步不忘孝掇皮皆是真移忠思致主务实见临民三谏言犹炳平生迹遽陈清风凛衰俗自足荡秋旻

王给事【信】挽词

主眷逢千载龙光倾一时铨曹着官簿禁掖粲英词论议推东省威声懽北夷平生经世意怀卷竟何之宦学素称豪仍闻吏事高精神虽腹满抚字亦心劳藩辅连三组沈疴见二毛胡牀庾楼在残月堕江臯

余给事【崇龟】挽词

乌府仍螭陛银台更掖垣事几无弗论外似不能言厚德镇浮薄平心剗剧烦用才殊未尽无地可招魂桂籍兄联弟兰阶子克家上恩嘉踵武京秩为增华朝着蒙倾盖纶闾覩判花遽成千古别南望想悲笳

史敷文【弥正】挽词

八行诸孙盛三公嗣子贤连收四鄂荐祗欠一书毡郎省刑章肃侯邦政誉传平生忧国意齎

志入重泉学问源流远乐哉贤父兄人琴亡旧曲风木怆寒声深痛几成毁沈疴汔丧心孝恭无可憾犹得傍佳城少小相从久自慙?甲辰交情日加厚姻好晚逾亲别去惊葭律归来见棘人西庄行乐地望断为沾巾

袁府君【文】挽词

家学传三世几间无二书力行真勇猛进取故舒徐前辈多遗墨先人祇故庐後來窥瓮牖【○袁文字质甫有杂着一编名曰瓮牖闲评】志士为歔歔

坦坦幽人履恂恂长者言忧时见顔色乐道竟邱园隐行推同气高贤萃一門四明耆旧传他日数诸袁

周路分【良臣】挽词

蚤负功名志从戎岂素心治军先肃靖游艺亦精深湖海开豪气云天廓义襟高門尚余庆兰玉正森森台岭论交契天街惜别离飞书能几到埋璧遽成悲旧识归樵句【在丹邱时探梅浮江李使君有樵字韵诗公和篇最工云卻从谷口问归樵】愁看结局诗紫髯无复梦空有泪交颐

赵左司【玘】挽词

行谊高余子文章自一家岳神均客礼敌国叹才华直节曾无苦全瑜更不瑕儒流有遗恨不见草黄麻淮甸争钱币夔城办戍兵诏归南郡近公去北門轻避宠若将浼求闲竟不成亦期无适莫一笑老於行许国终无挠居家不愿余深蒙明主眷未觉故人疎高论三千牋陰功四一書佳儿承积庆端可大門閭乡贡早驰誉郎潜方比肩求仙容我学成佛叹君先天癸年将暮金丹语未圆忽传长别偈天阔散云烟

王提刑【正功】挽词

廉白真家法原由金紫贤兄辞岭南賻弟郤丰阳钱筑屋吾将老藏书手自编老成俄已矣闻者为潜然籍甚青箱学醇乎赤子心片言皆可复一伪不容侵处事几游刃论交欲断金诸郎传素业桂子看成林二广外台首威棱着一門志期诸郡肃忍见匹夫冤奋击犹鷹鷂兴讒有兔爰投闲了无限此意与谁论伯仲三珠树优为一世才人琴先起恨金玉遂俱推南阮方深痛阿连尤可哀桃花源上路老眼更堪开

王大卿【正已】挽词

少壮节先着年侵气不衰忠虽由父教清亦畏人知处世无求合安时竟数奇甘泉人物会一老汉空遗麾节东南半澄清冠一时权輿周翰传顶踵阜陵知自谓二宜去人称三不欺卷怀

终未尽流庆称家儿图史但环堵江湖几问津虽多暮年乐谁忍半年贫海内清名满毫端秀句新风流嗟顿尽晋韵更何人老去王摩诘归来道更全賸添天美禄真得地行仙日欲增三径君胡欠百年桃源不无路重上惨风烟

刘吏部【俟】挽词

总角异羣儿庭趋蚤学诗一鸣登桂籍百里静潢池所至清民瘼平生号吏师郎闈方进用何乃弃明时剗剧最云问题輿上越山洞庭王泽远庾岭使星还中道趋台治名曹切近班陰功多及物阳报看循环谁扰奚山衆焚林兽已穷徙新能远虑下瀨得深功南峽肩随息中朝论愈公但知分谤喜宁肯自论功兄长与慈恩相亲色笑温公方持使节余忝代王言共约游三径俄悲作九原佳城隔风浪丹旄怆飞翻

朱南剑挽词

再世文章伯三朝侍从臣传家推笃学游宦肯谋身别驾歌章水甘棠想剑津虚堂两遗像谁不倍伤神朔望第一客巡察意更亲有诗欣和韵不饮喜娱宾名帖藏中古珍茶试早春据鞍犹矍铄何遽迹成陈碁战久不对诗盟亦寢寒方期会真率乃尔变悲欢岁晚本无憾情深忍那看佳城何处是东望泪丸澜

石南康【 】挽词

挺挺石可转恂恂意不胜平生忧国志长夜读书灯大易窥三古中庸进百能惜哉天不憖无复见川增家有春秋学渊源更得师风高盖公含泪落蔡邕碑官早终难进才全竟弗施遗编属贤子孝谨不应衰伊昔为君御儒流赖主盟执经容後进倾盖若平生坐见埋黄壤空劳望赤城友朋相与泣反袂不胜情

郑华文【若容】挽词

蚤擅春秋学贤关第一流少公清泽国赞府着神州试邑人交荐还朝誉更优如何急流退不使上瀛洲籍甚柯山政儿意识贵温【○本集有贺郑贵温寺丞直华文阁致仕诗贵温当是若容之字】欢谣闻魏阙殊宠镇吴门就养家传子休官泽及孙吾乡耆旧传千载德弥尊

兄弟忝同登论交最有情颓波知劲节彻?叹真清正尔寻姻好胡然丧老成抱疴难执紼挥泪望佳城

袁通判【章】挽词

大道知如路一心长似斋耄期称不倦胷次乐无涯孝谨古难及友恭人自怀无瑕夜光璧黄壤痛深埋盛德不容赞多言可奈何大圭原不琢古井竟无波前辈苦凋谢後生谁琢磨同庚

适斋老托体共山阿仅有一区宅曾无二顷田相过惟载酒至老不言钱几得拜状下何堪哭
道边门人多着籍下马向新阡

张工部【季樗】挽词

忠简传清白家声属弟舅惟公殿诸老积善见多逊两桂昌书种双椿蔼庆门壽终无可憾况
有典刑存壮岁登郎省旌麾历五州仁声号循吏治行最诸侯忧国言多切筹边虑更周积薪
无恨望终老得夷犹敕局同寅旧雌堂屡肯过故人今有几朝士更无多问信书犹湿相望鬓
已皤忽闻埋璧痛薤露不成歌

高端叔【元之】挽词

百氏极旁搜潜心老不休邻光时自照簞食谁堪忧弟子多蓝绶先生竟白头凄凉数间屋知
我独春秋铁石赋梅花闲情白玉瑕两公终磊落千载敢喧譁清节成瑰伟浮词尚孽芽君看
死生际不见一毫差满卷变离骚欧公一素袍岂惟将厚意要使勾残膏宿草成千古生刍为
一号虽无韩子诔贞曜本来高

赵提刑【子蒙】挽词

毓秀从天派吁衡动至尊使星方炳耀卿月遽侵昏已矣悲吴馆谁欵护北门庆源流未艾文
献馥诸孙处事才游刃论文辩粲花英姿凛熊豹健笔走龙蛇持橐身终外垂车梦到家平原
花木在愁絶旧生涯客授早登龙襟期一笑同门清心似水论正气如虹近问书犹湿重来迹
遂空无因送丹旌老泪洒西风

李抚州【庚】挽词

与物初无忤台评反谓倾麾符成漫仕林壑寄平生跪履嗟何晚挥犀空复情天台隔风浪无
地拜佳城李下真无径门前可设罗诗如翰林逸书似邳侯多奇字今谁问遗编尚不磨从来
好哀挽薤露忍兴歌蚤岁文声振长沙见贾生积薪看晚辈推轂致名卿子舍真连璧生涯付
短擎风流今李汉极口赞冰清

张钦州【舟之】挽词

少诵东臆句从君见典型义襟希窈十才刃比庖丁古镜悲鸾偶寒原怆脊鹄恂恂守家法兰
玉满阶庭姻好自诸冯东状取阿戎平时深念我晚岁忍铭公书字今犹湿心期谁与同回头
三十载洒涕向西风

钱江陰【佖】挽词

庾岭梅花暖贤侯惠爱深精神虽满腹抚字亦劳心九转竟难遇二毛何处侵伤哉东逝水无复大江陰【前知南安军移知江陰】

客授向东甌君为郡督邮岂惟寮契笃更喜吏才优每叹频年别俄惊一梦休虞山渺何许泪落不能收

李删定【叔益】挽词

积善务增厚求名惟恐多白圭宁有玷古井竟无波议法资修定监州极抚摩佳儿传素业留眼看巍科冰玉心相照谁云内举私深居无浪出清节畏人知尚忆紫芝宇无慙有道碑填空雨黄叶西望不胜悲

樊运使【光远】挽词

科目公余事南宫第一人七闽新使节三署旧儒臣倦拜方辞馈哀良莫赎身家声知有继仙桂两枝春模浦云亡後斯文付此贤命其随道丧学又絶心传河洛湮来派西州忆旧缘伤心耆老尽挥泪对霜天

丁寺丞【允元】挽词

家世传经术胶庠蔼隼声上方思旧学公乃擅专城滁上功尤着潮阳政愈明哀哉鶚流水犹解不平鸣严冷不可向其中实旷然行藏睽素志燕乐了余年鹤化人何处鸾孤影自怜才高不尽用流庆尚绵绵

曹工部【耜】挽词

箕颍文章士仪同社稷功惟公承庆裔有意振家风祠禄真崇道郎潜叹老冯伤心循吏手齎志九原中宦达推公早丁年备皂衣几为铜虎去终向石桥归齐国世臣少贞元朝士稀松风谈笑地回首倍歔歔

范致政【鎔】挽词

义侠久无迹吾乡见此翁紫微欣税驾飞将许同功银茜联恩渥金兰蔼义风虽增羸博恨犹喜桂成丛酒後昇平曲闲中安乐窝千金曾累致一醉竟无何老骥志空在孤鸾悲亦多相望才岁许托体共山阿

梁审计【季琦】挽词

壮岁崭头角夷途试着鞭羣公争倒屣诸老亦忘年论议倾朝誉功名短世缘神伤贤伯仲风

雨夜无眠寿夭固难问吁嗟不忍言婴啼摧玉树衰泪洒芳萱事契深羣从英才怆九原悲吟
慙楚些无地与招魂

吕从德【昼问】挽词

剗剧推才刃临机妙斲轮传家得清白满腹是精神未上金闺籍空留花县春善人阳报在兰
玉正洗洗回首情亲处相过濂水阳十年能几见一疾痛云亡县郭山空秀家园橘自霜主人
今已矣鸥鹭亦凄凉

王县尉【彦正】挽词

干蛊恢才刃谁能货殖私人皆竞毫髮我独破藩篱风雨空残梦池台怆昔时板舆临穴处行
道亦兴悲润屋公余事能为人所难蓼莪遗恨在夜雨旧盟寒家有书堪读囊无钱为看情亲
悲不那望絶旄飞丹

唐舍人【关】挽词

鴈塔名三世螭坳侍九重循循仪学馆谔谔囊着封至性悲三釜高怀薄万钟典刑伤不见哀
涕忽无从夷路方驰輿甘棠喜问津庙廊平日志露电百年身揅掌虽多恨为箕自有人发棠
陰德在阳报质苍旻

徐少卿【子寅】挽词

圣主一言寤长淮千耦耕山川皆在目草木尚知名盍被腰金宠徒为揽轡行诸郎袭余庆定
自继长卿所至多遗爱丹邱最有声奉常千载久攀恋一城倾已恨数离别宁知隔死生湖边
旧门巷一到一心惊

陆提刑【洸】挽词

数马谦恭甚挥犀色笑温风流士龙裔文采左丞孙晚幸成三径身胡遽九原素钦仁者勇大
岳竟平反早岁擅词场夷途列鴈行一麾分楚甸双节照江乡莲社容寒晚葭莩接老苍八旬
俱已矣回首倍凄凉

陆参议【沆】挽词

中外衣冠盛流传识後调声名三语掾身世半身寮宝晋书尤逸坡仙隐可招梅溪残月堕芜
没旧风标饰吏先儒雅低徊五十霜萑蒲扫韶右桑柘满黄冈知己平津老家传删定郎八龙
无半在风雨夜侵牀

蒋慈谿【鸲】挽词

伊昔丹邱去相逢意气倾楼前巾子秀山下育泉清敬梓情逾厚交梨论益明凄凉千古意潮落又潮生下笔欲生风磨砢日有功推敲诗益练骈俪语尤工经问南雷叟家传十八公词人谁可继文阵滑稽雄

吴大监【飞英】挽词

庠校声名早朝廷誉望尊忠言如日皎笑语若春温四拥皇华节屡登金马门用才终不尽流庆在仍昆旷典将行日南宫得舍人铨衡轻易地造化漫劳神旧事谁能记交情独我亲吁嗟三昧手不见掌丝纶

俞通判【茂元】挽词

强仕赋归去频年亦漫行宦情虽淡泊官事极精明赞画王公幕监州亚父城佳儿守遗训清白胜金籀象邑推三俊灵光赖此贤老成俄已矣远迹为潜然孝敬心何极公平録尚传佳城隔风浪忍赋薤歌篇

陈崇道挽词

学造龟山蕴诗传汝水余于公足陰德陶令竟闲居白业追莲社丹经授寝虚【其父号寝虚先生】平生了无恨善类勿欷歔

未第声先振才官节已奇精诚与神合陰行畏人知晚境终无玷遗文尚可师功名齎志歿回施称家儿

鲍潮州【瀟】挽词

三试皆前列一官何後时低徊广文舍齟齬使君麾遇事有如烛卫生宁及葵旧游成隔世流涕读新碑客授壬辰岁巍科盛永嘉芹宫屡挥尘竹院几烹茶假守深交谊清谈及道家犹怀郡斋晚羣雀噪檐蛇

攻媿集卷十三

<集部,别集类,南宋建炎至德佑,攻媿集>

卷十四

钦定四库全书

攻媿集卷十四

宋 楼钥 撰

今体诗

赵路钐【不枯】挽词

蚤岁游金阙霞冠拜紫宸可堪天宝乱及见会昌春宛宛王孙态飘飘物外身灵光怆陈迹遗老更何人诸父论交久忘年许预盟登山陪蹑屐泛月共飞觥来往开三径安闲羨一生山深凄薤露愁忆醉歌声

姜总管【浩】挽词

及见开元盛曾闻正始音雕虫徒壮岁冠鵷岂初心论事风生席疏恩带锡金精神空满腹愁絶病沈沈富盛俄遭变艰难却起家田园新活计诗礼旧生涯仙桂应传秀庭兰更茁芽真归了无恨超彻妙莲华

祝通判【鐸】挽词

坦坦曾无我休休早见几虚舟宁忤物抱瓮自忘机老去心逾壮归来事已非赏延推不及有子尚家肥花县弦歌化莲城水竹居旧寮情意厚近别音信疎不作三刀梦空垂别驾车新阡何处是东望倍欷歔

裘参议【子绍】挽词

累世朱陈旧宦游多向鄞飞鳧观政美展骥愈情亲久草归田赋欢迎入幕宾斯人忽千古望断剡溪滨玉立期清贵顰眉望寿龄父兄嗟奄忽姑姊亦凋零厚德今谁在佳城惨欲扃孙曾闻竞爽兰玉在阶庭

朱坡史居士挽词

岩邑富人物才惟史氏多流传有丹桂遗逸叹朱坡学饱终难售诗成祇自哦空余着书在令子挹余波交友俱名士仪曹礼意周使华临夏口诗兴共南楼喜得江山助还同汗漫游更烦贤宅相相与发潜幽

戴县丞【机】挽词

小戴久仙去何堪更哭君旧游惊昨梦陈迹怆遗文晚暮期相与死生俄遽分铭成媿赞德挥泪望新坟高士终为薄岂惟勾小稽鸾凰虽在棘桃李自成蹊官府资关决儒流仰品题定知余庆远遗爱满双谿

方兴化【叔珪】挽词

庙乏着靴鬼梦中言更明起家尤感励为吏极廉平荐口声名重朝行去就轻奏篇真确论何日遂施行鴈塔深论契鵷班试着行参亡闻易策越吊後除丧支郡难留邓佳城久梦方吁嗟德浮位回施与诸郎

戴迪功【应龙】挽词

犹记天街会同为乳窦游姻家频会聚亲意愈绸缪吉德宜多寿奇疴竟不瘳无由见安道泛雪怅回舟好学数仍奇躬行家遂肥时将诗自乐晚悟世俱非教子惟黄卷高门看绿衣阿连悲未泯无泪为君挥

王通判【琰】挽词

世笃青箱学骅骝更着鞭半山分近派岩壑诵新篇竹马迎双舄棠阴忆二天黄扉伸谏论风节尚翹然才具盍时用拂衣俄去之善藏经世手回施称家儿羸博延陵恨人琴子敬悲连年事如许天道杳难知

姜鍾离【柄】挽词

门户期兴起交朋务琢磨反身求大学决意取儒科赞府声尤着邻封惠亦多伤心濠上路无复听弦歌别去期三载侔来痛一书死生诚大矣力量果何如平日真知我遗言苦问予作铭虽不愧回首自欷歔

顾养直【义刚】挽词

万顷东湖下曾门起大家子孙昌世业文字作生涯堂後萱犹树庭中桂欲华惜哉时不待谁忍送悲笳旧向君家去宜斋屡举觞人常诵诸顾里不见他杨身世惊春暮湖山怆夕阳园林未成趣鸥鹭亦凄凉

李度支【嘉言】挽词

忽作堂堂去门前雀已罗梦随弹指断事向盖棺多心系六州铁身倾千丈坡暗暗昼夜哭奈

此敬姜何孰匪同升素君于我最亲词章传自旧翰墨恍犹新别去情逾笃归来迹遽陈无从效经纪悲结泪沾巾

何司业【伯谨】挽词

顷岁游孤屿名门说二何胡为终璧水自合上銮坡器重连城价心澄古井波传家衣鉢在袞袞并儒科肮脏阳司业作州如理家源流知有自悃悞信无华方喜亨途远俄惊暮景斜伤心倾盖旧何处望东嘉

王遂安【时叙】挽词

淮水古王氏生平熟义方三珠欣竞秀两桂早联芳才大用何嗇源深流自长青毡传令子一箭取双鶺问学自冰翁词章耸巨公不慙循吏传真有古人风扃螽书犹在飞鳧迹遽空人琴悲子敬三读怆深衷

周左司【颀】挽词

从政心无愧敢言人所难精忠忧世切清节照人寒交臂失持橐乞身终考盘老成今已矣西望泪丸澜乙丑慈恩会今几六十霜轺车来握节相府记传觞诗藪怀高隐邮筒见短章不堪千里隔丹旌想飞扬

苏江阴【十能】挽词

万卷蟠胸次千篇秀笔端朝行期奋迅贤路竟艰难虽号循良守欠为文字官遗编幸无恙留与後人看伊昔初倾盖摛文已甚工亲闻南涧语谓有魏公风既往言多验归来道更穷悔言非教佞後裔报宜丰

鲁少卿【豈】挽词

棣萼仪鸾缀翛然两鬓斑时清嗟岁晚游倦得身闲人在羲皇上经传伯仲间桂枝芳未已何止倍燕山【六十年间登科者十人】

前辈风流泯灵光独岿然指困推甲族跪履记丁年有子伤埋璧惟翁亦蜕蝉功名虽已矣千载尚遗编

陆郎中【沅】挽词

壮岁聯双捷衰年困百罹肉身心佛子霜发貌婴儿万事几樽酒百年千首诗浮生成梦觉吾道竟何之从弟忝东牀相从二十霜人琴一何苦冰玉两俱伤别久成今昔归来失老苍稽阴

终反葬西望倍凄凉

梁仲苍挽词

延赏高三让殊科擅一鸣元宾文未极长吉记先成妙语遗膏馥玄谈悟死生行人痛埋璧父子若为情人物如君少相期上石渠博文该四部笃学富三余泪尽知无及交深未觉疎何时酌坟草细读茂陵书

王检正【回】挽词

到处称循吏星轺复郡侯威名致降虏恩信感亡牛省闕主公议祠庭寻旧游善人天不憖愁絕岷湖秋客授蒙倾盖朝参喜缀班开藩才一水去国遂千山晚遇名方重言归鬓未斑功名付诸子含笑谢尘寰

彭宣义【汝知子复之父】挽词

种德不在大至诚天所亲但能存一念何用活千人经笥儒风远香山句法新功名付儿辈不必在吾身籍甚清湘守修名所在闻宦途资畏友家训仰严君归路飞丹旄长空惨白云生刍不成奠挥泪想江濱

朱婺州【安国】挽词

治行古循吏风棱真谏官锄奸清远徼持重息羣讜久弄赵尧印重弹贡禹冠去天才尺五惜不见长安

莫铜陵【堂】挽词

经学高余子躬行慕古人儒风三叶秀和气一门春台岭渐摩久铜官抚字均庠东亡二老凝望泪沾巾

张泰州【礼本】挽词

燕赵多奇士如公名不虚胸中九域志笔底百家书报国心尤壮筹边智有余功名竟齎恨西望倍欷歔

徐季节挽词

公府推徐穉山阳荐仲车盛时遗此老没世竟穷庐行道嗟无命传家幸有书鲁山终不识抚卷倍欷歔

周德远挽词

家世传儒业乡邦耸义风将迎无倦色交友尽名公太学飞声早浮生转首空怡如堂下月犹照紫荆丛【汝能之兄】

余承彦挽词

户外诸生屨门前长者车柳袍空自染瓶粟竟无储隐行刑宗党清风照里闾沈冥谁为表赖有子云书

李尧卿【唐佐】挽词

里社久相从知君阴有功救人多药喜持论耻雷同素业诸郎在浮生一梦空凄凉宋清传健笔媿河东

方运使【有开】挽词

圣主一见决孤忠自致身筹边满躯胆处事掇皮真气直老弥壮言高用未伸留屯十二事公论付淮民

王观国【覲】挽词

晚识三株树方知独笑翁旧游亏半面遗恨想高风小楷墨犹湿残膏泽未穷梅花缟寒夜埋璧衆香中

沈朝奉【云章宜之之父】挽词

相业富青箱丁年稔义方生儿有如此与世遂相忘终老三牲养凌晨一炷香浮休了无恨流庆尚深长

孙子才挽词

身後名何用人亡意愈深盖棺悲昨梦挂剑答初心潜德仍能发遗言尚可寻悼元情更切接陇柏森森【潘安仁怀旧赋既兴慕於戴侯亦悼元而哀嗣坟累累以接陇柏森森以櫜植元谓道元杨戴侯之子也】

梁运使挽词

风月诗千首烟霞宅一区三年着朝蹟一节僨亨途南海瞻遗堞西门破老巫才高不尽用无

地寄长吁

翁府君挽词

肮脏翁夫子高才噤不施牀头痴叔易梦里阿连诗德丧嗟何及天胡不慙遗清风终未泯吹折谢庭芝

徐府君挽词

孺子人如玉功名不在身死生齐物外孝友笃天伦已有传家子曾充观国宾他年芳五桂伤不见灵椿

魏监丞【叔玠】挽词

元老余风烈优游挹美官朝行喜银艾邻好许金兰医谩肱三折生惟指一弹难兄秋夜感风雨旧盟寒

族兄道州挽词

出守春陵远相思潇水深精神虽满腹抚字亦劳心人去成一古书来失万金怀哉季公诺已矣汉碑阴

周太博【汝能】挽词

雨涨双溪水风高五柳堂论交成莫逆抚事祗堪伤访雪无回櫂面山空夕阳乱莺穿绿树谁复为传觞

宁海骆君【季友】挽词

古易人皆学惟君志益坚研朱滴秋露读简断韦编空谷甘无用佳儿尚有传清风谁得似竹满卧牀前

臧温叟【春卿】挽词

白首行逾恭乡评敬此翁心开上池水气袭舞雩风礼貌诸公厚声华一瞬空臧孙知有後三世着阴功

陆宣城【梓】挽词

奕世承家学诸公荐吏能政传花县美心与练江澄易箴去何速攀辕悲不胜伤哉羸博葬泪尽老延陵

宁海刘君【次臯之父】挽词

不识紫芝眉空传有道碑义方真可法閤室岂容欺未觉山川改深明昼夜知薤歌慙不称冢子素能诗

宋南雄【价】挽词

二宋久云远遗风君庶几才华试文战政誉蔼王畿梅岭方腾最雪谿俄赋归情亲今已矣老泪不胜挥

莫子执【珪】挽词

乐有父兄贤谈经绦帐前桂林孤素志芹泮老遗编小阮情何切童乌业未传棹闲最崇笃口口话齐年

繆伯恭挽词

我实由汪出垂髫托外门非惟拜先德犹及见新婚谨厚推乡曲恩慈笃弟昆善人今已矣余庆在儿孙

吴通判挽词

一死交情见乡评重此翁素车奔夕梦绣被落天风身任朋僚责心忘尺寸功母书卓行传非介亦非通

赵县丞【彦棠】挽词

玉立佳公子哦松始戍瓜拳拳飭边琐寸寸画江沙慷慨志忧国清修僧在家送行诗尚湿身世遽空华

石通直【庄问纯度之父】挽词

籍甚新昌族真成万石家源流端有自惻怛更无华奉职冰同洁持身璧不瑕庆门传未艾兰玉茁新芽

胡监岳【祇叙】挽词

赋就八叉手文高三折肱青衫双鬓雪黄卷短檠灯梦断采芹水神凄下马陵诸郎追五桂洗眼看飞腾

赵司户【琇夫】挽词

奕奕佳公子词场早策勲愿为新进士终屈病参军旧事成清梦高标想断云伤心桑落酒无复到孤坟

端明殿学士王公【希吕】挽词

片言寤主上亨途几向专城佩左鱼羊陆遐冲虽坐折高文宿愤竟谁摅平时屡草千言奏垂絶犹腾八难书汉殿履声今已矣两州遗老倍欷歔

短檠铁砚用功深万卷蟠胸不辍吟故国遁身来济岱壮年发藻向儒林爱民利物平生事忧国忘家一片心史馆顷年陪润色挽公无路涕盈襟

陈文恭公【康伯】挽词

唐虞千载道重光奕奕元臣任赞襄谢傅风流冠江左晋公威誉比汾阳折冲曾不劳声色辅政惟先振纪纲天意高高谁可问坐令邦国叹云亡

德量汪汪万顷陂直将去就佩安危干戈虽在相寻日休沐宛如无事时奏罢未闻宫漏转归来俄见哲人萎哀荣终始谁能及百世旌忠颂德碑

王修撰挽词

十载频褰刺史帷名卿风采映绅綏庆门共仰聯三凤禁路咸嗟欠一夔神武衣冠终遂志平泉花木总成诗伤心积翠楼前月斜入栏杆欲向谁

贱子何能值一钱夫君于我独知怜樽罍谈笑几侵夜琴剑周旋不记年此去空悬徐孺榻重来无复孝廉船百身愿赎嗟何及哀涕沾襟如迸泉

何内翰【溥】挽词

豪夺锦标天下闻慨然有志整乾坤谏坡论事言皆合帝幄谈经道益尊千古高文在鳌禁一时名士上龙门经纶未究身先死痛惜谁能作九原

潘大卿挽词

直上青云不作难壮年何事挂衣冠功名已矣乖时望风节翹然见岁寒鸿去冥冥鵷不到蝶
飞栩栩梦惊残伤心耆老今无有留得遗编向後看

张运使【孝仲】挽词

惠周剑外与淮南归卧空山且避谗宴坐几年期不死临时一着信非凡不应杜父束高阁真
使谢鲲居石岩欲向西陵寻宿草秋风何日送归帆

魏郎中【熊梦】挽词

相公钟鼎蔽诗声鲤也闻诗早得名高隐碧谿心更远今游湘浦句尤清握兰未足酬吾志揽
轡宁知老此行今日哭君谁最切山房门下老门生

姜秘监【师仲】挽词

文笔无劳巧剪裁一时妙斲冠兰台王杨仕宦曾相接游夏渊源有自来治狱心知有阴德立
朝人叹有余才功名回施与孙子公亦何为不豫哉

久闻政绩最淮淝鄮岭循良亲见之梓里尚遗前日爱棠阴还长旧年枝钓璜方兆非熊卜曳
杖俄兴梁木悲千里佳城空望断他时归哭岷山碑

李公执挽词

乃翁志欲卧烟霞宅枕清江欲泛槎心地共知容渤海梦魂曾不到京华伯鱼久矣闻贤训魏
子端能起外家弥望三江梁下水陇西德泽信无涯

未甘辛苦去朝天故作逍遥陆地仙老子平生万事足人间五福一身全厌看日月同奔骥摆
脱尘凡等蛻蝉重到江头人不见晓风吹泪忽潸然

莫将仕【随】挽词

自叹清才久陆沈晚从内典用工深谛观炯炯死生际宁复纷纷利禄心载酒今谁问奇字遗
经古亦胜黄金十年契濶遽如许老泪临风自不禁

樊运使【光远】挽词【代人作】

妙龄便有老成风孝友丹心天与通师友渊源得西洛文章声价冠南宫固知夫子才难用犹
喜先生道不穷他日凤泉山下路几人下马拜茆中

樊侯勲德佐中兴百世儿孙尚典刑
闔境民苏御史雨列城人仰使君星宪台严冷独
戟豸道院清闲谁掣铃
谣颂洋洋在人耳不须乐石更刊铭

戴县丞【樟】挽词

蚤岁乡书荐弟兄
美君再举上青冥
蓝田方欲新漫壁
处士宁知却应星
忍向伯高将束帛
谁从小戴授遗经
佳城得卜真前定
忍看一翁衰泪零

伍主簿【景善】挽词

好贤元不减缙衣客
到公家如所归
二浙声名三鄂荐
四山风物一翬飞
桑榆冉冉身先蜕
兰玉森森家正肥
人有百身宁可赎
发棠谁复济齐饥

由来风谊独穹然
坐享家肥不计年
堕帻何妨分百万
指囷宁复问三千
灵椿老矣仁宜寿
玉树种成身已仙
衮衮公侯殊未已
正应含笑入重泉

晚年朋旧益凋零
叹絶斯人奠两楹
不忍衔悲读佳传
可堪回首念平生
交情君独全终始
人物谁能继老成
清些楚魂招不得
朔风凄切泪纵横

安恭皇后挽词

天作周文合禕揄礼
可观屡陪金辇幸
几奉玉卮欢
吴女簪新柰
梁房掩旧兰
春深蚕事起
谁复上桑坛
郁郁南山路
伤心凤翼红
哀歌凄薤露
秘殿掩椒风
故剑恩虽厚
中璫事已空
但余彤史笔
内传纪阴功

又代人作

玉胜标祥兆
禕衣配至尊
柔仪高马邓
盛德迈娥鸾
掖空陈迹
霓轩服厚恩
伤心临七夕
素柰已花繁
图史怀规鉴
篇章妙翦裁
承欢方秘殿
委化已泉台
幽壤湖滨秀
清笳日暮哀
未央当月望
不见翟车来

齐国夫人曹氏【赵知宗之母】挽词

痛哭王孙去
南来万里余
解衣催艇子
扶杖拥篮舆
已矣空鸾镜
谁欤得鴈书
辛勤立门户
地下勿歔歔
宗子今曾子
夫人古敬姜
邛邾承孝养
浯水刻恩章
汤沐封逾宠
芝兰晚更芳
九龄天报远
余庆尚流光

齐安郡夫人金氏【赵左司公硕之室】挽词

避地供汤饼当筵接缟衣仓皇奉神版岩险逊征駉遇事智尤敏相夫家寢肥考终无可憾蝶梦遶芳菲五子俱英发尤知仲氏贤勤明真世济廉俭信家传别乘径为郡高城欲扞边版輿俄弃养事业待他年

太淑人叶氏【单侍郎夔之母】挽词

妇职躬苹润芳年誓柏舟壺仪全肃睦梵行极清修贝叶开空性神篴豁病眸飘然指归路净观日西流为国生贤子三迁备母慈版輿崇色养从橐勉论思戏舞老莱子平反雋不疑孝心天罔极肠断蓼莪诗

太令人赵氏【王师栻之母】挽词

令德比鳴鳩芳年誓柏舟承欢犹有恋旷达了无忧方奉平反笑俄成汗漫游哀荣谁得似同穴乐哉丘姻娅托三槐同朝得往来迎春烦设席举寿荷攜杯京尹俄遭难都人亦助哀琅琅垂絶语烈妇信高哉

从姑太令人挽词

伯祖八贤女惟姑寿且康又闻歌薤露谁复是灵光采藻空南涧生萱怱北堂平生好心地持以遗诸郎

太恭人刘氏【王台州之母】挽词

籍甚成天助薰然藹妇容家肥身愈约福备礼弥恭上寿九开宅湛恩四受封何人纪遗德女壻正乘龙卫氏一儿足他人总不如一麾欣义檄千骑拥潘輿台岳伤归旆青山满送车佳城流庆远旁可万家居

太令人轩氏【赵山甫母自号觉庵居士】挽词

缘断身先隱年侵鬢未华死生犹晓梦富贵更空花佛祖亲提印儿孙竞起家无因拜灵几一奠赵州茶旧说苏无着夫人亦正宗毒蛇横在路栗棘更无踪【无着赞临济宗旨云一条毒蛇横在路上觉庵云栗棘蓬栗棘蓬一口吞却更无踪】萧散超尘界扶持礼绀容觉庵谁嗣法别去德云峰

太孺人蒋氏挽词

之死靡他志天乎不谅人嫠孤蓬在首难苦棘成新晚福容千指心空灭六尘平生贞烈意终作坐忘身润屋惟纯俭居然法度循松楸先垄下风月旧湖滨子妇皆知孝孙曾亦可人浦江如可赎真欲百其身

孺人陈氏【周子及之母】挽词

教子推陶母相望百代前诗书经口授名节诵家传艺苑高鸿笔忠言彻细毡源流知有自何止父兄贤令子齐年好相从识壺仪萧生结绶日孟母卜隣时未卜升堂拜俄闻陟屺悲天涯致刍束泪落薤歌辞

太淑人管氏挽词

彤史久不作谁能有妇功宁知贵家子乃有昔人风钿轴恩何渥芝庭泽不穷死生无可憾况已悟真空

陈夫人【程吏部之母】挽词

作配知名士周旋内则篇宜家兼四德训子见三迁就养荣方逮归宁病忽纒庆源流未已佳兆得牛眠

张夫人【余元老之母】挽词

妇德天然备肥家五十年平生勤内则晚岁识真詮倒廩非徼福翻经亦应缘于门有孙子佳气藹新阡

王夫人【罗尚书外祖母】挽词

妇德胜贤士嫠居成大家阴功宜有後余庆尚在涯杨恽出司马陶潜传孟嘉文昌纪遗范外氏倍增华

恭人强氏【曾南仲之母】挽词

祠部源流远来嫔曲阜孙事夫终妇道训子大吾门颁诰恩光渥升堂笑语温相期送丹旄马鬣近周原

恭人董氏【刘侍郎穎之母】挽词

敬饁尊夫子升堂乳阿姑乡评推至行家庆展新图半世悲鸾舞高年乐凤雏蜜章应未艾卿月应阶符

鹿夫人【同年应尉振之母】挽词

内外言无间初终志不移白头供妇职彤管着贤规庆衍珠三树芳先桂一枝凤岑归去路含

笑不应悲庆霈疏封日姑慈不忍违人方侈君赐我独避恩辉孝笃神应劳风高家愈肥新传快女壻亦复挂冠归

旌表门闾安人陈氏挽词

妇德高千古乡评彻九重柏舟终自誓石窀启新封孙子传清白闺门慕肃雍死生无憾处了不愧三从族姓朱陈盛夫人事愈明老姑俱上寿难弟各清名【詹事良翰之姊】节行辉彤管门闾照赤城室隣方有托何忍送铭旌

卢夫人挽词

名族着冈头【武冈邃之姊】幽闺女教修良人惊梦蝶衆子慕桑鸠物化了难问壺仪谁为收于公有佳兆袞袞看公侯

廿四从妹挽词

姊妹二十四凋零余二人他乡忽传讣老子倍伤神已叹嫠居久何堪逆境频佳城千里外西望泪沾巾孝养全终始真成乳阿姑衾裯长夜共甘毳四时须衆子俱传业诸孙足自娱吾家女兄弟似此亦几无去岁桐川弟新从姊处归备言家庆事犹着嫁时衣尚欲寻松社宁堪哭素帋人生真一梦回首事皆非

令人王氏【表兄陈左史之室】挽词

嫁早仍知孝夫贤自不贫事姑如事母忧物胜忧身凤诰恩荣渥鸠桑德意均孺哀声不絶泪柏不成春宦达方资助家肥忽悼亡一区终异室千载尚高冈奉倩神犹惨安仁鬓欲苍黄昏愁絶处谁伴紫微郎

宜人杨氏【郑华文之室】挽词

里閭依杨氏年家托郑门升堂从壮岁择壻得贤孙妇德仪中壺阴功燕後昆尤怜吾女子流涕说慈尊梦入枌榆社心游水竹湾勾归期拜寿近侍望承顔一昨闻微恙宁知竟大还佳城无路到夫妇泪俱潜

陈夫人挽词

族姓甲休阳夫人懿范彰奇男已南省快壻更东牀珍锡人加叹佳城神所藏平生阴德在余庆尚难量雅有幽闲操来嫔清白家相夫全礼敬见子致清华方享承轩乐俄兴陟屺嗟谁将彤史纪大笔为雄夸

硕人居氏【蔡尚书之室】挽词

顷侍尚书坐曾闻阃助贤晤言成勇退里谒戒私专梦断松江路神伤薤露篇悼亡千里泪叠嶂想新阡【葬于平江】

王夫人【周子及之室】挽词

阃内谁无助夫人事特明倾囊资色养勉学就清名遯世期高节辞风叹落英丁宁犹在耳伉俪若为情荆国风流远幽闺女教循鹄原惊逝水鹤发倍沾巾厚夜招香魄英词列翠珉祗愁书字拙贻笑卫夫人

王夫人【陈少南之室】挽词

淑质依名士身期百不忧藁砧家万里蓬首日三秋陶母传遗业嵇孤托旧游幽原诵诗传无媿柏为舟

王夷仲夫人挽词

彤史无人续谁能识壺仪苹蘩奉先祖诗礼付佳儿未见鱼轩乐俄兴鸾镜悲藁砧方得路肠断悼亡诗

盛夫人挽词

婉孌闺中秀清高林下风相夫能尽礼教子使移忠边郡官无旷都城养得终壺仪今具在流庆复何穷

恭人胡氏【陈奉直千能之室】挽词

懿行表闺房情亲共盡伤绣衣来宅相彤管着铭章【刘提举诚之为作铭】苹涧谁供祀藁砧空悼亡芝兰俱秀发所恨失元方【先丧其长子】

宜人闻人氏【赵婺州之室】挽词

四郡歌贤牧鱼轩从隼旃深闺无里谒色养谨安舆故里称家法诸郎读父书美哉彤史笔三诵为欷歔

宜人史氏挽词

阀阅冠三朝尊公两珥貂夫贤能尽礼家贵肯期骄教子门风振澄神性地超悼亡无可憾直

笔付孙樵

安人郑氏挽词

勤俭佐家肥犹齐举案眉锦封俱被宠鸾监可胜悲谢砌森羣玉郃林先一枝木华文雋丽铭德祭堂碑【木詹事为铭】

孺人钱氏【丞相之女适曹氏】挽词

家世戟如林来嫔蕙德音功容俱可度疾疹遽相侵已矣空苹涧谁欵助薰砧佳儿随玉折尤切悼亡心

孺人林氏【卢彦德之室】挽词

家世甘泉旧幽闺有令名贤明教陶侃勤苦佐渊明苹涧今何处鸠桑空复情谁知悼亡意挥涕望佳城

孺人曾氏【叶寺正之室】挽词

婉孌应眉寿天胡弗与龄情深孙楚咏泪尽女孥铭苹藻空南涧芝兰有谢庭越山埋璧处秋雨湿铭旌

信国夫人秦氏【林子长之母】挽词

夫人富贵出怀綳择配和鸣得仲卿鸾诰早能封大国鱼轩不及伴双旌肥家得法晚无倦教子登科新有声叹息南谿未成屋凤凰山下启佳城

茅夫人【郑贵虚之母】挽词

清心玉映许谁同更有飘飘林下风政尔高清协宗老故宜嘉遯乐龐公远谋蚤识身为重晚境还知性亦空已拟张林碑妇德合归彤史巨编中

孺人陈氏挽词

追忆宫端旧典刑三真况复是难兄岂惟门户生光彩直使朝廷列姓名烟海乘桴谁可夺天风反火报尤明虽云弟娣相从去自有英灵凛若生

太硕人潘氏【叶尚书翥之母】挽词

玉暎清心着壺仪闺房宾敬到齐眉岂惟山水协高趣【宗少文每游山水往辄忘归妻罗氏亦有高情与少文协趣】更为国家生好儿【太宗赐张文定齐贤母诏曰婆婆有福生得好儿为国家分忧】万口共推诸福备八旬犹负一年期伯仁冬日应肠断不见堂前举酒时

玫瑰集卷十四

卷十五

钦定四库全书

攻媿集卷十五

宋 楼钥 撰

表牋

请举乐

皇帝第一表

春秋重改元法盖先於五始君子不为乐古无越于三年请为王言冀同乐乐【中谢】恭惟皇帝陛下系隆列圣娯侍三宫绵宇属心既极讴歌之戴重华尽孝适承遏密之余顾烈祖之报厚且重焉然文孙之制期已久矣况复高庙即安於神御寿皇俯和於祥琴下逮都人悉除乐禁新王春而建号进宝册以归尊愿飭攸司各扬乃职锵八音而应律肃万舞以充庭仰奉重亲益见慈颜之喜下孚衆听普臻和气之祥

拟第二表

睿主承休光啓太平之运王正肇始益新治世之音爰伸百辟之诚未动九重之听洊陈奏牋进冒宸旒【中谢】恭惟皇帝陛下仰绍心传率循家法念德寿诒谋之重体重华尽孝之勤既居崇高富贵之尊未闻文采节奏之美声音不足於耳岂为始哉礼乐不可去身有为贵者虽圣帝尚深於余慕而理经尤务於适中莫先凤历之颁宜上龙楼之奏岂止君臣相悦第成徵角之诗将与天地同流益致形声之应

至尊寿皇圣帝第一表

高蹈万乘聿重協帝之华躬行三年曲尽慕亲之孝矧将陈於册宝盍备举於乐章爰率具寮仰于渊听【中谢】恭惟至尊寿皇圣帝陛下怡神于淡游物之初惟付托之得人宜燕颐而养性方且羹墙在念疏素以居既已光舜禹之传乃亲为曾闵之行期可已矣必欲加隆祥而廓然尚云宁戚顾平时不好世俗之乐岂今日忍闻堂上之歌然而和琴俯就于成声钻燧再经于改火不应慈极尚遏谐音伏望酌先王制礼之中念圣子承颜之养居处笑语寢寛追远之思钟鼓箏弦益致导和之美

第二表

三年执礼已经徙月之期五日受朝当备钧天之奏援彝章而有请闕俞旨而未颁事恐久稽义须再渎【中谢】窃以帝舜既命大禹犹欲六律五声之闻汉皇上寿未央亦以万岁大笑为乐盖已膺天下之养盍具举朝廷之仪若稽旧章允属盛际恭惟至尊寿皇圣帝陛下道高物表德迈古先既全与子之明尤尽因心之孝谓太宗就简遽为三十六日之期而晋武欲为莫起数百余年之陋出於独断高掩前闻羣臣仰体夫圣心荐岁忍形於奏牍迨兹即吉乃敢发端既已遏音于三载之余正当成歌於十月之後况卜元正之吉将新徽号之隆悦非广奏于和声何以崇成于盛典恭闻南内将腾听乐之章钦想东朝亦望承顔之乐仰祈睿旨俯徇輿情

拟第三表

洊贡封章祈举九成之奏未承诰命敢稽三请之勤【中谢】恭惟至尊寿皇圣帝陛下高视帝尊共为子道自毕因山之奉已合外除靡从越紼之权竟全终制远复先王之法肯循後世之常迨其今兮何以尚此至矣尽矣愿闻大舜之韶皦如绎如当语太师之乐虽欲勿用其将何辞济济寻贤倾听笙鏞之间欣欣百姓嘉聆管龠之音

拟寿圣皇太后牋

三载遏音已全于中制两朝就养当备于和声【中谢】恭惟寿圣皇太后殿下德竝娥莘行齐任姒佐中兴之业协济艰难赞内禅之明共安闲燕比惊慈宸忽返帝乡乃安长乐之居密受重华之养神孙御历宝册陈仪岂应迎年而不为乐琴瑟之友钟鼓之乐谅未忘伋极之思羽龠之器缀兆之文愿俯徇輿之情

贺正旦

皇帝表

岁必履端盖重四时之首年初建号有光二帝之传矧庆事之鼎来效羣臣之善颂【中贺】恭惟皇帝陛下乾刚行健离照继明正月之吉始和春祺既集四海之内咸仰王化方行当周家布政之时乃汉历改元之日嘉瞻万乘上宝册于三宫肃领千官奉玉卮于前殿借备琚璫珎璜之饰创闻钟鼓管龠之音益知嗣德之在初孰谓太平之无象开八荒之寿域登庶俗于春台臣猥预周行欣逢谷旦方千里者九想同望于尧云呼万岁者三敢竞伸於虎拜

至尊寿皇圣帝表

岁之朝日之朝方肇新于凤历尊之至养之至爰啓庆於龙楼欢动宫闈泽均海宇【中贺】恭惟至尊寿皇圣帝陛下位居慈极仁冒羣生一道心传六通四辟于帝王之德三登化洽上际下蟠于天地之间乃释万几之繁坐受九重之养惟时上日尤异常年圣子改元着遵制扬功之意听朝奉册见归美报上之诚八音克谐四方来贺岂特履端之可庆诚为旷古之未闻

臣等恪谨皃趋伏深螯拊顾方访道於崆峒之上正当储神于螭瀆之中何止八千春以大椿而为久敢祝三万岁愿慈母而亦然

贺三宫受册

皇帝表

乘翠凤之车讲盛仪於元日镂白玉之牒上徽称於重亲爱事既成绵区交贺【中贺】恭惟皇帝陛下与天同大如日方中克寬克仁允協成汤之德惟精惟一密承虞舜之传爰奉三宫之欢以垂万世之则讨论故实备极嵩高视慈福之鸿名皆有愿圣人寿之祝侈重华之显号尤彰为天子父之尊当迟日之载阳喜积陰之顿解雨师风伯既已肃清乾端坤倪为之呈露云移天?首趋汉殿之朝星拱玉皇亲下尧阶之故欢声相和叶气横流惟天人顺应之甚明知社稷灵长之可卜臣等幸缘际会获奉周旋快覩圣时允属绍兴之始愿龙孝治一如贞观之初

寿圣皇太后牋

涓嗣岁之端辰上丕天之大号神孙具礼亲来翠辂之朝圣子承顏同受雕珉之册【中贺】恭惟寿圣皇太后殿下行齐任姒德迈娥苹蚤辅中兴之功载裨内禪之策由长秋而登长乐安荣已见于无加自绍兴而至绍熙戩谷益知其未艾惟寿居五福之首而圣乃羣伦之先永年常奉夫母仪今日尤严于福后礼容甚盛鼓舞惟均臣等献岁云初趋班惟谨得少广之道本无迹之可名居东朝之尊祈後天而难老

寿成皇后牋

万乘来朝当夏时之上日三宫受册列文母之丕称覆载两间欢呼四起【中贺】恭惟寿成皇后殿下谦恭素稟柔懿内充奉慈极之天顏曲尽问安之礼佐寿皇之内治克全燕翼之谋礼既备于尊崇心益安于冲淡共都显号爰归父母之尊仰嗣徽音尤侈妇姑之盛俱以寿康而向用何劳警戒以相成臣等欣际休期获观盛典咏思齐之什维周匹休安长乐之居与宋无极

皇后牋

羽盖翟车陪六飞之法驾瑶编宝刻上三殿之隆名既备盛仪式昭内助【中贺】恭惟皇后殿下处心渊静迪德懿恭五日受朝常谨问安之奉九重视膳每言佐餽之勤迨兹谷旦之礼成想见长秋之喜倍尚须浹日嗣举从容尧舜相传禹方循于一道姜任在上似宜续于徽音臣肃领廷绅预观国典展宫中之贺谅无异于外朝奏堂下之音爰助成于和气

贺皇后受册

皇帝表

九重涣号实遵慈展之谟万乘临轩爰受中宫之册肆稽故实备着礼容窃以地本法天方着顺成之德月惟遡日遂参久照之明况居大宝之尊盍正内朝之助天作之合王假有家【中贺】恭惟皇帝陛下道贯三才爰均四海亲承付托之重允资辅佐之贤若时元妃作配龙潜之际俪我宸极有开熊梦之占诞布玉音进登椒掖赞侍膳问安之孝尽求贤审官之思臣等恪领廷绅预闻国典乾坤定矣式符羲画之文钟鼓乐之愿继周南之咏

至尊寿皇圣帝表

神器有传俾正椒房之号缙仪告备肆颁宝册之严化浹绵区庆归慈展【中贺】恭惟至尊寿皇圣帝陛下德参覆载道极范围尧治民以治民有光前烈天与子则与子啓佑後人乃当命禹之初首眷嫔虞之旧用修陰教以正人伦凤辇来朝副以翟车之盛龙楼问寝加之褱服之华臣等依附末光相成钜典仰遵睿训见正家正国之规巩固皇图知卜世卜年之久

寿圣皇太后牋

神孙御极蚤正于长秋天仗充庭用扬于显册事关宗社欢动宫闱【中贺】恭惟寿圣皇太后殿下气毓冲和性资渊静化行南国正万世之彝伦尊处东朝受两宫之孝养属涓谷旦首上隆名既先慈福之仪旋讲穆清之礼含饴示爱见宝历之亲传佐餽得人想慈颜之有喜臣等骏奔在列螯拊惟均家法相承咸仰徽音之嗣母仪有则益观王化之基

寿成皇后牋

坤柔而刚既参内禅之策妇听而婉俾正中闱之仪【中贺】恭惟寿成皇后殿下遡日为明与天同大赞至尊之孝治一纪于兹安长乐之宴居万年有永谨二南之正始备四德以相承懿典告成慈帏胥悦侈家国非常之庆实社稷无疆之休臣等获际昌明不胜鼓舞友琴瑟而乐钟鼓莫先俪极之贤本夫妇而始后妃兹实齐家之要

皇后牋

榆翟褱衣久正内廷之礼金宝玉册式全昭代之仪庆衍宗祏欢同宫掖【中贺】恭惟皇后殿下肃雍成礼柔静资生蚤开坠燕之祥允协维熊之梦躬俭节用致君子之家肥顺色承顔化天下以妇道爰自御图之始允资俪极之贤禀命慈皇藏仪谷旦是谓人伦之至益彰女则之严臣等目覩弥文欣逢盛际关雎麟趾既已先正始之基周姜太任当无媿思齐之圣

谢赐春衣表

春日载阳肆颁于命服上恩难报仰谢于皇局列辟同辞闾门受赐【中谢】恭惟皇帝陛下

业隆润色道广帡幪大舜之垂衣裳蔑以加此神禹之美黼冕吾无间然乃俯念于廷臣仍举行于时令爰赉以帛俾华其躬视爵秩而有差被宠荣而如一臣敢不退揣其分思称所蒙慕召南在位之风期厉羔羊之节效齐国老人之语请遗天下之衣

贺会庆节表【绍兴三年以左氏摄西掖侍班扈从有旨百官诣重华宫拜表牋时礼部郎已在北宫候迎驾左相留公请就殿庐中作今附於此】

虹渚发祥爰纪生商之旦龙楼啓庆敢伸戴舜之诚【中贺】恭惟至尊寿皇圣帝陛下游物之初怡神于淡六通四辟于帝王之德聿成盛治之勲上际下蟠于天地之间罔匪春和之气徧寰区而蒙福与太极以同功礼奉玉卮远循汉殿之制书陈金监何待唐臣之言臣等肃领鹄行恭舒虎拜祝南山之万寿睿算无疆效嵩岳之三呼欢声旁洽

攻媿集卷十五

卷十六

钦定四库全书

攻媿集卷十六

宋 楼钥 撰

表牋

谢温州到任表

起家为郡俄及成时便道之官已共侯度戴睿恩而甚厚宣德意以具孚【中谢】伏念臣一介书生累朝世禄当圣主飞龙之始偶玷末科筮明时振鹭之班每安平进久预宪章之笔削屡参史牒之编摩尝佐治于徧州复勾稽于列寺天府式邦财之重司宗书帝系之繁比终素鞶之期忽冒朱轡之寄惟此东甌之胜实为左浙之雄顷任冷官兹叨假守山川如故风俗粗谙虽无竹马之迎顿起蒲鞭之望以前日待诸生之意加惠斯民于此邦扬泮水之波广为膏泽要令上下俱无所苟且庶几田里寢销於叹愁兹盖伏遇皇帝陛下深轸黎元敷求长吏谓臣洊登王国必能弘惻怛之仁念臣四对天颜固无俟丁宁之运是以左符分畀不待朝参严旨趣行免加临遣幸遂养亲之志实勤恋阙之私臣敢不律已奉公平心待物惟忠惟孝誓坚始终之诚济猛济宽务勉中和之政

谢中书舍人表

史笔屡书深渐无补纶闱久假遽命为真尝控避而弗俞竟周章而就列【中谢】伏念臣受才譾薄涉世阔疎偶承累叶之儒科寢预清朝之官使往分郡寄何有民庸当寿皇御极之时曾四登于文陛逮圣主临朝之治遂三入于修门首污郎省之联旋备贤关之式货泉出纳粗谨攸司宝牒纂修伏寻故步晋班左城摄事西垣记注非工有媿螭?之直词章至陋殆为凤阁之羞矧执愚之不移或遇事而辄发妨贤已甚忤物且多方喜具之交怀恐颠跻之未免力求引退敢觊褒升才思欲枯安得涌泉之敏身章增焕更贻濡味之讥兹盖伏遇皇帝陛下翕受羣言旁招俊乂谓臣粗亲小伎故使当训诰之司察臣素廩朴忠或可效涓埃之助考于详试有此误恩臣敢不思称所蒙益共乃位言惟作命少裨雷风鼓舞之神忠以事君当谨朝夕论思之职

谢寿皇圣帝表

柱史充员久虞幽黜词臣掌制遽忝超除揣陋质以无堪望慈宸而知幸【中谢】伏念臣顷叨末第已出异恩再玷周行惟自安于平进仰承清问尝屡贡夫愚忠出分海峽之符入就星曹之列圣作明述亲见盛时年除岁迁寢尘清贯书言书动慙无载笔之功如丝如纶徒积代

庖之媿将以外庸而自诡乃叨亲擢以为真退省侥逾益增战栗兹盖伏遇至尊寿皇圣帝陛下達源系表探蹟古初齐圣广渊居域中之有大危微精一为天下而得人式诒燕翼之谋兹见储才之效肆令么?猥预论思臣敢不深念遭逢誓坚操守仰戴两朝之眷敢务苟容愿殚千虑之愚以伸忠报

谢给事中表

充员词掖久惧罔功进职琐闥忽惊误渥辱训辞之甚宠揣分量以奚堪【中谢】窃惟封驳之司实关出纳之要诏敕之布咸仰君相所为有唐则许涂窜而奏还本朝则令详酌其可否宜求人望以赞政经岂伊妄庸乃与詮择伏念臣迂愚自信执滞不通秉笔螭?固有切于良史演纶凤阁曾何取于陈言属兼直于禁林幸亲逢夫兴运书诏填委靡容晷刻之淹号令流行欲助风雷之迅仅无乏事安敢辞劳荷简记于宸衷俾骤膺于夕拜不改北门之旧族仍东观之华加贲身章增光从橐兹盖伏遇皇帝陛下励精初政垂意羣才用舍之间初无适莫论奏或至不吝改更知臣备历险夷羣有爱君之志谓臣素怀憊直愿殚论事之忠遂致孤踪亦叨隆委臣敢不俯思幼学务勉後图亲年益高但有归耕之意主恩未报尚希批勅之风

谢权吏部尚书表

充员琐闥自顾罔功摄长铨衡忽蒙误宠仰皇慈之至渥揣微分以何堪【中谢】窃以选部持衡凤号六卿之长文昌听履实为八座之联非素推公方不足以梏吏奸非妙有德望不足以压輿论虽黄散之下无忝异同而搢绅之流鲜不关系宜求精敏之彦以当要剧之司伏臣才不逮人学徒泥古一为支郡三入修门门久待上皇愧愚忠之无补亲逢嗣圣荷褒擢之有加代言非録贄之工批勅谢李藩之器俯徇刍蕘之论屡寛鉄钺之诛去省眼者五年遂躡登于冢宰离班心者一载遽首列于後臣禁林兼内制之文史馆涉信书之笔满盈已甚控避莫回颁御府之裘衣益之鞶带驾天闲之良马覆以雕鞶但喜悦亲之私敢云稽古之效兹盖伏遇皇帝陛下多能天纵盛德日新蒐举异才踵登持橐之先优容弃物独负吹竽之慙宜黜而迁以荣为惧臣敢不深思侥冒勉竭疲庸为山公啓事之书知非所及守崔亮停年之格何足言劳尚几典选之平少助官人之道

谢兼侍读表

升班文部方虞典选之难进读露门更辱兼官之宠循墙莫避据蒺是忧【中谢】窃以帝王之兴必以学问为急如怀素元量之选本为覽史之资由宋绶夏竦以来始有读书之职仰惟睿圣光绍炎图首开讲帷详延从橐考迹英之旧加赐坐以甚优于共膳之余俾侍言而更入首闕三朝之宝训次观先正之奏篇宜求鸿博之儒以助缉熙之学如臣至陋涉世多艰岂期累岁之推迁寢历明时之华要词垣翰苑代王者之敷言史观经筵极书生之荣遇况从夕拜擢置天官朝入君门方被宸纶之渥暮归私室又惊涣汗之颁是何遭逢有此侥冒兹盖伏遇皇帝陛下励精庶政垂意多闻广厦细旃许奉清闲之燕袞衣博带不违咫尺之顔自古所稀于今独盛猥令未至躡冠羣贤臣敢不紬绎旧章勉图微效海涵天覆或容草芥之忠日往月

来庶有毫厘之补

谢显谟阁直学士知婺州表

典选无闻方上便亲之请承流已试载叨出守之行宠跻延阁之班增贲辅藩之寄叨膺明命倍激危冲【中谢】伏念臣夺迹孤单逢时休盛昨自东嘉之收召寻登左省以推迁代言慙润色之工封诏乏涂归之效及夫紬书视草劝讲抡材皆儒者之至荣岂生平之敢望饗误恩而踰分致私室之挺灾重貽慈母之忧益动故乡之念力祈闲退仰赖矜从候邦分宝婺之区学士寓文谟之直繇常伯而出于故事或有此除考公论之归在小臣恐非所称莫遂循墙之避徒深恋阙之诚兹盖恭遇皇帝陛下覆育羣生敷求长吏察臣昔当一郡拊摩羸竭于微劳念臣敷历三朝进退欲全夫素守俾司乃牧俯使其私臣敢不钦服训词益思砥砺五百里曰旬不违咫尺之威二千石惟良少展涓埃之报

谢中大夫表

由选部以守藩方陈祠请因年劳而进秩更沐纶言只拜以还感铭何极【中谢】?念臣生逢圣主世受国恩虽历任累朝幸相继百年之外而传家三叶俱弗踰六品之阶敢期後嗣之微乃越先朝之旧共承遗训未知闻诗闻礼之言追仰前踪徒有慙长慙卿之诮岂特一门之幸实为千载之逢兹盖伏遇皇帝陛下优待臣工仍严铨法三年考绩既容赏典之参一体疏荣爰示禁途之宠臣敢不激昂素守衔戴隆知汉议方兴媿乏倪寬之对淮阳既远敢忘汲黯之忠

谢提举江州太平兴国宫表

分共理之符敢起一麾之叹廩祝厘之禄终俞三请之辞尽出上恩获伸素志【中谢】伏念臣稟资至陋涉世最疎误蒙三圣之知寢躡六官之长辍金华之讲而为金华之守曲从外补之求由学士之称而寓学士之班仍冒亲除之渥已过家而上冢将叱馭以登途属以母老易危暑行致疾羣医俱试百口相惊亟上需章谓必婴夫严谴首班温诏乃许缓于官期感泣之深忧惶实切率更旬浹又露忧衷特寬方命之诛竟允奉祠之愿仰隆施之过厚诚近代之所无去鲁行迟难效齐邦之接浙报刘日短幸容李密之陈情兹盖伏遇皇帝陛下仁本爱人孝先锡类凡加识拔举无簪履之遗苟有恳祈俯询刍蕘之切使退安于真馆得娛侍于慈闈臣敢不铭着肺肝躬陈菽水况此尘劳之久少休疲曳之余凯风自南获遂奉亲之乐衆星共北誓坚报主之心

贺重明节表【庆元元年】

述者明作者圣方兼备于孝慈一曰寿二曰康宜大来于瑞庆兹逢诞节倍激忱衷【中贺】恭惟太上皇帝陛下玩道希夷储神螭馭尊居特室成三朝脱屣之高坐閱皇齡受万岁奉扈之养功隆太极事越古初当今宾燕之时际此流虹之旦庆绵宗社欢动宫闈臣久玷从班适

叨外补天街簇伏莫陪豹尾之中海峽倾葵仰望龙楼之表

贺瑞庆节表

神策纪元方懋继承之烈流虹启瑞载逢震夙之节凡属照临率均拚舞【中贺】恭惟皇帝陛下聪明冠古历数在躬纂列圣之丕图谨三宫之色养色仰守成之美日闻典学之勤良月就盈爰辑大来之庆从天难老坐隆不拔之基臣窃食祠宫驰神天陛修菽水之敬既谐颖谷之私奉香火之缘敢效华封之祝

谢再任宫观表

祠庭既廩其命维新敕牒临门从天而下恍不知其何自凜欲受以犹惊仰惟异恩敢不只拜【中谢】伏念臣才非适用学不知方幸逢熙洽之朝寢冒清华之选四载预论思之列无补毫厘平时于出处之间麤分寻尺始因请外亟畀辅邦旋以便亲力求真馆尘渎盖高之听俱蒙从欲之仁继辱简知再叨共理不图出守乃复一麾来者犹可追惟阖门而退省观其所以养敢谋食以自营重寻香火之缘尽出冕旒之眷惟庐阜栖真之胜自熙陵纪年而来窃祝厘之虚名得与釜之实惠喜同毛檄欢动莱衣兹盖伏遇皇帝陛下覆载无私照临丕显选搢绅之髦士咸与明扬念簪橐之旧臣未尝终弃赋以斗升之奉增以儋石之储臣敢不益体洪私誓坚晚节为子华之母而请粟宁待人言班周室之禄以代耕实銜君赐

贺皇子降诞

皇帝表

天啓昌期方侈三宫之庆国生元嗣实隆亿载之基温诏四驰驩声一律【中贺】窃以本朝之传列圣古所未闻长嫡之出中闱今方再见况五世高曾之上寿当三朝揖逊之盛时首开长发之祥益茂无疆之祉恭惟皇帝陛下仁沾动植德冒华戎尧帝聪明既亲于九族周家忠厚宜见于百男爰稽熊梦之占允协燕禴之吉事关宗社喜浹穹只臣顷玷从臣幸休真馆拜丹陛之名表莫缀鸳班诵朝廷之德音敢同鰲拚

太上皇帝表

尊居慈宸方均万国之欢庆笃神孙益衍四朝之盛宫闱喜溢海宇恩深【中贺】窃以汉甘露中尝有甲观命名之爱唐开元际亦称三日临澡之仪曾未有视黄屋以非心见緑车之载育恭想天顔之悦咸欣帝系之昌恭惟【尊号】太上皇帝陛下道体纯乾功参太极传神器而与子为天下而得人仁声素洽于编民福祚遂绵于世嫡克岐克嶷饴饴自适于圣情曰寿曰康戏愈愈隆于色养臣曾从属车之後遥瞻特室之严奏未央五日之朝阻陪下列效嵩岳三呼之祝徒罄微衷

太皇太后牋

慈尊无上方歌眉寿之隆庆系有传及见耳孙之育古今创覩中外均欢【中贺】恭惟尊【号】太皇太后殿下化洽周南德同坤厚翊中兴之运母仪坐閱于三朝濬长发之祥帝统遙观於五世备寿富康宁之福形覃訏岐嶷之歌仰推毓夏之原是啓生商之瑞臣叨尘禁路退奉祠庭春而秋秋而春孰计後天之算子又孙孙又子益延过历之朝

皇太后牋

居寿慈之宫仰尊祖后歌震夙之雅诞育曾孙之志古之未闻亦本朝之初覩【中贺】恭惟【尊号】皇太后殿下德先恭俭性本仁明亲见尧舜禹之传共循一道上有姜任姒之圣宜致百男果庆中闈遂生元子惟天心之眷佑成国势之安疆臣只奉真祠阻陪贺版本支百世方欣五世之同堂寿考万年坐看卜年之过历

太上皇后牋

思齐文母媲慈极以俱尊於赫汤孙由中闈而载育仙源有自圣统其昌【中贺】恭惟【尊号】太上皇后殿下德茂涂山礼隆渭涘上皇与子赞成脱屣之高圣主奉亲倍喜含饴之乐当汉观命名之始想唐宫临澡之同四方流闻万口交贺臣尝叨持橐退获奉祠移寿康之班莫预千官之末衍云来之庆更绵百世之期

皇后牋

位正柔坤将行册礼祥开洊震首行天材上承列圣之休益侈重闈之庆【中贺】恭惟皇后殿下世传勲闕德应帝姻带弓韣于祿前允协燕祠之瑞设桑弧于门左果符熊梦之占三宫喜嫡长之昌万乘啓元良之正稽前朝而尝见在今日以增光臣退处衡门阻趋秘殿寿如山升如日愿賡归美之章衣之裳弄之璋更献多男之祝

贺重明节表【庆元二年】

黄屋非心坐抚重临之节玉卮为寿适临载震之辰庆溢宫闈欢均海宇【中贺】恭惟【尊号】太上皇帝陛下仁心爱物德泽在民天下为一家既全揖逊之盛域中有四大独冠古今之尊明继圣而帝业愈隆子生孙而宗支自衍咸啓华封之祝想闻汉殿之宜臣恪奉外祠遙瞻慈极嵩呼万岁莫陪就日之班花覆千官犹预需云之宴

贺瑞庆节表

虹流电绕式符长发之祥地辟天开方际中兴之运一人有庆万寿无疆【中贺】恭惟皇上陛下受命皇穹绍休列圣问之朝问之野莫知神化之方作之君作之师独得道原之大惟此

就盈之月是为载夙之辰仰三宫燕吉之欢衍亿世延洪祉臣叨陪法从得奉真祠帝所遥瞻敢作钧天之梦廷绅布列想闻嵩岳之呼

贺奉上壽圣壽仁太上皇帝圣安安壽仁太上皇皇太后圣安寿仁太上皇帝圣安寿仁太上皇后册宝礼成

皇帝表

尊处九重莫先于孝治庆绵百世俱上夫隆名诚振古之未闻喜当今之独盛【中贺】窃以加光佑惠慈之号既归二后之尊崇圣安寿仁之称仍谨双亲之奉縟仪具设彩仗交辉天地为之清明宗社于焉巩固恭惟皇帝陛下日行舜德思广文声谓此国必自齐家惟笃近乃能举远矧当旋乾转坤之始克躬问安视膳之勤乃因万国之欢用显三宫之懿臣屏居东甬寓直西清泽笏影纓虽阻陪于凤跸范金镂玉徒念望于龙楼

太上皇帝表

备九重之色养只奉慈仁得万国之欢心载扬显号皇仪具举孝治弥光【中贺】窃以圣圣相承本朝为盛安安克迓三叶尤隆惟寿居五福之先惟仁在四端之首尊无与二固不可以易言荡无能名要当举其大者恭惟【尊号】太上皇帝陛下躬帝尧之盛笃仲尼之恭广大之配乾坤宜享延洪之筭忠厚之及草木益昌积累之休仰睿圣之黻明极爱钦而尽道亲奉范金之宝首披镂玉之篇兼衆美以特书粲弥文而相接凡居覆帔罔不瞻依臣顷侍词垣兹归真馆饰琚瑀珎璜之佩莫陪天仗之朝闻钟鼓管龠之音尚想龙楼之晓

太皇太后牋

尊处东朝坐见鲁孙之孝治礼严北阙载加文母之鸿称大册告成本朝增重【中贺】窃以寿先向用具着箕畴圣本思齐是歌周雅慈为三宝之首既以益隆福者百顺之名又皆兼备兹仰铺张之盛弥功保佑之功恭惟【尊号】太皇太后殿下德厚柔坤道参太极尧舜禹之相授赞睿断于宫中姜任姒之俱贤播徽音于宇内隆兴而後四举縟仪绍熙之间浚修盛事矧亲提于神器付托得人宜首上夫瑶编只承于帝欢传有载燕及无疆臣尝玷从班欣逢曠典宫闈再辟想闻天仗之来贺版羣趋莫预廷绅之後

皇太后牋

镂白玉之牒上徽称于慈尊建翠华之旗藏縟仪于圣代欢传宫壶庆浹垓垓【中贺】恭惟【尊号】皇太后殿下德媲娥?圣齐任姒再世揖逊实参决于庙谟三宫康宁爰竝崇于色养惟神孙之尽孝仰祖后以承休取仲尼五美之言明老聃三宝之训用形容夫懿范以昭着于弥文臣退处海濒阻趋天阙瞻寿慈之新牓莫预班联歌思齐之首章第勤颂祷

太上皇后牋

宝册诞扬仰奉慈闱之懿徽称备举益增母道之光宗祉愈隆华夷交贺【中贺】恭惟【尊号】太上皇后殿下圣齐任姒德媲皇英方绵四方之休亲受九州之养王母之坐少广寿固无期昶虞之应召南仁不胜用仰嗣皇之尽孝极礼典以归尊三殿交欢万方同庆臣比叨荷橐兹获奉祠引振鹭之班莫陪进旅而退旅粲珣珉之牒更听大书而特书

皇后牋

三殿祫容俱上鸿名之懿一人孝治端由内助之勤凡属照临举深拊蹈【中贺】恭惟皇后殿下庆绵奕世位处内朝陰教所覃有卷耳樛木之美柔仪克谨奉长乐未央之尊聿严揄翟之衣同上珣珉之册邦彝有耀家法愈新臣顷玷禁途兹安海峤侧闻旷典但知兽舞之欢遥望昕朝莫遂凫趋之愿

贺皇后受册

皇帝表

廷提大册克备于祫容位正中围聿严于内治欢传禁掖喜浹编民【中贺】窃以尊尊亲亲既极三宫之奉夫夫妇妇是为万世之基颁制紵于嗣服之初饰褱衣于历年之後礼文惟称地道有光恭惟皇帝陛下德本世修合由天作上未央之万寿方陈汉殿之仪嗣太姒之徽音更笃周诗之庆卷耳之志当佐于君子思齐之圣以御于家邦朝夕永致其忧勤夙夜不忘于警戒于焉正始岂专为恩臣退奉真祠恭闻盛典汉之广江之永遥观美化之流行渭之涘治之阳咸庆旧章之复见

皇后牋

陈仪枫陛具招丹册之华正位椒涂光被褱揄之事事关宗社欢动宫闱【中贺】恭惟皇后殿下庆袭安阳行高妫汭起家而居爵位蚤缔天姻好逮而乐鼓钟益彰后德密辅九重之孝治仰承三后之徽音盛典告成内朝增耀臣祝厘惟谨窃栗自惭迹虽滞于周南化已行于汉域禁林草制曾蒙乙夜之观从橐趋班阻预长秋之贺攻媿集卷十六

<集部,别集类,南宋建炎至德佑,攻媿集>

卷十七

钦定四库全书

攻媿集卷十七

宋 楼钥 撰

表牋

谢大中大夫表

一身去国方叨祠廩以娛家四品頒纶乃次年劳而增秩素餐已甚丹悃知归【中谢】念臣少也数奇晚而多幸备皂衣之吏三朝许厕于周行联紫橐之华四载得陪于从列踰涯自愧补外以行荷圣君从欲之仁赋真馆祝厘之粟班通禁路尚污文谟内阁之严法应吏铨遂躡秦官大夫之首寄禄寢高于世胄被恩得奉于亲承视贾谊之超迁固非敢望比申公之即拜岂不怀慙兹盖伏遇皇帝陛下器使羣工曲成万物念论思之旧侍未忍遐遗付品式于有司许容平进周章登受俯伛何言臣敢不祇服训辞钦承命数老疾而无职事实深称於闲居优游不易公卿特未知於报所

贺重明节表【庆元三年】

少皞司秋适届肃霜之候重明丽正欣逢绕电之辰庆浹三宫欢腾四海【中贺】恭惟【尊号】太上皇帝陛下道隆邃古泽润生民引养引恬自得怡神之乐无伦无敌尤高与子之明福如日以正中年与天而同久千秋纪节固知黄屋之非心万岁争呼又见玉卮之为寿自他有耀申锡无疆臣尝侍宸旒兹游真馆恭陈虎拜阻陪汉殿之仪遥思龙楼徒效华封之祝

贺瑞庆节表

斗枢电绕良月占载震之祥崖石天齐令名采中兴之颂四方来贺百福具宜【中贺】恭惟皇帝陛下夙亶聪明躬行勤俭奉三宫之色养孝治日中得万国之欢心休祥云委当重熙而累洽能持盈而守成咸倾旧日之诚仰赞後天之?臣顷陪鹭振亲覩龙飞上万年之觴梦徒游于帝所接千岁之统心惟祝于皇龄

慰寿圣太皇太后上仙

皇帝表

奉慈尊於四世孝治方隆传遗诰于万方哀号何极【中慰】恭以【尊号】太皇太后道高

任姒德迈娥?三朝居长乐之尊九秋享无疆之寿手提神器亲授曾孙功成不居仙去何速恭惟皇帝陛下躬承慈训图报洪恩北面听朝备四海九州之养东朝晏起怀千秋万岁之悲忍从五日之哀特用周期之服愿少寬於圣抱期益慰夫亲承

太上皇帝表

太皇太后代慈宸兴哀覆帔所临悲号何及【中慰】恭以【尊号】太皇太后道妙千古母仪四朝决内禅之訃谟功在社稷受曾孙之色养福等冈陵乃以微疴遽传晏起恭惟【尊号】太上皇帝陛下仰遵遗训祇服通丧愿寬圣子之孝心勉徇先王之中制

皇太后牋

慈福上宾悲纏率土爱钦素着哀动重闱【中慰】恭惟【尊号】皇太后殿下夙奉太任亲承大舜妇听而婉实为内壺之观丧致其哀莫赎终天之痛愿遵礼制少抑孝思

太上皇后牋

寿圣升遐慈尊永慕恭承凶问均极悲惊【中慰】恭惟【尊号】太上皇后殿下寅奉重闱恪修陰教方日勤於孝养期仰嗣于徽音胡不万年忽成千古在人情而难处冀圣念之少寬

皇后牋

光佑讣闻迺遐哀动骤失慈尊之?误增悲慕之心【中慰】恭惟皇后殿下四世承顏累年逮事鸡鸣问寝每勤禕翟之行鹤驭登仙遂有云霄之隔愿推至理少抑深衷

谢再任宫观表

僻居海峤推戴上恩洊畀祠官忽颁严旨慙无报国之所喜便事亲之私【中谢】伏念臣潦倒无堪遭逢过分奉身而去径归绵土之田畏影自怜更卧漳滨之疾当一喜一惧之交切何三仕三已之敢云幸遂投闲庶几养志属书再考未免有言既彻九重亟蒙从欲阖门相贺遂寬乞米之忧连岁何功徒致取禾之诮兹盖伏遇皇帝陛下纁旒无蔽簪履不遗求齐国之世臣尚其余几数正元之朝士今亦无多赐以斗升济其菽水臣敢不仰銜隆施退适余生顾朝暮承顏得效老莱之戏虽渔樵混迹敢忘魏阙之心

贺重明节表【庆元四年】

继明而照四方夙纪诞弥之节得秋而成万宝是当载获之辰庆溢霄垠欢均海宇【中贺】恭惟【尊号】太上皇帝陛下尊同太极福浸黎元由父作子述之明得内圣外王之道脱履崇高之表怡神螭馭之中凤蹕来朝当电绕虹流之日龙楼上寿皆山呼鰲拚之人睿算无疆

洪图有永臣既收朝蹟洵处祠庭与造物者游敢陈金监之録献封人之祝徒想玉卮之仪

贺瑞庆节表

良月就盈出应五百年之运四方来贺仰祝三万岁之期宫壺交欢宗祊协庆【中贺】恭惟皇帝陛下符乾健德与日新寅奉重闱深思付托之重洵开二阁用广缉熙之明益增孝治之隆坐振儒风之盛如云如日喜逢诞圣之辰非露非烟茂郁兴王之瑞敢伸虎拜用赞尧龄臣再奉真祠僻居下国峩冠就列莫陪嵩岳之呼泚笔歌功愿献浯溪之颂

谢落职罢宫观表

杜门却扫幸家食之少安褫职罢祠忽台评之下及尚从寛典祇荷隆恩【中谢】伏念臣戇直有余顽冥自信生逢昭代屡玷周行年除岁迁实由於亲擢左提右挈敢藉于先容久居封駁之司几作怨仇之府用过其分思称所蒙始求补外以牧人已叨临遣旋请投闲而奉母又辱矜从五年自放於江湖一饭不忘于君父获栖故隐可谓幸民然犹通内阁之清班窃殊庭之厚禄余生何有惟断断以无他公论弗容尚斷斷而不可烦言果至百谪奚逃仰圣度之恢洪闵危纵之孤露爰施薄罚以示小惩兹盖伏遇皇帝陛下仁务包荒爵惟驭贵卫纓虽许终不可以假人汉印既销适足明於无我俯怜簪履之旧犹齿搢绅之间臣敢不屏息讼愆投诚戴德循南陔而戒养退甘三釜之贫望北阙以倾心莫効一毫之报

谢宫观表

杜门穷巷将没世以讼愆赋粟珍台仅踰时而复旧开孤迹自新之路承大君莫报之恩得之若惊感而至泣【中谢】伏念臣顷承驾缀亲覩龙飞词禁代言首播丝纶之命经帷进读不违咫尺之顔一去阙庭四叨祠禄初出恳祈之切两蒙简记之思惟此侥逾尤为忧异雷霆所击宁忘失箸之忧日月有明忽照覆盆之下岂无望於岁年之後不谓得於旬朔之间顾?职之告未颁而祝厘之领已继人谓去珠之再得自怜堕甑之犹全顿增菽水之欢足慰桑榆之晚兹盖伏遇皇帝陛下仁无弃物道本用中芝柱呈祥方炳灵于太室玉卮为寿喜亲庆於慈闱广四海以推恩軫一夫之失所有如闲废亦荷矜存臣敢不仰体隆知益安愚分半九十里深嗟末路之难取三百困徒切素餐之愧

谢进封开国子加食邑表

职在琳宫方谨祝厘之奉诏分谷璧更蒙与邑之多敢期洪私下及散地【中谢】?念臣顷叨推择滥预论思自登鎖闱之联已经采食之赐明时未弃犹得於祠官比岁以前居幸沾于郊霈贱息既承于延赏先臣复被于追荣独此加恩格而不下方斯念咎噤弗敢言顾三百户之逋罔知所自念五十里之小相去几何迨兹祭泽之颁始冒纶言之宠母升次郡爵进小邦再拜知归一门增耀兹盖伏遇皇帝陛下礼严宗祀惠及臣工仁不忍于遐遗福靡求于专向遂令远外亦荷宠光臣敢不俯媿素餐着铭丹悃奉璋就列莫输奔走之劳分土疏封安有藩

宣之力

谢通议大夫表

祠馆无庸犹会八年之课宸纶甚渥俾居四品之官拜命增荣抚躬知惧【中谢】伏念臣才非适用仕止为贫幸逢揖逊之朝寢冒论思之列久司封駁徒积悔尤亲覩龙飞实专内外之制旋升鸳缀更兼文武之铨爰揣分之易盈以治民而自诡母既登于大耋身亦觉于倦游力请投闲仰蒙从欲江湖羸足久甘渔者之争限簪履弗遗深媿廩人之继粟方夺荣之是惧何增秩之敢言汉诏聿颁尚得从大夫之後隋官平进犹使陪廷议之余兹盖伏遇皇帝陛下图大泽中谨微接下幽明考绩一付有司之公日月为功俯及从臣之旧有如衰废亦玷褒迁臣敢不仰佩鸿私愈坚晚节与之三釜方承戏彩之欢加以数年祈遂悬车之愿

谢再任宫观表

孤踪去国六换岁华明命临门五叨祠廩积素餐而自媿拜黄牒以知归【中谢】伏念臣处世最踈逢时多幸把麾江海因得遂於归耕聽履星辰今殆成于昨梦贱齿已开於七秩亲年既越於九龄无由陈力于清朝祇合投闲于故里先畴至薄叹微禄之未忘吏考将更惊俞音之洊及岂止寬忧煎于数口又将窃温饱于二年有何劳能蒙此抚养兹盖伏遇皇帝陛下躬操八柄坐制万方念笔橐之旧臣虽无可録軫盖帷之至意尚尔不遗使仍香火之缘以遂山林之适臣敢不只承恩渥涵泳化风菽水有余得效莱衣之戏云霄在望惟存魏阙之心

谢复职表

四年负谴尚玷从臣之阶一札疏恩复还学士之直周章拜赐感激为荣【中谢】伏念臣愚不知方志徒泥古顷更郡寄尝辱赐环屡玷朝行寢叨持橐代言批敕曾何有于论思约史侍经每自慙于玩愒典铨未几怀绶以归寻力请于真祠仍寓班於内阁致烦言之俯及甘暮景之宜休敢意矜存曲加枚拭特寬汉律申畀文谟深怜为养之勲又予祝厘之禄从天而下抚已尤惊兹盖伏遇皇帝陛下大度兼容至仁善贷谓臣亲逢初政曾厠衆贤之後陈察臣自讼宿愆不忍一眚而终弃爰軫盖帷之念未尝簪履之遗臣敢不祇戴宠光日思报称奉百岁之无益增莱子之欢诵万年之诗愿效封人之祝

贺瑞庆节表【嘉泰三年】

践阼十年益啓昇平之运逢辰千载又更震夙之期兆姓交欢一心同戴【中贺】恭惟皇帝陛下储神渊静流化俭慈仰列圣之好生守为家法视四方而兼爱务得民心坐凝稽古之勲增衍後天之筭臣屏居海峤遥睇宸廷见黄河千里一曲之清第勤善颂效嵩岳万岁三呼之祝莫预周行

谢再任宫观表

一收朝蹟分老瀛壖六畀祠宮誠知帝寵顧胡顏而亟拜徒空食以懷慙【中謝】伏念臣晚幸偷安近尤多病四支而三痛楚几遂作于廢人十日而九呻吟惟退量于薄命第以慈親之待養曾無他計以謀生尚存未盡之年更望無功之祿仰於洪造方局地以靡遑敢謂隆寬俄自天而賜允里閭改觀耄穉交歡共瞻新渥之榮光又獲全家之飽煖即衡門而被寵望宸極以銜恩茲蓋伏遇皇帝陛下大度海至仁天覆俯憐簪履之舊未忍遐遺又與升斗之余使能羸給豈止一人之受惠實令羣下之歸心臣敢不強整衰殘愈思感勵奉琳宮之香火每自處於幸民挂神武之衣冠冀終全於晚節

謝落職表

孤臣失察盍寘大呵上聖隆寬止從薄責俄自天而有命几無地以容身【中謝】伏念臣生則多艱仕皆過分幸遇千齡之會寢叨八座之聯歸奉祠庭猶寓西清之直坐縻廩粟不勞南亩之耕頃蒙乘障之除庸示起家之寵方循墻而引避痛陟屺以纏悲顧平時藏拙之最深矧洊歲執喪而致毀猥緣親黨非意相干不善防閑自貽伊戚仰公朝之矜恕念舊物之顛連褫學士之班再斯可矣使臣工之肅其在茲乎迨釋服以及朝敢陳詞而謝罪慈蓋伏遇皇帝陛下冕旒無蔽簪履不遺以天地之心為心何止國君含垢之意謂兄弟之子猶子真得聖人觀過之仁遂於危踪止用輕典臣敢不闔門念咎望闕歸恩三黜何言但有動心忍性之戒余生無几徐上引經告老之章

謝龍圖閣直學士致仕表

致大夫之仕仰賴矜從進學士之班弗容避免念余齡之無几幸晚節之苟全量小已盈感深至泣【中謝】伏念臣學徒泥古才匪適時三列皂衣寢叨嚴近久坐青瑣遂積怨仇敢自詭以治民為專求于奉母侵尋一紀孤苦再期耄矣無能每媿祝厘之廩仕焉而已況逢告老之期洊貢封章遠投君父喜下情之上達荷人欲以天期誥頒東海之濱職峻西清之直鹿車還里難忘貧賤之時龍馬負圖乃畀衰殘之候何夢寐之敢及亦家世之所無茲非幸欤不翅足矣茲蓋伏遇皇帝陛下德新惟日仁覆如天俯眷么微忝螭陛隨班之舊更憐翫散當龍飛草詔之初尚問生全不忍遐棄聿頒茂渥式賁窮途臣敢不內誓丹心益堅素節退人以禮已增鏤骨之私教子以忠使效捐軀之報

謝落致仕除翰林學士表

代庖僭直又見卯年之周視草為真復坐乙夜之覽撫危踪而何幸尋故步以知慙【中謝】竊以詞禁遽嚴宸居密邇有直諒多聞之益乃可預于論思為溫厚爾雅之文始宜司於播告鼓風雷之大号增日月之末光匪得英髦曷勝遴選伏念臣學惟涉獵才乏菁華頃載筆于螭尋演綸於鳳閣以先朝之門客為天子之私人方成王訪落之初預聞國論逮漢家更化之始首被召音惟投閑一紀之余且告老三時之久茲以晚節衰殘之迹參內朝供奉之班念齊國之世臣所存無几嘆元和之學士不謂重來茲蓋伏遇皇帝陛下思任舊人聿修庶政朝綱日振急聞忠荅之言疆事未寧尤務坦明之制遂令庸陋亦玷招延臣敢不修葺荒詞仰裨藻飾

尚祈圣度俯矜草芥之微终俾凋年遂逐桑榆之晚谢吏部尚书兼翰林学士侍读修史表

比蒙召节趣归紫橐之班叠被恩纶尽复青毡之物德有乾坤之重身同渊谷之危【中谢】窃以才不可以强为人当知于自度非山涛之识量岂足典铨必陆贽之文章始堪视草露门赞缉熙之益虎观资润色之工曾未能其一焉奚可兼兹四者伏念臣既衰无用已试罔功屏居一纪之余且经告老入对九重之下恍若更生而乃冒选部之真除寻禁林之故步进读清闲之燕充员笔削之间敢言眼赤之何时深媿汗青之无日身章愈焕饬饰增华儒生之为祠臣误辱公朝之宠天子以赐学士尤加暮景之荣兹盖伏遇皇帝陛下政务惟新人先求旧取之数路宜广择于时髦备于一夫恐徒妨夫捷径凌兢拜命颠隍知慙臣敢不勉策庸愚仰酬眷獎掌选而分文武讵敢辞劳垂车以示子孙终期得谢

辞免签书枢密院事表

误恩下逮俾缀还联逊牒上陈未颁俞旨仰冒盖高之听不嫌再渎之烦【中谢】恭惟累朝特重右府岂独无三军五兵之本抑使闻一日万几之微才则甚难官何必备顾愚臣之无取荷上圣之深知起之挂冠闻废之余处以持橐清华之旧强颜寢久告老未谐尚不堪朝夕之论思何以裨夙夜之宥密进寓承明之直更列元良之宾揣已奚堪逾涯莫甚欲望皇帝陛下俯垂渊鉴洞察忧衷念已迫于桑榆盍居闲地傥未遗于簪履姑置从班别求经济之材以翌昇平之运

谢签书枢密院事表

铨部为真犹未经于满岁机廷筵式乃遽辱于颁恩逊避靡遑周章增惕【中谢】窃以官莫崇于执政職尤重于本兵必求文武之全才以任国家之重事边圉甫定尚勤宵旰之忧邦域以宁允藉弼谐之助岂应疲卒可预几微如臣者资实腐儒仕叨法从由久司于封駁故多积于怨仇十载归闲仰戴乾坤之施一朝收召复观日月之明不堪聽履之华伏上垂车之请敢期误渥俾赞洪枢血气既衰止合奉身而去军旅未学曷赞基命之严玷书殿之清班忝储局之下客被绣鞶于上驷束鏐带于裘衣采食有加宠荣已甚兹盖伏遇皇帝陛下人惟求旧政务图新谓代言于受禅之初未忘孤迹迨趣职于更化之始深鑒凋年岂云术业之可称盖自眷私之过厚遂容侥幸倍切凌兢臣敢不深感隆恩愈坚晚节老当益壮固欲殫报主之忠耄矣无能终恐负知人之咎

谢皇太子賸

谬参枢筦仍污紫殿之班兼预储宾始下青宫之拜以荣为惧得宠若惊【中谢】伏念某少也无奇晚将焉用挂冠而去真成治世之幸民扶杖以观亲覩大君之更化首只严召重覲清光俾视草于銮坡旋典铨于选部露门进读册府细书旧物复还空积妨贤之愧故山在望但祈得谢而归敢冀明伦擢登右府致此血气既衰之迹厕于衣冠甚伟之中揣已奚堪荷恩有自兹盖伏遇皇太子殿下惟中玉粹学振金声子职日供肃侍凝旒之侧官僚妙选误收华髮

之余某敢不益励弩才用酬鸿造退怜已老莫能陪宥密之司勉讼所闻庶或补温文之德

辞免同知枢密院事表

宥府选寮忽叨再命需章避宠尚闕一俞爰洊渎于宸聰冀终回于涣渥【中谢】伏念臣引经纳禄奉诏还朝始膺典选之除适预和戎之议既不能出奇策以强国势又不敢抗高论以窃时名深为世务之宜遂定从官之论邻盟已讲边备粗寬魏絳何功姑欲就怀戎之得利张昭虽老当使知将相之有人赖圣慈俯徇于和亲在臣下盍为之引咎自媿寡谋之甚难陪基命之司殆无地以寄顏惟竭诚而报主日图内治之要未知所先靡厌衆言之求尚不暇给有何劳效遽被推迁不胜据蒺之忧徒谨循墙之走伏望皇帝陛下俯垂渊鉴洞察愚衷岂惟微臣怀以荣为惧之恐仰祈睿筭笃居安虑危之心精求文武之才用赞枢密之任

谢同知枢密院事表

筵宥密之班未知图报拜便蕃之渥弗许终辞自揆僥逾实深感惕【中谢】窃以皇家严二府之建任固匪轻机庭分四等之差官毋求备贤相并兼于使领副枢足赞于事几既曰才难岂容序进伏念臣少无可老尚何堪扶病以对便朝幸不违于咫尺强顏而居旧着顾奚补于毫分假宠已多旬间未得敢谓七旬之後冒参两地之荣畀兴国熙奏之官已为过分加淳化寇準之职尤媿无名偶缘廷告之同时因与政途而接踵在法当从既超笔橐之联计日而言仅周天地之数并增采食洊被匪颁兹盖伏遇皇帝陛下懋建大中丕乘兴运谓股肱所寄方彙进于时髦虽筋力既衰亦使陪于末议未遑席暖复俾陞升臣敢不仰戴隆私益坚素守边陲甫定愿裨内治之谋里社相望期遂归休之请

辞免参知政事表

进参政柄诚出误恩冒贡逊函未回渊聽洊布恳祈之切敢辞俯伛之恭【中谢】伏念臣才不逮中身今既老十载排根之已甚实倍费于保全一朝收召而复还又屡叨于褒擢非敢忘知止之义盖欲坚图报之心今则疾疢交侵徒强顏而自腆年龄云迈顾纳禄之未能使在旬月之间稍有毫厘之补序迁而上已分已逾而况据案牍而书名虽具员而益愧对冕旒而奏事无长策之可陈误宠所加羣言必骇欲望皇帝陛下念经纶之事重思辅赞之才难别选英髦俾作调元之助毋容衰瘁更貽滥吹之讥或畀旧班俯存孤迹

谢参知政事表

充贰枢庭方慙玩惕晋陪宰路遽被推迁倍深临谷之危莫遂循墙之请【中谢】窃以朝廷建辅号天子之四邻政事参闻下丞相之一等定名称于乾德复官制於建炎必求异能乃副隆委伏念臣颓龄景迫壮志日雕再掌吏铨但守停年之格滥居宥府未寬思职之忧虽粗竭于譎才终莫裨于末议负二宜去有七弗堪宿恙渐侵将吁天而致祷误恩狎至真踏地以靡遑况秉钧当轴之虚员而知印押班之分日兼与汉章之约仍从商皓之游命服匪颁复赐天

闲之骏爰田增衍更开公社之封昔在本兵尚为僥冒兹叨助理尤惧旷瘵兹盖伏遇皇帝陛下盛德又新至诚乐与折冲御侮坐底于外宁聚精会神力先于内治拣求俊乂置在弼谐聿令衰退之踪亦忝延登之数臣敢不益殫愚虑仰赞宏规曰都曰俞愿窃慕賡歌之喜知足知止庶几从告老之私

攻媿集卷十七

卷十八

钦定四库全书

攻媿集卷十八

宋 楼钥 撰

表牋

代宰臣谢宣示太上皇御书宋玉高唐赋傅毅舞赋陆机文赋嵇康琴赋曹植洛神赋王粲登楼赋史节故事段陈羽古意诗苏轼养生论周兴嗣千字文御跋表

乾道辛卯春被赐真行草书总十卷臣下拜瞻玩心目开明窃惟书法自东汉迄于晋唐代有名家然莫不祖述锺张宪章羲献而各得一偏未有超轶拔乎其萃者恭惟光尧壽圣宪天体道太上皇帝高蹈羲皇之上游戏翰墨之间初若无意而笔力所到自得之妙集乎大成如春云行空千状万态远视前古有不足述固知天纵之能心与神会非衆庶曲学之所可致也帝王余事犹能至此顾不休哉三月二日臣某恭题

奎画昭回来从慈极睿思优渥宣示迹联是何不世之逢获快争先之覩【中谢】窃以翰墨有法肇自东都帝王好书无如贞观虽具龙蟠凤翥之体徒为心摹手追之勤若夫天纵之能拔乎其萃自得之妙集此大成聿观历代以还未有今日之懿恭惟【尊号】太上皇帝陛下宸衷渊静帝学融明一札细书居多方国之赐六经大训式畀胶庠之传既全脱屣之高益有怡神之乐坐进此道作新斯文取楚客之赋篇迨梁臣之韵语舒牋自适肆笔而成乃因五日之朝并演十编之富恭惟皇帝陛下茂隆孝治仰识圣心金口登明究羣书之蕴奥云章交焕掩二典之光华是虽余事之能然诚非曲学之所及中秘将严于尊阁外廷咸预于荣观臣夙际休期幸瞻鸿藻登牀竞取詎敢效昔人之豪镂玉匪颁尚几为私室之宝

代宰臣进吏部七司法表

朝建天官实总吏铨之要诏刊治典恭承圣作之规会衆目以毕张集前编之未备幸终载笔敢後奏篇【中谢】臣窃以皇家黜累洽之期选部有一成之法蜀中兴之始爰尽纂于旧章迨更化以来尝再参于中制惟奇请它比随日以滋而巧吏猾徒缘奸而奋乃裒四纪之治革修为一代之经常然而汉定章程止由柱史唐更律令亦任柄臣未有上轸渊衷俯垂明听凡曰甲令之着首尘乙夜之观亲洒宸毫具标汗简必使绎寻而尽善更容开释其所然既咨可録之言时出非常之断合吏封勳考之目贯敕命格式之文以至黜赃罪之赏延进军功于流内恩防寬纵例絶扳援莫非近古而便今务在举宏而撮要笔则笔削则削罔有差讹官言官朝言朝此为依据恭惟皇帝陛下治先自内名不假人澄三省之源已严道揆定七司之制更肃班僚立通用以去烦文申权宜以存故典警捕有酬獎之等陞改易参照之科使官人之方

得以兼明于核实之次诚非小补臣等粗殚末技莫望清光事仿石渠称制仰勤于临决才非山甫有司终媿于将明尚冀颁行庶凭遵用

代宰臣进仁宗皇帝今上皇帝玉牒表

神文出治光绍三朝睿主膺期系隆列圣鬯皇猷而润色写翠琰以齐辉【中谢】恭惟皇帝陛下政用时中言为世则继志述事亲承太上之心传遵制扬功尽循我宋之家法眷仁皇之盛际延今日之宏规惟天圣之元实基四十二年之治惟乾德之懿将继五三六经之隆爰命儒臣并修史牒登载斯谨会萃不遗稽故事以成编肃听朝而进御忠厚之及草木知积累之自来广大之配乾坤岂绘画之能见牙签初秩金匱秘藏臣获遇休明居慙典领祖功如在期载缵于无疆帝业方崇当特书而不一

代皇子邓王辞免册立皇太子表

丹悃冒陈祈免升储之命皇恩加厚未颁赐允之书仰叩九重敢伸再渎【中谢】臣闻元良以正万国记言世子之能继明而照四方易谨大人之象以奉粢盛之祀以系亿兆之心苟素望之无闻岂盛仪之敢受伏念臣性难语上学不知方仰承君父之规久亲师傅之诲奉长安日边之对蚤乏奇辞辨陈留牒上之书素无英识戴乾坤之大造升爵位之崇班安知怀德之维城但媿无功而受禄纶言忽播绮殿爰开实怀不称之慙难冒非常之宠伏望皇帝陛下特回圣意俯听忱辞不嫌涣汗之收姑寝震宫之建誓?子职少答睿慈

又代谢册立表

睿旨中颁诞开宫邸微躬内媿亟上封章恩深弗遂于循墙惧甚有同于临谷【中谢】臣闻仰观乾象前星密迹于帝星俯察坤维少海实源于大海历稽盛古必建元良自非有贤圣仁孝之闻备恭敬温文之懿何以贰体宸极正位少阳伏念臣学识无长器资非敏实托本支之盛屡叨爵位之崇日就月将幼已慙于慈训夏弦春诵今未底于多闻自媿孱庸居怀兢惧忽拜玉音之宠冒陞铜辇之荣入侍皇居仰承天序兹盖伏遇皇帝陛下仁周溥率明照几微膺列圣之丕图奉上皇之色养眷求主鬯以重承祧储德未充曷副人神之望睿谟素定不由羽翼之成臣敢不益念前修永遵雅诰谨文王安否之问敢怠帅行书唐宗仁孝之诗仰祈札赐

又代谢太上皇帝表

从五日之朝夙荷抱孙之爱拜十行之札俄膺立贰之求仰慈训之曲临惧微躬之匪称【中谢】臣窃以大人有继明之义盖取诸离长子为主器之亲故受之震豫建储嗣虽本前规获奉重亲未如今日伏念臣幸以弱植出逢圣时列亚保之崇班初非功致胙真王之尊爵深愧名浮徒以托体严宸承休慈极忽颁丹诏叨处青宫共知睿断之不同实本圣谟之丕显兹盖伏遇【尊号】太上皇帝陛下德高尧舜道合羲黄虽与造物者游自求至乐仍有孙谋之燕以永无疆爰举旷仪以安神器臣敢不力修四学祇奉两宫立爱自亲仰体承祧之重聿修厥

德敢忘念祖之勤

又代谢皇后牋

坤德无疆实依厚载震宫肇建遽及凡材【中谢】伏念臣托质天支承华壺则干戈羽翥教虽备于四时父子君臣学不臻于三善忽奉褒扬之册俾当监抚之权仰宸断之刚明赖母仪之裨助兹盖恭遇皇后殿下德齐任姒贤过娥阴教聿修坐致人伦之正淑谋经远更图国本之安臣敢不居近正人力寻旧学祇召而不犯驰道当奉君尊问安而必至寝门益【阙】

又代谢受册表

铜门肇啓方慙主鬯之良珉册诞颁更举临轩之礼恩隆天地惧剧渊冰【中谢】伏念臣素乏材猷积叨宠数金印盪绶蚤处于宗藩青盖斑轮俄升于储位复差良日爰御正衙备金石以盈庭俨纓缕而就列授之宝牒训以纶言退省其私不知所称兹盖恭遇皇帝陛下道高世表机照物先断自宸衷岂私于爱子藏兹旷典盖重于承祧臣敢不仰体圣谟恪供子职出有师入有保起居惟近于正人亲则父尊则君夙夜益勤于顺事

代宰臣贺立皇太子表

豕嗣称贤夙仰吾君之子储闱定礼果安天下之心欢动两宫庆均四海【中贺】恭以离着丽天之象继明实系于大人震有洊雷之文主器必归于长子辟东朝之缙礼绵列圣之不基旷古难逢于今创见恭惟皇帝陛下孝如虞舜乐似文王敬奉亲严屡上玉卮之壽大宁国本首开银榜之宫庆幼海之澄澜瞻前星之腾耀一人独断非由羽翼之成三善自将克荷宗祧之守臣叨居近列恭覩盛仪日下重光已备夙成之德嵩呼万岁敢忘归美之诚

代宰臣贺太上皇帝表

神谟早定俾建元储圣孝丕承诞扬宸制事关宗社喜动华夷【中贺】恭以甲劝之生嫡王孙但有命名之爱一日而见三天子止闻临澡之欢载在信书以为美事曾未有传神器而与子见东宫之立孙介弗禄于无疆固萝图而有永恭惟【尊号】太上皇帝陛下道高百圣仁覆万方翼燕孙谋独享後天之算储登世嫡共仰前星之辉问安获事于重亲主器仍归于长子臣欣逢盛际获在还联卜世卜年期过周家之历重轮重润愿赓汉乐之诗

代宰臣贺皇太子牋

储德日新久系于衆望睿谟独断爰举于旷仪覆载两间懽呼四起【中贺】恭惟皇太子殿下地居豕嫡天与奇姿震一索而得长男宣膺主鬯之寄汉元年而建太子益知享国之长仰九庙之储休信两宫之增庆人心自定神器愈安某等肃领鴈行进瞻鸡戟元良既正不烦贾谊之言盛美难名莫尽卞兰之述

代谢吏部侍郎表【以下四首代魏丞相杞】

代言西掖方拜误恩摄贰东铨复叨改命循墙莫避临谷增危【中谢】伏念臣濩落无堪迂愚自信正以经营于菽水故尝希望于斗升昨自外官恭趋严召猥厕内朝之鹄列亲覩上圣之龙飞五历粉闱一参月寺筹边戎幕无婉画之可称将命蓊庭幸欢盟之复缔冒柱史词臣之选兼宫端宝牒之司初无左右之先容尽出圣神之亲擢忽承帝制俾倖大官一新龟紫之荣仍假铨衡之长莫回成涣徒激懦衷兹盖恭遇皇帝陛下虚以受人明于分职怜臣孤立于宦路借以末光谓臣曾历于剧曹付之重委臣敢不寅遵邦宪严制吏奸朝夕论思虽素乏严吾之誉簿书期会庶勉追裴马之名

代谢侍讲表

摄居选部已困剧曹擢在经帙更承清问退慙衰朽有此遭逢【中谢】伏念臣幼历羈艰学无师法顾孤陋寡闻之习但为决科之资无疏通知远之经素匪专门之业矧是帝王之大学非为章句之小儒必求鸿博之人以究渊源之蕴岂容朴学获奉细旃兹盖恭遇皇帝陛下巍巍成功谦谦终吉时降至尊之势兼收可録之言遂容草莽之臣亦预金华之讲臣敢不黽勉微力缀缉旧闻为二三万言之辞敢求释义畅五十八篇之旨庶补重明

代辞免进国史转官表

约史何功敢叨醴赏腾章避宠未拜俞音洵贡诚衷仰干睿听【中谢】窃以三朝之治迹允为万世之成规信传信疑传疑已备不刊之典笔则笔削则削屡资多学之儒而臣方贰政之未几适成书之已久暂领纂修之职曾无润色之劳使冒赏而不疑则叨荣之太甚而况近辞珍赐陛下固已许其廉兹躋崇资公议必传以为笑谓少者辞而多者则受谓今日是则前日为非虽故事之有初在微臣而焉敢伏望皇帝陛下俯矜贱悃特寝异恩益使人心知清朝以名器为重誓殚愚虑効薄伎于志传之间

代遗表

生而致主曾亮采之无闻死不忘君岂效忠之可已危惊欲吐老泪先倾【中谢】伏念臣奋自羈单本无饶颺蚤厕熙朝之鹄序亲逢上圣之龙飞猥以譎材屡叨隆委凡一时清切之选皆九重特达之知兵交而使在其间备更险阻猷告而尔顺于外尝预论思寢历政涂遂登揆席迄缘朴拙用速颠隮俯怜簪履之遗旋畀屏藩之寄人言噂沓何敢控陈天鉴高明卒蒙昭雪赋以真祠之禄予之秘殿之名屏迹衡门衔大恩而莫报驰心魏阙顾一饱以何安今则蒲柳益衰桑榆既逼老将智而耄及福已过而灾生卧疾漳滨恍精神之易散游魂岱岳嗟顷刻之难留仅存余息之微重结明时之恋伏望皇帝陛下治功惟叙圣德又新总万几之要以充毓天和合羣贤之智以维持国是问安慈极日承尊养之欢注想中原身济规恢之业臣命随气索志与辞殫王度清夷固无烦于尸谏死期迫促徒自切于哀鸣

代知泉州谢进职再任表【以下四首代舅氏汪尚书大猷】

承南服之流忽叨因任进西清之秩并辱柬知拜宠命以增荣俯懦躬而有腴【中谢】伏念臣奋自寒远遭世休明分甘州县之尘劳敢望朝廷之拔擢十年服采寢登侍从之班千载逢辰曲被圣神之眷此虽摄六官之长犹未为贰卿之真及遂求闲遽超次对退惟愚孱已剧优隆起试外藩以治民而自诡洊更下考无报政之可书方将重上真祠之章岂意更升学士之列一变闽俗初无常袞之称更与泉麾仍继蔡襄之後已试如此其可再乎无功而迁诚为过矣兹盖伏遇皇帝陛下政先实核恩不遐遗念微臣非可用之才羸堪郡寄谓长吏多数易之弊就畀玺书复增延阁之华益重专城之任臣敢不勉其未至究所当行久悉邦风既无劳于问俗务攻吏事庶不负于分忧

代谢隆兴府到任表

上印泉南方遂祠庭之请把麾江右遽叨帅阃之除猥荷柬知若为称塞【中谢】伏念臣幸逢昌运忝缀从班昨辞远于修门効蕃宣于遐服目驻尧天之日月身留闽徼之山川未及终更已叨因任共知鼯鼠不堪五技之穷自分鹪鹩惟望一枝之足屡申诚悃仰扣渊聪卒蒙从欲之仁获遂投闲之志千里未还于榆社十连复冒于纶音旋促对于清光误亲承于睿獎授之方略俾以奉行兹延见于吏民方究询夫风俗惟南昌之名郡实上圣之潜藩襟带江湖首尾吴楚雨阳方若正赖春耕秋敛之勤凋瘵已苏犹藉左粥右餐之惠必得循良之吏庶安流冗之民岂应意愚堪此委寄兹盖伏遇皇帝陛下恢张治具驾御人材察臣久被使令既深知于德意念臣备尝险阻亦粗识于民情特畀虎符俾殫努力臣敢不布宣寬大禁戢奸欺当使田间尽改带刀之习且令州县母存珥笔之风

代贺太上皇帝上尊号表

啓龙楼七十之庆春朝将展于上仪率鹄列三千之臣至朔先加夫媿称事高治古懽溢绵区【中贺】窃以荐舜于天尧帝聪明而逊位以武为子文王逸乐以延年不有极尊之称曷为甚盛之举镂白玉之牒归美两宫建翠华之旗亲朝五日书契未有宗社无疆恭惟皇帝陛下道尽事亲仁先自内谓富壽之福为彝伦之所先而父母之年在常人而犹喜况承社稷之托亲见春秋之高自非得九州四海之懽心备五帝三王之全美何以效之慈极副我渊衷爰集廷绅取于经而定大号更推帝泽敛时福以锡庶民上皇增万壽之昌太姒嗣徽音之懿至矣尽矣不可有加舞之蹈之莫知所自臣退甘屏处莫预骏奔奏薄技于从官之间敢怀故步效三祝于封人之请徒切愚诚

代谢宫观表

十年念咎踏地靡遑一日奉祠从天而下孤迹有自新之路圣朝无终弃之人恩重难名感深至泣【中谢】伏念臣猥由寒陋误辱眷知持橐近班何有论思之益把麾远郡粗殫惠养之勤乡关甫遂于归休帅阃忽叨于推择患生意表盗起邻封调戍卒于属州授伍符于逋牧不

虞宿将反堕奸谋方腾讼过之章乃被督师之命大兵云集谓当指日而可擒丑类麤奔曾不回戈而内向力追踪于山谷尚假息于朝晡绩既弗成罪将谁执七旬未格莫宽西顾之忧三褫犹轻难追南迁之谪获归故里已佩深仁自量摈斥之余宜在孰何之外敢图鸿造悯其垂朽之年特涣纶言廩以祝厘之禄削刊丹籍叨窃素餐兹盖伏遇皇帝陛下治本隆宽政先总核动加矜軫岂为匹夫而求全凡与使令不以一眚而终废俯怜庸懦曲赐涵容臣敢不擢髮省愆铭肌感德散材无用深知复玷阙之躋壮志虽衰尚得效糜捐之报

攻媿集卷十八

卷十九

钦定四库全书

攻媿集卷十九

宋 楼钥 撰

表牋

代谢宫观表【以下三首代史待制弥正】

赋禄真祠俯从私请升班次对更出鸿恩是何极陋之踪得此殊常之渥【中谢】伏念臣志徒慕古才不逮人由庠校之诸生叨承延赏勉箕裘之余习传玷世科甘从州县之劳敢觊朝廷之选惟睿主曲敦于旧学故微臣误简于渊衷自给札于中书寢影纓于册府退量幸冒祗务靖共固尝持节以言归旋即予环而就列寸长尺短第知自竭于愚衷年除岁迁何意遂尘于法从代言西掖进读东宫皆老父之故官实儒生之希遇力辞禁筦改贰秩宗威仪三千兹岂养痾之地春秋八十不胜爱日之思奏牍朝闻俞音夕至廩以祝厘之粟宠之荷橐之联毫厘莫报于公家顶踵悉由于圣造甫还私室已拜宸纶兹盖伏遇皇帝陛下政本用中仁惟厚下素矜朴拙初无进取之心重赐褒扬庸示保全之意父子感深而至泣里闾圜视以为荣臣敢不增激懦衷稍休弱质循陔承志庶几弃官归养之风恋关驰诚尚勉移孝为忠之节

代谢皇太子牋

储禁简僚久充员于中护祠庭得请仍寓职于西清退省至愚敢忘所自【中谢】伏念某禀生甚弱赋性尤疎一经徒守于家传累岁寢污于朝蹟独惟老父获际圣君乃眷潜藩曾是甘盘之旧遂容小子亦陪绮季之游自惭迟钝之资无补温文之学丐闲得宠拜命知归兹盖伏遇皇太子殿下盛德在躬劳谦礼士两宫侍膳益勤爱日之诚千里怀亲深察望云之念俾从私志实荷隆寬某敢不只服训词仰承色养扶羸东下遽收迹于鴈行矫首西瞻尚驰心于鸡戟

代谢皇太子宫讲堂彻章转官牋

储闈进读尝预英游奏议终篇遂迁爵秩曾是优隆之渥亦沾远外之踪【中谢】伏念某学匪洽闻身逢盛际宸扆念甘盘之旧俾鰥生获缀于宾僚经帷繙陆?之书命鹤禁亦为之训说备见经纶之用具存仁义之言戒彼覆车实为可监申其占毕顾有何劳方兹去国以奉祠乃以彻章而受赏被恩有自揣已知惭兹盖伏遇皇太子殿下任重承祧志勤好古传圣父诚明之学自得之心玩名臣论谏之文如对其面尚思记诵使遂褒陞某敢不拜手只荣铭心戴德一物三善固知裨赞之无功九弊六条更冀讲明之不怠

代贺光尧壽圣宪天体道太上皇帝壽圣明慈太上皇后上尊号表【以下六首代温州曾吏部远】

熙事备成惟圣人能飡帝徽称具举虽天子必有尊權动两宫化刑四海【中贺】窃以太上立德本无事于饰名大美不言顾曷资于崇报虽九载已都于显号而一人尚歉于宸衷乃因泰時之精禋并举累朝之旷典恭惟皇帝陛下恩被动植孝通神明登大位之崇高受上皇之付托玉卮称壽视昔有光宝册奉亲自我作古谓天祖羣物式昭时宪之明谓道法自然更着体元之正俞音诞布盛事一新万国得權心共仰仁天之大百姓加德教益知圣治之彰臣出守偏州恭承明诏捧觴再拜顿回凤阁之春稽首三呼但想龙楼之晓

代贺太上皇帝表

礼行于郊咸庆缙仪之备尊归于父聿严嫣称之加覆载两间欢呼四起【中贺】窃以巍巍者至高之貌用形容于博衍优游荡荡乎民无能名独着见于聪明文思仰尧仁之天大迈汤德之日新宜因百神受职之时更益大德得名之懿恭惟【尊号】太上皇帝陛下怡神于淡游物之初膺宝籙以兴拜授神器而与子凡此知人安民之要传诸问安侍膳之间黄屋非心乐逍遥于特室紫坛藏事介福履于慈闈虽秉谦尊莫回忱请光之大大之谓圣已陶万国之欢天法道道法自然益显百王之冠臣叨凭熊轼莫筵鴈行想汉殿之觴宁免滯南之叹効华封之祝敢忘拱北之诚

代贺太上皇后賸

备举盛仪诞扬懿号凡资持载罔不權呼【中贺】窃以迎长者三王之郊既告?于上帝有名者万物之母爰归美于慈亲益增地道之光深副天心之愿恭惟【尊号】太上皇后殿下德高任姒功迈娥?力赞睿谋亲授重华之帝尊同太极式安长乐之居受五日一朝之荣备四海九州之养爰因大祀载举徽音箕畴谓视曰明用显进贤之志老氏以慈为宝於昭生物之恩合兹二者之称仰止一时之盛臣分符有守恋阙无阶莫陪椒掖之趋但剧葵心之向

代谢立皇太子降赦表

储禁宏开宸纶诞布法前星之瑞象仰粲重晖扬少海之余波沛为膏泽神人胥悦宗社奠安【中谢】恭惟皇帝陛下道冠皇王仁沾动植端居南面受光尧付托之隆豫建东宫绵有宋延洪之福爰推恩霈下及黎民罄万国之欢心属一人之有庆臣叨紆郡绂阻贺阙庭比屋欢呼咸喜元良之正微衷感励谨宣寬大之书

代谢御书戒百僚手诏石刻表

诏旨中颁具孚羣听宸章申锡下及侯邦凡属照临举知感奋【中谢】窃以官刑儆有位之士成汤切戒于三风手书赐万国之臣光武尤严于一札聿稽前代王者之盛未如今日天语

之温盖九重虽备于躬行而百辟或违于德意玩岁愒日犹有谬悠拱默之流易虑洗心尚乏砥励激昂之气仰劳翰墨下访臣邻一新琬琰之刊传甚置邮之速兹盖恭遇皇帝陛下循名责实任贤使能形忧勤于宵旰之间十年于此示好恶于用舍之际四海胥然爰申播告之修更勤励精之始臣叨膺郡寄肃奉训辞祇率乃僚各共厥职欲令真伪毋乱敢为欺谩之文会闻上下相安莫有苟且之志

代谢直秘阁表

滥膺郡寄初无善状之称寓直奎文忽被宠光之渥拊躬有腴拜命增荣【中谢】伏念臣学昧家传才非时用猥缘遭际得効驰驱衣以绣衣虽谨惟良而折狱置之粉省未知何自以为郎退寻於越之居俄假东嘉之守四郊菜色重丹旻之忧勤一介萍踪荷玉音之临遣首问吏民之疾苦备闻田里之叹愁凡所奏陈悉蒙垂应移邻邦之粟不容遏余之私蠲下邑之租又免追科之扰罢民粗给和气随生雨阳以时黍麦增稔闾境方歌夫圣德误恩乃及于守臣顾抚字之徒劳媿清华之非据兹盖伏遇皇帝陛下核孝宣之名实总光武之权纲民瘼是求尤重专城之寄玺书加励滋多循吏之贤顾如微臣亦沾醴赏臣敢不仰衔鸿施俯竭駑才未读五千卷之书已冒登瀛之目加抚十万户之衆誓坚报国之心

谢庆寿赦加恩表【代龚参政茂良】

慈皇介寿幸陪前殿之仪庆沛颁春首被通侯之宠循墙莫避躋地自惊【中谢】窃以尧年符巽位之期舜孝极重华之盛请福寿之祝百僚咸预于骏奔下寛大之书万国宜沾夫锡赉岂繄迹列独冒殊恩况骖馭之文尝获登于徽册以蹒跚之质偶进摄于上公固已不胜千载之荣敢意更窃九重之眷封疏故郡地衍多畚端章甫以立朝安识周旋之中礼分茅土而建社自慙谈笑以封侯兹盖伏遇皇帝陛下义笃奉亲仁均厚下广宫闈之至乐用以及人録臣子之微劳遂先与邑臣敢不誓殫素节仰报鸿私五日一朝密扈天顔之睟穆万年亿载永瞻孝治之光华

代仲兄谢严州到任表

负丞棘寺久媿空餐假守桐庐遽叨共理初以还乡而拜命终然便道以之官被宠过优抚躬莫称【中谢】窃以子陵旧隐浙水奥区昔为太上之潜藩今实行都之近辅频年旱潦多凋瘵之民累政推迁宜择循良之吏如臣者稟生甚陋懵学寡闻猥承延赏之余甘老徒劳之役偶平诏狱入仕帝京财货暴如丘山敢辞委吏文书盈于几阁第谨攸司逮联敕局之删修才脱选途之尘穴进参外府曾何补于公家移赞司刑颇服勤于臬事衔上恩而莫报念色养之多违因谒告以遄归以治民而自诡仰蒙睿眷径畀左符方少遂于家居忽又承夫人乏盖歉岁方劳于旰食谓小臣曾对于清光颁严旨以趣行免内朝之临遣望龙顔于九陛不胜恋阙之心侍鹤髮之双亲少展循陔之志兹盖伏遇皇帝陛下天临万宇器使羣材培植邦基尤重牧人之任茂隆孝治俯推锡类之仁虽久历于王官必加试以民事有如臣辈亦在选中臣敢不恪奉教条布宣德意中外本一致顾何有于重轻忠孝无二心誓益殫于报効

谢南郊肆赦表【代温州莫给事济】

泰時陈仪聳百神而受职端门肆眚罄万国以归仁覆载两间懽呼四起【中谢】窃以圣人享上帝既竣事于圜丘厚福浸黎元爰疏恩于方夏配天其泽与物为春恭惟皇帝陛下历数在躬聪明作后治内以治外期臻宴粢之隆事天如事亲曲尽寅恭之至粢盛丰洁圭币辉华风马来临已见高灵之随星鸡载举喜闻鸿霈之颁不俟终朝遂沾四远臣逖居支郡莫望清光趋左右而奉章徒想冠裳之盛率将吏而拜诏更欣囹圄之空【北齐宋良为清河太守甚有善政天保初大赦狱内蓬蒿俱满无囚可赦惟率将吏拜诏而已时温州两狱俱空】

代谢举官不当降官表

守臣繆举莫盖前愆司败议刑尚从寬典仰至仁之善贷拜严旨以犹惊【中谢】伏念臣顷自作州屡尝荐士虽昧知人之鉴敢不尽心偶缘入幕之宾实能办事察之既至举者亦多况闻奏牍之交驰皆谓吏材之足取逮升剧县颇着能声雀角鼠牙乃寢招夫仇怨瓜田李下曾不谨于嫌疑嘖有烦言自貽伊戚在昔亲民之始尝陈同罪之章历时虽多逃责无所与洁而不保其往祇佩训词之温取人而失之以言深犯圣门之戒仅行镌削仰赖保全兹盖伏遇皇帝陛下驭下惟公待臣以恕谓引其类以俱进任则甚专若简乃僚而弗咎将谁执臣敢不深思创艾益谨品题应物未明当起惩羹吹齏之念求贤图报敢萌因噎废食之心

代谢知琼州表

一札十行俾远凭于熊轼四州百洞幸利涉于鲸波首及治封具宣德意【中谢】伏念臣奋身疎逖赋性愚蒙蚤叨世赏之延屡困宦途之滞字民淮甸慙非制锦之工式政衡阳有玷题舆之选顷分陋郡未及期年资浅望轻易致人言之噂沓地偏财匱不堪岁计之支吾已甘置散之科安有复然之望岂图擦拭更任蕃宣眷古珠崖实今琼筦邈在万里之外颛居一海之中汉晋废置之不齐隋唐分合之靡定久服本朝之声教遂同内地之流风惟黎母错居当谨边防之虑而贾胡遥集实为舶政之源自揆庸虚难胜寄委兹盖伏遇皇帝陛下仁思济衆德务包荒缅怀卉服之人遴选竹符之守知臣尝更于远外或可承流谓臣备历夫险艰庶几使过臣敢不仰銜恩纪谨布邦条幸依两伏波之神母憚三合溜之险仕方行志敢为乘桴浮海之言忠不忘君徒咏登楼望京之句誓殫努力用答鸿私

代贺太上皇帝庆壽表

啓七十之庆将传万岁之玉卮率三千之臣先上两宫之宝册美备形容之至光增授受之初孝治愈隆生民未有【中贺】窃以子有天下而尊为父方当祝耆艾之辰德为圣人而得其名詎可袭寻常之号一纪再加夫躋典九重尚慙于渊衷兹讲未央之仪爰采康衢之颂荣归慈宸燕及中闈恭惟【尊号】太上皇帝陛下道大难穷功成不有聪明逊位於昭与子之公逸乐延年自得从心之适曰仁曰德无能名焉乃武乃文纪其盛者【尊号】太上皇后殿下久参太极密贊重离天下济而地上行允谓相成之道尧南乡而舜北面实同稀有之期皇帝

陛下爱笃严君亲传家法谓壽富之福惟彝伦之所先而父母之年在常人而犹喜况承社稷之托获见春秋之高不有极尊之称曷为甚盛之庆优游博衍虽问之朝野而不知扬厉铺张要编之诗书而无媿礼文照古云物致祥欢均轩陛之间化浹华夷之外臣预瞻鸾辂入覲龙楼嵩岳传呼诚四海九州之至乐赭袍端拜愿十年一庆于修龄

代新进士谢赐花表

柳染青袍叨预天官之燕花裁绛彩更分禁籞之春敢望微生遽承华宠【中谢】伏念臣等性根浮弱学植荒疎吐天葩之奇篇初无词采啓琼林之茂典咸戴恩荣谢槐市之旧游寻杏园之故事兹盖伏遇皇帝陛下仁沾行苇材育菁莪万国春阳顾岂遗于寒谷九天雨露遂均及于羣英臣等敢不种学绩文去华务实芝兰馥烈但坚自洁之心桃李芬芳共乐不言之化

代赵侍郎【粹中】遗表

负罪屏居方还旧物卧病垂絶将谢明时顾属纆以甚危犹恋轩而不忍孤忠未泯衰涕徒倾【中谢】伏念臣起自诸生粗传末学弟兄射策偶登俊造之科州县服劳安有功名之望奉圣旨欲收于羣策谓故家或有夫遗才尝因轮对之初悞辱袞褒之宠神会气合不自知遇主之因年除岁迁俄寢上从臣之列二史屡书于言动三铨深昵于奸欺承摄琐闥亦知效古人批敕之节建明谋议欲以奉列圣在天之灵虽自诡以治民讵敢忘于报国迨池阳之奏课就茗水以交符投檄得闲归处四明之旧隐腾章褫职诵言一卒之幽冤固知不辨而自明卒荷容光之必照矜其久困赐以更生通禁路之班许寻故步继廩人之粟俾尽余年未酬骨肉之恩俄属负薪之疾水浮肤而成痼药苦口而勿灵残息仅存大期已迫媿论思之无补尚攀恋而有言伏望皇帝陛下寅奉慈闈益隆宝祚以寬仁壽天下之脉以清静养主躬之和尊艺祖肇造之功早正东向之位念神州沈沦之久无忘北伐之图臣易箴何为盖棺遂已生无可恋敢言滞太史于周南死或有知尚可抗杜回于辅氏

代陈阁学【居仁】遗表

承命造朝旋抱负薪之疾奉祠还舍遽兴易箴之言忍死有陈报恩无所恋明时而何及洒哀涕以空悲【中谢】伏念臣生也无奇幼而孤立自世赏而策进士奉大对于高皇之廷繇穴僚而登皇官受异知于孝宗之圣晋游学省出试州麾收眞郎曹殆遍更于宰掾擢居柱史遂径躐于词垣陟彼岷以纒哀予之琴而终制误蒙慈宸屡畀左符际真主之膺期升大邦而分阃每经烦使实坚徇国之心纵有微劳皆是守藩之职敢意凝旒之眷忽叨召节之颁云气在前不许三山之到君门甚迓翻成万里之遥抚薄命以自伤怀孤忠而莫吐卒困阴阳之寇竟违咫尺之顔洵贡忱诚僭干渊听念甘泉从臣之已老况正元朝士之无多祝厘之请则却而後从寓直之宠则辞而不获仰戴天地生成之造得为山林休养之谋然而精爽欲离形容尽变抵家而迹未定过信而病益增身方卧于漳滨魂已游于岱岳龙光采厚愧未补于秋毫驹隙易驰将溘先于岱露少留残景冒进危衷恭愿皇帝陛下寅绍皇图聿新孝治躬忧勤以致中兴之业进英俊以巩太平之基内修外攘坐复祖宗之旧东渐西被聿观声教之行臣假息

几何盖棺遂已尘劳五纪怅莫赋夫归田冥漠九原顾敢忘于结草

攻媿集卷十九

<集部,别集类,南宋建炎至德佑,攻媿集>

卷二十

钦定四库全书

攻媿集卷二十

宋 楼钥 撰

奏议

论实用空言【任敕令所删定官轮对】

臣闻善为天下者贵实用不贵空言然名为空言而行可底绩者乃所以为实用号为实用而行之不实者适足以为空言此不可不察也陛下即位以来大开言路收揽人才慨然念治效之未及鄙无用之空言而务求其切于实用者此诚得孝宣总核之意而言者不思曾为实用之说累年以来言者甚衆往往已陈而厌闻于是旁搜曲取毛举以应故事民力方匱而言利不已法令已烦而变更日增凡此皆号为实用者言之则真若可听行之则不见所益从而委以施行课其成效则且多其图册列数以美观览然则所谓实用者果非空言乎孟子陈尧舜之道以为齐人莫如我敬王陆贄论谏于抢攘日不暇给之时未尝不本于仁义堂堂本朝陛下聪明英睿隆寬尽下而进言之士不闻引今据古訐谟远猷徒藉细故以为实用而售其迎合之术臣窃惑之唐太宗求治之初魏徵仁义之说自今观之是为空言封德彝法律之说自今观之是为实用然太宗断然行魏徵之言而成贞观之治外户不闭行粮不齎斗米三钱几致刑措蛮夷君长带刀宿卫且曰惜不令德彝见之然则孰为实用孰为空言也臣诚不佞瞻望清光之初诚不忍自弃所学摭摭细故以幸于施用且深惧六经致治之成法寢为空言是以冒天威而进其说惟陛下赦之

论灾异

臣闻魏相之事宣帝多以异文为言李沆之相真宗每奏不美之事皆忠臣所以事君而良史所以垂教也盖人主居富贵之极操生杀之柄谄士日进佞说而直者亦难尽言祥瑞之出则润色而张大其辞灾异之见则掩覆而变易其占此二臣之所忧而明主之所察也陛下之畏天可谓至矣四方水旱盗贼之事无有不知知之未尝不深图而力行之天之仁爱陛下亦可谓至矣不以休祥为太平之应而时出灾异以示警戒之端夫天人之间相去不远太戊称宗实由拱桑之祥宣王复古厥有云汉之诗罪已而兴谅非虚语遇灾而惧适为盛德臣愚欲望陛下深求其故俯询愚言寬民力録囚徒凡可以应天者务求其实则治道日举圣德日新上答天心下遂人欲今日之异後日之福也臣之论奏动涉迂缓而爱君之心不胜惓惓惟陛下裁幸

论二广赏典

臣窃惟赏典之设以劝勋劳轻重均一则人心厌服抑扬失当则不能无辞立法之际不可不谨也广南东路西路转运使副提点刑狱到任许奏补子孙或期亲一名盖以其远入烟瘴之地人或惮行故以此劝之顷因言者谓广西漕宪置司静江到任不许奏补任满止转一官然广东漕司在惠州宪司在韶州与静江风土不甚相远广西以言者所论而减赏广东以论者不及而仍旧数年以来未之改定夫广南两路皆有瘴乡监司巡历其间岂应以易地而镌赏若旧法为是则广西不应独减以其太滥则广东不应独得比年臣僚以敕令所见行修法难以着为定令尝有申请得旨令给舍看详因循至今未有明文欲望睿旨检举淳熙元年臣僚所奏令给舍疾速定义或予或夺着为成法则事出于一无不平之议矣

论玉牒圣语

臣闻尧言布天下非若後世诏诰之言也盖其都俞吁咈出于心而应于口行于身而形于言是所谓有德必有言者也陛下临御以来言之闻于外者天下诵而歌舞之臣前载幸获一望清光天语之发震服不暇独念亲逢尧帝之圣而寒远小臣无由时闻玉音既而蒙恩兼职玉牒始尽见记注所载仰而叹曰陛下之言随事而应是皆出于心行于身察见治乱成败之机质之六经而暗合考诸三王而不谬备在编简不一而足臣不能悉举以进敢取其大者而铺张之陛下尝语臣下曰声色之事未尝略以经意至于宝货珠玉侈丽奇异之物心所不好亦未尝蓄之读通鉴至杨阜见人主之非则勃然触之与人言未尝不道陛下曰人君听言不可以人臣漏泄为罪纵使漏泄适足以彰君之美因举陆?之言曰谏者之狂诬明我之能恕谏者之漏泄彰我之能从又读至黄皓事陛下曰人主于近习不可不远昔仇士良教其徒固宠之术可以见矣又读至冯紵沮张华事陛下曰小人之谗君子其浸润肤受委曲如此使人主堕其术中而不知绍兴三十二年十一月有旨令入内侍省权免进子陛下曰祖宗以来止许人进一子此曹人多则党盛今人数不少若平居无事犹可汉唐之事是已隆兴元年九月有旨已降亲札付张浚王彦应兵将官有奏报文字及有陈乞并宜付通进司投入毋得依托左右近侍以进凡此六条皆人主之要道当今之急务爱君忧国之士欲言而不敢且累千百言而不能得其要者陛下于从容问答之间形之于言可以大书于方策可以为法于後世猗欤盛哉故斥声色异物之奉容人臣谏诤之直远近习察小人减内侍之进子禁兵官之依托皆陛下躬行之实心术之妙宜其不假润色而发于外者如此其巍巍也臣昧死不胜惓惓惟望陛下持之以诚守之以久日行其道日新其德当如周之文武终得逸乐之福毋使唐之魏徵谓不及于贞观之初则天下之幸社稷无疆之庆也

论土木之费

臣仰惟陛下恭俭惟德敦朴为先宫室苑囿未尝兴作禁御游观之地至有弗葺者自非殿宇之缮修学校之崇饰府库之辟官寺之徙不肯轻用民力盖圣意深知土木之功实为官私之蠹故节费省事以垂後则然臣窃见比年以来工役相继亦间有不急而可以缓为之者土役之劳扰非一蓄材植者有强买之惧事未作者有苛役之扰广道路则列肆有毁撤之惊撤基址则连甍失已成之业如此等事未易悉数或曰是役于游手而不妨田里之农事是出于赢赘而不关有司之经费物皆给以市直而无科敛之扰劳皆予以赏典而有劝功之心是皆不

究夫利害之实者也游手之役不费于财乎赢赀之用不出于民乎给以市直徒有其名予以赏典不及于下命令之出谁敢不承要不若前数年之无事于此也故尝谓人君之善俭者当如汉之文帝而善于用言者当如我朝之太宗夫以汉室之富百金之费宜不足惜而文帝以吾之百金计民之常产一台之费可资十家遂终罢之每事如此安得妄用此所以为善俭也以王府之贵营一假山亦不为奢而姚坦之言深切似过太宗时已为之一闻坦言叹其伤民亟命毁去言非亲闻感悟如响此所以为善用言也以今观之民贫益甚下户之产不直一金田野之夫终岁勤动而不免饥寒闾阎之人以数百钱为资生之策一役之兴费以千万计者不知可为几家之产州县之间一金一粟之不输则鞭笞立至追科之日械系满前号呼塞耳锱铢积之以充府库一役之兴费以千万计者不知出于几人之输然则文帝之言为有旨坦之之言为甚切太宗皇帝之德卓乎其不可及也以陛下之恭俭敦朴而臣犹敢以此为言者诚以今日事力尤非文帝太宗之时之比则爱惜浮费当又过之臣愚欲望睿慈念财用之至艰罢土木之不急远追文帝之美近法太宗之圣更复深軫姚坦之言则节省之益非止一端恭俭之盛冠乎百王日计不足岁计有余富庶之源当由于此臣狂愚妄论惟陛下赦之

论六曹法司

臣仰惟陛下垂意章程务极平允爰念吏部七司所关者大修书之日详加裁择书成之後又为总类名目虽分条贯归一诚以法守之地不可有毫厘之差也臣窃惟修法之事固已周密用法之吏尚有可言盖七司之法颁之四方而用在吏部长贰郎官年除岁迁难以必其通习吏人各自行案又未必尽知源流则是用法之责全在法司夫文法之习至以名家要须明练条章旁通伦类习之有素以为术业然後可以审处是非议定轻重窃见绍兴元年臣僚申请七司各有掌法案止系收掌文书即不共检条法乞将掌法案改为检法案内手分并于本部人吏内选差谙晓条法之人如本部无可选差许踏逐指差使掌本选之法事有不能决者听委法司铺叙条格然後长贰据法与夺此诚用法之要也属缘节次降旨裁减吏额往往将外差法司充其减罢之数目今虽有法司去处亦不抽差谙晓文法之人止是就本部迁补既非素习又复迁徙案分不常其守安得明习贯穿以资关决修之甚勤而用之不求其要诚恐有所未尽也臣愚欲望睿旨明诏攸司详考绍兴元年指挥专置法司厚其廩给而严其罪罚久其岁月而优其迁补使事有所任责有所归庶几有以仰称陛下立法之至意如蒙圣慈采择以为可行六部亦乞尽依吏部处分或恐重于多置吏额莫若随其事之剧易吏户刑三部则各置二名礼兵工三部则各置一名并择晓法之吏使之专意于此长贰郎官提纲于上法司守职于下则六部之事皆得其平矣

论治道【任宗正寺主簿日上】

臣闻人主之德与臣下不同臣下苟有寸长皆可以自见上之人舍所短而取所长则无不可以用者人主天纵多能下视臣庶是必备道全美百行衆善无一毫之歉长虑却顾万几庶务无一事之失然後足以御四海而图治功由汉以来人主銳意修政率不过数年而怠陛下以睿哲之资临御二十年而忧勤兢畏踰于初载臣下不足以望清光尚何俟于微臣之言猥惟人臣之事君非必皆好为谀悦盖其心每期君于善一有盛德谏训将顺归美惟恐不尽以期

人主为善之心间有不及则敢言者寡故天下之事惟见其全之尽之也人之一身见有无受病之处天下之大见有无蠹弊之原善养病者不以无病而废调摄善为国者不以无事而缓戒惧然後为得也汉唐贤君非无可传之烈如高祖之好谋能断文帝之以德化民武帝之雄材大略宣帝之赏罚必光武之身济大业明帝之幽枉必達唐太宗之除乱致治明皇之励精庶政宪宗之刚明果断有一于此诚足以建功立事措天下于小康然而必有以议其後而民亦有受其弊者正以如前所陈见其所长不见其不及而不能以自勉也是以尧舜之盛曰儆戒无虞曰兢兢业业一日二日万几汤以六事自责曰政不节与使民疾与宫室崇与妇谒盛与苞苴行与谗夫兴与故儆戒兢业在尧舜为不必虑所谓六事者又皆汤之所无而圣帝明王举其不必虑与其所无者日以自勉盖不惟未尝一日忘天下亦惟恐吾身毫髮之不尽此汉唐之君所以不能进也方今边陲虽靖而夷狄未宾纪纲虽举而万目尚疎敦励士气而廉耻不振撙节国用而公私俱匱比岁丰登民力且困重以岁旱尤难支吾陛下日昃视朝广求民瘼无所不用其至臣诚不佞窃希古人责难于君耻不及尧舜之意欲望陛下远稽古昔俯鉴近代凡其可取者必思兼备于今日凡其可戒者日思所以去之如汤之六事皆今之所无亦从而深求其端倪则圣德日日新又日新上益有以当天心下益有以泽民物以是而求所欲为者无不济矣臣不胜惓惓爱君之心进刍蕘之言惟陛下择焉

论责成

臣仰惟陛下临政愿治垂二十年孳孳万几兴利除害诚不为少臣愚无知窃有进焉凡天下之事君相讲求于上士夫献纳于下大纲小纪略已周徧而事之已议议之已行未底于成而遂止者尚多有之臣尝考求其故盖朝廷议之既熟成命一颁则谓事已施行下之人奉承约束文移行遣纷纭良久则以具文告于上方其播告之初天下皆谓其必行书之记注亦曰某日行某事其实事未及竟而止矣此所以事绪徒繁奉行者无所适从良法美意日讲于前而泽不得下究事不见成绩故迄今算计见效未能甚称陛下大有为之志也事有大小小者可以立办一出睿旨随即罢行若事涉大体所以为国家深长之训者是非磨以岁月不见其成且如屯田为富国之本水利为农事之要陛下最所留意施行不一然至今不见成效行之太遽者或至扰而无益行之太缓者或至寢而不报岂天下之事终不可为也臣愚欲望陛下遇事之欲行者俾大臣详加审订若度其行之终无益或利赖微末而不足行者悉从简省若其必可行而稍费岁月者朝廷置籍记其事端及施行之日月约事之大小为久近之期以时举催不办不已如此则事之欲为者皆有端绪陛下听纳之勤图国之妙日底于成而後治效可覩矣

论宗室右选岳庙

臣窃惟国家忠厚之德冠絶前古亲睦九族无所不用其至是以庆源蕃衍人才辈出皇朝盛事尤非历代之所可及近岁以来修谨好学者日衆士夫敬仰之不暇此皆陛下圣德感化之所致也然由进任子子为左选者堂除铨选各有成法无官人有孤遗请给亦足以活其家惟是官右选者人数极多往往远外无援鲜能自拔于稠人中以求用于时添差又有限员不可多得惟恃岳庙以餬其口州县又以窘匱之故俸给不能一一如期所在多有无告之人历岁

寢久员多缺少已不免待次之窘近降指挥顿减员额大约四分中几减去其二三凡宗室之赖岳庙以为生者待次遂至四年狼狽立见诚可矜悯如此则有官者还不若无官人孤遗请给之优陛下富有四海宁肯于天族较此毫末但以宗室不敢自言故此情无由上達况夫礼义生于富足一有失所则流荡为恶如水就下犯法者必衆尤非所以爱之也臣愚欲望圣慈深軫磐石之宗尽复岳庙员阙庶得天族各遂仰事俯育之计以助成信厚之风不胜幸甚倘或圣意犹以为冗则乞明降指挥于前所减数内复三之二或且复一半之数亦可少寬目下艰窘之状不为小补

论浙江渡船

臣窃惟江水之险无如钱塘不惟水面阔远风涛可畏加以沙涨无定日有改易大驾驻蹕往来尤衆绍兴初年渡舟屡有覆溺盖舟人贪利捆载以行弭櫂中流恣以乞取忽遇风涛举舟覆没操舟者独以善泅获免是时留守司转运使措置官造巨舰舟之受人各有定数立旗卖牌各有色别以卖牌之入为篙梢及补苴之费自此往来安便所利甚溥成规具在可举而行中间一再修葺近复废坏不惟渡舟罅漏成规亦不复遵守人畜杂糅私渡竞进近者连日有覆溺之害都人骇愕行道伤叹臣愚欲望圣慈行下两浙转运司修造官舟务极坚壮悉举元立约束以济病涉之人在官司为力甚易而人之受实惠者不知其几惟朝廷亟图之

论道学朋党【任宗正丞日上】

臣闻天下之大患每起于细微明者察之昧者忽焉不惟忽之复以察之为过迨其既成又已无及此天下之患所以相寻而不已也後汉党錮始于甘陵南北二部之谣唐之朋党始于李宗闵贤良之对本朝元佑党籍始于二三士夫不得志之徒事之初生若不足忧横流不止害不可言今日朝廷清明岂复有此然初见端倪不得不虑是敢先事而言宁犯狂僭之诛不忍自为緘默惟陛下察之夫道者天下之所常行学者士君子之所当务秦汉而下斯道不明诵说相夸去本弥远国家累圣传授敦尚斯文教风聿兴名儒间出讲明经术究极精微然後语道者不涉于异端为学者不至于无用恭惟陛下天纵圣性帝学高妙体斯道于已安而行之赏不轻予刑不遽施寬猛相济无有骇政执中之传也喜怒不私嗜好不闻隆寬尽下有言必从克己之仁也離離在宫临朝尊严清闲之燕不见惰容谨独之戒也清心省事湛然凝静物来斯应无所适莫正心诚意之学也凡前儒讲贯发明之大端惟是数者而陛下兼而有之臣愚何足以测识然青天白日孰不知仰而士大夫之议论则有可疑者臣窃惑焉比年以来曰执中曰克己曰谨独曰正心诚意往往有所讳而不敢言人主躬行此道于上而士大夫反讳言于下试考之十数年间章奏无虑千万未闻以一语及此而又相戒以毋言孟子曰齐人无以仁义与王言者我非尧舜之道不敢陈于王前以为齐人莫如我敬王者而圣世乃有此风何耶故凡士之端谨好修谈论经礼者一切指之以为道学小则讥笑大则折辱又甚则疾之如仇士之遭此者其间盖亦有以自取然而俱为士夫由学以进所谓同是尧舜同非桀纣而何相疾之甚也臣尝读大雅之诗曰君子实维秉心无竞谁生厉阶至今为梗诗人之意盖曰厉阶之梗由夫好竞者之为之也使士大夫操心无竞则何自而至此耶臣尝求之牛李之事虽曰李党多君子牛党多少人然德裕一闻御史大夫之除则流涕寄谢至其不然则遂为仇

敌呜呼非竞而生厉阶者乎元佑绍圣之事又可知矣故尝以为近习之排士夫非衰季之世无此若士夫之自相排虽盛时亦不能无之汉之党锢权在宦官乘主之昏而肆为之无足怪者若唐之朋党元佑之党籍则士夫自相倾轧使人主莫知适从为害尤甚盖惟人主能用中然後可以消弭于未然而使天下不至于甚弊惟士大夫能无竞然後可以衆贤和于朝而使国家不生厉阶今陛下执其两端而用其中自不应过虑而察士大夫之间未能无竞向者犹止以虚言相讥诃而近者颇有其迹矣臣愚欲望睿慈明诏中外咸推无竞之心勿徇一偏之见精白一义以承明主之休德臣前所过虑自可以消弭于冥冥之中臣不胜拳拳惟陛下裁幸

论明政刑

臣闻孔子曰道之以政齐之以刑民免而无耻道之以德齐之以礼有耻且格孟子曰国家闲暇及是时明其政刑孔子以政刑为缓而孟子以政刑为先人或疑之盖一道也孔子非以政刑为可废孟子非以德礼为可忘盖政刑不修无以为国及其既立化乃可行仰惟陛下临政愿治二十余年而忧勤不怠图治日切今者中外少事朝廷清明年谷既登流莩羸息外则边鄙之不耸内则盗贼之不兴既非贤哲驰骛之秋可谓国家闲暇之日而又延登宰辅共图事功当此之时若复玩岁愒日文恬武熙视国之蠹弊为当然而民之疾苦为细事置而不讲趋了目前使一旦有水旱盗贼边方之警则必事出仓猝无复优暇今日光陰岂不可惜仰惟国家累圣相传仁宗皇帝太上皇帝在位最久仁宗开天章阁命名臣条上当世急务乃在庆历三年太上逐权臣之党更化善治乃在绍兴二十五年皆是在位二十余年之後非若前代人主始勤终怠之比是以士气振作朝纲不隳嘉靖有邦此实我宋之家法也陛下垂意政刑何事不举臣愚过虑犹窃有言刑政二端所该甚广无问内外皆在其中今日冗官之员最多而乏周用之才养兵之费最重而少精锐之卒游手倍于农人而趋末者日衆归明坐困州县而冒诈者日繁问食货则国用既虚又非藏于天下问力役则贫弱日困不能安于田里加赋之害莫甚于和买而绍兴近辅之地斯民无聊未知所以宽恤之术取民无制莫甚于榷酤而行都首善之地设法尤盛日求所以张大之方水旱虽曰稍息而蝗蝻遗种尚多安得不为来岁之虑盗贼虽曰不作而民间愁叹尚衆安得不思豫备之宜此皆政之大端也如此等事未易悉数未问外攘之说先求内治之谟如以为小康则真若无事试加思虑不胜私忧用刑之道在今日实为公平人主无喜怒之私朝廷无风旨之闻一付有司动循三尺然而四方冤狱尚多有之若无辜陷罪固当痛惩诡法惠奸亦非今典祖宗非不随事宽宥然当是时法家者流皆是西北强毅之士坚执成法或至少恩故每使儒臣治狱谏议其间有司既不失官守而法禁亦不至烦苛今则不然用法之人多言阴德重辟强刦亦或失刑虽曰忠厚所渐者深然有奸宄不胜之弊刑之不修此其大者臣愚窃为陛下惜此闲暇故愿陛下速为永图虽未能每事更张扩然一变岂可不深思其故使之日新伏望睿慈采孟子之至言明政刑之二柄般乐怠傲固圣世之所无苟且因循恐良时之易失臣忧国有素不敢烦渎惟陛下幸赦而留意焉天下幸甚

卷二十一

钦定四库全书

攻媿集卷二十一

宋 楼钥 撰

奏议

乞正太祖皇帝东向之位【任温州日上】

臣仰惟陛下圣孝冠古通于神明谅阴端忧哀礼兼尽称天定謚博采衆说务极其当臣假守偏郡安敢妄议宗庙以干严诛自以世受国恩蒙被使令有怀不言是为欺天臣窃见近降指挥恭为大行太上皇帝升祔有期增置太庙一室以奉神灵臣不学无术又在远外道听涂说尝有见闻臣居明州近故龙图阁待制赵粹中寓居臣乡里闻其任吏部侍郎日曾进庙议请观其书熟复其说臣既击服粹中亦深自慨然至于流涕盖谓太祖皇帝开基创业之盛而不得正东向之尊考之典礼稽之古谊本无可疑熙宁五年首以王安石之臆说变乱古制阴使章衡倡为谬论虽名臣如冯京梁燾卢士宗司马光等力辨而不能回孙固反覆论议仅得不废配天之祀而东向之礼竟不获伸绍兴五年董弅建议孙近李光折彦质刘大中廖刚晏敦复王伋刘宁止胡交修梁汝嘉张致远朱震任申先何慤杨震庄必强李弼直皆是其议赵焕奏陈尤力太上皇帝擢弅为侍从涣为监察御史言已行矣而一赵霈独不以为然徒以谏大夫之重议不出已横加阻抑然犹畏公论不敢非毁但以徽宗在远未当专议遂寝其事淳熙元年粹中以当时羣臣所奏悉加铨次为陛下言之既蒙睿旨下之礼官国子司业戴几先兼权礼部侍郎力沮其说而言无经据粹中又进辟异一书深切着明终亦不行臣详叩之粹中言几先本不足以摇大事盖尝密言于执政以为太上皇帝万寿之日未应议此以致中辍今大行太上皇帝方将祔庙维其时矣陛下亲承付托以太祖皇帝七世之孙奉绍兴五年制礼之遗意取粹中所进一书申命讨论正太祖东向之位参先朝羣臣之说定我宋宗庙之礼省有司增室之役为万世不易之法以慰列圣在天之灵臣不胜大愿不敢苟避斧钺失今不论後实难言使他日未先狗马填沟壑虽有可言之路亦已晚矣惟陛下赫然英断举而行之实天下幸甚

贴黄臣照得粹中所集庙议及辟异等书又有杂说一编皆已经进御或恐内府深藏未易寻究臣尝传録副本乞降敕旨取索谨当缮写投进臣伏以宗庙之事事大体重不敢闻于外庭如蒙圣慈不以人废言伏乞睿旨以粹中之书出自圣意付三省施行臣职居远外合具奏状正以事当严密恭读中兴会要绍兴三十一年四月二十四日太上皇帝宣谕宰臣曰臣僚于利害奏劄士大夫自合亲书不须计较字画工拙敢循故事以劄子亲书投进仰乞睿照论恢复【知温州被旨奏事】

臣仰惟陛下亲受至尊壽皇圣帝付托之重兢兢万几惟日不足天下之事不胜其繁臣愚以为当先立乎其大孔子于鲁则先三家于卫则先正名岂无他事可为盖莫先于此也国家之大者莫先于恢复之计君臣之间所当朝夕以谋之而在天者有数存焉不可以强为也高宗立国于兵戈扰攘之中保全东南兼爱西北盖三十六年而传之壽皇壽皇即位之初慨然有志于中原练兵选将躬亲骑射以作士卒之气不惟时未可为正以高宗年高厌兵圣孝承志终守和好以修内治盖二十八年而传之陛下陛下念祖宗积累之业痛二圣播迁之祸承两朝未集之勲軫遗黎陷溺之久今日之事岂复有先于此者臣在远外固莫窥庙谟之秘若自登极以来诏令为民而下所以戒飭士夫警策将帅皆足以感动人心今又讲蒐田之法人固已知圣意之所在臣犹有言者非敢劝陛下好兵亟战挑强邻开边衅纵将士以邀功而生事也诚愿陛下专以恢复之计为心旦旦而思之岁岁而图之陛下果笃志于此祈上天之助顺则畏天之心益谨望祖宗之阴佑则敬祖宗之心益笃思欲如唐太宗俘颉利以奉神尧之欢则事亲之孝益至以至欲图外攘必先务内修则政事日以举欲谋西北先保东南则邦本日以固非将相无以佐大业则求文武之才必备非储蓄无以举大事则用天下之财必俭务求忠良节义以备使用则谗谄面谀凡可以害吾之治者不约而自退务养神气精力以待事机则宴安嗜欲凡可以伤吾之生者不戒而自定边防以修军政以严如此则迟以岁月虽甲兵未动版图未归而恢复之计成矣一旦天道好还天心悔祸文武之士云蒸雾集王师顺动豪杰响应则大计可举于以摅高皇之宿愤焚老上之龙庭奉万年之觞为重华之壽而後陛下之孝道光矣国家之大耻雪矣若非及今而图之事机之来岂能以一日之力而得此哉臣区区愚衷犯分进说惟陛下载赦

乞寬茶盐榷货之法

臣闻古者官养民後世民养官盖古有井里之法民生而授之以田法度明备养生无憾是官养民也自井田法坏流弊日久尺寸之地无非斯民交易以为世业而出其租税以供公上此民养官也後世用度日广什一取之而不足又重取之又有曰茶曰盐与夫榷货之属皆出于山泽之利民取之以自养者酒所以成礼所以养生古惟以沈湎为禁而後世榷之凡此数者国家既擅其利以供养兵与支费之大端其势不得不立法以禁切之岂特使利孔专出于上亦所以抑制豪强恐其专利以陵贫弱也为政者要当究其本源而兴利聚斂之臣不思大体繁文日增至于今日网密甚矣摇手犯禁非所谓易避而难犯细民贪利法出奸生不惟不足以胜之而奉法之吏临事虽欲坐以深文亦有不得而尽行者使其尽行必致生事苏绰在西魏以国用不足为征税颇重既而叹曰今所为者正如张弓非平世法也後之君子谁能弛之臣尝感其言而智识短浅未能为国家建画长策若从而轻之又恐愚民无知抵冒益衆欲望圣慈軫念元元谓设禁者本有不得已之意而犯法者初非甚可罪之人或有不体国家寬大之德于是数者更有陈请重设法禁视平民如寇仇于见行条法外创意增添之者惟陛下一切寝而不行甚者或惩其妄言播告中外使天下知圣意之所在则斯民阴受天地之大赐所以保护元气而壽天下之脉者或在是矣

论训练禁兵

臣闻天下虽安忘战必危自辛巳甲申用兵之後天下狃于无事兵备寢弛壽皇圣帝长虑却顾外欲为恢复之图内欲修固本之计申飭州郡训练禁兵立拣中之额有路铃按教之法有朝廷点摘之制虽未能尽为精銳而每州各有数百人可用俾兵威日振盜賊帖息可谓明效大验矣臣试郡海濒恪遵故事月自按试以行赏罚不敢不谨而犹有可疑者两军决战弓弩可以及远而短兵可以角敌较之二者则短兵之用尤多军器固不一而足大约弓弩枪牌长刀皆不可不习至如击炮以御敌驰逐以据险皆当习于无事之时乾道元年专降指挥禁军武艺只得教弓弩手余外武艺更不教习军士有长技而不得自见既以阻其勇气亦恐閱岁因循无所激励日成废堕万一欲用必至扞格至如定礮之类尤非一日可习州郡但知奉行指挥而远虑不可不及欲望圣慈旨下三省枢密院议定速赐行下依旧制閱习于军政诚非小补

论保治【任考功郎中日上】

臣闻无虞者盛帝之所戒无难者圣人之所惧持盈守成大雅所以称太平之君子也高宗皇帝中兴之初身济大业时巡东南艰勤百为盖十余年而後小康晚有辛巳之扰兢畏克终以享九龄肆我壽皇圣帝受禪之初銳意有为加以甲申之警虽卒从和议而经略之志不忘益勤万几圣德日新比年有旱潦之灾寅畏天戒广求民瘼四方章奏惟恐不闻蠲放惟恐不多賑恤惟恐不至愁叹化为讴吟奸盜为之帖息脱履万乘以授圣子二帝相传体尧蹈舜冠德百王皆由兢兢业业以致此崇高之盛陛下承熙洽之运膺付托之重垂拱以视天民之阜诚千载之一时也縟仪钜典次第蒐举又足以为太平之荣观也中外静謐边鄙不耸夫何为哉况复仰遵壽皇之训日晏坐朝孜孜听政讲论经理篇帙有加为臣子者何以仰赞聪明然区区愚忠不胜爱君忧国之心以为无难之世易于因循此如人之一身时有小疾则饮食起居动知戒谨固有尪羸而壽考者强壮之人未必无病血气尚盛多恣所欲疾偶未形因谓之安此固良医之所惧也孟子曰国家闲暇及是时明其政刑今日之无事实陛下闻暇之时也改元之初三宫徽号之仪长秋册宝之礼皆不可少後自今凡稽古礼文之事动有重费而无益于治道姑俟于施行务求实效无事虚文轸未雨彻桑之言思大寒索裘之戒旦旦而图之使事事有备先为不可胜以待可用之机以保盈成之业于无穷天子之孝顾复有大于此者乎

论流民

臣试郡永嘉本无善状既迫替期误蒙陛下收召使备郎列二年之间粗知利病近闻有流徙之民日夜念之民生岂欲轻去乡土自非水旱太甚何忍散流去岁早禾成熟人心晏然螟虫为孽所损不多晚禾未登偶缺秋雨然未至甚害也而流散不已州郡既为之减收苗米招来海商存抚賑恤虽得少定而去者已多不得不为之计也臣闻富弼賑济之政在本朝最为称首然考其时弼知青州本自无事流民乃自河北而来弼不以非吾土之民而不任其责调护惠养委曲周旋迨麦熟而归又予之以道途之费收其强壮以备卒伍今日亦可仿而行之古者徙民归乡其徙必有法其归必有处今之流民扶老携幼颠顿暴露不知息肩之所其有亲戚知识以为归者无几率皆茫然远去以侥幸万一未至淮上其狼狈于道者已多至而失所则老弱转乎沟壑壮者不为盜賊则或为好人诱略北去以为奴婢无复生还之日又可虑可

哀也臣愚欲望睿慈兴念愚民早赐处分行下两淮监司帅守条画措置如其已有所依未能自还者听其自便苟无所投告愿归而不得者量给赈粮使之复归如此等人亦足以语化乡里使之安土重迁其愿备卒伍者欲贷种粮者有官君子各以富弼之心为心随宜措置救于濒死之际其所以救民心而镇边服者于是乎在条目听其自为俟其事定各以给贷招抚之数申闻庶几官无重费而无知之民不致陷于饥饿之水火实国家之仁泽也

乞罢温州船塢

臣窃惟官冗甚矣而未易遽去其有无用之官徒费廩禄而一司之费又为甚多贻害公私者不可不去也温州有造船场一司究其建立之初本因高宗南巡驻蹕临安漕臣一时措置谓漕舟全缺而良材兴贩自处过温以入于海者衆于是置船场立抽解是时材木不可胜用客贩既盛而漕计有余州郡系省之钱可以支拨岁造百艘以供漕运诚一时之利也尔後本司自有船场又近地如明州华亭亦皆造船足以供转输之用今则山林大木絶少客贩不多系省不足以给费本司亦知其难办岁朘月削每年止造十船而一司尚存凡费如故其所谓益于官者不过十舟若就办于本司及近地之船场不甚费力请言温州之为害者监官初止一员既增其一已而又增遂为三员虽是宗子添差而皆厘务请给人从并同正官则有俸给之费所养工匠则有衣粮之费造船之日又添以米十舟分为春秋两料除材植取于客贩抽解贴买不多而有铁炭灰油之费其起发而来也以运河平底之舟而行鲸海不测之渊虚舟既不可以进势必载私商客货其中远出海港而复揽载不可禁察又有将校借请篙梢犒给之费少或半载多或数月而後能達多有覆溺沈破之患此其官司所任劳费之日也若其烦扰百姓则又甚焉十舟梢工轮差永嘉县有田产船户每船所用水手则又泛差诸县濒海之细民为之此曹各有渔业深惮此行吏人乘时为奸追扰迨遍始得人足其实不用自行率以雇人之直纳于梢工始得脱身万一船败于海上将校等人均偿不足又以其名籍追元差水手勒使填还间一有此嗟怨尤甚臣在任日先究此弊每水手一名除追呼磨官之费钱之实及梢工人止六贯有奇遂举一岁之数官为出数百缗而罢水手之差又恐吏辈久复扰之尽取诸县水手名籍俟其齐足焚于公庭海濒细民始得休息然此司不罢终为劳费而于漕运甚关利害臣愚欲望睿慈特降圣旨行下转运司及本州罢去此司以惠一方监官姑给添差之俸听其满考已差下人省罢兵匠收隶厢军其抽解及排岸司职事使监税官兼之既无造船之用则客贩抽解亦当蠲减省一州之烦费息百姓之追扰少助仁政之万一不胜幸愿贴黄臣尝略会计一岁之费造船工料官兵请给衣粮起发等为钱三千六百贯有奇米七百余石监官衣绵将校借请在在外伏乞睿照转运司若以为难乞令本州详具细数除官兵请给衣粮外如丁铁等费及抽解木植出卖量认钱数每年发赴本司以裨造船之费

论宽刑罚

臣闻刑罚所以惩奸也然圣王用之所以弼教非得已也人主之用刑惟当务宽皇朝专以仁恕得天下之心列圣哀矜惟恐一物之失所陛下遵有宋之家法绍壽皇之心传临御以来仁恩德泽浹洽无外用刑之际尤軫圣心诚斯民之幸也然有司奉行惟上意所向自古已然唐太宗时自张蕴古之刑法官以失出罪为戒时有失入者人不加罪尝谓大理卿刘德威曰近

日刑网稍密何也对曰此在主上不在羣臣人主好寬则寬好急则急律文失入減三等失出減五等今失入者无罪失出更获大罪是以吏各自免竞就深文初非有教使之然畏罪故尔倘一断以律则此风立变矣帝悦从之由是断狱平允此最千古之龟鉴也壽皇圣帝事事寬恤尤谨于刑乾道元年之冬刑寺定断陆知微兄弟三人冒官之罪太轻壽皇震怒刑部侍郎王拂大理少卿陈良翰放罢其余郎官寺郎各鑕一秩天下咸以为当然在是时正如德威之言颇有各求自免竞就深文之弊至次年春三月壽皇闻之亟下手诏曰狱重事也用法一倾其平则民无所措手足比年以来治狱之吏大率巧持多端随意援引而重轻之故有罪者兴叹而不辜者罹酷朕甚患焉卿等其革玩习之弊明审克之公使奸不容情罚必当罪用迪于刑之中勉之哉其听朕命毋忽大哉王言过于太宗远矣自时厥後刑为之平迹者科举之病太甚其欲革而去之盖不止上之人之所欲也潘显伯兄弟之狱在兄弟私情则若可恕在贡举条制则无可逃有司定罪太轻至勤睿断所谓非常之断人主专之衆论无不称快愚臣过计乃窃忧之盖自陛下龙飞之初覃霈所及与民更始寬恤之诏联翩而下四方日有刑措之望此虽至公之举终是罪重刑轻况复罚自近始官僚之外上至刑房之吏下及刑寺之胥无不责罚固足以惩奸矣而犹有所虑者官吏震恐或有便文自营之心则讞议之际宁免傳致深文以图自免者唐太宗以仁恕为先壽皇圣性隆寬中外具知然前事如此则知陛下虽本无尚严之心而天威所加事迹相类或恐未免有竞就深文之弊臣区区私忧怀此累月矣既已轮对奏事无路自達敢因转对倾心献忠欲望睿慈深加矜察鉴太宗之咨询体壽皇之诏旨酌德威之至论审事迹之近似出自圣意特赐处分或未欲显颁诏令乞命大臣明谕至意俾持刑官吏毋以此事自艾务从平允以称明圣审克之心天下幸甚臣一介疎远不胜爱君之心昧死有言罪在不赦伏惟裁幸

卷二十二

钦定四库全书

攻媿集卷二十二

宋 楼钥 撰

奏议

雷雪应诏条具封事【任国子司业日上】

臣某准绍熙二年二月六日尚书省劄子三省枢密院同奉圣旨近日陰阳不和雷雪交作朕恐惧修省殊不遑宁深虑庶政或有缺失未能消弭可令侍从台諫两省卿监郎官馆职各条具时政阙失闻奏臣备数省目覩雷雪之异窃考咎证无路进言伏读明诏陛下上畏天戒俯询朝列此而不言臣则有罪臣仰惟陛下承列圣之正统受壽皇之付托即位以来虽有忧勤之心而初政所施未有以大慰天下之望天之仁爱陛下亦至云矣去岁皇纬失度其甚异者太白经天臣庶虽知而朝廷不闻有消弭之举天意正以星文不足以示异故以雷雪之变发于都城不用清台之测验不待臣子之奏闻三尺童子亦知其为灾异此天意之彰彰者也陛下发德音访阙失此心固足以对越上天然须见之行事之实然後足以应之其他春秋之书五行之说陛下必已熟见琐琐细务又不足以敷陈臣请言其大者要者昧死条具如左须至奏闻者

一雷者阳也雪者阴也阳气震动蛰虫奋起虽稍先时犹未为甚雨中间有小雹人已惊骇至于庚辰之朔晡时雷电大至天地晦冥久之方散雪霰继作夜以至旦盈尺不已辛巳之夜又复增积寒气凝冽几不可堪是何祥也阳者天道也君道也夫道也君子也中国也阴者地道也臣道也妻道也小人也四裔也天意昭然过于告语惟下至诚惻怛应天以实察察灾变之彰明览时政之已行阳气方兴而阴沴侵陵乃至于此此不待屡数而後可知惟陛下圣明默会天意防微杜渐曲轸宸心然後可以消弭矣

一自古人主遭值灾异者多矣请以成汤宣王之事明之汤之祷旱于桑林以六事自责曰政不节与使民疾与宫室崇与女谒盛与苞苴行与谗夫兴与成汤不迹声色不殖货利以义制事以礼制心顾安得有此六事而深以自责若不能自容者此所以消弭天灾而反致勃兴也宣王中兴大雅以云汉为首窃尝考之止言靡神不举靡爱斯牲上下奠瘏靡神不宗敬恭明神宣无悔怒若归过于百神者盖宣王之意以为祀神如此不应致有灾变其所以至此者必由于我其刻责之深又过于成汤反已之切乃见于言外序诗者所以称其侧身修行而王化复行实始于此臣愿陛下远鉴桑林之祷六事虽无亦当自责一或有之改过不吝三复云汉之诗至诚反已祈以应上天仁爱之意则圣德日新今日之异适当为後日之祥也

一臣仰惟陛下初在恭邸英毅神武之姿观瞻甚耸比登东宫天下属心犹恐陛下他日或偏于刚严圣学日新高明柔克一于仁厚动以仁宗为法率循壽皇之训天下涵泳圣化实宗社万世之福也然臣闻之天以刚健为德君以法天为先臣愿陛下体刚健为德本而以仁厚行之刚则不为物所移健则不为慾所怠杜请托之私絶牵制之累如禹之恶旨酒孔子之放郑声则君德日隆于上朝政日清于下而始郊见矣大抵疏远之臣惟愿陛下之忧勤亲密之臣惟愿陛下之逸乐忧勤则幽枉必达下情得通而膏泽及于民矣逸乐则伺候颜色干求恩泽而私意得以行矣陛下自雷雪之变必且忧形于色宵旰兴叹是数日间干请必少此皆切近而易察以此推之圣心忧勤恩幸自远苟日谨一日雍雍肃肃宸襟泰然渊静鉴明以照百官其视宴游之惑岂不相万此非以刚健为本宁有此耶故臣以此为应天之要

一臣仰惟仁宗之治最为盛际陛下所愿取法臣观仁宗专以仁厚养天下而纪纲甚严者最以言路之通也大臣奏事或至于首肯内廷请谒未免于付外然崇獎直臣妙选台諫一言可取断在必行臣不敢以累数都尉李玮之贬司马光敢言公主亦不得无罪此骨肉之爱也遂至降封王德用进女王素敢言正为其亲近此衽席之事也立命出之言者无罪而主德益盛此其所以为仁宗虽唐太宗之听諫勿及也比年以来朝行不闻直声而有以多言被黜者虽蒙寬恩止从外补不加之罪然士气消沮无敢出位而论事者况自去岁又闻宣諭攀援有封驳諫诤之职正以维持国论主张公道干请攀援有出于法例之外者陛下间亦有不得已应之外庭有言遂与寝罢在陛下不为伤恩而有司得以执法法者陛下之所以与天下共此者也若开宣諭之门则废有司之守不及今制之日加一日其何以为纪纲耶臣愿陛下力开直言之路杜塞宣諭之门每以今日求言之切为心则治道不患其不举矣

一臣仰惟壽皇之治始终不渝陛下得于亲传臣亲壽皇二十八年之治不可形容而其卓冠于百王者非止孝俭之德最以忧民之忧不以灾异水旱为讳闻之惟恐不早救之惟恐不尽蠲放惟恐不多至于竭仓廩倾帑藏以赴其急乃者水旱连年人心惶惶若非壽皇焦劳于上有司奔走于下竭力而经营之则必有盗贼夺攘百姓流离之患矣丰储仓所以为中都之备一时欲用出圣断排羣议积贮为之一空俟其事定收采随足人心爱戴天意协佑旋致丰穰此真万世之法臣愿陛下畏天之威光绍谟烈遇灾而惧不以为讳专法壽皇力行消弭之道臣下有隐而弗言者随事之小大罪之则天下晓然知圣意之所在矣

一臣尝窃究国家中间阳九百六之会一时臣子误国非一而蔡京为首京之误国非一而其甚者无如御笔之一事臣三修玉牒因得考本朝时事之变祖宗累朝未尝轻以御笔处分外事神宗作兴凡事多出圣裁虽边徼细故亦烦亲洒是时蔡京方为检正建请差官置局编类为书遂委京编次此盖老奸相业之本也徽皇之初京既收召一旦得君欲逢主意固相位排同列辟公议行私心变法度崇虚文遂创御笔之制违者以违制论事由于京而书出于徽皇权归于京而过归于徽皇时假制礼作乐之名间以惠民之事以文过饰非御笔一下无敢议者其初犹有正人在朝间有执奏京欲其必行又改其法违者以大不恭论凡有异议即致窜逐而纪纲益以紊乱然京自为之未至于甚比其再相以至三入宠任既不及旧御笔一从中出京亦不知所为商鞅立法亲受其弊虽欲支吾不可为矣败国殄民尚忍言之此实万世之龟监也陛下兢畏恭俭固必万无此事然人主作事动为天下後世之法其端亦不可轻啓臣

愿陛下遵祖宗之法戒节有司之守条章明备动皆有则如有非常之断固在陛下专之其余细务悉有法在宸翰处分谨之重之若天之雷霆其发必以时而不至于?乃所以强主威也

一臣闻元符三年九月辛卯镇洮大雷自初夜至四鼓一百三十余震墙屋摇动檐瓦散坠人人有覆压之惧黎明视之雪深二尺熙河机宜文字李复言于师臣胡宗回曰雷风天之号令其发多于盛夏今秋且尽震暴非当终夜不息而又六雪殆将有不测之变因为规画密谕守将严备又以兵守邈川缓急相应援越月羌果叛攻陷城堡赖有豫备得以破之熙河以安今日销变之事无所不当虑雷雪之为灾虽不至如元符然金人之强狡实万倍于青唐边备未坚臣实忧之欲望陛下俯采李复之言申饬诸道边师修备固圉以防不测之警

论进德养生【任起居郎直前奏事】

臣闻养生可以进德进德可以养生人受天地之中以生所谓命也是故中也者天下之大本也和也者天下之达道也喜怒哀乐之未发谓之中发而皆中节谓之和是道也所谓以之为己则顺而祥以之为人则爱而公以之为心则和而平以之为天下国家则无所处而不当尧舜禹之相传以执中汤之建中武王之皇极皆此道也人之气也冲然而甚微泊焉而易危既不可过盛又不可过弱惟得其中则养生之要也人之心也操之则存舍之则亡既不可甚劳又不可甚逸惟得其中则进德之要也苟能于日用之间谨言语节饮食寡欲而固其本省事而清其心平喜怒之发端戒爱憎之私徇内外交养表里如一则寿命可以延长盛德可以日新矣仰惟陛下以天纵之资抚盈成之运精一之妙固已得之寿皇之亲传临御以来立政用人行以大中至正之道黜陟之际惟公议是从是以朝野肃靖海内小康皆中和之效也去冬违豫旋庆康复窃究所自殆恐有差其所谓中者臣误蒙睿恩擢真柱下所当罄竭以效万一天下之事未敢具论惟望圣聪俯听愚言养生进德俱以中和为本视听言动率务戒谨饮食起居不使过差喜怒之发无所容心事有可喜从而喜之非吾之所喜也事有可怒从而怒之非吾之所怒也如是发必中节不致一偏万几虽繁使百官有司各任其职陛下以大中之道酌其可否一吁一俞可以坐判圣心休休保合太和日复一日不惟帝德益隆心广体胖神气舒畅虽有阴阳愆伏安能为吾之患哉臣言虽肤浅意则甚笃冀有益于清躬伏惟陛下裁幸

论郊庙之礼

臣窃惟郊庙之礼国之重事非臣子所当轻议然事有戾于古而又不宜于今苟得其说不可不陈也仰惟神宗皇帝锐意作兴鼎新百度专置详定郊庙礼文所命儒学之臣博考古今裁定仪制帝亲临决而着于令凡今日所行多出于此臣尝恭覩神宗实录元丰六年有太常丞吕升卿建议郊祀致斋事理甚明虽不见于施用而史臣载其全文有以知时论必以为是特未见于用尔臣敢约其大略而言之升卿谓郊祀致斋之内不当先诣景灵宫及太庙朝飧遂罢景灵宫诸殿朝谒而天兴殿及太庙时飧如故则是其言非不见用特行之未尽尔其言凡有天下者莫重乎飧帝历考载籍不闻为祀天致斋乃于其间先飧宗庙者也独有唐天宝之后用田同秀言立老子庙号曰太清宫是岁将行郊祀以二月辛卯先躬飧焉祝用清词馈用素饌甲午又亲飧于太庙丙申乃有事于南郊虽论者以为失礼然考其所斋之日及辛卯飧

于太清宫至丙申殆且五日犹得雍容休息以见上帝也今致斋三日其一日于大庆殿而用其二日三行礼焉古之大祀未有不斋三日而敢与神明交者今行礼于天兴殿才斋一日尔其之太庙与郊宫前祀之一日皆尝用之矣谓之一日之斋尚非全也夫用一日之斋以修大祀未见其可况非全日乎于此奉宗庙则斋之日不足以奉上帝则斋之义不专论者曰宗庙之礼未尝亲行故因郊祀躬展荐献臣曰不然人主于宗庙之飨固当岁时躬修其事其不亲飨者盖後世之失礼也必因郊祀而行之则义尤不可以为郊礼宜如故事致斋于大庆殿二日径赴行宫其宗庙亲飨并乞寝罢天兴殿朝飨乞更不行俟礼毕而恭谢别修太庙躬祠之制每遇行庙飨之时则罢景灵一孟朝谒之礼庙飨庙斋乞于内殿车驾出人如常仪如此则祀天飨庙两得其当此皆升卿之言也臣三仕于朝屡祇祀事凡曰大祀致斋三日惟祀事得行其余悉禁盖专致敬于所祭也而郊庙明堂大礼致斋三日之内銮輿再动百官相祀陪祠骏奔惟谨上下俱不得尽致斋之义又太庙行事极于跛倚几至僵外而以此跛倚之余致斋于郊宫虽强有力者亦苦于颠顿而恭敬之心衰矣臣愚窃所未安而不敢轻议既得升卿之说敢采之以献于陛下仍录其全文及唐明皇变礼之因列之于前以备采择伏望圣意谨重祖宗旧典不欲尽行升卿之言臣又从而斟酌其说欲望睿断改定仪制每遇大礼用故事停景灵冬季孟享而于孟享之日行朝飨天兴之礼太庙岁五大飨止于当郊之岁或烝或尝亲行其一祝词仍以郊天先告二者致斋并于内殿车驾之出止如常仪专用三日之斋以事上帝陛下得以斋心养性对越上天君臣无并日之劳有司省供亿之重考古验今于礼为称仍乞明诏二三大臣俾侍从台谏两省礼官及今集议其当裁定一王之仪其他赦宥赏赉悉如旧制革天宝之变礼以无失祖宗奉天享庙之本意实天下幸甚

论诸州奏案【宜引】

臣窃惟狱者天下之大命也历代圣帝明王之所甚谨若夫钦恤忠厚又未有如本朝列圣之极致者也臣区区愚忠怀此久矣敢先极论古今之事而後备陈当今之宜惟陛下垂听夫杀人之事世所不免使甲能杀乙而乙之子若孙杀甲以报之可也如此则将交仇而不已故先王制之刑辟命之士归以尔之仇丽吾之法而後大定然甲之杀乙则既杀之矣士师取甲而诛之虽以伸乙之冤而士师实以生者就死地死者不可复生脱有错误悔之无及又况箠楚之下何求不得间有诬服遂致冤滥此先王所以戒谨详审惟恐其不至也自古平治之世必以省刑罚为先尝求其故矣唐虞画衣冠而民不犯则曰罪疑惟轻功疑惟重与其杀不辜宁失不经而後好生之德洽于民心成康圉圉空虚凡四十年则秋官司寇之书极其详备三代以还享国之久者无如汉唐汉四百年始于约法三章唐三百年基于太宗岁断死刑二十九人惟我国家太祖以不杀而得天下高宗以不杀而启中兴累朝仁厚度越千古太祖尝读尧典叹曰尧舜之世四凶之罪止从投窜何近代宪网之密耶盖有意于措刑也故自开宝以来犯大辟非情理深害者多贷其死有司言自二年至八年诏所其死岁至四千一百八人仁宗凡有疑虑奏裁者率贷其死岁至活千余人国祚灵长民心固结凡以此也今之士夫不深察其故论重囚则曰汉高祖约法三章杀人者死安有杀人而不死者乎论强盗则曰太祖立法强盗赃满三贯足皆处死今强盗之法为太轻臣又尝求其故矣秦之苛酷以微罪而坐死者甚衆如曰诽谤者族偶语者弃市之类不知其几商鞅论囚渭水尽赤岂皆杀人者乎天下愁怨相率而叛之故高祖约之曰杀人者死盖言惟杀人者死尔其下云余悉除去秦法则其他

死罪皆去之矣此秦民所以大悦亦非曰杀人者必死也律文诸强盗及伤人者绞杀人者斩古之中制也而唐元和之敕京兆府奏应擒获强盗不论有赃无赃并集衆决杀则已重矣周显德之敕应持杖行劫不问有赃无赃并处死则又重矣本朝规制日趋于厚由今视之故以太祖之法为重不知其时正欲革五代之弊法而务轻之也是二者不知深求其故反以藉口可乎今日朝廷清明刑罚当罪虽州郡以案乞奏裁有司皆详处既不滥及无辜又不至纵奸太甚然臣每疑州郡成案恐未必一一是其本情近有乞奏裁之狱悉以原勘始末案款缴申大理寺使之反覆閱实然後奏闻报决臣窃是之然恐事至太烦又从而讲究其说欲望睿慈明诏有司奏裁之案合贷命中自依见行条法遇有情理无可悯行下依断者仍下本路提刑司取索本州原案并碎款一一详审若无可疑则行下依断随即回申或见得碎款情节与成案不同则当惩治官使情弊或卤莽之罪庶几间有冤者得以平反实有罪者无所幸免狱吏知畏不至文致重辟益广陛下好生之德比之尽取碎款者既得大体而于朝廷明谨之意益为详尽天下幸甚

贴黄臣窃见诸州奏案惟是蜀中州郡者尽录原情碎款列于成案之前若陛下更欲详尽乞下刑部择蜀中奏案碎款详备者镂板行下诸州令依此式样备录碎款奏闻尤为幸甚

论君道难易【内引】

臣闻孔子曰为君难又曰如知为君之难也不几乎一言而兴邦乎仰惟陛下以一一人之身膺上天之眷命承祖宗之基上则奉两宫之养下则应万机之繁在陛下可谓至难矣然陛下所谓居得致之位操可致之势而又有能致之资威制强敌恢复中原兴起祖业以大一统谓之难可也若曰承两朝付托之重保境而养民以为内治之事在陛下初无难者两宫备天下之养一月四朝已有定制如期尽礼则事亲之道昭矣大昕受羣臣之朝兴居出入皆有定时夙兴听断则君临之道宜矣饮燕有节则圣躬日康赐予有度则财用日积采公议以用人才则衆心服开言路以广聪明则下情通示廉耻则可以全士夫之义严典章则可以杜侥幸之门闻四方水旱之事勤而抚之则可以消弭盗贼之变知四方事机之萌敏而图之则可以折奸雄之心国家南渡以来高宗披荆棘以立朝廷寿皇振纲纪以保治安凡今日宫室之宏丽宗庙之严飭百司庶府之备具三军万姓之阜繁皆非一日之力陛下安享盈成之业宜无难者天下当为之事固未易以一二数如前十者陛下念兹在兹日谨一日则事之大者已得其要事之小者当随以举矣臣之所陈陛下勤而行之俱为易事舍而弗图难斯至矣又况人心易感上德易见事有不大于人心能言者皆能议之圣心一日见于施行则人心翕然何啻风之偃草今日大端不过三四明断之下俄顷可毕而稽留不决迁延日久四方传闻徒骇观听此在陛下尤不为难古人责难为恭而臣顾以为易者义固不同言各有当其为爱君之心则一也伏惟陛下裁察

论君心

臣一介孤远比者待罪左史兼摄西掖感激恩遇不敢爱身间有论奏皆非得已上触天威下忤人意朝夕惴惧以俟谴呵乃蒙圣慈俾遂为真周章控辞既不获命退惭僥冒龟勉就职益

知陛下不以言罪人而以言取人不惟赦之而又进之有君如此惟当勉竭以报万一尚有孤忠可以自效天下之事不可胜陈爱君愈切尤不可苟深思熟虑不若求其至要者言之宗庙社稷之重四方万里之远系于陛下之一身陛下之身主乎陛下之一心临御以来兢兢业业惟恐一事之失度一物之失所周思却顾若不能自己向者数事虽若久而不决处之详虑之审天下之以为是者陛下终以为是公议之以为当然者陛下终以为然方其未行人人颺望及其既行中外称颂侧闻陛下晨兴之後未御听朝澄心静虑以待机务天德清明夜气冲和照临百官是非了然此真社稷之福也欲望睿明保持此心终日乾乾尽善尽美无可言者或恐勤劳万几不无游息之时退朝之暇从容良久更以一二时顷凝神储思翻阅奏章或可或否不以人废付之大臣使择其可而行之则天下翕然知陛下之明断无甚难者愿垂聪听择而行之天下幸甚

论赈济

臣仰惟陛下诚心爱民若保赤子比以诸路州军去岁荒歉去处各赐度牒以为赈恤之备此真为人父母之意民之受惠不知其几然臣尝在州县备见荒政之修无有上策盖年谷丰熟之时家给人足上之人不过抚之而已一旦岁事不登举无涯之衆而欲仰食于公家虽有孔墨之智亦将不给若州县之官尽心竭力力之所及者广则民之获济者多所谓博施济衆尧舜其犹病诸况今州县少有储蓄仓猝无以为备今方春首传闻宣池沿江等处流莩相望狼狽失所若非朝廷倍加拯救老弱转乎沟壑壮者或肆敝攘稍失抚御起为盗贼特未可知度牒之颁在国家所捐虽多恐饥民未能遍及窃见沿江诸州尚有桩积米斛非特旨不敢支动积之岁久陈陈相因欲望圣慈出自睿断行下诸路凡有合行赈济去处亟加措置将桩积见米随宜赍贷以济急阙邻近州郡亦许支移仍责官司以所赍钱候秋收日籴还今春幸得膏雨二麦可望此去麦熟尚有四月劝分之数恐亦不能接济国家以桩积之米捐以予民犹不为过况赈赍于急缺之时收籴于秋成之後既可大慰民心又不妨以陈易新为经久之利惟陛下亟图之

攻媿集卷二十二

卷二十三

钦定四库全书

攻媿集卷二十三

宋 楼钥 撰

奏议

请车驾过重华宫第一劄

臣仰惟陛下承壽皇付托之重以天下养犹恐未足以报天地之恩乃者间以圣躬违豫积废起居宸心靡遑宁处正月九日千乘万骑冲冒风雪中万衆叹仰以为天子之孝前古未有後又以痾疾不出者几半年虽临朝如礼而外人久不瞻望天表进香之日无不鼓舞以为吾君康复久矣景灵宫以四孟分诣者道远不可太劳非得已也重华既近会庆在迓銮輿一动自此五日一朝之礼必如平时乃二十二日有司命戒于夙昔羽卫环立于廷中百官趋班拱俟鸣蹕而烛残日出寂不闻声相顾失色谓迓者陛下无故而不一视朝已骇羣听今日何日安有不出之理列立又久之进退不可臣以待立为职法许直前使是时得望清光必且顿首百拜以请而清禁严遽何由伸吐泯默而退震悚无地中外觐望欢意索然天气晴和又无雨雪乘輿将驾莫知何故然而大臣不敢言台谏不敢论犹以未知事实之如何昨日本合具闻赴宴贡院忽传今日驾出人人相贺臣中夜起坐以俟夙兴漏且尽矣又无所闻忠诚所激敢昧死上奏伏望陛下深思社稷大计亟降指挥若曰壽皇圣节偶以某事不及上壽今以某日诣重华宫起居则天下之疑议顿解两宫之圣意交懽孝治无亏国祚愈隆虽复费钱百万极奉亲之礼所不当惜亲上玉卮为千万壽未为晚也臣拳拳愚忠惟陛下裁幸

第二劄

臣仰惟陛下圣主也然有一事臣初疑之已而思之而惧今则忧矣敢为陛下言之事有至大而陛下以为至小至重而以为至轻至易而以为至难朝夕之所当行而视之若旷典此臣之所以疑而惧惧而忧也文王朝于王季日三武王帅而行之不敢有加焉汉为五日一朝之礼已为疎阔本朝家法事母后之礼皆朝夕一再见壽皇之事高宗以相去之远勉从五日之制苟非有故未尝辍也陛下之事壽皇三年之间率循旧典四海悦服去冬圣躬违豫继有痾疾暂废起居人亦无得而言今则无故而屡止此人之所以纷纷也盖天下之事无大于此无重于此然而在陛下行之当然为甚易进香一出而人心欢然会庆节一不出而人心遽骇事可睹矣朔日不出犹曰有冬至冬至不出而人心几于离矣朔望比其他过宫之日已非细事特以会庆冬至为尤重姑以朔望为轻然圣节至日犹曰每岁有之至于圣政之成全载壽皇一朝之事玉牒会要足成淳熙末年之书陛下之所以奉贍谋而铺张圣父之闕休者止此一事可谓尤重矣一展九月再展十月以圣躬之未安也今则礼仪毕备宰执观书者三有司习

仪者一忽又改日万衆震惊固知择日之不远终亦不知何故陛下亦思改日之说乎卜吉既定岂应复改正以进呈之後十七日必须恭进又非时节起居之比三书相踵仗卫罗列皆是五更夙办万一又不成出则事体利害尤甚故不免为此一策非美事也欲望圣慈翻然感悟亟降指挥若曰屡蒙壽皇圣旨免到宫不敢有违今已奏请以某日过宫此令一出欢声必闻是日仍须必出雨雪即赐雨具进书之前得再为此则人心翕然而定自後不复再展而五日一朝如旧则天下晏然无事矣可谓至易之举而足以了至大至重之事惟陛下断然不疑实宗社无疆之庆

同侍从请过宫第一劄【同赵彦逾倪思陈傅良等】

臣等比以车驾久不过宫乞宣引同班奏事伏蒙圣慈俾并进于玉陛方丈之地臣等于初七日至东华门伺候宣引间续准传旨改用今日臣等区区之诚正以过宫一事欲得面控悃素臣等窃谓父子之道天性也以壽皇至慈陛下笃孝顾何待臣等譊譊冒溷圣聪第以近日之事观之陛下朔望不出许以进香进香不出许以上壽上壽又复不出明降指挥二十八日必出万姓欢呼踊跃以望翠华又复中辍重失人心莫此为甚旋闻展用月旦今又闻欲用十五日仰惟陛下临御万方以信为本成王剪桐为戏周公遂封唐叔以为天子无戏言况过宫美事孝治所系四方所仰而反汗至于再三实恐因此朝廷命令无以行于四方载惟陛下容纳直言虽小臣忤旨亦不加罪然言虽容而不行事欲济而复辍日复一日寢为常事关系非轻今臣欲望圣慈确然不易则社稷幸甚臣等幸甚万一圣心未决姑示顺从使臣等无辞可措至临期不出则又失信于中外良可惜也臣等前居家俟罪本不敢供职既蒙许以宣引故曳屣就列以冀一瞻清光如又未决臣等何颜尚在班行非敢数忤雷霆自取诛斥诚以三军万姓不知宫禁中事不知圣父圣子慈孝本自无他怨讟横生至不忍闻恐自此不已驯致叵测非敢以引退为高以合班为喧正欲感悟圣心以消弭未然之患也冒犯天威臣等无任惶惧俟命之至

贴黄臣等伏见会庆圣节合候过宫上壽之後方可锡宴今缘未曾过宫遂行展日若因循未出则锡宴难以举行况天下郡国皆已设宴而中都反未讲礼阙典尤甚传之四方书之史册是锡宴不行将自今始深为陛下惜之伏乞睿照

第二劄

臣等伏见会庆节在即十二日礼合进香都人颺望翠华忽又得旨免过宫无不失望既而十三日内教十六日十七日孟飨皆圣躬亲临中外益望陛下必躬上玉卮之壽伏计圣心素笃仁孝知此礼至大至重决意必出固无待臣等再三之请政缘进香之前已有定论旋复反汗是以不免过虑须至溷渎臣等窃惟人子事亲朝夕定省自天子达于庶人其礼一也五日一朝已为希简今陛下自三月恭谒之後至今八閱月矣皆以壽皇圣旨而免至于生辰上壽恭想圣意必欲陛下来此人之至情也陛下重明圣节既受羣臣万年之觴窃闻今日嘉王生朝设宴禁中壽亲之际父子欢洽陛下宁不动心上念两宫延望之意且臣等料度圣意所以久不过宫者或谓陛下有所疑有所畏父慈子孝本于天性壽皇既以神器亲授圣子方颐神

冲澹凡军国之事悉不预闻五年之间初无纤芥断无可畏第恐犹有左右小人妄生离间撰造言语惑乱圣听全在陛下深思洞察断然勿疑臣等窃见今年夏秋之间太白昼见至于经天九月七日金星掩心大星而又黑祲亘天万目骇观荧惑见入太微垣逼近内屏房星为明堂又属宋分太微内屏均近帝座此皆天变之大者也所在洪水为灾衡岳山摧正逼祠宇剑门峯坠塞断谷口今月十六日夜当陛下斋宿之时行都地震有声如雷夫衡岳南方之镇行都驻蹕之所此皆地变之大者也至于人情下而闻阁衆而三军近而禁卫以陛下久缺定省之礼口语籍籍谤讟纷纭所不忍闻自庙堂大臣至于百辟数进苦言徒劳容受竟不施行莫不忧惧愁苦不能自存此则人情之所甚不安者也陛下乘輿一驾如反掌之易则天地之变异必销人心之忧疑立解陛下何惮而不为若圣意固执又复迟疑则天地之变决非虚设人心动摇必至叵测又非去岁之比矣臣等蒙陛下擢置从列感恩至深目击事势可畏如此不忍上负圣知是敢罄竭血诚控告君父伏望圣慈断然一出不胜宗社之福如臣等所言更不能感悟圣心则臣等皆为失职实难苟安不免引去以俟罪谴激切之衷倾尽于此伏乞睿照

贴黄臣等伏见司马光为谏官上皇帝疏又上皇太后疏臣等今不胜拳拳之忠辄具奏劄上进重华宫所有录本并以缴进伏乞睿照

上壽皇圣帝劄子

臣等仰惟陛下功成不居以舜禪禹上继光尧垂耀万世臣等素蒙长育又荷拔擢竭忠主上如事壽皇所愿两宫孝慈永久无间使宗社灵长朝廷奠安无愧典谟之盛而半载以来车驾每欲过宫起居每蒙圣慈降旨暂免盖昨缘积雨极热深轸慈眷然而因循日久浸阙礼文观瞻所系驯致疑惑而皇帝天姿恭谨兢业过甚深念蒙付托之重怀不自安几若严惮倘非壽皇圣帝加意开接每事慰安切恐渐成疑阻关系非轻今兹会庆节合上壽伏望睿慈先期勿复更免过宫俾皇帝得以躬率羣臣展前殿玉卮之敬三宫欢洽四海欣庆不胜幸甚窃惟父子至情本无纤芥或恐左右小人妄有间言使孝慈之怀两不能尽更望圣明以宗社生灵为念曲赐洞察愈加慈爱勉以必来皇帝素笃仁孝又蒙皇慈委曲如此必无迟回于以释四海危疑之心于以光两朝孝治之美臣等无任恳祈激切之至

上两宫奏疏

臣某等昧死再拜上疏至尊壽皇圣帝陛下皇帝陛下臣等窃惟父子之间人所难言也而况万乘之贵两宫之尊崇高莫大慈孝兼全在于臣子何敢容喙伏见嘉佑中英宗皇帝嗣极之初慈圣光献皇后垂帘听政天下安危之机实在于此司马光不胜爱君忧国之心上疏英宗则专陈子道上疏慈圣则专论母慈又虑母子未能深属或有疑阻遂并以一疏上之慈圣之慈英宗之孝终于无间顾岂臣下之力然光之心出于至诚未必无助臣等是敢仰慕先正竭尽区区共为一疏上干两宫伏惟圣慈俯垂听纳臣等闻圣人之德无加于孝一人有庆兆民赖以天下与人易为天下得人难为天子父慈之至也以天下养养之至也高宗以天下授之壽皇壽皇以天下授之皇帝为天下得人而宗社奠安孝之大者也前则壽皇尽孝于高宗今则皇帝尽孝于壽皇以天下养孝之尤大者也内禪之盛自尧舜以来未有如今日者再世

揖逊不待倦勤辉光今古震耀夷夏若寿皇享为天下得人之福皇帝尽以天下养之孝则天地祖宗垂佑于上臣民夷狄厌服于下非所谓一人有庆兆民赖之者乎今日之事父子至亲虽非嘉佑之比然司马光之言有切于事情者其略曰孔子曰孝哉闵子骞人不间于其父母昆弟之言盖言诚信纯至表里着明而他人不能间也孟子曰父子责善贼恩之大者盖言骨肉至亲尚以恩意相厚不尚较锱铢之是非也今日之事或见于此虽天性无间本无可疑岁月寢久颇见形迹臣等欲望皇帝深思孔子之言寿皇无忘孟子之戒万一奸人欲有关说涉于离间者显行诛斥以明示天下日遣使介交驰两间重华笃慈爱之仁南内尽爱恭之实夙整法驾视膳问安及清和之时讲恭谒之礼或邀迎于内庭或娱侍于禁籞使都人拥观万国懽舞破羣情之惶惑消衆口之谗谤两宫慈孝之道昭明于时传诵于後和气嘉生充塞宇宙变愁叹为讴吟化骄阳为甘泽岂不盛哉岂不快哉臣等欲望两宫同降指挥指日顺动壽皇为宴设之具皇帝当奉养之仪驩欣交通于未见之先慈孝翕合于无疆之久於万斯年燕及中外天下幸甚社稷幸甚

论君道

臣闻孔子曰为君难何为其难也以为四海之大万几之繁贤否之辨是非之明皆君之难事而未足为难也以常人之情凡可喜而易为者人君必戒之絶之凡可厌而难行者人君必勉之进之而後可以为明君可以服人心可以追三代之盛可以为万世之法此其所以难也宫室服用宴饮欢乐声色俳优驰射弋猎珍禽奇兽宝玉秘玩此皆人情之甚喜者恨无力以致之而人君颐指如意有求必获然而一纵意焉则乱亡之机实自此始故必戒之絶之是非所谓难乎恭俭朴素忧勤笃谨讲论经理考证古今广求民瘼招致贤能此皆人情之易厌者虽一介之士所不能行而以万乘之主行之然而一留意焉则治平之基实兆于此故必勉之进之是非所谓难乎喜人而予之爵赏稍过则为滥予怒人而加以刑罚稍过则为淫刑而其尤难者其所言之际乎巽与之言人所乐听在人君则当察之不惟察之又当屏之忠鯁之论人所难受在人君则当容之不惟容之又当行之此皆人之至难而人主任天下之重虽富贵崇高无伦无敌而欲去人之所喜行人之所厌是为艰哉仰惟陛下圣性天纵其所可喜者能戒之絶之其所可厌者能勉之进之是将尽为君之道以厌服天下之心然臣区区犹恐有未尽者不敢泛引古事多援经史以为烦渎直以人情之所甚喜与夫可厌者为陛下言之诚能深知为君之难戒其可喜而有大大可喜者见矣勉其可厌而有不容厌者效矣大抵为人君者皆不可以常人之情自恕而以人所难者自勉忍人之所不能忍容人之所不能容谨人之所不能谨戒人之所不能戒人以为自苦而我乐之人以为甚难而我安之夫然後可以尽君道矣臣久污朝列无补事功误蒙圣恩拔擢至此朝思夕虑未有长策奇论以补报陛下聪明于万一直以愚忠所存恳恳奏陈伏望睿慈略其言而采其意不以为愚而力行之庶其有涓埃之益以无负责难之义伏惟陛下裁幸

攻媿集卷二十三

<集部,别集类,南宋建炎至德佑,攻媿集>

卷二十四

钦定四库全书

攻媿集卷二十四

宋 楼钥 撰

奏议

论初政

臣仰惟陛下受天明命膺太上付托之重以承列圣亿万年之基图覆载两间无不悦服窃闻陛下临朝渊默发言精当尊礼大臣凡事审订而後行台谏论列给舍駁议随即听从而圣德谦抑增置讲官收召名儒有终始典学之诚宗社无疆之休基于今日诚千载之幸会也臣至愚极陋备员从班既得以词章小技仰代王言奏对之初敢效忠言以裨圣明之万一自古人君既位之初多能自强以銳意于治天下往往称诵望太平于旦夕以其富贵崇高安逸汰侈不期而至在位既久君子日疎小人日亲逆耳之言不闻而谄谀之言日进偃然自以为安而不知君门之外皆知祸乱之作独人主不得而知呜呼秦汉以来贤明之君而至于此或及其身或貽祸于子孙为後世笑者不知其几也唐高宗永徽之初日引刺史十人入阁问民疾苦尊礼长孙无忌褚遂良恭己以听百姓阜安有贞观之风而权移房闕几覆唐宗明皇开元之初以风俗奢靡制乘輿服御金银器玩令有司销毁以供军国之用珠玉锦绣焚于殿前后妃以下皆不得服珠玉锦绣天下母得采珠玉织锦绣而末年穷天下之欲不足为其乐以致天宝之变德宗动遵礼法罢贡献罢乐工纵苑兽出宫女淄青将士投兵相顾曰明主出矣吾属犹反乎政从寬大藹然有贞观之风而其後奉天之幸又幸梁州几不免其身而其尤可憾者初能疎斥宦官亲任朝士而後乃疑暗不知所倚任晚又益忌宿将而罢之命宦官分典禁旅终唐之世为患尤深此三者最其可戒者也陛下圣性高明恶旨酒薄嗜好孜孜以学问为急而不以位为乐臣岂当私忧至此以平日读史见贤明之君不克图终未尝不痛之使唐之三君皆能谨守如其初则末年岂至是哉今夫官吏以三年为任者能为三年之计则可保其身或苟度岁月鲜不及者人主修身正家处事发政动为无穷之计则可以保天下陛下任天下之重承社稷之托兢兢业业终如今日而又日亲贤臣益务学问增修圣德虽休勿休天下之事及其小而谋之则不至于大自其迹而防之则不及于远守之以坚行之以久而後治效可觀也成王访落之诗曰於乎悠哉正未有艾心诚求之此保治之道也伏惟陛下裁幸

雷雨应诏封事

臣准尚书省劄子十月八日三省同奉圣旨朕以不德嗣承大宝夙夜祇畏不遑宁处乃者陰阳谬盪雷震非时淫雨为灾朕心甚惧推?厥咎未知其由凡朕躬有过失朝政有阙违可令台谏侍从各条疏以闻无有所隐臣待罪东台职司论驳雷雨为沴自应论奏仰勤诏旨尤切兢

惶实以兼直内制适当书诏填委之时才短思涩日不暇给虽有愚悃未能控陈慈敢一一陈述伏惟陛下采择伏自陛下临御之初近自都城远及四方人心翕然陛下又守之以仁用之以俭忧勤庶政之余亲近儒生讲论经理上则尽孝于重闱下则深恤于民隐此宜有嘉祥为之应而变异乃尔不惟冬雷无此盖虽暑雨蒸郁亦未有震雷连日夜不止如此者也臣少诵云汉之诗尝于诏书略发其说而未详序诗者曰宣王承厉王之烈内有拨乱之志遇灾而惧侧身修行欲销去之天下喜于王化复行百姓见忧而求之于诗若王曰呜呼何辜今之人天降丧乱饥馑荐臻又曰耗斁下土宁丁我躬曰兢兢业业曰忧心如熏曰宁俾我遯等语皆所谓遇灾而惧百姓见忧者也若曰靡神不举靡爱斯牲圭璧既卒宁莫我听曰不殄禋祀自郊徂宫上下奠瘏靡神不宗曰祁年孔夙方社不莫昊天上帝则不我虞敬恭明神宜无悔怒则若怨天之不佑而终篇不见侧身修行之言何耶呜呼宣王之意以为周家一岁祀事为民而祈者不过如前数事今我既一一为之而旱灾如此无所归咎其罪在我矣故虽无侧身修行之言而诚意出于言外故百姓得以见忧而序诗者亦显然诵言之汤以六事禱于桑林曰政不节欬使民疾欬宫室崇欬妇谒盛欬苞苴行欬谗夫兴欬成汤不迺声色不殖货利六事皆汤所无者犹拳拳深自克责此宣王所以粲然复兴而成汤所以其兴勃焉也太戊桑穀共生于朝伊陟曰殆不胜德武丁雉升鼎耳而鸣祖己曰修德三君修德而称三宗夫所谓德者非他也至诚之谓也故经之言德多以伪为对曰恭俭惟德无载尔伪作德心逸日休作伪心劳日拙孟子曰以德行仁者王以力假仁者霸知以力假仁为伪则知以德行仁者为诚矣又曰恭俭岂可以声音笑貌为哉言不可以伪为也扬子曰有人则作之无人则辍之谓之伪亦言其不出于至诚也至诚之道曰戒慎乎其所不睹恐惧乎其所不闻故君子必谨其独也文王黜黜在宫肃肃在庙不显亦临无射亦保不闻亦式不谏亦入盖于闺门衽席之间一一以礼法自处诚意着见有不可掩者所谓莫见乎隐莫显乎微欲人不闻莫若不言欲人不知莫若不为盖言之无不闻为之无不知者易傅曰君子居其室出其言善则千里之外应之况其迹者乎居其室出其言不善则千里之外违之况其迹者乎言行君子之枢机枢机之发荣辱之主也言行君子之所以动天地也夫以陛下畏天之诚心下诏责躬又从而求言方在行内无殿之可避方执通丧无乐之可彻荒政日修德泽日布可谓得应天之实矣臣区区之愚尚恐有声音笑貌之为有无人则辍之伪故敢僭越陈之陛下询访日勤恐未免于自用讲读日加恐未免于嬉游闺门甚正而外间已有好色之谤用度甚节而外间或议锡予之多臣之所闻未必皆实陛下罪已惟惧不及伏望圣明鉴宣王侧身修行之意求成汤自责以所无之心凡应天之事一切行之以诚持之以久一如前日雷霆轰轰于上之时斥远谗邪亲近忠直裁节横恩修明纪纲不以有人则作之无人则辍之然後治效日有可觀矣陛下觀今日为何等时一人修德于上则可以弭天变可以安人心覆载所及亿兆生灵将自此而有生全安堵之望社稷益固宗庙益尊陛下为千万世圣明之主若行之不以至诚姑以声音笑貌为之则忠直者日疎谗佞者日进不自觉知以至祸乱有不可胜言者成王访落之诗落始也始即政而访问于羣臣也曰於乎悠哉正未有艾将予就之继犹泮涣言天下之事悠远未有底止事若将就而又涣然难合此成王之所甚惧以保盈成之业今日正是陛下访落保治之时臣不敢泛引天下事为对倾沥愚悃仰答清问伏惟陛下裁幸

议祧迁正太祖皇帝东向之位【同从官】

臣等窃惟宗庙至重祧迁之礼尤不可苟今大行至尊壽皇圣帝祔庙有期礼官乞迁宣祖而祔壽皇圣帝此本朝之定制伏望朝廷照应礼典施行无可议者所有太常少卿曾三复请正太祖东向之位就乞上祧僖祖此事尤重非议不可臣等考之嘉佑中固已建议徒以亲犹未尽故虚东向之末以待太祖而太祖尚居昭穆之间治平末年僖祖亲尽而祧至熙宁大臣王安石不顾公论不稽礼典直以私意臆决紊宗庙之大经当年名臣与夫绍兴之初董弅王普朱震等建议淳熙初元赵粹中尽集前後论议奏陈尤切一时已蒙采录皆以偏辞曲说阻抑至今仰惟太祖肇造区夏功迈百王庙号太祖盖以尊无与二非曰尊諡也今郊祀既以配天宗祀以配上帝而在庙独不得为始祖祫享独不得正东向可乎正缘议论未明故屈受命开基之君而列在昭穆之序其何以示後世揆之礼经僖祖亲尽当祧不因迁祔之时此事谁敢轻议况今日九庙既备尤不可忽而不图臣等欲望圣断明诏大臣早正鉅典因大行祔庙之际定宗庙万世之礼慰太祖在天之灵破熙宁不经之论开千载之惑以昭示无穷天下幸甚社稷幸甚

贴黄自古天子止祀七庙太祖之庙居中三昭三穆实为六世与太祖之庙而七本朝崇宁按唐之制始立九庙有其举之莫可废也今太祖为始祖则太宗为昭真宗为穆自是而下以至壽皇四昭四穆与太祖之庙而九上参古礼而不废崇宁九庙之制于义为允伏乞睿照

治平四年从张方平等议僖祖当祧合于礼典其年三月已自祧迁藏西夹室至熙宁五年王安石以私意使章衡等建议乃复祔僖祖以为始祖又将推以配天欲罢太祖郊配韩维司马光等力争而安石主其说甚坚孙固虑其罢艺祖配天建议以僖祖权居东向之位既曰权居则当厘正明矣伏乞睿照议立四祖别庙

臣等窃惟宗庙事重作可轻议兹准省劄【节文】太祖皇帝既正东向之位然僖祖宣祖既祧之主宜有所归欲用朱震之说藏于夹室则考之周制僖顺翼宣之主不当藏于太祖之庙欲用王普之说祔于天兴殿则景灵宫朝献之礼与唐禘祫朝享之仪同欲用柳冕之之说筑别庙以居之则又非合食之义以是三者令臣等集议可谓详尽臣等请先明其不可行者二而定其可行者一以裨庙堂之末议恭惟本朝去古既远礼制不能尽循于古参取汉魏以来以至于唐考定为一代之制按唐张齐贤之言曰古者有天下者事七世而始封之君谓之太祖太祖之庙百世不迁至祫祭则毁庙皆以昭穆合食于太祖商祖玄王周祖后稷其世数远而迁庙之主皆出太祖故合食之序尊卑不差汉以高皇帝为太祖而太上皇不在合食之列为其尊于太祖故也魏以武帝为太祖晋以宣帝为太祖武宣而上庙室皆不合食于祫至隋亦然唐以景皇帝为太祖太祖以上皆不合食于祫臣等谓齐贤之说本朝之所当取也太祖皇帝开基之初岂不能祀七世推而上之至僖祖而止故用唐制建四亲庙以祀僖顺翼宣四祖洎太祖祔庙尊为宋太祖盖契始封于商稷始封于周故商周皆尊为太祖唐自凉武昭王髡而下至高祖为八世岂不能惟髡为始祖而以祖虎始封唐公父及已皆袭封于唐唐之建邦启土比之契稷故推为太祖而太祖之上亲尽则毁故如宣简公在高祖时为四室之尊洪农府君在太祖时为六室之尊然皆亲尽为祧也太祖之兴上无所因与汉高祖事同故太祖尊为太祖而僖祖在治平间以亲尽而祧入于夹室至熙宁中王安石始改尊僖祖为始祖遂屈太祖不得正东向之位以至于今今日既伸太祖东向之礼僖祖之主当再入于夹室既协

唐洪农府君之制又遵治平已行之礼然在今日则为未安盖自熙宁以来推尊既久难以一日遽还夹室又考之周制后稷之庙则先公之祧藏焉盖公刘不窋以至太王王季之主皆祔文王武王之庙则先王之祧藏焉盖自成王而下皆祔唐有兴圣庙以祀凉武昭王故景皇帝既正东向则献祖懿祖之主皆祔以不欲以祖先而祔孙子之庙也今之太庙顺祖翼祖及宣祖之迁皆入夹室则犹曰僖祖在第一室故三祖之祔为顺今太祖既入第一室则僖祖宣祖二主之祧所以当议也臣等以为朱震藏夹室之议既不可用景灵宫祭圣祖用素饌则王普祔天兴之议又不可用也惟唐柳冕之说筑别庙以居之朝廷谓非合食之义则臣等有说焉谨按唐陆淳之言曰太祖复位献懿之主宜有所归一曰藏之夹室二曰置之别庙三曰迁于园寝四曰祔于兴圣然而藏之夹室则无飨献之期置之别庙则非礼经之文迁于园寝则乱宗庙之仪唯祔于兴圣为是至贞元十九年左仆射姚南仲等献议五十七封付都省集议户部尚书王绍等五十五人请迁祔兴圣庙议遂定由是太祖始复东向之位臣等以为僖祖当用唐兴圣之制立为别庙以代夹室顺祖翼祖宣祖之主皆藏焉如此则僖祖自居别庙之尊三祖不祔于孙之庙自汉魏以来太祖而上毁庙之主皆不含食今遇祫则即庙而飨于礼尤称如朝廷以为允当更乞行下礼部太常寺考议制度施行

议明堂【部中集议】

谨按礼记曾子问天子崩未殡五祀之祭不行既殡而祭又曰自启至于反哭五祀之祭不行已葬而祭郑注云郊社亦然正义云未殡哀戚未遑祭祀既殡而後祀也欲葬之时自启殡以後葬毕反哭以前灵柩既见哀摧更甚故五祀之祭不行已葬反哭殡宫毕而行其祭又引郑云既殡以後未启以前得行祭礼检准本朝典故缘郊祀明堂间有在谅闇之中然皆在踰年之後别无未葬以前行礼故事若据礼经则已殡未启可以祭祀某等窃见礼莫重于丧丧莫重于斩衰况事父孝则事天明此礼之本也若皇帝过宫执丧如礼则既殡未启可以据经行事今来丧礼未成难以议祭合俟皇帝即丧次行礼则有司之事可以类举

再议明堂【御史台集议】

某等窃见本朝每三岁一行郊祀皇佑以来始讲明堂之礼二者至今遵行本无可议大行至尊寿皇圣帝之丧未及发引而大祀之期已迫考之典故累朝间有大祀在谅闇之中而适不在当郊之岁故无发引以前行事故实考之礼经在王制则有越绋行事之文在曾子问则有既殡而祭之说虽未葬以前可以行事某等窃以丧莫重于斩衰祭莫重于禋祀因大丧而废大祀礼固不可若斩衰之礼未备而祀明堂则事天如事亲之义安在经曰事父孝故事天明祀曰祀明堂而民知孝又曰祀乎明堂所以教诸侯之孝今皇帝之丧以日易月既经小祥其去大祥禘祭已无数日而皇帝尚未有至宫行礼之日夫所谓绋者乃菆涂龙輶之索人子居丧不离菆所故大祀则越此绋而行礼今皇帝未尝一至殿菆之所则何绋之可越某等今议合候皇帝即次执丧之後或依据礼经而用未葬之前或参酌故事而展太祀之期徐议其当则有司之事可以次第而行矣

卷二十五

钦定四库全书

攻媿集卷二十五

宋 楼钥 撰

奏议

讲筵论资治通监

臣仰奉圣训读资治通监有以见陛下务考周秦以来兴亡治乱之迹以为监戒此诚圣学之要也司马光为此书始於周威烈王二十三年命三晋为诸侯以为天子自坏其纪纲周衰既久自此遂不可支故极论礼与名分最详以为此书首篇诚足为後世之深戒然臣尝考之此书之作又有深意自古史法皆以编年春秋是也自司马迁史记创为纪传之体无复编年之作荀悦袁宏书又不显光之此书实继左氏传而不敢显言之春秋一经公羊止获麟鲁哀公之十四年也左氏经终孔丘卒哀公之十六年也而传终哀公之二十七年其末篇叙知伯事其略曰知伯不悛赵襄子由是基知伯遂丧之知伯贪而愎故韩魏反而丧之注谓在春秋後二十七年臣考获麟而春秋絶笔絶笔二年而孔子卒又七十六年是周威烈王二十三年而三晋为诸侯通监之始也其实三晋之分知伯在周贞定王之十六年去孔子才二十七年左氏传以三晋事终通监以三晋事始其实继左氏传编年之法此读通监者之所当知也又通监首卷起着雍摄提格尽玄默困敦太岁在戊曰着雍在寅曰摄提格在壬曰玄默在子曰困敦光岂不能书戊寅壬子而直以此纪年者尔雅释天篇岁阳岁阴甚详其以甲子乙丑云者在书法止可以纪日光之书此非好为泥古盖其岁阳岁阴书法当然也伏乞睿照

论通下情

臣闻天尊地卑乾坤定矣卑高以陈贵贱位矣君臣之分万世不易之道也然天为高矣不以高为贵而以下济而光明乾为刚矣亢龙则有悔而以用九而为治在易坤上乾下卦反为泰其象曰天地交而万物通也上下交而其志同也乾上坤下卦反为否其象曰天地不交而万物不通也上下不交而天下无邦也此皆圣人之深意也故古之君子分甚严而道则同势甚尊而情则通舜之求于臣者则曰予违汝弼汝无面从退有後言禹之告舜则曰安汝止惟几惟康其弼直孔子教人以事君之道曰勿欺也而犯之礼经亦曰事君有犯而无隐孔子事君尽礼春秋专为尊王而作而在礼尊君之至至于蹇路马有诛齿路马有诛可谓严矣而二帝三王之君其所以求于臣者直以为惟后非贤不又后非衆罔与守邦直以为君之与臣相与共治天下故其见大臣则在舆或为御坐或为起盖尊德乐义不得不然上下一体不事形迹是以治功可兴而事业可就也中古以还君益尊臣益卑至于晚唐五代犹有坐而论道之余意太祖收揽权纲以救天下之弊可畏可仰孰敢干犯然与赵普论事心通气合或夜半而至

其家其相与何如也累圣相承共由斯道尊如天严如神而降寬尽下容受狂直如出一律本朝隆平既久中兴以来三圣授受绵七十年以至陛下仰惟圣听恢洪无不覆帱论经理日昃不倦真古帝王之用心亦艺祖神宗之家法也今日陛下临朝俨然若帝之临宰臣而下奔走拜伏莫敢仰视号令之发方尺之纸风动万物畴敢不应人主之尊不患不及臣愚欲望睿慈严上下之分而通君臣之情隆堂陛之势而明否泰之道陛下体天道之下济而羣臣得以卑而上行使刍蕘之说不壅于下狂夫之言圣人择焉则君道愈尊国势愈隆天下以成其政欢欣交通而後天下可为也臣言若迂实切于治惟陛下裁赦

论君心【知婺州朝辞】

臣闻庖丁之技因悟养生轮扁之工可以语道言有甚小可以喻大多此类也臣无所取材号为温州号为烦剧若趣了目前簿书期会财赋宾客之事亦可麤办臣尝自念受朝廷千里之寄不可止了目前环境之内山巔水涯苟有一夫之失所皆已之责于是分任官僚访问者老不自耳目之私私而以衆智为明虽不设鈎距不为巧术而下情麤通二年之闲苟幸无事矧今立朝七年蒙陛下拔濯爵高禄厚授以便郡委寄益重尤当布宣寬大以惠斯民当此违离君父之初尚効论思献纳之益愿以涓埃之微细仰裨海岳之高深恭惟陛下为天之子受付托之重天之所覆祖宗之所临御陛下以一身应之日晏坐朝躬亲听断大臣议政羣下献说崇朝之间应酬已多退阅奏章坐判可否况复圣性恭俭勤于讲学人主之道不为不至然臣窃恐犹是趣了目前未必能致幽远治道多端未可以为止于此也臣辈所治一州实恐日力不给陛下所临如臣辈所临之州不知其几四方所至幅员动以数千万里必欲家给人足无不得所则所谓博施济衆尧舜其犹病诸谓其力所不及则禹思天下之溺由已溺之稷思天下之饥由已饥之人主用心不得不然陛下试于清闲之燕披輿地之图不知某路今付之某人为监司帅臣某州今付之某人为太守某军今付之某人为将帅其人之才不才事之治不治察其事实而赏罚随之犹庶乎其可乎虽好恶之道惟应任大臣先有司而四海之远治之在心苟不能以吾一心包括宇内每思有以补偏而补弊笃近而举远臣恐四海之民将有不安其生者陛下如此存心则下受赐者衆以其非趣了目前而已也臣窃闻孝宗皇帝尝语近臣曰朕每日于天下游行一遭此真帝王之言故延见访问无一事之不周此陛下所宜取法臣未能知効一官而推广事理敢以为献惟垂听而赦其愚

论本朝专尚忠厚【召除翰林学士】

臣孤危之踪顷岁际遇陛下践祚之始获侍讲筵进读资治通监至孟子见梁襄王问天下恶乎定孟子对曰定于一孰能一之曰不嗜杀人者能一之是时臣尝奏曰孟子在战国时人皆谓之迂阔于事正谓此等盖当时七雄分据专以杀人为务所谓争地以战杀人盈野争城以战杀人盈城杀人多者国愈强惟秦为甚伊阙之战杀人二十四万华阳之战杀人十五万其尤甚者长平之战一日杀四十万卒平六国一天下乌在其不嗜杀人而能一之也然则孟子之言果迂阔乎是不然孟子之所谓一者非若秦之一也三代之得天下以仁传皆数百岁秦止再传而四海涂炭嬴氏无遗种是不若不一之为愈也臣窃惟孟子之言至皇朝而後验唐自天宝之乱藩镇盛强世袭根本不可动摇宪示刚明果断武宗成其功烈兵威稍振然他镇

不能尽服仅能羈縻之而已周世宗不血刃而下二关夺李氏之淮南已为甚盛之举至我太祖太宗削平僭伪四方宾服重熙累洽绵百余年人但知祖宗之善于用兵不知所以一天下者本于不嗜杀人也靖康之祸其何忍言自王安石开边结怨王韶伐青唐章子厚开梅山刘彝沈起生事於南蛮童贯蔡攸起衅於北边有如高遵裕灵武之溃徐禧永乐之陷杀气妖氛转入中国使中原百年丘墟天地之大德曰生岂专以杀而定天下哉高宗披荆棘而立朝廷外有方张不制之敌内有江湖甚剧之寇而卒能光启中兴正以圣性不嗜杀人天相人助以跻登兹是知本朝家法专在于不杀而孟子之言明效大验于此陛下玉音称善至于再三臣违离阙廷十有三年屏居畎亩不敢忘君惟陛下圣慈仁孝畏天爱民施之于政皆出诚心是以郊祭之礼上帝昭格年谷顺成中外小康真得列圣之用心而权臣愚好自用轻信寡谋横挑强近兵连祸结中外寒心者数月臣窃自惟念天道亏盈益谦好生恶杀我宋立国二百四十余年专于不杀北敌之强盛殆将百年专於好杀天意其将孰佑之乎是以去岁拥兵南来屡有败衄且多失其酋豪而粮道不继为之退散今岁声言入敌卒亦不能大入此固国家福祚无疆陛下威德远被将士用命民心不离以至今日然迹其所本实曰不嗜杀人积累忠厚之报也臣衰老得谢待尽朝夕仰蒙束记更化之初首加收召诚以久苦足趋拜甚难控辞不一而上迫于威命趣行郡守津遣翰苑之除下于里门皇恐就道复覲清光诚为微臣千载之幸顾无以上答乾坤之施敢以昔时经帷之说申言之伏望下采刍蕘之言力行宽大之政光绍前烈益恢远图臣虽退伏田里志愿毕矣

论风俗纪纲

臣窃惟国家元气全在风俗风俗之本实系纪纲本朝纪纲素定风俗醇厚度越前古自权臣擅朝政以贿成十余年来无复公道纪纲废弛风俗凌夷几不复可以为国矣天开圣明甯殛元恶党与以次诛斥此如沈疴去体而元气未尽复调护保养不可缓也其要莫如正纪纲厚风俗二者向者纪纲既废货赂公行苞苴之弊徧及中外仕者朘削民财以奉权臣则美官可翹足而待兵官剋剥士卒以奉权臣则将帅可计日而取是以民力益竭军政大坏今日尽籍其家数至钜万俸禄有限何缘至此则其取于民力取于士卒者不知其几也文武之臣所赖以为国家之用而专以趋媚为能奔竞拜伏竭资效产不复知有廉耻之道至奴事其仆隶以自进既得所欲则傲然于外小则骄人甚则害物士大夫苟可自致无不效尤否则为州为县公取窃取以自効举削或以厚赂而後得然则欲贤令宰以临民得乎风俗至此不可胜诛陛下寬仁必不欲一一究见其罪亦恐搜求已甚人情不安欲望圣慈念民力之困弊县官之不给而丘山之积实出于鞭笞膏血之余纵未能尽捐以予民乌可不思所以救其倒垂之急会计凡目举以补大农之经费而稍寬州县之督责使陛下惠养之意晓然示于天下而所以寿国脉者无出于此矣更乞明诏大臣以及台谏给舍去其太甚以惩其余使自今以始纪纲益振则风俗庶乎归厚实宗社无疆之福外侮虽为可虑然治外者当自内始故臣拳拳首为陛下陈之

论仁德刚德

臣闻乾健坤顺震动艮止各以其甚者言之乾之下济未尝不顺坤动也刚未尝不健震亦有

止而艮亦有动圣人之德亦然文王之武武王之文可知矣人皆曰天以刚为德人主亦以刚为德此万世不易之论也在易大有之盛五爻皆阳而君位以六居五曰柔得位而上下应之曰大有击辞又曰天之所助者顺也人之所助者信也履信思乎顺又以尚贤也盖天与人君一也虽曰以刚为德而尤以好生为仁臣事陛下于龙飞之初年投闲一纪再蒙收用日夕思念愿有以裨益圣德于万一惟国家累圣专以仁厚不杀为主如积善之家必有余庆仰窥圣性承忠厚之习如必欲强为刚强之事度亦非陛下所安臣又求之于古周过其历汉祀四百本朝累圣相承平治最久究其所以虽曰积累之厚而周之世世修德莫若文王汉之结人心无如文帝本朝之盛仁宗皇帝尤为隆平四十二年之事至今人人能称颂之文王徽柔懿恭视民如伤亶亶穆穆顺帝之则文帝恭俭宽仁专务以德化民仁宗皇帝圣度如天万物并育自有謚法以来未有以仁为謚者天实命之夫以周汉暨本朝盛际自文王及文帝及我宋仁宗不以刚德为称而皆本仁柔以出治陛下圣性隆宽实似之而又谦恭勤约身先天下虽欲强为刚强之事亦有所难诚能远慕文王文帝而近法仁宗使好生上当于天心皇恩浹洽于上下则保治之道何以尚兹臣又有愚见敢申言之文王之赫然斯怒以安天下之民文帝以严致平仁宗皇帝干戈鉄钺之诛未尝有所私贷所谓仁者必有勇此皆自仁德发之此尤陛下所当取法也陛下外鉏叛将内诛奸臣雄断庙谟天下耸服臣愿陛下不必改圣性之所安而于用贤去佞收揽威权惩艾奸恶时出圣断以裁之则仁足以寿天下之脉而威足以折奸谀之心行之无倦谨终如始则宗社之福诚未艾也

论内外之治

臣窃惟国家驭外之道与古不同艺祖开基未始一日忘幽燕之民太宗乘河东兵威亦欲一举而终不遂真宗初以边民苦於战争戒边将各自城守以图安静达来之来乘虚而入直抵河上澶渊亲征出于不得已而履此危道自解讲之後累圣不复有北伐之举宣和燕山之役是时中国军政大坏委于奸人腐夫以取覆败此又非所忍言臣尝以假吏至燕亲见旧边所谓白沟河者真一衣带水而安肃等处水柜榆柳塘泊之遗迹亦皆人力设险而又天险也前代虽汉唐之盛岂无失德而患不至此秦之长城千古以为无策然犹有以限制之自周德威失榆关之要石晋献十六州之地而後中国不复可为此如编氓之家与盗为隣所恃以御之惟垣墙耳一旦盗入垣墙之内而画平地以守其势但多与之金帛冀其勿扰耳故虽以累朝承平策止于此况自建炎以来限以淮水蜀犹有险可守襄汉则平陆相接天未悔祸高宗孝宗岂不痛念势既未顺遵养至今奸臣擅权狂悖生事几危社稷陛下之所亲履又不免屈己以求和和之成否尚未可必臣虽预未议非不知振发激烈以摅宿愤敕榜一出外议纷然虽浮言胥动不究事实然皆有强人意者虽不可用正自不可以为不然闻之古语有云主忧臣辱陛下宵旰未忘顾臣辈无有长策以尽雪国家之耻其辱惟甚臣观欧阳修言于仁宗曰元昊叛逆一方而劳困及于天下北人乘衅违盟而动其书侮慢至有贵国祖宗之言陛下愤耻虽深但以边防无备未可与争屈己买和莫大之辱是时犹以为莫大之辱则今日之事岂特可为流涕太息而已陛下以生灵为念虽奸臣以诛而国势愈弱不得已而屈己增币尚未保其必从则国家之辱甚矣君臣上下惟当以宗社为念卧薪尝胆以图之臣恐和议一成喜庆相贺文恬武嬉便为无事则後日之事其何可胜言陛下躬行恭俭更化善治欲大有为而边事未靖欲为未可宜先定规模内修自治之计日夕与二三大臣讲明其要次第施行如边备

屯田安集流移葺治戎器节约冗费等事皆为要切之务臣年过七十本不当仕敢竭丹衷以告陛下退伏田里死无所恨惟陛下亟图之

攻媿集卷二十五

卷二十六

钦定四库全书

攻媿集卷二十六

宋 楼钥 撰

奏议

论听纳

臣窃惟人主求言非是止循故事人臣进说必欲有益国家君臣之间各思致治上下相应本同一体而上之求於下下之进于上齟齬不一今古患之前贤之论可谓详备更有二事臣敢详陈一是忌讳拘牵一则指摘效验为害实广人或未思何谓忌讳拘牵盖人主崇高献諛者衆以年则称亿万以祚则谓无疆颂德则必拟尧舜论治则不数汉唐习闻顺指之辞罕陈兢业之戒天文示异则移占于殊域水旱为灾则委罪于州县姑务一时之美听本非平日之後言一有立论稍高出言据正或相苛责以为过岂知言不激烈不可以动人言无顾忌乃足以达意故禹以丹朱而戒舜周公以商受而戒成王君臣一心不以为异秦汉而下忌讳实多京房之说王章之言既大悟于君心又深中于时事可谓一时之至论羣臣之未发止缘权幸侧目奸谀蔽欺弃其大端摘其小过因缘人主之讳恶显坐臣子之非宜致之死地以箝衆口由今观之验以汉事使房之说获用则石显之徒可诛而孝元之政不坏矣使章之言卒行则王凤之党尽去而西京之祚不队矣拘牵忌讳以至于此此臣之所谓害之一也何谓指摘效验盖人臣进言求益于国前有据依後有证验庶几得事理之实可以回君上之听传之简册以为格言如贾谊之论侯国江统之论徙戎言虽不用事则果然证验之明如合符契可谓善于立说者矣然而进言之士指陈事实必曰如是则治安如是则危乱或引商为鉴或借秦为喻自是进言之体无非爱君之言正欲人主垂听可以制治于未乱岂愿他日有悔徒取知言之虚名然而未形而言多谓其已甚既言之後或未必尽然便谓好为过言不见其效成谗夫浸之闲啓人主厌言之心人臣既为君上而言固当不苟人主但求有益于我何问其他且如水旱之始皆谓盗贼可忧赖陛下图之於初救之备至饥饉者既得所养奸杰者无所发端至于今日卒以无事此非天道实出人谋在今日事虽不然而其初真有可虑若谓太过则诚不可以此知但当视其鉴戒之言益增警惧之意若始疑其过未指其妄则言者憚矣陛下爱养敢言之气深察羣下之心如臣所陈又何足进窃惟古人之论犹未及此敢因奏对辄罄愚衷倘圣明少赐采择不为小补

论帅臣不可轻出

臣窃惟诸道置帅官称安抚兼兵民之权有分阃之制朝廷选择甚重不轻比年以来遇有盗贼窃发州县所不能制者必使帅臣亲行虽多成功臣窃虑此水旱饥饉既不能免潢池弄兵

安保其无若自此以为故事帅臣动辄临戎恐非国家之长策也仰惟神宗皇帝垂意边事庙谟深远乃熙宁九年知成都府蔡延庆言乞发陕西兵援茂州候兵集自将以往令转运司摄府事诏朝廷已遣将部兵延庆务在持重毋得轻去成都元丰九年河东经略司言西贼入麟州神堂寨知州訾虎等领兵出战有功诏虎自今毋得轻易出入遇有寇边止令裨将出兵擄逐神宗之虑深矣盖帅守之臣民之司命一有失宜衆心易动当令指授方略调度军食持重镇抚以靖一方虽有挫衄根本不摇若使轻出利害实大盖帅臣之行建牙郊野堪战之士咸在行陈从行兵卒必是单弱而又随宜迁次登陟险隘脱有黠杰之盗伏隐篁竹乘闲捷出以犯大帅之顔行则贼势易张国威难振仓猝之顷可胜言哉故延庆有请既拒而不从訾虎成功亦因以切戒此臣平日之所虑适合信史之所传无事而言似非时务愚者一得愿效君前伏惟俯矜微悃曲留宸念臣幸甚

论役法

臣窃惟州县之事其切于民者莫大于役法其害于民者亦莫大于役法役法不明民受其害仰惟陛下爱民如子罢行利害惟恐不及而民犹有未安田里者盖役法有以害之也夫民之畏役如避仇讎苟可以幸免则无所不至甲当为之必曰乙富於我乙当为之必曰丙之增产倍我民之奸伪百出吏之上下百端州以为甲可甲不已而诉之运司则以乙为之乙又诉于常平司则复及于丙矣取其案而观之则据法援例皆不可破三者交诉不胜不已卒之豪强得志而害及下户小人以气相高往往未被供役之害而生涯荡于吏手矣臣在州县见斯弊详求其故盖前後臣僚论列有为朱脚白脚之法者有为鼠尾轮差之法者朝廷行之正求以便民然而申明愈多法令愈繁有司不知所守而舞文之吏因得并缘为奸而民益病矣臣尝求之一乡而得之其法明而易行简而易守凡物力及百缗者役一月及千缗者役十月其闲多寡有差大率皆以月计行之既久上下相安甲满而乙代之乙去而丙为之不容吏预其闲而民亦乐其力役之均无复讼诉为令者诚使他乡皆然则邑事去强半矣惟其官司素无定法故难以推而行之臣以为苟以此施于天下何为而不可如曰风土有异同版籍有多寡不可一律则使凡乡之富者或数倍于此则以此法等而上之以三百缗五百缗供一月之役乡之贫者或不及于此则以此法等而下之以三十缗五十缗供一月之役以天下视之疑若轻重之不同以各乡视之乃所以为均也各乡既均讼诉皆息是岂不明而易行简而易守哉然吏之与民迭有利害役法不明则民病民病则讼繁讼繁则吏可得志役法一定则民安民安则讼清讼清则吏无所措手为治者将安从乎陛下如以为可行苟但付之有司则必有老奸宿猾豫为後日之计争执前後成法以挠之者惟陛下断之果行之必精择详练之人使推此法行之一州一州便之则使监司行之一路一路便之则使诸道皆行之而实惠遍及于天下矣

论军器冗费

臣窃惟国家军器之备置监以总其要置所以鳩其工器械犀利诚得戒不虞之上策臣愚以谓戒不虞者本以安民也而无名之斂或至于扰民本以卫国也而无用之工或至于蠹国何谓无名之斂每岁收买军器物料朝廷虽许支钱州县或无钱可支不免科扰又有津遣之费

大率多出民输常赋犹不能给况重之以此乎此所谓扰民者也何谓无用之工本所万全指挥及东西作坊见役五千七百余人岁支钱二十九万缗约米四万余斛用人不为不多廩之不为不厚而犹以为未足更于诸州作院差拨兵士入所又一千余人岁支钱八万余缗米九千余斛而诸州又厚有衣粮以赡给之此所谓蠹国者也陛下睿明洞照灼知扰民之弊近已将诸路日前岁额泛抛军器物料并皆除放民颇息肩矣惟蠹国之弊未有以上闻者夫以本所日役三千七百余人苟能汰除老弱严禁冗占专择可用之卒日督其程则军器不患于不办今既以无用之人杂处其中而徒取外郡之卒更置于此重耗廩给将焉用之臣愚欲望圣慈特赐详酌考军器之程计工徒之费如臣言或有可采即乞睿旨将本所三千余人专其工役所有诸州兵匠遣还原来去处岁省公家之钱几万缗米几万斛蠹国之害既衰而小人亦免旅居之叹有利而无害惟陛下图之

论福建盐法

臣仰惟陛下勤恤民隐宵旰求治民生利害无小不闻或罢或行曾不淹日兹非励精之明验欤窃惟榷盐之法天下通行七闽之法公私尤便上州得盐下州得米民不淡食官收其赢漕司平其多寡州县赖以充用田里之民尤为乐业而行之既久不能无弊官无本钱而豪民出其资故大半之利归于私家县有积逋而漕司取其数故般运之赢废于中道支发案先後之次网船有滞留之费寢失古人立法之旨议者不知讲求弊源去其太甚者而图其余使害去而人不知利兴而民有赖乃一切欲以榷筦之法齐之行之未几公私俱病赖圣明尽复其旧吏民无不鼓舞然新法之害既去而旧法之弊则未之讲亦未为尽善也臣愚欲望圣慈行下监司诸州讲求监行盐法有未尽者纤悉必闻举其偏而补其弊立为成法俾之遵行以惠闽粤於无穷不胜幸甚臣恭闻仁宗皇帝有欲增河北盐价者仁宗御批所奏有曰朕终不忍使河北人食贵盐父老闻之掬香于手望阙焚之以谢圣恩祖宗德泽之在人如此盖盐者人之所共利立法苟善所被实广惟陛下裁幸

论主簿差出之弊

臣窃惟县治主簿专以勾簿书之稽为职凡一县税赋之输纳实总之销簿对钞尤为紧切而监司郡守循习故常以主簿在县官中最为事简差出不时甚者至沿檄无虚月朝归而暮出虽有勤干之吏困于往来欲竭力效职而不可得簿书期会比之教化则为细事在州县之闲则急务也小民输官租得钞而归官司勾销名簿则可以优游卒岁豪强顽猾据簿之未销者督之则无所逃罪其闲利害皆系于簿书簿书不明则吏得以肆意为奸贫民下户至有已纳而更输豪猾之家苞苴把持或至于幸免则主簿之职若闲而实要如此任职而不勤责固有所归矣幸走道涂而一旦以不职被谴彼有辞焉臣愚欲望睿旨诸路监司守臣遇有差出轮点诸县主簿量立定制每岁不得过两次又计日月之多寡较道里之远近而比折之当差出者不得以请求而免已满两次者不得复差庶使小官得少安职守簿书不至猥弊而民被实惠矣

乞东宫官进嘉言善行

臣仰惟陛下深惟天下之大本立储宫以安社稷置僚佐以任辅导之职真一代之盛典也臣猥以庸陋备员其闲且得执经从容以侍承华千载荣遇非所宜得思欲殚智竭虑以称陛下任使之意补太子聪明之余虽太子天资明敏谦勤好学而臣不过于诵说之间可以少效其愚讲罢而退虽欲陈述古今以资盛德无由以进退而思之实不遑处臣窃闻祖宗时应东宫王府官属每五日必使各进嘉言善行一条臣愚欲望睿旨申行故事使臣等每五日必以一事进如有己见因而详论其是非当否不问兴衰治乱帝王臣子凡古人言行可以劝可以戒者采于百家择其机要以奉太子则上性愈明辅成储德区区之心得逃尸素之责矣王府僚属亦仿此而行之必有日新之益此故事也

论朱熹补外

臣窃惟欲收天下之人心必用天下之人望帝王之兴罔不取此文王作兴而二老归孟子所谓二老者天下之大老而归之者也晋元帝初镇建康吴人不附士庶莫有至者一日王导及诸名胜骑从而出吴人纪瞻顾荣皆江南之望窃覩之乃相率拜于道左导因请引二子以结人心二人应命而至由是吴会风靡百姓归心焉此尤其明验也下至刘备之入蜀薄许靖而不用法正曰靖有虚誉今主公始创大业人不可户晓宜加敬重以慰远近之望备乃礼而用之夫太公伯夷固非後世所及纪瞻顾荣一归而江左之君臣遂定许靖知无实用先王以其虚誉犹礼而用之事虽不侔意则一也陛下不得已而嗣位兢业当百倍于平时首辟经筵刻意典学天下风动以为新政之第一而又出自宸衷收召朱熹寘之讲席渴于一见惟恐不及次对之宠擢于中途当今人望儒宗无出熹之右者虽不可以望太公伯夷其视纪瞻顾荣过之远甚平生为有用之学非若许靖之虚誉也故天下士夫视其进退以为重轻及其来前陛下倾待以礼礼记一经又先令讲大学之篇学士翕然向风谓将大有补于圣德忽然去之如振槁然举朝失色言之丧气此非细故也陛下之去刘正己失之仓猝然曰去宰相而已又去黄度亦为之纷纭然曰去谏官而已二事已致物议然未若朱熹之举之为甚也取天下之人望以收人心陛下既已得之今又去之人心谓何此可想而知不待臣言而後喻也不知陛下所以去之者曷故熹无职事惟有论议必是论议之间有许圣心知前日所以处之者不以代言不以为六部之贰俾以次对待讲是专求其言也以言求之而以言弃之尤非所以示天下也抑又有大不可者熹之去就固已关系甚重始闻此事臣自以备位後省可缴奏以裨圣聪命犹未颁而熹已出门乃知御批径以付之皇恐而去此尤不可如此则是命令不由中书不由封駁之地此其利害又甚于失人望矣臣事太上皇帝论事动至十数违忤已甚而事终以不行盖重惜喉舌之地虽有不从不过不报故张子仁终不建节郑汝谐终于外补陈源终不得俸率逢原终不得告如此等事尚能扶持不致倾危者此太上皇帝之盛德也今成命未至于後省而御批已自别行正使圣断排逐奸邪犹不当尔况施于此乎此臣所以忠愤感激惧职业之遂废而无以事陛下也欲望圣慈翻然感悟念古人进退人以礼之意无貽加膝坠渊之讥在陛下若反掌之易而气象顿还矣苏轼论汉高祖刻印销印有同儿戏何尝累高祖之知人适足明圣人之无我臣实有望焉干犯天威罪当万死伏惟陛下裁幸

乞赐莫叔光諡及录用郑鐸之後【同倪思】

臣等窃惟为寮潜邸者儒生之荣遇施恩旧学者人君之盛德仰惟陛下聪明天纵圣敬日跻而终始典学习与性成荣儒重道增光家法凡臣子之执经于初潜辅导于朱邸者宠数特异仰见圣明不遗故旧之至仁其有身为侍从而不及覩龙飞之盛终于庶寮而不得沾霑泽之余者有二人焉窃见故吏部侍郎莫叔光性行端良问学该洽立朝正色有仁者之勇始以秘书郎兼平阳郡王府教授後以著作佐郎兼嘉王府赞读在陛下左右四年尝赐以恬静二字後虽免兼而朔望必见爱眷优渥陛下悯其蚤世赐以金缯而赠典之外未尝加以异恩易名定諡故屯田员外郎郑鏐素明经术通贯古今教导诸生着録甚衆任秘书郎日先帝时在东宫陛下为英国公孝宗擢兼小学教授创置一员与知枢密院何澹轮日入侍首尾再朞尝进劝戒元龟一书尤蒙褒美御书无逸一篇及学问清修岁寒等字以赐之鏐之身後尤为哀替无家可归一子远宦奉九十之母无以为养一子累举未第无有为二人言者臣思臣钥实与同朝而鏐又臣钥之师也臣等幸日侍经幄敢以奏闻伏望圣慈特加矜念使恩逮泉壤泽及遗孤簪履不遗民德为厚实有补于圣治

乞加赠彭龟年及録用其後

臣闻太宗征辽追思魏徵明皇幸蜀乃祭九龄盖忠臣之言常时或不见用事有其验虽悔莫追此明主之所宜加察也陛下即位之初一时旧学多在外服惟彭龟年自起居舍人擢中书舍人迁吏部侍郎臣同在後省见其无日不蒙召见恩至渥也韩侂胄方有弄权之渐龟年知其必为後患上疏力言遂以待制知江陵府而侂胄留为内祠是时臣为给事中林大中为中书舍人同衔缴奏乞留龟年既不可得再奏龟年义必不留言又不从三人相继去国侂胄因之愈肆以致祸败今十余年矣去岁仲冬之三日甫诛奸臣而大中与臣明日即蒙收召起于既老独龟年蚤没不及见更化之盛实可怜悯臣尝从其家得谏草敢缮写进呈伏望睿览则知龟年先见之明献言之力或加赠恤或録用其後仍以奏检宣付史馆上以广圣君念旧之心下以激忠臣敢言之气实为幸甚

【御笔彭龟年系朕潜藩旧学当权臣用事之始首能抗疏折其奸谋褒恤之典理宜优异虽已追赠未称朕怀可特加赠龙图阁学士其子彭钦与寺监簿差遣】

乞録用陈傅良之後

臣仰惟陛下自更化以来拔用人物凡曾被选择而厄于远外之人存者无不收召如臣等辈皆不遗忘其不幸湫先朝露不及见今日盛际者或加赠諡録用其後而尤笃于旧学之臣如彭龟年莫叔光郑鏐是也惟故中书舍人陈傅良以一世名儒为嘉邸直讲最蒙恩遇陛下践阼之初置之从列尔後困于排抵几至危殆起知泉州不及赴而卒其家索然次子已夭长子师辙穷匮孤独曾经一任改奏京秩年过五十栖栖逆旅所向不偶诚为可悯臣与傅良为布衣交後又同朝俱掌内外制情义至厚真是畏友其学问文章过臣远甚实不忍其後之不振窃见绍熙中陛下生辰傅良献诗大蒙嘉赏亲御翰墨写其诗篇反以赐之臣尝再拜而为之跋奎墨既已刊之乐石敢以墨本及臣跋语同以上进伏望圣慈俯赐睿览兴念簪履之遗特降恩旨録其嗣子上以见圣主甘盘遯野之思下以慰傅良沈泉之痛不胜臣子之幸

攻媿集卷二十六

卷二十七

钦定四库全书

攻媿集卷二十七

宋 楼钥 撰

奏议【西掖奏稿】

缴泉州吴净党罪案

臣比缘承乏暂摄西掖刑房之事职所当书人命所系尤当加谨尝考近岁所断过四百余人非不欲求以生之而奏案所言愚民犯法多其自取不敢轻有论奏臣闻之书曰罪疑惟轻功疑惟重与其杀不辜宁失不经经者常也杀人者死法之常也杀人而不死是失之不常也圣人初无意于庇有罪之人而使死者衔冤也特以罪有可疑者可以杀可以无杀杀之则恐其无辜不杀则失之不常宁失之而不忍其不辜而死也国家列圣仁厚凡大辟刑名疑虑情理可悯皆许奏裁率从宽贷国祚灵长此其大者窃详泉州百姓吴净党之事本州见以疑虑具奏以臣观之亦几于可悯者矣臣请举其大略而言之吴净党虽非良善之人然其所犯止因已醉而求酒既无杀人之心又初不操杀人之器许应遂恶其秽语先以木扁担赶打案中明净党党势迫见有木柄铁齿爬掣急把起爬掣以枕背打许应遂额中心一下血出倒地再以爬掣木枕背打左边肋下虚处扇骨上一下伤重于辜限内身死爬掣既非杀人之具又当夜分之时秽语初无切害许应遂先以木扁檐赶打偶有爬掣而取击之止于二下遂致重伤原其本心非是凶恶寘之死地罪有可疑欲望圣慈体大舜惟轻之仁广列圣好生之德矜愚民之无知察所犯之非故特下刑寺重别定断俛蒙宽贷亦必杖脊配流或加远恶足以偿死者之冤矣所有录黄臣未敢书行

小贴子臣详考本州奏案许应遂被打之时妻阿曾弟许应明同苏穗奴扶策许应遂于煮糖竈前坐向火炙救苏穗奴等依旧打糖则可见当时亦不以为重伤况本州具奏有云原其所犯本无杀意若便行正断窃恐不中有此疑虑检准淳熙敕大辟刑名疑虑奏裁则是本州亦以为疑窃恐难以正断伏祈睿照

缴刑部劄子【朝散大夫守宗正少卿兼权刑部侍郎郑汝谐劄子三省同奉圣旨依】

臣窃见在法大辟情法相当之人合申提刑司详覆依法断遣其有刑名疑虑情理可悯尸不经验杀人无证见四者皆许奏裁此本朝累圣仁厚之至绍兴以来凡奏裁者必贷见今所行尸不经验杀人无证佐而奏案中情理分明者皆自依断必委提刑亲临察其无冤而後处决不以其奏裁而幸免也其刑名疑虑情理可悯者又皆详酌罪犯或贷或不贷亦非尽从轻典也年来死罪日报思欲澄源正本以几刑措而未有以为策今忽奉前项指挥臣再三紬绎虽

是申严旧法欲革淹延之弊深恐未易施行敢因其言条列如後

一谓州郡之吏虑申提刑司未免有财贿之费径以闻之于朝廷提刑司亦利其安静无事不惟不复诘问间有申详覆者亦疏下州郡使之奏闻臣窃以为未然提刑以提点一路刑狱为职州郡详覆而本司之吏利于受贿此当责之提刑非之之弊也当有以禁止之岂可纵而不问若以为提刑司之吏利于详覆之有得则所谓利其安静间有详覆亦疏下州郡使之奏闻者官耶吏耶以为吏则彼方利详覆之财贿而疏下者非其所利也以为官则亦当以此责之提刑别议申飭可也一谓刑名初无疑虑情理初无可悯类皆饰为辞说而以数百幅之案牒上干九重之听览中书之务不清都司之事日积刑部疲于拟议棘寺困于约法臣窃以为未然初无疑虑可悯饰为辞说者盖有之矣然求之于古用刑之际宁过于详毋过于简故王制曰成狱辞史以告于正正以告于大司寇大司寇听之以告于王王命三告参听之三公复以告于王王三又然後制刑盖如此其详唐制诸州断死罪虽非疑虑各三覆奏亦不以为繁也今奏案之上九重亦惟以视其成而已中书之务不清恐不专为此若都司刑部棘寺则职专在此为此言者恐未免于惮烦之讥

一谓诸州因禁以候奏案之下淹延日久其闻证佐牵联之人或监或系多有死于疾病饥饿者岂不伤圣世钦恤之仁而上奸天地至和之气臣以为此论诚美矣奏案之稽留以至淹延诚为大患是当别议措置如此令一行州郡承风观望锻链周内或至移情就法苟免駁纠径从详覆处断鲜以上闻杀人愈多伤钦恤之仁奸至和之气必有甚于今日兼恐囚无生路翻异愈繁淹延愈甚囚系愈多矣

一谓欲乞明降指挥应诸州不当奏之事而辄奏者其当职官吏悉坐不应奏而奏之法朝廷知其难行既以贴去而改之云今後应诸州军勘鞫公事如罪犯委有疑惑情理可悯者方许奏裁其有情法相当所犯初无疑虑者令径申提刑司详覆断遣施行臣以为议者固以必不可行而改者亦未应如此行下盖二者自有见行条法不待申言言之先後意有重轻必欲申严若曰情法相当者申提刑司详覆依法断遣其委有疑惑情理可悯者方许奏裁则其辞尚缓或别议戒谕则可若今所降臣愚实恐州郡妄希风旨奏裁之案日少详覆而断者益衆虽都司刑寺之事简而杀人愈多此臣所以寒心也

一谓自此敢有违戾者必罚无赦又小贴子内称间有将贼赃低估价钱止作四贯七八百文以应赃不满之条若此等类乞今後许从刑部点对将官吏取旨施行臣窃以为尤非也汉景帝之诏曰狱疑者□有司有司所不能决移廷尉有令谳而後不当谳者不为失政恐人之畏罪而不谳故以此诱之今而曰必罚无赦则谁敢谳乎近盖尝以谳之不当而罚检法之官论者固已深虑而况此明禁之乎低估价钱者取旨施行则今後必多赃满之人尤非臣所敢闻也窃观自古书传所载惟务寛宥如与其杀不辜宁失不经之类不一而足矧祖宗以来惟恐有司不以冤狱上闻大中祥符六年真宗以外郡断狱有疑及情理可悯者避大理駁纠不即申奏诏令申提点刑狱官覆实具案附驿以奏闻付大理寺详覆取旨天圣四年仁宗诏自今大辟案情理可悯而刑名疑虑者更不申提点刑狱官竝具案闻奏如无枉濫情弊更不駁勘未闻有使之不谳者也

右前件所陈上渎天听罪在不赦窃以为今日断狱既未有澄源正本长策使斯民之无犯莫若且仍旧贯无事改作深恐讲之未详反致已甚拳拳纳忠不敢爱身臣非好为立异利害所在职所当言不容緘默伏望圣慈详察寢罢上件指挥实为天下幸甚所有錄黄臣未敢书行

缴皇后宅恩泽【李孝纯等奏合得恩泽一十八名尚有八名乞依安恭皇后宅体例施行】

臣仰惟皇后母仪天下所得恩数自有故事然司封格法但载大礼恩泽数目其册宝推恩止系特降指挥大率国家循例等事有其举之莫可废也有其废之莫可举也皇后册宝亲属推恩旧得二十五人隆兴二年因臣寮申请特减七八此安恭皇后之例也至淳熙三年寿成皇后自以别无承受之人于十八人中又乞减省遂又减八人绍兴元年皇后受册先得旨应照淳熙三年以前条例及有司别具前後体例以闻得旨与十人仰见陛下遵守家法莫敢举之之意今因李孝纯等陈乞却复八人虽比之旧制仍少七人正合安恭皇后之例然已经淳熙三年减作十名及绍兴元年特旨裁定而今日又复增添在陛下崇尚恭俭之时不宜有此如圣意以李氏三位子孙数多俯循其请乞降睿旨所添八人止许奏本宗亲如此则既不失恩厚又有樽节不致泛溢已甚所有錄黄臣未敢书行

缴林大中辞免权吏部郎除直宝文阁事与郡【同给事中尤袤】

臣等闻之苏轼上书于神宗其论存纪纲曰建隆以来未尝罪一言者纵有薄责旋即超升许以风闻而无官长风采所系不问尊卑言及乘舆则天子改容事关廊庙则宰相待罪台谏固未必皆贤所言未必皆是然须养其銳气而借之重权者岂徒然哉将以折奸臣之萌而救内重之弊也又曰弹劾积威之後虽庸人亦可奋扬风采消委之余即豪杰有所不能振起此天下之至论也仰惟陛下隆寬尽下和顏受言而台谏之臣相继去国者已多侍御史林大中任言责者三年余矣最蒙眷注言听谏行前因论事除吏部侍郎虽去言职遂正从班人皆以为陛下赏之也辞免一再除职与郡大中以书生起家陛下拔擢至此在大中之分足矣而臣等犹敢有言者非为一大中也为台谏事体惜也非止为台谏事体也为国家惜纪纲之地也大中论一少卿亦不知所言之详而同日与郡陛下既以为权侍臣矣而仅一直宝文阁天下传闻必以为朝廷以言罪人乃与所论之人俱坐汰斥实伤国体且亏仁厚之政近年台谏风采日消正赖陛下主张使之振作以强主威以尊朝廷以讐奸邪以沮侥幸言脱于口应之如响中外竦动纪纲自张不然则所损甚多来者亦不可为矣公议皆赖陛下选大中言职或留之论思献纳之斑度今事势大中义难复留敢望圣慈念祖宗之深意鉴苏轼之至论详察事体无令言者与被论者同日而去施行稍有次第使得从容引退优礼以遣之养臣下敢言之气全国家退臣之礼犹足以示四方俛陛下慨然感悟曲留其行则臣等幸甚过望士大夫感悦奋励孰不思罄竭以图报哉所有錄黄臣等未敢书行

缴皇后宅内客亲属补官【皇后归谒家庙亲属推恩数内内客蒋孝曾亲属张孝诜霍渊霍溥白身补官】

臣比者以李孝纯等陈乞还给皇后恩泽八名尝具缴奏乞将所添八名止许奏本宗亲奉御

笔特与书行臣伏而思之虽比之寿成皇后添此八人然正合安恭皇后之例臣亦不敢固执即已施行近者伏覩皇后归谒家庙一行推恩给事中论駁蒙陛下曲从其言仰见圣主化由近始中宫以义制私朝政清明中外悦服近来亲属推恩虽人数比旧为多然出自宸断裁节横恩大率略尽臣辈尚复何言仰惟陛下从善如流千载一遇讵敢失职以负圣明如李孝纯孝友转行右武郎臣亦不复论列命妇加封亲属转官悉当书行惟是门客蒋孝曾白身补将仕郎亲属张景诜霍渊霍溥白身补承信郎求之故事既无比比例比之衆人最为太优盖白身补官岂是细事官冗已甚不应开此幸门前此止以李氏子孙亲属衆多特旨放行恩泽张景诜霍渊霍溥既是亲属即合于所添八名恩泽内补官庶免又于十八名之外别添三人反过安恭皇后之例若门客则无补官之例尤不当僥冒补授欲望睿旨今亲属三人于所添八名内奏补仍追寝蒋孝曾补将仕郎指挥或与免文解一次实为允当所有録黄臣未敢书行

攻媿集卷二十七

<集部,别集类,南宋建炎至德佑,攻媿集>

卷二十八

钦定四库全书

攻媿集卷二十八

宋 楼钥 撰

奏议【西掖奏藁】

缴潘景珪差知平江府

臣仰惟陛下不忘簪橐之旧念景珪家食之久授以大藩本无不可兼景珪屡试剧郡节用明法未尝有不善于民惟是近岁洊致烦言倍费君上保全之赐王畿辅邦吴门最大而起于散地而遽得之必至公论籍籍恐非所以爱之也士大夫苟无大过清朝不忍终弃矧如景珪付以一州自可办治而臣犹以为言盖恐未允公议终难区处欲望圣慈改畀以次州郡俟其治绩稍见以序陞迁不过少迟岁月人亦无得而言所有録黄臣未敢书行

缴刘炜监司差遣【圣旨首议禁戢私钱今已见效依旧与监司差遣】

臣与刘炜初不相闻知第闻其为人颇有志于事功故朝廷任以边郡权为淮漕然以前年禁私铁钱之事观之则知其人非善于处事者也两淮铁钱私铸太甚浸淫入于内郡合行措置禁戢人虽以为私忧然无敢以身任其事者朝廷以衆言下之漕司炜自任其事故一以委之然而虑之不审处之不详行一切之令而欲去积年之弊当时公私兵民行商坐贾虽贫富多寡之不同苟蓄一钱则望一钱之用而炜为之太遽徒以片纸出令使尽失其平一路骚然无不怨愤愁苦其不致生事者特天幸耳是後倍费朝廷调护为之遣使为之集议始则降官会终则给交子纷纭久之中外寒心仅得少定至今追咎未已犹未有以为久之计识者方且忧之虽得私钱粗息所伤已多是何异拔小儿之齿齿虽得脱而儿殆矣如此处事谁则不能若非朝廷改图几无以善其後方是时炜亦仓皇无策幸而罢归得以苟免尚足以为功乎陛下若念其为国任事其志可怜前日之扰非始谋所及不忍废弃则可耳今忽有旨以其首议禁戢私钱今已见效依旧与监司差遣若反以为功而赏之者诚恐此命一出必致大骇物论亦无以谢淮甸之人臣虽甚愚知其必不可行故不敢以仇怨为惮冒昧奏陈欲望睿慈寝罢上件指挥少俟事体平息録之未晚臣数犯天威罪在不赦惟陛下原贷所有録黄臣未敢书行

缴陈岷差知靖江府

臣窃惟国家之待士大夫亦厚矣虽有过愆陷于罪籍未尝终弃迟以岁月多擦拭而用之此朝廷之至恩也然亦当视其人之如何彼虽有废放之叹我则有民社之重平时既无善状而

又貪黷太甚者自不应复以民社畀之而况师藩乎岷之处家丑声甚彰弃妻之讼人愤其冤岷之居官污声尤着帅蜀之迹最不可掩前後章疏指陈实事臣不敢复论顷除鄂渚守臣公议尚且不容随即寝罢桂林重镇控制南方非有才具不足以应事机非有廉节不足以服远民其可使岷居之乎间废虽久衆尚断断臣若不言亦必有论之者欲望圣聪寢新命于未行之时别选良牧以鎮抚二十五州之民庶使士夫知畏公议所有錄黄臣未敢书行

繳郑汝谐除权吏部侍郎

臣伏见四月二十七日郑汝谐除权吏部侍郎二十八日给事中黄裳繳奏五月二日黄裳除兵部侍郎于是汝谐与裳俱不就职因仍不决遂至踰月臣下罔测圣意所在今三月三日始有前项指挥臣窃惟给舍台諫纪纲风采日以振作则朝廷益尊寢以消弥则廉陛陵夷盖纪纲者陛下之纪纲风采者国家之风采必赖陛下主张然後可为故自来中外之臣所以畏朝廷者以其有给舍台諫也所以畏给舍台諫者盖以尊朝廷也故非才而得美官无故而求横恩者皆惴惴然不敢自安始则曰给舍肯故过否一闻台諫奏事则又曰不至及我否累朝以来务谨重此选使人不肃而严盖未有如今日不振者也况所贵於士夫者为其能存廉耻侍从之官又士大夫所属望以为表率也小大之臣一闻给舍台諫语及姓名不当办说是非即合奉身而去脱有不当公论固存不惟伸言者之气正以增朝廷之严臣不敢更引古义只以近事明之淳熙二年莫济以祕书监兼权中书舍人因司諫汤邦彦论韩彦古职名事後有贴黄云初除职名後省失於繳駁莫济自念前在後省曾经书行皇恐引咎即求补外寿皇谓辅臣曰济何故求去辅臣以实对寿皇即取入文字揭去贴黄而後出济终不敢复留寿皇亦听其去人皆以济为贤而服寿皇之重言路也是时习熟见闻亦不以为异事近日一二士夫明见台諫推弹乃敢睥睨复留名为引退实有觊望强愎之气反出言路之上汨丧廉耻取笑朝野不得已而後去言者又与之俱是以风采摧颓无复气焰汝谐士人也一闻裳有繳駁即已出城待命一再入奏力求外补固已深知事体不复可留陛下虽使就职汝谐必畏公议不敢效尤彼莫济初无姓名在白简中推迹其故犹自引去矧汝谐亲为黄裳繳论何顏复就从列黄裳已蒙陛下眷留臣不敢复论然终以不得其言而夺封駁之矣而汝谐秋毫不动俨然居职事理颠倒公论不平亦何以表率朝列宣示中外流传四方重取讥讟虽欲以职事自见亦无以为容矣臣愚欲望睿慈重纪纲风采之地全士夫廉耻之道许其补外以正事之体度汝谐未敢就职必再辞免而从之则陛下退人以礼汝谐处身有义君臣之际颇为得体实天下幸甚臣诚不肖掇事西掖泯默愤懣寢食不安正以事未经申不论奏今而不言则为失职是敢不避斧钺冒贡愚忠伏惟陛下深察早赐处分所有錄黄臣未敢书行

繳郑汝谐第二状

臣今月初三日准錄黄郑汝谐日下赴部供职初四日尝具奏繳至今未蒙处分初七日再准錄黄郑汝谐辞免乞祠禄或一郡奉御笔依已降指挥供职臣么麼掇承西掖以论駁为职言语拙讷不足以动天听汝谐之奏既勤陛下亲洒宸翰必是已蒙省览其言曰自叨除命之後凡三遭省官论奏其意不过欲正国家之事体而存给舍之纪纲是其言可听者一也又曰论事者罢被论者留不惟事体不顺而纪纲几于尽废是其言可听者二也又曰自始被命至今

已四十日矣有合区处施行之事不为不多乃以一小除目閱日已久何必留臣以启多事之原是其言可听者三也其说皆与臣言暗合以此犹知人情本不相远此天下之公言也况黄裳一经缴奏陛下察其难以竝在从列故处以王府旧职而汝谐之命谢深甫缴之臣又论之矣汝谐必知难以竝立深甫与臣又当如黄裳之引去自此一有论奏则先危其身向来犹得与之俱去去非臣子之所惮与之俱去事已可骇今则论事者罢被论者留台谏给舍不复可为虽具其官而职尽废其何以为国乎陛下若徇其请付以外郡以靖朝列在陛下一举手之顷耳朝廷则可以正纪纲振风采汝谐则可以全去就知廉耻上下两得之矣近来事绪日出论駁日至烦渎圣听皆非得已陛下本务安静而滋益多事臣愚不避万死伏望圣慈采之公论付之无心刻印销印惟是之从使朝廷肃然是非别白实为幸甚不然恐纷纷未已徒骇观听无益也所有郑汝谐供职指挥此特其一尔欲望先赐宸断俯从所乞他日如欲用之亦未为晚上项録黄臣未敢书行

缴郑汝谐第三状

臣备数左史误蒙圣恩兼摄西掖比因郑汝谐除吏部侍郎曾经给舍缴奏之後得旨令日下供职继又准御笔批汝谐乞祠劄子臣两具缴奏未承处分又蒙宣谕书行臣以愚戇固执不敢奉诏伏念臣以么麽小臣区区抗论实非有他正为朝廷维持纪纲庶几後省犹有官守然自知荒陋之文不足以立雷霆之下朝夕俟命靡遑宁处今兹再降指挥仰窥圣意以汝谐为有才故排羣议而用之万钧势重罪无可逃三谏不从臣可以去不敢更有缴奏但以上件録黄难以书行臣亦无顔复玷朝列谨具奏闻见今居家俟命伏望圣慈将臣早赐罢黜庶免久妨贤路冒犯宸严臣下情无任惶惧战栗之至所有録黄臣未敢书行

缴给还陈源产业什告告劄

臣窃惟陈源近除内侍省押班後有缴奏蒙陛下采纳虽许其趋走于禁中而外廷之议获伸告命不给俸禄不支仰见皇明洞烛足使近习屏气今来忽有指挥给还物产臣亟取会数目除追纳及卖过外所余不多若不必深较然事体所关则有不可陈源罪恶贯盈死有余辜幸蒙寬宥复备使令陛下既已伸外廷之议而复还其已没之物产则赏罚近于无章矣且其前後赐赉及其侵盗其数不貲今其所余田产不满万缗杂物称是又多不可售之物举以与之岂惟不足以示恩适所以啓宠纳侮且小人无厌之求其势未必遽止臣愚欲望圣慈追寝上件指挥以絶奸萌不胜幸甚所有録黄臣未敢书行

缴封桩库取金银

臣窃惟祖宗置内藏库盖以乘輿服用之余别储以备边费寿皇置封桩库亦欲蓄于无事之时以为有事之用非若前代琼林大盈专以为私藏而轻费也故累朝惟闻时出内藏以补有司之不给借用或至百万偿还不足往往贯之未尝无故反取外帑以实之也高宗皇帝尝曰祖宗储积内帑本以备边陲缓急之用此真陛下所当取法也今日比祖宗时事力不及十之三四专仰东南以立国取已竭泽矣州县困乏田里憔悴重以去年水旱所在饥荒江上流殍

盈路往来皆能言之圣慈力加赈恤所济无几二麦未熟可为寒心当今别无生财之道惟赖陛下身履恭俭爱惜财用禁戢贪暴检柅奸弊尤恐不给而窃闻内庭宴饮无时费用无度内帑所积支用不赀既不领于有司无从知其虚实然观屡降指挥多取桩钱物则所谓当亦不妄臣职分户房每见宣取数多实为惊惧盖今日民财竭尽既不在民则在官而经费既不可减用之又如此不节封桩家计所储正自不多若如此支用又将竭矣内帑既虚封桩所竭国将奈何古者无三年之蓄犹曰国非其国而况虚竭如此岂细故哉臣职当论奏正以每降指挥必以恭奉三宫为名故臣子不敢有言然而外议籍籍谓所取之钱多为内廷浮费不过支散乐工赐予近幸日甚一日如此以江海实漏卮山林供野烧岂有纪极哉州县上煎下迫不惟民不堪命吏不得息县既不可为州亦无少宽监司例被督责版曹日忧不足椎剥疲民取其膏血百十之逋动遭鞭撻取之尽锱铢用之如泥沙岂不可痛哉今月十三日连有两项录黄其一曰令封桩库支银八万两会子二十万贯赴内藏库供纳恭奉寿圣隆慈备福皇太后尊寿皇圣帝寿成皇后使用陛下自正月一日行庆寿礼之後至今未曾再驾内外方日夜望鸣蹕之行既欲以钱粮为恭谒之用臣敢不书行又一日得旨令于封桩库取金二万两银五万两内藏库送纳此项实为无名之费一日两指挥前者则为奉重亲之用犹为有名如後一项则为不可府库陛下之府库微臣安敢方命诚愿圣慈惻然兴念母以生民膏血供无涯之费以固邦本以保宗社夫二万之金五万之银在陛下富贵之极视之若不多以民间计之不知为中人几家之产细民几万之资州县取之于民不知用多少答箠竭多少资产辍多少衣食而後得此故拳拳为陛下言之望俯鉴愚衷收还诏旨务为节俭以益圣德以宽民力实天下幸甚所有录黄臣未敢书行

缴万锺除起居郎兼权中书舍人

臣仰惟陛下即位以来求贤是急收召人物布满班行是以政事虽有阙遗而纪纲不到隳案兹忽闻万锺为起居郎兼权中书舍人人已甚骇臣尤不遑钟之为人臣所深识性资浮薄举止轻儇少有不检之名老无自艾之意世居京邑日偶贱倡至今市井之间咸知姓字凡曰缙绅之彦鲜与交游重玷台评难逃物议顷方屏处俄报召还何缘受知不使置散言者强颜就职固已可羞钟乃先期入朝如恐不及复居卿列尚曰旧人谬厕从班实污清选但工谐谑何以当吏笔之严仅习歌调何以代王言之重断然不可衆所共知岂微臣视樊哙耻与为伍将有正士问元稹适从何来若陛下必用万锺则孤踪谨避三舍议已出口安可同寅词不逮心姑陈大概敢祈睿断函寝误恩况兹西掖之司下房最冗身当衆怨力拒斜封今欲使斯人在官是先与羣小为地亟伸缴奏仰冀听从重千天威恭俟严谴所有录黄臣未敢书行

攻媿集卷二十八

卷二十九

钦定四库全书

攻媿集卷二十九

宋 楼钥 撰

奏议【琐闼愆言】

缴冯辅之等转官【改易制造头冠法服等竝皆精致干办御药院冯辅之黄监吴思忠李唐卿各转一官内冯辅之吴思忠遥郡上转行黄监阶官上转行李唐卿转行遥郡】

臣仰惟陛下即位之初忧勤抑畏臣子奉职朝廷清明海内欣快虽水潦为灾岁事坏于垂成而人心不恐者以政事纪纲之可恃也兹奉圣旨以御药院改易制造头冠法服依淳熙十六年体例干办御药院四人竝特与转行一官臣误蒙陛下擢寘琐闼不敢不以愚忠仰图报効臣窃惟历代人主或出于幼冲不知爵赏之可重或强愎自用不以法制为当守又以嗜慾荒惑不能自克则左右近习之人乘时肆志引例破法惟其所欲外庭不能支吾则攀援侥幸驯致乱阶者多矣陛下诞膺丕图人心翕然诏书所至危疑之情即日尽定盖知陛下仁孝素着而务学为急习熟世故亲履时变反覆史传之得失洞知小人之情状无酒色之娱絶器玩之好专欲亲近儒生讲论经理此不世出之主也所望超然远览削去弊蠹排抑侥幸振起纪纲惟祖宗典故是遵惟天下公议是取则太平之期可望今即位才及两月而已复容受欺罔遽出横恩以塞无厌之欲其何以示天下夫人主持以立臣民之上者以纪纲为急横恩一出则是斜封墨敕自坏纪纲陛下心所备知目所亲见凡可鉴可戒之事皆当深思切虑力自振拔岂应因仍旧例以黷初政近年以来每遇如此指挥臣僚无不缴駁率蒙依奏後虽制造头冠法服转行之人亦以缴奏终于回授而况于改易者乎今来冯辅之吴思忠竝系武功大夫遥郡团练使若于遥郡上转行则皆为防御使黄监见系武功大夫遥郡承宣使若与阶官上转行则为横行右武大夫李唐卿见系武功大夫若与转行遥郡则为刺史夫武臣至于武功大夫则为止法正如文臣之中大夫也武臣大夫实历七周年用七举主始转横行非有功效显著不帶遥郡如文臣不为侍从不得为大中大夫二者皆有累数十年而不迁终身而不得转凡有恩赏正许回授此一定之法也臣愚欲望睿断将上项改易头冠法服赏各与转一官其碍正法人竝与依条回授以昭名器之重以示天下之公以窒侥幸之门以光初政之大不胜幸甚所有錄黄臣未敢书行

缴随龙讲官等转官

臣窃惟陛下龙飞御天凡旧日攀附之人均转官资诚未为过但以国家官冗至此已极而六年之间两遇覃霈爵赏益滥尝考随龙恩例在祖宗时止转一官多不过两官正缘高宗立国于扰攘之时一行官吏自元帅府执羁勒于万死一生之中故南京即阼之初随龙人竝转四

官壽皇朝虽转四官然两官系用建储恩并转非专为覃恩也太上皇朝四官之赏盖是失于契勘陛下不以位为乐不得已而後受臣于彭龟年黄由沈有开同在後省见其引义力辞其言至切心甚服之臣愚欲望睿断检照祖宗之旧典裁节近年之横恩酌为中制使随龙讲官各转两官曾任藩邸讲官各转一官以成旧僚辞宠之贤以示陛下不敢自比于祖父之意天下幸甚臣冒昧进言不避紊烦所有錄黄臣未敢书读

缴戴勲除知合门事

臣仰惟陛下龙飞御天潜藩旧人际千龄之会无不有攀附之幸矧如勲者服劳五年职为内知圣心记存擢而用之诚未为过然初除带御器械臣僚以员数已足恐其滥额以啓幸门尝具缴奏今奉使方归自言合门舍人今既故除既合解罢乞祠禄而遽以知合处之则为过矣始八月中臣寮之奏欲少俟他日有阙以颁成命得旨依已降指挥则是除目已定又曰候有阙日供职则陛下所以处之者可谓详尽矣今乃猥以员数已足欲从朝廷乞一外祠而遂得知合虽曰不要君臣不信也窃见壽皇即位之初龙大渊曹覲在潜邸尤久亦止除御带至次年春间大渊自枢密院副都承旨覲自御带俱为知合时金安节周必大相与缴论甚切且谓二人攀附虽旧过此以往事君之日甚长傥其谨畏有加何患身不富贵奉圣旨罢剧就闲宜允衆论尚兹回缴可特依奏大渊别与差遣覲依旧带御器械一时君臣之间如此其盛然犹其进不已恃宠弄权寢预政事贻害甚多太上皇初年譙熙载姜特立径除知合无有论者公议深以为惜然犹是太子春坊又非内知之比如勲本是士人素被眷知使事甫毕且当退静以俟君命不应遽有此举上则以御带为未足下则欲乞外祠以徼取其所欲如控囊然若遽以知合处之则陛下之官非惟不足以厉世摩钝亦不足以慰满左右之意臣实忧之欲望睿慈深察愚忠追寝新命今譙令雍既以持服未可仕宦勲则当用八月十九日圣旨候有阙日供职或恐圣意念其未有职守即乞如吴炎依蔡必胜例权差候有阙日拨填庶得允当所有錄黄臣未敢书读

缴关礼张宗尹特与随龙恩数

臣窃见前项指挥颇骇观听臣非敢故为烦渎实以随龙恩数自来无有特与之法一开特与之门恐恩幸援来者无已陛下必有难处者伏覩淳熙十六年三月十七日圣旨随龙讲官承受官可各转四官以承受官厠于随龙之数已非令典然犹不至如今日特与恩数之滥是时承受官系刘庆祖以无官可转已于吏部陈乞回授今来关礼张宗尹若果系承授潜邸奏报两殿文字陛下念其有劳欲与以恩数乞照淳熙十六年指挥施行庶免开特与随龙恩数之门以塞後來攀援之路不为小补所有錄黄臣未敢书读

缴随龙人转官并王倓等八人恩数

臣近者论奏随龙讲官及曾任藩邸讲官转官事乞酌为中制讲官各转两官曾任讲官各转一官得旨依奏仰见陛下虚心应物从善如流臣不胜感涕有君如此何忍有怀而不言寻奉圣旨随龙官吏诸色人军兵等开具职位姓名可各转四官资白身人与补保义郎曾经

藩邸应奉人可各转四官资等臣缘未知前项讲官处分未敢论奏今又准今月十日指挥依已得指挥官吏诸色人等转官补官应千恩数等竝依淳熙十六年体例臣僚缴奏数内王倓八人十四日得旨王倓等内有官人转两官白身人与补承信郎陛下之不私旧人足以示大公于天下然臣犹未有尽其愚须至再渎天听臣前奏谓随龙恩例在祖宗时止转一官多不过两官正缘高宗立国于扰攘之时一行官吏自元帅府执羁勒于万死一生之中故南京即阼之初随龙人竝转四官等事其理甚明今讲官及曾任讲堂官已蒙陛下依奏减半推恩则随龙官例诸色人霍汝翼王德谦以下各与转两官白身人补承信郎曾任藩邸应奉人各与转一官其王倓等一体照曾经藩邸应奉人推恩则事体轻重与讲官等一体实为允当陛下在位统业以天下为忧身率以正无敢不服累年横恩至此裁定天下必当称诵圣明自此抑侥幸振纪纲惟圣意所尚朝政清明此其本也臣职在封駁苟有管见不敢避仇怨而负天子伏惟陛下裁赦所有録黄臣未敢书读缴郑熙等免罪【後省看详临安府进士郑熙等连三上书所言无礼奉圣旨竝免罪】

臣窃惟陛下即位之初下诏求言章交公车来者甚衆後省被旨看详虽未能徧其间议论剴切有补于政者犹未暇一一奏闻若郑熙辈上书再三言寢不逊所乞幸建康事尤无足采得旨免罪仰见圣主寛宏之度然臣又有愚见不得不以奏闻古语有之狂夫之言圣人择焉以言求人曾未闻有所褒表而遽有免罪之旨不可以家谕户晓必有轻议于下者况士人上书亦间有无稽之言甚于此者欲望圣慈盖之如天若此等人一切容之万一有伏阙邀驾等事自有常规寘之有司以旨赦之庶全国体若因看详而免罪臣等受谤而不足道恐非所以广陛下之盛德也臣一日之间屡有论奏实非得已自非赐以矜察臣实无所逃罪如郑熙等果有不逊之心免罪之後亦不能禁其妄发不若寢而不问静以待之臣怀不自己犯分渎烦无任战惧之至所有録黄臣未敢书读

缴蒋介石除右监门卫中郎将

臣窃惟古者侍御仆从罔匪正人其选择之遴不徒取其勇力也近时环卫官合门带御器械等即取武勇之士又参以才諳韬略文学之人诚有古意此国家之美事也如介以右科发身人物议论足以备环卫之列久在合门得郡远去陛下亲擢称此选臣亦喜朝廷用人之当除目之下即已书行徐考员额则尚有可议伏见初置环卫官以来三十余年矣元以十员为额实精其选内以严侍卫之职外以示将帅之储今十员已足而又除介以介之才收置于员外无不可者特以遴选人才之地此门不可遽开一开此门权幸贵要便将攀援而进予援苟滥则名器愈轻不可不虑也臣愚欲望圣慈别赐处分庶免攀援侥幸寢坏成法所有右监门卫中郎将録黄臣未敢书读

缴李谦召试合门舍人

臣窃惟武臣之召试合门舍人与文臣召试馆职无异必其人物才业足以厌服衆论不可以轻予也李显忠称号名将而有孙能以文学自好尝名荐书陛下宠以召试宜矣臣初不知谦何等人考其家世乃知其父师顔曾任建康府统制于绍熙四年七月十一日乞致仕如此则

谦之服父丧方踰小祥犹在服制中也在法小使臣遭父母丧只给假百日本非令典近方有臣僚论奏议更此法见今看详况本法自有愿持服之文正所以待孝子也谦为小使臣固可用百日之制矣尝获文解则是愿为士人而不持父母丧可乎未除而经营召试欲玷清选则是冒哀求仕尤法之所不容也欲望睿断追寝成命勒令归持父丧俟服满而後从仕观其见识凡下亦不足以辱召试之宠所有錄黄臣未敢书读

缴刘询带行遥刺

臣照对刘询两任簿书官合转两官酬赏得旨依刘尧咨赵友仁例特与转行遥郡刺史臣窃考之刘尧咨淳熙六年以武功大夫奉使回程特授荣州刺史则是以奉使恩而转遥郡非以簿书之赏也至八年始以簿书任满赏特授忠州团练使赵友仁淳熙四年以在殿陛日久应奉有劳将两任簿书任满转两官恩例特典转行遥郡刺史此询所引之例也臣考之成法武功大夫为武臣止法今来虽有赵友仁例缘友仁系在淳熙四年至淳熙十六年太上皇帝即位之初所降指挥竝不许以泛赏迁转止依条法施行自此以後凡所以泛赏引例转遥郡横行者皆许缴駁或吏部执奏终于回授而後已臣愚欲望圣慈特降睿旨寝罢刘询带行遥刺指挥令与依条回授所有錄黄臣未敢书读

缴王泾等放令逐便

臣伏觀上件指挥窃惟陛下圣孝仰奉三宫以泾等皆医官旧人故许逐便以备使令然四人之贬罪有轻重未易以一概论也方高宗升遐之初泾追两官勒停一千里外州军编管马希古追两官勒停五百里外编管後省臣僚独论泾之罪不容诛以其轻脱纵肆所用之药不依方书不随病证率意自任致此祸变人人愤郁恨不食其肉罪大责轻纵未置死地乞断配以副衆心有旨王泾追毁出身以来文字特决脊杖二十刺面配千里外牢城收管绍兴三年正月指挥周昭应奉医药不谨除名追毁出身以来文字刺配琼州牢城永不放还臣愚窃谓壽皇尽孝执礼不胜创钜痛深之心故处泾之罪仅恕其死而已太上皇帝之恕周昭行道之人多知其故含怒蓄愤以致违豫者久之窜之海外圣意可知在今日虽经赦宥不应遽使之齿于平民臣以为马希古尚可恕也王泾周昭之罪不可恕也欲望睿旨将王泾周昭逐便指挥特赐追寝毋致失刑以累初政所有錄黄臣未敢书读

缴医官郑至達改风科入内内宿

臣闻有国有家者立法之制使有司守之有司不能守则君上当治其废法之罪若徇一夫之请越法自便有司能执法守而上之人反欲以一时指挥而废法开侥幸之门以来无涯之请则法令俱成无用矣医虽曰伎然先王之所甚重矧国家禁廷之所用上奉三宫所宜精择元丰之法选保试补其制甚严政和少变宣和又申严之俾竝依元丰法虽奉特旨传宣宣押等仰医局执奏不行可谓详尽矣臣在後省所当遵执实缘年来缴奏多急于大者而以此等犹为细事亦间有书行自知其非今朝政清明凡侥幸废法之事遇之辄论陛下俯从如响则在臣尤不敢忽所有郑至達特改风科与差入内内宿其于法制不可行者二而事体之大不可

者一臣敢陈之揆以宣和执奏之法一不可也又乾道三年指挥内宿风科医官以二员为额见今溢额人且令依旧今後竝不作阙差人二不可也是二不可者翰林院医官局能执奏以为不可而圣旨特依今来指挥则是臣所谓有司能执法守而上之人反欲以一时指挥而废法此于事体所系尤重自此苟有势援之人皆视法令为甚轻悉以特旨冲之则旧法几于无用矣此臣所谓事体之大者也臣不识郑至達为何人伎艺之精否考之案牒则累经缴奏淳熙十二年为德壽宫医官有劳特与免试验供职差人内宿淳熙十三年又为医药有劳差充德壽宫祇应皆为医官局执奏奉圣旨特依今来指挥皆为臣僚缴奏而罢不知惩创又图特旨以破旧法则其人顽狡可知况内宿风科医官既以二员为额目今已有员至達又在三人之外又闻大方脉以七员为额正缘千求不止已是滥额数员可见冗滥今若不行止遏恐来者不已是医官局能执法守而旧法日以寢废臣等反失其职矣是以冒昧历历言之欲望睿断追寢特旨庶使侥幸攀援之人自此帖息不胜幸甚所有录黄臣未敢书读

缴谢渊请给全支本色

臣仰惟陛下奉承三宫惟恐不能顺适圣意然法制之设所以公天下而共守之有不可踰者知合谢渊为皇太后亲弟请给依韩侂胄例特与依禄给全支本色有以见陛下奉祖后之意然真俸之支则有不可吴玠吴玠同为太皇太后亲侄同为检校少保节度使可谓事体至切矣然吴玠之请真俸已久无有议者而吴玠之请太上皇为之降旨则黄裳以给事中力陈者三四陛下为之降旨则黄由以摄给事中又至于再三论奏而後止疑若有甚异者无他玠在绍兴元年十月指挥之前而玠在指挥之後者指挥既定之後若又开此门则戚里攀援何时而已两朝圣明终允其奏韩侂胄之真俸以淳熙十五年十一月降旨正与吴玠事体一同谢渊之请切似吴玠臣是以不容不论欲望圣慈收寢前项内批指挥自後若不系南班随龙统兵战守之人以真俸为请者一切以定制絶之既以杜侥幸之门于节用之政不为小补所有录黄臣未敢书读

缴傅昌朝改差干办皇城司

臣窃惟皇城司之职不为轻选臣不知傅昌朝为何人第以名簿籍考之淳熙十年天申圣节皇后合得?补恩泽将一名回授与本合进奉白身傅昌朝补承信郎昌朝所谓之官虽元系亲属恩泽而补官之日明言以亲属恩泽回授与主管进奉之人即显得本非亲属而主管进奉止系一时非泛补授故顷以亲属赏典转官先经之部先示後有给舍缴駁皆谓依元降指挥止合转至训武郎止不曾施行至今年七月二十七日指挥云皇太后亲侄女婿傅昌朝偶用本殿捧香恩泽补官特与依亲属补授出官施行见今吏部申明朝廷未曾转行武翼郎夫覃恩转官以千万数独昌朝未得放行盖其出身犹未明白也若止是一时非泛出身其得合职已是过当难以遽当皇城司之选况昌朝见待干办军头司犹未赴上臣愚欲望圣慈收上前项皇城司除目俟朝廷取见出身明白放行本人转过武翼郎然後授之未为晚也所有录黄臣未敢书读

缴李氏等依宫人例支破请给【成国信国崇国三夫人李氏等系太上皇后亲属依宫人例

支请】

臣窃惟国家赋禄俱有条式不可紊也绍兴元年士歆妻梁氏支給臣僚缴奏谓一命妇之谓给事体虽若细微然幸门一开攀援者衆蚁穴之不塞可以溃堤遂蒙寝罢夫以士歆为宗室大老其妻一有干请犹为之遽止今无故而给三人尤为无名吴琚为太皇太后之亲侄谢渊为皇太后之亲弟其请支真俸陛下不以私害公悉从缴奏而止李氏三人因缘戚里不从夫爵得授国封已为幸矣若更依宫人禄式则例支破诸般请给饶冒益甚检照内国夫人例一人每岁约计钱近二千缗银一百五十两米四十五石绫一百二十五疋罗三十余疋绢六百疋绵四百两况一日而并与三人其蠹耗可知陛下恭俭节用为天下先中外方且冀望裁抑内庭用度以纾国力若遽开幸门自此攀援日至何以杜絶臣愚欲望圣慈收还上项指挥以塞戚里无厌之请实为幸甚所有录黄臣未敢书读

攻媿集卷二十九

卷三十

钦定四库全书

攻媿集卷三十

宋 楼钥 撰

奏议【琐闼意见】

缴朱熹除宝文阁待制与州郡差遣

臣仰惟仁宗皇帝圣度如天御史唐介以言事得罪贬春州别驾明日中悔命改英州已处之善地矣又明日用其言罢文彦博而遣中使护介之行未几遂复召用此所以为庆历之盛臣观陛下容纳直言改过不吝无愧仁皇朱熹始除宫祠深骇观听物论纷纷已而闻仍次对之旨则知圣意之已回臣寮缴奏又加宝文之职而与州郡则圣意又愈释然矣臣虽已论奏兹益进其愚陛下本以闵其耆老当此甚寒不欲使之立讲欲望圣慈授以内祠仍令修史少俟春和复还讲筵如此则君臣之道终始周尽熹之难进易退陛下素知顾岂以加职为宠惟陛下待以恩意亟使留行进之以礼则熹虽已去犹未出昼可以留矣臣苟有愚见不敢不尽伏冀垂听而采用之所有録黄臣未敢书读

缴祧庙事【御史中丞谢深甫等奏集议祧庙事乞且从礼官第一次陈请奉圣旨恭依】

臣窃惟宗庙重事非可轻议虽议礼之家古称聚讼然在上之人所以择之者如何尔凡事固当从衆要以不专视议者之衆寡惟其是而已矣本朝自开国以来立四亲庙之後凡宗庙之事据经守正本无可议治平末年英宗祔庙僖祖亲尽迁之夹室而顺祖遂居第一室天下无可议者盖僖祖之迁夹室于礼为顺太庙者宋之太庙非以第一室为主也自王安石异论奉僖祖已迁之主复入第一室正东向而议论始纷纷至今神宗祔庙翼祖遂迁亦礼之宜也蔡京用事专务绍述熙宁之政又唱九庙之制复奉翼祖已迁之主入庙当时诏书明言自我作古可见无所经据若太祖东向之议自熙宁以来议者不知其几至陛下而始定甚盛举也此事既定遂又议僖祖宣祖祧主所归考之于礼经计之以治平故事止合竝迁夹室如顺祖翼祖之制正缘熙宁之後推尊僖祖已久又纷然有不当使僖祖下祔子孙之说故衆议中制取唐柳冕之言创为别庙二事皆已得圣旨恭依矣岂应更有异议比闻朱熹曾入文字未蒙降出臣辈无由辨正是否忽又得旨恭依台谏之奏且从礼官第一次陈请则是止祧宣祖而祔孝宗所谓太祖东向之礼又复寢而不行臣实惶骇窃谓如此重事陛下再降旨恭依今忽以数语而改之行之四方实惑衆听臣未深辨欲望降出朱熹劄子庶见得有所据依者何事果能使中外心悦而诚服则改之未晚若如今日所行则宗庙重事议已定而复摇重事反轻非所以示中外如臣浅陋何足以预议大事苟有所见不敢以畏避而不言伏惟陛下裁赦所有録黄臣未敢书读

再缴李氏等依宫人请给

臣近者缴奏李氏国夫人三人请给事伏准御笔可依皇太后妹嘉国夫人例特与书行仰见陛下尊奉太上皇后念三女兄之意故有上项指挥臣岂应不承威命窃惟封駁之地以出纳为职君命之出从而出之岂不顺便惟知其不可而纳之是为举职况一事之侥幸从之亦未甚害所可虑者幸门一开便以为例援例而进得之者不以为恩不得者遂以为怨此喉舌之地所以必争正恐其攀援而不已也嘉国夫人淳熙四年初支俸给一时有司失于争执开此幸门李氏三人遂援此例初失于一今有三三人既行则後之攀援者又不知其几凡曰后族姊妹得之则兄弟之妇援之兄弟之子妇又将援之不知何时而已乎况今日国力甚屈不惟不可以望承平之时比之绍兴既不可及虽欲比之淳熙比之绍熙亦不大舛今岁遭壽皇之大丧待金国之信使固已不胜其费而天时如此救荒不暇朝廷倾赀以为民民之受实惠者无缘得徧饥疫可指日而俟盗贼所在而萌芽凜乎可惧之时陛下惟当躬率俭素横恩滥予损之又损犹恐不逮安可听戚里之无厌援不得当之旧例不思以义断恩如此之类侵寻不已何以善後臣是以辄忘忌讳再渎天聪伏望圣慈终赐寝罢如圣意深念从母母宁别予之财太上皇帝以吴琚不得真俸遂赐之钱庶可全肺腑之恩而不废天下之法更取圣裁所有录黄臣未敢书读

缴毛伯益转行遥刺

臣仰惟陛下嗣服之初爱惜名器间有出于左右求请或竝缘赏典或引用近例或出于三宫之亲属苟戾于法有司执奏无不垂听故朝廷清明可望治效近有李革以应奉有劳由副尉而转承信郎亦不可不论正以事体至微不敢渎冒天听今忽来有上项指挥毛伯益者知其为内侍不知有何因缘直以职事宜荣理宜优异与转遥郡刺史实骇公论夫以内侍甚衆遥郡至严有以赏典等事迁转者犹不可行指挥再三终于回授而况全无来历内庭趋走安得言劳便嬖使令岂应优异若此门一开凡有无厌之求陛下遽与施行而臣等又不能缴奏则遥郡不已便图正任正任不已廉车留务以致节钺何厌之有如此则祖宗之法度朝廷之纪纲将遂荡然何以为国自来内侍求请迁转屡经缴駁皆有一二可言盖未有如今日指挥僥濫太甚臣是以尤不得论欲望圣断追寝上件指挥推究伯益无故僥求上罔圣聪之罪特赐黜责以惩其余庶几自此可以少戢此曹不致过有踰分之请实为幸甚所有录黄臣未敢书读

缴重华宫官吏诸色人等及五年推恩转官

臣仰惟陛下钦事三宫务尽孝道重华宫一行官吏等人用德壽宫故事服劳五年例转一官资前此方以推恩为迟今幸举行典故本不当有言然臣有愚见如医官及碍止法人二项不容不论医官久饗廩禄窃取宠荣本是庸人侥幸在选壽皇违豫之久中外日伺脉状以候康复而其词不伦固已忧虑一旦弥留无不愤痛虽其罪不至如王泾之甚亦以一时多事未尝明正典刑六月二十三日奉太皇太后圣旨医官大方脉蔚仲坚郭仪李九龄疮肿科王懋陈世安口齿科俞时雍竝罢重华宫祇应此盖太皇太后明知其医药状而至仁覆露不欲加罪

止从罢遣後至八月间因台官论奏郭仪李九龄蔚仲坚辈庸缪之罪其言某辈则非止此三人也寻得旨仅降三人者一官未几至十月初王良佐李九龄郭仪又以应奉太上皇帝医药有劳而转官矣其侥幸已甚皆不复论其于重华医药失职如此不至严谴已为厚幸安得一例皆与转官之赏乎其医官已经降官及罢祇应之人乞更不推恩武臣及内侍等碍止法人数目不少若尽与转行实为太滥正引乾道二年之制隐下後來即次指挥致有今日施行欲乞竝照淳熙八年七月指挥回授其指挥使以下碍止法人亦乞照前项指挥依条施行其他人数猥衆官掖事严臣不能一一究知其显然可论者如此欲望明照三省枢密院及所属曹部照应逐次指挥及臣所奏二项事埋仔细开具施行庶几实有劳效者不至遗失侥滥太甚者稍得樽节其于爱惜名器之朝不为小补所有録黄臣未敢书读

缴陆彦端将覃恩竝解带各转一官恩例特与阶官上转行一官

臣待罪东台论奏固多皆是为陛下爱惜名器节省财用排抑侥幸以存国家之纪纲若碍止法人或转横行或转遥刺二事尤当固执一失职守来者无穷不可复为矣陆彦端事太上皇帝为随龙人衆所知以随龙之故超授官爵不为少矣若纵其无厌之求则何时而已耶比者太上皇后归谒家庙彦端于武功大夫并转遥郡两宫臣寮缴奏三次以一时人衆太上皇帝圣旨其他碍止法等人竝从所请时令与三人者转行彦端其一也是以一日随行之劳而转与二十年磨勘之官矣去年八月又以睿思殿内东门司等历过日月并使人到阙等泛赏乞于遥郡上转行後省察见其月日皆是重叠引用缴奏三次乞令吏部契勘年月遂寝而不行今又有此请夫覃恩转官解带转官使其不得止法则当循序而进何待特旨正以二者皆是泛赏碍止法人不可用故叠以二者冒干天听又欲于阶官上转行则是以碍止法不可用之赏而转右武大夫其为坏祖宗成法尤甚臣是以不得不论欲望圣断察其情状追寝上件指挥庶使退听且以塞後來无穷之请臣载惟陛下初政犹未及半仁恩隆寛左右近习戚里之衆干请恩幸渎紊圣听动劳特旨臣愚駁论虽荷矜从更乞奋威断择其干请太甚者有以惩戒之则朝廷益清纪纲不紊尤为幸甚所有録黄臣未敢书读

缴成立带行遥刺【御前忠佐成立该登宝位合转四官内两资转马步军都军头外两资转特与带行遥郡刺史诸般请给等竝依周兴体例支赐】

臣窃惟国家名器之重在今日尤宜谨守引例破法之弊在今日尤宜痛革臣待罪琐闕顷者屡有駁奏不敢顾恤仰惟陛下恭垂明听从善如流近来方得小定忽准前项指挥义不容己者御前忠佐止有六资曰步军副都军头马军副都军头步军都军头马军都军头马步军副都军头马步军都军头六资之外无法可以选补其转行遥郡刺史者盖横恩也武臣转至武功大夫为止法非有军功等不许转行而况此乎历考太上皇帝在位六年放行忠佐转官者才二人然皆有迹可考周兴以马军都军头转行尤在绍兴二年七月是时太上皇帝即位已三年矣至十月又以陆安为之中书後省缴奏而止绍熙三年四月又有指挥又以门下後省缴奏而止且以周兴之转行是有司失于执奏者直至绍熙四年再与而再缴至勤御笔以其久在潜邸应奉有劳特与转遥刺时方多事因遂放行盖亦三经缴奏不得已而後行非苟然得之也今可援为例乎况陆安在太上潜藩随龙应奉余三十年録其久劳犹艰难如此陛下

既位未久若成立引例破法六资犹未曾转满径以四资之恩超授遥刺则今之为忠佐者又援此例而进不可遽止名器愈滥矣陆安援周兴之例止言请给而不及大礼支赐进状下户部本部执奏而不行今成立破法所乞指挥则又全备以此知祈恩侥幸之人宛转攀援无时而已欲望圣断特赐详酌其以两资转至马步军都军头者法也则令有司照条格施行其余两资则与寝罢塞幸门而守旧法实为允当所有录黄臣未敢书读

再缴成立带行遥刺

臣近者缴奏随龙御前忠佐成立带行遥郡刺史奉圣旨两该随龙可特与书行天威所临即合承命然详究事体轻重宁受一夫之怨不敢废陛下纪纲宁被方命之罪不敢变有司法守也陛下明知带行遥郡刺史为侥幸又知两朝随龙忠佐人众恐开幸门以成立两该随龙故令特与书行庶使余人退听臣略考之太上皇帝随龙人有兵级八十八人内吴翊等十余人又在陛下随龙人数如此则未问其余名色只就成立本等人数内两该随龙已有十余人若成立带行则此十余人者必将援例而进不若杜之于初则来者自然绝望一开其端侥幸日滋纵之则名器愈轻赐予益滥止之则或得或否不惟无以服其心多方营求不与不已烦渎天听陛下将自厌之臣愚欲望睿断寝罢上件指挥以塞侥幸之路况陛下即位未久如此等事但当一切止绝若初年不难于发端後省不得而缴论诚恐国家爵赏有限不足以塞此曹无穷之请为害愈甚矣所有录黄臣未敢书读

缴韩侂胄转一官彭龟年除职与郡【同中书舍人林大中○韩侂胄转一官依所乞除在京宫观彭龟年除焕章阁待制与郡】

臣等今月初九日窃闻吏部侍郎彭龟年内殿奏事退而居家待罪不知其由已而又闻知合门事韩侂胄见求祠禄方有传闻谓龟年论侂胄甚切故皆不自安然而不知所论者何事也今有上项指挥则知传闻之不谬龟年以侍郎得次对与郡侂胄解合门及都承旨职事转一官内祠有以见陛下之处事不失一偏然臣等愚忠犹有当言者陛下自在嘉邸眷礼僚旧一旦龙飞不惟宠以爵秩延见访问几无虚日天下不以为私而服陛下好贤笃旧之德不谓三数月间所谓五人者黄裳遽成长往黄由寻遭外艰沈有开陈傅良相继论罢惟龟年一人犹在从列经筵又其赋性伉直论事不回尤蒙眷奖必其怀不自己尽言无隐今又去之则陛下之旧寮无遗不惟伤伐木之义而四方谓其以尽言得罪尤害政体此臣等所以重惜也知合门事及都承旨皆武臣之高选陛下不难于侂胄之罢可谓英断然次对不过在外之职序位反下于贰卿廉车之升留务则宠之已至况一去一留恩意不同去者遂远不复得侍左右留者既曰内祠则召见无时终不能远人言籍籍尚以为不平臣等欲望睿慈更加详处或留龟年于经筵则可以不失讲读之旧若其不然则命侂胄以外祠或予以外任事体适平人亦无可言者如龟年之贤陛下素知顾岂遂将终弃後日召用正自未晚然目前处事贵于得宜臣等诚恐指挥一出难于反汗故敢罄竭愚虑以俟采择所有录黄臣等未敢书读

再缴韩侂胄彭龟年【圣旨彭龟年除职与郡已是优异韩侂胄初无过尤屡求闲退罢职奉祠亦不为过竝依已降指挥】

臣等昨缴论彭龟年韩侂胄事得旨令竝依已降指挥施行臣等何敢不承君命然二人者事既相关须当适平龟年以真侍郎除职与郡若以为优异则侂胄之转承宣使非优异乎若谓侂胄初无过尤则龟年论事乃出于爱君之诚心不顾其身以进忠言岂为过乎臣等区区不敢更留龟年在龟年进退之义亦不可复留但直臣去国公议为之叹息恐自此无敢有为陛下出力论事者矣龟年既以决去侂胄难以独留欲望圣慈俯从臣等所奏予侂胄以外任或奉外祠以均事体以慰公议不胜幸甚再犯天威无任震惧伏惟陛下裁幸所有録黄臣等未敢书读

攻媿集卷三十

<集部,别集类,南宋建炎至德佑,攻媿集>

卷三十一

钦定四库全书

攻媿集卷三十一

宋 楼钥 撰

状劄

知温州举胡宗应贤良科状

右某伏覩本州士人胡宗左朝散郎裒之孙修职郎序之子家世业儒自少颖悟诵书属文随见辄解臣乾道七年为本州教授蚤已见其不凡去此十余年闻其学问日进有声上庠兹叨假守首访人物而邦人又咸言宗习应制举词业已就因见其书盖学有师承文无蹈袭博考经传有志于斯文参验古今将期于世用且其资禀温良家居孝友表里无玷言行俱优可谓儒林之俊彦圣世之英才臣谨遵奉诏书保举堪应贤良方正能直言极谏科于贡举条制并无违碍今具本人所习词业策论合五十篇谨缮写成八卷目录一卷缴进谨录奏闻伏候敕旨

除中书舍人举莫光朝自代状

右臣伏覩迪功郎临安府盐官县尉莫光朝粹纯无玷廉介自将种学绩文足为后来之秀臣今举以自代

举杨简刘仲光状

准尚书省劄子奉圣旨令侍从两省台谏各举通亮公清不植党与曾任知县人二名者右臣伏覩奉议郎知饶州乐平县事杨简学问深淳操行介洁议论坚正皆有本原爱民之政着于剧邑是臣乡人素为畏友非敢私荐公论所推朝请郎监登闻鼓院刘仲光纯粹而能刚疏通而有立曾知隆兴府奉新县甚有政声次历福州通判又有关决之誉此二人者实可应通亮公清不植党与之选

除给事中举高似孙自代状

右臣伏见文林郎绍兴府会稽县主簿高似孙夙有俊声能传家学词章敏赡吏道通明臣今举以自代

举宗室伯洙师津状

准尚书省劄子奉圣旨比来宗室在朝者少可命两省台谏侍从各举有文学器识者二人以备选择者右臣伏覩朝请大夫前知处州赵伯洙少登世科退然儒雅操守素坚政事中和若蒙擢寘朝行可以素率宗盟春秋寢高伏望速加进用儒林郎新池州铜陵县丞赵师津忍贫好学历操勤廉旧名师困尝在江东与应孟明同为县丞一路称此二人而师津至今沈滞选调穷而益坚不改其操国家教养之久宗室贤才日衆臣敢以此二人仰备选择

除权吏部尚书举谢天锡自代状

右臣伏见从事郎广南西路经略司干办公事谢天锡经明行修推重乡曲一入太学衆誉翕然省试为上三名廉退谨飭至今尚以选调远宦人皆有遗才之叹臣今举以自代

除显谟阁直学士举冯端方自代状

右臣伏覩迪功郎前隆兴府奉新县主簿冯端方学问淹该词章典丽自其少时已为故户部尚书孙覿所称晚沾世赏笔力愈高虽名士交称而尚沈选调矧又稟资谦静吏事不苟臣实不如举以自代

举冯端方江畴楼昉状

准尚书吏部牒奉圣旨令侍从给舍台谏各许荐举所知谓如某人学识可任清要某人材术可任剧敏某人刚正某人疏通下至将士智谋勇略或有所长亦各以名来上者右臣伏覩承直郎前楚州团练判官冯端方性行淳茂文词瑰伟直可以掌诰代言久沈下僚衆论所惜其人已老欲望蚤赐擢用如淳熙间韩元吉刘孝韪之比从事郎江畴学问精博议论閎放居为人师顷为徽州司户参军不惟吏事公勤门有诸生授业甚衆可备学官之选从事郎监行在点检贍军激赏酒库所采场门楼昉少负俊声记问该洽居有乡曲之誉文有制诰之体宜居馆阁养才之地使之涵养成就端方昉二人与臣皆同乡曲昉姓氏偶同却非宗党如蒙朝廷擢用後不如所举臣甘坐缪举之罚

除吏部尚书兼翰林学士举张慤自代状

右臣伏覩从政郎新两浙东路安抚司干办公事张慤操履至纯表里如一学问词采俱有过人举以代臣实允公议

举俞应符李兼郑肇之充监司状

准尚书省劄子奉圣旨考察见任待阙监司公共荐举者臣等仰惟国家多事急于求才而监司所系尤重臣等即当恭承明诏窃谓进退人才者朝廷之权分别是否者台谏之职臣等虽在论思献纳之列不应预闻考察之事若公共荐举所不敢辞但以人既难知知亦不能皆合如列衔其举复恐所见不齐既不敢有私资浅之人又不敢太拘资格并是公共商不敢有私

亲党合谨同状各随所知开具职位姓名及其所长闻奏谨列具如後

一臣某举承议郎行司农寺丞俞应符蚤继世科尝办剧邑疏通而有守精敏而善谋朝请郎权知台州军州事李兼清白承家公廉镇物已着维蕃之绩宜为揽辔之行朝请郎权发遣全州军州事郑肇之才猷挺特论议公平使居部刺史之职必有古肤使之功右谨录奏闻伏候敕旨

荐沈端叔王度劄子【同从官】

某等窃惟国家自更化以来求贤最急得人亦多其大者固已收召进用其小者亦蒙拣拔器使然以某等耳目所接犹有遗焉伏见承直郎前监行在左藏西库沈端叔文学老成操行无玷自为诸生由舍选释褐成均多士咸所推重分教章贡振作士气人知向方其时权臣擅国方斥逐上封言事之人而端叔奉檄校试庐陵乃以封事谤木之遗命题又发策言言路之通塞系乎人材之消长议论鲠切不徇时好及在左帑委蛇筦库锱铢必谨抱负所长不事表暴至今犹困选阶端叔处之泊如也从事郎前安庆府府学教授王度性资粹和词采藻丽驰声上庠之久遂由舍选登科屡更忧患几二十年仅有三考学殖愈进文气不衰为安庆府教授江淮士子不远千里而至居乡又以孝行有闻某等深考其人俱知其事苟不以上闻当任蔽贤之责欲望朝廷擢用寘之馆学实称其选

举阎一德綦奎赵积谦充边郡状

准尚书吏部牒奉圣旨令侍从两省台谏各荐举边郡太守三二人姓名来上者右臣伏覩朝散郎监登闻鼓院阎一德出自世家屡更繁剧纂辑经史着古今政事录以为规警顷知建昌军诸司交荐得知泰州以忧不赴今任列院物誉甚美迪直郎前知建宁府建阳县綦奎名门之裔官业可称建阳最号剧邑奎勤于抚字号称治办列剡政绩未蒙擢用曾叔祖故翰林学士密礼建炎艰难之时实掌书命着兵筹机要上之奎习熟闻见使之乘障必有可观通直郎主管台州崇道观赵积谦西洛故家少年尝冠铨闱方为幕职取知当路不缘介绍遂得改秩作邑宜兴前政实权臣之党月解拖欠至多积谦方议区画补解而郡不容积谦谓一时奉命必致凿空取办慨然请祠而去人咸惜之臣今并举充边郡一德累经任使尤所当先

荐黄肤卿林椅劄子【同倪思】

臣等叨尘从列仍侍经帷既不胜爱君之心无以効报国之志惟有獎提英俊振拔滯淹使其人有能致身于时则臣等可追蔽贤之责今得二人焉窃见从事郎前临安府府学教授黄肤卿志节有称词章特出所着北鉴八卷专论本朝昔与契丹为邻後为金人所辱究切事实虽祖宗盛时不曾一得志于北朝靖康以来动皆国家失计指陈事实略不忌讳删削繁文极便观览自乱华编诸书以来皆不及此若陛下以备乙览则必愤累代之世仇痛人谋之致辱臣子读之则必广求御戎之策务为强国之谋文林郎绍兴府府学教授林椅淹贯经术博考古今所着周礼纲目一书专论成周法度官职以类相从皆撮精要周公遗制可举而行既非泥

古以违今直可据经而从事自新莽北周名具实丧熙宁新法专以理财遂使指爲虚言实不可用惟椅之说灿然可观二人者皆负才名务为有用之学不惟编载有体其所着论又皆明白洞达有益于世闻其书各自缴进臣等仰惟圣学高明于经于史皆所留意而二人所着书实可以上裨缉熙之万一欲望圣慈特颁睿旨降付三省看详如其实可采録乞加擢用以示褒劝

攻媿集卷三十一

卷三十二

钦定四库全书

攻媿集卷三十二

宋 楼钥 撰

状劄

辞免除起居郎状【绍兴三年四月】

右臣准尚书省劄子奉圣旨除起居郎者有命自天措躬无地窃以柱下之史密侍于清光螭头之班尤先于左陛必得俊髦之士以居记注之司如某者学不知方寸非适用自登仕路屡点朝行但期平进之安敢启超迁之望忽叨新擢实出误恩已深据疾之忧更重积薪之媿自知若此公论谓何伏望朝廷特赐敷奏收还成涣改畀真才俾退即于卿联庶少安于愚分所有恩命未敢祇受

辞免兼权中书舍人状

右臣准尚书省劄子奉圣旨兼权中书舍人者自揣饶逾弥增震惕伏念臣技能至薄见谓顿迟学术素疎且多废忘躋迁左陛曾閱日之未深密侍清光惧记言之非称矧是演纶之要实参造命之严非智略该通不足以裨赞国论非辞章典丽不足以润色王猷可使凡才而预华选暂承人乏虽弗许于控辞退睥时髦顾岂容于冒进欲望朝廷特赐敷奏曲回宸命更选词臣俾专柱下之官庶愜廷中之议

辞免除中书舍人状

右臣准尚书省劄子奉圣旨除中书舍人者有命自中抚躬失措窃以仕朝廷者以三字为要知制诰者以一日为荣前代选才必考言而後授近时摄事多满岁以为真察之加详过于明试臣自顷承乏最为罔功词华不足以彰播告之修论议不足以效论思之益久虞幽黜敢冀亲除伏望皇帝陛下俯鉴忧衷亟收成涣俾仍记注之旧精求润色之工庶穆师言且安愚分

辞免兼实录院同修撰状

右臣准尚书省劄子奉圣旨差兼实录院同修撰者叠拜宠光伏增震惧窃惟高宗皇帝中兴之烈信远迈于前王必如太史公实录之书乃可传于後世当求直笔仰赞宏模如臣蠢愚遭世明盛自慙薄宦幸三入于修门虽点从班未一登于东观为直词掖方忝误恩共貳史官敢污清选欲望皇帝陛下俯垂睿照改畀时髦使专掌于王言庶或逃于公论

辞免兼直学士院状

右臣准尚书省劄子奉圣旨兼直学士院者忽拜恩光俯增震灼窃惟翰苑之职儒者至荣虽曰兼官亦当遴选如臣之陋与世多违蚤玷世科麤尝为场屋之技久从吏役岂能工制诰之文独蒙睿主之深知获备词臣之下列叨居西掖已惧空餐掇直北扉尤惊误宠矧清?尚稽于问寝顾禁林何急于充员伏望皇帝陛下洞鉴愚衷亟收成涣诏书日简方当视草之得人英俊骈罗安用积薪之居上

辞免除给事中状

右臣准尚书省劄子奉圣旨除臣给事中依旧兼直学士院者惕闻宠命莫措微躬窃以掌制紫垣久惭无补进官青琐尤惧非宜盖机要之愈严繁出纳之攸系自非学足以与闻国论智足以深照事机或非其人必害于政臣退量至陋深恐不堪昔惟润色之司犹虞疎阙兹任涂归之职是速颠隮矧当书诏填委之时仍兼词翰清切之地圣恩诚厚愚分难安自知断断以无他衆必断断而不可伏望皇帝陛下收还成涣俯鉴忱衷别择时髦俾当夕拜庶几得批敕之手不至累知人之明

辞免除权吏部尚书状

右臣准尚书省劄子奉圣旨除权吏部尚书兼职依旧者宠光下逮惕惧靡遑窃以选部攸司是曰六官之长文昌摄事亦叨八座之称纵难求杰异之才犹当取践馱之旧臣一登仕路三入修门年除岁迁寢踰于始望寢惊梦愕屡蹈于危机惟兹琐闥几更月琯遇事辄发徒自积于怨仇忤旨为多方日虞于呵谴敢期睿獎亟赐褒迁径由夕拜之联擢试天官之职兼汗青于东观仍视草于北门揣愚分以何堪恐公言之不贷伏望皇帝陛下收还成涣改畀真贤俾退服于旧班庶渐伸于归志

辞免陞兼实录院修撰状

右臣准尚书省劄子奉圣旨陞兼实录院修撰者叠被恩荣深增战灼窃以思陵在位着三纪之治功儒馆修书垂百王之宪则宜求良史以赞宏模臣才不逮中职多共貳北门视草顾五技之已穷东观滥竽曾一辞之未措矧乍躡选曹之长方将谢史笔之兼敢冒宠光进升论譔铨曹至冗尚忧绵力之弗胜髦俊满前安用庸才之备数仰祈睿鉴遴选实能庶大典之速成免公朝之虚授

辞免兼侍读状

右臣准尚书省劄子奉圣旨兼侍读者朝拜宸纶暮叨恩命退量薄采切惊惶窃以帝幄执经之臣尤高露门进读之选自非耆儒博硕古学精深虽得侍清燕之间何以赞缉熙之盛如臣至陋冒宠已多推迁才闕于七年起躡寢登于八座已不堪于共貳尚敢望于至三昨为载

笔之官犹慙于记注今进迹英之列安有于发明当观术业以旁求岂以班联而序进仰祈睿鉴俯照愚衷仪图名世之贤增光稽古之治庶容一介专意三铨

乞补外劄子

臣辄倾丹悃上渎天听伏念臣庸陋无堪敢萌荣望比自三污朝蹟六閱岁华太上擢之冗散之中俾居词掖陛下赐以便蕃之宠遂长铨曹侍帝幄之深严极儒生之荣遇汔无毫末仰赞高明况今福过灾生量盈器溢近遭介弟之戚复有冢妇之丧重贻亲忧尤不遑处重念臣有老母年八十有六气血寢衰喜惧交切久去乡国日夕念归伏望圣慈俯矜孤迹畀臣祠禄使息疲劳或得州郡差遣许其効力于外庶几不妨贤路少追身灾干冒天威臣下情无任惶惧俟命之至

辞免除职与郡状【庆元元年五月】

右臣准尚书省劄子奉圣旨除职与郡者闻命云初揣躬知惧伏念臣久污近缀无补明时自怜小器之易盈况复私门之多故辄倾危悃仰叩宸聪果蒙从欲之仁俯遂闲归之志已为厚幸敢冒殊荣乃叨寓职之恩仍畀典州之寄实踰始望爰沥忱辞欲望朝廷特赐敷奏俾遂真祠之请庶安故里之居

辞免除显谟阁直学士知婺州状

右臣准尚书省劄子奉圣旨除显谟阁直学士知婺州者恭拜丝纶若临渊谷窃以东阳望郡当选循良延阁显名以优耆德岂容一介之贱并叨二者之荣伏念臣三入修门十更除目经帷史观实为儒学之华翰苑铨曹寢躋从班之长属以私门多故老母念归力陈旬外之章幸动盖高之听本欲少休于疲曳敢期叠受于宠光伏望皇帝陛下俯鉴忱衷特回成命廩以祝厘之禄从其学稼之心庶使微臣得安愚分

乞宫观第一状

臣辄沥危衷仰干宸扆伏念臣比以便亲求外自诡治民伏蒙圣恩俯从所请文谟寓直宝婺分符一旦得之实踰分量臣因得过家上冢以遂私心誓当勉竭疲弩图报君父已择行日即戒征途偶缘臣母以犯暑来归感疾颇重始则冒风作热以脏腑下利年已八十有六平时虽幸康强而血气既衰不堪触动今既伏枕旬日其势未有向安之期访医治药曾无退候举家惶扰朝不谋夕自知稽留官期合取违慢之罪又准七月二日指挥以臣寮奏请将应未申到任帅守监司排日催促疾速起发仰惟陛下以千里重寄付之微臣在臣岂不愿即祇郡事上宽顾忧情迫意切不免有言偃然方命迹几似之傥不投诚陛下窃恐难逃谴责震恐忧惧无以自容臣与老母相与为命既未容扶持上道又不可单骑先行若更迁延月日深恐辅郡久无正官或致阙误重臣之罪无以自追欲望圣慈察臣由中之言出于恳切特赐宫观差遣一次使得少遂其私庶几母子或可保全尽出天地父母之恩糜捐顶踵不足以报冒犯天威臣

下情无任惶惧俟命之至

第二状

臣比蒙圣恩除臣显谟阁直学士知婺州者臣暂还乡曲即欲之官臣母年八十有六忽以冒暑感疾疟痢交攻屡濒危殆不免控告君父乞奉祠侍养得旨不允此犹是朝廷故事又有量展赴官日限指挥明诏之颁词旨温厚俯矜危惻洞照真情登拜三读阖门感涕臣仰銜隆天厚地之恩不敢随即再请今诏下几句局踣不遑臣母虽幸向安年高易于感动其势非更宽以日月安得顿复旧观黽勉上道深虑颠隮母子相与为命又不可单骑先往深恐稽留君命使婺女久旷守臣之职臣则有罪不免复申诚祷欲望睿慈察臣之请出不获已差臣在外宫观一次使得杜门专意医药不惟保全母子之至恩亦足仰助孝治之万一干冒天威臣下情无任惶惧俟命之至

第三状

臣比以母病陈乞宫观伏准尚书省劄子奉圣旨不允依已降指挥前去之任者拜命三次周章局踣无所措躬伏念臣蠢愚不肖误蒙陛下拔擢便亲求外过家上冢悉荷矜从诚愿竭少图报效而况臣所得州素为浙东佳郡财计粗优岁事登熟去乡不远使臣得奉亲之官宣布德意岂非臣之至愿实缘臣母一病五十余日虽曾少间而年高易于感动近尝夜作呕吐次日心脾痛楚几于委顿阖门无以自存惊惴度日此去舟行三日至越遵陆七程始到婺州见今尚须扶掖方能起坐委难支吾若迫于威命勉强登途脱有不虞万死莫赎昔陈实为太丘长更有诈称母病求假事觉收之以为欺君不忠病母不孝不忠不孝其罪莫大虽不孝安敢为此不免复冒斧钺之诛三以情实披诉于君父之前欲望圣慈特赐矜察除臣在外宫观一次使臣得以杜门专意医药之奉保全老母之余生臣无任祈天望圣惶惧恳祷之至

辞免再差知婺州状

右臣准尚书省劄子奉圣旨差知婺州者自天有命无地措躬伏念臣比剖左符暂归故里属亲闱之感疾叩宸陛以陈情荷温诏之一颁控忱辞而三请因殊庭香火之奉得专心医衿之营仰戴恩私寢成药喜忽蒙柬记再畀藩宣不移东婺之辅邦俾遂南陔之孝养固当仰体趣行之旨勉图共理之良惟母寿益高几近九龄之耄虽官程甚迩尚踰数驿之遥傥扶持以亟驱恐疲劳之未免况臣世系本出部封至今三邑同姓之人不减四明聚族之衆向于宦路或讲宗盟亲疎之间悔吝斯起忧患不堪于累岁聪明尤减于前时敢以妄庸冒此烦剧欲望皇帝陛下收还成涣别选长才庶安衡泌之居以尽晨昏之职

辞免复职状

右臣准尚书省劄子奉圣旨复元职名依旧宫观者臣逖闻成命深震危衷伏念臣生遇昌期仕叨从列顷以便私而请外旋因奉母以求闲处此累年安如一日闭门自屏尚遭白简之弹

跽地靡遑敢冀青毡之旧忽颁纶于北阙复寓职于西清拜宠若惊祝厘如故不图简记远及微踪揣愚分以非宜恐人言之可畏伏望皇帝陛下俯矜贱悃亟寢误恩庶安敝里之居免玷甘泉之列

辞免与郡状

右臣准尚书省劄子奉圣旨与郡者臣恭闻明命莫措微躬伏念臣少习一经本因觅举仕踰三纪非敢为高论思无补于清朝更迭遂求于辅郡为亲而归故里九易岁华复职而畀外祠一由上赐与郡有旨阖门皆惊久伏丘樊岂不愿承于任使傥无疾病犹当出效于驱驰兹贡需章实有危悃母以九十四之耄日抱沈疴臣以六十七之年又婴宿疾顾二人相与为命无一日不曾用医汤药扶持苟延暮景里闾劳苦具见真情心志已凋豫切不虞之惧头颅如许宁堪共理之良伏望圣慈俯怜旧物许令终养以全乌鸟之私仍俾祝厘少安麋鹿之性

乞致仕状【开禧二年十二月】

右臣么微之迹遭际圣时叨缀从班曾无补报忧患余生自贻严谴杜门省愆衰瘁日甚重念臣生于绍兴七年今年及七十揆之礼经实当告老伏望睿慈许臣致仕干冒天威臣下情无任祈天请命激切屏营之至

第二状

右臣昨具奏乞致仕奉圣旨不允者引年有请愿毕余生赐旨未俞敢申再渎仰动盖高之听冀垂从欲之仁窃以致为臣者实累载之素心不得谢者乃清朝之异数苟非宿望厥有彝章如臣者少既无奇今将安用不堪荷橐赋彭泽之归来但切杜门类介推之偕隐子欲养而亲已矣老将知而耄及之而况拜不能兴扶而後起退量病体何必待年揆以礼经适当纳禄弗容自默非敢为高伏望圣慈俯矜愚悃俾安畎亩遂终齿于幸民许挂衣冠庶获全于晚节

辞免复职状

右臣准尚书省劄子奉圣旨与复元职者臣忽闻牵复倍切惊惶伏念臣久遂退闲晚更忧患不知自谨宜得大呵曲荷隆宽止从薄责既坐糜于祠禄复进冒于侯封增衍圭腴方申谢牒敢图睿眷尚及孤踪未容挂神武之冠仍为洗丹书之籍宠还故职以责余生感上意之至优恐輿言之弗贷欲望皇帝陛下鉴由衷之悃悃垂尽之年追寢误恩少安愚分

辞免除龙图阁直学士致仕状【开禧三年四月】

右臣准尚书省劄子奉圣旨除龙图阁直学士依所乞致仕者闻命自天措躬无地窃以引年载请方拜命音进律过优几成误宠重念臣仕参法从归即隐居多病蚤衰久有挂衣冠之志为贫急禄尚存恋栈豆之私不因及七十之期安敢为再三之渎幸兹得谢何望叨荣矧惟汉

阁之班莫重河图之直当以处赴功之彦岂应畀纳禄之人伏望圣慈收还涣渥念臣素知知足俾臣粗保始终惟旧贯之是仍庶余生之无媿臣除已遵奉圣旨致仕外所有龙图阁直学士恩命臣未敢祇受

辞免召赴行在状【开禧三年十一月】

右臣准尚书省劄子奉圣旨召赴行在者臣闻命震惊罔知所措伏念臣本无可老而益衰既已引年方兹待尽忽蒙颁命不知所为况号召之一新以人才而为急有如臣者将焉用之输忠竭诚则已忘旧学陈力就列则又为废人伏望朝廷特赐敷奏非敢饰辞以控免悉由衷诚而吐陈冀别用于真贤庶少安于愚分

再辞免召命状

右臣准尚书省劄子楼钥召赴行在即具奏辞免恩命奉圣旨不允令所在州军以礼津遣疾速赴行在又蒙赐臣诏书一道者召命鼎来亟伸控免诏音俯及未赐允俞敢陈再渎之私上动九重之听伏念臣投闲已久告老方新忧患薰心积有负薪之疾权豪侧目尤深据疾之危不赖至仁岂存孤迹忽闻上圣雷霆之断复见中天日月之明四方相贺以同声万物亦为之吐气虽曰杜门而待尽宁当俟驾而後行实以蒲柳蚤凋桑榆暮迫病纏双足时历半年弱质既衰曾鍼砭之弗及余灾未殄致医禳之无功已分终穷岂萌他望仰蒙简记首预旁招已挂衣冠敢效从班之专達肆颁纶綍更加礼遣之优恩洊沥丹心仰干洪造伏望皇帝陛下恕其方命察此由衷略反汗之小嫌遂乞骸之素志或寬岁月俾息田庐傥拜起之粗堪岂奔趋之敢後

辞免落致仕除翰林学士状

右臣近具奏再辞免召命未准回降间又准尚书省劄子奉圣旨楼钥落致仕除翰林学士日下前来供职者臣控辞未允闻命尤惊伏念臣性资颀蒙学殖荒浅仰逢休运屡点周行本无藻绘之工每叨文字之选知南宫之名表有媿锦窠代西掖之王言久尘薇省摄承翰苑亲预禅书兼内外播告之修当书诏填委之际疚心自勉血指知惭伏自一去阙庭已周岁纪饱更忧患嗟视荫之几何絶望功名幸引年之得遂矧矧沈痼期保余龄逮兹更化之初狎奉趣归之旨循墙固请出綍又新弹虎門已挂之冠殊乖素志正鰲禁久虚之席尤惧非才伏望皇帝陛下俯察忱衷别求髦俊俾司是职大放厥辞庶德音昭示于万方虽武夫亦为之三叹获苟安于故里免有玷于隆知

再辞免状

右臣蒙恩落致仕除翰林学士继具奏辞免状准诏书不允者屡辞召节已干方命之诛叠迓诏纶又冒执愚之惧自量其分不已于言窃以起废江湖岂非臣子之大愿充员翰墨尤号儒生之至荣而臣昔者摄空实由西省今焉被命乃自外方身已纳禄而复齿垂绅之间仰上恩

之特异年过从心而使当视草之职真近此之所无臣自知其弗堪人必以为不可进退之际局踖靡遑欲望皇帝陛下念及衰残许其引避或不容于固请姑别处于闲曹虽怀知止之惭犹有可勉之理

谢宣召入院状

右臣伏蒙圣慈除臣翰林学士仍依故事本院待诏李舜臣至臣所居宣入院充学士者远颁除命贲临东海之滨甫覲威颜径上北扉之直重勤主眷申遣王人荷新渥以无堪抚旧游而自失伏念臣学徒泥古仕本代耕素甘州县之劳敢冀朝廷之选而乃屡参鹄序寢上螭坳紫薇久典于训辞青琐进司于封駁天官掌选兼侍金华之严史观缀文久摄玉堂之邃投闲置散已分终焉告老休官遂将已矣寧知末路复被优恩不容卧家趣使赴阙对迓英之合曲軫渊衷登螭文之堂殆成陈迹自叹形容之尽变况闻櫨栋之洊更已试罔功既衰焉用兹盖伏遇皇帝陛下才无终弃仁不遐遗解琴瑟以更张聿修治具出丝纶而弥大下取故臣钦佩隆知颇惊羣听臣敢不勉寻末学增葺寡闻强为骖馵之词少答便蕃之宠

辞免除吏部尚书兼翰林学士兼侍读状

右臣准尚书省劄子奉圣旨除吏部尚书兼翰林学士兼侍读者叠拜恩光弥深震恐伏念臣顷者摄承文部兼直禁林进读露门无匪高华之选退耕绵上不堪忧患之罹冀垂车以示子孙辱赐骸而归田里敢图出綍复使弹冠况在七旬之余悉紆三组之重不惟共贰俱俾为真有如朽钝之踪曷称便蕃之宠欲望皇帝陛下别图衆俊无备一夫念齿髮之早衰察精神之不及姑仍旧贯尚竭庸材

再辞免状

右臣蒙恩除吏部尚书兼翰林学士兼侍读继具奏辞免伏准诏书不允者词禁再登甫祇官次恩光三锡益震愚衷贡逊牒以未俞望宸居而力请伏念臣才本无用病困易衰休官方幸于杜门承诏忽惊于赴阙寻銓坡之旧已惧不堪居从橐之先尤为非据况二选并称于剧部而九重密侍于迓英仍兼视草之司深切负芒之惧欲望皇帝陛下俯矜诚悃曲軫颓龄既知断断以无他安得多多而益办许容避宠庶免妨贤

辞免兼修国史实录院修撰状

右臣准尚书省劄子奉圣旨兼修国史兼实录院修撰者臣再入修门屡膺宠渥周章亟拜局踖靡宁伏念臣顷筮从班尝共衆职既典铨于选部仍视草于禁林兹皆遂于为真又已参于进读更颁恩旨俾预史官比缘叠组之烦疲于奔命乃若汗青之重无所措词至今媿之况复老矣三者已难于胜任一身安得以贪荣欲望皇帝陛下悯其已过于七旬察其难兼于数器以国典为甚钜择英才而别求庶使微踪粗殫努力

攻媿集卷三十二

卷三十三

钦定四库全书

攻媿集卷三十三

宋 楼钥 撰

状劄

乞归田里劄子【嘉定元年七月】

臣辄倾诚悃仰干天听伏念臣危孤之踪自庆元改元补外因遂投闲十有三年而尚遭排根不已屡欲陈乞致仕以年既未及恐涉矫激继遭内难即吉之日甫及七十引经至再始遂挂冠臣自去国即为终焉之计人所共知去冬仰蒙圣恩更化之始首赐收召是时非敢俟驾而行实以方苦足疾控辞不获除目下及于里门郡守又从而津遣扶病赴阙再瞻清光洵蒙亲擢加以兼职又且俾典贡举非不愿勉竭衰悴少伸报效重念臣年已七十有二精力益耗铨曹有簿书之烦翰苑有文字之穴经筵史馆皆非所堪近以中暑招医不敢谒告步趋拜跪强勉不前不求退休必至颠踣久妨贤路且玷明时伏望圣慈俯矜孤迹再许纳禄归老田间实戴天地之恩敢忘君父之赐

辞免签书枢密院事劄子【嘉定元年八月】

臣伏蒙圣慈除臣端明殿学士签书枢密院事兼太子宾客特降中使宣押臣赴院治事者惕闻涣渥俯震危衷伏念臣三际圣君四污朝蹟仕甘平进惟义命之是安心实靡他以朴忠而自立顷尝去国本为奉亲置散投闲久作山林之计匿瑕含垢率由天地之仁虽屡遭摧剥之余终不至排根之甚幸逢更化道辱召还既叨长于六官且悉归于衆职亶为过分何敢僭求况已越于从心比再祈于纳禄不图睿眷擢籓枢臣典选固难尚能自勉本兵尤重安得冒居宠加秘殿之名兼预储寮之列误恩下逮羣听皆惊殊非衰迹之所堪抑亦多言之可畏伏望皇帝陛下收回成命改畀英髦俾仍献纳之班驯遂退休之志傥获免妨贤之诮庶不累知人之明

辞免赐衣带鞍马劄子

臣蒙恩除签书枢密院事兼太子宾客又蒙赐臣对衣金带鱼袋鞍马窃以出珍服于尚方锡名驹于内廄臣庀职之始拜赐已隆岂应旬浹之间复冒恩荣之辱礼诚过厚心则靡遑伏望皇帝陛下察臣侥幸既多负乘有眚使之安分抑免伤廉特降指挥追还所赐

辞免同知枢密院事劄子

臣准尚书省劄子奉圣旨除臣同知枢密院事依旧兼太子宾客特降中使宣押臣赴院治事者误恩狎至抚已增惭伏念臣顷备论思久投闲散荷皇明之收召加宠渥以便蕃俾参枢筦之班仍预储局之客已为过幸每惧弗堪曾煖席之未遑俄历阶而使进本兵至重宁容滥吹之人偃伯云初兹岂养痾之地尚蔑一毫之效遂叨二府之真念朝行之髦士甚多况天下之逸民未举不应迓列乃以序迁欲望皇帝陛下俯鉴由衷母嫌反污遴选英才而图任姑令旧着之少安亟赐俞音免貽羣议

辞免参知政事劄子

臣准尚书省劄子奉圣旨除臣参知政事特降中使宣押臣赴都堂治事者承命下临抚躬增惕窃以中书之本万化固资参预之良近弼之有贰臣足称倚毗之重敢言推择误及凡庸伏念臣洊点从班叨尘宥府才再周于月琯已叠被于恩纶玩愒自慙于事功而何补衰疲既甚况疾病之复侵方将俟使介之旋便请挂衣冠而退忽惊宠渥俾预政机载考旧章间有三人之同列若稽近比未闻两地之赘员伏望皇帝陛下俯察由衷曲怜过分收还成涣愿亟赐于俞音茂柬英才以共扶于兴运

贺东宫上御书居仁牌劄子

恭审宠锡宸章聿新户册前星少海益严壮丽之规安宅广居深寓藏修之意震亨协吉日进无疆【某】叨预下寮欣闻盛事容即陪于贺旅敢先贡于忱衷伏望令慈俯垂鉴察

乞归田里劄子【嘉定三年四月】

臣辄伸衷悃仰干天听臣闻七十而致仕礼之经也一介孤远素安平进遭际累朝三入周行寢尘法从年未六十即遂投闲屡思纳禄正恐或以为矫母丧既终适当七十再疏得请自谓平生志愿不啻足矣敢图圣慈更化之日首赐收召力疾趋朝一见天颜尽畀旧物旋由枢筦进贰政机皆非梦寐之所敢及玩愒岁月毫髮无补日负忧惧重念臣今已七十有四当戒得之时而况筋力日衰每虞僵仆素有足疾曾为废人近者益不堪奔走之劳非不恋慕圣德愿效尺寸陈力就列不能者止欲望睿慈矜怜衰悴许臣仍旧致仕归伏田里以尽余生不胜万幸

第二劄

上章有请愿致为臣颁诏甚温未容得谢敢洊陈夫愚悃用仰冒于宸聪伏念臣少已无称老将安用仰被圣神之眷擢登枢近之班然而虽号参知了无裨补弥缝辅赞何所建明拜跪进趋率皆强勉十目所视一心靡宁久矣妨贤自知不可衰而戒得衆必有言矧同召之三人今止存于只影汗顔在列归梦先形漏尽钟鸣夜行当已日暮途远逆施谓何欲望睿慈俯回渊听放归田里俾遂毕于余生再挂衣冠庶可全于晚节

第三劄

臣叠具劄子陈乞致仕伏奉诏书不允不得再有陈请洊颁渥未许告归三贡需章终期得请敢冒盖高之听仰于方命之诛伏念臣猥以迂儒叨尘近缀上恩至厚加宠数之便蕃同列咸和务寅恭之相勉非缘他故借以自陈惟是年实寢高夙若负薪之疾位为甚过了无横草之功冠已挂而复弹车既垂而再驾识分知足之意虽曰素明安烦恋剧之讥岂能户晓久妨贤路奚补公家屡属藁于皂囊终投诚于丹扆仰祈聪鉴俯察衰踪与其僵踣于朝重貽镌诮孰若曲从所请先赐保全矢辞已穷屏息以俟

【御笔卿为时耆艾秉国枢机进退之间重轻所系数颁诏谕宜悉朕怀勉竭壮猷毋庸遽去】

乞致仕劄子【嘉定四年闰二月】

臣敢倾危惴仰冒天聪臣闻七十而致仕古之道礼之经也臣五十九而投闲十载而遭母丧比及三年年适七十连年再请已遂纳禄平生仕宦至此不啻足矣加以多病早衰素有足病是岁一发数月甘为废人国家更化之初记录簪履之旧首赐收召病不能进既叨翰苑之除又颁趣行之命扶惫造朝本拟一拜清光归安田里旋蒙拔擢岁中屡迁冒列政途荏苒三载顷申恳请未赐俞音因仍强颜又复许久今年遂七十有五矣既违古义又乖初心筋力益衰旧疾发动重以手足之戚抚事伤感久在朝假不遑安处勉强参告颠踣是虞兹敢投诚君父乞骸以归非惟羸全晚节亦免久妨贤路陈力就列不能者止臣既不能不止何待伏望圣慈许臣再挂衣冠以毕首丘之愿不胜惶惧祈恳俟命之至

第二劄

臣昨具劄子陈乞致仕伏奉诏书不允上疏力陈颁纶未许念乞身而至再望得请以为期窃以七旬而加五年在微臣而宜去一日而降四旨惊眷宠之过优旧或施于累押之余今乃用于初求之顷莫知所处益不遑安伏念臣学术素疎宦情尤薄禁路已知其踰分政途深媿于罔功况在纵心之时既从谢事之愿岂容今日犹玷迕联凡今在朝惟臣最老不以妨贤而自列殆几贪禄以忘归福过灾生重以鹄原之戚日暮途远恍然驹隙之驰赞襄向有于建明趋拜每虞于僵仆凯息影于田庐之下敢投诚于君父之前伏望皇帝陛下俯赐矜容曲怜疲瘁恩荣素厚非无犬马恋栈之心志意已凋但有麋鹿投林之想倘得退寻于医药庶几尚保于桑榆

第三劄

臣再贡封章陈乞休致两奉诏书不允者引经告老尚闕俞音造膝陈情敢祈恩许难避再三之渎庶蒙万一之从伏念臣屡忝登朝几成去国投闲置散自分终焉避宠辞荣不啻足矣头童齿豁固知竟死以何裨漏尽钟鸣乌可夜行而不止岂知末路重上要津同寅协恭虽粗逃

于瘵旷玩岁愒日恐徒积于悔尤久踰休致之期深有满盈之惧弟兄猥衆凋谢奚堪疾疢交侵衰颓已甚惟应纳禄或免挺灾伏望皇帝陛下洞鉴由衷俾令得谢既不敢请麾符之寄亦不能奉香火之祠挂神武之衣冠复寻故步乐清时之钟鼓尚伏余生

再乞致仕劄子【嘉定四年五月】

臣比者三上封章恳求纳禄圣意眷留温诏稠叠仰体隆寬复就班缀本未敢再有陈请渎冒君父实以今年七十有五自念厚恩未报勉强奔走使其无病尚可支吾臣近者四月十七日扈驾朝献景灵宫乘骑拜跪几致颠踣翌日鞭策不前不免谒告复于二十七日堂中议政之次方欲夙退缘积雨阴湿不惟发动足疾适苦腹痛忽作旋晕不知人者良久此丞相以下之所亲见十目环视不可掩覆亟归私第招医用药仅得少定至今气短力乏连请朝参等假弥不遑安使当殿陛朝谒宗庙骏奔之际不测有此岂不有玷班列必致倍费保全兼臣先已挂冠又过数岁强顏寢久自知人言不贷以为贪禄忘归一旦疎虞无所逃罪是敢投诚于陛下之前深恐不任趋拜亦不敢又劳宣押之烦辄贡囊封吁天有请伏望睿慈矜其过老察其由衷许臣依旧致仕放归田里以毕余年不胜百生之幸

第二劄

臣兹以感疾旋晕既蒙圣恩给以朝参等假自度老而气耗难以黽勉趋走既忝参预又不容安坐养疾是以控告九重力求归老伏奉诏书未赐俞允臣仰戴恩纪俯增震惕伏念臣旧有宿疾甘为废人不自意全得至今日适有天幸又延数年及见圣君更化之初叨预明时共政之久非不知思竭愚虑仰酬异恩外若强而中实枯心欲为而力不逮日见衰羸之状乃无报效之勤立则欲僵坐多假寐徒妨贤路难免人言况复近因风湿之侵初为飡泄之疾眩晕几成于颠仆摧颓重费于扶持虽转刻以复醒亟还家而归卧仰蒙予告得遂呼医自怜蒲柳之零宜逐桑榆之暖岂容强勉更效驱驰一朝或作于周行万死难逃于大谴伏祈天鉴俯察忱衷许挂衣冠往寻丘垄庶可访寻药石收聚精神苟余喘之尚存皆再生之大赐

第三劄

臣近以衰病陈乞致仕两奉诏书不允仍不得再有陈请臣仰感圣慈未赐严谴非敢渎盖高之造实缘有未尽之诚辄干萧斧之诛冀动凝旒之听伏念臣少无所用老则可知顷叨猷纳之联甘处废闲之地属睿主当改弦之始俾微臣仍曳履之余擢真枢庭遂进参于黼黻重廩廩曾何补于治功不惟见诮于人自知非久于世然而七旬以後三载于兹羸能力勉于步趋因谓尚堪于驱役鸟虽飞而宜下可不知还灯欲灭而复明安能长保当未及衰残而告退况今以疾病而有求倘遂伏于先庐庶少延于暮景伏望皇帝陛下俯怜疲瘁亟赐俞允用人固欲尽其才而臣才已尽使人不欲穷其力而臣力既穷辞虽已殫情则甚切遡九重而请命祈一札以赐归

【御笔引年纳禄在常情则然养老乞言犹古人不废况大臣之进退系朝家之重轻有如贤

卿蔚为国老频閱抗陈之奏殊乖眷委之怀益务交修母思独善】

亲书奏谢御笔劄子

臣待罪政路荏苒三载累上引年之请必蒙陛下曲赐眷留本未敢洊冒天威近在堂中忽作晕眩几至颠仆谒告呼医寻即上章求致其事两拜温诏尚閤俞音情意迫切遂成三渎初七日早仰荷圣慈特遣中使传奉恩旨臣既粗可支吾且闻居家引疾素无宣押之例惶惧承命即时入堂已具奏知敢图天地之隆私申赍云汉之亲札獎饰备至训以去就之宜臣实何人叨被殊渥周章震悚无以自容虽勉力就列终恐衰悴不能仰酬洪造之万一谨于中夜斋祓躬伸奏谢来日自当俯伏宸陛控叙危衷臣下情无任感天荷圣激切屏营之至伏乞睿照

乞增葺锦照堂劄子

臣辄有微诚仰于天听臣祖赠太师齐国公臣某政和中由卿列擢守乡郡兴利除害非止一端每有奏闻随即报可其後在任首尾五年宣和初方腊猖獗邻郡啸聚相应如杭严处州皆遭攻破越及温台仅余城郭外邑亦多涂炭惟臣祖申饬备御多设方略阖境无虞就陞徽猷阁直学士告墨具在前後玺书褒美皆亲洒宸翰云章昭回海邦增耀城内一湖旧有十洲三岛最南一处适与私家相近遂于其上建锦照堂刻碑堂中以侈上赐中更兵毁巍然独存是时州治初复移为小厅碑石暴露隆兴元二年间州郡方始再建及今五十年栋宇弗支加以连岁暴风秋霖颓损尤甚臣自顾么微猥叨误恩置诸迹列累疏乞身未蒙俞允顾惟家世之旧不敢自默欲望圣慈特降睿旨许容臣自备材植以时增葺倘遂归休得以周旋其间仍不许本家及官司指占安泊居止庶可永久尊奉先朝奎画之严抑使子孙表扬前人之志

进东宫耕织图劄子

某衰迟之踪叨逾过分自尘枢筦即备储寮仰蒙令慈眷顾加渥退念略无毫髮可以补报每切慚悚某伯父故淮东安抚璫尝令於潜深念农夫蚕妇之劳苦画成耕织二图各为之诗寻蒙高宗皇帝召对曾以进呈亟加睿獎宣示後宫至今尚有副本某尝书跋其後仰惟皇太子殿下渊冲玉裕学问日益密侍宸旒恤下爱民固已习熟闻见究知世务惟是农桑为天下大本或恐田里细故未能尽见某辄不揆传写旧图亲书诗章并録跋语装为二轴伏望讲读余闲俯赐观览或可备知稼穡之艰难及蚕桑之始末冀诸几案庶几少裨聪明之万一亦以见下寮拳拳之诚

乞致仕劄子【嘉定五年三月】

臣辄伸丹悃仰冒宸聪臣闻之礼经自幼学以至致仕具有节目古今用之臣生而多幸年未四十而仕遭际三朝四入周行年除岁迁寢至通显七十挂冠不啻足矣陛下更化之初首蒙收召迫于威命扶病复来恩渥益隆遂尘枢筦进参黻暇亦既三年中间屡尝自列眷留再三不敢烦渎去冬自丞相而下三人求去俱不允俞臣难以继进伏念臣今年七十有六矣齿髮

凋坏衰相日侵筋骸疲瘁隐痛交攻每趋朝谒悉出勉强深惧僵踣于宗庙会同之际有玷陛下保全之恩顾岂有入仕则在古制之先而休官乃在其後又复过数年矣贪冒之讥难免人言臣自知媿有面目伏望圣慈矜念衰残许归田里赐以余龄使全晚节不胜百生之幸

第二劄

臣昨具劄子陈乞休致放归田里伏奉诏书不允臣窃惟皇朝忠厚专以礼义廉耻养士夫之心先正名公多有不待年而告老者先帝临御申严此制凡已七十而仕者御史必弹纠之有去七十尚二三岁者庙堂不敢除以待次郡守是为爱养臣子不使犯礼经之戒伏自陛下改弦更张以来兴念正元朝士所余无几又多久厄于权臣用事之时虽年登耄艾亦皆以次收召德至渥也迨至今日荏苒六年召用之人或去或亡几于略尽独臣久玷政途未容得谢诚不遑安近者台评有言人臣视爵禄为己有则昧止足之义无廉退之行贪竞之俗成矣又曰路不妨贤则拙者可信而塞者通矣又曰凡在朝列有恳愿补外者当从其请此皆犁然有当于人心而臣忝在近列年已过期使其精力尚强犹可图报老而耄及将焉用之伏读诏书不胜震越正以材疏智短不足以任共政之责所以切切求退非为图山林闲燕之适也若商山之终隐当以自师如渭水之图功安能为役与其後日徒费陛下保全不若及今尚可黽勉之时使之进退合宜则不惟微臣晚暮荣幸亦足以成圣朝风化之大端示天下以止足之义

第三劄

臣累具劄子陈乞休致伏奉诏书不允不得再有陈请告老将归吁天有请蒙恩未允蹐地靡遑敢干方命之诛三贡乞身之悃伏念臣屏居既久得谢复来初期一拜于天光径还乡社岂谓五经于岁律尚玷政途屡求再挂于衣冠亦已叠勤于诏谕词穷复止福过难安念久据于要津致坐妨于贤路况复衰颓益甚遂已至踰七望八之年参预无闻何以佐咸五登三之治爰自去冬而草奏必期嗣岁以辞荣亲奉玉音谓正资于辅佐洵颁纶命又有及于典刑仁慈优隆词旨详縟仰圣主所以逮下在微臣皆非敢当不复更引礼经远希前哲直以血气衰瘁疾既交侵心志凋残事尤健忘行多则蹇于进步坐久则昏不知人但可投闲岂堪任责欲望陛下特垂睿鉴洞察忧衷推从欲之至仁使归安于故里巢由长往孰云尧帝之遗黄绮终辞无损汉家之盛切于得请不觉费辞

再乞致仕劄子【嘉定五年八月】

臣辄沥危衷仰于天听伏念臣衰瘁至此实不堪为世用仰蒙圣恩擢寘政路首尾五年平生自知分量不敢贪荣久处于此日不遑安是以无岁不求再挂衣冠或以疾故请至再三率蒙睿眷温诏曲留不敢频有烦渎又复中辍今年七十有六矣已无颜面尚玷迹联况自入春以来屡以病告两尝吐痢俱作再以淋涩为苦近复以暴下累日藹然弗支形体瘦瘁饮食绝少近虽勉强朝参深恐不能支吾一旦僵仆大廷万目并观徒为清朝之玷臣之获谴顾何足言伏望皇慈深察诚悃使之归伏田里以迄余生以全暮景实为孤臣之幸

第二劄

臣近者上章乞身自知僭冒甘俟刑诛重蒙圣慈不惟未赐俞允又勤诏旨仍降四项指挥不容引退臣感激恩遇衰涕交横不免再有陈述陛下更化之初臣首蒙收召旋自西府进贰东省三数年来圣德日新治效益进凡前日水旱饥疫虫螟盗窃悉就消弭边陲宁谧年谷顺成此皆国家运祚方兴圣德光被使臣等得以充员尸素于此岂不仰恋明时而乃自求屏退况今郊祀大礼在近千载际遇又将预骏奔之列引疾勾去此岂臣子之情实以屡困疾病筋力顿衰精神懔懔不能自持正恐当圣主精意明禋之际冒居使名不足以效奔走万一颠沛于郊庙坛壝之前有污大仪则臣死不足以塞责是以不复更敢引经据古直述情素投告君父及此秋季祀事未讲之时赐以残骸俾归桑梓得为太平之遗民免玷知人之圣鉴诚为余生之幸再渎天威臣无任俯伏感涕祈恳之切

第三劄

臣再具劄子陈乞休致伏奉诏书不允不得再有陈请念臣久叨共政之地屡上乞身之章兹焉三渎于冕旒诚欲一归于岩穴危衷倾叙温诏潄颁已穷告老之辞深感留行之眷惟是臣荏苒五载侵寻八旬略无横草之功固已难居于迓列若匪负薪之疾犹能强处于周行诚以一年以来百病交作几经告假日媿空餐近虽勉赴于昕朝实亦每怀于隐痛不知者尚谓其矍铄旁观者宁免于揶揄今则骨露神痴行迟坐困髮种种以如许视茫茫而愈昏孔子老而戒得之言庄周壽则多辱之训皆所当鉴不敢重陈直述腹心仰投君父惟乞皇帝陛下察其衷曲加以哀矜及兹未至颠沛之时使得早遂归休之请首丘在望没齿难酬重冒天威臣下情无任惶惧俟命之至

乞致仕劄子【嘉定六年正月】

臣辄沥危惴于冒宸听伏念臣衰薺无堪叨尘政地四年于兹屡贡乞身之章曲蒙睿眷诏旨丁宁又复中止旧岁多病内外交攻齿髮并侵心神凋耗秋间自列正恐不任郊禋骏奔之劳既不得请日夕兢惧迨原庙太宫圜丘行礼之际陛下寅恭?巩神示昭格而臣筋力弗强足膝俱惫侍祠跛倚几于僵仆臣实无以措躬旁观亦为臣危之独以熙事备成恭谢日近未敢奏陈虽幸俱免疎虞而雪深寒劲采所弗堪拜起蹒跚有失臣子之敬况今逐年七十有七若又不能挂冠而去则寡廉鲜耻安烦恋剧之诮必不迨于公议而臣平日知止知足难进易退之志至晚节而扫地虽百口无以自明是敢仰渎天威求致其事少休故里以毕余生伏望圣慈亟赐俞允使得纳禄以塞盈溢垂车以示子孙不胜百生之幸

贴黄臣昨者斋沐修写奏劄只俟恭谢礼毕榻前控陈既而展日再臣贱疾愈致发动适值同列在告勉强陪班痛楚特甚呻吟宛转几不聊生元正朝谒使客在廷皆弗获预机务丛委非可养痾病体支离岂堪任事虽欲一伏轩墀有所不能用敢殫沥寸诚仰祈保全生成之赐见今居家以俟威命伏乞睿照第二劄

臣近具奏陈乞致仕伏奉诏书不允者伏念臣顷自从班为亲求归继遭排报十有三载百谪备矣不敢遽挂衣冠恐或者以为躁愤其实无所怨尤母丧既除适当谢事之时再疏而後得请自谓余龄无几平生出处遂保始终敢图睿恩起于既老擢寘近列皆出天地生成之赐职高任重忧惧日积俸优分溢满盈自畏况兼年垂八袞衰疾交侵医疗未效玩愒滋深合是数端岂复有可留之理欲望圣慈察其真情检会累奏亟赐一俞上以广清朝养老之懿下以全微臣首丘之愿感戴恩纪没齿图报干犯雷霆之威席藁俟谴

第三劄

臣近者再上封章力求纳禄伏奉诏书不允不得再有陈请臣自揆逾分不当更申黷冒真情迫切敢犯威严臣窃惟陛下更化善治百度维新比年以来大臣之进退犹未有全其终始者殆非所以示四方也皇恩如天保护臣下迹联求退率多留行固足以仰见眷注之深然如臣者本乏才术少不如人今焉及耄顾何足算力不逮心既无以佐万机之烦年当戒得又无以逃衆口之诮使其蹒跚後尘已为徒妨贤路矧复病苦相缠虽欲勉竭有所不能历数立朝之人臣最衰老其为宜去亦莫先于臣者是以不避三渎期于得请居家屏息以俟俞音臣无任惶惧震灼之至

第四劄

臣近具奏陈乞纳禄准尚书省劄子备奉圣旨依已降诏不允不得更有陈请臣洵有危惓不容自己敢毕陈之臣窃惟仕而请老古今之通义而在汉尤以二疏为贤方父子相期俱归移病赐告广遂称笃上疏乞骸而後许之及其都门祖饯至今想见蔼蔼之盛此岂真疾笃者而宣帝不以为欺公议不以为过正以其年既笃老且欲以全其节也如臣不肖无能为役起于挂冠貳政累岁贤路久妨一宜去年登七十有七望八十几何踰礼越法甚矣二宜去福过灾生拙恙交攻呻吟宛转殆无生意三宜去三上封章皆出由衷之言不敢遽称疾笃以欺君父又敢望圣慈推宣帝保全臣下之意使臣庶几二疏之风抑以示圣朝退人以礼之美倘得以余年归休山林以毕首丘之志天施地生恩纪无极若筋力尚可勉强犹当一拜轩陛之下以展犬马恋恋之心铭肌刻骨九殒不忘叠犯威顔臣下情无任激切恳祈之至

第五劄

臣比者四上封章力请纳禄词殫情极窃意或可以感动宸聪仰蒙圣慈亲御翰墨眷留至渥予告至再祇服异恩敢不退听初亦自谓幸得兼旬休养益近药餌庶可勉强自振上副九重之至意而空餐已久福过灾生终岁疾病入春反深医者伎穷假限将满衰悴痛楚愈难支吾屡渎君父实非得已伏望俯矜垂老使致其事归伏田里消弭悔咎少延残喘不胜百生之幸

第六劄

臣辄沥危惓洵渎宸聪臣老朽抱疴五上乞身之请三蒙予告之恩专意医药又复许时拙恙

曾无差减昼夜呻楚左右所不忍闻垂絕之命去死一髮伏念臣入仕以来服膺忘事之戒奔走外郡凡公家参集之会未尝托病苟且况冒居迓联首尾六载日谨听谒退而赞貳政机应酬庶务延接宾客或逼昏晚虽曰徒劳然竭其区区之愚每欲粗伸报效犹以不称为惧今则筋力已愆病又困之恭谢之後元日朝贺使者在廷皆阻于就列盖两月余不获进瞻威顔岂有高爵重禄养此衰残之人上辜任使下妨贤路怀安尸稟负罪愈深虽圣眷之优加实公言之可畏内自揣度如临渊谷假限既满不容勉强揆以汉法三月当免稽诸着令止许百日是敢申布忱衷控投君父伏望睿慈察其迫切曲赐矜怜俾得再挂衣冠早归田里消弭悔咎苟存喘息以见松楸实戴天地生成之德矢辞已穷臣无任战栗俟命之至

第七劄

臣情实迫切不避斧钺之威言出由衷仰干天地之造期于得请遂忘屡渎伏念臣忝尘迹列于今五年自揣疎庸岁岁求去奏疏彻闻无虑数十圣度容纳非直寬其譴呵而又亲洒宸藻过形獎饰区区所陈竟闕俞音使臣筋力未愆尚可勉强固当殫竭弩蹇以答隆恩公论私计犹弗暇恤而今者一病累旬略无退证医疗备至不容措手惟有决意乞身归休田里既释重负稍免忧惧庶几消弭灾咎假息余龄倘得毕志丘壑则君父生死肉骨之赐沦肌浹髓虽九殞不足以论报矣干冒宸严臣无任战栗

贴黄臣以病体衰羸天气尚暄若俟假满有请必致重劳处分故敢不俟半月之限竭其恳恫欲乞圣慈免再给假赐臣骸骨及今得归尚可生还故里不然则必至毙踣于此情实可矜伏乞睿照

乞御书锦照二字劄子

臣昨者陈乞自备材植修葺先祖赠太师楚国公臣某守明州日所建锦照堂永远严奉徽宗皇帝御笔碑石已蒙圣慈依臣所奏臣今者乞身得归辄沥愚诚欲望特洒宸翰赐臣锦照二字庶几奎画昭回庸侈祖孙被遇累朝眷宠之厚以为敝里私家无穷之光不胜荣幸

乞东宫书怀绶二字劄子

某昨者陈乞自备材植修葺先祖赠太师楚国公某守明州日所建锦照堂永远严奉徽宗皇帝御笔碑石已蒙圣旨依某所奏某乞身得归欲于堂侧立怀绶扁榜是敢仰干令慈望赐某二大字以为子孙不朽之传不胜幸愿

攻媿集卷三十三

<集部,别集类,南宋建炎至德佑,攻媿集>

卷三十四

钦定四库全书

攻媿集卷三十四

宋 楼钥 撰

外制

吏部尚书赵汝愚兼侍读

敕朕退朝之余务学为急开迓英之阁肆求经史之遗言对无逸之图慨念祖宗之美意正有资于劝诵顾何惮于增员具官某秀出天支蚤收儒效擅开平之誉久宣出藩入从之劳条晁董之言尤见忧国爱君之意谨铨衡于选部实领袖于禁途朕惟历代编年之详萃于通监之纪三朝致治之要列于宝训之书尔其因事进规尽忠无隐矧是宗盟之彦首陪经幄之游尚服异恩以称公选

寄资武功大夫干办御药院陆彦端转归吏部除带御器械依旧干办太一宫

敕具官某尔给事宫省谨而寡过肆还寓秩列之铨选属鞬九陛仍护行宫往哉惟钦母替于旧

武经郎赵不淹换太子右监门率府率

敕具官某国家宗支视古为盛然以属近行尊得奉朝请者亦鲜矣尔修饬有素宗老荐其详雅授以正率日陪近班尚勉之哉以永终誉

许从善循修职郎

敕具官某尔以假吏往从使节兹登仕籍始得论赏虽曰踰时亦不失劳矣

从政郎邵武军司理张令照降两资故罢

敕具官某治狱之职惟公则平尔曲奉上官纵更为伪以?人于深文台评来上罚其可追再镌厥阶归务循省

修武郎前监绍兴府东城库马镒降两官

敕具官某尔职權酷惊扰田里宪台按治鬻讼自解削秩免官以正名分

朝散大夫知邵武军赵师造降两官

敕具官某政平讼理郡太守之先务也尔按吏不审乃讽胁理官伪为文记以傳致其罪彼罪虽得尔其可佚罚乎褫秩二等以戒鍛链之吏

从政郎贺正使书状官俞南仲循两资

敕具官某朝廷选修聘之使而使之自选其属尔以庠校之彦为之少从礼成而归赏可後乎何谦韦益竝循修职郎

敕具官某集故事以成书儒馆之职也尔隶西省【韦益改东省】亦预有劳既登仕版仍进一阶

朝散郎温州通判傅颐降一官放罢

敕具官某榷货之禁至为严密治中别驾实专掌之尔职在是而不能戢吏卒之冒法岂惟关防之弗严抑见威令之无素削秩免官以惩不恪

福州观察使王拊父康赠武功大夫成州团练使

敕朕肇禋南郊只见上帝爰推霈泽以及万方仕登朝列皆得以及其亲具官某故父具官某有子以廉车告归尔亦预此恤典尚其有知钦承休命

寄资右武大夫遥郡防御使皇子嘉王府都监韩世荣转归吏部在京宫观

敕官躋横列使领遥防是为右选之华用示内班之宠具官某进谨赤墀之奉退祇朱戟之劳历年寢多以疾来谗俾隶名于铨部仍赋禄于真祠尚服渙恩以保终吉

承节郎潘时美嫡母孔氏年九十一岁封孺人

敕具官某嫡母孔氏比肆郊霈推老老之恩尔年登九龄子为命士予之汤沐以为晚岁之华

通奉大夫显谟阁待制陈岷系韦潜心举主降一官

敕贤引其类固难保于终身称匪其人亦何逃于定制具官某早登膺仕屡荐小官逮历岁之既深有字民之无状按章不审虽多刻吏之文具狱既成莫掩贪夫之迹考寻举将乃属从臣

以尝遇于霈恩姑稍镌于命秩尚为宽典毋有遐心

嘉王府请尚书彻章官属各转一官

承议郎中书舍人兼翊善黄裳

敕朕有元子教之以义方尔以名儒导之以经术既阐百篇之奥可稽一秩之褒具官某造理精深处心夷旷出廷臣之右能介而通从吾儿之游最专且久博文约礼欲着乎心考古验今如指诸掌因乃天资之美加之学力之优兹焉进官姑以示宠惟帝王之胄非务为章句之徒发经史之微尚益明事物之要既上紫垣之直仍先朱邸之僚进有赖于谕思退尤资于讲习其祇朕命式究尔心

承议郎著作郎兼赞读黄艾朝奉郎军器少监兼直讲陈士楚

敕具官某朕以元子天资之良遴选宾友以辅导之惟尔艾尔士楚俱以儒英从吾儿游典谟训诰誓命之文讲贯既久以至终篇旌尔贤劳何爱一秩其益暨乃僚秉乃心相与发明经史之要日计不足而岁有余厥惟休哉

知扬州钱之望复直宝文阁

敕具官某朕肇禋南郊爰肆霈泽士有一眚咸复厥初矧吾帅臣起临边阃日着声绩如尔之望者顾可後乎尔守襄阳烦言洊至稍镌寓职于今三年因予泰畤之恩归汝宝奎之直其祇宠沃益懋尔功

成都府路第二将高师顔制置使司奏举知黔州

敕具官某蜀道万里士有负文武之才者朕何自而知之尔起将家历戎职制使谓尔通练老成连师又称其沈毅通敏朕以二臣之言试尔以黔中之守尔能不负所举则知所以报国矣

泉州同安县灵护庙神封威惠侯

敕具某神朕之爱民至矣吏治于明神职于幽苟利吾民虽远必录以尔神庙食海峤久着灵迹却蚩蜮而张官军招海贾而销疠疫有司核实具以上闻锡尔嘉名歆予茂渥

承直郎坑冶司检踏官蒋盖降一资放罢

敕具官某国家置使江左以总诸道之货泉设属支郡以究山泽之遗利尔其属也冶工争攘至相戕杀尔实啓之劾章既闻其上一秩免所居官吏之不?庶乎知警

修职郎临安府昌化县主簿赵善视降一等放罢

敕具官某尔筮仕之初密在畿邑是何么?敢尔披猖镌秩免归尚为轻典尔则自取将谁咎哉

入内内侍省都知邓从训该奉上高宗皇帝徽号册宝转协忠大夫依前奉国军承宣使

敕朕推尊烈祖务极隆名宝册之严式资办护均行赏典尔则先之具官某服在禁庭恪共衆职横班秩峻既兼留务之华高庙礼成实任贤劳之首爰加命秩用答尔勤

倪思等系常良孙举主各降一官

礼部侍郎倪思

敕人未易知其来已久士不自爱乃至于斯既骇予闻致貽伊戚具官某夙推清望遍历华途比因缮监之迁爰谨属寮之荐家既传于清裁人亦谓其端良俄隐慝之遽彰何贪心之已甚考寻举将乃属从臣以其未脱于七阶俾尔姑镌于一秩勿以惩羹之故而忘推毂之公

中散大夫知通州章冲

敕具官某人之难知旧矣尔为南兰陵以户曹为贤而举之閱岁既久乃以贿闻申举将之罚不可废也其上一秩毋忘省循

隆兴府佳山孚应庙神封惠济侯

敕具某神国家爱重爵赏非有功不侯人神一也以尔神生而不求闻达以忠孝而化人没而能着灵响有功利以及物手植之槐犹在舟行之祷必答予之好爵其尚钦承

朝请郎致仕刘础降一官

敕具官某朕视岭海犹畿甸也尔守苍梧而部使者谓尔加赋于民且曰遂祠请而未拜闻劾章而径行虽已挂冠岂容幸免姑镌一秩以示薄惩

从政郎钱逖降两资候服阙日与远小监当

敕具官某细民以煮海为业私贩冒禁或未能免尔仕至邑令又方执丧使者廉按谓尔为逋逃之渊藪何耶削去二阶姑令终制朝祥暮贬其尚何辞

寄资训武郎嘉王府都监朱思正转归吏部在京宫观

敕具官某服役内廷兼官王邸克勤所职以疾丐闲禄以内祠秩之吏选尚钦朕命以善尔躬
成镛知黔州

敕具官某尔奋由武科屡更事任黔中虽远委寄不轻外控夷蛮地当一面命尔作守凡牧民
固圉之事尚勉之哉

寄资武义大夫果州团练使重华宫只候董友闻转归吏部

敕具官某尔职联中禁使领遥团共事累年以疾求退俾乃旧列往赴右铨益务检身以俟收
用

秉义郎合门看班祇候韦琳报班差错降一官

敕具官某朝仪尚肃宾赞尤严进退降登视以为节抗声失度时汝之辜爰削一阶以惩不恪
郭棣知泸州

敕掌殿岩之武卫夙着勤劳分边阃之顾忧兹烦镇抚睠予世将听我训词具官某稟资沈雄
驭下严整出临淮海尝当一面之权入总貔貅久护千庐之密北归故里既历累年惟时泸川
控彼蜀道靡有蛮夷之外侮何期蠹贼之内讟狂卒称兵衆无与者仇人假手天实诛之顾平
时谋师之甚艰岂今日择才之可後畴堪予选金曰汝谐尔其设方略以靖惊疑示寛大以安
反侧凶徒既殄无问胁从义士实多当行第赏绥爰有衆遂令境内之清坐折遐冲益致王灵
之畅伫闻嘉绩别议优恩

文州灵惠丰安侯加封嘉应

敕具某神朕成民而致力于神阴平去都城万里苟有利于民亦不汝遗也增以嘉名用答灵
贶尚其歆奉以惠远氓

文林郎保宁军节度推官赵善谦降一资放罢

敕具官某尔以宗子居大郡幕府不能自洁其身乃与胥徒共为奸利偿券焚历欲盖弥彰镌
黜示惩尚服寛典

文林郎宁国府司理盛将之降一资

敕具官某狱事至重岂容小差尔职其间乃尔失当谅其非故姑示薄惩

承信郎石璿父荣年九十五保义郎致仕

敕具官某父某比肆郊霈推老老之恩尔年登九龄子为命士授之武爵以为晚岁之华

兴化军莆田县顺济庙灵惠昭应崇福善利夫人封灵惠妃

敕明神之祠率加以爵妇人之爵莫及于妃倘非灵响之着闻岂得恩荣之特异具某神壺彝素飭庙食愈彰居白湖而镇鲸海之滨服朱衣而护鸡林之使舟车所至香火日严告赐便蕃既极小君之宠祷祈昭答遂超侯国之封仍灵惠之旧称示褒崇之新渥其祇朕命益利吾民

朝请郎张抑系舒光举主降两官

敕具官某人之难知旧矣尔持江东使者节以池阳郡博士为贤而举之閱岁已久乃以贿闻比申举将之罚惟尔在哀疚而未及既除丧矣其上二秩毋忘省循遥郡刺史知和州某依旧武功大夫祁州团练使

敕具官某将门出将其说古矣绍兴以来名将之後人才不乏鲜有以将略世其家者尔起自西陲属鞬九陞顷由选择出守山阳虽边尘不惊智勇无以自见而首尾五载固圉有劳徒之大邦陞以遥圉之秩朕之知汝深矣勉趋功名毋忝尔祖

寄资训武郎韩果转归吏部在京宫观

敕具官某服役禁庭屡更岁龠恪勤厥职式闵其劳禄以内祠秩之吏选尚钦朕命以善尔躬

文林郎监泰州盐仓周大老降两资放罢

敕具官某盐策之盛莫如海陵积弊之深亦非一日今帑中之藏至失十万百发吏奸汝之职也详究始末失职已多而又不能自别于賁贷之嫌再镌厥官归务循省

朝奉郎知湖州乌程县赵彦卫为乡民诉水伤拥并死损八人降一官

敕具官某尔试邑辅郡能声彻闻秋潦为灾诉者辐凑老羸蹂躪至有死伤虽非关防所及咎将谁归其上一阶服我寬典

嘉王府讲尚书彻章官属诸色祇应人各转一官资

内知客修武郎谯令雍秉义郎戴勲

敕具官某贤王务学讲席彻章惟此百篇之书坐閱八年之久凡预职守咸进官聯尔起于诸

生班在上合祗事朱邸见谓恪恭涣恩所加勿谓故事尚勉思所以称此者哉

使臣忠翊郎姜文用孙昌祖忠翊郎姚思正保义郎董政中徐松成允显高珂指挥使从义郎冯涇王良讲堂使臣秉义郎蒋巨卿张克家讲堂书写文字进武校尉张桔承受所手分承信郎舒良嗣承受下主管文字忠翊郎遼兴祖客司成忠郎傅宣世前都监训武郎朱思正医官成全大夫陈世安翰林医候李之美成全郎陈翊

敕具官某等王邸谈经閱岁滋久凡曰执事咸进厥官往其钦承益务恪恭

秉义郎杨忠辅换太史局丞权同知算造

敕具官某周之冯相氏保章氏皆以中士为之星历之学为士者可不务乎尔邃于历彻于朕听因其所长俾贰局事推步日月星辰之行以称朕钦天授时之意尔尚勉哉

殿前指挥使行门长行左班杨坦刘选李端邢敞沈明黄毅杜桩吴珪蔡显右班王佐边宁李钧孙彬陈琚曹涣王浹黄义陈圭换武翼郎添差诸州驻泊兵马都监

敕具官某等行在所猛士如林又择其雄毅之尤者列在入门为予爪牙历岁既久亲閱挽强之技超授武爵护戒方州锡之袍带以宠尔行毋忘卫上之忠益习近民之事尚勉之哉

殿前指挥使守阙行门长行左班许坦聂荣明泽孙伸右班盛俊吴佾郭锡换从义郎

敕具官某尔等以拳勇选密侍宸居有年于兹矣亲试其艺视高下而赋之爵尚勉之哉毋怠于事

神骑嵌补副指挥使姜胜换秉义郎宣武嵌补指挥使徐成换从义郎天武下名副指挥使吕俊换修武郎

敕具官某尔等早以武勇备予羽卫閱岁既久而挽强之力不衰授爵有差往亲民事益务忠恪以称所蒙

赵介循从事郎

敕具官某尔以刀笔为册府之吏周旋四库其职清矣又以奏篇之赏疊进资级其思所以称此者哉

入内内侍省都知邓从训转履正大夫依前奉国军承宣使余如故

敕总禁廷之务久矣宣劳居横列之班兹焉进秩具官某持身克谨遇事惟勤出入宫闱习见

累朝之故实侵寻岁月兼提衆职之纲条爰因酒正之修更陟武阶之峻勿云近北思称优恩

萧鹓巴奏孙秉义郎存德乞将磨勘转官回授母淑人耶律氏封郡夫人

敕命妇之封率从于夫爵小君之号兹越于邦彝某人早嫔名将之家同慕中华之义两朝示宠名已着于鳩桑一子貤恩荣特颁于鸾诰往服朕命益宜尔家

朝奉大夫钱之望奉使回程转一官

敕具官某北遣使华往修邻好闻其扶疾虑有阙事见大夫非无可使恐不及期以尔志存许国才足应变辍自边阃俾将予指闻命引道礼成来归进之一秩姑以劳还俟讫外庸嗣有褒擢

武翼大夫杨大节奉使回程转官

敕具官某朕岁遣使华往修邻好必选上介以辅其行尔以扈卫之臣为行人之副中途易节调护无亏惟尔之能应予之赏俾增命秩其尚钦承

奉使官属文林郎陈元震从事郎谯令宪迪功郎钱廷玉忠训郎郤师孟忠翊郎黄允迪训武郎李邦安忠郎郎杨祖烈吴良弼赵进承节郎张达符溥从义郎何洵保义郎金彦达进武副尉王冲各转一官

敕具官某岁遣信使修好邻邦凡为假吏之行举有优恩之及用酬劳勩毋替忠勤

武功大夫和州防御使殿副都指挥使部杲落阶官

敕总千庐之卫久护戎昭颁一札之恩用申褒律具官某器资沈鸷谋略雄深饬边备于上游坐销外侮肃军容于中壘允藉壮犹朕慨宿将之无多眷故家之可用繄尔昆弟为予爪牙兹彻武阶俾专使领庸示等威之峻式昭名器之公其服恩荣尚图忠报

合门祗候训武郎李彦机从义郎李删秉义郎杨应龙应奉人使到阙一十番各转一官

敕具官某等信使来庭掌在上合宾赞之职不容毫厘之差祗事累年积劳可赏进之一秩益务恪恭

从事郎成州天水县令韩廷圭降两资

敕具官某边臣无小大皆以忠实为先尔以逸囚受罚矣而又为欺浚削一阶用戒来者

皇叔祖士岷男太子右监门率府率不?转一官

敕具官某国家以十阶待近属必十载而後一进其选所以将之者何如耳顷罢吏议亦既累年察之盖详爱宠其子躡等而进虽曰近比实惟异恩

忠翊郎李孝纯落阶官合门宣赞舍人

敕具官某尔以名将诸孙中宫兄子不患不致富贵顾所以将之者何如耳顷罢吏议亦既累年察之盖详克自循省宾赞之职用以命汝念之哉知复玷缺之艰难则知所以保其身矣

故责按安远军节度行军司马詹仪之追复中大夫

敕具官某朝廷念广西盐策之弊因尔建议使行其言非徒无益而又害之尔既知其不可而不能自己何也解弦更张事始少定褫官置散以谢远民而尔亦亡矣尔岂欲害民者徒以昧于不远复之义而致此亮其本心追复旧秩能体此意尚为有知

大中大夫参知政事胡晋臣提举修寿皇会要并礼仪使转一官

敕朕寅绍丕图推尊慈极纂修帝制尤严于五载之余登奉宝储遂全此一主之法惟时近弼兼总宏模矧相礼以备成岂畴庸之可後具官某该通而知务端静而善谋顷上禁途居然有公转之望迨升宥府足以致朝廷之尊俾参预于政机益茂明于国体缉成大典允藉宗工诞举辇仪更资使范以侈重华之盛以彰叠矩之传爰序进于崇阶尚勉从于逊牒增培采会仍衍真畚噫铺张闳休实赞我显亲之志奉行故事尚坚而致主之心往服训辞以绥宠渥

从事郎赵彦适收使射中减磨勘循一资

敕具官某国家选士于廷又命以射尔以宗支之秀既擢儒科能游于艺且应赏格何爱一阶以示劝奨从事郎王尧佐前任复州司理载铁钱入铜钱界算请盐钞降一资

敕具官某冒利犯禁齐民则有之尔为狱掾乃敢以身而试法稍镌命秩犹为寛恩

朝请郎尉闻诗前知永康军拖欠纲运降两官

敕具官某朕崇俭示朴未尝加赋于郡邑然军饷则不容缺也永康虽小赋入有度及尔为之阙供甚矣镌去二秩以励其余而犹不夺尔合江之符以不得罪于民也其务足用勿以惩羹而取盈焉

朝散大夫知明州高夔为提刑陈倚申厉雄公事不自陈避嫌降一官与边郡

敕具官某尔以选择屡典大藩四明富民之讼使能俟属邑之公行听宪台之移狱则晏然无事矣部使者谓尔不能引嫌疑有未尽镌官一等易地边方汝往哉其思有以静镇之

朝散郎国子博士徐堯上殿坠笏降一官

敕具官某尔以老书生献箴于朝此意勤矣朝仪贵肃乃尔失度虽欲宥过不应但已稍镌命秩矣傲廷绅寄资右武大夫遥郡团练使符淦降两官放罢

敕洒扫是职专务尽恭过愆有闻岂应从恕具官某久以勤敏祇事禁严当克谨于官箴乃自貽于罪罟命镌横列尚畀遥团罢归铨部之班显示貂璫之戒

内侍高品李元美降忠翊郎放罢

敕具官某禁廷贵肃三尺尤严尔职其间而越法度削官二等尚为宽恩

合门祇候潘璘落看班

敕具官某尔祇事听朝再更岁龠稽之故实盍正官称益务恪恭毋怠于久

皇后亲嫂硕人许氏特封郡夫人

敕命妇之封盖从于夫爵小君之号兹出于上恩故某官妻许氏蚤嫔将家今为后族廉车既往莫谐偕老之宜戚閤方兴实号懿亲之长属褱之之归谒分石窀以疏封尚惟治度之循以对宠光之渥

直敷文阁史弥正为高夔奏厉雄公事落职罢宫观

敕具官某尔奉祠就养宜无预于公府知笃葭莩之好而忘瓜李之嫌事发相重遂彻朕听收还延阁之直仍罢祠宫之官尚其省循予不汝弃

侍御史林大中直宝文阁知宁国府

敕具官某朕惟天子耳目之官与夫言语侍从之臣皆极天下选岂应轻去然进退之际君子之大致存焉朕亦欲有以全之尔以清德雅望周旋三院有年矣忧国之忠匪躬之节论事有体义形于色台纲斯振物论洽然擢贰铨衡所冀献纳之益而抗章自列引义不回宣城大邦实慈皇初潜之地寓直宝奎以宠尔行牧御之方无俟多训勿以在外而忘告犹政成来归副我虚伫

知漳州邓驿江东提刑

敕具官某入而居献替之选出而任澄按之寄皆朕耳目之官也以尔端靖有守雅望甚休擢在谏垣出镇南服江左祥刑之重肆以命汝岂惟引以寢近为尔之宠抑使列城之人知朝廷垂意臬事至遣谏官以临之书不云乎好生之德洽于民心朕将庶几焉

知庐州许及之大理少卿

敕具官某朕承累世仁厚之余虽罔敢兼于庶狱而明罚敕法求惟厥中乃者播告之修孚于中外矣尔以谏省之旧知予德意而明敏详练无施不宜召自边阃用为廷尉之贰昔张释之使天下无冤民于定国为之民自以为不冤汝往哉其为朕持天下之平且以行汝学道爱人之志

大理评事李珣再任

敕具官某廷尉之属非明于文法不以轻授非迟以岁月不能贯通也尔以名家子庀职既久以其自列爰俾因任尚图来效勿替厥初

故太傅富察久安女硕人乞用父遗表恩泽封郡夫人

敕命妇之封盖从于夫爵小君之号兹出于君恩某官女硕人富察氏生长北方来归王国谓父兄即世惟一身之仅存而恩渥自天曾累岁而未请乃叩九阍之邃愿加列郡之称亮其忱衷矧有近比特疏予宠用慰尔心

忠训郎兴州游奕军权统领常崇转一官

敕具官某朕周知中外将士之才间使来前用阅其实不以远近为间也尔来自西陲人物可采何爱一秩以宠尔归益习戎韬以俟有用

殿前司神勇军统制训武郎刘肇步军司左统制修武郎姚旦总辖牧放倒弊数少各转一官

敕具官某等岁分遣诸军牧于淞右宽闲之乡惟统御有方刍秣以时归而阅实生全者衆进之一秩以为来者之劝

高夔知庐州

敕具官某尔顷守合肥尝移之内郡旋守四明又易以边方乃自制司复分帅阃盖以尔习熟淮甸有志事功故因以迁焉内有以固吾圉外有以宣王灵尔尚勉之哉

朝奉大夫新知昌州程仲虎为亏发官钱降一官与闲慢差遣

敕具官某朕崇俭示朴未尝加赋于郡邑然军饷则不容缺也广安虽小赋入有度及尔为之阙供甚矣姑镌一秩以为罢软之戒

皇弟右监门卫大将军某州刺史多能多助收使父居中遗奏各转遥郡团练使

敕具官某等朕亲睦九族务从优恩而十阶之进则谨守旧制未尝私也以尔父尝建节旄不及中壽遗奏之泽未请于朝俾尔昆弟俱领遥团之任朕之于尔厚矣尚惟恪恭以绥宠禄

林?合门舍人

敕具官某尔以武科首选庀职上合有年矣銜恤告归免丧入见俾还旧班益务恭恪

中大夫知宁国府蒋继周磨勘转官

敕拥千里之麾方着民庸之茂考三载之绩尚伸吏课之公具官某被眷慈皇进班言路以中执法之旧为东诸侯之尊政最有闻尚有稽于褒表封章来上何屡请于归休兹以年劳应于铨法爰峻文阶之秩遂登从橐之班大异庶工往祇茂渥

知广州岳霖敷文阁待制致仕

敕师闾有严方任顾忧之寄囊封何遽来腾告老之章惊尔疾之寢深抚予衷而甚戚具官某秉心端亮遇事详明少历艰勤养成畏谨之性晚更事任率有循良之称念方虎之旧勲擢金吾之近侍一辞轩陛洊閱岁时起分岭表之麾俄感漳滨之疾宦游南海曾无暖席之淹次对西清用示挂冠之宠尚期自厚以冀有瘳

岳霖赠四官

敕挂冠有请方联次对之班易箠可哀宜厚饰终之典云胡弗淑而至于斯具官某出自勲门动遵土检揽轡登车之寄夙着贤劳簪笔持橐之除实由亲擢分五羊而作牧拥驷马以启行何恙之深此生遂已念世臣之无几怆长夜之不晨忍闻垂絕之言宁爱不赙之宠躡四阶而进秩按三尺以疏恩用大尔家庶将予意

知赣州赵彦操知广州

敕具官某尔顷为列卿摄民曹领京邑以才謂称今二十年矣屡试剧郡政最卓然南海巨屏实控百粤去朝廷远委任尤重章贡壤地相接不惟通知风俗之宜南方亦久闻尔之名矣举以命尔其为朕绥编氓抚蛮蜚使岭海之间不异畿甸庶有以副朕不忘远之意知静江府赵思集英殿修撰提举江州太平兴国宫

敕具官某朕择才而用谋帅尤艰广右去朝廷远二十五州绵地甚广尔以甘泉旧臣起家作牧而两载之间内外晏然治行可覩矣方图尔功而以疾谗丐闲甚力何耶均逸祠庭遂尔赋归之志陞华论譔示予笃旧之恩尚勉壮犹毋忘忠报

攻媿集卷三十四

卷三十五

钦定四库全书

攻媿集卷三十五

宋 楼钥 撰

外制

给事中尤袤礼部尚书

敕官建仪曹俾司礼乐制作之事职专宗伯当用朝廷老成之人阅一时侍从之臣极三朝髦俊之选求之公论金曰汝谐具官某学极羣书才兼数器被眷知于慈宸参寮案于储宫出入累年始终一节禁路论思之益有衆人之所难琐闼封驳之章至三进而未已积兹德望处以文昌职务惟清实总夷夔之任谋猷可告尚殚积契之忠

中书舍人黄裳给事中

敕朕惟舜命龙出纳朕命而名官以纳言盖人君之命不难于出而望其能纳也琐闼之职为朝廷喉衿古谊昭然尤当遴择具官某天资直谅学力粹深处之王邸则有讲导之益擢之词掖则推润色之工是用授尔以封驳之任非以序而迁也事有不可尔则尽言言而可从朕不吝改惟能知舜所以名官之意则能体朕所以命尔者矣

太常丞章颖军器少监

敕具官某尔以伦魁之彦【伦魁见汉书扬雄传是集屡用之一本改伦为抡非】端谅有闻进丞容台预职史笔王邸讲诵之益天官铨综之公惟时名流兼此数器俾贰戎监是曰序迁萃之象曰除戎器戒不虞此亦急务尚勉之哉

吏部员外郎汪义端监察御史

敕具官某朕选任台端增置谏列惟六察之分职非一人之可为泛观在廷识擢自我以尔早先衆俊屡试长才风仪凜然有御史之望声誉籍甚乃故臣之家俾践世家往赞而长屡更剧郡尚何学邑之拘辍自名曹庸示简僚之重其祇朕命往振台纲

右正言胡琢左司谏

敕具官某朕擢卿谏省亦既再岁端靖有守论事加详盖闻古者有争臣七人尔独贤劳念之

久矣增置諫列俾正左虛之位其益究乃心暨乃僚相与补拾阙遗以辅不逮俾朕导諫之风有闻于世亦惟休哉

监察御史何异右正言

敕具官某台谋之选俱为甚重而职务自有不同台臣当纠官邪而諫省专裨主阙尔为六察亦既年余屡进封章凛有风采今予授以拾遗之职滋向用矣以戢豸之风尽造?之益则朕有所言之美而尔亦无愧于古争臣矣

大理评事王补之大理寺丞

敕具官某尔家传文法久任廷评遂为同列之首贤劳着矣丞贰之职命尔迁焉罪宜惟轻絜古之训移情就法尚戒于兹

宝文阁直学士程大昌龙图阁直学士提举南京鸿庆宫

敕朕收揽羣才缅怀耆德矧东宫宾友之旧游从琳琅之游冠西清学士之班爰峻河图之直具官某才高而能下气劲而用冲幼学壮行曾不渝于一节出藩入从实有闻于三朝退食自如着书不辍仰天观象穷羲经八卦之文画地成图洞禹贡九州之域兹继廩人之粟益高延阁之名故国有世臣尚赖典刑之重乃心在王室毋忘猷告之忠

皇伯嗣秀王伯圭故妻秦国夫人宋氏追封两国夫人

敕伯父行尊已极三公之贵夫人德配盍疏二国之封虽不逮于生荣顾可稽於恤典具封某起由戚閤归我宗英动惟图史之遵居有珩璜之饰少同甘苦能与家人而忘贫晚被宠光固宜君子之偕老云胡不淑弗永其年赐汤沐之大邦既屡颁于翟芾兼公侯之两社爰特畀于蜜章【蜜本诸晋书山涛传所云云蜜印是集屡用之一本讹蜜为密或改作宸亦非】以伸伉俪之情以厚幽冥之渥尚惟精爽式克钦承御史台检法官李谦太常丞主簿彭龟年司农寺丞【元系林大中辟差大中与郡张叔椿再辟辞免】

敕具官某等尔谦笃信好学表里无玷尔龟年刚毅近仁气节有闻又皆忧深思远有拳拳爱君之心御史选也大中之辟叔椿之留岂其私哉而引义慨然若不可一朝居者朕既不汝舍而高爵非所以留之也容台农扈分以命汝丞哉丞哉其少安之以俟选择

都官员外郎赵谧尸部员外郎主管左曹

敕具官某尔祖父以直道佐中兴配飨高庙子孙苟在仕版以次拔用今位于朝惟尔一人外奏筠阳之课内为秋官之属恂恂自守尚有家风迁置毋民毋懈于位

赵思璘知德庆府

敕具官某海康虽远以高庙潜藩而增重选侯亦不轻也尔以宗支之秀资历寔高往抚是邦毋忽民事都大提点坑冶铸钱耿延年两浙转运判官

敕具官某部使者分行诸道在外则锤官总货泉之重在内则畿漕任飞挽之繁皆遴选也尔长於心计敷历已深新安之政兴仆植僵彻于予听鼓铸以佐用度又优为之计台虚位亟以命汝或遄其归以副朕为官择人之意

陈扬善知光州

敕具官某浮光旧为内郡今实竝边牧民之任不轻畀也以尔尝守辅邦见称办治自去郎省家食有年兹庸授以左符往临边徼抚民以宽处事以静其庶几乎古之折冲者矣

知湖州赵不迹都大提点坑冶铸钱

敕具官某尔秀出宗支以才自奋三试剧郡办治有闻惟时锤官究山泽之利兴鼓铸之饶以佐国用非心计优长风力强敏之士不足以当之辍自吴兴俾趋台治检柅吏奸导疏利源匪急匪徐惟正之供则尔之职举矣

知平江府沈揆司农卿

敕具官某朕临御丕图求贤如渴储闈寮案选用无遗盖举予所知非止笃旧故之恩也尔以儒学奋身周旋清贯词藻之发追配前良肆朕纂承之初最先收召出守剧郡试之益详矣汉二千石有治理效公卿缺则选诸所表朱邑由北海入为大司农则其事矣朕之待汝岂惟掌周稷之事哉往祇厥官嗣有褒陟

吕大麟知常德府

敕具官某本朝衣冠之族爵位相望文献不坠未有盛吕氏者也至于今日仕者寢寡慨然念之起尔于家以尔素守家法好学不衰宰郡有循良之称在朝谨靖共之守去国既久退然自安武陵湖右奥区外控五溪之徼思得贤牧以抚安之故举以命尔尔尚勉哉能大其家则为报国

左丞相留正初除少保封赠

曾祖赠太师耀卿追封英国公

敕朕任贤甚专虚已以听累奏篇之赏盍膺八命之崇览逊牒之勤始进三孤之重乃循故事

加賁曾門具官某生為善人世載隱德傳芳中古由王國大夫之有聞席慶華宗去清源節度之未遠惟躬行無媿于幽顯故家聲大啓于孫曾是生名儒致位上宰閱書屢錫已登極品之官公社肇開爰胙真陽之土尚惟精爽歆此寵靈

曾祖母周國夫人藥氏贈周國夫人

敕士有奮身而仕至元臣推恩而爵及曾祖嘗迹所自必有其源豈惟奕世之賢仍多中饋之助夫或加寵婦則從之具封某以柔淑之資嫔儒素之族積功累行雖有良人之賢處順安時宜偕君子之老比及後裔是生上台封既至于小君寵仍疏于大國不改周南之舊用配留侯之祧其祇異恩以利後嗣

祖贈太師沂國公寔追封福國公

敕德雖着州鄉而弗顯于朝廷身不及富貴而乃施乎孫子此古人敢以自必而天報昭然不誣我有宗工恩逮顯祖具官某坦坦幽人之履恂恂長者之風惟先世以來有功于國故余慶所及遂肥其家果見聞孫進登孤保屢頒霈澤貴極師垣乃更沂水之舊封仍祚閩山之鄉國九京未泯百世不忘

祖母楚國夫人洪氏贈商國夫人

敕婦道之修相夫以順家法之懿至孫而興雖寵榮不及乎生前而恩渥屢加於身後具封某以幽閑之操崇節儉之風夫婦俱賢蓋非一日之積室家流慶遂見百年之余賜湯邑于南荆易封圻于上洛以顯漏泉之澤以慰含飴之思

父贈太師衛國公誥追封魏國公

敕朕惟東周大夫留氏號稱世賢子國子嗟之父也俱不見用詩人惜之此丘中有麻所由作也朕之用賢則異於是具官某世有潛德生為醇儒雖富貴不在其身而善慶乃積于後惟我碩輔秉國之鈞尊顯其親貴極人臣斯教忠之效也既胙武公之土復更畢萬之封父子之賢于是俱顯視東周之留為盛矣死而不忘其尚知歆

前母燕國夫人鄭氏贈齊國夫人母秦國夫人劉氏贈魏國夫人

敕婦爵從夫已極小君之號母貴以子游更大國之封具封某迪德靜專處家約素相夫以禮躬孟光舉案之勤教子能賢慕軻母擇鄰之訓相夫初政致位上台秩既進于三孤貴遂登于累葉表茲闕范用配祔宮改北國之舊圻畀東藩之新邑【劉氏改四塞之舊邦畀大名之新邑】申加閱冊增賁宗祧

故妻魏國夫人徐氏贈秦國夫人

敕朕宠任大臣躋荣孤保爵既加于祖祢恩又及其闺门具封某生有令姿居循内则知巨源之识度相敬如宾勉仲卿以激卬及见其贵虽隔幽明之际仍深伉俪之情夏篆通牖显汉相元勲之重鱼轩象服开秦川大国之封九泉有知千载无憾

大理卿王善之直龙图阁知平江府

敕具官某吴门地大物阜隐然东南一都会也尔生长浙右固已习知其风俗又尝持节临之声闻蔼然至今未忘矧明练宪章饰以儒术再长廷尉滋向用矣抗章求外自诡治民为尔相攸无踰於此畧以義图之直用宠尔行岂惟不减昔人昼锦之荣吏民闻之不戒以孚足以寬吾顾忧矣

浙东提刑陈倚大大理卿

敕具官某国家以臬事付廷尉而立制视古为祥治狱者无踰于定法断刑者不使之鞫囚而卿实总之选顾不重哉尔习于宪章而持心近厚由廷评而上至于为长践有年矣綰建宁之符持浙东之节又皆有称焉肆畴已试还尔旧物囹圄屡空病未能也尔能尽心使刑狱号为平则庶几乎古矣

知雅州宋南强知金州

敕具官某金城外控边陲内连巴蜀有民有兵号为价藩延藩之余正须长才以任郡寄择人于内岂曰无之临遣而行虑不及事畴咨西南之守就以迁焉以尔有志事功敏於从事其解蒙山之组往抚汉阴之民此而有闻朕将用汝

木待问知湖州

敕具官某儒科首选宦达相望储禁旧僚收用略尽慈皇初开南省尔则为多士之先冲人顷居东宫尔则任端尹之寄而十年以来欲仕辄已朕尝念之惟近臣为明当途之诬浮议遂定吴兴剧郡视古左冯衆所惮为举以试汝勿以多言为畏倚需最课之闻高爵美官岂于汝吝

费培大理评事

敕具官某李官选属必先试以文法然对有司之问者易为工察庶狱之情者难于尽尔为廷评其以昔之所习见于详讞之际遇事加勉增益其所未至不倦以终之则为称职

福建提刑辛弃疾太府卿

敕具官某尔蚤以才智受知慈宸盘根错节不劳余刃中更闲退以老其才养迈往之气日趋于平晦精察之明务归於恕朕则得今日之用焉召从闽部长我外府夫气愈养则全明愈晦

则光于以见之事功孰能御之哉

顏师古知泉州

敕均佚真祠遂彭泽赋归之志起临旧镇慰颍川愿借之心匪曰朕私徒得君重既去家之不远俾便道以有行具官某学慕儒先朝推寿俊慨孔戣之去命典外藩念阳城之劳许归故里而远眈怀其惠政贾胡服其真清攀辕莫留垂涕相踵此诚心之所感非人力之能为既彻听闻重增嘉叹方遴选惟良之守要在求已试之才追常袞之遗风当一变于闽俗用蔡襄之故事宜再领于泉麾式遄其驱以副所望

新宁国府林大中知赣州

敕具官某章贡居江右上流控楚粤之要民俗果悍可以义服不可以力胜也非清德雅量练达世务者不在师帅之选尔以不羣之资为有用之学治县如古循吏入朝为才御史弹劾不避於权要论议率中于事机横榻之风振于一时朕既分尔以宛陵之符念其家食易镇兹地先声所临百吏望风抚予南邦以宽忧顾朕岂汝忘哉

广东转运判官黄抡再任

敕具官某朕分遣谏官御史使行诸道以廉察列郡之吏知予德意多称其职尔以端谅之资选在谏省去国未几使于峽南善最有闻俾之因任既以慰斯民愿借留之意又以见朝廷不忘远之仁母替厥初嗣有褒宠

宫人王安安转郡夫人

敕朕谨乃俭德固无渔色之私选于後宫亦若审官之遴宫人某稟资婉孌祇事静专被樛木之恩蚤预内廷之御承小星之惠躋升名郡之封其益习于壺彝庶克绥于宠数

直龙图阁知赣州杨万里秘阁修撰提举隆兴府玉龙万寿宫

敕具官某朝廷之於贤者用而尽其才上也用未尽其才而勇退宠其归而全其高次也上焉者朕之本心次焉者非得已也尔以清节雅道冠冕一时高文大篇追配古作出入中外闻望日休计台丐归俾守章贡古郡卧治庶以优贤抗章自列欲留不可畀真祠之佚升论撰之华诗不云乎虽无老成人尚有典刑朕不汝忘也

秘书丞陈损之淮东提举

敕具官某常平使者之任重矣淮东盐筴甲天下视他路尤重货泉所聚出入万计调度低昂在一路部使者事又重焉尔起西蜀慨然有志于当世通练閫敏遇事风生周旋清涂久摄宰

掾弥纶省闕备着贤劳视其官可以知其才矣顷护使客往来淮堧归论利病如示诸掌兹因求外选而用汝勉哉思所以称任使之意起居舍人陈傅良经进寿皇圣政转一官

敕具官某朕惟寿皇在御务行圣人之政二十有八年传祚菲躬惧弗克堪既以申飭史臣谨以事繫日之书又掇其大端可以为法于万世者别为一经追俪二典真我家之盛事也尔以一代名儒晚登郎省亲擢道山付史史事奏篇来上奉之慈极从容进读冠佩俨然兹焉论赏盍先於衆命增一秩以示儒者之荣尚惟钦哉浙东提举陈杞本路提刑淮东提举卫经浙东提举

敕具官某等浙东部刺史萃于会稽密迹行都视他部为重杞以办治之才为常平使者就畀臬事任益高矣泾以伦魁之彦领淮甸盐策改授籓节地益近矣其各扬乃职使刑罚无冤公私兼足以副朕抡选之意武翼郎左翼军统制韩俊供职满十年转一官【修武郎马军行司选锋军统制李郁同】

敕其官某尔出自禁旅护戎泉南【李郁改陪都】既历十年内外靖谧虽功名无事以自见贤劳着矣俾循故实序进两阶益习韬铃以俟选用

参知政事胡晋臣知枢密院事

敕朕纂承丕绪图任旧人一日二日万几之?勤于裨赞三军五兵之本兹益厚于倚毗乃播纶言式彰枋用具官某气全刚大识造精微以端靖结慈皇之知以忠纯为初政之辅同心同德人孰知房杜之功嘉谋嘉猷日惟陈尧舜之道居宜镇于雅俗动有助于沈机察其所安任以不贰矧一登于政地凡三入于枢廷谅宪度之愈明畀事权而增重噫予欲务孝宣之周密以起治功尔其慕子房之从容用符眷意顾惟宿望奚俟多辞

同知枢密院事陈騏参知政事

敕赞本兵于右府方藉壮猷图共政于迕聯尤资宿望我有明命告于具寮具官某学探圣源才周世务立朝謇谔素为君子之儒处事精详居有大臣之体升之常伯擢在机廷陈告后之谋猷简而甚切赞基命之宥密静以无譁雅量镇浮不改其度正身率下敢干以私曾不俟于期年俾进陪于大政国以永赖人无异词噫谟明弼谐朕有望股肱之助任重道远尔其推腹心之忠永孚于休以副所属

吏部尚书赵汝愚同知枢密院事

敕西汉以同姓疏封不在公卿之位东平以至亲辅政厥山声望之隆惟我本朝尤厚皇族始则优加禄爵曾弗仕于外廷後虽竝用亲贤亦无踰于法从兹开宥府盖得宗英具官某????出天潢望高国器早随寒隼首冠于儒科出任藩宣久临于蜀郡侍经帝幄选士贡闈皆故事之所无在尔身而兼备爰以枢机之寄托之肺腑之亲必有若人乃堪大任匪固私于异渥将深

慰于公言噫开国以来未有今日非常之举本兵至重当展平生有用之才以增磐石之光以壮维城之势

刑部郎中沈枢度支郎中

敕具官某尔生长相门明习文法为郎宪部恪守三尺司度之职凡军国之用会其入出以周知经费之数欲得清谨之士为之故以尔迁焉勿以郎潜为淹思所以称其职者

太府寺丞沈作宾刑部郎官

敕具官某郎官必由宰郡而除宪部惟以明法而授行之旧矣尔出名阀通习宪章久历廷尉之属宜在兹选向守丹丘曾不煖席而去郡之曰遮道借留其必有以得此者再入修门养资外府而後迁焉朕之用尔审矣惟尽乃心以称斯举

右司员外郎应孟明左司吏部员外郎徐谊右司

敕具官某等宰掾非他官比也调护关决皆天下事非有才识可以为守常应变之助者畴克为之尔孟明介然有守练达民事尔谊能为可用通贯治体一以序迁一以选授朕方委政于二三大臣惟尔分任其劳使大臣得以纲纪庶务助朕求贤以起治功岂小补之哉度支员外郎王厚之直祕阁两浙路转运判官

敕具官某朕惟转运之任莫重于畿内祇承慈训率用士人比年以来多称其职尔庠粹诸生故家人物好古博雅风裁素高克勤小物而知大体领使淮西声望籍甚为郎名曹侃然有守还畀道山之直兼按浙河之闲飞挽以时而用不乏调度有经而民不病表率诸道尚其勉哉

监都进奏院朱致民大理司直

敕具官某诗云彼其之子邦之司直国家明谨用刑遂以名李官之属近复定制审阅奏当尤不可以轻授也尔以儒学自奋而宰邑丞郡循良有称入班于朝靖共尔位选以命汝往哉惟钦

司农寺丞彭龟年祕书郎

敕具官某朝列多士皆以贤选虽不以日月为功要必使宿其业尔丞大农属耳兹又命典中祕书朕不以为烦人亦无得而言以尔之才望有以当此也道山羣玉之府涵养天下英才异时台阁高选于此乎取何止读未见之书而已哉

中书门下省检正杨经太府卿四川总领湖北转运副使张抑太府少卿湖广总领

敕具官某等国家东巡吴会宿兵楚蜀示天下以形势给饷之任必选王人居之尔经奋身西南老成详练枢属宰掾裨助为多问以蜀事了辩如响是用使尔于蜀尔抑起自故家见闻殚洽屡持使节所至可纪荆湖风土尤所谙历是用使尔于楚宠以外府长贰之任将命以行尔二人皆儒士其有以适缓急之宜无乏兴无病民使上下百城不扰而兼足相安而有恃则朕之顾忧可宽矣

新知湖州木待问改知婺州

敕具官某浙河以西吴兴为辅藩浙河以东婺女为名郡视邦选侯委任惟均尔少为举首声振东南从吾春宫徧历寮案今投闲之既久命起家而作牧引嫌自列易地为宜是行也非惟不使汝远去畿甸苟尽心焉课最易闻公论自此而定则朕之眷汝人无闲言矣宣教郎史弥廓系秀王孙女夫转一官

敕具官某尔以师臣之子娶秀邸之孙不习贵骄能勉家学推恩尔室遂进以官往其钦承益务修进

朝奉郎给事中黄裳朝散大夫权工部侍郎谢深甫磨勘转官

敕严吏铨之课所以示百寮之公优法从之朕犹不忘三载之考具官某再登朝著亟上禁途朱邸横经久藉讲磨之益琐闼批敕尤高论駁之风【谢深甫云翱翔朝著密勿禁途三辅政清久资于弹压贰卿任重允赖於论思】兹以年劳应於治典爰陟文阶之等寢陞官簿之华其服恩荣尚殚猷告

张允中该修玉牒循从事郎

敕具官某慈皇宝牒之成一代之钜典也尔为胥吏预有勤劳既登仕版并进二阶

知秀州赵充夫改知湖州

敕具官某尔守临汀政最彻闻擢之嘉兴尤号办治理财则不扰而集御史则不恶而严民甚安之湖在近辅最剧就以畀汝近岁皇族人才辈出尔宜在政事之科益勉所长为诸郡率朕将有以表异之

太学正顔棫知常州无锡县吴猎潭州教授项安世召试竝除祕书省正字

敕具官某等国家开馆阁以待天下士若必循次而进非所以示招延之广也博采公言取以数路尔棫由舍法官学省尔猎方宰壮县尔安世客授湖南一闻其贤俱命给札前此殆未有也指陈时务蔚然可称登之册府遂列英躔岂惟养有用之才抑以为多士之劝庶几岩穴之彦亦将乐从吾游焉

户部员外郎赵谧陞郎中

敕具官某近岁郎选日重非外庸之着不在此选非资历之深犹置员外尔以名臣之孙更践兰省积其吏考就正厥名官簿寢高益思加勉

苏大任太学正

敕具官某眉山苏氏文献相望尔雅派别以学自奋朕览荐牒召寘学馆得天下英才而教育之何乐如此益勤教事勉继前良

赵不遯知西外宗正事

敕具官某国家宗支日盛散处郡国而温陵长乐犹循南西二京之旧各有司存以尔行尊而性淑奋由儒科练达政事往其主盟纠合吾族抚摩孤弱而使之得所教孝秀以率其不良振振麟趾之风庶有望焉

江东提举黄黼户部郎中主管右曹

敕具官某聚天下贤士列之朝行必更外庸而後收用非惟欲重郎选亦以详试人才亨途由是而荐之焉轻畀也以尔驰声胶庠资敏而练世故使行江右行部刺史之体召对便朝嘉其忠荅户曹动关民事号为剧烦往既乃心以副选擢之意

焕章阁学士知襄阳府张杓猷阁学士知建康府

敕凭熊轼于上游久资填抚之略畀麟符于重地尤藉保厘之方是为留龠之司增峻宝储之职具官某性资闇敏智识纵横乐父兄之贤源流有自登侍从之选敷历已深遇事敢言词锋甚厉临机辄断才刃有余辍自文昌出当方面果肃清于边徼务宣畅于王灵矧是秣陵实雄江左石城鍾阜六朝之风绩犹存大纛高牙先正之威名未远俾居连帅益振家声想具有于成谟顾何烦于多训

显谟阁待制知江宁府章森焕章阁直学士知兴元府

敕荆楚奥区无若江陵之重巴蜀外蔽实赖汉川之雄我有侍臣更此名镇峻增延阁之职用宠元戎之行具官某禀气冲和受材宏达早被知于慈宸亟登任于禁途司留龠于陪都既腾善最建高牙于南郡名殿上游眷炎刘始封之邦为元德必争之地【此称蜀汉昭烈帝之字宋时避庙讳故改作元】云屯万竈虎视三秦诵武侯出师之章谅其素志审汉将登坛之策勉乃壮图毋有遐心往只成命

王藺知江陵府

敕运魁柄于西枢尝赞幄中之画开帅藩于南纪兹分阃外之权惟任旧人式孚羣听具官某器资鲠挺智识开通世传许国之忠躬负济时之略明目张胆在朝廷无事不言聚精会神故君臣不胶而固辅予初政正位本兵机谋足以折千里之冲文武足以为万邦之宪退安祠馆寢閱岁华蜀道登天之难曲从私请荆州用武之要勉为朕行谅无俟驾之淹倚闻洗印之报噫比周家之分陕允属宗工据天塹之上游是为重镇尚体规恢之志岂惟填附之图

知兴元府宇文价知襄阳府

敕唐制以山南分东西二道西则汉中为巴蜀之扞蔽东则襄阳为荆郢之北门以是俱号重镇而控扼之要于今尤切谋帅其可轻乎具官某以学奋身世有名德寿皇眷知擢寘华近遂居文昌八座之选出镇汉中于今五年抚安军民帖帖无事襄阳易地委任惟均方时小康边鄙不耸轻裘缓带折冲樽俎以追羊祜之遗风不亦善乎

钱象祖吏部员外郎

敕具官某吏部之司七而右选最为剧曹涉笔终朝犹恐不逮非夫精敏详练之士不足以察吏奸而澄弊源也尔明习吏事饰以儒雅分符持节民庸茂焉为郎未几衔恤而归不俟造朝亟加选用静以制动要以御详汝知之矣尚其勉哉

将作监主簿李大异司农寺丞军器监主簿曾三聘太府寺丞

敕具官某等大农外府分领食货之重各设之丞以赞其长非才不授也尔大异强记洽闻处事有条尔三聘笃学厉操持论不苟簿正两监退然安之竝进厥官各任以事以才自见今其时矣

秦焞知严州

敕具官某尔生长大家少而颖悟力学进德誉者交口古括之政无愧循良严陵为高宗潜藩密迩行阙选而用汝详试其才益抚吾民以称朕意

吴宗旦知舒州

敕具官某龙舒在淮右为名郡士大夫以剖符为乐而朝廷必选才而後授之尔以学自奋明练宪章法家者流自以为不及也律身范俗清裁可纪家食寢久精力未愆往居专城绥靖淮服列卿之旧朕岂汝忘

榷货务监官修武郎陈仲坚董渊孙旸收趣增羨各转一官

敕具官某等摘山鬻海之利榷之以佐用度其数实广尔等协心奉法岁有赢贲何爱一官以

劝来者

新江西运副钱端忠改江东运副

敕具官某尔以王人给饷江淮才諝着称俾之将漕需次已久持节有行小疾来谗尤见廉靖为尔易地以遂其私辅养精神庸俟器使

干办审计司刘三杰将作监主簿王恬军器监主簿

敕具官某等尔等在太学为名流试剧邑为良吏以荐入朝岁月当迁分命以勾稽之职而处三杰于大匠恬于戎监职清而务简益养贤望以俟甄拔

江西路转运判官林湜吏部郎官

敕具官某尚书郎为当今妙选朝行虽有名士必更外庸而後授之尔尝戢豸冠凛有风采按刑浙东将漕江右久摄帅阃所至有称赐环而归敷奏详雅资望高矣然犹处之小选所以重铨综之任也其究乃心以赞而长

攻媿集卷三十五

<集部,别集类,南宋建炎至德佑,攻媿集>

卷三十六

钦定四库全书

攻媿集卷三十六

宋 楼钥 撰

外制

国子司业彭椿年除祭酒

敕具官某祭酒尊者之称也苟卿任齐最为老师盖三为之後世遂以名胄监之长非夫儒先哲艾德齿俱尊者岂轻畀哉尔蚤以文行表于诸生历官朝行好礼不变擢居小司成士论久已厌服为国学师无以易汝往哉惟不言而躬行使人益观感于规矩之余则首善之风振矣

枢密院检详李祥国子司业

敕具官某成均教事师道贵尊近岁虽长貳不并除而为士择师不应以此为拘也尔驰誉胶庠见谓前辈文学行谊久服衆心谅直简严不移素守郎潜以来蔼有师儒之望兹庸命以少司成之职追还古风变而至道于以副朕作成之意尚勉之哉

左司谏胡瑒司农少卿

敕具官某朕之用人谨守成宪惟尔之用独异他人始以编摩见于便朝奏对详雅朕心向焉擢典中秘遂居六察居无几何径登谏垣期月之间屡献忠谏引嫌自列执义不回俾貳大农岂朕初志往祇乃事庸俟甄升

同知枢密院事赵汝愚初除封赠

曾祖东头供奉官士虑赠太子少保

敕国家亲睦九族本支蕃衍侯王使相宠禄相望然虽在近属无子孙赠典之文惟尔孙曾进秉事枢追荣之恩上及三世有宋以来实自汝始岂不荣哉具官某胄出熙陵庆绵汉邸生长承平之日涵濡信厚之风不显其躬以焘于後本兵之任我得宗英推迹本原宠之宫保蜜章之渥贲尔九京

曾祖母龚氏赠高平郡夫人

敕士大夫遭时遇主致身两地必有庆源之自仍多内助之先矧在吾宗可无异渥具封某婉嫔之质幽闲之度克相夫子寢大其家孙又生子起为公辅既锡曾门之宠并推妇爵之崇惟沁水之名邦实河东之沃壤以示庙祧之宠以增属籍之光

祖赠秉义郎不求太子少傅

敕唐之宗室大用者九人而李适之为称首追荣乃祖褒册典物焜照都邑行道咨叹着于史牒今尔之宠视古过之具官某稟资甚贤为善知乐虽事功不见于世而隐行实侔于天是生闻孙首致枢近既尝逮事当揆所元用推黄壤之恩爰授青宫之傅三锡之命尚其未央

祖母太孺人晁氏赠咸宁郡夫人

敕惟晁氏世有名士在济北号称华宗女教既严壺彝可纪矧来归于天族乃深笃于义方宜有後人克显先世具封某结缡之训盖自家传采苹之仪实遵礼度相夫以道躬德曜齐眉之勤有子甚仁兼仲由负米之养三迁之教燕及元孙

【元孙之元宋时避庙讳所改】一命之荣胙之大郡是为阳报尚服殊恩

父赠大中大夫善应太子少师

敕躬行之实莫着于隐微天报之昭殆同于影响苟能用一日之力何必活千人而兴惟深仁厚谊有以过絶于人则陰功隐德终当暴白于世具官某生长富贵遭罹险艰菽水仅充而事亲有卧冰跃鲤之孝伏腊未给而於人有解衣推食之仁片言可质于神明一饭不忘于君父教忠之训既着生前笃行之名遂彰身後朕方命尔元子贰吾西枢察其许国之忠想见过庭之学宠之师范冠彼储僚岂惟祔庙之是崇抑亦宗盟之未有尚其英爽式谨歆承

母淑人李氏赠安化郡夫人

敕朕显登枢筦既以崇赵氏之祧加贲幽原其可忘孟母之训具封某生自名阀归于贤宗秉志静专与少文而协趣处家约素为彭泽以忘贫一门相勉以孝慈奕世俱传于清白是有贤子为予辅臣爰开顺化之封用示追荣之宠母重杯棬之感庶寬霜露之思

妻淑人徐氏赠鄱阳郡夫人

敕朕竝用亲贤延登宥密虽曰家传之懿如麟趾仁厚之风亦惟阃助之良有鸡鸣警戒之道宜与偕老胡不永年用加宠荣以贲冥漠具封某天资柔淑妇德慈祥册府道山才及见夫子英游之际副笄翟茀伤不逮小君命服之荣独惟南渡以来久寓楚东之近始封此郡尚慰尔灵

知夔州赵玘江西路转运判官

敕具官某尔起书生有志当世顷由名曹出镇淮右孳孳边备论奏相踵易帅夔子民夷帖服事有当辩不已于言可谓首公忘私者矣大江之西漕事为重引以渐近朕意可知顺流而归祇率厥职

江西提刑刘光祖知夔州

敕具官某夔子之国介于楚蜀之间山川险固民夷杂糅谋帅之重心惟通才尔正色立朝号称敢言出拥使轺威望日耸既授以江右之节矣尚兹家食非以优贤分阃之寄易以命汝亟其洗印以安远民

知昭州庄方知琼州

敕具官某琼管以四州之壤屹立海中实与番禺相为引重大舶猷琛赖以归麾符不轻畀也尔进由儒科练达吏事贰郡滨水承流昭潭必能习知南海之俗往其辑宁蚩蚩劳抚贾胡以称朕选侯之意

军器少监章颖左司谏

敕具官某古者箴规之求下逮工瞽矧位于朝孰不进言以谏名官视古已狭选用之际其可不严尔蚤以抡魁寢登华序清标直节照映周行约史东观横经朱邱端靖无华物自宗之擢居谏垣允协时望山甫补袞职之阙孟子格君心之非尚惟勉旃以伸素蕴

将作少监黄艾右正言

敕具官某谏省设官备矣大夫而下几于古诤臣之目比方并建遗补俱以引嫌而去妙选时彦乃今得之尔抱负不凡学为有用言简气劲宜备谏列辍自王邸命以拾遗尔其振厉风采别白是非引经据古以佐朕之不逮将虚已以听焉

资正殿学士正奉大夫萧燧转一官致仕

敕朕睠言故老方深仄席之思遽览封章乃有垂车之请勉从所志殊拂予怀具官某洪毅而裕和【洪毅之洪宋时避庙讳所改】闳深而肃括擢儒科于绍兴之际登朝躋于乾道之初自结主知盖正人无待于助久司言责使天下想闻其风遍仪论思献纳之班遂参辅赞弥缝之用粤从去国亦既累年卧疾清漳兴邺下文人之咏挂冠神武慕山中宰相之高爰序进于崇阶以曲全夫晚节噫汉疏知止既永谢于轩裳萧傅素刚尚勉亲于药石

萧燧赠金紫光禄大夫

敕旧弼退休方徇辞荣之恳奏函踵至惊闻垂绝之言抚往事以慨然怜吉人之已矣具官某

名高一代仕历三朝官以谏为名真得诤臣之体后非贤罔又俾参黻之尊虽为故里之归尚伫壮猷之告云何属疾亟愿乞身载览遗章尚想伏蒲之气优加恤典以彰告第之恩庸寄予悲务昌厥後噫求马周仪形之见遂隔九京歌晋公柱石之衰重增一涕

知建康府余端礼吏部尚书

敕朝列选曹妙简持衡之任位登常伯尤高荷橐之班兹得名臣式符时望具官某稟资洪毅履行精纯慈宸结知蚤预甘泉之侍储闈列属久陪少海之游顷出镇于雄藩实典司于留龠既闻报政亟命还朝矧惟十载以来屡历三铨之剧士论夙推于平允吏行素惮其严明乃于昼接之余宠以天官之旧老成复进岂惟躬簿书期会之繁忠蹇自将正有赖朝夕论思之益其祇成涣用副虚怀

湖北提举张孝曾夔路提刑

敕具官某夔子一道视四川为差近而山川深险杂以夷蛮民物凋陋困于征取典刑之使选用不轻尔出自名家敏于吏事持节湖外敛散以时往按蜀门布宣德意使深山穷谷举无冤民则庶乎得职矣

右正言何异湖南运判

敕具官某朕监观四方志不忘远寄耳目于部使者犹恐不逮故间遣谏官御史以临之尔自登朝行雅有清望顷因奏对擢居宪台升之诤臣之列方有赖于规益引嫌求外授节湖湘典司将输光华煜然夫以峩鴈伏蒲之风抗揽轡登车之志扬清激浊在此行矣有猷以告毋有遐心

四川制置使京镗权刑部尚书

敕朕体列圣宽仁之训务谨刑章求一时忠厚之臣俾居司寇久虚此位今得其人具官某器度恢洪才猷挺特蚤结慈宸之眷亟登要路之津修聘殊邻壮苏武持旄之节开藩全蜀慨王尊叱驭之行百城咸服其恩威四载备闻于劳烈爰示赐环之宠俾陞听履之班锡以赞书付之臬事罔兼庶狱朕方推文王敬忌之心明用五刑尔其慕皋陶迈种之德尚殚辰告以副予知秘阁修撰知绍兴府赵不流职事修举除集英殿修撰

敕怀会稽之章久烦填抚报齐邦之政可後褒嘉具官某分派天潢服休仕路顷由淮甸来任飞乌挽粟之司旋尹京都遂登簪笔持橐之选起临辅郡就擢帅垣迨兹期年知职务之时举去此一水亦举言之日闻乃谕柄臣俾陞寓职以玺书示勉励之意母曰彝章使田里亡愁叹之心尚图来效

梁季琬知光州

敕具官某尔父在绍兴间以才敏致位文昌其後未有至二千石者尔守上饶政务简静衔恤而去未究职业浮光易治地则被边举以命汝委寄为重尚其勉之母忝前人

李沐吏部郎官

敕具官某尔以旧学大臣之子自奋巍科寢登膺仕出使闽浙有志于民为养求归嘉其靖退晋接之顷处以名曹亲庭无信宿之遥选部乃摄承之旧往只厥职无复固辞

新知兴元府章森改知泸州

敕开藩蜀部曾洗印之未闻易镇边陲又改轸而于迈惟首公之有素谅承命而遂行具官某知略该通才猷挺特进仪禁路入陪豹尾之严擢殿留都出拥麟符之重由上流之奏课畀西道以折冲十年而守汉中田叔固宜于久任五月而渡泸水武侯岂憚于遐征矧羣情安集之初藉元帅抚绥之力推君子之心置小人之腹能坦然而不疑脱慈母之怀立严师之傍当翕尔而自定亟祗成涣用宽顾忧

知福州郑侨知建康府

敕开帅藩于闽峤曾未弥年司留龠于秦淮兹焉易镇渴想仪形之见亟令邮置之传具官某执德不回秉心无竞论议远追于晁董文章高轶于汉周正色立朝尤推批勅之手至公典选允藉持衡之权皂盖颁春出临千里锦衣行昼就抚三山欲改畀于麟符仍从驰于驿骑朝受命夕引道谅无憚于暑行退补过进尽忠正有资于辰告入奉受厘之对徐为分阃之行惟我旧臣服兹休命

广东提刑李信甫江东提刑

敕具官某尔为御史直道而行出守信安旋使南峤皆有声绩可纪矧录囚于岭海烟瘴之地不憚深远劳亦甚矣抗章求闲未应舍汝其典泉事于大江之东少休驰驱而後揽辔以行亦惟休哉

太府卿辛弃疾集英殿修撰知福州

敕具官某七闽奥区三山为一都会地大物阜甲于东南负山并海绵亘数千里举听命于大府连帅之选岂云易哉尔以轶羣之才蚤着事功壽皇三界大藩宠以论譔之华于今几二十年召对便朝擢长外府益平豪爽之气而见温粹之容朕心嘉焉比居外台猷议从厚闽人户知之陞之集贤增重阃寄往其为朕布宣德意抚吾赤子以宽一面之顾忧朕岂汝忘哉

著作郎黄由军器少监

敕具官某着庭之选最为清高矧尔以抡魁之英謇谔之气周旋三馆于兹有年经上要津无可者然朝廷序进人物不厌于详荐绅绵历事任不以迟速计也进贰戎监仍摄剧曹益养资望以俟器使

司农卿沈揆权吏部侍郎

敕古有六官孰若天官之重部分四选无如武选之繁兹择贰卿宜求吉士具官某高文赡丽古学精深自登周行雅有清望凡一时华要之选以累载周旋其间壁水道山为诸儒之领袖储寮词掖振六艺之英华屡垂上于禁途复优闻于郡课蔽自朕志召长大农宠之荷橐之联畀以典铨之寄惟公可以守成宪惟明可以察衆欺倚闻称职之名用助官人之道

新知襄阳府宇文价改知遂宁府

敕朕惟今日谋帅之难深以数易为戒卿有大邦遗爱之旧无嫌改命之繁具官某学有家传才为世用奋身西蜀膺慈皇特達之知累岁中朝历儒者清华之选佩印屡更于劔外分符最久于汉中岷首名藩方寻羊叔子之迹遂宁旧治更喜郭细侯之来谅去思之未忘宜外庸之益着往祖成涣嗣有宠光

知遂宁府单夔知建宁府

敕远临蜀部念频年跋履之劳易镇闽邦示乡国旋归之宠具官某受才通敏莅政精明繇廷尉之年蚤被慈宸之眷擢侍臣之列最居羣彦之先祠庭寢閱于十年帅阃雄开乎三峡旋更会府采着外庸仍次对之旧班畀建安之新组山川伊迓谅少慰乎遐心民社匪轻方有资于善政惟时旧德服我茂恩

张孝伯司农寺主簿

敕具官某尔以学自奋吏治有闻三入朝行閱岁滋久凡尔等夷腾上多矣退然靖共物论归之兹以序迁勾稽农扈尚共乃事以就器业

知广德军林孝友大理寺丞

敕具官某列寺皆有丞惟廷尉之属其选为尤重必求通儒以治庶狱已试之效吾其舍诸尔顷居是官见谓称职出守桐川又以最闻兹还旧班进用无壅惟明克允以副朕好生之意

中奉大夫知襄阳府张杓大中大夫知建宁府陈居仁磨勘转官

敕夙严铨法所以示百僚之公优待从臣犹不忘三载之考具官某神机敏悟器度闳深禁路升华久听星辰之履帅藩因任盖得江汉之心【陈居仁云性资夷旷学问淹该西掖代言雅

得深醇之体南邦共理尤明寬猛之宜】兹以年劳应于治典爰陟文阶之等益增侯服之光思称恩劳尚殫猷告

中奉大夫吏部侍郎沈揆磨勘转官

敕制禄以官式序百僚之进在法当从乃登四品之崇具官某儒学老成文华高胜储案有执经之旧祠臣推为诰之工屡结绶于朝行几问津于禁路摄承民部更一纪而有余积累年劳虽九迁而未艾兹擢天官之贰始伸铨格之优太中不易公卿庸表褒迁之渥大夫既掌论议益思献纳之忠

新除兵部侍郎黄裳显谟阁待制依旧嘉王府翊善

敕朕惟国朝谨教子之法王府建翊善之官在太宗务选正人惟姚坦最称直士自时厥後何代无贤我有论思之臣俾专辅导之任具官某以天下士从吾儿游自典秘书已参讲席虽寢历琐闥之贵曾不离朱邸之僚诵典谟百篇之书既得坦明之制正春秋一王之法尤多深切之言力辞武部贰卿之除俾就文谟次对之秩于以究遗经之终始于以示朕意之眷留尚服训词益殫猷告

成忠郎邕州横山寨招马官黄世明转两官

敕具官某戎马之须多自南徼尔招诱尽力累赏日厚并陞二秩以旌其劳

敕赐进士及第陈亮承事郎签书建康军节度判官厅公事

敕具官某三岁大比人徒知为布衣进身之途艺祖皇帝有言曰国家设科取士本欲求贤以共治天下大哉王言朕所当取法也廷策者再乃始得汝尔蚤以文艺首贤能之书旋以论奏勤慈宸之听亲闋大对嘉其渊源擢真举首殆留以遗朕也尚循故事往佐帅幕益懋远业以须登用

集英殿修撰耿秉权兵部侍郎

敕长才被选尝擢侍从之联末疾自言闵劳官职之事丐闲寢久简记不忘既加昼接之余复畀夏官之贰具官某稟资端亮厉操坚刚笃志爱民虽细故必加远虑推诚致主无一事不以上闻屡布藩条率腾善最甫登禁路俄领外祠乃俾赐环再趋文石之陛亟令持橐径归武部之班益励壮犹以答隆眷

皇叔祖少保士岷赠少师

敕属近行尊富贵既无危溢年高德邵死生宜备哀荣 官某迪德忱恂处心夷旷分晖帝籍

虽坐致于显融席庆王门曾不形夫骄吝磊砢维城之望雍容鸣玉之班奉香火于内祠允谓三朝之旧建节旄於辅郡更居亚保之尊胡不百年困于一病惊奉章之上达怆遗老之几何辍九陛之视朝冠三孤而锡命噫高爵厚禄既已见于生前恤典优恩顾何忘于身後尚惟英爽歆我宠灵

武德大夫鄂州都统制张诏军政修举转一官

敕具官某国家分屯重兵列戍江浒申饬将帅务严纪律尔居鄂渚实当上游缓带轻裘如一儒生而气稟山西沈鸷善断军政修整彻于朕闻何爱一官以示表劝益励戎昭用图尔功

直祕阁京西运判朱曦顔直焕章阁知静江府

敕具官某桂林为岭右都会控制最远帅阃久虚抡择尤遴惟尔儒雅醇明练达世故盖尝为部使者矣当盐筴蛊弊之後协心扶持民怀其惠辍京西飞挽之重还抚南方增尧章寓直之名用为尔宠内安毗俗外戢蛮蜚人心知向条教易孚予自以为得人尔其有以称此哉

广西运判方崧卿京西运判提举张釜广西运判

敕具官某等岭右分百越之半漕计匪轻京西总三司之繁事权尤重尔崧卿儒雅饬吏廉按有称是用易以襄汉之节尔父清白传家敛散惟谨是用图尔桂林之居道里略同委寄无异飞刍挽粟既资办治之才揽轡登车益抗澄清之志尔惟自勉朕不汝忘

太常丞李谦浙东提举

敕具官某部使者任常平之寄一道之休戚系焉朕固不以轻畀而况近几乎尔笃志于学力行其言弦歌之政见于已试忧国之心形乎辞色辍从朝行畀以使节早蒞之余岁事未知周爰咨询先事而图浙河以东汝其任是责哉

知宁国府蒋继周知太平州

敕偃藩巨屏正资共理之良易镇邻邦允藉上流之重惟时宿望听我训辞具官某经术融明材猷挺特历居言路凜乎中执法之威屡剖郡符翕尔东诸侯之最念千里相安之久为三年报政之期乃睠当途犹为重地民风纯静素称道院于江东讼谍简稀真是太平之官府更藩旧德为抚黎民矧击柝之相闻亟驱车而及境双溪叠障难伸愿借之私五马一骢又得宦游之乐其因详试遂乞外庸

未待问知宁国府

敕具官某朕念储闱寮案之旧罔匪极一时之选既已延登四人为予宰辅其在外里居者亦

未尝忘也尔事朕有素家食累年起为二千石以示旧恩相攸久之兹焉始定宛陵为江右名郡以寿皇潜藩地望尤崇尔其往为朕抚字吾民笃志赈恤以销愁恨叹息之心岂惟有以副选侯之意尔亦将由是而进焉

成都提刑杨王休本路运判知阆州续耆成都路提刑

敕具官某等朕临御万方寄耳目于部使者地愈远则任愈重蜀道万里成都奥区其选又可知矣尔王休移自潼川方祇臬事易以漕节就按本道尔耆自守阆风颇着能称俾乘宪以表表列城使民之利病彻于朕闻而朕之德意布于遐徼扬清激浊威爱兼举则为称职矣

知常州陈谦湖北提举

敕具官某为常平而置使专以惠民选名士以乘轺示不忘远迹服勤儒术抗志事功顷居编摩已着才望甫试繁剧优有治声往行重湖之区典司义廩之政贸迁鬻海之利务在通商绥靖摘山之徒无致生事伫观成绩嗣有宠章

吏部员外郎雷濬直焕章阁知平江府

敕具官某姑苏古郡号称吴门密辅行都最为重镇地大物阜讼诉实繁衣冠走集应酬不暇非宽博强敏之士其何以居师帅之任乎尔以办剧之才饰以儒雅尝以一邑之长膺千里之寄又以十连之帅抚五羊之民召对便朝郎潜选部念未足以究尔之能也视邦选侯为朕一行加以尧章之职用为临遣之宠倚闻异政以称所蒙

章森依旧知兴元府

敕国家谋帅岂命令之可移臣子徇公亦东西而惟命闲因有为未免从宜具官某文有古风神无滞用以禁路论思之旧为藩方师帅之良建业留都允藉保厘之略江陵巨屏久烦填抚之威惟此兴元控于蜀道念开藩之未及又易镇以有行不如旧贯之仍毋庸新尹之告汉中地重肯形鸡肋之书南国教明当息鼠牙之讼尚图茂渥以答显庸

吴总知泸州

敕禁路通班久遂燕闲之适藩方谋帅允资抚御之良方起家而临民谅闻命而引道具官某胄出勲门而被服儒雅世传戎韬而深涉艺文泽笏影纓旧为仪于朝列拥麾持节屡宣力于坤维眷此泸川控彼南徼民生繁阜当劳来安集之余军律申明严坐作进退之节正赖中和之正往宣宽大之书西平王之在唐固多贤子诸葛侯之仕汉自有美声益振尔家用固吾圉

知太平州叶翥知婺州

敕听履而上星辰缅怀旧德把麾而去江海又着外庸锡以明纶处之辅郡具官某性寬而有制道广而能周为天子之从臣最先衆俊主国家之大计殆过十年谋谟备罄于忠嘉仕已不形夫喜愠乃睠文昌之老俾临宝婺之区姑熟最闻未及赐金之宠括苍地近何殊衣绣之荣倚观中和乐职之诗益表平易近民之政其祇隆眷嗣有优恩

刘侯广东提举

敕具官某朕嗣服之初首下寬大之诏俾部使者分察属郡务寬民力尔守岳阳推诚奉行凡加赋横歛之病吾民者悉加蠲除几去岁额之半荐章交上朕甚嘉之岭海去朝廷远畀尔一节专歛散之权推岳阳之意而行之遐陬其息肩乎

攻媿集卷三十六

卷三十七

钦定四库全书

攻媿集卷三十七

宋 楼钥 撰

外制

同知枢密院事赵汝愚知枢密院事

敕朕延登枢臣方务亲贤之并用擢专兵本岂以日月而为功式隆磐石之宗益耸维岩之望具官某仙源有自天分素高发之以场屋之声名博之以师友之问学论思禁路真有诤臣之风填抚藩方着古循吏之绩望之堂堂折而不挠元龄孜孜知无不为卓尔士夫之间居然公辅之器顷为储案已知许国之忠兹贰机廷尤见爱君之笃俾陞右府之长密赞中宸之谋增衍真腴并昭异数噫三军五兵之间虽未至于庙堂一日万几之繁正有资于帷幄朕方越拘挛而图任尔其勉忠力以赴功惟既厥心同底于治

吏部尚书余端礼同知枢密院事

敕朝建几廷实总事枢之要任专军政尤资副贰之贤乃图旧人用称隆委具官某气和而有守资介而能通蚤膺慈宸之知徧仪清贯爰列储闈之属久事初潜褫身有肃括之称立朝奏正直之德典铨衡于选部尤推鉴裁之公守管龠于留都允藉保厘之略召还位着益简予充盖君臣相知非一日之积而文武并用何二柄之分屡登朝夕论思之班宜居夙夜宥密之地啓侯封之土宇畀采邑之圭腴噫运筹帷幄之中当远追乎前躅折冲樽俎之上正有望于壮犹尚服宠光母替朕命

万鍾司农卿

敕具官某尔以才諝早为九卿去国久之擢冠宰掾仕已之际不见几微召对便朝奏论详雅是用命汝复长予周稷之任王城内外储粟动以百万计上下仰给事则浩繁往哉惟钦以称朕意

通议大夫知枢密院事胡晋臣致仕

敕三年辅政是为股肱之良一旦乞身欲挂衣冠而去勉从尔请深轸予衷具官某迪德粹和秉心正直尊贤容衆无一毫忌刻之私学道爱人备四时温厚之气察其有守任以不疑典封駁于东台赞枢机于西府进参翮暇遂长本兵方朝竭节以相资乃以沈疴而有请任重道远

知许国之未量名遂功成奚退身之太早无君子者如苍生何噫垂车而传子孙顾莫回于雅志就第而问筹策尚有冀于壮犹其服宠光以绥吉履

胡晋臣赠金紫光禄大夫资政殿大学士

敕抗章自列俯从纳禄之言遗奏上闻犹笃爱君之义惊柄臣之已矣抚用事之怆然具官某天赋纯诚世推厚德仁必有勇立朝多謇谔之忠正而不它致主尽忠清之节自登近弼可谓大臣何抱疾之遽深愿辞荣而勇退始犹未许遂不可为爱之欲其生谓何恙之不已死者如可作微斯人而谁归加秘殿之隆名极文阶之三品俾昌厥後均赐以官噫命方士而求马周空軫如存之念辍余瓜而奠如?徒增追悼之怀顾一监之既亡嗟九京之何及尚惟英爽歆此宠灵

潼川运判刘光祖奏儒林郎知资州龙水县杨安益赈济有方循一资

敕具官某潼川去朝廷远顷修荒政部使者察一道官吏之能否以龙水为最而闻於朝进尔选阶以示褒表

徐元德知均州

敕具官某均之为州虽远以其控制洞蛮置武当之节使填抚一境任不轻矣尔蚤以经学教授乡里旋以声望登进朝行贰郡新安绩用采着剖符兹土以惠远民往哉惟钦益行所学

太常博士陈棟秘书丞着作佐郎李唐卿着作郎秘书郎范仲黼着作佐郎校书郎王奭秘书郎正字蔡幼学校书郎

敕具官某等道山羣玉之府聚天下英俊其间所以涵养器业以为进用之储也尔棟以容台议礼之旧尔唐卿尔仲黼登瀛既久尔奭尔幼学给札着称或于典丞郎之职或序进着作之庭校雖未见之书不改共二之故职优选遴孰迈于此其思称崇獎之意以为邦家之光

大学博士邵康太常博士曾秘国子博士太学録雷孝友国子正田澹并太学博士

敕具官某等博士秦官掌通古今员多至数十人国朝稽古建官凡以博士名者皆清选也尔康学问该洽俾议礼于奉常尔秘资稟纯笃俾典教于胄学尔孝友尔澹俱以上庠纠正之职陞教育之任一曰而拔士以十数亦足以知朕好贤之意也其祇明命母曰序迁

费士寅籍田令

敕具官某朕立贤无方视所为主苟得茂才多列于朝尔以西州之隽褒然为举首荐口既重又当有以表异之往司帝籍实预容台清华之选权輿于此惟务靖共以俟甄拔

主管吏部架阁陈希点国子正汤璿国子録

敕具官某士修于家而仕于朝又典胶庠之教事可谓荣矣尔希点蚤上甲科久为掌故尔璿首冠南宫未登华途嘉其静退之风俾参乐育之选雅有声望司予成规子率以身畴敢弗恪

湖南提举郭德麟宗正少卿

敕具官某宗正一星在帝座之东朝廷以属籍为重设官以象之卿少之选亚于太常非他寺比也尔以谅直周密久司六察之职出持使节深简予衷赐环来归优寘少列岂徒为养望之地将有以进汝焉

皇叔祖赠少师士岷追封郡王

敕冠三孤之位既颁恤典之优疏千里之封更极真王之贵具官某分暉天????擢秀宗支琚瑀珩璜允矣朝仪之肃囊兜戟纛居然将阍之禁虽平生坐致美官而终老不愆素履逮朕纂承之始方形亲睦之风曾颁爵之未遑乃抱疴而自晦云何不淑遂止于斯噫搢笏垂绅抡典刑之安在分茅胙土尚冥漠之有知用慰尔灵益昌厥後

士岷女三人并封县子

敕某人朕丕承庆基崇笃宗老凡今属近行尊历事三朝如尔父者几人奄其告终遗奏来上粲然三女愿赐汤沐朕何爱大邑之封不以慰尔父之意乎益懋壶彝以对隆渥

同知枢密院事余端礼初除封赠

曾祖庆太子少保

敕士有致位庙堂而光显于时其上世终身韦布而追荣於後惟源流必有所自而贵盛亦岂偶然具官某乐道丘园隐居闾里人无知者实有侔于天我自得之故无待于外比及三世乃生其枢朕方以储阁旧学之臣擢居宥府基命之地首以宫保之亚用为曾月之光岂徒显尔宗之祧抑以为善士之劝

曾祖母徐氏齐安郡夫人

敕朕延登储寮进贰枢筦既已宠及上世又念伉俪之贤必有以相之者故加以小君之号焉具封某生太末之枢盛偃王之族嫔于良士托以终身谅阍范之可称至曾孙而遂显择黄冈之佳郡开石窾之新封贲尔泉扃歆予涣渥

祖铎太子少傅

敕君子之泽既被于後人朝廷之恩宜及于先世有德必大可考不诬具官某探六艺之遗言为一乡之善士虽文学行谊不见于用而孝悌忠信能行于家再传而兴致身枢近推迹先祖之自欲亢余氏之宗青宫六传举以命汝尚惟不泯服兹宠灵

祖母傅氏高平郡夫人

敕儒者笃行不显於世而能垂裕子孙则亦惟闺门能循法度以为之助追赠之宠歿宜共之具封某谨苹蘩之仪佩图史之训克事君子相敬如宾是生贤孙为朕良佐以高都之名郡为汤沐之新邑惟尔灵其预享之

父赠通邑大夫绘太子少师

敕信安自赵拚以来仕登宰辅不过三数人我有本兵之贤固由自致迹夫义方之教当揆所元具官某秉心静渊履行淳固分薛包之田而爱形于兄弟折冯驩之券而义笃于乡闾积善有余固非一日之力延师不倦遂成令子之名周旋清班登进宥府蜜章加赠屡升法从之阶称庙益亲独簪宫师之选以示教忠之效以宽追远之思

母淑人虞氏咸宁郡夫人

敕士之家传固出父师之训古有胎教实由母氏之贤仕既显于朝廷宠宜加于泉壤具封某天资婉孌妇德静专谨以事夫远追举案之美勤于教子不媿断机之言虽鱼轩不见于生前而鸾诰屡颁乎身後兹锡义川之号盖由枢筦之恩庆则有余泽其未艾

妻淑人叶氏信安郡夫人

敕大臣许国能有羔羊正直之风夫人起家必如鸣鸠均一之德既资内助之力宜啓小君之称具封某姆训是遵壶彝甚饬相尔夫子不以事物婴其心为时名卿得以廉白厉其操位登两地之贵恩沾三世之先矧惟鱼轩宜尔象服视枢臣而命爵就乡郡以疏封益肥汝家庸称予渥

浙东提举李谦乞将合转朝奉郎一官回授本生父珣赠承事郎

敕具官某故本生父某朕方以孝治天下凡以亲为请者多曲从之尔世有令德躬履持操是生贤子而嗣其兄既以能显其父母矣愿舍外郎之一秩求赠本生之二亲淳化淳熙况有故事是用宠尔以廷评之阶诗不云孝子不匮永锡尔类尔子方为部刺史以此风厉郡邑其助吾风化多矣

本生前母王氏本生母陈氏并赠孺人

敕具官某故本生母某氏尔有贤子出继伯父既显其亲又追惟本生之重愿加赠典有司已援旧比且言员郎所系为重而其请于义可矜足以劝臣子荣亲之孝朕曰俞哉并进汤沐之封以为泉壤之宠

胡澄知光州赵彦珙知容州

敕具官某等光山之在淮右今为保障之区容管之在广西旧为经略之所选候而往寄任匪轻以尔澄起由名家尝奏郡课尔彦珙秀出天族洵佐藩条往分顾忧当体朕意有政可纪无远不闻勉哉

四川总领杨经直宝文阁提举四川茶马

敕具官某尔以宰掾之长往饷蜀门之师万里驰驱之劳计当入境四川樵牧之寄尤在得人与其遴选于中朝孰若就烦于便道载颁英簋寓直宝圭摘山以惠远人市骏以备戎事惟乡闾之在望宜利病之详闻往既乃心用扬厥职

淮西提举张同之奏修职郎安丰军六安县令陆子虞救活被水人一千四百余人循一资

敕具官某鼓钟代馨淮有三洲诗人所以兴叹也安丰之潦朕闻而念之部使者谓尔有字民之能乃得救灾之术进尔一阶又以少徇父老借留之意其亦宠矣益勉之哉

朝奉大夫知叙州计孝似夷贼作过不能弹压降一官

敕具官某僰道被边郡将实作控御之寄而威令不申夷獠侵侮惊扰边氓害及徼吏久而後定是不于汝而谁责哉其上一秩尚思後图

朝散郎叙州通判李枋孙节制义军惊动夷贼降一官放罢

敕具官某远夷匪茹侵我王略尔为别驾受帅檄而不进拥义军以自尊致此猖獗而又贪功幸赏迹状昭然削秩免官以示边吏之戒尚为宽典其务省循

诸王宫教授杨大灋国子监丞黄度并监察御史

敕具官某等宪台设属实分六察之司御史虚员当极一时之选孰堪此任今得其人以尔大灋以端恪之资而达于时宜尔度以深沈之量而敏于吏事旧临剧县俱着能声尝对便朝各陈说论尚忠而用夏政既已先明诏之颁约史而作宋经亦已考遗编之载并加亲擢盖自简知尔其助正纪纲振扬风采务求称职之实毋负官人之能

福建提刑卢彦德本路运判

敕具官某尔屡持使节为时老成暂居郎曹复按闽部祥刑之寄方藉平反将漕之司又烦调度不改山川之旧仍颁郡邑之条益靖吾民以称朕指

知郴州吴镒湖南提举

敕具官某尔以册府之英起当郡寄慈惠之政彻于朕闻夫士之务学固将见之用也始以宜章之最俾任一州继以郴阳之能得廉一道矧是湖湘之远方当旱潦之余醯茗阜通虽攸司之甚重仓庾歛散尤荒政之宜先尔能究心部刺史之职则朕之用汝等而上之庸止此耶

曾集知严州

敕具官某赣川之曾人物相望仕至二千石者前後以十数声绩茂焉尔习于家传有志乎古试以举寄有志乎民还奏便朝嘉其详练惟严陵之辅郡实高庙之潜藩分以左符用抚吾民由小州得大州盖亦宠矣益勉厥职以大尔家

沈维知房州

敕具官某尔以相家子明习文法自致廛仕盖尝久于廷评为丞为正又出为二千石矣中更闲退閱岁滋深起尔于家俾分房陵之符戢吏爱民省刑节用治郡之大端也尔皆知之奚俟多训

知江州王师古广东提刑知吉州胡长卿广西提刑

敕具官某等国家分道遣使以祥刑为重岭海之远尤遴于择人尔师古奏浔阳之课尔长卿报卢陵之政俱以儒雅饰吏践?岁久授之轺传其必能为朕审用刑章平反庶狱使百城之民自以为不冤亦惟休哉

吏部员外郎钱象祖陞郎中

敕具官某尔自淳熙初元摄事列曹今二十年矣三易州麾一拥使节凡今郎吏出入省户未有如尔之久者也兹以积考始正其名资望俱高益称详练虽曰铨法尚服优恩

新成都府司户李侨乞将所得官资回授父证赠迪功郎母廖氏赠孺人

敕具官某士之发策决科以求仕也尔之子万里造庭得官名都而求致其事以荣二亲此非追远报本不可解于心者能之乎朕甚嘉之曲从其请于以风厉四方使知慕焉

新徽猷阁学士知建康府张杓依旧知襄阳府

敕金陵为帝王之宅方藉保厘羊祜得江汉之心爰加因任具官某忠嘉传世才智絶人兼言语政事之科何施不可更弹压惠养之政易地皆然惟今襄阳在昔畿甸畅皇灵于遐徼控天塹于上游谋帅留都已畀玉麟之重还车旧镇谅多竹马之迎惟首公而忘私遂闻命而引道吏民如故不烦条教之载颁城郭重来但觉精明之顿改其只茂渥以訖外庸

左司应孟明中书门下省检正右司徐谊左司员外郎

敕具官某等宰掾之任重矣自尔二人为之实能谨守程度参稽事宜佐吾二三大臣以平章中书之务大臣亦言其能朕用嘉之以序而迁滋向于用益习天下之事以昌远业尚勉之哉

何澹焕章阁学士知泉州

敕弄大夫之印方渴想夫嘉猷分刺史之符尚往临于重镇眷知有素中外惟均具官某名擅伦魁望高风宪由辟水师儒之任历骑省诤臣之班披腹而呈琅玕独任台纲之长把麾而去江海更观吏治之优矧是泉山实雄闽峤徒得君重勉为朕行焕乎文章示西清学士之宠凜然风采增南国诸侯之严倚闻报政之期其体顾忧之意

枢密院编修官吕棐太常丞

敕具官某三丞号高选而容台为最不惟礼乐是司凡朝廷有大议必咨焉是可以轻畀哉以尔奋自儒科又精吏事持论不苟廉直自将久於编摩擢寘华列惟寅惟清往赞而长

国子监主簿王源国子监丞

敕具官某冒监以教养人才而金谷细务丞实司之尔父顷在从班有批勅之风能继世科风烈未远久服勾稽之职就俾序迁资望寝高尚思所以称其家者监登闻鼓院李友直宗正寺主簿监都进奏院罗克开国子监主簿

敕具官某等国家铨择人才进各有叙勾稽之职在寺则司宗为清在监则胄庠为重以尔友直儒学老成旧传夫素业尔克开士行修饬自奋于世科进官于朝雅有贤誉俱迁簿领实阶华途采务靖共以祇朕命

潘景珪知湖州

敕具官某吴兴名邦今为辅郡地大而民阜赋重而讼繁视邦选候弗以轻畀尔练逵吏事明习宪章入从出藩践馱旧矣起家为二千石顾岂择地而後安移前日弹压之威而为惠养之政尚优为之以称朕意

沈瀛知江州

敕具官某大江之险分戍重兵浚水之阳号称要地军民错处牧御须才尔奋迹胶庠驰声场屋仕虽三已而无愠予岂一端而取人既辍新安之行复分共理之寄绥靖十同之衆抚安万竈之屯此而有称进则未艾承节郎叙州管界巡检程仲乾因夷人作过被杀特赠两官与一子进武校尉

敕具官某尔为微吏勇于扞寇而捐其躯谋虽不足过于逗挠自全者远矣以二秩告第而官其子庸劝边臣之用命者

湖南提刑孙逢吉秘书少监

敕具官某道山羣玉之府聚天下英才其间必又求才之杰然者领袖之遴选之久今得其人以尔稟资端方充之以学九流百氏之书该综无遗良史之才诤臣之风尔实兼之顷由少司成出使湖湘刺举惟公风采凜然是今日第一流人物也还为少蓬孰不曰宜来游来歌以副虚伫

楚州奏忠训郎添差副将魏昌教习效用弩手转一官

敕具官某尔以名将之子习于戎昭练兵山阳守将以告授之一秩以励能者

蒋蔺邵公翰奚士逊邵袞并大理评事

敕具官某等理官之属惟廷评为甚劳狱成之告必躬必亲非习于文法者不在兹选今又试以经术盖欲兼用儒者也尔等俱以场屋之旧明司空城旦之书而中其科虚位既久并举而用各扬乃职使人知引经决狱之效焉

太常少卿薛叔似秘书监

敕具官某朕以册府为重选才甚严信宿之间既得逢吉为之贰又俾叔似长之所谓朝取一人焉拔其尤暮取一人焉拔其尤士论翕然朕亦自乐于得贤也尔问学渊博论议明辩结知慈皇擢在谏省有古诤臣之风远乘轺车归贰容台物望无不宗之既授以太史氏之职复使正此久虚之位表仪隳游儒者之至荣也雍容养望以俟甄擢

司农少卿詹体仁太常少卿

敕具官某奉常惟礼乐是司而去古寢远放失尚多非得博物洽闻学有根据者未易轻畀也尔少明经术务为有用探蹟索隐耻一物之不知总饒之久盖已由郎省而贰大农矣召对雍容效忠无隐其为朕典礼乐之事钟鼓玉帛抑末也尚求其本而厘正之

蔡戡司农少卿

敕具官某尔起由名家以甲科自奋登用最蚤敷历已多深沈之度廉退之节朕知之旧矣比总军储尝贰外府升之农扈备予九卿朕欲收拾人才共兴治功览尔奏篇又有得士之喜顾岂独望以周稷之事然积贮天下之大命也方平余以为备尚赞而长使事集而民不扰则予汝嘉

新知泉州何澹两易知明州

敕起镇泉山将趋于闽部易麾鄞水并护于瀛壖凜闻宪府之名增光制阃之寄具官某受材精敏履行粹和场屋文鸣蚤先衆俊朝廷德选寢历华途属予纂绍之初赖尔论思之益擢居骑省端有古诤臣之风进长乌台真得中执法之益遽收朝蹟再更岁华洊畀郡符俾近畿甸地当一面海市三陲蔽遮浙河之东控御岛夷之外布宣德意岂惟欲田里愁恨之销敷畅王灵正欲藉文武威风之重倚闻成绩嗣有殊褒

知明州朱佺两易知泉州

敕具官某才有小大之异而选用当适其宜郡有远近之殊而委寄之重则一尔详练世故敷历仕途鄞岭分麾报政久矣温陵改镇易地皆然此则控东夷之要冲彼则据南海之都会内修侯度外畅王灵谅无惮于修途当复闻于善最

司农少卿胡瑒湖北运判

敕具官某朕临御万方寄耳目于部使者又间遣谏官御史为之俾遐陬之氓如在畿甸矧湖右实据上游而外台当军民错处之地任顾不重哉尔外静而内明言简而气劲一见而决亟寘谏垣雍容论奏多所裨益乃自引嫌迁贰大农丐外再三察其勇退兹用授尔以飞挽之寄为官择人非以遂尔之私因事进规无忘爱君之意

高文虎将作监丞

敕具官某朕旁招俊乂布列周行德进言扬如恐不及矧以太史氏之旧引疾家居十有四年昔病今愈予环可後乎尔博学笃志承伯父之传网罗旧闻述史迁之绪采之公论金曰汝贤再转为丞尚居缮监职务清简可以卒汗青之业毋以匠为嫌也

汪粹军器监丞

敕具官某尔旧弼之子以才自见出临边郡绥靖有方奉最言归论奏明辩丞于戎监孰不谓宜矧尔久在塞垣有志事功除戎器以戒不虞国之务也亦惟钦哉

户部侍郎赵彦逾工部尚书

敕考六典之书实重冬官之职总百工之事今惟起部之司乃得宗英俾居常伯具官某联休天派擢秀儒科立志孤高万鍾何加于我持身廉洁一介不取诸人令名远绍于闲平惠政偏加于楚蜀任国大计为予良臣朝夕论思有猷必告簿书期会惟正之供勤劳已着于巧咸宠数遂登于八座亲贤并用朕方隆睦族之风技巧咸精尔尚敬若工之命

攻媿集卷三十七

<集部,别集类,南宋建炎至德佑,攻媿集>

卷三十八

钦定四库全书

攻媿集卷三十八

宋 楼钥 撰

外制

太府少卿兼知临安府袁说友权户部侍郎

敕朕揽收人才思裕拜用足兵虽急要先足食之言大计是谋当求大度之士是为儒者之效孰曰民曹之难具官某文有英词神无滞用蚤登馆学尝接武于华途旋历麾符屡策勲于剧部居輦轂弹压之任知里闾铢两之奸前张後王声望相继东贾西萬豪猾自消叠膺昼接之荣擢寘地官之贰损上益下朕欲图加赋之寛理财正辞尔尚明盍彻之意

直秘阁两浙运判王厚之直显谟阁知临安府

敕具官某国家驻?吴会视古天府民日庶事日繁师帅之寄尤难其人以尔先世尝为京尹治行超卓如汉章尊汝实是似故以命汝自其少时博雅笃学世味冲澹若将终身焉一行作吏所至办治处之以荣观而超然投之以剧繁而不乱是宜居此官者辍自漕台加畀延阁用为尔宠唐人有言輦轂之下先弹压郡邑之治本惠养此言殆未纯也五方之民固为彫杂九县之衆尤须抚字威惠交孚则为称职且称其家矣

户部员外郎黄黼直秘阁两浙运判

敕具官某部使者之职重矣而畿漕视他路尤剧近岁率用儒者不惟职务整办惠爱遂及于浙河之东西是不可改也以尔起由胶庠凝粹而开敏尝使江东得敛散之宜澄按列城不苛不弛兹由郎省付以漕事寓直延阁以示宠嘉矧在乡邦周知利病尔能罢行之下有月旦之评上有公朝之论当不日而彻闻矣勉哉

李大卞知洋州

敕具官某洋川在东蜀为望郡通僦谷骆谷之道据黄金戍之险贤牧风流相传左符不以轻畀也以尔家世循良明习吏事虽安於闲退而閱岁已多勉为一行以副朕选用之意

虚恨蛮酋首成忠郎袁弄满三年转一官

敕具官某国家铨法文臣以四年武臣以五年乃得进秩三载考绩不以施诸庶僚也以尔慕义中华誓保西南塞下郡将有请升尔一阶益贞乃心毋替于旧监建康府榷货务武翼郎赵公逊修武郎丁昌时收趁增羨各转一官

敕具官某等摘山鬻海之利榷之以佐军需其数实繁尔仕陪都岁课登衍何爱一秩以劝后来

周秘大理寺丞

敕具官某李官之属率以文法进求其持身无玷缺以儒术饰吏事者尤难其人尔起名家久于棘寺尝为丞为正矣试郡有称奉最来归【奉一本作奏与前卷奉最言归论奏明办互证当作奉】再转为丞复典臬事虽若小迁而荣途自此无壅矣随龙御前忠佐马步军都军头陆安转遥郡刺史

敕具官某郎选在今为甚重虽朝列名流必着外庸而三尺则有司执法以裁正既进六资则朕之宠命复行上下俱为得体而尔受之亦宜往刺一州益务中恪

浙西提刑叶适吏部员外郎

敕具官某郎选在今为甚重虽朝列名流必着外庸而後授今得人物之英为之则又增重尔博极羣书洞视千古文章之发追配作者顷由册府试以郡寄临事知变就畀使节以宠之天官名曹实为星省之冠是不于尔而谁属简要清通尔其兼之

判潭州周必大判隆兴府

敕诏起东山已报长沙之政符分南服尚提新府之封乃睠元台载扬明训具官某闳深而肃括坚正而裕和极论思献纳之工尽辅赞弥缝之用始终一节光显三朝进退百官聚英才而在列总领衆职任大事以不疑方安藁馆之闲往镇藩方之远眷怀不替委寄则均政化流行有类上公之分陝威名孚洽共期大老之归周惟此南昌尤为要地爰命三孤之重式遄十乘之行矧尔寓居之乡实今赐履之下既喜衮衣之寢近抑欣昼锦之有光先声所临羣听自耸噫令行庭户当还带牛佩犊之风福及京师更伫自叶流根之效来绥四国式宪万邦

朱熹知潭州

敕具官某十国为连师帅是寄矧长沙控湖湘上游赐履甚广视邦选侯尤难其人以尔古学粹深风节峻特可以为世之师仁心仁闻威惠孚洽可以为时之帅兼是二者往临藩方声望所加列城耸服儒先相望士气方振尔其为朕教之楚俗虽安尚有凋瘵尔其为朕抚之典刑所存奚俟多训

陈公亮江西运副

敕具官某朕惟郡邑官吏至繁不胜其选故精择部使者付以扬清激浊之寄以尔抗直而详谏由宰掾持七闽使者节按刑畿甸又有能声是岂可一日使之家食而不在事易节待次姑以徇尔之私大江之西将输事重益谨厥职以副眷怀

吏部郎中林湜太府少卿

敕具官某版曹总国用之要而帑藏分之有司必以外府处其中所以检柅财货之出入不嫌于详其可以轻畀哉尔奋身儒生习于吏治在县为贤大夫入朝为才御史澄按两道摄承十连皆有声绩彻于朕闻召寘郎闱靖共尔位进之少列以慰公言率属究心使上下兼足尔其懋哉

户部郎中赵谧军器监

敕具官某戎监之设本以严饰武备而休兵岁久缮修之职各有司存长贰亦惟总兵凡而已以尔旧弼之孙克自抑畏久在郎省能寡悔尤序进为长仍摄民曹往其只钦毋替于旧

龙图阁学士正议大夫韩彦直磨勘转官

敕夙严铨法所以示百僚之公优待从臣犹不忘三载之考具官某材猷通敏政术闡明历事三朝负缙绅之素望投闲十载号簪橐之旧人心安藁馆之居职寓河图之峻年劳既久官簿愈高用为晚节之华其服宠光之渥

宝文阁学士大中大夫顏师鲁转一官致仕

敕奉香火于真祠方徇投闲之请挂衣冠于神武遽腾告老之章虽欲挽留不如得谢具官某性资刚毅政术疏通幼学壮行曾不渝于一致出藩入从盖详试者累年往使殊邻抗节不挠进登常伯典铨尤明一辞宸陛之严洊镇泉山之远力求闲退方念仪刑不知何恙之深载览引年之奏俾升官簿以宠老臣眷简未忘姑遂明农之志始终无玷尚余许国之忠服此恩光体予至意

顏师鲁赠四官

敕垂车得请尚想履声之余易箴有言犹存尸谏之意怆老成之已矣念冥漠以恍然具官某受才高明植操坚特莅官行法所至有循吏之风忧国爱君直欲任天下之重独辞荣于八座乃敛惠于一方身退而名益彰年高而德弥邵眷旧臣之无几惊遗奏之遽闻超进文阶仍延世赏仰无愧俯无忤何谢古人生也荣死也哀终全晚节眷惟英爽歆此宠灵

正议大夫尤袤转一官守礼部尚书致仕

敕位列仪曹屡上求闲之请恩隆储案俯从纳禄之私兹焉告归于以示宠具官某器资精敏学业淹该隐帙奥篇了辨无爽残膏賸馥沾丐为多册府道山极一时儒学之选词垣翰苑兼两朝制造之工比讫外庸进仪清禁命之夕拜有唐人批敕之风擢以春官当虞臣兴礼之任乃因感疾遽欲辞荣俾陟崇阶以华晚节李纲乞骸而去肯久于尚书孔戣得谢而归仍加于礼部尚祇涣渥无媿前良

尤袤赠四官

敕旧老遗荣犹有留行之意表章载览忽形垂絕之言天不憖遗人所嗟惜具官某以时耆德事朕初潜蚤岁宦游殆及王杨之接晚年贵重遂从园绮之招古事今事问无不知大言小言进必有补爰暨纂承之日首参侍从之班召自藩方喜典刑之如故擢居琐闼嘉悻直之不衰图任方深求归何亟虽弗至甘盘之罔显恨不许彦博之少闲丧此良臣动予深念进四阶而命秩按三尺以疏恩学焉而後臣之正赖多闻之益死者如可作也抑惟斯人之归或其有知母悼不幸

起居舍人陈傅良起居郎

敕具官某言动之属史官固有左右之异朝廷之用贤士岂以日月为功试之加详旨则有在尔穷百氏之学发六经之文身方在于布衣名已传于海内外庸既讫衆望愈归比再入于修门寢擢居于清贯叩其著述之业登之记注之司螭陛直前善开明于朕意凤池共二能震耀于王言执义不回秉心无竞稍迁厥职以重此官庶几朝宁之间犹见仪刑之旧载纂高皇之典仍陪元子之游益啓乃心毋忘忠告

秘书郎彭龟年起居舍人

敕具官某朕修明官制用之有条识拔人材待以不次惟此柱下史在迺列以尤亲取之中秘书迨近时之罕有既云遴选安得异辞尔操守坚刚论议剴切端公辟属赞台院之宏纲册府为郎号士林之翘楚擢真螭头之直俾陪豹尾之班不循年限而授此官深得用魏謩之意掌録时政以付国史尚克遵唐室之规益效忠猷以酬异渥

朝请大夫权刑部尚书京镗磨勘转官

敕六卿分职皆吾从橐之臣三载陟明优尔吏铨之制具官某谋谟宏达识度恢洪顷膺慈展之知径上甘泉之列张旌而使万里折戎虏以不骄叱馭而镇两川抚民夷而咸服召登宸陛下真秋官兹以年劳应于治典爰峻文阶之等益增禁路之光尚服恩荣式殚猷告

兵部尚书罗点落权字

敕尚书古之纳言必求德望之妙武部周之司马实惟邦正之专肆畴已试之良爰锡其真之宠具官某訏谟经远雅量镇浮蚤历近臣自有老成之誉素多仁闻仍全刚毅之资推爱人利物之心为致君泽民之业词掖久推于润色经帙尤赖于讲明旅登听履之聯兼莅典铨之重仪刑朝著满岁已深领?从班优贤可後有常德以立武事正需旧学之规以军令而振国容方倚壮犹之助往祇成命式赞永图

兵部侍郎耿秉落权字

敕朕旁招贤士遴选从臣惟我旧人载处五兵之贰不烦满岁遂颁一札之书俾正厥名敷告于衆具官某姓资刚果器识宏深夙志功名善谈当世之务屡更事任专以斯民为忧故典州则千里举安而将命则列城蒙惠徧仪华贯寢简予衷抡才甫上于禁途引疾遽收于朝蹟勿药有喜盍归乎来留寘迓聯方藉论思之益愿全晚节尤高廉退之风乃加真除俾镇雅俗橐弓虽久岂忘武备之修持橐甚休益谨忠猷之告尚承至意母有遐心

工部侍郎谢深甫落权字

敕朕昭德塞违临政愿治乃睠吉士洵兼夕拜之官乐闻嘉言俾正冬官之贰固云试可实示褒升具官某性稟粹纯行能肤敏被圣父非常之遇膺周行不次之除嗣服云初首居郎省量才既审擢寘谏垣顒顒朝望之益高臺臺奏篇之切当晋登在陛咸推记注之功就尹中都更资弹压之重持橐优迁于起部典铨仍领于选曹载输批勅之忠尤见爱君之笃岂应久次宜遂为真畴若予工匪求精于技巧母替朕命尚益效于论思

汪德输知崇庆府

敕具官某始吾高宗开公社之封实自蜀国寻以崇庆名军盖久而後冠以府号地望滋重矣选侯可轻乎惟尔祖首贰元帅府以佐中兴尔为恂恂克守家法简池之政平易无华畀以左符往守兹蜀念之哉无忝尔祖则不负寄委此邦之意

宫人符燕燕转永寧郡夫人李进进转通义郡夫人

敕朕饬修内治靡形色选之私周览掖庭爰秩妇官之序有嘉女德用锡命书具封某婉孌自将柔良有素知小星尽心之美不见骄盈承穆木逮下之恩惟加肃谨寢历时之久备殫夙夜之勤分乐土以疏封賁小君而示宠其祇涣渥益懋芳猷

汪义端知舒州

敕具官某淮右诸郡职优而事简舒其尤也尔蚤登甲科蔚有时望近膺亲擢欲振台纲引去翩然留之不可尔才办剧屡更盘错是邦简静游刃有余其与斯民相安于无事以称朕安边固圉之意

集英殿修撰知绍兴府赵不流知广州赵彦操职事修举并除焕章阁待制

赵不流

敕报政辅藩又见期年之变疏恩中展载加禁路之荣具官某庆席仙源才优吏道顷由辇毂弹压之任遂为朝夕论思之臣宝婺分符备着蕃宣之效会稽奏课曾陞论譔之臣宝坐黄堂庭无留事风行黔首时有誉言登之持橐之职壮我维城之势帅临十国方为久任之图位列四松不减近班之宠尚祇明命以讫外庸

赵彦操

敕帅闽雄尊着南海于蕃之蹟玺书勉励陞西清次对之华惟我宗英被兹涣渥具官某才猷敏劭学识该通蚤膺圣父之知道寘列卿之长俾兼天邑有赵张之威名进摄地官熟研桑之心计一辞位着久閱星霜姑苏宣三载之劳章贡总数州之重顷踰庾岭往镇番禺抚蛮徼以不惊惠贾胡而无扰载嘉善最俾正从臣望云以求蓬莱母谓鹄行之远把麾而去江海乃通豹尾之班兹曰殊恩益图来效

端明殿学士正奉大夫致仕郑丙赠四官

敕引年已久无复尚书之履声遗奏忽闻庶几太史之尸谏旧臣无几恤典宜加具官某气直而能温性刚而善下立朝正色为多士之表仪典选尽公慕古人之风裁洵更名郡遂返故乡奉祠馆以怡神据礼经而告老谓因闲适可迪壽康不知何恙之深遽起云亡之叹叠升命秩仍茂赏延八座班高笃始终之不替九京恩及尚英爽之有知

资政殿大学士通议大夫范成大转一官致仕

敕图旧人而共政方媿未能引大体以乞身胡为有请嗟名臣之老矣抚往事以慨然具官某俊逸不羣风流自命文章甚伟崔蔡诚不足多制诰尤工王杨当为之伯绪余所出施設具宜桂海冰天望皇灵而益远瀛壖蜀道专制閩以增雄是诚宣力于四方宜俾进宫于两地出司留龠遂奉祠庭用之未尽其才退而自求其志卧公干漳滨之疾挂隐居神武之冠宠数弥光典刑斯在噫胸中之有兵甲世称小范之才高扁舟之泛江湖或谓鸱夷之仙去皆尔乡闾之旧岂其苗裔之余无忝前良以全晚节

范成大赠五官

敕旧弼遗荣方遂垂车之志需章上奏忍闻易箴之言天不憖遗人其殄瘁具官某身登二府仕历三朝词章议论之高无惭古昔东西南北之表咸着威名曾辅政之几何乃居闲之浸久九龄之风度可想晋公之神明不衰石湖忽堕乎文星壽栎遽成夫陈迹云何不淑而至於斯念三吴人士之无多叹一代风流之几尽躡五阶而进秩按二品以疏恩噫三仕三已而赋归

岂复计生前之事一官一集之传远尚得垂身後之名其或有知当自无憾

军器少监黄由将作监

敕具官某朕有元子爱之固深而教之惟恐不至一时宾僚极儒雅之选尔以伦魁之彦久仪羣玉之府侃侃正色抗论不回自少匠而为长盖亦宠矣技巧精能非以此望汝也横经朱邸使吾儿有直谅多闻之益是惟休哉

开府仪同三司判隆兴府赵雄少保致仕

敕旧弼偃藩方倚上流之重需章请老遽求故里之归逝矣莫留惻然兴感具官某谋谟宏远识度恢洪洞往古治忽之原识当今轻重之体临机辄断慕如晦弥缝之功遇事敢为有黄裳经济之略顷辞朝会洊着民庸起之西蜀之阨付以南昌之郡仰父俯子寢销愁叹之心襟江带湖雅称诗书之帅以疾来谗乞身甚坚虽深軫予衷亦重违雅志其陟三孤之贵以华万里之行噫图任旧人谓尚堪于大政注想元老惜不究于长才谅服涣恩式全嘉遽

赵雄赠少师

敕垂车自适难留故相之归属纡有言尚笃大臣之谊殄瘁之叹远迓所均具官某以庸济之才际明良之会坐庙堂而独任光辅至尊之朝解印组以言旋犹高勇退之节迨予嗣服尝赖矢谟初为武侯渡泸之行实重周公分陕之寄洊更帅阃最得士心不图柱石之衰遂挂衣冠而去勉亲医药犹藉典刑遽沦九京奄隔千古爰陟公师之亚仍加世赏之延噫死生旦昼之常固达人之所谅君臣始终之分岂恤典之可稽慨想冥途尚歆异渥

湖北提刑张垓江西提刑知池州王谦湖北提刑

敕具官某等祖宗哀矜庶狱分道置使前古未有也朕承丕绪尤遴于择人尔垓名臣之子尚有家法尔谦儒林之彦尤长吏才大江之西人以终讼为能重湖之北民有敝攘之扰各务澄按恤民之可矜惩吏之无良使远方人人自以为不冤朕将有以褒表之

朝议大夫焕章阁待制马大同磨勘转官

敕一麾出守实吾从橐之臣三载陟明优尔吏铨之制具官某器资精敏心计疏通比从惟月之班径上甘泉之列民曹治赋更嘉献纳之忠京口分符备着蕃宣之效年劳寢及治典可稽俾序进于文阶以增光于侯度往其祗命益务告犹

吏部郎中钱象祖枢密院检详

敕具官某天下之兵本于宥庭设属抡才实视宰掾非夫详练敏明之士不在兹选尔起于重

珪叠组之家而以书生自处蚤更事任若老于州县者出入郎省殆二十年敏而不疎审而无滞赞吾枢臣尔其选也益勉所长以俟登用

太府丞曾三聘秘书郎

敕具官某道山蓬莱图籍钜万士夫仰望真望飈车羽轮之隔游其中者皆天下选也以尔力学自奋持论不阿忧国之心如饥如渴擢自外府径登清贯益读未见书以昌远业且使四部秩然有序是为称职哉

大理寺主簿王寧新知信阳军刘崇之并太府寺丞

敕具官某等寺监皆有丞不外府设官独详焉盖欲上裨版曹之调度下梃有司之出纳不可以非其人也以尔寧文词蔚然明习吏道勾稽棘寺平反为多爰俾序迁以酬劳勩尔崇之声称籍甚蚤登着庭出守边方占对尤敏使还朝蹟以慰公言所贵于儒者为其能通世务其以所学见之事功勉哉

宗正少卿郑汝谐右文殿修撰之池州

敕具官某尔以科级自奋以吏諲见称持节分符俱有声绩登之卿列进摄禁途迨命为真乃有异论朕方遴论思之选屡欲留行尔乃陈云就之余式遄其行慰彼右文论譔之职往抚池阳凋瘵之余式遄其行慰彼黎庶

忠翊郎屠思正监辖制造御前军器所实及五年转一官

敕具官某除戎器以戒不虞国之务也尔职其事遂閱五年何爰一官以獎劳勩

壽圣皇太后庆八十诏书文武陞朝官等加封祖父母父母定词

台諫卿监郎官以上封祖父并父

敕具官某父某朕日侍慈皇推尊祖后母仪备三朝之盛壽简增八袞之崇奉徽称于日至之长讲庆礼于元正之始爰本亲亲之道用推老老之恩以尔积善有余潜光不试粤有贤子【祖父云孙子】扬于王庭【台官云列属宪台卿少云列在月卿郎官云列在名曹都司云宰掾是司】聿观縟典之行可後高年之渥爰陞命秩以示宠光益务教忠用图显报

台諫卿监郎官以上封祖母并母

敕具官某母某氏【同前制朕日侍慈皇至用推老老之恩】以尔妇道素全壺彝甚饬粤有贤子【祖母云贤孙】扬于王庭【官官云列属宪台卿少云列在月卿郎官云列在名曹都

司云宰掾是司】聿观缙典之行可後高年之渥爰加沐邑以示宠光【郡夫人爰封名郡国夫人晋封大国】

职事官内外陞朝官京局京官选人在外京官选人封祖父母父母

敕具官某父某朕以祖后壽登八袞恭侍慈皇奉上万年之觴爰推老老之恩以广亲亲之道以尔潜光不试积善有余【祖母并母云壺彝甚饬妇道有闻】子仕朝行身逢庆霈【祖父云孙仕朝行朝官云子通朝藉京局京官选人云子仕中都在外京官选人云子在仕途】爰加异渥以惠高年

知枢密院事赵汝愚初除封赠

曾祖太子少保士虑太子太保

敕我有宗臣进长枢筦虽循墙而避宠终出綍以疏荣贵震一时恩及三世具官某分暉帝胄履善家庭九族序迁曾不登于膺仕百年隱行乃有见于後人惟尔曾孙既登右府亚于宫保已賁幽原爰加再命之崇遂列三师之重前无旧比歿有余光

曾祖母高平郡夫人龚氏文安郡夫人

敕位尊任重必有家传积厚流光亦由闾政恩既加于曾庙封宜进于小君具封某以柔淑之资嫔信厚之族虽中饋之职无显于外而内则之懿能肥其家逮三叶而益昌位元枢而鼎贵载加名郡以表芳猷

祖太子少傅不求太子太傅

敕紫枢元臣方隆于同姓青宫亚傅尝宠于大家位既愈崇恩亦宜称具官某奕奕帝王之胄恂恂儒素之风教子以经至孙而贵鸣珂佩玉虽不见于生前叠组重圭乃追荣于身後进登一品以慰九京

祖母咸宁郡夫人晁氏济阳郡夫人

敕世胄高华本由济北之族庆源流衍实自召南之风具封某躬苹蘩之勤遵图史之训功容俱备典则不渝教子有方能甘啜菽之养抚孙甚爱真有含饴之欢兹领枢庭以翊兴运顷尝颁夫沐邑俾载益于郡封爰分广济之名式慰谨终之意

父太子少师善应太子太师

敕眷我维城固多将相侯王之贵惟尔有子遂为股肱心膂之臣可无宠光载笃余庆具官某

家法有自天资尤高及见太平犹记开元之际结交前辈尚闻正始之音躬曾闵之孝钦慕间平之儒雅爰谨家庭之训遂传宥府之贤乃进宫师以彰阳报其祗明命益啓後昆

母安化郡夫人李氏饶阳郡夫人

敕爱君忧国繫我本兵之良嬖德娠贤可後荣亲之渥具封某稟资柔懿植操幽闲以泽底之名家归天潢之支派【泽底一本疑底字误因缺之考唐李肇国史补以泽底李与冈头卢士门崔竝称可证其不误】中闺甚肃不辞举案之勤令子着名端自断机之训云何不淑其後遂兴洵啓博陵之封以示冥途之宠

妻鄱阳郡夫人徐氏通义郡夫人

敕大臣许国有光麟趾之宗夫人起家无媿鹊巢之隐惜悼亡之已久宜追远以加荣具封某生自儒门嫔于皇族身能全于妇道生弗永乎天年迨夫子之登庸嗟室人之冥漠视其爵秩贲以恩光易番水之旧封畀眉山之新渥尚惟灵爽式克钦承

攻媿集卷三十八

卷三十九

钦定四库全书

攻媿集卷三十九

宋 楼钥 撰

外制

大中大夫沈揆转一官守权吏部侍郎致仕

敕侍朝甚喜方仪荷橐之聯何恙之深忽上挂冠之请初不闻曾子之疾乃欲为疎傳之归具官某文有菁华学称博雅顷屡登於位着矧夙备於储寮嗣服云初首颁於召节殿邦既久终入於从班谓其数器之兼畀以二铨之重预修史策劝讲经帷造膝陈谟曾未浹日抗章告老胡不待年许寻里社之闲仍守天官之秩子騫之在汶上莫遂挽留公干之卧漳滨徒深怀旧尚只渙渥以保修名

沈揆赠四官

敕孟轲之致为臣方軫留行之念曾参之啓予手忽闻将死之言抚往事以何追嗟若人之不淑具官某老於文学志在事功博极羣书而发于英词上下千载而见之笃论任握节分符之寄所在着称登簪笔持橐之班於时未久抱疴自列纳禄言归当危憊以奏篇眷忠勤而陨涕爰加恤典悉按彝章进官序以甚优畀赏延而不吝尚惟英爽歆此宠灵

皇太后庆壽武学生加封祖父母父母定词上舍内舍生

敕具某人父某朕以祖后春秋益高乃月正元日恭侍慈皇仰奉庆礼錫类之恩溥及中外一命而上祖父母父母壽登八十者始得预此尔年方从心以有子列在右庠尝预舍选宠以命秩【祖父并父云进加命秩祖母并母云宠以恩封】最为优异其服明渙以迪壽康

外舍生

敕具某人父某朕以祖后春秋益高乃月正元日恭侍慈皇仰奉庆礼锡类之恩溥及中外惟尔有子【祖父母云有孙】列在右学年登八秩宠以恩封【父母同词加封云加进恩封】其服渙恩以绥吉履

胜捷下名都虞侯杨彦换从义郎王檝换秉义郎

敕具官某汝久隶羽林积劳可纪授以勇爵实应旧章往其钦承益务忠恪

王进之知德庆府

敕具官某尔顷以天府贰车往守武陵突不得黔已复报罢朕心悯焉晋康虽远实高皇兴王之地举以授汝以观汝能尚其懋哉毋替朕命

大理寺丞林季友吏部郎官主管侍郎右选

敕具官某郎曹二十有八莫剧于武选文书盈几难以徧察涉笔占位犹恐不暇非静而敏者未易得其要领也尔以儒者而通世务桐川奉最再转而丞於廷尉未久也选居星省遂典三铨鶚弁之士惟吏是听虽有抑滞不能自伸尔其念哉勉赞而长

浙西提举黄通本路提刑

敕具官某三丞出拥使节还为郎曹者多矣以尔之贤列属宪台丞於中秘使事修举宜俾来归浙河以西服尔清裁尔亦以静退自处无美於登仙就易祥刑之司以为畿甸之望表廉干儆惰偷民以不冤清我臬事朕岂使尔徒久於外哉

宗正丞郑公显浙西提举

敕具官某朕惟仓庾敛散之法山海摘煮之利分道置使所任甚专畿甸之间选用尤重以尔学赡而文敏外寬而内刚进丞司宗华问采畅兼掌名表蜀词最工持节有行去天尺五酌丰歉而赋政辨能否以简僚惟尔之能思所以称

龙图阁直学士程大昌除龙图阁学士致仕

敕引经告老为神虎挂冠之归念旧疏荣峻龙马负图之职以优耆德以表高风具官某秉操坚刚着书渊博蚤游册府擅温厚尔雅之文晚侍储闈赖直谅多闻之友十年笔橐人望素隆数路麾符民庸益着高蹈嚣尘之表久从香火之闲年既及於从心志欲祈於纳禄羽翼之资黄绮毋忘伐木之诗丘壑之有皋夔当遂考盘之乐尚祇明涣式介蕃厘

大府寺主簿林思济大理寺丞

敕具官某先王用刑之法莫详於甫刑一书有曰故乃明於刑之中率又於民隸彝尔蚤以经术先多士尝诵其言矣入仕朝行有靖共之誉廷尉选丞以尔为之其试所学以广朕钦恤之意

主管户部架阁孙元卿太学正

敕具官某尔以甲科自奋用为掌故之官更历艰棘盖久而後得之退然自莫亦既再岁贤关清选尔宜居之子率以正孰敢不正桥门之士将於尔观焉

修职郎权建寧府政和县尉胡杞擒获许伯祥等循两资

敕具官某警捕尉曹职也奸民寇攘尔能致之连帅有言何爱旌赏

余永弼知阆州

敕具官某阆风锦屏之胜士诵少陵之诗恨不得身到其地尔乃以二千石临之岂易得哉尔起儒门万里入蜀洵更事任雅有能称郡寄寢高事权益重无轻民事克勤小物则可以称此矣

王寅知江州

敕具官某长江上游以浔阳为重鎮分屯禁旅控御一面守将非它郡比也以尔三领左符老于吏治番易之政人多称之其殫抚字之心无改中和之旧使兵民晏然隐若敌国则不负选侯之举矣

丁逢潼川府路转运判官

敕具官某尔有志当世结知慈皇守郴阳使湖外又皆有声绩可纪今日有用之才也东川飞挽之重不以轻畀叱驭而往毋惮驰驱抚摩吾民廉察羣吏以称外台耳目之选是惟休哉

谢源明直焕章阁知温州

敕具官某朕遴选諫臣以广听览尔顷居九列旋冠宰掾察其坚正擢在骑省论事不回方向於用衔恤而归念之不忘亦既即吉起镇东土惟永嘉在左浙为望郡山川秀发衣冠鼎盛四邑相去才百里而负山并海壤地深远人物日庶事亦滋繁非得精明和惠之人未易办治尔其人矣尧章寓职以宠尔行俟讫外庸登进未晚尚其钦哉

干办审计司范荪太府寺主簿

敕具官某蜀之范氏如晋王谢人物辈出文献相望尔在今日又其翹楚也以世科发身以吏课交荐其在朝列退然若无所修综者而人自称之勾稽外府姑以序进勉绍家学以称所蒙

赵像之福建提刑

敕具官某七闽祥刑之寄选於衆久矣以尔被服儒雅屡持使节往司宗盟声望日着虽无预

於吏治已习知其民风就乘轺车不俟临遣听讼吾犹人也必也使吾讼乎圣人之言固未易及得情勿喜尚惟勉旃

江东连副传伯壽直焕章阁

敕具官某朕为烈祖圣学高妙昭回之光下饰万物焕乎文章尊阁惟谨寓直之宠不以轻畀也以尔天资警敏一日千里词章精赡连收三科登著作之庭於今十有八年矣按刑将漕益着外庸爰锡宠名以示褒表讨论润色岂其舍诸

朱翱大理寺丞

敕具官某惟尔祖光辅思陵尔父又登从列君子之泽未艾也尔被赏延乃能明习文法致身廷评出守辰阳奉最以归进之棘丞荣路无壅益勉厥职无忝尔先淮西运副赵师 太府少卿淮西总领

敕具官某国家分屯重兵布列江浒董饷之任必选朝士临之而金陵莫重焉尔决科自奋饰以儒雅有志事功所至办治尝使京口见谓敏明淮甸钱币更张之余赖尔抚摩调护之力民情悦服名称益彰兹以亚卿往司调度足兵足食复於尔观焉尚殚尔心以副详试之意

庐州修城官修武郎建康都统司中军权副将马再兴武显郎左军统领毛致通武经郎左军统制马通各转一官

敕具官等合肥当淮西一面俾葺坚城以固吾圉率衆庀工浹底於成各进厥官庸劝劳勩

同安郡夫人武氏进封才人

敕五官正宫闈日修於内则整齐品秩尤戒於私恩必有柔仪乃容序进具封某稟资婉孌履行纯和久承樛木之慈得备贯鱼之列疏封名郡锡号小君知閱时之滋深嘉率职之无怠登之女御示我壺彝位几近於九嫔爵亦侔於千石带弓箭而待君侧吾岂务於燕游理丝枲而献岁功尔尚勤於蚕织

知建康府郑侨吏部尚书

敕司筦龠於留都方资贤牧典铨衡於选部当任旧人乃播纶言载仪禁路具官某性资刚毅学力精深声华蚤擅於伦魁名节尤称於杰特训辞温厚信独步於一时朝夕论思率主盟於定议旋由夕拜进长天官闽部选侯洵更镇抚秣陵谋帅复藉保厘属兴宣室之思俾趣锋车之召渴闻说论日伫尚书之履声器使羣才更赖山公之啓事毋庸俟驾亟遂归班

赵师程大理寺主簿

敕具官某朝行簿领之官勾稽之外职业素简惟理官设属则有近制廷评奏当之成俾分考而订正之遴选非他比也以尔天潢之秀儒雅自将试邑佐州遇事不苟且尝列于朝矣其服朕命益观汝能

翰林医效王懋兼重华宫只应实及二年转一官

敕具官某朕只事重华尤谨于药石之奉尔以疡医奉职惟谨亦又再岁在法当迁俾陞尔阶其思所报

俞澂知常德府

敕具官某武陵为湖北名邦以壽皇潜藩地望增重总数州之戎事控五溪之喉衿未尝不迭侯而用焉尔出儒门明习文法有公廉之操得温厚之称尝守高安政适其平郎曹卿寺践历滋久起家剖符往镇遐服明听朕言无轻民事

中奉大夫焕章阁待制知鄂州王信磨勘转官

敕一麾出守久着于民庸三载陟明适登于吏考乃颁恩命俾进文阶具官某性识疏通材猷敏劭西掖擅演纶之美东台高批敕之风易镇会稽畅威名于近甸分符鄂渚增形势于上游兹以年劳应于治典虽曰有司之定制是为增秩之殊之荣益图尔功以谨忠报知明州何澹母太淑人石氏该庆壽恩封齐安郡太夫人

敕朕礼厚两宫当累洽重熙之际年登八袞奉隆慈备福之尊乃推老老之心庸广亲亲之道具封某氏起自名族嫔于大门善相其夫为部使者之贵亲见吾子任中执法之严方乘轻轩以就禄养逢国家之庆霈开汤沐之新封位正小君爰择黄冈之胜恩隆晚岁式增彤管之华益介壽祺以仪闺闼

太府少卿吴玘太府卿淮东总领

敕具官某国家东巡吴会列戍江淮惟此丹阳尤为近屏护饷既久可後褒升尔儒雅雍容克勤吏道详历版曹司金之职遂登外府亚卿之华顷以王臣往给军食调娱酬酢上下帖然就加惟月之班其服自天之宠勿替于旧益图尔功

迪公郎李阅父仪甫该庆壽恩封承务郎致仕

敕具官某尔积行有素年过九龄有子在官实应封典授之京秩以为尔宠

宫人张氏封郡夫人

敕朕日听外朝退修内治妇官具设尤严陞给之分恩命所加必视功容之懿具位某氏雅称柔履选自良家事官壺以服劳閱岁时而滋久啓封名郡进位小君仍颁禄秩之优庸示禁庭之宠其祗涣渥益懋芳猷训武郎临安府湖州巡辖递铺梁青违滞金字牌降一官

敕具官某置邮所以传命令达章奏矧制阃动系边事可少稽乎尔怠於职行不以时夺尔一阶以惩不恪

国子録陈邕武学博士

敕具官某尔掌教国子蔚然有称尝对便朝论事尤切长于右学益观通才武尚止戈兵实贵谋其以斯意训迪学士庶几得有用之才以备将帅之选焉

王介国子録

敕具官某士登甲科立致臚仕亦惟行谊有以称则得之斯无异辞尔当龙飞之初居俊秀前列辅邦入幕以儒雅饰吏是能称此科级者擢居冑监典我教事又能称此使学者宗之则尔之进未艾也

枢密院编修官许介宗正丞

敕具官某司宗有丞在颂台宪府之间非列寺比故其选甚高尔蚤擢乙科尝试剧县慈皇闻其善政就加增秩之宠再入修门其才益着比以编摩之职摄郎省参宰掾矣兹登清途务修宝牒益谨厥职以究尔长

王漑户部郎官

敕具官某版曹掌国之大计而左民尤为繁剧州邑之讼有不得其平者率造焉思得疏通详练之士久矣尔源流家传缘饰吏事往使於蜀精敏有余操赢赀以苏疲瘵尝加诏奨召对便朝审其可用往振兹职益观汝能

夔路运判冯震武户部郎官四川总领

敕具官某朕惟武王不忘远之意西南万里选才尤详矧总饷之寄动关军国见大夫临遣而行或不及事尔蜀国之产尝列於朝观风夔门能宣德意加以民曹之职就董五十余州之赋以给营垒之师民力困矣军须方繁足食足兵伫观儒效

太常寺主簿张贵谟司农寺丞

敕具官某尔学术该通论议根据一时清流也顷试剧邑乃有能声盖尝见於用矣勾稽颂台

进丞农扈虽曰曾预礼乐制作之事要须详试簿书期会之间尔惟通才其体此意

太社令陈岷太学博士

敕具官某尔以绍兴法从之孙自奋宏博之科宜仕於朝久矣徊翔幕府列属容台贤士之关
师儒虚位畴咨多士金曰汝宜温故知新尔其自勉

判建康府葛邲改判隆兴府

敕由端揆以殿邦允藉保厘之略为上流而易镇更资抚御之才爰授左符载扬明綍具官某
谋猷宏达德度恢洪三世名儒益致家声之显两朝异眷遂专国秉之隆矧惟旧学之臣久处
洪枢之任密参庙算既兼文武之资析解政机遂付军民之寄加延恩而寓职视上宰以疏荣
顾陈义以甚坚为相攸而改命惟襟江带湖之地可以优贤皆耕田凿井之民正宜坐啸其为
十运之帅式遄千骑之行噫尝本五兵弥觉偃藩之重周知万务岂云敛惠之难尚乞外庸益
绥休宠

新除吏部尚书郑侨龙图阁学士依旧知建康府

敕召还选部行领从臣之班居守陪京复分方面之任选用之遴中外则均具官某望重两朝
才高衆俊以三代之文掌我帝制以六经之学格於君心顷由天官出镇闽部旋畀保厘之寄
实资镇抚之功尚书喉舌之官固应图旧河东股肱之郡故特召君矧荒政之方修亦逊章之
沓至俯徇借留之志益高难进之风龙阁陞华用为尔宠麟符增重克成厥终益着外庸以绥
涣渥

知临安府钱塘县赵盛太社令

敕具官某惟尔先正光辅高皇配飨庙廷燕及後裔凡尔昆弟序进於朝社稷之司不以轻授
靖共尔位毋忝尔先

新知潼川府杨虞仲真秘阁知夔州

敕具官某夔子之国号称夔门盖蜀州之喉衿也谋帅之重实难其人尔西南望士三持使节
蜀之民服尔名已久尔亦习知风俗之详矣潼川未行易镇兹部寓直中秘以为尔宠民生凋
瘵非他路比罢行利害汙可小康其尚勉哉以称推择之意

进士张昉陈舜咨赈济补承节郎

敕某人荒政之修观分为急尔出私储以济饥民何爱一官用劝来者

承信郎榷货务检法使臣钱煜收趁增美转一官

敕具官某榷山海之利以佐邦储赏典最厚尔奔走其下亦预进官尚勉公勤思有以称

陈谦夔路运判

敕具官某夔门为蜀要冲川陆险絶刀耕火种民生甚难将输之寄甚重郡计实仰给焉非通敏之士不在兹选以尔有用之学洵试剧繁以南兰陵吏课之最领湖右敛散之权兹为朕行调度一道抚惠疲氓务去泰甚使田里得以安其生则朕之顾忧宽矣

知台州徐子寅广东提刑

敕具官某朕念广东宪台之重畴咨其人思得资高而练事法明而尚宽者居之大臣谓尔为可且曰是尝为卿为部使者帅维扬矣中更退闲起为汉东而治办丹丘之政民安而歌之使持节以按岭海其必有以称钦恤之意朕曰俞哉式遄其驱毋替朕命

奉议郎提辖榷货务谢俨收趁增美转一官

敕具官某榷筦之繁总於京邑尔不欺於职济以变通岁入之货坐致赢美可无褒赏以劝後來其只增秩之恩益谨有司之守

提点坑冶铸钱赵不迹淮南运判

敕具官某朕惟外台飞挽之司莫如东淮委寄之重兼宪使刑辟之任当使客冠盖之冲欲求通才得我贤族以尔奋由科级尤精吏能拥麾檄于三州屡书课最总货泉於六道式阜邦财俾行边强进专漕计尚思忠报益着外庸

文思院造皇太后尊号册宝监官从政郎陈庶监门儒林郎黄概各循一资

敕具官某朕以月正元日奉徽称於祖后白玉之牒镂刻甚工黄金之玺一铸而就虽曰有司之职实惟莅事之勤各进尔阶庸示嘉宠

干办审计司刘诚之太常寺主簿刘德秀大理寺主簿

敕具官某等列寺之属职皆勾稽惟容台礼乐是司实预讨论之事惟廷尉刑狱至重实分□议之司铨叙人才者尤不可轻授也以尔诚之声称籍甚持以靖共尔德秀文采蔚然不事表襮兹庸并命其进未央尚体优恩各扬乃职

福建提举张涛提点坑冶铸钱

敕具官某国家分道遣使各扬乃职惟货泉之寄总六道百郡之权归於一大有司视汉之鍾官辨铜其重甚矣非得通儒不以轻畀以尔抱负不凡词章精赡出入朝行见谓老成使於二部皆有声绩举以命汝其为朕谨调度察奸欺使邦财阜通朕岂久汝於外哉

宋之瑞福建提举

敕具官某尔以儒学之秀三仕于朝滋向于用而又引去朕亦念之七闽敛散之司职优而事重畴咨朕使起尔于家土之宦学不以仕已为喜愠上之用人岂以中外为重轻尔尚勉旃以俟光宠

从政郎扬州司法林櫟搜获铜钱循一资

敕具官某边郡严钱币之出而吏多不?尔能摘状遂正其罪选阶之进以懋尔勤

四川量试宗子伯扬时敏补承信郎

敕某人尔在属籍远处蜀道能以文艺优占科级锡之武爵尚其勉旃

镇江都统阎世雄管军五年职事修举转遥郡刺史

敕具官某国家分遣禁旅列戍江城京口扞蔽行都最为要近尔以宿将坐总戎韬威名隐然壁垒清谧五年于此宜赏贤劳遥刺侯邦是为异宠益思忠报毋替厥初

慈福宫内人安化郡夫人方氏彭原郡夫人高氏清河郡夫人邝氏竝转国夫人胡氏苏氏张氏竝封郡夫人

敕朕承累洽重熙之运奉隆慈备福之尊畴咨女御之良爰畀恩光之渥具位某氏稟资婉孌植行柔嘉选在掖廷蚤备妇官之列事予祖后寢更岁龠之深属庆典之告成演褒纶而逮下进封大国【胡氏苏氏张氏云啓封名郡】益懋小心

焕章阁待制赵不流换正任承宣使知大宗正事

敕拥东越之麾方腾吏课纠成周之族有赖宗英优加留务之班式宠从臣之旧具官某气和而智敏属近而行尊风分帝胄之华寢历仕途之久政成京邑尝进贰于司空身处辅藩讫褒升于次对来奉便朝之覲俾专属籍之盟示我异恩超廉车而授职藉卿宿望壮磐石以承休是曰当才奚劳多训

修职郎郑守仁贺正旦使亲属循一资

敕具官某尔父顷使敌国尔虽不预行役而善于子职使行者不内顾而居者得所安劳还之初亦被醴赏举行于今尚其只服

修职郎李良臣奉使书状官循两资

敕具官某岁遣信使信聘殊邻凡预驱驰均有劳还之赏矧以铅槩为职润色使华疊进选阶于汝何吝庆壽诏书宗子年八十以上使臣年八十以上愿致仕者竝转一官定词

敕具官某朕以正月上日奉祖后万年之觴霈泽四方及人之老尔在属籍春秋益高进以一阶用华晚节【使臣云尔在右列引年告老进官一等是为优恩】

宗子汝种与昉补承信郎

敕具等尔在属籍逢时覃霈能以文艺自叙科级予之武爵尚其勉旃

淮东提举陈损之创立绍熙堰除直秘阁

敕具官某水利本以惠农常平使者之职也尔使淮东善于其职建议任责迄观厥成俾来以图如指诸掌闭纵随时条流有序绵亘及数百里之远灌溉为千万顷之利农商俱济旱涝无虞使客漕运之往来咸有赖焉谢安为隩人以召伯名之尔通敏有余不扰而办名以绍熙淮民不汝忘也寓直中秘以宠尔勤朕所以待汝者何止是哉

姚槩知邕州

敕具官某南晋深入领右控制蛮方唐则分建五管今亦并护数州权任亚于连帅选侯顾不重哉以尔莅官不苟有趋事赴功之心治施於靖咸有声绩班班可纪今又命尔以此邦固圉寧民尚其勉哉

大理少卿许及之权礼部侍郎

敕廷尉天下之平游居卿列宗伯春官之贰径入从班是日异恩实由亲擢具官某才兼数器识综九流蚤以多文之儒务为有用之学方弹冠之伊始已脱穎而不凡禁閤拾遗得真諫官之誉藩方作牧有古良将之风比因奉最之归俾箴明刑之任惟庆霈既行之後当郊禋再举之时仪曹久虚礼典谁属释尔平反之重参予制作之司有功过于张之贤朕所知者虞舜命夷夔之事汝则兼之益勉告犹斯为称职

四川茶马朱致知京西运判

敕具官某襄汉将漕之寄虽所部不过数州而实兼诸使之职控制边要仍居上游不轻以授

人也尔起世家能以儒雅饰吏事尝守申伯随侯之国又三使於蜀矣万里召还复畀华节惟尔鼻祖致身九卿以桐乡之啬夫为汉世之循吏尔其苗裔当慕前烈以此位而行志岂不易于一啬夫哉

训武郎监榷货务陈仲坚收趁增羨转一官

敕具官某榷筦之重总於中都尔能其官岁入赢羨加之命秩以劝後來

仓部郎官郑湜大理少卿

敕具官某国家刑辟之寄总于廷尉而职则分任焉使习宪章者视狱之成而审听囚徒必命儒者临之其旨深矣尔少而发藻善为词章立朝有鲠亮之称治民有循良之效总饷江左威誉日耸郎潜未久卑尔臬事能深知设官分职之旨斯无负今日推择之意往赞而长亦惟钦哉

起居郎陈傅良秘阁修撰嘉王府赞读

敕具官某汉四皓起商山羽翼之功千古称之朕则歉焉使高帝能以卑辞厚礼聘之以辅其子则善矣尔以一世名儒羽仪於朝抗议不回引去甚亟尔与吾儿游旧矣尔既厌直承明之庐予亦闵劳以侍从之事宠之秘撰之寓职来为朱邸之宾僚尚遄其行庸副虚伫

带御器械霍汝翼复元官转观察使

敕具官某侍御之臣苟旷瘼而必罚岁时既久俾牵复以自新尔旧服禁严雅称详谨佩侯邦之组绶官簿寢高属宸陛之囊鞬戎容甚肃顷惩慢弛知务省循况更政典之修径授廉车之秩益思恭恪以对宠光

文林郎张允中该修壽皇玉牒循一资

敕具官某宝牒成书尝颁醴赏汝供刀笔亦与进官母曰例迁其思所报

前知建昌军赵彦礼拖欠月椿钱降一官

敕具官某盱江本江右佳郡一人坏之毒流至今尔自力于政而承积弊于二十余年之後给饷有阙无所归咎稍镌一秩以儆後來

沈合知岳州

敕具官某岳阳据荆楚之要郡虽小而地望实重焉尔清约详练资历寢深惟尔兄旧镇长沙

威望凜然父老类能道之试郡云初母忝家声则知共理之意

赵不遇江西提举

敕具官某尔顷以吏课之优为郎起部出守辅郡蔚然有闻江右敛散之重俾尔持节以临之昆弟三人少则俱列于儒科今又分道而为使者远有光华宗盟之美谈也其勉尔事以称所蒙

攻媿集卷三十九

<集部,别集类,南宋建炎至德佑,攻媿集>

卷四十

钦定四库全书

攻媿集卷四十

宋 楼钥 撰

外制

知婺州叶翥知绍兴府

敕辅郡承流久不听尚书之履价藩谋帅兹又怀太守之章允谓才难莫先德选具官某智周虑表学绍儒先践?既历三朝侍从亦踰一纪爱人利物由天性之自然足国裕民处地官而最久屡更剧地深惠疲氓尽销愁恨叹息之心尤见劳来安集之政眷惟东土密迳行都先帝上宾将奉因山之役大邦维屏益严分阃之除惟尔通材称予隆委规模素定既所临而有声威信兼行当不扰而自办伫闻成效奚俟多辞

新知绍兴府倪思知婺州

敕具官某视禁林之草允藉通儒分辅郡之符俯从忱请相攸既审易地皆然尔学优而醇文丽以敏早登宏博之选径上清华之途翰苑词垣擅两制丝纶之美经帷史馆极一时笔橐之荣擢贰仪曹独司邦礼拭圭出使握节言旋曾坐席之未温俄抗章而自列岂久劳侍从之事遂厌直承明之庐怀会稽太守之章至勤再命继东阳隐侯之咏去拥一麾勉为朕行毋轻民事词人而任岳牧初无内重之偏宣室之对鬼神当俟政成之後

夔路运判陈谦湖北提刑

敕具官某尔以君子儒为湖北常平使者蛮獠披猖省民惊扰船粟而往哺之尔之职也因摄宪台并任其责就设方略随以抚定朕闻而嘉之可谓不辞难者矣乃酌帅臣之言姑辍夔门之役兹庸命汝持刑本道以慰民望以獎尔劳其思永图靖此一方不汝忘也

湖北提刑王谦湖南提刑

敕具官某部使者之选以风采为先所以寄吾耳目于千里之外不欲其数易也以尔志操不凡居有直气其在郡邑声望翹然持宪湖陰正欲倚重易节隣部非以便尔之私又将于尔乎观焉尚勉之哉

判太史局降授夏官大夫吴泽降授中官大夫荆大声降授中官正刘孝荣同判局降授局令

周端友并复元官

敕具官某等天道高远王者欲求端于上必有日官以司之尔善于观象见谓老成顷以不谨尝镌命秩涉期而叙法也勿以为宜得而忘所报

修武郎监建康府榷货务门茅恭收趣增美转一官

敕具官某榷货之在留都岁入甚夥增美之赏司关者亦预焉进尔一官益勉而职

建宁府浦城知县鲍恭叔降两官永不得与亲民差遣

敕具官某县令与民最亲狱事所宜深察也尔为大邑以重辟告于郡却而复上几限平民于死迨冤状既白而欲便文以自解乎外台有言夺汝二秩不复使任临民之官尚为轻典也

中大夫焕章阁待制赵彦操转一官致仕

敕镇五羊之地方通持橐之班叩九虎之关忽上挂冠之请是为宗老宜厚宠章具官某受才素优莅政尤敏早参民部旋自逸于燕闲晚历藩方尝屡腾于课最眷南海折冲之略升西清次对之联闻圉圉之屡空见里闾之不扰胡为感疾遽欲乞身念帅阍之几年进文阶之四品郑尚书之威信日伫来归汉大夫之优游谅深自得以华晚节以励能臣

带御器械某知合门事

敕设上合之官岂惟掌朝会之事选名门之子抑以储将帅之才具官某志在事功家传韬略奏最于淮陰为侯之地易镇于亚父所封之城闻父丧而弃官人咨其孝承召命而引道朝赏其忠释苴杖以趋班属橐鞬而卫上授之以仲叔圉之任可使当公西华之言惟子道臣道之知方宜军容国容之俱习是将用汝尚其勉旃武功大夫殿前司选锋军统制李浩总辖牧放合转一官久任有劳转行遥郡刺史

敕具官某兵久不用军中累年劳以进武爵率有止法无得踰焉以尔久任戎务举军推其能出视駟牧善修马政宠以郡刺史之职盖异恩也其奋事功以图报称

侍御史张叔椿权吏部侍郎

敕朕祗膺丕绪董正具僚六部之分莫如选部之为重小宰之事岂应冢宰之兼行辍而风宪之严司我铨衡之旧具官某性资凝粹论议正平袭永嘉之儒风蚤收科级守文昌之家法雅擅乡评再策足于朝行几问津于禁路进班柱史君举必书掇事天官吏奸无蔽自擢居于横榻久肃正于南台当予御图三日之裨俾尔正位贰卿之列规模素定要须甄拔之尽公藻鉴益明无使贤愚之同滞副兹隆委成尔修名

左司諫章穎侍御史

敕具官某朕临御之初精求政体正心以正朝廷正朝廷以正百官朕之所务也然一朝之纲总于宪台一台之柄属于端公兹得其人他可类举以尔秉心坚正烛理融明学问之懿察于朱邱横经之日风节之峻见于谏省论事之际不俟信宿擢之南牀其为朕别白正邪振举蠹弊使君子有所恃小人有所畏四方风动而朝廷益尊于予初政岂曰小补之哉

右正言黄艾左司諫

敕具官某古者天子有诤臣七人而後之諫官不过一二苟非精择正士何以补袞职之阙哉朕御图伊始下诏以来直言旧学之臣声着骑省首命序进以示四方尔发藻士林负敢言之气事朕宗邸动有箴规辍任拾遗兼侍经幄风采凜然闻于中外兹庸命汝官以諫名予违则汝弼汝言则予从岂惟身处寡过之地庶几海内之士闻其风者有乐告以善道之益焉

国子司业李祥宗正少卿

敕具官某尔朴茂忠恪见推士林顷贰司成学者厌服盖平日践履之效是可以声音笑貌为哉司宗少列位亚容台叙百世之本支修累朝之史牒惟老于文学着述不倦者可以当之举以命尔公论惟允勇退之志亦可以少回矣

吏部郎官叶适国子司业

敕具官某国家萃天下英才而置之学选于衆而为之师经术由此而明人物由此而出岂细故哉朕御图之初思欲作新学者耳目求当今第一流素为天下士所推服者以正师席宜莫如汝矧兹郎潜资望俱称故用之不疑传不云乎善待问者如撞钟叩之以大则大鸣叩之以小则小鸣惟汝足以当此哉

司农少卿蔡戡司农卿

敕具官某大农本周稷之业自汉名官以来惟朱邑号循吏郑康成为大儒唐之段秀实以忠节自奋官人以重顾不信欤尔以儒术治行选为少列徊翔朝行最为旧人进而为长虽曰序迁益勉所长以绍乃祖之风烈何止为此官之重哉

刘光祖司农少卿

敕具官某忠直之士为国之宝本朝名臣岂无以直道去国者旋复召用以至大位此又祖宗之家法也况尔予之旧学相从有年执法殿中号称謇谔虽尝引去圣父任以外台帅阃之寄不使之一日家食也兹庸命尔为少列于大农实为多士先尚遄尔驱以副朕倾徯之意

显谟阁待制黄裳给事中

敕眇予冲人临政伊始惟我太上知卿最深朱邸谈经专任以辅导之事银台批勅又属以出纳之言虽抗论而迁厥官终留行而不使去至今日而复用岂人力之能为具官某学贯九流识通千古世居剑外擅蜀士之雄文地近关中挟西人之劲气是非邪正惟务体国利害祸福不知有身久从吾游备见尔蕴迨此纂承之日付之封駁之司将求多闻毋替谆谆之诲不负所学会观谔谔之言倚注方深权輿于此

新除起居郎陈传良中书舍人

敕朕嗣膺大统收揽羣才朱邸贤僚岂容居外紫垣老手宜俾为真具官某学探圣原文追作者论议多先儒之未发行藏惟古人之与稽相从两载之余信为三益之友谓左氏真得春秋之旨谓周官实为太平之书推祖宗之本心明政事之要道昔信其说将行所言首畀故官洊加新渥矧是纂承之始尤资播告之修大老之居海滨是将焉往旧学之遯荒野其遂来归式遄尔驱以副朕望

起居舍人彭龟年中书舍人

敕中书造命之地实王政之所先内史代言之官非贤才而孰处我有旧学时为名流擢登词垣实预国论具官某为有用之学抱轶羣之才惟其善养之气刚遂使所居之官大班分螭陞视言动而必书额叩龙墀抗威顔而不挠方朱邸横经之日多赤心忧国之言迨膺超除深允衆望训词温厚尔其振盘诰之文朝夕论思尔毋废箴规之益尚图忠报奚事多辞

将作监黄由起居郎

敕具官某王者嗣膺丕祚首用旧僚非欲私我所与而厚平日之恩盖将举吾所知以来当世之士列尔二史助予一人以尔蚤冠儒科久仪朝路不以仕已为意而益进于学不以利害为计而务极其言囊封既効忠嘉殿陛尤加剴切被眷知于慈宸为宾友于王门迨初政之方新与羣英而并进入则侍螭头之左凡论事而直前出则班豹尾之中亦在法而当从是为尔宠期懋予衷

著作郎沈有开起居舍人

敕具官某朕践阼云初涉道尚浅实赖二三元老力济多艰更资左右近臣交修不逮惟平日宾僚之旧分一时言动之书匪予敢私惟尔能称尔词华敏赡学术淹通蚤蜚场屋之声名久历胶庠之师表以着庭而兼史笔之重由郎省而参宰掾之司比从予游实自亲擢学为可用阅义理以滋多中自不欺乐讲论之日益其居柱下密侍朕前尚思嘉猷以助初政

参知政事陈騏知枢密院事

敕九五正位方承太上之传二三大臣俱极当今之选用人由旧锡命维新既久贰于政机宜进专于省府具官某气刚而不挠德盛而有容以博学笃志而为世醇儒以正色直道而致身近辅斯谋入告则惟后之德一夫不获则时予之辜厚重若绛侯而有多闻之学弥缝若如晦故无扬已之名朕念周业之艰难慕汉机之周密矐我元老长予本兵藉东省之猷为领西枢之方略事均一体威示四方噫折千里之遐冲顾岂图于近效建万世之长策正有赖于訏谟其务同心以康庶事

同知枢密院事余端礼参知政事

敕文武两途实归一道东西二府允赖兼资粤予非凉膺此付托乃进鸿枢之贰俾参黻黼之严具官某宅心粹夷植操坚特凜凜有大臣之体谦谦得君子之风寿皇知台察之名擢居法从太上眷储僚之彦授以本兵唯然形忧国之诚卓尔任正君之责言婉而切气劲以温故于宥密之司率藉调娱之力稽之公论蔽自朕心欲新政之设施宜旧人之图任是资共二有赖同寅噫朕方求内外之安经理于上尔尚虑军民之要弥缝其间庶几有成其永无斁

覃恩文臣承务郎以上转官选人在任并岳庙循资定词

敕具官某朕奉太上之慈训嗣守丕图践阼之初大敷霈泽京秩而上咸进厥官【选人在任云凡预选阶有官守者皆许序进岳庙云虽食祠禄咸许序进】盖将乐与士夫共起治功也各扬乃职以称异恩

文臣承务郎以上致仕定词

敕具官某朕仰惟太上不俟倦勤传祚眇躬覃霈之颁仕者进秩虽致其事亦预此恩老吾老以及人之老王者之仁政也朕心庶几焉

端明殿学士知江陵府王藺资政殿大学士知潭州

敕朕嗣居九重临制万国若刺史县令之衆未暇究详惟方伯连帅之功首当褒表眷时元老尝秉鸿枢抚荆楚者有年易湖湘之重镇具官某受天间气为世名臣直节高风真可立懦夫于百世之下崇论宏议将欲举明主于三代之隆受知两朝致位四辅过江而见王导有国何忧举衆而得臯陶不仁自远控长江之都会建大将之鼓旗固边圉以内周宣王灵而外畅惟予初政之急念兹旧弼之贤下诏求言方期乐告视邦选牧有赖于蕃惟此昭潭峙乎南服带洞庭而负乔岳扼岭峤而震蛮獠藉卿威名壮我藩翰加以大学士之贵用为东诸侯之先噫陶公之封长沙足倚上流之重贾傅之对宣室已深前席之思尚遄十乘之行以慰一方之望知常德府袁枢右文殿修撰知江陵府

敕具官某荆州居国上游自古为用武之地谋帅之重每叹才难以尔鯁亮之资渊博之学养气以义不挠不阿有忧国爱君之心有愤世疾邪之志一辞禁闼家食累年起镇武陵治行昭

着宠以论譔之职以殿是邦朕承丕图临制四方万里之远谓斯民宅生于刺史故大明黜陟以示好恶由支郡而受阃寄尔实为初政第一选固圉靖民可不懋哉

兵部尚书罗点父奉直大夫朝俊覃恩赠中散大夫

敕朕祇荷慈谟嗣膺大统爰敷旷荡之泽以及中外之臣矧喉舌是司兼领典铨之重而松楸在远方深陟岵之思乃分宠光用贲冥漠具官某天资纯茂族系繁昌早为君子之儒称于里社自乐先王之道老矣丘园尚及郗超入幕之宾不见纪骞隔屏之坐素多隐行遂为大门兹登五品之崇足慰九原之望贤子方用侯封未央其歆纶诰之恩继有蜜章之渥

参知政事陈騏该覃恩封赠

曾祖太子少保敦太子太保

敕朕只膺慈训勉绍丕图允赖迺臣共济万几之务爰因惠泽特推三世之恩具官某积善素深本心无竞恂恂有守既高月旦之评坦坦无营自乐衡门之老侈厥余庆流于後昆进参政地之崇追贲储僚之峻肆由亚保荐锡明纶用昭宠灵以慰冥漠

曾祖母始兴郡夫人成氏河南郡夫人

敕朕履位云初均福于下有如近辅之重可後曾门之光具封某生于儒家嫔此名族动谨珎璜之饰克供苹藻之仪是有闻孙晚参大政易翁源之旧壤开河内之新封陰报可知宠光未艾

祖太子少傅策太子太傅

敕图大宅中方布维新之令建极歛福寔均共政之臣爰举彝章加贲先世具官某履行纯固稟资粹和福祉未央见生子生孙之盛人门俱胜无慙卿慙长之名申命九泉遂登六傅【○六傅见晋书何劭传一本作太傅与下句意义混不可从】兹进在前之职用为有後之荣尚惟不忘其克祇服

祖母和义郡夫人朱氏博平郡夫人

敕惟时近臣翊予初政厥有霈泽光尔前人具封某素稟嫺柔能循法度中馈攸职宜其室家庆源既深有此汤沐载啓博平之号益崇石窀之封是为异恩以诏幽窆

父太子少师说太子太师

敕维予冲人嗣大历服无疆惟休均暨海宇凡列朝籍皆得以荣其亲矧二三大臣顾可後欤

具官某尚友古人为世善士安时处顺不求闻达蕴蓄弗露是宜有子既执政柄宠及泉壤义方之训盖可验矣乃进宫师以慰雨露之感英灵不昧其尚宠嘉之

前母平乐郡夫人成氏文安郡夫人母咸宁郡夫人王氏济阳郡夫人

敕大宝是守赖兹臣邻湛恩普覃燕及祔庙具封某克遵壶范能谨妇仪举案事夫聿追德曜之美断机教子无愧轲亲之贤既陟近臣屡扬恤典兹载疏于新宠用加峻于小君以宽吹棘之思庸示漏泉之泽

妻东牟郡夫人宣氏封鲁郡夫人

敕丕绪绍隆方履重熙之运臣工翊赞宜均内助之恩庸颁鸾诰之华以诏鱼轩之贵具封某静专自守俭约有闻作配名卿能勉以正克主中馈用肥其家视夫爵以疏封由霈恩而改命乃畴曲阜载锡赞书尚迪令猷以祇茂渥

礼部侍郎许及之该覃恩封赠

父朝奉郎枢赠朝请郎

敕朕祇荷慈谟嗣膺大统爰敷旷荡之泽以及中外之臣矧吾贰卿欲罢先世可无涣渥以发潜光具官某坦坦幽人恂恂长者惟居乡不变其素守而教子能知夫义方隐行有闻阳报如响亲见儒科之擢蚤欣宦牒之荣远奉安舆既愴九原之隔兹持禁橐何胜三釜之怀超官簿以升阶冠郎曹而视秩是为旷典少慰孝思

故母安人吕氏赠令人

敕九五正位方承与子之传小大羣臣俱有荣亲之典载颁明命以示宠光具封某淑静自将柔嘉可度嫔于善士克共苹涧之仪生此名卿徒起棘薪之叹既更事任遂陟禁严爰疏告第之恩以显漏泉之泽尚其冥漠式克钦承

继母太恭人五氏封太令人

敕【此下同前九五正位六句】具封某雅着壶彝恪循妇道俭勤自诏允为中馈之贤甘旨承颜坐享安舆之奉既登眉寿茂拥多祺乃因霈泽之行超示疏封之宠其祇朕命益侈尔荣

故妻安人洪氏赠令人

敕凡我从臣均此大霈爰及闺房之秀并膺纶綍之华具封某鍾庆相门流芳女范蚤从名士将仰望于终身胡嗇永年曾不登于中寿迨跻显用尝贲恤章兹超命服之荣用锡幽局之宠

姑从告第以慰悼亡

妻安人潘氏封令人

敕【此下同前凡我从臣四句】具封某稟姿静专处已冲素动遵女戒克循待傅之言躬习妇仪果见从夫之贵治组紃而有度奉温清以尤恭象服是宜鸾牋增宠其服恩光之渥以彰内助之贤

焕章阁直学士中奉大夫丘宙磨勘转官

敕具严铨法所以示百僚之公优待从班犹不忘三载之考爰颁命綍俾进文阶具官某以拔萃之才负爽邦之望进贰民曹之重心计有余出临井络之区威名益远方谋陟典适会年老遂升汉大夫之名用为蜀太守之宠其祇涣渥嗣有殊褒

见任侍从该覃恩转官

兵部尚书罗点【以下首尾词同】

敕朕嗣膺鸿祚祇遘燕谋九五正位之尊何德以称二百余年之业得人乃兴眷惟禁路之英皆我慈皇之旧爰因覃霈首示优恩具官某以经世之才为致君之学早登朝著益显时名久居侍从之班务竭论思之蕴末光之依日月既亲遇于三朝听履而上星辰足仪刑于百辟方藉嘉谋之告亟升命秩之华其务同寅以光初政

工部尚书赵彦逾

具官某砥砺廉隅磨砢事业挺身徇国是为贵戚之卿正色立朝遂陟文昌之贵

翰林学士李巘

具官某德必有言文斯贯道蚤仪鹄序径登紫橐之华进直鸾坡久被金莲之宠

刑部尚书京镗

具官某学博而智明才高而用大出分方面曾远瞻于王灵入践文昌实坐司夫邦典

兵部尚书耿秉

具官某持论不阿修身无玷参华武部久仪法从之班共二琐闥克振涂归之职

工部侍郎谢深甫

具官某忠结主知才周世务雍容禁橐屡形批勅之风润色邦条雅得稽经之意

给事中黄裳

具官某性禀精忠学穷奥义潜藩劝讲赖诱进以最深琐闼除官冀涂归之如昔

中书舍人陈傅良彭龟年

具官某学贯九流名满四海【彭龟年云学识纯明谋猷深远】横经朱邱遂依日月之光光制西垣期鼓风雷之号

吏部侍郎张叔椿

具官某迪德粹和受才肤敏久居横榻实高风宪之严兹任小天允致铨衡之重

户部侍郎袁说友

具官某器度恢宏风神峻整宣威天邑政允号于神明掌计民曹道深知乎取予

礼部侍郎许及之

具官某智术疏通词章精敏拾遗谏省雅有诤臣之风掌礼仪曹克守先王之典

起居郎黄由等该覃恩转官

起居郎黄由起居舍人沈有开【以下首尾词同】

敕具官某朕嗣应鸿祚祗遘燕谋九五正位之尊何德以称二百余年之业得人乃兴眷惟近臣实有旧学爰因覃霈首示优恩尔早负时名进多朝望曳裾王邸熟陈六艺之格言载笔殿?允谓三长之良史方藉嘉谟之益亟升命秩之华其务同寅以光初政

秘书少监兼权吏部侍郎孙逢吉

尔学贯古今识分邪正比当年责是为谏诤之臣兹典选曹雅善铨衡之职

侍御史章颖左司谏黄艾

尔早陟殊科进多雅望曳裾王邸熟陈六艺之精微执法宪台【黄艾云泽笏谏垣】独振一时之风采

监察御史并卿监郎官该覃恩转官定词

敕具官某朕嗣服云初求贤以自助仰惟慈皇招徕衆俊寔在周行殆留以遗朕也覃霈之恩其可後乎尔职在六察【秘书监云擢长道卿云列在月卿郎官云列在郎曹】序进一阶往其祇命之思所以助我者以报

在外大中大夫以上官知州府该覃恩转官显谟阁学士中大夫知绍兴府叶翥【以下首尾词同】

敕朕奉上皇之慈训承列圣之丕图霈乃涣恩覃于海宇矧是文昌之旧往宣屏翰之劳爰锡明缙俾跻命秩具官某材猷通敏德度恢洪听履禁途坐阅十年之久分麾帅阃实为九牧之先方歌求助之诗仍加进律之宠在汉比千石之秩于今为四品之阶其务钦承益思犹告

焕章阁学士大中大夫知明州何澹

矧惟中执法之旧往为东诸侯之行爰锡明缙俾跻命秩具官某学探蘊奥名冠伦魁入总台纲见藜藿之不采出临制阃致波涛之不惊方歌求助之诗仍加进秩之宠在隋始大夫之号于今正三品之阶

通议大夫焕章阁待制知建宁府陈居仁

矧是词臣之旧往宣藩服之劳爰锡明缙俾跻命秩具官某禀资端亮秉德忠纯擅西掖之雄文最宜为诰奏南邦之最课尤号近民

中大夫焕章阁待制知鄂州王信

矧是琐闥之旧往宣藩服之劳爰锡明缙俾跻命秩具官某词源浩博才刃恢余西掖东台尝备更于清选武昌夏口正倚重于上游

中奉大夫焕章阁待制知镇江府马大同

矧是文昌之旧往宣屏翰之劳爰锡明缙俾跻命秩具官某性资沈毅政术闳明持橐禁途尝主民曹之大计分麾京口实当天堑之要津方歌求助之诗仍加进秩之宠昔倪寛则以诵书而擢若晁错则由对策而除龙图阁学士正议大夫知建康府郑侨

具官某学通乎百氏文根乎六经领豹尾之班雅有公台之望分麟符之寄实为方面之雄

徽猷阁学士中大夫知襄阳府张杓

具官某才高一世气压万夫听履汉廷有张京兆之英誉分麾岷首追羊太傅之流风

中大夫敷文阁待制知建宁府单夔

具官某才猷肤敏政术疏通持橐禁途坐阅十九年之久分麾侯服屡称二千石之良

焕章阁直学士中大夫知兴元府章森

具官某风仪峻整学术疏通持橐禁途尝典铨衡之重分麾帅阃屡专方面之雄

大中大夫敷文阁待制知泸州吴总

具官某家声素着政术甚优四松而班殿廷实视从臣之清贵五月而渡泸水正资边徼之威名

大中大夫焕章阁待制知太平州蒋继周

具官某才名素着经术尤高宪府宣威尚想闻于风采侯藩共理亦屡赋于中和

宝文阁学士奉直大夫知遂宁府宇文价【知潼川府阎苍舒同词】

具官某禀资肤敏植行粹和听履禁途【阎苍舒云持橐禁途】尝出汉廷之右拥麾帅阃屡登蜀道之难

攻媿集卷四十

卷四十一

钦定四库全书

攻媿集卷四十一

宋 楼钥 撰

外制

在外大中大夫以上任宫观该覃恩转官

龙图阁学士正奉大夫韩彦直【以下首尾词同】

敕朕奉上皇之慈训承列圣之丕图需乃涣恩覃于海宇矧是文昌之旧屡从闲燕之居爰锡明缙俾跻命秩具官某才周庶务仕历四朝进长地官职论思而最久退安真馆奉趋谒以甚恭方歌求助之诗仍加进律之宠爱陟文阶之等遂冠侍臣之班其务钦承益思犹告

焕章阁直学士朝奉大夫谢谔

具官某纯诚自守全德兼容听履而上星辰已高勇退之节把麾而去江海竟寻嘉遯之风

通奉大夫显谟阁待制陈岷

矧是琐闥之旧久从藁馆之居爰锡明缙俾跻命秩具官某天资通敏门第高华入处东台早仪簪橐之列出临西蜀遂安香火之闲

中奉大夫敷文阁待制吴益

矧惟次对之旧久遂真祠之游爰锡明缙俾跻命秩具官某禀资和粹植行端良壮岁逢辰已列甘泉之侍高怀去国惟求藁馆之闲

大中大夫焕章阁待制刘国端

矧是论思之旧久从闲燕之居爰锡明缙俾跻命秩具官某秉心无竞持论不阿横榻宣威径上甘泉之列西清寓职遂安藁馆之游

大中大夫敷文阁待制贾选

具官某才周世务识照事机宪部持平蚤列甘泉之侍闽山报政遂安藁馆之游

在外大中大夫以上致仕官该覃恩转官

龙图阁学士通奉大夫张大经【以下首尾词同】

敕朕仰奉慈谟嗣膺圣绪肆颁大霈覃及万邦当代英才虽赐环而毕至前朝故老乃上印以言归顾注想之方深岂涣恩之可後具官某纯明而有执亮直而能容諫大夫之伏蒲明行甚肃大常伯之听履物望愈高挹神虎挂冠之风寓龙马负图之职居然寿考允矣典刑比歌求助之诗庶有乞言之福爰陟文阶之峻用为晚节之华其服宠光益介繁祉

敷文阁直学士正奉大夫汪大猷

具官某性通而自节道广而能周雍容簪橐之班凡有谋而必告出入麾符之後乃未老而求闲辞荣上北阙之章寓职峻西清之旧

正议大夫宝文阁待制沈枢

具官某风猷高迈政术淹通扬历禁严尝任宫端之重周旋郡寄遂专帅连之雄聯次对之清班乐辞荣之嘉遯

朝散大夫敷文阁待制李昌图

具官某才周通变气稟直方登蜀道之难屡称肤使出汉廷之右遂列从臣通次对之清班乐辞荣之嘉遯中奉大夫万锺直龙图阁守本官致仕

敕具官某朝廷用人岂容其无故而去臣子纳禄或遂其知止之高尔以文奋身以才用世外临两郡既治行之有闻内列九卿非宦游之不达方将执笔于左螭之陛乃欲挂冠于神虎之门畀以河图之华成而縣上之隐是或一道毋有遐心

著作郎李唐卿江东提举太常丞吕棐湖北提举

敕具官某等朕惟一人之聪明不能周知天下之故分道遣使不惟寄耳目于外临遣朝士又得以宣布予之德意志虑于民常平以敛散为职括山泽之利事顾不重哉尔唐卿心平而论笃久于著作之庭尔棐气劲而言忠丞于礼乐之地俱以儒学老成见于有用治县称最寘彼周行辍从郎曹将我使指一往大江之左一往重湖之北各扬乃职朕不汝忘

知建康府郑侨吏部尚书

敕金陵为王者之宅固有藉于保厘吏部有天官之名尤欲精于流品粤求旧德复领从班具官某执德不回秉心无竞举明主于三代之上倡诸儒以六经之文论思不憚于犯顔封駁尤高于批勅出临乡部载守留都肆纂承丕祚之初乃董正治官之日亟颁召节方欲听尚书之履声尽付铨曹岂令书干木之纸尾伫闻猷告其疾尔驱

太常少卿詹体仁太府卿

敕具官某容台之礼乐外府之财用其实皆政也後世治出于二而後有流品之分然礼以养人为本又曰乐以殖财惟知古道者能言之尔好古而志于用顷由道山册府出为常平使者远护军储能声益昭归处少列明礼修乐亶惟其长序进卿长上以佐民曹之调度下以梃有司之出纳以若之才不劳而办朕将思所以用汝者焉

监察御史曾三复太常少卿

敕具官某宪府设属以六察为重容台少列非七寺之比寿皇厌朝士之数易御史钱薦或二三年而不迁若其察事能审敢言不阿擢居礼乐之司不以为吝士亦以此竞劝朕之用尔盖此道也尔气刚而克和才敏而能详其在周行表表自立报政于辅郡简僚于南牀助正台纲阅时最久朕知其有靖共之誉故拔而用之礼方从宜大飨伊迺引经据古使礼行于上而人孚于下朕于是望汝焉

李壁秘书省正字

敕具官某惟尔父尔兄并游英俊之躔有臯绶之遗风无歆向之异论能继厥後尔惟其人自登世科亟寘册府銜恤万里素冠三年招收来归复畀旧物岂惟以是正简册望汝史事甚重尔有家传朕将于汝乎求之

知枢密院事赵汝愚该覃恩封赠

曾祖太子太保士虑少保

敕朕祗膺慈训勉绍丕图允赖迺臣共济万几之务爰因惠泽特推三世之恩具官某宅庆璇霄聯芳宝牒少而从宦虽官政之莫施孝以宜家谅躬行之无媿侈厥余福流于後昆进参宥府之崇尝贲储寮之峻兹畴故典遂陟孤卿用昭宠光以慰冥漠

曾祖母安郡夫人龚氏崇国夫人

敕朕履位云初均福于下有如近辅之重可後会门之光具封某生于儒家嫔我皇族动谨珩璜之饰克共苹藻之仪爰及诸孙进居两地遂啓封于大国以锡命于小君陰报可知宠光未艾

祖太子太傅不求少傅

敕图大宅中方布维新之令建极歛福实均共政之臣爰举彝章加赉先世具官某履行纯固稟资粹和生长承平及见累朝之全盛始终信厚遂臻後叶之繁昌进秩青宫申命黄壤兹以湛恩之布径跻亚傅之荣尚惟不忘其克祗服

祖母济阳郡夫人晁氏濮国夫人

敕惟时近臣翊予初政厥有霈泽光尔前人具封某素稟嫺柔能循法度中馈攸职宜其室家庆源既深有此汤沐载啓濮阳之号益崇石窀之封是为异恩以诏幽窆

父太子太师善应少师

敕维予冲人嗣大历服无疆惟休均暨海宇凡列朝籍皆得以荣其亲矧二三大臣顾可後欵具官某孝友实根于天稟躬行无愧于古人为吾宗盟之表善言善行称于搢绅即世之後隐然不忘是宜其有子也宠及泉壤遂冠六傅兹以周官贰公之秩以告于第且以慰雨露之感英灵不昧其尚宠嘉

母饶阳郡夫人李氏申国夫人

敕大宝嗣守赖兹臣邻湛恩普覃燕及祢庙具封某克遵壺范能谨妇仪四德备全協山水之高趣三迁垂教为廊庙之钜贤屡锡恩封以昭宠遇乃开申伯之国载彻饶阳之封以寬吹棘之思庸示漏泉之泽

妻通义郡夫人徐氏安定郡夫人

敕丕绪绍隆方履重熙之运臣工翊赞宜均内助之恩具封某婉嫺自将柔嘉可度克相夫子遂为当代之名卿乃嗇天年不见机庭之异数亶敷宠渥岂间幽明用畴涇水之封载彻眉山之旧尚惟英爽欽此恤章

签书枢密院事罗点初除封赠

曾祖起太子少保

敕延登迓臣翊赞初政维时伟望进参宥府之严庸锡明纶以厚曾门之宠具官某持身无玷制行有严寡悔寡尤自洁幽人之履以嗣以续遂开余庆之源厥闻惟彰其後乃大爱畀青宫之秩用疏黄壤之恩尚惟不忘其克只服

曾祖母陈氏临川郡夫人

敕参宥密之司是谓百僚之表焕显扬之典宜加三世之荣具封某妇德素充姆仪尤备柏舟自誓知勤苦以成家彤管有光笃义方而教子至孙曾而遂显信陰报之不诬锡命小君疏封乡郡以侈漏泉之泽以彰告第之恩

祖琢太子少傅

敕士有积德在躬弗见于用施及後嗣追荣厥先于百年之後岂人力所能致哉具官某孝友天稟义概素笃人不间于其昆弟之言深沈不二安分知足长者之号着于乡党积此庆美笃生枢臣申命九泉遂登东储六傅之秩如有知也庶克自慰

祖母邓氏新兴郡夫人

敕登用大臣所以赞庙谟也锡命之初则必有以宠其先世又所以示优典也具封某勤俭柔淑如古贤妇克相夫子以广义风为族嫔之所依赖含饴之爱素笃于生前虽不及亲见其贵而汤沐之颁方来未艾荣亦至矣新兴名邦用贲冥漠惟尔灵其预享之

父赠中散大夫朝峻太子少师

敕积厚流光既陟机庭之峻位高宠厚肆崇祔庙之恩厥有故常式昭涣渥具官某操履纯固性资靖夷共被对床素深同气之爱指困倒廩尤高周急之风是锤令子之贤亲见儒科之擢速超登于近着尝屡被于恤章进位宫师疏荣泉壤庸示教忠之效庶寬追远之思

母齐安郡夫人缪氏封通义郡夫人

敕遴选名儒密赞紫枢之贵推恩贤母式颁鸾诰之华具封某性秉贤明动循鉴戒从夫协趣克共苹涧之仪教子有方首擢桂林之秀承顏甚乐就养有年受福祉而未央见宠光之狎至兹易眉山之号用崇石窀之封其服异恩益介遐寿

妻赠淑人黄氏永嘉郡夫人

敕进秉事枢实倚朝廷之重载疏汤沐以旌闺阃之贤具封某稟姿懿柔处已庄静毓庆儒族知女则之不踰作配名卿循妇仪而克谨云何不淑弗见显庸兹畴瓿海之雄用锡鸾牋之宠姑从告第少慰悼亡

妻淑人陈氏封咸安郡夫人

敕进秉事枢实倚朝廷之重载疏汤沐以旌闺阃之贤具封某鍾庆相门流芳女范无违夫子形鹄巢积累之风宜其家人有鸣鸠均一之德克谨旨甘之奉居惟法度之循兹开名郡之封用锡赞书之宠其祇异渥益懋芳猷

中书舍人彭龟年兼侍郎

敕朕自临帝位首辟经帷详延旧学之贤不改潜藩之旧具官某始以德选久从吾游素知朕意之所安况有诏书之备列不待多训自应具知惟孟轲所着七篇之书非战国以来余子所及盖尝三复其说间有一得于中若知言养气之难存心尽性之妙人无不善圣可践形正须反覆屡陈使予通彻无蔽若夫爵禄之制井地之规凡诸所传皆我当讲食云则食坐云则坐朕当审尊贤之方义莫不义仁莫不仁尔其务正君之学

给事中黄裳礼部尚书

敕朕嗣膺大统首擢旧僚然建安七子之贤先推徐干商山四皓之盛最数黄公径跻八座之崇庸侈一时之盛具官某学足以充其性辩足以达其心贯穿经史之言而纚纚可听论议古今之变而历历如睹自予幼学屡得良师若夫上皇委任之专潜邸游从之久无间于我未有如卿规过举则何止血山之言执正道则不数邪蒿之说开性天之所蔽知学力之自来幸不容甘盘遯野之行是宜被伯夷典礼之命孺子王矣方夕惕以尔勤良言旨哉尤日资于献纳其祇予训益勉尔忠着作佐郎王容范仲黼并着作郎秘书郎王奭校书郎蔡幼学并着作佐郎

敕具官某等学士大夫以道山册府比之蓬莱瀛洲之胜而着作之庭又其高选也尔容学博而文优尔仲黼忠纯而意笃既皆升处其长爽之远业幼学之英才又均使为之佐或以伦魁而声称昭于时或以名门而学问世其家是皆称此选者朕笃意人材共兴治功公卿将于此乎取何止以史事而望汝哉

秘书省正字颜棫秘书郎项安世吴猎并校书郎

敕具官某等比岁一日给札而得三俊馆阁之盛举也然秀颖之才将于此乎养之以待用若棫之声名发于上庠猎之才略着于剧县安世之节概又士论之所推是三人者不惟老于文学又俱练于世故举而用之何所不可况年皆自强而艾固无俟乎菁莪之育也兹命棫典中秘书猎与安世为校讐之职姑以序迁朕将有以用汝焉

浙西提刑黄通湖南运判江东运副傅伯寿浙西提刑

敕具官某等朕分道遣使以寄耳目于外地有远近职有剧易选任之意则无不均尔通以谅直之姿抗澄清之志使于近畿威望甚耸引疾求退故畀尔以湖外漕计少休其劳尔伯寿以精敏之才在文章之选使于江左职业日修惜其久外故授尔以畿甸臬事引以自近然飞挽谏议二者俱重事也一日不理则必有受其弊者其各勉旃以称予选

知枢密院事陈騏初除封赠

曾祖太子太保敦少保

敕朕嗣守大宝凜乎重器所赖左右大臣辅其不逮乃由政地进陟机庭追荣厥先是有彝典具官某隐德不耀躬行有余孙子相承代传清白之训施及三世遂登庙堂推恩泉壤至于再三是必有以致此也兹举周官孤卿之秩以告于第尚惟歆承嘉命佑尔後人

曾祖母河内郡夫人成氏滕国夫人

敕夫人之号古者谓之小君历观在昔盖未有无因而得之者也具封某躬节俭之行有柔嘉之德克相夫子以肥其家陰功所昭至于孙曾而後见汤沐疏宠盖尝历始兴河内之郡今兹封国间于齐楚庶几冥漠其克自慰

祖太子太傅策少傅

敕学士大夫必知尊祖非独礼典之攸尚至于为世显人往往推迹先世之所自隐德彰着其应不诬具官某出太丘之华胄生赤城之儒族栖迟衡泌不以利欲贰其心躬行之笃见信乡党虽不及施用于世而积厚流光屡被追荣之典兹登亚傅品秩益崇如有知也可以无憾

祖母博平郡夫人朱氏崇国夫人

敕妇人之爵必从夫子若夫异恩之颁加责王母非二府大臣则不预此具封某动遵图史雅习组紉妇道甚饬隐然朱陈之好也含饴之爱素笃虽不及亲见其贵而积善之效乃暴白而不可掩疏封一国以为庙室之光

父太子太师谔少师

敕陈氏着姓自妣汭之後历三代建国不絕汉以来多名卿大夫百世相望君子之泽未泯亦可谓盛矣具官某以隐逸遂其性以诗礼训其子内行之积既有以大其门闾而教忠之效卒为朝廷之端士存歿虽异哀荣则均夫三孤之长貳公洪化有子如此遂申命于九泉岂惟慰尔子深长之思亦所以示予体貌之意

前母文安郡夫人成氏杞国夫人母济阳郡夫人王氏信国夫人

敕延登枢臣所以赞庙谟也锡命之初必有以宠其先世又所以示恩典也具封某稟姿婉嫕处已俭约有光彤管之训不愧采蘩之诗是有贤子为吾近辅副筭六珈屡颁石窀之封矣兹彻沐邑改命于杞伯所都之地【王氏云命于广信之区】以劝天下之为人妇者

妻鲁郡夫人宣氏封魏郡夫人

敕朕初膺丕祚晋用近弼惟东西二府兼以任之夙夜匪懈是可不厚其内助之恩乎具封某性资贤明能循法度归于名士用勤俭以起其家闺阃之政不以累焉使得一意精白以承休德是足嘉者兹啓大名之郡以诏予宠其尚祇服永绥燕誉

知枢密院事陈騤该覃恩转官

敕朕祇荷慈谟钦承丕绪万几之务每惧弗堪共政之臣实资夹辅因霈恩而申命览迩牒以力辞序进一阶仅同百辟具官某忱恂而坚正浑厚而温恭久处从班以嘉谋而入告自居宥府任大事以不疑比当内禅之初尝求小愆之助善调庶事动怀永图执义示公惟知议军国之利害忘身徇主岂复计官资之崇卑乃诏攸司俾行故事不已循墙之避遂忘反汗之嫌矧东府弥缝之是兼尤当代观瞻之所系姑循撝谦之志稍行进律之褒噫文武兼资尚深思于并用内外无患当益勉于交修惟肩乃心以翊予治

参知政事余端礼该覃恩转官

敕朕以寡昧之资传泰安之祚既登九五之正位允赖二三之大臣盍因覃霈以疏恩终以谦辞而改命具官某崇深而有裕庄肃而能容幼学壮行终始勿渝一节出藩入从精白不形二心比参鸿枢实赞初政俾进居于东府仍兼领于宥廷一日万几之繁既调娱而曲当三军五兵之问又该综以无遗虽官簿之当升曾身谋之不顾命由中出事则公行何陈义之益高乃抗章而不已姑徇三辞之请仅升一秩之华噫訏谟远犹乃所望于贤辅高爵厚禄岂有吝于予怀其尚钦承以副隆委

四川制置使丘密焕章阁学士再任

敕乘乾德以御图始受四方之籍念坤维之作牧久分一面之权眷威惠之并行岂恩荣之可後宠加延阁因任帅垣具官某道广而能周才高而善下躬履冰霜之操手挥河汉之文握节拥麾所在着神明之政簪笔持橐周行推仁义之言顷出镇于成都实总临于诸道先声所暨远俗自孚泸川除暴之余施赏刑而曲当武兴阙帅之久藉方略以无虞兵民无不归心奸宄为之破胆封陲宴若政绩炳然东西六十州敢违号令幅员数千里燕及羌髳寬朝廷之顾忧信京师之流福尧章增焕正学士之清班蜀道借留慰吾民之素望示予隆睠表尔异能德裕筹边何止山川之洞见孔明识治或言礼乐之可兴益懋前功以需登用

朱熹焕章阁待制侍讲

敕朕初承大统未暇他图首辟经帙详延学士眷儒宗之在外颁召节以趣归径登从班以重吾道具官某发六经之蕴穷百氏之源其在两朝未为不用至今四海犹谓多奇擢之次对之班处以迓英之列若程颐之在元佑如尹焞之于绍兴副吾尊德乐义之勤究尔正心诚意之说岂惟慰满乎士论直将增益夫朕躬非不知政化方行帅垣有赖试望之于冯翊不如置之本朝召贾傅于长沙自当待以前席慰兹渴望尔遄驱

翰林学士李嶽宝文阁学士知婺州

敕登鳌户以摛文久资润色分虎符而出守有赖蕃宣中外虽殊眷倚无间具官某性资渊静学问该通视八代文章之工欲齐驱于艺苑极三朝辞命之选几独步于禁林周旋十年终始一致古事今事问无不知公门私门行皆可迹方进迁于翰长何遽动夫归思宠西清学士之班仍寓宸奎之职为东方诸侯之长更当宝婺之躔是诚岳牧之用人宜有江山之为助徒得君重其为朕行勉着民庸以观儒效

检正应孟明太府卿

敕具官某尔以纯一之德惻怛之诚见于牧人御衆之间备着爱民利物之效召由帅阃徧仪宰掾盖朝列之老成士林之标表也外府上佐大农之调度下柅有司之出纳卿士惟月实艰其选举以命之公议允谐问津要途自兹始矣

右司徐谊中书门下省检正诸房公事吏部郎中钱象祖右司刑部郎中沈作宾检详

敕具官某等朕初政是图惟二三大臣夹辅之赖枢机至重当先其大者岂可以细故萦之于是详择掾属以次而迁尔谊深沈而善谋尔象祖详审而无滞尔作宾在郎曹有通敏之称其为朕简节疏目清东西府之务俾吾大臣惟振纲絜领以赞予远猷则尔为称职矣

吏部郎官李沐将作监

敕具官某东都李固好学寻师同业不知为司徒合之子其所成就复为李公尔以辅臣之子退然寒生蚤擢甲科仕进甚缓文敏而蔚追企古作郎潜既久避远繁剧处之缮监以遂其志素尚如此远业未可量也军器监承汪梓仓部郎中大理寺丞周珙刑部郎官

敕具官某等列曹为郎其选俱重非治郡有声绩者不预焉国家行之几三十年弗可改也已尔梓博涉文学有志事功出守都梁边防甚饬尔珙明习宪法恪意操守濡须之政田里妥安况俱以名臣之子尝在朝列奉最而归宜登兹选肆令并命以究尔能积贮者天下之命寛仁者累圣之规深体至怀各赞而长

兵部侍郎耿秉焕章阁待制知太平州

敕入而奉上为言语侍从之臣出则殿邦任蕃宣屏翰之寄士之从官是为通显国之用人初无重轻第于临遣之间终惜老成之去具官某天资鲠亮政术精详自其居下位之时已有泽斯民之志功利及物既所至而可称恳惻爱君凡有猷而必告甫上甘泉之列亟求故里之归旋即赐环复令持橐为真武部固有赖于论思摄事琐闥尤见推于抗直比力祈于补外亦深察其由中畀以当涂真是太平之官府宠之次对仍聯两禁之清班用昭眷怀增重侯度访民瘼之疾苦谅无假于训辞控天堑之要冲尚往图于方略勿以在远而忘献言大宗正丞李大

性军器少监兼权司封郎官

敕具官某朝士之职优而事简者无如二监非所以处才者然而铨序人物具有差等不可废也尔一门竞爽刻意记问出而丞边郡入而筦周行心计有余遇事多办进贰戎监仍摄郎曹益务靖共以俟选择

大理寺丞彭演大宗正丞

敕具官某朕惟国家本支百世繁衍盛大高出近古既择属近行尊之贤者以纠合宗盟又选学士大夫以贰其事职虽清简不以轻畀也以尔经术该综吏事精明丞于外府于廷尉践扬既久而後登此盖亚于三丞之选仕益进矣优游养望其进未央

大理司直朱致民大理寺丞陈朴大理司直

敕具官某廷尉天下之平而国家设属为尤备囚徒之听自昔以吉士临之奏当之成今又使分董而察焉以尔致民儒学老成久预臬事故俾升而为丞尔朴才具资品皆应近制故以为邦之司直朕嗣服之始专以祖宗家法为务虽罔兼于庶狱惧不获于一夫各既乃心毋懈于位

太府卿詹体仁直龙图阁知福州

敕具官某朕览长乐之志知其地大物阜真东南一都会也帅守抡才初政为急以尔学问该洽性识深明试之剧繁所在办治入为九卿向于用矣愿求闽部求便其私径疏昼锦之荣仍畀河东之直跨州连邑要风气之不殊并海负山赖威名而为重倚观政绩以究尔能

广西运判张釜直秘阁知广州

敕具官某朕临御万国一视同仁岭海之远待犹畿甸矧番禺重镇实控南服谋帅之际其何可轻以尔绍兴旧弼之孙以家学登世科润饰吏事所在称办湖湘明歛散之宜广右谨将输之要就移五筦之长以当一面之权寓直道山以为尔宠尔其填抚远氓招徕海贾斥贪残奖廉介以称予倚任之意是惟休哉

知建宁府陈居仁知镇江府

敕由词掖以偃藩久腾善最分辅邦而易镇用奖贤劳宜锡明缙以昭宠数具官某风猷凝粹心地平夷识者叹其远道之资望而知为大度之士文华纬国久从凤沼以代言愷弟宜民屡以虎符而出守恩威并用宽猛适时不惟人乐其中和所至岁为之登熟眷兹京口控彼江津城郭增雄有山川之映发兵民杂处无牒诉之浩繁属旱魃之为灾赖贤侯之勤抚毋庸临遣亟望遄驱坐理南徐其首修夫荒政时登北固尚有赖于良筹惟服训词嗣图褒表

泸州安溪寨蕃官王鉴男天麟承袭补承信郎

敕某国家填抚万邦燕及方外惟尔父祖恭顺相传尔之承袭请命于朝武爵之颁益务忠谨

江西运判赵玘直显谟阁知隆兴府

敕具官某国家选侯甚重谋帅尤艰既惩数易之繁重戒迎新之费就移使节俾正帅垣尔受才甚高得誉最早以文学之彦为慈惠之师其在合肥极论淮钱之弊迨移夔子载言蜀戍之详主漕计以宣劳总邦条而摄事抚綏凋瘵赈救凶灾因江西颂韦侯之言念河内借寇君之意径令洗印以遂开藩俟讫外庸成尔归志

沈清臣江东提举

敕具官某士有自重其身而轻视轩冕嘉遯于世而独乐山林是虽出于一概较之浮竞者相去远矣此有国者之所当与也尔以古学为任不计时之用舍顷游馆学从予潜藩俨然自持古之畏友也兹予纂绍念尔退闲起以江左之节用慰家食之久其尚少安以俟恩渥中书舍人蔡幼学兼侍读【以下二首嘉定元年以吏部尚书兼翰苑偶西掖无兼员用故事行词并附于此】

敕春秋天子之事具存一国之书笔削圣人之公实为万世之法朕久勤讲贯期广见闻兹择名儒共论斯道具官某深知经旨素有师承未冠而擅论魁士皆取则既壮而登膺仕人以为迟近升禁路之华庸代王言之重予欲旁通夫六艺岂容弗措于一辞所以至日昃而不遑庶几学古训而有获惩恶劝善其力究于微言考古验今将益明于大体

蔡幼学讲诗终篇转官

敕朕践阼十五载尤先讲贯之勤诵诗三百篇端赖缉熙之益谈经既毕第赏可稽具官某早冠时髦寢为朝望践扬已久既昭着夫外庸献纳于今喜时陈夫说论谨凤掖代言之职当金华卒業之辰序进文阶以酬儒效其罄格心之学用为报上之忠

攻媿集卷四十一

<集部,别集类,南宋建炎至德佑,攻媿集>

卷四十二

钦定四库全书

攻媿集卷四十二

宋 楼钥 撰

内制

拟进郊祀御札【绍熙五年也 是年七月光宗禅位宁宗未尝郊祀篇中有寢历六年云云盖在光宗未禅位时豫拟而事不果行】

朕只膺慈训嗣守洪图仰天地之储休以绥四海赖祖宗之垂裕寢历六年欲涓长至之辰载举亲郊之礼膏泽可占于农扈信盟久缔于邻欢浹可小康敢忘昭报率由旧典无事虚文上万壽于重亲式严孝治均蕃厘于兆姓匪乡朕躬按令甲以陈仪体先庚而申命朕以今年十一月只事于南郊播告中外之臣咸谨骏奔之职其飭尔事毋愆于仪故兹札示想宜知悉

拟立皇子喜王皇太子制

朕只若大猷绍休列圣念承祧之重允属元良惟主器之严莫如长子仰稽古制详考旧章匪予一人之私繫尔四海之望诞扬明綍敷告天廷皇子具位某夙稟谦恭动循仪法生长帝王之胄周旋诗礼之经迨予纘承勉尔谕教宏开邸第宠之茅土之封妙选英贤为之羽翼之助而能服勤讲贯尚论古先閱义理以滋多屏骄奢而不顾朕惟储贰不可以旷位国本宜先于正名其从朱邸之尊入处青宫之重於戏立嫡以长所以绵宗社之休为下得人所以系臣民之望

拟进登极赦文【绍熙五年七月五日】

朕共为子职日守宗藩烈祖上宾曾未释服圣父违豫几不胜丧属上意之倦勤屡思退托蒙太皇之出令遽命纂承眇兹冲人膺此大器惊惶失次涕泣固辞谓二百年社稷之传岂容执逊惟亿兆人讴歌之戴久已属心仰有体于慈谟俯难违于衆志只承丕祚以抚万方自维寡昧之资深思付托之重祈天永命用绵龟鼎之休发政施仁首播风雷之号可大赦天下【云云】於戏奉三无以劳天下敢怀以位为乐之心歛五福而锡庶民盍布与物惟新之泽罔闲遐迩之衆咸瞻旷荡之恩

季秋淫雨震电罪已责躬诏【绍熙五年十月】

朕临御以来三閱月矣迺者洚水为灾畿甸尤甚悉意賑抚未知攸济而又陰气为沴天作淫

雨继之震电信宿犹未已也时维季秋实已孟冬兹岂其时耶变不虚致朕甚惧焉岂朕之德薄不足以承祖宗之休烈抑眇躬有过朝政或阙而致然欤云汉之诗遇灾而惧终篇惟及靡神不举靡爱斯牲等语盖言如此而天灾之见罪必在我侧身修行之诚见于言外此朕之所当勉也朕欲应天以实而方执壽皇之丧避殿撤乐皆无以自见惟是罪已责躬其曷敢後布告中外使知朕恐惧修省之意

孝宗祔庙德音【绍熙五年十二月】

朕躬绳祖武日懋孝思万邦之君允有貽孙之典七月而葬适当同轨之期怅莫报于皇慈惟谨襄于大事卜夏禹巡狩之地近高庙衣冠之藏载谋载惟既营神域必诚必信已窆灵輿迓吉仗以言旋肃太官而班祔縗仪云备旧制可稽固已遵三年之通丧体累朝之俭德蠲除浮费戒节虚文然念遗诰初颁都下有奔号之扰因山之际国人多供亿之勤未免烦会稽之徒宜特肆栋阳之赦神只效顺咸议恩封官吏宣劳均行赏赉寛井里之赋调清圉圉之縲囚庸推泽物之仁用继忧民之志於戏苍梧不返人心惟慕于重华温洛未归陵邑尚安于永阜咨尔有衆服予异恩

改嘉定元年诏

朕嗣承大统勤抚庶邦更星纪之一周见历元之三易频年相继寰宇多虞边衅遽开顾生灵之何罪虫蝗为孽与旱潦以相仍皆权臣误国之致斯在菲质应天之敢慢方今典刑已正纲纪益张乃因正月之和适际三阳之泰诞扬大号亶告多方取商宗嘉靖之言暨周王耆定之义用光嗣岁式迓休祥庶几叶气之薰太平可望行见万民之集得所为期衍丕祚于无疆与斯人而更始其以明年为嘉定元年

戒饬贪吏诏【嘉定元年三月十四日】

朕临御以来仰遵累朝恭俭之规菲食卑宫靡敢怠遑庶几躬行以移风俗而志勤道远观感未孚况以奸幸弄权故相同恶上下交利贿赂公行赃吏债帅益无忌惮监司为吾澄按之官郡守受吾民社之寄至相仿倣贪婪无厌反恃苞苴狼籍已甚席卷帑藏或盈钜万郡县经费耗蠹几尽军民衣食椎剥无余积敝有年虽悔何及大臣簠簋不饬殆弗容迁就而为之讳也朕方厉精庶政与民更始申加训饬以警有位继自今各务精白一心以承至意其有并缘公家以济其私尚为故态必罚无赦至如互送无艺屡形切责遐方循习曾不少悛并当禁戢或彻听闻考验有迹皆以赃坐呜呼咎莫追于既往法欲励于将来宜存素丝之风毋蹈覆车之辙使人知自爱罔或敢干冀民力之少苏期士风之益媿朕意厚矣尚其戒哉

戒饬四川将士诏【嘉定元年四月九日】

朕端居法宫慨念蜀道敢泄迩而忘远庶一视以同仁自叛将之既诛与斯人而更始已讲休兵之策冀臻彻戍之期惟是师徒屡更征役暴露久矣夙宵惕焉每咨督饷之臣仍饬列屯之

师究心调度加意抚循然而养兵于无事之时在国家而靡吝効命于多虞之日乃吏士之当为饒馈运之或愆及勤劳之弗恤罔孚朕志岂追官常凡尔在行亦宜深体其有狃于姑息不知律纪之遵妄肆謹譁几失等威之辨流传易惑关繫匪轻爰颁一札十行之书用严三令五申之制各思戒儆毋抵宪章

闵雨求言诏【嘉定元年閏四月二十六日】

朕惟祖宗传祚之重只惧靡遑而自去岁以来蝗蝻为灾冬既无雪春又不雨以至于今陂泽扬尘种未入土夏且半矣祈禱不应间有霖霖未能通济天灾流行固亦有之在于今兹关繫实重边鄙甫定流徙未复漕运不至余价日增苟失岁事何以保邦朕于宫中斋心致祷又将躬谒于灵神且飭臣邻广求民瘼六官帅漕各令条具可以慰安人心消弭天变者矣载惟云汉之诗靡神不举靡爱斯牲祈年孔夙方社不莫祈于天以及父母先祖不见责躬之言盖宣王谓周家祈禳之典既已备举而旱既太甚是必在我有以得罪于天其遇灾而惧侧身修身之意藹然见于言外朕心慕焉固知大军之後必有凶年不敢以此自解也传不云乎屋漏在上知之在下人苦不能自知其播告中外凡朕躬之不逮朝政之缺失与夫田里愁叹之由军民疾苦之状尽言无隐朕将采而用之庶几以实应天冀消灾沴以迄康年无小无大惟既乃心称朕意焉

右丞相钱象祖等以旱蝗星变待罪不允诏

朕临御寢久兢惕靡宁更化以来厉精深切虽边鄙有息肩之日而民生当望岁之时旱魃为灾飞蝗肆孽方阳光之煜画见太白之争辉岂天道之难知实朕躬之自致无所归咎惟知反身尚虞抑塞之未伸正欲交修于不逮腾章来上忧国良深有何愆尤而欲引去退惟凉德詎可不移于大臣所冀同心庶以灵承于上帝尚安厥位益远乃猷

赵彥逾再上劄子辞免端明殿学士并执政恩数不允诏

卿以起部太常伯领?从班主耳忘身预陪国论金陵吾之北门固以谋帅为重文明之峻职政府之异数所以宠卿之行今欲辞二者而之镇顾岂若留卿以自近乎朕虑之甚审久而後发不应至此乃复反汗无以多言为也

新除安德崇信军节度使伯圭辞免不允诏

朕肇禋重屋惧弗克堪赞予盛仪赖我宗老首颁祭泽无加于达尊者乃因旧镇益以汉东之大国备三公之典策兼两镇之节旄先正以为异数非如卿者其孰能当之何用撝谦以避斯宠

新除少傅周必大辞免不允诏

卿三朝元老身佩安危退处东山直欲弃置人间事顾岂以爵秩为心哉朕初临御注想不忘下诏乞言疏恩进律亦可以见朕意矣覃霈之颁无远弗届安有达尊如卿而可但已保传一间不必固辞逊草甚力非朕所望

赵汝愚再辞免提举编修国朝会要不允诏

卿进专国秉总领衆职无所不就固无待于兼官也国家以史事为重故必择其尤重者属之上相叠畀三组既已再命而又欲辞其一何耶会要之书故实所萃诸儒载笔坐总宏摹兼人之才岂复惮此其只成涣以訖奏篇

吏部尚书郑侨辞免兼实录院修撰不允诏

高宗中兴临御三纪一代之史简册拏?设官累年汗青无日朕既命大臣为之典领思得鸿儒耆德为诸儒倡卿自陪都还朝表仪从班论撰之重非卿谁属矧惟旧物不待畴咨趣上奏篇毋劳谦避

吏部侍郎彭龟年辞免兼侍读诏

朕开迓英之阁瞻无逸之图上慕唐虞近法祖宗正有赖于啓沃之助卿以旧学之臣劝讲多益升之进读亦惟序迁朕方汲汲于旧卿欲济济相逊固经帷之美事也然虽有德齿之尊不曰朝廷莫如爵乎其毋固辞徒稽朕命

王藺再辞免知潭州不允不得再有陈请诏

惟有周之盛时以分陕为重任故烦旧弼往镇边陲升秘殿之隆名易昭潭之巨屏輿言允协忧顾滋寛胡为再辞至勤三命粤汉诏流行之既久谅楚人徯望之已深倚闻叱馭之行毋执循墙之避

新除四川安抚制置使赵彥逾辞免不允诏

蜀道险远人所惮入一之为甚其可再乎然朝廷为官择人不免于推轂以遣忠臣忘身徇国岂难于叱馭而行昔赵拊以匹马入蜀为政简易及其再命神宗谕之曰近岁无自政府复往者卿能为我行乎拊曰陛下有言即法也顾岂有例哉今朕知卿清节着于蜀遂用熙宁故事卿能体拊之忠其得辞行乎

新知鄂州吴玠辞免不允诏

卿奋自戚閤被服儒雅虽斋坛授钺棘位通班人终以用未尽其才为言矧襄汉上游尝腾善最武昌重地宜分顾忧何必固辞亟其只命

赵彦逾再辞免新除端明殿学士中大夫四川安抚制置使兼知成都府不允不得再有陈请诏

蜀道天下之极险也然以为难则难于上青天以为易则易于履平地是在人尔卿尝总军饷度历五十余州公廉明恕蜀人诵之兹庸命以制阆之寄蜀父老闻卿之来必有不待教而孚者矧视仪政地位望愈隆尤足以示朕不忘远之意谋帅之重盖无以易卿者矣赵汝愚辞免大礼加食邑实封不允诏

朕只事总章惧弗克堪卿以端揆实专使领天地并祝神明顾歆熙事备成显相之力也赋以多邑具有故实既免告廷之礼何事循墙之避

新除刑部侍郎梁总辞免不允诏

卿少习宪章历观棘寺为郎为卿皆以此选正以明练吏事心计有余遂持使节遂董军饷擢贰民曹俱称职若今秋官虚员舍卿尚谁属耶明允笃诚若自道万里使使还径俾为真金曰汝谐何辞之有

吴玠再辞免不允不得再有陈请诏

朕立贤无方惟才是用亦不必曰右贤而左戚也尔尝主漕计总军饷出帅襄阳皆有治状可纪而强仕之余使之奉祠燕处可乎鄂渚兵民杂居号称难治正倚才刃勿复谦辞

王藺辞免覃恩转一官不允诏

朕嗣位云初覃霈四方小大之臣罔不均被卿以元枢旧德出镇雄藩序进一阶亦惟彝典忽披逊牋殊拂眷怀其服恩光毋留朕命

周必大再辞免少传不允不得再有陈请诏

朕勉绍丕图方修初政首推霈泽溥及羣工惟予元老之贤宜陟孤卿之秩偃息而藩魏室何必在廷寅亮而命周官是为进律载披来奏殊拂眷怀卑于公尊于卿亦惟均耳一而俯再而伋何以多为兹系具瞻毋庸固避梁总辞免奉使回程时转一官不允诏

卿辍自从班远使邻国服劳已甚成礼而还序进文阶厥有旧典往只涣命何事谦辞

知明州何澹辞免曾任藩邸讲官转一官不允诏

卿顷以儒英授经于朕逮予嗣服眷注不忘求之近比当进两秩旧僚逊避俯徇其请在卿又何辞焉宜遂钦承母至于再

知泰州韩同卿辞免改授正任观察使在京宫观不允诏

朕勉承丕祚肇正中宫尔为后父之亲召自淮壖之守眷惟相种本出儒门属王姬下嫁之恩致武爵流传之衆兹优戚閤超授廉车俾仍奉于内祠盖一遵于典故是为允惬其又奚辞

赐观文殿学士致仕李彦颖银合茶药诏

朕只绍丕图缅怀故老卿前朝旧弼佑我烈祖遗荣告归世推典型比进嘉言尤见忠荃一水间之日劳注想爰颁饮剂以实宝奩问劳有加将予至意

赐龙图阁学士致仕程大昌张大经敷文阁直学士致仕汪大猷显谟阁待制致仕程叔达宝文阁待制致仕沈枢敷文阁待制致仕李昌图银合茶药诏

朕寤寐贤俊怀思老成卿顷侍孝宗夙着声望引经告老【张大经改垂车告老】世推典型逮予纂承渴于一见爰加问劳仍有匪颁体予至怀无忘忠告

资政殿大学士黄洽辞免覃恩转一官不允诏

朕践阼云初访予落止缅怀旧弼尝下求言之诏矣乃因覃霈俾进文阶国有彝章非有私于卿也其服训词毋烦多避

周必大再辞免少传不允不得再有陈请诏

朕嗣膺洪祚注想宗工比升孤棘之班实霈蓼萧之泽虽云恩厚非曰予私凡卿之言近已行于一二顾朕所与辞何至于再三若夫勋爵之科尤匪尊贤之意尚承眷渥毋事劳谦

殿前都指挥使郭杲辞免修盖大内福宁殿等特转一官减三年磨勘回授不允诏

朕俯徇羣臣之请归安广内之宫顾栋宇之崇成命工徒之劳止卿亲临鼙鼓祇事殿岩讫役云初懋官可後既有勋恩之命毋烦避宠之词

知枢密院事陈騏乞归休不允诏

卿儒学老成有大臣体肆朕纂服方原倚毗何为露章遽祈间退谋猷克壮神明未衰其谨辅予无事力请新除知枢密院事余端礼辞免不允诏

朕惟宥廷之任事体至严非长材不可以济时非壮犹不可以经远卿兼资文武久赞枢机辅政以来输忠无隐辍自中台之贰进专西府之权蔽自朕心益隆兵本是为妙选非以叙迁公论具孚逊章可略

新除参知政事京镗辞免不允诏

卿以通敏宏达之才受知烈祖擢之法从付以全蜀太上召还文昌有意大用肆朕纂服登贰西枢关决筹帷动称朕意是用进参机政以究经纶之蕴镇浮应变卿所优为眷倚方深毋庸多逊

新除同知枢密院事郑侨辞免不允诏

卿久仪禁路人望最高垂上政途详试帅阃天官之长至勤三入西枢为贰盖已晚矣朕访落求助二三大臣是托以卿宏才素蕴练达国体急于登用以冀治功其只成命以图回本兵之务勿以谦避为烦也

正议大夫陈騏辞免除职与郡不允诏

朕惟释政机而均逸者大臣全进退之宜畀华职以示宠者累朝笃始终之眷矧惟耆哲朕所倚毗专西枢本兵之权兼东府基命之地俯徇忱请暂分外藩恩礼加优典章可考少须除命何用谦辞

王藺再辞免覃恩转一官不允不得再有陈请诏

朕勉承基绪犹惧弗堪实赖臣邻相与协济不有近辅孰为之赞襄不有价藩孰为之屏翰霈恩所逮中外惟均矧如旧弼之贤方倚上游之重需章洵至涣号难回其遂钦承毋为固避

御史中丞谢深甫辞免兼侍读不允诏

进读云门自昔高选肆朕纂承之始首务详延妙择法从之贤不以轻畀以卿器资端亮学问淹该议论正平实长风宪俾侍经幄士莫之先胡为引辞尚留朕命令行弗反倚听嘉猷

新除资政殿大学士陈騏辞免不允诏

卿器资刚毅经术该通久任事枢临机辄断力祈闲退善始以终况辞藩屏之除愿处祠庭之佚由衷有请反汗无嫌若规殿之隆名乃大臣之彝典再披逊牋殊拂眷怀用荣买臣衣锦之归毋作考父循墙之避

攻媿集卷四十二

卷四十三

钦定四库全书

攻媿集卷四十三

宋 楼钥 撰

内制

新除户部侍郎袁说友辞免不允诏

版曹天下之剧任也而卿为之之时尤难向来国家多故事绪浩穰经费之外又增不时之须属岁大禋调度不给卿儒学俊茂旧历清华通敏有余独任大计内之无阙供之急外之无诛求之怨满岁有奇劳亦甚矣为真已晚又何辞焉

新除少师永寧郡王郭师禹辞免不允诏

阜陵之役重事也朕不得躬执紼之劳祖遣有行号慕弗已卿以王之元舅国之信臣辨护宣勤为朕任送终之责往来顺济上下无譁礼备安虞归祔太室卿得以报孝宗之恩朕可忘所以赐卿者哉进长孤棘仍加王爵既涣告廷之命何烦避宠之词亟其钦承朕言不再

伯圭辞免兼中书令不允诏

中书造命之地令公师长百僚清贵华重古人谓之凤凰池者也国朝之制率以宠异亲贤然祥符天禧以还久不除此官矣惟公明德懿亲贵重无二三公两镇何以加此爰举旷典以赉宗正既无兼管内枢之烦复得老成典刑之重涣汗大号毋庸固辞执谦虽勤礼难曲徇

太府卿吴玘辞免换授正任观察使在京宫观不允诏

卿生长戚闈儒雅自将佳公子也名曹缮监践有年總饗殊方寢升卿列贤劳既久宠以赐环廉车内祠用循故事非以为褒美也春秋方富而才可用岂遂投闲哉母事牢辞其只朕意

新除观察使谢渊辞免不允诏

卿以祖后至亲往为使介风埃万里不憚驰驱成礼而还褒升可後廉车之峻遂登从班毋庸空辞思所以称此则善矣

知绍兴府叶翥辞免除龙图阁学士不允诏

孝宗因山之役凜然惧不克奉大事文昌老成尹兹东郊遂委己以听焉神明不衰心计有余酬酢万变调度百出卒之礼成而无缺典用足而节横费朕心嘉之絕江不风入山而雪谓非卿之力耶进职龙图姑以示宠朕之所以待卿者非止此也而又何辞焉

知枢密院事余端礼辞免摄太傅持节导孝宗灵驾及奠謚册謚宝监掩攢宫转一官不允诏

比者营图东越襄奉阜陵卿以本兵之崇亲临复土之重往来俱顺上下无譁涂潦方深蹇蹇尽王臣之节顔色尤戚栾栾有棘人之风朕方笃孝思幸周大事既赖送终之助首加进律之褒是所宜然无可辞者

郭师禹辞免备礼册命宜允诏

卿以只奉阜陵显颁制綍升孤卿之峻秩封异姓之真王册命之仪朝廷当备控辞甚力引义尤高虽俯徇于谦冲顾岂忘于嘉叹

赵汝愚辞免不允诏

卿辅朕初政备宣忠力兹奉孝宗大事厥功茂焉褒崇之典所宜优异正以卿素执谦冲避远权势凡有进擢辞逊过礼或至迫而後受故尤思所以处卿者初拜右揆已授此官还以畀卿是不为过毋复牢辞朕必不为反汗也

宜州观察使孙璫辞免孝宗随龙特转一官不允诏

列祖上宾孝思日切仰威灵之如在率礼不违念攀附之几人独汝无怠爰自廉车之秩特升留务之班其服异恩寧容反汗

参知政事京镗辞免孝宗祔庙毕特转一官不允诏

朕尊奉皇祖无所不致其厚而送终之礼祔庙尤严卿以辅臣相此盛仪已事而竣可後褒赏进以一秩诚不为过赏有先後既已均及卿可独辞乎

皇伯祖伯圭辞免赞拜不名加食邑实封不允诏

天下有达尊三爵一德一齿一而未及言亲也惟公德明爵齿俱尊而又孝宗同气之亲太上皇之伯父而朕之大父行也贵穷人爵思所以尊异之非举旷典不足以称紫微令公既以谦辞而不受朕其可遂已乎不名之礼盖自尚父保衡以来实朝廷之殊礼前朝尝以宠待亲贤百有余年无有可当此者举以命卿人无异辞尚形逊避朕不敢从邦之荣怀亦非朕敢私也

知枢密院事余端礼辞免兼参知政事不允诏

朕图回治功方倚二三大臣以为重卿顷自参预进长枢廷宰席偶虚俾兼政地兹惟典故亦今之宜非卿通才何以任此亟其承命无事谦辞

新除观文殿大学士知福州赵汝愚辞免不允诏

卿以肺腑之戚为社稷之臣翊戴眇躬辅相初政力足以任天下之重识足以断衆志之疑倚毗方隆引去何速虽有议者亦无异词遂释台符往分帅阃极秘殿之殊宠实累朝之旧章事君以忠卿既全出处之致退人以礼朕当笃始终之恩尚冀告犹毋庸辞命

余端礼辞免权提举编修玉牒监修国史日历不允

朕惟国家以史事为重典领之任必命大臣宝牒之设盖古者书之于策之遗意日历则以事系日後之信史实基于此卿问学通博摄行相事非卿其谁宜司之成命已行毋容多逊

参知政事京镗辞免权提举实录院编修国朝会要不允诏

高皇帝中兴之烈当遂特书累朝庶政之规尤宜分类故实录则取史迁之旧而会要亦用唐室之余爰命大臣职此二者卿素推该洽俾视纂修其躬率诸儒以趣成大典兹为故事何必谦辞

宝文阁学士知遂寧府宇文价乞奉祠不允诏

卿以文昌旧德往镇蜀藩居外数年所在称治方此政成于大府正资卧护于远民忽腾谗疾之章欲遂奉祠之请眷倚之重神明未衰其乞外庸毋违朕志

提举临安府洞霄宫赵汝愚辞免观文殿大学士不允诏

大臣进退之宜固知有义人主始终之遇尤当示恩矧惟宗工析解机政念忠劳之素着曾倚注之未衰歔然赋归若此勇决闽山旧镇既避宠之甚坚书殿隆名岂升华之可已谅还寓里暂佚真祠其体眷怀毋为多逊少保周必大再乞致仕依已降指挥不允诏

七十致仕虽着于礼经二三大臣难拘于古制矧惟元老尝冠中台周旋两朝负荷重事既于蕃于南国终退处于东山神明未衰德望弥劭奉真祠之香火自乐隐居挂神武之衣冠胡为早计抗章再至陈义愈高顾难徇夫冲怀尚少安于素履

宝文阁学士知太平州李巘乞宫观不允诏

卿老于文学久处禁林出守当涂日俟报政胡为谗疾欲遂求闲朕方念典刑之旧望屏翰之良卿岂不能体此眷怀为斯民而少留乎

余端礼辞免右丞相不允诏

朕承付托之重思绍祖宗之大业志勤道远悠哉未艾置相之际其何敢轻宁槐位之暂虚必畴咨而后授卿纯明笃厚秉德不回入从出藩望实兼着本兵贰政三载于兹论事有诤臣之风谋国得宰相之体具瞻攸属显拜不疑惟今亦多故矣朕欲赖卿以济书所谓若济巨川用汝作舟楫卿其以此自任副朕倚毗万斛之载惟卿为宜而又何辞焉

新除知枢密院事京镗辞免不允诏

朕惟圣人不畏多难而畏无难于今虽曰边鄙不耸而宥密之司正当为不虞之备无竞维人朕于是注意焉卿以慷慨宏远之资有志事功立节于殊邻宣威于全蜀纂绍之始一见而决擢贰枢筦风采凜然预政未几复为之长迹若序进实繇德选当仁无逊其又何辞

新除参知政事郑侨辞免不允诏

朕以寡昧嗣无疆大历服惟二三大臣是赖凡今日德望在人为国家用皆两朝选擢留以遗朕者也卿周旋从班雅有公辅之器登之枢筦人以为晚顾岂以日月为功乎参预政途金言为允宜遂佐朕宏济多艰引避抗章非朕所望

新除端明殿学士签书枢密院事谢深甫辞免不允诏

卿始以县大夫奏事孝宗一见以为有唐人风亲擢再三如恐不及上皇用卿于谏省试卿于天府而登之从班肆朕纂承辍秣陵之行而寘风宪之长进读金华引以自近用卿之意久矣宠加书殿升贰几廷卿岂未知朕意耶何避宠之力也亟其只命毋用费辞

新除权兵部尚书张叔椿辞免不允诏

卿出入朝列?历最深凡今要途多出卿後文昌入座乃尔世官端粹亮直之资视名父以无愧台纲谏省久矣贤劳进长夏官朕命惟允往其率职何事谦辞权兵部尚书张叔椿辞免兼侍读不允诏

惟卿先正以经术侍孝宗于潜藩逮居文昌实兼露门卿立朝不阿雅有父风听履之初仍命进读此搢绅美谈也何辞之有

右丞相余端礼辞免权提举编修玉牒实录院编修国朝会要不允诏

史册之成欲传于万世国家所重莫盛于三书大事则续为镂玉之编中兴则未就汗青之简况举纲而撮要欲踵事以增华宜有宗工并修钜典卿尝兼二者未浹四旬既进秉夫钧衡俾尽专于笔削宅百揆而熙帝载惟尔之休总衆职而称上心非卿孰可

参知政事郑侨辞免权监修国史日历不允诏

朕惟史事至重功用浩博惟以事系日谨而书之则後之信史于此乎取分命诸儒而领以大臣国家之令典也卿以儒英出入册府有年矣兹参大政命总宏摹良史之才加以学识公议所属尚何辞焉

户部侍郎袁说友辞免兼侍讲不允诏

卿性资闇敏儒术该通虽当主计之繁每切爱君之念方御图云始首辟经帷而建议独先能发朕意前所陈请旋已施行近因献纳之余复上课程之奏深嘉忠荃俾与讲明惟说论之是求何需章之为逊亟就还英之列以裨典学之勤

新除吏部侍郎林大中辞免不允诏

卿天资鲠挺论事不回比以久居台端慈皇盖尝命以小宰之职矣去为剧郡召归近班既殚批勅之勤庸畀典铨之任践?惟旧选用匪轻清吾文部以助官人之能不亦休哉避宠丐闲非朕所望

新除吏部侍郎兼太子左庶子娄机辞免不允诏

天官贰卿之司有资铨综春宫中护之职尤遴选抡卿性稟深淳才猷挺特以天下士从吾儿游顷寻里社之闲久乐祠庭之适兹方更化首遂建储思得老成之人以重元良之辅亟颁召节重上从班毋庸固辞式副虚伫

新除开府仪同三司充万壽观使杨次山辞免不允诏

朕维新庶政豫建储闾属时戚閤之贤久安均逸进视鼎司之贵岂曰示私卿素迪忠勤居怀静退谨容仪而就列允为耆艾之英养戚重以闾门尤服满盈之戒逮兹播告曾靡异辞览巽牋之亟陈顾谦怀之难徇其只成命母拂予衷

新除权兵部尚书兼侍读倪思辞免不允诏

朕惟奸臣窃权上下蒙蔽导谀献佞习以成风卿至朕前独效忠谏谊气足以激颓俗英词足以发壮怀凤鸣朝阳何足以喻迨兹更化可後趣归来对便朝言议益伟武部之长露门之读姑引卿以自近耳往其承命母执牢辞

新除礼部侍郎兼侍讲章良能辞免不允诏

卿夙富青箱之学来居紫橐之班兼直北门典司东观朕惟亲军旅之务非以待词翰之臣仪

曹既俾为真经帙仍资劝讲爰总夷夔之任实亲褚马之贤金谓汝谐卿毋多逊

右武大夫文州刺史知合门事杨谷辞免除观察使不允诏

爵惟馭贵当昭示于至公恩以及亲遂优加于彝典卿起由戚晚列在朝绅入仪宾合之司归服家庭之训克存孝谨不见骄盈爰稽閱岁之劳超进观风之秩需章来上几不自胜涣汗既颁固难曲徇其益坚夫素履庶长保于令猷

右武郎知合门事杨石辞免除观察使不允诏

名器至严岂容于轻授恩荣加厚遂越于常规卿毓秀后家通班朝路素有义方之训密参宾赞之司居存忠勤深避权势爰考践?之旧躋升廉问之华成命既行固难反汗逊辞来谏尤见益恭其体至怀以永终誉兵部尚书倪思辞免兼修国史兼实录院修撰不允诏

国之大典尤贵于择人史之良才当先于求旧卿蚤尝再入素擅三长孝宗擢之著作之庭先帝处以献纳之任皆参笔削具在简编兹当更化之初方以得贤为喜式资班马之体追配商周之书允谓汝谐尚何多逊礼部侍郎章良能辞免改兼修玉牒官不允诏

古者大事书之于策玉牒之所由起也唐始建官而未若本朝之重写之精缣度之邃殿他书莫严焉以卿比司记注久居史馆是用任以大事之重凡例昭然具有书法翦繁撮要作宋一经以诏来世方以此望卿而又何辞

吏部侍郎娄机辞免兼太子詹事不允诏

召还紫橐固有赖于吏铨肇廷青宫尤遴求于端尹卿性姿凝远问学老成久为资善之寮实谓甘泉之旧雍容引去恬然自如属兹更化之初矧复建储之重载烦哲艾以辅元良毋庸固辞服我休命

攻媿集卷四十三

卷四十四

钦定四库全书

攻媿集卷四十四

宋 楼钥 撰

内制

端明殿学士四川宣抚副使安丙乞宫观不允诏

卿沈毅善谋尤长将略内鉏臣奸外御强敌履天下之至难为全蜀之司命虏实畏卿如所谓祭北门祭西门者然彼之披亦穷矣乃睠西顾嘉叹不忘方升书殿之班以重阃外之寄胡为引疾愿解印章朕方赖卿以当一面贤于长城远矣卿其身任保障之责以称朕意京西湖南北路宣抚使宇文绍节辞免除宝谟阁学士不允诏

入陪经幄外畅王灵既物望之愈隆岂褒章之可後卿受才挺特抗志崇深不惟誓报于国恩尤欲仰追于祖烈宣威边徼遂寛北顾之忧寓直文谟益峻西清之职尚殫忠荃嗣有宠嘉毋事牢辞亟只新渥

新除宝谟阁直学士李寅仲辞免召赴行在不允诏

朕志于有为心不忘远矧惟簪橐之旧具宣藩翰之劳既颁优恩仍趣归覲卿素全忠孝备着事功岂惟劲草之知实障狂澜之倒峻西清之职未称眷怀望东海之来方深渴想尚腾逊牋未就锋车式遄其驰勿重有请

礼部侍郎章良能乞宫观不允诏

卿以该洽通敏之才洊直螯禁亦既三载身兼数器宣劳翰墨之间夥矣朕更化之初大述作多出卿手方有赖于论思之助遽欲以目眚求退非所乐闻也卿虽欲奉身而去使朕几似于弃才者可乎其安厥位勿重有请

新除观文殿学士赵彥逾再辞免不允不得再有陈请诏

朕更化之始登用贤才宗老典刑无如卿者闵劳以官职之事雍容进读以冀日新之益进班延恩少示眷意一辞赘矣况于再乎身其康强谋犹克壮少亲医药毋复重陈勉为朕留以系人望

侍读赵彦逾倪思宇文绍节侍讲章良能辞免进讲毛诗终篇转一官不允诏

朕日御还英讲明经理三百五诗至是终篇叙进官联厥有典故卿为宗老【倪思章良能云卿居从列宇文绍节云卿虽处阍外】实助缉熙母事固辞益思所以辅朕之不逮

新除刑部侍郎曾?辞免不允诏

朕更新治化钦恤刑章遴选贰卿久令摄事以卿性资直谅器度寛洪承东鲁之儒风袭南丰之家学比安闲外促使来归入对便朝喜闻正论刑惟弼教方有望于老成德本好生当务先于明恕亟只隆委勿事牢辞

吏部侍郎梁季秘乞宫观不允诏

惟卿先正受知高皇既登听履之班尤多活国之计是宜有子为予从臣比更民曹浩穰之司又历铨部公方之选胡为引疾乃欲求闲尚安厥官以副眷倚之意刑部侍郎曾?辞免兼同修国史兼实录院同修撰不允诏

昔在先世尝继列于史官尔为近臣亦游司于直笔间居自适更化惟新召还献纳之联兼畀纂修之旧岂特助成于国典抑将大振于家声明命既颁逊辞可略福州观察使镇江府驻劄御前诸军都统制兼知扬州毕再遇乞奉祠不允诏

牧守之良方图久任将帅之重尤戒迭更惟卿沈鸷之资拳勇自夺身经数载最多汗马之劳赏不踰时亟上廉车之峻领京口戎旃之寄镇淮堧制阍之雄深明保障之图日讲留屯之策流民寢复信使始通甫臻按堵之期遽上奉祠之策良民尔位以讫外庸

皇太子某辞免每遇视事令侍立宰执赴资善堂会议不允诏【嘉定元年闰四月】

朕惟古者立国必建储闱共为子职实资主器之重惟予元子笃意向学年未及冠绰如成人朕欲俾尔习知国家之务侍立吾左预闻政事师宾会议皆吾大臣朕方一新治体兼听公言尔当周旋其间日增闻见以成温文之德尚其勉旃母事多逊

四川宣抚副使安丙再辞免资政殿学士不允不得再有陈请诏

朕更化以来爱惜名器未尝轻以假人其有度越拘挛超资级而授者非如卿之隼功茂绩不予也书殿升华以所以待执政者待卿其内抚兵民外饬边备使全蜀之境奠枕无虞以称朕委任之意以保尔功名之成可矣服我休命母为固辞

皇伯嗣秀王师揆生日诏【嘉定元年五月十五日】

薰风南来当朱明之方半望舒东出庆伯父之始生是曰宗英宜膺天壽匪颁惟旧宠数益新

新除吏部侍郎章良能辞免不允诏

卿以刚劲之资济以博洽之学为吾词臣仍兼数器其在仪曹事有不可者坚执不移朕所叹嘉进贰天官其以处仪曹者处之柅吏奸明铨法庶使无贤愚同滞之嗟何为固辞更欲求去非所望也

新除侍卫步军副都指挥使夏震辞免不允诏

卿赤心体国忠勇自将久摄殿岩尤见劳效步旅谋帅卿实宜之其为吾协和三军训之以义密卫行阙以折遐冲胡为固辞其服休命

开府仪同三司杨次山生日诏【嘉定元年六月二十三日】

卿志乐燕间躬持廉靖时当初度宜介多祥是为戚閑之华爰厚上方之锡

知合门事杨谷乞祠不允诏

卿戚畹之良周行素谨职司宾合宠畀廉车忽求祠馆之闲欲侍家庭之佚且弟兄并列于朝着以何嫌倘父子退休在眷私而有歉惟益崇于谦靖亦奚虑于满盈其服厥官毋庸有请

宝谟阁学士前四川安抚制置使杨辅乞宫观不允诏

朕以国家多艱更化善治收用耆耄如恐不及慨念旧学存者几人就传之初卿为首选盖吾烈祖之所亲擢向者持橐未久翩然西归朕念此弗忘也非不知制阃之重有赖壮犹而图任之意则有所在召节既往注想待卿控辞愈切殊用恍然载览封章宣示迺列备见爰君忧国之志益知尊主庇民之学然与其献言于万里孰若造膝而陈前乃欲引疾求间效蜀庄之沈冥何耶矧西蜀之士卿为标表肯为朕行则後生英俊将于于而来矣三命益勤朕志不易勿复有读式遄尔征京西湖南北路宣抚使宇文绍节乞祠不允诏

卿以通敏之才渊博之学起趋勲名之会欲报家国之仇辍从经帷出抚边徼修好伊始息肩可期有如贤劳盍还旧着属以缮修备御之未毕劳来安集之方勤将图尔功少俟其定忽上真祠之请欲为便道之归在卿则固所愿焉于朕则岂所望者其摅长算毋有遐心

右丞相钱象祖乞解罢机政不允诏

方国家多事之时任庙堂一相之职卿盖屡形于固避朕亦自知其甚难然而朕以更化云初尤冀和平之福而卿受恩最厚素为忠孝之家正使虑有未周力有弗及犹需同心协志求以

尊主庇民而况察卿之才为衆所服宠以告廷之拜岂曰历阶而升幸边琐之粗寧恐事机之难测中外未能小息臣主靡容自安旱魃既驰星文未格日不暇给他何可言偶微爽于节宣宜倍加于摄养勿念去计共图治功宵旰实勤曷尝以位为乐燮调有赖安得奉身而归

新除御史中丞章良能辞免不允诏

朕惟振朝廷之纪纲当先重纪纲之地新天下之耳目必遴求耳目之官卿鲠亮之资渊深之学自奋于韦布之日有闻于搢绅之儒虽遍历于清华亦屡更于夷险处身无玷疾恶如风欲坚塞于幸门曾不辞于怨府弹擊之任简求实宜其力辨于官邪以共扶于国论发卿所蕴助朕有为勿腾避宠之章益励敢言之气

卫泾乞解罢机政不允不得再有陈请诏

居九五之正位方以遇灾而忧何二三之大臣皆欲引身而去岂朕所望于卿奚安尚赖同寅而协恭庶几转祸而为福要须持久或可图功虽屡请以难从毋再辞而为赘

钱象祖乞归田里不允不得再有陈请诏

朕慨践阼之既久念治效之不进不惟不进殆将阽危是以惕然改图励精更化庶几更也人皆仰之之意首论一相得卿之贤旁招俊乂如恐不及前此寒心数月方幸交邻少定可以尽力内治自卿及执政以至论思之臣造膝而言无不倾听君臣之间了无疑阻卿等以灾异请去朕方侧身自儆不容重陈而数日以来庙堂五臣而三求退留行之诏屡下请犹未已不惟朕失所望四方传闻其谓朕何卿以勤劳致愆调摄惟益谨药餌以速痊愈所谓故国者有世臣之谓也非卿而谁其体一心勿致三渎

褒语卿相予未久备整忠劳方图内修正藉协赞知卿小疾予告甚优伫闻有瘳勿复言去

刑部侍郎曾?乞祠不允诏

朕延登耆隼列在迓聯岂惟资献议之平真有赖论思之益卿夙高誉处久乐燕闲粤从一节之趋增重贰卿之选惟明克允方持宪以尽公非道不陈曾閱时之未久忽披来谏遽欲告归有嘉易退之风殊匪趣还之意刑章方简议无待于过三史笔至严职何妨于共二少安定着难徇谦辞

礼部尚书倪思乞祠不允诏

朕召收旧人以图新政比者凡有一事宰辅相与谋于庙堂侍从相与议于台省粗无过举朕心以忤今兹未能略定而求去者纷然从班亦有一二矣矧卿素为敢言自陈说论不畏强御不避怨仇历历为朕陈之擢长仪曹以示褒表亦为此举何耶朕求其故岂朕有以致此耶相

应以文止见辞费惟当一切不听庶几以一天下之观瞻其体眷怀勿复有请

签书枢密院事林大中乞仍旧休致不允诏

朕更化之初未遑他务求贤甚急首召耆英起自挂冠之余擢居持橐之长延登枢筦增重朝廷言必出于内心谋实稽于古训倚毗方切而疾遽侵冲养有来何恙不已胡为腾奏即欲告归尚精医药之调以繫搢绅之望

江淮制置大使丘密乞致仕不允诏

朕惟屯禁兵百万而边鄙是虞开幕府四三而留都尤急畀以枢廷之寄增吾天塹之雄卿久安里閭洵分帅阃徒得君重肯为朕行上寛宵旰之忧外抚貔貅之衆尽护诸将独当北门草木亦知其威名狄鞬想闻乎风采力裨庙论卒靖封陲人皆望归袞之期卿乃有挂冠之请矧方叔之谋猷克壮而晋公之神明不衰益坚体国之心毋作明农之计

宝谟阁直学士李寅仲乞祠不允诏

朕缅怀巴蜀之民未尝忘远梦想渊云之彦尤务招来卿蚤冠伦魁久腾英誉洵登朝蹟尝为献纳之臣出殿侯邦尤着蕃宣之绩特立抢攘之际实增嘉叹之深升学士之班既以旌其风节趣锋车之召诚有望于谋谟何辞之烦以疾来谗万里云远当已戒途三命滋恭谅无俟驾

右丞相钱象祖辞免提举国史院实录院提举编修国朝会要不允诏

纂修史册深赖于公平会粹典章尤先于鸿博允资硕辅坐总宏摹卿识洞古今学该流略接词华于奕叶用则有余考故实于累朝尽其素习举以并命了无异辞母逊牒之重陈期奏篇之俱上

参知政事雷孝友辞免权监修国史日历不允诏

密赞政涂日预万机之决参提史笔正资数器之兼卿早冠词场寢登册府迨通班于侍从已尝赖于纂修朕慨大典之未兴选鸿儒而坐领趣就累朝之策仍严系日之书故事当然谦辞可略

刑部侍郎曾?辞免兼太子詹事不允诏

朕遴选从臣方赖论思之益精求储案尤资辅导之功卿累叶儒风半生朝蹟何止衣冠之伟实为簪橐之英擢处宫端允符公论亟承明命毋庸固辞

观文殿学士侍读赵彦逾乞归田里不允诏

朕更化之始起大老于东海之滨明德懿亲老成典刑趣行造朝国势增重訐谟远虑见于进读图任共政束于定制偃息藩魏人望所归小疾既痊正宜休养大臣不可以暑行其为朕留庶几犹得奉露门之从容也

吏部侍郎梁珌乞待次州郡不允诏

朕惟论思之臣欲全进退之义若其未可以去则亦难以遽从卿为国宣劳既云累岁任予典选实号剧曹胡为抗章必欲求外冕旒密侍正有赖于协恭符节屡更顾奚烦于详试尚安旧着以副眷怀

礼部尚书倪思乞待次州郡不允诏

卿以一时人物之望召还未久拳拳献纳朕所乐闻何嫌何疑屡欲求外此固足以见难於韩退之节非朕所以待卿者且更迭之制岂为卿辈设哉

江淮制置大使丘密再辞免召赴行在不允不得再有陈请诏

卿以超世之资笃济时之志久安故里曾不忘畎畝之思洊镇陪都专以徇国家之急言皆底绩事不辞难御侮折冲既以着偃兵之效闻命引退谓不应俟驾而行一归疑丞之班足为宗社之重既颁温诏日俟来音共政而图旧人注想以待元老而乃抗章至再称疾愈坚极知难进之风殊非虚伫之意况闻老而益壮气不少衰式遄其驰以副所望使朝廷得以諮访而搢绅视为表仪务远乃猷以弼予治顾何恙之不已谅无说之可辞

知平江府李大异辞免除宝谟阁直学士不允诏

朕惟斯民宅生于牧守苟有治理效者仿虞朝考绩之法取宣帝增秩之意不惟示劝抑以数易为重也卿以诤臣出守吴会政声上彻朕所深知进职西清庸示褒表成命已颁尚何辞焉

赐皇太子生日诏【嘉定元年八月十七日】

敕某商黷中分良初度赐生设醴用为宴衍衍之资授粢貽牟仍厚匪颁之宠共期难老益体隆私

通奉大夫赵师 辞免复宝谟阁直学士依所乞宫观不允诏

卿起临近甸尝着外庸既辞制阃之行仍徇祠庭之请念宣劳于北固欲华尔归俾寓直于西清但仍其旧卿毋多逊朕不汝忘

观文殿学士何澹再辞免知建昌府仍奉祠禄不允不得再有陈请诏

以金陵而为陪都保厘素重护天堑而开制阊委寄尤隆卿以时名人为予旧学蚤膺擢任屡尝入从以出藩寻遂登庸俾尔贰公而洪化【洪化之洪宋时避庙讳所改】方权臣之用事宜正论之多违久镇三山时称治最言归数载朕不汝忘属边鄙之甫寧择邦侯而分遣惟大使之所莅非良弼其谁宜朕方躬宵旰之勤卿当体股肱之寄闻命引道知己屈于中途奉亲为荣顾何妨于色养母格成涣式遄尔驱

镇江府都统制毕再遇乞归田里不允诏

卿以拳勇之资挟忠毅之气抚士最为得衆遇敌几于无前外则营垒之不譁内则里閭之甚靖属边陲之甫定亦信使之交通诸将于焉少休来奏亦求引退乃眷维扬之重镇实为淮甸之要冲其为朕以少留岂于卿而独後总周庖而入卫终当谁归歌出车以劳还固应有日

京西湖南北路宣抚使宇文绍节辞免召赴行在不允诏

卿以劝诵之近臣往宣威于遐徼边陲以靖邦好沆修爰念贤劳亟颁命召何控辞之未已义引疾以为言朕渴想风仪急闻方略俟交符于制阊即趣驾于归途毋复重陈副予虚伫

何澹辞免兼江淮制置大使不允诏

国家间遣辅臣往营边事粤从近代加以大名不惟欲忧顾之寛正以增使华之宠畴咨于衆喜得其人卿以旧弼之贤畀留都之寄英声有素輿望已孚疆场甫寧先上宣威之组江淮并护再隆分阊之称其为朕行徒得君重独当一面正资经理之良坐使诸军咸属指呼之下往只成命母致牢辞

新除焕章阁学士改知江陵府充京西湖北路制置使李大性辞免乞奉祠不允诏

谋帅以镇上游素为重任分阊以护两道尤赖长才卿久列从臣屡更藩服比奏三吴之课继拥七闽之麾方塞北之休兵属荆南之缺守仁声夙着僉论攸推进学士之清班益隆眷倚总边庭之诸将咸莅指呼引道既前遄驱毋缓爰事循墙之避伫闻洗印之期

新除同知枢密院事丘密辞免不允诏

朕厉精更化当馈思贤枢庭既得于耆英宣室实深于注想谓何恙之不已故申命以益勤载览封章备陈疾状使翦须而可疗亦所当为倘赐几而肯来自应增重宜进万金之药勿为三命之辞

攻媿集卷四十四

<集部,别集类,南宋建炎至德佑,攻媿集>

卷四十五

钦定四库全书

攻媿集卷四十五

宋 楼钥 撰

内制

右丞相赵汝愚加食邑实封制

门下朕只膺丕绪肇祀合宫赖天地之灵俨百神而顾享严祖宗之配绵万世以承休惟时大臣赞我缙礼肆颁祭泽敷告朝伦具官某寬博而崇深裕和而肃括学造圣贤之蘊才兼文武之优有经济四海之志而行之以忠有酬酢万变之智而决之以果擢由枢筦进秉国钧是为社稷之元勲非止衣冠之盛事处心无竞休休多容物之仁守道不阿蹇蹇尽匪躬之节予所毗倚国其庶几顷卜仲辛恭修大飨上稽皇佑之典故近遵慈极之宏谟致精三日之斋?奉九筵之制惟辟公之显相厥有贤劳顾熙事之备成敢云专乡增多采邑并衍真畬以隆岩石之瞻以壮维城之势於戏载貂蝉而展采固宰路之所同被袞绣以侍祠实宗盟之未有惟亲贤之并用于邦国以增光其服渙恩益图治绩

赐告口宣有敕卿为时上相赞我盛仪是宜与邑之多用见畴庸之渥其只成命母事谦辞

士歆加食邑实封制

门下朕严九筵之礼是曰肇禋逆三神之厘若蒙昭答餽惠所暨臣邻斯均矧惟属籍之尊可後恩光之渥集廷绅而诞告示诏綍之匪私具官某德性寬洪风猷端粹重珪叠组生长富贵之中簞节駢旄雍容闲燕之久惟夙夜之匪懈仰春秋之益高实长周家之宗盟是为刘氏之祭酒兹崇宗祀预赞上仪冠班列于三孤聳仪刑于九族乃加并赋仍侈圭腴以表耆英以隆孝治於戏祭有十伦之义莫如同姓之先备者百顺之名益介遐龄之永愿如壽俊奚假训辞

赐告口宣有敕卿位冠孤卿望高宗老既奉合宫之祀宜加采邑之封虽曰彝章是为新渥

郭师禹加食邑实封制

门下朕只事总章荷神只之来格广施惠术普中外以惟均顾予元舅之亲尝预羣工之相肆加异数明告周行具官某迪德忱恂饬躬谦靖祖后实为同气壽皇尤笃优恩淑旗綬章蚤授斋坛之钺篆车希冕近升棘位之班疏三吴公社之封廩万壽祠庭之禄能屏膏粱之习自忘圭组之崇比卜季秋亲祠重屋茂对三神之祉宜先四姓之贤用衍爰田载加真食於戏兢兢

业业以事上帝朕敢怀专乡之私洞洞属属而存小心尔尚介方来之宠益昭吉履永保修名
赐告口宣有敕礼毕九筵恩均百辟赐予伯舅之胙均兹宣室之厘与邑宰多颁纶可後

周必大加食邑实封制

门下朕嗣守邦图肇修宗祀父天母地祭既重于合祛尊祖敬宗礼尤严于并□予一人越绋以行事尔多士奉璋而侍祠眷旧弼以兴思顾庆条之可後诞扬涣号敷告听廷具官某简重而閎深直方而肤敏典诰上规于姚姒词章远轶于汉周弼亮两朝未究经纶之蕴镇安四海有怀康济之功偃藩南国之雄均逸东山之胜比以霈恩之渥升之亚傅之崇注想不忘乞言方切属伸大报爰启合宫载谋载惟圣父尝颁于先甲我将我享季秋乃卜于仲辛熙事既成蕃厘来介申衍多田之赋仍加真食之封於戏明堂王者之堂方荷神休之答二老天下之老宜先祭泽之施尚迪远猷永绥殊宠赐告口宣有敕卿尝位冢司均休真馆属总章之竣事赋多邑以示恩其即钦承以只眷渥

师夔加食邑实封制

门下朕寅绍丕图修大飨亲惟伯父既有助于多仪神介蕃厘詎敢云夫专乡亶敷命綍用告听廷具官某履行粹和稟质端靖生长神明之胄源流诗礼之传出分顾忧见民庸之甚茂入趋班缀奉朝谒以尤恭建六纛以承家视三公而命秩属讲肇禋之礼适当越绋之行摄事太宫降登有度陪祠重屋显相无违庸推祭泽之优可後宗盟之懿爰加并赋并衍畚租兹谓恩施式昭名数於戏奉牺牲粢盛而告聿严布政之宫拓山川土田之封益示展亲之义其只异渥以对灵嫉

赐告口宣【吴玠吴玘同】有敕礼成重屋賚及万方宜首及于懿亲用申加于多邑载颁明命其服殊恩

吴玠加食邑实封制

门下朕穆卜季秋躬修大祀灵只授职幸熙事之备成多士在廷赖懿亲之显相宜颁惠术敷告羣工具官某谨畏自将纯和无玷聯四姓小侯之贵承三朝外戚之恩入侍中宸属橐鞶而甚肃进班上合飭冠佩以尤严顷建斋坛退安琳宇旋视孤卿之秩并开公社之封建及礼于九筵实均厘于万国乃增采邑仍衍圭腴以彰宠数之优以表肃雝之助於戏蒐上仪于阳馆岂惟黍稷之馨錫蕃祉于后家可後脉膺之赐尚绥吉履以服彝章

吴玘加食邑实只制

门下合宫肇祀实只奉于慈谟宣室受厘爰大颁于霈泽惟时懿戚夙着贤称庸举徽章式孚涣号具官某美由世济才应时须登簪笔持橐之聯惟知避宠更握节拥麾之选不专为恩比

崇建于斋旌旋寢加于孤棘逮兹大报赞我上仪礼既备于八阶胙惟优于四姓俾增多赋仍衍真腴於戏文德以讲明堂幸神只之顾飨贺庆以亲异姓宜福履之均沾虽曰邦彝尚承惠渥

郭杲加食邑实封制

门下朕顷用盛秋修宗祀奉牺牲以荐备阵重屋之仪赖爪牙之良肃领千庐之卫既云竣事可後均厘我有明纶告于列位具官某生资沈毅世济忠勤气稟山西期远追于起翦书传圯上自有合于孙吴久专将阃之雄入侍殿岩之邃属只孝飨务罄斋诚奉璋惟多士之贤执戟有元戎之重肆畴采邑仍启侯封以介灵休以彰异渥於戏茅檐蒿柱朕方躬大礼之严玉节琫戈尔尚体中权之寄益思忠报以答殊知

赐告口宣【萧鹓巴同】有敕礼严重屋泽及羣工锡多邑于岩除启新封于侯甸【萧改眷我劲臣畴兹多赋】其只明命益励忠猷

萧鹓巴加食邑实封制

门下奠圭瓚以荐诚既修于宗祀执豆笾而在列宜咸被于灵煇眷我虎臣董兹羽卫厥有涣恩之锡式彰显相之劳具官某智略雄深性资沈鸷望云就日夙肩面内之诚建旆设旆驯致总戎之拜奉真祠而均佚视左棘以疏荣乃因霈泽之行增畀爰田之赋申加真食用侈神休於戏承异眷于三朝盖屡觐弥文之盛敷大赉于四海顾可无宠数之优益绥令图以保终吉郭师禹特授少师封永寧郡王加食邑实封制

门下朕纂上皇之丕绪承列祖之通丧复土告功既克襄于大事提纲置使实有赖于懿亲爰播明纶肆加殊宠具官某小心自牧吉德着闻蚤席庆于椒闱寢升华于棘位恂恂家法靡矜金穴之奢侃侃朝班久遂琳宫之适兹卜会稽之麓往营永阜之陵灵驾徐驱飭厥仪而肃靖重臣主办讫闋寢之固安粤惟元舅之崇可忘醴赏之报翳劳之称匪朕敢私袞服命圭显冠孤卿之秩金印鰲绶进封异姓之王仍旌钺于东秦彻土疆于南晋申陪井赋并侈辕畴以昭四姓之华以笃三朝之眷於戏节侯仕汉得谨畏谦恭之声尚父在唐有富贵繁衍之盛岂其苗裔见此亲贤其踵前人之休以为密戚之劝

赐告口宣有敕阜陵复土元舅策勲既升冠于孤卿仍疏封于王爵其只涣渥母事谦辞

皇伯祖太师嗣秀王伯圭特授兼中书令加食邑实封制

门下朕只绍炎图通绳祖武追仰抱孙之爱谨奉敢涂实繫同气之贤式专使领克襄大事悉按旧章昭示殊褒用孚羣听具官某聯休皇极正位泰阶直大以方厚载体坤爻之二爵齿与德达尊全天下之三惟我孝宗最崇秀邸眷乃象贤之懿褒兹开国之封敬其所尊爱其所亲今当推于宗老反也如疑往也如慕况密护于厥仪每入临于朝晡曾不避于涂潦能以从心

之岁躬为复土之勤有司莫敢不哀行路为之感动语必流涕誓报平生之恩赏不踰时肆举非常之典是兼紫微令之重以为大父行之华仍衍爰田并丰真食匪以爵而驭贵恨无言以酬公於戏隆专席之荣盖用祥符之故实第中书之考曾参尚父之勲名以增师尹之严以侈邦家之盛益绥壽嘏庸对宠光

赐告口宣有敕卿贵隆人爵尊袭王封亲临永阜之藏宠冠中台之列是为殊深尚体眷怀

右丞相赵汝愚特授银青光禄大夫加食邑实封制

门下圣人因亲教爱盖本于躬行大臣以道事君莫先于协赞朕方遵皇祖之训形四方之风眷我宗英相予孝理惟忠劳之备着繫命数之宜加爰集具僚载申褒律具官某崇深而行简直谅而能容学有渊源究前圣天人之蕴志存节谊立本朝社稷之勲相业素高民瞻允属自擢登于右揆独光辅于冲人於皇孝宗克振炎祚朕既荷緑车之锤爰遂绍于重规卿亦蒙丹扆之异知寢基于大任惟推心而相勉念图报之尤难三年之丧服勤敢怠七月而葬宣力居多因山为陵得邱原之爽垲称天定謚极宝册之铺张迺吉仗以来归奉太宫而班祔诚信无悔哀礼有余仰慰在天之灵实由同德之助是用超文资之峻径授三阶衍并赋之腴几盈万户勉从逊牒少屈恩纶於戏明德懿亲既居金鉉黄耳之贵劳谦终吉仅登银章青绶之联益成廉退之名尚副倚毗之意赐告口宣有敕卿只奉阜陵爰加赏典班既高于百辟位亦次于三公其体眷怀亟只成命

皇伯祖太师嗣秀王伯圭特授兼中书令加食邑实封制

门下朕丕膺宝祚加厚皇支惟我祖之君万邦既讫因山之礼顾天子之谓伯父实参置使之行眷吉仗之言旋岂褒缙之可後视仪宰路敷号廷绅具官某赋敏给之资擅温恭之誉分左符而出镇尝专制阃之雄易留务以归班径擢斋旄之峻迨冲人之临御进孤保以疏恩凤阙晨趋见朝仪之甚肃鲤庭日侍知家法之尤严匪惟族姓之光允谓衣冠之盛比营东越崇建阜陵愿躬除道之勤往护成梁之役久安闲燕退若无凭小试才能灿然可覩宜加宠数以答贤劳公府肇开遂拟三师之贵珍台兼领并增千户之封用侈宗盟兹为使相於戏有是父有是子俱膺华袞之荣拜于後拜于前克绍緇衣之美勉图休问以对殊私

赐告口宣有敕惟予伯父表我宗盟爰升袞钺之华已播丝纶之宠其只异数母事谦辞

知枢密院事余端礼特授银青光禄大夫右丞相加食邑实封制

门下稽古建官莫重王朝之论相代天理物必资揆路之得贤朕临御惟艰畴咨敢怠爰命紫枢之长进居黄合之崇乃辑廷紬诞?制綽具官某温恭而气劲凝静而谟明智周万事之原学贯九流之邃孝宗擢之于庶列亟跻法从之班圣父召之于留都遂处辅臣之任益殫忠荩力赞政几迨予嗣历之初尤藉同寅之助迭掌东西之二府兼明文武之两途内则密勿庙论以虑四方外则整齐戎律以令诸将清规足以范俗深谋足以济时进退百官详试知人之鉴调

娛衆务究观识治之才蔽自予衷与之国秉用正钧衡之寄母劳梦卜之求超授文阶增陪并
赋以示奋庸之选以昭注意之隆於戏夙夜基命而单厥心朕欲起太平之盛朝夕纳诲以辅
台德尔其继良弼之名表正士风访求民瘼及间暇而修政刑之要专燮理以致阴阳之和若
股肱耳目之相位若天地祖宗之临汝懋承明涣期底成功

赐告口宣有敕卿比领枢廷兼行相事兹延登于石揆已诞布于明纶注意方深拜恩可後

攻媿集卷四十五

卷四十六

钦定四库全书

攻媿集卷四十六

宋 楼钥 撰

内制

伯圭再辞免两镇节度使不允批答【绍熙五年九月】

省表具之朕惠于宗公务隆于体貌相予肆祀可後于恩褒位已极于人臣官无加于师尹兼授斋坛之钺倍多并赋之租是曰彝章未为异数仪刑所繫以为泰乎俯伋之恭再斯可矣

口宣有敕卿位冠三公望高九族兹相合宫之祀用颁双节之华其服恩荣毋为谦避

伯圭再辞免两镇节度使不允仍断来章批答

省表具之朕尊宠帝师惟恐不至优崇元老尚窃慊然故因大飨之成曲示异恩之渥载加少府之节复登上将之坛城南天下稀旧临乐土汉东国为大并领名藩式慰具瞻益绥多祉既无反汗之理奚事循墙之恭口宣有敕卿德齿俱尊名位皆备欲侈三卿之宠遂疏兼部之恩何必固辞亟只成涣

侍讲陈传良朱熹宣赴经筵供职曲谢宣答词

有制朕务明政体首辟经帷嘉旧学之来归喜耆儒之同集其思忠告以副畴咨

初讲毕案前致词降殿曲谢

陈傳良

有制首颁召命渴想忠猷聳闻讲贯之详恍若从游之旧克谐朕志益啓乃心

朱熹

有制久闻高谐倾伋嘉猷来侍迹英之游讲明大学之道庶几于治深慰予怀

余端礼 辞免知枢密院事不允仍断来章批答

省表具之卿自籓本兵积隆时望有致君泽民之志有忧边思职之勤迨参政几又尝共二其于基命宥密之地详练久矣兹畴枢长非卿谁属夫本强则精神折冲制千里之胜者其机实在于庙堂尚究远图以只宠命朕志决矣勿复有辞

口宣有敕卿精白承休勤劳匪懈爰自政途之竣载登宥府之崇成命既行牢辞勿再

京镗再辞免参知政事不允仍断来章批答

省表具之本兵之任方倚于壮犹共政之求更资于夹辅朕图回治道选用柄臣眷一相之处中有嘉同德惟万几之甚衆允藉协恭卿之长才朕所深识奏陈剴切剖决精明进参黻臞之严益冀訏谟之告既颁再命母事三辞

口宣有敕卿召归全蜀旋贰洪枢兹膺共政之图实倚告犹之益何劳谦避其遂钦承

郑侨再辞免同知枢密院事不允仍断来章批答

省表具之朕惟孝宣枢机周密用以中兴汉道于今本兵之地尤号才难卿以魁硕之才为士夫仪表践扬最久望实具孚兹焉登用朕非以私于卿所以尊朝廷也朕方庶几孝宣之治卿志在体国其遂秉德以陪朕顾岂以执谦为美乎

口宣有敕卿屡分帅阃三总吏铨兹进贰于机廷方允符于舆论亟其只命何必固辞

郭师禹再辞免师不允批答

省表具之朕惟三孤之贵卑于公尊于卿异姓之王苴以茅胙以土皆本朝之所重非懿戚而谁居以卿德量有余忠诚匪懈受隆知于烈祖不专为恩护大事于阜陵克勤乃职迨兹归报可後褒嘉既敷号以明扬虽循墙而安避母为苛礼徒拂眷怀

口宣有敕位尊三少爵重异王用酬使领之劳已播廷扬之命洊披逊牒其服殊恩

郭师禹再辞免少师不允仍断来章批答

省表具之卿世为懿戚仕历累朝惟孝宗之恩每思所报故阜陵之役独护其行人徒见阖门而养威今乃知任事而能办位列三孤之长封疏五等之崇扬于大廷协彼公论何为固避屡却复来其亟受于宠章母重陈于逊牒

口宣有敕阜陵庀役总使有行既竣事以来归乃疏恩而示宠其只一札何事三辞

伯圭再辞免中书令不允批答【庆元元年】

省表具之卿以伯祖之尊上公之贵名位已隆而无事任之累富贵已极而无危溢之虞壽考康宁子孙蕃衍此于人间世尚何慕焉独惟烈祖孝悌之至则友其兄朕追仰音容如在左右古者思其人犹爱所憩之棠况我祖同气之亲乎是以因使范之劳加宠数之重夫高允之在魏子仪之在唐俱以令公名者岂惟爵秩之崇盖以德为贵也惟我父师尚何辞于此哉

口宣有敕卿爵齿俱尊忠孝兼备兹授令公之秩为皇族之光母复固辞亟宜只命

伯圭再辞免特授兼中书令加食邑实封不允仍断来章批答

省表具之朕考国朝官制尤以中令为重亲贤如魏鲁陈韩诸王为此官者仅六七人元丰中曹佾以帝旧兼令有司谓无给俸之例则其稀阔又可知矣卿为达尊执德弥劭久虚之典非卿尚谁当之近命元子宠兼袞钺恩礼之盛萃于一门邦之荣怀匪曰予私辞之至三斯可已矣

口宣有敕卿位极人臣德高帝胄爰拜中台之长以彰元老之尊宠命既颁谦辞勿再

余端礼再辞免右丞相不允批答

省表具之君臣相逢谓之千载上下协济本乎一心必能如风云之从斯可不胶漆而固惟卿朴厚副朕倚毗虽累年务罄于论思而近岁又殫于忠力眷政府枢廷之更践知文事武备之该通仪图老成宜置左右试之已久断然不疑惟昔宗盟尝居冢宰之任若时卿袞亦应栢溪之祥尚期远迈于前人相与共兴于大业朕所望者卿何辞焉

口宣有敕卿比握兵机实专政柄乃径登于次相仍累进于崇阶其服宠光勿为多逊

京镗再辞免知枢密院事不允仍断来章批答

省表具之朕惟本兵之司有国所重必得枢机周密乃可图功自非智略纵横何以称职卿之能事朕所素知分制阃则推师师之良登政途则着辅弼之望威名日起遐迩具瞻其励壮犹益运幄中之算坐销外侮以收堂上之奇宜已需章母留朕命

口宣有敕卿资兼文武望耸华夷辍东府之大臣长西枢之重任明纶已播逊牒母烦

郑侨再辞免参知政事不允仍断来章批答

省表具之朕修明庶政务兴起于事功图任旧人乃布扬于命告卿行为世表文擅国华琐闼銓部则着忠蹇之名侯藩留龠则备恩威之美再仪禁路增重朝行既擢贰于本兵兹进参于黻暇其体责成之重母为避宠之烦

口宣有敕卿擢在枢廷久隆人望兹进参于大政庶益重于本朝洵贡忱词亟只明命

谢深甫再辞免签书极密院事不允仍断来章批答

省表具之朕惟九五正位每切图安二三大臣所当遴择乃眷几廷之贰必求禁橐之英卿外
寬而内明气和而才劭凡一时清切之选以数载周旋其间封駁之严屡回主意抨弹之劲益
振台纲劝誨以来陈谏尤切兹肆颁于一札俾参掌于五兵出命惟行抗章可已口宣有敕卿
备历华途寢高雅望兹自宪台之长入参枢筦之严朕命既孚卿辞母费

余端礼再拜辞免右丞相不允仍断来章批答

省表具之商宗之命传说也爰立之初训告具存惟说以天下自任只若休命不敢辞也朕之
论相则又详矣大号扬廷与衆共之需章以来既已再却而犹未已何耶朕之菲凉有赖啓沃
式克钦承卿其可使古人专美于前乎三命而倭其可已矣

口宣有敕朕妙选儒英俾登揆路欲专裁于庶务顾俯事于三辞难徇劳谦亟命成命

赐右丞相钱象祖褒语

朕更化之初论相为急注意已久无踰卿者大臣义当体国勿为牢辞往哉汝谐母稽朕命

附劄子臣护望清光仰蒙圣慈开纳刍蕘之言不胜千载之幸再被宣旨令撰右丞相钱象祖
褒语进上窃思制麻已宣无可辞之理臣退方供职所有答诏章良能必已撰述臣谨撰褒语
进呈更合取自圣裁【开禧三年十二月二十四日翰林学士知制诰臣楼钥】

新除右丞相兼枢密使钱象祖再辞免不允批答

省表具之汉之丞相无所不统孝宗正名委任采重朕更化善治注意尤精以卿忠孝之家台
辅之望践敷中外多历年所迹者再预政机能断国论去凶举贤人望愈归播告廷绅士夫至
于相贺何谦何疑固辞不已矧是边陲之未靖尤资右府之壮犹三命而倭执谦甚矣朕志已
定决无反汗之理卿其自任天下之重称朕意焉口宣有敕卿兼文武之资体家国之重既已
颁于制綽何尚执于谦词母违朕言亟正台席

新除参知政事卫泾再辞免不允仍断来章批答

省表具之朕更化之初惟二三大臣是赖以卿伦魁之彦密在迓朕赞决庙谟擢升独坐寻畀
洪枢之任仍参礪鍛之严兹焉正名以赞台揆内则百实之欲治外则三边之未宁此为何时
而执故典其体责成之意勿为逊避之烦

口宣有敕卿近以枢廷遂参政地兹焉锡命止用正名尚裨当轴之谋无执循墙之谨

新除参知政事雷孝友 辞免不允仍断来章批答

省表具之朕躬览万几与民更始欲解琴瑟之旧允藉股肱之良卿久矣蜚英居焉难进比处代言之任实怀愤世之心预同密谋卒殄元恶擢居琐闼遂长宪台欲新亿兆之观瞻尤急二三之辅弼其只予命亟赞政几国事匪轻谦辞可略

口宣有敕卿由中执法为吾大臣正资经世之猷以赞济时之相朕志先定卿辞勿烦

新除端明殿学士签书枢密院事林大中再辞免不允仍断来章批答

省表具之卿养气以刚秉心无竞出藩入从荣利澹然久安燕居不容何病朕一新治具急欲求老成典刑以镇服中外起旧德于垂车之後还人望于持橐之班矢谟朕前尤见克壮亟升书殿进贰宥庭人无异辞国以增重时则可矣尚何逊焉

口宣有敕卿禁班老成人望久属擢真几庭之贰正资兵本之谋尚复奚辞往其只服

杨次山再辞免开府仪同三司不允批答

省表具之朕爱惜名器惟贤是予由掌武之官而视仪揆路品职益崇其可轻畀卿以肺腑之亲服在爵位靖共自飭廉介有余爰示优恩用孚至意而又何辞焉母复重陈亟宜就列

口宣有敕卿联芳椒掖均逸琳宫爰开公府之华实视台躔之贵其只茂渥母事牢辞

经筵进讲毛诗终篇宣答词

宰执赴听讲致词谢

有制朕临御今十五载讲诗终三百篇卿等同观朕心惟悻尚其协赞助我缉熙

侍读侍讲官奏贺

有制朕日勤三接共讲四诗既彻篇章实资问学深赖主文之谏载嘉归美之勤

宰执率经筵侍立官再奏贺

有制朕积朝夕之勤终雅颂之业究观六义用蔽一言尚冀输忠毋忘进戒

皇太子再辞免侍立会议不允批答【嘉定元年闰四月】

省表具之近颁中诏命元子以侍朝仍谕大臣集东宫而会议是为令典非用前规顾予教尔以义方俾尔预闻于政理躬临五学既亲宾友以交修密拱九重具见君臣之相与尔能进德予自忘疲何以辞为再斯可矣口宣有敕尔为元子年近成人俾入侍于昕朝且预闻于几务勉亲多益毋事牢辞

卫泾乞解罢机政不允仍断来章批答

省表具之朕厉精更化遭时多虞延登俊良列在辅弼当经纶之始赖协力以共谋迨平定之初乃奉身而求退朕所未喻卿尤无他知出处之素明见忠勤之曲尽五十而服官政在古训以甚明三千而惟一心矧大臣之无间倘遽欲去吾谁与居勿为封奏之烦尚体眷怀之渥口宣有敕卿以同德任吾大臣一为进退之图实有重轻之系尚安位着庸副朕心

褒语卿贰政更化之初备宣忠荅朕所眷属何人异辞告归无名理难曲徇

姃媿集卷四十六

卷四十七

钦定四库全书

攻媿集卷四十七

宋 楼钥 撰

内制

提举淮南东路常平茶盐公事陈损之奨諭敕书【以常平司见在米麦及收籴物斛分拨入州军賑糴共二十万石】

朕嗣服之始旱潦相仍宵旰兴怀务行实惠首形诏告所望部使者推广上恩初不以重费为憚也卿使淮堧盖尝久兴水利兹又能发其余蓄上不仰给于大农下有以平八郡之糴边民被惠已广而又将为後日之储有臣如此实宽顾忧载覧奏章良深嘉叹

贺金国生辰使副梁总戴勲到阙传宣抚问并赐银合茶药口宣

卿等远聘殊邻旋归近境念舟车之劳勩颁茗剂之珍芳仍命行人往将予意

赐银合腊药敕书

荆湖南路安抚使王藺

卿西枢故老南国元侯念兹鬻发之辰赐以奇珍之剂体予至意勉尔壮犹

四川安抚制置使赵彥逾

卿视仪两地出镇四川锡品剂之奇珍慰风寒之匱薄益厚颐养用寬顾忧

主管侍卫马军行司张师顔

卿肃领骑兵分屯江国颁宝奩之珍剂慰玉帐之凝寒其体眷怀益恩忠荃

御前诸军都统制阎世雄皇甫斌张诏赵夔刘忠刘震

卿等肃提禁旅列戍藩方念久处于辕门俾匪颁于奩剂毋云例卷其服恩纶

御前诸军副都统制冯湛张国珍田世辅李世广王宗廉王知新田臯

卿等远临外戍密赞中权念营垒之严寒锡禁庭之上药尚思奋励以答恩私

报登宝位使副郑湜范仲壬到阙传宣抚问并赐银合茶药口宣

卿等握节言旋及门伊迓厚葺剂珍芳之赐劳川途跋履之勤庸序尔情特将予意

赐银合夏药敕书

荆湖南路安抚使王藺

卿尝位元枢往临南楚爰锡珍芳之剂用清暑愠之祥将以宝奩贲于帅□

四川安抚制置使赵彦逾

卿不辞叱驭谅已开藩爰加珍剂之颁仍贲宝奩之赐用示恩于宗老期解愠于吾民

侍卫马军都虞侯张师顔

卿总提骑将往驻金陵当溽暑之在辰出珍芳而分贲尚绥衆士如濯清风

御前诸军都统制阎世雄张诏赵廌刘忠刘震田世辅

卿等分戍价藩抚安戎垒出上方之凉剂分内府之珍奩坐觉生风凉欣承命

御前诸军副都统制冯湛张国珍李世广王宗廉王知新田臯

卿等分提禁旅密赞戎和乃驰赐夫芳珍冀远清于蒸鬱惟兹解愠可以忘劳

赐银合夏药敕书

知潼川府费士寅

卿旧居两社出抚东川缓带轻裘远着藩维之效宝奩珍剂往寛炎鬱之烦益谨节宣以绥宠渥

四川宣抚使安丙

卿仕联执政职佐宣威蜀道筹边想帅垣之多暇暑风届候将珍剂以分颁岂惟清遐徼之尘抑以解吾民之愠

江淮制置大使丘密

卿恩视政涂任分制阆炎威将炽念戎幕之贤劳灵剂匪颁均上方之珍品庸昭涣渥以涤猷烦

四川安抚制置使兼知成都府吴猎

卿寓直从班镇临制阆增雪山之重念抚御之良劳当南风之薰冀节宣之抚爽爰颁珍剂庸示优恩

京西湖南北路宣抚使宇文绍节

名在经帙威宣将阆上流增重念袞暑之贤劳良剂匪颁助薰风之清穆其均此赐以慰彼民

殿前副都指挥使兼江淮制置使赵淳

职领殿岩任隆制阆属风埃之甫定当溽暑之寢隆爰锡珍奩用将宝剂坐消烦鬱仍助节宣

侍卫步军都虞侯措置防扞江面王处久

肃领卫兵出临天堑壁垒多暇涛波不惊属当炎暑之隆宜厚珍芳之锡尚承殊渥以豁烦襟

侍卫马军行司权管干本军马职事张良显

肃提精骑分驻留都当溽暑之寢隆属氛埃之甫定爰颁珍剂用涤烦襟益谨节宣以图绥靖

御前诸军都统制李郁毕再遇秦世辅王大才彭辂

某等肃提戎律绥靖边陲当溽暑之寢隆属风埃之甫定永怀劳勩宜助节宣爰畀珍芳以销烦鬱

御前诸军副都统制周整庄松何汝霖刘元鼎魏友谅薛九龄王钺

某等协佐戎昭克勤军务抚帅徒而整暇当炎暑之蕴隆臧宝剂以分颁即柳营而加劳

赐安南国王李龙翰嘉定二年历日敕书

敕安南国王某朕仰稽天运豫受民时爰分历象之书徧及方隅之境眷惟南国世奉中朝此疆虽远于山川嗣岁先颁夫正朔用均惠利尚克钦承

金国吊祭使人赴阙口宣【绍熙五年十月】

盱眙军传宣抚问赐御筵

有敕卿肃持使指来慰国哀眷入境之云初岂肆筵之可後往宣予意以劳尔勤

镇江府赐银合茶药

有敕卿等肃拥使华远将慰礼经铁瓮山川之险锡宝奩茗剂之珍宜体眷怀用安旅次

镇江府赐御筵

有敕卿等来趋素幄行次丹阳虽深衔恤之悲不废示慈之宴是将厚意式宠行人

平江府赐御筵

有敕卿等远从燕驿近及吴门深嘉唁问之勤宜备宾筵之渥其承异眷益进来程

金国吊祭使人赴阙口宣

赤岸赐酒果

有敕卿等远将慰问来届近郊先之旨酒之颁增以嘉肴之锡少安次舍用息勤劳

赐御筵

有敕卿等握节载驰赴疆来吊将展国丧之礼宜先郊劳之仪其体眷私少休匱薄

赐被褥钞锣

有敕卿等远致奠仪久劳客路爰厚寝衣之赐仍分盥器之珍跋履之余抚存加渥

密赐大银器

有敕使华既接吊礼斯勤宴已备于饗殮器仍加于银镂是为异渥少慰贤劳

赐生饩

有敕卿等少安宾馆既毕吊仪按聘礼以受饗命廩人而致饩谅均徒御咸体眷怀

赐内中酒果

有敕卿等礼谨吊丧退将即次颁酒殽于内府示恩宠于来宾意则一余物惟俱称

朝见讫归驿赐御筵

有敕卿等慰此国哀见于丧次爰暂休于燕馆用初秩于宾筵首示殊私嗣加好赐

就驿特赐衣服金带银器衣着

有敕卿等吊丧自远率礼无违器分山溢之珍衣有身章之宠虽云多品未尽至怀

赐内中酒果

有敕卿等肃将使节来唁丧帟嘉有客之多仪出尚方之珍品甘芳俱厚宠眷弥加

在驿特赐射弓酒果

有敕卿等既肃哀仪难修宾射虽辍主皮之艺仍加设醴之勤殽核俱颁情文尤厚

特赐射弓御筵

有敕卿等交邻有道序宾以贤属当变礼之时仍饬初筵之赐穿杨何取折俎惟优

特赐射弓例物

有敕卿等慰予国恤厚乃宾仪虽观射之未遑顾匪颁之可後悉从常礼以表眷怀

朝辞讫归驿赐酒果

有敕卿等吊哀事毕赠賻礼成将遄车马之归载厚壶筵之锡其承嘉贶复啓长途

赐御筵

有敕卿等既趋素幄遂别彤墀礼下替于权舆恩更加于觴豆尚安旅次徐届归程

回吊祭国书

皇祖上仙尝驰赴问冲人嗣位方服通丧荷信使之远来辱吊仪之加厚益坚盟好弥切感怀
哀疚既深敷陈难究

回贺登宝位国书

只奉慈谟勉承丕祚比飭行人之告兹勤信使之来仪物有加书函尤备既荷礼文之厚益欣
盟好之坚爰谨报章用陈谢悃

报谢登宝位国书

祖武是绳孝思方切勤使华之远暨知盟好之弥隆品物具陈情文俱称比已腾于报牒爰再
飭夫行人仍致彝仪用将谢悃

报谢贺庆元元年正旦国书

三阳攸庆方夙戒于行人万里交欢复远勤夫信使惠以函书之厚加之筐币之丰爰飭报章
备宣谢臆惟益坚夫世好冀均介于春祺

金国吊祭人使回程口宣

赐龙凤茶并金镀银合

有敕远修□问兹遂旅归茶分北苑之珍器备南金之饬是为异渥用慰遐征

赤岸赐酒果

有敕卿等返旆云初出郊于迈加六壶六筵之馈致三辞三揖之勤式慰尔归用将予意

赐御筵

有敕卿等成礼云归啓途未远意方勤于郊送恩宜视夫宾初既厚眷私益坚信睦

平江府赐御筵

有敕卿等吊仪既备使事言旅行已次于苏台恩仍颁夫鎬燕礼及加厚客路具宜

沿路赐使副冬至节绢

有敕使且北归日方南至载念修途之役俾加厚币之将其服恩荣尚寬旅思

读祭文官

有敕卿远陪肤使归遇新阳爰颁束帛之温以助重裘之燠益昭眷渥庸慰贤劳

三节人从

有敕长至维时远归在道言念御寒之具特加实筐之珍赉赐有差恩私无异

镇江府赐御筵

有敕卿等来修慰礼既毕使仪望北蓟以还轅至南徐而憩节庸加燕衍其悉眷私

盱眙军赐御筵

有敕卿等来成使礼归吹边疆更加燕豆之勤不替权輿之旧其承眷礼遂戒征途

金国贺登宝位使人赴阙口宣

盱眙军传宣抚问赐御筵

有敕卿等持礼远来入疆伊始念川途之匱薄加燕劳之优隆徒御少休宾仪无爽

镇江府赐银合茶药

有敕卿等来拥使华远申盟好念舟车之劳役颁茗剂之珍芳爰饰宝奩以迎玉节

赐御筵

有敕卿阼云初亲仁是务肃使华于近镇谨宾礼于初筵益届来程以承眷渥

平江府赐御筵

有敕卿等远持贺礼来次辅邦再加燕衍之私庸示眷存之渥少休跋履且慰勤劳

赤岸赐酒果

有敕卿等来次郊闾肃将贺礼宠以上尊之赐加之硕果之珍式伫来游以坚信好

赐御筵

有敕初御丕图远勤信使既次郊关之近载如燕豆之优其体眷私以承虚伫

金国贺正旦使人赴阙口宣

盱眙军传宣抚问赐御筵

有敕卿等远将聘礼来贺岁元既加壹劳之勤首示肆筵之渥其只眷意益谨宾仪

镇江府赐银合茶药

有敕玉节方来宝奩是锡取雪芽于北苑辍珍剂于尚方并宠行人用昭眷意

赐御筵

有敕卿等远持华节近来次方行登象日之畿重锡需云之宴益加盛礼庸示眷私

平江府赐御筵

有敕履靖之始修聘甚勤行既次于近藩礼宜加于载燕是为异渥其服多仪

赤岸赐酒果

有敕卿等远从万里来贺三朝望观阙以非遥赐壶筵而加腆尚承眷渥以缔欢盟

赐御筵

有敕履端之始将命以来既闻畿甸之登宜厚宾筵之锡春私所逮使介维均

赐使副春幡胜

有敕彩杖土牛方举春郊之礼宝幡金胜爰如使客之恩和气所鍾欢盟益厚

赐三节从人春幡胜

有敕卿等修好时重履端爰加厚于使华乃分颁夫节物仪虽辨等意则均优

朝见毕归驿赐酒果

有敕卿等既覲轩墀归安次舍俾厚壶筴之赐少休车马之劳母曰彝章实惟至意
赐生饩

有敕卿等进讲贺仪退休宾馆既设豆筴之渥仍加饗飮之颁尚体眷怀以须异数
赐内中酒果

有敕卿等来趋日正兹遇岁除出御府之甘芳助驿庭之晏集益修宾礼用介春祺
赐被褥?锣

有敕卿等来趋元日将覲大昕爰加赐于寝衣仍分颁夫盥器用安次旅以示恩私
入贺毕就驿赐酒果

有敕岁律更新使轺远暨酒致屠苏之胜盘随椒栢之芬均受春阳益增和气
玉津园射弓赐御筵

有敕兹开禁籞用设射侯既观舍矢之能爰锡在公之燕有发必中不醉无归
朝辞毕归驿赐酒果

有敕卿等甫辞殿渥尚憩宾邮载为川陆之行更厚壶筴之锡益只眷渥以示初终
赐大银器

有敕卿等既成聘礼将治归装乃颁什器之丰皆用五金之次是为异渥式助遐征
回程赐御筵

有敕卿等成礼言归登途欲远仍特颁于载燕曾不替于初筵春日尚寒宾僚加厚
赐接伴使副春幡胜口宣

有敕卿等往迓使轺还趋行阙值阳和之届律加好赐之如仪其服殊私益只厥事
金国贺登宝位使人到阙口宣

赐被褥?锣

有敕卿等肃将使指来贺君临爰颁盥洗之珍仍致衾茵之丽用安次舍其服恩私

赐使副春幡胜

有敕卿等远修邦好适遇春阳爰加节物之颁庸示使华之宠尚只涣渥益缔欢盟

赐接伴使副春幡胜

有敕卿等迓客于畿还朝有日当此新春之始特加好赐之优其体眷私益修使事

赐三节人从春幡胜

有敕春起于东使来自北举彩杖土牛之礼颁宝幡金胜之华仪则有差恩无所异

朝见毕归驿赐御筵

有敕卿等来致贺仪归安宾馆念川途之劳勤设樽俎之优隆庸示眷勤少休跋履

赐酒果

有敕卿等拭圭修聘将币成仪爰加芳醕之颁仍厚嘉殽之锡少休徒御以俟宾筵

密锡大银器

有敕卿等陈仪既备执礼滋勤欲深示于情文爰密颁夫用器非金之贵惟意之将

赐内中酒果

有敕卿等来修邦好克谨宾仪分御府之甘芳示使轺之华宠虽云例卷盖出殊恩

赐生饩

有敕卿等既谨朝仪退安宾次俾廩人之致饩冀使者之加餐异数相望眷怀增厚

特赐御筵

有敕卿等趋朝甚谨授馆方安修客礼以无违秩宾筵而有楚特将予意庸慰尔勤

特赐酒果

有敕卿等进谨朝仪退安宾馆赉此壶尊之腆加以肴核之珍盖示殊私尚承好赐

玉津园射弓赐酒果

有敕卿等肃驾使轺共修宾射谅慰四方之志想闻百发之能爰锡甘芳少休劳勩

赐射弓例物

有敕卿等讲射宝津视仪相圃爰首颁于弧矢仍加赐夫金繒张弛具宜恩私愈渥

朝辞毕归驿赐酒果

有敕卿等讲射宝阙事毕言旋锡列瓮之芳醪泊加筵之珍果少休宾驭行届归程

赐御筵

有敕卿等履勤入覲兹遂告归更加筵豆之优不替权舆之始尚只燕礼徐戒行装

特赐银

有敕卿等备成使事俱趋归程特颁山溢之珍用助清驰之役毋云故事盖示优思

回程赤岸赐酒果

有敕卿等已只聘礼初计归程乃驰赐于上尊仍分颁夫硕果少安旅次徐届征远

赐御筵

有敕卿等持礼言还戒途伊始爰啓在公之燕用华修聘之归既秩宾筵遂登客路

赐龙凤茶金镀银合

有敕卿等邦好既修回途未远珍茗选春芽之赐宝奁分山溢之余是曰殊恩用将厚意

平江府赐御筵

有敕卿等贺礼既周归程寢远甫即苏台之次载修镐燕之仪益向长途毋忘厚意

镇江府赐御筵

有敕卿等远来致庆倏遂言旋念北客之改辕即南徐而锡爵眷私无替礼貌采修

盱眙军赐御筵

有敕卿等来持庆礼回次边疆欲缔好于两朝复陈仪于四簋行当上道更祝加餐

金国贺正旦使人到阙回程口宣

赐龙凤茶金镀银合

有敕卿等将命言旋登途寢远饰宝奩而加惠实珍茗以分颁深示恩私式安行役

平江府赐御筵

有敕卿等来贺履端更勤归报洊锡吴门之宴用津燕驿之行春日尚寒征途加护

镇江府赐御筵

有敕肃持玉节还次丹阳仍优宴豆之仪用慰川途之役其均既醉毋惮遄驱

盱眙军赐御筵

有敕卿等远贺元正洎修使事爰肆筵于边服将夙驾于归途眷礼之私始终无异

报谢使副林季友郭正已回程到阙传宣抚问并赐银合茶药口宣【庆元元年正月一日】

有敕卿等握节言旋登载告至想风寒之匱薄念川陆之艰勤茗剂宝奩并加存抚

金国谕成使赴阙口宣【嘉定元年八月】

盱眙军传宣抚问并赐御筵

有敕卿等载驰原隰始届疆陲当和议之既成喜欢盟之复缔首加劳问仍示宴私

镇江府赐御筵

有敕卿等持节鼎来杨舲既济望信书之渐近启宾燕以加勤其体眷慈式遄行迈

镇江府赐银合茶药

有敕卿等肃拥使华来修邦好爰厚宝奩之锡用加珍品之颁庶涤烦劳式只延伫

平江府赐御筵

有敕卿等远将信币来次近畿嘉朕使之再驰宜宾筵之三锡是为异数用贲行人

赤岸赐酒果

有敕卿等徒御远来郊圻密迩爰再颁于甘醴仍分锡夫嘉肴行色休休宾仪是饰

赐御筵

有敕卿等遥驱使传切近国郊将修昕旦之仪重锡需云之宴式昭眷意益谨前窥

贺生辰国书

使介载驰伸讲诞辰之庆邮音垂谕少迟良月之期?致函书远将筐币用祝无疆之算益坚有永之盟施及黎元同跻仁壽

攻媿集卷四十七

<集部,别集类,南宋建炎至德佑,攻媿集>

卷四十八

钦定四库全书

攻媿集卷四十八

宋 楼钥 撰

内制

明堂礼毕告谢五岳四渎祝文【○原集此首前有告谢天庆观青词满散朱表今删】

伏以只奉慈谟亲行大向多仪既备景贶孔昭实惟山川之灵阴相馨香之荐尚歆诚悃滋介纯禧

明堂礼毕祭谢五岳四海四渎祝文

伏以肇祀合宫告成熙事惟二仪祖宗之礼皆已备修凡五岳河海之神悉均望祭虽灵祠之尚远顾?报之敢稽

明堂礼毕奏谢诸陵表文【○原集此首後有瑞庆节建康府茅山崇禧观启建祝壽道场青词满散朱表今删】

伏以嗣历云初奉先为大适三岁当郊之际只荐总章惟列圣在天之灵俯垂阴佑虽洁斋之粗备惧诚悃之未孚高厚顾歆神明来格既讫成于熙事敢恭布于深衷遥望陵宫不胜感涕

安穆安恭皇后改諡告太庙祝文

伏以仰惟烈祖将祔太宫易别庙之旧称从成孝之尊諡先期以告英鉴其临

大行至尊壽皇圣帝灵座祝文

伏以集百官于南郊首定称天之諡奉二后于太室改从祔庙之名将举盛仪敢伸昭告

奉上孝宗皇帝諡册宝成穆成恭皇后改谥册宝奏告天地社稷十神太一祝文【○原集此首前有瑞庆节满散道場赐三省枢密院殿前司马军司步军司乳香口宣瑞庆节万壽观满散道场青词满散朱表瑞庆节太一宫设醮青词满散朱表又此首後有天庆观报恩光孝观青词太上皇帝本命万壽观设醮青词满散朱表今并册】

伏以壽皇即远方定于尊称祖后俱从当更于旧諡将严宝册敢告神只

孝宗皇帝谥号下日改换铭旌奏告祝文

伏以烈祖在天南郊定谥既遵节惠之典载飭神明之旌仰惟威灵俯鉴诚恪

孝宗皇帝櫨宫神圉除去铺屋窠木等奏告昭慈圣献皇后永佑永思陵祝文

伏以皇祖上仙期方临于七月稽山庀役地实近于诸陵暂撤徼庠稍开宰木惧有惊于神御
敢先叩于威灵仰冀洪慈俯加阴佑

孝宗皇帝祔庙修制佑室太庙殿宇廊庑权奉安祖宗神主于初献厅时前奏告祝文

伏以仰尊烈祖将祔太宫奉二代之宗祧饰累朝之佑室暂迁神主敢告威灵

权奉安神主祝文

伏以崇饰太宫奉迁神主少寓斋居之邃以须佑室之成敢冀凭依用伸?告

祭祀太庙土地祝文

伏以修崇清庙升祔孝宗念斤斧之交兴惧神只之或耸敢先昭告愿相多仪

阎仲续康伯修奉櫨宫传宣抚问并赐银合茶药及喝赐一行官吏工匠等犒设口宣

有敕卿等视役山陵宣勤夙夜劳风寒之匱薄颁茗剂之珍芳好赐有?工徒无怠

孝宗皇帝梓宫发引祝文

啓櫨

伏以阜陵既飭灵驾将行遂从禹穴之藏式啓商楹之殡攀号何及昭告宜先

前及日初昏奏告

伏以窀穸有期念终天之永诀灵輿即远痛诘旦之将行重惜分阴采增孺慕

发引时前祭告

伏以六紼有行九京寢远追念抱孙之爱阻伸临穴之勤少驻须臾不胜哀殯

啓奠行礼

伏以於穆孝宗将趋神穴爰諏谷旦肃引灵輶顾挽紼以难留遂遵途而即远音容愈邈恸哭何堪

祖奠行礼

伏以陵宫既备愴我祖之何之紼翬啓行痛仙游之不返拊龙輶而永诀驾鲸浪以遂东祖祭是修哀号愈切

下皇堂时前奏告

伏以於皇文祖将就敢涂愴永閼于衣冠痛莫亲于兆域式安玉体絕望天顏

掩轡毕迎奉御容詣下宫奉安

伏以明明我祖奉窀穸以既安離離在宫痛威容之愈邈天顏惟肖神宇具依不胜追远之悲敢致妥灵之告孝宗皇帝梓宫发引奏告天地社稷太庙别庙太一宫祝文

伏以烈祖上宾阜陵告备慈啓敢涂之旧将趋兆域之藏敢告先期仰祈阴佑

至轡宫奏告帝后祝文【按原集此首前有天庆观报恩光孝观青词此首後有冬至节孝宗皇帝几筵水陆道场齐文皇帝本命万壽观青词散满朱表今并删】

伏以奉皇祖之敢涂勉襄大事近累朝之兆域敢告威灵未遑洛邑之归尚奉会稽之葬仰祈孚佑咸遂妥安孝宗皇帝虞主自浙江还重华宫鼓吹导引曲

孝宗纯孝前圣更何加高蹈处重华丹成仙去龙輶远越岸暮山遐波臣先为卷寒沙来往护灵槎九虞礼举神只乐万世佑皇家

孝宗皇帝神主自重华宫至太庙祔庙鼓吹导引曲

吾皇尽孝宗庙务崇尊鉅典备弥文巍巍东向开基主七世祔神孙追思九闰整乾坤环宇慕洪恩从今密迩高宗室千载事如存

孝宗皇帝虞祭毕卒哭行祭礼祝文

伏以阜陵复土既修易奠之虞班祔有期遂卒无时之哭仰遵礼典莫究哀悰

孝宗皇帝神主祔庙并成穆成恭皇后神主同时祔谒升祔奏告祖宗后帝祝文

伏以竣事阜陵既毕九虞之祭寧神祔室实同二后之升祖宗是依昭穆以序实循礼典敢告威灵

孝宗皇帝祔庙乐章

圣人之德无加于孝思皇孝宗履行立教始终纯诚非曰笑貌於万斯年是则是傲

太庙修置太祖至高宗室帝后神主祔室毕工时前奏告还殿室祝文

伏以班祔孝宗崇新清庙备累朝之祔室奉列圣之神灵敢告先期冀垂昭格

还殿正奉安祝文

伏以阜陵竣事太室鳩工爰藏礼于宫庭用妥灵于宗祔以享以祀来燕来寧

孝宗皇帝祔庙时前告迁成穆成恭皇王神主诣幄次权行奉安以俟同时祔谒升祔祝文

伏以阜陵竣事奉神主以即安室祔致严妥柔灵而并祔稍迁遽幄将奠太宫惟时之良敢豫以告

孝宗皇帝神主祔庙前二日奏告祝文

【原集此首前有太上皇帝本命太一宫设醮青词满散朱表今删】

天地

伏以尊祖礼严因山事毕用宏开于宗祔将升祔于灵仪信宿之先洁斋以告仰祈昭鉴永赖孚休

宗庙

伏以於皇文祖既毕安虞爰考礼于前朝盍妥灵于太室仰瞻列圣敢告先期其永无疆克昌厥後

别庙

伏以惟我孝宗将登清庙设九虞而既毕奉二后以同升永世是承前期敢告

太社太稷

伏以永阜讫功孝宗升祔惟亿载万年之钜典告九土五谷之明神愿鉴先期式垂孚佑

太一宫

伏以烈祖上宾太宫升祔国之大事其敢弗?天之尊神是当先告冀垂昭格用妥威灵

改元庆元奏告昭慈圣献皇后永佑陵永思陵永阜陵成穆成恭皇后欝宫表文【○原集此首前有天庆观报恩光孝观青词今删】

伏以仰奉慈谟勉承丕祚将兴嗣岁首议嘉名惟庆历最为盛时而元佑尤伸公道履端伊迺敷号云初敢告威灵式祈孚佑

改元奏告祝文【原集此首前有皇帝本命万寿观设醮青词满散朱表今删】天地【景灵宫天庆观报恩观同】

伏以纘绪何堪改元惟谨稽仁祖致平之盛泊泰陵嗣德之初合取嘉名用绵丕祚敢伸昭告仰冀孚休

宗庙【景灵宫帝后诸陵表文同】

伏以承列圣之休谨踰年之制合太宗明皇之号有唐实创于嘉名仰庆历元佑之时我宋尤称于盛际爰笔新于岁纪敢?告于威灵

社稷

伏以嗣位承休踰年改号取庆历元佑之盛期绍重规仰勾龙后稷之神用伸昭告尚祈灵佑益介炎图

太一宫

伏以嗣历云初纪年敢後合两朝之盛爰号庆元告十神之灵用祈福佑尚惟昭鉴永助丕基

上辛祀感生帝以太祖升侑奏告祝文

天地

伏以祀感生之帝盖已有年侑创业之君始从今日敢伸昭告仰冀孚休

宗庙

伏以推功艺祖既居东向之尊升侑感生兹谨上辛之祀仰瞻列圣豫告先期

社稷

伏以感太微之精夙只大祀推艺祖之烈升侑明神惟社稷之炳灵设豆筵而致告

诸陵诸櫜宫表文

伏以上辛谷旦大旅盛仪爰推立极之功克配感生之祖遥瞻陵域敢告吉期事体至严威灵斯鉴

僖祖顺祖翼祖宣祖还正殿奉安祝文

伏以新庙是营羣言允协爰卜太宫之右用安四祖之灵敢冀威神式歆典祀

奏告太庙祝文

伏以肇举盛仪宏开别庙祧僖宣之祀视夹室以尤严迁顺翼之灵祔先公而惟谨仰祈列圣俯鉴忱衷

春分前修饰櫜宫奏告诸陵祝文

伏以岁序流易春阳正中既当雨露之濡益愴宫陵之念缮修惟谨种艺以时敢告先期尚祈昭格

进奉皇太后生辰表词 【原集此首前有太上皇帝本命太一宫设醮青词满散朱表今删】

伏以尊居长乐方歌难老之诗时届芳春适启诞弥之节邦家均庆宫壺交欣【中贺】恭惟壽成皇太后殿下德合坤元心同天大赞淳熙之内治恭俭具孚命菲质以嗣兴恩私未报方具游神澹泊玩志清虚益观过历之期坐閱後天之算臣夙承大造获奉慈顏含饴弄孙咸仰姜任之盛戏彩为乐惟祈箕翼之年

伏以修兰亭之禊事方乐春阳上椒殿之壽觴仰尊祖后壽成皇太后殿下恭愿坐膺多福日介修龄国治家齐合三宫而同庆天长地久见千载之太平

太阳交蚀祭告太社祝文

伏以季春五阳日食于朔侧身修行朕不敢怠伐鼓于社彝章具存尚抑羣阴以助阳德

阴云不见交蚀祭谢祝文

伏以清台献占太阳当食引咎自省方切兢兢东方未曦陰云布濩实惟神赐敢恃天休

孝宗皇帝小祥奏告永阜陵櫨宫表词【○原集此首前有皇帝本命万壽观设醮青词满散朱表太上皇帝本命太一宫设醮青词满散朱表又有太一宫祝延太上皇帝圣壽设醮青词满散朱表今竝删】

伏以念兹皇祖遽惊新谷之升瞻彼阜陵采切高山之仰恭惟【尊号】皇帝恢宏帝业垂裕孙谋兹当祥练之初敢後馨香之荐驰诚惟谨陨涕无从

改元嘉定奏告祝文【开禧三年十二月】

天地景灵宫天庆观报恩光孝观

伏以只奉洪图寢逾周纪属时多故欲开嗣岁之祥乃选嘉名用冠新元之首敢伸昭告祈介宏休

宗庙诸陵

伏以承列圣之休方深夕惕纪新元之号式介春祺开景运之亨嘉期武功之耆定仰惟敷佑敢不钦承

太社太稷

伏以为国家者尤谨于纪年有社稷焉敢稽于歳事仰冀神灵之佑庶开嘉定之期肇易美名爰伸昭告

太一宫

伏以国之大事莫重改元天之尊神当严昭告愿介亨嘉之会遂成耆定之功益卑多祥以兴嗣岁

诸陵櫨宫表文

伏以只奉洪图寢踰周纪属时多故欲开嗣岁之祥乃选美名用冠新元之首取商宗嘉定之旨睇武王耆定之功仰冀孚休敢伸?告

闰四起居诸帝后表词【嘉定元年】

诸帝旦表

伏为积分成闰适当孟夏之余告庙有仪敢飭先王之典恭惟【諡号】皇帝德参高厚仁及华戎仰赖在天之灵益绵奕世之庆式供嘉荐用妥威神

诸后旦表

伏为元年建巳闰月定时既当视朔之初爰谨奉先之礼恭惟【谥号】皇后坤隆厚载世嗣徽音慨莫望于声容尚永绵于庆美式修孝敬敢荐馨香

诸帝望表

伏为闰以正时方谨居门之日月惟既望敢修朝庙之仪恭惟【谥号】皇帝泽溥羣黎庆繇百世望僊游而虽邈席丕祚于无疆爰荐孝思用循彝典

诣诸后望表

伏为四月维夏闰式纪于归余先后在天礼用陈于改望恭惟【諡号】皇后母仪如在神御即安永陪衣冠之游用绵宗社之庆奉承孝思冀荐惟馨

洞霄宫径山天目山龙井祈雨祝文

伏以国方多事所愿年丰春夏以来甘泽未足种不入土遗蝗已?当宁兴思旱气甚广近虽得雨犹未霈然遣官祷祠斋心以俟庶祈响答三日为霖大慰九农敢忘伸报

故皇子肃王罔兴灵前夕敕祭祭文

呜呼哀哉顷欣嫔御得此诞育晬盘将设何去之速情之所鍾念念颯蹙苗而不秀无乃太促一奠寓哀往从幽卜

成肃皇后小祥奏告永阜陵櫨宫香表词

伏以祖后上宾尚想含饴之爱岁华遽易忽惊钻燧之期遥瞻陵寢之严倍切音容之感期已久矣俨追慕以如新练而慨然顾加隆而敢怠肃陈宝炷用表哀诚

雨泽愆期奏告祝文

天地十神太一九宫贵神岳镇海渚

伏以旱魃为灾间有不免在于九岁利害尤深疆场甫宁流徙未复中外空匱正望有秋属兹常阳种或未入苟失岁事何以有邦顾惭菲凉久蒙敷佑高高在上【皇地只云后土灵只】俯鉴哀祈三日为霖庶以活国侧身引慝恭俟嘉应

宗庙别庙

伏以时方常阳忧惧实甚种未入土何望收成间有一雨未能沾足斋心致祷靡神不宗在天之灵愿垂矜悯有请于帝救此下民沛为膏泽徧及遐迩迄用康年以壽国脉

太社太稷雨师雷师风师【○原集此首後有天壽观报恩光孝观青词今删】

伏以社稷与君以民为重民之司命以食为天方多艰仰望一稔久矣不雨雨又复霁倾心祷祈愿垂嘉答广布甘泽普济羣生报以秋冬其敢不飭

禳蝗祝文【○原集此首前有皇帝本命万壽观设醮青词满散朱表今删】

天地

伏以稼穡维宝方兴播种之功蝗蝻为灾备举禳禳之术虽都城之少静顾畿甸之尚?远迩何殊焦劳则一敢祈上帝【地云后土】俯念斯民既敕酺神尽屏衆多之害更令田祖益昭秉畀之灵

社稷

伏以禾苗方茂社稷焉依虽旱魃之已驱复飞蝗而为孽神既职幽冥之事朕不胜宵旰之忧爰致祷祈愿垂感格扫螟螣而无迹庶穡稼之有成

酺神

伏以比以飞蝗之作孽尝遵典故以祭酺都邑顿清无非昭答郊圻未免敢怠祈禳惟尽除振振揖揖之灾庶几有薿薿芄芄之望

雩祀祝文

前一日奏告太宗室

伏以旱魃挺灾祷而既应覆出为虐其害愈深爱即紫坛仰祈清昊熙陵之德实配彼天豫告威灵愿垂昭格有请于帝苏此遗黎

上帝

伏以旱气方隆祷既如响飞蝗肆孽禳之亦消柰何常阳又以示谴朕实不德民则非辜只祓郊丘谨修雩祀仰祈上帝哀闵下民蚤兴云雷大沛雨泽无有远迩均被滂沱坐变凶年复成乐郊邦本所繫惟天佑之

太宗

伏以天灾流行固知代有今岁之旱尤所弗堪祷雨应期方幸周浹阳居大夏兹焉益骄爰即泰坛恪修雩祭稽诸典故典作主侑神曾孙菲凉宜致疵疢殃及万姓实惟焦心在天之灵愿垂矜闵亟颁甘泽以迄康年

皇地只

伏以至哉坤元厚德载物生我百谷以活斯人比雨应祈种幸入土苗而未秀又复亢阳涿涿山川物意焦灼国有典故祷旱以雩后土资生敢伸?告愿垂大惠敕使百神三日为霖溥及万域以苏焦槁以致丰登庶几有邦可以长保

再奏告宗庙别庙

伏以顾惟菲凉负荷至重常阳之罚乃徧黎元飞蝗未清雨而复旱投诚列圣威灵在天闵予曾孙以及赤子亟垂昭格沛以甘霖迄用康年保邦是赖【别庙云雨而复旱兹焉致祷愿昭感通】

太社大稷岳镇海渚五方山林

伏以惟民之生以食为命聪明正直亦惟相依今兹旱灾日既太甚侧身致祷徧于百神仰冀为霖沛然四洽庶有秋之可望岂嘉报之敢稽

内中禳蝗文【按原集此首前有成肃皇后中元节水陆道场斋文今删】

伏以旱魃云初遂致飞蝗之作孽雨帅既应不图遗种之滋?远侵闽楚之疆近集郊关之内遇灾是惧惟帝焉依愿敕百灵尽除螟螣之害俯令万国咸保稻粱之丰

祈雨感应报谢祝文

天地

伏以涉春以来旱气甚广种未入土上下隐忧宵旰斋心日致忱祷皇皇后帝【皇地只云坤元后土】实赐鉴临日雨而雨随时孚应艺我稷黍寢成小康尽彼万物不足以报矢词告谢少致衷诚

宗庙

伏以亢阳为灾几害穡事国计所系无所控祈夙夜投诚父母先祖敢期上彻在天之灵霖霖滂沱几无虚日旱魃退听良苗勃然所在中熟实踰始望倾心报谢其敢弗？

别庙

伏以亢阳已甚尝致祷祈甘雨以时实为孚应兹成中熟获济民生幽赞为多可无致谢

十神太一九宫贵神

伏以民为邦本食乃民天岁一不登何以为国顷以旱甚祷于尊神【九宫贵神云祷于贵神】如飧应声随车滂沛肃时雨若易歉为丰敢罄谢诚尚求终惠

岳镇海渚五方山林

伏以国方多事岂堪旱灾？诚祷祠靡神不举时雨之降实由山川三日之霖四远沾足岁事将就？谢敢稽太社太稷雨师雷师风师【○原集此首後有天庆观报恩光孝观青词今删】

伏以顾惟菲德致此亢阳仰赖百神鉴予忱祷风雨时至雷霆疾驱远迩均沾成此中熟一祈一报敢怠此诚尚惟居歆益加敷佑

祭告酺神

螽贼为灾秉卑有资于田祖蝗蝻肆孽扫除实赖于酺神既随祷以尽消俄蔽空而复至人心相恐岁事可忧疑有物以驱之殆非力可及者载修祀事仰叩高灵俾食叶食心之妖罔存噍类成多黍多稌之庆还保丰登

攻媿集卷四十八

卷四十九

钦定四库全书

攻媿集卷四十九

宋 楼钥 撰

谥议

孝宗皇帝谥议【奉敕撰】

臣闻帝王之出治丰功茂烈生则着见于天下而其流传于後世者则待节惠之名要皆取其盛者而传之文王一怒而安天下非无武也武王告取成而作洪范非无文也取其盛者而传之则备道全美可以一言定也甚哉孝之大也虞舜之大武王之达自汉历唐无不论帝为孝本朝累圣相承皆用旧典若夫集孝道之大成则未有如大行之盛者也恭惟大行至尊壽皇圣帝绳艺祖之武重光尧之华以天纵之能日新之德临御天下二十有八载巍巍煌煌不可备述若形容天地绘画日月则不容无辞方在初潜龙德而隐学聚问辨师教不烦日就月将君德昭着?巩劳谦共为子职日趋朝谒威仪雝肃虽莫窥其涯涘而中外属心天人协应光尧内禅高视唐虞嗣位以来励精庶政召收故老尊礼元臣临朝若神待物如春崇节俭以革奢汰之风振纪纲以起偷惰之习事无小而不察人无微而不记机务虽?酬酢无壅立法定制动为後则以科举为未尽则立待补之法以蒐遗才以武举为未盛则优入仕之级以收智勇年劳并用以裁滥赏而不致于累迁铨闱加严以抑任子而又为之限节改秩必使之作邑谓举以亲民而使之治民御史必取之贤宰谓受人之察而後可察人以周行速化必使试郡而後为郎以延阁清华必俟有功而後除职监司守将必延见而临遣癯老昏繆之人不得而隐藏奸赃之吏必穷治而斥逐清介洁廉之士则从而拔用朝士阙官乃除遂无待次之淹要郡留阙选才遂无轻授之冗黜赃吏之世赏进军功于流内长虑却顾守之至坚故虽日不暇给而四方靡然向化矣于时疆场未寧戎车方驾激励将士严备边陲张皇六师明见万里中原起来苏之望殊邻多归附之民抚而有之还以为用天威既振强敌畏讐虽犁庭扫闾未快初志而信使复通减币杀礼至今无烟火之警苟非雄断远略何以臻此临政既久治道愈明物来能名事至辄断精神之运上际下蟠于天地之间智虑所关六通四辟于帝王之德行公道以销党偏之蔽推平心而絶喜怒之私间有水旱之变应天以实而礼文尤备州县之奏恐其不速蠲复之数恐其不多倾困倒廩以济其急赏勤罚惰以励其余民不知其有凶岁亦随以登熟幸太学幸秘省廷策贡士布文教以振士风御鞍马亲弓矢申严军法立武事以张国威内外大小之臣无不列之屏以待黜陟山川险要之要无不指诸掌以立防闲治具毕张风化已成方且玩意希夷而无奉道之过游心寂寞而无佞佛之迹作歌天之图兢惧愈深辟延和之殿諏访愈切躬讲读之勤设遗补之官其于保治有始有卒至于脱屣万乘燕居重华授受之际尤为雍容呜呼身退而道弥高尊极而用弥俭是宜万有千岁永处慈宸而厌代登遐归于帝乡此羣臣万姓所以攀号擗踊泣尽而继之以血也远日有期恭定尊谥请之南郊以诏万

世谨按谥法曰能官贤才曰哲帝德广运曰文应变无方曰神保大定功曰武持盈守满曰成慈惠爱亲曰孝迹无知人而善任使文武各得其用非所谓能官贤才乎修德以来远人矢文以治四国非所谓帝德广运乎酬酢以周万几图回以尽衆智非应变无方乎妙韬略而不用极聪明而不杀非保大定功乎守基图之广大延国祚于绵远非持盈守满乎若孝道之盛非惟臣子所不能称赞虽考之谥法求之六家语其甚盛者曰慈惠爱亲而已是则未足以彰大行之孝也报本反始而奉郊禋尊祖敬宗而事庙飨惟高宗为天下而得人太皇尽母道以爱子而大行天赋至性不可解于心备四海九州之养谨五日一朝之仪委曲周尽犹恐不及两宫九闰终无间言固已风动四方震服荒裔高宗属疾则衣不解带躬自尝药及弃天下则勺水不入于口倚庐有过于哀鄙汉文之短丧陋晋武之无断身服苴麻礼尽苦块行有匹夫之所难哭则哀动于左右邻使来吊止许朝于丧次颜色之戚哭泣之哀邻使退而叹曰皇帝圣孝乃如此大臣或进谕解之言则流涕被面曰大恩难报羣臣感泣莫敢仰视易月之制既终因山之役既毕孺慕无已追远弗胜遂举大宝以畀圣子不曰倦勤不曰求逸惟曰不得日奉先帝之几筵躬行圣母之定省又曰俾予一人获遂事亲之心永膺天下之养于是御素服于乘輿尊几筵于内殿退处堊室以终三年之丧哀疚不忘斋洁自若钦事慈福温清无违呜呼兹岂非集孝道之大成又岂慈惠爱亲之所能尽也大行至尊壽皇圣帝宜天锡之曰哲文神武成孝皇帝庙号孝宗谨议

成穆皇后改谥议【奉敕撰】

臣闻帝王之兴皆有天命夫妇大伦尤非偶然曰天作之合曰天立厥配正始之道王化之基于是乎在焉矧汾阳大家多为后族唐室宪宗则有懿安之盛皇朝真庙则有章穆之贤姓系相承是生圣女庆钟戚閤实媿壽皇生不及禕衣之荣歿而膺宝册之礼久安别庙将奉太宫宜改尊称以从帝谥恭惟安穆皇后柔明懿淑慈顺温恭蚤俪王藩克尽妇道设桑弧于门左屡占熊梦之祥带弓鞬于祿前每啓燕祠之瑞云何不淑遽奄九原迨烈祖之御天眷元妃而追册欲歌流荇伤不见于令姿正号长秋遂疏恩于幽窆固已严烝尝之奉崇节惠之名绵庆祚于三朝介洪休于万世重华厌代方服大丧吉竈因山行当升祔念今日遗弓之痛既切于神孙愴昔时故剑之求用承于先志爰因安穆之懿式遵成孝之规谨考谥法妇德均一曰成德化肃雍曰穆安穆皇后窈窕好逮有关雎之美用心专壹有鳴鳩之德非妇德均一乎孝钦以奉舅姑和平以仪闺门非德化肃雍乎伏请改上谥号曰成穆皇后

成恭皇后改谥议【奉敕撰】

臣窃惟至尊壽皇圣帝临御之初仰奉高皇首隆孝治化家刑国百度具举而中闈久虚阴教斯阙乃奉亲命乃諏卜吉考正古制闋建长秋安恭皇后淑范懿德冠于後宫君子好逮遂正乎内坤承乾而时行月遡日以为明禕揄盛服助成九庙之奉栉纵具礼钦承两宫之养母仪既尊后德有辉而曾未数岁祲缠椒掖方隆大练之饰终符素柰之祥求贤审官未展周南之志感今怀昔空形宋文之策固已极褒崇之典议安恭之谥祭于别庙迨今二十有八年矣壽皇上宝万国起号弓之慕孝孙尽礼七月它因山之役有司奏请定谥南郊二后在天皆应改号以从成孝之名谨考之谥典曰夙夜警戒曰成谦而好礼曰恭安恭皇后共茧馆之职以赞

亲耕之勤谨鸡鸣之戒以勉相承之道禁切外家不干里谒兹不曰夙夜警戒乎躬节俭之德服澣濯之衣却贡献之珍丽遵图史之箴规兹不曰谦而好礼乎伏请改上谥号曰成恭皇后

刘忠肃公【大中】覆谥议

资正殿学士刘公辅政于绍兴七年未几而薨距今五十有余年矣中更权臣当国之久故家泯然无闻公又为赵丞相鼎深知同寅之人尤无敢言者迨今始得出处之详于行状太常又明其立朝体国之大节谥以忠肃可谓当矣呜呼高宗皇帝身济大业披荆棘而立朝廷一时人物虽经崇观政宣之摧折靖康建炎之流离而元佑流风犹有存者赵公身任天下之重甄拔人望布满中外论思劝讲皆极天下选由是王政日修国势日隆以后中兴是岂惟将帅攘却之功哉抑闻之赵公入相之初首白高宗必欲得公与王公庶为执政以自助二人遂并用方是时君臣上下日夜讲求恢复之计外与敌通使而为备甚饬所谓行在所止为时巡之谋若不可以一朝居非若後日之晏然于此也公之同心辅赞力正国本太常之言皆家世旧闻参以记传炳炳如丹而後公之名益显望之如神人然公议之不可泯谥法之有益于天下如此可不务哉

王节愍公【伦】覆谥议

马或奔蹏而致千里士或以负俗之累而立功名夫泛驾之马蹏之士亦在御之而已此虽非古先用人之道汉武帝所以能得奇才为用盖以此也靖康艰难事出仓猝承平百年衣冠如云习于久安不知所为平时经明行修褒衣博带之士狼狈失守不计其几至有助桀为虐忘君卖国不忍言者枢密王公名臣诸孙跌荡不羁浮湛闾里不见其异一旦慷慨奋发论事激烈抗章敢言钦宗为之改容擢于布衣待以国士天下方知其为奇男子也帅府既建首为劝进之举高宗募忠勇之士往使不测之敌罔有徇死以行者惟公机智勇辩气吞强敌往来

三忠肝义胆折服倔强和议之成为力最多公之志盖未已也故每当陞辞必以乘机用兵为请勿复以臣为意此其志岂止于和戎哉使被留音问断絶诱以高爵而不就胁以严诛而不惧引义南向仗剑以死郡邑为之震动至画像而祠之回视小廉之士其能以忠徇国视死如归如公者寡矣太常易名曰节曰愍无可议者传之来世抑以见取士之无方不应以细故而弃才也

杨惠懿公【僖】覆谥议

谥所以易名也法苟应谥虽功烈不见于世亦必随其人之所宜而称之此孔文子之所以为文也故特赠光禄大夫少傅杨公某生长富贵不知天下之忧患而抗志不羣笃志问学隆师亲友嗜书好古若有不能自己者古人以公子而厉布衣之操者公实近之已而游太学擢上第优游都城以致显方是时四方无事朝廷尊安周旋清华尤无以自见于事然因所职而建言类老于世故者自诡治民休有惠爱晚登禁途益有志于效忠孜孜论思时见一二不幸所蕴未伸天不假之年而遽忽焉惜乎未见其止也官簿已高一赠而至光禄礼官即其已行者揆之以法谥以惠懿得其实矣尚何异辞

攻媿集卷四十九

卷五十

钦定四库全书

攻媿集卷五十

宋 楼钥 撰

进故事

唐监

李绹对宪宗曰人臣死生系人主喜怒敢发口以谏者有几就有谏者皆昼度夜思朝删暮减比得上达十无二三故人主孜孜求谏犹惧不至况罪之乎帝善其言【旧唐书李绹传不载此新唐书载绹见浴堂殿帝曰比谏官多朋党论奏不实皆陷谤讪欲黜其尤者若何】

【绹曰此非陛下意必憊人以此营误上心自古纳谏昌拒谏曰夫人臣进言于上岂易哉君尊如天臣卑如地如有雷霆之威彼昼度夜思始欲陈十事俄而去五六及将以闻则又憚而削其半故上达者才十二何哉干不测之祸顾身无利耳虽开纳奖励尚恐不至今乃欲谴诃之使直士杜口非社稷利也帝曰非卿言我不知云云与此大意同而详约其异】帝谓宰相曰太宗以神圣之资羣臣进谏者犹往覆数四况朕寡昧自今事有违宜卿当十论母但一二而已【○旧唐书宪宗本纪元和二年十二月丙辰上谓宰臣曰朕览国书见文皇帝行事少有过差谏臣论诤往复数四况朕之寡昧涉道未明今後事或未当卿等每事十论不可一二而止与此无异意而语句不尽同】

臣尝谓近古敢言者在唐太宗时无如魏徵太宗尝赏其直言徵对曰陛下导臣使言所以敢尔不然臣敢数批逆鳞哉在宪宗时无如李绹而绹之言如此不惟曲尽人臣之情盖亦躬自蹈之而後能言之以此知一介之臣敢言于人主之前者至鲜惟在人主有以导之宪宗有意贞观之治【原集因避宋仁宗讳魏徵作魏证贞观作正观今并更正】谓事有违宜卿当十论母但一二而已绹既能开广帝意宪宗又能励其羣臣如此中兴唐祚不在兹乎仰惟陛下和顔听言好善忘势凡有奏对无不俯纳臣密侍清光实亲见之而臣犹援宪宗李绹之言者盖当国家闲暇人心易弛朝廷之上罕闻直谏又曰圣躬康复以来羣臣深恐仰劳听览奏事不敢迟久言而简切固不在多第恐相习成风各务省事朝删暮减恐无二三情实不输事理不究羣臣苟免烦渎之过陛下因谓无事可言私忧过计昧死陈述愿陛下厉太宗宪宗之志俾廷臣竭魏徵李绹之忠知无不言言无不尽上下交泰以兴治功圣度优容择其可用者力行之顾何事之不济哉窃见陛下视朝之际宰辅奏事已久亦难以坐至日宴寿皇在御之日多于进膳之後便殿引见臣寮得以从容询访此实陛下家法可举而行也

资治通监

武德九年【○九年旧本讹八年今据资治通监改正】房玄龄尝言秦府旧人未迁官者皆嗟怨曰吾属奉事左右几何年矣今除官反出前宫齐府人之後太宗曰王者至公无私故能服天下之心朕与卿辈日所衣食皆取诸民者也故设官分职以为民也当择贤才而用之岂以新旧为先後哉新而贤旧而不肖安可舍新而取旧乎今不论其贤不肖而直言嗟怨岂为政之体乎

贞观元年或上言秦府旧兵宜尽除武职进入宿卫【○进旧本讹追今据资治通监改正】太宗谓之曰朕以天下为家惟贤是与岂旧兵之外皆无可信者乎汝之此意非所以广朕德于天下也

三年濮州刺史庞相壽坐贪污解任自陈尝在秦王幕府上怜之欲听还旧任魏徵諫曰秦府左右中外甚多恐人人皆恃私恩是使为善者惧上欣然纳之谓相壽曰我昔为秦王乃一府之主今居大位乃四海之主不以独私故人大臣所执如是朕何敢违赐帛遣之相壽流涕而去

九年岷州都督高甌生坐减死徙边或言甌生秦府功臣寬其罪太宗曰甌生违李靖节度又诬其反此而可寬法将安施且国家自起晋阳功臣多矣甌生获免则人人犯法安可复禁乎我于旧勲未尝忘也为此不敢赦耳

臣闻书曰官不及私昵惟其贤爵罔及恶德惟其能盖官爵者天下之公器人主所以厉世摩钝犇走天下而天下为之服役者以其用之公也唐太宗由秦王嗣位其平日陪从于左右者往往经百战之余冒矢石犯霜露出万死而得一生及见兴王之盛者盖无几也太宗以至公为心虽有故人旧勲而求迁官者未始轻予祈入卫者不肯偏用至於坐贪污者虽怜之而终遣之去犯法者虽不忘而终不敢赦惟其见之明而行之果是以能成贞观之治本朝列圣故事一一可考陛下毓德春宫之久攀附之人官之禄之其人甚多既历四年而扳援求请今犹未已动烦宸衷曲为区处臣愿陛下远鉴文皇之公心近遵列圣之定法裁抑侥幸使各安分而退聽则外此而妄求者亦当息心朝政清明非为小补

唐监

太宗贞观三年帝谓侍臣曰中书门下机要之司诏敕有不便者皆应论执比来惟睹顺从不闻违异若但行文书则谁不可为何必择才也房玄龄等皆顿首谢【○旧唐书太宗本纪及资治通监令百司自今诏敕有不便者皆应执奏毋得阿从云云并载在贞观四年七月与此作贞观三年异】

臣闻机要之司譬之人身则喉舌也舜之命龙曰夙夜出纳朕命惟允盖命令之出或出焉或纳焉惟欲其允而已然必先之曰命汝作纳言以纳名官正欲其能纳也命令之颁于天下犹饮食之入腹也饮食不择则身必病命令不审则下必伤人之饮食也柔则当茹刚则当吐喉舌之责也若不问刚柔知茹而不知吐一过喉舌所伤必多虽欲悔之已无及矣大雅之称仲

山甫曰出纳王命王之喉舌惟其或出或纳如喉舌之谨焉夫然後赋政于外而四方爰发也太宗其可谓知此者矣不惟听臣下之言又敕责而使之言范祖禹亦曰朝廷设官分职非徒使上下相从欲交修其所不逮也苟取充位而奉行上令则是胥吏而已仰惟陛下平心处事虚已听言後省间有论奏率蒙赐可不憚更改是将比隆大舜予违汝弼之训而臣犹以太宗之事为言者言切而易明事近而可鉴亦工执艺事以谏之意惟陛下行事每每如此则圣德益新朝政亦清贞观之治不难致也

三朝政要

太宗淳化七年六月以左谏议大夫魏庠司封郎中知制诰柴成务同知给事中事凡制敕之有所不便许依故事封駁以闻八月命枢密直学士向敏中张咏同知银台通进司凡天下章奏案牘必由二司然後进御先是中外奏报但由尚书内省籍以下有司有司或行或否得缘而为奸禁中不得知外司无纠察之职至是始命敏中等谨视其出入而鈎稽焉事无大小不敢有所留滞矣九月以给事中封駁隶银台通进司应诏敕并令枢密直学士向敏中张咏详酌可否然後行下富弼等释曰古者诏令皆中书奉行门下省审封駁改正厥有司存太宗亲选向敏中张咏同判通进司等以察稽失二府奉行之过皆得改駁关防之意谨之于始也今之羣臣多不举职官有封还之名未闻駁正之实所以命令不由此司十有六七盖因循之蔽也

臣窃惟唐给事中之职凡百司奏钞侍中既审则駁正违失诏敕不便者涂窜而奏还谓之涂归李藩为给事中制有不便就敕尾批却之吏惊请联他纸藩曰联纸是牒岂曰批敕耶唐制之严如此中更五季寢失其职太宗皇帝深究治乱之源特振其职业妙选名臣为之曰凡制敕有所不便许依故事封駁曰应诏敕并令详酌可否然後行下则是事无轻重政无大小官无尊卑封駁详酌是其职也近者给事中论奏除目或谓止当駁论横恩不当及此臣深恐此论有误宸聪使後省寢失其职纪纲废紊所关者大是敢仰稽太宗致治之要为陛下言之庶使後省臣僚得举其职言听计行以裨圣治臣不胜惓惓

汉书

高帝纪六年上归栢阳五日一朝太公云云诏曰人之至亲莫亲于父子故父有天下传归于子子有天下尊归于父此人道之极也

臣闻文王之为世子也朝于王季曰三武王帅而行之不敢有加焉父子之道天性也一日不见岂容自安汉高帝五日一朝其父比之文武虽曰稍疎然文武皆以世子事亲高帝已有天下曰见则有所不暇故立五日之制焉本朝列圣务尽孝道凡事祖后母后于宫中见之无时至尊壽皇圣帝之事高宗正以异宫而处不得已俯从汉制二十八年终始不倦陛下今春过宫者再恭请者一人情感悦欢声四起自兹以後积雨既不可出极暑又难进拜因仍至今五閱月矣都人颺颺日望翠华之驾今则雨师洒道之余仲秋新凉之始伏望早降睿旨夙戒有司讲定省之礼上以奉两宫之欢下以慰兆姓之望臣不胜惓惓

资治通监

唐贞观六年监察御史马周上疏云云太上皇春秋已高陛下宜朝夕视膳今九成宫去京师三百余里太上皇或时思念陛下陛下何以赴之又车驾此行欲以避暑太上皇尚留暑中而陛下独居凉处温清之礼窃所未安今行计已成不可复止愿速示返期以解衆惑上深纳之

臣窃考唐太宗时高祖以太上皇居大安宫而太宗欲往九成宫避暑马周切谏以为车驾此行欲以避暑太上皇尚留暑中陛下独居凉处温清之礼窃所未安又曰九成宫去京师三百余里太上皇或时思念何以赴之此皆忠臣爱君之切足以感悟主听垂宪後世仰惟陛下诚孝着闻乃去岁之冬及至日岁旦三诣重华都人欢呼中外庆快今犹未久也霜寒阴雨固难屡出窃闻壽皇近曾宣医外间传闻日望翠华夫以九成宫去大安之远马周切切欲太宗之速还今则鸣蹕至近伏恐壽皇思念敢望出自圣意亟修定省之礼实天下幸甚

攻媿集卷五十

卷五十一

钦定四库全书

攻媿集卷五十一

宋 楼钥 撰

序

止斋春秋後传左氏章指序

春秋後传左氏章指二书故中书舍人止斋陈公傅良之所着也春秋之学不明久矣啖赵之後至本朝而後有泰山孙先生复尊王之说弥显公是刘先生敞权衡意林等书订证尤详伊川程先生颐虽无全书而一序所该圣人之大法备矣自王荆公安石之说盛行此道几废建炎绍兴之初高宗皇帝复振斯文胡文定公安国承伊洛之余推明斯道劝讲经筵然後其学复传学者以为标准可谓大全矣东莱吕公祖谦又有集解行於世春秋之义殆无遗蕴止斋生於东嘉天资絶人诵书属文一旦迴出诸老先生上歛然布衣声名四出六经之说流行万里之外而其学尤深於春秋钥非深於此者尝涉猎诸公之书非不明白然亦不过随文辩释间有前後相为发明者亦不见体统所在钥自客授之初即从止斋游虽不得执经其门尝深叩之同在西掖时始以隐公後传数篇相示因为道春秋之所以作左氏之所以有功於经者其说卓然且曰自余有得於此而欲着书於诸生中择其能熟诵三传者首得蔡君幼学蔡既仕又得二人焉曰胡宗曰周勉游宦必以一人自随遇有所问其应如响而此书未易成也未几去国而钥亦归虽若相忘於江湖而友朋之来必以此书为问虽亲炙之者跪以请则曰此某身後之书也迨卒於嘉泰三年而此书始出其壻林子燕最得其传又四年而後长子师辙与其徒汪龙友以二书来钥老矣如获希世之珍屏去他书穷昼夜读之始尽得其大意呜呼盛哉盖未有此书也先儒以例言春秋者切切然以为一言不差有不同者则以为变例窃以为未安公之书不然深究经旨详阅世变盖有所谓隐桓庄闵之春秋【○原集因避宋钦宗讳凡桓字皆作威今改正後同】有所谓僖文宣成之春秋有所谓襄昭定哀之春秋始焉犹知有天子之命王室犹甚威重自霸者之令行诸侯不复知有王矣桓公之後齐不竞而晋霸文公既亡晋不竞而楚霸悼公再霸而又衰楚兴而复微吴出而盟诸夏於越入吴而春秋终矣自杜征南以来谓平王东周之始王隐公逊国之贤君其说甚详而公以为不为平王亦不为隐公而为桓王其说为有据依又其大节目如诸侯改元前所未有齐鲁诸大国比数世间有世而无年至记厉王奔彘始有纪年古者诸侯无私史乘与檇机春秋皆东迁之史也书齐郑盟於石门以志诸侯之合书盟於咸以志诸侯之散是春秋之终始也隐桓庄之际惟郑多特笔襄昭定哀之际惟齐多特笔诸侯专征而後千乘之国有弑其君者矣大夫专将而後百乘之家有弑其君者矣宋鲁卫陈蔡为一党齐郑为一党公会齐郑於中丘而後诸侯之师衡行於天下罪莫甚於郑庄宋鲁齐卫次之而父子兄弟之祸亦莫甚於五国是可为不臣者之戒矣齐桓公卒郑随朝楚夏之变夷郑为乱阶侵蔡遂伐楚以志齐桓之霸侵陈遂侵宋以志

楚庄之霸足以见夷夏之盛衰矣书公孙兹帅师书公孙敖帅师书公子季友卒皆见三家之所从始首止之盟郑伯逃归不盟则书以其背夏盟也厉之役郑伯逃归不书盖逃楚也夷夏之辨严矣自隐而下春秋治在诸侯自文而下治在大夫有天下之辞有一国之辞有一人之辞於于戈无所不贬於玉帛之使则从其爵劝惩着矣文十年而狄秦又三十年而狄郑又五十余年而狄晋狄郑犹可也狄晋甚矣贬不於其甚则於事端余实録而已矣此皆先儒所未发至僖之三十二年四卜郊不从乃免牲犹三望极言鲁之用天子礼乐以明堂位之言为不然惠公始乞郊而不常用僖公始作颂而以郊为夸引祝鮀之言为证此尤为前所未闻也若左氏或以为非为经而作惟公以为着其不书以见春秋之所书者皆左氏之力章指一书首尾专发此意昔人以杜征南为丘明忠臣然多曲从其说非忠也公之章指谓君子曰者盖博采善言礼也者盖据史旧文非必皆合於春秋或曰後人增益之或曰後人依仿之或以凡例义浅而不取或以例非左氏之意盖爱而知其恶者乃所以为忠也又言庄公元年至七年及十九年以後讫终篇多无传疑有佚坠公之求於传者详矣呜呼与止斋游前後三十年不得卒业於其门既兴殄瘁之悲而後得二书其间尚有欲质疑而不可得此所以抚卷三叹而不能自己也

息斋春秋集注序

吾乡四明庆历皇佑间杜杨二王及我高祖正议号五先生俱以文学行谊表率於乡杜先生又继之讲明经术名公辈起儒风益振厥後伊洛二程先生之兴得其传以归者惟故礼部侍郎高公公天资纯笃济以勤敏师友渊源学问精诣入上庠登舍选已有盛名诸公贵人争欲婿之拂衣而归建炎二年升补上舍绍兴改元德音免殿试赐同进士出身十三年高宗初建太学遴选名儒为四方所推服者为少司成公实应选士子云集凡学之规则皆所裁定明年三月车驾幸学讲易泰卦於上前擢贰卿将向用矣以直道忤时宰一斥不复家居累年中壽而歿泊端明汪公登从班奏言公学行出处之详始诏复次对官诸子而公之名愈显矣自顷王荆公废春秋之学公独耽玩遗经专以程氏为本又博采诸儒之说为之集注其说粹然一出於正然犹未行於世也仲子得全知黄州始取遗藁刻之而属钥以序钥生长外家汪氏於公有连虽生晚不及承教而犹记拜公牀下窃闻之公既投闲杜门屏居略不以事物自撓日有定课风雨勿渝此书之所以成也呜呼泰山孙公明复【○前篇书名此书字故异】着尊王发微深欲明夫子褒贬之旨伊川先生则谓後世以史观春秋谓褒善贬恶而已至於经世之大法则不知也自有春秋以来未有发此秘者公亦曰仲尼惧先王经世之法坠地莫传欲立为中制俾万世可以通行故假周以立王法而托始於隐公焉且以文武之道期後王以周公之事业望鲁之子孙也以此推之春秋固非一王之法乃万世通行之法也其推明伊川之意类如此昔曾子每诵夫子之言则必曰吾闻诸夫子子夏使西河之民疑汝於夫子曾子罪之说者曰言其不称师也观公之序直引伊川之序不更一辞可谓称师而知其所本矣伊川有序而传未成公之书成而未有此当属之深於春秋者钥何人而敢预此黄州言之再四窃幸因得托名於不腐乃弗敢辞公讳闕字抑崇子孙能守家法其兴盖未艾也

古文孝经指解後序

古文孝经实吾夫子之旧秦火之後出於屋壁而顏芝所藏十八章已先行於世翼奉张禹等五人各自名家古文惟孔安国马融为之传而又不显隋开皇中刘炫为作稽疑一篇已多讥笑唐陆德明亦云古文世既不行随俗用郑康成注十八章本独一刘知几以为行孔而废郑诸儒争辩蠹起明皇亦以今本注而序之书以八分刻之经台犹在长安童而习之皆此也司马文正公仅得古文於秘阁之藏为之指解尝以进仁宗哲宗而范太史祖禹继为之说噫自汉以来何其好者之寡也故信州使君季公天资纯孝笃学好古尊敬此书又为详说不惟发明夫子之旨又以文正公之解随文演畅用意甚勤辞亦详备如爱敬可行於匹夫而恶慢不可行於天子如论忠顺之不可失如不敢遗之机甚微而其效甚大又曰要路云者言所敬者寡所说者衆也曰至德云者言所敬者广而所因者本也皆有所启发非苟然者绍熙五年七月皇上践阼有诏求贤公以八月进此书未几中书舍人陈公傅良又为之缴进於经筵初欲刊於广信而不及公之子淇念此书之未行将刊於家求为後序经曰故自天子至於庶人孝无终始而患不及者未之有也明皇注云始自天子終於庶人尊卑虽殊孝道同致而患不能及者未之有也言他此理故曰未有此说非也古文小异故自天子以下至於庶人文正公则曰始则事亲也终则立身行道也患谓祸败言虽有其始而无其终犹不得免於祸败而羞及其亲未足以为孝也季使君又以明皇之事证之是矣钥窃以为犹未为详且明敢申言之夫圣人一经可谓详矣而其立教之要专在此数语孩提之童无不知爱其亲是人之於孝未有无其始者夫子所以为曾子谆谆言之正欲人之有终也夫子首以总言孝道次分天子诸侯卿大夫士庶人之孝大小之分固自不同而又於此谓孝道有始而无终未有不於祸患者此则无有贵贱之别後虽具述孝治圣治之效以至终篇然其教人之最切无过於此上下一体俱当尽心焉明皇惟不知此所以不克其终可不戒哉篇末云孝子之事亲终矣止为丧祭之终犹未为孝之终也若所谓孝之终与此孝无终始之终盖为立身行道死而後已者也故虽曾子既启足手以其能全而归之自以为知免矣然而易箒一节犹在其後盖大夫之箒犹非其正也呜呼圣人之言可谓深切而能有终者亦岂易易乎钥余生无几深知兢惧得正而毙所愿加勉故以告有志之士且以补二公之说云

范忠宣公文集序

惟昔贤者皆後世之师表而学者之慕古人则自各有不同如汲黯之慕袁盎司马子长之慕蔣相如若不可解於心者本朝先正名德相继如泰山乔岳景星凤皇事近而易考嘉言善行皆当取则而区区之愚少而读元佑丞相忠宣范公言行録反复终始正学大节伟识宏度赞叹不足於诸钜公间尤愿执鞭欲追逐其万一而不可得也如奏议国论等书责人如责己助廉成德之训又若避好名之嫌则无为善之路等语皆当终身诵之每恨未见其家集也嘉定五年三月甲戌公之从曾孙中书舍人之柔见过谓钥曰忠宣文集未行於世晚而谪居永州三年邦人至今怀仰比因沈使君圻赴郡以家藏本属之既已刊就而旧无序引径以见委钥谨谢之且曰托名不腐岂非晚进之幸岂非平日之愿願年衰学落何足以预此三辞不获则取而伏读越两日而尽得之盖公天资诚确笃志学问承文正公之亲传博之以泰山孙明复徂徕石守道盱江李泰伯三先生师友之益发为词章根柢六经切於论事无有长语而一出於正文忠苏公序文正公集有曰其於仁义礼乐忠信孝弟如饥渴之於饮食欲须臾忘而不可得又曰虽弄翰戏语率然而作必归於此故天下信其诚争帅尊之公真是似者哉而钥

之所尊敬者此又其余事自其立朝出镇庙谟相业具载史册不待贅言惟公本於忠恕得二者之功用深入吾夫子闕域非淺丈夫所能窺者温恭惟謹无异稠人遇有当为勇决過於贍育此其大过人者然亦尚可勉也心平而寬慮周而远喜恕哀乐所发而必中克伐怨欲不止於不行包含太虚无所适莫姑以其见於外者一二言之邓綰尝奏罢公襄州及言者攻綰则极力争之谓已经先朝责降不应再有所贬公亦非有意於以德报怨自谓上惜朝廷事体下以安人情反侧黄门诵杨畏弹章而公去相位他日哲宗面斥黄门公从容为解黄门谓公为佛地位中人章子厚得罪父年九十议与一便郡公言当置往咎而念其亲公本以议新法不合而去及温公将尽改熙丰之法公谓特当去其太甚又须徐徐经理论差役一事尤不可暴操心类如此公既丧明而责知随州寻窜永州盖子厚必欲寘之死地而公素安义命无一语怨之家人犹未平也风雨中覆舟於江以救仅免拭面而语家人曰此亦子厚所为耶呜呼使之从夫子於陈蔡当亦有不吝何病之言此非他人所及也蔡新州重得罪公力救之上忤廉中下违同列贤如刘元城诸人以吴处厚为义存君亲而诋公不遗余力公不为动卒贯其死一时不以为快及事之变自刘忠肃吕汲公等虽终於贬所其得免於已甚着始知公之不寘新州於死之力也汲公辈窜岭表郊赦未颁先谓难从恩宥公斋戒奏大防等年老疾病何以自存迹其所罪亦因持心失恕好恶任情以异己为怨讎以疑似为讪谤误国害公覆车可鑒此不惟欲寤泰陵正欲感动子厚辈使之革心而从厚也呜呼自熙丰元佑以至元符绍圣之间世事屡变翻覆非一徽皇践阼改元建中靖国流人悉归四海望太平於朝暮钦圣显肃皇后与徽皇待公而为政至遣中使远至湖外好赐牵复迎劳不絕公时在瞽废风痺中知上果用我亦欲感激自奋而病不可为矣呜呼天乎倘延以三数年之壽使再得政则调一天下可以仰副建中靖国之意岂复有後日之祸哉公既已矣而蔡吕俱召吕又为蔡所挤而任蔡愈专矣此所以抚卷长怀而继之以太息流涕也後之君子多识前言往行以蓄其德者於此书可不熟复而力行之以代弦韦之佩乎文正四子长监簿以疾蚤歿忠宣与二季皆显衣冠蝉聯然自忠宣以来一百二十有四年而後中书舍人始继世科实监簿之曾孙范氏之兴未艾也

王魏公文集序

神宗皇帝不世之资高出百王始相荆国王文公君臣之间义同宾友奏对往复载於史可知也元丰之初主德已成天容毅然羣臣尊仰将顺之不暇非复熙宁之比惟左丞魏公起由庶僚自结主知以省寺八品官而特许赐坐与府尹奏事而命奏罢独进一为柱史许以直前而又导之使諫待遇之意固已卓异於余子公亦感慨自奋不负所学论事上前守正不阿精当剴切其视同列如野鹤之在鷄羣一时才气无出其右者若其论说古今治乱灾变警戒计边馈之非实杜西师之再举除市易之罚息而别以内外救徐勲之诏狱而戒其出入折奸佞之萌辨是非之际皆深中事机有以变移主意而一出於义理之正言议风烈凜凜生气神宗倾听獎拔尝谓公曰朕与卿兄弟如同产然是知神宗圣度恢伟容受直言而当时俛伏听命无能有所论说者盖皆具臣不足以佐下风耳不然公之抗直安得容於朝廷之上乎公之五世孙直显谟阁厚之编次遗文属钥为序钥曰文公之文固不待序而显校理之文曾南丰为之序而陈后山继之使钥诵左丞之书则可何敢以此自任显谟公求之不置钥曰吾有以应子之求矣田承君昼天下士也送别邹道乡之言可畏可仰是岂苟於从人者在公幕府至十有

五年微公不足以致此客微承君不足以入公之幕也为公家传其称公之文则曰踔厉骏发卒归宿於道制诰温润丰美得中和之气而属辞赡洽成於口授上数称之诰命有可以通行者俾公为定辞以新之公在翰林旧制尹京者不行词时高丽修贡数以奏来上而所用答诏以十数有旨学士等槩为之执政欲人求一通以塞旨而上乃独用公所草其後既为丞弼每下大诏令与通好夷狄多属於公若筹边之妙略立朝之大节皆炳炳如丹又采长老之论缙绅大夫之谈谓公厚德怀人如晋羊祜直节敢谏如魏辛毗吏治儒雅如汉张敞风槩整峻如唐温造昌黎有曰知其客可以信其主知其主可以信其客公之贤足以表千古承君之言可以信後世钥不佞尚何敢措辞於其间

陈都官文集後序

制置使陈官由地官贰卿出镇四明政成暇日以家藏曾祖都官文集刻之郡庠属钥为序谢不敢且曰蒋鲁公之序详矣何敢赘既不得命敬题於後曰高哉都官之节也鲁公称公之学曰雅志之所学以谓为道而不为利此学者之所当守而不失仕者之所当遵而不变者也若夫平日之论高出於夔契之上而至其趋时之事乃卑出於管晏之下者此固令举之所鄙也称公之文曰大者则以经世务极时变小者犹足以咏情性畅幽郁盖其於道如此而其辞亦不足道也可谓备矣然犹若有所畏避而不敢尽言钥不佞敢补其所未言者尝三复公之遗文而得其为人盖其抱负素已不羣本之忠义充以学问以安定胡先生为师所友自东坡先生而降皆天下士渊源又如此万言之策经济之规模定矣自以亲结昭陵之知身虽在外遇事辄发书论灾异言尤激烈三上英宗书又皆人所难言迨神宗作兴锐意治功王文公得君用事法度更新诸老大臣争不能得抵巇取爵位之人不可胜数风俗为之大变至有远在蜀万里外官为偏州腾奏於朝盛称青苗新法之美而捷登臚仕者公方宰山陰例以秩满登馆阁小忍不言岂不足以平进而抗章力辩缴纳召试堂劄自取窜责而不悔方且优游庐山与刘公凝之骑牛松下穷幽寻胜以自娱适呼鸣非凝之不足以当欧阳公之庐山高非公不足以倡凝之之贤也使当时以公一言而寤君相之意安有後日之纷纷哉公既穷老以死其子诉冤又重得罪然其後再传而得秘丞及刪定二公三传而贰卿出陈氏益大天之报施何如哉读公之文者能以是求之然後知公之高风大节犹将廉顽立懦于百世之下毋徒玩其华藻而已也

清真先生文集序

班孟坚之赋两都张平子之赋二京不独为五经鼓吹直足以佐大汉之光明诚千载之杰作也国家定都大梁虽仍前世之旧当四通五達之会贡赋地均不恃险阻真得周家有德易以王之意祖宗仁泽深厚承平百年高掩千古异才间出曾未有继班张之作者神宗稽古有为鼎新百度文物彬彬号为盛际钱塘周公少负庠校隼声未及三十作为汴赋赋凡七千言富哉壮哉极铺张扬厉之工期月而成无十稔之劳指陈事实无夸诩之过赋奏天子嗟异之命近臣读於迓英阁由诸生擢为学官声名一日震耀海内而皇朝太平之盛观备矣未几神宗上宾公亦低徊不自表襮哲宗始寘之文馆徽宗又列之郎曹皆以受知先帝之故以一赋而得三朝之眷儒生之荣莫加焉公之歿距今八十余载世之能诵公赋者盖寡而乐府之词盛

行於世莫知公为何等人也公尝守四明而诸孙又寓居於此尝访其家集而读之参以他本间见手藁又得京本文选与公之曾孙铸裒为二十四卷中更兵火散坠已多然足以不朽矣公壮年气锐以布衣自结於明主又当全盛之时宜乎立取贵显而攻其岁月仕宦殊为流落更就铨部试远邑虽归班於朝坐视捷径不一趋焉三绾州麾仅登松班而旅死矣盖其学道退然委顺知命人望之如木鷄自以为喜此尤世所未知者乐府播传风流自命又性好音律如古之妙解顾曲名堂不能自己人必以为豪放飘逸高视古人非攻苦力学以寸进者及详味其辞经史百家之言盘屈於笔下若自己出一何用功之深而致力之精耶故见所上献赋之书然後知一赋之机杼见续秋兴赋後序然後知平生之所安磬镜乌几之铭可与郑圃漆园相周旋而禱神之文则送穷乞巧之流亚也骤以此语人未必遽信惟能细读之者始知斯言之不为溢美耳居闲养疴为之校雠三数过犹未敢以为尽力淇水李左丞读赋上前多以偏旁言之因为考之羣书略为音释阙其未知者以俟博雅之君子非敢自比张载刘逵为三都之训诂也钥先世与公家有事契且尝受廬焉公之诗文幸不泯没钥之愿也公讳邦彦字美成清真其自号历官详见志铭云制使待制陈公政事之余既刊曾祖贤良都官家集又以清真之文竝传以慰邦人之思君子谓是举也加於人数等类非文吏之所能为也

北海先生文集序

皇朝文章之盛高掩前古徽宗在御天下承平上则日月戴承星文云彩之效祥下则灵芝朱草赤乌白鹄之呈瑞名表进贺殆无虚时文士角立争奋所长无不工致形容铺张以为盛观会进筑顺州得枸杞宿根於土中其形?伏仙家以为千载所化驰献阙廷上生於壬戌正符所属之辰尤以为善祥百寮欲以诂朝拜表诸公阁笔相视无以措词先是庠校英才久束於王氏之学不习应用之文车驾幸学欲进一表而无能应者时翰林学士綦公为诸生出藁袖间无不惊服至是已为学官有荐公名者延致东阁授以题意公从容属联妙絶一时首曰灵根夜吠变异质於千年驿骑朝驰荐圣人之万壽眷荒裔沈藏之久实王师恢复之初物岂无知时各有待既进天子为之改容即日喧传京师诸公咸自以为不及也公初起北海之滨学殖甚富不求人知自是贵名日起遂登馆殿未及施用而以内艰去矣建炎二年高宗驻蹕维扬公航海朝行在一再还而为郎明年轮对一见契合恨见之晚擢左史摄琐闥召试中书文不加点玉音击叹即正西掖进用之捷未有近比永嘉南渡之行公在帝侧实代王言诏旨所至读者感动诸将奔走承命如陆宣公之在奉天也寻入翰苑当羽檄旁午书诏填委之会而播告之修不匿厥指吕忠穆公以首相开督府训辞尤为宏伟有曰尽长江表里之封悉归经略举宿将王侯之贵咸听指呼其能布宣威灵张大国体类此语公笃意经术博览强记以直道自任才高而气刚平时为文不为崖异之言而气格浑然天成故一旦当书命之任明白洞达虽武夫远人晓然知上意所在非规规然取青媲白以为工者比也夫唐文三变宋之文亦几变矣止论骈俪之体亦复屡变作者争名恐无以大相过则又絶为长句全引古语以为奇倔反累正气况本以文从字顺使於宣读而一联或至数十言识者不以为善也惟公与汪龙溪追述古作谨四六之体至於今行之然此等在公皆为余事尽忠竭诚遇事极论进而造膝退多削藁以辅成中兴之业公之力为多焉公之薨於绍兴十有二年秦丞相方当国专政以罢相草麻之憾恨不得甘心焉至二十九年而後宗丞李公益能始状其行又至三十三年而後得参政周忠简公铭公之墓公之从孙焕丰集公文为五十六卷藏於家钥生晚不及拜公下

风而多诵公文文赘倅丹丘始见家集益闻出处之详晚而投闲有更生者亦公之从孙蚤有隼声寓居吾乡尝以公海上诗刻求跋为之诗曰晋阳固自有高共奉天岂可无宣公当时扶日沧海东尚想健笔驱长风指麾诸将如奴童中兴当数第一功断碑毋庸诧诗工制藁具在銓坡中更生致谢再三且曰今之知北海先生者盖寡遗文将遂版行愿为之序钥曰公之文有传又得托名於不朽不复固辞属更忧患既免丧而後敢为下笔惧不足以发扬公之盛烈谨銜媿而书之公讳密礼字叔厚潍州人北海其自号也

攻媿集卷五十一

<集部,别集类,南宋建炎至德佑,攻媿集>

卷五十二

钦定四库全书

攻媿集卷五十二

宋 楼钥 撰

序

芑林居士文集序

知人古以为难苟未见其实行形貌言语名誉文华皆未可以保其往此今人所以难知也及其盖棺事定登载史册又有好恶之不公流传之失实不得其贤否之真此昔人所以难知也至於近世前辈耳目所接虽铭志多溢美章疏多溢恶以为难考然其行事具见於已为交游皆出於善类又其平生所着诗文集以成编始末备在粲然不诬察其所安断可识矣芑林居士向公寔文简公五世孙也重珪叠组生长富贵而抗志不羣卓然自立所交多天下名士方全盛时居官守职固已不畏强御声绩着闻靖康元二间为江淮制置发运使一闻伪楚之变即移文合肥拘留其家属以折其奸心闻者韪之高宗初开元帅幕府以羽檄起四方之兵未有应者公募士人李植首齎金币以济艰难之用上章劝进切中事机上深嘉之承制补植以官公之功名及受不世之知实始於此及帅长沙金兵猝至坚守奋击外救阻絶力不足而城破犹保牙城巷战以拒敌兵退尽所以抚摩之力楚人至今德之寻改鄂州行次衡阳曹成李宏贼衆十万将肆侵斂公肩輿入曹成贼垒晓以大义不敢为暴遂获鍾相降杨正表上眷愈渥擢之户籓入从出藩竭其忠力几至大用媚嫉者衆而公雅志退休抗疏面陈不一而足卜居临江古木无艺多植岩桂又素慕香山自号曰芑林有船曰泛宅高宗亲御翰墨书四大字及企疏堂以宠其归公家东望合皂山连玉笋靚深如隐君子居壁皆画以山水木石门皆装以古刻灵龟老鹤驯扰其间自着五十诗以形容景物亦多和篇尝云渊明生於兴宁之乙丑归以义熙之乙巳年四十有一余生於元丰之乙丑归以绍兴之壬子有述怀诗云我与渊明同甲子归休已恨七年迟又言香山得洛阳履道坊杨常侍旧宅芑林得临江五柳坊杨遵道光禄别墅有诗云莫问清江与洛阳山林总是一般香两家地占西南胜可是前人例姓杨又题乐天真云香山与芑林相去几百祀丘壑有深情市朝多见忌杭州总看山苏州俱漫仕才名固不同出处略相似上梁文云坊名五柳仰陶令之高风洲号百花乃东坡之遗事其尚友前贤类此标致可知矣士夫往来者必造见又素喜客相与觴咏其下盖自建炎初元罢六路漕明年归临江绍兴八年起至平江力辞不克次年三月复归自是不出优游十五年以壽终焉勤劳着於中外名节全其终始虽有异论亦皆厌服无可议者诸子又能世其家不待平泉之记草木数十年来幽致俨然复哀一时名公书尺刻为芑林帖公之忠孝大槩愈着而世之持论者大定矣公之曾孙公起为湖广总属分司九江受知於使君袁和叔夔介以求序且言已刊公之家传行状志铭为一编又刊拘伪楚檄稿及诸贤跋语他日又将刊家集行於世钥生晚虽不及拜公牀下生长外家外祖汪公少师与公同朝相好曾为汪氏友恭堂生云阁赋

诗先太师岐公初丞崑山及趋事於吴门最蒙眷与故多见公之藻翰熟闻高风今又尽得公之诗文杂着如断碑风雨碎文章等句皆素所脍炙今乃知为公之诗公为徐东湖诗集後序有云始为诗以数百计一见师川快说诗病尽焚其藁则知公之少作尤多其所存者止此耳章表奏议明白直亮可举而行兼备体制而又能出入内典此盖由前朝涵养之久文简典刑之存非曲学之士所易及也钊庸陋不佞何敢预品题之末姑诵所闻如此犹记九岁时仲舅尚书公尉江山乙丑登乙科以书为谢公答书亲题其外云书上明州锁元先辈汪下书芻林居士此亦近时之所未闻也公讳子諲字伯恭官至徽猷阁直学士累赠至少师云

洪文安公小隐集序

番禺洪氏自忠宣公以文学致位通显忠诚许国远使殊庭当干戈俶扰之际执节不屈迨苏子卿之归而二子已俱中词科矣一子又继之自唐设此科本朝又增广之名公多出此途然未有兄弟三人聯中如此之盛者也况父子俱掌帝制出入銓坡文章声问萃於一門赫然为天下冠而仲子文安公又其先達者也公生於宣和二年至绍兴二十五年自秘书省正字已兼中书舍人独押六房暂直学士院又三年以左史再摄西掖明岁为真遂擢翰林学士出守吴门高宗皇帝将行内禅圣意谓一时大典册不可轻属召为翰林承旨禅位之诏登极之赦尊号改元等文皆出公手纷至沓来从容应之动合体制天下传诵极儒生之荣遇孝宗皇帝命知贡举未几遂登枢近盖仕宦终始以文字为职也唐张燕公称富嘉谟之文既而曰施於廊庙则骇矣惟公天分素高加以笃学文体蚤成天生廊庙之文也文从字顺随物赋形非如寒士苦志悲鸣口吻者所可望也公以隆兴初元知举钊由乡书就试公一得文卷必欲寘之前列而第二策中误犯泰陵旧讳公叹惜不已为引吴若等例奏闻褒借甚宠得旨降充末等首名钊何者受公特达之知既窃名第以至晚登政途不敢忘也公之子二橘尝守峡州将赴阙至上饶而歿樵知余姚县又亡於旅舍峡州无羌时刻公之文将俾钊为序未及也其壻汪君杲通判信州以峡州遗意为言钊方经纪余姚之家其子佑又面以为请钊何敢当独以衔恩未报又愿托不朽因不敢辞公之兄为右丞相諲文惠弟以翰林阁老终端明殿学士諲文敏世称三洪以比锦屏三陈而又过之公讳遵字景严若世系治行则文敏所作行状甚详不待愚言而後见小隐则公自号也

静退居士文集序

欧阳文忠公为本朝文章宗师犹昌黎文公之在唐也光焰万丈不容赞叹诸子叔弼兄弟咸得家传季默之子徽猷阁待制德孺则诸孙之益显者也尝见中书舍人王公铄铭公之墓云忠厚之质孝友之性皆稟於自然不劳雕琢诗篇赋颂章奏碑志之文古律虽殊体制不一各极其妙而家法灿然当时推能世其家者惟公也尝访求遗文於馆中仅三十余篇每恨不得其全公之孙汲守连州以公家集二十卷侵诸版而来求序始得而尽见之呜呼真得六一先生之传而王紫微之称非溢美也中遭乱离挈族南徙流离困苦忧国爱君之心尽发於诗文中皆不苟作平生着述散逸为可惜然此足以不朽矣前辈既不可得而见文章流传士夫皆当传録而况於子孙乎欧阳氏久振振连州能传斯文於其家世尚勉之哉公讳懋德孺其字自号静退居士遂以名其集云

筠溪文集序

士大夫种学绩文孰不欲流传於後资稟有厚薄用力有浅深固不可诬然须器度过人则自应高胜有非勤苦之所能强进者此可与知者道尔筠溪先生以父兄之贤少有声於太学一夕奏厕有同舍投繯於梁间公时年才十七八略无惧意亟解其系卧而枕於股上亲抚摩而嘘呵之会有後至者怪而问焉徐语其故驰报斋中羣士竞篝火而来相与抱持而归竟全其生即日名动京师弱冠遂为大观三年上舍第一人继登科其才固足以得此天报亦昭昭矣公之器度絶人远甚如许加以问学之懿其发为文章顾岂浅见者所能及也政和间以南宫舍人使契丹擢左史因讦直贬宣和未知冀州独能坚壁以抗强敌靖康初漕江东平叛卒之变入绍兴为饶吉二州七年复立左螭寻掌书命雄深之文黼藻王度四方传诵之论事封駁皆人所难又以力辟和议益与时忤迁户籓丐外补去国之际犹拳拳以立国待夷狄之大计为言竟请祠以归隐福之连江西凡十六年不复有仕宦意哦诗自娱笔力愈伟居闲忧世着议古数十篇虽贬论古事而皆关於当事利病深切着明有范太史唐监之遗风乃心王室惜乎用之之不尽也迨今将一甲子公之孙珏以郎曹典大藩今居江西宪台方迎奉老亲而当寇攘惊危中竭力不少顾避琪以上舍魁决科克继大门为京口贰车皆有时名有以知公之泽未艾也二孙以钥游从之厚出公遗文三十卷求序钥晚进何足以测识前辈所蕴以平日慕用之诚幸托名於不腐敢谨书之公讳弥逊字似之昆仲六人文字为一门之盛兄尚书弥大【○宋史季弥逊传讹作弟弥大】弟太史弥正俱负重望筠溪则公自号云

曹忠靖公松隐集序

淳熙改元九月癸丑昭信军节度使开府仪同三司曹公薨十月壬戌德壽宫遗中使赐以宸翰有曰历事四朝尽瘁国事从徽考北狩至燕被密旨昼伏夜行持御札御衣俾予继统金人败盟犯江奋身请行见敌帅力陈祸福敌退渡淮继令请太后天眷至金主前宣予孝思使彼感动俾予母子如初完顏亮方图南下令往观其意陈前後盟约声色俱厉亮令以绣褥藉之终始一节夷险不渝今遽告终为之惻然因疏其行事大概赐其後具见予不忘之怀呜呼士生斯世苟有一概可以自见皆足以取重於时其歿也苟得名士巨公为之志亦足以垂不朽惟公之生屡立奇节歿才浹旬而斯文出於慈极震耀一世先正诸公间得碑铭多属词臣为之若夫亲御翰墨大书特书圣作高妙文简事核未有如此之盛者顾虽刻铭鼎彝无以尚兹史册登载足以传无穷矣钥於公三子俱识於宦游中仲子工部相与有连事契尤厚公薨十七年矣集公之文俾钥序之且曰先公早入太学负时名中更险艰晚遂安逸其於六艺百家无一日辍吟而停披也诗文至多略备衆体绍兴乾道间出入两宫奉清燕之闲最承宠眷谦谨已甚无毫髮之玷一时笔墨类多出其手易箒之际以藁属耜曰尔为我传之涕泣拜受袭藏至今追念平生大概固已具於高宗之制然文字未有以自表矧家世业儒大父箕颍之文参政上蔡谢公为之序引行於世自度多病早衰恐负九京之托与子幸同郎省能加一言於篇首志愿毕矣工部近以衡州奏事上记尹京时实在幕府问劳优渥遂留为郎庀职未几他不暇问拳拳独以遗文为言诚足以称其家矣公之诗文其来有原其发不苟慷慨论事有古烈士之气雍容适意有隐君子之风又未易以一端尽也盖尝登冲嗇之庐玩云壑之胜想高致而不及见而又重违工部之请故为之书公讳勋字功显諡忠靖累赠太师松隐公晚岁游

息之地遂以名其集云

詒痴符序

客有以书一编示余曰此赤城李公察院所为诗文名曰詒痴符公亡矣莫晓其名书之意余曰公於书无不读此名殆不苟也海邦货鱼於市者夸诩其美谓之詒鱼虽微物亦然字书以为詒街卖也顏黄门之推作家训曰吾见世人至无才思自谓清华流布丑拙亦已衆矣江南号为詒痴符公之意盖出於此特谦辞耳公讳庚子长其字也少年笔力絶人始为长沙尉一时帅守部使者倾待之皆以牋翰委公从容泛应无不曲当时余伯父扬州为漕使公首以长牋进谒有曰衰怀错落有秋风鲈膾之思旧学荒凉无春草池塘之梦伯父一见击赏延为宾客不复以寮吏遇之汤公参政时帅湖南後为中司遂辟公检法官迁六察为郎而归自此三数十年间仅一再以麾节出终不得为文字官以展究所长识者恨之余倅丹丘始得拜公之门公方买屋近郊古木交陰庭草错列若隐士居聚书数万卷於楼上闭门不与人通老矣犹沈酣其中里闾罕识其面间与人接虽微贱必与之抗礼後生有以经史叩请随即响答诗文晚益高时出一篇即日传诵哀挽之作尤为凄惋真可以泣鬼神也公之子澎因求余序其首余度公所着甚多犹有遗者更搜故藁尽出而行於世以慰其平生笔砚之功则箕裘可以不坠矣陈子高克台人也诗名已久而所传不多公尝尽得其遗逸者板行於江右视旧殆过倍蓰而子高之诗益显公亦将以此望於後人乎然读此编者亦足以知公之所存矣

环溪文集序

道无终穷学无止法自非圣人谁能尽之观志学以至从心犹有等级如此学者之於斯道随造诣之浅深用功之多寡如猎於山渔於海死而後已犹不足以究圣人之蕴奥若环溪者殆深而多者乎余少读能改斋漫录等书而知有临川吴虎臣之名隆兴改元同年有二吴曰澥曰鎰皆虎臣之族虎臣名曾尝分严陵之符澥字德深终太学录鎰字仲权终湖南转运判官三人者皆博学多识而善属文晚岁投闲四明里中有醴陵宰吴君琮来一见知其佳士与之接从容於杯酒间亦是族也既别去始得环溪之文一编玩味不置又知醴陵乃其叔子分教澧阳时所刊恨不及面与之商既老还朝有名大礼者见余自言奉其祖环溪大全业八卷并以江右诸台请赐諡事闻於朝钱丞相尝知抚州熟知其名既以遗才为惜欲於科目之外收岩穴之遗而下之有司久未及报再见泣以请曰大父着书满家贫不能尽刻先醴陵又齎志以歿藐然孤孙以其言行大略求伸於身後而事有未成几无以归告两世丘垄谓余於吴氏素有事契求一序以传余曰环溪不待序而传也笃志好古尽孝事亲固已师表乡闾名闻京师工部尚书何公异称之云易旋玑明天理自然终归之人事几微之应本制论期黼黻王度若以身周旋从事於礼制乐作之末虎臣云通言简不及陋侈不及冗事顺而意宏辞严而理婉仲权吏部云宋文人之文唐诗人之诗而汉经生学士之学也其书通言云者法言中说类也醴陵亦云学通五经尤长於易礼旁通於百家而游艺於文观此四者可以知其平生矣深於易故三十而着璇玑图论深於礼故又二年而着周礼本制图论六官析微论皆传於世通言最所注意名言善诱实惠後学其曰不为言之言言立不朽又曰孔孟之书无难读之文无难明之字此不易之论也而通言未免於为言间亦有难读者呜呼其学早成而进修不自己

使天假之年且将有不为之言而壽止同於韩昌黎为可叹也唐李愿何等人盘谷亦无闻於时徒以序而传先生视愿有余而环溪之窃而深繚而曲又岂減於盘谷所歉於愿者特余之文不足以发之耳江右多秀士大礼其别图之

王文定公内外制序

藏书以经史子集为四库尚矣国家中秘之储士夫家塾之目莫不由此然惟集部必居十之七八方来未已充栋汗牛不厌其多非特玩其辞也盖尚论古之人史传铭志不若家传最详然必见其遗文而後得之文章之作出於胸臆读其文则如亲见其人考其言则如生其时不可诬也左丞相鲁国王文定公天分素高涵养深厚自少时已有场屋声中外翱翔未始一日去书及为天子代言外制内制词旨温淳殆有西汉遗风如春之和如玉之粹措意高远而浑然不见圭角实似其为人一时争传诵之其後徧历七府位极人臣事业之伟钜尝状其行为详然传於不朽要不若遗文之具备公之子知筠州枢与诸季编辑西掖北门旧藁为三十卷俾钜具之钜平时诵公之文恨不能多见薰沐三诵而後叹曰曩见礼部侍郎史公弥大言尝问视草之体於鲁公公曰苏长公才气迈往不可强迫轨躅少公沈厚尔雅尚庶几焉钜於公之文不敢轻为赞扬读斯文者不惟可见乾道淳熙之盛欲知公之词源当於长公少公之间求之

酌古堂文集序

故太府卿王公实钜之姑之夫也其亡也钜为之志铭甚详公之子惟潜在哀其诗文若干卷号酌古当集会国史院下索志铭及奏议等文求序於钜向固不忍铭公而卒铭之此不应辞惟公天资穎悟虽世家四明而幼随父金紫仕西北如京洛故家子弟既冠而孤叔祖宗正少卿欲命以官力辞之欲以与其季而自奋於科级少卿以公昆弟三人必使之受而以遗泽官其长弟又自以一官与季子可以见王氏之义风公之自立者已可知矣既而翻然曰学不必尔仕以行其志足矣遂不复为举子业而一意於学忍贫深居穷经阅史手自编辑及见王紫微洋诸公作诗直欲追俪陈简斋及子高辈一语不苟作名公多畏服之近时以诗鸣如石湖范公见公诗亦自言欲焚其藁未尝无为而作文遇论事则明白洞达援据审谛切於世务理之所在无所回挠压之以万钧震之以雷霆不动也如江陰论民兵之终於无益广西论盐法之不可轻变其为宰掾看定四方章奏之类皆如五谷药石之适於实用若其立论谓翼祖虽已入祧庙而臣子终不当以其讳为名字及扁榜六十甲子古人惟以纪日所谓天有十日是也若书岁则当如通监之用岁阳字以表德不应自称其言皆可以为後法风流酝藉如晋宋间人若不以事物自婴者至其莅官而克勤小物立节而不媿古人诗文中亦间见之读者自可得其为人又不待於费辞自少至老聚书六万余卷多自雠校为之目甚详名堂以酌古鼎彝古刻分列其下钜少公十有九岁忘年与进不以辈行自高笑语至通夕无间钜未死不可不为发其幽光余已见於志铭者不复载公讳正已字正之潜今承德清能守先训尚当勉绍素风以亢王氏之宗云

见一堂集序

赤城鹿公以望郎显於淳熙间当服官政之年不以病不以故致为臣而归天子既宠褒之朝之名卿大夫学校之士争为歌诗以饯其行郡太守侈其事裒以为见一堂集传於世将三十年矣其子龙泉大夫又辑一时诸公寄赠若山园留题等益之为十卷所以显扬先君子之清风峻节歆动中外盖其祖帐之盛如二疏歌诗之多如杨巨源而其齿尚强其去尤高虽时移岁久一览此编赫赫若前日事真足以廉贪立懦也观夫大篇短章铿锵眩晃极其形容之美写其慕叹之怀非不欲庶几公之所立也然而至今未闻有继之者岂非坡公所谓有其言而无其心有其心而无其决者哉钥初谒公於堂上实与周子及彭子复同之获陪杖屨接觴豆於烟霏空翠之表退而赋十三诗以献其後又尝铭公之墓故龙泉复以序引为属自惟宦情素薄而投闲十年屡更奉祠洎恣恋粟视公不待年而去诚甚不勇然亲在为养尚得自恕也今免丧未死年甫七十真老矣方将上挂冠之章期於得请是敢落笔而不辞公之本末具於志铭龙泉亦已系之卷末兹不复赘

槩庵居士文集序

江都李氏名族也绍兴间名之从民者尚多俊茂余生晚犹及识将作监端民平叔及其子泳皆有声诗又有名璜字德劭者平原公之从孙将作之再从弟少负隼才而颇诞放耻从进士举里人或譙之则曰我非不欲试但恐夺尔曹魁尔又嗤笑之乃曰尔曹不信我将试矣一试果魁维扬後寓四明笔力雄迈人所罕及时初脱兵火之厄郡县庠校记文多出其手太守仇公泰然愈周公元举纲潘公子贱良贵皆一时名公莫不低簪礼之侍御史王公伯礼伯庠为教官与之游最厚盖文字之友也明多禅刹往来其间或以书来云孟信安欲招为壻资送特送且可得官擲於地曰老大乃复於此耶竟不报既不得志场屋萧散肮脏以终其身不娶无子晚从宏智禅师於言下有省益耽内典以其笔耕之余买田一顷施於阿育王山使奉尝我写照而题其上今至留水陆堂中遇荐羞则为设伊蒲其赞有云分明便是庞居士又却无人卖罩篱不可谓无所得然亦可哀也已尝见侍御言德劭病革往候之问向为文用僧腾客为何事曰侯景台城是也又问平日了達今何所见曰都无所见但觉神气消散尔出书一囊乃其遗藁犹顾而言曰以属吾子勿窃吾诗文以为己作平时相忘方緜惓时戏调尚如此里人戴伯与权雅士也托馆王氏慕其文名从侍御诸子借囊出藁而手编之又多残纸断坏不可尽録故所存十之二三仅得诗文杂着几二百篇厘为十二卷俾余为序久未暇及尝取其白氏长庆诗谱録寄吴门使君李谏议既为刊於集後又索其诗文且曰近为建宁当为版行余喜其文之将就泯没而有传也为序其大槩而记之呜呼世之骚人才士耽嗜成癖哦诗属文皆欲有闻於世而因仍埋没与草木同腐不得以一语自见由古以来不知其几德劭之集藏於侍御之家传於伯与又因余与谏议而行於世兹非幸欤若其诗句之工妙文体之高胜出入古今追配前良不待余言览者当自知之槩庵其自号云

雪巢诗集序

淳熙五年余自删定郎赘倅丹丘始识雪巢林君景思行谊高洁肮脏不与世合环堵萧瑟忍穷如铁石一郡人士称重之读其诗恍然自失愈叩愈无穷身虽未达而以诗文於诸公闻於是遂初尤公尚书诚斋杨公侍制俱为之序此可以不朽矣一日写数十百篇遗余又使序之

余曰二公已序何待於钥景思笑不答而请不已余哑然曰吾知之矣君诗出入古今作者门户善备衆体二公极力称道犹有未及者诗之衆体惟大篇为难非积学不可为而又非积学所能到必其胸中浩浩包括千载笔力宏放间见层出如淮陰用兵多多益办变化舒卷不可端倪而後为不可及君盖於此有得者如罗汉岭头罗汉树杨花飞後无可飞等篇直欲与溪陂行茅屋为秋风所破歌相周旋君岂欲余之及此乎景思捧腹久之曰吾於此非曰能之而愿学焉子何以得余心吾行於世五六十年来得此於人者盖寡因相与剧论诗家事不知更仆之久酒酣欲去遂书以遗之

静斋迂论序

静斋李君才翁自号也才翁真静者也幼历艰苦与其兄德翁相与为命寓柯山尝试流寓为魁选故参知政事钱忠肃公闻其贤延致馆下今丞相实从之学才翁学有本原又自刻厉文章日高兼备衆体尝叩钱公以亲党举削公信其言而许之彼以金为谢才翁曰乃欲以此污我耶白公不可与公益高之欲授以官力辞曰使有仕进之分则已效於科举矣强与之又不肯仕为求祠禄使藉此以试漕台两预荐书又不利於春官遂不为进取计盖取经史百家读之以昌其诗以大放於文钱公秉政亦不略为身谋从钱氏祖孙终其身如一日素安贫约粗给即止家无冠裳通谒止称长安李某台之人无贵贱老少莫不敬而爱之几如康节之在洛也郡邑来仕者闻其风多与之交俗务一丝不挂得酒则酣畅自适贯穿今古多识前辈行事清谈亹亹听者忘倦丞相屡出仕必与之偕行有直谅多闻之益以才翁之才不得少施见於世又不幸年六十八而歿善类皆嗟惜之有子曰?丞相视之如子姓抚其家不替於昔一日俾?来见出才翁所着迂论五十余篇求为序引钥旧闻才翁之名赘倅丹丘始交下风觴咏相从欣然莫逆交情久而采筠间往来都下飘然如不系之舟见之使人意也消尝以诗赠君归有云文可演纶诗更工翛然蝉脱世尘中平生不复遇飘瓦两脚何妨类转蓬彼尚劳心论出处我今无梦计穷通江神阅徧憧憧者来往无营只此翁才翁得之甚喜回首三十年矣才翁家长安大父及与横渠浮休诸公游号潏水先生文集行於世多入陕西戎幕晓畅边事腐夫握兵以抗议不合坐废岁久贼犯关中年高且病乃以为旧德知兵强起以守秦州空城卒死於贼此志士人人之所痛也其家避地深入峽南父又卒於瘴乡祸患何可堪耶才翁诗文至多未暇編集迂论则其所学之着见者言议正大文词温淳论治体则欲返本而不求於末论世故则由相激而成坏谓道之弊极而必反谓圣人无心化物而化自行其论汉事尤为详明既无科举之累又不求卖论以取官直取诸胸中实见而笔之名曰迂论而实非迂也若言情贵得其直而养心在於明分则有自其躬行得之非真静者能及此也余既为之序又念才翁之葬未有志铭并书其大槩以授之才翁讳龟朋?能世其家今为丹丘人

放麕子集序

秦西巴不忍一麕而与其母孟孙遂以为子传是出於一时之仁耳然犹未及放麕之称至唐陈子昂感遇诗始曰吾闻中山相乃属放麕翁后山托疾谒告擅去官治以送坡公其诗有云岂不畏简书放麕诚不忍正用此然亦一时之不忍耳吾友蒋仲武天资仁厚自号放麕子盖终身拳拳於此者其为人不言可知始与之同从国先生仲宏之纲相与最厚余是时读书於

荒园破屋中家贫仅有书一厨仲武时时相过清谈繙书动至终日以是知予益深余老矣回首旧游凋落殆尽仲武之子和中以遗藁求序閱其名曰放麕子集读之惨然是诚吾亡友之本心也仲武嗜学如嗜芰於书无所不读於诗无不记虽字画任真而手抄之书至不可计其孝友慈祥爱人利物之心既不得少见於世一寓之诗大篇短章藹然仁义之言溢於编牋若奥篇隐帙稗官小说问之如响少工词赋每屈其侪辈而辄不偶於有司以此穷老而不厌乡评无不以善人长者称之斯人既不可复见抚遗编而叹息余闻人之积德不必活千人而後兴以放麕之心推之後其有兴者和中自力於学效张横渠体以絶句发古诗之微咄咄有父风又闻其三孙颀然而立兴仲父之门者庶其在兹乎

纸合诗序

我家业儒旧矣曾叔祖承议才气尤俊伟不羣妙年决科刚介自守承平时宰畿县尹以势临之不为动未几罢归卒不偶以死时时闻诸父言之恨生晚不及识也叔祖实承议仲子少力学有父风言议英发率倾坐人视功名若不足以浼焉者事亲尽孝道既终丧赀产一不取与妻子郊居自业方其四方之志未衰以一介行李往来江湖间上武昌浮彭蠡历览胜地挹秀气以充胸中之奇晚居龙潭安贫裕如槿篱荆门背山俯溪如世所画老圃之居客至则清谈去则宴坐老圃老农尔汝无间谦恭乐易宗党乡曲无不敬而爱之年已八十矣每取伊洛道德之书释老清净之说读之随意手抄细书着行动盈编帙日不下数千字以训子弟以励後进虽书生举子以为难且劳者为之不少勸老成典刑此尤人之所畏服也钥官永嘉一日以书来曰我处此二十年简俭粗足无复缘饰纸合方可丈余藏修游息不出於出番易张紫微尝有此诗吾既与子和之矣今和者益多卷轴益富亦居闲胜事也汝为我序之钥谢不敏敢取叔祖平日大槩书於卷首使览者详焉旧闻荆国文公有和王乐道纸合诗学易先生刘公斯立亦尝赓韵始知紫微盖循诸公之旧非倡也并録二诗以归独恨未见乐道之作耳钥仲兄顷亦同赋有曰但爱窗间冬日煖不知门外北风凉叔祖击节叹赏以为正得我之意抑所存又可知矣

三家诗押韵序

吾家自高祖正议先生以儒学师表乡曲是生五子曾祖金紫曾叔祖承议俱躋世科助教最幼家传擅名而遽於小学亦有五子其次子则居士叔祖也字元应记问该合书经览輒不忘许叔重说文解字略皆记诵其於六经句读点法悉有定规如不字本方久切凡书之不字皆点入声其字皆点平声惟夜如何其则不点盖本是以箕字而借为其也尝曰陆氏释文最为详密集古人之全後之作者如孟子音之类皆所不及读书者多自苟简口口相授遇有难字始为检阅故谬误者多我兄弟少时皆读之自至尾殆无遗失钥侍坐最久粗传绪余又以授儿曹使不至於甚陋者皆叔祖之训也教子尤笃五鼓而兴灯前坐对同读一书多至百遍诸叔父经书皆通念如流真可畏服也惜乎父子不偶叔父三人俱下世弟四人字君秉肮脏寡合独居郊外先庐中疎财处窘蹭蹬场屋年过六十而气不衰取欧阳苏黄三家诗集类以声韵细字楷法凡四十万字亲经四写而後成书以示钥曰此吾以适晚景者也虽若无补然因此书见前辈用韵之妙虽曰本朝诗律坏於和韵如三公多记善用若天成然不知者必以我

为无所用心而为此吾子其为我言之钥曰唯旧见叔祖手写春秋左氏传礼记二书悉以古字今又见叔父之勤如此敢书所闻见以勉後生之偷惰者

求定斋诗余序

吾宗自高祖正议先生以儒学起家仍三世登科者五人最後伯祖宗子博士元符三年锁试以来雁塔不书者至於五纪从兄编修景山始因太学舍选与教授兄少虚同上绍兴三十年进士第又三年而後钥继之大率羣从中入上庠躋世科登朝行拥州麾皆兄为之倡兄少在场屋声一语不苟作遂以词章闻於时由太学正宗正寺主簿玉牒所检讨官枢密院编修官守江陰以治最闻自九江移武昌以疾奉祠而遂已矣门户不竞可胜叹哉遗文散失未暇会粹平日游戏为长短句甚多深得唐人风韵其得意处虽杂之花间香奁集中未易辨也其壻黄定之安道偶得残藁遽侵之版而求序引呜呼吾兄抱负不凡志尚高远居家孝谨临政明恕读书博而能精属文丽而有体长短句特诗之余又尚多遗者此何足以见兄之所存耶少工赋篇骈骈尤高曾不得一日为文字官韩退之云乃令吾徒掌帝之制翻阅此篇为之於邑兄尝以为能定未易言故自号曰求定斋云

攻媿集卷五十二

卷五十三

钦定四库全书

攻媿集卷五十三

宋 楼钥 撰

序

六老图序

记曰福者备也备者百顺之名也盖一有不顺不得谓之备一有不备不得谓之福世之得福者有之而备与顺者百不一二易曰积善之家必有余庆善至於积则非一人之为一日之力而後庆为有余庆至於有余而後能备能顺哉恭惟致政太保大丞相魏国公际遇真主於龙潜之日光辅初政名遂身退之後两镇巨藩再专国秉皇上笃旧学之恩二纪之间所以宠绥其身荣其亲而燕及其宗党者无所不用其至上印绶则赐第於京师挂衣冠则分湖之一曲雍容进退为国元老四方之人无不以备福为可美而未知夫备之至也始丞相事母齐国太夫人至孝及见大拜者数年九鼎之养回班之仪照映今昔凡孝於亲者亲其身欲冀望万一而不可是生一女五男子至淳熙乙巳岁丞相年登八袞其女兄八十有三四弟亦皆六十余矣一门同气咸壽而康举觴相属朱顏华髮嬉嬉如小儿状乡闾亲识叹仰盛事咸请绘而为图丞相曰幸哉兄弟无故是吾门之余庆也乃大合乐置酒高会簪纓樽俎极一时之盛以上方所赐金帛香茗以侑酒作为歌诗播之乐府於时风日清美箫鼓振作长子礼部侍郎某以次对奉祠次子都官郎官某入制司议幕率羣从子壻皆盛服环侍行酒授饗躬子弟职乐饮终日而罢昔眉山洛下耆英之集且有四人同生丙午之歌然皆合衆姓而成之无出於一家者若燕山窦氏称丹桂之芳襄阳马良擅白眉之誉亦未闻以大耄之年而全对床共被之乐而又得燎须之爱如今日者是千载乐事曾未之有嘻兹始可谓备福也已图成适得良工为之写照逼真乌纱道服前奉女兄恂恂怡怡如欲笑语虽名位有高下才业有先後而温乎其容薰然之慈大率相似识不识望而知其俱为德人长者也惟史氏世有隐德八行先生又以奥学絶识不言而躬行既不得显用於世福庆流演是生我公其在朝廷专务以道德佐人主规恢宏大不求近功絶口不道开边事其在郡国爱民如子涵养教化惟恐伤之待人接物谦下已甚好贤乐善收选寒俊荐进若不及位极人臣退然如老书生源已深而日濬之本已厚而日培之闔门习成忠厚无一人为克核事者史氏之兴殆未艾也何止今兹乎人有一善而责报於天躬不自後而欲徼无妄之福者可以媿矣然则疏吾乡风化之原助圣朝孝治之盛不在兹图乎丞相顾钥曰子为我序此钥不佞辞不获命谨再拜而书之

乐书正误序

乐之坏久矣自孔子时问乐於苾弘学琴於师襄语鲁太师翕如纯如之变记关雎洋洋盈耳

之美闻韶而忘肉味与人歌而善必反之而後和之太师挚而下适齐适楚入河入海必谨识之盖周衰而乐工散亡一日欲用则犹可访求也圣人之用意深切如此故自卫反鲁然後乐止雅颂各得其所诗三百五篇皆弦歌之以求合韶武雅颂之音去今又二千余年杂之以郑卫混之以兜离而乐几亡矣以祖宗全盛之时聚天下博洽之士不惜重费欲定乐律以求合於古而不可得盖其声者乐之本也不得其本而求其末取之尺寸是以度也求之秬黍是以量也未有能吹律而求声者而况於今乎尝从知乐者得十二律均旋相为宫之法益以变宫变徵而求八十四调调为七声其说其备盖本出於龟兹而郑译首好之以传於世乃与周官大司乐之说不合又不可晓近岁得陈礼部乐书谓周礼止以圜鍾函鍾黄鍾为宫如三统三正不过子丑寅而止又谓古无四清声痛夷乐之入中国必欲尽去之颇与其他论乐者异闲居无事读之尽二百卷古今之乐曰雅曰俗曰胡器用舞曲无所不该其间重见者亦多要可谓浩博矣求其所谓声者终不可得然念其用心之勤乐家之书未有此比又苦其舛误无所考证闻建昌陈使君刊此书与礼书竝传取而校之赖以改定者甚衆又亦互有得失并为质之经传而是正之尚三数百条会表兄华文阁直学士陈公之子芾为南丰宰因以寄之南丰欲别刊此编以补郡本之缺求书其後老矣精力日衰而气习未除强为少年书生事亦可笑矣校书如扫尘而况拙者尚望多闻之士增益其所不及以全此书使後來者有考焉亦区区之志也

燕乐本原辨证序

乐之失久矣本朝诸钜公逢时遇主不可谓不行所学而终无定论今之君子学此者益寡建安蔡季通久从晦庵朱先生游学问该洽持论皆有信据一见而及此因得叩请曰大乐之书卷帙繁重不能自随出所着一编曰燕乐本原辨证谓雅郑固已辽絶而燕乐尤为淫靡然推其所自实出於雅唐志论雅俗之别谓俗乐有与律吕同名而声不近雅者其宫调乃应夹鍾之律季通谓律度量衡言盖有叙若有尺寸求之则是律生於度若以累黍为之则是律生於量皆非也故自为律以吹之而得其声每疑今之乐以夹鍾为黄鍾得唐史之言而信故为图为说而又列律本正律俗名三者使人知今之俗乐虽非古而其本则不能外此也则又叹曰为此俗乐者不知其何人使後世耽玩而人心日漓风俗日薄不能自还於雅正其亦不仁也矣然名宫与调犹曰黄鍾中吕南吕以纪律本意谓声虽变而名尚存不没其本以待後之知者其用心又何其仁也故欲民之归於厚当先正乐欲乐之正不可不先求俗乐之原此书之作非一日之积余虽好之亦未能遽解老矣恐不能自进於此季通又长余二岁安贫乐道壮岁已弃科举此志其遂申否乎季通此行得一观颂台之乐归而益考诸书欲使乐书全备善矣然古谓妙解者犹不如神解如万宝常等人亦几於神者恐非书所能尽季通用功已深更加勉焉必无歉於我然後可传诸人求大乐之书而观之尚俟後日

辨志録序

学记曰一年视离经辨志此书之所以立名也学者则先辨志志不辨则不知所守矣东莱吕伯恭甫与钥为同年生而又齐年闻道甚蚤心实师之博学笃志深造自得规模宏大而克勤小物其所着书如大事记近思録闕范之类不一而足又杂取子史传记下逮医书精要而切

於日用者以为此编易知易行中人皆可企及扩而充之则可以入圣人之道用虽委曲而体则正大事若浅易而理实精微凡处已待人临事之方详尽缜密而大要以忠信笃敬为本将令学者循循然如履平地步步就实其用意切矣章贡李君和卿得而玩味法其可法戒其可戒又将刻而广之此真东莱之本旨也俾钥为之序孟子曰可欲之谓善有诸已之谓信天下之事凡可欲者皆善其不可欲者非善也可欲而不能有诸已则犹天下之善也譬之五谷无非嘉种然必艺於土而後有苗有叶以至於实然必有诸已而後有所谓美所谓大以至於圣神此书诚善矣然君子多识前言往行盖将以蓄其德非以资口耳之习也学者读之必以有诸已而力行之则东莱之意庶其无负矣此书初以帅初名後又改为少仪外传云

复古编序

文字之书世谓之小学或者因陋就简指以为学之细事而忽之非也古者四民择其秀者为士而教之所谓八岁入小学者教以礼乐射御书数是六者虽不见古人之大全周礼注疏亦见其略是皆有名数法度及人之幼真淳未散记识性全使习六艺则终身可以为用此为少年之学非曰学者之小事礼坏乐崩射御弗习数学亦复罕传犹幸六书之说具存凡将爰历等书不复可见急就章止存大略惟许叔重着说文解字垂范千载李阳冰中兴斯文於唐若南唐二徐兄弟尤深此学楚金在江南既为通释部叙通论祛妄类聚错宗疑义系述等篇总谓之系传又着韵谱备矣鼎臣入本朝逮事熙陵命校定叔重之书至今赖之尔後杨南仲章友直文勋邵疎陈晞诸公皆以篆鸣遗迹犹班班见之然不闻有书以惠後來吴兴张谦中有笃志古道伤俗学之混淆为书一编号曰复古【○宋史艺文志张有复古编二卷】用功数十年书成于大观政和之间陈了斋程北山为前後序称美甚至足以不朽矣钥晚出何敢容喙尚有欲言而未尽者谦中考证精诣字之合於古者皆所不论惟俗书乱之者必正其讹舛毫厘不贷读者悦服无有异论闻其落笔作篆如真行然略无艰辛之态惟体修而未重与人小异不入俗目汉宣帝时器械工巧元成间鲜及之有谷口铜甬传於世款识铜字其体正尔始知谦中之作盖有自来非以意为之也巍字从委从嵬或省山以为韩魏之魏谦中为林中书家篆墓碑终不省去山字古无庵字谦中以为当作闇而难於题扁山谷虽定从草谦中亦不用也尝篆杨龟山所作踵息庵记终篇偶无此字碑额虽从疾竟作隶体书之其信古不从俗类如此钥不能作篆心颇好之阳冰新义犹为楚金所祛使二徐见此编殆无以訾之阳冰务新而谦中一意於古优劣可以坐判矣

班马字类序

淳熙壬寅余丞宗正同年李圣俞为簿暇日以一书相示盖娄君机所编史汉字类也余读之因相与言曰古字不多率假借以为用後世浸广随俗更改多失造字之意此好古者所叹也以史籀之大篆或云书法已坏其书俗恶已不可言以叔重之说文而云野陋浅薄谬妄欺世後之字书又可知矣西汉去古未远文章固非後人所及而字亦多古虽已变秦文科斗书废要之假借简朴髣髴古意其兴亡之大端忠邪之异趣千载自不可诬而綴文之士又摘取奇字以资华藻片言只字施之铅槧自有一种风味故海蒙汉隽等书作者不一此书更取史记之字合为一编从韵类分粲然可覩娄君之志勤矣盖孟坚生於东都源流叔皮以成信史子

长事武帝絀金匱石室之藏网罗天下放失旧闻孟坚实祖之多用其文不敢改定娄君尤为知所本矣然亦有难解者班子於马时有遗失文意泯没如彘肩之不言生有以起自布衣而去也夫之类殆不晓其意又其甚者垓下之围以项羽之用兵未尝接战止以楚歌而潰去疑无此理至误儒者谓惜乎项羽韩信不曾一战引孔明仲达以为比史载甚详而孟坚略不及此是可遗耶尝有意一一证之性懒未暇娄君此书将传於世观其趣向进进未已或更考究以补孟坚之阙以发挥子长之余不亦善乎圣俞哑然笑曰娄君属我以序久未落笔当尽以子之言寄之

西汉会要序

梁王筠论家门集自言吾门人人有集以为盛事然自永嘉南渡以至齐梁文气日以卑弱所谓连篇累牍不出月露之形者也临江徐氏以儒名家始余读思叔左氏国纪故中书舍人陈公君举为之序固已甚重其书後见贰卿彭公子壽为其表兄秘阁商老求儒荣堂诗始知其编北阁錄甚富史官奏其有益於史笔遂膺延阁之宠寻传其书知其有思叔之兄伯仲皆以诗书发身晚皆挂冠家居为乡里标表已而思叔长子孟坚着汉官攻次子仲祥又仿唐会要之体为西汉会要一书疏为七十卷目錄二卷总为十五门分三百六十有七事嘉定四年表进仲冬丁卯有旨付尚书省藏之秘阁是昆仲父子间四书俱行於时俱有益於世用非止如王氏词华之比也三代之余治效近古莫如西京典章文物立法定制不惟辉焕周密其言语亦皆雅驯非後世可及然而散於纪传表志之间读者未易识其伦绪仲祥究心於此二十余年无一事不錄无一语无据条列肅分秩然有叙开卷一阅而二百余年之事历历在目其体专以班氏为主又旁取荀悦诸书参考异同视古之文类与近时汉寓博闻六帖法语字类等书皆出其上士夫之好古者无不欲錄而藏之不患其不传顧何待於序引而求之不置余既书儒荣之堂又铭秘阁之墓思叔致书又以此为属为着其大略惟老惫不能尽纂述之详为有媿云商老莘梦莘绍兴二十四年登科思叔名得之孟坚名筠淳熙十一年同登第孟坚今知全州仲祥名天麟开禧元年延试第六人今为湖广总领所干官云

历代帝王总要序

帝王之传尚矣鸿荒以来至於高辛其事莫得而详故夫子定书断自唐虞司马迁亦以为荐绅先生难言之洛阳邵雍为皇极经世书以为唐尧即天子位岁在甲辰推而下之以迄我宋之熙宁又略载岁之卦爻以推其政迹比世之绍运图编年通载詮要等书最为优焉给事中娄公机嗜学如嗜芟手不释卷尤长於考订着书不一始为资善堂教授辅导帝子备竭心思去国二年青宫始建妙柬僚寮以吏部侍郎召还首兼端尹皇太子天资高明笃学好古礼待宾友咨访不倦上下三千余年兴亡治乱固已纲举而领挈矣公益思有以补报取平时所着帝王总要一书精加润色辑成四帙又备錄年号辅臣各有一编始自唐虞以至光宗皇帝凡君道之污隆治效之优劣既书其大略以至离合割据余分闰位五德之相生世系之聯属靡不提纲撮要又择前贤立论精确者各系世次之末开卷粲然如指诸掌献於局俾钥序之钥窃窺此书叹曰彼瑶山玉彩之集皆非此比也皇太子讲诵之余垂意阅习不待徧考史牒古今历历在目矣况公之持身挺特论议直谅凡所着述皆有依据亦未尝苟为高论以骇俗故

规画一出於正无可议者皇上崇建国本教以义方既命丞相为之少傅执政大臣皆为宾客左右劝讲罔匪正人公为之领袖又以此书日陈於前此宗社无穷之福也钥何敢赘辞

温州进士题名序

永嘉自晋为名郡宋兴六十余年人物未有显者至天圣初朱君士廉第进士邦人荣之以名其间自天圣至今历四十有八年举其上第者凡三百三十有七人夷考乡荐之额初止二人中十有三今益以五他繇大学外台以进一举所第率过乡荐书之数而魁南宫者四冠大廷者再呜呼亦盛矣河南二先生起千载之絶学以倡学者此邦之士渐被为多议论词篇类有旨趣进士之盛岂其是欤钥滥授於兹乐儒风之方兴爰考姓名之高下岁时之後先次而书之刊置学官又访其氏族爵里别为一编咸虚其末以待来者虽然程氏之学大要在知本而敬以行之事业文章皆其发也而禄爵之得丧不与存焉向以此邦之士因故家之传充而不止沿流而達於源其为盛也又将立言者乐为此邦书之钥也斯拱而竣

送赵廉州序

赵使君以贵介公子好古嗜学自少交名士寓居东嘉避远嚣尘筑屋城西偏环以竹树如山中居拥书数千卷沈酣其间客至则清谈终日无倦色澹若与世相忘者遇其适意扬眉抵掌论兵讲其道咸纚纚有端绪又自许以有用之才一时贵人争荐之锡对便朝神会气合可立致要津下亦当在蓬莱道山也自以家贫急养分合浦之符以归且行顾谓钥当有言钥曰奉太夫人轻轩远游岭海抚字之外惟谨视药餌经行佳山水有诗愿以寄我此外尚何言然有一於此昔尝疑孟伯周去珠复还事谓明月之胎固灵物也政苛则去平则归虽知几士不及殆史失之诬观柳子厚记零陵郡乳穴之复载穴人之言曰向吾以刺史之贪戾嗜利吾是以病而给焉今吾刺史令明而志洁吾是以诚告焉且乳穴必在深山穷林入者触昏雾扞龙蛇束火以知其物靡绳而志其返其勤若是出又不得得直吾安得不以尽告读之哑然笑曰是珠还之说也盖天之生物凡世所谓宝者必在深险之地刘氏在峽南役兵采珠至磨石於其足而縋之海使不至其下不止以是知求珠之难不止如乳穴之深一去一来岂其然乎使君行矣自尔或闻合浦之珠曰盛则公之政成而民生可乐矣当举卮酒南望相贺以待公之归

送王粹中序

粹中力学起家驰声上庠优在舍选又其问学该洽其进未已慨然有志於功名者也客授历阳学子云集凡经指授多所成就当路诸公非无知己尚为江右漕幕之行君向欲入蜀尝为大篇後亦为诗以送历阳之役老为此来日不暇给何处有诗辄效昌黎先生以规之义为赠君子疾没世而名不称非必欲求名也疾吾无是实而致名也善乎名箴之言曰内不足者急於人知沛然有余厥闻四驰昔者子路惟恐有闻赫然千载德誉愈尊盖名者实之宾也实至则名随之非可要於乡党朋友也非可以违道而干也予人以金帛不足以收也饮人以酒不足以得也惟求其在我者而已凡得於外者分毫皆是过分一切听之其求於我者则无法所谓死而後已不亦远乎苟进德修业惟日不足虽欲逃名不可得也士之决科姑以进身

而已所过者化陈迹俱不足言世之为大魁中大科者是仕进第一选後日贤否毁誉皆不系此场屋之声亦不足以名世吾曹相与勉之爱厚不觉费辞其所以相期者远也

增释南阳活人书序

世以医为难医家尤以治伤寒为难仲景一书千古不朽盖圣於医者也本朝累圣笃意好生务使方论着明以惠兆庶积而久之名医辈出如蕲春之龐泗水之杨孙晁张锐诸公未易悉数无求子朱公肱士夫中通儒也着南阳活人书尤为精详吾乡王君作肃为士而习医自号诚庵野人以活人书为本又博取前辈诸书凡数十家手自编纂蝇头细字参入各条之下名曰增释南阳活人书可谓勤且博矣自言暮齿駸駸不欲为私藏将版行于世来求一言余好医而不能学与之论辨皆有据依学者可按而求求而得其用始知此书之为有功也然尝闻之老医京师李仁仲之子云前朝医官虽职在药局方书而阶官与文臣同活人书既献於朝蔡师垣当轴大加称赏即令颁行而国医皆有异论蔡公恕始尽改医官之称不复与文臣齿不知当时异论之详若许学士知可近世推尊其术本事方之外为活人指南一书谓伤寒惟活人书最要最备最易晓最合於古典余平日所酷爱观许公之言则无求子所着可轻訾乎因并书之

郑屯田赋集序

先生姓郑氏唐之名族後累世居福州少时以孝文集书囊为殿帷赋魁其乡继以玉路建太常赋入太学人多传诵寻寓四明开门受徒来者云委躬孝友之行该贯羣经多有讲解旁通子史百家年至四十五绍兴三十年始登科文备衆体尤工於赋源流李唐诸名公出入三元元佑二李之间集古人所长而藻思絶人兴寄高迈闻见层出讲明题意立词用韵精切平妥古语随用奔凑笔端而一语不出程度之外元佑有域中有四大先生作域中四大王居一有輿议称太平人犹议其率先生有太平无象皆突过前人不可企及读之熟知之深者方服其理明而辞顺盖古文之有韵者也钜年及弱冠侍亲游宦而归始得登门时亦粗成赋篇及见先生机杼望洋回若而叹一意摹仿先生时犹未第间作一篇俟诸生既毕始出之迴出人上视瞠乎若後者又引进之尝曰前四韵固当加工然皆有规矩前辈以妙意英词震耀人耳目者多在後四韵而学者忽之致读者无味虽舜琴歌南风可谓杰作先生犹曰後三韵皆空矣其严如此阅诸生所作语虽工或引经史全句属对可观而意不贯者皆所不取每令人读尧舜不能化朱象大舜五十而慕富岁子弟多赖等赋以为韵韵有意终篇尚有余味可以为法或有一字切题既不可对而又与题字相犯者谓不若真之送聯如以礼为翼之以翼星而配礼之类先生作诏诸儒讲五经则曰厥後孝章开白虎之名盖亦遵於此诏鲁秉周礼云不然何以韩宣子见易象於春秋知周礼之尽在鲁钜服膺有素既沾残膏以窃名第老犹不敢忘命儿辈收纂先生旧作仅得三十篇儿辈又以钜少作八篇綴於後此编不惟筌蹄而已亦不求传於世区区辞费如许不惟人笑之亦窃自笑姑使子孙知师承之自尔先生讳鐸字刚中官至屯田郎尝为主上小学教授近録其後又特加赠官云

法华经显应録序

西竺之教其高处至不可思议有历劫赞扬所不能尽其神通发现摄魔救苦虽非人力所及皆其余事也然其教所以盛行於世者亦赖此为多法华经凡三译而鸠摩罗什所译举世诵之功德効验昭然显着传记所载非一盖此经实如来秘密藏非思量分别之所能解故其神异如此乡僧宗晓朝夕诵习尝刺血书之又集古今简策之言凡一百五十事遂成巨编皆有依据将版行於世以助流通一日访其所居萧然自适与之语贯穿教乘问何以不出领衆曰非所敢当也因出此书求余为序余笑曰黄面老子本不欲言大藏所见与夫龙宫海藏之所秘无边无尽其实本不曾言况此经之外见於余之余者乎子既集之而余又序之耶请不已漫书以授之且语之曰子欲了此而後游方他日一登宝所悟明本性筌蹄且将忘之而况此乎晓曰唯

聪老语録序

余顷投闲门可罗爵有僧以径山聪老书来求寺记甚勤再三辞之不惟与聪无半面身隐言逊何能属文径山之名甲於东南一燔之後欲兴瓦砾为宝坊两宫赐予檀施山委旧观鼎新又大过之宜得玉堂金闺之英为之登载顾乃访老朽於寂寞之滨何耶僧曰寺倚神龙为命率衆致祷肸鬻昭答欲以属公余感其意而为之辞晚归朝行始与之识退然老衲也再相过忽已亡矣其徒集六会语刊之求序余不能学佛莫知师之所至但见临济扬岐之下曰白云端曰五祖演曰佛眼远皆古德之光明杰特者远传行雪堂行传光晦庵以及师其相付嘱又非他人苟然之比光将示寂以行所付法衣集衆书偈以授师偈曰再来毒种元聪侍者叵耐吾宗灭汝边也我今高枕百无忧听子时挝涂毒鼓丛林遂有毒种之称聚徒说法三十年自雪峯来此山法席大振复成金碧之区人谓为国一後身则师之所得者可知矣读者其自参之

攻媿集卷五十三

<集部,别集类,南宋建炎至德佑,攻媿集>

卷五十四

钦定四库全书

攻媿集卷五十四

宋 楼钥 撰

记

中兴显应观记奉敕撰

嘉定三年十一月朔制诏臣钥显应观为国家集福之地自建立以来未为之记者汝其碑之文成朕当书其额曰中兴显应观记已而宸翰下颁昭回之光辉耀千载臣既承命谨拜手稽首言曰百神在天地间昭布森列皇朝咸秩无文非有功不祀其间灵效显着远迹奔走者不过数处而护国显应真君其一也真君崔姓庙在磁州旁为道观河朔人奉之五百余年矣靖康中高宗由康邸再使金磁去金营不百里既去谒祠下神马拥舆舁辇炳然州人知神之意劝帝还轅孝宗诞育于嘉兴先形绦服拥羊之梦生有神光烛天之祥此皆其最着者也中兴驻蹕钱塘初置观于城南寻徙于西湖之滨分灵芝僧寺故基为之祠宇宏丽像设森严长廊靚深彩绘工致铁骑戎卒左出右旋戈鋌旗盖势若飞动敞西斋堂以挹湖山之秀为崇佑馆以处羽衣之流称其为大神之居高宗脱屣万乘尝同宪圣临幸以丹堊故暗赐金藻饰一新既又三十余年矣皇帝皇后聿追祖考之意载命兴葺复赐缗钱二万俾都监右街鉴义主管教门公事明素大师陈永年买田以增斋供之费所以妥灵而锡福斯民者甚至是诚不可以无纪也窃考神之所自不知者以为北魏之伯渊其知者以为後汉之子玉虽皆名公而实非也续会要等书亦不详谛或误後人唐武德元年置磁州贞观元年州废而以滏阳属相至永泰初始复旧仁宗实録景佑二年封崔府君为护国显应公且言府君贞观中为相州滏阳令再迁蒲州刺史史失其名在滏阳有爱惠民为立祠後因葬其地咸平二年始赐府君之庙而京师北郊及郡县奉之如岳祠至是因民之所信向而封崇之故诏曰惠在滏邑恩结蒲人又曰按求世系虽史逸其传尸祝王官而民赖其德使果为子王与伯渊安得谓史逸其传欵元符二年即旧号封王大观赐庙额政和赐冠冕七年加封护国显应昭惠王宣和三年郡守韩景朝辞承上命葺治祠曰敷灵观曰显应且按旧碑为之记其说略与实録同又言唐太宗梦得之碑诏入覲刺蒲州河北采访使因命刑曹曹弋编録神之灵迹五十余条传于世淳熙十三年奉光尧圣旨改封真君然至今以府君为号者尤见其本于为令也初命延福宫使安德军承宣使张去为为提举官传子及孙延庆复庀此职宣力于观为多道士初止十余人今益以衆田止百余亩今益以广啓观门而许士庶祈禱咸有定期季夏六日相传以为府君生朝都人无不归向骈拥一夕尤为一时之盛孟冬十日又谓为府君朝元之节或云以是日上升禁庭皆设斋醮北人之寓居者是日亦必至焉乾道六年遣使贺金国正旦臣以假吏从行过磁使介而下相率望拜于驿中盖往来者必致敬行则先禱于西湖之祠归则洁羞以谢之臣谨摭其始末之实为记而又播以诗云

惟汉之司农兮着遗爱于桐乡使葬我于桐兮必他时之奉尝繫神之仕兮于濫之阳惠及斯民兮久而愈彰擢刺河中兮任河北之采访生则祠于旧邑兮歿又冢于其旁神之既远兮虽尊以姓而逸其名神之威灵兮信千载之流芳谓子玉与伯渊兮皆流传之渺茫独昭陵之诏録兮载顛末之为详北方之人兮谨庙食而自唐膺累朝之封赐兮诚有赫乎龙光功在社稷兮着明效于靖康神马乘輿兮实显佑于高皇始孝宗之方娠兮梦绦衣而拥羊迨震夙之夕兮又神光而发祥敞祠宫之百楹兮缭千丈之周墙俨像设之雄尊兮焕金碧之焜煌仰皇明之临御兮未尝求福而专乡洒奎画以宠嘉兮粲凤翥以龙翔前三茅而後太乙兮与四圣而相望肆陰隲而默相兮巩国势于无疆上宫掖而下士民兮藉神休而禴禴伟明神之英烈兮夫岂敛惠于一方愿谒于上帝兮扫欃枪而殄豺狼吾君将中天下而立兮开寿域于八荒神亦归其所兮报何可忘

重修太常寺记

礼乐一也舜命伯夷作秩宗典朕三礼曰夙夜惟寅直哉惟清无他言也命夔典乐教胄子而及诗言志歌永言声依永律和声八音克谐无相夺伦夔亦曰於予击石拊石百兽率舞又曰戛击鸣球以至鸟兽跄跄萧韶九成凤凰来仪何乐之详也三礼之书乐亦在焉而名书皆以礼春官掌邦礼而大司乐以下属焉则夷夔之任已归于一矣为乐设官十余自中大夫而下府史胥徒凡一千三百余人其间上中下瞽至三百人眡了又三百人而舞者衆寡尚无数抑何其备也孔子之时礼乐已缺其观于周而历聘诸国志固在于行道未始不切切于二者故问于老聃问于苾弘止以论语一书求之执礼固所雅言而言乐为尤衆至闻韶而不知肉味且曰不图为乐之至于斯也所感深矣与人歌而善必使反之而後和之说者或不知此章之意盖乡人邦国所用之外乐歌多失其声苟闻歌而善必使再歌之所谓和之者又得此一诗之声矣太史公知之言三百五篇孔子皆弦歌之以求合韶武雅颂之音礼乐自此可得而述故曰吾自卫反鲁然後乐正雅颂各得其所岂苟云乎哉自太师挚适齐至少师阳击磬襄入于海亦多不得其说挚而下皆乐工散之四方夫子谨志之如有欲用则皆知其所之殆所谓乐失求诸夷者耶安上治民莫善于礼夫人而能知之至于移风易俗莫善于乐乌可不求其故哉今又几二千年礼既多废乐尤失之皇朝累圣非不讲明所谓礼者尚可求之简册一时钜公乐乐甚盛卒不可复古盖其本已亡矣乐之本在声无知之者而力求于尺度秬黍之未为可叹也近世陈氏兄弟礼乐二书流传于世礼尚可考乐亦名与器而已耳高宗嗣历庶事草创而卿列不以一日废迨驻蹕钱塘以法惠僧寺东偏隙地为敕令所又街之东则为容台尚不足以尽设礼乐之器遇阅习则列宫架于法惠寺中绍兴三十一年少卿王公普始请易地会敕局中废遂迁焉中为寅清堂耿耿夏屋于是为称法惠既废为怀远驿又以为台諫官舍敕局再建于寺之旧处而容台不移于今五十年矣梁栋墮圯日有覆压之虞卿少久阙嘉定二年崇庆张君钧为主簿已叹其不可居既丞胄监又转而丞于此时司农太府俱舍旧以趋新或谓亦可迁矣君曰此礼乐之司庭宇宏敞位置崇严不应轻弃矧盗泉胜母古人所避不若因而增葺之请于朝度材于天邑凡而丛费取其贐而亲出纳之都下之烦末吏曹之漫欺一切痛革之手赋工直察其勤惰者至执扑以扶勤者或酹酒以劳百堵皆兴衆役竞劝始于三年之仲冬明年三月八日告毕用工三千五百有奇而内外坚巩丹堊辉华于旧有加而无不及观者骇叹谓工于营私者未必如是之敏且办也发地得泉石刻名曰观音且曰饮

者可以愈疾犹是法惠之旧濬而澄之泉甘且冽结亭其上扁以汲古皆不在调度之数宜其大有不足而反因撙节之有方余钱三十万归之府中而寺有勲臣画像及书籍岁久脱落又欲为一碑未能也府帅将作监王君栴复以为助今皆如所图不愆于素而求记于余余自念老矣岂复为文顷岁尝叨簿正博士少列之命三以家讳而改除终不得进退周旋于其间兹喜寺之新因君之请又欲以平日所闻者自见故弗辞君饱学工辞章沈默静重号蜀士之秀而克勤小物乃如此汉之什邡剧邑也办治有余力今日葺理官寺朝论翕然称之每言前後同僚协力以躋登兹不自以为劳其言曰今之天下虽不易于为而于其尚可为之中卒至于不可为者意其无不息之诚且不能充是心以往故也君之所存者如此宜乎见诸实用者有此也寺无他碑乾道七年黄公钧为壁记谓後世以仪为礼以器为乐其于圣贤之道远矣惟仪与器又皆因陋就寡寢非六经之故盖尝诵其言而叹息今钟鼓玉帛具在而官寺又备矣若安上治民移风易俗者可不求其彷彿于古者乎

台州社坛记

台州之北大山绵亘其一支自东而西蜿蜒委蛇至江而止势若回顾是为龙顾之山子城据其下官寺在焉城西南隅去仪门百步步为社稷之坛厥位面阳爽垆平旷昔人相攸而为此必不苟也有司不戒日就荒圯颓垣成蹊莠牧无禁淳熙己亥正月宗正寺丞沈侯被选来守仲春行祀愀然顾其僚曰是可以奉吾神乎乃命撤而新之临海令彭仲刚建县治于煨烬之余侯知其才举以任焉首按图籍斥地之旧繚以周墙数十百丈始治地得仆碑土中洗而读之盖政和中所颁社稷坛式也制度明甚横列三壇門各四出中立社稷二坛风师居东雷师雨师居西亦各为坛坛之高二尺有半又为燎坛于风师之东南壇外稍高于诸坛于是悉仿名数因其旧而增筑之故有屋四楹为视饌待事之所既葺新之又增其一为斋洁之地其途北出表以二柱中建台门严关键以守之作于六月朔旦又六旬有七日告成靡金钱五十万有奇民不知役工不告勤过者肃然始知有地主之敬侯命钥书之钥闻古者先成民而後致力于神侯之下车访民隐飭吏事廩廩乎循良之风而思不倦以终之以是邦被山带江水旱仍岁又间有郁攸之灾谓职诸幽者非人力所及故于神无所不致其敬社稷之重其可後乎秋社展礼气象一新环珮琮琤豆笾静嘉神贶昭答如在左右继自今气淑民和雨阳时若其必有相之者然则侯之政真知所先後而致力于神者乃所以成民也侯名揆字虞卿秀之嘉兴人

澧阳楼记

绍熙四年三月戊寅澧州澧阳楼成于是太守王侯承甫以书属余为记且曰澧之为州始于开皇後虽废置不一而柳河东谓自汉以南州之美者十七八莫若澧则在唐已为名郡国朝建隆四年始脱僭窃之余而为王土乾德二年始隶荆湖北路东接洞庭西连施黔武陵在其前江陵在其北为湖广之孔道承平日久户口滋蕃岁输米以斛计者十五万养禁旅至三千有畸盛矣建炎之末妖民弄兵倡乱加以剧寇一再攻陷民居官府荡为埃煤因以饥馑几无噍类盖六年而後定翦除榛棘招集流散仅复城郭之旧今六十余年矣米输犹不及盛时十一屯兵百余人而郡治尤偪小黄堂之前重门相去不能寻丈外逼郡城又有酒垆相直才于

东偏后一门以通出入心窃隘之访诸故老或曰酒垆之後旧为城门兵毁以来闭塞至今倘辟而新之郡之气且伸吾民其庶几乎士民援以请为告于部使者始作新门酒垆既迁斷其故基则古甃宛然言益有验节费以为资募民以供工官吏劝趋日以就绪外凿城雉上建华屋即前日之外门为仪门而撤其旧于是治事之厅始得轩豁宽敞而前无蔽障得以挹兰江之秀俯仙明之洲经始于去年之十二月庚申至是讫工合乐以落之气象焕然顿还旧观不敢自以为功也要不可以不纪余因为之太息曰今之为郡者或能以廉白自喜则于营缮之事一切置之恐以扰民而招谤不问其事之当为与否也前後相承谓非吾责若此楼之于澧阳是可已乎余与侯世有道义之好又为世姻侯之兄弟皆承清白之传侯里居时恂恂然一长者而莅官遇事人有难及莆田剧邑谈笑办治兹试雕郡谓将日不暇给而能振起固陋兴五纪之阙典开一郡之眉目是可记也又考之地志是邦有浮丘子采药之仙踪李羣玉读书之遗迹又楚之申明以忠孝着晋之车武子以学术显皆其郡人也先是层城横前重局壅底士气亦因以不扬是役也岂惟于陰阳家之言有利于郡其必有秀士为时而出者侯于是时勤抚以致其庶尚俭以益其富辟庠序以教之後來者又能继此将寢复承平之盛而贤能以兴实自侯发之侯名正功四明人承甫其字也

真州修城记

真之为州未远也自唐永淳中始析江都置永正县南唐为迎銮镇皇朝乾德二年升建安军大中祥符六年以圣像一铸而成遂以名州而实当江淮之要会大漕建台江湖米运转输京师岁以千万计维扬楚泗俱称繁盛而以真为首中兴以来不复置发运使而山阳通泰之盐泝江而上商贾辐凑犹为准壤大郡佛狸之驻瓜步近在六合之境逆亮之至瓜州去此数十里郡居二者之间故亦再罹兵祸朝廷以保障之未固屡飭守臣筑城凿池以为设险之计林君伯成兴役于前及四百余丈镇江游奕统制郭君超继之仅八百丈虽务欲速未底于成嘉定二年八月诸军粮料院潘君被命出守当兵荒饥馑之余几不成邦既属以劳来安集之政又以城筑委之君自下车爱民如子手自摩抚左餐右粥加以医药呻吟疾痛不翅切身之苦视人之饥真若由己食寝为废此意孚乎上下通于幽明斯民感悦顿有生意和气致祥年穀顺成劬农通商寢复旧观乃大肆其力于斯城因前功而增筑之合四百六十余丈基厚六丈上居三之一可列七骑高二十二尺浚濠五百余丈阔者至一十五丈深称之女□易土以甃凡鹄台礮台武台角台□城马面等甃结坚致金汤之固岿然与维扬相为长雄足为边庭之壮观既又兴造葺修自仪门黄堂凡官府公宇大小二十八所合为屋二百二十六楹郡之内为之一新朝家以缗钱十万米七千斛庚费而所用不貲不复有请惟以榷酤之余及撙节用度以充之斯已勤矣郡之井市与漕台皆在城南大江之滨议者欲如瓜州之城剏为两翼自城到江以蔽遮之事重费多未易骤举余追记未冠时侍亲泊江干登监远亭访之居民指其前曰顷有閤市悉垫于渊江外有沙洲数十里虽隔皇天荡之风涛而激水北来相侵未已不数年间之宦游者则监远亦为壑矣是知两翼之城不至江滨则不足恃岸既善隤不知所止又何恃也将为久计则更宜详处而审订之抑又闻合肥之城自乾道修筑岁岁增葺工费不可数计竹木灰甃出于帅漕二司而工役则又金陵戎帅任之以跻登兹山阳历阳大率类此今是邦城郭虽就而方有两翼之议又前者林郭二君之所筑已多隳圯尚须随处补苴又别储二万缗豫为後日不时之备继此者当知今日之艰难益加不测之防则当与扬庐和

楚岭薛相贯而掎角之势固矣惟潘氏自紫微舍人以风节名一世君之二父以从子被赏延俱为时吏师先正柯山使君能轻财重义君实似之自其幼年躬行孝谨笃志问学有不可解于心者行矣而着日进未已尝宰崑山去之日无以续食及倅京口以荒政自任民以父母称之今则江之南江之北草木亦知君名制帅既以治最上闻士大夫公论莫不以为循良之冠君则退然未尝自足也使守边者诚心体国皆能如君何有北顾之忧哉官僚以郡人公言求记为书大槩尚勉其成云君名友文字文叔婺之金华人

奉化县学记

四明六邑奉川为大号难治然俗尚气而服义秀士尤多治之得其道非难也神文在位郡国始建学张文定公方平谓庠序俶落乎睢涣嗣音乎郟鄏而是邑旧记谓相国清河公士逊出镇秣陵为椎轮之始盖宝元初秘书丞于君房为宰以石夫人之庙为县学自为之记云然且曰愿以奉川为县学始亦可以知吾邑儒风之兴旧矣宣和中周君因徙于邑治之东面势益胜未几舍法罢废为亭传又遭弄兵者毁焉绍兴九年荣君彝复新之于今五纪栋宇寢坏圯陋不可复支永嘉宋君始至谒奠顾瞻庙像愀然曰教化根本之地不振如此何以示斯民之欲谋焉未遑也财用之空乏期会之迫遽固已不胜其应而连岁大祲愈不暇给政成欲去介介若不满邑士汪君汲素好为乡里义事闻之谓其弟份曰是吾曹责也不待劝率不谋于衆以身先之首创大成殿增广旧址不日而成一木一瓦皆不苟设必欲坚致宏敞为久远计重立先圣先师十哲之像仪两门庑以次兴作前有墨池濬而广之方正清深冰壶澄澈南山千尺倒影其中轮奂翬飞照映江县为费不貲曾无吝色乃季夏戊申宋君率僚佐士夫释菜学宫用以揭?妥灵观者如堵惊叹赞美以为前此未有而民不知役也于是里中善士董安嗣徐如松等三十有二人争趋竞劝相与再建驾说之堂挟以直庑傍列诸斋庖湑廩器用毕备凡为屋四十楹又以去岁始有自右学登科者为辟射圃以劝方来举梁之初属钥为之文今既崇成又托以记钥世居奉川高祖正议先生教授邑中宝元学记预名刻石寻掌乡校前後几三十年始为郡人然五世皆反葬境内区区封邑犹不敢舍辞不获命敢告于里人曰令尹洎诸贤所以惠吾邑者至矣自尔必能相勉以学相高以文躋儒科登膺仕使吾邑簪纓日盛为四方荣观则今日之举斯为称矣然孟子有曰谨庠序之教申之以孝悌之义颁白者不负戴于道路矣是殆与今人论学之意不同何耶孔子之教人亦必曰弟子入则孝出则悌盖庠序所以申孝悌孝悌之义明则老而负戴于道者少者必从而代之以此为庠序之效不为利禄地也诚能因今之学行古之意月书季考不害进取而父兄之告语师友之讲习率以孝悌为先此义既明则凡学于此者施于家则为孝子顺孙出而仕则为忠臣良吏跼蹐济济化及里闾寢有不负戴之风几于一变而至道者将以此望吾党之士岂直为是观美而已哉宋君名晋之字正卿惓惓无华三为邑长皆以儒术饰吏事首欲兴学迄于有成邑人纪之实钥之同年生也

安庆府修学记

舒本羣舒之地于今最为佳郡瀟皖之胜欲游而不遂见从宦拥麾而之焉者辄企慕如登仙然嘉泰二年严陵詹侯下车以宽明之资临淳古之俗平易近民因其俗而施之政未几坐以

无事顾谓僚属曰官府俱饬而黉舍不称兹不可後乃即其旧而增葺之学始建于绍兴八年中更繕修岁久圯坏以某年庀工至某月日讫役焕然一新郡人谓役不及我而跻登兹愿有以纪之教授王君君玉度以书来余与詹侯俱壻王氏而侯为尊行知其贤有年矣以西枢之子谦厚廉介所至有声绩而饰以儒雅澄江既以政最舶使尤着清节谓文翁兴学于蜀变巴夷如邹鲁翁实舒人尤敬慕之故未暇他事而首属意于庠校可谓知所先务矣舒之人将何以报之侯非有望于报也惟尔父兄相与率其子弟益进于学亦因其淳古之习而文之以儒术不必以取科级之多寡为轻重文翁既祠于学如汉大司农朱邑以一啬夫而遗爱传于千载周瑜以文武才略独步江湖间其名尤高皆郡人也诚使异能之士间出为国家用如前数公岂非侯之望于斯郡者尚勉之哉

黄州贡院记

黄冈东南佳处也大江东下赤壁西峙武昌夏口鼎立相望其在皇朝王苏二翰林一以州驰名一以坡自命皆千载杰特之伟人竹楼雪堂既坏复葺风流文献至今增重近时郡太守博士皆不轻其选秀士亦彬彬出矣建炎兵毁以来秋赋多附他邦乾道七年始试于州而因陋就简寓贡闈于庠校三载必一毁撤既非所以作士气而学宫寢以颓靡州人病之嘉定二年四明高君仲远来守承开禧兵戍之余日不暇给首谒夫子庙叹其弗葺已甚未遑他务与教授李君宗勉饬而新之廊庑斋舍以次兴立而大比又近不可复蹈前辙亟相与谋得驿舍遗址鸠工调度分委僚属创贡院五十余楹庀工于二月丙寅讫役于五月己丑重门正厅考试分位左右长廊庖湢吏舍备具严整费缗钱五百万米二百斛悉出于撙节之余民不知役工不告劳而八十五年之阙典一旦复兴父老谓承平殆亦不及士类欢奋起象振发且请记之仲远与余有中外之好相与素厚以书来委且曰去中秋才月余愿即为属笔以慰千里之望余为之欣然且曰仲远长余一岁恂恂似不能言与人语如恐伤之月评以长者称两乘贰车而後试郡抚字固所长不谓振起事功敏办如此高氏盖名家也高宗皇帝中兴初驻蹕钱塘始建太学妙选师儒先侍郎首为国子司业岂惟文行经学足以表率士林驰名京师规绳具举未几车驾幸学擢贰仪曹至今四海尊仰之仲远其次子也居家孝友恪守家法故为政雕郡知所先後士子尚勉进学业以称使君期待之意使人物声望与江山相高二翰林有灵实宠嘉之仲远名得全朝散大夫云

建宁府紫芝书院记

建宁当闽浙之冲是为孝宗皇帝龙潜之旧虽宦游不得一至其地闻其山川耸秀武夷诸山皆非尘境盖八州之门户也鍾为英杰古今相望士夫多挺挺尚气节秋赋动踰万数荐送率八十余人儒风最盛学有生徒三百分十二斋犹不足以容之今郡侯宝谟阁直学士谏议李公镇临以来治行称最百废具举功利及物不可以数计周知而尤笃意于教养顾瞻府庠悉加葺治犹以为未能甚称乐育之意谓晋范甯之守豫章大设庠序资给衆费一出私禄心实慕之乃捐俸钱三千余缗度地于学之东西两隅广为四斋鸠工于嘉定三年仲冬朔旦讫役于明年二月之望修廊广厦翬飞跂翼名斋以志道据德依仁游艺以其前挹紫芝之峯扁曰紫芝书院盖前所未有也财不费于官敛不及于民增弟子员又广田畴以丰其储举郡之士

欢奋感励咸请记之公学有家传伯仲竞爽且素号博洽富于文词不以自有乃列致郡博士暨学职诸生三百余人之请贻书以属于钥顾年侵气索何以承命勉为之言曰谏议此举固已甚伟当屡书以传後若名斋之义其待学者尤深矣是四者出于先圣之言学之大端莫过于是道者百圣之所传非可以须臾离不志于此则易以流遁必至惑于异端德者诚也经之言德必以伪对之以是决知德之为诚据此一诚可以终身行之仁之为器重其为道远苟能依之形于参倚之际非学之要乎德不可言志仁不可言据艺不可言依言之各有攸当也或谓艺成而下圣人以游言之疑其为可轻是不然所谓艺者非如今之技艺乃礼乐射御书数古所谓六艺是也稽之礼经各有名数先王设教及人之幼少真淳未散之时使习而熟之则身在有余不可胜用君子未有不兼此而能为全德者今礼坏乐亡射御号为武事数亦不复见惟六书可传士又罕垂意焉夫谓之小学谓小年所当学非曰学之细也洒扫进退尚由此可以上達而况六艺乎苟能尽力于三者而游于此则为士庶几于备矣学者其毋忽于名斋之义勉而进之以答谏议之赐岂以科举利钝为吾儒之盛衰耶本朝庠校权舆乎睢涣嗣音乎郟鄏宝元中诏建州立学赐田五顷至庆历四年郡邑始得立学熙宁设官分教建州首置教授一员诸郡亦未之有元丰又赐田十顷则知是邦之学国家最所属意尤在他郡之先也或曰郡既有学而复有书院不既多乎是又不然潭之岳麓衡之石鼓南康之白鹿皆此比也古者家有塾党有庠术有序国有学以今准之百里之邑千里之郡其为学当有几所而谓此为多乎姑诵所闻以谢谏议及多士之意若公余诣学与郡博士讲明经术以训迪好学之士则谏议之任也钥何敢赘为之辞

卷五十五

钦定四库全书

攻媿集卷五十五

宋 楼钥 撰

记

麻姑山顏鲁公祠记

顏鲁公尝为抚州刺史至今有南城县麻姑僊坛记南城今属建昌军郡人祠公于僊都观中曾南丰一记论公之风节备矣正平张公戒又发明邪正祸福之说尤为着明张南轩已谓无可言者于是系之以辞使祠者歌之以侑神然则後來者可无作矣庆元六年观遭火灾祠宇灰烬巨石皆毁裂大钟亦融液不可寻而公之碑独俨然人益敬之太学甯君居麻姑下下与观相望慕公之为人以私财撤而新之求记于余又以李盱江麻姑山赋求宇文枢密之书余虽不识甯君而嘉其好古以扣工部尚书何公公曰此山与吾月湖山庄皆同郡尝建一阁于观门之西藏书万卷余以效李公择山房之旧因亦与甯氏游且促余记之鲁公事业载新旧二史然得南丰正平二记而幽光发越不容贅词独惟公既亲为僊坛记真有意于神僊之说故附会者亦衆姑以为作尉时或谓子有金骨可以为僊又谓希烈使人刺之公曰吾服殷七七丹在顶解金带与之故得縊死而全其首领及其既死又有寄书小顏家之说皆方士之言无所取信固不必办观公视烈火满坑忠愤一发径欲投其中贼徒掇而得免当是时岂暇顾身首之全否耶因诵平日所闻以授甯君使刊之以祛世人之惑亦不失曾张二公之本意又与盱江一赋词旨暗合云甯君名式聚族颇衆又多为儒甯氏未艾则公之祠亦赖以不坏矣

广德军范文正公祠记

文正范公勲业在国史其祠于广德则已具见于内相浮谿汪公之记兹以祠宇久圯不修从弟鏞以嘉定二年为郡博士撤而新之求记于钥语之曰文正公盛德絶识才兼文武非赞扬所能尽然大要在立志不苟而已耳方在贫约则朝暮甘藿粟之味既已富贵则子弟均布帟之清在海陵为一仓官而筑海堤数百里在桐川为一狱掾而所立已卓然如此一马微矣居则鬻以养士去又鬻之徒步而归其跋乞米帖云顏鲁公唐朝第一等人而饘粥不继非所谓君子固穷者欤又有家书云老夫平生屡经风波惟能忍穷故得免祸公之所存类如此此其所以大过人者故曰志士不忘在沟壑勇士不忘丧其元公之自处直欲追古人而友之故其见于行事亦非今人所能及也学既奉公之祠则为士者无徒慕公之名位当求其所以致此者钥既为推公之所以致此者而为之记又因以勉吾弟与吾党之士钥虽老尚当相与思古人与稽之义云

鄞县经纶阁记

始庆历七年荆国王文公宰明之鄞县元佑中县治建阁以纪遗爱名曰经纶肖公之像而祠其下俯仰百余年间尝再兴于绍兴淳熙而又废坏绍熙五年知县事莆阳吴君泰初新之起于三月戊寅踰月而讫工旧观复还而有加焉求记于郡人楼钥钥以史牒考之公为县时世当承平公方读书为文章率三日一治县事垂意斯民为之起堤堰决陂塘为水陆之利贷谷于民立息以赏俸新陈相易兴学校严保伍又刻善救方立县门外邑人便之此相业之权舆也公之于鄞厚矣观经游之记皆为农田而行历东西十有四乡乡之民毕已争事而遂归上书外台极论浚河捕盐利害则公之为政可知诗文之传于世为鄞而作者班班也乡有五先生钥之五世祖及王公杜公皆与之定交是以教化兴行学者竞劝後有忆鄞及忆东吴太白山等诗则又知公之恋恋于鄞也熙宁遇主千载一时尽以所行于鄞者推广之呜呼使一时奉行者皆能如公之在鄞则天下岂以为病哉天下虽病之然吾邑人之于公不敢忘也故尸而祝之以至于今若吴君可谓知务矣政成且去如始至然一新县楼出于人之乐输以其余材又为此举盖将以表先正仁民之效慰父老甘棠之思而示後日循吏之劝一举而三善具非直为是观美而已也

定海县淮海楼记

庆元五年十月甲戌庆元府东海县淮海楼成主簿陈君广孙求记于余问楼何以名曰秦公少游初筮之地也旧有此楼碎于建炎兵火至是始得再作退而考之国史有传云元佑初调定海主簿信矣又求于文集则絶无一语及之访诸父老相去百余年间耳目所不接不可得而考矣公受知于东坡王荆公本欲以大科发身俯就进士举实与先祖少师同在元丰八年丙科家藏小録淮海独掌牋表盖其布衣时名已重矣然亦不闻仕乡邑之详谓公鄙夷吾乡而不一语耶则公所至必有诗文不应于此独尔顷游括苍公之故迹班班可见水边沙外之词後人作为莺花亭登临赋咏犹使人想见风度楼今在簿领官舍余未及登也闻其东望大海浮天浴日之波殆无津涯大江自东而南西抵郡城横陈楼前潮汐往来风帆浪舶尤为壮观北有蛟门招宝伏龙之山南有长山太白诸峯一览而尽得之此宜公之所甚乐岂亦有诗文而遗佚不传耶公未第前一年尝自题其闲居集之首曰将赴京师索文稿于囊中得数百篇辞鄙而悖于理者辄删去之岂後来亦尝取少作而删之耶陈君元枢之子宦学有家法知所向慕故一官虽小慨念前闻人而兴斯楼及瓜且去矣必欲记此余既喜其意因又念一时诸公与公同时秉钧怙权富贵隆盛者多矣由今观之虽穷达贤否之不同同归子尽彼或甚达而民无称至有搢绅所羞道者公以軼羣奇才为苏门上客赋似屈宋诗凌鲍谢壮犹硕画直欲鞭笞二虏而困于烦言陷于党人仅得一校勘黄纸书籍为正字史院编修官遂倅杭州监处州酒窰榷及横雷坎 堦流离醉卧古藤一笑而终亦可悲已而声名至今暴白家有其书望之如神仙然其所经行之地了无片言可寻犹为士夫爱慕如此然则士之立于世可不知所择乎莺花亭诗祭酒芮公国器一章最佳人言多技亦多穷随意文章要底工淮海秦郎天下士一生怀抱百忧中余尝诵而悲之因并记焉

东莱吕太史祠堂记

乾道淳熙间儒风日盛晦庵朱公在闽南轩张公在楚而东莱吕公讲道婺女是时以学问着述为人师表者相望惟三先生天下共尊仰之而婺人被东莱之教尤深至今名士班班其传盖未艾也先王为文靖公之七世孙自正献公而下名德继起又为文清曾公之外孙渊源固已甚远而天资絶人读书五行俱下少从三山林公之奇游学徒百数卓然出其上博极羣书究通千古兴亡治乱之变而耽嗜经学至忘寝食年二十有七礼闈既擢前列又中博学宏词科举名震于都城钥既忝同登复媿齐年意其为豪俊之士一日相遇则颓然似不能言者殊不称其名与之坐而敏焉不惟使人意消欽叹击服虽定交于是日终不敢以友友也公入馆学钥在敕局又邻居于百官宅听教为多亦尝造婺之寓居留连夜话几至达旦又六年而再造焉则公已病矣尝为之叹息曰少为国器长为人师使居大位则必称物平施庶几直道之行也而公已矣世间物物自书之外无一可动其心者推明道德性命之说而不流于迂尽排佛老异端之论而不至于甚爱惜士友如待子姓而持论不阿别白是否如持水镜而不事于察着书立言粹然一出于正而克勤小物虽使之仕于州县亦甘心焉盖其造诣精深本末具举用志不分必欲至于圣贤阃域沛乎不见其止也其教人则以孝弟忠信为先以穷经躬行为务故登其门者随其性质咸有得焉自建炎南渡父祖始寓于婺假官屋以居其地在光孝观之侧入仕虽久而在官之日仅四年故在婺之日最多四方学者几千云集横经受业皆在于此晚始买屋于城之北隅以旧居归之官公之亡既二十有七载是为开禧之三年邦之士夫及其门人请于郡欲以旧居之半为堂以祀先生郡侯谏议李公大异慨然从之又出钱五十万属掌书记宣君绘经理其事前增城主簿潘君颐孙实董斯役郡寮及其门人合力以佐费庀工之初相率持牛酒以犒焉嘉定改元之秋为屋才十余楹外门五间祠室及前轩各三间又欲前为一堂扁以丽泽书院以存公之旧且为後来讲习之地後为遗书阁以度平日所着如大事记读诗记阃范近思録春秋尚书讲议家法祭礼及他书之未成者皆可以传远垂後而工费犹未备国子司业王公介与其同门友生谒记于钥感念畴昔自以宦游不得日陪函丈亦不谓公之蚤歿也老矣公之墓木拱矣虽欲一拜祠下而不可得遂不复辞而书其始末将使吾党之士自今瞻先生之像如在左右毋忘先生之淑诸人者以自勉且思有以称贤使君所以风厉振起之意则先生之传宁有既乎先生讳祖谦字伯恭其季曰祖俭字子约确守素业能世其家顷以忠愤上书贬死江右主上更化念其困于权幸之手赠直秘阁泽一子学术操行亚于先生恐久而泯没敢牵聯书之

平江府瞻仪堂画像记

庆元二年知衢州郑公若容治行彰闻浙东部使者合词以最课表于朝某月甲子有旨除直秘阁改知平江府自皇帝践阼以来垂意民瘼郡太守以异等效膺不次之宠实自公始四方流传莫不耸动而公之名益显吴门地大物夥郡务又十倍于西安旧尝闻吴中士夫言吾邦使君当得三数人以治宾客答牋书理财赋听民讼分典之乃可办治虽若戏言盖甚言其日不暇给也公精力絶人年侵而强直不衰今蒙天子亲擢以平日临事不苟之意穷日夜之力以从事于簿书期会宜视前後数公愈劳而无顷刻之闲然下车未几而治声已随舟车而东矣一日贻书于钥谓郡中自至道以迄于今更郡守一百五十人率有绘像旧在齐云楼两庑绍兴末年洪公枢密以内相出守尝建瞻仪堂而列像其中范公参政为之记今又三十六年绘事故暗装潢漫以侈脱欲尽图于壁间良工名笔一开生面而以旧像度之阁上庶几可久

子为我记之钥喈曰以绘事为甘棠固他郡所无于浩穰胶扰中公余丰豫雍容及此非身兼数器之才宁能尔耶举此一事可以知公之政下转而上闻天子之用公殆未艾也钥祖父宣和中尝以徽猷阁直学士为守遗像在诸公间虑其久或失真谨以家藏写照因托公是正之并书始末以塞公命

慈溪县董孝子庙记

庆元二年某月甲子庆元府慈溪县重修董孝子庙成邑令朱君堂求记于郡人楼钥以传记图经参考之孝子讳黯字叔達一字孝治会稽句章人生後汉时家贫少孤事母尽孝采薪供养甘果美味奔献于母母甚肥悦比舍有王寄者富而不孝二母各言其子寄闻而衔之伺孝子出苦辱其母孝子知之恐貽母忧默而不言母既葬斩寄首以祭母墓自囚以告有司和帝释其罪召为郎不就以寿终句章今之鄞县也孝子之母尝寢疾喜饮大隐溪水不以时得于是筑室溪傍以便日汲厥疾用瘳溪在今县南一舍故以慈名溪而又以溪名县母反葬于鄞鄞为郡太守治所故州邑与其墓侧皆世祠之城之祠宇即其故居先其母塑像在南郭草堂中康宪钱公亿迎归于庙钥亲访其墓宰木犹存近存城南岂所谓草堂者耶晋虞预会稽典录亦载其事但言会赦免而不言为郎之详然至今乡人犹称董孝郎中庙也吴之虞翻称其尽心色养丧致其哀单身林野鸟兽归怀怨亲之辱白日报仇海内闻名昭然光着以为会稽英俊之首唐大历中刺史崔殷作碣徐浩书之亦云其徙居也庭出寒泉其执丧也林集祥鸟无貽一日之忧终报共天之怨又载其六代祖仲舒汉大中大夫嗣孙字春领庐江太守世为郡中名族既不可详考又言环堵已荒遗记将落意前此必有碑版今不得见矣若董孝名乡慈溪名县亦谓之董溪则不可磨也祥符元年冬真宗皇帝封岱礼毕诏赐号纯德徽君或云起于钱康宪之请夫孝子岂有意身後名耶发于至诚自不可掩生蒙和帝之恩越九百载而膺章圣之宠然则隐约之士可不慕而勉哉唐神龙中有张孝子无择墓在慈溪之虎胥山结庐负土有涌泉芝草之异仕至和州刺史比郡中有扬孝子庆自绍圣至宣和刲股割乳以愈父母之疾者至于五六卒旌表其门孝秀相望蔚为义郡其源流有所自矣元丰间盛君次仲为令尝书董溪事于碑下建炎改元林君叔豹祠于东山之阳绍兴之末户掾董君邻摄邑又崇大之为前後二殿前以奉孝子而处其母于内今三十五年矣浸以圯坏朱君始至进谒慨然以为此盖风化所系宜为先务顾荒陋如许是阙典也君既以儒雅饰吏剴决如流县务毕举以政成之余一新庙貌视旧增辟首捐俸钱助以余帑敛不及民给工直如私家人徒见轮奂之美而不知役莫不惊叹称服又率邑之士夫酌奠以落之是足以仰赞天子之孝治而示邦人于无穷皆可书故备书之

嵎县嵎浦庙记

剡壮县也两火一刀自古记之晋宋名胜遗迹至多地以谿名以谿之山水俱秀也邑城之北山围平野谿行其中至四十里许两山相向愈迫剡之水易于暴涨者以此然水口气聚所以为壮县也西曰嵎山巨石突踞水上其下曰嵎浦岩壑奇耸尤为胜絶溪多积沙深浅不等惟此数里间渊渟澄澈不知为几寻丈潭在石下为羣鱼渊数相传中有神物无敢触犯亦险绝之地也上善济物侯庙貌像严毅夙着威灵据山瞰谿称其为明神之居谿通曹娥大江山为

台越孔道舟车所经无不致敬吉凶响答求梦尤应远近以雨阳祈祷蒙赐为深时节报谢者相踵画像以祠于家者俱是也骆氏世为庙史有吴越时公牒称陈长官祠嘉佑七年乡贡进士何淹为给事郎太子中舍知县高安世为记亦云侯姓陈氏为台之仙居令始过此陰有卜居之志秩满舟覆于下拯之复溺死焉自尔显灵民遂祠之天福初有神兵之助而受此封然酈道元之注水经出于後魏已言嶧山北有嶧浦浦口有庙庙甚灵验行人及樵伐者皆克敬焉若相盗窃必为蛇虎所伤则庙已古矣况台州乐安县五代时改永安至皇朝景佑四年始改为仙居不应石晋之前已有此名岂侯实为永安县令後人误承仙居之名耶正如磁州崔府君国家奉之甚严会要以为後汉之崔子玉孝宗圣德事迹谓赐名从玉从爰盖以始生符瑞默契其名而昭陵实録乃谓唐贞观中濫阳一县令也幽冥之事不可究知传记亦有谓灵祠间有以刚方之士代之者惟其血食有素授职于朝故封爵之报与臣子不殊也建炎时敌骑入越而叛兵欲犯邑境以神之威不战而退乾道中曾赐香茗之奠今丞相大观文谢公布衣时由丹丘赴南宫神已告之富贵之期是举登科作尉此邑事之尤谨公既登枢筦修职魏君必大率邑人以加封为请庆元改元赐庙额曰显应公之力也魏君年及八十为一乡之老既募衆力新其嗣而钥之子瀟适为丞介以请记惟神之姓氏事迹着闻已久瀟又能道祠宇祈禱之祥且将捐私财而刻石并为记之修庙之役刘令君渠先以十万钱市材魏君以宰木助之周令君悦取以建殿宇始于庆元四年十一月成于六年六月而终始经理者魏君也

桐庐县桐君祠记

荊州多荊蓊州多蓊豫章以木氏都酸枣以棘名邦兹邑以一桐之大垂盖如庐古有隐者采药求道于此或问其姓则指桐以示之人因称为桐君故桐江桐谿桐岷皆以此得名既以为县又因以名郡焉大谿澄澈横其前又一谿出天目至此而会一山岿然耸于谿之东林樾秀润号小金山上有祠宇肖君之像盖一方之絶境也新婺州贰车詹君义民以书来曰家本严陵郡中慕桐君之高风来寓邑下念古祠之芜废思有以兴起之未能也邑尉赵君某公余为一新之士民称美思有以登载传後求记于余昔未冠时尝侍亲过其下虽甚爱山川之清淑曾不能登嶠以致一觴之荐徒诵卢公赞元招僊之词而去之至今犹属梦境也夫所谓隐者正欲逃名于世严之高士有三人焉子陵隐于汉风节最高而其名终不可泯方干隐于唐又以诗显桐君不知为何人身既隐而姓氏竟不传其殆最优乎余既喜詹赵二君之好事有契夙心因并书之俾刻焉

建宁府冲应周真人祠记

神仙之说茫乎邈哉有耶无耶不可得而知也以为无者谓以秦皇汉武之力求之而不得故以为必无之殆未必然以为有者则指传记以为信传记虽多夸言然耳目所不及者非必无之噫盖有之矣我未之见也洪内相志夷坚言建之周生事以为丹欲成而失之出神往求而魔又困之劝家人火其尸而无所归又谓其山浅陋非神仙所居也嘉定五年学士院权直真希元建人也为其里浦城周真人之祠求记于余且示以真人之弟待制公所为行状及闲乐先生陈公师锡容台何博士去非所书陈何皆同乡始末甚明始知内相得于传闻而未见此三书也真人天分素高夙有仙骨神既授之又加以真积力久之功其妻杨氏文公之孙亦有

隐操相与枯槁于山林之深及其垂成犹未至于形神俱妙轻举飞昇之地则世之谓一有遇而遂羽化者又难矣然其精神聚而不散遂着灵响水旱有祷至今犹能惠其里社里人以其祈禳之明验闻于府于监司以彻于朝封冲应真人旧有祠宇因而兴葺以侈上赐而真人之名益显矣余闻建多伟人山川孕秀非他郡比近阅图志武夷之外名山无数造化岂故私于一方哉自有宇宙融结自然而秀气特多人才方兴而未艾盖不止神仙道家之盛也余家于鄞少有四方之志而宦游不出温台粗穷东南之胜欲入闽而终不遂老矣方乞身以归将隐于四明山中望建安无可到之期第切怅叹而已既为书此且嘱希元并与前三公之文刻之此不复具载云真人名霞字史卿希元名德秀

攻媿集卷五十五

卷五十六

钦定四库全书

攻媿集卷五十六

宋 楼钥 撰

记

遗老堂记

乾道辛卯客授来束嘉一日衣冠会于黄堂庑下中有苍颜白髮目光了然者心窃敬之人曰此高密郡王曾孙崇道公也迟顷俄扬笏相向字呼我家少师问于君何属钥拱而对曰先大父也因言在京师时相与游从如昨日事媿晚出不及知自尔时时造门闻话言祖宗承平余百年事之废兴人物之贤不肖内之朝廷典章近之干戈转徙之详历历言之叹击不暇若宗正属籍之盛他人按图莫能究举以叩之了辨如响年踰八十视听不少衰气节刚劲门无杂宾独以事契故厚我一日谓钥曰予家素贫侨居佛庐他无所用心左右图史且以永日近辟屋数楹取赵台卿之言榜以遗老子盍为我记之钥曰台卿非公比也彼尝诡姓遁身以逃鉤党之祸晚焉着书词思遗老顾岂得已公以当世宗英尝驱驰戎马间得敌要领归报德齿俱尊为赵氏祭酒名堂之义不应处此汉子政自以宗室遗老言事必尽今天子广览兼听无间疎戚亲亲贤贤尤所笃意间平之懿迨无遗贤公于古事今事问无不知岂不能为更生之为而以台卿自处耶公一笑并以为记

会稽县寬简堂记

会稽县治之东有地三亩所旧有一堂以温陵曾鲁公尝为之宰名曰袞绣岁久圯坏知县事欧阳季思汲撤而新之前轩後庑又为亭三间以临河上岩桂官梅分植其间栋宇宏敞丹堊焕然经始于庆元四年孟秋落成于十月之望求名于余为之名其堂曰寬简亭曰休心且语之曰文忠公君之四世祖也为郡以寬简不扰为意故所至民便既去民思或问公为政寬简而事不弛废何也公曰以纵为寬以略为简则弛废而民受其弊吾之所谓寬者不为苛急尔所谓简者不为繁碎尔此士夫均所当法也君承家传为江右甲族而今之在仕版者才一二君仕中都以才謂自见诸公贵人荐之朝来治剧邑其可不以此言为法乎因为书其扁记其说使刻诸石以自励且以示後之人县壮而赋重民为之困官不胜繁君能以剗剗之余力及此且再书考矣尚其勉之行百里者半九十毋忘此言後來者又能率是而行之岂惟文忠公之言可宝万世邑之民其庶几乎或曰临下以简御衆以寬此古之格言也然今之作邑者戴星出入焚膏继晷犹恐不逮寬简之说果可行乎曾不知为单父者弹琴而治宰山陰者昼而垂帘其必知此矣故文忠之为青州扬州南京皆号大郡公至三五日间事已十减五六一两月间官府如僧舍岂非明效大验乎文忠之宰夷陵为喜喜堂记有曰听事之东以作斯堂度

为疏洁高明而日居之以休其心君于公退之余吏散庭空休心亭中以养吾之神以待事物之至惟宽与简将自此出本无二道也

昌国县学申义堂记

东阳葛容甫洪为昌国令葺县庠之讲堂名曰申义求书其扁余既喜葛君知政之先务又乐其名之佳大书以遗之又欲为之记余分教永嘉时尝作序齿文以示诸生其略曰孔子称甚矣鲁道之衰也洙泗之间断断如也说者谓断断为相逊孟子曰谨庠序之教申之以孝悌之义颁白者不负戴于道路矣夫洙泗之间行者相逊何以为鲁道之衰谨庠序之教何预于道路之负戴者及究其说汉地理志云鲁濒洙泗之水其民涉渡幼者扶老而代其任俗既益薄长老不自安与幼者相逊也徐广又曰盖幼者患苦长者长者忿媿自守故断断争辞所以为衰也想其盛时老者晏然如父兄之役子弟无复相逊子所谓老者安之殆为此也孟子亦谓孝悌之义既申则颁白负戴者少者自当代之矣噫后世教养士子以科举得人之多寡为庠校之盛衰者与古意远甚昌国故甬东之地民以渔盐为业近岁儒风日兴而犹未盛葛君欲崇教化以善其俗一闻余言则曰此名堂之本意也始与从弟镛尉东阳而归余启得人之问以容甫为称首兹为乡邑治声卓然又将兴学化民以几古人之意诚非文法吏所能为者齐变至鲁鲁变至道顾不在兹乎钥既为之记而命镛弟题其上

奉化县恕堂记

奉川余乡邑也比因扫松见赵令君会方祷雨相与过恕堂上盖县斋便坐且折狱之地也栋宇一新而户册不称令请改书之且出旧记相示因谓令曰治狱固贵乎恕而所谓恕者非止用于此也孔门之徒最为善问子贡猝然问曰有一言而可以终身行之者乎亦难乎其答矣夫子不曰仁不曰义不及其他而曰其恕乎兹岂夫子一时姑以应弟子之叩击哉盖其平日践履之实故其言藹如历万世终无以易此又从而言曰己所不欲勿施于人大哉恕乎曰违道不远曰求仁莫近一贯之传亦曰忠恕而已矣制字之初以如心为恕大率以我之心如彼之心则为恕矣若彼亦能以其心如我之心则天下岂复有他事哉世之言恕者曰我能临民而轻其笞箠追科而缓其节目是皆恕之一端何足与言恕之大全也君子学道则爱人人能言之小人学道则易使则鲜有能说者此亦恕之说耳君子役人者也以吾心如下之心安得不以爱人为务小人役于人者也以其心如上之心安得不易使且以至微之事言之令君坐官舍而有以谒入者心欲却之苟曰彼之来亦良难岂非有急以相投有事以相告耶则吾之迎之也必不以为憚驱车以出谒欲见主人而不出心必愠之苟曰安知其家不适有故乎姑待之则吾之心必释然矣推此以往仁不胜用宁复有乖争陵犯之患哉令君曰所未闻也方欲以记为请愿径书坐中语以诏後之人且曰邑有吴氏懋者既以一力葺理牢户内外俱备又以其余材重建此堂愿托名焉令君名彦綰秘阁修撰右司公之子以清谨守家法以儒雅饰吏事明恕而行终始如一为邑中建惠政石桥分为双洞壮丽绝出吏民以为昔所未有诚信及民上下响答此堂其余事也

冲和堂记

古有宗法大宗小宗具载礼经圣人之用意深矣阳美周孝侯庙碑後有宗簿宗尉溧阳史氏旧有家谱每一院各有簿尉之职盖是时宗法犹在意必择其族之有才力者为之若有司然余姚虞氏实世南之裔有为农者故谱尚存自受氏以来莫不可纪如汉之谡吴之翻凡有名于史者皆略载其行事历晋宋齐梁陈隋皆尝上于朝而名臣为之修纂齐则王俭修之他悉类是闻玉山鲁氏有谱亦然唐史所载甚详至武氏而谱法大坏唐人犹能各守其閥閥今则亡矣本朝惟一二名门如杜祁公上世自二代春秋诸侯之子孙千有余岁不絶世谱苏老泉之言曰情见乎亲亲见乎服无服则亲尽亲尽则涂人也吾之相视如涂人者其初兄弟也兄弟其初一人之身也悲夫一人之身分而至于涂人此吾谱之所以作也钥尝读而重悲其言故族党虽衆纵不能与之如同气率体老泉之言以待之山谷先生文章妙天下学问冠百家而至性尤为絶人东坡先生荐之曰孝友之行追配古人其见于诗如食莲有感等语皆藹然仁义之言于元明知命情义尤笃晚谪宜州患难极矣学道纯熟不知有死生之变与再从弟靖民判官书有曰吾侪所以衣冠而仕宦者岂已力哉皆自高曾以来积累偶然冲和之气在此一枝其实相去不远幸深念之呜呼此言之发出于中心其视羣从功綏之亲岂有厚薄之间祇此一语可以睦宗党可以厉风俗可以寬鄙而崇薄圣人宗法之意尽在是矣先生之诸孙萃既刻之石名曰冲和帖又建堂于家仍以冲和扁之皇太子为之大书萃又求钥为之记顾骈骹之词何足以发窃尝佩服斯言故勉书之萃以才业之美由郎曹宰掾为直显谟阁两浙路转运副使其他在仕籍者多以治行间称故家簪绅之盛在今日未有如黄氏者兹非冲和一枝之余庆耶

清芬堂记

皇朝以忠厚为家法亲睦九族高视千古高宗中兴收用周宗以强王室如令時令諤子崧子昼子洳皆列之法从或绍爵郡王士樞士鏐等又皆极禄位之丰更化之後首擢令衿袭封安定独殿诸老宠眷隆渥特许非时见普安郡王倡和动盈卷轴王圣性高迈学问夙成篇章璀璨属联尤工其间理趣精深非若文士徒为华藻而已绍兴三十二年孝宗受内禅而令衿不及见矣一子子觉以御书诗二轴装潢以进孝宗复亲洒翰墨题其一云朕在藩邸令衿以宗室老奉朝请时有唱酬子觉今标轴来上想清芬之如在复书赐之其一云此卷皆朕与令衿唱和诗令衿亡矣覽之怆然先是佑陵朝谏官江公望以抗直敢言有重名于时而又学佛超诣每谓与吾道合令衿旧与之相好得其四书俱是理到之言前後名公卿跋语甚衆尝以进呈孝宗又书其後有曰观江公之言其利济方便超脱生死佛道盖如是欤超然居士果能允蹈卓尔不羣信乎宗藩之领袖也高山仰止聊书卷末诗及此跋又书旧讳至十有一超然盖令衿自号也子觉之长子伯禽祕藏于家亦谨题于卷尾伯禽之子师济举以示臣钥敢整冠再拜而读之仰而叹曰皇乎盛哉臣子之家宝先日所得奎画者有之矣未有炳曜杰特昭回之光连篇累牍如此之夥者也惟安定天资颖悟加以笃学所交多世之名胜乐善好施胸次豁然中间尝以客得祸终不自悔惠人利物不负公望之言寓居柯山臣外祖太府少卿汪思温为守与之友善公望所谓事事方便物物利益者外祖盖终身诵之後二十年先臣赠太师岐国公璩为监征公知其贫而廉贷私钱三十万以济臣家之归先臣一介不取虽已偿之至今怀感终不敢忘此固公之细事敢附见于此抑使人有以信公之实行也师济将取清芬二字以名其所居之堂而求记于臣臣老矣学落不能驰骋于艺文之圃辄直书始末以着君臣

相与之深庸詎後世为安定子孙无穷之荣且以见前良议论词采更相映发为一时文献之盛云

扬州平山堂记

平山堂东南胜处也长淮之东地多堆阜苟见山处皆以得名于斗野山在他郡何算自泗上南来者望而首得之故米宝晋有第一山之咏仪真西北登高见建邺诸山而有壮观之胜扬州大明寺所谓自有宇宙便有此山而千载无领略之者六一居士一览而得之撤僧庐之败屋作为斯堂而风景焕然遂名天下公以为占胜蜀冈江南诸山一目千里而王荆公亦谓一堂高视两三州者也天造地设待人而发滁之醉翁峡之至喜皆以公得名而扬又居南北之冲士夫往来喜至其下自堂之成所谓迷楼萤苑芜城九曲之旧【○一本作风亭月观吹台琴室之旧】俱在下风矣公之记岷山亭谓岷盖山小者而其名特着岂非以其人哉羊叔子与杜元凯是已亭屡废而复兴者由後世慕其名而思其人者多也此堂亦几是耶然而物有盛衰承平才更十七年而堂已圯坏直史馆刁公约新之沈内翰括为之记绍兴末年废于兵毁周貳卿淙起其废而洪内翰迈记之近岁赵龙图子蒙尝加葺治郑承宣兴裔更创而增大之开禧边衅之起环扬之境本无侵軼而庸人债帅畏怯太甚始以大言自诡事未迫而欲遽遽假清野之名纵火于外负郭室屋延燔一空而堂遂为荆榛瓦砾之场于兹数年矣嘉定三年寇攘既息而旱蝗饥馑之余疮痍益甚皇上思得人以镇抚之大理少卿赵侯方以闽漕之节僉次于浙右遂除右文殿修撰起帅于扬远继叔祖龙图之轨下车之初日不暇给简节疏目恩威竝用教条井井军民帖服边鄙既已不耸而年穀顺成寢复乐土之旧郡城堡寨【此下各本俱缺】

攻媿集卷五十六

<集部,别集类,南宋建炎至德佑,攻媿集>

卷五十七

钦定四库全书

攻媿集卷五十七

宋 楼钥 撰

记

雪窦山锦镜记

雪窦山名天下自下而升既至絶顶而地始平旷四山又环之寺据正中气象雄秀二水不知所从来出山之两腋而会於前径赴大壑峭石削立险不可测崩空落崖飞雪千丈洞心骇目胜絶一方此山之所以得名也繇古以来登览之士不知其几眩於创见何暇拟议绍兴甲子郡太守尚书莫公将来游乃始发妙意於万象之表谓水去太亟属寺僧以田为池使二流汇其中寛纳而缓出之则寺当少利有诗云能废千畦渟玉雪不妨飞练挂丹梯读者韪之而四十余年十易主人咸睥睨以为难淳熙十一年足庵鉴公禅师既至百废修举取莫公之说斟酌之八月己未遂兴畚鍤池深一寻纵四百三十尺广半之筑堤南西以便往来因桥为闸视水涨落而闭纵焉明年二月庚子池成漪涟拍堤渟渟如拭千岩倒景空明相映道俗欣叹见未曾有禽鱼下上咸有喜色师问名於雪窗张武子良臣武子曰是所谓渊林锦镜者也遂以锦镜名而谓余记之余不能习陰阳家言然通天下一气耳山如人之定形水如人之脉络或潴或泄当适其中池之未作也水若建瓴山之气与之俱逝而不留及其既积则淑灵之气得以扶輿磅礴於兹矣继自今其必有卓然超彻之士深藏若虚出於此山以振祖风者岂惟利而已哉曩尝一再游焉间久不雨水仅相续萧索轮囷固自不恶惟积雨暴涨则尤为壮伟可观顾安得每每如许及今过之既坐亭上徐彻三版水则大至怒涛迅雷凌驾震叠素蜺万数哮吼层出真天下之奇观也始惟见寒莎野奔纷骇相应少焉觉两涯石壁亦为之低昂不已此非亲至其上深矚而驻观者不足以知此莫公止为不妨飞雪之胜不知此池之成关机阖开乃大有功於瀑泉也足庵传洞下心宗精链刻苦等慈接物法施不吝所向倾动缙白数主废刹皆立兴之壮年尝出力於此以办衆缘晚座道场年踰八十适丁歉岁艰食之余他人支倾补坏犹惧不济乃於谈笑间成此胜事用钱百万外不以谒诸人内不以费诸帑倾囊倒篋一力为之信有大过人者是役也僧德实实相其事妙有智思规画多出其手又得信士单承亮割膏腴以补田之废此池益可以久矣故并书之以告来者云

望春山蓬莱观记

老与佛之学行於世尚矣未知孰为轻重然以吾乡一境计之僧籍至八千人而道流不能以百其居才十数而佛庐至不可数何耶盖尝闻之欧阳公矣大略以为佛能籍人情而鼓以祸福人之趋者衆而炽老氏独好言清静灵仙之术其事冥深不可质究故凡佛氏之动摇兴作

为力甚易而道家非遭人主之好尚不能独兴且曰其间能自力而不废者岂不贤於其徒者哉明之四山去郡皆三十余里西有湖千顷一山穹然秀出此为最近者名曰望春旧有灵波庙以祠白龙政宣间有陈孜者始崇以殿辟道院於东俾道士冯立权奉香火祖父少师典乡邦因湖之淤请於朝而田之岁得谷亡虑四十万斛父老以为德生立祠其中又得道士何思远居之於是观宇益兴廊庑略备思远澄心链气得黄老之真风驱役鬼物灵迹有不可掩者尝之京师有运船数百千艘欲絶淮而潮不登为作法於其壅未几潮溢欢声如雷悉赖以济发运使以闻敕差明州管内副道正盗发清谿旁郡山谷间多响应者祖父大飭守备郡以无恐思远亦有陰助石记存焉绍兴癸卯太守莫公将命拜章祷雨而验奏移象山蓬莱观废额手书扁榜以宠异之其後主者竭力以增益前功今知观吴若讷继胡志清之後里之巨室厉氏兄弟相与出力兴造又得咎氏创岱岳行祠於山麓遂为一方胜处由欧阳公之言观之诸君可谓能自力而贤於其徒者矣钥自念生晚不逮事祖父尝拜祠下冠佩俨然幼年及识何君犹记其道貌能历历道祖父时事使人起敬吴嗣法於何为孙行履行乃祖之法以大其居是为能负荷者哉与之游一日来请曰观之兴才六十余年惧无以传久远愿记之应曰传之久不久正不在记而况此骈骹之文乎世之栋宇有倾民力为之欲为无穷之计而骤起亟废几不能以一瞬山巅水涯结茅累甍或遂化为殊庭自前古以至今日者非一日子以为今之琳宫藻馆据名山洞府之胜霞冠星?摇曳其间者皆固然耶其创始之初亦若是而已又未必能如子之居之壮也其浸致雄盛者虽曰有数亦存乎人尔揆之世法又何止栋宇也哉今蓬莱之兴或作於前或作於後以躋登兹归语子之徒傥能念其艱勤而增葺之则真可以无穷矣吴曰正欲记此以示来者遂为之书

天童山千佛阁记

淳熙五年孝宗皇帝亲洒宸翰大书太白名山以赐天童山景德禅寺寺之门甚雄敬刻云章尊阁其上又於方丈专建一阁以藏真迹实为禅林盛事前所未有也初西晋永康中沙门义兴卓庵山有童子来给薪水後既有衆遂辞去曰吾太白一辰上帝以师笃於道行遣侍左右因忽不见自是始有太白天童之名山在郡东南六十里所太白一峯高压千岭雄尊深秀为一郡之望绍兴初宏智禅师正觉欲撤其寺而新之谋於衆有蜀僧以陰阳家言自献曰此寺所以未大显者山川宏大而栋宇未称师能为层楼杰阁以发越淑灵之气则此山之名且将振耀於时矣觉深然之乃拓旧址谋兴作内外鼎新以次就成智匠高妙务极崇侈门为高阁延袤两庑铸千佛列其上前为二大池中立七塔交映澄澈游是山者初入万松关则青松夹道凡三十里云栋雪脊层见林表而倒影池中未入窥楼阁口非人间世矣中建卢舍那阁尤为壮丽住山三十年其为久远之计皆絶人远甚後有慈航了朴一坐亦二十年起超诸有阁於卢舍那阁之前复道聯属至今岿然相望又大筑海涂增益岁入由是天童不特为四明甲刹东南数千里亦皆推为第一游宦者必至至则忘归归而诧於人声闻四方江湖衲之以不至为歉皇子魏惠宪王出镇一见慈航欢若平生暇日来游頤瞻山林登玲珑坐宿鹭或累日不忍去因图以进於上会稽郡王太师史文惠公又从容奏请遂有四大字之赐瑰奇絶特之观无以加矣十六年虚庵怀敞自天台万年来主是刹百废具举追迹二老而千佛之阁岁久浸圯且将弗支犹以前人规模为未足以称上赐欲从而振起更出旧阁及前二阁之上金以为难师之志不回也先是日本国僧千光法师荣西者奋发愿心欲往西域求教外别传之宗

若有告以天台万年为可依者航海而来以师为归及迁天童西亦随至居岁余闻师有改作之意请曰思报摄受之恩糜躯所不憚况下此者乎吾忝国主近属它日归国当致良材以为助师曰唯未几遂归越二年果致百围之木凡若干挟大舶泛鲸波而至焉千夫咸集浮江蔽河輦致山中师笑曰吾事济矣於是鸠工度材云委山积列楹四十多日本所致余则取於境内之山始建於绍熙四年季秋之甲申才三载告毕费缗钱二万有奇是岁海庄倍稔赢谷三千斛如有相之者不求於人见者乐施以迄於成凡为阁七间高为三层横十有四丈其高十有二丈深八十四尺衆楹俱三十有五尺外开三门上为藻井井而上十有四尺为虎座大木交贯坚致壮密牢不可拔上层又高七丈举千佛居之位置面势无不曲当外檐三内檐四檐牙高啄直如引绳旅楹有闲翬飞跂翼周延四阿繚以栏楯内为绮疏表里明豁自下仰望如此崑阆梵呗磬钟半空振响徜徉登览四山瞰河汉星斗如在栏檻御书金榜巍乎中峙翊以翔龙护以绦绡高出云霄之上真足以弹压山川传示千古善财童子大藏严藏入见楼阁广博无量则不可知若经行四方室屋巨丽殆未见其比也钥奉祠东归尝往游焉惊叹杰特目眩神骇过於耳闻敞请记其事老矣学落不能形容姑记大槩以表吾乡之胜海内好奇之士欲游而未遂者览此则太白之景思过半矣虚庵道价素高禅子向方鳬夷亦闻其名而归之加以愿力深重才刃恢恢巧匠瑰材成此胜事观者无不美叹或请饰之敞曰殫力竭财幸跻登兹行且谢去若丹雘华饰尚有赖於後之人云

安岩华严院记【代仲舅汪尚书】

吾乡僧刹最衆奉川一邑凡七十有二雪窦古道场为冠其次则安岩山也林壑幽邃非余山比出县治三十里創於唐之大历而废於会昌五季汉之乾佑僧清耸义仙入山求卓庵之地登高四望投以一石誓曰石所住处吾其止焉既得之曰此五龙之地居此者当利见大人皇朝乾德钱氏犹在吴越闻耸之名命住杭之灵隐寺号了悟禅师乃以此庵为四明道场尔後寢为徒弟废坏天圣中有老禅伯其名上曰居下与泰陵庙讳同字久住天童山邑有汪居士湜自号静先生以其好佛里人称为汪长老率信士十人力挽师为此来既至尤与居士契合遂相与营度形势迁立寺基相去二百步有蒋宗盛施钱十万凿山平址汪君鸠合衆力建寺宇百余楹殿堂宏敞中严像设康定元年括囊山人志全为之记大率称其地之胜东接奉川西连台峽南临沧海北倚四明言其兴造之速则曰霜暑不再金碧相辉师又自作十方遗戒谓永为十方宗师说法道场语论深切盖凛然可畏人也手植松六千本自葛陂至门约十余里亦有松门记三碑皆居士所立称为檀越主则施财出力为多矣庆历三年赐华严禅院之额外建玉涧流峡望春濯尘四桥中有钓台緑萝望海亭皆为佳境距今百六十余载间有兴作支倾补坏视旧不能有所增益今住持僧无尽俗姓汪氏寔居士五世孙也出或庵体公会下三住名蓝来主华严十年矣念居士经始之勤益务兴起族弟智德舍俗为僧与之勦力有蓬道奥山縣亘三千亩冈垄险絶莽为盗区僻在此山之西德之已业也至是舍入山中别立一庵以谨护守林峦映发又一胜处於北名马迹开废田八顷又以衣盂增置三十亩以贍塔庵尽公既已重建僧堂钟楼等比旧加壮创为舂磴机轮激水为无穷之利又将增广大殿香积地之废兴固自有时居士植福深厚厥後族处双谿为大家其兴未艾岂苟然哉余家久与之通谱视之犹南阮也族子汲与宗党求记於余余笑曰尝观白乐天沃洲禅院记谓晋宋以来白道猷始居此山中间寢荒大和有头陀僧白寂然卜筑遂为禅院寂然谓乐天为从叔

乞为之记乐天系以词云道猷肇开寂然嗣兴今日乐天又垂文兹山异乎哉沃洲与白氏其世有缘乎今安岩大刹居士建立於前无尽嗣兴於後又委余以记余有从子清一方礼尽公为师其於汪氏又不止如沃洲之与白氏也因慨然为书之

径山兴圣万壽禪寺记

径山天下奇处也田双径而上至高絕之地五峯巉然中本龙湫化为宝所国一禪师开山於天宝之初特为伟异天作地藏待斯人而後发道成名震召归长安代宗为之执弟子礼将相不得预大丈夫事继之以无上又继之以法济坐镇羣魔刀斲禪牀而色不动识钱武肃王于微时故吴越累世崇奉尤谨皇朝至道中太宗皇帝赐以御书并佛骨舍利元佑五年内翰苏公知杭州革为十方祖印悟公为第一代住持绍兴七年大慧禪师来主法席衲子云集至千七百衆末年南归重来踰而复振入境相与映发道俗趋仰龙神亦随指麾而定显仁皇后在慈宁宫高宗皇帝在德壽宫时皆尝游幸就书龙游阁扁榜孝宗皇帝书兴圣万壽禪寺又赐以圆觉经解天下丛林拱称第一大慧以来名德继起神龙灵响素着国家民庶有祷辄应累封神应德济显佑广泽王庙为灵泽且有玉圭玉带黄金餅鑪祭器之赐其盛极矣然而废兴有数不可预知国一之後以会昌沙汰而废咸通间无上兴之又後八十余年庆赏始以感梦起废为屋三百楹翦去樗栌手植杉桧不知其几今之参天合抱之本皆是也蒙庵禪师元聪以庆元三年自福之雪峯被旨而来道誉隆洽不媿前人五年仲冬行化浙西而回禄挺灾烈风佐之延燔栋宇一昔而尽异哉人皆以为四百年积累之业一旦扫地有能兴之非磨以岁月未易就也先是寺基局於五峯之间又规模不出一手虽为屋甚夥高下奢俭各随其时因陋就简亦复有之衆为之请曰大慧无羌时岂不能撤而更之顾其势未可兹焉火起龙堂瞬息埃灭岂能神欲一新之乎况祖师之像出於烈焰而不毁开山之庵四面焦灼而茅不伤师与国一俱姓朱氏或疑以为後身比移酱坛涌泉成井今日安知非暂废而当复大兴耶聪曰有是哉微我谁当为之乃出衣盂为之倡率学徒元韶可達等所在缘化两宫加以锡赆施者闻风日集动以万计又命南悟等广募闽浙江东西良工伐木於山日役千辈斤斧之声震动山谷凡食於山者无问比丘优婆塞相与劝勉智者献谋壮者出力夙夜经营不翅已私开拓旧址首於东偏为龙王殿以严香火之奉继为香积厨以给伊蒲之饌延湖海大衆则有云堂供水陆大斋则列西庑此皆一日不可缓寺之所以立也宝殿中峙号普光明长廊楼观外接三门门临双径贺五凤楼九间奉安五百应真翼以行道阁列诸天五十三善知识仍造千僧阁以补山之阙处前耸百尺之楼以安洪钟下为观音殿而以其东西序度毗卢大藏经函凿山之东北以广庠堂輦其土石置後山巨壑中开毗那方丈於法堂之上复层其屋以尊阁思陵宸翰御榻修复妙喜塔亭仍建蒙庵於明月池上为香水海以沐浴为天慧堂以选僧禪房客馆内外周备像设雄尊金碧璀璨法器什物所宜有者纤悉必具不可胜书盖其百工竞起衆志孚应经始於六年之春成於嘉泰改元之夏阅月才十余而变瓦砾之区为大宝坊始者荡废於一弹指顷若甚惨矣及其兴之神速则高掩前古而又雄壮杰特絶过於旧按图而作井井有条云栋雪脊翬飞层叠迴出於烟霏空翠之表春秋二会来者益衆奔轍瞻仰如见化城惊瞿踊跃称未曾有经山於是乎大振矣余尝登含晖之亭如踏半空左眺云海视日初出前望都城自西湖浙江以至越山历历如指诸掌真絶景也为别峯宝印赋诗有百万櫟松双径杳三千楼阁五峯寒之句印为之抚掌且曰山中之景几无余蘊矣是时新创大阁丹雘未

施上下一色如凝霜雪涉二十年犹属梦境今则土木之盛何止十倍恨未能一寓目也聪忽以书相寻於寂寞之滨属以记文遣僧契日携书来见备道始末辞之曰年侵学落笔力随衰子之师愿力宏深成如许大佛事不求於重望雄文之士而为此来何以舛耶求之再三拙庵又助之请遂櫟括其语为之大书且告之曰大慧千僧阁之成一时称为盛举善乎李资政之记以谓在杲公何足道而循习齷齪者以为奇特不亦陋甚矣哉聪之为此初岂有意於兴作者因攸攸之奇变偶人情之响答上资国力广集喜舍时节因缘有相之道以躋登兹是固不可不记以传远然於师何有哉矧国一之初本无可传之法其後瞻礼之衆倾於亿兆财施之广形於千万视之如幻等之於空居惟一室室惟一牀布褐陶匏澣衣粝食其视宠荣震耀何如也聪方以此道行而余欲以言语赞叹有为功德多言益足为赘是故言尽於此师其以为然乎

江州普照院记

余少侍先光禄自洪都舟行顺流而东过彭蠡望庐山开翠屏於空外小泊南康迫於行役不及一至山中历指五老香炉诸峯怅望而行犹意此生可游也老矣遇人自山中来必问泉石之胜或惠以图与记读之若身到其处也住育王瑞公九江人尝以问之最能言受业普照院之详盖院去湓城之东才十五里为邦人游乐之地昔昙珣律师讲经宴坐感白鹿之祥至今有白鹿台台下即此刹晋义熙中远公与十八贤结莲社於兹山而於山巔水涯建立法幢甚衆此盖其一也虽非深入庐阜而面势殊胜前横大江江中桑落洲正与之对亦为一古刹中更兵火荡为榛墟绍兴初僧崇信始诛茅结屋而徒弟普诚与嗣子师瑞师绍师义师卿相与募缘兴建已而正殿廊庑法堂寢室轮藏三门钟楼佛阁庖湑等处无一不备瑞公自以土木但为有为功德出而游方以一大事为己任首住舒之兴化移浮山未几被命来育王时佛照光禅师自径山乞归来居东堂瑞其高弟也既嗣法席父子更唱迭和相为引重衲子云集因念受业香火之传犹有未满足人意者罄衣赀度智日智月等十僧使相其事为经久之计增田以待云水高人是刹之立几七百余载既废而复大兴岂无数耶瑞公清介孤高而未尝为矫厉之行道俗归重故能一坐大道场至於九年略无魔恼已而退居西塔又复累岁一日语余曰出本无心住亦随缘拙庵既已示寂吾将归老於前山山间素无碑志愿为之记将归而刻之噫余既无由杖屨相从以酬素愿纵到山中胜具亦已无有矣师之归度无再见之日庐山面目终不能复识既为书其始末又重为之恍然也

魏塘大圣塔记

僧伽本西域人唐龙朔中始来中国於泗州临淮县信美坊乞地建标欲为伽蓝掘得古香积寺石记并金像一躯上有普照王佛字或言师顶有一穴室之以絮夜去絮则香满一室质明香还复室之万回异人谓观音化身也示寂於长安以有灵应迁还泗上为之建塔传於世久矣钥先祖少师年四十而守家传其显应事甚衆陈子充大光了斋之孙貳卿之子与余家有连比任太府寺簿余方为郎相与尤厚余既投闲而子充亦挂衣冠矣忽以书来云先侍郎自绍兴十二年南兰陵解郡组延平既无先庐无所於归始谋禾兴之居侨寓魏塘大圣院六年始得今竹桥之宅院以大圣名中有瑞像灵异几不胜书盖自治平绍圣时屡发妙光其明属

天图志实载之至今水旱灾疫必求於此祖父谏议尝因从兄默堂绘像而为之赞所谓一月在天影分万水者也方寓居时祖妣尚无恙泊吾二亲阖门敬奉皆所亲见久思有以崇事之老僧清楚戒行坚洁一夕梦僧伽欲建塔於寺中既以实告适符愿心自淳熙六年竭力为之经理岁捐百斛以为助今将二纪土木之工悉已就绪其高七层塔心相轮以次而举指日可毕愿为我记之余方病足僵卧一榻酸呻无聊未能属笔隔岁而相促不已余昔诵韩文公诗僧伽後出淮泗上势到衆佛尤魁奇且有突兀三百尺之语东坡之诗云不嫌俗士污丹梯一看云山绕淮甸乾道间以假吏过泗但有火烧水转扫地空之叹而已盘沟小像之在吴门人犹敬之不谓殊特之观乃见於此子充疎财好施既以轻视轩冕不问家之有无独於此举惟力是视倡率衆施成此胜事三请之勤见於罗雀之门与世异好如许余亦不得而辞也

仰山太平兴国禅寺记

仰山天下之胜地也虽未曾一至其处读韩昌黎之文而知山之有神阅传灯而知小释迦之开山二神萧姓释迦之来实有灵响迺山为寺又能陰相默佑招致檀施以至於今迦之道愈高山之神益灵山之名以日着环袁之境旁及四邻之外水旱疾疫必祷而奉香火者尤衆其详又见於孚惠二王集録寺兴於唐会昌之元至皇朝太宗皇帝赐以太平兴国禅寺之额仍赐御书栋宇之盛甲於江右自迦至今凡三十有七代矣嘉定元年闰四月三日不戒於火延燔殿堂楼阁三百余楹尽为煨烬兹岂有数耶太守寺正余公谓一郡倚此山为命当有以兴起之亟捐金钱三百万首建法堂及二王之殿户部尚书赵公为建僧堂三间且为之主盟知隆兴府待制赵公前後施钱亦三百万作佛殿住山清公率其徒持鉢四远闻者乐施不数月佛殿丈室香积廊庑尽还旧观而焕然一新则大过之呜呼又何其神速也余侯以丞相之弟平易近民既已成民而又能致力於神尚书歛泽民之惠袖活国之手归而燕居助成大事连帅又出俸余为之倡率清以一衲度寒暑顷在净慈孝宗知其名召对而赐之颂至今土木形骸不改故时四人者相与敬孚惠之灵神兴释迦之名刹一废一兴殆不偶然清属予为记记其大概云尔神有二祠去寺远者一舍近者才五里而寺亦祠之释迦讳慧寂初来自郴余侯名应诚尚书名善坚待制名希恠清自号简庵余四明楼钥也

攻媿集卷五十七

卷五十八

钦定四库全书

攻媿集卷五十八

宋 楼钥 撰

记

新昌县丞廳壁记

余表弟汪履道得中丞新昌寻前任人名氏自绍兴末年得李君结而下凡十余人以壁记为请报之曰昌黎蓝田有记尚可着笔乎书再来曰蓝田之文诚美矣殆有激而言不然既曰於一邑无不当问而崔斯立乃曰哦二松之间丞果谁负也我先人季父及吾兄皆尝为之率以勤干貳其令有声於时是邑虽小思继家声庀职以来勉於所事日不暇给追科讞狱凡邑之寄大府下之县必属令丞谓之知佐簿与尉或不预也侵官固所不敢敢慢官乎求丞之职又自有常平雇役经制等缗钱动以千万计境内河渡水利等事固已不胜应帅垣部使者萃於越委以吏事文符旁午又时奉檄以走它郡会邑大夫更易掇承久之惟恐无尺寸自见以及吾民诚知古今事不类人才有高下顾虽欲一日扫溉之暇不可得未可以蓝田之言为当然也余读书莞然曰子之言有理勉旃其以此记之

钱塘县廳壁记

钱塘古都会繁富甲於东南高祖南巡驻蹕於兹历三朝五十余年矣民物百倍於旧负郭二邑事体寢重他郡邑莫敢望绍兴二十七年有旨钱塘仁和比开府祥符两赤县中书择才授任秩满许以陞擢於是选任又重仁和乃钱塘之分故钱为尤重焉旧治在钱塘门内寻入景灵禁籞乃以华严僧坊故址为之在国庠之西南邑钜事丛才者或病之绍熙二年宋君价始至兴滞拨烦坐以无事首作夫子庙以崇儒风建狴狱以清囚禁因又裒彙前任人名氏将刻石以记县既甚古蒐考史传自宋元嘉中刘道真至吴越罗隐凡十人国朝张君房而下抵今凡三十九人具载岁月亡者缺之使後有考焉君实景文公四世孙风流未远儒雅饰吏敏於从政故其施設知所先後如此钥与君素有姻好喜君之优於仕也为之记始末而又告之曰壁记不可无也然县令去民最亲贤否不可得欺彼卓太傅元鲁山诸公着於民心千载犹不忘盖有不待碑而後传者君尚勉之

沿海制置司参议廳壁记

四明为东南大邦海市三垂北通海岱东控高丽日本诸国高皇南巡驻蹕临安尤为控扼要地始置沿海置制使寻命守臣兼之凡闽浙淮东濒海之州皆隶焉後分道置使乃专领浙东

四郡检校少保郭公仲荀徽猷阁待制仇公忞皆尝领之仍有参谋参议官绍兴三年二司俱罢隆兴元年海寇猖獗户部侍郎赵公子瀟以敷文阁直学士出镇复兼置制使以重其权独置议幕非老成资高者不在兹选於是张君大年始为之五传而至先君先君尝以军器监丞兼摄起部出守括苍倦游念归遂仕於家又阅八人至今吴候候一日谓钥曰时平罢警幕府虽省文书然制司任重为之参佐敢怠其事将刻石纪前任人名氏自隆兴始且子之先君尝为是官矣子为我记之候尝为鹅城濠梁二守有能名精神未衰才力过人此职虽无以表见然尝造其公宇前日支倾挂坏之不暇今皆焕然又有余力以及此临事类不苟识者多称其贤钥既与候游又因得以不肖姓名托先君之後遂谨书之

昌国县主簿厅壁记

昌国明之属邑实海中一大岛也以山经地志数家考之唐开元二十六年七月十三日析越州鄞县置州仍置奉化慈溪翁山等县大率多析於鄞明今为庆元府鄞复为鄞翁山即昌国也大历六年三月四日废於袁晁之乱故唐书地理志元和郡县图志止列四县曰鄞奉化慈溪象山而图志於鄞县云翁洲入海二百里即春秋所谓甬东越灭吴请吴王居之者也其洲周环五百里有良田湖水多麋鹿图经翁山一名翁洲十道四蕃志云徐偃王居处城基犹存皆今之县境也皇朝端拱二年始为盐场熙宁六年部使者以蓬莱安期富都三乡与鄞县隔海请置一尉以司鬬讼盗贼事王文公尝为鄞令创县赐以今名元丰元年又割定海县之一乡隶焉初以邑小惮费以尉兼簿领之职隆兴改元海寇猖獗郡守尚书韩公仲通奏更置武尉而职始分邑之未立一尉独尊承平民有余力官舍壮丽他邑无能及者而簿厅始因草创久觉弊陋居者惧将压焉累政欲为而力不逮庆元二年平阳杨君既至慨然欲一新之既数月公勤敏明孚於上下尝试为之图郡造浮梁邑有余材君请得之捐资调度邑人相与分材効力不劝而集鳩工於三年初夏落成於十月之乙未为厅三间高广加於前数尺阶与轩称是徒厅右之神祠於左廊庑吏舍一切更造木工一千五百有奇役夫二千优与之直费钱才千缗父老争持酒币以犒工役喟曰民不告劳而轮奂如此何其神速也始余官於朝故人刘闲叟峤云以书来曰外子杨正臣欲附计台一试望有以惠顾之已而中其选遂登绍熙元年进士第钥也初一见而奇其貌与文今又益知其才矣余鄞人也而未尝涉海第闻出定川蛟门山水天无际风帆迅驶穷日而後至昌国故虽有宝陀安期蓬莱之胜愿游而不果惟邑人往来诵杨君之政至不容口发轫之初临事不苟如此远业殆未可量也邑士请记其实且曰杨君将去不可以无传故欣然为书之

庆元府通判南厅壁记

郡县丞虽不侔然位高而偏大率如蓝田壁记所言余顷赘倅丹丘问於故给事吴公芾公曰吾尝三为之进则有侵权之讥退则有避事之谤余曰处於材不材之间可乎公曰子得之矣庆元於今为辅郡贰车有三分东西南厅而南为胜城中一湖最为絶境公宇据其阳尽得十洲三岛之要旧为榷酤之所至今犹以名其桥南渡增员始以居此参政钱公重建红莲阁於前运使杨公大兴厅圯然二厅皆有题名此独阙焉今董君尝入制幕先君工部时为参议官同僚颇久乐此邦风土别驾车以来既至首欲编前任名氏登之石以序列见属病故相仍三

请不倦遂为之书并以所亲历而知者告之君之大父资政在思陵元帅府为名臣家法流传犹有世臣之风只此一举足以见居官之不苟淳熙初魏王易镇罢倅贰而置长史司马之职故更六年而後叶君以太社令员外置云

钱清盐场厅壁记

钱清镇去绍兴府四十五里而近有江曰浦阳盖自婺之浦江发源浦江旧名浦阳也唐志载越州有府一曰浦阳乃府兵之府城基犹在有桥曰隐兵而钱清之名则不知所始相传以为钱武肃王诛董昌於浮梁因以得名然近尝发土得灵助庙舍路记乃会昌中碑已言钱清则名已久矣昌传言执昌至西江五代吴越世家又言西小江岂正谓此江耶或言後汉父老持百钱送太守刘宠各为取一大钱以此表其清云熙宁间部使者卢秉论盐课云越之钱清场江水清淡以六分为额不言三江曹娥两场老吏云崇宁改盐法始以钱清分为三场场基堆阜四环乃旧教阅之所今犹目为教场亭民本九十余户户每月出盐一席豪民既侵夺其地邑胥又多方渔猎之复有私贬通注之扰仅余三十八户而额不减使之均出是以重困四五十年未尝及额而逋负愈积矣从弟镛孤苦力学久处上庠幸取世科顷尉东阳颇着能声转而为此不敢不谨抚存亭民既为之剔蠹疏源又间为之代税输三十八户欣然如更生而课亦随羡遂加增九分有奇廨宇建於崇宁二年适百年矣虽颓敝之甚高宗幸四明略尝驻蹕其中镛为一新之仓使得十万钱而为屋三十余楹宏敞雅洁什器俱备使亭民之解事者司钱物之出入官吏皆不预居民仰叹以为前未有也又尝为府中修山陰两乡海上石堤八百丈土塘千三百余丈添创两埭造南岸大石桥以便往来亦可谓勤矣去替止三月以书来求壁记将书前任名氏岁月之详因为取其大槩并记之庶後來者有考云

池州教官厅壁记

秋浦为江左名郡齐山九华之胜人物秀发又有李太白杜牧之遗风庠校之兴有自来矣吾甥永嘉卢申之祖皋力学继世科为郡博士其行也求赠以言申之俊而好文进学不待劝勉特以其少立而自立将为人师虑鲜琢磨之益大书无有师保如临父母以遗之之官未几则闻教育有序矜佩向风以书来求壁记告之曰余尝客授子之乡矣学无止法学然後知不足教然後知困古人之言其旨深矣非真知学者自以为足非笃於教人者亦不能知困惟敦学半传说之说本以勉其君而学记以为教学相长此又一说也今之教者不待问而讲说又所从事惟举子业虽皆非古之道然励志於学当自知其不足用力於教当知其困不足与困子当自知之非余所能告也试书诸壁以铭座右且将以告後來者

攻媿集卷五十八

卷五十九

钦定四库全书

攻媿集卷五十九

宋 楼钥 撰

记

慈溪县兴修水利记

慈溪本以东汉孝子董君得名溪今在大江之南江之发源自越至上亭而分一贯邑中一环邑前已复合焉县之西北有水出羣山间迤而东来未至县五里所抵彭山而入於江濒江旧有闸启闭以时遇霖潦则泄之瀦其余以备旱暵西乡实受其利又通下流以入县水势朝拱映带左右合於陰阳家言亦犹它山之於郡城也昔人创邑之初为长沟於井市横三纵四其间二者如带之垂为梁於上而通舟於下堪其南而立斗门於东呼吸江水脉络通贯按其图大槩如古浚洫之制岁久闸废水无所蓄旱则仰潮汐乍盈易涸民劳滋甚县河浅淤菰蒲丛生居民因侵其旁艺木筑室日就湮微雨集则溢溢沉垫已则污秽停滯气壅不宣多起疠疫岂惟不足以供灌溉之须年来县一再火延燔数百家环拱而莫之救病又甚焉邑无丞水利之职簿实司之盖有欲为而不能遂者会今郡侯岳公方提举常平事按行郡邑首询利病县人合辞有请乃下其事使亟图之主簿赵君推迹本原慨然欲复其旧告谕父老训率子弟莫不劝趋凡田於西者亩出钱三百首建闸於彭山先为长堤以扞江潮撤故闸余址悉以石为之长十有一寻广四寻中阙丈有二尺肩以层版经始於淳熙十三年之春秋七月讫事费钱百六十万为工五千里筑四埭以障支流西乡之利既兴遂修斗门复捐金钱为之倡二者皆坚致精密比旧基有加焉十月初吉又为濬河之役赵君譬晓明白上下交孚於是家自为役不待程督愁霖之余开霁踰月若有相之者尽撤壅蔽始见故道攘剔浚治工不告劳河广一丈五尺深七尺中间广二丈六尺深如之引西流而灌之緑波汪洋舟楫通济又可以溉邑下之田易去横约增重河梁百年旧观一旦复还如人之身气血滯郁疾疹随生医巧药良导之流通则举体和畅精神自倍耄穉杂然相贺且曰自今以往吾邑其庶几乎赵君佳公子也种学绩文以儒科自奋天资闇敏吏事极不苟二役之兴皆成於同僚协谋不掣其肘更选里士之才而公者以司会计不使吏预其间故财不蠹民不扰一箠不施而利兴害除可传永久咸请记之余观古循吏剖讼解纷功止一时惟水利之兴则可以惠民於无穷熙丰间非不务此然而扰民之害先见则奉行行之过也善乎苏颖滨之论曰事起无渐人不素讲未知水利之所在而先遣使者兴事至此盖已甚劳皆切中当时之病恭惟皇上求民之瘼如恐弗及一以此事委之州县而命部使者督课之是惟无作作则实利及民赏不失劳所在底绩由今之法良有司奉行惟谨而佐邑之贤又有如赵君之整办迟以年岁所济多矣後来者尚有以增缉之哉赵君名汝积字商卿汉恭宪王之裔熙陵八世孙也

荆門軍義勇甲仗庫記

文武無二道有其事則必有其備古之義也荆門王使君銖之為郡也思不忝於先烈竭力從事有聞於時始至問民疾苦皆以財殫民貧奸豪得志逋逃為孽人不奠居為言君曰是當有以次第為之汲蒙泉以釀酒而利入日倍垦荆榛以為田而旷野以辟括隱戶以增官賦務農功以勸本業崇飾學校旌賞孝悌嚴釋奠之禮勸獎士子以興文風以續先參政之墜緒鋤治豪強修飭火政明賞信令以制逋卒盜賊之尤無良者遠斥堠教義勇又能凿頑石甃通塗增置郵傳以便往來謹邊鎖絕支徑申嚴法禁以謹泉貨才智有余而精力足以行之諸司咸以最聞可以少休矣一卒以狂醒殺三人捕得立誅之以聞上尤嘉嘆以為無罪可待威名流聞奸究屏迹載念郡當荆楚之郊倚義勇以為重在尺籍者四千人顧視所用器甲之屬名數虽具在而積久不用位置無法率委於郡治廊庑滯壓朽腐兵氣不揚君既親行都試以作其勇且曰兵不犀利與空手同甲不堅密與袒裸同是非置之高爽之地民居多茅茨萬一延燔則又將埃滅而無余矣乃度基於郡之西北虛旷凡百余丈繚以周牆阻以深溝計工與材以聞於朝有旨下總司千金谷以濟其須淳熙十五年八月庀役不閱月告成為屋若干楹厅事居中置樓於門兩庑翼如也使君為政抑可謂知所先後文事武備無有不及者足以為保障矣荆門多古迹義勇之士服習教法持利兵以賈勇望高陽之長阪其亦有慕張益德之橫矛拒敵者乎幕府翰墨之士登斯樓也挾清漳之通浦倚曲阻之長洲其亦為有仲宣之賦者乎使君其進之

泰州重筑扞海堰記

東南堤防莫盛於淮東扞海之堰堰在泰州海陵縣北一百五十里起唐大历中黜陟使李承自楚之鹽城南入揚州綿亘通泰之境不惟蔽遮民田亭竈附衣尤利鹽事至天聖初范文正公又宏大之徙堰少西以避海濤之冲發運使張綸轉運使令狐儀實主張是亘一百四十三里有奇甃其外以為固置兵五百人分列五寨專典繕修崇觀之後始充他役乃無一人守者宣和堤決坏田三百余頃紹興七年又坏堤几半越二年始修成已不如天聖之堅密厥後提舉朱冠卿知州事徐子寅張子正魏欽緒皆因坏增修子寅又請鹽場官分視扞堰各守其境淳熙十三年提舉趙玘相河所冲曰六澤浦甃而新之壯於旧三倍且柵其外十三里更創夾堤六里於桑子河其餘增卑培薄悉還旧觀慶元二年二邑之民又以病告謂晏溪河東有土月堰下臨海洋了無涂泥為之固护地形就下紹興以來四經移筑民田之墊於海者十五里冲損海陵堰身六里余如皋亦坏十余处近益損甚提舉王公寧覽之惻然亟命知海陵縣陳之綱相視利害請移入二里重增九尺基厚二丈九尺面減五尺又遣扞堰巡檢劉正志量度會計創立基址計三十四里一百九十四步用工二十八萬公按圖察之謂西接范公大堰若不及今移筑則堰內之田當為斥鹵且將浸淫旁及橫流四出為害益大亟以奏聞且言水政臣職也敢憚改作所費虽重撙節財用銖積寸累愿就茲役不敢以煩朝廷仍及仲春農事未興之時亟圖之正月甲子剡上凡再旬而得請遂以某月某日庀役至某月某日崇成既訖事再招海清兵士百人分置五寨兴窑燒磚以為後日繕修之備仍檄之綱偕干辦公事趙不熄董其役公亦躬為一行凡用若干工費錢米若干民大感悅而王公不自以為功也告成於朝廷一秩以寵之太守沈公坦走書於鈞曰扞海大堰虽跨數州而泰之利害犹重今日所修則

全在下二邑赖贤使者一力为之民既不知役凡我同僚亦皆蒙成而无预请记之钥因为之考图经旧记而得其实则作而言之曰美哉斯役也范文正兴千载之大利苟非後之贤者相与扶持之亦安保其不坏自兹朝廷之上皆如今天子之垂意为部使者为郡将皆如王公之用心虽至於无穷可也钥与王公尝同朝稔知其文章政事之絶人试郡永嘉实继沈公詹事之後泰州其子也治办有余尤为王公所知乐其有成欲以传於永久钥长子淳方以一尉出二公之门故不复辞而属笔焉

余姚县海堤记

余姚为绍兴壮县岸大海者八乡分东西二部绵地一百四十余里旧有长堤蔽遮民田孝义龙泉云柯三乡沙涨土高无风潮冲决之患开元东山兰风梅川上林五乡间有阙坏实为民忧其东自云柯而北至於上林为二万八千尺庆历七年县令谢景初为之王文公记之今自上林以及兰风四万二千余尺庆元二年冬知县施君宿所筑其中有石堤四所计五千七百尺者又其所创建也邑人求记於余谢之曰令尹之功力固倍於前人然前有文公之记何敢为第二碑请不已则又曰文公之文不可及姑以记今日之实则可尔余外祖汪公少师宣和中尝为是邑修烛溪之湖建承宣之亭其後伯父从兄皆尝为之妇家王氏自尚书而下四世寓邑中熟知海堤之为害而近岁犹甚大率岁起夫六千夫役二十日计工一十二万费缗钱万有五千夫力或不均弊孔百出故劳费如许民力不堪曾不足以支一岁而又往往荡去矣施君始至问民疾苦咸以此为大病亲往视之询究利害乃得要领导乡豪之首公强干为人所信服者十五人分地而共图之尉曹赵君伯感协力攸助必欲集衆力以扞怒涛谋久计以苏民瘼承平时提刑罗公适知县秘书丞牛君尝以石为之今既百年旧迹远在海涂中则民田之侵多矣先因修筑搜取涂中旧石创筑二千七百尺用工二十万三百六十以蔽东部之田惟西部三塘以绍熙五年秋潮为菑故堤荡尽为害甚酷乃於谢家塘王家塘和尚塘三处度为石堤通计三千尺尤当海水突怒之冲乡民赵明释子行球董其役约费甚重邑不足以供列於府於监司提举常平刘公诚之深主其说首助谷三百斛益勉为之凡所陈请率应如响通守王君介干办公事王君柄左右尤力令得恃以展布堤高一丈石厚一尺为一层用石至三万尺县出缗钱四千三百有奇邑之士夫与其乡人助三百万工力尤重费犹未足也兹事既成则并海之田始尽可以无虞矣前者惟知修筑弗思守护之策随补随坏迄无宁岁况堤坏有渐特人事有所未尽尔冬而起夫春始兴役因仍粗毕姑以办闻日隳月损无肯出力蚁穴尤能溃堤况秋至潮起其坏必甚亟科近堤民夫为之救捺农事方殷青黄未接安有财力以为久计今则四邑官分季临视庙山三山两寨官月遣十兵巡其上乡豪又伺察之堤苟有阙即以闻於邑随即补治其视荡然而後为之者岂不相万万哉令犹以为未也谓不有以为千百载之图终恐不足以继而前功寢隳矣於是又议建一庄约为田二千亩始得上林海沙田二百三十余亩又得东山汝仇湖外之地六百八十三亩龙泉有桐木废湖素不蓄水得七百四十五亩三者凡为田一千六百六十八亩皆出官司之相视不妨公不害民收地之遗力俱有水源以为灌溉募民耕垦假以资粮菑畲新地皆成阡陌得禾稼实利以助费又将益求旷土且以其收而岁增之以足二千亩之数筑仓於县酒务之西专储粟以备修堤之用岁省重费民遂息肩浮土为千金之堤斥卤化膏腴之地传之将来利顾不博哉刘公又备邑人所请奏之九重白之庙堂及当路诸公乞以此庄之田依常平法不许他用仍禁官民户之请

庶可经久圣天子加惠田里诸公相与维持其说亟下俞音曾不淹时令率吏民祇拜明命刻之坚珉以诏後人今之宰剧邑者簿书期会日不暇给水利等事遇有急阙趣了目前其至诚爱民有不可解於心而才智足以行之如施君者几何人施君湖之长兴人实司链之子司链用不尽其才齎志而歿君能世其家下车以来百废具兴饰以儒雅整办有余铢积寸累以图此举中间易地之行咸恐败於垂成及其来归为之愈力百年之害一日尽除去岁他邑告歉而此独丰海田几於倍入明效大验今已如此宜乎邑人歌舞之天下之事害不极则利不兴若有数然民困已甚令以深长之思而兴民庸部使者之贤建白甚明圣朝勤恤民隐遂跻登兹非止人力也後之人守其成规随力补治虽至於无穷可也因作为诗章命邑人歌俾之勿壤歌曰

舜江之为邑兮居越之东八乡濒海兮水浴日而吞空古有长堤兮庸蔽遮乎一同人力有限兮海涛之来无穷涛来如山兮日相撞春一有阙坏兮苇不可障而泥不可封民将为鱼兮良田垫於冯夷之宫岁月劳费矣民告於鞠凶万五千之缗钱兮十二万之民工惟令之贤而才兮有尉曹之和衷筑土累石兮折彼波臣之冲矗如长城兮缭如万丈之晴虹部使者主盟於上兮飞章彻於九重仰明圣之恫矜兮朝奏而暮惟人欲之从垦田倍於千亩矣藏其收於廩中禁豪民之侵渔兮虽巧取而弗容化斥鹵兮土膏隆隆变歉岁兮为年之丰良耜耒兮多稼芄芄获之积之兮将栉比而墉崇歌以讯之兮乐石是砮赤之相告兮永无忘令君之功惟後人之勉勉兮用心以公视此堤之关兮谨为之弥缝念经始之艱难兮尚图功於厥终

象山县渡船记

象山为邑海市三垂汉志鄞有越天门山輿地广记谓即今之东门山也唐神龙二年属台州广德二年始属於明元和郡县图志亦言本汉鄞县地神龙元年监察御史崔皎奏於宁海县东界海曲中象山东麓彭姥村置县惟西南有陆路接台州宁海二说微有不同而郡县志加详焉志实李吉甫在相位所上吉甫尝为明州长史宜得其真今西北至庆元府水陆一百六十里中有一渡之险若由宁海陆行则回远倍之故多已渡为便渡实支海南曰陈山去邑十五里北曰东宿皆潮退而行中途少憩海口俟潮登而後善達旧以小舟往来多有风涛盗刼之虞隆兴二年今资政殿大学士赵公彥逾主邑簿始创二大舟颿檣篙櫓器用毕备募习於操舟者月给之分置二渡以便行者晏然如在枕席之上所济不知其几邑人至今歌之钥尝侍公坐问何以能办公曰句稽之职安得有力及此偶郡委以征商事旧例商贾以钱输官以十之二为导行费既首蠲其半以惠之余分给胥辈因置鰲箒而谕之曰前日公用有例今一切不取尔曹得百金则以一钱真其中仅二年余所积已多矣因首以修朝宗碑又助邑之敕书楼与邑庠遂以为此二舟皆躬自督课费省而工倍人乐为用故能办耳钥为之三叹试吏之初孰能用心及此今日勲在社稷岂苟然哉公去既久寢以隳废而一舟先坏间有修治往往因陋就简不可支久撤旧增新并为一舟行旅不堪濡滞而私渡出焉未免复有覆溺者庆元四年六月承直郎韩君元礼为宰访问疾苦耆老首以是告谋欲遵赵公之法而兴起之鳩工度材即以八月先造一舟其长七丈广二寻十一月既成又以次年之冬葺治旧舟去朽易坚色色鼎新几於改作至今年二月毕工修广之度视前少杀之若什器细大篙师名额悉循古规又月委官僚以次提督用防奸弊功就而民不知邑士请纪其事钥以谓赵公济川之功

未易遽及今令尹忠宪裔孙雍容办治维此一举仰有以继赵公之成绩俯有以为一方永久之利赵公名遂身退卜筑城中亲见其成喜形於色尤为一段奇事夫子产以与济人於溱洧孟子以为惠而不知为政今前後邑官之贤盖能知为政者惠及斯民如此後來者苟能垂意而不忽二舟之利其有既乎陈山有驿以为宾客行人弛担之地将刻石驿中以诏後人慨然为直书之以补吾里地志之阙云

攻媿集卷五十九

卷六十

钦定四库全书

攻媿集卷六十

宋 楼钥 撰

记

范氏复义宅记

吴门范氏自唐柱国丽水府君居於灵芝坊今在雍熙佛寺之後五世孙文正公少长北地皇佑中守杭始至故乡访求宗族买田千亩作义庄以贍之宅有二松名堂以岁寒阁曰松风因广其居以为义宅聚族其中义庄之收亦在焉中更兵毁族党星散故基榛抚编民豪据为居室为场圃僦直无几甚失遗意粟无所储寓於天平山坟寺倍有往来给散之劳久复圯废改寘城中反寄他舍病此久矣自公长子监簿而下又五世而至良器一日谓二弟曰先君奉议念此有年齎志而歿吾侪当有以振起之慨然自任思图其新於是历告居民尽除僦直约期而遣之不服者诉于郡于监司以至上达台省提刑临川何公异太守四明郑公若容咸义此举力主张是复得故地周一千四百四十八丈首捐私帑繚以垣墙创建一堂仍扁岁寒以祠文正结屋十楹以处贫族就立新仓寢复旧观庀役於庆元二年之季夏仲秋告成不愆於素观者无不叹息亲掌出纳一年以为後式选族子之廉谨者二人继之详具要束以补旧规揭於堂上且刻田籍於石以为永久之计介季之柔续世科於百二十有四载之後尤勇於义既力赞其兄谋之属钥为记始末钥不佞先祖少师收恤宗族有意於此而岁不与伯父扬州始为之虽不及文正公之盛而寒宗之贫者赖以自给亦四十余年於兹先工部欲附益之而清贫终身犹未果也见范氏家法为之媿叹是举也衍文正公累世之遗泽伸先奉议九原之余恨又以绵范氏无穷之休岂不伟哉呜呼文正公奋身孤藐未尝赖宗人毫髮之力既达则阖族受解衣推食之恩天佑范氏三子鼎贵皆以宏才高谊上继父风後人得维持凭藉以保其家良器以布衣而决意兴起不惟义宅载新义庄亦复整饬剔蠹省费又为数世之利用心如此後其兴乎呜呼文正初立规矩止具给予之目仅设豫先支请之禁不数年忠宣公已虑其废坏故治平奏请圣旨违犯义庄规矩之人许令官司受理又与右丞侍郎自熙宁以至政和随事立规关防益密今之规约又加密矣一门同姓为此义事其难如此而况天下之大思所以为亿万世之计者又可忽乎呜呼衣冠之族不免饥寒者甚衆愿如范氏之宗派而不可得今坐享饱煖者几人若人人如良器用心更相扶持以永其传则善矣若曰是我所当得者而不思自力甚者反为蠹於其间则文正诸公实临之其闻於有司曰公元者盖今之族长云

汪氏报本庵记

惟四明汪氏代有隐德上世葬城南之俞村钥汪出也尝随拜扫裴回松下顾瞻前後中有一

丘隆然奇峯遥峙秀水萦抱磬折面势冈阜非若近时积土平田强为丘垄出於人力者比气象秀润真吉竈也是为外高祖大府君之墓府君以才选为吏古君子也终身掌法一郡称平范文正公王荆公皆以士人待之我高祖正议先生为之志铭盖积德之尤着者是先生奉四先生而汪氏之衣冠始於此钥生长外家逮事外祖少师二十余年亲见孝友之懿奉坟墓尤谨遇忌日必躬至墓下为荐羞之礼遂为汪氏家法仲舅尚书恪遵先志不敢少怠而增色焉俞村之墓始於十二府君其子若孙葬於左右也凡十余所迨今百七十余载矣冢舍三易岁久易圯仲舅投闲既久度不可支吾乃营基於松楸之东辍费於伏腊之余鳩工两月而告成为堂三间後出一间并为修祀之地前为轩如堂之数可以聚族列拜两庑凡六楹前又为门及享亭以淳熙十二年三月二日奉神座於堂之东室宗人虽坟墓在远遇清明必合而祭者凡数十人列於其次规画□悉一一亲授以板为障而平其前祀则取以陈祭器临事可不移而办下至庖湍罔不备具靡钱五十万一力为之贍莹旧有田初出於诸院其子孙间有生计凋落视为己业而私售者久不能制於是积累细微益以俸入以元直取之用供僧徒岁仍例卷命族人迭掌祀事其器用则分任其责且为出谷以助他日尚将益之庵成未有名梦中若有告以报本者公为之恍然遂以名之正奉始卜葬西山少师兄弟皆从仲舅大为基阡甲於乡里又以外祖母福国之先壠在奉川桃花隩王氏既不振亦为买田建屋以奉香火凡其先冢域至是无所不备可以传远矣钥既得归日侍函丈一日顾钥道始末使记其详以诏子孙惟我舅氏克振家声光绍前人以燕後叶庵之落成时年六十有八矣诚孝不衰而又精力絶人克勤小物壮者有所不逮皆可谓人子法遂谨书之後人能不坠少师尚书之意汪氏之兴殆未艾也

长汀庵记

楼氏自周武王封夏后氏之後东楼公於杞实始得姓後有食采於娄者因以为氏或着楼焉东京雍丘县即杞之旧故亦称杞县楼氏以杞国为郡而望出东阳虽闻吾族自婺而迁不知所始自钥一行推而上之至八世祖而止惟曾叔祖一十五助教墓志云六世祖自婺迁於明是钥之九世祖也又不书其讳明化院之西南一山坡陲数十百晦上世葬埋甚衆邑人号楼太婆墓亦不知太婆为几世为何姓今坟墓可寻者七世祖大録葬白水雷家隩六世祖二评事葬太婆墓山之中刘夫人葬於西偏相去数十步徐夫人葬明化侧平地盖祖宅之後也高祖十八正议及陈氏和义郡朱氏历阳郡二夫人曾祖三金紫永嘉郡夫人翁氏葬龙潭先祖三少师两守乡郡首尾五年每寒食上冢旌旗鼓吹皆集莹下乡里以为荣少师教授兖州时祖妣秦国夫人冯氏蚤丧葬南山再娶魏国夫人冯氏先卒得地於报国山之左今为仁济院作三穴以右穴葬魏国少师亲写冯令人藏扁榜犹存约他日自居中穴而迁秦国於左晚岁有闽人上官仲恩献金鍾山图得於舒氏尤喜之知平江日病中语诸父曰我死当葬金鍾比薨二夫人葬已久金鍾墓域颇狭至今三坟相去或二十里而远初营葬时四山皆愿求售仲恩亦劝之五伯父曰人其谓我家乘势并包非先志也仲恩叹服且曰第三虎山不可不买可以为庵其实庵後亦一穴也少师龙虎二山皆平正如画至江而止龙山之前俯临沙洲相传下有金鍾曾见光景今神龙居之亦圣迹也俗谓江水一段为一汀近金鍾一汀最长弥勒每浴其中号长汀子故地名金鍾而庵名长汀少师薨於宣和五年至七年岁在丙午而葬今且八十年矣先君银青卜壽於於庵之後荷诸院相从尝买邻山以葬亡弟鎬壽穴正在两山之

间坐艮向坤面势环拥下直金鍾之洲前有一峯钱令公葬其下号令公尖为山五重惟此峯中立深秀正与之对自他处视之俱不如也先君以淳熙九年十二月十七日卒於仲兄严州郡治以次年九月二十日大葬庵之右屋适在其前虽不碍前山而神道门起於谿次不能相望为曲径以入是时以仲兄继亡无力改造先妣年已七十有四亦不敢轻动因仍几二纪嘉泰四年正月九日先妣下幸弃诸孤荒迷哀苦之余卜以腊月八日丙申襄事谋之羣从衿哀负土决意先期移建冢舍以八十年左支右吾之屋撤而新之旧木之可用者十无二三又迁基於左半在田间筑叠尤费工力幸及大事之前粗毕工役为屋三十余间造石桥三所材良工致庶几可久於是始得神道坦平墓与门直列植櫟桧移置石兽等平楫前山气象愈伟少伸兄弟夙昔志愿皆祖考陰佑之赐宗族相成之力也祖茔松行有干霄合抱之材然侵耕者多亦有枯瘁稍正疆界又补其阙别为屋数楹於外以为廡廡是役也虽出於一力而事实关於诸院已戒僧徒日谨焚修以资冥福若羣从及子弟扫松沿干而至者自当馆谷於此如挈家寓处或封寄什器必至触污冢舍非奉先之本旨自兹幸无启此意亦宜相与戒飭仆使一竹一木毋庸侵犯斯有可传之望前辈言子孙以仕宦不能自守坟墓而使人代之故守墓之人不可待以奴隶而况庵僧乎此庵始建僧希亮入主之三十五年传其弟子本权权住三十年又传妙悟才三易人俱善於其事後來者宜善待之

李氏思终亭记

淳熙八年岁在辛丑钥预考南庙试蜀人李君子思以审计司聯事先已固已得其江东十监读之一见如平生欢既而出所着易解相与讲明警发为多竣事钥叨丞外府君代主宗正簿钥寻丞司宗方以同僚为幸而君忽焉亡矣哭之尽哀且与诸蜀士经纪其家君之父年已八十诸子皆幼吊者无不伤?送其西去哭以二诗殆不胜情今三十有二年矣间者阔焉不相闻知庆元之初钥既投闲明年閱登科记见君之子道传在乙科又一纪而复来则已闻其召命同朝五年寢登馆学上着庭掇考功时时相过以先友故厚我其季性传又擢嘉定四年第来见独未识长子心传闻其尝名荐书一不上第年未四十弃举业而着书朝廷取其建炎以来系年要錄百卷寘馆中尝得其副而尽读之然後知天之报施本无差忒而子思家学日成为不忘矣子思之论易专究心於卦画其言甚富如中孚豚鱼等说前未有发明及此者十鑒极陈南北朝战守胜败如指诸掌书有小传又有诸经解义皆其节自之大者吐其所见议论过人一宰饶之德兴治行有循吏之绩其所抱负十未见一二此识与不识所以恨其蚤歿也五年七月癸亥考功涕泣而谓钥曰先君子之葬兄弟尚弱万里亦无由相告已得後谿刘先生为之铭矣墓前有亭取终身慕父母之义以致深长之思非敢自言能尽此也名以思终并致昆仲之意俾记之凡子思文学事业与其家世履历後谿之志已详不复书语之曰先公有子如此固已不悼其不幸於土中矣终之义岂云小哉近方为金华季氏为古文孝经详说後序因论古自天子至於庶人孝无终始而患不及者未之有也为之言曰圣人一经立教之要专在此数语孩提之童无不知爱其亲者是人之於孝未有无其始者夫子作此一经正欲人之有终也自天子以至庶人孝之大小固自不同於此复言若孝有始而无终未有所不及於祸患者此则无贵贱之别上下一体俱当尽心焉末篇云孝子之事亲终矣止为丧祭之终犹未能孝之终也夫所谓孝之终与孝无终始之终盖谓立身行道死而後已者也故虽曾之既启足手以其能全而归之自以为知免矣然而易簣一节犹在其後盖大夫之簣犹非其正也呜呼

圣贤可谓深切而能有终者亦岂易易乎钥余生无几深知竟惧得正而毙所愿加勉故以告有志之士云钥老退学落加以病余辄拾前说以慰孝思之切惟昆仲勉之

碑

聚奎堂碑

兵部尚书赵师 谓臣钥曰淳熙初年龙集乙未高宗在德壽宫先臣和州防御使赠少师伯驩久被眷顾师 由锁应赐进士出身德壽喜甚谓其有子赐金更新所居增创一楼以荣桂书其榜盖遮孝宗圣制闻喜宴诗桂林争占一枝荣之句而宠之庆元改元师 卜筑吴门之昼锦坊辟堂曰聚奎奉先世前後所藏真蹟匪惟侈云汉昭回之盛抑取寰宇所谓五星聚奎天下太平之义累圣崇儒右文高视千古盖天人之符应也主上误加将拔寢尘禁近尝因奏对以宸翰为请上首肯再三嘉定三年冬起家长武部兼天府明年正月见於便殿昧死申言上又许之七月甲寅申使宣谕拜三大字之赐未几又锡三扁曰宗表曰玉辉曰与闲钁镂髹饰皆出尚方恍然从天而下周章蹶蹶感激自誓思所报称移刊乐石愿有以记之臣辞不获窃考所元盖非一日国家亲睦九族恩礼兼备神明之胄繁衍盛大教养既至人才辈出献词章躬课试承平百年史不絶书崇国公世恬好学绩文有声前朝徽皇命翰林学士承旨郑居中为志铭知淮阳军米芾书丹其子开府仪同三司嘉国公令峻及从苏轼黄庭坚游刻而龛诸睦亲北宅之壁间嘉国之子通判泰州子笈陪从康邸最膺顾遇又见芾所书而爱之绍兴间既得本本访求其後伯驩与兄浙西路兵马钤辖伯驹方赘员筦库以近臣召荐待以家人礼念其孤露自立厚加抚劳勉以温习赐第都城俾日趋中禁图书之府曰於此可观人间未见之书少师老成详练历记旧事尽瘁职守褒赏相仍博洽醞藉歌诗声画取法晋唐游戏丹青深造其妙德壽怡神物表密侍清燕预翰墨之选直庐邃严且给珍膳名画法书鼎彝款识考订商略从容毕景肆笔成书楷法行草分赉稠叠王粲登楼及谢庄月赋则全而书之二王怀素帖则仿而临之合作逼真以少师鉴裁精审犹不能辨又杂取唐宋名贤佳句形诸幅笺便而者踰十数持宪近畿孝宗出内帑缗钱万严饰天庆观亲札丁宁示弗勤民之意神毫睿藻数以赐焉乃今奎画申攷於以承二祖之休於以獎声绩之櫛三朝宝墨萃於私室光华绚烂衣被草木有历劫赞扬所不能尽者而臣何足以知此虽然盖可稽焉堂以玉辉名则取陆机文赋石韞玉而山辉之语楼以与闲名则取苏轼赖有高楼能聚远一时分付与闲人之诗而宗表之褒实用唐宰相李勉故事圣意攸属昭然着见复揭荣桂旧题於便坐植岩桂以环之始乾道间遴选聘使擢少师为副别授国书议事故知其为宗老相与叹服以为备待时之说归报盖久而後益信师 稔承家训大沮开禧用兵之议以是不合而去圣化更新复登迹聯委寄益隆俯俞忱请则所以蒙被简记者有自来矣惟昔君臣际会一字之褒踰於华袞今少师父子才美世济为赵氏祭酒帝笔之储盈溢巾衍有传家之宝无登牀之嫌六丁丰隆呵禁护持昭示将来以永无斁为子若孙顾瞻丰碑斋庄敛衽仰圣作之渊懿知忠厚之积累尽万物而不足报可不勉诸臣衰頽无庸方期谢事跂望斯堂无由一拜於其下敢述始末而为之诗曰

煌煌圣朝亲睦九族有制有恩克保世祿信厚振振麟趾之时才学自奋见於设施於穆少师

相逢盛际受知高皇蚤被简记源流有来元佑名臣赐对入侍礼如家人博洽醞藉翰墨之选帝笔昭回溢於巾衍赐第崇成有子策名乃书荣桂表於家庭阜陵抡才輶轩载牵出奉六条申畀一札子克负荷致身文昌四尹神皋如汉赵张卜筑姑苏有严尊阁户册狭放增贲丘壑奎壁之光聚於吾门顾瞻斯堂庸侈上恩是父是子并膺殊眷非止为荣於以示劝生子生孙其报伊何忠孝一心永矢弗磨

王节愍公忠肃庙碑

嘉定四年某月某日诏为故枢密节愍王公立庙赐额忠肃某年某月某日庙成惟公建炎绍兴间五使不测之地卒执节以死忠烈显着人户知之大臣欲专和戎之功不以实闻故恤典多阙至孝宗皇帝闻之始特官其三孙曰杞曰桷曰机开禧权臣横挑毡裘三边俱震始复求专对之才以通好桷捐躯徇国为人所难母夫人又以节愍之事勉之张旌三往终定信誓祖孙相望勲在社稷可谓无负三槐之家风矣绍熙元年謚公节愍桷既奏功擢帅合肥寻尹天邑请於朝求为乃祖立庙於是天子嘉叹且曰尔祖葬吴郡其庙於城中桷拜稽首退而营求会提点刑狱陈芾摄府事为度基於郡之北真庆坊地周百三十丈有奇辟门三楹旁翼二挟以入两庑中为寝堂敞以高轩肖公之像以安康郡夫人陈氏配命服如礼鼎俎具列深邃崇严既足以揭?妥灵又启旁舍以处道流买田续食使永香火之奉可谓备矣少卿以新庙成不可无纪命铜碑之铜尝铭公之隧若平生大节与夫勤劳机辩之详既屡书之兹不复列独着立庙之本末以诏後世窃观昌黎韩公为庙碑者三曰乌氏曰田氏曰袁氏乌以重胤田以弘正袁以滋皆以子至将相宠及上世非自以功业而得庙食也以死节而得祀者莫盛於张巡许远之庙而两家子弟才智下後无闻焉惟节愍公上承三槐之盛以忠义自奋风烈昭灼膺此庙食之宠尸而祝之以死孝而归其骸孙又以探虎穴而就功名既不忝其先而又增大之王氏之庙其最优乎因为之歌诗以侑四时之享云

公之生兮不辰投大艰兮期殉以身掉三寸兮惊严宸起布衣兮立登从臣痛二圣兮蒙尘出万死兮气益振得要领兮折殊邻辩悬河兮机若神数往返兮就和亲功既高兮遭厄屯握汉节兮死朝绅地震裂兮天霾昏祀於河间兮秋复春绍祖烈兮世有人始虽屈兮终获伸墓於山兮祠於城之闔依琳宇兮轮奂一新肖公之像兮凜然如存芳菲菲兮荐苾芬洋洋在上兮伤不见而不闻公其诉上帝兮叫九閤或为鬼以厉贼兮如张巡九原有知兮焕丝纶享庙食兮报君恩佑尔後人兮传无垠

攻媿集卷六十

<集部,别集类,南宋建炎至德佑,攻媿集>

卷六十一

钦定四库全书

攻媿集卷六十一

宋 楼钥 撰

启

谢发解启

决战文场喜麀大敌策勲计版幸缀羣英心既歉然顔之厚矣窃以真主嗣临于万国宸心经略于中原正紫髯将军抚劒之秋岂白面书生鼓篋之日然用武必有文备当修德以来远人况一士可以止百万之师寸舌可以贤五千之骑搴旗斩将者特匹夫之勇敢敦诗说礼者乃元帅之资丁字徒知固难处强弓之右毛锥可用当争雄大劒之间得奇才自足有为用真儒必将无敌爱命郡国选修洁之士且使乡遂献贤能之书广数路以取人才诏直言以增士气将取布韦之贱以为将相之储草莱期王佐之才畎亩任天下之重坐使有志之男子羞为无用之陈言附凤翼而攀龙鳞咸起功名之愿擢犀角而拔象齿始膺藻监之求如钥者赋性枣昏受材樗散幸家声之未远冀世业之永传誓收黄卷之功益振青箱之学十载空随于举子一言未售于有司良弓之子必为箕有自来矣吹竽之门而攻瑟如不好何欣逢不讳之朝深惜难逢之会一鼓作气已为胜敌之谋三年不鸣期遂惊人之举及奏功于里选仅侧迹于行间虽叨鸛荐之书犹愧鹏飞之化沙砾已甘于在後駑骀敢望于争先静惟贱士之拔茅实赖大人之推轂兹盖伏遇【某官】才高今古名压搢绅久居喉舌之司卧治股肱之郡爱民如子惟忠厚以存心遇事生风信精神之满腹天子思大夫之国器布衣求吏部之门生遂使庸愚亦未抡择钥敢不益严笔阵力淬词锋敌无畏于万人霸当成于一战鵬在秋天之外已借高风鱼掀春浪之中更资余泽

谢省闈主文启

薄技巾程岂谓单辞之误上恩从厚犹沾末第之荣靖言侥幸之由实自生成之力德无所报感不知言窃惟选之公本条为盛科条之备今日尤严凡羣试于有司当守遵于成法未问词章之工拙先观品式之从违苟有一毫之差必为终篇之累惟时公讳尤异常规虽在祖宗不致山川器币之废然为臣子当明许势乘机之嫌着之甲令以谨临文之疑揭之棘闱以备入门之问倘律度之不中宜衡鉴之弗容自非词华惊絶代之工议论如古人之正又安得特加擦拭曲赐甄收既寛司败之诛乃玷主文之选如钥者伶俜无取坎壈数奇猥承簪绂之余期绍箕裘之业念踵登桂籍者已三四世而不书鴈塔者几数十年幸兄弟之联飞喜门庭之稍振愿修世学益大家声滥由乡老之书来赴春官之试孺子不谨尝约日而後期穷鬼为妖复转喉而触讳问山犯名之二者犹有不学之愧书马与尾而四者尚怀谴死之忧矧明见于条

章乃自为于卤莽深虑布韦之贱不胜鉄钺之诛敢谓巨公曲成孤迹略去片言之失力收一日之长委堕甑于道中已甘絶望取焦桐于爨下实赖知音既援例于先朝遂飞章于清禁异恩俯及同辈皆惊虽不能豪夺于锦标然固已宠踰于华袞三神山上人怜不及于鳌头千佛经中自愧得陪于骥尾退量叨冒良有夤缘兹盖伏遇【某官】正始名流开元故老公车说议与秋霜烈日以争严召驿重来快凤凰景星之先覩假道蓬山之上主盟兰省之中凡属品题莫逃藻监虽小善之占必以録尽收天下之英雄而斯言之玷不可为尤费笔端之造化遭逢若此称报谓何钥敢不痛自激昂益加详谨对千人而不犯愿尚友于先儒号一庄而复荒肯下同于流俗誓损顶踵以报丘山

谢试中教官除温州教授启

就试棘闱复售綴文之技庀司槐市误叨分教之官慙无黄绢之好辞偶中青钱之妙选卓踰望表愧溢情涯窃以庠序之兴人伦是赖郡国皆立王化尤先僖公能修泮宫致一时称其多士子产不毁乡校盖千载以为美谈在西汉李唐之盛时有义翁常袞之循吏变蜀郡如东鲁至司马氏而昌其文化七闽如上州有欧阳生而为之倡是知自京师而首善亦必崇乡赏以励贤惟我皇家历参古制开学宫于四海延师席于诸儒虑择士之或遗复设科而俾试考之经以察其识命之赋以观其材人寡鉴精礼优选遴欲中有司之意必兼举子之长如钥者术业空疎词章骯骯受过庭之教敢言匡鼎之解颐【原集避宋朝庙讳凡匡鼎匡衡匡庐之匡皆作康今改正】习雕虫之工难及温生之父手比幸登名于兰省夫何困迹于铨曹念旧学之未芜几此途而妄进操觚染翰是皆已试之才敛板趋风咸望非常之遇顾如孱质乃预英游方期六鷁之退飞敢谓双鵬之连中获离场屋之余习复逃州县之徒劳载维永嘉实名东浙鳌头屡占在纷纷白袍之间黉舍宏开无青青子衿之废苟非儒匠难主文盟好为人师素守孟轲之戒此非子坐恐招有若之机念得宠之过优复去家之不远无非侥幸端有夤缘兹盖伏遇【某官】旋斡化权主张吾道内治外治既陶万国之泰和小成大成仰赞一人之化育善类悉归于真宰危踪尤累于洪钧久怜书马之愆欲收置于门下兹试不龟之药偶获预于选中亟畀除书实由大造钥敢不益坚素履无负初心学不如务师曾何知于善诱教然後知困顾敢忘于自强庶上副于眷知以少图于报効

回交代李教授【冰】启【以下十五首温州教授任内】

陪鴈塔之题名如昨梦叨鱣堂之选猥继後尘荷委贶之洊临愧驰緘之已後恭惟【某官】性天夷旷才地高明笔阵摧风得隼胶庠之彦儒林振藻飞英俊造之科尚淹三馆之游俯作诸侯之客一方士子固已乐吾教中当路荐书皆欲出我门下倚闻严召径挹超除钥托契已深承顔不远此非子坐正慙温故之称必有我师全赖告新之益

通添差教授王太博【信】启

宾兴乡国曾叨推轂之知客授侯邦尤得抠衣之便抚躬甚喜剡牋先之恭惟【某官】赋軋两都名高六馆文章攀桂再登俊造之科闾閭排云首上治安之策诏开言路章交公车英词

独彻于细旃褒语宠踰于华袞先生入太学方将育天下之英才广文独冷官何乃为诸侯之宾客俯从新制大屈公言风引仙舟虽觉三山之暂远云垂鹏翼会看万里之横飞钥少欲传家长而懵学闭门覓句初无蠶臼之称仰屋着书空有酱瓿之诮顷藉鸛章之荐遂叨鴈塔之题不知七年待次之迟但喜一旦同寅之幸岂止日沾于膏馥要当力踵于步趋既非中行待我以衆人方谨旧恩之报如使西河疑汝于夫子难逃良友之讥

通太守曾吏部【逮】 启

恭审疏宠宸庭承流侯服凡居庇峙罔不欣愉窃惟左浙之奥区独以永嘉为名郡人才秀发接王谢之风流城望雄尊控瓯粤之冲要海物惟错生齿日繁属岁事之多虞致天灾之代有风驾浪万衆为鱼烈火焚庐一昔而烬八潦七旱田野无以为生九牧十羊吏民疲于奔命阖境告病渊衷顾忧正藉虞升卿为开错节不有龚渤海谁治乱绳既入奏于明光谅疾驱于逵道恭惟【某官】乘珠照夜衡玉悬秋学自得于家传美盖由于世济矧惟我宋衣冠之盛无如曾氏閥阅之高闽峤勲名藹相门之清议南丰术业擅昭代之词宗未若于门卓称江左弟兄辉映竞驰云间日下之名门户炽蕃遂为泽底冈头之族顾如伟望立卜要津早瞻使者之星来近长安之日握兰密勿铨衡无同滞之嗟听棘平反囹圄有屡空之效暂从均逸亟畀于蕃将使官府复见于太平闾里尽销于愁叹报齐国之政谅无五月之淹趣曹相之装即听三公之拜钥学不知道才非瘥人偶沾末第之名滥作诸侯之客敢图会遇获事贤明欢寒士之顔愿托千间之厦顺下风而请敬持一瓣之香

通太守莫给事【济】 启

恭审荣膺宸诰起镇侯邦琐闥需贤将复甘泉之旧左符共理暂为沧海之行先声所加衆听皆耸恭惟【某官】学该四部文擅两科浑然金玉之相凜若松筠之操经纶自任直将举明主于三代之隆雄挺不回信能立懦夫于百世之下韬藏既久闻望益高独由直道以致身自结九重之知己紬书东观径跻瀛洲学士之联典奏南宫已有凤阁舍人之様上方修明号令鼓舞华夷爰念制词思复深淳之体肆求卿列首推横博之才俾代予言仍参内相大述作多出其手岂惟复见常杨近诏诰自为之文端欲上规姚姒还直螭坳之秘进趋鸡戟之严更藉刚方之资为专封駁之寄危言造膝尝有志于回天劲气逆鳞曾不难于去国坐命时论之推重惜无谏列之拜章退安香火之祠自得林泉之乐惟永嘉之古郡实东浙之奥区乃命承流以遂均逸一麾出守肯为顔步兵之诗五马自随姑寻王右军之旧矧高门之名胜着此地之声华南院世官犹有甘棠之遗爱阿连客授尚存绦帐之余风自闻成命之肆颁惟恐使君之来暮山川改观城郭增辉地控瓯闽正有资于韬略道传伊洛尤仰赖于范模第恐廊庙之资尤被冕旒之眷赐环在迓岂容早盖之行春视草居中复见金莲之照夜遂大拜以佐中兴钥学不知方才非可用末科厕迹自怜书马之愆再试得官人笑画蛇之赘敢恨入年之家食第慚多士之主盟好为人师真成不韪此非子坐日惧弗堪仰千骑之鼎来幸二天之在望飞鸿遵渚咸歌姬旦之归兮泮水采芹犹喜鲁侯之戾止

通邵通判【范】 启

别驾功高夙仰声华之茂广文官冷幸依庇?之余念行遂於趋舄顾敢稽于馈鲤恭惟【某官】风仪峻整政术高明试以剧烦井井有条而不紊遇诸盘错恢恢游刃以有余矧是永嘉甲于东浙地望控瓯闽之要人才承王谢之流正资贤治中以佐明太守抚摩凋瘵振起教条稔闻五月之政成尽出贰车之力赞少舒骥足不妨风月之平分入箴鹄行会见云霄之独步钥才非适用学不知方虽记问以尚疏在渊源而何有谬司芹泮偶及瓜时乐英才而教之固知非据事大夫之贤者尤得所依

通赵通判【侃】稟启

题仲举之舆凜先声于海峤开马融之帐窃大庇于云天仰德既深遡风知幸恭惟【某官】派分银汉秀挺琼枝撑肠富万卷之书落笔扫千人之阵儒科振藻仕路蜚英非错节于笑谈破大觚于俄顷歌合江之桃李邑人犹见于去思依上幕之芙蓉府主但闻于坐啸眷兹名郡密迩行都属频年有饥馑之灾况比屋被焚漂之酷公私窘匮民吏彷徨方欣郡政之一新更喜治中之鼎至湖楼风月岂惟景物之平分春草池塘会见精神之顿改来播海沂之咏伫归禁闼之班钥才不及中学非语上渊源无自敢谓好为人师教导未明政恐此非子坐不图幸会获在帡幪闾境倾心想望贰车之风采冷官修敬预通记室之姓名

回钱録参【佖】启

久矣向风恨无半面之雅兹焉联事幸逢三语之英拜履非遥扪心知慰恭惟【某官】清姿冰洁奥学渊深玉笋琼彝压倒千人之笔牙籤绀帙读残万卷之书淮山小试于梅仙海峤更烦于阮掾狱市无扰长赋池塘春草之诗兄弟联飞行继鵬鸞秋天之武钥家传虽久客授何堪喜闻都骑之来遂窃灵河之润朋緘委贶惊珠璧之暗投短牋陈诚愧瑶琨之匪报

回瑞安胡县丞启

一行作吏敢兴独冷之嗟再转为丞喜见真清之彦高词先辱谦德有光伏惟【某官】泽底名家云间妙誉仕途详练两淹黄绶之司荐口澜翻果上金闺之籍谓宜阔步径登要津通雨道晴又听下邳之论事哦松扫竹不妨蓝水之风流预想登仙由兹假道钥宦游无取客授何堪骑气方来【○骑气见史记天官书一本改气为骥误】将快争先之覩緘书敬遣少陈未见之心

回陈司户【僖】启

芹宫客援慙博士之不治槐笏宦游喜参军之称絶闻风久矣拜赐懽然【某官】理窟精深词源渊奥早射广庭之策合窥藏室之书谁谓偏州乃淹贤掾俸钱寡狭固非京兆念珠曹吏事精明共看琰之霹雳手高才如许迅召何疑钥行遂同寅庶几承教日候入疆之告忽惊将命之临广文冷官虽有声名而何用孟公尺牋但知藏弃以为荣

回前宁海沈主簿【輿杰】启【沈在秦师垣馆下登第後駁放不复仕】

窃伏海隅久压斗南之誉宦游仙里屡闻月旦之评首勤车骑之临门更有文书之衔袖劳谦过矣自视缺然【某官】涵泳圣涯翱翔艺苑振三都之鼓吹韵五典之笙簧汉阁招贤贵人欲出我门下尧阶赐第天子谓入吾选中一官犹恨于栖鸾万里忽嗟于退鷁虽当邪正初分之日乃有疑似难明之人顾得丧苟无愧心虽圣贤未免流议沮鲁如臧氏之子能使予不遇哉于齐主侍人瘠环好事者为之也科第空传于拾芥功名高视于浮云收还四海之虚声自作一乡之善士寻伊洛之故步穷洙泗之遗经仰屋着书期立言以俟君子闭门觅句推残膏以丐後人坐历十年事更几变沈舟而阅千帆之过翦翮而看百鸟之翔公论自明识者增叹纷纷余子蝇营虽见于复还落落高怀马丧安知其非福然而休期难再大器晚成毋忘结绶之心当起据鞍之志钥晚生无似客授何堪久怀望履之私未遂升堂之快掩关却扫素钦静退之风忘年定交猥及庸虚之子焉有琼瑶之为报但惊珠璧之暗投诵广文官冷之诗喜遇同襟之客读东阳郊居之赋会求抚掌之欢

回永嘉徐主簿【總】启

孺子名高方屈临于簿领广文官冷乃先辱于缄滕摘词粲然为礼过矣伏惟【某官】学耽八索识洞九流提笔以赴文场前无坚敌影纓而游帝所自致巍科精金百链而愈刚良玉三献而後售宜在瀛洲之选往观藏室之书俯就鸾栖尚淹鹏运高士不为主簿虽曰徒劳君子不卑小官何妨行志会闻妙擢径上要津钥晚出无闻散材焉用黄卷自乐岂敢好为人师绦帐方开正恐此非子坐独幸佳郡素多贤僚匡衡鼎来可共说诗之乐凿齿一诣便胜读书之功

回瑞安林主簿启

宦游伊始方淹枳棘之栖客授无堪徒愧蒹葭之倚先声竦甚华翰先之伏惟【某官】人物粹夷天资爽迈宝甘棠之笏自有家风读牙籤之书尽传世学小试勾稽之职倚看趣召之行钥久矣闻名兹焉同事高士为主簿固知公议之未平广文独冷官但喜疎踪之有托

回平阳李县尉【煥】启

登汉庭之第猥继英游访吴氏之仙更逢隐吏方谨先声之伺遽勤华翰之颁恭惟【某官】学有本原辞无枝叶论议醇正所得盖自于名儒气貌粹温不问已知其长者腾蹕合登于要路酸寒乃就于尉曹不容警捕之淹会膺召对之宠钥家传虽久客授何堪逢君子之僚已伸素愿笃年家之好尤激义风

回郡庠职事启

冷官无取岂敢好为人师佳士有闻不当列于弟子伏惟【某官】性天俊茂才地高明玉笋

琼盃压倒千人之笔牙籤锦帙读残万卷之书三年已见于惊人一第何足以愿子倚观奋发自致功名钥久矣闻风欣于识面辱贻书之加宠叹陈义之甚高喜荷之私敷宣冈既

通交代徐教授【嘉言】启

读鴈塔之题久钦间望典鱣堂之教获与交承既慙扬糝之在前敢俟及瓜而受代通名伊始修好在兹恭惟【某官】学造圣涯文高艺苑评彼处士孺子宜当为先求之古人有功未见其比能似鼻祖今为耳孙既已飞英声于千佛经中固宜追俊游于三神山上何为历岁始就冷官惟此邦余王谢之风而多士知伊洛之学正有资于模范俾益究于渊源君子之育英才诚所乐诸公之登台省会见同升钥夙昧家传偶叨客授望亲庭于咫尺较吏考之毫厘日冀先声得遂归欤之志顾瞻清峙用宽仰止之心

谢除删定官启

投诚恩地倍烦大冶之陶熔定法清朝俾预有司之笔削密附声光之末亲承约束之严荣喜交深凌兢采甚窃以国家备百王之制章程垂万世之规小纪大纲秩然有序奇请他比或以滋彰肆当核实之朝爰举久虚之典宏开书局共议邦条上勤元老之尊坐总羣言之首假删诗定书之目以名其官凡摩研编削之流可知其选岂容滥吹有玷知音如钥者才不适时资非近道雕虫何取漫成童子之虚声书马有愆几作词场之奇崇敢叹十年之不调但知三省以加功德之不修学方图于为已斯未能信仕岂专于为贫乃因客授之行益究家传之旨力考渊源之所自务求敦学之半功抱素志以自怜庶此生之不苟竟缘色养来叩化钧璞三献而就知道五技而成拙属正人之登用矜寒士之滞留谓当在药笼中必欲出我门下诵佳句于百僚之上有味其言持长绶于千仞之艰不遗余力卒令弱质亦入化炉虽知隔仙府之几尘犹使及天朝之速化适承人乏获厕英游自为之谋不过于此兹盖恭遇【某官】主盟公道厚礼人材讽赞九重不显弥纶之用精白一意曾何适莫之容然无私乃能成私惟不德是以有德如弟兄之不振荷造化之特深之遴显以文之亨着以功取言竞爽公山用于前正礼擢于後实出殊私钥敢不益励廉隅进修职业举数事以塞诏何敢自欺慕国士以报恩岂容弗勉

回詹状元【騃】启

清禁传呼喜闻第一之选长牋委贶更惊骈四之工恭惟【某官】学富三冬才优六馆驰隼声于艺苑承一门诗礼之传奉大对于听庭为四海英雄之冠贤关增气里社重辉盍从台阁以问津会见功名之发轫钥顷由殿幕先揖辞华待尼父于季孟之间愧文衡之非据举公孙为贤良之首仰天鉴之独高敢意谦撝反为巽谢通浙东安抚李参政【彦颖】启【以下九首通判台州任内】

便亲求外仰蒙化笔之余贰郡之官适在帅垣之下依仁有自稟令无譁敢修大府之恭庸効小夫之智恭惟【某官】爽邦哲匠名世真儒以平生不欺之心为古人有用之学澄之不清

淆之不浊俨然公辅之资来非可招去非可麾卓尔朝之望至公待物直道持身辞色不以假人毁誉未尝经意上以此信于人主下以此服于衆心久为朝夕论思之臣遂登夙夜宥密之任进参政柄实领宰司岂惟奉养之微曾不改于儒素若其酬应之确了无间于戚疏苟曰才能各随器使虽有浮竞自应意消故国是不容动摇而朝列为之肃靖坐镇雅俗远追谢安石之贤共致太平咸望杨公权之相既明且哲善始以终出殿大邦宠分秘殿七州讼理民无恨于田里之间数月令行人自得于湖山之外虽少留于蓬岛曾不远于长安会闻袞绣之归亟正钧衡之拜钥登门最晚辱眷惟深涉笔金科顾如知于八律兼官玉牒曾弗措于一辞叨陪典领之严备费生成之造会闻半刺许置外员幸下考之再书援新制而三请匪蒙深照安得此行望故里以非遥奉安輿而在即获承菽水之养尽出丘山之恩展骥无堪徒以负丞而增愧【负丞见韩愈蓝田县丞厅壁记一本改丞为乘不必从】登龙未遂尚须假事以有行爱日方舒寒威将劲愿为宗祔之重益精茵鼎之调

通吴给事【芾】启

甘泉宿望久怀曦骥之诚别乘赘员喜有登龙之便敢修柔削以代先游恭惟【某官】命世伟人爽邦哲匠才雄万夫而持之以正名满四海而取之甚廉出入两朝周旋三纪选部赖典铨之鉴琐闥高批敕之风剧寄屡分外庸尤着侯邦讼理民举安于田里之间帅阃令行人自得于湖山之外扫蠹源而略尽清狡穴以一空不惟所去以见思抑使所居之官大乃守东山之志屡赓彭泽之辞均逸祠庭犹俾斯人之有望告归神武直将与世以相忘容与千岩之中傲睨羣物之表凡烟霞胜絶之地皆杖屦经行之区下流水而上青山固知自适身赤城而名綵阙岂得长闲况资元老之壮犹将任旧人而共政丘壑皋夔衣冠巢许民具尔瞻股肱萧曹腹心良平公其母逊钥晚生无似薄宦徒劳涉笔金科倏更三载兼官玉牒弗措一辞惟父母之年益高念菽水之养多阙偶逢新制适契初心得请治中将遂亲迎之乐强颜员外未知贰郡之方幸门墙之是依信典刑之斯在使获附声之末如见古人倘粗传土之苴余愿为弟子炎威方炽仙隐独清顾茵鼎之茂调为宗祔而自重

通韩运司【彦质】启

伏审拜恩天陛将漕日畿龙马负图久寓邃严之直水牛挽粟允资幹运之才凡隶部封举深拚蹈恭惟【某官】乘珠照夜衡玉悬秋赫赫元勲具载鼎彝之刻言言余烈尚存带砺之盟仰昆季之横翔见门庭之益振竹楼赤壁增大江形势之雄樵李嘉禾伟近辅恩威之洽剔蠹源而俱尽扫狡穴而一空齐民欣冬日之温老吏凜春冰之薄矧是外台之重适当虚席之初肆求能臣乃擢贤守借一州之敛惠俾列郡以观风问津清禁之途接武昕朝之列致身自奋行预严徐之褒活国有谋小试管萧之亚不劳鞭扑坐致钱流便登簪橐之联俯慰搢绅之望钥行能无取学述尤疎涉笔刑章顾安知于八律预名史牒曾弗错于一辞惟亲年之益高念色养之多缺偶逢新制求倅偏州乘鴈双凫顾何加于多少悬疣附赘适有愧于骈枝莫知关决之宜幸属按临之下愿广万间之大庇俾沾九里之余波展骥何堪徒以负丞而兴叹登龙正阻尚须假事以有行

回王主管【铢】 启

东阁同趋曾蒙倾盖南州半刺首辱飞缄瞻高隐以非遥荷谦光之过厚恭惟【某官】神锋秀整笔力纵横克绍家声善宝甘棠之笏亲传世学尽读牙籤之书盍上亨途以摅雅志依芙蓉于边徼俄赋归来奉香火于仙都姑为自适正恐精金之价定不容美玉之椟藏钥佐郡无堪登门自喜属暑行之疲甚媿瑶报之阙然

回宁海汤知县【烈】 启

蚀粟周行力图补外赘员别乘恩许便亲喜同事之相依荷贻书之先辱伏惟【某官】词场前辈圣世名流栖枳海邦藉甚一时之望采芹泮水盍从三馆之游尚为墨绶之淹小驻青云之武循良所在登用可期惟慕向之已深喜瞻承之伊迩纵横老笔叹才气之增雄蹀躞征尘媿报章之弗称

回石司户【宗昭】 启

闻公子之名踰于十载识荆州之愿始自去秋既服持衡之公更蒙倾盖之好兹来佐郡深喜为僚素知三语之无同未省千人之小异荷贻缄之先辱审沿檄之将归喜不自胜言何能尽伏惟【某官】学期于古用适于今高挹儒科振家声于奕世首为户掾赞郡政者累年岂容州县之劳会登台阁之选君既不为骈俪之谀语我亦欲言去就之私心自惟无堪顾将焉用三尺所出四年其间用之则行舍之则藏讵敢论古人之懿往而不返入而不出要皆非吾道之中惟亲年之益高愧色养之有阙每切望云之念惧乖爱日之诚幸下考之再书援新制而三请置之员外处以治中岂求半刺之优正恐负丞之诮玉川之异自异或恐未然蒙庄之才不才未知攸处既逢直谅之友良佩切磋之规贺下之先请益为便凡此地当知之事与平生有用之言不鄙其愚愿悉以教

回添差钱节推之稟启

处以治中自惭无用置之员外所向适同喜倾盖之非遥荷贻缄之先辱伏惟先大家声赫奕性地纯明早联绅笏之华未快云霄之武六月而息欲为擊水之游三年不鸣必有惊人之举暂烦婉画来佐贤候不移桑梓之邦径入芙蓉之幕会闻交荐别遂超迁兹叨佐州甫及视事一笑莫逆俱为骈拇之流同官为僚尚恃断金之义

回宁海方知县之启

附骥同登恍如昨梦飞鳧来下忽听先声方慙佐郡之无堪深喜为僚之有托伏惟文之性资通敏问学邃深属辞甚工屡得文场之隼从政何有浸蜚仕路之英既通籍于金闺聊假途于墨绶惟兹海县在四明天台之间久矣邑人有卓茂鲁公之望矧叨末契尤切寸一辱华翰以过优媿短章之匪报

贺明州范参政【成大】启

恭审诏起柄臣权分制阃九重前席方深共政之图千里褰帷暂屈于蕃之寄山川顿改号令鼎新凡属按临举增拊舞恭惟【某官】儒林师表圣代宗工英主有为出际五百年之运嘉谟允合遂叨九万里之程羽仪天朝金玉王度演纶秘掖追还盘诘之风抗节殊邻平讐疆梁之气威名日着宸眷采隆谋元帅于东南懽皇灵于徼塞令行八桂世称伏波铜柱之规泽浸两川人服武侯羽扇之略进参黼黻光辅太平遽辞丹陛之风云高蹈石湖之林壑奉身而退与世相忘属名藩弄印之初喜元老赐环之速首颁帝綍并护瀛壖姑为试冯翊之行了无薄淮阳之志仰体皇上忧顾之重俯矜民生凋瘵之余叱馭径行不待东方之千骑望尘雅拜欣逢刺史之二天传填抚之先声极抚摩之至意吏民相贺知有所依旬月之间坐以无事轻裘谈笑澄瀚海之惊澜健笔流传播鸡林之佳句尽消愁叹倏变讴吟谅课最之易闻恐公归之难缓台星两两重观齐色之祥泰山严严式副具瞻之望钥夙叨鑪冶久去门墙赘员于兹阻奉维桑之敬赐履之下实云击柝之闻尚为假事之谋少遂趋风之愿敢凭庆牒敷叙勤诚画戟靖深薰弦和畅祈为冕旒之眷益精茵匕之调

攻媿集卷六十一

卷六十二

钦定四库全书

攻媿集卷六十二

宋 楼钥 撰

启

谢除宗正寺主簿启

容台列属方惊出命之从天宗寺勾稽更许引嫌而易地事应如响人以为神倍烦致曲之私益戴不赉之赐伏念钥顷持孤迹入玷周行叨金科笔削之司三岁于此预宝牒讨论之末贰职最优念亲年之益高思色养之多阙偶逢新制幸遂赘员天台四明喜家山之在望治中别驾奉菽水之余欢甫更二考之书复捧三州之檄苟逃吏责来赴朝参登光范之门始寻故步索长安之米甘作畸人素蒙一顾之隆重辱千金之诺屏身逆旅忘意洪钧不图信宿之间忽被生成之渥力羣才之竞进或累月之曲留是何庸愚首劳记轸俾居制作之地得以周旋其间虽公府无私讳之可疑而人子有至情之当隐范蔚宗谓郭泰为太司马迁以赵谈为同彼虽千载不刊之书亦有一时随宜之例矧从兄正有近比而律经端为此文非敢为循墙之恭姑以避入门之问洊勤敷奏许以徇私再窥天派之庆源恍若华胥之昨梦轻舟浮海方虞风引于三山零雨自天终赖云兴于四岳兹盖伏遇【某官】圣时间气王佐真才进退百官而坐庙朝悉从公论总领衆职而称上意专干化权矜雁塔之旧题惜龙门之下客遂由远外径被甄收钥敢不仰首厚恩服膺高谊况获居典领之下犹得附声光之余谱磐石之宗益加修纂图国土之报誓竭疲弩通温州交代沈詹事【枢】启【以下三首知温州任内】

偃藩沧海真有古方伯之风易镇温陵庸示东诸侯之劝乃容贱子获继後尘敢言一月之间再辱五云之赐揜谦甚矣揣分悚然恭惟【某官】学贯九流气高八表天分已超于凡品心传自得于遗经嚆道真泳圣涯信师友渊源之远穿天心出月胁仰文章黼黻之工首振台纲早膺睿獎洊居宰掾遂陟禁途储寮推商皓之贤朝望出汉庭之右粤从壮岁已着外庸使节帅垣凛威名之犹在闽山江国怀惠爱以如新独瀛壖未识于旌旄故上意特分于符竹教条所及扫狡穴以一空政务日清剔蠹原而欲尽朞年而变百堵皆兴精力如黄颍川而事不劳方略如薛冯翊而用自省抚摩多暇赋咏流传绣口锦心在昔接王杨之旧风楼月观从今齐沈谢之名忽传舜诏之颁更与泉麾之重伫闻归奏别拜褒迁刺史之为三公厥存故事人主之论一相用佐中兴伏念钥晚出无堪冥行自信当血气盛强之际不能大所居之官矧父兄忧患之余岂复有敢为之志兹叨郡寄遽迫戍期虽怀乌养之私未识牧民之体仰惟耆德尝拜下风庭内芝兰已见朱轡之贤守门前桃李居多黄阁之名臣望重儒先年为父行退慙孤远敢谓交承瞻之在前知坚高之可慕瞠乎若後岂可逸之能追尚须修敬之初躬请告新之益署风清润燕寝邃深愿精茵鼎之调仰副冕旒之眷

回瑞安吴知县【敦义】 启

朱轡就道未知郡太守之宜墨绶临民正须邑大夫之助同寅为幸良觌非遥伏惟【某官】璧水胜流桂林秀士絺章绘句蚤腾场屋之名错节盘根尤蔼簪绅之誉尚淹阔步俯就徒劳已报政于罗川更字人于安固一同何幸获依明府之仁三异有闻行应清朝之选钥疎愚自信忧患何聊忽为双旌五马之行欲访孤屿中川之旧人情物态虽曰素谙吏事邦条正资協济曾未驰于尺牒乃先辱于朋緘欣荷良深敷宣罔既

回沈主簿【兴杰】 启

别十五年愿复为李君之御官二千石又获在郑公之乡入境云初飞緘未暇不图前辈先辱英词伏惟【某官】厚德镇浮高风立懦蚤勤学殖视富贵若易然晚悟性空置功名于度外笑孟尝之下客为羲皇之上人以济南伏生之年抱西河子夏之病隐居求志之士吾见其人焉耄期称道之贤盖仅有存者行见鹤书之聘仍加鸠杖之扶乞三老之格言为千载之盛事钥顷因客授获预英游兹叨铜竹之分方厚金兰之好拔薤一本惟忠告之是求束帛十端惧寡闻之贻诮敢俟及阶也而相帅冕便当从牀下以拜德公

回杨秘监【万里】 启

钥猥自右庠谬参外府兼史牒讨论之职皆英躔吹借之私垂问甚勤撝谦良渥再念一登末第曾因公讳而退飞三入容台率以祖名而引避虽曰周人事神之义亦惟穷鬼转喉之妖敢因修谢之余并发自公之粲瞻依益切感叙奚殫

回王原父主簿【洙】 启

顷传新作慙妄正于雌黄兹荷劳谦喜再来于尺素志期远到学有隼功曾日月之几何觉词章之顿进伏惟【某官】才由天与业本家传孔鲤过庭素佩学诗之训相如入室肯希用赋之图既决世科浸登宦路移平昔穷经之力为一时应用之文今日侍亲既供子职他时遇主可代王言尚云老马之智专不鄙雕虫之技小谓白圭之玷固曰可磨而清济若毫岂如无有不量衰朽辄指纖瑕非惟欲补于聪明抑亦愿加于砥□今则下语俱当属联更工回念旧编如出两手虽未至飘飘凌云之气然已有咄咄逼人之风盱衡以观刮目相视要知骈俪之有体不必怪奇以为高既不当窘于边幅之间又不可施之廊庙而骇文从字顺意足气全苟进学之未央谅蜚英之有助君如斲轮者须得手而应心此若持衡然惧俯首而至地果或亮我尚惟勉旃

回李希岳先辈【询伯】 启

泽底名家素联粉社云间俊誉未覩芝眉辱华翰之先临喜高词之创见伏惟【某官】天资近道学力过人绣口锦心期赴功名之会金昆玉季已蜚场屋之声岂大才之未逢何小敌以

犹怯然焚舟而进者有决胜之志手劒而盟者乃败北之余试看今日着朱骑马之流多是前年点额暴腮之辈会见出一只手竟当取第二筹欲大振于家风惟益修于贤业自慙朽拙莫助掀腾辄驰緘以附鴈足之还方洗眼以俟龙头之选

回张子宓教授【虞】谢作辨虚跋后

虚以拟玄仰儒先之述作言不尽意冀学者之发挥惟後世之子云有本朝之君实探赜索隐着书立言顷尚多于阙文旋获逢于全帙盖丁年得之张御史之手谓蜀本出于范太史之家且言令慈水之时亲曾覩德深之说既踰三纪始遇一编专穷象数之微备见渊源之蕴辄伸末议具载旧闻初未有演义之篇故尤钦于絶识及今见发微之论乃尽掩于前功念其生不得用于时赖有此可少见于世况家传之甚的实乡义之所推掠而有之忍亦甚矣不胜愤懣并为辨明岂惟慰九原之英抑亦表一介之善伏惟【某官】义尊从祖力取世科知奥学之有来发幽光之不泯怀问一得三之喜极骈四俪六之工荷意甚勤非吾敢望藏于屋壁何殊孔氏之遗报以琼瑶徒愧卫人之厚

回上虞杜君昆仲启

伯氏决科出世真成于一佛华宗积庆克家又见于二难琴劒踵门文书衔袖大篇见怜才之切长笺知种学之深陈义甚高撝谦似过有如衰悴自揆庸疎论道德则虚负于初心言文章则难追于古作徒勤盛意祇益厚顔尚冀融明均垂孚照

回陈胜私先辈【岷】启

谒次通名初喜见秀公之裔世家论契乃知为侍讲之门握手定交倾盖莫逆伏惟【某官】父书素读天分更高盘万卷于云梦胸中巢四松于匡庐山上及见开元之故老尚闻正始之遗音古事今事问无不知儒家道家应皆如响稍窥新作叹温厚尔雅之文侧听高谈真直谅多闻之友言诚可用学有自来蚤负俊声真是崑山之片玉晚甘肥遯竟成沧海之遗珠退念少时熟聆慈训遭戈兵之肆毁寓冢舍以偷安荷先正之相求辟数椽而共聚穷百家之奥旨信一代之伟人三纪以还尚求过于仲舅交臂而失恨不拜于下风岂于暮年得逢贤嗣自幸无涯之乐且闻未见之书游边忽作于宵征访别更厘于夜辱余生能几再见末期相送仙舟第有加餐之祝会从僊籍或观破贼之章

回翟司户【大正】启

服忠惠之英名固已踰于四纪闻孙曾之竞爽曾未识于一人喜户掾之鼎来抚衰踪而自幸伏惟【某官】家传未远天分更高书读五车多是牙籤之旧仕因三语密参莲幕之游谅无暖席之温即有交章之荐杜门老矣承问欣然倒屣相迎及见故家之人物挥犀晤语尚传前辈之风流

回刘监场启

客授仙乡夙闻俊誉屏居海峤喜听先声知望履之匪遥荷飞緘之下及伏惟【某官】性资纯厚问学邃深毓秀箫台真得江山之助策名枫陛荣登将相之科宜径为结绶之行乃俯就熬波之职时则可矣君其升乎退念衰踪再瞻英峙回思三纪知故旧之几何来共一樽庶笑谈之莫逆

回奉化赵县尉【伯凤】启

居闲已久喜逢梅隐之来投分素深知是雪斋之子貽緘先辱修报何迟伏惟【某官】挺秀天枝传芳祖烈翩翩佳公子稟资固自不凡显显世豪英游宦已知自立暂宣威于彩棒会接踵于青毡旧识二难又迎一尉轻舆径造岂惟桑梓之必恭先垄相望正尔松楸之有托

回曾签判【桀】谢复官启

贤者受诬輿情久郁圣恩牵复公论终明方深赞喜之私乃勒言谢之宠伏惟【某官】世传清白政本廉平蚤通籍于金闺旋字民于花县方政誉之旁达俄毁言之上闻乃以乾餱之愆重为白圭之玷叫阍徒切欲复雁门之蹠投匭莫伸屡索长安之米忽闻昭雪尽释猜嫌首畀故官遂登上幕自此升矣已知复玷缺之难惟其有之行遂赴功名之会比传邸报寻辱邮音荷雅眷之未忘愧芜辞之不敏容容多福固匪吾人之当言皓皓易污愿全君子之终吉

回贺致仕启

顷自投闲已作终焉之计迨兹告老亦惟仕者之宜况平生不敢为高至今日自应知止过蒙褒拂深荷谦勤及神虎挂冠之年幸酬素志若龙马负图之直实出误恩方此控辞未遑致谢敢输微悃以报先施

回西安高寺丞【文善】启

七旬得谢方报君恩千里貽緘仰钦友谊诵高词而增叹附陋迹以何堪钥仕本为贫才非适用数奇命薄何望宠荣年除岁迁寢踰涯分积有妨贤之媿遂叨宰郡之行自顷投闲已作终焉之计逮兹告老亦惟仕者之宜奉母九龄都无外慕执丧三载苟幸生前偶当纳禄之期始上叩阍之请平生易足非敢为高今日既衰固应知止俞音初闕遂过神虎挂冠之年误宠太优乃有龙马负图之直控辞弗获修谢颇稽不图撝谦俯加赞喜伏承【某官】曲崇乡党不倦词章能于剧部之余闲俯念陈人之末路予之题品贲此哀迟来日无多但欲坚杜门却扫之志褒言已甚詎敢为惊世絶俗之夸矧灾星之尚存致宿恙之不已轩裳俱脱既无是有鬼之嗟药石弗灵未见其效如神之速呻呼一榻之上荏苒再朔之余旧学已忘岂知雕篆之习报章自勉惭非骈俪之工何足拜嘉适堪取笑幸投苦海母玷文盟

回留校理【元刚】 启

中宏博之科凤闻令誉陈治安之策首见雄文喜承秘省之异除乃辱私门之谦谢摛词甚丽陈义尤高伏惟【某官】胄出相家名标学海牙籤象轴读残万卷之书玉笋琼盃压倒千人之笔始膺妙选径上周行给札北门大明当世之务紬书东观更用先朝之官忽蒙骈俪之工犹见渊源之自惟我宋文体之盛扫晚唐风格之余杨刘始以藻丽擅名欧苏惟以才气独步後来争奋分???寢差凡词采之有闻或雕镂之未免不图晚景获见胜流洗未习而一空视前良而无愧何有报酬之称第知藏弃之荣

回真正字【德秀】 启

给札北门首閱治安之策紬书东观先勤骈俪之文退视歉然劳谦过矣伏惟【某官】乘珠照夜衡玉悬秋宇量邃深吞云梦者八九胸襟宏放贮文字之五千连中异科径登左学兹更化之云始以急贤为最先落笔万言无非当世之务奏名九陛遂结明主之知擢处道山尚迁俊轨虽百家之富未及于盛际而四部所蓄孰比于秘藏嗟朽蠹之日侵亦校讐之几废倘絕意轩冕之进能垂精竹素之间竭其心思磨以岁月岂惟辨正于讹舛抑以多益于见闻远业采昌贵名增重此时册府其推为行秘书他日玉堂信可谓真学士有如衰朽喜见豪英顷闻札闱之言颇以里俗为念知所存之甚大致相与之尤深强饰芜词以酬雅眷文不足以意或可通

回赵昌甫监岳【蕃】 启

书寄鳬飞喜见章泉之姓氏亭名鱼计曾观小宇之赋篇惊二宝之俱来顾千金其何算伏惟【某官】学緘八索识洞九流虽离郑甫之居犹是赵家之玉旧传文献不知几世渊源时出词章自然一种风气流传寢广慕用良深恨无半面之恩忽枉五云之贶惟上饶夙名于佳郡而南渡犹多于寓公东莱文清之重名典刑斯在南涧稼轩之妙语酬唱相从接絺绘之王杨为衣冠之巢许到霜降水落之後擅日光玉洁之称不图加念于陈人使得远沾于賸馥矧倦游既久得谢重来慚共政之无堪叹妨贤之已甚屡尝求去犹苦留行阳杲杲其未光首肃大昕之蔼景翳翳以将入尚通残客之来当血气之既衰以筋力而为礼心存北阙欲报未能日暮西山不归何待况兹踰七望八之际安有骈四俪六之工猥以芜辞妄希雅好曾不尽意无以为顔

回张伯修【汝砺】 结交启

贵贱虽殊无不须友以成者交游当谨必先择善而从之愧我非才误君永契惟朋友实为士之急务故古今以备人之大伦不取乎挟有勲挟贵挟贤每求夫友多闻友直友谅是以合志则一朝倾盖如故或至兴思则千里命驾而行道义所存器重如此古人混混去不返俗子纷纷何足云倚贵势以为山视贫交而如土平时相遇虽欸诚伪尽少物所重则仇隙顿成经一死生因以知情者多矣临于利害卖而取宠者有之岂能无媿伐木之诗固已不胜谷风之刺

怅圣贤不可跂而及顾风流孰能坐而还舍君其谁当今何逊伏惟【某人】勃率为理窟慷慨真人英器大难容反为下士所笑才高无用直以巨儒自期思得同志而与之偕游故凡庸才皆不足为伍肯许陈余之刎颈未逢范氏之杀鸡遇无易之交朋过辄忘其姓字时惟公琰威重有守独与祖希情好日隆同心之言臭如兰乐则生矣君子之交淡若水久而敬之惟情不可间而疎故人皆欲得而友退量陋质敢侧英游初期莲社中不许谢生居其列岂意竹林下乃容向秀预其流畀以雄文深为缙礼咳唾已成珠玉宝掷地当作金石声实昭盛德之过谦益使小人之不称钥区区何数断断无他虽相距一望之遥恨未谐半面之雅讲闻高谊日久矣岂若吾身亲见哉将抱季任之币而愿交于下风乃尽嘉宾之心而獎成于後进钥敢不竭愚者衆慮之得裨上性就学之明终身无变于炎凉一节不渝于风雨同自同异自异吾懒为玉川子吟我用我卿用卿君毋作庾中郎语

攻媿集卷六十二

卷六十三

钦定四库全书

攻媿集卷六十三

宋 楼钥 撰

启

代贺魏王判明州启【以下十五首代先公工部】

恭审显册中颁价藩易镇任隆分陕久推大国之王宗茂强周咸仰吾君之子传闻四远懽喜一词恭惟【某官】庆席璿源辉分宝绪天球不瑑中全温粹之资金监洞开外广精明之照为善深知于最乐退朝有若于无凭节旄兼两镇之雄劔佩领诸侯之贵启封安化旋赐履于大明出殿宛陵复分麾于东甬静练方赓于妙句昔儒已沸于欢謠遵海而南振元戎之号令自江而左分皇上之顾忧先声所临疲俗胥庆未听教条之施設已蠲闾里之叹愁不知官高卑耸藩维而增巩弗违顔咫尺来休闻于无穷【某】连蹇孤生衰颓末路为郎粉省屡陈过辇之忠假守莲城寻窃乘轺之遣偶缘瓜李之避苟安桑梓之居方兹需制幕之期敢意忝戚藩之属二天在望分甘此日之杜门广厦俱驩尚几它时之曳履

代贺史丞相【浩】启

恭审显膺帝制荣正台衡总宥密之大权兼文武之重寄华夷震衮朝廷尊严恭惟【某官】有王佐才负宰相器开天辟地际千载之亨嘉旋乾转坤赞一人之号令声动四海礼絶百僚岂惟崛起徒步以至公侯所谓优游都城以取卿相自星郎在列已依前位之星及月寺为卿又近重轮之月惟旧学甘盘而帝心久矣简在故爰立传说而士论犹以为迟进既攀于龙鳞归得承于鹤髮老莱子以彩衣为戏岂若衮衣之荣太夫人乘轻轩而游宁及鱼轩之贵增二府之门第破四明之天荒由古以来于斯为盛然而位望益重身名俱荣上有相须致太平之心又有高拱操成功之意京洛愿王化之复搢绅冀公道之行三军五兵之问既至于庙堂一日万几之务又赖于帷幄盖春秋责贤为甚备而丞相得君为最深当此秉钧之时宜适投军之会继伊周之事业用尧舜其军民自然拯中原故境之人追尚父中书之考【某】老于州县辱在泥涂惟能守分以固穷尤拙乘时而射利刘尹知己虽自知而弗如荀令进人将不进而无已仰銜恩施亲见盛时听白麻于九重深喜缀鹄行之後磨苍崖之千丈会当观鸿烈之成

代贺叶丞相【顥】启

恭审涣号大廷晋班左揆外领机庭之重兼提史笔之严宗庙晏安华夷震叠窃以宣王兴周

道允资元老之壮犹盘庚告商民必任旧人而共政盖功名满人视听固用舍为国安危况寝兵措刑方极帝王之盛将擢士拔卒以为将相之储矧惟宗工尝参揆路远姬公于王室何以使四方之迓衡置裴度于岩廊自足使两河之听命亟登上宰庸副具瞻恭惟【某官】正色立朝精忠许国自任天下之重深结人主之知持论弗阿笑首鼠两端之陋居官不苟扫狡兔三穴之奸士夫敬之如神朝野倚以为重擢从禁路处以衆途独持文武之权实行宰相之事主张公道兴起治功夫何谗箭之深至彻凝旒之侧方当名实之综核肯容邪正之混淆初未辨是非几类市中之处及大明黜陟卒麾瓜上之蝇亟颁赐环入对前席暂登枢府之寄式宠衮衣之归金瓯久覆于姓名玉铉正须于调燮召词臣于紫禁都人知拜相之荣宣大廷之白麻公议贺得贤之盛九州四海万口一辞上方注意于太平公亦同心而辅政臣作股肱耳目拜有虞戒禹之辞尔为麴糵盐梅膺高宗命说之训当圣贤相逢之会信社稷无疆之休益展经纶以臻康乂【某】依人最久荷德深深一闻成命之颁百倍輿情之喜兔葵燕麦固匪春风之上游马渤牛溲愿为药笼之余物

代贺蒋丞相【芾】启

敬趋宸陛俯听制麻恭审爰立巨贤进居端揆朝廷肃静宗祖泰和【某】窃以人主必观其所用之才宰相必视其所养之气惟胸中之素有不可及则天下之事皆不足为盖尝论古之人求气之说虽霍光之不学与周勃之少文惟其器质之浑全致此功名之翕赫使广之以絶人之识加之以济世之才则其视三代之臣可无愧千载之上久闻是语今见斯人恭惟【某官】为国元臣受天异禀德行冠四科之首真成顔闵之流文章承三变之余迥出王杨之右家声甲于江左誉望高乎斗南议论依至公澄之不清挠之不浊进退有余裕来非可招去非可麾蚤结眷知遍仪华要凡一时清切之选以数岁周旋其间矫矫蛟龙虽已得于云雨乔乔松栢曾不改于岁寒极论思献纳之工见辅赞弥缝之妙果膺大用以具副瞻当圣君居九五正位之尊以太平惟二三大臣之责然而治体未定国势未振虽甲兵之问不至于庙堂而愁叹之声尚多于田里当途之士盖曰欲之而不能命世之才独恨求之而不得比适宰司之虚席独因逊牒以矢辞姚崇之说明皇是陈十事千秋之寤孝武端为一言凜然有王佐之才卓尔当天子之意九重动色岂欲当馈以叹萧曹四海得人大似选衆而举皋尹志存经济身佩安危必欲士夫息奔竞之风上下无苟且之意富国强兵于岁月之顷移风易俗于礼乐之中迓衡之期拭目以俟【某】一介何取半生无闻窃郎宿之虚名将遂及瓜之代仰台星之腾实深贺厦之诚庶几么麽之踪预在生成之列

代贺浙东安抚蒋丞相启

恭审诏出中宸将复钧衡之旧权分巨屏姑烦袞绣之行邮语四驰欢声一律恭惟【某官】气全刚大学造精微倡诸儒以六经之文允谓天民之先觉举明主于三代之盛亶为圣世之宗臣于垂绅搢笏之间负旋乾转坤之任维持国是振举朝纲治已向于迓衡悲遽纏于陟屺上方待公以共政士以夺服而为荣虽眷宠之优隆念析陈之哀到五使衔诏莫回终制之诚三年执丧必待变衰而起惟开元之际共高于张说而嘉佑之时独见于韩公三人相望千载同仰甫及祥琴之御亟分帅阃之雄冷然御风姑少留于蓬岛举而见日曾不远于长安福及

京师心在王室高牙大纛往分东顾之忧黄阁白麻行正左虚之位【某】退惭顽黷素出陶熔迨兹一障之乘又托十连之属治大府而受约束恨无鳬舄之飞如厦屋之为帡幪自喜燕巢之稳

代贺范舍人【成大】启

伏审宸庭疏宠词掖升华窃惟中禁之班莫重西垣之选弥纶世务论思居谏诤之先荣辱一言惩劝出赏刑之表动关国体荣冠朝行名儒既登善类相贺恭惟【某官】学耽八索才本六经分东方诸侯之符俄促归于凤阙秉南宫舍人之笔遂进立于螭坳比求肤使之行无出明公之右戎酋相顾不知李揆之肯来士论私忧或言韩愈之可惜抗穹庐而不挠全故壁以复归天颜为开国势增重径上紫微之直快吟红药之阶虽儒者最以掌制诰为荣而人言犹有典属国之叹眷之方渥进用未央变污俗而制典谟正赖文章之润色游都城而取卿相会摅经济之规模【某】托契颇深受知尤厚静守贤侯之范喜闻内史之除大厦穹崇窃自同于燕雀飞黄腾踏愿少顾于蟾蜍

代通婺州王给事【曦】启

灏水开藩误蒙知己琐闼批敕屡幸趋风迨承山郡之流复窃宝隣之庇夤缘有自欣拚实深恭惟【某官】道学渊源文章典丽家藏郑公甘棠之笏架插邺侯牙籤之书掣碧海之鲸鱼笑翡翠兰苕之戏运天池之鹏翼隘鸞鳩榆枋之飞蚤登瀛洲径跻禁路肩险夷之一节际亨嘉于千龄忠若子文仕无喜已无愠情如徐邈昔非介今非通録旧学之多闻冠近班之异渥药阶苔砌方欣星掖之重游鲈膾蓴羹又叹风舟之引去欲前半夜之席暂分千里之麾陈义甚高急流勇退清风八咏岳牧姑用夫词人泰阶六符廊庙正资于王佐【某】被恩有素图报未遑偶缘瓜代之先期已造莲城而视篆小侯方事夫大国短札爰具于遥怀鲁之击柝闻于邹敢谓相依于唇齿楚之余波及于晋尚期曲赐于帡幪燕寝优闲暑风清润愿精调于茵鼎伫入秉于钧衡

代谢户部侍郎举陞陟启

下走无能谬忝花城之贰当途过听误形褒字之褒一经品而便佳三下拜而受命宠踰望表愧溢情涯窃以选之之公今昔攸重近观所为主人固不易知惟一心湛然妙絶冰壶之清澈虽万物纷至难逃风鉴之毫厘见诚过于百闻辟或由于三语使不言则子几失矣观其眸则人焉廋哉未有断然于稠人之中举之于千里之外自非俊彦曷称褒扬如【某】者术与世疎能如命薄生而多难天与数奇斗筭之才亦何足算儋石之禄祇益可怜半生从事于下僚再转为丞于百里躬亲丹墨日困秕糠蔑有哦松而自娱行矣及瓜而受代着身卑穴絶望品题敢期一纸之春风忽到穷山之寒谷退不知据得之若惊兹盖伏遇【某官】高识絶人大量容物绣衣金节屡宣江上之风月寺星曹更近长安之日进司民部简在帝心深欲以人而事君尤喜屈身而荐士伯乐回顾自宜十倍之增匠石挥斤猥及百围之散涸鲋已蒙于升斗羣蚊难负于丘山【某】敢不益守官箴深緘荐墨小人怀惠藏在寸心国土报恩见之他日

代贺林左史【机】启

恭审拜命中宸书言左陛故国非谓乔木赖有世臣我家再得青藜是为旧物望高位着喜动搢绅恭惟【某官】德度粹夷道源渊奥扫千军于笔阵敢当我哉快独步于词林无出右者结绶丹墀之上横经朱邸之深重晖重轮早依光于日月从龙从虎终感会于风云起分千里之忧已着九重之眷爱膺严召入覲清光高宗学甘盘尚记宅河之旧孝文见贾谊果膺前席之褒欲亲咫尺之威颜仍典起居之记注珥螭坳之笔岂惟富贵之逼人乘凤阁之钧会见功名之报国【某】披云未遂仰斗徒勤属分山郡之铜符阻奉侯门之珠履闻置邮之传命庆朝廷之得人夏屋渠渠方托帡幪之庇?梦魂栩栩恨无羽翼之飞翻

代贺汪舍人启

恭审光膺宸綍进拜词垣搢绅钦稽古之荣制诰见代言之体正人登用善类依归恭惟【某官】识际天人道隆今昔渊源奥学倡诸儒以六经之文挺特高风立懦夫于百世之下秉赤心而自许箴丹扆以结知堂堂坚许国之忠蹇蹇有爱君之节密居螭陛非尧舜之道不敢陈进批龙鳞虽贲育之勇不能过伏蒲论事名重日边埋轮击奸风生江水亟被赐环之宠载归珥笔之联承亲擢于中宸陟清班于西掖阶翻红药谢公徒詫于风流日对紫微白传漫矜于清贵兹惟盛德高视古人首正官联用明旧制大开公道以塞幸门圣君深纳其忠嘉多士想闻于风采究观今日谋谟之懿可见异时经济之功号令一新固已追踪于姚姒规橐素定便将接武于皋夔【某】假守何堪依仁有幸大厦成而燕雀贺知无风雨之虞灵丹化而鸡犬升自有云霄之望

代谢除提举福建市舶启

分侯麾于古括始终蒙全护之私总商舶于温陵委曲荷生成之赐窃以番禺置使传自有唐闽峤庀司起于元佑金山珠海磊砢乎万宝之藏輶輶航琛奔走乎百蛮之广楼船举飘而过肆贾胡交舶以候风岂惟贸易而求质剂之平抑将绥怀而致声教之被是为遴选必藉通才如【某】者少也多艰壮而漫仕驰驱四纪备尝州县之劳黽勉一心尤谨简书之畏抱虚郎省滥吹朝绅念尸禄之无功以治民而自诡试以一郡逮于二年布宣诏书不知万里君门之远施行义役庶几三代井田之遗幸年谷之顺成致闾阎之安静益勤抚字以免譴诃闻尚书之履声理应退听扫舍人之门外自恨无阶敢谓大钧弗遗下体未作乞怜之态已叨拜命之荣仕而为贫瓜戍既欣于非久思不出位樗材或得以苟容自为之谋岂过于此兹盖恭遇【某官】清朝硕辅名世真儒雷厉风飞君臣相遇于千载天开地辟日月可冀于中兴顾在上引类自其本心而为官择人尤为急务至如下走虽曰无以逾人察其平生必知老而戒得俾司互市实出殊私【某】敢不俯激懦衷愈全晚境慕隐之之节饮贪泉不易其心效孔戡之清罢货燕无名之费倘逃瘵旷以报使令

代通交代李知丞【浚】启

对松而哦自?龚丞之老及瓜而代又迎贰令之贤顾今日之交承真一时之会遇心未降于既见齿已幸于相依恭惟【某官】性稟中和家传清白一行作吏功名小试于着鞭三载陟明才术已闻于游刃宣勤劳于莲幕通姓字于金闺方嘉运之鼎来宣亨衢之阔步仕择人而人不择仕姑为金濂之游丞负予而予不负丞应起蓝田之叹学美崔生之博清推景倩之真去则行迟谁非恋父母之国闻何来暮其如兴民吏之謠豫想登仙兹为假道涉笔惟谨居然视雁鹜之行黔突未几行矣筵驾鸿之列【某】半生从宦再转为丞徒甘州县之劳反出簿尉之下?如栎之无用愧若糠之在前虽旧尹之政必告新然老者之志不如少材不足塞既久负于曠瘵玷或可磨当益劳于砮错

代通苏通判【师德】启

恭审疏恩玉陛贰政金陵居百里而负丞仰二天而托庇时方会遇喜倍伦夷恭惟【某官】学殖深醇材猷敏邵泉如初涌共推大手之才山或可移难变至诚之节名家最久治世益新明良相会于半千阅閱当今之第一纶綍蔼玉堂之誉鼎彝书凤阁之勲惟别乘之多才信高门之有子眷言建业今号陪京罗绮一城富六朝之风物弦歌千里绵百世之衣冠山川分龙虎之形甲冑冠貔貅之勇忧寬西顾任重维藩尤资贤治中以佐明太守畴兹异数属我真贤已腾来暮之謠更听不空之颂始展骥足姑凭泥轼之荣真有凤毛行拾青毡之旧【某】材如樗散性若枣昏猥承弓冶之余谬缀簪绅之列半生从宦徒甘州县之劳再转为丞反出簿役之下及瓜将代幸追前愆杭苇欲归深虞後患既托帡幪之下谅寬鞭策之求双舄愿飞恨乏仙凫之便戎幕知稳果无巢燕之危瞻霄汉之仞墙寓腹心于尺牍方盛德之在木惟卫生之有经祈为宗祊精调茵?

代贺邓运使启

伏审荣拜纶宠持使节恭惟懽庆窃以自江而左最为财货之源由古以还夙号膏腴之地菽粟有如水火山川不啻金汤十国为连尽承风乎外府三军分驻皆仰食于太仓矧转输于千里之劳而储蓄必九年之富欲责成于列职必也使乎肆图仕于旧人无如公者畴兹大任属我真儒恭惟【某官】望重吏师行为世则志澄清而默断用耆驩以无留元非百里之才多多益办小试一同之地绰绰有余虽儒者当任于谋谟然利器必更于盘错狗盗鼠窃曾何置于齿牙蚁聚蜂屯固不劳于才刃奸蜂逆挫荐牒交驰谓割鸡焉用乎牛刀处别驾始展其骥足铜章墨绶聊自乐于弦歌泥轼星屏俄平分于风月任居刺史之半人仰治中之贤邦国不空繫实王祥之赖老弱从借乃许寇恂之留由万家而治十万家自千石而陞二千石吏民乃服其教化草木亦知其威名即地按临方剖东州之竹拂衣归去空余南国之棠惟守正以不阿乃既蹈而复振伯道载米而之吴郡已为良守于中兴次公受诏而归颍川终云治行之长者欲立赏以劝百辟岂私惠而庇一方赐爵关内侯有昔王之盛典增帙部使者见今日之殊恩邦人腾挽不留之歌江国兴来何暮之叹星随骏駟风靡列城曾未布于教条已想闻于畏爱木牛流马非以居材金节绣衣于焉借重谅未容于暖席行即膺于赐环【某】孱琐无堪衰迟有素半生从宦敢辞奔走之劳再转为丞犹惧旷瘵之消久欲执鞭而从轡未遑持帚以扫门念小吏之人疆际钜贤之持斧驾驥策蹇讵敢自安含垢匿瑕不无所赖双舄无据曾莫

効于皐趋大厦既成徒自深于燕贺

代贺徐提刑正旦启

行夏之时爰重建寅之统采周之旧式谨次王之书惟道与时而偕行宜福如川之方至恭惟
【某官】爽邦哲匠名世大才荷宸扆之眷知俨使台之威重明刑以弼教懋哉期于无刑听
讼吾犹人必也使之无讼比期年而报政与十国以为春茂对三朝倍膺百倍【某】职卑而
亢道阻且长宾履蹶珠遥慕簪庭之礼壽觴浮柏莫陪进酒之仪

攻媿集卷六十三

<集部,别集类,南宋建炎至德佑,攻媿集>

卷六十四

钦定四库全书

攻媿集卷六十四

宋 楼钥 撰

启

代贺王枢密【伦】奉使回启【以下五首代舅氏汪尚书大猷】

交邻国有道乎大而事小遣使臣以礼也远而有光自昔才难于今任重十九年诚着夷狄孰谓世无苏子卿数千里口伐可汗必有人如郑元璫惟乐天者保天下故和戎而得戎心乘轺之人衔箠于道临轩优造固盛世之非常杖节请行实大臣之未有扬旌亟去缔两朝鱼水之欢接浙言还际千载风云之会神人喜乐河海晏安么麽至微驩快以拚恭惟某官有宰相器真王佐材量括江湖不清不浊气充天地至大至刚貌不胜衣心匪转石言而造膝非尧舜之道不敢陈议或犯顔虽赍育之勇不能过愈膺眷注浸历清华快吟红药之阶久寓紫微之直敏悟如廷硕时诏诰皆自为之文精壮若燕公大述作类皆出其手进贰枢府增重圣朝运筹于帷幄之中折冲于樽俎之际上方安边境于无事时乃坚和盟于未寒礼云礼云岂玉帛乎哉使乎使乎安国家可也谓虞臣之相逊彼或一时命裴度以往厘正在今日确持志士之操果为天子而行帝曰汝谐金言惟允身轻一叶佩四海之安危名重泰山耸万夫之风采分忧北顾顒望东归马维驹马维骐方听黄华之选雕集栩雕集杞已闻四牡之来生灵获按堵之安宗社有覆盂之固孤忠凜凜驰不测之深渊万目睽睽仰难逢之盛事欢传土宇喜动天顔去握汉旄固已虚上台之席归调商鼎何待趣舍人之装行慰具瞻即膺爰立某寒乡冷族艺苑散材虽知必学于箕裘未免徒劳于州县寡交于世知己惟公顾兼葭之柔曾倚身于玉树蟾蜍之拙难追步于飞黄谁知霄壤之殊途不替金兰之旧分比干寸禄进拜崇墉方彭彭驰使者之车而恋恋有故人之意将曲成其羽翼乃特借以齿牙俾扫齐门护参俭幕受丘山而有自効蛇雀以无阶俯听先声莫负蜀郊之弩辄寻故步重瞻夫子之墙敢泚笔于下风伫宣麻于谷旦

代贺钱枢密【端礼】兼提举德壽启

恭审光奉宸纶进参枢筦天子侍龙楼之膳仰裨孝治之勤圣恩加书殿之名增重本兵之寄神人欢喜宗社晏安恭惟某官才为时生美由世济学究六经之蕴识穷庶物之原绀帙牙籤插架固踰于三万漆书竹简撑肠何止于五千发华藻以为文出绪余而饰吏果由治行自致功名践敷仕路之深密勿从班之久属远夷之弗靖眷边境之多虞洵遣侍臣往宣德意星轺两使尽清千里之烟尘羽扇一挥坐变三军之风采谿度机事明若着龟确守成模坚如金石远膺芝检来对枫庭君必有尊盖以天下养也时方多事要当马上治之自非膺眷遇于两宫

兼文武之二道安得被家令赐金之宠赞元枢总戎之权父子无难言之嫌繁公是赖庙堂销未形之患舍我其谁久难其人今得此选自闻拜命念曰当贤虽李卫公之高才素耻由于进士而曹侍中之故事特先赐于儒科积此恩荣可知注倚边声未寂骑 方高顷在金城固已图上于方略今居西府自应制胜于朝廷位高则任隆名盛则望备尽平时欲行之事当今日可为之秋愿思君臣遇合之难以济国家恢复之业【某】劾官何补蒙眷数深侧闻涣汗之颁倍极輿情之喜兔葵燕麦固匪春风之上游马渤牛溲愿为药笼之余物

代贺钱参政兼知枢密院启

恭审荣膺宸綍进贰政机兼特右府之权益壮本朝之势邨音一播舆论交孚恭惟【某官】德量恢洪勲名赫奕传龟袭紫伟冈头泽底之家耸壑昂霄擅日下云间之誉早膺睿眷寔历华途游刃不见于全牛利器岂拘于错节外台辅郡着藩宣屏翰之功清列近班备献纳论思之益顷以边庭之未靖尝持使节以请行风清塞北之烟尘名震淮南之草木折冲樽俎之上运筹帷幄之中方邓鹗欲弃凉州微升卿几误国事惟营平固守明诏谓宣帝可为忠言披胆莫回噬脐增悔以身徇主岂欲得先知之名转败为功自难掩孤忠之节亟畀芝函之宠峻跻枢筦之权虽士气之已振尚兵衅之未解力裨圣算先遣轺车嘉谋无胶柱之拘天意有转圜之易垂绅搢笏坐致元功曲突徙薪终为上客宜进参于黻黼俾益究于宏规士夫喜公道之行中外欣王化之福惟夷险不踰于操守故始终尤被于龙光大臣虑四方玉铉方资于调燮人主论一相金瓯将启于姓名某窃禄无堪荷恩自旧侧听丝纶之播不胜燕雀之私邻哉邻哉方庆明良之遇人耳人耳愿归造化之余

代回高参议启

假守南州方遂奉祠之词拜恩中道忽叨谋帅之行曾修问之未遑媿貽緘之先辱伏惟某官精忠报主妙略济时英英故国之耆儒表表清朝之雅望一门父子喜富贵之鼎来万里功名谅规橆之先定岂谓着鞭之晚尚淹入幕之留蔚相扶炳相辉适有同寅之幸起而言酌而祝尚资婉画之余

代回陈节推【榘】启

擢首选于汉廷耸闻雋誉置外员于俭幕是曰异恩曷迟吾行愿快先覩伏惟某官东嘉胜士西洛别传视将相之科真拾地芥陈治安之策若吐天葩顾上游实为馆殿之储屈故事尚劳州县之职青云器业具在斯人欵緑水风流颇有此客否首勤高作来访陈人骈丽何工褒嘉过厚闲而成嬾既乖桑梓之恭言不能文又媿琼瑶之报

代谢直秘阁启【以下四首代知温州曾吏部逮】

假守偏州方媿承流之选陞华中秘遽蒙增秩之褒揣已无堪归恩有自伏惟某稟资甚陋涉世尤疎十上空归莫售家传之学一行作吏但遵父教之忠素甘薄宦之驱驰敢意清时之差

择容台议礼仪博聚讼之嘲畿甸持刑上广好生之德进貳唐朝之铨选预参汉代之章程忽去国以难留只杜门而自省偶属东嘉之空乏俾分南面之顾忧被临遣于丹陛之严受要束于黄扉之邃俯矜羸俗惟恐其伤虚受瞽言其应如响邻封移粟来苏待哺之民下户蠲租尽革剥肤之弊赤子既寃于无告青史遂书于有年皆圣君施舍之恩繫上相燮调之赐苟逃旷戾已剧饶逾乃论尺寸之劳诞布丝纶之宠重念流离粗免凋瘵尚多倘守臣安受于误恩则事体遂同于佳郡虽循墙而力请曾反汗之无闻风阻三山尚觉去人之远云兴四岳遂沾零雨之余兹盖伏遇【某官】道德宗工朝廷元老天开地辟会千载之明良雷厉风飞冀中兴于日月深念专城之重务先良吏之求苟片善之有闻无一夫之责备坐令么麽亦玷褒嘉【某】敢不益励弩才深图雀报仙凡复隔无从读石渠东观之书今昔何殊尚当奏渤海南阳之课

代贺虞丞相【允文】启

恭审宸章焕发肇更夹辅之名制册随颁爰正左虚之席仰观盛事高掩前闻窃以阿衡左右商王作相必兼于仲虺姬旦股肱周室为保亦资于召公下及两京以还寢隳二代之典虽大臣之委寄自若而历时之位号不伦至用秦官领事之称以为唐室中台之长大圣君之有作复官制以聿新非为远追孔子正名之言抑欲遂行宣帝责实之政肆畴上宰首属宗工恭惟【某官】千载真儒两朝元老蕴仲舒佐王之学负孟轲命世之才竭忠力以事君肩一心于夷险出绪余而应事了万变于笑谈勤劳何止于十年往返动踰于万里凡四海危疑难办之事廷臣皆敛衽而莫当求一时刚果敢为之人天子必虚怀而相属手持威柄身佩安危王曰勲国曰功顾持书而未已出为将入为相宜注意之尤深臣主俱贤纪纲益振尊归慈极赞九重孝治之心位正储闈建万国元良之本总衆职以遂大有为之志讲内治以成不可胜之资当稽古建官之时选衆而举膺奋庸熙载之任舍我其谁兼提枢筦之权进极文阶之品汉仪复见一新昭代之观瞻周室中兴会见神州之克复【某】久蒙知遇猥被使令方欣黄合之开洵喜白麻之播用汝作舟楫仰知济川独任之专以我为镆铘遽有跃冶自言之意

代贺沈运使【复】启

恭审天陛拜恩日畿授节木牛挽粟荣分使者之权龙马负图宠冠奎文之直列城耸动公议倾依恭惟【某官】造道深淳受材高劭漱六经之芳润摘章惊絶代之工究千古之兴衰论事有适时之用顷趋严召自结深知谓公等皆安在耶信明主一见决矣郎潜省户坐腾列宿之辉使行边庭尽护长淮之境总师屯之万竈供日费之千金民不告劳士皆宿饱试之冯翊益知治行之高任以关中要资饷馈之给岂惟见研桑心计之妙行且膺严吾从臣之求于焉假途宁俟暖席【某】夙蒙知獎兹属部封顾惟千里之凋残犹赖二天之庇覆轺车澄按冀舒雅拜于前尘峤海阻修莫厕贺裾之下列

代贺吕运使【正已】启

恭审光被宸命宠升使名九重益厚于眷知列郡愈严于风采恭惟【某官】高才絶俗奥学

传家纳万顷于云梦曾破大觚于霹雳手钓璜渭水屹然尚父之功名听履汉廷伟矣尚书之人物践馱中外备历险夷比讲邻盟独膺亲擢方张旆而远聘俄全璧以来归首加部使者之称独典属国之恨倚毗方重进用未央伫登紫橐之华径取青毡之旧【某】辱知有素赞庆尤深大厦之庇千间夙荷帡幪之赐洪河之润九里愿承沾丐之余

代谢知温州启【以下二首代知温州王待御伯庠】

承流蜀道初无保障之功更治瀛壖复得股肱之郡俯慙侥幸欣载生成伏念【某】少已无奇晚尤多难十年不仕惟真祠香火之依一札俄颁岂生平梦寐之及曾箴片言而悟主未知何自以为郎方评兰省之文忽冒柏台之选遇事辄发初不顾于憎仇有知必言誓少酬于眷獎久为怨府卒蹈危机但求阖户以省愆敢意分符而起废叱驭而进仰追鼻祖之忠勤鼓盆而歌有媿蒙庄之了达号啼塞耳忧患薰心愿休退于田庐姑召收于魂魄讵闻袞服之贵下軫绋袍之思授以辅邦遂其私计俾控瓯闽之要许寻王谢之风江海一来难冀修门之重入山川相望惟思旧隐之可归兹盖伏遇【某官】道德佐王谋猷济世大开正路期立致于太平独秉化钧用陶成于善类有如朽钝误辱矜怜【某】敢不澡雪精神究询利病奉寛大之诏务使及民劳抚字之心以报知己

代贺史开府【浩】启

恭审颁册九重视仪三事节旄前道聿严帅阃之雄袞绣交辉爰宠帝师之旧允为异数宜属宗工恭惟【某官】忠冠两朝道关百圣体仁蹈义声名如山斗之尊聚精会神君臣不胶漆而固当天开地辟之际赞雷厉风飞之机天下日向于太平王化亦几于复见晋公巨德归为緑野之游谢傅高怀终为苍生而起会稽辅郡曾衣锦衣闽峤大邦更凭熊轼上笃潜藩之眷恩先召节之来前席受言改容加礼台廷虚左方图上宰之求制綽自中首?多仪之备参鼎司之崇品隆岩石之具瞻锡賚便蕃燕飧优渥贵盛絶诸公之右荣宠萃一门之中高宗旧学甘盘未见报功之及武王维师尚父会闻授任之均【某】素辱殊知仰钦成命属有郡章之系莫前宾合之趋萧曹同心咸愿股肱之夹辅瓯闽接境敢睎□齿之相依

代魏丞相回赵明州【伯圭】启

将使指于龙庭曾无微効代王言于螭陛遽辱误恩方自媿于抱虚乃亟蒙于赞喜恭惟【某官】才高玉笋秀毓银潢人推子敬之明经自许东平之乐善享太守之禄二千石屡宣屏翰之勤赐列侯之印十九枚益见本支之盛行被芝书之宠即归荷橐之班【某】久辱眷知兹蒙推借朋弼遽及可知君子之谦谦交态益深备见故人之恋恋

代龚参政回广东林提刑【光朝】启

入处从班已慙过分进参机务益愧非才首勤庆牒之临尤佩海辞之切伏惟【某官】学穷古始识造几先六艺渊源得圣涯涵泳之乐一时名胜多残膏沾丐之余比专璧水之主盟将

掩桥门之盛际乃从雅志往接遐方文翁之守蜀邦常袞之使闽部正藉远扬于声教岂惟详试于刑章毋为揽辔之淹会有赐环之宠顾如匪陋误被柬知忽叨共政之图悉自更评之助疾颠是惧请益无阶兹闻提耳之言当谨书绅之戒陈耽先用殊有太丘未登之慙乐正无闻恐孤孟子不寐之喜尚期弗弃警所未知

代莫给事【怀】贺曾丞相启

恭审光奉制麻进登揆路华夷填服宗社晏安恭惟【某官】学殖深淳器资闳博千载际聪明之主十年居侍从之班本末源流知天下之大计论思献纳见王臣之匪躬顷贰政机密参国论辅赞藏诸用不言房杜之功仁义事其君岂为管晏之烈天子意可使为相朝廷谓无以踰公正夹辅之名方革秦官之陋蕴太平之业况传鲁国之余一闻爰立之传实允具瞻之望【某】受知最久假守无堪不胜贺厦之私敢致飞緘之敬自怜老矣方日念于故山倘遂归欵尚许全于晚节

代仲兄【锡】谢监左藏库门启

谪狱南徐曾无善状司阁左帑遽冒中除误叨特达之知倍费生成之力窃以剖讼之际自古所难吕刑谨两造之情周官备五听之制虽三尺从事固自有法然片言折狱存乎其人仰惟列圣之朝尤广好生之德凡婴罪戾咸剧哀矜用隣邦之吏以絶请求择练事之人以加详密孰谓清强之选猥先寒晚之流有何微劳当此殊遇伏念【某】受才甚陋学道未深名粗齿于荐书仕仍由于世赏铨曹试律虽少知司空城旦之书户掾兼官顾岂是柱後惠文之手偶上司之过听付疑狱而使评三省吾身樗材奚取一行作吏墙面是忧况縲紲之中或非其辜而箠楚之下何求不得閱简书而致察束桁杨而不施公心以观三日而决正自惭于拙速亦何有于平反因获瞻上相之光仪固已剧此生之荣幸敢图大造俯念孤踪雀角鼠牙未知明辨牛溲马渤首辱兼收坐令下国之参军来职中都之外府奸胥锄治虽云狡穴之已空宝藏所储或恐蠹原之未尽出入亲临于朱墨启闭尤谨于晨昏时乎为贫孟子亦容于击柝各从其志望之自乐于抱关上得近于恩闕下不妨于吏考深知侥幸曲赖陶甄兹盖伏遇【某官】夹辅圣君共康大业羣才并用或下采于刍蕘片善不忘顾岂遗于葑菲致使斗筲之贱亦沾肤寸之余【某】敢不澡雪精神感藏恩纪既以备笼中之蓄讎敢貽门下之羞今日遭逢本非梦寐所及他时报効要当生死以之

代陈叔扬【大年】谢兴国军教授启

持帚相门屡瞻公袞横经侯泮辱在化鑪揣已无堪归恩有自伏念【某】涉道甚浅接物最踈不能饰貌以动人且无曲学以阿世永为大父独立先朝正色不回志必期于去莠着书自见心常在于尊尧虽孤忠劲节每挫抑于强臣而潜德幽光终暴白于昭代传家有法遗子以安学焉记问礼之言仕者守教忠之训一经未泯贱子敢忘滥踵世科几周岁纪奉真祠之香火两痛家讎司絶徼之贸迁适开边衅妄论天下之事慨上公车之书虽幸彻君门之九重犹未试铅刀之一割坐閱星霜之变不知升斗之谋壁立自怜瓶储不继投诚大造自忘跃冶之

非厕迹嘉宾时遂曳裾之愿驢头鼠目何敢求官马渤牛溲庶几待用赖钧播于小物俾客授于南州好为人师素守孟轲之戒此非子坐恐招有若之讥既逃州县之徒劳仍有弦歌之可乐无非侥幸端有夤缘兹盖伏遇【某官】旋斡化钧主张吾道内治外治既陶万国之泰和小成大成仰赞一人之化育善类悉归于真宰危踪尤累于洪钧夫何孤寒有此遭际【某】敢不益坚素节不负初心学不如务师曾焉知于善诱教然後知困顾敢忘于自强庶上副于眷知用少图于报効

代范孝隆【栋】谢提辖文思院启

扫舍人之门方欣进拜备事官之属遽辱生成揣分已盈戴恩无艺伏念【某】才如樗散身若蓬飘不能饰貌以动人目无曲学以阿世偶凭门?获厕官联太上皇方御于飞龙先丞相实同于附凤言言正色独输蹇谔之忠耿耿一心共济艰难之会旋居元辅以佐中兴依日月之末光会风云之盛际生前相业但为社稷之谋身後生涯肯作子孙之计适权臣专国而方恣致故家无地以自容屏迹山樊但知畏影冥心宦路敢望求伸欣逢更化之初始兴干禄之志犹念一经未售莫振家声百技无长不为世用顾时命之大谬况拙懒之相逢虽尝千里以効官又复三年之不调痛弟兄之沦落慨门户之衰颓不自植立以干当世之公卿几无面目以上先人之丘垄幸真贤之并用喜公道之大明辄弹贡禹之冠径造平津之合回思江国当叨堂下一言之知仰望台衡敢叙屏间半面之慙岂图谦德弗替昔时执轡愈恭不数信陵之义脱袍加惠犹怜范叔之寒曲记姓名俾归陶冶钝不及事幸而得之善为为谋不过此矣惟文思名官之义取栗氏铭量之言鳩燕荆胡粵之良材督郑宋鲁吴之巧匠居百僚之底虽号卑微在三辖之间颇为优简静惟侥幸冒端有夤缘兹盖伏遇【某官】吾道宗工本朝硕辅总衆职而称上意明良相会于千龄顺四时而遂物宜勲业独高于百世惟儒者在朝美政而上臣事君以人三握三吐而下士毕归一贵一贱而交情自若务尽刘翹之术不嫌跃冶之私坐使孱庸亦叨造化【某】敢不仰銜恩施俯?司存逢人而说项斯敢忘此意结草以报魏颗誓毕余生

代汪景孟【茂良】上龚参政启

程末技于省闾曾叨误听拜下风于帅阃始受真知不图沦落之踪复望荧煌之座敢陈悃悃上动高明伏念【某】学不知方器非适用少修素业惟知读先父之书壮忝末科亦尝起当时之志但欲仕途之平进耻为俗士之诡随猥缘假吏之行谬辱名公之举逮其当轴许以曳裾方文武并用之时有贤愚同滞之叹薰莸既异轨辙遂殊碌碌不为颇慕望之之从志寂寂为尔自甘邓禹之笑人岂其若将浼焉政自不得不尔集君卿五侯之味深所不能奉南丰一瓣之香徒怀自信惟集贤之门无杂宾以进故小人之身为衆怒所归独念由铨选而仕京都初非有援满吏考而为帅属止以为贫虽造物有意于提撕而揣分但甘于静退内省不疚浮议何伤克尽力于公家庶可逃于吏责忽传印绶之解是为荐绅之忧欲留孔戣固已难伸于末议不负临贺讵知反蹈于危机祠官实匪其本心化笔几成干误墨襮被而去杜门自怡追惟平生最号多蹇孤苦独立险阻备尝当此流离之时尤为灾祸之会鼓盆之念未歇陟岵之悲已深是知胶西之行虽曰公孙之力也若夫江滨之溺岂亦子厚所为耶尽捐怨天尤人之

私益广安时处顺之说数年于此寸进何言駸駸婚嫁之逼人扰扰啼号之塞耳稍收魂魄再整冠裳幸逢万物吐气之秋宁忍一人向隅之泣用持鑕质来就洪鑪兹盖伏遇【某官】得时致君以道济物卓尔圣朝之柱石凛然王佐之规模陛廉日尊藜藿为之不采威望所及草木亦皆知名惟上臣之用人无一夫之求备哀穷悼屈观过知仁顾如贸贸之来似匪悠悠而进念千里识韩之日初不知蒙眷之由而一緘荐祢之书已大有吹生之意矧是政机之亲秉实为善类之所依遂令久郁之情居有求伸之愿适会槐庭之虚席共期枫陛之拜麻广厦万间将随燕雀之贺灵丹九转愿同鸡犬之昇

攻媿集卷六十四

卷六十五

钦定四库全书

攻媿集卷六十五

宋 楼钥 撰

启

代通王明州【佐】启

恭审光膺一札移镇四明加延阁之清华示雄藩之风采自闻成命已播先声恭惟【某官】学造圣涯行为世表韦编竹简读残万卷之书玉笋琼彝压倒千人之笔才出于天人策上名冠于龙虎榜中莲幕抡才未舒婉婉之画兰台选士已闻袞袞之登立螭陛以书言接鹄行而布武俄分郡寄远畅王灵以黄霸神明止着循良之誉虽子游文学无阙政事之科未有以千载之通材兼一时之要任直节在庭臣之右治最为天下之先饱闻两地之生灵自乐二天之庇惟时鄞水实近行都海□三垂地绵千里清朝偃武久无烽火之惊潢池弄兵或恃风波之险近御狗偷之盗远防虎视之隣必欲得第一流以之为二千石忽闻凤诏更畀菟符宿奸甚落胆之忧罢俗有息肩之望帡幪伊尔桑梓知归便道过家大似衣买臣之锦近臣还阙岂惟得子敬之毡行据要津以前大用【某】夙蒙异顾近别台躔岂知闲冷之身复拜荧煌之座曾是堂前之燕知故垒之可依自怜屋上之乌因丈人而亦好

代陈福州陈丞相【俊卿】启

上公分陝聿严帅阃之雄寒士依刘叨处贰车之任爰通名于下执喜托迹于洪钧恭惟【某官】百代伟人两朝元老负特立独行之气坚任重道远之心奥学渊源根六经而排百氏忠诚挺特贯三光而洞九泉当天开地辟之秋遇雷厉风飞之主臣作股肱耳目备宣辅赞之宜尔为麴蘖盐梅尤着燮调之效维持国是进退人才士夫喜公议之有归中外知王化之将复功成而退道大不容麾分十国之连地控七闽之要故乡在望何殊朱卖臣衣锦之荣盛德若虚肯为苏季子佩印之乐经纶未究威望益隆公尚居东行见袞衣之复席方虚左重膺玉铉之求【某】学术荒疎惟资凡下迟顿不能以及事容貌不足以动人良弓之子必为箕粗守传家之旧吹竽之门而攻瑟自怜应世之乖念平生愿上于膺门而今日得游于俭府趋风伊迓抚已知荣弩马加鞭倘缓一时之驱策顽金跃冶尚希他日之陶熔潭府靖深暑风清润愿体冕旒之眷茂加茵鼎之调

代谢叶丞相【衡】奏门客恩泽启

孤踪何取妄干凤阁之元臣洪造不遗俾于龙门之下客生成有自感戴惟深伏念【某】一

介寒儒半生苦学蹉跎场屋徒坚铁砚之心荏苒岁时有愧青箱之业家惟四壁之徒立野无二顷之可耕重念严君久为漫仕心劳王事尝抗尘于三纪之间位亚郎曹竟赉恨于九泉之下弟兄孱弱门户羈单记先友于碑陰孰是金兰之旧候舍人于门外顿惊霄壤之殊敢期当路之知不忍向隅之泣念子路为曾参所畏固知事契之深有山公则嵇绍不孤尤觉义风之厚假以手援之力开其寸进之阶是何遭逢获此成就兹盖伏遇【某官】夙高耆望光辅昌辰雷厉风飞君臣相遇于千载天开地辟日月可冀于中兴方将任使于贤能顾岂遗忘于微贱至而不肖亦使有成【某】敢不俯激懦衷仰酬恩纪便当衔袖以上先垄且将藉手以战文场黄壤有知岂无结草之报青毡如在敢忘推轂之私

代通薛通判【夙】启

庠校帅儒两着佐州之效尘埃俗吏方为学邑之行获在下风岂胜幸会恭惟【某官】性资冲静经学通明文字五千渺波澜于笔下云梦八九忘芥蒂于胸中早收俊造之科径蹶清华之武先生入太学久居贤士之关博士伴双旌乃为刺史之半公论甚郁高怀自如登临洪府之江山啸咏烂柯之风月抚摩凋瘵关决是非似闻五月之政成多赖贰车之力赞龐士元之展骥其可再乎班景倩之登仙行且升矣【某】么微晚出蹭蹬半生顷辞箠楚于尉曹复较锥刀于征筦贰令海邦之表脱身选路之初任花县以无堪惊瓜期之甫及尚祈加惠俾免旷官非曰能之姑试铅刀之一割所可恃者正依广厦之千间

代通刘湖州启

建牙三辅谁无附骥之心涉笔一同乃有登龙之幸敢修竿牍仰彻斋铃恭惟【某官】闻望雷霆文章河汉穿天心出月胁英词侔造化之工嘯道真泳圣涯奥学究诚明之蕴周旋中度左右逢其源历穷千古而若在目前览百家而不专纸上義文既远尚有言传释老虽殊皆为我用惟其蓄于中者厚故其发于外也闳入仕皇都声动百寮之底出临壮县治高三异之书惟圣主以斯民为先而中兴视循吏之盛大褒卓鲁径蹶龚黄越观二十载之间不过三数人而止久难其选今见我公矧兹苕霅之区是曰股肱之郡白苹泛月想神仙窟宅之深早盖颁春称师帅风流之美来纓丈二之组密依尺五之天课最易闻上心素简丈夫功济四海尚郁壮犹刺史入为三公更观盛举【某】初无他技早预一官徒坚铁砚之心犹负金羸之训典闽山之醯务俄閱十年充樵李之法曹媿无三语转丞兹邑获居是邦方涓日以载涂行束身而受察岂惟庀职于吏师之侧抑将横经于政学之余哦二松之间敢言公事而姑退得广厦之庇庶几寒士之俱欢

代通赵郡王【伯圭】启

瞻帅阃于瀛壖曾以部民而修敬望斋旌于泽国更容邑吏之趋风肃贡朋緘豫通下执恭惟【某官】璇源毓秀嵩岳储神东平之在汉京为善深知最乐汝阳之居唐室退朝端若无凭宛然韦布之流籍甚搢绅之望惟亲贤之并眷宜富贵之逼人寓直西清屡拜两宫之雨露疏封南服不移十载之旌戏清和兼惠夷之风畏爱如衰盾之日潢池赤子之威名于鲸海之深

大舶贾胡传政誉于鷄林之远乐苕溪山水之胜奉珍台香火而归濯纓而赋沧浪阖门而养威重四子之官二千石用昭盘石之宗列侯之印十九枚式广维城之助虽有苍生之俟望不妨綠野之雍容昨新郑之真封分閬中之巨屏囊兜戟纛益严亚保之多仪袞绣貂蟬入侍合宫之盛礼宠光有赫福履难量【某】早预一官本无他技典闽山之醴务俄閱十年充樵李之法曹愧无三语兹叨貳令又获登门梓里有光复见鲁公之拜後棠陰未改尚歌召伯之去思自念孤踪适逢幸会矧是典刑之旧愿承土苴之余哦二松之间敢言公事而姑退得广厦之庇庶几寒士之俱欢

代通李都大启

高山仰德久欲事于贤大夫冷局效官幸获依于部刺史迹虽殊于两地庇实托于二天敢因告始之恭少见投诚之素恭惟【某官】风仪岳峙德量渊澄才兼文武之资学究天人之际义尝许国忠不忘军决策请行不独在十九人之列论功颁赏已足称五千骑之贤成桃李不言之蹊坚松柏後雕之操爰受朱幡之寄入趋丹陛之严宣室受厘谓贾生久不见矣中朝召对叹徐乐皆安在耶亟示睿恩俾迁辅郡拥麾出守屡宣恺悌之仁揽轡观风端有澄清之志眷货泉之至重移使节以按临尽收数路之权悉总三官之利钱流于地货积如山已书朽贯之功即听召环之命【某】济南冷族海内腐儒苦半生甘在百寮之底崎岖末宦滥参九府之司岂期朴 之资获在帡幪之下纯金无用尚期良匠之钧熔跃冶不祥敢覬洪炉之造化

代谢知潮州启

曳裾东阁载瞻元袞之光华剖竹南州复预大炉之造化宠惊神悚感极涕零窃以在广极东以揭阳为列侯自唐而後有昌黎之遗风置乡校以教千里之民驱鳄鱼以除百世之害坐使蛮夷之地一如畿甸之间惟我皇家尤重边徼正当择士以职承流如【某】者蹉跎无堪鋹崎可?绍弓冶之余习缀搢绅之後尘两地监征力较锱铢之利六年学邑备宣朱墨之劳虽无健吏之声称颇究生民之利病顷罢边城之佐首干上相之尊得倖宛陵忽坐遭于摈斥奉祠梓里亦久就于休闲孤迹若萍归栖何所仕途如漆跬步而登帐毁誉之交攻惊镌黜之四至息黥补劓苟逃城旦之书涤虑洗心敢赋大钧之问会中兴之英主复图任于真儒自怜香火之散官曾是门墙之旧物念丘山之莫报幸沟壑之未填寻故步于钧墀仰勤三握发三吐哺之礼诉危衷于洪造复烦一举手一投足之劳俾守海隅以安蛮蜚恶溪瘴聚不妨叱馭以前驱秦岭云横何必问家之所在但如侥幸端有夤缘兹盖伏遇【某官】以王佐才为天子相内以缉熙于庶绩外焉镇抚于四夷虎啸龙吟弼亮两朝之治鸢飞鱼跃陶成多士之材遂致庸愚亦叨任使【某】敢不布宣诏旨抚字民生益遵父教之忠毋怠官司之守兴洸吏之问敢辞行路之八千捐国土之躯庶报龐恩之万一

代谢刘提举荐举启

几邑负丞未展秋毫之效上臣误听已形华袞之褒恩重丘山感深肺腑伏念【某】才如命薄术与世踈忘尝有志于事功颇亦早亲于经学屡操笔砚之习往从场屋之游良弓之子必

为箕有自来矣吹竿之门而攻瑟如不好何衰迟白髮之双亲齟齬青衫之一第赏延于世遂因委质以入官父教之忠粗识律身而奉法念家声之沦替嗟世绪之凋零敢言隐忍以就功名但欲植立以兴门户一行作吏亦知栖枳之为卑再转为丞宁复哦松之可乐困簿书之丛委惊尘土之昏霾应无穷之求急于星火酬方来之务纷若毛厘但能催科粗可逃责当官碍于掣肘莅事况多于面墙公家之利无不为谁为知己君子之仕行其义求无媿心曾微片善之可书敢冀当途之肯举仰乡闾之先达方彭彭持使者之车怜上世之至交犹恋恋有故人之意夫何么麽适隶按临忽传一纸之春风为振孤生之寒色周章拜赐俯俚知归兹盖恭遇【某官】识量恢洪风度凝远北宫黜之勇一毫弗挫于人柳下惠之和三公不易其介声猷籍甚节义凜然揽辔近畿起澄清天下之志推轂後进称品题人物之公广务搜罗误收庸琐【某】敢不饮冰励操结草酬恩鲋辙可怜方赖激西江之水鹏程欲起更祈借北海之风

代贺王詹事【十朋】启

恭审显膺宸命擢处宫端朝廷益增国本增固凡在绅綬之列举深拚舞之私恭惟【某官】学探精微气全刚大耸公台之望于庠校谈经之曰吐廊庙之言于殿廷射策之初结知两朝倾誉四海堂堂不挠岂惟近古社稷之臣谔谔以昌信是当今谏诤之选进以礼而退以义用之行而舍之藏四拥隼旟掩汉室龚黄之迹一登鹤禁追商山园绮之踪朝廷固喜于得人公议咸期于且相弼谐审谕方资李文纪之忠清辅赞弥缝会致房玄龄之事业【某】繇然无似少也何知备更州县之劳幸脱谴何之域贰车来止方将扫齐相之门召驿趣行莫获为李君之御敢驰贺牒少见忱衷尚期茵鼎之调仰副冕旒之眷

代通薛尚书【良朋】启

拜檄戟于黔山当辱老商之一眄驾屏星于梓里幸依夫子之仞墙俯已知归陈诚敢後恭惟【某官】身兼数器才出万人深造道真传伊洛渊源之学发为词藻追舒向金玉之文自结上知遍仪清贯谈不妨于剗剗切名自觉其逼人握节拥旄外着廉平之绩簪笔持橐内为侍从之臣凡建明遇事而敢言宜宠遇在廷之莫及尽四方而属望期两地之问津听履而上星辰忽惊勇退把麾而去江海径作赋归周旋泉石之间盘屈公台之器谢傅东山之志宁久遂夫高怀贾生宣室之思行即膺夫迅召【某】生平无似门下所知自幕府之终更叨贰车之承乏十年德施未知图报之阶一代吏师喜有趋风之便始兹洗印未及扫门沈侯方赋郊居辄通名于记室庞公倘入城府期雅拜于前尘仲夏清和燕居优暇愿调鼎食以候锋车

代贺赵明州【伯圭】启

恭审课绩上闻为南国诸侯之最宠光下被进西清学士之联曾何异登瀛之荣又以显维城之效恭惟【某官】为善最乐大雅不羣风流追配于古人被服必先于儒者天潢近???于周为鲁卫之亲帝胄奇才在汉擅间平之誉号宗藩之仪表为圣世之豪杰海沂歌别驾之功丹丘着剖符之烈眷深于上进不以亲奉夫人之輿创闻盛事送列侯之印独被殊恩睠二浙之奥区有四明之佳郡地绵千里海□三垂浪舶风帆萃卉服猷琛之利蜂屯蚁聚有潢池弄兵

之虞必得升卿以当错节正须龚遂来理乱绳既易地以策勲果自天而涣号赐金增秩爰示宠于侯邦簪笔持荷径闻津于政路几京师之蒙福见城郭之生辉坐令风涛万顷之间陰受刺史二天之庇命召公而江汉化已知治效之优得李勉而朝廷尊行听召音之播【某】戴恩最厚仰德方深侧闻二千石宠数之颁实同十万户驩心之剧恨官司之有守望宾庠以无阶燕雀贺大厦之成喜得营巢之地骐驎骋夷途之逸岂无附尾之心

代上吕镇江启

憔悴余生幸叨末契风波千里敬谒明公敢陈迫切之愚仰溷高明之听虽云无因而自至詎敢亡说以为先窃以文举不羈妄谓李君之有分山公如在定知嵇绍之不孤载在信书以为盛事盖先契者古人最重而高谊者叔世所艰不有豪杰之人孰振颓靡之俗恭惟【某官】量吞四海气压万夫夙怀公辅之壮犹早屈功名之奇志钓潢渭水世传柱石之勲取日虞渊身预风云之会独有用之学兼济非常之才精忠上结于主知儒术下饰于吏事发矟游刃未见全牛错节盘根久知利器总军储于边徼仰分西顾之忧守留龠于行都更任东厘之寄惟京口之巨镇控天堑之要津坐肃未几卧治自若已闻政绩之上达侧听召音之鼎来立懦律贪以名节而自任哀穷悼屈崇风义以独高寒士赴之如归羈人倚以为命矧在门墙之旧尤祈甄冶之收伏念【某】身与萍浮命随叶薄绍箕裘之业不能自振于家风厕簪绂之联徒以猥缘于世赏羈蹇加人数等流落在天一涯忧患相仍不及养亲之三釜饥寒复迫焉能餬口于四方比参醖局之僚越在瀛壖之表方苟升斗而自活未容尺寸之暂施适承弊政之余例有谴章之及二年于此十口无归虽尝知安分之言亦能诵固穷之戒然而比之顔氏既无负郭之田较以渊明更乏储瓶之粟不求济于旌麾之下是自投于沟壑之中重念【某】大父获游相君之门最蒙知遇先人亦为药笼之物屡辱生成恩纪未酬存歿知感迨宵人摄职于越邑遇明府弭节于舜江踪迹虽微曾辱步兵之青眼眷私不替间遣使君之白衣是敢仰凭一日之知辄忘三渎之僭大鹏欲化固将借北海之风溷鲋方危且愿激西江之水

代通韩总领【彦直】启

居百僚之底虽知仰泰山之名轻千户之封但愿识荆州之面幸兹末属预在下风虽拥簪之未遑顾驰絃之敢後恭惟【某官】雄才冠古壮气横秋当世家声功孰踰于八柱国妙龄上第名独高于千佛经错节盘根共知利器发矟游刃未见全牛顾大丈夫所以致身惟明天子以为知己乃眷江淮之壤实为财货之渊万竈列屯用增天堑之险三军宿饱正资鞭策之财爰擢于贰月卿仍暂烦于星使威名远暨城池不啻金汤储庠益充菽粟有如水火当边隅之息燧肃营垒以无譁非惟操赢货以佐军所谓不加赋而足用簿书期会岂久为外府之淹朝夕论思行即簪甘泉之侍【某】伶俜何数结约亡奇少读父书未策勲于笔砚早承世赏偶厕迹于簪纓自紆俗吏之青衫羞见古人之黄卷奉祠庭之香火遽纏风木之悲依幕府之芙蓉又属沙金之汰竭来上国猥备微官董舳舻之转输谨朱墨之出入幸预使令之列祇承约束之严得大君子为之依归庶贱有司安于职守弩马十驾寧敢惮于驱驰鷓鴣一枝愿永栖于茆

代谢临安府通判启

拜赤舄于泰阶方深荣幸驾缙屏于天邑遽辱生成退而扪心感至流涕伏念【某】材如樗散性若枣昏妄尝有志于功名颇亦早亲于笔砚与圣贤对独耽黄卷之书从场屋游终阻青衫之第强颜宦路刻意官箴两仕穷边仅脱微躯于万死一参下幕幸离小选之七阶学邑宁川虑伤美锦分司京口莫试铅刀比改畀于除书俾总提于市榷谨朱墨之出入较财贿之有无誓殚一日之长不惮数年之次忽从省汰何所怨尤八岁三得官莫沾升斗一门四立壁但有号号惊薄命之数奇觉晚途之甚寥顾已往之迹了如苍狗之浮空閱去速之辰常若白驹之过隙髮种种以如是身遑遑其何之幸宵人未填沟壑之时际元宰方庆风云之会势殊霄壤契笃金兰传好语于西山趫然有喜进孤踪于东合欢若平生穷猿方急于投林弩马但知夫恋栈周旋久矣委曲从之三握三从而谦德不衰一贵一贱而交情自见官不离于都下职况忝于治中或于多岐初类亡羊之牧未必非福今成丧马之翁顶踵知归丘山莫重兹盖恭遇【某官】为天下宰负王佐才元首明哉股肱良哉适臣主相逢之日受命长矣弗禄康矣佐国家无疆之休大开衆正之门共筑太平之址惟贤者在位引类而上臣事君以人凡厥有知谁无附凤翼之志顾如无似亦叨展骥足之荣【某】敢不仰戴已知恪居官次饮冰厉操惧为门下之羞结草酬恩敢後古人之报

代通李县丞启

始为刀笔吏愧居栖棘之聯获逢君子寮行视哦松之乐顾惟幸会殊剧懽惊伏惟【某官】秀毓山川庆鍾閎闕学渊源而有守才韝駉而不留致身于红莲幕中举无遗策书名于金闺籍上益着休声仕不择地而安丞有负予之叹立吏行之鴈鹜岂端使然哉造朝列之鵷鸿殆亦非晚矣【某】江湖冷族簿领下僚父教之忠粗可律身而执贄学失其道徒嗟莅事之面墙鼯尾跋胡转吭触讳一邑无不当问肯例以嫌三人必有我师愿提其耳

攻媿集卷六十五

<集部,别集类,南宋建炎至德佑,攻媿集>

卷六十六

钦定四库全书

攻媿集卷六十六

宋 楼钥 撰

书

答綦君更生论文书

钥讲闻雋誉久矣兹承惠然肯顾教以长书论文章大体笔力袞袞大过所闻幸甚幸甚钥少习举业不过欲应有司之求作吏以来虽粗有意于此而精神多敝于无用宦游往来忽焉半百重以二三年间忧祸薰心偶然不死以至今日旧学本自无几益觉荒落尚何足以言此而厚意不可虚辱试吐一二相与质正之来书谓长江东流不见其怪瞿塘滟滪之所迫束而後有动心骇目之观诚是也然岂水之性也哉水之性本平彼遇风而纹遇壑而奔浙江之涛蜀川之险皆非有意于奇变所谓湛然而平者固自若也滟滪之立中流或谓其乃所以为平此言尤有深致故乐之未亡也与天地同和可以感发人之良心而其既亡也史纪其精者谓能使人叹息凄怆至泣下沾襟者然後以为声之妙曾不知哀以思者乃亡国之音所谓安以乐者何在耶清庙之瑟一唱而三叹其亦异于後世之乐矣妄意论文者当以是求之不必惑于奇而先求其平唐三百年文章三变而後定以其归于平也而柳子厚之称韩文公乃曰文益奇文公亦自谓怪怪奇奇二公岂不知此盖在流俗中以为奇而其实则文之正体也宋景文公知之矣谓其粹然一出于正至其所自为文往往奇涩难读岂平者难为工奇者易以动文人气习终未免耶典谟训诰无一语之奇无一字之异何其浑然天成如此文人欲高一世或挟战国策士之气以作新之诚可以倾骇观听要必有太过处呜呼如伊川先生之易传范太史之唐监心平气和理正词直然後为文之正体可以追配古作而遽读之者未必深喜波平水静过者以为无奇必见高崖悬瀑而後快韩文公之文非无奇处正如长江数千里奇险时一间见皆有触而後发使所在而然则为物之害多矣故古文之感人如清庙之瑟若孟郊贾岛之诗穷而益工者悲忧憔悴之言虽能感切不近于哀以思者乎钥本不敢为人言言之又极平平视来书豪壮顿挫之气亦甚异矣人之少而壮壮而老如朝气之鋭昼堕而暮则归钥方堕而将归欲以当足下之鋭宜其说之不相似然时时读足下之书以作其堕足下亦味钥之言以趋于平亦朋友相资之义也岂惟文哉喜怒哀乐之未发与夫平坦之气顾岂有一毫之不平古人欲寡其过而未能此意安在幸并思之多言媿甚惟足下谅之而已

答朱晦庵书

钥伏自壬寅夏间修敬绍兴台治之下伏蒙与进加以宴犒获侍博约之诲未几先生赋归钥亦继遭外艰沈迷忧患後数年赴官永嘉才闻台旆造朝已复还山後知起镇临漳俱不得一

拜记史之问请违台范遂一纪矣青天白日奴隶知仰叹慕师席无由进拜时得门下所著作诵咏探索尚庶几在弟子之列仰惟名德为一世师表今日端揆而下诸公无不有先登之媿尝见讲筵班退黄夕郎对人浩叹或问之曰好一个去处吾曹冒处此如晦庵乃不使一来耶钥学殖荒疏无所可用三入修门推迁至此进无补于君上退不能宁其亲茆类之词不足以代丝纶之言孱琐之资不足以立雷霆之下曰坐针毡未知自免于戾前者表兄陈舍人之子赴楚州户曹一见即言尝拜牀下蒙齿及贱姓名固已慚惕感着之不暇蔡季通倾盖如故亦言軫记之意晚出何以得此季通定交日浅而得益已多而况得亲炙于先生乎诸公方谋以麾节强起门下庶几因得伏谒以遂师承之愿因季通归敢此少见惓惓不敢累牋以为苛礼顾虽承顔接辞未有其便或以为可教欲得警诲使知所归不胜幸甚易学啓蒙之书反复熟观无从叩请亦托季通寓下意一二何当抠衣以请伏纸驰诚之切

答杜仲高旃书

钥向者天街一别忽忽四五年兹辱惠书以慰以荷钥杜门郤扫荷上恩再畀祠禄仰以奉九十之亲俯以自适不肖之躯不翅足矣况老态日见夏秋间病足延痛左腕尝作醺词云四肢而三痛楚十日而九呻吟其况可知近方稍安九十者其家不从政但当虞侍膝下暇日则以故书遮眼而昏花已不可视细字矣鼓琴足以自娱奕碁可以遣日此外一不以经意来书论出处大致意甚笃词甚伟佩荷虽深然非所敢当也寄示新诗快读降叹杜诗集注等书恨未尽见发微一编诵之数过卓乎高哉贤父子真足以发少陵之微意非浅识者所及来书云云姑置是事且说杜诗以寄远怀如何杜之诗韩之文如王右军之书皆古今一人而已近世士夫水墨积习之工类不甚至唐人多能书欧虞褚薛是其尤颖异者疲精竭神各名家终不足以望右军阃域若诗与文可以力取而强进之耶诋之为村夫子者固自难言然王荆公以为与元气侔盖极言诗之高致若曰所以拜公像再拜涕泗流正为茅屋为秋风所破叹一诗用意之大东坡谓自是稷契等辈口中语正谓其语似稷契辈尔唐史赞之诗人以来未有如子美者皆极口称其诗工部之诗真有参造化之妙别是一种肺肝兼备衆体间见层出不可端倪忠义感慨忧世愤激一饭不忘君此其所以为诗人冠冕後人着意形似亦有可杂之诗中而不可辨者至其奔逸絶尘虽诸名公恐未免瞠乎若後此难与不知者道也然儼人必于其伦以言取人先圣所难若直以上比禹稷与孔孟之进退则亦爱之过甚此老如在亦未必敢当鄙见如此更试思之非面言不能究也如中自诛褒姒前辈尝称之而陈将军之不没其实未有人能发此者发微如此者非一末篇尤佳叹诵不已又记一二事虽非诗之大节因并及之留花门诗连云屯左辅百里见积雪以赵次公之详且博略不注释四明旧有卞倅养直園为注甚详竟不得其书尝与之论及此亦止云意其偶有积雪尔盖花门即回鹘也钥尝考回鹘之俗衣冠皆白故连屯左辅而百里如积雪然不既多乎以此意读之方觉语意精彩顿别又尝与蜀士黄文叔裳食花榘因问蜀中有此乎黄曰此物甚多正出阆州杜诗所谓黄知橘柚来极为佳句然误矣曾亲到苍溪县顺流而下两岸黄色照耀真似橘柚其实乃此榘也问之土人云工部既误以为橘柚有好事者欲为之解嘲为于其处大种橘柚终以非其土宜无一活者又云嘉陵江水何所似一本作山水者是盖嘉陵江至阆州西北折而趋南横流而东复折而北州城三面皆水故亦谓之阆中阆内如河内然地势平阔江流舒缓城南正当佳处对面即锦屏山盖山如石黛水如碧玉故云嘉陵山水何所似石黛碧玉相因依真絶唱也此

皆前所未闻恐可以助异闻之万一又信乎不行万里不可读杜诗也信笔为报惟为远业目厚会昆仲并道甫问讯为荷

答柴殿院之子楙书

钥承长书之贶且示以事目甚详区区非不知之钥自叨典选凡滞案至前必究观之可行则属使胥辈施行若必不可行求其说而不得则必悉以底蕴明告之使知其决不可以幸望息心而归且曰毋徒为逆旅也是皆未尝问识不识求尽吾职而已况如先殿院厚德前辈幸及同朝今见贤子来理遗泽岂不愿奉周旋重蒙垂谕不得不详布之遗表自重官之外旧日惟中奉中散大夫以上方得一名若先殿院生前持服时中奉大夫之告已下未及授而捐馆则尚可料理舍此则无说矣何也以为带贴职朝议大夫与不带贴职人事体一同则钥之外祖汪公带直显谟阁二十年转朝议大夫数年而後致仕未尝敢陈乞遗表恩泽盖无此法也来教所谓一职合比四官不知何所据而言亦所未闻也以为已该唐勘转中奉大夫之人则苟未授告犹朝议也钥之亲伯父绍兴三十二年已下磨勘告未及下而终于朝议大夫亦不敢求遗表盖告未下则无缘可得也观尊意所以未能决然者以犹有虞氏之例也亦尝为之求其说虞君终承议郎无可得遗泽之理以其寓直龙图阁乃在朝请大夫之上想是时有人为之地以其寓直之高故特与之致仕一名若先殿院所寓之职则犹在朝奉郎之下况已得致仕恩泽而欲以此更得遗表一官求之法例无一而可既必知其不可而不以明告徒使左右久旅营营则钥之所不安也病中草草授笔吏以为报切幸加亮

答赵共甫书

易补音之作所谓鲜不抵掌?为迂阔诚然诚然钥雅好吴氏诗补音今者皆取其说然尚有当言者如幡幡之下注文用之不尽似有未圆处不若全用或节去不甚亲切者如即鹿无虞不叶中字亦可若以音五公谓诗叶蓬豳则上章葭狃又尚何叶此一音可去之诗必有韵易则有不叶者又不可强通也车之音斤于韦昭之辨只得写诗补音全文节之意不完难晓艮卦薰心【思寻切】此不可晓如此则是本音非叶也注中引易林太玄乃叶邻民岂误音耶小畜象独富乃取诗瞻卬补音内引老子二项知足者富强行者有志可用如以正叶富吴氏之意不可通不若易之大率古语多韵跋语所谓言出而声谐辞比而响顺不待勉强牵属而自中音节者极然如圣谟洋洋嘉言孔彰作善降之百祥作不善降之百殃之类甚多只如补音首论服字方悟汉书顺天者昌逆天者亡名其为贼敌乃可服作蒲北切方可通耳吴氏以集韵为据而不深考说文解字之书如硕人盼字注文未为甚当说文盼恨视也从目兮声胡计切盼诗曰美目盼兮从目分声匹范切眄目偏合也一曰褻视也久目丐声莫甸切三字甚明盖盼如孟子使民盼兮然眄如老商之一眄又眄庭柯以怡顔以匹范一切为与倩绚二音不相叶又似太甚若眄则几不成字则以不考信说文之故也姑举此一端耳江不与阳唐相连而缀于三鍾之後上去入皆然盖古音江【音工】谓之转声与东通亦有据否有疑处必有考证方可决然定说不然宁阙之尔每疑十二齐不缀于支脂之微之後而与十三佳十四皆相比久不得其说後因观後汉语如天下中庸有胡公万事不理问伯始五经纷纶并大春之类皆是七字为句而四字一韵下三字一韵若天下模楷李元礼方知楷与礼叶齐之所以

近佳皆也非好古者亦不语及此不知者不止谓迂阔而已来教所说屯离蹇乾随临噬嗑革卦中诸字今本既叶如王郑诸家改字不同皆可略而不问如乾之若厉等十二处有不可通者不必强通只如潜龙勿用亢龙有悔见羣龙无首吉虽欲通之不可得也但当采吴氏之说通其可通者足矣如晦庵之说亦及叶韵渐卦上爻以陆为逵虽改经文于仪字却叶杂卦之末盖杂而又杂不可终究自大过颠也而後更不复反对坡公疑之改从反对大非古意观其韵叶可见非差如归妹女之终也未济男之穷也可求反对乎此皆晦庵之说为是若实之从去声则似未然更须详考此亦未暇入声之叶去声恐无此例有则韵皆少差如读之为读【豆】复之为复【扶富切】覆之为覆【敷救切】宿之为宿【秀】无有从其本字之去声者尽入声韵中只有厌【入】厌【去】二字通用本音却是实有此二字义又不同实为去声恐难从也如伸正当为敬比辅也比吉下顺从也履艮同人卦首合别着卦名贲象天文上阙文旅象两小亨当是衍来说皆然但流传已久不可轻改然亦不可不知也钥又别有跋语见他纸可用否午暑连日挥汗方能办此余不暇及亦不可为不好者道也

答徐敬甫书

钥辱示及主敬扁榜艮斋真蹟文昌章公跋语固深叹服然不敢着语者顷窃闻之太府卿王公字正之钥姑之夫也尝言此字本翼祖庙讳虽已再经祧迁而在臣子终不当以此为名字及斋室之名张南轩以此为字向不以为然钥又尝见文潞公帖或劝以为翼祖已入夹室可复旧姓潞公云老夫弼亮四世未敢遽改盖是时犹是七庙也徽宗朝立九庙翼祖复入庙祔又以为讳後至钦宗祔庙始复祧迁省元钱敬直永嘉人也钥忠告之遂改易直此不可不知也特臭味相与敢及此切幸加亮

答赵郎中崇宪书

钥久不嗣音正尔驰仰辱书翰以慰以荷蒙示谕濂溪书院尤见政最之余儒术润饰甚休甚休谨为写四字去但谿字当如此写溪出于阳冰之变体非古也二者俱写去惟台意所择濂字有少曲折见之别纸望详览九江江古郡于今为重镇幸有周先生之遗迹表而出之又使士子得以馆谷于其下儒风自此愈兴贤使君之名与之无穷矣钥衰瘁求未得尚尔勉强草草修报不究欲言并几台察

濂谿之濂字书所无钥少时见林侍郎黄中知江州曾作濂谿祠堂记今想尚有石本便中望以寄示其中亦似说濂字如元次山之 崕语出于意见近岁得晁氏参记许氏文字一书以道所编也有云濂【徐力盐反唐力簪反】从水从兼徐本曰薄冰也一日中絶小水唐本曰薄冰也或曰中絶小水又曰淹也或从廉徐本阙濂字接素问夏三月之病至陰不过十日陰阳交期在濂水杨上善曰濂水静也七月水生时也然则从兼者亦古文廉字非兼并之兼以上皆以道之说徐本谓今世所行徐铉所定说文解字也以道得唐人本时以校其不同者钥按素问二十四卷陰阳类论夏三月云云在濂水注濂水者七月也建申水生于申阴阳逆也杨上善云濂廉检反水静也七月水生时也唐本既曰或从廉则非无濂字晁氏之书甚佳止有三册若因刊之尤佳

攻媿集卷六十六

卷六十七

钦定四库全书

攻媿集卷六十七

宋 楼钥 撰

书

答杨敬仲论诗解

钥蒙示教诗解以病故相仍近始读竟荷开发鄙陋至多感叹击服之余恨未得一遂请益于门下若夫发明无邪之思一贯之旨天人同心大道至平古说难尽信虽载之左传者亦不可据尔雅亦多误大学所引亦有牵合诗序多失经意释文多好异音诗人讽咏或自包于事实制度名数不尽合于礼典先王皆在商世难拘以周礼文王以服事商不应作礼乐如此类未易槩举皆前辈之所未发者尤用服膺然惟尊意每不自以为足而欲人之言钥亦不能自己欲効所见试陈其甚明者正欲反覆论辨以归至当非恃相与之厚非爱此书之深不及此也

葛覃 毛诗传曰覃延也其义未安覃本义深也葛叶大而蔓小故坠焉而深下俗谓坠下曰覃徒紺切而广韵集韵无此字音释文徒南切方音不同不可知也而谓延也则未安曰覃及鬼方由中国而覃及之则中深旁浅实有覃义实覃实訃后稷之声深广也故水中深旁浅曰覃加水以别其字先儒徒因葛推义释覃曰延然施即延也无乃重复乎大田以我覃耜覃者深也耜宛然有微深之状故曰覃耜毛传殆未亲见耜徒见易有剡木为耜之义故以覃为利後儒求其说而不获又转音为剡又转字为?今正其字义平声如字

覃尔雅释言流覃也覃延也郭注皆谓蔓延相被及说文□长味也从 咸省声诗曰实覃实訃徒含切又□篆文覃省潭说文从水覃声集韵一说楚人名深曰潭潭字在六书中为形声如江河之从水而工与可止取其声而无义潭从水覃亦取其声非有义也潭有深义今之言潭潭是也覃欲无深义字书凡有意者如人为为伪人言为信之类皆入会意之科王荆公字说所以不能传者往往以形声诸体皆入会意故有牵合强通之病以葛之蔓延故施于中谷亦未为重复也覃耜之音剡疑是方言集韵以为利耜止以诗传释文为据如八月剥枣剥音普卜反荆公以为养老者剥枣之皮而进之後行田野间羣儿相呼扑枣方知释文之有自来此二覃字更望考之

鹊巢维鸠居之 尔雅释鸟云鵲鵲鵲郭云布谷未安音如布谷者不居鹊巢音如鵲鵲者乃居鹊巢为鵲鵲鲁昭公二十五年鵲鵲来巢而公如乾侯此亦假他巢之应也故文成之世已有童謡曰鵲鵲跕跕公在乾侯矧鵲鵲亦鵲鵲之音凡鸟名多用其音埤苍云鵲鵲方言云戴胜今审究戴胜首有竦毛鵲鵲亦有之而鵲鵲身色黑戴胜身色髭而稍长大岂埤苍考之未

审欬布谷其音浑然鸛鹄其音亟然获谷毛毳头有斑者李氏亦以鳴鳩为鸛鹄

多识鸟兽草木之名考之当如此之详然鳴鳩之为鸛鹄甚明浙人呼为八八儿川人呼为阿八所谓音如布谷者乃今斑鳩俗谓之步姑其姓虽拙粗能为巢戴胜首有竦毛向後鸛鹄竦毛直上又自不同鳴鳩之刺不壹正谓鸛鹄也郭景纯云布谷固已失之欧公言拙鳩极然不知此乃鸛鹄吕氏具载皆未当也

简兮日之方中在前上处

将祭习舞以日中为期硕人在前列上处方中将中也硕大也大德之人俟德容也

前辈曾云日之方中则明而易见之时在前上处则近而易察之地君犹不能见况幽远者乎此意甚切

氓于嗟女兮无与士耽士之耽兮犹可说也女之耽兮不可说也

耽乐也说解说也今俗说亦以女淫为大丑

毛传云女与士耽则伤礼义郑笺云士有百行可以功过相补至于妇人无外事惟以贞信为节然功过相补则士可耽也每疑其害教近得一说无与士耽已是自悔而反正之言盖其初抱布贸丝来即我谋後又以车来则非女之奔之也其言曰始者以士之耽兮故我今日犹可说也若是女之耽兮则我不可说矣如此则得诗之意又免功过相补之害教也

兔爰雉离于罗 雉文明比君子

非为其文明也罗之设所以取鸟兽兔狡如小人爰爰缓行不至触冒雉性耿介多罹其中世乱网密小人多幸免而君子多?于罪言文明则意差

蘅兮 此诗凡言女皆指君也女者爰之之辞

民劳王欲玉女是用大谏此意尤明又卷阿俾尔弥尔性之类不惟是爰君如古之称我为朕未至如秦以来分别之严也

出其东门聊乐我员 我自有员姓者吾妻也

此说未然毛郑不解员字疏言乐我心云耳云员古今字助句辞也唐员半千齐州人其先本彭城刘氏十世祖凝之事宋为起部郎及齐受禅奔元魏以忠烈自比伍员因赐姓员古无此姓也况此诗解内云陆德明以尔雅云徂存也牵合上章思存改且作徂甚无谓也且语助也于义自通何必牵强又改字以此知员亦语助耳

侯人维鹄在梁不濡其翼不濡其喙 鹄鹄啄长尺余颌下胡大如数升囊羣飞入水食鱼今也

在梁不濡其翼味长如此而亦不濡是当食鱼而不得食喻贤者宜得禄而不得禄

欧阳氏曰此鵜当居泥水中以自求鱼而食今乃邈然高处鱼梁之上窃人之鱼以食而得不濡其翼味如彼小人窃禄于高位而不称其服也鵜不当以喻贤者不若欧阳氏之说为长

不遂其媾 小人富贵纵肆好色淫恣而弃其妇媾婚媾也

毛氏曰媾厚也张氏曰不遂其媾不称其宠待也今人谓遂意亦曰称意

荟兮蔚兮南山朝隲婉兮变兮季女斯饥 董曰集注作媼蔚文也南山朝隲蛩蛩也人莫敢指者乃陰阳交感不正之气南山喻在高位朝隲喻淫纵淫纵者惟其意所溺固有其妻虽婉变而自不说者如卫庄姜虽美而不见答盖不乐于静正而放于情慾季女者年少之义以其未尝相亲如不为妇也故曰季女不说之则失所至于斯饥矣

张氏诗曰林木南山荟蔚时工斤樵斧兢朝隲举知趋利青冥上不念幽居季女饥陈氏曰壮者趋利于山则弱者馁穷于室小人肆志于上则君子困穷于下张陈二说虽未必尽得诗人之意然其说犹雅驯今为一媾字一媼字又婉变季女遂生此说然朝隲实非蛩蛩也彼蛩蛩之诗首章曰蛩蛩在东莫之敢指故次章曰朝隲于西崇朝其雨至今朝日在东则虹出于西夕日在西则虹出于东鲜有见于南者且此诗初不言虹而径以朝隲为蛩蛩则不可既曰季女如有齐季女而曰如不为妇亦觉费辞若以南山喻高位朝隲喻淫纵亦不成诗语宜有以更之

七月一之日鬻发二之日栗烈 鬻发者寒气劲发万籟尽鸣如鬻栗也野俗有语篱端吹鬻栗谓烈风吹篱端之虚管作声也栗烈者丑月寒气益烈人股战栗也毛传谓栗烈寒气也其以是坎

毛氏曰鬻发风寒也栗烈寒气也王氏曰风而寒尚非其至也无风而寒于是为至只如此说足矣鬻栗乃胡乐一名悲策一名笳管羌胡龟兹之乐也其声悲栗胡人吹之以惊中国马後世乐始谱其音以为衆器之首周时安得有此俗语尤不足取股战而栗汉人始有此语

二之日凿冰冲冲 凿冰之时择冲和之日虑寒气之伤人也豳公之爱民如此

毛氏曰冲冲凿冰之意孔氏曰冲冲非貌非声故云凿冰之意左传曰深山穷谷固陰沍寒于是取之豳尤寒盛冬安得有冲和之日不如只从毛说

东山鸛鸣于垤妇叹于室 毛传曰垤螳塚也将陰雨则穴处先知之鸛好水长鸣而喜也孔疏曰将雨则螳避湿而上塚鸛鸣于垤诗意与零雨其蒙同妇叹于室闻其夫将归感伤而叹也

毛公齐人必自知之解不甚详孔疏亦未明皆不见于垤之义惟胡德輝理苍梧杂志言之最

明云新经释鸛鸣于垤谓垤为丘垤非螳塚盖荆公未尝到山东螳塚有极高大者如塚墓然每天将雨则鸛集螳垤而鸣螳知雨鸛喜雨以其类也方说得于垤字分晓正以雨将作故妇叹于室如殷其雷之意正念其劳也若我征聿至自在下句妇叹于室意联于上孟子所谓丘垤以是知丘是自然高处垤乃螳塚下王洪盘马于螳封亦谓此也

狼跋 老狼有胡进则躐其胡退则跲其尾周公欲进则成王未授公以政如狼跋其胡欲退则又深念民人社稷之重欲退不可如狼?其尾

周公虽进退不可亦何至如狼之跋?故程氏有云狼兽之贪者猛于求欲故?于机穽罗繄前跋後?进退困险诗人取之以言狼之所以致祸难危困如是者以其有贪欲故也若周公者虽在危疑之地安步舒泰赤舄几几然也又云先儒以狼跋?不失其猛与周公不失其圣猛奚若虎豹胡独取狼也诗人比兴以类是以香草譬君子恶鸟譬小人岂有以豺狼兴圣人乎程氏之说美矣然诗中无机穽之意犹未为尽也尝得其说于蜀人杨少卿民望云狼之遇人先旋遶于人之四旁甚疾人为之战惧自失然後食之诗人盖以狼之跋?比四国而周公处其中不惧也此说最为得之

常棣宾尔笾豆饮酒之饫兄弟既具和乐且孺妻子好合如鼓瑟琴兄弟既翕和乐且湛 孺有柔义兄弟既具犹曰皆在于是和乐且柔孺言辞气柔巽也其妻其子情好合同言夫妇父子和顺孝慈如琴瑟之和毛传曰翕合孺子也湛和乐之至

此解亦平然说诗意未出此诗极言兄弟之间如伐木极言朋友之间前章引陈曰兄弟之急难相救助如此及其既安宁乃谓兄弟不如友生乎此正诗之本意也此二章言凡人以宾尔笾豆饮酒之饫为乐若兄弟既具如谓兄弟无故其乐又何止笾豆饮酒而已其和乐又且如孺子之真情如孺慕之孺有不可解于心者凡人妻子止以好合尚能如鼓瑟琴之和若兄弟翕合而无间其和乐不足以尽之又且湛矣如湛酒湛色然如此方见诗意

六月栖栖 六月建巳之月也栖凄也凄凄有冷意时有麦秋之寒也

毛氏曰栖栖简閱也苏黄门曰栖栖不安也李氏曰与论语栖栖同注栖栖犹皇皇言其不安也虽未为定论然以为栖栖有冷意麦秋之寒则不可俗谚云江南两浙春寒秋热若中原北方则立春便温和入夏便热入秋便冷冬则极寒宣王在西周四月岂复有冷也

车攻不失其驰舍矢如破 惟善御者两骖不猗虽驰而一无所失

此一段不尽其义苏黄门曰四黄既驾两骖不猗御者之善也不失其驰舍矢如破射者之善也盖不善射者必待御者为之诡遇则获故王良为之范则嬖奚不能获一惟御者不失其驰而舍矢如破方见射者之善不惟此诗意明孟子一段亦皆焕然

吉日既伯既祷

毛传曰祷祷获也祷未必为获也云云祷者祷其无伤人也弓矢驱驰之间或偶伤人故祷欤

毛以祷为祷获固已赘矣此谓祷其无伤人亦未为的当将田而用马故祷于马祖不必专为获亦不必专为求无伤人与廐焚不问马之意不侔

漆沮之从禹贡雍州漆沮既从从者从入渭水然则天子之所其在渭漆沮之会欤

漆沮既从禹贡自说治水此诗自说从漆沮驱禽而至天子之所似不必泥此从字

庭燎毛传曰庭燎大烛也云云秋官司烜氏凡邦之大事共坟烛庭燎故书坟为蕢郑司农云蕢烛麻烛也然则与庭燎有异焉今俗曰□盆者庭燎欤□麻滓也音洗毛传以为大烛未安

今说亦未安□乃麻饼毛谓大烛司农谓麻烛皆是也古者如男子夜行必以烛童子隅坐而执烛又如顔叔之秉烛非如今之蜡烛也凡点火而明者如麻骨桦皮松明之类可以照者皆谓之烛今祭祀所用庭燎以麻骨一大束立于地而然其上照耀一庭故毛谓之大烛司农谓之麻烛却非□盆也

斯干如跂斯翼如鸟之跂立而张两翼鸟首如栋薨两翼如二溜

孔氏曰如跂如人跂足直立若如今说下三句已言如矢如鸟如翬矣不应又以跂为鸟之跂不若只用旧说如人之跂立翼言其翼然不必谓鸟之翼也

小旻人知其一莫知其他不敢暴虎不敢冯河此固肤近柔懦之士所执常论然而人知其一莫知其他不知圣智所及当大有为亦无所慑但圣智虽不慑亦无慢易忽略而亦战战兢兢

范氏曰人皆知虎不可暴河不可冯而不知小人之不可不畏临深履薄惧之甚也此说似胜不必更加委曲也

小宛交交桑扈率场啄粟哀我填寡宜岸宜狱握粟出卜自何能谷桑扈名窃脂食肉之鸟也云云今不得食而率场啄粟喻食肉富贵者今犹失所困乏而况于疹病孤寡贫弱之徒宜其尤甚于入犴狱也云云民穷苦握粟出卜问曰何自而能谷善耶此章言贵贱皆困穷

前辈大率如此说意既不属亦觉其言泮涣桑扈窃脂尔雅释鸟自有两义非名窃脂也其曰夏鴈窃玄秋鴈窃蓝冬鴈窃黄桑扈窃脂棘鴈窃丹者窃皆训浅注窃蓝青色然则窃脂谓其色浅白也其前又别有两句云桑扈窃脂鴈鵠剖苇注云食肉好盗脂膏苏黄门古史序有云圣人之不为不善如驹虞之不杀窃脂之不谷小宛正谓此窃盗脂膏之义此章盖言遭诬而无告者桑扈食肉而谓其率场啄粟可谓是非颠倒矣惟其填寡宜乎于岸狱也此事甚易见试握粟以卜之谓握粟以试桑扈彼何尝能食谷乎言是非在目前分明如此而上不能察若以为卜筮之卜则意差矣

何人斯维暴之云 详观是诗非刺暴公也刺其从暴公者也

此诗之序必有所传诗不言苏而序言之一诗中只有维暴之云一句不知果暴公否郑氏以苏暴皆畿内国名孔疏云苏国在河内温县是东都之畿内也春秋为公者多是畿内诸侯徧检书传未闻畿外有暴国今暴公为卿士明畿内此说亦不定记得郑渔仲曾辨此云周之畿内无所谓暴者更当考

巷伯捷捷幡幡 幡幡者随风翻覆反覆不定之状如此

幡幡诚有反覆之意然谓之随风翻覆则是今释道所立之幡也恐古无此秦已有幡信之书未知幡信起于何代更考

北山或王事鞅掌 在腹曰鞅此诗士子其职卑矣其鞅在掌方驾车马故任此劳故世以烦劳为鞅掌毛氏曰鞅掌失容也孔氏曰鞅掌烦劳之状只须用孔说今说颇迂鞅鞅鞅鞅皆在马之身惟辔则在御者之手鞅既在马腹如今之肚辔不应在人之手掌也

陆机草木疏

机当作玃非晋之陆士衡也吕氏读诗托皆作玃又答论易

玃何敢言易间有闻见辄以一二求教兹蒙下问以口耳之所得录呈恐可以少裨聪明

坤元亨利牝马之贞

坤利牝马之贞说者止谓取其顺尔曾不知圣人取象皆曲有妙理禽兽之牝者皆顺惟牝马之性最贞游牝率以一牡引十牝虽杂以千百苟非其偶他牡犯之则踴啮不可近坤之卦虽主乎顺惟其能贞乃成地道故曰至柔而动也刚至静而德方也妻道臣道岂曰顺而已哉

答张正字论庄子书

玃比自同朝初欲相亲而未能高才饱学深藏若虚亦不可得而亲也後始得稍稍承教蒙以庄子讲义借示遂得以窥见素蕴每切感叹谓请益未艾也忽尔去国为之恍然亟令传写元本九册谨以纳还伏幸视至闻尚留关外无由执别尤增怅惘平时读蒙庄之书安能如执事用功之深士友来言处得丧之际鼻间栩栩则造诣可知略阅讲义开发为多然亦有一二鄙见疏之别纸更望示诲治万里之船何时可行尚容别布今之隐几者非昔之隐几者也郭象云子游常见隐几者而未有若子綦也非也讲义略之

此意甚妙方子綦隐几而卧未有以异于人也仰天而嘘嗒焉似丧其耦则讲义所谓超然万物之表而万物无与为对者也隐几虽自若忽然有觉则今之隐几者别是一人非适之隐几

者矣昔有适也故子綦善其问且曰今者吾丧我

吾遇天难

讲义云天难注与疏皆不解安易云雷屯刚柔始交而难生动乎险中则天造之难也

窃寻上下文恐不为此前曰天忘朕耶後又曰天降朕以德则是云将谓鸿蒙为天矣讲义亦云云将再见鸿蒙而谓之为天盖天其施也前则云将三问而鸿蒙曰吾弗知又三年愿闻一言而鸿蒙遣之使归不尽告也故云将曰吾之遇天可谓难矣故愿闻一言而鸿蒙始告以心养等言不必求之屯卦也

以瓦注者巧以钩注者憚以黄金注者昏 讲义云以操舟博塞明之又云博塞之事以瓦注为戏则得失之心忘而其智巧以带钩为注得失之心渐重而憚以黄金为注则得失之心愈重而昏今之博者谓所出钱物为注王冀公所谓以陛下为孤注是也

然庄子前此说操舟本无博塞之言而博者亦不至以瓦为注盖注者抵掷也谓如玉抵鹄金抵竈之类试欲抵物以瓦抵之则巧以钩抵之则已有憚心以黄金抵之则必不中此所谓外重则内拙也钩亦刀之异名如吴钩是亦不必带钩也

答徐丞【适】书

钥比为从弟致谢承报章甚勤且蒙示惠忠壮公事实伏读不胜叹仰靖康之变死事者寡世以为恨迨五路之失执节守义者衆人以为关陕多豪英而然若忠壮生于大未而忠勇两尽是无待而兴者也冯通奉之状之诔范君之传皆能以雄文发幽光足以传不朽矣惟後篇称萧参政奏请者乃王仲言明清挥尘第三録第二卷具载此文自窃惟国家而下至少厉偷俗之弊则仲言所见而失所着人姓氏者也自此纸顷岁而下至有道处士迴之兄也则皆仲言所述也萧参政临江人恐或者谓李邕是其乡人而为此奏是又不然此文之作盖是朝廷未知三人之时据冯公之状建炎三年十二月忠壮死事明年赐諡赠节度而萧公乾道始仕于朝为宫教至淳熙始居言路登政府不应始有此奏今当易去萧参政某奏请六字而改题云王通判明清挥尘第三録则为得之恃臭味相与不自外如此若更以程北山所作志铭编入则尤为全备也并几垂照

攻媿集卷六十七

卷六十八

钦定四库全书

攻媿集卷六十八

宋 楼钥 撰

书

上宰相书【代叔父】

某闻天地之所以为天地者无私也而人或见其私盖其生育长养以为事有时乎私而实非也寒冬沍寒万物憔悴春回自东一元磅礴于太空而一草一木咸有生意造物未尝私也间有朽枿枯株虽无萌蘖之生而其根荄余润犹未自绝于造物者一元之气必且为之融液浸溃费施生之力而不憚虽其生独后于众卉而终亦不在造化之外故人或疑造物之私于此而不知其非私也恭惟【某官】弼亮两朝经略四海巍巍勲名与嵩岱齐聚精会神仰赞圣天子治内治外之务方且收拾人才躬周公吐握之劳视平津东合为不足道挟鑪锤以造化天下人物正如一元之运行无有偏颇当是时而有匹夫匹妇之失所是当春而有寸卉之不萌也敢不投诚于造化而俟其生成哉【某】受才最卑赋分最蹇入仕三十余年历州县者七任两宰剧邑一佐边郡虽绵力不足以为国家使令而父教之忠粗知廉勤以自守庚辰之春仰于光范之门蒙大丞相恩造俾倅宣城方且自喜萌蘖之得生日望成就而需次之间有报罢之命今日之来其穷甚矣正犹朽枿枯株大费造化之力大丞相秉化鑪于上枯者吹之使生肯使【某】遂老於穷哉寒谷之黍彼吹律者犹能使之长而况造物者乎愿大丞相扩无私之造使萌蘖于今日而备用於後虽吹之嘘之若私于小物而亦岂有累于造化哉天地不可报之恩犹当糜捐以报万一

上宰相书【代人】

天地万物惟其时而已矣圣人作易幽赞神明然于卦言时必大其义用是知易之作亦明其所谓当其可之时以示後世後世好言机而不及时间以为机即几也窃以为不然圣人言几而不言机盖几者动之微而机者事之要後世之所谓机者似时而非也言机即近于人为气象迫促惟恐失之时则出乎自然者我心休休庶绩自达天何言哉四时行焉百物生焉四时自行百物自生天则付之于无私而已一草一木华实各有其时或先之或後之妄者以为奇为瑞其实则反物之妖也天之于物尚尔而况于人乎宰相操造化之柄区区然欲以智力运造化则亦劳矣故当观万物之变而听其时之当然我之用舍时也事物之芸芸于前者亦时也推无一夫不被泽之心以待天下然其自穷自达自进自退若不由乎我而惟物之时之听夫然後不烦智力而王佐之气象见矣方今圣贤相遇千载一时神会气合此岂可以人为求之耶相公上佐天子下理万务四海之求于相公者一一以智处之则且将不胜其应究极化原

在乎坐以观万物之动植随其时之可而应焉此相公之所以大也【某】何为者曩者猥叨龙虎榜之下陈则固已为今日张本屡拜下风误蒙知遇相公之欲提撕于衆人之中久矣有其志而未有其权有其权而或非其时故【某】辱在泥涂虽知相公之不遗微贱而不敢有求于相公之门相公秉钧当轴二年于兹矣而【某】适在心制中杜门海峤实不敢求闻达于时今者收召魂魄弹冠而扫门相公一见便有曲成之意兹非【某】之时乎敢诵言所闻于平日者以献古人云君相造命虽曰造命非时不可今日则真可以言命矣惟相公矜而进之【某】如蟋蟀之秋吟非敢鸣其不平也时焉当鸣盖有不容自己者干冒钧严俯仰俟命

上蒋参政书【代范孝隆】

某闻君子之所以得人心者能以天下之心为心而以吾之心为天下之心天下之溺何预禹事禹岂无一席之地以容其足哉而其心视天下之溺犹已溺之也天下之饥何预稷事稷岂无一饱之计以充其腹哉而其心视天下之饥犹已饥之也二君子孜孜汲汲罄竭以拯天下凡能以天下之心为心而以吾之心为天下之心也公卿世家为之子孙者孰不愿自植立以振门户其愿之从违系乎子孙之贤否然此心则人之所同也夫已欲立而立人已欲达而达人吾夫子以为仁人之用心况夫已已立而人或未立已已达而人或未达仁人见之得无动心乎恭惟【某官】怀絶世之才辅之以硕大光明之学文章雅奥足以规姚姒谟谋忠嘉足以配臯稷领宥密参机政天子虚席而论相阁下其选矣仰惟先正太师魏公勲业誉望为前朝第一等人彪炳俊伟具在史册子孙以似以续持橐拥麾代不乏人以至于阁下阁下以经术魁儒科以词章鸣海内优游都城中极天下清华之选凡书生之所梦寐而古人之所歆艳者无不亲历之人望益隆主眷益深卒以此取卿相蒋氏之家声日大以肆天下以是知魏公之有孙而阁下之光于前人也阁下以王佐自负一意于尊主庇民固不以是区区之轩冕为事然如阁下之为人子孙可谓盛矣有人焉业弓冶之余而弗能修播获之职颠沛流离而叫呼攀援于门下阁下其念之也必矣伏念【某】先丞相妙年自布衣以策于天子风节翹然有闻致位上宰忧国爱君之心终身不少衰至今数绍兴中兴名臣然亦不在第二流也惟是诸孤不肖既不能以家学取世科委靡闾茸又不能少自振拔于搢绅之列加之忧患相仍三兄沦谢相继惟一弟相与为命又皆困蹶连蹇碌碌州县间退揣庸虚之质顾何足以求当世闻达惟是痛念先丞相之迹未陈而门户衰落遽已至此几无面目以上先人之丘陇矣罢官三年固穷田里非曰絶意荣望顾当路未为之地者故不得已而为此待时之计一日有闻于人曰朝廷大用蒋公矣问其家世则曰太师魏公之曾孙也【某】也释然悟跃然喜曰吾之穷其少瘳乎或曰子于蒋公之门无一日之旧而势位如霄壤之隔子乃以为往必得所欲何耶【某】应之曰吾闻蒋公之为人其心则禹之心稷之心也公与魏公相去四世岩岩相望如此【某】为先丞相之子而没没不振如此以此求之其必有以哀我者故今日之来索手无以自见不自知其不可也伏惟仁慈薰然垂德于不报之所引手于内沟之际使他日有以少见于世士之归心于门下者多矣岂特【某】哉

上洪丞相书【代表兄孙公和】

某闻臧孙谏君以德而君子知其有後于鲁管仲受下卿之礼而君子知其世祀于齐方二子

之为此也求尽乎人臣之事何尝有意于徼福而此亦岂徼福之具哉然爱君合礼天相神佑百顺不期自至而子孙硕大繁衍君子已能逆知于未然呜呼彼皆一时陪臣效小忠循常礼而天之报施已如此矧本朝钜公以身殉国建天节排大难功成困谗身不得有为于时天亦媿之必拥佑其後光明俊伟亦非止如□管二子而已也恭惟先正内相忠宣公以文学志谊结主知致身华近一旦当戎马仓卒之变翠华南狩驩馭未反此正主忧臣辱士君子毕命効死之际而肉食者类多选奕蓄缩为保家室计无肯出万死以报国者独我忠宣公毅然自奋仗节请行不可回挺平时德望固已耸服夷裔而专对正辩又足以弹压倔强不廷之衆故虽间关险阻节旄尽落而中心如丹卒缔金石之盟还长乐之驾向者三十年边鄙不耸而南北无烟火警谁之力也上天助顺佑我国家为生贤佐而所以报忠宣公者亦昭昭可知盖丞相首以文章鸣而一门之秀连中宏博异科洪氏之文遂擅天下此虽在丞相为余事而四海由是人知洪氏之名而家有洪氏之书此天所以侈忠宣公之报而示为善之利也权臣当国衆能胜天方忠宣公还朝被太上皇帝宠遇之厚駸駸大用谗人罔极一斥不复故权臣能贬其位而不知适所以大其声能抑其身而不知乃所以昌其後天定复有以胜之未几而朝廷更化金昆玉季继踵登用福善祸淫可谓差耶恭惟【某官】以顔孟之学负伊吕之才周旋外服而降岩石之瞻翱翔华要而结两宫之眷比者槐铉虚席久至閱岁此古今之所未闻而四海所显望卒之覆金瓯秉魁柄者丞相也明良相遇千载一时决非偶然者是虽报施常理皆人所不能及由是辅中兴于无穷而成忠宣之大功天于此不为无意也【某】不佞一介鄙人无所取材独念先吏部【某】早受忠宣公之知君子交情见于尺牋先吏部流离兵火之余故时图籍往往埃灭而忠宣公咫尺之书藏弃巾箱烂然可观先吏部既捐馆舍【某】虽无似亦知宝秘以俟今日是敢躬自装褫百拜以献有以见先世之契不为不厚亦以少裨门下手泽之富比之扫舍人之门者犹为有因也恭惟丞相竭诚节以相天子巩国势于千载而衍家庆于绵远八叶宰相七世内传将不足为今日道痛念先吏部以笔砚起家忠鯁独立终于一郡人亦叹其余才未施而不肖之孤又不能少振于後宦路如漆四壁枵然几填沟壑偏亲垂白菽水不继犹强自植立以苟升斗得官安陆困于远次之官有期矣固将奉板舆携孥累为数千里之适以图一饱然喜惧之年惴惴朝夕所以谋寸进而为亲荣者尤切切于中仰惟阁下仁慈薰然軫念先世一日之素兴哀于无用之人道援天下之余力一振于穷困之地则高谊絶俗寒士归心【某】亦当摩顶放踵以効万一九原有知先吏部亦不当後结草之报惟阁下哀之

上赵宪书【代赵推】

某闻疎不如亲亲不如贤诗曰岂无他人不如我同姓曰瓜瓞曰葛藟亲亲之谓也周公相武王封姬姓五十三国而天下不以为私人皆曰周以宗强噫宗故可以为强也宗而非贤其何以强使受封者五十三而不贤焉天下不以我为私乎无竞惟人四方其训之周以宗强盖以贤强也我国家圣祖神宗敦厚同姓封爵禄廩务极隆异亲亲之道尽矣贤贤之义则未也乃复慨念宗室虽有才而不得试于是设教养之法开选举之科人才班班得以自见近岁修洁博习之士因以益衆与寒隼并驱争衡天子又搜举其尤才能者擢寘周行授之以持节拥麾之寄视有周无媿焉恭惟【某官】以光明俊伟之才辅之以渊源该洽之学高义慷慨薄乎云天劲气峥嵘沮乎金石间平之儒雅勉石之事业阁下诚优为之在中为鯁亮之臣在外为

循良之吏中朝士夫数当世贤者必以门下为称首朝夕论思自此升矣激浊扬清顾为阁下胸中自有定论然人才方赖以主盟倘从州邑之吏视天族之可以收拾者长养而成就之俾有以自见于世则亲亲之道贤贤之义足以仰赞朝廷之盛矣【某】疎族无似蚤岁而孤上奉孀亲下抚幼弟家四壁立无以资其身攻苦读书不能自已辛勤百战始得一官为寮于兹亦几年矣廉勤自饬不敢少越规矩之外以为终身羞史君察其无他而未敢求知部使者冠盖相望而弃之不顾每自念言是岂惟孤寒之难于进盖未有当世明公以为之引重也阁下按临曳裾旅进天壤势异谊不可以冒干然而决于自献者诚以阁下方主张公道爱惜士类宗族之末尤所矜怜倘引而进之则他人必指之而曰是子也而首受知于宗英其必有以取此也假宠乞灵【某】之寸进有望矣故【某】平日之不敢为不肖以幸今日之遇非徒以亲亲望门下也古语有之为山九仞功亏一篑故士君子于举士之际多以垂成为辞呜呼九仞之亏固为可惜然所以致九仞者不由覆一篑而进乎今日之进固有望于阁下之开其始若其终之则在他日

上叶枢密书【代人】

某闻念子桑之饥者有裹饭之仁怜范叔之寒者有终袍之惠故旧之情谁则无之故穷则相恤达则相引或故旧之不及用则从而收其子孙此古人之所甚重而今之时絶无而仅有者也故山公在则嵇绍不孤而优旃之戏亦能封叔敖之子载在前史以为美谈寥寥高风非当世大臣孰能振起之恭惟【某官】道德配古人声名满天下秉大政行公道行将入相明天子以共起中兴之功而独于故旧之情尤为垂意此所以能主盟吾道而振风教於千载之後也伏念【某】门绪衰微生涯沦落环视一身无寸长可録独赖先世遗泽得官而蹭蹬连蹇絶人数等齿名仕版今几三十年矣顷者得阙桂林待次数载望岭外之地邈然数千里而偏亲垂白不堪远去重以久居浙西遭去岁边警士夫率皆东徙转寓於越之属邑羈单可怜无与为比痛念先君之後零丁如许今欲之炎荒之地则有狼狽之忧坐以无策则忽不知岁月之换而寸进愈茫茫矣分奇才薄失于初计尚谁咎哉然犹有冀寒灰复燃者赖有阁下使【某】不于今日伸喙而一鸣是自弃于沟壑也方阁下弦歌武城先君宰剡豁获与阁下有同僚之契而荷致遇为最深今日不肖之孤贫悴无聊至于此极此阁下之所宜动心也然阁下方坐庙堂而进退百官而【某】也微贱疎远尾百僚之底前时未契何足恃此以进君子之门独以向者阁下拥麾毘陵【某】得以桑梓修敬固已蒙眷顾之厚谓【某】为故人之子有惻然兴怜之意今也【某】之穷益甚而阁下振拔滞淹一举手力而今日之进不为无因敢冒鉄钺以干造化区区之命垂于阁下之手伏惟薰然之慈有以怜之振之不胜幸甚

上宰相书【代人】

某闻养才之法不一也养大才者劳之养小才者优之譬之植木彼榎楠桧柏之属不贵其拱把椽?之用也生于陰岩絶壑中风雨之所浸蚀霜雪之所摧折外益枯而中益腴磊砢多节目而材益刚夫然後数十百年而以为栋梁而不挠明堂之柱非此不能胜也然为巨室者栋梁之外椳闌居楔之用不知其几故必有养小材之法焉若朴 小木欲求近用苟不植根于膏腴壤坟之地使之遂其生长则将枯悴萎蕤荡然虽求拱把之材亦亡矣孟子曰天将降大任

于是人也必先劳其筋骨饿其体肤此养大才之法也小雅曰薄言采芑于彼新田于此菑亩此养小才之法也才大者用大而志亦大故必先劳之而苦其成小才者用小而志亦小故必先优之而责其近未易以一概论也伏念【某】生无一奇学无一成猥以赏延登仕版几四十年矣平时碌碌以备国家之使令虽不能卓然拔茹于流俗而以功名自期然谨守父教官箴以从事思有尺寸以见乎世比仕东都自计司而为均输之职亦不敢以为劳且穴方且躬朱出墨入之烦居无何而以罪去退念妄庸孱谬获戾为宜而一时旁观莫不搥腕太息知其冤而莫敢辨【某】亦不敢自明以速戾何也坐废田里于今五年堂有八十之母而阙旨甘之奉室有数百之指而困啼号之迫日复一日几不自聊呜呼是朴 之才而遭风雨霜雪之所置之陰崖絕壑将遂摧折于无用之地是大君子所宜动心焉者也恭惟【某官】以不世出之才辅赞两朝举天下之物皆在陶冶而进退士大夫于一举手之顷比者起东山以镇压倔强不廷之国如凤凰麒麟一出而鵩怪?妖自然逃遁陰受公相之赐者不知其几千万人而犹孜孜以人才为意不倦吐握之勤此周公之用心也重念【某】孤危之迹屡玷大造而公相宠遇抚存之非一日也今日以穷来归栖栖如飞鸟之依人人将怜之而况公相耶噫【某】之此来则穷甚矣公相遂收録之耶则他日必有尺寸之効以报门下今日弃之则遂将槁项黄馘与粪壤俱腐虽欲糜捐以为门下用终不可得録之弃之【某】之命悬于公相矣伏惟公相哀怜之干冒钧慈【某】下情无任战栗之至

礼书

冯仁叟表兄请婚任氏书

族绪单平猥绍大冯之裔人才凡下敢齿诸任之间偶因媒妁之言获缔婚姻之好伏承【某人】幽闲秉操素知苹藻之诚而【某长孙某】孝谨传家粗习箕裘之业兹谐燕尔夫岂偶然往之女家想见结缡之戒愿为有室遂成合卺之欢敢荐薄诚拱闻嘉命

不愚弟请婚冯氏书

见舅氏于渭阳慚非酷似寻世婚于高密兹谓好逑盖将缔百年之欢岂惟合二姓之好伏承【某人】素鍾淑质久?中饋之仪【某男】幸忝弥甥不待东牀之选蚤荷千金之诺敢稽百两之将宜其室家既无嫌于齐郑传之孙子俾弗替于朱陈

少虚兄请婚孙氏书

托契高门承风久矣求婚犹子得诺欣然属事绪之因仍閱岁华之荏苒敢持薄礼远寻旧盟维鹄有巢正欲资夫内助迨冰未泮深有望乎来归方当相忘于江湖之中可以尽索于形骸之外

从子泽请婚舒氏书

定五世之交久笃金兰之契合二姓之好敢稽雁币之恭惟【令女】素习妇功【某男】粗修子职既无嫌于齐郑将永好于朱陈远不容刀何待买邻千万之费告先近日倚观结缡九十之仪

内弟汪文可请婚薛氏书

叙百年之亲素联瓜葛合二姓之好兹始权舆既情话之相通曾媒言之不费【令女】夙?姆训【从子】粗习家传了无耦郑之嫌乃有齿任之幸既承面命欲奉婚期嘉礼具存何妨三者之备官占云吉尚几五世之昌

沈虞卿侍郎女许陈氏书

襟期莫逆久为研席之交臭味不忘兹遂松萝之托欣然承命舍是焉求伏承【某人】诗礼素传稔闻于父教而【某女子】苹藻是训未习于妇容嘉纳采纳币之同时实有室有家之伊迓潘杨方睦当豫卜于三星吴越相望尚将杭于一苇

史侍郎女许秦氏书

老矣从心犹有爱孙之念为之求耦幸逢列鼎之家【某人】秀出相门素传诗礼【某女】幼疎姆训未习组紃荷鴈币之多仪知凤占之协吉深喜潘杨之睦自此权舆既无秦晋之卑庶安家室【又郑府云既无齐郑之嫌】

□纳币张氏书

合二姓之好荷亲谊之甚高寻十年之盟喜宦游之相遇况老境笃抱孙之爱而儿曹怀归养之思男女及时幸勿愆于柔日币帛将意媿不办于多仪共存素风一洗未习

季舅第三女许顾氏书

闾里相望其来已久婚姻之好实始于今【某人】秀出辈流方谨诗礼之习【某女】幼居闺壺未?纂组之工既协凤鸣辱贻鴈币一言决矣正须坦腹之求百两成之当谨结缡之戒

汪表兄之子请婚书

桑梓相望夙敦雅好金兰合契幸缔华姻【某人】素习妇功将归千岁龙鱼之裔【某人】粗传家法适得五世凤皇之占二姓是求一言而决欲将厚意敢稽纳币之仪伫俟嘉期终遂肥家之吉

妇弟知道长女许李氏书

里舍相望曾未谐于识面媒言一定乃屡辱于贻书臭味既同婚姻敢後伏承【某人】世传儒业况是太史公之外孙【某女】幼习妇容未熟曹大家之女诚知凤鸣之叶吉荷鴈币之先临往送之门媿不盈于百两愿为有室庶仰望于终身

少及兄女许舒氏书

师友从游爰自宿昔婚姻求偶至于四三况一水之相望宜两家之合好【令子某】蚤传诗礼尚余独坐之儒风【某女】幼习组紃未解大家之女训既叶凤鸣之卜首勤鴈币之临佳耦曰妃但觉门阑之喜色同声相应尚何媒妁之多言

次女许郑氏书

鴈塔题名夙讲同登之契凤占叶吉兹谐嘉耦之求一笑相过片言而决伏承【某人】幼而岐嶷早有成人之风而【某女】资亦善柔方亲慈母之训俱生丙午之岁真是甲辰之雌惟臭味之既同在礼文而宜简御之百两首勤纳币之仪加我数年当展齐眉之敬

从子涑请婚陈氏书

颍川谯国均着声称孟公君卿俱为游侠相望千载之下始谐二姓之欢【某人】柔婉有闻素?姆训而【某】孤?自立粗习家传了无间阻之言遂定婚姻之约幸兹叶吉孰云齐郑之嫌其或自今益缔朱陈之好

治请婚吴氏书

识北平之三世素知事契之深牵张氏之一丝喜有姻亲之托凤占云吉鴈币是将伏承【某人】出鄞水之外家遂归于我而【某男某】生台山之传舍爰娶于吴既无非耦之嫌殆有夙缘之幸一言而决因缔交于延陵子之门二姓相求用徼福于东楼公之裔

攻媿集卷六十八

<集部,别集类,南宋建炎至德佑,攻媿集>

卷六十九

钦定四库全书

攻媿集卷六十九

宋 楼钥 撰

题跋

恭题直学士院所赐御笔

留正少师判建康府赵汝愚右丞相

臣绍熙五年待罪西掖兼直学士院际遇主上龙飞之初书诏填委时翰林学士李巘去国新除中书舍人陈傅良未至臣以非才当内外制斤斤幸无阙事一时册后封拜加恩等皆次第而举八月二十七日忽蒙宣召不知为何事入院而御笔至亦不闻知既启御封留正除少师观文殿大学士判建康府汝愚除右丞相故事命相必设金銮殿词臣面受圣语是时主上犹御重华宫仍锁南内翰苑故以御笔赐臣二者皆有训辞而汝愚者尤详遂具载于二制中退不敢以语人读者往往不知所自也又九月二十三日伯圭加两镇节度使十月八日以季秋淫雨罪已降诏庆元元年正月八日汝愚除特进依旧右丞相十三日师夔除开府仪同三司四月四日余端礼除右丞相臣千载幸遇猥以芜陋之词视草摛文堂录本例留院中臣得珍藏宸翰以为家宝未遑勒之坚珉谨斋祓装褫以传子孙仍识岁月大概于右

嗣秀王伯圭免奉朝请并圣节批答

绍熙五年皇上践阼之初臣叨掌内外制时从臣方同班一奏事然後以次独对臣犹未及进也七月二十九日嗣秀王伯圭以衰老乞免奉朝请内批降诏不允怀不自己辄进狂瞽之言仍有贴黄云圣意若允其请不必行出伯圭劄子径论大臣降一指挥尤为尽善仰蒙圣慈彻去贴黄御笔批依八月十日羣臣上表请以十月十九日诞圣之日为天佑节内批宜允臣又亟奏少俟三表即再得内批降批答不允寻三请而後从之臣谨宝藏二奏中宸翰御宝于家使世世子孙仰见圣主从善如流不以人废言之盛抑以记微臣际遇之荣仍录所撰诏书及三批答于前以着事实後以契丹伪号中有天佑二字始改瑞庆节云

恭题知贡举所赐御札

皇帝御极十有五年岁在戊辰礼部试进士五千余人二月甲辰以御札付臣等臣亟率同知贡举臣思臣幼学臣时暨参详点检试卷官以下三十三人班列于庭望阙重拜退而启緘伏读莫不惊喜感叹以为前此虽间有之未有如今日之盛举也仰惟皇帝陛下以濬哲之资承

付托之重清心寡欲崇儒典学不懈益?乃者权臣开边涂炭生灵陛下忧形于色外锄叛将内诛元恶处之晏然而天下复定所谓渊默而雷声神动而天随者也方且厉精而躬览临政而更化廩廩向治安矣先是三锡宸翰于贡闈其二皆以不及临轩故戒主司以审取舍今岁亲策造士而又豫戒臣等至于再三盖自比年以来奸幸弄权公道几泯举场宽纵以私害公士类嗟惋不胜其敝又虑人之议已也专为蒙蔽杜絶人言仰赖陛下圣心感悟首下求言之令继颁温诏博采刍蕘真社稷之福今圣训有曰去取之间趋向所系使精加考閱择文体醇正议论精确者又曰或因问献言实有可用虽涉讪直勿以为讳陛下隆宽尽下高视千古属意人才兴起治功煌煌帝谟五三六经载籍之传敢谏之鼓诽谤之木何以尚此猗欤休兹臣等既以宣示寮属更相劝厉又以圣意发策俾士子尽言无隐矣伏念臣等受国厚恩平日所愿推贤逊能图报万分矧以孤学误蒙委以文衡回念场屋之旧固不敢轻于抑扬恪遵告戒谨拔其尤异者實在前列然士子局于文体虽有奇才恐不得骋又臣等智识荒浅深恐上不足以副陛下求贤之切下不足以得人物之真惊惕祇惧夙宵靡遑敢以奎画登诸乐石以诏四方仰惟国家设科得人最盛然山林岩穴之士必有逸才高节非科目所能致爵禄所能诱者惟陛下推此心以往不憚孜孜而求之当有魁垒不世之才出而为陛下用野无遗贤多士济济臣等不佞尚庶几见之

恭题赐陈傅良宸翰

臣仰惟皇帝陛下龙潜嘉邸毓德进学一时宫寮皆出遴选尝逢诞辰咸献诗颂既而置酒高宴初酌黄裳次酌陈傅良各授文书一通致谢再三其一曰上呈翊善其一曰上呈赞读御名谨封因请问所以谦赐之由陛下为言二公之诗虽因为壽而作皆寓警诲之意辄依所惠亲书一本复以为赠以示不忘裳与傅良跼谢而退陛下践阼之初擢裳礼部尚书傅良中书舍人未几裳以疾歿傅良奏请以宸翰刊之坚珉玉音赐许是时臣钥待罪琐闥与傅良同直北门尝过其家傅良以跋语示臣大略曰季札观乐歌颂而曰哀而不愁太史迁读虞书至于君臣相敕维是几安未尝不流涕也成王作颂推己惩艾可不谓战战恐惧善始善终者哉益颂者不专于美盛德之形容皆有警戒之义秦斯以来此义殆絶臣为之矍然作而曰伟哉论也自时大序言以成功告于神明无有以颂为警戒者舜皋赓歌世但以以为盛事非司马迁不足以发圣贤相敕之旨自李斯颂秦专务溢美人亦不以为过韩愈有曰不以颂而以规亦不悟颂之有规也而傅良能发之臣于傅良平日所畏至是益以叹服促使刻之傅良曰今既刊奎画于上方不敢使人代书适有目眚当俟小瘳曾未信宿而已报罢臣寻亦去国相忘于江湖者十余年傅良下世访遗藁于其家则不知所在矣其子臣师辙求跋其下将碑之以传远臣既伤傅良不及见更化之日敢直书始末上以彰陛下好贤乐善之素下以侈傅良等际遇之宠抑使後学知古人赓歌颂诗本非专于形容称美而讽谏之切未尝不寓于斯云

恭题仁宗赐董渊宸翰

臣窃考皇佑五年三月辛丑朔壬子崇政殿试礼部进士圜邱象天赋辛酉放郑獬等五百二十人前所书十四日是为甲寅盖廷试後二日又自言以大理丞景福殿祗应岂非为诸位官耶孟子曰国家闲暇及是时明其政刑是时神文临御已三十余年正月平依智高朝廷无事

而肆笔匪颁小臣犹不忘保治之要虽止二字足以示万世法印文左曰帝右则古笔字也见义云章臣高祖先臣【某】以是年中第为第三甲第八十人臣家衣冠实始于此感叹再三谨附书下方

恭题仁宗赐怀琫御颂

臣仰惟绍兴初元高皇帝南巡慨念天章所藏祖宗宸翰坠失殆尽求访山林所得不多惟明州广利寺住持僧净昙悉以宸奎阁中仁宗皇帝所赐怀琫赞颂宝墨上进上大悦赐以御札谓卷轴既丰护持有道又书佛顶光明之塔以宠之孝宗皇帝赐以妙胜之殿皆口登之乐石惟净昙摹勒昭陵诗翰虽至今珍藏而因仍七十余年未称尊奉之义今住山臣僧宗印始尽摹而刻之以补名山之阙典而後累朝云汉昭回之美于焉大备真东南禅林第一盛事也山君海王益当来朝以谨其藏若禅颂之深妙宸藻之交辉则非小臣赞叹形容之所能尽也

恭题仁宗赐张中庸恤刑敕书

臣家藏赐吴绍儒恤刑敕书後止书日不知何帝时秘书丞兼权兵部郎官臣张钧以其从曾祖中庸所藏仁宗皇帝暑月敕书一通示臣凡二百五十字绍儒者二百二十七字而同者一百七十有九字始知绍儒者亦昭陵所赐也绍儒当是郡守故有云方伸共理之良中庸为部使者故稍详焉闻之故事每更一朝则敕字别为一体此二书虽作字不同而每行皆九字玺文大小如一未有敕字絶甚相似则是同时无疑日子不同盖以颁降远近为先後至今先下川广次及诸道或恐非一岁之书也臣仰惟艺祖开基仁覆天下好生之德洽于民心开宝二年四月诏扇喝泣辜前王能事恤刑缓狱有国通规今朱夏既临溽暑方甚矧兹縲系深用哀矜宜令有司限诏到日其囚人枷械圉圉户庭吏每五日一檢視洒扫荡洗务在清洁贫无所自给者供给饮食病者给医药小罪即时决遣重繫无有淹滞太宗太平兴国六年诏当铄石流金之候在黄沙聚棘之中亦有洒扫供饌之文雍熙三年四月诏曰当此炎蒸之际念其縲紲之人宜伸钦恤之文庶协长羸之候宜令诸道州府军监县等凡禁系之所竝须洒扫牢狱供给浆饮械系之具皆令洁净疾病者为致医疗供送饮食画时传送无令邀难减刻无家属者官给口粮无归法者候处断之时给与酒食小罪逐旋决遣大罪穷究其情无致淹延以称朕意盖又加详矣自是每岁首夏下诏恤刑遂为定制真宗大中祥符仁宗庆历皆有诏旨而条约大率如开宝雍熙之诏乃知此二敕书实本朝之家法累圣遵行尤以炎蒸为念肆我主上当盛暑时临轩疏决分命诸道虑囚悉如故典至开禧二年复因论囚又命提点刑狱使者仲冬巡历如仲夏之法每岁必再举行又命御史劾其不?者钦恤之恩又益广矣钧蜀人也褫身肃括持心笃厚行其所学不苟于职朝誉蔼然力求外补今为潼川宪使奉训词之丁宁宝前朝之敕书宣扬德意于万里之外使远民自以不冤如在畿甸真可以仰副临遣之意矣

恭题向公起所藏仁宗宸翰

臣顷见故秘书省正字陈师道跋修起居注江休复之孙端礼所藏仁宗皇帝御书善法刑政四字又言其玺文曰帝籙窃疑其不伦後见昭陵他刻正用此印臣寻考之其字曰□盖古文

笔字也出义云章始知师道误以为籀字尔密州观察使赠太尉向惠节公传范蒙赐以飞白帝笔二大字七世孙新知桂阳军临武县公起刻于石以示臣云汉昭回不容绘画敢以旧闻再拜书于下方

恭题赵时穆家穆两朝赐碑

臣三造朝行四官玉牒凡圣语御笔在法当书尝预修仁宗皇帝朝玉牒十年求所谓二者絶无而仅有有则必谨书之盖以临朝渊默几欲无言云汉之章尤不轻畀有如尹孝齐公叔充乃独蒙忠孝之褒则其贤行真可以信後世矣三子决科神宗皇帝又宠异之益彰麟趾之庆君子之泽流衍至今五世孙剡夫与其子时穆以家藏二碑示臣端拜敬诵仰叹累朝崇笃亲贤之盛事孝齐公立身训子之懿美一时名公或序或议雄文相照碑制古雅书札精到抑以窥见承平文物之大概窃考印章左曰帝人所易识右曰笔义云章中古字也昭陵多用此印退传张文懿公士逊富藏书画友正能世其家擅书名有晋宋风度此二碑皆其奇画世所罕见友正不仕故衞中无职守养高故第中三数十年非孝齐公父子之贤且厚未易得其书丹也剡夫寓四明有乡曲之誉时穆登世科为开化尉奕奕佳公子也其益宝藏以无忘先朝先世之典训

恭题神宗赐沈括御札

臣仰惟神宗皇帝经略西事纖悉周密万里风烟俱入长算时四明沈公括帅鄜延閱月才十有六承密诏至二百七十三道元佑编裕陵御集悉已上送官此秘贮所存者尽元丰五年十月盖以永乐事而公亦归矣臣顷在都下尝恭覩宣谕杨公绘宸翰笔法与此卷絶类仓猝戒谕边臣而字体庄重庙谟远矣再拜钦叹谨识于後视张丞相魏公浚潭州旧题恰六十年矣

恭题徽宗赐沈晦御诗

宣和六年御试策问非举子所能条对惟胥山沈公晦以轶羣之才精通象数借箸筹之一挥数千万言炳如也佑陵喜于得人闻喜宴以御诗宠之云章昭回具在金花笺上至今如新势欲飞动是时以贡士人衆特添省额一百人廷试士子至八百有五人文物盛一时沈氏其世世宝之使後來者犹得以想见承平气象胥山遭时多艰不得跻时于舜禹之前能捐軀尽瘁于干戈抢攘中而去就出处卒保名节褒然举首可谓不负徽皇知人之哲矣

恭题宇文绍节所藏徽宗御书修禊序

臣尝观兰亭修禊序草本流传千载唐太宗求之尤勤自谓心慕手追一人而已唐人作字无不效之者故南唐後主谓善法书者各得右军之一体若虞世南得其美韵而失其俊迈欧阳询得其力而失其温秀褚遂良得其意而失其变化薛稷得其清而失于窘拘顔真卿得其筋而失于粗鲁柳公权得其骨而失于生犷徐浩得其肉而失于俗李邕得其气而失于体格张旭得其法而失于狂独献之俱得之而失于惊急无蕴藉态度观此言则是终无有得其全者

恭惟徽宗皇帝天纵多能游心六艺笔力超迈高掩前古自出机杼真书禊序于青缙中虽曰出于薛稷而楷法精妙何止青出于蓝而已臣世受国恩先臣大父【某】受不世之知俾守四明乡郡者几五年宠光狎至细书方国之赐联翩而下虽遭兵毁遗刻犹有存者兹焉恭覩签书枢密院事绍节家藏御书真蹟昭回之光照耀凡目感叹不足谨流涕再拜书于左方归其书于宇文氏

恭题徽宗赐张继先御诗

嘉定五年岁在壬申郊祀庆成中外交贺乃季冬甲午皇帝恭谢太一宫臣扈驾陪班既已峻事知宫事高士臣易如刚以所藏徽宗皇帝赐虚靖先生张继先诗翰示臣且求跋其後窃惟汉天师道成于蜀而教传于龙虎山至三十代而虚靖出仙姿絶人道术惊世人谓天师复生诚不为过佑陵亲御词翰烂然如新再拜御瞻荡耀凡目勒之坚珉以镇名山已为晚矣呜呼人知佑陵之崇道教不知仁心实本乎为民人知虚靖之仙去而蜀之青城犹有见之者此诗尤不可以无传也

恭题钦宗御画十八学士图

唐文皇十八学士犹在秦府盖武德四年也仰惟钦宗皇帝毓德春宫以仁孝恭俭闻天下手临旧画而又亲洒宸翰以志之诚有慕于贞观之盛也臣尝观後周光禄丞杜良作文皇画像记曰太宗已定天下而高祖已登九五矣太宗于閭閻疾瘼干戈勤劳且尽知之于仁义之治兴太平极治之功容或有未究焉耳既作文学馆延四方英俊讲贯紬绎薰陶耳目者莫非帝王之事彼十八登瀛人必曰为如是事而治为如是事而乱以太宗之明刻记于心肯图衰乱乎一意于求治而已仁鑪义鞴道薪德火日往月来就圣神之模其为宗庙社稷生灵者炳焉与三代无以异矣故太宗之功烈自汉高以降莫之与敌十八人之力也此真得太宗之意呜呼钦宗游戏翰墨而为此固为万世法由今观之岂不为臣子万世之痛哉抑闻後世人君能用材者无如太宗然许敬宗乃得预议者谓如摘瓜手耳取之既多其中不容无滥此又足为世戒故并载之

恭题高宗赐胡直孺御札

高宗皇帝垂精翰墨始为黄庭坚书今戒石铭之类是也伪齐尚存故臣郑亿年辈密奏豫方使人习庭坚体恐缓急与御笔相乱遂改米芾字皆夺其真尝覩写诗自周南至商颂全表上有帝笔印记天纵多能人固莫及圣度恢然其视使臣下为拙笔书者霄壤矣

徐府及洪刍兄弟皆庭坚外甥有酷似之称俯题双庙诗有云向使不死贼未必世能容不惟自巡远以来未有此论盖亦隐永乐之痛庭坚亟称之且勉诸洪进步非此舅安得此甥也然卒致大用殆亦不喜刘蕡之助云

恭题高宗赐陈正彙御札

陈瓘之在四明遣正彙往浙西过杭州遽告变蔡京既得其情必欲寘之死地又欲并以此杀瓘既就逮瓘以劲言得免犹谪通州故其放还谢表云?突教子素存不二之风曾参杀人宁免至三之惑又云海岛万里不如无子之无忧淮壖一身弥觉有生之有患徽皇聪察仅得贷正彙之死既至沙门无复归望岛上巡检知其为名家子招致馆下又有神祠甚灵尝谒之卜以栢琰且曰若得生还求百圣琰掷之至百皆然未几钦宗即位召归而瓘已下世痛不及见遂得心疾上殿已不能对赐以名方犹传于世高宗眷遇又如此擢其子大方为郎瓘之孙大年实正由之子也为臣家壻故得闻其详谨书之以补衆人之未及者

恭题汪逵所藏高宗宸翰

绍兴五年御书廷试策问

高宗皇帝践阼之九载当绍兴五年岁在乙卯二月车驾始自平江还临安八月癸亥策士于行在所射殿时敌兵败退厉精求治亲御翰墨咨以当世之急务一士条对剴切褒然为举首则信之汪洋也自幼天资高迈十行俱下笔力絶人其在布衣名已闻于当世胪传第一年始十有八圣意寤寐英杰得之喜甚且曰惟昭陵天圣八年王拱辰魁多士年实相似赐名应辰诚为儒林盛事既负重名益进于学八年为秘书省正字寻以论和议不合权臣恶其不附己屡摈于外几二十年而其学沛然莫御更化之明年始入为吏部郎望临一时自尔入从出藩四方以其出处为世轻重位虽止于内相文昌用不尽其学至今学者尊敬真有泰山北斗之望可谓不负亲擢矣公之次子逵能继世科恪守家法仕为吏部尚书太子詹事博学多识绰有父风一日谓臣钥曰先公所试策问思陵御墨既传于外得为私藏禁中装潢亦非人间所及是殆天赐以为家宝也其为逵识之臣钥再拜耸观叹仰惊眩前所未覩窃惟国家三年一廷试士子固必有首选惟此举策问既出奎画下宠多士云汉昭回照耀编简汪公一代真儒魁天下今贤嗣又得真蹟藏弃以诏将来光明俊伟未有如此者其家法书甚富此特为希世之遇虽夏之璫戈商周鼎彝款识甚高古者亦当在下风矣谨识于後而归之公少名师闵故字孝伯既得赐名丞相赵鼎字之以圣锡云

御书中庸篇

高宗皇帝自履大位时当艰难无他嗜好惟以翰墨自娱始为黄庭坚书改用米芾动皆逼真至绍兴初专仿二王不待心慕手追之勤而得其笔意楷法益妙五年策士首得汪应辰九月十九日言者乞依雍熙故事赐新进士儒行篇以励士检有旨仍添赐中庸送秘书省校勘正字张?校中庸篇高阅校儒行篇二十二日阅入奏儒行虽间与圣人之意合而其词夸大类战国纵横之学盖汉儒杂记决非圣人格言欲望止赐中庸一篇庶几学者得知圣学渊源而不惑于偏邪駁杂之见上可其奏御书中庸以十月四日赐之仰惟思陵书六经以幸承学之士此固余事然中庸无虑三千五百余字万几至烦而浹日之间书就中篇书生勤笃者亦安能及此尊经崇儒之意真可为万世法时赵鼎为左仆射例得墨蹟为家藏仍摹刻分赐鼎晚谪海上而素重应辰遗言以此卷归汪氏应辰次子逵既以御题示臣并示此卷可谓汪氏二宝矣高宗壽考遐不作人鸢飞鱼跃儒风日盛中兴之业实本于此应辰上不负天子下不负所

学躬行直道以终其身以及子孙君臣际遇猗欤盛哉流传千载何止一时之荣也

恭题孝宗御书心经

淳熙十四年岁在丁未孝宗皇帝元命之年也十月二十二日会庆圣节亲洒翰墨书心经于禁中观堂先是上天竺山再建观堂既成住山妙珪求记于臣尝既登之石矣嘉定二年孟夏之十日珪又来言蒙皇帝赐以孝宗所书真蹟愿得跋语并刻之山中臣仰惟孝宗皇帝圣学高明度越前古是时在位已二十有六年不倦于勤治体已定而进德不已退朝余暇游心内典深味禅悦毗卢五千余卷而此经独名以心盖千经万论之至要也列圣在御相传以仁忠厚积累福祚延永苏轼有云惟佛与佛乃识其真臣谨斋祓书于下方以诏後世

恭题曹勋所藏迎请太后回銮图

臣尝恭读光尧太上皇帝宸翰称谯公历事四朝尽瘁国事始终一节夷险不渝且言令请太后天眷至金主前宣予孝思使彼感动俾予母子如初恭惟太上皇帝睿性仁孝天地助顺以遂长乐之欢而乃推功臣下尧言炳然亦惟谯公忘身徇主有以得此也臣自为儿时闻临平道中太后回銮之盛恨不身见之暨官玉牒预闻史事才得窥一二今从谯公家获覩迎请图丹青灿烂赋篇瞻蔚然後一时庆事历历在目敬拜叹仰呜呼休哉夫以谯公功成之初乞身退归无一毫矜伐意此图之作非欲自明其功盖所以发挥太上皇帝圣孝之蹟过于方册远矣是岂惟其家所当宝藏後之太史氏尚有取于斯焉

攻媿集卷六十九

卷七十

钦定四库全书

攻媿集卷七十

宋 楼钥 撰

题跋

跋王顺伯所藏二帖

鍾繇力命表

始顺伯示余以定武兰亭序书赐官奴乐毅论余谓小字无以复加矣顺伯笑曰未也又有迈此者乃出鍾繇力命表谛观久之心为之醉字画精到乃至是乎顺伯博雅好古蓄石刻千计单骑赋归行李亦数篋家藏可知也评论字法旁求篆隶上下数千载衮衮不能自休而一语不轻发先鍾後王字家固有定论以此三者坐判优劣岂为知者道耶

定武修禊序

顺伯好石刻成癖兰亭善本收至三四未已余家无一名帖心顾好之把玩不忍去手虽未若顺伯之膏盲然疾在腠理矣岂所谓不治将深者耶

跋秦淮海帖

山谷晚游浯溪题诗磨崖碑後见少游所书文潜诗尝恨其已下世不得妙墨刊石间时少游醉卧古藤下未久也而山谷老人已有此恨矧今相去几百年此帖洒然如新得而读之宁不感叹

书仰孝子行实後

先生孝行出于至诚本不求人之知清朝官之以风厉天下而後先生之名显永嘉名臣辈起为浙河东西冠嘉遯之士至行卓然必有继先生者第其深处岩谷不求声称故潜德幽光未之或发钥不肖愿与邦人访之闻于州于部使者于朝廷使此邦之风义益高而先生之名不孤不亦可乎

跋陈氏续蒙求

徐坚作初学记中山刘子仪爱其言曰非止初学可为终身记此书出入史传援据精确何止应童蒙之求耶

跋吴生画卷

李广射虎

史言将军射没镞谓没矢者殆未必然临右北平盛秋匈奴避之画不能真似尚可想见也神气如此而恂恂如鄙人此所以为李将军耶

山水平远

延陵生丹青无不工适兴作山水尤深远有意趣宦游三载归心荡摇渡口唤舟殆属梦境

跋韩干马

旧读坡翁诗恨未见此画今日得之便觉诗画互相映发此诗此画谁当看岂无所待耶

跋徐荐伯横槊醉藁

上马能撃贼下马作露版古人惟以许传修期荐伯儒者由右学以奋论议慷慨谈兵如流击贼何足言读其诗顿挫清厉有壮士横槊之气倚马而作露版有余矣修期何人哉

跋徐子田菊坡图

徐君傲睨菊坡不复出仕故其乐同彭泽令少日便赋归而三径已就荒松菊仅有存者则夫火驰宦途碌碌忘返之士顾有一适如君者耶

书元章简公神道碑後

章简公名德隆重词章典裁盖平昔之所慕者兹来佐州披图牒访古迹始知甓城牖门疏河建隆梁以为此邦无穷之利者皆公之力曾孙康曾适为监征叩其家世始得碑铭而读之益加叹仰若苏魏公之雄文韩南阳之奇画又皆可宝也

跋任氏香圆记

齐晋安王以莲华供佛愿竟斋不萎七日斋毕华更鲜红视甕中稍有根须史称其孝感然犹藉于水也香圆垂之空中而敷华结实可谓异事此理殆未易致诘轻下注脚却成蹉过

跋王清叔画卷

断崖小枯木

醒庵古木大似梁鹄书有劒拔弩张之气

全幅枯木

此幅笔势尤瓌壮杂之文湖州射泽中未易辨也

横披山水

观此图当作烟雨半开登高临远时想苟求形似便失妙意要不可以画家三尺绳之

跋霍氏球川图

霍君来为赤城理官垂去矣益不得志书衔袖过余曰漫仕三年不逢已知图家之球川得名胜词翰盈巨轴以此西归贤于荐书远甚余颇爱其言展卷久之字呼曰子登宦情如水而家居胜絶乃尔君之归似晚矣他日有客道南兰陵舍舟金斗门外径造竹所者必我也君其容之乎

跋王少保行述【参政敏肃公父】

士夫以重名致大位虽才业足以自奋要其先必有所自来而积善累功之人亦往往取必于後参政一代伟人恨生晚不及见得此书于公之仲子始知自无怨公以还世有隐德遂为名臣大家天之报施端不偶然後来者又坚肯堂之志汤汤淮流宁有既耶

跋丁端叔所藏鼎彝款识

右商周以来鼎彝尊鬲等八十有六予游南兰陵从丁端叔借观商周远矣器之存于今者盖寡识者望而知之以为商质周文世愈远则文愈简然周器亦有甚简者不知何以别其非商也盘诰诂曲聱牙商周皆然其他训诰誓命之文初不相远者商颂虽止五篇求其体制比之清庙维清之诗加详焉岂高识者他有见于此耶古人不可复见而得其器器又不可得有乃摹取款识之文茫昧难读顾有何好而深好之是殆难与不知者道也

跋陈忠肃公表藁

范忠宣晚年益以天下自任尤留意人材或问其所储蓄为今日用者曰陈某又问其次曰陈某自好盖言忠肃公可以独当天下之重也宣和末年或问游公察院以当今可以济世之人

曰陈了翁其人也元城先生尝因公病勉以医药自辅天下将有赖于公当力加保养以待时用读公表藁及纸尾数语气凜然如生折而不挠有大臣之风三公真知言哉

跋百醉老人诗

百醉老人诗追七子凌鲍谢诸公论之已详游别圃有句云中原戎马场故国虎狼窟言归成默伤念之中心栗钥读而悲之此诗人黍离之叹少陵一饭不忘君之意也百醉间一醒岂真醉耶

跋史魏公与心闻禅师帖

太传史魏公得法于心闻爱其子孙至今不忘明书记其从孙也持魏公书偈来读之益信二老相得之深传播丛林又为裴相国与黄蘗禅师添一重公案

跋赵清宪公遗事【○宪一本讹献考宋史赵挺之传谥清宪与赵拚异】

右丞相清宪赵公遗事其孙谊録以示钥遂获窥先正之风烈呜呼建中靖国初徽皇銳意于治亲擢公为御史中丞裕陵人物之旧收用无余党论虽兴犹有如公者屹立于诸公中谗谤竞起而主意不移维持国是尚有赖焉使左右皆薛居州事宁至此耶三读遗编为之感涕

跋戴伯与石屋诗卷

庄子秋水篇言埳井之蛙擅一壑之水陆士龙逸民赋富贵者是人之所以欲而古之逸民轻天下细万物而欲专一丘之欢擅一壑之美半山诗曰穰侯久擅关中政长恐诸侯客子来我亦暮年专一壑忽逢车马便惊猜盖用其语语则工矣惜乎其不大也石屋之胜余未及识伯与以妙思寻幽而无专擅之意思与好事者共之岂不宏哉

跋刘杼山帖

先子嗜书如嗜芰平生富藏名流翰墨而独谓杼山先生之书光前絶後尤祕宝之钥自遭家艰文字散落惟此二番宛然巾箱中疑有神物为护持焉谨帛其縵而新之以续先子之志

跋朱灋山自撰墓志

灋山先生少年以词藻表见一世士林传诵追配前良铭中之文如霜降水落扫尽翰墨余习非饱谙世故晚岁见道不及此尚何疑于死生之际哉

跋徐状元奭祥符五年敕牒

欧阳公归田録载真宗好文虽以文辞取士然必视其形神器识或取其所试文辞有理趣者徐公铸鼎象物赋云足惟下正詎闻公餗之欹倾铉乃上居实取王臣之威重以为第一呜呼公之擢举首远业已见于此非徒为偶俪之工祖宗之取人如是宜乎名臣之衆多也

跋杨伯子诗卷

平生未识诚斋而多见其诗每深向若之叹璘师示以此卷读之洒然知其为诚斋之子也笔力駸駸真逼人哉

跋秦淮海戒杀帖

秦淮海妙墨前辈所推余顷得此本爱玩不能去手时在校官念此邦日事鲜食物命不可胜计欲传于人未暇也兹来假守遂登之石释氏戒杀诚是而言之太过不若远庖厨之言为适中然则何取于此尝感汝南周顒之言曰变之大者莫过死生生之所重无逾性命性命之于彼极切滋味之在吾可賒读者宜动心焉

跋郑屯田镌蓬莱山诗

先生风神萧散肺腑清彻不以事物自婴故出语辄惊人晚归自道山来赋此诗未几遂仙去元丞相微之云我是玉皇香案吏谪居犹得小蓬莱先生殆是耶

跋杜祁公草书诗

钥在郡庠直舍时薛君文老以近隣相过出杜祁公草书云诗尝跋之云欧阳公答祁公惠诗言无俗韵清而劲笔有神锋老更奇二宝收藏传百世岂惟荣耀诧当时薛君所藏诗虽出于唐人而草圣则公真蹟也欧阳公二宝君得其一矣兹遂登之于石

跋薛士隆所撰林南仲墓志

淳熙四年冬钥备员敕局陈君举任太学録官居相隣一日同林伯顺大备相过怆然曰薛寺正之亡吾侪之所痛也尝为伯顺求先铭于寺正书以古篆恐其难辨又作楷法于後已授我而亡之矣後从薛氏子沄得其藁茫不知何语子能辨之否钥不善篆而素好之一见才识十二余皆奇古难知白仲氏故严州使君相与徧閱字书考究几月而後尽得之寺正于书无不读耽玩钟鼎古文搜奇抉怪凡易识者多不用古文所无间以小篆补其阙真好古哉君举伯顺得之喜甚又十二年假守东嘉二君来见曰寺正所授真篆二本後得之故书中取以校昔所考无差者并为刊石以授伯顺使宝之以成其志以存寺正之遗蹟抑以见吾兄弟用心之勤俯仰皆有感焉始伯顺葬父于金舟如寺正之志後以五年九月壬申改葬于亲仁乡龙门山合其母陈氏云

书周礼井田谱

会稽夏君林以笃学名于乡绍兴间有旨郡给笔札録其所着书以进郡出钱百万就姚江置局誊写几千卷春秋易有解律历有书余从其孙壻袁起宗鼎得其周礼井田谱读之井田之废久矣林勲本政书最为有志于古然仅载田制他书亦未有如此之详且明者井邑丘甸寓兵于农凡出于井田者无不毫分缕析又皆图以示人如指诸掌文中子曰如有用我者当执周礼以往其讲之熟矣事大体重固非岁月可为惟仁政必自经界始此先王经国之本也故为广其传思与学者共讲之刊既就钱文季文子指其间有不合者胡太初宗亦相与讲明而黄君毅又作问答一卷皆有益于书陈君举许以序引自湖南远寄词雄义浑尤为着明遂并刻之惟文子之说以俶装薄遽不及附见当俟他日夏君年八十余无一日不着书其精且博如此以上书补官一试吏而止不得少见于施用为可憾云

跋诸名公翰墨

韩魏公 司马公

王文公 韩康公

富韩公 文潞公

王宣徽 晏元献

陈文惠 韩南阳

右诸名公翰墨米宝晋题跋过江以来鲜有之或谓得之扬州扰攘中盖故家物真可宝也司马公书必施于所尊其论出处大致凛然不可夺晏元献属其弟于人以以为不可温顔兹非前辈之言耶是时士夫书必以小纸圆緘故多用圆印而书无摺痕礼简而意厚字画又不苟类可传後今世专以録子往来语多浮溢纸尾书衔全是吏牒体虽有词翰之工欲袭藏之终觉不韵重可叹也

跋汪季路所藏书画

徐骑省篆项王亭赋

旧见岸老笔谈载骑省濡匾之说近有敷原王季中彦良实襄敏诸孙余及见其暮年尝问古人篆字真蹟何以无燥笔季中笑曰罕有问及此者盖古人力在□不尽用笔力今人以笔为力或烧笔使秃而用之移笔则墨已燥矣今观此轴信然子孙非不甚工惜其自坏家法反以端直姿媚售一时後进竞仿之古意顿尽但可为知者道耳

龙眠九歌图

三闾大夫见楚先生庙图画古圣贤怪物而作天问龙眠读九歌而为之图一段风流视楚人何远

王晋卿江山秋晚图

宋大夫闻襄王之梦孙兴公见天台山图皆想像为之赋文章之妙如此若丹青非亲见景物则难为工晋卿固自名胜然方其以金猊游冶都城嫩寒中安知江山秋晚时事不有南州之行宁能尽写浩然词意耶孙浩然词云一带江山如画景物向秋萧洒水浸碧天何处断霁色冷光相射橘树蓼花洲掩映竹篱茅舍天际客帆高挂烟外酒旗低亚多少六朝兴废事尽入渔樵闲话怅望倚层楼红日无言西下【右离亭燕】跋元丰八年进士小录

先祖少师以是年登科为三等第十人建炎中金兵至四明诸父仓猝避难室庐遭毁故物一不遗章公择申公子也实为同年生其孙灏与钥同登隆兴元年进士科家藏此书至绍熙改元始得传录以笃年契以示後人是时当泰陵在谅闇贡闈既试而火时有状元焦之謠已而果然尝闻之长老焦之文精而丽亚魁刘公之文浑然天成主文争或不胜则曰魁恐终非远器焦竟不及禄而刘遂为近臣是书大略与今日相似而不同者九终榜无一宗子盖天族未有试进士者任子当有自锁试进亦不见一人既无廷试止书第一第二等期集所供职才二十五人卷首止以二版书杂事试官书知举而不及参详以下犹有明经科谢恩延和殿赐优牒于崇政殿门外又不晓优牒之义四月二十九日奏号五月二十日御史拆卷封三日奏名六日奉敕放榜此皆事之变汪公灏职纠弹秦公观掌牋奏兹又一时之盛也

书张武子诗集後

武子拱人也父避地南来往返明越遂家于明隆兴初与余为同年生自尔益相好人物高胜笔力可畏非敢以友友也不幸齎志而歿吾党共哀之其季以道哀诗二编期以行远遂初尤贰卿为之序以道示余泣且言曰尤公知吾兄之诗而不深知其平生知平生者惟子尔更为我言之余曰尚忍言哉武子天资絶高少以流寓名荐书文已怪怪奇奇或诮之笑曰吾宁僻无俗宁怪无凡此意卒不变然亦以此不偶闲居好与诸禅游佛日宏智皆入其室颢悟超卓学亦与之大进结交老苍闻见多前辈事听之使人忘倦丞相寿春魏公作尉姚江一见君奇之君亦归心投以诗曰愿同丑万辈终老孟子门後二十年试南宫魏公得其三策心知为武子之文袖以见知举张公真定曰适得一卷舍人如欲取时文则不敢进果欲得士人否张公曰吾尝言宁取有瑕玉不欲取无瑕石读之以为佳魏公曰此某故人张某之文也舍人异而记之比揭榜惊谓魏公曰果张某也魏公罢相居小溪山中武子日从之游如裴迪之在辋川两仕都城司余于外司帑于内皆甚剧泊然如在山林苟非所知虽贵而欲见不造也平时若不以事物自婴而官业井井可观惜乎不见用惟诗传于江湖间尔余尝跋其诗卷云与武子评诗谓当有悟入处非积学所能到也君读之以为得我意尝曰山谷晚年诗皆是悟门爱其金猊繫马晓莺边之句又曰四更山吐月残夜水明楼东坡尝赋五更五诗词虽工盖惟四更

为佳尔又尝自哦其诗曰客向愁中都老尽只留平楚伴销凝又哦其词曰昨日豆花篱下过忽然迎面好风吹独自立多时其大约可见矣闭门读书室中无一物凭案开卷终日凝然性虽嗜诗未尝轻作或终岁无一语故所作必絶人妻孥至不免饥寒或谓君不为岁晚计君曰水禽有名信天翁者食鱼而不能捕兀立沙上俟他禽偶坠鱼于前乃拾之然未闻有饿死者其夷澹雅谑类此诗不必赞也其清丽粹洁上参古作旁出入禅门寄兴高远遽读之或不易了而中有理窟览者当自知之

跋赵君靖所藏张紫岩帖

丞相魏国忠献公名遂身退又在闲废忧患中与友壻赵君家问悼亡方切而忧国爱君之言炯然自以为中心未尝须臾宁时绍兴辛巳边事方扰故公尤以为忧忠肝义胆不徒因事而後见也

跋东坡上枢密论开边书

裕陵銳意攘夷晚乃信用兵不是好事枢臣得公书惜乎不蚤以闻徒流传至今也

跋陈简斋戏学

刘子曰玉屑满匣不可以为圭璋余则曰虽不可为圭璋要可宝也于此书亦云

跋李伯和所藏书画

东坡所作文与可砚屏赞

老坡文如河汉而寂寥短章措意曲折不窘边幅大似老泉名二子说而又过之使但言竹石之工何以为文湖州耶

薄薄酒二篇

两头纖纖终不如月初生虚飘飘终不如花飞不到地薄薄酒後作者寢不及前词人务以相胜似不若别出机杼

苏氏璇玑图

晋史载窦滔妻苏氏始平人名蕙字若兰善属文滔苻坚时为秦州刺史被徙流沙苏氏思之织锦为回文璇图诗以赠滔宛转循环以读之词甚凄惋凡八百四十字即此图也与武氏所记多不同未知孰是又武氏谓二百首而龙眠止得百二十六首细推之殆不止此也

跋安光远所藏祖廉访诗跋

廉访公以文受知徽皇屡将使指刘延康之守真定公实佐之分守京城又引以自助寻执节以死公与其三子宝学公以下护丧间关兵火中送之建阳未至而死于道其为人可知钥顷以假吏过赵石桥色深碧而累甃坚致中为大洞跨水两旁桥基各为小洞三若品字洞中多前良题刻不能详记意公诗在其中也此轴多北刻无别本安氏尤当宝之

又张总得与其父子伸帖

总得翁才气高迈其子紫微公文采名重一世议者犹谓不及其父所与安君子伸二帖称叹如许欲得名章俊语为定山中故事求新诗以矜式此翁岂轻为许可者耶

跋抚州崇仁县义约

媿哉义约之立也风俗之媿恶繫乎士大夫先正名公有以孤生荐于乡历求裹粮于亲故终不满千钱愤且慙挂钱于城门矢之曰我且显当徙族以去已而果然非轻去父母之邦盖病其里俗之不可变也崇仁固多士有因此约而成名他日得志必益思有以媿吾之俗凡济人利物之事相与讲求而兴起之下至田里必有出入相友守望相助疾病相扶持之风近者悦远者慕一变至道当于此乎取何止为目前寒士之利也耶

书魏丞相奉使事实

隆兴二年金以兵压境朝廷选使右丞相寿春魏公时在淮东宣谕司议幕见大夫无可使者召对便殿遂授使节敌势方张事变叵测所谓飞矢在上行人在下而公握节抗议动中事机气劲词直要约遂定迄今三十年边境晏然厥功茂矣此书所载皆其实迹也方来归时钥适在都下士大夫皆谓必有醴赏殊渥迎劳境上以宠其至至则论赏如格与平时泛使无异公亦退然即司宗官次而不自言久之而後为右史又久之仅迁左螭亦以序进而已盖平时寿皇銳意恢复中原绍祖宗之大烈敌未退听尝诏公尽以礼物授督府为犒军费虽卒就和议圣意不以自安也公既登从班典铨演纶封駁相继上眷日隆一岁九迁乾道元二间以夕郎摄大夫径除同知枢密院兼参知政事不数月参预为真是冬遂登揆路宰相代天理物固非赏功之官公之大用君臣遇合殆不以使事至此也制麻初放贺版如织有客历叙奉使大节既而曰逮兹登用咸谓畴庸在宵人窃谓其不然待丞相不几于太浅使苏中郎亶典属国固难酬抗匈奴之功然富韩公卒为大臣岂专以使契丹之故公读之以为佳公之意可知矣元丰中裕陵命苏魏公纂修南北通和以来国信文字赐名华夷鲁卫信录仍别录一本付枢庭圣谟远矣中更丧乱书遂不全呜呼摭高文之宿愤必有任其责者于此书尚有考焉

攻媿集卷七十

<集部,别集类,南宋建炎至德佑,攻媿集>

卷七十一

钦定四库全书

攻媿集卷七十一

宋 楼钥 撰

题跋

跋汪季路书画

王岐公立英宗诏草

昭陵以英宗为皇子诏曰濮安懿王之子犹朕之子也思陵以寿皇为皇子诏曰艺祖皇帝七世孙也明白洞达晓然使天下後世知之前圣後圣其归一揆大哉王言兹岂词臣之力也哉

魏野草堂图

寇巴东终于无地起楼台熟魏三山居乃如许宜乎不肯以此而易彼也

苏子美诗

尝见沧浪补怀素草书至不可辨虽天才豪逸自谓信手纵笔何尝留意然非水墨积习亦未易至此

东坡祭范蜀公文

唐人赞狄梁公云取日虞渊洗光咸池潜授五龙夹之以飞公称蜀公云导日而昇灿如长庚事固不侔词意亦卓然过之

东坡与欧阳叔弼兄弟帖

苏以欧而显欧以苏而尊荐士蔽贤後人当知所择

东坡与林子中论赈济帖

荒政无第一手盖蓄积无素聚饥民以千万计仰给于官活者虽多其不免者亦衆尽心力而为之尚庶几焉尔坡翁亦自言熙宁流殍之祸公私皇皇晓夜措置仅免狼狈九年耕必有

三年之蓄古制既不明此贾谊所以哀痛公私之积也

黄太史书少游海康诗

祭酒芮公赋莺花亭诗其中一絶云人言多技亦多穷随意文章要底工淮海秦郎天下士一生怀抱百忧中尝诵而悲之醉卧古藤诚可深惜宜人者宜于人竟亦不免哀哉

蔡京自书窜谪元符党人诏草

裕陵裁决庶政动出亲札是时京方为检正建请差官置局类而为书因委京编次迨事徽皇遂以为相业之本违御笔者初以违制论後又以大不恭论其实皆出于京也党籍之设臣子所愤纒悉见于此藁尚可掩乎比其再相以至三入宠任既不及旧御笔一从中出京亦不知所为商鞅立法亲受其弊隕身覆宗诚自取之败国殄民中原丘墟岂不痛哉

跋乔仲常高僧诵经图

始余从乡僧子恂得罗汉摹本旧有跋云姚仲常善画而不易得一贵人待之三年一日欣然索匹纸为作应真数日而成其本已经四摹固知失真已远而笔意尚卓然可观衆像之外人物鬼神山水树石无不毕备以瑠璃瓶贮藕花小龟缘茄而上童子隔瓶注视末有大蛇横行水帘中节节间断而意象自全皆新意也恨不得见真笔後又见摹本于苏卿伯昌家则已题为龙眠矣大率事不深考又不谨于阙疑见唐人画则指为道子摩诘不知有卢楞伽辈见国朝画则指为龙眠亦不知有乔君也今见此图泊岩壑跋语为之醒然且知姚之为误也是僧默诵何经而仙佛诸相缥缈自其口出鬼物俯听于後皆有妙思又使人之意也消

跋游嗣祖所藏帖

欧公与薛公期驾部帖

欧公有送公期得假归绦诗山行马瘦春泥滑野饭天寒饧粥香最为人脍炙简肃公绦人也公为之壻称其清德直节家法严子弟多贤材公期岂其人耶

山谷草圣

草圣可习无如俗何以山谷之高胜晚乃得脱此耳

唐子西与游氏帖

蜀士郑太玉与先生游俱好世出世间法尝曰文章习气盍痛扫除雕琢肝肾徒劳人耳先生戏答曰吾宁尽此生笔砚间寂然之乐俟来世尚未晚也其用志如此先生尝谓其子曰我胸

中有见成论五百篇当以授汝未几疾作遂歿紫微公以为终身之恨云

跋王顺伯家藏帖

苏子美锦鸡诗

沧浪文采絕羣正似锦鸡虽欲为木鸡可乎悲哉

范文正公与尹师鲁帖

师鲁自筠州輿疾至南阳托范公以死盖平日之相与者如此

韩魏公与尹师鲁帖

尝读安阳集及家传公之虑事精审非他人所及此帖尤可见兵凶战危安保必胜或记师鲁谓公置胜败于度外者过矣

王荊公书佛语

公诗有云世间好事佛说尽岂为此等语耶公之书自有来处非无意于工者

林和靖与通判帖

通判不知何如人承平无事时佐钱塘佳郡又得此老为州民乐哉

右军章草

章草之絕久矣尝见皇象所书急就章象时有张子并陈梁甫能书甫恨逋并恨峻象斟酌其间甚得其妙中国善书者不能及【○舊本自张子并以下六句间空七字今据三国吴志赵逵传末注文填补】惟如此然後可作章草此帖信是合作正使非右军真蹟决非近世所能为者是可宝也

米元章三帖【一行书一篆一隶】

孔融遗张紘书曰前劳手笔多篆书每举篇见字欣然独笑如复覩其人以是知古人作书亦有以篆者宝晋行书妙絕一世此卷四十三字尤高而不善用二短何耶

跋陈闻远所藏了翁龟山元城帖

杨龟山尝宰余杭今赞府陈棠则了斋之曾孙也出家藏二公及元城先生手帖家问凡十二纸邑大夫江君相与刻石于县庠名德翰墨前後照映整襟读之凛如三君子相从于一时百世之下尚当兴起矧声迹尚未远耶

跋曾氏独醒杂志

余比官成均临江曾无逸为僚尝言其先君子平生示以书一卷盖状其行事樊少从博士为之哀辞者端明忠简胡公遗墨二画得良斋诚斋诸公为之跋诚斋又序其独醒杂志呜呼备矣无逸又曰先子非无意于用世蚤岁得疾遂弃举子业专务古学能悬腕作行草追配前良向也视富贵若不足洵而曰浮云居士久益高尚又以独醒名斋晚号归愚所造愈深故死生祸福之至了达如此家有章伯益友直飞跂墨戏数幅初未尝摹仿落笔辄过之一日于败纸写二虫精彩胜絶未几遂下世故并手泽藏焉余曰画不足为居士道也以诚斋之亲且厚犹不知游艺之妙其蕴蓄不见之外如此画者多矣可胜叹哉寻得独醒志读之益知其为博雅笃论之君子徐节孝平日默处一室几若与世相忘至其论天下事则衮衮不倦有不出户而知天下之称然犹居山阳往来之冲若居士远在江右而中原故事历历能言则又过之矣

跋赵伯山责伪楚昼

段太尉奋然击朱泚人徒知出于一时忠愤柳河东拳拳録其遗事以见非出于苟然者延康二书观者无不兴起近读其行状在承平时遇事一一不苟故能自立于抢攘中士大夫平日苟不务操履一旦临大节能不夺乎

跋姚编礼【辟】敕牒

议礼之家名为聚讼彼惟不得卓然名儒而杂进异议故尔嘉佑治平间朝廷清明元老大臣欲修因革礼而于下位拔用姚苏二人书成而人无异词为官择人要当如此而後可以服天下成事功矣

跋谢观妙混元实録

道家者流出于老氏而支分派别去本寢疎道藏之书杂取百家士之有闻于世者多以拜章役鬼炼气 金为能此皆燕齐方士之余去本又远矣观妙本儒生学道于皇甫清虚盖知尊老子者博极书传荟粹成编穷搜约取自号实録且言凡十六变之说事迹隐晦其余间见纪传不载时代者不述与夫放光见瑞示梦传言灵验等事非化身下降者亦不复载庶几传世不诬然青羊白卫之灵迹琼台玉局之奇祥此类尚多果皆实欤尝诵公是先生之言曰苍茫六合外渺莽三皇初近既未必有远亦非必无信如斯言安知其非实也

跋李武义【翼】行状

天宝之变拥强兵坐而观者相环也而贾贲以一尉讨贼张巡以县令起兵朝不坐燕不与古人不免有是言忠臣义士惟知尽节不以位卑为辞也李侯官不过微吏而独奋一臂抗方张不制之敌矢死不屈凛然如生三复遗事为之流涕

跋朱岩壑鹤赋及送间丘使君诗

承平时洛中有八俊陈简斋诗俊岩壑词俊富季申文俊皆一时奇才也南渡以来诗俊文俊皆为执政大臣相与力引岩壑之名始以隐逸召用于朝而肮脏不偶终以退休鹤赋之作其有感于斯耶使其羽翮一成岂不能翱翔寥廓往而不返犹思以灵药仙经求报主人爱君之意又见于此余生晚不及见犹识蕲州史君淳诚笃实似古君子宜岩壑相与之厚也

书张待制【字发】行实後

余尝过越与士人语靖康建炎间事叹曰李邕以吾州降金虽苟全一时之民而貽我千载之辱余慰藉之曰彼但自隕其家声安能污大府耶钦宗仓卒遣使廷臣多畏避苟免中书侍郎陈公慨然请行钦宗为之泣下特免其行见大夫无可使者卒遣之其副则待制张公二人皆奋不顾身深入虎狼之区沦陷十余年竟握节以死忠义之风凛凛如生是岂不足以刷会稽之耻哉士曰然皆吾乡人也兹读张公行状因记于後

跋袁起岩所藏阎立本画萧翼取兰亭图

此图世多摹本或谓韩昌黎见大颠或谓李王见木平皆非也使是二者不应僧据禅牀而客在下座正是萧翼耳吴公傅朋云书生意气扬扬有归全璧之色老僧口张不嚼有遗元珠之态【元珠之元宋时避庙讳所改】亦非也翼以权谋被选远取兰亭首奏乞二王杂帖三数通以行至越衣黄衫极宽长潦倒得山东书生之体方卑辞以求见衲袖之书乃是御府所贲野童自随亦携书帙此正画其纳交之时後既得兰亭则以御史召辨才晓然告之不复作此儒酸态矣且其时此僧为之绝倒良久何止口张不嚼而已右相不惟丹青精妙其人物意度曲折尤非後人可及也

跋姜尧章所编张循王遗事

柳河东以段太尉逸事上史馆自言好问老校退卒能言其事考其所载者三戮郭曦之军士抚焦令谿之农者不受朱泚大绶之币顾太尉忠节显着何必俟此三者而後为贤盖惜其逸坠且以见太尉之平昔非一时奋不顾死以得名者旧唐史之传虽详以未见河东之状故三事皆阙而不书宋景文公谨谨书之其为佳传之助多矣尧章慕循王大功而惜其细行小节人罕知者砻砻然访问而得此将以补史氏之遗其志可嘉也

跋东坡获鬼章告裕陵祝文

永乐之祸可胜痛哭鬼章生禽宿愤遂摅太宗平突厥高宗平高丽当告陵庙盖以唐高祖蓄愤于北狄太宗锐意于东夷武功未终後圣继志亦既平荡所宜啓告此长庆中奏语也不知当奏告时有雄文如此否

跋东坡送刘道原归南康诗

刘凝之弃官居南康欧阳公所为赋庐山高山谷谓其忍贫如铁石者是生道原坡公亟称之所谓古君子即凝之也司马公通监一书赖道原为多其子壮舆亦奇士坐客问此诗本末因为道此

跋嘉佑二年进士小録

钥曾大父登治平二年乙科大父登元丰八年丙科近岁传得小録又因并録绍圣二年者大率与今小异今又见此书四者俱以前一叶尽録杂事而此又分试题为三等殆不可晓同年生无分职姓名下每事辄容一字事之因革类如此不能详考矣是岁得名士十五六人而苏长公少公皆在焉此真千佛名经也

跋扬州伯父赋归六逸图

渊明聯句 山谷西轩 真长望月太白把酒 玉川啜茶 东坡题咏

尝见古画六逸图孙登长啸阮孚蜡屐渊明以巾漉酒韩伯休货药边孝先昼眠毕卓瓮下皆非同时特取其逸耳非若竹溪六逸之同游也滕子济藏唐人出游图亦六人宋之问王维李白高适史白岑参云林子跋云据其名题或有弗同时者而扬□并驱睥盼相语以为得意忘象者扬州伯父所图是岂可与俗人言耶

又四贤图

谢安游东山 张翰思蓴鲈

子陵钓台 渊明临流赋诗

谢公虽为苍生一起而东山之志不渝子陵出见刘文叔终不肯为三公以归季鹰渊明尤为高尚伯父拥麾持节十余年兴寄高远尚友四贤晚而得归殆不负此志矣

跋了斋有门颂帖

钥旧读了斋集见有门颂一篇莫知其旨庆元二年八月上澣有二僧叩门袖出了翁真蹟及与延庆第四代明智讲主论此颂二帖读之恍然因问天台教观之说云智者大师所说四门

一曰有门一曰空门一曰亦空亦有一曰非空非有其实一可贯四四实归一公之为有门颂盖谓此也近世士大夫用力不及前辈只如学佛或仅能涉猎楞严圆觉净名等经及传灯录以资谈辩尔若唐之梁补阙诸公本朝杨文公杨无为张无尽及了翁皆留心教观深得其趣读此颂及书可以知其所造之深矣惟公忠言大节照映千载身罹百谪视死生如旦昼平时学问深造自得固自应尔方在丹丘时逆境尤多而心地泰然深入不二法门公之学佛得力岂易测识哉二僧欲刊之石以信天台之传谨书于後而归之二僧曰妙珣了怡云

跋施武子所藏诸帖

鍾繇墓田丙舍帖

庆元二年孟冬壬子见余姚施令尹盖司谏之子也出其家所藏墓田帖碑石余诵山谷之诗曰平生半世看墨本摩挲石刻鬓成丝为之三叹

王右军东方画赞

李阳冰上李嗣真论右军书有云画像赞洛神赋姿仪雅丽有矜庄严肃之象视之信然

黄庭经

硬黄小字临黄庭平生所见三四非精笔不能到第未知玉轴黄庭比此何如耳云林子以陶隐居之言证此经非逸少书而隐居与梁武帝启自以黄庭为逸少有名之迹若遂以为兴宁以後宋齐人书恐亦未易定也

王大令洛神赋

大令好书洛神赋而李阳冰论右军书与画像赞同称右军之蹟不复可见不知更胜此否柳公权记于前璨题其後何止公慙卿耶

东坡救月图赞

旧未见此图直不知赞之所以作东坡竹树犹传之文与可兹以一点成月一抹成蛇曲尽妙趣盖自得之若曹不兴误墨成蝇子敬为乌駮?牛高道兴坠笔亦成画彼皆工于画者坡乃以游戏至此真天人哉

东坡醉中书对客醉眠诗

公自言我书意造本无法点画信手烦推求然豪逸迈往如此者不多见每每言酒气从十指间出而饮酒正自不多岂所谓醉中醒者耶

跋卞居让摄泰州长史牒并宣徽院公文

余平时见士大夫家故物未尝不起敬亦因考其所自窃考此卷前曰敕泰州团练使乃检校太保姓荆者敕授之官如今之公牒前必曰知某州军州事之类也自牒奉处分以後则泰州之公移也既差卞君摄长史故为之词其後列衔皆泰州之官印文凡七皆泰州团练使印唐朝固有纸告而此非告也後一纸宣徽院之文姓柴者禹锡也禹锡以太平兴国七年四月拜枢密副使至雍熙二年冬方罢而此文乃八年九月所给故知其为禹锡也国朝旧制宣徽二使通掌院事共院异厅止用南院印又南院比北院颇优或兼枢密亦掌本院皆与此合石晋天福五年除翰林承旨改殿前承旨为殿直或云淳化三年始改殿前承旨为三班奉职盖苏易简以是年除承旨而其次子耆续翰林志云旧有殿前承旨其父拜翰林承旨上以其称呼不别又以其与清贵混淆诏改为三班奉职以避其称因备载之然此卷乃卞氏故物相传二百余年又出于兵火煨烬之中是可宝也

跋温公题刘杂端孝叔奏藁【○孝叔名述神宗初为侍御史知杂事王安石始参知政事述疏论权数不足任云云最为切直宋史本传失载尚见东都事略】

士大夫特立独行无待于助然亦赖巨公正人以为重韩忠献论事切直有本末王沂公称其不负所职谏官宜若此而忠献益自信刘杂端之奏藁司马文正公以为纯忠恳至深识治本明主宜置座侧以为观戒杂端可以自信可以不朽矣一时得丧其犹足存耶

跋陈昌年梅花赋

皮日休赋桃花欲状其天冶专取古之美女以为况此赋形容清致故又多取名胜高人以极其变梅固非桃可比体物之工亦又过之

跋孙德辉作薛持国所居记

南朝何子季筑室秦望山山发洪水树石皆倒拔惟子季所居岿然独存太守衡阳王元简命锺嵘作瑞室颂刻石以旌之薛君家再脱郁攸之灾乡人敬之水火虽不同亦可名瑞室云

跋李光祖所藏远祖迁定海县丞告

天福八年乃石晋高祖之末吴越第三世弘佐之三年自同光改元武肃王建国以来二十有一年矣是时吴越虽奉中原正朔事皆专行令丞银茜之赐岂复有关于晋朝况此告不称敕而称制盖吴越国承制而行者也或者犹疑官制印文等全似中朝考之五代史吴越更名所居曰宫殿府曰朝官属皆称臣遣使册海中诸国封拜其君长又通监言建国之始仪卫名称多如天子之制教令下统内曰制敕将吏皆称臣惟不改元置百官有丞相侍郎等又范鲁公五代通录云自称吴越国工参佐称臣僭朝廷百僚之号府曰朝廷但不改年号而已通监又有宝正之称五代史十国年谱载至六年而後已平章事等官虽不可徧考亦有可言者中书

侍郎曰郑遨五代史一行传有郑遨隐居华山唐明宗以左拾遗晋高祖以谏议大夫召之皆不起则是隐居不仕又天福四年已卒且不与吴越相干非此郑遨也翰林学士行礼部侍郎知制诰元德昭後为吴越丞相及事弘佐与俶至显德三年周世宗使吴越出兵击南唐时犹在相位所谓元丞相不欲出师者元本危姓危仔倡以信州降武肃武肃恶其姓遂易元氏德昭即仔倡之子熙宁中参知政事章简公绦厚之即德昭之孙也苏魏公为章简公神道碑言曾祖仔倡又言祖德昭武肃王称制用以为相官至右仆射兼侍中晋国公铭曰宪宪公祖遂相钱塘然则此为吴越之告无疑如给事中曰辇右丞曰玄亮皆未详若门下侍郎平章事曰鼎者疑是林鼎武肃以罗隐林鼎为宾客元瓘以镇海节度判官林鼎掌教令恐至弘佐时为平章事未可知始武肃尝列宾佐将校名氏于纪功碑陰者五百余人而见于史者如沈崧沈瑫皮光业辈不过十数人其他不可得而见姑叙其可见者以俟博古之君子云五代乱世仕于晋朝与仕于吴越不足为轻重要欲辨其所自耳李氏藏此告二百五十余年得以存先世之旧信可尚也光祖所记清泰三年闰十一月正当後唐废帝之末晋高祖改元天福之际乾佑元年则汉隐帝之初也并书之

又苏黄门帖

苏少公谪居筠阳今有杂着一编别行于世吾乡李光祖一日携其曾祖屯田所传筠阳唱和集见示时在元丰间雍维瞻度支为守屯田字君绩为倅与颖滨及一时士夫唱和甚衆余既假而録之光祖又携此一帖及二刺字来考之遗老传少公以着佐为签书南京判官长公以诗得罪从坐而谪监税居五年移知绩溪县此帖云已离洪州正赴绩溪时也余帖既归苏氏此尤当宝藏之舒中丞志屯田公墓谓虽老翰墨篇章益遒瞻可喜然则宜其与少公相好也

书董资政【耘】元帅府事迹

高庙中兴之初纪载时事者类非一书间有异同无从质正初史官奏请诏随龙人与藩邸帅府旧僚并前宰执各令记录事迹撰为一书以进御取其实而不诬者降付史官计当时臣僚应为此书者多矣而高庙独以属四人盖妙选也大资政董公预焉是高庙深知公之必不诬也旧尝见一二编未问登载之工拙纪事之虚实往往因而自列其功状故见者多疑其私公初为大元帅行军録遇盗亡失既无复见今读此编据一时见闻之实以事系日炳炳如丹扈从之久亦云劳矣曾不自言止载二奏劄之可考者若制诏书檄及李纲宗泽之表奏何烈之小史徐伟之忠谋録及痛定録等皆公以为可信者并裒而上之然则此编是所谓实而不诬者真可备史氏之采择以信後世岂特为董氏之家宝也

跋魏忠壮侯【胜】行实

乾道初余尝过山阳望清河口吊忠壮魏侯战死之地故老犹能言当时事相与悲吒久之又尝从老校退卒问知守海州事甚衆犹记一二侯有鎡石具装明光甲胄日射如黄金出入行阵敌望之胆落尝被甲坐城楼观战备骏马城上望见我师少却怒甚推去雉堞飞骑而下径入阵中敌望风奔溃又尝战北门既捷忽回骑径出南门人不知所谓盖虑酣战于此或击吾

背也已而敌果袭南门以数矢却之三军敬服後得参政钱观文所记言隆兴二年仲冬敌出清河连艘而下侯率神劲弓射之矢尽而船出不已以战舰拒之中流为敌衆所乘矢下如雨势不可支弃船登岸敌已渡者衆被围甚急冒东南而出身中数箭拔之复上马告急于大军而救不至侯胆勇善鬪而人马被伤已十七八士气已竭进退无所因坠马遂死之而大军亦丧气矣观文时为淮东宣谕使当得其实呜呼使当时拥强兵坐而观者稍出数十百骑为之声援岂至是哉今览行实为之三喟子孙多壮士尚其勉旃

跋苏魏公所临阁帖

此苏魏公所临阁帖也谭训云尝于相国寺置得阁本法帖十卷甚奇毕文简公赐本也魏公记诵絶人固由天分博极羣书盖出学力观此卷临摹之工其勤可知申人自怠而欲追及前辈可乎

跋华氏中藏经

余少读华佗传骇其医之神奇而惜其书之火于狱使之尚存若刳腹断臂之妙又非纸上语所能道也古汴陆从老近世之良医也尝与之论脉云无如华佗之论最切曰性急者脉亦急性缓者脉亦缓长人脉长短人脉短究其说未暇也一日得闽中仓司所刊中藏经读之其说具在盖贰卿姜公诜为使者时所刊凡三十余年而余始得之序引之说颇涉神怪难于尽信然其论议卓然精深高远视脉察色以决死生虽不敢以为真是元化之书若行于世使医者得以习读之所济多矣惜乎差舛难据遂携至姚江以叩从老从老笑曰此吾家所秘不谓版行已久因出其书见假取而校之乃知闽中之本未善至一版或改定数十百字前有目錄後有後序药方增三之二闽本亦间有佳处可以证陆本之失其不同而不可轻改者两存焉始得为善本老不能缮写俾从子溉手録之蕲春王使君成甫闻之欣然欲于治所大书钁木以惠後学且以成余之志因以溉所録面授而记其始末于左药方凡六十道亦有今世所用者其间难晓者有之恐非凡识所及佗传称处齐不过数种又未知此为是否好事者能以闽本校之始知此本之为可传也

攻媿集卷七十一

卷七十二

钦定四库全书

攻媿集卷七十二

宋 楼钥 撰

题跋

跋陆宣公奏议总要

阜陵喜观陆贽奏议故紫微崔公为总要一书上之东坡先生曰如贽之论开卷了然聚古今之精英实治乱之龟鉴然奏议繁重尚勤乙览是书撝华芟冗因门分类名言确论一阅而尽得之所以开导聪明裨益治道多矣易曰纳约自牖崔公有焉

跋石曼卿古松诗

曼卿上世家幽州燕俗劲武少以气自豪书体兼颜柳前辈谓愈大愈奇余三见真蹟礼部尚书家西师诗有旗光秋晓起甲色夜江横之句欧阳氏筹笔驿诗有意中流水远愁外旧山青之句今又见此诗影摇千尺声撼半天尤为人脍炙皆警策也欧阳公称文章劲健称其意气余以为字画尤有劔拔弩张之态吾乡郡从事官舍中先有筹笔驿石刻久矣今赵君致远又欲刻此是为二妙也

跋周公礼殿图

余近得临江周公礼殿图石刻绍兴十七年向芑林刻于学宫疑与先人所藏画本不侔闻大资政赵公帅守成都尝摹礼殿本为八轴借而校之丹青焕然自盘古而下位次向背不同者十八九虞羲八卦上下各有字位置亦不伦夔之球为鍾无传说像孔子弟子中多徒父叔鱼原亢又一人阙名石刻中有梁鱣字叔鱼而形貌不类却无顔路公孙龙冉季公祖兹漆雕从狄昱公良孺奚蒧叔仲会容蒧顔之仆左郢而有蜀太守李冰又一人无名第七轴画文翁司马相如?衡萧德仁戴圣王吉严君平扬雄刘向服?陈实鍾繇诸葛亮崔桓平福王濬杜预张华杜畿豆卢第八轴画汉武帝萧何张良叔孙通陆贾陈寛贾谊司马迁董仲舒汉光武邓禹桓荣班固张湛廉范马融第五伦郑玄公孙弘儿寛丹青愈工皆石刻所无益州刺史张收未知在汉何帝时後汉诸名儒或在其前若鍾繇诸葛亮王濬杜预张华等皆魏晋间人既在张收之後岂後人所续耶武帝光武列于诸臣之间次序亦多不可考萧德仁崔桓平福名不甚显豆庐复姓不知何名姑记大概以俟考证

跋孟蜀王与周世宗书

余家藏此书既以五代史证其事兹阅张次功所编蜀檇机载此尤详因具书于後

广政十七年周世宗即位改元显德周师至仇池攻秦州韩继勳凤翔王万迪请益师昶遣雄武监军使赵季札率师赴之季札怯懦不进乘驿而还成都震恐昶怒斩于市十八年五月李廷珪高彦俦吕彦珂总衆以御周师九月战于唐仓监军王岌被杀我师败绩廷珪退保青泥闰月周师克秦阶成等州雄武节度韩保正弃城遁十一月又克凤州执节度使王环监军赵崇溥二十年六月周世宗归我秦凤之俘昶遣使致书谢称大蜀皇帝世宗不答昶曰朕郊祀天地称天子时尔方鼠窃作贼何得相薄耶二十一年荆南遣使来致书言周世宗已定淮南请通职贡昶不许

跋任氏所藏外祖汪少师帖

钥生长外家事外大父少卿二十余年屡侍笔砚书问多出亲札外祖母王夫人居奉川任氏与舒董诸家皆至亲相与笃厚类此忽瞻遗墨肃然起敬陈后山谒龐丞相墓有云少日拊头期类我暮年垂泪向西风陈简斋跋存诚子帖有云客来空认袁公额泪尽慙无杨惲书三复二诗重增悲叹

跋参寥诗

参寥以东坡门人得罪黄师是坡之姻家时为京东漕使坡与之书曰参寥以某故窜兗州望为之地师是日昨方有兗州楼教授见过其人必长者遂以为属教授钥大父少师也领其意而行既至兗与之定交後宰登封一日閤人告曰有僧携行李径欲入门自言与知县故人不可止遏少师笑曰必参寥也已而果然馆谷县斋尝同登嵩岳之顶游从倡和参寥集中所称试可即少师之字也诸父犹及见登封时事兗州一段旧得于师是从子叔愚子鲁云珣公所藏二轴皆其得意诗翰墨飞动真可宝也集中有九江与东坡话别诗云雪水黄楼赤壁间胜游长得共跻攀坡亦云算诗人相得如我与君稀周旋如许何止工诗而已耶少师遗文碎于兵毁仅存二十四峯诗与师喜雨诗有云一声雷碾青山过万里风驱白雨来之句兹见师诗重增感慨然卷中和愚上人二首开字奉字鷗字三絕漪涟斋一首皆不见于集以此知遗亡者亦多矣

跋桑泽卿和林和靖诗

和靖诗似其为人自然高胜不特梅花为絶唱也泽卿一一细和间有不能辨者风度又可知和靖絶笔一篇云湖外青山对结庐坟前修竹亦萧疎茂陵异日求遗草犹喜曾无封禅书此则不容和矣

跋从子深所藏吴紫溪游丝书

钱塘何传朋游丝字前无古人黄给事仲秉钧尝称蜀士仲明举诗云春蚕一缕来不断万钧

笔力归毫芒佳句也然未若参政汉滨先生王公瞻叔之诗为工伯父扬州尝得二纸于吴公从子深求书王公之诗于後

又题所书罗端良文三篇

新安罗端良愿公辅器也止于鄂州世所共惜刘子澄清之为倅亟以其诗文为小集以不暇求全也所作无不精妙而陶令祠堂记社坛记尔雅翼後序尤为高胜端良方无恙时尝以此三篇见寄意亦其最得意者余每为子弟诵之从子深请书此卷後有作者欲论渊明及社稷事恐无以过此尔雅翼一书深恨未得见之也

书吏商赠赵仲坚题其後

余从兄之子伯时一女谨择所归近以归赵仲坚佳公子也既尉新城以此卷来求余言老矣几与世相忘素不长于吏道又非能言者何以告子惟仲坚大父龙学少师一世吏师光显于朝精明强敏诚有不可及闻其在上虞时忍贫如铁石已为半刺犹执卷田间躬视仆夫粪田灌蔬竟日一肉故曰人有不为也而後可以有为知宗长子也继有贤誉仲坚廉谨详练师祖若父尚何他求为书柳河东吏商以赠而系以此仲坚勉之哉

跋周尚书武仲诗轴

余少读龟山先生集见周宪之墓志知公孤立于宣和中独佑陵知之甚深公以御史触忤权贵屡蹈祸机诘王黼拒梁师成极论童贯蔡攸之罪至往来使不测之敌伏节不屈建炎元二间为刑部吏部尚书高宗欲柄用之而不及刚毅之气可畏而仰兹读公诗词翰俱高尤使人起敬公讳见诗注宪之其字也建之浦城人尝为贯所诬谪黄州三年日以诗酒自适无漂泊流寓之叹卷中多黄州诗意其正在谪居中盖宣和末年也又称公以文学名于世余暇留心翰墨得欧阳率更笔法至是尤可信矣

跋虢国夫人晓妆图

虢国夫人承主恩平明骑马入金门却嫌脂粉污顔色淡扫蛾眉朝至尊余每疑此恐非杜少陵语後乃得于张祜集中盖集灵台第二篇也素闻同年林子长家有虢国夜游图甚佳而未之见或谓此晓妆图也岂正画平明骑马时耶

跋范石湖游大峩诗卷

文殊示现于五台普贤示现于大峩光景殊胜大略相似旧见无尽居士清凉传书五台事甚详亦有诗纪所见今石湖先生大峩数篇尤为奇伟张公素不善书必不能如此翰墨飞动然无尽後谒无业禅师塔塔上五色光现有诗云四入台山礼吉祥五云深处看荧煌而今不打这鼓笛为报禅师莫放光尤为禅林称诵使石湖再登大峩必须别有一则佳话也

跋徐神翁真蹟

海陵汉晋间有乐真君子长或云徐二翁其後身也如蔡鲁公之东明吕东平之善守尤为着验此卷脱去白字遂为桑公大夫登第之祥可谓神矣然使吾得为二翁道成之後闭口藏舌何用管人间如许间事

跋姜氏上梁文藁

姜氏在京师以财雄南来吾乡子孙遂以儒显舅氏适斋尚书汪公跋语甚详七夕书此卷閱两旬而下世殆絕笔也钥以外门之故向来亲见上梁文属藁之初宣奉公庆七十时丞相寿春魏公见委以乐语有云生长东都亲见开元之盛际从游诸老及闻正始之遗音又云今日王孙犹有承平之故态当年竹马得见会昌者几人丞相颇以为然姜氏家风盖有自来其兴则未艾也上梁文必言儿郎伟旧不晓其义或以为唯诺之唯或以为奇伟之伟皆所未安在敕局时见元丰中获盗推赏刑部例皆节元案不改俗语有陈棘云我部领你懣厮逐去深州边吉云我随你懣去懣本音闷俗音门犹言辈也独秦州李德一案云自家伟不如今夜去云余哑然笑曰得之矣所谓儿郎伟者犹言儿郎懣盖呼而告之此关中方言也上梁有文尚矣唐都长安循袭之然尝以语尤尚书延之沈侍郎虞卿汪司业季路诸公皆博洽之士皆以为前所未闻或有云用相儿郎之伟者殆误矣因附见之

跋傅梦良所藏山谷书渔父诗

渔家无乡县满船载稚乳鞭笞公私急醉眠听秋雨右山谷之父亚夫诗也谷之诗既刊诸石此虽仅得三之一残圭断璧要自可宝谷尝有古渔父诗云四海租庸人草草太平长在碧波中殆此意耶

又孙鸿庆作傅和州墓铭

鸿庆孙文昌一代文章伯也志人之墓固未免于称美兹为和州之志有云其学自六经太史氏百家诸子浮屠黄老之书无所不读其文自歌诗赋颂表笈传序箴铭纪志亦无所不工又曰文章閎丽可当大典册诗语精深可列于歌颂以荐郊庙此非心服其能不作此语也梦良为余乡邑三年且去矣撫仕当未艾若御民一以寬简听讼如家人无疾言厉色如和州之在蕲廉直有父风所莅皆有迹又不减繁昌之政能世其家者也【和州讳谅友繁昌讳玠】

跋可寿上所藏史文惠公帖

于襄阳问紫玉如何是黑风吹其船舫漂堕罗刹鬼国玉云于顛你者汉问恁麼事作麼于当时失色玉云只者个便是漂堕罗刹鬼国于於是省于在襄阳傲上虐下号为襄樣节度犹能有此前辈贤达所以好与有道高僧游者正以富贵隆盛谀言塞耳若不得此等人安能深锥痛割如许太师史公地位中人与师为方外交此诗帖皆其蹟也二人相得必别有针锋相

湊处非外人所知不然安得相与如此之深耶

跋褚河南陰符经

陰符经说者甚衆以文义不贯颇费牵合盖尝疑之唐李筌传骊山老母之言曰此符三百余言百言演道百言演法百言演术上有神仙抱一之道中有富国安民之法下有强兵战胜之术分为三章又有六注谓太公范蠡鬼谷张良诸葛亮及筌也繫以正义不言谁作後序中谓出于骊山老母亦间有无主名者略计太公之言八张良之言九鬼谷六诸葛五范蠡才一见而筌及正义尤详又与世所版行注本不同後有断章三赞又道士希严不知何许人作赞三十九首可谓备矣或总题其後云观注者粗得一二而赞者略无彷彿信其奥妙不可以智知而言说姑存之耳诚哉是言也比岁于都下三茅宁寿观见褚河南真蹟注本始知上古真仙各出语一二以至三四自愚人以天地文理圣【○此句似有脱误字】而彼不言为谁其间有若相应答亦有旨意全不联属者将由羣仙之集而为之耶抑高真荟粹而成此经耶初有道流携以求售索价不貲未几羽化于观中遂为三茅宝藏摹得其本以归兹因徐粹中醇一为慈谿至道宫建藏手写以遗之凡见河南所书三本其一草书贞观六年奉敕书五十卷其一亦小楷永徽五年奉旨写一百廿卷及此盖书百九十本矣二者皆见石刻惟此真蹟尤为合作字至小而楷法精妙河南卒于显庆三年年六十有三书此时计四十五岁而永徽所书则五十有九矣岂惟笔力不可跂及亦安得此目力耶然三本详略亦自不同草书本又冠以黄帝陰符经要当以此本为善仍命长子淳细书临摹于後尚存旧本之万一云

书石门披云集後

縉云川谷惟石门最可观诵太白之诗旧矣乾道五年先工部守括苍侍旁见石门洞文跃跃然欲游未能也明年冬先君解印绶余适分教永嘉奉双亲东下登览胜处为题诗壁间淳熙末自温守得旨奏事复过其下相羊竟日尽见岩石留题恨不能悉记奉祠里居而羽士王君愚叟访余于寂寞之滨自言尝住此观裒古今诗文为一编将归而刻之閱一再过如蹈梦境少作非工亦列其中又荷好事者为之次韵老矣无由更寻故步慨然为书于後而归之愚叟好棊与琴诗有佳语又能集此以永山中之传信雅士也

跋赵清臣所藏濮议

嘉泰元年三月乙巳访余姚令君赵清臣观书閱画久之清臣曰尝见濮议乎余曰固尝见之君所藏何书也曰顷丞金坛得于苏氏云欧阳公以此议献之神宗而出镇道遇苏魏公语及此事径以奏藁授之遂为苏氏家宝余归而閱近岁庐陵所刊文忠公集则此卷列在一百二十卷以後首尾俱同而録本多误亦间有胜于版行者因并为手校而归之公序此议而进之神宗时罢政而出为观文殿学士行刑部尚书知亳州以年谱考之实治平四年正月盖神宗即位三月公得亳社故序称先帝议称英宗其第四卷劄子注云是岁十月撰不曾进呈谓治平三年也三月以言者指濮议为邪说求去不允十月成而不及进者英宗时已服药故并进之神宗也其为後或问二篇及汉魏五君论晋问未知所着年月公薨于熙宁五年壬子年六

十六此书进于治平丁未年六十一矣因并见之

跋桐陰韩氏家问

苏魏公尝言韩忠宪教子严肃不可犯知亳州日第二子舍人自西京倅谒告省覲坐中忽云二郎吾闻西京有疑狱奏献者其详云何舍人思之未得已呵之再问未能对遂推案持挺大诟曰汝食朝廷厚禄事无巨细皆当究心大辟奏案尚不能记则细务不举可知矣必欲撻之衆宾力解方已诸子股栗累日不能释家法之严如此所以多贤子弟也或疑其言为过观此家问可信不诬亦是亳社时事可畏而仰哉象君令君犹能守家法邑事整办庠序一新又刊此卷寘之学宫真桐木韩氏之子孙也

跋张德深辨虚

余少时尝得仪真所刊司马氏潜虚中多阙文不能遽解隆兴改元先光禄官奏邸检详新安张公为僚同寓直舍时在侍旁日从之游自言家有潜虚全书亟借而传之又言为慈溪令时有张氏德深汉邃于易元【○元谓扬雄所作者宋时避庙讳改书今仍之後同】盖未识潜虚也尝示之一见即言其大义归閱数日着辨虚一篇洞晓其说因略为余言之自此始知虚之大概独未见所谓辨虚者相去几四十年与新澧阳郡博士张子宓语及此书子宓曰德深从叔祖也始得见之凡十余篇兼综易元二书易曰卦元曰首虚曰名卦有爻首有赞名有变二体四位十等之象八物五行与生成之数乾中元之所以始一三五之所以虚与夫揲法占法皆若异而实同又辨气体性名行命与蓍虚之得此几无余蕴德深之学真有渊源而总序则检详为县令时所为也检详又云虚之书未成而已传温公晚始以全书授范太史淳夫遂传于蜀後以问蜀士曰非也观物先生张公兵部行成所补托为此言耳观物先象数之学着述衍翼元元包总义潜虚演义经世索隐外篇衍义通变等七书近百卷世号精博尝取演义读之为卷十六潜虚之书章分句析尤为详尽比辨虚不啻数倍果如蜀士之言非此人亦不能补此书然观物之书未出而德深能辨之此其所以尤难也检详又言通监为温公之笔学潜虚为心学方疑总序中不见此说兹又得发微论考之则衍总序而为总论遂及笔学心学之说直以为出于已而没德深之作自元以准易虚以拟元论而下有九篇八篇皆德深之旧止有变论一篇论律吕者在此书之外犹恐是其本文而此所传者或阙焉又不载五宫天轨岁纪三图德深辨名之末谓齐处大中之内斟酌造化其斗之任乎今发微论乃曰处大中之内在天其北极之任乎轻改一言失其旨矣土分王于四季齐亦土也居中而斟酌造化故以北斗之任非谓若极之居其所也检详为察院时以发微授司马侍郎季思汲其兄汉章倬为湖广总领遂以版行实乾道二年也淳熙十一年检详之子南金又刻之世罕有知所自者钥非欲与检详辨诚不敢没德深之实而惜其不少见于世也德深兄弟读书躬耕其兄宗丞亨时济得荐送而归其父题于门曰三四郎今年免耘田专掌送茶其朴茂类此德深耽嗜古学天文地理无不该贯此特其一也

刘允叔梦紫瓜而作舍萌题其後

退之送穷而延上坐子厚乞巧而甘抱拙若允叔之舍萌则真驱之虽未能絕紫瓜之生畏君之词自尔当不复敢入吾梦矣然此种一名不落彼梦满甌三颗不妨甲科释褐者殆以此又似不必力驱之也为书其後以壮昆季西上之气

跋朱叔止所藏书画

徐季海题经

赵氏金石錄目錄第七卷一千三百四十唐徐浩题经天宝中立欧阳氏集古目錄云经首有楞伽阿跋陀罗宝经一部乃浩所书而经则吕问姚子彦等写也在嵩山经藏院叔止所藏虽不见所书之经而季海所题为可宝又足以考天宝中官制之一二云

李公垂书乐毅论

李公垂短小精悍诗最有名时号短李其在翰林与李德裕元稹同时又号三俊传称以文艺节操见用余固尝见石刻大字不知其小楷精到如此今世以海字本为第一残阙已多此卷比右军所书甚小墨蹟具全尤为可珍详视印章盖岩壑老人故物也

龙眠莲社横卷

余得莲社图高三尺横二尺笔力精劲五采焕发妙絕一世龙眠真笔也此为横轴大略相似时有不同元中之记云童子蹲而汲水者一人而有二书猿一罾一而猿亦有二罾则鹿也元中书甚工既非其亲书疑别为一图作记余所藏童子汲水及猿皆一而罾亦鹿也龙眠为此图妙意非一自知爱重或纵或横意必有数本恨未能尽见也此卷谢康乐不为长鬣捕蛇翁亦欠朴樵之状必有能辨之者

跋李孟达含章六世祖少卿诗卷

少陵之祖审言山谷之父亚夫再传三传而诗遂名世自李早梅而下传数世而诗益昌盛哉

跋沈云巢帖

云巢妙于楷隶诸书备古今体寸墨尺纸落笔辄为人争取富池灵神犹知护惜子孙尤宜宝之也

跋吴僧若達所书观经

太府卿苏公伯昌谪为明州长史僧有献少公维摩经手泽盖为老泉小祥书此後以示蜀士士曰蜀有长公书圆觉经与此同时字体亦相类以所携石本示公且许求墨蹟以来後不知

曾得之否若達二经元佑诸名公为之跋而增重观经俨然如新不知法华经何在安知他日不能复合耶

攻媿集卷七十二

<集部,别集类,南宋建炎至德佑,攻媿集>

卷七十三

钦定四库全书

攻媿集卷七十三

宋 楼钥 撰

题跋

跋扬州伯父所藏魏元理画卷

莲荷

尔雅释草言荷最详其茎茄其叶薏其本密其华菡萏其实莲其根藕其中的的中薏观魏君墨戏曲尽形状殆无余蕴又有熟茨生菱鳧茈之属一一如生衺暑尤宜观之所谓宛然坐我水仙府也

桂花

伯父扬州持节拥麾几徧东南襟度高胜所至多与雅士游若魏君元理之画徐公明叔之书皆擅名一时者桂花才一枝谿观佳处疑有秋风生其间

跋龙眠二马

余家藏白氏长庆集久矣近又得吴门大字者周伯范模欲得旧本以所藏龙眠二马遗余古有以妾换马者矣以书换马自攻媿始可博一笑

跋赵共甫古易补音

小学之废久矣陆氏经典释文可谓详尽近世读书或至苟简率意诵习字有不识者始加閱视有讹谬终身不自觉知而况补音乎吴氏好古博洽始作诗补音虽不能变儒生之习而读之者始知诗无不韵韵无不叶祛所未悟有功于古诗多矣吾友赵共甫又取其说以补古易之音用志甚勤远以示余閱之不去手钥老矣习气未除颇为是正一二目昏成嬾媿不能尽力也噫凡将爰历等书今不复见惟许叔重说文解字为小学之本颜黄门家训称其检以六文贯以部分櫜括有条例剖析穷根源集韵虽博贍于考古则未可全据共甫今本诸吴氏多以集韵为证更当以说文解字定之可传无穷吴氏之书不知者以为苟然而已共甫祖其余论钥又喋喋及此皆谓之癖可也虽然自当有好之者

题拳毛騧

杜少陵观曹将军画马图诗云国初已来画鞍马神妙独数江都王又云昔日太宗拳毛騧近时郭家狮子花名画记江都王绪乃霍王元轨之子多艺善书画鞍马擅名陈后山亦谓一纸千金不当价人传此马为江都笔诚有之长安志太宗昭陵有六骏在陵後曰拳毛騧金石錄昭陵琢石象平生征伐所乘六马为赞刻之此马神骏耐战是横行万里堪托死生者史称秦王自起兵以来前後数十战身先士卒轻骑深入虽屡危殆而未尝为矢刃所伤今观帝手书亲乘之马槊箭之疮十有二处而不及其身真天人哉考之史其平黑闥也洺水大阵信然谷州乃河南府之新安福昌二邑也武德元年改谷州至显庆二年始废此言合鬪盖征世充时黑闥乃在山东也

跋赵振文经幢碑

赵振文为临安郡从事寄示小碑得于井中盖钱氏专知回图酒务曹从暉所立经幢也从书会同十年岁在丁未七月十五日试考之石晋岁在丙申改元天福三年戊戌契丹耶律德光改元会同至天福九年晋改元开运至开运四年岁实丁未契丹入汴灭晋六月刘知远建国曰汉仍用天福十二年正契丹会同十年是丁未一年实晋之开运而汉仍称天福契丹则曰会同也明年戊申汉始改乾佑钱氏兼有两浙自唐乾宁二年至皇朝太平兴国三年凡八十五年当五代时贡奉中国不絕惟唐明宗时安重海奏削鏐王爵元帅尚父以太师致仕时尝称宝正年号安重海死复鏐官爵复用中国正朔今乃用契丹年号耶律灭晋时大赦改晋国为大辽国开运四年为会同十年意必亦颁正朔于诸国故钱氏用之此史氏所未见也钱弘佐以是年卒而俶立史不书月旧五代史弘佐以汉初卒于位而俶立汉祖入汴之岁十二月俶为胡进思所废此盖弘佐已卒当俶之时也因并着之

跋王伯长定武修禊序

定武本凡湍流带右天五字全者皆谓在薛绍彭之前然不能知岁月之久近此诚善本王顺伯谓是熙宁前摹拓于中山者为可贵近见毕少董所藏董氏淳化间本尤为精好自言为儿时亲在定武见青石本带右天三字已阙坏大观再见之与旧所见无异则五字未必皆绍彭剗损也更当考绍彭在中山时岁月云

跋余襄公题崖碑

襄公以孤生起峽南忠言廟上显于庆历尝出居庸关口伐戎酋于九十九泉退其二十万之师西边亦赖以定晚而经制五管前後十年如交趾大理特磨南诏之国皆可以颐指气使使坐庙堂真可以镇抚四夷乃终于南方人之功业不惟有时亦各自有地如伏波之在南孔明之在蜀盖非一人不然昭陵非弃才之主而公之用不得尽为可叹也此帖字有顔体石崖天齐人物亦俱与之相高云

跋李庄简公与其壻曹纯老帖

韩文公潮州表柳河东囚山刘宾客谪九年文愈奇而气愈下盛哉本朝诸公如忠宣之德度元城之劲节东坡先生英特之气行乎患难高掩前人庄简公流窜濒死重以爱子之戚尤所难堪家书中言议振发略不少贬其气何如哉三诵以还慕仰不已纯老姓曹氏讳粹中吾乡之善士有诗传行于世真冰玉也

跋金花帖子绫本小录【王扶盛京】

集贤王公金花帖子其孙鄜州谓端拱二年太宗朝第三榜者误也当以益公所考为正尚书宋公名白时以翰林学士礼部侍郎知贡举其同知贡举则知制诰李公沆帖子花押盖二公也咸平元年知举四人杨给事砺李舍人若拙梁司谏灏朱秘丞台符盛公帖子花押乃此四人也太宗以至道三年上宾咸平改元真宗谅闇遂不廷试而敕下礼部放榜登科记亦称省试故犹得以帖子报中选者非以不临轩策试而废兹制也知举止列祖父不及三代糊名复于淳化三年至是已七年矣艺祖一朝进士凡十五举多者不过三十余人太宗朝取士浸广至二百余人独孙何一榜放三百五十五人诸科合千余人後世但骇其多而不知前两年诏权停贡举至是集阙下者万人太宗既多取之而後连四年俱有权停之诏次五年为至道三年三月以大丧不暇及至咸平之初诏以久停贡举颇滞时才令礼部据合格人内进士放五十人诸科百五十人来岁不得为例于是进士孙仅等及高丽所贡竝赐及第此小录所载五十一人是也祖宗时贡举之疏数取士之多寡惟上所命非若近世之定制也钊高曾先祖仍三世登科中遭兵毁故书无一存者先祖少师元丰末年焦蹈榜丙科後从年家章氏传当时小录虽印为大编而与今制不侔者已十余条又尝见嘉佑二年章衡榜东坡兄弟小录与焦榜者不殊今始见王盛二家金花帖子及绫本小录前此真未闻也诸公跋语如载知举家讳私忌等外若韵脚明主空一字【按此下有脱落字句】诗限六十字以上成论限五百字以上成皆与今小异今止书第一人此直书状元外氏书其母之封五十人贯开封者三十七人不应如此之多按端拱二年有旨国子监生并须品官子弟开封府有户贯者充岂以此故士子多用开封贯耶贯建州者二人一日建宁军一日建州书事不同如此者非一祖父俱存者今日重庆而第四人张景荣侍下父祖未仕者书不仕三代名下书皇任者柳河东作陈京行状云五代祖某陈宜都王曾祖某皇会稽司马祖某皇晋陵郡司功参军父某皇右补阙云云或谓书皇者以表其仕于唐也此又不然多有称皇不仕者又或止书见仕某官每一顶各空一字皆与今不同此榜止五十人可以绫书不知前此孙何一榜三百余人亦可以绫书耶小录之作近亦屡有轻以意改者要知典故所在前人多有深意一遵其旧可耳吁又何止此耶司谏秘丞各称其官杨公为翰林学士而止称给事李公知制诰而称舍人亦因可见前朝之官称云杨公开国之初为第一人李公为乾德四年进士第五人梁公与其子固俱为大魁朱公则孙何榜第二人主文极天下选宜乎得人之盛仅继兄何固为盛事刘煜子岳父温彦是终身不听乐者中山刘子仪参政季子渊皆在此榜高辅国曾祖季兴祖从海俱为南平王盖荆南高氏辅国之父保寅不知在从海十五子中为第几人与继冲俱归本朝者也吕蒙休三代俱赠师传父龟图母刘氏徐国太夫人文穆公蒙正之弟也王克从为彦超中令之孙句希吉为中正之子盛京为文肃公度之弟乐黄庭父史任职方员外郎是作太平寰宇记者其

任职方宜矣李山房谓知名之士几三之一後生寡陋不能尽知姑诵所闻一时人物不亦盛哉借摹本於丰宅之有俊老眼不能细书令从子溉临写藏于家仍备书其後而归之

跋云丘草堂慧举诗集

余顷岁游云岩有诗牌挂壁上拂尘读之云朝见云从岩上飞暮见云归岩下宿朝朝暮暮云来去屋老僧移几翻覆夕阳流水空乱山岩前芳草年年绿爱其清甚视其名则僧举也曰非季若乎僧曰此今之庐山老慧举也後得其诗编号云丘草堂集及与吕东莱紫微公雪谿王性之後湖苏养直徐师川朱希真诸公游最後尤为范石湖所知尽和其大峨诸诗余赴东嘉亦辱诗为赠近世诗僧如具圆复莹温叟辈沦落既尽而师亦亡矣其徒觉净求跋其後感念畴昔因为书之师老于禅悦诗句特其余事而能兼得衆体佳处不可以一二数读之者可见其人不劳赞叹也

跋苏氏回文锦诗图

晋史载窦滔苻坚时为秦州刺史被徙流沙苏氏思之织锦为回文旋图以赠滔宛转循环以读之武氏及见晋史之成不知何所据依记载如此之详滔字连波记之末云因述若兰之多才复美连波之悔过故山谷题此图云千诗织就回文锦如此阳台暮雨何亦有英灵苏蕙手只无悔过窦连波正用武氏之记而任子渊止以晋史注之岂未考此记耶余前後见旧画数本大小不侔未有如此卷之精者

跋东坡行香子词

挥尘第三録载东坡自黄州移汝州中道起守文登舟次泗上偶作词云何人无事燕坐空山望长桥上灯火闇使君还太守刘士彦法家者流山东木强人也闻之亟谒东坡云知有新词学士名满天下一出则京师便传在法泗州夜过长桥者徒二年况知州耶切告收起勿以示人东坡笑曰轼一生罪过开口不在徒二年以下吾乡丰吏部叔贾谊倅盱眙游南山寺有老僧云寺旧有苦条木一段上有东坡亲书行香子词後沈于深水中亟募人取得之遗墨如新就刻其上寻为一军官买去析为枪干矣此词惟曾宝文端伯所编本有之亦云与泗守游南山作则挥尘所载殆未尽岂与之同游後乃閱其词耶偶从丰氏得墨本既登之石又以寄施使君武子请刻之以为都梁一段嘉话

跋黄氏所藏东坡山谷二张帖

东坡与黄颍州父子厚善尝书颍州之父子思诗集之後又龙图二女为少公二子适逊之妇观此祭颍州之文与龙图直阁二公书问情好可知子思名上字孝下字先颍州名上字好下字谦龙图名从一从是字师是直阁名从一从辛字才叔居宛丘家藏二苏翰墨甚富此二十一帖及孙志康二帖墨妙亭记醵种麦行及山谷二张公挽诗直阁之孙约之年才十三遭靖康之变随其父郎中公脱身来南能携以自随既又力贫登之石其未刻者一二尔可谓善守

家法者也余尝铭其墓亦为及此约之幼子直义以真蹟见示为记其大略坡书皆有法石本类多失真此卷字字飞动惠州儋耳及北归等帖尤为老笔信可宝也第六帖云因志康行即孙君也第七帖云乞会稽使其得请则题诗必满浙东矣第十六帖云乏人写大状不罪简率盖今所谓外啓者前辈书问皆用之故云第十九帖在曲江云何时定居少安晚节归及毘陵而仙去曾不得一日之安也悲哉

黄太史张右史张浮休皆一时人物之英则颍州之贤可知太史先自金华徙豫章颍州之先自浦城徙宛丘尝叙宗盟故称从侄右史为龙图友壻且居于陈尝为颍州作友于泉记故叙乡曲浮休又周旋伯仲间任道即汝阳守诵三公之诗使人兴起也

墨妙亭记惜未登之石醵种麦行有章草体别是一种风气

祭颍州文故颍州使君同年黄兄集云几道大夫年兄之灵 终焉玉雪集身为玉雪
不缓不□集不絙 与义降升集与道
含章不矜集终焉不矜墨妙亭记以为吴兴新集集无以字 余以事至吴兴集至湖
乃为差久集犹为差久

山谷诗仕路厌风沙集厌作困 袖有投虚手集手作刀

张右史诗但使将军桃李在集使作得 闻凶哭朋友集闻哀若朋友

张浮休诗常忆之官颍上时集作忆昔 着靴骑马集作乘马

三公诗皆亲笔集中犹不同如此岂编集时尝改定耶

跋遗教经

欧阳叔弼集古録目遗教经卷第二百六十三右不着书人名氏刻石年月世以为王羲之书石在永兴欧阳公集古録跋尾遗教经相传云羲之书伪也盖唐世写经手所书尔唐时佛书今在者大抵书体皆类此第其精粗不同尔近有得唐人经题其一云薛稷一云僧行【阙】书者皆与二人他所书不类而与此颇同予知写经手所书也然其字亦自可爱故録之盖今士夫笔画能髣髴乎此者鲜矣山谷云不知何世何人书或曰右军羲之书吾尝评此书在楷法中小不及乐毅论尔清劲方重盖度越萧子云数等非右军笔画也赵明诚金石録云唐遗教经正书无姓名第一千九百四十八跋云国初时人盛传为王右军书惟欧公识其非是考诸公之论非右军书明矣然欧公谓唐写经手所书明诚定着为唐遗教经则尚有可疑以世民二字俱如此写不空笔画恐非唐人书或若山谷之言不知何世何人得阙如之意也

跋东坡纸帐诗

坡公次韵柳子玉二诗曰地炉曰纸帐此纸帐诗也集中纹作文氎作叠煖作暖祗作但皆可通惟以鲸为衾则非也少陵有太子张舍人遗织成褥段诗有云开緇风涛涌中有掉尾鲸後又云锦鲸卷还客始觉心和平坡正用此事而編集者未之考也此卷字画飞动不可形容公尝和子由论书曰端庄杂流丽刚健含婀娜岂自道耶

跋陈进道所藏杜祁公诗

右杜正献公诗翰界纸谨书三诵起敬第不知请郡四明者何姓公自注云君侯远祖讳合始知其为孙氏按四明题名记云孙合博学高才唐末授左拾遗净惠院即其故宅载于图经唐文粹有古意效陈拾遗有哭玄英方干先生诗有卜世论春秋无贤臣论皆合之作也又不知孙氏为守者为谁太守题名记中无之止有孙扶在端拱中又与正献不同时庆历中王周以司封郎中为守乡人也政和七年钥先祖少师为乡郡两任涉五年在任除次对所居号昼锦坊南门内有锦照桥与正堂相直宅之後有锦照堂在今竹洲上宅之左有堂名以继绣以继王公之後也不闻有姓孙而为乡守者王岐公作孙威敏墓志尝以枢密直学士知益州道中罹母忧服除以为陕西都转运使未欲远去坟墓得知明州属盗起山东改知徐州威敏越人王荆公在鄞时答元规大资书有云比方得邑海上而闻左右之别业实在敝境岂威敏以别业在此故有仁里之言又岂威敏得请而正献赠以此诗既改徐而不及至郡耶浅陋姑诵所闻未必真是进道好古博雅更试考之

蔡君谟诗会亭遇资政孙公赴阙公致仕已七年时召归将有西鄙之任有云新治甬上居闲逸安暮齿以是知亦尝居于四明

书从兄少虚教授金书金刚经後

呜呼此从兄教授少虚之真蹟也兄少好二王书笔力素高後得乐毅论石刻深爱之一笔不妄下故楷法精妙字字可敬观者当自知之兄讳鉉少虚其字也幼有俊才日诵千言未冠能属文十五应乡书中其选又十年始入太学声闻诸公闻公试圣人肆笔成书赋薛叔云元鼎魁文固佳而兄之赋云元圣有作斯文在兹惟得书之体也故肆笔以成之兄自少习书未尝作赋时方兼经一出而争诵之私试惟圣人可以践形论冠絶一时盖他人皆谓圣人能践形兄独谓可以践形尤得孟子之旨而文又胜蜀名士冯圆仲方李知几石为学官相与击叹且曰东南乃有如此人才耶必欲真首选虽以异议小却而名愈重绍兴二十有九年解试为第七名明年省试为第六名三场俱高而尧仁如天光武总揽权纲二论尤为世所称述钱子和豫为参详官批其卷云议论雄特文势雅健非老于史学者不及此无有与之争衡者方未第时嫂郑氏不幸勉强赴省既登丙科授盐官尉已成见次遭伯父朝散之丧哀毁瘠甚奉亲至谨真是食在口则吐之至是欲寬伯母陈氏安人之忧先意承志曲尽子道服阕除泰州教授未几又罹内艰何其多难耶乾道三年庄文太子将葬宫僚二詹事庶子谕德当作祭文而难于言或以属兄为之文曰呜呼惟天惟祖宗啓佑我国家纯笃生哲人允惟元良及兹重离竝明家用平康於万斯年肆用貳我宸极承我两朝用奉若于天休洪惟我亿万年竝受丕丕基者庶其在兹若之何弗吊旻天降割于我家虚我主器惟御事庶士越在外服越百姓里居罔

不?伤心矧惟某等有服在百僚惟我储君既冠成人夙敏日跻弗勤弗烦惟兹四人无能往来厥有显德亦罔克纪述惟速戾于厥躬是惧若涉渊水今日月有时惟是窀穸之事所以奉神灵于幽宫者其孰敢弗?肆惟灵其监于兹虽多用盘诰语而体正文古无能易者衆作为之皆废寻为临安府教授以为郡国首善为上庠之亚坚持规矩学者翕然师尊之光宗以东宫尹京内侍知省甘昇怙势横恣欲广湖上园囿讽府中移置社坛府命兄为祝文兄执不可以书抵少尹曰依奉令旨改移社坛就昭庆寺前筑叠令譔祝文某窃以社稷系一府利害不可轻有改作况今皇太子殿下领尹事大体重尤难轻议某虽闻见今社坛委是荒芜沮洳每岁不问晴雨只就寺宇祠祭深失礼意此实累岁有失修治止宜芟治增筑别建祭屋孟子云祭祀以时然而旱乾水溢则变置社稷赵岐谓其间有旱乾水溢之灾则毁社稷而更置盖谓国之事神者既备而神或不职然後可以易置示加责于神也今六气顺序别无灾沴若今轻改社稷神何所依祝史之文其将何辞揆之幽明事未稳便欲望别取令旨止下本府如法修筑若必欲改移所有祝文不知所谓难以下笔未敢制譔言虽不用而闻者叹服咸曰昔知其能文不谓风节如是之高也淳熙改不考试婺女得疾卒于贡院壽止四十有二呜呼痛哉天胡予以才而嗇其壽畀之名而夺其禄耶娶郑氏宣和太宰居中之曾孙再娶孙氏绍兴参政近之孙郎中大雅之女俱无子以族人之子演为後又得一子泮于民家以其为遗体也始日者唐杞谓兄不壽且大期不远斋戒泥金以书此经冀望少延而竟如其言尤可哀也兄喜读庄子汉书故文气有近似者尝谓钥曰我欲手写古书意所好者首以檀弓继以天问天对之属必与时好不合欲名曰攻瑟编大率志尚如此甥壻盛箕号能文自婺来明作四明八咏颇工衆方环坐读之兄久与之厚字呼曰次龙沈约文体卑弱可憎君又效之耶坐客赦然盛亦悔媿藏其藁不出郑先生刚忠席下数十人兄一日忽私谓钥曰吾默观同舍中惟杨圣可与吾弟为佳问之则曰惟汝二人清而有福问兄何如又曰我虽清如无福何今同舍凋谢存者盖寡圣可名公治晚得官而有子琛登甲科兄非相形者而风鉴乃如此钥少兄四岁爱抚训獎过于同气其卒于婺也往为护丧以归兄之昆弟五人惟幼弟在其子浹装潢此卷以求跋痛念兄之抱负不羣宜乎远到顾其少作与场屋之文俱不足为兄道而区区具载于此者伤其不壽而见于世者止此其亡也志铭不立羣从辈行今亦无几钥不书此则兄之哲踪远韵遂泯矣故书之不嫌于详钥非不慕兄之书而天资不颀不及远甚于是年六十有七矣勉追後尘而犹如此虽觉我形秽亦无所辞焉

跋仲兄严州所书安遇山房題扁

先君银青尝读葛文康公集见其父清孝公行状云所居以安遇名轩言遇无定遇安有常安先君欣然曰此吾之心也遂以名所居之堂自号安遇居士先是卜壽藏于报国山仁济院祖妣魏国墓左因作小庵于山下号安遇山房命仲兄书其扁後既葬于长汀而山房亦废仲兄遗墨尚存从子灋装池求跋痛念父兄相继下世二十余年抚卷不胜感泣

跋王恭叔所藏渊明雪中诗图

初寮跋祖颍所藏东坡帖言吏部赵公元丰元佑与坡为代所藏则公使淮南时坡所行词也言公之孙奇育而不及弃奇盖寮之爱壻也集中与之赓唱近三十篇亦谓之赵十六有云何

敢壻君真好友端来学道伴衰翁与之别则曰吾诗如钟须子撞岂可一日相参商则翁壻之间固可知观此图则又知其兄弟之相与风度殊不凡王郎示余此卷余何敢望寮君之伴我亦我家之祖颍也

跋先大父徽猷阁直学士告

政和间先大父少师被命守乡邦再任至四年宣和二年方腊起睦州连陷睦杭歙处四郡声摇两浙承平既久至勤京师遣大兵而後剿灭时先祖备御甚严保全郡境适召赴阙下不敢遽去奏乞侯代以安人心事定奏闻遂升学士纶告既登之石足为家宝惟是词臣不知其详褒词既简外祖汪公所记钥实知之时诸父多仕于外九伯父暨先君待次里中扬州倅卞公养直園在伯父馆下为此跋语亦未深考也钥昔闻之腊之初起本无足畏朱勔父子以花石进奉等结怨东南所在顽民好乱者与腊相应贼势日张其实皆村民也少随侍处州闻其来处也止以数舟载百余人绦帛帕首带镜于上日光照耀自龙泉山间乱鸣钲鼓顺流而下诸邑泊城中望风而遁略无守备遂据州城又欲破温州赖刘教授士英唱义坚守台州赖滕司户膺二城皆全钥尝仕二州尤闻其详温则处贼洪再使其徒来攻其西吕师囊以魔术发于台之仙居既破乐清又攻其东危甚郭少保仲荀等以西师来援始免台亦师囊之党攻城甚急久而後解二城虽仅免而城外皆为盗区蹂躪残灭甚矣越分帅府虽不至为贼所迫而剡川新昌魔寇大炽被害最酷及宁海俱与奉化为邻避地而来者如织恐贼徒杂于衆中人心恟恟先祖经画大略如汪公之记神道碑云台越二城虽全而外境皆残破惟明六邑秋毫无犯为得其实矣爰是东备海道南塞新剡寧川之冲布耳目远斥堠戒僧寺不复鸣钟有急则鸣以为警贼知有备不敢犯我在诸郡中阖境独全明赏信罚境内之盗亦不得发发亦辄得佑陵知之深嘉屡叹故赏之尤厚寇既平改睦州为严歙州为徽剡县为嵊亦可见当时之事变矣钥不肖且老每念先祖之功无有发其幽潜者会从子深以此卷求跋敬叙所闻使後來者知之

书机汲记赠姜子阳题其後

乾道五六年间先光禄守括苍兄弟随侍郡斋中无处不对谿山之胜而山无水源取汲于谿一日试同仲兄步至谿浒一下数百步又攀援而归喘汗久不定相顾曰徒手上下犹如此彼卒辈负水而登日不下数四其劳甚矣思有以免之竟无策而止後偶读刘宾客集有机汲记聱牙难晓详究其说则哑然曰是可施于括苍无疑然久无所告语姜子阳钤辖沿檄来归因语及此询问甚悉是有心于利物者因为録宾客所记又命工作小式以遗之归见黄堂悦献其说而赞成兹事纵未能筑以达于正堂但得引寘山上而运之比汲于谿者大有间矣外而公厨及公帑酿酒之须皆可以济下至岩居而谷汲者亦可仿此若小有不合则又在润泽之功子阳幸加之意焉

跋豫章别集

【原目此首後有跋王伯奋所藏文苑英华跋清閼居士临修禊序二首今竝佚其文】

一诗二铭赞颂三序说四记律赋笺注老子一篇杜诗六十首东坡少游参寥各赋春日诗十首参寥第八首云梅梢青子大于钱慙愧春光又一年亭午无人初破睡杜鹃声在柳花边山谷别集书王氏梦锡扇乃是此诗但首句云压枝梅子末句云杜鹃啼在柳梢边岂山谷爱参寥诗尝书之扇耶山谷以承天院塔记为人所讪遂贬宜州记文及毁壁序皆见此集

攻媿集卷七十三

卷七十四

钦定四库全书

攻媿集卷七十四

宋 楼钥 撰

题跋

跋沈智甫所藏东坡帖 【原目此首前有跋五谏帖一首今佚其文】

坡公以端明殿学士侍读学士为定州安抚使绍圣元年落职知英州道贬宁远军节度副使安置惠州帖中又言过邢州疑是此时再遭远斥不知所与何人既言道友恐是佛印参寥诸公以书唁之公不领细人姑息之爱而望其警策以进于道一见梁邢州之善政而亟称之不计身之百谪恐一善之不闻呜呼此其所以不可及也

跋扬州伯父所藏张魏公帖

魏公谪连州凡四载夫人侍太夫人居长沙绍兴二十年移永州始迎版舆同处时伯父扬州以湖南漕兼潭帅权臣当国士夫或以倾覆迁客为进身计伯父义概凛然刘杼山在全则持使节以过之魏公在连则时节馈问其母自潭过永又津其行魏公所以致谢之勤也百谪不怨惟思报上德而收拾人物之心犹不少忘可以略见公之所存矣

又钱希白三经堂歌

绍兴二十四年岁在甲戌先银青部纲过仪真钥实侍行时七伯父方以漕使兼扬州遂到郡斋公余出示书画卷有草书一轴末章云君家世世为好官後书钱希白今五十年矣偶以问诸孙而桂始出此卷盖三经堂歌也希白名易吴越国王侁之子与其兄昆随俶归朝愿从科举年十七举进士御试三题日中而就言者以其轻俊而黜之太宗语苏易简曰朕恨不与李白同时易简曰有钱易者李白才也太宗喜曰若然当用唐故事召至禁林会盗起剑南不果用复举进士甲科又举贤良方正科官翰林学士俊逸过人为文数千言顷刻而就又善行草书有文集在秘阁观此卷可知其人也宋谏议敏求着东京记载崇庆坊司空致仕李昉宅有孝经道德经为三经堂家有东京图崇庆坊在城之东北有李昉司空宅则诗所谓夹城尽北十里街者也黑輶盖用汉旧仪丞相两黑輶事考其家谱子孙为郎者衆独未知客曹为谁司空之子宗谔为翰林学士年不及五十真宗甚悼之恨不及大用且曰自国朝将相家能以声名自立不坠门阀者惟昉与曹彬家尔宗谔之子昭述亦为翰林侍读学士从子昭道为天章阁待制世世为好官非虚言也

跋从子深所藏书画

东坡

公以元佑五年在杭州治西湖四明图经载太守七人皆止书元佑年韩宗道李莘李闳王子渊张修刘淑吕温卿不知所与何人谓视此民犹公民虽欲勿与得乎

钱明逸 张文潜

钱子飞父子兄弟俱中制科作字犹有父风然以言事致杜范富三公皆罢政惜哉张右史手书自有一种风气与大礼庆成赋藁相类

林和靖 蔡端明 范太史

和靖名逋字君复而曰君复顿首古有此例比西台差少肉信然求仲盖用三径事也蔡端明诗见於集中第八卷题云二十一日山堂小饮和元郎中牡丹向谢之什范太史笔势端重似其为人集中今无此诗家传谓自绍圣之後贬责万里屡遭焚溺之厄元符丧归再严党禁家藏文字固已不全靖康避地迁徙所存益少悲夫

刘杼山

伯父扬州与杼山同在京师太学相与最厚观此书词交情可见此皆在贬所书也第二帖三霍之言虽出雅谑盖是时鲜有与迁客相亲者故鸿庆孙尚书亦有望望然如避垢污之言其志先伯之墓有曰余谪洮阳壽玉方持湖南使者节过我相劳苦如平生与此意不侔矣第三帖问疾而进苦语有味其言哉钥少随侍溧阳及拜公牀下见与伯父一书其言尤切有曰久闻壽玉後堂甚盛某不敢谓然吾侪老矣违情逆境固不可堪若纵意于声色之娱为计似疎其于保壽命也左矣人世浮生其谁不死眼前亦何尝见有百岁之人然古人必谓卫生有经者大恐未死以前或因此疾病纏身举动须人其况亦何可堪也尝历历服膺此言不知旧帖何在前辈责善之义如此陶公安世因公之言遂为伯父上客後所立亦不负二公之知时先君银青为道州僉幕避伯父亲嫌而归亦过清湘见公故帖中两问及後在溧阳受知尤深公尝曰某无他长颇能对客发书草圣飞动观者必谓敏手钥亲见其落笔沈着详缓甚不苟也感怆畴昔谨为详志之

李西台

西台不惟以书名每见其诗真有唐人风度纸尾花押笔力亦不凡

钱曲台【昆】 吕芸阁【大临】 苏後湖【庠】

钱裕之善草隶而字体又与希白子飞不同郤近李西台但未老耳芸阁先生经学之余词翰皆有余韵後湖居士诗笔俱老岂夺命鬼手之後哦诗结字尚有余习耶止之讳正由了翁次子其与前辈相接如此家风可知

游御史酢

建安游先生从伊川游在谢上蔡杨龟山之间宜其与了翁父子相厚也龙舒为今佳郡是时乃空乏如此天灾流行可无先备耶

赵清献

清献平生四入蜀先为蜀州江原县後历梓益两路漕使又两知成都最後则已为执政矣神宗亦曰能为我行乎帖中言寄家甬上单骑入蜀是为部使者携一琴一龟时耶

徐东湖

徐东湖与了翁家相厚如家人通判郎中即了翁次子止之也呼以仁弟情义可知

韩南阳 宋宣献 文潞公

南阳为元章简公书神道碑字体庄重正如此宣献传言笔法精妙上尝取所书千字文及其家之墨迹藏禁中故敝纸渝墨尚有典刑潞公翰墨飞动使人望而畏之

曹子方

佑陵盛时曹公上书极论时事庙堂质责之问所从知对曰天下皆知之而相公不知所谓焉用彼相遂贬去京尹不忍辱之引颈荷校而行吏卒问何以为路费曰少俟吾子已而一介草履负担而至即其子也问所携前则草履後则乾粮卒辈愤然欲加摔辱子奋曰我父得罪朝廷尔曹敢加无礼我当杀尔愕不敢动靖康初召还寢至枢筦又闽人也宜乎游了翁之门

石曼卿 张都官

石学士以书名所谓愈大愈奇者张都官未知何等人要是前辈作字不苟如再拜尊候施於所敬今亦不见此风矣

张魏公

紫岩翁忠肝义胆炳炳如丹盖矢死而不变也使士夫俱能怀此心国其庶几乎

吕子约

哀哉子约见其书如见其人始余以隆兴初元与其兄东莱为同年闻子约之贤而未识也淳熙九年子约来掌庾事余在先君服中时时相过情义日笃服除舍弟买舟赴调或传以为余将西上子约在庾中亟以片纸力言其不可前余固不为行计然此意不可忘也其後两得同朝迨天台赘倅之行又见其遭贬自此不复得见亦不意其蚤没也尝评其人杨秉三不惑之外视轩冕又如浮云非勉强然也见其进未见其止观人多矣未有表里如一如子约者所谓盖有之矣我未之见也九原可作微斯人吾谁与归

周莲峯 朱灋山 王侍御伯庠

绍兴之末莲峯周貳卿归自永嘉灋山朱公舍人归自平江俱以次对来寓四明僧舍侍御王公年虽未及而从二公游完顏亮既平周公贺表用万马救中原对一驴载都市朱公问之侍御适参坐诵臧质传中数十言二公俱称其强记故倡酬之频如此周公之诗三惟中篇及朱公一诗皆亲笔侍御皆使人代书盖至敬之地不敢纵笔也山谷与王才元舍人咏牡丹诗云欲搜佳句恐春老试遣七言賒一枝周公岂用此事耶少时俱及拜三公牀下抚卷惘然岂复得此前辈人物乎

徐明叔剡溪雪霁图

伯父扬州所至办治官府清简坐多佳客如徐公明叔其一也幼时犹及望见徐公之风流韵度如晋唐间人翰墨篆画四明人家多有之时徐貳卿献之为守与叙宗盟久留郡斋如秦诏刻石篆韵皆其笔也尝为高丽使属尽图其山川器物以归兄穉山侍郎有重名从子子礼志其出处甚详谓画入神品山水人物二俱冠絶濡毫漱墨成于须臾此卷凡是矣命女壻状其行则近故参政张公伯子也因并记之

跋再刊裴公纪德碣

熙陵命王着集法帖第五卷有李斯篆十八字米南宫云未知何人书盖亦不敢以为斯之书也黄秘书伯思长睿着法帖刊误云按其文云田畴耕耨为政期月而致法令使父子为邹鲁乃李阳冰篆王密所撰明州刺史河东裴公纪德碣中字也此帖乃摹田畴等十八字为斯书与碑中篆无铢黍差而米云不知何人书盖未见此碑也校书考古精确类此然秘书又云自苍颉至程邈书皆伪史籀书传後世者岐鼓耳今此书云扬州裴易惠系字殊无三代体与其辞皆唐人笔亦为未尽盖所谓史籀书者即此碑额中字也□乃碧落碑第二字唐字也阳冰最爱碧落碑故用之秘书以为杨字殆未考尔州 惠三字皆在系即纪字之半但无易字疑以明字叠而成之特以大为小岂秘书却未考此碑之额耶若谓字无三代体与其辞皆唐人笔亦可谓精鉴矣建炎三年此邦兵毁最酷旧物几无存者待制仇公得此碑于藁莽中重刻之而或毁焉仅存其额识者深惜之貳卿李公以台省旧德来临政成多暇访得墨本新知繁昌县玉牒善潼素工小篆专以属之輶石其家临视摹刻漫者阙之以成此一段奇事使裴公

之政阳冰之笔与公之名俱传又俾钥书其後亦预有荣焉按东武赵明诚德甫金石錄此碣又有八分书者今不知所在矣貳卿名景和九江人也

为赵晦之书金刚经口诀题其後

钥七世祖以贄为奉化县录事当咸平中民俗富厚一意奉佛邑之告成明化等塔庙多所营建时杭州新印华严经赎十部以归又刊法华经版造百部皆以分施邑下诸寺至今犹有存者尝得古铜观音像于江沙中长仅尺余而相好端严宝藏于家是生四子六世祖其次也尤笃厚种德五世祖正议先生以文行教授乡里三十年皇佑间登第起家一时名公舒丰罗袁童郭姚俞皆为高弟曾祖金紫兄弟继世科诸公又皆执友而与提刑罗公尤厚盖其醇茂勤笃甚相似也开禧元年表妹壻新彭泽赵丞晦之师恍欲刊六祖金刚经口诀钥方居先妣安康郡太夫人之丧痛念先妣平生佛课至谨既于卒哭前手写法华经以资冥福因许为晦之书此口诀及观後序则罗公所作敷畅经意又发明六祖之说且云士大夫无不乐助而四明楼君某愿助成其事则我曾大父也遂谨书之且易注文为大字以便观者区区之诚愿以追荐祖先二亲无量功德其中妙旨开警迷懵者非一善读者当自知之

跋山谷西禅听琴诗

此山谷西禅听戴道士弹琴诗也山谷之诗不待赞扬手自分内外篇今之诗集传於世任公子渊为之注者皆自入馆後诗才七百余首外集乃有千余有如此诗而不得在内篇又或云晚年删去诗可易言乎内篇有听宋宗儒摘阮歌不知与此何以分必有能辨之者集中幽水曰幽泉更作曰更似外集又有招戴道士弹琴诗岂亦斯人耶

跋晁深甫所藏东莱吕舍人九经堂诗

伯父扬州家有钱内翰希白三经堂歌其蹟甚伟初不知为谁氏作後阅宋谏议所着东京志始知为崇庆坊李司空家三经乃孝经道经德经也末章云三经不灭堂不坏君家世世为好官兹见东莱紫微公题晁氏九经堂诗益知大家文献相承未始不以经术为本也

跋叶氏夫人墓志

四明衣冠虽盛自开国以至绍兴曾未有仕登两府恩及三世者二十四年岁在甲戌史公才始为端明殿学士签书枢密院事兼参知政事赠三世为东宫三少隆兴元年从子浩为参知政事未几为尚书右仆射同中书门下平章事至淳熙五年再为右丞相其後位极人臣生为太师赐第行在所玉带金鱼勳名富贵康宁壽考为近代臣子之冠子孙繁衍不惟为吾乡衣冠盛事四方搢绅亦莫不歆艳企慕而求其源流之所自则出於八行之一人又遡而上之则八行之母叶氏夫人流庆也夫人以子孙赠典凡十七封为冀国夫人太师文惠王推原本始追崇极品之外上及五世之祖其叙致积庆之由可谓极其至矣然犹未能知叶夫人之详也开禧二年新监文思院弥忠致族党之意叩门而告钥曰叶夫人之志铭碑石既碎於兵火不

知所在近方得於故书中始知於煨烬之余仅得断碑上世能錄其铭虽有阙文而其志铭则子之大父少师为乡郡时所作也呜呼建炎三年吾乡遭兵毁最酷我家先世遗文片纸不存粗能班班见一二不谓乃有此碑伏而读之不肖孙不敢为溢美之言至其言曰人皆谓天之报施善人在此而余独以为曷止是哉盖本固则叶茂源深则流长累行积德厚矣後必有显者未易量也铭词又有曰天之报施固未易量後必有显以大厥光是时枢密方为遂昌县丞而终貳大政文惠王即夫人之曾孙也碑中五子一尚幼者後名光七孙若讷即文惠王之书名若愚後名渊终朝奉郎知江陰军若谷後名溥终湖州通判若朴名源为曹娥监场涓以删定官为南康军签判浚为婺州通判是时犹未生也元孙令数十人弥大为礼部侍郎敷文阁待制弥正两浙东路提刑今弥远方为起居郎弥坚方为枢密院检详弥字一行登科者已六人其余名荐书游贤关以赏延登臚仕者未易缕数况其子孙承上世积善之庆大率性行端良相勉於学以是益知史氏之兴未艾而吾大父之言於今已为明验矣既谨录之以补家集之阙又着其说於世使为善者知劝他日有秉彤史之笔为列女传者当以夫人为称首焉阙文尚多可补者补之余当以传疑不敢苟也呜呼苏文忠公为三槐堂铭有云善恶之报至於子孙而其定也久矣国之将兴必有世德之臣厚施而不食其报然後其子孙能与守文太平之主共天下之福今夫寓物於人明而取之有得有否而晋公修德於身获报於天取必於数十年後如持左契交相付吾是以知天之果可必也又曰世有以晋公比李栖筠者栖筠之子吉甫其孙德裕功名富贵略与王氏等而忠信仁厚不及魏公父子由此观之王氏之福盖未艾也钥不佞於史氏之门亦云

跋姚宣伯所立许斯二孝子墓表

东阳在婺为壮县号难治近岁议者以东乡尤旷远别置一尉以领之余里人姚宣伯为之数月以书来曰税籍不明赋役不平非民之顽驱之使顽也余报之曰固也良心人所同然或仁或鄙顾为之上者如何子益勉之未几又以书来曰管内有许斯二孝子墓许见晋书孝友传墓在蓝碭村所居名孝顺里及其亲家尚可识鹿峯虎峯俱以得名斯盖吴亦乌间人墓在后侶村地名孝义塘事并见图经二人皆尝表其门闾今不复存欲立巨石以表其墓且各刻其事於碑陰以诏邑之人使慕焉愿为书之余欣然曰尉以警捕为职而加意於风教子之意远矣且必耿令君之所乐为也自念得姓於东楼公而望出东阳郡上世迁於四明而婺实吾宗之故里也既书其碑又且劝宣伯并刻之

跋张忠简公阐诗帖

熙宁六年日当食四月朔裕陵为彻饌避正殿一夕微雨不见日食百官入贺蔡子正挺为副枢献诗前四句曰昨夜薰风入舜韶君王未御正衙朝阳辉已得前星助阴沴潜随夜雨消当时无能过之者盖又有皇子之庆也端明张公绍兴十三年为秘书郎是时事既相类诗语精切可以追配前人後以孝宗旧学仕为尚书虽不及大用而清德映照宠数优渥三子一孙同为郡守叔子遂践世官张氏之兴未艾也拳拳爱君忧国之诚已见於此诗伏读为之三叹

跋王如晦文卷

开禧二年下元前二日王周伯屋示余以巨轴曰此曾大父朝议少时场屋之文也大父滁州藏之赠告箱中余曰周伯妙年固非汉之老人而余年七十及识君之曾大父於少时余与表兄中书陈舍人安行俱汪出生长外家舍人幼孤侍母以汪氏为归余十岁时见舍人取朝议之女外祖少师待朝议如姻家往来无时後六年而朝议亡外祖铭其墓而仲舅尚书为之文绍兴三十年岁在庚辰滁州登科余适在都下侍仲舅往贺滁州泣曰先君少在郡庠以明易试优等升内舍籍上庠兵火之後再以本经中乡举太学再兴又以诗赋联荐一日外报省榜而不及门先君方理发吾母劝之曰君发已种种兹事可已徒费精神何为先君握其发曰未死终不可已然竟齎志以歿某之侥幸先君之泽也今见所着易义十三篇论二首虽非今时文格然既尽当时之体而议论详明益见学问之蚤成而老不得售非命也耶滁州既成先志仕至二千石亦足为善士之劝矣若其高谊乐施虽已见志中抑闻遇西变时乡之寒士襦被附舟日为食客又济其乏絶者不知几人项文学彦思汲贫甚以场屋之旧叩门无时公知使令者厌之一闻项之警欬则径出迎之袖出所赠以应其须尝在旅中项来谒不值逡巡既去而银盃羽化从者遽白公以为无疑公怡然曰必无之因置不问後乃知从者之度也闻者益叹服其他折券已债不可数计王氏之泽未艾也周伯拱而曰皆孙曾所未闻愿书卷尾以补家传之阙又以诏後之人

跋赵大资政所藏赵忠定公帖

开禧二年大资政赵公奉祠居四明一日理故篋有简韬紫罗囊中緘封甚密发而视之乃丞相赵公报章翰墨如新盖皇上受禅前一日事已豫定公密以报丞相丞相时为知枢密院喜甚而书此所谓陆贾交欢为公以大义谕殿帅郭果正如平勃之安刘氏也公慨然感念儻已十三年矣公方为蜀帅时尝被旨上内禅本末无一言之诬兹欲以此简登之石以示後人公之意深矣钥待罪直学士院甲子昧爽之前密闻大议於公相君示以太皇太后之命播告四方实叨视草遂得在二公之间正元朝士存者无几矣幸日陪杖屨之末公曰微吾子无有深知当时事者为我序之钥曰唯

跋刘师文昆仲乞增母壽疏藁

文王谓武王曰我百尔九十吾与尔三焉文王九十七乃终武王九十三而终有是哉正义曰年壽之数赋命自然不可延之寸陰不可减之晷刻然刘氏兄弟以母暴得病欲絶各乞减算三年增母之壽而母後六年乃卒呜呼真有是哉

跋东坡与宗人帖

宗人容贫甚吾无以济之昔年尝见李駉马玮以五百千买王夷甫帖吾书不下夷甫其人则吾之所羞书此以遗生生不得五百千勿以与人然事在五百年後价直如是吾佛一坐六十小劫五百年何足道哉东坡居士

俟河之清人壽几何容方苦贫而使得五百年後坡亦善谑矣钱大参书法源出于坡叹仰若

此必能审其为真

书李氏建炎备御录後

始余八九岁时侍外祖汪少师外祖母福国夫人先妣安定郡夫人季舅江州赴奉川任氏庆集江口秉义李君及王夫人邀过其家隐然巨室犹记及见双椿芝兰之盛既长始知二老人康适由长子修武子列一力干蛊才智絶人孝养备至秉义自六十岁即以家事付之一丝不挂时已近八十略无老人衰惫之气壽至八十八而终侍御王公志其墓先是建炎三年吾乡被兵祸最酷远如昌国颺颺独居一海中亦遭焚毁时高宗南巡永嘉奉川为孔道敌势方张承平既久人不知兵望风奔散而邑境独全尝以问诸父洎故老则曰此李君子列之力也邑有义社素号趫勇邑官召人士议事皆已窜伏山谷君所居去邑一舍令驰檄使自备餼粮从便控扼而数百人已列庭下君延致其长自任馆谷之责椎牛酺酒以劳勉之衆皆感奋远近来归随即抚定军声既振寇望风而卻麾衆追蹶得其数级而还事定又出私藏犒之方是时处张功閥冒赏射利者甚衆君不自言赏亦不及逮今将八十年李氏之赀产虽寢不及旧而陰德必报文风大兴君有九子长过庭蚤入太学得官亦转为丞矣第四子迪功充庭是生六子长曰元白授学於舒元彬璘归以诲诸弟今为上舍生诸弟与其羣从入太学预乡书者已五六人元白长子亦入学次以制中开禧元年进士第乡里莫不歆艳盛矣一日迪功理故书尽得修武备御时支犒总目手泽具存欲以显扬先人之烈俾钥序其後详已见于张公仲房所作行状矣抑闻之衣冠南渡所在颠蹶者非一钥亲见王信州正夫从言时侍二亲避地南来依依然无所归寄命一航闻有义勇所聚遂投之衆见其北音遽曰此奸细也欲戕之举室不知所为忽一士人攘臂曰毋害善良此士大夫之族也问知其为三槐家益善遇之则子列也且曰微子列吾家无噍类矣又闻秉义尝庆壽百客皆集有壻刘氏独不至子列欲尽亲欢以此为歉问之则以官逋三数百千方系於有司不可脱也即具舟载钱如所负之数输之官取壻以归大率高谊宏略如许然则李氏之兴殆未艾也今方多事思得疏财好义徇公忘私如修武君者岂易得哉故慨然为之书

跋秦王独猎图

山谷题摹燕郭尚父图云往时李伯时为余作李广夺番儿马挟儿南驰取番儿弓引满以射追骑观箭锋所直发之人马皆应弦也伯时笑曰使俗子为之当作中箭追骑矣余因此深悟画格此文皇独猎图唐小李将军之笔建炎间内府宣取於宗室家奏以非所敢惜但以前射一豕而上生於亥故不敢进复令取之亟摹一本而以真者进御三马一豕皆极奔骤弓既引满而箭锋正与豕相直岂山谷龙眠俱未见此画耶

攻媿集卷七十四

卷七十五

钦定四库全书

攻媿集卷七十五

宋 楼钥 撰

题跋

书曹武惠王传後

康王之诰曰昔君文武则亦有熊罴之士不二心之臣保乂王家用端命於上帝夫所谓不二心者人但谓其忠於所事而已书之意盖谓其臣与文武之心为一如咸有一德之谓也艺祖之造邦武惠之元勋不容赞叹後人徒知艺祖之神武而不知创业垂统本於不嗜杀人徒知武惠为熊罴之士不知其用兵行师不妄杀一人所谓不二心之臣故伐蜀而戢兵艺祖使人谓王曰汝能戒士暴掠成吾不杀之志任得其人矣江南将下艺祖梦神人奏上天以金陵一城生灵为曹公後自知公必能副朕不杀之志矣呜呼我宋之国祚无穷曹氏之余庆流衍三代之君臣何以尚兹

跋赵睎远使北本末

汉武帝得人之盛史赞有曰奉使则张骞苏武武之执节千古所仰若骞者往来匈奴十余年谓其勤劳则可然竟不得月氏要领犹之可也奉使有指而多取外国奇物失侯之後益言所闻於他国者以荡上心帝之黷武以至虚耗骞实启之殆汉之罪人也少师以皇族之彦孝宗妙选副国信使上方锐意恢拓别持一书前此未有而公遇事详审抗节不挠既深得肤使之体迨其归奏力陈遵养之说上意虽无封狼居胥之快而察公之忠诚南北信誓守之愈坚三复遗编手泽粲然敬叹不已既得周文忠公为隧碑以发扬之谨书卷末以慰二贤嗣之孝思云

跋黄刺史公移

余从妹适新昌石时亨文今主桐庐簿其壻黄君日宣自言鼻祖名从日从成唐五季间为明州刺史始居勤之隐学後徙於剡所居号北庄且携其家藏明州公移三纸相示草书皆手泽也余每见旧物无不爱玩又念先大父少师宣和中守乡郡首尾四年中更兵毁不惟家集不存吏牒亦不复见君家此帖传三百年可宝也谛视之其第三帖天佑三年呜呼唐昭宗以天复四年三月改天佑八月而遭朱全忠之祸哀帝嗣位竟不改元三年岁在丙寅明年四月而唐亡矣岁在丁卯是为梁开平元年余二帖皆开平二年岁在戊辰第二帖则正月而第一帖乃九月三帖之次正失其前後当一正之二帖为雪窦山者前止称监盖专为监事也印文漫

灭仅辨一二疑是监中之印一牒补吴德为衙官则明州重铸之印六字甚明晚唐名器益轻一刺史而检校太傅骑省宪衔下及胥吏是时钱武肃王据吴越或劝拒梁使者武肃笑曰吾岂失为孙仲谋耶故用其正朔又言董昌之诛明州君预有力故有佐忠去伪功臣之号因并着之

跋欧阳公与张直讲帖

欧阳公笔札自成一家故所见无伪帖然鲜有如张氏所蓄之夥盖直讲出其门久矣呜呼前辈风范叹仰何极与门人书止以讲学进道为问官称直书外封多用花押皆今之所无也出处君子之大致可以自决若范蜀公之不待年固为高矣盖有为而发公亦不暇俟从心之期勤勤屡请而後得之本无可疑而於士友间询士论恤清议又恐或以为远也李宗易未知何人公欲少遂体息可渐调摄公非他人比也以忧世体国之切又为斯文宗主虽曰忘疲精力耗矣六十四岁至蔡明年六月得谢又明年当熙宁五年之秋而公薨矣哀哉汝陰处士公待之甚厚骑马听朝鸡之句可知一从王氏之招顿隳素守春秋犹且倚阁於公何有哉公发明经学於诗最详易道难言公亦自言不敢以己意为準也直讲五世孙簏示此二轴敬题其後闻家藏直讲易说犹恨未及见之公尝荐直讲试制科期待不浅官此大理寺丞秀州幸命也而其後衣冠不絕曾孙谔欣泊簏俱挹世科非垂裕之效耶

跋巢经唱和帖

向芑林 壽岡杨愿 巢经萧奂

芑林词翰固多见之壽岡巢经之酬倡可以见江右文物之懿壽岡临江之山其字谨仲绍兴二十一年进士也枢密杨公字原仲姓名适与壽岡相似今其家在会稽杜小冠陈惊坐不可不辨也

跋傅钦甫所藏职贡图

河南出鲜卑慕容氏吐谷浑之後也地在河南古之流沙也梁天监元年遣使朝贡献玛瑙锤後或岁再三至或再岁一至

中天竺国一名身毒天监初其王屈多遣使献瑠璃唾壶等

师子国大通元年其王迦叶伽罗诃黎邪使使贡献北天竺国天监三年遣使朝贡

渴盘陀国于阗中小国也中大同元年始通江左遣献方物

武兴蕃国本仇池天监初封武都王後以为东益州滑国车师之别种天监十五年其王厌带夷栗陁遣使献方物

波斯国中大通五年始通江左遣使献佛牙

百济国在震旦之地共有五十四国百济其一也天监十一年遣使朝贡

龟兹国西域之旧国自晋渡江不通天监元年遣使朝贡

倭国武帝进其王武为征东大将军

因古柯国【梁书及南史并作周古柯国此因字似误】呵跋檀国胡密丹国并滑国之旁小国也普通元年使使随滑国使来献方物

白题国匈奴之别部落也汉灌婴与匈奴战斩白题骑一人普通三年遣使来献方物

末国汉世且末国也普通五年始通江左遣使来贡献

林邑国古之越裳汉日南郡象林县天监九年其王范天凯奉献白猴

婆利国去广州二月日行天监十年【梁书及南史并作天监十六年】遣使奉表献金度

宕昌国西羌种天监四年其王梁弥博来献甘草当归

狼牙修国在南海中去广州二万四千里天监十四年遣使阿撒多奉表

右二十国亦有屡至者姑纪其略

正字傅钦甫携职贡图见示不惟画笔精好其上题字亦自合作李龙眠有帖云梁元帝萧绎镇荆时作职贡图首虏而终?凡三十余国今此卷才二十有二必有遗脱者余试考之其一曰鲁国使龙眠以为首虏而此曰鲁岂有误耶徧阅南史梁之记传及通典太平御览皆无鲁国与丙丙国其下二十国则有之既列於前皆曾朝贡於梁者也武帝纪中又有扶南邓至於閩蠕蠕高丽干陀利新罗盘之一丹九国岂图之所遗耶亦不见所谓?者按海南诸国晋代通中国者盖鲜故不载史官及宋齐至梁其奉正朔修职贡航海往往而至自晋氏南渡介居江左北荒西裔隔碍莫通至於南徼东边界壤所接宋元嘉象浦之捷威震冥海於是鞮译相系无絶岁时以泊齐梁职贡有序元帝字世诚武帝第七子也工书善画自图宣尼像为之赞而书时人谓之三絶江陵城陷聚图书十余万卷尽烧之着书甚多内有职贡图一卷此几是矣然尚有可疑者既曰图书尽烧何由得传使不在煨烬中去今已六百五十三年纸之壽虽过於绢素亦不应尚尔全好恐是龙眠摹本前帖即其自跋也故又云恨笔墨凡恶而未究真此盖其自谦之辞也标题小楷与帖字颇类疑亦龙眠之笔又帖云状其形而识其土俗今不见所识又疑止摹其形也况龙眠好临古名画如张僧繇善神李将军海岸图吴道子韩干者尤多晋天福中胡严徵临道子善神亦曾榻木澹岩张公右丞达明龙眠之甥亦言伯时於前人遗

迹靡所不叩则元帝之画当是其所临者贞观开元等印高下匀布如出一时贞观既在御府不应百济之下书显庆四年灭又内殿图书内合同印集贤院御书等虽皆是李後主印然近世工於临画者伪作古印甚精玉印至刻滑石为之直可乱真也姑罄所闻更俟博识之士订之噫龙眠之笔在今日诚不易遇钦甫宝之安知他日不获其余也

钦甫云通监宋元嘉二十七年将北伐诏云芮芮亦间遣使远输诚款誓为犄角疑丙丙与芮芮相类恐传写之误然南史亦无芮芮之名姑俟详考

梁书西北诸戎传芮芮国盖匈奴别种魏晋世匈奴分为数百千部各有名号芮芮其一部也自元魏南迁因擅其故地宋引之共伐魏天监十四年遣使献貂裘是後数岁一至贞观中中书舍人裴孝源公私画录云梁元帝画六卷并有题印却不及此又云职贡图三卷江僧宝画隋朝官本亦有陈梁年号名画记云元帝画职贡图并序外国贡事又梁书云任荆时画番客入朝图下元日再书以助博闻

初疑芮芮恐是蠕蠕北史蠕蠕传甚详考之不见而南史蠕蠕传与梁书芮芮传首尾止二百余字事绝相类乃知芮芮果蠕蠕也蠕蠕贡献已见前跋在武帝纪中因并书之

跋二疏图

开禧二年余年七十乡党作会於敝庐俞惠叔以此图为壽爱玩不已时余已告老於朝至明年再请而後得之韩文公送杨巨源序引二疏事云後世工画者又图其迹至今照人耳目赫赫若前日事则知旧有此图矣澹岩右丞张公有二疏图诗自注云世传顾长康笔故诗中云虎头图一卷高贵乡公画隋朝官本二者未知孰是右丞诗又称潼关四山万木送车阨咽导骑交驰疑非此本龙眠思出新意或约旧图而为之洛阳王壽卿鲁翁篆李阳冰琴铭跋尾赵公明诚称其深入阳冰之室贺公所称殆是斯人而非公也近又得龙眠四皓图稍大遂临此本展以为对

题柳公权所跋洛神赋

洛神赋本感甄赋王大令好书此故多传於世尝见六一居士家传绢素真蹟亦非全文柳诚悬小楷书跋此卷作章草体虽合作未到皇象诸公其用工亦深矣余以读者不能尽职欲为行书于後因参以他本正定以冗未暇书此归之他日或再见尚当属笔

跋金縢图

金縢之说不明久矣尝偶得其意欲着于册而未暇庐甥祖皋申之携此图见示虽出临摹而古意具在遂为之说书序曰武王有疾周公作金縢读者遂谓公作金縢之匱殊不知序书者盖言金縢之篇为公而作也古之卜筮非若後世之轻易记曰易抱龟南面天子北面盖圣人斋戒以求蓍龟其求之天也可易乎哉此篇之说既不明似觉文义间断又若非可以传後世

者间有不通先儒多略而不道余熟复之始得其意而後词意聯属所谓丰不余一言约不失一辞者要当先正金縢二字所谓金縢之匮者其中实藏占书自后稷之封於郃分茅胙土授之以龟占书至严子孙世守非有大事不启也武王克商才二年而疾弗豫召公太公曰我其为王穆卜穆敬也二公欲卜之於天也周公曰未可不若以感动我先王遂以告太王王季文王卜三龟而皆吉所谓启籒见书者正启先世金縢之匮也既观占书亦曰吉公纳册於匮中不欲人之见之非圣人欲徼福於後也罪人斯得之後又为鸛鵒之诗以遗王其意切矣史臣书王亦未敢诮公言虽不诵言而不利孺子之谗王之心犹未释然也雷电以风禾偃木拔王与大夫尽弁以启金縢之书不知何为而启此书也以为不知则天变於上何为而启此以为知之则亦不必启此书也盖其时正以不知天之所以为变故启占书以卜天意及得公代武王之说至於执书以泣王心始大悟首曰其勿穆卜盖本欲卜而今不必卜也始知天变之意欲彰公之勤劳尔出郊而迎雨反风而岁大熟而後一篇之义焕然孔子定书特存此篇以见周公之制礼作乐以致太平本於此也新莽以平帝有疾作策请命愿以身代藏册金縢莽之谗诈不足言汉去古未远此说已不明直以金縢之匮为周公所作而况於後世乎

跋章达之所藏虞书孔子庙堂碑

此本虽无大周二字比余所藏为多又精彩殊胜闻天台有真迹在余生恨不得见之得见此本斯可矣

又心经

虞书石刻虽不尽有尚多见之心经精妙始见此本章貳卿自言家藏已百余年矣柳诚悬苏浩夫人志铭此本奇甚只一叠字真欲照人小字难於寬绰而有余不如此不足为楷法户籀李公诚之示以大父参政文肃公草堂所藏怀素自叙嘉定元年闰四月丙子同观於道山堂有疑为临本者然亦妙矣未易轻议

跋潘刑部致尧诗卷

彦先济南潘公之字也登绍兴初进士科时方多艰慷慨许国始为尉曹丞相吕忠穆公荐其有专对之才二年岁在壬子假礼部侍郎使不测之敌一时名公皆壮其行诗章甚衆今其存者四殿院刘公棐察院李公藹又李公愿马公永卿皆俊伟人也公既得要领以归和好随定授朝请郎尚书刑部郎中终焉公讳致尧其行也季氏宗丞公致祥字彦和奉其太夫人居四明余从妹适宗丞之子迂今其子佖楼出也携以求跋为道梗槩仍请道山诸贤各识姓名於别卷明日又书此於玉堂直舍俾佖袭藏之以为家宝云

跋李文敏公遗事

士大夫学为文章固足以为国之光华一临事变隳素守忘大节者多矣二凶变起仓猝文敏公廷叱之而夺其气事不难无以见君子宗社再安诚国有人哉

跋李山房与山谷帖

山房不以书名尝见行书不知草圣乃如此以是知前辈无不过人者所谓不有此舅安得此甥也

跋黄子耕定武修禊序

子耕明远以古帖相易不肯各有其宝余以淳化间本与此相似而流带右天尚全谓子耕曰天下有道丘不与易也明远姓单名丙父右选之有文者

跋郭适之集句梅雪诗

集句始於近世莫盛於半山而葛公亚卿继之後有作者鲜能及也吾乡郭君适之举业余暇为梅雪集絶句至六百余篇虽曰以诗为戏非博记详取未易为也然亦有择之未精者至下取鄙句何耶昔有刺字至半山之前自称集句诗人坐客骇然公寘之坐末问曰江州司马青衫湿何以为对应声曰梨园弟子白髮新公甚悦观此篇者其可轻视之耶

题专壑

半山诗云穰侯久擅关中政长恐诸侯客子来我亦暮年专一壑每逢车马辄惊猜盖引穰侯事而采庄子擅一壑之语也余起於告老之余叨尘枢近寓居乃得此胜处名以专壑客有言曰此真传舍子安得专余曰公退燕坐酌酒赋诗如在深山穷谷中援琴对之万壑同响则余实专之矣若自其变者观之则此身殆非吾有而况此乎客一笑因刻其语於崖下

跋韩忠武王词

近见费补之袞梁谿漫志绍兴间韩蕲王自枢密使就第放浪湖山匹马数童飘然意行一日至湖上遥望苏仲虎尚书宴客也王径造其席喜甚醉归翌日折简谢饷以羊羔且作二词手书以赠苏公緘藏之亲题其上云二阕三纸勿乱动淳熙丁未苏公之子壽甫山丞太府携以示蕲王长子庄敏公庄敏以示余字画殊倾欹然其词乃林下道人语庄敏云先人生长兵间不解书晚年乃稍稍能之耳嘉定改元庄敏公次子枢密副都承旨带御器械杖以二词石本见示益信梁谿之说但词中一二字不同耳昔人有竞病之诗及塞北烟尘之句虽皆可称殆未有超然物外如蕲王之旷达者也

跋韩庄敏公遗藁

钥顷在周行荷庄敏公与之进抵掌而谈世故慨然有许国之志观此奏藁盖事有至难而不敢辞身将就死而弗苟避母已老而不以告子在侧而不及知事定之後始出以示之忠孝大节可以概见勒石传远以昭前人之遗烈此孝子职也

跋桑泽卿兰亭博议

禊序之传歌诗序跋不知其几愈出愈新赞扬不尽泽卿又从而鸠集之後之作者殆未已也余复何言尝记本长老赴阙时过金山佛印见其朴野强使赋诗仍诵唐人以来佳句本忽使人代书云水里有块石石上有个寺千人万人题只是这个事印深服之余辄用其语曰定州有片石石上几行字千人万人题只是这个事可以发好事者一笑

跋黄知命帖

山谷真蹟中更禁絶重以兵毁销烁而四方得之者甚衆则知此老所书未易以千亿计知命但传诗篇今始见此帖於子耕许风度大似伯氏所谓一不为少者尚可想见白衫骑驴摇头而歌之时山谷以名太高一世忧患卒以谪死知命虽以黻废优游终老殆伏波家之少游耶

跋蒋亢宗所藏钱松窗诗帖

钥汪出生长外门幼时见故大参钱公为贰车公壮年风流醞藉喜与士夫游与外祖尤厚吾乡旧有五老会宗正少卿王公珩朝议蒋公璿郎中顾公文衡州薛公朋龟太府少卿汪公思温外祖也皆太学旧人宦游略相上下归老於乡俱年七十余最为盛事礼部侍郎高公阅起居舍人吴公东信皆自以後辈不敢预王薛二公下世参政王公次翁致仕寓居嘉慕义风始议为八老会朝议徐公彦老布衣陈公先而後至顾蒋汪公参政泊高吴二公继之然已不及前日之纯全矣大参政诗中所谓八僊人者此也蒋公园中素有集春堂海棠尤多即大参所赋也後使淮上犹与蒋公通问今左相当轴与大父相望於四十年间蒋公曾孙亢宗装池诗帖欲以献光范门下求跋其後大参素博学好诗文词翰俱胜不待赞叹又见前辈宦游其待寓公如此之厚也

跋先太师与张检详帖

先君太师隆兴初元监进奏院检详张公为寮俱未有廨宇同处直舍情好日隆未几先君易诸军粮料院张公擢监察御史会有旨荐郡守遂荐先君其词曰御下以严处事以静严而知恤静而能办识者以为曲尽先君寻以军器监丞兼工部郎因此得守古括公迁检详已而归婺源奉祠先君两致专书前緘衔位钥代书之今四十年矣公之子星子令南金以墨蹟远寄又以二书为碑本见遗仍求真蹟感叹追慕衰泪横集谨书其後而归之先君一意郡事书尺尽付钥辈此皆亲笔尤见交情之笃馈遗止此又以见前良相予物薄而情厚也

跋陈君彦直楚芎图

小子何莫学夫诗多识於草木之名离骚具载香草多湘楚间所产陈君笃好之图形作赞而阙所不知者四以是知诗人亦不能尽见痛饮读之取其大指而已陈君所记亦有与余所闻不同者人言木兰即木笔虽别有辛夷之名未知孰是而颇有证焉半山有篱落黄花满地金

之句欧公云菊无落英半山云欧九不曾读离骚公笑曰乃介甫不曾读耳竟无辨之者余尝得其说不惟悟欧公之意骚之旨亦明灵均自以为与怀王不能复合矣每切切致此意木兰仰生而欲饮其坠露菊花不谢而欲餐其落英有此理乎正如薜荔在陆而欲采於水中芙蓉在水而欲攀於木末皆此意也又尝於兰有感焉凡花之生深林者皆能不以无人而不芳然古人必以称兰者非兰不足以当此正如疎影暗香他花亦有之惟梅可以语此耳有若无实若虚犯而不校初止言昔者吾友尝从事於斯而後世以为顔子不疑又此意也余老矣本终身山泽间牵挽至此日堕胶扰中一见楚芰卷轴虽未及见陈君已觉鄙吝意消又知为同年雍甫之季也纵笔及此俟来过我相与一笑

跋余姚县陈山寺碑

五代史载耶律德光问冯道曰天下百姓如何救得道曰此时佛出救不得惟皇帝救得虽俳语人谓契丹不夷灭中国之人赖道一言之善也五季历五十余年四方云扰惟两浙境内不知兵革但知钱武肃王象世奉佛崇饰塔庙不知一方生灵佛力所不及者钱王实为之陰功至普於今庆裔縣远为本朝勲閥之冠姚江陈山一碑具言建立本末主僧妙珣欲持谒丞相於丹丘仍携忠懿王制书求跋遂书於卷尾

跋旧答李希岳启

少尝问从兄编修景山老杜韩柳洎本朝欧苏半山山谷诸公晚而诗文益高何耶兄曰文章精神之发也学问既充精神有养故老而曰进余尝佩服斯言数年前余方投闲李希岳惠以骈俪之文尝手报之复以来示又出大篇笔力愈进余退视旧作自觉只在故处为书卷尾以志吾之媿尚勉希岳之进也

跋王额之所藏赵忠定公帖

绍熙之末丞相赵忠定公方在西府慨然欲收召天下故老之有清德雅望者聚之朝时太府卿王公正已吏部郎中丰公谊诸人皆其选也以年高退处於家皆欲尽起之庶几大老归明年忠定当国王公时已休官丰公先至适以繁言而去此事遂已尔後事愈多变而诸老亦尽矣可胜叹哉大卿钥姑之夫也从其孙额之见忠定旧书读之使人流涕尚宝藏之使後来知前辈相与之意非有私於故旧也

跋王岐公端午帖子

嘉定二年大宗正丞兼权吏部郎王君以曾祖岐公端午帖子并和范蜀公诗一轴示钥且求跋钥曰华阳集一百卷可谓多矣然岐公在翰苑几二十年著述殆不止此尝问公之孙大监云不惟有所遗逸如资治通监序韩魏公神道碑皆曰御制不敢编入家集中钥谨考此轴所书太皇太后慈圣光献也皇太后宣仁圣烈也皇后钦圣宪肃也时熙宁三年裕陵之盛际也後一诗集中诗题有云兼呈司马君实内翰又自注云自太平兴国以来四世凡十榜登科又

云予与景仁君实有子登第公长子仲修蜀公之子百揆俱在叶公祖洽榜第四甲温公之子康中明经一甲亦在是年集中诗与子皆同惟鸣凤作雏凤云

跋周侍郎聿三帖

钥衰族本出东阳枢密通谱为伯父行使关陕时声绩甚着侍郎周公书中云枢密於凤翔长安西六程极川心凡事皆平和无间言而陰能消诸公自恣之心极不易周公古君子言又出於无心则当时使事可见李世辅後名显忠意随枢密以归张中孚亦关中之杰黠周公推诚待之是时士夫多出入兵间以济国事可仰也

跋章达之所藏唐石淙诗序

同知枢密院章公示以故碑二册其一则夏日游石淙诗序日□制□音圣盖则天所作也有云爰有石淙者即平乐涧也则天赋七言太子显则中宗也相王旦则睿宗也武三思狄仁杰李峤苏味道姚元崇阎朝隐崔融薛曜徐彦伯杨敬述於季子沈佺期各称其官诗皆七言侍游应制亦有姓名残缺者後云大周久视元年左奉宸大夫薛曜奉敕书其一秋日宴石淙序序中言若三阳石淙亦曜书曜乃稷之兄字画劲正实相似云退而详考之唐史则天圣历三年造三阳宫于嵩山夏四月幸三阳宫五月改年久视七月至自三阳宫唐会要久视元年七月三日右补阙张说以车驾在三阳宫不时还都上疏有云三阳宫至洛城百六十里有伊水之隔崿坂之峻奈何去宗庙之上都安山谷之僻处正其地与时也春明宋次道敏求作河南志登封县三阳宫武后圣历三年造有含枢殿长安四年毁之其城曰石淙即平乐涧也或谓石淙即晋石崇之金谷考之殆不然太平寰宇记及河南志皆云金谷在河南县此石淙在登封县淙与崇字又不同以此知其非也武后传言则天作十有二文此碑多用之亦有字画不同者又知□之为月□之为圣圀之为国全之为人等不能悉书亦可补史之阙文也

跋赵明可家藏三物记

金蚕为墟墓中物无疑尝见虞世南家墓历古多族葬记一墓域有数十冢在某州县又记松柏若干株石羊石虎石沙门等若干又云金蚕若干蚕乃墓中物不知何以知其数殆不可晓汉鐙制亦甚巧上翻其半可焚膏油置蜡炬亦可收灯炮古人制器不苟如此葛文康公鲁卿少仕于兖有手板裁香楷之句此简真阙里物又传于唐初信可宝也故家遗物传数世者盖鲜明可既藏此三者及其宰县适有龙牙之异亦一奇事也

又信岐二王传

开禧元年钥方闲居书信王岐王二传其六世孙汝述既登之石至嘉定二年秋汝述归自庆元县更求跋语并叙家世岐王之子安康郡王士说尝使敌营随二圣北狩不胜忠愤骂敌而自沈于黄河金人服其义葬之河于是生银青公不柔银青生岳州善待字时举久寓吾乡又与钥同为隆兴元年进士杜门罕出教其四子甚严各设几案正坐其中自为指授後汝述汝

達汝遇汝适俱踵世科十余年间皆改京秩其兴未艾信岐二王之贤德安康之忠节岳州之义方是宜有後哉

跋张正字庄子讲义

景德三年敕庄周立言理归於冲寞郭象为注义造於渊微自庄子之书盛行於晋而清谈名理莫不以象为称首其序首曰庄子者可谓知本也矣庄子固为知本而象所谓本恐非庄子之本也南郭子綦隐几而坐仰天而嘘嗒焉似丧其耦顔成子游曰今之隐几非昔之隐几者此庄生之妙旨而象乃曰子游尝见隐几者而未有若子綦也呜呼谓之知庄子可乎自兹以後无能真知者惟王荆公之论苏文忠之记超乎先儒之表得庄子之本心而荆公专以未篇天下为言盖其首论六经之道既而曰後世之学者不幸不见天地之纯古人之大体百家往而不返必不合矣而後列诸家于後以老聃为博大真人又自称其道术然而皆在百家之科不敢上与六经比此实蒙庄语也太史公先黄老而後六经六家要旨以儒为宗顾安知此乎余虽服膺二公之言窃以为前此未有发此秘者而又自知学力浅短不敢轻议嘉定改元始识西蜀张君于朝行闻其耽玩此书且有所着深藏若虚似不能言一日旅进送客而独留之始敏其说惠然以其书示余始得以尽见所蘊因相与商榷之其言浩博未易究陈大率探庄生之深旨得二公之遗意凡世人真以为荒唐谬悠者皆推引以通乎六经之意虽未敢以为尽得其说而与世儒之说不侔矣方欲时奉从容以求发明之益倏然去国留之不可欲得一言以为别余老矣何能坐进君方以才名入道山册府澹然不见其喜及其去也亦无几微见於顔面则其所得所养可知矣万里相望余将再挂衣冠归老田里无复再见之日君其勉旃进进不已尚可以寄我也君名兴祖广汉人也

攻媿集卷七十五

<集部,别集类,南宋建炎至德佑,攻媿集>

卷七十六

钦定四库全书

攻媿集卷七十六

宋 楼钥 撰

题跋

跋史太师答范参政荐崔宫教帖

太师魏郡王闻人一善则志之随时荐用不遗余力此其真帖盛大且有後荐贤之福也乾道间丞相魏文节公守吴门魏惠宪王镇宣城过郡宫教为教官作乐语有云天上风姿咸仰吾君之子人间官品休论异姓之王丞相极称之以是知大参范公不苟於荐士太师谓之二难是矣紫微先生举钥自代遂出门下宫教之丧紫微哭之甚哀人琴俱亡未几亦下世矣紫微兼内外制文擅一时宫教之文人鲜知者故表其警联可以知鼎味云

跋赵忠定公家书

丞相忠定公魁多士登馆殿侍经帷帅全蜀知贡举皆本朝天族之所未有受知孝宗擢登从列又留以遗光宗两朝眷渥特真枢府引故实力辞至於五六重以御史之有言又列高宗圣训以为据而诏旨弗俞寻知枢密院事绍熙五年七月甲子既成翊戴之功拜右丞相翰林学士李公巘所草麻制已行三命而倭终遂牢辞改枢密使至八月二十八日钥时以西掖直学士院主上犹在北内忽蒙宣押御笔留某以少师观文殿大学士判建康府赵某宗姓之贤伟然忠实太上体壽皇图任之意擢贰机衡肆朕继承厥功为大俾居宰路控避莫回殊拂眷怀尤辜輿望朕惟不胶者卓维时之宜今政令未孚水旱间作得一贤佐度越拘挛万几实繁其遂我相可除右丞相词臣苟得君上一言敢不具载况承宸翰详密如此何敢不以屡书并草两麻丞相制有云壽皇咨其切直屡敷心腹之言太上察其笃诚径委股肱之寄擢居宥府密赞筹帷逮予有兴厥功尤大又云亟颁诏綍俾践台甫何循墙之过勤致反汗而中止既辜輿望殊拂眷怀又云矧今政令之未孚复多水旱之间作是图贤佐以赞繁机越彼拘挛不胶者卓矣置於左右亦职有利哉非为朕私其遂我相盖具载上语也比岁不知者以钥为褒称太过谨不敢辩云汉之章至今宝藏然则丞相之进用本末大略可考矣公之长子太府寺丞以家问示钥敢详书之若其戒从子初仕数端真可以为世范云

跋白乐天集目录

香山居士之诗爱之者衆亦有轻之者山谷由贬所寄十小诗如老色日上面欢情日去心今既不如昔後当不如今又轻纱一幅巾短簪六尺牀无客日自静有风终夕凉妙絶一时皆香

山诗中句也周公恐惧流言日王莽谦恭下士时若使当时身便死一生真伪有谁知今在王文公集中不知亦香山诗也此特其佳句尔其间安时处顺造理齐物履忧患婴疾苦而其词意愈益平澹旷达有古人所不易到後來不可及者未容悉数琴诗亦多有曰自弹不及听人弹又曰近来渐喜无人听琴意高低心自知皆有自得难言之秘道德二经世所尊尚读老子诗云言者不知知者默此语吾闻於老君若道老君是知者缘何自着五千文其所见超诣如此留侯之在汉无敢訾之者四皓庙诗云子房得沛公自谓相遇迟终杂霸者道徒称帝者师子房尔则能此非吾所宜立论至此尤为高胜而可轻之乎余平日佩服其妙处手编目录寄吴门使君李公谏议并以所闻录寄之李德邵璜有白氏年谱尚当访求以成此书云

跋戴式之诗卷

唐人以诗名家者衆近时文人多而诗人少文犹可以发身诗虽甚工反为屠龙之技故好之者寡黄岩戴君栋字敏才独能以诗自适终穷而不悔号东臯叟不肯作举子业且死一子方在襁褓中语亲友曰吾之病病矣而子甚幼诗遂无传乎为之太息语不及他与世异好如此子既长名曰复古字式之或告以遗言深切痛之读书绩文而尤笃意於古律雪巢林景思竹隐徐渊子皆丹丘名士既从之游又登三山陆放翁之门而诗益进一日携大编访余求一语余於诗虽知好之而不能工老益废忘无以答其意夫诗能穷人或谓惟穷然後工笠泽称玉谿生是已笑语之曰子惟能固穷则诗愈高矣余之言顾何足为轩輊耶

跋汪季路所藏书帖

唐僖宗赐僖实敕书

唐末敕书读之使人凄惻时多工於书仓猝中犹尔可观文安王君世臣跋语颇详谓袁氏本得之古墓中疑即僖实之墓又言徧閱唐史及编年通载不着僖实姓氏盖偏裨也余观勅书委谕详密必非施於偏裨者治平中张唐英次功自号黄松子着外史檣机十卷载前後蜀事王建永平四年书张琳始未有云大顺初僖实为黔南节度辟为推官僖字惟集韵与喜同他未之见邓校书名世古今姓氏书辩证正引檣机之说且曰姓书未有此氏今增入乃知姓僖而名实也书後止书十五日尚不书月王君遽以为中和年者以书中言越在巴蜀又有虽元恶未就诛擒凶党并皆逃窜及已收宫阙之言盖僖宗乾符二年乙未黄巢大盗始起至广平元年庚子遂入长安帝幸兴元次年改元中和遂幸蜀三年癸卯李克用以四月平京师巢遁去所谓元恶未诛已收宫阙殆斯时也四年夏巢既诛乙巳岁三月始还京师改元光启是在蜀凡五年若大顺乃昭宗之次年庚戌欲以此为昭宗之敕则昭宗虽尝播越幸石门幸华州幸凤翔其在凤翔诏谋幸蜀王建迎驾而不果是为僖宗中和之敕无疑岂中和间僖实已为黔南节度至大顺初始辟张琳耶其详不可得而知仅得二书知其姓名他书未必无之顾浅陋老懒未能详考尚有待於博洽之士王君偶未考檣机又惜邓校书之不及见此书也

东坡啸轩诗

易晋卦之九四晋如鼫鼠虽近代大儒皆以为贪而畏人之鼠然诗之硕鼠从页石声大也故曰若大鼠也易之鼫鼠从鼠石声陆德明释文音石五技鼠也引本草蝼蛄一名鼫鼠始深疑之考许叔重说文解字注云五技鼠也能飞不能过屋能缘不能穷木能游不能度谷能穴不能掩身能走不能先人是真蝼蛄也荀子所谓梧鼠五技而穷杨倞所注乃出於叔重唐本又曰六技鼠也下又有云能歌不能成曲成曲一作度曲余尝试其五技皆然土中百虫多能以穴掩身惟此物於浅土穿穴人或取於路旁处必得之暑月雨後土中有声若长哦者俗谓蚯蚓唱歌余既得六技之说尝於夏夜倾听久之篝火发土果蝼蛄也坡翁词翰不待赞叹啸轩诗云食土蚓无肠亦作终夕叫似亦未知为蝼蛄而徇俗耶弥明石鼎联句云时於蚯蚓窍微作苍蝇声亦误矣

付官奴乐毅论

余见此刻多矣未有如此之精明者半山集中有江邻几邀观三馆书画诗或云梅圣俞作有云羲献墨迹十一卷水玉作轴排疏疏最奇小楷乐毅论永和题尾付官奴岂承平时此论犹有真蹟耶

淳化本修禊序

余尝蓄一二禊序近岁得毕少董所藏参龙董氏淳化中本最胜少董跋其後甚详自言董氏有三百本取其尤者三此又其最佳者後多名士题跋而田君秀实大篇亦以此为三本中第一故尤宝之与此本无一毫之差而此长半寸许当是装潢者用刷太重遂引而伸之尔

邵康节观物篇

易之传尚矣至本朝而後有先天後天之说戴九履一左三右七二四为肩六八为足坎以一居北坤以二居西南震以三居东巽以四居东南乾以六居西北兑以七居西艮以八居东北离以九居南故说卦云帝出乎震齐乎巽相见乎离致役乎坤说言乎兑战乎乾劳乎坎成言乎艮此後天之说文王之易也乾一兑二离三震四巽五坎六艮七坤八乾自南而左巽自西南而右故说卦云天地定位山泽通气雷风相薄水火不相射盖乾上而坤下离左而坎右震东北而巽西南兑东南而艮西北二卦各各相对此先天之说伏羲之易也先儒以此二者为先天後天之辨窃尝考之说卦惟帝出乎震之序合於今人之说其余如所谓雷以动之风以散之雨以润之日以暄之艮以止之兑以说之乾以君之坤以藏之曰乾健也坤顺也震动也巽入也坎陷也离丽也艮止也兑说也曰乾为马坤为牛震为龙巽为鸡坎为豕离为雉艮为狗兑为羊曰乾为首坤为腹震为足巽为股坎为耳离为目艮为手兑为口又乾称父坤称母震巽为长男长女坎离为中艮兑为少又乾为天坤为地震为雷巽为风坎为水离为火艮为山兑为泽终说卦之篇皆先天之说也顾未详考尔先天千载絶学麻衣得之传於希夷累传至康节而後盛行然余始在永嘉得先天方圆二图於薛象先叔似传皇极经世之书於王木叔桷而不见其全後丞外府蜀士吕泽甫凝之以閩州奏事进经世之说阜陵大喜其书留为太府丞同官为寮始得蜀本全帙因得叩其一二後有观物篇隔眼大书云出康节亲笔今见

此卷悚然起敬始知板本失真为多然犹恨不见其全也二图探索无穷康节之学虽不易窥测要皆不出於此系辞所谓太极生两仪两仪生四象四象生八卦明道先生所谓加一倍法尽在是矣使伏羲文王周公孔子复生不能加损毫末於此不如是何以顺性命之理通幽明之德类万物之情哉熟复叹仰以还罄其謏闻书之以俟知者

温公奏稿

平章军国重事止预大事十二条见申国春秋所以尊尚元老也近岁窃平章之名而不加重字岂其力不足以得此哉欲尽总衆职以盗大权尔彼亦不足以知此盖有教之者呜呼非文潞公吕正献岂可当此位耶

欧公与刘原甫帖

公是先生望隆一时而不容於朝出知扬州欧阳公所为赋平山堂之词也移知青州公是作董仲舒诗云江都才子又胶西扰扰诸侯等弃之为问公孙丞相道不知东阁欲宾谁後又帅长安久之作班超诗云班超投笔起行间傳郑甘陈不足攀何事眼昏头髮白却思生入玉门关二诗不无少望矣欧公与之至厚西斋盖平时羣贤聚会之地欧公至今有西斋帖然终不能挽之还朝岂非命耶

韩魏公与欧公帖

欧公尝曰累百欧阳其何敢望他韩公今观此帖魏王之推尊欧公又如此更相钦服宜乎同心辅政以致庆历之盛翰墨又其余事也

东坡与秦太虚帖

坡公爱淮海如子弟喜黄冈如乡曲殆前缘耶

跋黄子迈所藏山谷乙酉家乘

顷岁见张志溥庇家藏山谷杂记一小卷谛玩不已因略效其笔意手录之兹见子迈所临乙酉家乘典刑具存为录杂记於卷末而归之呜呼建中靖国以至崇宁元佑诸公多已南归而先生乃以承天塔记更斥宜人谁能堪之先生方翛然自适观所记日用事岂复有迁谪之叹所谓青山白云江湖之水湛然寧复有不足者家乘止四年八月二十八日而先生卒於季秋之晦相去才月余耳三山陆待制务观尝言先生临终时暑中得雨伸足檐外沾湿清凉欣然自以为平日未有此快死生之际乃如此世言范寥信中访先生於宜此书信然

跋朱晦庵书中庸

乾道末年余客授东嘉贰卿曾公以吏部郎出守尝侍坐论训诂音韵数端公皆以为然余因曰此皆学者之细也公正色曰不然中庸所谓博学之审问之慎思之明辨之力行之五者不可阙一兹非所谓博学者乎余为之悚然公乃文清公之次子文清及见元城龟山诸公家学有自来矣中庸之言昭如日星晦庵先生书此以告学者而又曰不可以偏有所缓至哉言乎学者试思之缓其一则必有所蔽而况以力行为可废乎戒之哉

跋费校书【肃】被召省劄【与陈简斋同被召不出】

费校书之不赴特召窃闻之是时人情事力尚可为恢复计遽以和议自屈忠义之士皆惜此机力既不可以回因遂肥遯以求其志不知者谓其为高而已

跋胡澹庵和学官八诗

澹庵先生以一书触秦氏窜昭州诸贤救之高宗谅其忠再徙为威武签幕羣儉承一时风旨相与挤之而又下石焉乃始远置新州又复移吉阳盖秦氏必欲致之死地也先生处之泰然虽遭摧辱略不为屈益穷经学又以昌其诗绍兴更化始得北还孝宗初政擢吏部郎隆兴改元钥就试南省先生以秘书少监为参详官钥策卷误犯泰陵旧讳知举内相洪公方欲为之奏闻先生赞其决遂叨末第盖优恩也於是始得拜先生下风长身霜鬣神采昭映恭谦磬折音吐洪畅略不见久居岭海烟瘴之状衣冠甚伟如见古人时以短笺投谢坐主或报或不报惟先生报章甚宠以钥多用讳事遂引衅夏滕文等数十条为言尤切感服宝藏又已载於先生集中今见学省八诗盖摄祭酒时也前辈固多唱酬未闻大篇而人人报之愈出而愈奇最後樊武谕以其右科魁选再登进士第先生首言舞阳次及魁纪皆樊氏之先一武一文益见其工是时年逾六十思若涌泉笔力愈劲英特之气至今凛然周益公为隧碑言先生刻意诗骚後生投贄率次韵以酬多至百韵数十篇然则此八诗犹先生之细也钥顷既登门又辱许从其长子季永游虽恨其早没而仲子季解及季永二子伯圜仲方俱以才业自奋今为湖南宪江西漕枢密院编修遂践世官皆相与良厚又在中书尝预试仲方二子燿燿童子科钥年七十有四求归未得於先生之门遂识四世抑以知澹庵之德泽为朱艾也谨并书於卷尾云

跋郑德輿历代蒙求

蒙求始於李氏後有作者终不及之盖自王戎裴楷鸣鹤士龙之类多取其一事而成对如忌鵬畏牺人多知其事而鲜知畏忌二字出於班孟坚幽通赋中蜡屐好财似若不类而事则相关秉烛不谐尤非切对则以事意相似屡见和韵有句赅者亦有广编十七史或专用小说及本朝故事左传西汉或道家之书意亦勤矣终不及李氏之盛行同年郑君德輿老不废书用李氏之体备述历代由伏羲以至大宋事不求对句以四言童子易於诵习千古大槩如指诸掌德輿别有着述此特其一尔然比之衆作其殆最优乎其子洽湑镌板以传为书其後且将使诸孙诵之

跋黄长睿东观余论

云林子妙於考古是书久行於世余尤所笃好惜其讹舛尚多每欲手写以传好事者未暇也着作庄子礼欲得善本传後再为详校而寄之王顺伯厚之尝言本朝始自欧阳公集古录千卷赵德甫金石录至二千卷考订甚工然犹未免差误惟云林之书为尽善顺伯蓄古刻最富论议不苟余观此书辨析隐奥上下千古皆前贤所未发後人所难及修撰刘公焘紫微董公道皆鸿博之士与之言自以为不及也以云林之美才又仕於洛多见故家名帖及居馆阁尽见太清楼所藏异书时方承平鼎彝古器具见制作欵识之旧尝自言曰考校往古事迹先须熟读强记遇事加之精审决无疎略又谓欧公考校非所长则此书宜无毫髮之恨及细读之尚有疑焉如米襄阳疑李斯书谓不知何人书云林则曰乃李阳冰篆明州刺史裴公纪德碣中字可谓精确矣然谓史籀书扬州 易□系能辨其字殊无三代体与其辞皆唐人笔顾不知正以纪德碣额缩而小之既全取□州 三字又移明为易□系皆取其半□乃碧落碑中唐字阳冰素好碧落碑故用其字云林误以为扬殆未之考也王大令静息帖礬石事异苑谓曹公同王粲见此而云林谓刘表在荆州时未知何据题河南王氏所藏子敬帖云太极璇题犹重书自注云谓不书太极殿榜然璇诗所谓璇题纳行月者乃谓以玉饰椽头如孟子之言棖题非题扁之题也王世将表云顿乏勿勿云林引顏氏家训云世中书翰多称勿勿又引杜牧之诗浮生长勿勿谓古人诗中用之不特称於书翰顏之推在牧之数十年前似难以此诗为证跋右军甘蔗帖云?似竹於文从焉此帖以之俗从草非是按说文解字蔗从草在草部不得为非是以是益知考古着书之不易云云林壽止四十而精博如是余年七十有四闻见寡陋心顾好之不自知其可笑也鍾王以来多以意行笔云林耽玩古帖与之俱化如隱之为隱最之为?之类尚衆此既为小学而作亦略为正其点画不敢自为详尽更俟博雅君子相与正之

跋扬州伯父耕织图

周家以农事开基生民之尊祖思文之配天后稷以来世守其业公刘之厚於民太王之于疆于理以致文武成康之盛周公无逸之书切切然欲君子知稼穡之艰难至七月之陈王业则又首言授衣与夫无衣无褐何以卒岁条桑载绩又兼女工而言之是知农桑为天下之本孟子备陈王道之始由於黎民不饥不寒而百亩之田墙下之桑言之至於再三而天子三推皇后亲蚕遂为万世法高宗皇帝身济大业绍开中兴出入兵闲勤劳百为栉风沐雨备知民瘼尤以百姓之心为心未遑他务下重农之诏躬耕藉之勤伯父时为临安於潜令笃意民事慨念农夫蚕妇之作苦究访始末为耕织二图耕自浸种以至入仓凡二十一事织自浴蚕以至剪帛凡二十四事事为之图系以五言诗一章章八句农桑之务曲尽情状虽四方习俗间有不同其大略不外於此见者固已韪之未几朝廷遣使循行郡邑以课最闻寻又有近臣之荐赐对之日遂以进呈即蒙玉音嘉獎宣示後宫书姓名屏间初除行在审计司後历广闽舶使漕湖北湖南淮东摄长沙帅维扬麾节十有余载所至多着声绩实基於此晚而退闲斥俸余以为义庄宗党被赐者近五纪则其居官时惠利之及民者多矣孙洪深等虑其久而湮没欲以诗刊诸石钥为之书丹庶以传永久云呜呼士大夫饱食煖衣犹有不知耕织者而况万乘主乎累朝仁厚抚民最深恐亦未必尽知幽隱此图此诗诚为有补於世夫沾体涂足农之劳至矣而粟不饱其腹蚕繰织紵女之劳至矣而衣不蔽其身使尽如二图之详劳非敢憚又必无兵革力役以夺其时无污吏暴胥以肆其毒人事既尽而天时不可必旱潦螟螣既有以害

吾之农夫桑遭雨而叶不可食蚕有变而坏於垂成此实斯民之困苦上之人尤不可以不知此又图之所不能述也伯父讳从玉从壽字壽玉一字国器官至朝议大夫

跋先大父嵩岳图

嵩高维岳峻极于天巍然居四岳之中盖天下之絶境也大父为登封宰家间旧有嵩山图丹青故暗扬州伯父设於云岫堂屏间而书大父二十四峯诗于左右钥幼时犹及诵之先是建炎中四明遭兵毁最酷诸父仅得生全故庐焚荡一物不遗亦不知尝刻之石也嘉定三年钥叨居政地乡人张致远翼仕京西一日得书谓北客有以杂碑至榷場贸易忽见嵩山图碑下有序文及诗知其为大父遗蹟远以见寄如获拱璧真我家旧物也惜其岁久细字欲漫乃敬书之移於乐石于是钥年七十有四矣不能更作注字使第三子治书之碑不载岁月知县伯父生于元符二年小名曰嵩家藏诗序书元符庚辰大父又於少室山達磨面壁处作庵其上后山先生陈无已为记今在集中云建中靖国元年则辛巳岁也县潜书潜即参寥子以二者考之在县首尾凡三年大父字试可参寥集中多有唱和如登嵩山絶顶等诗大父遗文顾无传焉三十六峯赋亦不知何在故此碑尤当宝之呜呼大父薨於宣和五年甲辰後十四年是为绍兴七年丁巳而钥始生既不获逮事而登封旧治失守不能复故北望慨然何能自己大父登元丰八年乙科文气政术过人远甚读此碑者可以想见大概受知佑陵官至徽猷阁直学士尝守乡郡再任涉五载其详见於神道碑铭中後诸父累赠至少师钥始追赠太师齐国公云

攻媿集卷七十六

卷七十七

钦定四库全书

攻媿集卷七十七

宋 楼钥 撰

题跋

跋春秋繁露

繁露一书凡得四本皆有高祖正议先生序文始得写本於里中亟传而读之舛误至多恨无他本可校已而得京师印本以为必佳而相去殊不远又窃疑竹林玉杯等名与其书不相关後见尚书程公跋语亦以篇名为疑又以通典太平御览太平寰宇记所引繁露之书今书皆无之遂以为非董氏本书且以其名谓必类小说家後自为一编记杂事名演繁露行於世开禧三年今编修胡君仲方榘宰萍乡得罗氏兰堂本刻之县庠考证颇备凡程公所引三书之言皆在书中则知程公所见者未广遂谓为小说者非也然止於三十七篇终不合崇文总目及欧阳文忠公所藏八十二篇之数余老矣犹欲得一善本闻婺女潘同年叔度景宪多收异书属其子弟访之始得此本果有八十二篇是萍乡本犹未尽其半也喜不可言以校印本各取所长悉加改定义通者两存之转写相讹又古语亦有不可强通者春秋会解一书【是书未详孰撰考晁公武读书志有皇佑间进士杜谔集繁露诸书断以己意名春秋会义】仲方摭其引繁露十三条今皆具在余又据说文解字王字下引董仲舒曰古之造文者三画而连其中谓之王三者天地人也而参通之者王也许叔重在後汉和帝时今所引在王道通三第四十四篇中其余传中对越三仁之问朝廷有大议使使者及廷尉张汤就其家问之求雨闭诸阳纵诸陰其止雨反是三策中言天之仁爱人君天道之大者在陰阳阳为德陰为刑故王者任德教而不任刑之类今皆在其书中则其为仲舒所着无疑且其文词亦非後世所能到也左氏传犹未行於世仲舒之言春秋多用公羊之说呜呼汉承秦敝旁求儒雅士以经学专门者甚衆独仲舒以纯儒称人但见其潜心大业非礼不行对策为古今第一余窃谓惟仁人之对曰仁人者正其谊不谋其利明其道不计其功又有言曰不由其道而胜不如由其道而败此类非一是皆真得吾夫子之心法盖深於春秋者也自扬子云犹有愧於斯况其他乎其得此意之纯者在近世惟范太史唐监为庶几焉褒贬评论惟是之从不以成败为轻重也潘氏本楚庄王篇为第一他本皆无之前後增多凡四十二篇而三篇阙焉惟玉杯竹林二篇之名未有以订之更俟来哲仲方得此尤以为前所未见相与校讐将寄江右漕台长兄秘阁公刻之而谓余记其後

跋宋宣献公书李公垂诗编

李公垂诗编自号追昔游宋宣献公手书之可谓两绝乾道七年尝宿剡川之龙宫寺见李公

诗碑今在编中而有阙文亟为求石刻於寺补百余言宣献字画精妙而参以恶札如砢砢列於璠璣中益叹前辈之难及也宣献父名臯不惟於本字缺笔高字亦去其口尤见真迹不疑如此等书皆亲自传录春明三世以博洽称有以也夫公垂短小精悍才气絶人其自言治行之伟如此人品真可与文饶相上下惜乎二公德度如此恩讎太明以此得名位亦以此掇祸大雅曰君子实维秉心无竞谁生厉阶至今为梗诗人之意谓厉阶之生由夫好竞者为之也牛李二党更相摩轧数十年而唐益以衰可不戒哉

跋周氏棣华编

欧阳公於燕兄弟之诗发不如友生之义高矣此诗方以兄弟为急而毛郑二氏失其本义得公之言诗意始明而未章犹未甚详深哉诗人之旨也俟尔笱豆饮食之饫特一时之适耳使兄弟既具而无他则和乐至於且孺犹孺慕之孺此真情也妻子人合也苟能好合犹如琴瑟兄弟天伦也如其既翕而无间则其乐至於且湛犹湛酒之湛其乐尤深矣故又曰如此则可以宜尔室家乐尔妻孥所谓人不间於昆弟之言而家肥矣是究是图亶其然乎而後篇终兄弟之道无余蘊矣前岁武宁周氏昆仲俱自上庠来见以棣华集求诗许之已久今其季又至且流涕曰始与吾兄同致此悬不幸兄亡矣愿终惠之兄弟无故天下之乐事也余伯仲九人仅存其四备尝手足之痛为之感叹不足并书古诗之义以遗之因以勉其後人毋隳此意以保其家周氏其有兴乎

跋林氏所藏赵清献公父子诗

清献公以元丰二年春加太子少保致仕明年次子景仁倅永嘉从公游天台雁荡吴越间荣之至今廨宇有戏彩堂犹以为盛事萱堂林先生隐居乐道与公父子游顷岁客授之初登堂慕想尝录三人唱和之篇兹从萱堂之元孙晋获见真蹟以神道碑考之正三年庚申岁也清献父子定交寒士萱堂以布衣与大臣为寮友高风凜然俱可敬而仰哉

跋八阵图

八阵自桓温一言之後无能究其说者乾道末年客授东嘉始闻其说於毘陵使君薛士隆而陈君又以薛氏所传握机及马隆赞示余於是始见武侯之遗意王清叔晓以要略建安蔡季通元定着论尤详嘉定三年编修胡仲方渠示余一篇盖其妇翁王景醇方帅夔门裒前後衆说寄仲方且俾访求遗逸余遂取所藏薛陈王蔡四家之书悉以授之将以复寄夔帅并刻焉武侯之阵原於先天六十四卦之方图而其实则井田之遗法也文中子以不井田为苟道且曰诸葛亮不死礼乐其有兴乎盖以深知井田之制也毘陵尝问余曰一部周礼兵制何在对曰在夏官曰此但畋猎閱习坐作进退之说且非兵制也对曰寓兵於农比閭族党为伍为什即其制也毘陵曰固然当知古人法制素明中外一致非如後世别有兵法八佾之舞六十四人即此法也祭祀燕飨犹以为用人人习熟公卿皆可为将帅用此道也法制既隳知兵者犹得遗意余因其言而考之韩信连百万之衆战必胜攻必取自谓多多益办者此也项羽败亡之後以二十八骑分四队而下尚能披靡汉军亦此也晋之马隆以一小将自荐武帝倾意用

之孤军深入略无後继音问既絶而捷奏忽闻则已斩树机能而平凉州矣史但言其用偏箱车今乃知其深於八阵如此後之任将帅者可不知此哉

跋山谷奇崛帖

山谷草书钓鱼船上谢三郎之词後有云上蓝寺燕堂夜半鬼出助吾作字故尤奇崛吾侪生晚恨不识山谷上蓝何等鬼物乃得以夜半助奇崛之笔此鬼正自不凡

跋刘资政游县学留题

资政靖文刘公以大魁发身高宗擢至侍从贤德日着而不见赫赫之名盖其人深沉醇厚盛德若不足晚益受知於孝宗乾道五年起之闲废中先畀内祠兼侍读除礼部侍郎权尚书年高求退不至大用後以资政殿学士致其事名节始终与黄公中徐公嘉名位相似前则有王公十朋周公操陈公良翰此皆孝宗盛时尊老贵德之懿也龙游有石而鋭古记有之曰尖石圜出状元绍兴十有四年岁在甲子大水去其鋭次年乙丑公遂魁天下人皆以此为奇?而公处之泊然不有也钥生晚不及拜公亲闻介庵赵公少卿彦端云尝自以好论时事不知讳避时朝廷方经略中原日为恢复之计调兵造甲诸郡颇扰多指言其非是或潜於上曰陛下究心大举凡所图回但资赵彦端一笑尔赵颇闻之不胜恐惧且谓使汉武帝闻此诛灭何疑已而寂然久乃知刘公夜对上从容问曰闻卿监中有人笑朕所为者公初不知端倪徐对曰圣主所为人安敢笑若议论不同则恐有之上意顿解亦曰止是议论不同耳赵公闻此感不容言又叹仓猝中出言之尽善若止曰无之未必其可深悟圣意也帝前动笏移南山推此一端以见献纳之有益于国者多矣钥年十六时侍先太师仕柯山兄弟学於郡庠者二年颇闻乡之名公始末但闻公之为士固穷力学以致膴仕不知其他也钥四明汪出表弟之子之强力学决科作尉兹邑闻其居官殊有可纪校文漕台竣事来见曰县学大成殿建於至和二年颓圯已甚斋馆又甚焉幸士民之相安谋欲撤而新之翕然响应动有缗钱数千可以兴役此志甚嘉方勉使成之又曰闻刘公布衣时因乡饮酒礼之成尝书讲堂壁间以勉後学而壁坏不复存访其家得之求跋於钥取而读焉益知公之平素所以自勉所以教人之大方槩见於此矣其曰山川虽秀未足夸而师友之益为可恃旨哉斯言然则尖石之?岂足为公道是宜刻之坚珉以诏後来公以平日谦退故知之者寡此钥所以不能自己于言亦不嫌於太详也顷先公守括苍公之子之衡宰龙泉县有声後为御史台检法官今诸孙为守为倅公之余庆殆未艾也

跋袁光禄【穀】与东坡同官事迹

庆历诏郡国立学而置教官者才数处多延致乡里之有文学行谊者为之师我高祖正议先生教授四明前後三十余年一时名公皆在席下是时赴乡举者才百余人解额六人试于黉楼秋赋之年先生谓舒公亶袁公穀罗公适曰二三子学业既成不应有妨里人荐名于是舒试于乡袁试于开封罗试于丹丘三人皆在魁选实为一时之盛舒以舜琴歌南风袁以易更三圣赋名于时而袁之着述传于世者有韵类题选百卷後学赖之元佑五年倅杭州东坡为

郡守相得欢甚有迓新启事坡书龙泉何氏留槎阁记介亭唱和诗坡次韵二诗一谢芎椒一为除夜如别乘一来风月平分破之词最为脍炙正为公而作则其宾主之间风流可想而知也抑尝闻坡一日谓公曰素知博洽试徵轶事公一夕录数十百项坡曰可谓博矣又从而增之前辈之不倦于学如此尚书丰公稷亦正议之高弟志公之墓当崇宁中方讳言苏氏但言为守者至不言坡之姓字钥随侍括苍於郡斋见公作守时十诗石刻摹遗其家此外罕见公之遗文自少学赋最重韵类之书窃以为古今类书第一盖类书必须分门虽多出名公而事多重叠又必有杂门惟此书以韵别之读者随字径取一索而获每一目之下必有赋题故以题选为名况公编纂精确诸经注疏搜括无遗蜀有书林号为该博止取白氏六帖散于此书之间其实反成猥酿殊失本意世鲜知者公之五世孙燠录公与东坡同官事迹及丰公所为铭谓钥书于後因诵所闻并书之两家子弟衰门既幸未坠而公之後儒风有兴有孙字质甫好古笃学教子有闻于时觉名乡书燠以吏部知九江燠以特科为丞燠之子肃甫一孙字叔平又有名方亦以特科进其子洽与肃俱收世科其兴殆未艾也罗公亦为杭之贰车与坡同时有启云谈笑风云咳唾珠玉弟兄射策有机云慷慨之风父子谈经无畝向异同之论是故名动四海号称三苏亦为坡所深知意与公适相先後因附见云

书陈止斋所作张忠甫墓铭後

乾道七年客授东嘉获从一时贤士游忠甫居城南相见如平生欢学校中小有所闻必诘其始末而是正之略无隐情尝曰性直言愆执友或不能堪不意子之从我如流也钥曰朋友道丧已久劲语实所乐闻以此终三年往来如一日又自言旧与其友谢君黔讲易谓易与春秋未易窥测诗书执礼夫子雅言于是相与读书与诗仪礼虽非全书而礼节具在自古以为难读而公独熟复而躬履之貳卿曾公逮时以吏部典州取其所校定大字刻之实为善本尝问何以不仕曰今之仕皆非古之道是以虽贫而不愿禄也问其说曰始至则朝拜遇国忌则引緇黄而荐在天之灵皆古所无也其持论不回类此後十五年叨冒假守则公已亡又二十五年当嘉定四年凡始以志铭求书丹感念畴昔并书于後

跋唐林夫父子帖

唐质肃公盛名士大夫户知之少时见唐氏风宪记及东坡守杭州赠林夫诗又知有林夫之名郑君寅宰吉之太和今工部尚书汪季路其舅也以林夫尝自谏院谪五羊移监太和盐酒税遂取所藏林夫所书少陵剑器行哀江头二诗与家问等及其父翰林侍读学士彦猷二帖并使刻之县有林夫墨池山谷後为令尝为之赋诗则其工书可知父子笔墨相照映後来自知识别不待赞扬云季路好古有素郑宰实知枢密院惠叔之次子闻其博雅有能称必能访求遗迹以增益之

跋六逸图

孙登长啸 马融卧吹笛 陶潜漉酒巾边韶昼眠 阮孚蜡屐金貂换酒 毕卓瓮下雅放乐畅
達逸 苏子美书

顷在高炳如家见案上有六逸图意其为竹谿李白孔巢父诸贤閱之乃孙登马融陶潜边韶阮孚毕卓此卷絕似而有沧浪真蹟以六字目之尤为可宝余于此见渊明又在馆中见唐人为太白写照始知今世所画陶则状其远韵李则极其俊气殆出龙眠诸人意匠未必真也展玩未已童子忽曰岂针灸图耶坐客为之絕倒

跋吉日图

此图古矣意其出于唐人是时六经未版行本各不同故沧浪录旧文而以今本证之前有壮士驱羣丑而前以待王射得悉率左右以燕天子之意然御者当居中以执轡主将居左必择勇者为右此画御者或在左或在右殊未晓也

跋史文惠公帖

四明沈氏累世为儒钥幼年犹及识博罗公是生三子长字公权为乡人师表晚始得官太师史文惠王笃布衣之交荐之孝宗上殿改秩为绍兴签判次字高卿少负俊才绍兴十四年初开太学时侍郎高公为司业陈公少南为博士皆极天下选得高卿春秋卷寘之首选声名籍甚竟以恩科第一尉食祠禄以终签判有子曰焕官虽不達而有盛名尉有子燠力学未效家藏太师所作博罗挽诗及荐尉公于梁丞相帖足以见太师垂情寒士又以知尉之有以得此也前辈日远後来者可不勉绍遗风乎抚卷三叹谨书其後而归之

跋范丞相江西唱和诗卷

高平公相业之详见于王大参瞻叔所作行状公之第四子孝隆栋实为钥妻之姑之夫获闻公平生尤着初赴廷试京师人已传惟襄阳一范吴兴一刘直言时方佞谀成风人已想望风采暨牖传尽甲科不见二公姓名李丞相士美以考官侍立出班奏知徽宗亟命索此二卷进读嘉叹再三遂俱寘第二甲首公既得官时何丞相文缜方为内相往别之何公曰如公等人物岂应墮州县中公年始逾冠对曰偶叨名第且欲归山中读书未暇求进也何公尤加叹赏赠以诗曰汉廷初唱乙科时陞楯何知亦叹咨天子方将前席问将军焉用免冠为高风已侧谀臣目异日应伸壮士眉更向山中读书去功名如此不嫌迟然公竟自此横翔三十一岁为高宗朝名相兹得敬观诗篇遗墨敢识旧闻于後刘公名宁止云

跋米元晖着色春山

向芄林有题元晖横轴云早为山谷印可晚陪帝所清闲笔力休论扛鼎神工更解移山向日家居道士今朝落笔仙乡胸次山高水远笔端云起风狂可谓曲尽矣关全李成皆世名笔多大山乔岳之形元晖专貌江南山水自成一家此卷尤为胜絕超然故物也後人多作贋本去此远矣

跋王都尉湘乡小景

国家盛时禁裔多得名贤而晋卿风流尤胜顷见雅集图坡谷张秦一时钜公伟人悉在焉淮海词所谓忆昔西池会鸳鸯同飞盖者又有诗云梦入平阳旧池馆隔花貌口吐清寒皆为此也尝画孙浩然金陵离亭燕词多少六朝兴废事尽入渔樵闲话曲尽其妙今又见湘乡小景着身富贵不以平阳池馆为恋而乐荒闲之野虽尝因谪居而见之四时草木羣飞皆有生意胸次可想而知

跋杨叔禹所藏东坡帖

二疏渊明泊文太师其退一也老矣既退复来求去未得尤有感于斯言坡公犹以名位过分日负忧责吾曹岂容安处耶

人言作文当如作家书长公家书即文也如此等帖可以吊丧问疾而废之乎

绍熙四年余以左史摄词掖为殿试篇排官杨浑甫为检院其子叔禹登甲科明年尝书此卷又明年当庆元改元余自天官出守婺女叔禹送以诗有云为汉寝谋惟汲直在唐无党只香山虽不敢当实佳句也万里之别余自废退十三年又已休致不谓复来而叔禹召还由学馆入册府再见恍如隔世坡帖八轴复得披阅慨念畴昔遂书卷末云

又跋东坡三笑图赞

坡书三笑图赞不言为谁山谷实以陶陆远公事陈贤良舜俞庐山记亦云举世信之有宗室彦通字叔逵作庐岳独笑一编乃以为不然谓远公不与修静同时余曾因其言细考之十八贤传远公卒于晋义熙之十二年丙辰年八十三而吴筠所撰简寂陆君碑修静卒于宋明帝元徽五年丙辰去远公之亡正一甲子而修静年七十有二推而上之生于义熙之三年丁未远之亡修静才十岁况修静宋元嘉末始来庐山远之亡已三十余年渊明之亡亦二十余年矣渊明生于晋兴宁之乙丑少远公三十一岁卒于元嘉之四年丁卯远亡时渊明年已五十矣固宜相从姑志之以示好事者

跋曾召南所藏先侍郎训戒

諡法尚矣子孙孰不欲显其先世然罕有以清为諡者尝求之周公之法及春秋广諡沈约扈蒙诸书皆无清字惟贺琛之书乃有其三曰弗迹声色曰清弗殖货利曰清临官洁正曰清苏老泉之书有其一曰避远不义曰清有如赵清献公丰清敏公皆世所归重若赵清宪则未免有议之者矣葛文康公之父官虽未及特諡清孝顷见文康谢表有云俯惟先臣夙有卓行饮冰自励清每服于人知负米服勤孝实由于天稟观休宁以语姜尉之言可谓严矣至曾文清公乃得此名公论为之翕然钥初筮永嘉时侍郎由吏部郎典州亲见美政後十五年叨冒假守凡事以为楷模今閱此卷训戒其子引文康之言泊文清之书两家皆以清易名者清白之传可知三读叹仰不已召南久更事任已有所试矣其益思所以振家声者哉

攻媿集卷七十七

卷七十八

钦定四库全书

攻媿集卷七十八

宋 楼钥 撰

题跋

跋 书

蜀隆州有山名跨鳌郡人李公新号跨鳌先生有书一编名 书观物先生张公行成跋云方言曰 倦也丁度谓字或作?故司马相如云穷极倦?而释者亦云倦?疲惫也先生之书以名盖示其倦游不晷时用也余考之集韵二十陌有 字与剧同音注引方言倦也然则此书之名音从剧义则倦跨鳌之意不过此尔然说文解字无 而有□集韵 胡官切?亭名在上谷?谟官切说文解字□其虐切相踦□也二字若不类而俗书足以相乱 从山谷之谷弹丸之丸则是钦宗庙讳嫌名第三十六字止是亭名别无义可取跨鳌卒于宣和之末故不以靖康之嫌名为避□从谷亦其虐切口上阿也从口上象其理郤络皆从此俗书与山谷之谷无别□已逆切持也象手也集韵云隶变为丸执孰等之丸凡恐筑之凡当从□俗书与丸凡无别司马相如上林赋曰徼?受诎曰穷极倦?俱音剧倦 疲惫也而说文□字徐锴通释亦引上林赋徼?受屈谓以力相踦角徼要极而受屈也?竭戟切□其虐切声亦相近疑即□字也跨鳌之书不应取踦□之义正用方言上林赋倦?之意耳区区虽若辞费详考及此因并见之以俟好古者癸未申同年锡赴宏词多用奇字已在选中正用倦 字而有司以为犯庙讳嫌名而罢之过矣

跋 书

余君穉编大易粹言刊于龙舒又自着书名曰 书以八起数或问 字何义余考说文解字二字部亟字注敏疾也从人口又二二天地也去吏反徐锴通释曰承天之时因地之利口谋之手执之时乎时不可失疾也会意气至切集韵于去声七志正引上文而又于入声二十四职出此字亟□?注亦引上文而云或作□?余君既拟太元潜虚以为书谓此字实备三才故用之亦务用奇字故又加升第未知?字止用集韵为据虽复别见他书其下又加木则未之见也当考去吏乃本音也要当从去声为正

跋汪季路所藏书画

东坡西山诗

西山诗碑止有坡谷张右史三篇近岁邓公裔孙以前辈和篇数十首相示辄不揣次韵附见于後时在翰苑仍效周益公用印章盖南渡来官府印多更铸惟翰林院犹用承平时旧印铸于景德二年苏邓二公俱曾用此也

顏鲁公书裴将军诗

鲁公集中不见此诗裴将军不知为谁既言剑舞疑为裴旻曾子言有若无实若虚犯而不校昔者吾友尝从事于斯矣初不指名为何人而後世皆以为顏子不疑此书不见姓名其剑拔弩张之势非忠肝义胆不能为此所谓言言如严霜烈日真可畏而仰哉

温公倚几铭

文正公自不妄语推之亹亹千余言一出于正是以辅成元佑之治古之人所以大过人者无他善推其所为而已耳

蔡端明吐谷浑曲

此柳河东铙歌鼓吹曲第十篇李靖灭吐谷浑西海上曲也忠惠公字人言愈小愈好而大字亦足名世瑰词妙墨可称二绝

富郑公帖

国初袭前代之旧士夫隔品致敬则端拜自文忠公为相一切罢之潞公尝云宰相事体都被富郑公坏了兹观与李待制师中书词谦尊而光尤增叹仰公在当时犹山岳然一赵济敢摇之而师中亦凌慢如此况他人乎

赵德甫帖

赵德甫为金石录二千卷最称精监此卷谓宋公无名猨者而黄长睿谓汲冢师春书宋之世次曰景公猨者昭公子与此铭合当以猨为正周猨女及□猨亦人名此谓仲忽以为鲁公器者无所据而薛尚功谓乃说文鲁字古之文字形声假借鲁公者周公始封为鲁公为周公祭文王之器无疑考古之难如此哉

范寬雪景

范寬画亦可模见真者辄能辨之刻削穷丝发而行笔坚劲铁屋石人无能及者非其天性甚寬亦不能为此也

燕文贵画卷

图画见闻志载燕文贵本隶尺籍工画山水不专师法自立一家规范预玉清昭应宫之役偶画山水一幅人有告都知者因补图画院祗候实为精品此卷不入家数而布置精工别有一种风气岂其是耶

跋王逸老饮中八仙歌

朱岩壑跋逸老草书兰亭禊序云逸少作行书逸老为草字外人那得知当家有风味逸老以草圣擅名其为名公称道如许寓居乌戍是时先太师岐国公为监镇与之往还旧亦得其八仙歌此本改从九从日字为颠盖长史素有此称也羔羊居士乃其自号圣采为所居之堂得柳轩岂亦其家耶钥随侍时当绍兴十一二年间犹识其人此卷书于庚午岁自言年七十有五则知生于丙辰余生于丁巳後公六十一年方识公时才五六岁嘉定四年辛未始见此书则亦七十五矣感今念昔为之惘然

跋张谦中篆金刚经

谦中之篆自成一家近尝跋复古编颇详此盖其真蹟也然坡公有与赵清献公帖云表忠观碑额可用张子野之孙有书之子野吴兴人名先而此云追荐亡父张三先生何耶更当详考其间以袒为但以转为褥以萨为薛之类是终不欲书篆法之所无也

跋李晋明所藏书画

文与可竹

笑字从竹从天而字书不述其义李阳冰云竹得风其体夭屈如人之笑坡公亦曾用其说湖州两枝开卷一閱真欲向人而笑者妙处可得而窥哉

与可老木

廉博士宣仲以古木墨戏得名于绍兴间尝以坡公真笔映之全无光彩兹见湖州老笔又出其上坡公有云孰有爱其德如爱其画者乎

东坡渔父词

元真子生为鲁公客後又为坡谷所称至櫟括其诗篇大书之其与屈灵均答问于江滨者何异耶

东坡获鬼章告庙文

鬼章扰边如唐之默啜种谊之奇功似郝灵筌第未知当时有词臣如此否翟忠惠作安南制

有云亦惟恃我朝廷爵秩假宠有邦用能保尔山川土田传祚永世文人多称服之盖出坡公之遗意时方禁苏氏学而文人之杰如忠惠公亦祖其绪余是真不可揜矣

跋宇文廷臣所藏吴彩鸾玉篇钞

始余读文箫传言吴彩鸾书唐韵事疑其不然近于汪季路尚书家见之虽不敢必其一日可办然亦奇矣为之赋诗且辨其为陆法言切韵兹见枢密宇文公所藏玉篇钞则又过之是尤可宝也既谓之钞窃谓如北堂书钞之类盖节文耳以今玉篇验之果然不知旧有此钞而书之耶抑彩鸾以意取之耶有可用之字而略之有非日用之字而反取之部居如今本皆以朱字别之而三字五字止以墨书字之次序亦不与今合皆不可致诘辄书前岁所与汪氏诗跋于左庶来者得以览观今玉篇惟越本最善末题会稽吴氏三一娘写问之越人无能知者楷法殊精岂亦彩鸾苗裔耶

跋所书卞公祠堂记

东晋死节之士卞公为最显忠献公为之立祠忠简公为之作记忠肝义胆千载鼎立既成而忠献趋召碑未及建今五十年矣忠简之子澥将漕江左俾钥书之将登于石钥为何人而敢预此顾惟平生慕卞公之节义恨不及登忠献之问叨末第时受忠简公深知实门下士也兹乃幸得以恶札托名于不朽故谨书之

跋赵氏所藏大士

赵君所供大士闻竹石皆廉博士宣仲之笔梵相则出于司马参议端行廉讳布司马讳梈皆以画得名于绍兴初余家亦有此像端行并作山林此轴得二名士各尽所长尤可宝也

跋胡五峯论语指南

论语一书自昔大儒不知几人未有能发明仁之一字樊迟问仁夫子固尝答以爱人矣韩昌黎原道首曰博爱之谓仁他何望焉自伊洛二先生始发千古之秘洙泗言仁深见本原兹读指南一卷枢密黄公察院沈公皆深于此者五峯断以一言方见二公犹有差处一曰有心于为仁则曰如此立言恐不识心不识仁也一曰能恶人则或者疑焉于是复明仁者之心曰本无所恶也则曰只是当好恶之时胸中元未了了也乌得为仁又颜渊问仁之下有曰人有仁不仁心无不仁此要约处不可毫厘差呜乎此言旨哉此论语之本体也然而非二公相与讲贯亦无以发五峯之言故易以朋友讲习为说盖天下之说未有过于此者夫子以学之不讲为忧盖君子之忧未有甚于此者学者可不勉哉

跋张乐全上范文正公书

范文正公讲道睢阳乐全以文受知晏元献公欲择二?其一则富文忠公次则乐全乐全虽不

成?然皆文正所荐文正通守河中乐全以布衣寄此书自叙南都知獎甚深蒲坂会府则河中也又曰经术兴于南郡士林归乎北海北海潍州也文正未尝仕于潍亦无北海之称南郡亦非为南都恐是引用马季良孔文举故事俱不平阙而集中却有上北海范天章书又有谢范天章荐应制科诗在明道二年又有谒青州范天章等诗考之乃范中丞讽也乐全虽为文正所知二范俱曾为天章阁待制俱曾知青州然文正在明道间始为通守而讽已为天章文正知睦州苏州之後始得此职又执政之後知邠邓杭晚知青州则已疾甚乐全亦已通显而讽正以天章守青社又实以明道二年同宋宣献蔡文忠列荐乐全茂才异等然则集中诗及书皆为讽而作青州在汉属北海唐天宝曰北海郡皇朝以青北海县置军後升为潍州政和始以青州为齐郡以潍州为北海郡此书称北海盖谓青州也因具列之以俟知者此书当在范氏而乃传于女孙岂书成不及上仍藏于家耶

跋东坡备水帖

苏少公序黄楼赋谓长公之备水有三焉水至而民不恐水大至而民不溃水既去而民益亲此帖言得旨见役七千余人盖水去之後请增筑徐城以木堤扞水冲之时熙宁七年七月河决澶渊九月水至城下帖称二月十日则其明年元丰元年戊午也坡时年四十三笔虽未老而精彩照人可宝也

跋李庄简公与傅樵风帖

建炎四年金陵溃卒四散三月戚方既残广德五月遂围宣州锋不可当参政庄简李公时为太守无兵可恃亟设方略招溃卒于郊野厚待之以为用戚与其副并马近城指画攻具公以一书傅矢射副马前大略言戚乃凶寇天诛必加汝为将家何至附贼二人相顾曰此间我也攻稍缓始得为备诏遣统制巨师古刘晏率兵救之晏战死第三帖所言巨刘为此也尝巡城亲以铁扇障面而贼箭正中之危机屡矣旧曾问于老校退卒而得其详经略潘公其婿也尝言公当危时寘匕首枕匣中与家人约曰城不可必保若使人取匕首则我必死汝辈亦俱自戕无落贼手一日危甚果遣人至一家恸哭既而报少宽矣公誓以死守励志如此故将士用命贼遯而城全郡人至今祠事之观所与给事傅公手帖则所闻益信二公里人忠义相勉风节凛然皆可畏而仰哉

跋东莱舍人所作赵钐辖墓表

赵侯死节九江三子相从于难父死于君子死于父忠孝之道萃于一门殆有东晋卞氏之风刘公尝任从班丞相沆之孙也为之墓表甚详东莱紫微吕公有文章重名又为之墓表足以传不朽矣侯之元孙吴兴使君崇规先以墓碑示惠朱晦庵跋语谓东莱碑铭今不复存当为求之其家吴兴之父道州亦自言未入石而家多故因亡其本吴兴一日又过钥曰近从临川宗族家遂得墓表录本且得东莱所答签判书真蹟欲俾书墓表以补先世之遗慨然为书且勉其并刻东莱之帖以信後世钥何幸乃得以鄙札托名于斯

跋彭子壽甲寅奏藁并目录手泽

绍熙五年岁在甲寅七月甲子皇上初受内禅恭俭仁孝中外具孚励精图治羣贤在列曾未几时而权臣已寢寢孽牙其间无有敢白发其端者时惟吏部侍郎彭公以旧学受眷最渥忠愤激发数其奸状自此补外钥在东台同中书舍人林公缴奏至再竟不得回消长自此分矣三人之言皆验于後而公尤为曲突徙薪之首更化之初与林公俱召遂列还联独公不及见今日为可痛也公之子司农寺主簿钦出奏藁及目录手泽等见示览之辄为流涕公论既白上恩加厚公亦不自悼其不幸于九原矣钦倅嘉禾求跋其後林公下世亦已五年感念畴昔病中扶惫书此公之德业皆已见于隧碑不复屡书呜呼子壽可以不朽矣

跋韩熙载投吴状

杨行密之据淮南一传渥再传隆演徐温已专政矣九年温始进隆演为吴王而建国天佑十六年始即吴王位改唐之天佑为武义元年又传至溥改元顺义拜温左丞相其子知诰为左仆射六年岁在丙戌温虽在金陵制朝权而政已归知诰立延宾馆以待士四方豪杰归之时中原多故名贤宿德皆亡身归顺此正熙载投吴之时也其父光嗣为後唐明宗所杀熙载方隐嵩丘惧祸及而南奔所谓司空者非温即知诰而史传江南诸书不载其为司空宋齐丘虽为司空乃在太和六年岁在甲午相去九年矣熙载文华擅一时南唐諡以文靖此状虽挟战国纵横之气不脱五季萎?之体然词翰俱胜惜乎生不逢辰崎岖危乱中自朱元之变嗣主益忌北人多酖之遂至自污要其论议未曾少屈信英物也想见分裂之时南走北走之士类假此等文词以自见禅月贯休之投孟蜀有诗云一瓶一鉢垂垂老万水千山得得来亦此类耶

跋向芑林拘伪楚檄藁

博陆侯既立宣帝威权益重而严延年劾其无人臣礼事虽不行朝廷肃然敬惮之使博陆虽有骄慢之心亦足以夺其气伪楚虚有其表中实谬懦岂敢望博陆之万一建君主龙天之议则其人可知向公一闻奇变即檄合肥拘其家想其方在惶扰忧恐中闻此宁复敢桀耶封府库以臣名奉昭慈垂帘而上玺绶于高宗虽出一时诸公之议而此举实中其机此岂浅丈夫所能及哉

又芑林家规

芑林遗训凜然如生而三子俱贤兴国及郡倅既遵行维持于前贰车高壽独殿诸公保家之虑尤为深长既闻于郡又刻之石诸孙相与结约为久远之计士夫名家能守素业少见其比临武令君悉以见示叹仰不已然尝闻古之循吏有云律设大法礼缘人情盖不欲专以法临民也家规如学规然师与弟子以道义相处不得不立规矩以警其不率者非恃此以为庠校当有行于规矩之外者而况家乎临武令为一门最长更惟勉之以全雍熙之轨则向氏之兴未艾也既以芑林文集求序引又书此以赠之

代史少保恭题御制和诗

臣不肖仰蒙陛下矜念簪履之旧俾待罪经帷宠光殊奘无前比廼季秋壬子锡宴于澄碧殿因获纵观清澈之胜洞心骇目如上崑阊捧手从游天顔益温命宿玉堂之直庐顾谓臣此会不可以无纪臣亦思叙感遇之万一是夕裁成古诗三十韵上进陛下赐以宸章俯同其韵华袞之褒下饰小已虽圣主所以优礼老臣者务极其至而隆天厚地之恩臣愚何以称塞窃观有虞盛时帝庸作歌而後皐陶扬言载赓犹得大书简策垂文後代臣之芜陋焉敢言诗而乃上勤睿作之妙是岂惟近世儒世遭逢之所未有视皐陶抑有光焉倘不能勒之坚珉以侈大赐臣则有罪臣洪惟陛下圣学渊奥句法深醇浑然天成兼备衆体一诗之中屡致意焉有曰跻民期仁壽有曰朕瘠天下肥得以见陛下之用心有曰都护万年觴何当至庭庑得以见陛下之立志若夫罄嘉谟以起勲业则非臣衰朽之所敢承至使直笔以纪中兴臣不佞苟未先狗马填沟壑虽在田里尚庶几见之

代仲舅汪尚书跋了斋表藁

德壽皇帝中兴慨念裕陵实录之诬绍兴甲寅乃诏三馆之士是正之内相范公冲中书舍人任公申先相继职其事当时英俊皆在选中吾乡礼部侍郎高公阅其一也先少卿方官于朝高公以姻连馆寓间见诸公往来议论之余钥因得剽闻一二及取忠肃陈公所着尊尧集读之其立言措意无非忠愤所激英风义气凜凜乎方册之上自恨晚出不得端拜下风逮今五十年始获见公手书表藁于蒋君辉之家盥手谛观为之歛衽遐想气象如在左右窃尝考之国史政和初元张公商英犹在相位编修政典局其所建也于是得旨命公缴进此书及奏御留中而张公以八月罢政用事者隐其诏索之实而诬以私九月遂有台州之谪观公题识数语虽在颠沛艰危中其尊君戴上之心死生祸福有不能夺者抱抑鬱于一时昭声烈于万世以此较彼孰得孰失钥辄不揆敬书其後而归之

攻媿集卷七十八

<集部,别集类,南宋建炎至德佑,攻媿集>

卷七十九

钦定四库全书

攻媿集卷七十九

宋 楼钥 撰

杂着

咏归会讲说

乾道五年暮春辛巳昼锦坊楼氏为咏归会黟县尉曹主之言志者十三人冠者十二人童子二十人质明谒先圣先师以叙列坐临安教官讲夫子入孝出弟之言已钥乃作而言曰吾门自高祖先生以儒学起家衣冠六世仕者以清白相传学者以诗礼相勉门内雍穆虽总角之童亦恂恂自守家法遂为四明望族亦知夫所以致此者乎先生以古道为乡里师表一时名士咸出其门儒风蔚然大父行以下以文鸣者相继金紫孝友絶人少时刻意学问有古人闭门锥股之勤少师宏才大度为圣世名臣窃尝闻金紫之言曰可使财穷不可使行穷少师之言曰士大夫遇好事不要错过呜呼味其言其所存可知矣诸父承家学之传尽洗膏粱习气至不使人见有子弟态吾曹今日不耕而食不织而衣生长以来不知人间辛苦劳役事正以上世书种不絶故得为天之幸民吾之弟若从子皆宜自勉于学以无负尉曹咏归之意抑尝闻阙党童子将命夫子曰吾见其居于位也见其与先生竝行也非求益者也欲速成者也张童子明经韩子曰夫少之与长也异观少之时人惟童子之异及其长也将责成人之礼焉成人之礼非尽于童子所能而已也然则童子宜暂息乎其已学者而勤乎其未学者圣贤之言其诱人于善如此其切然而阙党童子张童子皆无闻焉今日之坐于下者年甚少气甚锐岂无文采之可取记诵之可喜然为士者之事等而上之不知其几级当佩服夫子速成之戒深求韩子成人之言退而思曰我知此矣能此矣未知未能者何啻千万计为己之学不至于圣人不可已年有限而道无穷故君子有终身之忧任重道远死而後已不及今无事时自力于学而以身之势身之年为可恃谓学无益谓恶无伤苟目前安佚而不思後日事日复一日忽焉老之将至使没世而无闻是岂吾祖宗父兄之所望于後人者钥将行矣五年而归艸者弁矣冠者室矣富贵科第是有命焉不可以必求也惟期懋进乎学駸駸日新道学既充所谓取时名而振家声者不在兹乎日月逝矣岁不我与後生可畏焉知来者之不如今也古人曰士别三日便当刮目相视况五年之久乎幸毋忽

赵子治循斋说

赵子野求名其斋名之以循而告之曰循之义大矣哉庄子曰去知与故循天之理董仲舒曰乐循理谓之君子通下一理尔循之而行可以寡过可以接物可以处事可以临政等而上之何所不可亦不必咨是非于人心所不安即是非理循是而行隐于心而安施于人而合天

理不外是矣言虽近而旨甚远子治勉之哉

赵元卫勉斋说

余既为赵振文作母自欺斋之铭又名子治以循斋其季元卫亦以此请为名曰勉斋而告之曰事在强勉而已矣强勉学问则闻见博而知益明强勉行道则德日起而大有功吾侪中人之性可上可下如逆水行舟倍用力则可以寸进谨执持则尚在故处放手则流荡而下不可收拾矣贵贱穷达自有定分学问亦自有分量尽力终身虽所至未可知与不用其力者有间矣元卫勉之哉後日再见当刮目相视也

双谿金君显庵说

双谿金君式欲书显庵扁榜且曰起家寒儒禄不及养自升朝籍三得追荣吾亲虽取以显父母之义非敢当此也愿并言其所以显者因告之曰经所谓显父母者谓立身行道扬名于後世非取爵位之显也故孝子养亲必荐仁者之粟而况枉道以干进乎若枉道干进则虽位极人臣赠亲崇品适足以为九京之辱何显之有易曰贲其趾舍车而徒扬子曰以其所养养之至也君固所深知闻又自卜壽藏于其侧其以此意更以告後之人

徐圣可字说

临江徐君简一见如故交问其字曰敬伯因告之曰君之字善矣然自翼祖再入祧庙虽于礼法不讳为臣子者要不可以为名字君闻而矍然请易之于是字之曰圣可盖亦取仲弓子桑伯子之问也舜命教胥子有曰简而无傲臯陶九德曰寬曰柔而下皆性之善也曰栗曰立而下必曰而者皆所以成其德是以君子不敢恃其天资而贵于学也子桑伯子圣人之所可也君其体舜之无傲臯陶之所谓廉又以仲弓之言而行之不亦善乎

赠种牙陈安上

韩平子问叔向曰刚与輓孰坚对曰臣年八十矣齿再堕而舌尚在老莱子曰齿虽坚固卒以相磨舌柔顺终以不敝而子思以为吾不能为舌叔向老莱晓人以处世之法本非正论子思之言则有意于刚也陈生术妙天下凡齿之有疾者易之以新才一举手使人终身保编贝之美吾于此有感焉岂惟已人之疾是喜抑使人知刚者之不必亡也

从子颢改字景刘

刘颢字处和南阳人父绍仕宋位中书郎颢母早亡绍纳路太后兄女为继室颢年数岁路氏不以为子复为奴婢辈所苦路氏生濂兄颢怜爱之不忍舍常在牀帐侧辄被驱捶终不肯去路氏病经年颢昼夜不离左右每有增加流涕不食路氏病差感其意慈爱遂隆濂有识事颢过于同产事无大小必谘而後行 【以上节录南史孝义传之文】

颯数岁时伯兄尚无恙既奉名于二亲而立名使钥字之是时取季札观乐歌魏曰美哉颯颯乎大而婉故字曰大之伯兄下世且久嫂氏鞠三子如一日颯既冠将授室上则欲其干母之蛊下则欲其教率二季因阅南史刘君传实有感焉改字颯曰景刘而告之曰刘君之事可谓难矣後母不以为子而孝益甚谦非其同产而爱益笃又况奴婢从而困苦之惟其至行不移母反慈爱而弟亦终能敬于事兄此天理也伯嫂既非前後之不同而慈祥尽爱又非路氏比二季亦能惟兄之听颯居其间当慕古人之用心思尊长所以字我之意孝友二事行之惟谨二季亦当如谦之事其兄则雍睦之盛无媿于古人矣尚勉之哉

姜子谦以试邑锺离请益

乡人有为宰而请教于外祖汪少卿语之曰作县无他切勿作大【音做驮】或疑其太简而又云百里独专易得作大才作大且先与丞簿尉等情不通渐至养尊则去民寢远

龚公滂善宰剧邑或问其要云此如浙江踏浪儿投身怒涛中旁观亦为之寒心所以能济者谨不可吃了一口水吃着一口便难脱矣

前辈有为县公退以贯珠诵佛其叔父见之云汝欲为佛耶对曰然叔笑曰汝既做了知县更望做佛耶言造业之多也其人悚然谨不敢为殃民害物等事

子谦既挹世科以新制宰锺离以此册请益钥不曾作邑无以塞命况近世如吕观文治县法等书已多彭子复临海一书尤精详可取而观也姑诵所闻一二以告言皆通俗易晓俱有旨哉淮堧事简土风亦淳长民者惟相与安之而已

弹广陵散书赠王明之

唐李琬闻乐工羯鼓谓虽精能而无尾工异而问之自以为求之久矣琬曰曲下意尽乎工曰尽琬曰意尽则曲尽又何索焉工曰柰声不尽何琬曰可言矣使以他曲解之果相谐协余尝爱其说少而好琴得广陵散于卢子嘉鼓之不厌然此曲多泼擻声盖他曲所无者二序正声乱声或以此始皆以此终小序为一曲权舆声乃发于五六弦间疑若不称屡以叩人无能知者王明之精于琴为余作此小序独起以泼擻雍容数声然後如旧谱闻而欣然遂亟传之耶婆娑鸡得屈柘急遍而得其尾今广陵不假他曲而得其首声意俱尽古语真不虚也晋史称广陵散于今絶矣而韩臯论之甚详且其所谓哀愤躁蹙惨痛迫胁之音始末具见而尤致意于宫商二弦至乱声而愈觉痛快必非後人能作余所得数声未必真出于古也以其深愜素怀故书以赠明之

赠写照郭拱辰

艺无大小胸中有书者居然不凡三山郭君登晦庵之门而游戏丹青挟写照以示予若郑公尚书晦庵数公展卷对之如欲笑语陋质不足烦君为貌武洞清神物能得其真有不怒而威

之意勉强更添数百卷书则顾陆不足进矣

赠笔工吕文质

四明吕文质居桃源谿上多游浙右作笔殊佳在人品中则贾长头也近笔工苦无兔毫文质深入淮楚始得之韩文公作毛颖传及赞终始以中山为言意其为定武也传虽寓言然其中云蒙恬南伐楚次中山将大猎以惧楚则非定武也今溧水有中山去县才十五里元和郡县志云出兔毫为笔精妙此县唐属宣州今隶建康宣城笔旧有名于世岂以此耶文质试往访求之

赠徐心镜

师旷师冕蒙?御瞽古人专使之审音此事不复见矣今之听声殆其遗意徐心镜一闻人声辄能言其休咎周之瞽蒙上中下凡三百人不惟禄之而又有相之者而徐生一身餬口之不足噫古道之不行何止是哉

赵甥叔明和孺堂

外甥赵叔明汝顾昆季四人今与其季季敏汝助同堂而居求扁于予小雅燕兄弟之诗曰丧乱既平既安且宁虽有兄弟不如友生俎豆饮酒之饫兄弟既具和乐且孺妻子好合如鼓瑟琴兄弟既翕和乐且湛深哉诗人之旨也毛郑注笺皆不得其意谓安宁之时则友生为急曾不知伐木则专为朋友此诗则专主兄弟盖谓急难御侮以兄弟为急至于安宁乃谓兄弟不如友生乎此说出于欧阳公尝因是以推後二章注笺皆非也盖曰陈筵豆以饮酒食一时之乐耳尚得以厌饫而况兄弟既具如孟子所谓兄弟无故一乐也既具矣吾之和乐且至于孺谓直如孺子之时孩提之童其长也无不敬其兄者此天性也妻子本非天属徒以好而相合犹能如鼓瑟琴然若兄弟翕合则其和乐且至于湛言甚乐也平日以此意处兄弟之间因名其堂曰和孺且序其意以勉之

名厚孙

嘉定四年龙集辛未五月二十二日瀟得男其八字辛未乙未癸酉癸亥以辛未土克癸亥水或以为大海水非土之所能克是不然辰戌丑未皆为土而未乃坤位纳音又为土是坤土也坤为地中庸谓振河海而不泄者也何克之云欲名以振又有当避者易曰地势坤君子以厚德载物名曰厚孙抑侮之使从厚云

书老牛智融事

淳熙七八年间始闻雪窦山有僧智融者善画而絶不以与人一日见其画心甚敬之曰此非画者其殆有道之士乎往山中访之融素严冷不可挹酌一见心许气韵谈吐果如所期归取

匹纸寄之久不见与催以古风有曰古人惜墨如惜金老融惜墨如惜命又曰人非求似韵自足物已忘形影犹映地蒸宿雾日未高雨带寒烟山欲暝融得之喜遂为余尽纸作岁寒三友妙絕一时尝问尚可作人物否曰老不复能作盖目昏不能下两笔也问岂非阿堵中耶曰此虽古语近之而非也吾所谓两笔者盖欲作人物须先画目之上眦此两笔如人意则随皆随笔而成精神遂足只此一语画家所未发也自是数年间时得其得意之笔精深简妙动人神品尤号作牛自号老牛智融或云源流出于范牛而妙处过之融亡矣不可复得从其徒问以平生俗姓邢名澄世居京师以医入仕南渡居临安万松岭号草庵邢郎中官至成郎中出入禁廷赏赉殊渥不知从何得道年五十弃官谢妻子祝髮入灵隐寺诸公贵人挽之不可犹以去俗尘不远又游诸方径山匡庐经行殆徧闻是山之胜遂投迹为终焉计假一室深坐土木形骸泊然如偶人斋余或曳杖以出有欲相随则谢遣之山有千丈岩妙峯亭栖灵隐潭皆幽僻絕胜之地意行独坐或至移晷人莫窥其际初亦不知其能画也山深多蛇忽作二奇鬼於壁一吹火向空一踢蛇而掣其尾蛇患遂除而时有火惊或者病之又于火端作土泉声为之革尝画龙首半体祷旱辄应颇近于灵怪师亦不以自矜也遇其适意嚼蔗折草蘸墨以作坡岸岩石尤为古劲间作物像不过数笔寂寥萧散生意飞动或极力摹写亦有形似而遽不及远甚此自是悟门非积学所所及也始知向来幽寻之时山林云气四时万变到眼入心一寓笔端游戏点化自然高胜前无古人超出翰墨畦畛略不可以画家三尺绳之或加以势利则避之愈深意苟相与亦辄不吝作诗不多语意清絕字画亦无俗韵初自言若得为僧三十秋瞑目无言万事休绍熙四年五月某日卒壽八十僧腊如师言与足庵尤契合相与终始先一年足庵示寂侍者道元来都下求铭于余师亦以书见属未几而师亡亦异矣师晦藏自秘虽与之周旋者不能尽知余亦安能知其所至陈后山谓渊明无意作诗但写胸中之妙余于师之画亦云东坡赞文与可竹石曰呜呼孰有爱其德如爱其画者乎此余所以又叹也元之来也以师所予足庵弥勒像及元所藏牛溪烟雨二轴遗余师又寄归牛图意盖有在余为作三偈元欲刻之石且请书师之大略附足庵碑陰因慨然为书之

攻媿集卷七十九

卷八十

钦定四库全书

攻媿集卷八十

宋 楼钥 撰

赋【课藁所有原集别有试藁一卷其目曰宣王内修政事赋玉卮为寿诗注以省试光武大度同高祖赋宅道炳星炜诗策三道注以教官试又有策问一卷合御试召试省试别试解试上舍试州学等试所拟问凡十有三篇今并缺佚无凭录刊】

受降如受敌赋【以受降之际亦当严备为韵】

上将甚武神机独潜虽在受降之际亦如待敌之严纳夫授首之人敢矜已胜类彼临戎之日以备无厌夫惟兵收决胜之功将有防微之智谓寇之穷也虽已见于屈服而心之险也犹未知其诚伪彼既降矣曾无自满之心如受敌然必谨非常之备于是大敞坚壁旁标碧幢无丑类胁从之衆纳渠魁肉袒之降如将受夫大敌惧见欺于小邦方陈释缚之仪深虞变诈若处交绥之地敢恃敦厯莫不肃我军容严予兵卫虽残寇之臣附犹两军之交际非惟伸大将之威盖恐堕敌人之计受其壁焚其棨豫防一旦之危称尔戈比尔干陰养六师之鋭议者曰彼之降也既挺身而至矣我之受也当开心而待之何必招携之日乃同御侮之时盖念犬戎之难信深恐狼心之或欺与其有变以无备孰若居安而虑危岂不见行俭审兹果能平夫突厥耿公明此遂终定乎车师彼有坑既降者固出诈谋使自缚者尤非善画曷若我外弛金鼓内严矛戟深防祸起于所忽亦虑敌乘夫吾隙彼如犯顺以欲为我则称兵而将亦伐崇因垒既施文考之威就塞筑城兼取武皇之策因知力角于锋镝者敌尚能御变生于肘腋者患何可当今也勅敌虽闻其讐服祸心犹恐其包藏惟吾之为备也既自严密则彼虽好乱也乌能陆梁且异夫魏子会秦卒受欺于商鞅唐臣盟狄果见劫于平凉噫屈膝而服也人固畏威噬脐何及也吾当虑後毋弛禁以自忽必整军而後受方今将军纳降衆而献俘于庙焉不废严兵之守

击楫誓清中原赋【以渡江击楫誓清中原为韵】

国讎未雪壮夫请行击长楫以前渡誓中原之复清共涉巨川爰叩舟人之柅备言素志愿恢天子之京时其典午中衰永嘉南渡愤晋元攘敌之未暇有祖逖奋身而不顾扬舲以往方乘天塹之流击楫而言誓复皇都之故尔乃援引兰櫂旁瞻碧幢一鸣而英气先奋再鼓而羣心已降志必复夫故土誓有如夫大江吐我赤心忽形言于剡木指夫白水期净扫于中邦谓夫战尘久满京师突骑交驰洛汭期狼烟之必扫顾鲸波而作誓方横桡徐抚独决策以前征倘诸夏未平尚何顔而复济岂不以国始草创人思苟存江山有异也或作楚囚之泣纲维不举也至形北客之言故我浮巨舰以勇奋视强敌而气吞倡义有先于温峤定从不假夫平原遂

将电扫风驱尽复神州之大肯使龙蟠虎踞久留法驾之尊果能扶神器之阽危拯遗黎之沈溺长淮以北也复见夫冠带大河以南也悉除夫荆棘不渝江上之盟坐制目中之敌澄清抗志车同范氏之登慷慨论功柱鄙汉臣之击向使无妖宿以示异缓若思之代终则必蠢尔丑类堕吾计中尽郊圻而申画举幕庭而一空振起江南益大中兴之烈扫清冀朔遂成再造之功惜乎大厦未成而忽挠栋梁中流欲济而遂亡维楫不闻壮志之成就徒有余威之震叠方今矫矫虎臣皆欲济河而焚舟下视祖生之事业

簞食壶浆迎王师赋【以王师所至食浆以迎为韵】

民意胥附王师出征持簞壶而咸至实食浆而相迎饮食虽微用表欢欣之志遐迩均集喜观仁义之兵盖悯赤子之无依奋神戈而大举惟兵之所至也既已不扰则人之乐从也其谁敢拒橐弓箠矢往平敌民之民簞食壶浆来劳王师之所观夫老幼纷至饔飧共持我之至也救民于水火彼之迓也恐吾之渴饥凡尔一时之衆悉迎六月之师馈饷鼎来皆望风而远附干戈所指曰後我以奚为兹盖兵收不战之功人有再生之喜竭蹶而趋也欣涂炭之时脱襁负而来也知父母之孔迓顾慕义以皆然非吊民而何以以万乘而伐万乘罔敢抗衡其小人以迎小人咸来造垒大抵穷兵以残民者孰肯後行师以救乱者衆斯向方今也军罔秋毫之犯人无血刃之伤是宜至者献酌来皆裹粮夏衆咸来功可同于商后燕民不悦事有异于齐王向非东征西怨也民望来苏迓悦远归也衆无携贰又安得辍仰事俯育之物见心悦诚服之意自坐见于功成曾不烦于家至如是则三军益饱何烦挽粟之勤千里遐征不假望梅之智非不知给饷不絶也何必馈食酺酒以犒也奚烦挹浆然念礼虽薄而心则甚至食虽菲而情乌可忘苟匪同心之奉曷云厚意之将亦何异咸筐元黄人尽归于周室争持牛酒民皆劳于高皇彼有筑道而馈军者用力亦多投醪而饮衆者为功非易岂知多助之举自有争先之馈方今中原之民皆开门而迎王师又岂止于壶浆簞食

光武乘时龙而御天赋【以时乘六龙以御天也为韵】

炎德继统汉光得时惟乘龙而特起以御天而有为独收兴复之功系隆丕祚盖际飞腾之会统制方维迹其奋宛邑而战昆阳诛青犢而降铜马念再造丕图也虽本自于神圣而独逢兴运也故能安乎区夏军摧九虎成止戈之武焉时乘六龙显御天之造也观其业务绍复符能握乾将登四七而上应于列宿载当二百而适际于中天体纯刚而有作莅至尊而独专受命而兴协彼真人之应逢辰则奋揽夫帝位之权用能骧首而飞也非在田而在渊馭世而起也遂得位而得禄威羣盜之鼠窜扫中原之鹿逐尊既正于九五祚遂兴于百六爰究位天之载允协羲经详推鬬野之符又同赤伏大抵圣不世出也世必治而斯起龙不时见也时纯阳而後升今我恢雄图之赳赳济大业以兢兢既当阳而有造宜取象于时乘小利见之神尧第伸潜跃仰同符之高帝果致隆兴因以兆应金刀祥飞白水赤光之照也已新于育圣之际佳气之郁也又见于举兵之始由天意之久属宜帝尊之独履盖有致而斯能苟不然而何以遂令耿氏攀鳞翼以愿从肯使圣公假风云而能起故得息盜集之奋蝟破野战之羣龙回鸢既止于九县彗云宁见于高铙灵贖自甄类五马渡江之化功臣皆厚笑四蛇入宇之从噫感如诸将也有鳞集之归骧如吴公也擅风行之誉抑知天德之位亦赖人谋之助吾皇复受天命而

远跨于汉光乘时龙而在御

修身以为弓赋【以修身为弓发必中矣为韵】

学贵务本志当适中惟修身而由道遂取喻以为弓正以不他曲尽饬躬之术张而弗弛自成中的之功士有该百行以研穷端一心而折衷谓存于吾者苟不知审则发于外者何以示衆今也见圣师而由圣当明四重以四轻犹弓人之为弓要在百发而百中观夫学问尚志操修及时忠信以进德也我则务敏骄奢所自邪也吾宁诡随故此诚身之道类夫弦木之为虑以动动惟时罔蹈党偏之失奠而发发必中宜先审固之持兹盖有不言也言则中伦有弗行也行皆审是施于远大则何止百步时乎游息则为之一弛苟出乎而发乎信高矣而美矣勉夫百行折中矩而周中规志在四方义为的而思为矢彼有忠信为甲冑者第取防闲之固以言行为枢机者深明荣辱之因我是以鉴彼省括谨夫检身动切戒于失鹄发何劳于扣轮亦犹率乃攸行书取若虞之度反而求已辄言如射之仁因知身之修也有立功立德之方弓之作也有尚角尚筋之术然器不臧者曷成功于射隼材不良者难求奇于贯蝨理既无邪中斯可必肯同诡遇一朝获禽以为良尚小仪成终日射侯而不出噫主于皮者徒闻游艺之巧佩以弦者但知矫性之柔曷若志正以体直自然诚立以身修殆将观德于矍相奚假矜能于养由如是则有志于弧礼何拘于戴记其直如矢道兼得于成周诚以枉尺直寻也固所不为志眉中目也亦何敢忽取友必端则道岂反害与人无争则行何有阙又当兢兢业业以修吾之身肯废前功于一发

尊贤则士愿立朝赋【以尊贤则士愿立於朝为韵】

士固自重君宜罔骄惟克尊于贤德斯愿立于王朝上怀乐道之诚必加优礼下起充庭之望不待旁招凡称命世之才俱有事君之愿然而世或崇儒则与朋类以偕进时乎慢士则虽佚遗而不怨惟明主有尊贤之意每务撝谦则羣髦兴入仕之思谁甘肥遯时也晋昼接下鼎烹养贤德行道艺则必预旌表忠信孝友则皆蒙荐延此既加于体貌彼宁甘于弃捐神圣谦冲每优崇于儒术英豪歆慕咸乐効于官联自是来荣轩冕之华去耻山林之入望旒纓者拭目以期见候旌车者比肩而竚立谓邦有道兮于时可见故心欲仕兮如是其急圣人在上既闻有礼之三君子于行愿厠乱臣之十大抵士虽贵于求仕位尤慙于苟居视君好恶以决已进退观道兴废以卜身卷舒虽尊德乐义而见或嗟晚则离蔬释蹻而来惟恐徐莫不有道贱焉而耻也岂若吾身幡然而改於立或无方必负割烹之鼎待如不次自投銜鬻之书是何君专行爵之权士守立身之则倘恃禄位者因明月而按劒则安义命者必冥鸿而避戈是故好仁文后有海滨二老之归慢骂高皇致商岭四人之匿譬如鸟巢不覆则凤集阿阁骏骨必市则骥来四极今也世遇右文之盛朝惟有德之尊语而前席者非鬼神之论见而赐璧者非捭阖之言又孰不思弃商筑来趋舜门尽令雒水之西同为振鹭肯顾鍾山之北犹念惊猿王者以是改容就不召之臣式间礼非常之士俾乘驹以去者赅然而至卧庐以隐者幡然而起是之谓王公尊贤士乎士乎可以出而仕矣

济河焚舟赋【以济河焚舟志在立功为韵】

战欲必胜归宁豫谋既济河而赴敌遂决策以焚舟涉彼大川肯思还于故国火其巨舰誓死报于强雠昔秦穆违蹇叔以袭人越晋邦而趋利二陵之败也既自咎于覆将三年之战也又貽讥于拜赐全师再出俱怀奔北之羞雪耻不忘常起向东之志孟明乃慷慨发愤欢呼即戎谓将之屡败也固难以语勇而君之专任也当先于効忠昔也丧师曾媿万全之策今焉贾勇愿收一战之功由是提虎旅以徂征絶鲸波而永逝念解骖之遗辱遂舍舟而自誓兵苟胜也仇则可报功不就也我宁复济顾吾战志已为死战之期虑彼士心犹作生还之计莫若扬一炬以独决聚万舟而毕焚烈焰奔电长烟走云俾归者以絶望庶往焉而立勲回视归途渺洪涛之千顷示无还志激壮气于三军故得我师奋臂以长驱邻国歛兵而自戢纵横驰河内之地谈笑取王官之邑指茅津而反济封殽尸而洒泣挫夫强晋既闻国耻之湔威彼西戎尤喜霸功之立兹盖舍生而往也非徒誓于击楫好谋而成也非不悔于冯河百败而勇气不讐一战而战功愈多归志与灰而共灭盛烈如山而不磨誓必破于秦师类湛船之项籍悲不还于易水小叩筑之荆轲噫秦将之忠也既怀报国之心秦伯之任也不数覆军之罪苟因一眚而遂弃徒使终身而自悔又焉得千载之下仰焚舟之风凜然如在

本强则精神折冲赋【以本强则以精神折冲为韵】

本既强固人斯服从得英隽以制胜致精神之折冲俊士朋来益巩尊崇之势威风远暨坐摧奔突之锋窃原君得士则昌国以贤为本苟并谋兼智也能以德而为固则怀奸伺隙者自闻声而远遁盖朝廷为诸夏之本能制胜于九重故精神折千里之冲自宣威于四远观其多士同德一人励精肃尔幄中之妙算凜然堂上之奇兵势既闻于克巩胜自全于不争朝有德而益尊人皆奠枕敌望风而引去孰敢争衡兹盖威棱之振也足以耸动于华夷誉望之隆也足以永为夫仪则人咸想于风采我何劳于声色宜其上兵伐谋大邦畏力晏子不出于尊俎兵自罢于邻疆齐威必胜于朝廷会果来于敌国大抵千里制难者以重任于贤士匹夫敢争者以轻量于大臣今也俊乂垂绅而搢笏臣主聚精而会神惟用儒而无敌宜不战而屈人止须裴度之神明以威悍将不假鲁连之谈笑坐鄙强秦譬如猛虎在则藜藿不采于山神龙居则网罟不亲于水今也纪纲法度有以巩固威灵气焰不可向迓国家安堵以无事邻敌从风而自靡顾厌难于无形非得人而易以贤五千之骑随何徒诧于片言止百万之师处厚亦称于一士噫子玉不去则为晋之患季梁犹在则挫楚之强矧多士之济济佐中国之堂堂赫然临之则夫谁与敌望而畏之则彼乌敢当岂不见汲黯居朝寝淮南之异议仲尼相礼归鲁国之侵疆彼有威却匈奴者未免于穷征口伐可汗者犹劳于面折未若此动容貌而鄙暴斯远宣灵武而奸邪尽絶方今优游于岩廊之上而精神折冲九有自闻于有截

岁星所在国有福赋【以岁星所居宜其有福为韵】

国既得岁祥斯应期占是星之所在有其福以诚宜仰以验之木精适居常次致当临之邦域咸被纯禧原天下之妖祥系岁星之赢缩且运于上者象不虚示则居其下者应为甚速爰占景曜适当所次之躔俯验吾邦诞受非常之福观其瑞色明润重华陆离应以仁也既存生育之理王于春也又司长养之时既循度而至止则锡美以宜其右行于天居一辰而不忒下临无地备百顺以无亏是宜君明臣直而世格昌期时和年丰而人欣乐岁师之兴也战则必克

政之举也事无不济由龙宿之所居故鸿禧之可继越人遇此终摧吴国之强晋室得之果挫符坚之锐大抵事将兆于休咎星乃为之疾徐超而前者或弃次而旅次行而失者或当居而不居事各有证象诚非虚惟岁之在也无东西之去则福之来也有山阜之如可以伐人请验马迁之史所之得地愿稽班固之书彼有国之昌也由太白之当期国之厚也以填星之居久况此应王者而纪于号令主岁事而为之统首苟非次舍之当居安得休祥之备有岂不见淫在元枵之次徒致郑饥既居析木之津遂兴陈後因知岁之行也虽本于天度岁之居也实昭于德馨今也太史奏瑞清灵炳灵生治国之百乐开宝运之千龄如是则贤士已登不必验少微之象刑章几措何烦占贯索之星王者以是考星次之攸居知天心之所与歛时福而民罔不锡讨有罪而人莫能御方今天相中兴而岁星临之孰敢犯王师之所

高祖好谋能听赋【以天性明达好谋能听为韵】

高祖独奋汉图以成盖有好谋之德又兼能听之明顾夙负于英姿乘时以起尤乐闻于羣议择善而行迹其提三尺以初兴念四方之未定谓不咨于衆则孰判利害不择其言则曷分贤佞从吾心之所好谋之其臧屈羣策之兼收又能审听观其逐鹿崛起断蛇勃兴善欲纳则如恐不及策可用则何为不能惟大公至正之是取岂小智浅私之自矜功为最高虽独称于赫赫计将安出每嘉纳以兢兢莫不说辞或悦于监门谋主或资于亡命食而吐哺也恐彼败事言其逆耳也知其利行设施皆合于衆智明達盖由于天性顾将军何以教深图东向之功非夫子无所闻爰下南浮之令非不知雌雄之势可决于一战甲兵之利可服于诸侯盖念至仁伐不仁也何必恃勇多算胜少算也敢忘用谋我是以疑切戒于筑室从有如于顺流为真王为假王悟陈平蹶足之语趣刻印趣销印用张良借箸之筹帝之性也非不聪明帝之度也非无豁達然而助桀为虐者欲居秦室之富养虎遗患者几遂鸿沟之割谋苟匪于能用乱何由而可拨所以关东欲弃问不憚于据鞏戍卒能言见岂嫌于衣褐难者曰赵王之立也不顾叔孙之争匈奴之伐也反囚娄氏之贤谋不询于多士智难合于敷天殊不知过虽闻于有此改必见于幡然遂令信彼四人爰割体肤之爱封之万户深惩械系之愆至兹骑项虽倨也諫而必从溺冠虽慢也贤非不好吾不爱于兼听人亦为之乐告故能举秦如鸿毛而取楚若拾遗翦一时之强暴

子使漆雕开仕赋【以开未从仕圣人使之为韵】

夫子善诱漆雕受知念从仕之未也爰因言而使之顾至圣以何心惟均教育视吾徒之可用俾効施为蒙尝尚友及门潜心诸子仕焉非苟于利禄学也所期于官使眷兹尼父当日则何以哉谓彼漆雕可以出而仕矣观夫心本爱日志思泽民惟可行之道不试于事以有用之学私淑诸人及门之士也皆欲効职升堂之子也谁忘进身惟此鲁人颇能参于圣学虽当周季俾往厠于王臣开也倏尔有闻欲然自视谓吾之学也固欲见于行事而学之优也乃可施于从仕苟吾信之未能何已长之足恃斯言既发殆门弟之未闻此意孰知惟圣师之独喜议者谓士之仕也固所素愿师之言也宜无不从然念道之将行则急于一命才或未充则难求万鍾虽尚迟于奋迅聊自适以从容所以进则未能垂嘉言于颡達喜其志道激高论于司农噫有帝王之学者使之为邦在言语之科者使之辞命苟非此子之善学安得发言于将圣今也

师以为可而犹切于退托道既未成则尚资于涵泳志有同于曾点姑乐舞雩艺或及于冉求始当从政彼有求价而沽者赐亦陋矣干禄而学者师何过哉岂若此心不求于爵禄迹宁滞于蒿莱历考阙里贤惟子开固异夫何必读书子路饰有民之说使之学邑尹何非制锦之才诚以志则在于恬愉心不谋于富贵才已成而已则犹歉师之可而吾犹曰未使斯人也出而仕焉功利之及民也尚何有既

天下可传檄而定赋【以今天下可传檄而定为韵】

世仰英主威行普天既望风而应也【一作乘破竹之势也】可传檄而定焉王旅既兴将大苏于远迹军书所至当自底于安全夫惟信已结于人心助遂多于天下彼陷于涂炭也无不徯我则闻吾号令也孰能御者赫然一怒皆延颈以望焉于以四方可传檄而定也时其士勇咸鼓民思已深万里起箠壶之念中原徯车马之音苟用十行之札足安四姓之心寰宇虽遥已欣闻乎大号尺书所至自平难于当今是宜叙百世之仁恩收三军之勇果书至河西则惊万里之明见节入北军则举一麾而袒左何在我之能然盖斯时而固可极彼不毛之地咸已顺从驰吾插羽之书自然安妥大抵强人之服者必假征诛之及从民之望者止烦命令之宣今也久矣愿王师之至欢然闻军檄之传自然奸雄畏力而屈膝老穉闻风而息肩所以光武陶仪函纸首安于平广淮陰遣使尺书亦足以降燕或曰民已见于归心国何烦于驰檄殊不知近者已附而远或未至弱者欲来而强犹作敌故我形惻怛之言也慰云霓之望振威猛之词也若雷霆之击俾尔怀德而畏威俾尔收功而底绩掉舌而贤五千骑岂劳辩士之随凭轼而下七十城何用狂生之酈向非戴商之民家则相庆思汉之人心焉悦随则何以当率土之纷扰也可空言而耸动之兴可冀也乱斯已而固异夫通彼夜郎止谕意于蜀道守夫鸭绿卒遗谕于高丽皇乎哉铅槩之儒也既务于讨论帷幄之臣也又加于审订俾万姓以咸悦耸百蛮而退听方今檄书风驰而人望中兴不假一戎衣而大定

仁孝二致同源赋【以仁孝之道二致同源为韵】

仁孝至重性情所根用若出于二致理盖同于一源究此两端皆良知之固有初无异体以大本之中存尝闻才非曰于尔殊人或多于自异语其大体则似有异用本之一贯则了无余事惟兹仁孝在人皆可以广充究厥本源是理曾何于二致观夫惻隐素稟爱钦自持行之闺门则致终身之慕散之民物则由一念之推莫匪斯心之举初非二道之为皆是物也孰能外之总百行以率先悉由所性虽两兼之难备安有他岐岂不以亲其亲而因不失亲老吾老以及人之老笃近举远虽则有别举斯加彼率由内抱信此理之不殊推是心而足保顾施物事亲之际虽曰殊途如钩深探赜而言孰云异道大抵孝之化也先以博爱仁之实也本于事亲苟志于仁则岂好犯上有一非孝则适能害仁虽运用或疑于前後而本原不离于真淳当戒波流之荡曾何派别之因本立道生载考鲁论之训功多事寡备形延笃之论是源也会精粗于一致之中合内外于同归之地使兼爱者知厚亲之道而敬亲者备仁民之意重轻非复于殊两先後岂殊于源委尊而安义道同曾子之三爱则无差本异夷之之二厥後道不明而去本益远性好偏而所施不同剔股孝也而深溺鄢人之过摩顶仁也而或沦墨子之风是皆得于此失于彼我则触而长广而充纯若顏回可并有虞之体德如閔子岂殊管仲之功以是知天

下之得盖以其仁圣人之德无加于孝见于日用虽有殊品求之吾心初无异教信夫仁孝之道虽二致而本同源又何必分其大较

孟荀以道鸣赋【以二子皆以其道而鸣为韵】

周孔既远孟荀挺生以斯道而自任在当时而善鸣仰兹名世之贤同宗一圣抱此觉民之术茂着英声当六国之下衰有二贤之可考以亚圣之才而无所施用以宗王之学而终于穷老其遇于世何如也既不逢辰不得其平则鸣焉独能以道观夫名重楚国学传子思优入圣人之域卓称王者之师恐斯文之丧也振吾道以鸣其顾二儒仁义之言一根于正用六艺诗书之教大警于时兹盖二百余章兮皆立教之文三十二篇兮悉缀文之美阐其前而振其後着乎心而入乎耳蔑千载未光之病岂没世无闻之耻时将驾说鼓木舌于诸儒经本吐辞和金声于夫子诚以轲之辩也非出于不得已况之说也不贵于难持奈何承道传之弊也叹德衰之已而如草木无声而风或挠矣如金石无声而人或击之苟非一鸣之善曷能万世之知久而益盈固异震雷之喻大而且远允同木铎之为宁不由别王霸之尊卑明礼义之统纪一时卫道也信同声之相应後世闻风也有德音之不已顾响应以能然非言扬而何以假于韶乐鄙弗能之后夔鏘若钧天小为文之韩氏故能倡正道以相和诋异端而力排南蛮之舛兮岂巧舌之能骋天下之鵠兮岂好音之孔怀俾衆议之不惑由大声之孔皆且异夫卿云最其善焉文徒称于壮丽魏晋未尝纯也辞只见于淫哇噫大醇小疵也虽或不同立言指事也未尝有二羣儒敢饰于邪说处士不容于横议然则先王之道至今在人耳者无他由孟荀之不坠

攻媿集卷八十

卷八十一

钦定四库全书

攻媿集卷八十一

宋 楼钥 撰

铭

胡德容安静室铭

民生之初未尝不静私慾害之羣邪交骋不操而存必也元圣勉旃学者无非中性乃若异端寂灭清静死灰不然何有于应寧知圣心尘不着镜妍媸坐分不将不迎吾尝从事万虑悉屏求静得扰薰莸终胜师乃有言求则增病必有事焉勿忘勿正安则何敢庶几游泳吾谁与归将求安定

赵振文母自欺斋铭

上欺乎天谓其甚邈下欺乎人意其罔觉事亲而欺所厚者薄事君而欺陷于大恶所利几何所丧甚博惟不自欺乃无媿怍一不妄语所守至约事是今日勿谓为昨推此而行余裕绰绰心惟至灵神不可度戒之戒之惟谨惟恪君如美玉欲资磨琢他山之石可以为错

族兄德润砚铭

惟端溪下岩之石藏古丽州之楼氏用以射策阅三世孙子相传宝千祀

王端本砚铭

四圭两圭同一邸未闻一璧踞十趾玉有五色今乃紫磨以禹圭滃云起羲献传家不知几傲睨挥毫约诗史淮水不絕壁不毁书种緜緜尚百世

赞

伏羲像赞

不履而跣不冠而髮是何人欤以治以察手持圆蓍画卦以八呜呼是所谓古之聪明叡知神武而不杀者夫

东坡画赞

出则凤鸣处则龙卧论议触海翻声名塞天破百谪九死一毫不挫呜呼固已知前无古人後有作者殆恐无有过之者也

吕真人赞

神气旺双瞳碧一劒横飞万里瞬息旁人道是吕洞宾堪笑旁人初不识

自赞

平生爱读书眼昏健忘不如故平生爱为人只有照管不到处老矣百事好罢休山林如许盍归去惟有媿处便须攻攻到无时方始住

伯氏小崑山赞

崑山片玉大不弥掌数峯天成暗合心匠悬崖峻嶒咫尺千丈主人乐山一见技痒环以清泚碧树增两海岸孤絶大士俯仰我亦膏肓谁会清赏援琴对之万壑同响

十六叔祖画赞

猗欤先生嘉遯岩谷中无一尘高视流俗面壁燕坐形骸土木是谁丹青写此面目旁观未知既笑而嘻此身见在何以假为先生粲然徐曰不然若谓是假何必此画咄哉此身又岂其真

赵禹川画赞

一室悬罄万缘俱扫道穷而志益坚心灰而形不槁予实敬之盖宣和西洛之贡士而淳熙宗室之遗老也

陆从老真赞

纶巾野服河目海口膏肓泉石而能起人于九殒之余衔盃漱醪真欲遯迹于千载之後是将傲睨尘埃之表盖隐于药而逃于酒者也

莫子大画赞

目光深碧长鬣如漆少从诸公故身处韦布而有素官之风自适其适故年将六十而有孺子之色是将坐安舆脱世故洗眼以看令子之翱翔而逍遥乎仁寿之域者耶

叔韶弟画赞

是何为者独立突兀目视云汉若书咄咄江山数千里而气益增齠髫十九年而志不屈故能起连桂之坠緒收青毡之故物今既渐失布衣之高是将敛湖海之豪而归寻理窟者耶

高会之画赞

风标秀整兴寄高远洪湲京尘而素衣之色不緇浮沈宦海而铁砚之志不浅吾欲与之一局以消白日五弦而送归鸿盖所谓向若而叹自崖而反者也

赵景瞻画赞

写照求赞其词多妍子求箴规意已卓然余讷于词为诵道家之言其言曰和畅命生卑退德生清静道生慈俭福生君能行此四者而又文之以学富贵何足论当遂为河间东平之贤

冯义叟画赞

曳筇者谁曰小冯君谓为山泽寒儒而有食肉之相疑为贵介公子而有惊代之文孤标如峯尖之秋隼秀句如春空之行云退然不言无异稠人若飞书走檄之敏高文大册之工有能试之老矣是笔力犹足以挽千钧者耶

汪强仲画赞

头圆骨紧短小精明种双芝之秀擷丛桂之英宦学有传清白是承勉之哉资稟如此母曰贤于俗人斯可矣冀有以振吾外门之家声也

丰叔宜真赞

志行超卓风神洒落袭清敏之余庆传黄梅之家学弟兄怡怡亲髮如鹤故居鼎新朴斲丹雘已而意慕山林身去城郭扫溉松楸以自伸其志甘守簞瓢而不改其乐萧然松庐一邱一壑搜苍石之空洞引瀑泉之溅扑信盘谷之可序而辋川之可貌也惜乎急景不可以久留泉石之膏肓又不得而药吾闻其风欲从之游意九京其可作耶

从子泽修净业以弥陀像求赞

弥陀何在云在西方垂一只手接引无际视日入处知几由旬一念感通如覩面见庄严五采聚紫金光全体现前若在净土汝以色相欲见如来一念或差万里悬隔惟此世尊衆称慈父汝能供养忏悔归依家有慈母与佛无二事母与佛其毕此生

观音像赞

宜兴蒋云起示余曹仲元观音像上有宣和御题笔妙在吴道子之上且曰上天竺瞻礼大士者衆今将摹刻山中使来者得此像以供养用资二亲冥福乃稽首为之赞

慈悲广大相好殊胜笔意精微乃与佛称自在在心固不在相察至秋毫出道子上携此西还刻之天竺流传八方植无量福

定光佛像赞

虫蚀成文屋漏成痕赠之以中天然者存拟议则错思量则昏断是无人能会徒自饶舌纷纷直教唤出南安岩主也只解说无门风铃摇殿角柔橹过江村

南山律师赞

曰禅曰教无非为人惟兹律仪尤切于身仰止南山与佛无间人天师尊不容赞叹

灵芝律师赞

南山既远教道中微化身再来是为灵芝持律益严护法甚劳灵芝之风南山相高

佛法自天竺流入震旦久矣而四海之外奉之尤谨今有日本国僧俊苾慕南山灵芝之法航海求师首画二师之像求余为赞苾公恪守律严究观诸书既得其说欲归以淑诸人余非学佛者吾儒曲礼三千散亡多矣然见于日用者如入公门而鞠躬上东阶而右足虽造次不可废也诗曰我心匪石不可转也我心匪席不可卷也威仪棣棣不可选也此非律之说乎归矣使律之一宗盛行于东海之东于以补教化之所不及其为利益岂有穷哉

哲老真赞

本是六一居士後裔郤做临济老子儿孙拈槌弄拂便习成出家儿事横说竖说都不见文忠之文若是金刚圈浑身透过栗棘蓬作一口吞直得齿如劒树口似血盆呵佛骂祖惟我独尊真个了此一段大事也不枉了打破家门

湖心竹谿政讲师赞

诸佛诸祖都知源流一片灵台莫之与俦万论千经纵横受用一段辩才压倒大衆定交方外一别九年再见似黄面老子依旧说教说律说禅指望他一口吸尽西湖水郤成火里打秋千季札挂劒于徐君之树吾亦说偈于老师之前师岂遂无知耶当亦盱衡而为余欣然也

监堂听老赞

咄这老顽顽于石铁喝倒又起棒打不杀急里翻身当机便拶若教挝鼓说禅也会七七八八
咄把似口罗舌沸何似耳聋眼瞎

瑞岩益老赞

铺席多年欲卷收又携一锡海东头云门不絶仅如綫命脉有人能续不

涂毒策老赞

涂毒已化一丝不挂谁模其形强为描画是见佛便呵见祖便骂者我铭其塔已成话霸更要
注脚我则不暇为此老从来颠蹶不知今在何许而精爽犹为可怕也

雪庵瑾老赞

俊辩不穷灵台无比庵空无人雪消成水若道成水流转未已一点洪炉永超生死

英老真赞

竖起硬脊梁论交铁拄杖栖云庵中若将终身十字街头蹴踏龙象大地一变直教寸草不留
大厦将倾敢将一手扶当翩然去之远隔风浪维摩示疾幸得无恙且须留取这老古锥要与
住山人作个榜样

寿上人真赞

年甚高业甚茂火冷云深松枯鹤瘦对鬼神而独说有翻河之辩口人望为大道师终不出一
只手迈祖风之高絶挽末俗之卑陋求之吾乡盖前有颜圣徒而今见此山之寿

瞎堂远老真赞

少识师于柯山之庵晚见师于灵隐之南荆棘林中吞栗棘蓬观堂深处见古瞿昙云归列岫
月印寒潭真圆悟之嫡子而杲风之同参也

圆觉庵澄师真赞

清浄缘深尘劳念絶虽见比丘尼身有古贞女之洁居然是圆觉庵第一代住持更不须横说
竖说

偈颂

双峯二偈

莫把资深两处寻此心心外更无心道人欲问资深话自得元无古与今

道非身外亦非中左右逢源作麼逢遶寺寻山无好处不知门外有双峯

新昌石佛

费尽三生心与力造成石像一百尺相好端严具足尊五采黄金妙装饰道不是佛卻不得若道便是也不得上尽层楼卻下来何曾见得真弥勒

游金焦两山以雨而辍

余沿檣行浙西冒秋阳之暴烈漕河絕流日有焦槁之叹至京口假舟游二山适是日风雨大作江头尤甚岂俗语所谓平生不卖浆者耶回城道中因忆本长老金山偈戏续其韵

金山寺裏山焦山山裏寺风雨劝我归也省两头事本长老金山偈云水裏有块石石上有个寺千人万人题只是这个事

跋惠峯询老所编类海

古德手段决裂剥地破?地折说道不立文字未免横说竖说草庵文字太多只为老婆心切若不作恁麼看将谓多口饶舌

题老融画弥勒

乘风欲去东南回头此意谁参当时蹉过足庵卻来攻媿同龕

戏赠怡云平老

深山中拔出闲身鬧市里寻得静处相逢了白话三通那个是末後一句不因闻所闻而来不为见所见而去岭上白云君自怡何时许得同龕住

送清道者住投子山

一鉢一衲一邱一壑非去非住无相无作一脚踏着投子机不被旁人轻摸索

戏题珪老借庵

莫道庵子是借底只你也是借将来劝君莫作来生债尽底还他亦快哉

不知当初问谁借至今久假而不归毕竟还了方是了卻须还我未生时

次仲舅韵寄拙庵

涵秋古涧落珠旒几欲相将作胜游芒屨未穿心已嬾不如莫莫且休休

明月堂前玉几山倦游双径却来还舅甥相与成三隐城郭山林等是闲

公居山外我城中不见成疎见亦空要是归来当一见待携藜杖访支公

莫把坐忘成坐驰归来须是识真归壶筹投尽无人拾澹坐藤牀风掩扉

送雪窦壁老住雪峯

雪窦移将住雪峯两山雪色本皆同莫言此去八千里明月往来含太空

游雪窦双塔登云檐有怀海印云老

来礼二师遗像小立云檐一饷欲见德云比丘却在别峯顶上

金猊本老领优婆塞衆求写选僧堂三大字示以数语

行者堂中选僧衆僧堂中选佛人道是我却不不如莫待僧伽梨便与竖起脊梁骨大丈夫休
汨没一粒爆起冷灰豆十分钝似辽天鹞赤脚踏透祖师关神锥击碎精灵窟君不见卢能只
在碓坊前解道本来无一物

题寿居仁独说图

向来八万四千偈舌端辩才若翻水山空月落说向谁不如出口入吾耳当时受者亡是公乌
有先生子虚子我却曾见语录来祇有空空数张纸

题壁老笑庵

笑甚底笑甚底若要笑时笑杀你说梦梦中洗泥泥里头上安头以水济水个个一般滔滔皆
是我也要笑来终不欲开唇露齿

题宏老空谷

君看空谷自然空声有洪纤应则同正为中虚声自应莫将应处做神通

听老自号监堂来住芦山山中先有监堂

监堂来住监堂中两监相磨只一同要是非堂亦非监但见寂照含虚空

跋涂毒与惠老偈

我铭师塔而不识面一瞻顶相烂烂岩电横说竖说不待饶舌涂毒一声百兽脑裂

次韵伯父与心闻偈

绍兴二十四年伯父帅维扬时在郡斋见所与心闻一偈庆元六年听老示及真蹟恍如隔世敬次旧韵

法器何妨待晚成一朝点铁便成金拽开鼻孔力无限坐断舌头功更深扬子江头言在耳灵山会上笑传心自怜钝置无香气四十年来只似今

汪耐翁以最首座十玄谈见示

十首玄谈已赘疣劳君头上更安头若还又有九百汉葛藤相纏几时休

题龙眠画西域圣僧

放两不借叠双足自在在心机在目默然深入不二门不知师唱谁家曲

戏答益老寄方竹杖

瑞岩益老寄方竹杖书云不可削圆也一笑又举大德拈起拄杖全得这个力话谓攻媿下语下得一任提持下不得夺却作麼生区处快道快道

家家竹杖只圆光此竹如何得许方削得团栾无可笑蓦然夺去亦何妨咄哉得力处不在这个

答东山一老二偈

即心是佛本无难错卻丝毫隔万山知有毗卢五千卷谁能分寸费跻攀

闭门深坐日知味无限好山都嬾游城里山中俱是隐江湖不若两忘休

送一老住庐山归宗

久向东山卷藏经鬼神推出举军惊从来要去庐山住好就山中过此生

啐啄同时不偶然史君提起正当年向来闹市难行道今日人天听说禅

千古名山大道场止因赋重遂荒凉後之君子谁能弛试向山前问老苍

归宗法窟寢湮微拭眼余风靡子遗法鼓一声精彩变要如光弼用军时

庐山面目非难识横岭侧峯皆是真若待出来方识破不知何用个中人

题庠老颐庵

下震上艮下动上止分明两片口唇包着许多牙齿祸自此出故以言语为戒病自此入故以饮食为忌庠者养也颐者养也名庠而住颐庵知他养个甚底直待吞卻栗棘蓬更与吸尽西江水莫问这边那边都是一个道理

题慈溪张氏坐化颂

慈溪董君之妻张氏坐化作颂云有身有苦无身无碍撒手便行这回自在柏泉诸人称之为下一转语

苦是自苦有谁缚汝碍是自碍非身为害既知一物本来无何待行时方自在

书全无用语录

全公无用无用之用生前已自无用死後葛藤何用虽然如是善用者必自有用不善用者不如勿用试问大衆如何则为善用有时拈起一枝草作丈六金身有时把丈六金身卻作一枝草用

跋正法眼藏

正法眼藏当时灭卻那得许多落落索索问着则差答着则错喝也喝不住棒也打不着妙喜更得工夫时与下个注脚休休休莫莫莫若要拈花微笑底事不二法门也低一着

攻媿集卷八十一

卷八十二

钦定四库全书

攻媿集卷八十二

宋 楼钥 撰

祝文【案原目此卷前有致语十五首上梁文四首劝农文三首合为一卷已缺佚无存又有青词三十四首别为一卷疏文九十六首分为二卷大率道场祈醮佛寺功德求僧募缘之作今竝删去】温州修大成殿祝文【教授】

殿久弗葺隳蠹日甚神像在兹惧将压焉易敞从新飭工伊始恐惊神灵不敢不告

台州谒庙祝文【通判】

东岳行祠

泰岳以肤寸之泽及天下功利之在民物者何止一邦钥佐郡此来伏谒祠庭岩岩之瞻邈在天外神听则近尚其顾歆

灵康行祠

惟神之祠肇于永康而灵响之着盛于台城乃崇寧元祀曾祖来守以神之陰功闻于朝是以有仁济之封钥佐郡此来所以事神者何敢不肃祇事之始先歛祠下灵康之谒少俟朝夕惟神其鉴之

诸庙

州之民吏治其明神理其幽神之血食于此既久功利之及民者深钥佐郡此来祇谒祠下吏之事不敢不勉惟神其陰佑之

灵康正庙

王之威神震于一方疫疠雨阳罔不禴禴昔曾大父来守海邦列功于朝侯封有光钥兹叨佐州祇敬灵响岿然祠庭襟山带江千载乔木郁乎苍苍再拜致谒肴鲜酒芻愿广陰佑保綏此疆十雨五风丰年穰穰吏责苟逃神赐敢忘

辞庙祝文

先圣

夫子曰君子学道则爱人 钥未知道而愿学焉 美员此邦所未底于戾者 夫子之教也 今去矣 敢敬致辞 然夫子之道无乎不在 钥之心亦当无乎不勉 盖夫子之庙可辞而道不可须臾离也

诸庙

钥赘倅此邦首尾二年年谷顺成无菑无害神之福吾民者如此而吏之被赐也尤为不赀 今去矣只拜祠下非敢邀福于身愿神之福吾民者千载犹今日也

温州谒庙祝文【知郡】

先圣

夫子之道万世所尊 夫子之尊万国所共 钥顷尝分教今十五年 奉释奠之旧仪 葺大成之广殿 兹叨假守 尤仰师尊 夫子有言曰 敬事而信 节用而爱人 使民以时 钥虽不敏 请事斯语 惟夫子实鉴之

诸庙

永嘉内外百神咸着灵响【祠山云惟王威德着于东南创祠此邦民已受赐 海神云惟王勲业冠于唐室威德着于是邦】 钥顷尝客授祈报屡矣兹焉假守获共香火之奉 今岁旱灾甚广独吾州有年神之赐厚矣 国家张官置吏凡以为民祀典所载亦惟有功于民者祀之 秋气方中岌岌然以风涛为忧愁霖未止愿亟开霁以全农功 钥不敏竭力以祇王事惟神有以相诸幽则吾民其庶几乎祇谒之初敢敬以告

祭酺神祝文

惟周礼族师之职春秋祭酺郑康成云螽螟之酺庆历之制有蝗虫则祭熙宁议臣欲每岁春秋行礼终不果行乃闰五月丙戌以虫螟为害祭以致祷赖神之赐随即衰息兹当晚禾秀茂之际又有食其心者士民以前日之灵异来请不憚再渎复举斯典诗云靡神不举靡爱斯牲而况明神见之礼经着之祀典专职于螽螟者更不敢辞其劳神其不倦于应俾田祖之神界之炎火以全岁事于垂成不亦休哉

辞庙祝文

先圣

呜呼圣人之言可宝万世而况吾夫子集大成而又拔其萃者乎夫子之言曰道千乘之国敬事而信节用而爱人使民以时钥不肖试郡以来伏谒之始固尝请事斯语龟勉万一由是得二年之间田里相安今去矣敢以展谢四五年间十修释奠之礼顾瞻庙庭不忍遽去若拳拳愿学之志又非止乎此也

诸庙

惟明神福永嘉之民民之谨奉香火于兹有年矣钥试郡此来荷神之休凡有祷祠无不响答今岁尤幸十雨五风以迄康年晚禾阙雨不免烦渎秋高气清忽霈膏泽岂么麽能动神听盖千里之幸也吏之抚民不过二三年钥拳拳此邦无异乡社今去矣既谢灵贶神其加惠斯民于无穷哉

工部加赠焚黄祝文四首

国家藏事于南郊大賚四海钥以叨列朝籍赠先考为中散大夫呜呼惟楼氏世有积德衣冠相袭既百三十余载矣自曾大父金紫而下阶官至朝议者三人俱不及生登五品我先考历仕几一甲子谨廉周密始终无玷阙官簿益高寿七十有六而束于新制乃今而後得之仲兄既不胜丧遂不得同致恤典焚黄九京追痛罔极伏惟昭鉴歆承宠渥

钥伏自淳熙十四年七月假守永嘉辞拜莹下圣朝恩賚动及泉壤先君赠典乃至八前四者固尝燔黄以告矣今皇帝登极已而钥迁秩中奉又遇明堂大礼累赠先君为正议大夫今者钥由权吏部尚书丐郡得婺按故事以请于是遂有正奉之赠归扫松楸泪沾宿草敢以四告并侈上恩惟我先君位不称德积庆流衍十年之间宠渥踵至不肖子钥蒙被遗泽年除岁迁寢逾分量幸逃谴何得遂一归皆先君之赐也尚惟祇服命数以佑我後人于无斁

惟皇帝御宇之四年亲祀南郊霈大泽于天下追荣之恩普及泉壤呜呼显考积厚流光钥不肖祇服义方凭藉陰佑幸不坠门户以为先君羞十有四载之间告第燔黄至是而九兹敢以宣奉大夫之命荐于莹域顾瞻松楸音容如在尚惟歆鉴式绥宠渥

伏自嘉泰三年郊祀大礼考加赠银青光禄大夫妣加封安康郡夫人恩命未颁显妣遽弃诸孤忧苦摧割未遑藏事去岁天子宗祀合宫又赠考金紫光禄大夫妣安定郡夫人呜呼显考捐馆于今二十有六年告第之典至十有二今既视秩天官追踪曾祖显妣克享上寿石窆啓封至再至三康寧考终洵更大郡余庆所暨燕及孙曾世受国恩存歿俱幸惟是奉显妣色养之久近经初忌又首行燔黄之礼钥等不胜哀慕之剧谨并以四告三黄展仪莹下

移长汀庵祭告祝文

三代并陪葬位

钥等罪逆酷罚母氏大寧郡太夫人汪氏倾逝伏自淳熙十年先考葬于长汀祖庵之後是时即议少迁冢舍因循二十余年兹以母氏卜日合祔移庵于左敢先奉祖考神主于享亭庶免斤斧工役惊动神灵俟新庵之成复还庙室伏惟鉴察密赐陰佑俾大事克修钥等不胜哀痛感激之至

先君工部

呜呼先考之葬二十余年矣体魄安静子孙蒙休久议迁移祖庵不敢轻易天祸我家母氏大寧郡太夫人以正月九日弃诸孤攀号擗踊痛割何极钥等忍死力贫已豫卜十二月八日丙申奉太夫人之丧祔先考之墓将以此月二十二日丙辰解屋填基伏恐惊动神灵先于今日设祭昭告惟我先考默相大事使区区孝诚早遂素志永奠二亲九原之居不胜悲痛感激之至恤典将颁燔黄未果寒食之节以凶服不敢墓祭挂旛追荐并惟歆鉴痛吾母之不及见也

土地

先祖少师之葬建立庵舍今八十年其镇安松楸保佑存歿惟神是赖兹以母氏大寧郡太夫人之丧将祔于先考光祿之墓豫卜吉日迁庵于左方伏恐有冒明神谨用昭告奉神位稍就西厢俟工役讫事别当筑室妥灵永祗香火惟神鉴察尚陰相之

毕工奉安神主

长汀建庵垂八十年物各有数撤而新旃显考之藏安康合焉惟此旧基实蔽新阡忍死竭力徙于东偏土木初兴神主告迁兹焉讫役奉以言旋载髹新位敬书揭?舍旧从新凭依永传佑我後來庆系其绵

乡校奉安先生祠堂祝文【代工部】

惟我曾祖以古学起家不务仕进退而教授乡校一时名公横经授业最为盛际里人推本文风之所由兴相与祀于学有年矣近又请于郡愿徙祠东序以致尊尚之意郡太守欣然从之遂为四明美事衰族预有荣焉粤子孙不敢以是勤乡曲身任其责堂宇一新像设严备其率子弟祇拜祠下以妥先生之灵世蒙余休惧弗克称继自今岁时瞻敬其勉进学业惟孝惟友以庶几先生之风以无负里人之意惟先生其鉴之

立皇太子祭诸庙祝文【以下代温州守】

皇帝惟宗祧之重豫建太子以固国本爰推恩沛惠绥万方凡郡国大小之神有功及民者命长吏咸致敬焉惟神庙食兹土法应得祀谨涓吉辰【一作谨遣某官】奉酒醴牲牢以荐馨香神之听之相我千里之民自今无或有旱潦疫疠之灾仰以答上之赐俯以为邦人之休顾不在兹乎

海神庙祈谢祝文

祈雨五首

惟神相唐若旱作霖精爽凜然庙食岁深民以旱告吏实疚心洁斋致祷罔或弗钦愿沛膏泽视古犹今庶几叹愁变为讴吟

海邦之民神所劳骄阳伤农下无告吏实不肖心是悼三日再渎神勿躁旱魃既虐风亦暴吹云使醯气不冒平畴良苗日就燥安得上天陰雨膏神兮至灵随所祷牲牢馨香敢忘报

夏旱致祷神既应之骄阳复兴实慙再渎暑气日甚嘉谷将槁吏无所告惟神是求愿为甘露迄成岁事灵应益彰报敢後哉

顷岁夏旱秋而得雨农功虽失尚收桑榆惟今之灾秋晚未已千里内外日以告病间有火惊无敢安处麦不入土後日可忧渎神再三顾岂得已愿为膏泽拯此疲氓

三时务农以神为命雨阳不若随祷辄应农事既闲人亦少休旱暵告病惟神之求连薨而居甘井枯竭宜寒而燠疫疠将孽神芘斯民尚听祷祈三日之霖拱而俟之

迎神像行道祈雨

旱灾致祷虽日造于灵祠甘澍愆期意尚亏于旧礼愿同佛像周历郡城列处黄堂慰万衆瞻依之切悉裒缁侣尽六时讽咏之勤庶神力之益彰俾雨师之速应人所欲者神其听之

谢雨四首

夏旱而雨功归于神神安厥居盖亦未几秋阳为虐于于复来不以为瀆而不我听三日之泽如响应声苗兴勃然一稔可待神之赐也敢谓偶然敬拜于庭神其来格

神居是邦民之司命曰雨曰阳来祷必应亢旱既久千里告病迎处黄堂用彰礼敬人心惶惶神实来听以陰以雨不俟雩禱肃神之归如初之迎揭?妥灵牲酒斯盛或言海气则风之证祈佑农功俾终有庆

秋日亢阳正此无告海风助虐其何以堪吏之不德不能销去精祈未既灵贶已昭神之爱民若父于子随祷而应是焉可诬尚请于朝以伸阳报

旱灾之余人心易恐雨小不应千里嗷嗷所不甚恐惟神是恃卫公精爽凜然如生膏泽所沾闾境告足率属来谢其敢不?尚冀时若以汔稔岁

祈晴二首

惟神庙食之久于民有功曰雨曰阳调护无爽吏政实愆致此陰沴雨雪不已欲耕未能怨咨无告惟神是赖毋以吏故而害于民廓清顽陰使遂开霁吏敢不勉重为神羞

春耕欲雨多则告病人既无厌神亦难应然念此邦倚神为命淫霖未已陰沴日甚嘉种不蘖汨于深泞东作苟失曷为农庆日在甲子占匪休证驱斥雨师惟神之令有祷于兹神其来听

谢晴

春霖太甚良农病之吏求于神日俟嘉应上勤宵旰德音四驰曾不淹辰廓清氛翳回视四野物物昭苏神实相唐功着千载變调之妙又及我朝曰雨曰阳尚期终惠

祈雨雪

惟兹东嘉岁事屡愆神厚其赐书大有年农隙而旱敢渎神听泉竭麦枯人亦告病岁云暮矣煖然如春又恐疫疠重困吾民立云滃兴密雪交下益以霖霖润及原野是在明神不劳余力倘终芘之何以报德

谢雪

冬温不雨为嗣岁忧致祷于神灵应如响微雪欲作先集于霰报神之赐庸有既乎

发海舟

郡祇天子命遣巨舰数十艘由海道以戍四明惟神庙食此邦灵应如响愿陰相之俾往来鲸波如乘安流无有惊畏则所以报神者敢怠哉

禳谢 风三首

永嘉灾荒首尾十年今岁之稔近所无有时阳时雨神赐实宏秋霖未已害我穡事积陰之久或致 风穷民易惊愁叹相属垂成之赐惟神是依驱除云师使见白日风伯退听鸣条不闻倘终惠之其敢忘报

鲁有爱居止于东门展禽曰今其有灾乎是岁也海多大风先事之占有可信者此邦岁苦风邦人畏甚春有飞雪以秋为期暑雨未休深恐驯致惟神灵响千里具依是用祇谒祠下豫罄邱祷曰阳曰雨神已佑之于前其终惠之汔我穡事

吏实不肖无功于民神曷芘之随祷辄应反风之感虽曰偶然如神之灵答祝昭甚震风凌雨

一夕扫除祇谢祠庭其敢不恪

龙女庙祈雨祝文二首

旱潦有数天实为之千里之润神实司之岁以旱告将困吾民天高难谏用求于神幽蛰奋起霈然膏泽俾成丰年何以报德

灵贶在民庙食久矣灵虽不渝祠则甚圯旱祷未答或其在是吏职养民视饥犹已神相于幽休戚共只愿嘘玄云沛泽千里何以报神葺祠旧址丹青相辉栋宇丰侈神之听之誓有如水

二龙潭请圣水祝文

岁以旱告靡神不举百谷方仰于膏雨神龙犹卧于灵湫爰遣属僚修郡故事仍将缙流讽咏致祷挹彼注兹虽曰圣水一勺之多赋灵于中端如泰山肤寸之润三日之霖将于此乎求之神尚肯来慰此渴望

迎四龙王行道祝文

深山大泽是生神龙旱魃为灾迎之幽宫圣水一勺神在其中甘霖未施吏罔措躬旗旄幡幢往从绀容愿驱妖沴回禄祝融愿呼羣灵屏翳丰隆尊居黄堂指麾成功膏雨浪浪黍苗芄芄策勲而归报神何穷

巾子山龙潭请圣水祝文

记曰天降时雨山川出云然惟神龙所居则肤寸之云雨辄应之郡苦亢旱祈禳之礼徧于羣神云出相望膏泽未下窃惟巾子山一郡之望真龙之所居也谨命县大夫修敬灵湫勺圣水以伸诚祷愿兴云霓沛以甘雨以慰渴想以苏千里以示神应于无穷不其休哉

九龙潭请圣水祝文

神龙之居实为灵山旱忧吾民神不得闲从人之来奋起幽蛰来即公堂杯水可挹玄云四兴千亩含滋为此泽者非神而谁求之于初万目所瞩目以将之其敢不肃神乎既居愿安幽宫节宣雨阳相予屡丰

平水王祷旱祝文

亢阳为虐方忧诚祷之未孚故老有言始悟灵神之在迓谓护国通天之号有济民惠物之功比岁以来幽祠寢废既上雨旁风之未免何西厢东序之足观虽吏民已谨于祈禳而守宰久愆于礼敬旱既太甚咎或在兹闻之惕然其敢寧止爰陈菲奠来谒明灵伏愿矜小己之寡闻

愀斯人之无告沛乎百里之润为之三日之霖誓率耄倪益谨牲牢之报且令栋宇聿观轮奂之新

郭先生庙祈雨祝文

维兹斗城先生卜之历千百年民用安之亢阳有祷神又听之庙貌之崇後其图之

祭勾芒神祝文二首

正月惟闰既望始春甘雨霰霖土膏坟兴祀牛于门协气是迎司我穡事惟帝与神歆此菲奠用介丰登维时发春盛德在木帝实主之神实辅之乃祀土牛用介穡事其尚居歆以迄康年

春赛诸庙祝文

惟神功利及物庙食此邦维暮之春聿修岁祀涓辰致洁徼福于民神之听之惠我无疆

毕文简公祠堂奉安祝文【台州】

兴国之初台为王土擢公朝行首綰郡组宣畅皇风蠲除虐赋去历华途为公室辅遗爱一方美谈千古君子人欽章圣天语乃昔尤侯建祠黉宇遗像未设阙典思举传之番易冠佩容与道貌睟然争先快覩钥去二百年叨继前武敢曰尚友庶几趋步于以奠之揭示仪矩曰士曰民惟敬惟慕

乡校序拜奠谒祝文【代乡人】

先圣

夫子于乡恂恂为先乡人饮酒後杖者出正月之吉敬拜殿庭退序长幼仰遵圣训兹与乡人饮酒以齿谨以清酌荐筵式陈明献

兗国公

惟公亚圣苦孔之卓非礼勿动不改其乐愿言曦之敬拜于学兹与乡人饮酒以齿释菜于先圣谨以荐筵之礼配陈明祀

邹国公

学以明伦孝悌具申徐行後长舜予何人乡党尚齿遗言是遵兹与乡人饮酒以齿释菜于先圣谨以荐筵之礼配陈明祀

攻媿集卷八十二

<集部,别集类,南宋建炎至德佑,攻媿集>

卷八十三

钦定四库全书

攻媿集卷八十三

宋 楼钥 撰

祭文

孝宗皇帝灵驾发引祭文【同侍从】

维绍熙五年岁次甲寅十有一月戊子朔十五日壬寅具位臣某等伏覩哲文神武成孝皇帝灵驾发引臣某等谨于道左恭陈薄奠攀慕龙輶臣等谨泣血顿首死罪言曰恭惟尊号皇帝道全德备仁熟义丰列圣储休承艺祖神明之胄中兴垂统绍高宗揖逊之传亶超今冠古之资妙旋乾转坤之略高出百王之表规恢亿载之图若孝德之大成盖圣人之未有永惟四海之养仰奉两宫之欢以万乘之尊躬行舜慕以三年之久亲执尧丧释神器以不疑事慈闱而尽礼方且凝神泰极介寿无疆乘鸂馭以上宾攀龙髯而何及千官号恸兆姓悲摧兹当同轨之期既庀因山之役臣等叨尘班列夙荷生成痛灵驾之莫回俯涛江而欲济同倾丹悃敢荐芹诚臣等无任号天摧絕哀慕感切之至臣等泣血顿首死罪谨

祭龚参政【茂良】

呜呼哀哉先生之生殆不偶然先生之用人则望焉先生之贬自古有此先生之亡则天道亦不可知矣呜呼哀哉尚何言哉圣度如天斥者多还使先生少须臾毋死且少北矣而何朝露之遽先呜呼祸福之变处之晏如疾在血脉而居非人之所居以马伏波之坚壮犹不堪飞鸢之堕况爱嫡埋玉之痛虽有铁心石肠能无动乎斯人也而有斯祸兹非命夫兹非命夫钥受知先生十有七年出入东合托身陶甄既惊叹于云亡又哀夫父子之相随于九原也闻旅榱之言归愧生刍之阙然向风一恸有泪彻泉

祭谢枢密【廓然 同寺监丞簿】

丹丘之境上应泰阶名德辈出未跻公台惟公特起抱负奇才遇事风生游刃恢恢一言寤主风云壮怀含香兰省钱豸栢台言听谏行天顔屡开青霄直上富贵鼎来洪枢运动大政参陪谓当自此翹轍盐梅天乎不淑梁坏山颓上意震悼生荣死哀某等叨列周行屡登翹材剑佩俨然公安在哉乃列斯殽乃酌斯罍失辞一恸我肠九回

祭王丞相【淮 同郎官】

呜呼鲁公气备才全结知三朝运逢半千绍兴之季已任谏垣敷历中外再归日边巍巍壽皇尤急亲贤知公日深擢之迹联忧国孜孜爱君拳拳无喜无愠不党不偏若不胜衣似不能言临机辄断得君最专爱惜名器避远势权旁求髦俊坐镇浮僇其崇如山其澄如渊宰辅七府十有四年弥缝藏用海内晏然缙仪大典奉以周旋无器可名靡劳弗宣经纶未究精力未愆名遂身退来归林泉舜亦命禹龙飞御天甘盘旧学盍归帝前上意倾属虚左待旃呜呼庆门多故天命不延羸博痛念风木悲纏竟不胜丧一病弗痊两宫震悼四方惊传某等叨列郎吏久与陶甄絶望袞衣阻拜新阡敬以菲奠远致几筵矢哀以词有泪如川

祭罗枢密【点】

呜呼天之生才足用一世如公之生为国之瑞气劲而和色温而厉立登要津以学自致年不可及衆惟大器亶亶九迁逼以富贵而公谦虚得宠思畏乐善贪贤惟恐弗至公尔忘私力拯时弊忧深思远语辄獻欵论事剴切无所顾忌退省其私不改端粹谓如若人宜居大位上以旧学眷宠尤异擢贰西枢望以经济才五浹旬一疾而逝天胡不仁孰主张是赋以宏才登之两地乃遽夺之哀哉殄瘁平生无玷俯仰何媿母方远归子不及侍公之齎恨有此一二某等仕同班列情均兄弟同寅协恭相勉忠义比日扈从尚得聯骑一宿九原惊悼丧气潭府方新贺吊相继矢词寓哀痛哭流涕

祭赵观文【彦逾】

惟我朝之天族兮分银潢于仙源极富贵于承平兮盛人才于瓜瓞之縣仰高帝之子孙兮固龙种之不凡惟我公尤为杰出兮掇儒科于妙年初小试于簿领兮騰政誉于瀛壖葺水利于不朽兮两舟之济人不知其几千由宰县以佐郡兮声名上彻于细毡阜陵畀以三辅兮藹遺爱之流传上不畏于强御兮下抚恤于黎元鉏积蠹之狡穴兮伸累载之幽冤将使指于诸道兮振风采于两川一介不轻取予兮信靡劳之弗宣出藩入从兮擢文章之迹联当绍熙之末年兮鯁论至于骈肩公实领袖于时髦兮心铁石而愈坚剧羣情之危疑兮方忧夫杞国之天发大计于丹衷兮皇天后土实临公之一言彼颂梁公之取日兮谓咸池与虞渊未若公之善断兮定策于万衆之先进忠谋于长乐兮又从容于平勃之间覩大明之继升兮措世于泰山之安无官可以酬公兮视政路之清班伟君子之劳谦兮推勲名而弗专望蜀道而再登兮兼制阬于帅垣服袍带而携琴龟兮追轨躅于赵张之贤方谗邪之竞起兮若蝥螳之羣喧驰睿旨于万里兮俾书龙飞之末与颠陷宗臣于罔测兮将于此而求旃孰知公方平心直笔以进兮无一语之党偏守陪都之管钥兮归佚于棹闲繙万书以自适兮若将终其身焉痛妖孽之肆行兮哀凶鞠顽而盜大权又妄兴于兵端兮致涂炭于三边公虽身在外兮切忧时而拳拳豁天地之开辟兮更汉化而改弦起大老于海滨兮询黄发而罔愆屈故事而不得共政兮为帝师于经筵俄引疾以告归兮返锦里而名全犹荐贤以报上兮又开东宫之新编曾经济之未究兮忽一疾而不痊邦国为之殄瘁兮惟我十倍于哀纏悵登门之虽晚兮幸接武于甘泉顷丐外而投闲兮亦来问舍以求田登百尺之楼兮十载奉公以周旋约五日以往还兮澹若水而无闲然酒三行而棊再战兮望之者或以为仙时抵掌以剧谈兮若相和之簾幄忝赐环之同日兮祖生先我而着鞭我方困于沈疴兮尚蹉跎而蹒跚陪露门之进读兮又聯鑣于九

閤公既扁舟而东下兮谓将相随而出关乃匏系而不得去兮徒尺书之翩翩谓独居而无偶兮幸蚤归而毋留连荷公之心相知兮梦日绕乎故园何天之不慙遗兮弃尘区而蛻蟬念吾母之窶窶兮公之赐及乎九原感二子之受知兮正礼举于後而公山举于前繫龙门之高峻兮殆吾父子之宿缘何云翰之未乾兮惊身世之遽迁寄薄奠于總帷兮惨东望之风烟尚乞身以挂冠兮期执紼于南阳之阡相距才四岁兮亦岂久于人寰爰矢心以致辞兮洒哀涕之潺湲

又【葬事】

惟公操厉冰霜忠贯日月东西惟命险夷一节求之古人盖以安社稷为悦者也功成不居棹闲道尊更化还朝进读露门人望所归尚秉政机难进易退竟歌式微送公江干欲随出关匏系于兹梦寐故山寄声促归相从暮年我未得去公已登仙疾不及问丧不得恻尚期执紼少展悲痛抗章乞身六请未俞闻公窶窶哀不足而媿有余亟遣长孙往致刍奠东望佳城老泪如漣

祭赵侍郎【粹中】

呜呼惟公族系盛于山东貂蟬风烈衣冠所宗建炎南渡名胜昂顚源深流远古今贯通父子兄弟师友磨砢惟公问学俊气如虹词场策勲雁行離離一登朝班雅望已崇上嗟见晚眷意日隆年除岁迁龙飞云从容台道山螭坳储宫琐闥批敕仇然献忠天官铨综奸弊一空论议从厚古人追踪遇事敢言执节始终煌煌艺祖配天其功东向之议公论所同引经据古昭若发蒙言虽未用後当折衷出守池阳吏凜民雍自兹倦游冥冥飞鸿僧坊萧瑟暮鼓晨钟人不堪处公方冲融卷不去手图书横纵顔筋柳骨翰墨尤工一觴一咏其乐无穷四明尚齿犹存古风虽有多乡老亦赖寓公公居其间俯首鞠躬人化其德事之滋恭庆霈既颁尽还故封宜对宣室自兹登庸胡为小疾乐石弗攻一朝倾摧如千丈松某等辱居里闾许入社中登临歡歌樽酒从容回首不堪顿失两翁遗像俨然素发方瞳有酒既旨有殽斯丰公乎来乎泪如奔洪

祭莫侍郎【叔光】

呜呼国之用贤夫岂易然成德如公而壽不延稟资中和宅心静渊决科者三其勇无前朝行恂恂似不能言义有不可论正而坚壁水道山柱史掖垣扬历清华斤斤十年直如朱丝思若涌泉简知益深擢居右铨进也未央何疾之绵方将引归朝露忽先一子秀发衣鉢有传公固无憾人谁舍旃矧如我辈俱忝官联不见几何遽惊蛻蟬相率来奠尚陈豆筵公能来乎有泪如川

祭陈阁学【居仁】

惟公少驰隼声晚以文鸣德望寢隆俊伟光明海内孰不知仰而知公之深者非至亲不得其真情盖公之性资浑然天成如浑金与璞玉器用莫得而名故人知其坦荡荡而不知其日用

之矩矱人知其无不可而不知其胸中之渭泾其治郡也但见惠利之及物而孰知锄奸之若谈笑其立朝也但见文章之经国而孰知献纳之出于忠诚以是举世称其长者士夫以为仪刑周旋五州有衰之爱盾之畏出入四朝有惠之和夷之清呜呼人不为不知而知之不尽才不为不用而用之未盈可以穆天紱而谋王体可以运枢极而秉钧衡於皇孝宗知公至矣谓使是人而坐庙堂自然安靖而和平大哉王言大用之意已形天胡嗇之殊迁之命交臂而失十年外庸身益远于听廷皇上趣归既及帝京衆心颺颺谓今必用矣而一疾困之身欲进而不能君门咫尺而成万里舟欲至而风引去于蓬瀛奉祠而归人已舛望犹庶几复起而为苍生岂知到家才越信宿而千丈之松已倾矣亲党为之恸哭远迩于焉叹惊天苍苍而难问遂将埋玉璧于泉扃耶钥生长外家小公九龄挹丛桂之芳润攀紫薇之余英相与事诸舅如诸父而中外亲密如一门之弟兄卒不欸于情话徒追痛于幽冥朗朗百间可以安享于上壽乃不得一日之宁登虚堂而进拜怅遗像于丹青衔悲送公郁郁佳城举一觴而致奠不知涕泪之交横也

祭史敷文【弥正】

八行之孙三公之子术业傳家公实是似小试词场再拔其萃才名已昭所欠一第入丞大农兰省摄事持节拥麾所至可纪太师年高貳卿即世相公煌煌惟公是倚拂衣赋归一则以喜周旋数年先意承志一旦执丧不堪哀毁窀穸之奉杖而後起遂抱沈疴忽若蝉蜕使假岁年顾何止此呜呼长才盖棺已矣【某】等托契素深游从晚岁持宪者五遽隔生死存诚觴豆兹乃来祭感今念昔相向出涕

祭王侍御【伯庠】

呜呼公之学术能世其家公之操履终始无瑕出遇圣明风云千载正色立朝藜藿不采退居里门善刀而藏天子念之起殿大邦夔子万里萧然一舸尚无图书安问蜀货一来东嘉益见真清爱民戢奸郡政向成公病已侵公志益壮孜孜于民以至属纆闾里相吊老穉涕洟正人云亡善类畴依精爽如生尚歆薄奠奉公之丧不敢不勉

又【同官】

惟公少年有场屋声晚登霜台四方威名出入蜀门清节着称凡我士夫想望典刑一闻公来奔走出迎待人之谦与人之诚相顾叹仰如见古人孰不自勉以事父兄郡政一行风采已新庭讼无留日益精明恂恂拊摩薰然慈仁时济以猛宿奸震惊博洽谅直如刘更生刚正廉介如宋广平此真吏师所愿奉承盛德如公宜百其龄天胡不仁夺我老成饮泣巷哭嗟叹相闻矧在僚吏若何为情卮酒未酌悲涕先倾

又【路祭】

呜呼公之来兮双旌纷马輿兮往迎公之去兮丹旄惨千里兮相吊曾日月兮几何乐何少兮

哀多欲攀轅兮執紼變歡謠兮悲歌嗟若人兮宜久蹇何為兮中壽巷哭兮失聲紛雨泪兮如溜設祖祭兮道周奠單杯兮泣樞瞻望兮弗及此恨兮何究甘棠兮岷碑尚千載兮不朽

祭薛寺正【季宣】

嗚呼天之不佑斯文耶如公之道學而施不昌天之未欲平治耶如公之宏才而用不彰議論之醇操履之剛根六經而貫百氏闡微言而蹈大方破千載利欲之謬妄掃諸儒章句之披猖蓋書無不通事無不練一話一言皆絕人意表橫騖別驅窮極幼眇而究其旨歸貫之以一初無相去之尋常施之政事著之文章真所謂不見其短又惡知其所長者斯人也而不及中壽福善禍淫之道奈何乎蒼蒼嗚呼公之聲名海內所尊然形之于外者不苟徇乎衰俗之見蘊之于中者人亦莫究其所存故不知者以為徒剛而已爾而知之者亦惟稱其直諒而多聞知公之深不過幾人言之則大而似夸矣尚何言哉相向而哭失聲者蓋嘗登公之門者也卮酒之奠相與悼善類之不幸一哀而出涕又何止為薛使君而已耶

又【辭靈】

鉤登門最晚受知最深人之云亡百身何贖解組東去莫預執紼英爽如生涼歆菲誠知己之報嗟無及矣尚行所知毋羞九原泪盡辭窮嗚呼哀哉

祭鄭龍圖【伯熊】

嗚呼和氣生物本無偏頗惟公之生得之者多德量淵澄而不見其涯涘性質玉粹而不勞于琢磨其形于文也渾然天成而上軋于周漢其進于道也怡然理順而深探于雄軻與之游如在春風之中登其門如入泰山之阿是非至明而涵容不顯其迹進退至切而雍容不見其他至于莅官則有不惡而嚴之風憂世則有哀而不傷之意發而中節茲又皆其所以為至和者也外庸既積物望朶重是當羽儀天朝登進法從獻納論思而格君心輔贊彌縫而藏諸用何皇天之不憖忽兩楹之奠夢仰絕識之超詣豈死生之能動惟慈母之垂白反銜哀而擗踊雖行道而心折矧為公之伯仲者耶【某】等登門最久涉學昏瞢時扞衣而請益或執經而折衷聞公之亡相與嗟痛喪不得束刍而酌葬不得執紼以送馳菲奠以寓哀徒向風而一恸

祭呂太史【祖謙】

嗚呼才難之嘆豈謂凡才治不如古亦云久哉思得一人庶几于此才非不多未知孰是必也學窮本源行有根柢古今貫穿而守之以約規模宏大而不遺其細議論正平而得事機之要人物兼取而無愛憎之累表里如一俯仰無愧若人者夫然後退可以為後學之師表進可以居朝廷之大位覬斯民之小康抑吾道之不墜惟公其人歟胡為抱道而不得試也嗚呼天之生公其亦甚難而不易賦之德而嗇其壽誘其衷而不使伸其志蓋天子欲用而公已病病不可以為矣卧家优游尚足以矜式于一世何疾困之宿昔而逝嗟此數年凋喪善類天乎天乎又奪吾大賢是真可為痛哭流涕者矣【某】等登公之門嘗聞余論之一二顧平時師仰

之不暇尚何敢知公之所至诗不云乎人之云亡邦国殄瘁抑公其人也相与设奠而哭以斯文是岂曰吾徒之私意也耶

祭吕寺丞【凝之】

呜呼泽甫百夫之特学博而通文丽以则雅量镇浮长才办剧妙龄世科幕府婉画乘边二年日着声绩分符闾风再登上国入奏帝前漏下数刻论事衮衮济以亮直庸节之学茫昧莫测君得其传若数白黑往古来今可验可索上意响合动容叹息曰卿毋行其在予侧俾丞外府始有朝蹟雁序横飞家声赫奕行且用矣何丧之亟向也闻君才气无敌迨入修门已见病色惟我同僚得友三益每怀私忧勉亲药石戊辰之朝末疾俄得径走君家已云易箴呜呼天与以才而壽之啬秘此絕学不使究极樽酒论文谈笑翰墨俯仰之间已为陈迹岷峨西来万里泛宅今将安归行道嗟惜难兄乞州经纪甚力庶几孤嫠同此休戚钅定交虽晚义深匍匐遇哀一动涕泪如激

祭从舅汪删定【大辩】

呜呼惟舅甥之间兮固曰至亲粤我之于诸舅兮有异于他人盖生长外家兮非一朝一夕之积公亦依于伯父兮自龆髻而为羣飞黄着鞭兮媿驽马之弗进一日千里兮怅奔逸之絕尘无诗不酬兮无樽酒之弗与琢磨至切兮亦游焉息焉而是均迨公之鼓篋上庠兮我亦继荐于乡老喜南宫之接武兮相与赐第于枫宸情好益笃兮几类于同气年不相远兮亦忘其分之卑尊仕于百僚之底兮气出万夫之上小试以事兮无不关于细毡之闻逢此百罹兮凡三仕而三已鼻间栩栩兮眇轩冕于浮云不负临贺兮反贻怒于柄臣引经诤律兮又以激僚友之纷纭卷怀于家兮志则在于当世沈酣经籍兮益以探圣贤之深醇进于朝兮可以使藜藿之不采居于外兮可以使功利之及民投以所问兮惟明时之所用此公之所自许兮人亦以期于君忽奇祸之作兮真出于意表曾一指之伤兮害右肱之屈伸惊一世之英兮奄盖棺而事已纷孤嫠之叫号兮何苍苍之不仁呜呼鉴裁至高兮不以我为不足语词章之雄兮若谓我其可以与于斯文顾忧患之沈迷兮荷抚怜之日至登公之堂兮君今其安存望丹青之图像兮何精神之逼真念一息之千古兮不知泪涕之沾襟翩飞旒之南征兮今其已矣言不成章兮尚何问于穹旻

又【同乡人】

呜呼景孟天赋奇倔少小孤立气已英发一登上庠径挹簪笏读书俊甚如千里之驹遇事敏强若辽天之鹞知已在朝声动魏阙当夷途之欲骧惊霜蹄之屡蹶浮湛里閭中不自屈方且横鹜艺苑深探理窟冀此生之有用耻修名之泯没虽矫矫亢亢高视一世而和之者寡然揆之公言顾岂非明时之人物也耶况复颍广颍张生有奇骨音吐洪畅辞条丰蔚充其所养壤剗荆何奇疾之遽婴祸乃生于所忽迨亲友之及知则已盖棺而竟歿矣呜呼今而後里有疑谋孰为之析理于茫昧事有难办孰为之应变于仓猝此士友之所痛而以福善祸淫欲归之于恍惚者也家四壁立夫将安施孤嫠一恸行道伤割某等义笃金兰契连瓜葛悲埋璧于

黄壤揽寒涕而执紼呜呼景孟精爽何之尚能闻此言于髣髴矣乎

祭姜总管

惟公生长京华起自戚閤积习富贵遭时多难乃能奋身自喜吏干天资精敏儒雅饰缘治丝之纷解绳之乱投以剧繁谈笑立办结交老苍衆口争荐中外筦榷所至增衍郡国韬铃足当一面五十余年宦游不倦晚而退休雍容闲宴为生有涯雅意作善结庐百间藏书万卷兰玉秀发簪笏辉炫外台荐书上合宾赞寓公寄客如公者鲜壽几八帙乡间歆羨胡为沈疴奄如露电呜呼中原战氛陆沈赤县开元旧事于今几见承平王孙少日更练灵光一荒有识相嗟某等里社从游交情恋恋岁月侵寻惊此物变曰樽曰醕曰俎曰饌矢哀以文有泪如溅

祭刘宜人【王台州母】

猗欤夫人婉孌静专生自名族嫔于太原夫人之夫学行推贤乐善好施余庆绵绵夫人之子壮岁腾骞高牙大纛名郡蕃宣相夫一心教子三迁彩衣斑斓孙曾满前慈祥恺悌举无间言五福兼备富贵俱全丹丘赤城版輿轻轩壶彝妇则谁其比肩自奉愈约执谦愈坚待人愈厚奉佛愈?一语不妄一言不偏坦夷真醇得全其天少疾考终忽如蛻蝉壽开九帙尚何憾焉某等托在乡曲又忝姻连升堂进拜于兹有年慈容如生望之退然设奠矢哀涕泗潺湲

祭史宜人【太传女兄】

惟灵八行之孙拾遗之妇孟母之贤共姜之守古称五福其一曰壽夫人尤盛年帙开九惟我魏公视姊如母【唐杨慎矜兄弟友爱事姊如母】躬率四弟备极孝友俱登高年世所未有六老成图夫人称首庆事方隆疾已在腴进粥療须医禴趋走夜半讎闻悲哽心疚?惟此风俗可归厚女壻乘龙芝兰俱秀终始哀荣何憾何咎某等出入相门于兹岁久薄奠荐羞泪落卮酒

祭族兄心上人

惟我鼻祖四子俱贤仲生先生衣冠蝉聯曰伯叔季仍居奉川既富且庶後乃日脩人物雕零赖有达源天乎不淑朝露溘先寿虽已穹惜不少延达源之生俊气腾骞使其起家必收青毡少从释氏白业精专结交老顏直与比肩曰律曰教又参枯禪说祖正令室中机缘通贯一理如珠在穿旁及百家覃思钻研纂言记事细大不捐出其绪余翰墨诗篇流传江湖声价愈喧世晚寢薄空门亦然耕而卤莽乃芸人田耳剽涂说妄夸真詮行有说空诳欺人天惟师高蹈得味中边或劝出世如坠诸渊先君爱重挽之使前陈义甚高万牛莫旋我倅丹邱来游万年欲与同车往寻只园曰无累我徒惊林猿踏遍胜境径归海壖孤云悠悠独鹤翩翩念之意消望之若仙诗晚益工节穷益坚一鉢一衲遂以终焉我媿晚出最辱爱怜家有书种俾其力传名节器业俾其勉旃我恐不称服膺拳拳师弃尘世其犹蛻蝉有骨已灰无铭可镌敬书梗槩以赞遗编茗盃三酌泪下迸泉

祭谢云台【杰】

呜呼谢公人物之英爰自上蔡斯以道鸣继以大参又有列卿文献奕世不殒其名惟公岿然见谓老成文如绮错辩欲河倾诱掖後进纠合宗盟高怀肮脏不以事婴漫仕委顺浮湛半生一邱一壑自喜独清永嘉名邦来为郡丞关决之余名流合并风流醞藉至今有称然诺不侵自主门庭有如不肖一见心倾忘年许交语必尽诚去秋末宦寄径赤城冲热远临握手通情黄山密迕诗筒屡赓自言多病懒入帝京慨然奉祠欲为此行冀幕府之裨助望前辈之典刑喜而不寐日听先声苟孤纵之未汰当倒屣以逢迎讵音忽闻心折魂惊痛斯人之云亡伤耆老之雕零览翰墨以犹湿乃遽隔于幽冥亟驰菲奠以写中扃望东山以兴哀尚髣髴其来听

祭周通判【去非】

呜呼直夫而谓止于斯乎始虽同登各天一隅余分郡符君方忧居间至偃室退公之余讲易谈元为之踌躇剧论世故发蒙砭愚再仕峽南备历崎岖代答一书曲尽锱铢倘不忘远当有取诸前宰剧邑赫然有誉遇事不苟动有规橐忧患熏心笃志弗渝渴然自忧求方于余谓当良已乃终弗除抱负不凡有衿不祛曾是半刺仅得绯鱼近传短牋周姓言孤啓緘恍然乃君遗书死生大矣何其舒徐挥翰寄别其言穆如数五十五尚明堪輿明月清风犹能自悟通乎昼夜晏然不殊呜呼直夫而又何憾乎下交私情惊怆欷歔对客三诵泪与之俱净光东麓遥望故庐矢哀以词奠之生刍

祭陆提刑【洸】

陆氏家声源流云间左丞儒宗振于陶山大漕徙鄞及见盛际双椿偕老八龙列侍公尤秀出三荐漕台漫登臚仕益展长才荆门拥麾课最上彻孝宗一见畀以华节敛散得宜流殍再生就陞宪车刑期无刑大狱株连平反甚勇烦言俄兴公不为动得请祠庭赋归翩然士师辨明卒如公言宏远之业卷藏退处卜居斯成生计楚楚里社相从期公长年小病困之卒随逝川窀穸有时来致菲奠矢哀以词有泪如溅

祭赵安国【镇】

惟君孝于奉亲友于羣弟自信淳直澹乎世味心计有余能振其家乃筑新堂不陋不华优游卒岁足以自适忽焉已矣天乎莫测青山满门寒梅满坡公则云亡伤如之何丧此善人乡里嗟惜举觞一酌涕泪沾臆

祭张梅州【祖顺】

呜呼刺史为千里之尊人生以五马为贵苟仕宦之平进率以次而驯致今之士夫孰不为之何于君而独不以畀公之才足以办剧其严足以戢吏折狱则敏于片言理财则优于心计谨于奉法鋭于立事此真良二千石之选也而屡得屡失得又不久终不得以行其志自宰龙游

政声甚美擢守武当时方壮岁既而数奇三仕三已往倅番禺荐牒交至就秉一麾谓自此升矣而遽以不起予之早而夺之屡引之深而寘之于烟瘴之地是果有司之者耶岂造物小儿之见戏也呜呼踰岭来归川陆迢递一家累然行道陨涕矧乡党之素交而同社之深契公之将行开樽尽醉曾岁月之几何而举觞以为酌灵其来乎庶知此悲痛之意呜呼哀哉

祭赵运使【善□】

公生于荆南长于五岭与七闽居乎乐成卒于杭而葬于鄞余与公倾盖稽山寻忝姻家中虽屡见而莫从容于永嘉望公自此向用矣而送公之丧于啓霞呜呼是岂偶然也哉惟公才具有称既敏而明受知孝皇擢真列卿谓宜持橐仍尹神京流离数年起拥双旌飞刍江右转饷帝城文母上宾因山为陵公方力疾办护讫成跬步要津径登西清疾势寢革大命以倾天子震悼亲党叹惊夫孰知公此理素精悟死生几如旦昼知吾身之不可以久生也谢医郤药湛然中局爵禄在前不复入于心恩爱至重不以关吾情泊然长往无物可婴然则公之自处者如此吾党亦何为而哭失声耶钥投分素深齐年为兄爰设薄奠以写此诚盖一死一生而交情乃见余亦不知夫涕泪之纵横也

祭舒签判【琬】通判【璘】

猗欤舒氏何其多贤昆仲飞英俱自少年西美元英既已玉折于往岁所赖以主门户者惟传正传道元质之鼎立而乃相随于九原耶惟吾传正负气敢言晚对大廷直声凜然止或尼之不至帝前尉于武昌恩威并宣日剖滞讼自以不冤五溪峒蛮动兴戈鋌匹马深入且谕且鏖投戈解仇罗拜马前远迹惊叹咏歌四传通籍金闺将宦闽川一疾困之遂至沈绵祠禄甫颁朝露遽先惟吾元质良知自天蚤登上庠受知南轩一日千里师友渊源学道爱人中心拳拳新安客授范模陶甄横阳抚字吏畏民安私淑诸人春诵夏弦本思无邪贯三百篇处以治中伤哉士元呜呼二公之亡也固无所憾于其身我之吊也伤吾今不复见此二人兄之于事如烛照而数计季之于人如熙然之阳春主盟义风声至响臻事无剧易人无故新乡有曲直不于公堂而惟兄之愬人有叩请不之他人而惟季之亲今而忽焉连璧沈沦呜呼天之于舒氏何多予以才而不使究于用不予以利禄而强其名岂名者造物之所甚贵有非利禄之所能均耶我有疑虑从谁咨询里有後生繄谁是遵悲夫伤哉灵輶有行双旒相因薄奠写哀岂吾侪之私情上为清时惜此人物而下为吾乡痛二公之不得伸也

祭从兄少微县丞

惟我大父二十余孙列为五家同出一门岁久凋零仅有十人兄为之长又殒其身兄号秀颖早登成均谓收世科致身青云留落久之始预搢绅数年之间为尉为丞介然自守不缁不磷归而後病卜筑湖滨奉祠香火女嫁男婚庶可供老而疾已成抱疴视?伤哉沈沦诸父盛时游宦频仍礼智二院久矣比邻两家子弟情谊尤亲读书从师调琴相应方期晚岁杖屦逢迎幽明遽隔孤嫠惻惻葬从其先远日数旬酌奠送行涕泪沾巾

祭李府君【奉化乡人】

东郭之外湖水清澈修梁驾空霜筠茂樾居者何人如湖之清有隐君子陇西先生先生之家为儒裔世上舍之孙香弯之弟仰屋着书其书满家不偶于世乡闾之华鸾鹤精神方瞳华发望之俨然叩之斯发三絶韦编究极微言身则已矣此书当传谓君百年後进承楷一疾困之无不伤骇原始反终旦暮死生书种有继何恋何营惟今来者非亲则旧典刑之亡使我心疚窀穸有期来奠一卮哭者失声先生何之

祭表兄冯藉田【端方】

外门汪氏诸表森然惟我与兄始终周旋姻好裔世生又齐年嬉则同队学则差肩惟兄敏悟得之于天加以笃学经史贯穿长而属文思若涌泉俱从郑师尤工赋篇鸿庆孙公一代儒先见兄骈俪叹惊属聯得兄百韵报以长笺二文照映至今流传盍登青云操笔如椽命胡数奇场屋迤邐年及半百始沾赏延所至文鸣笔力翩翩词人所长多工一偏兄备衆体词妥意全间见层出左右逢原持之以谦似不能言晚尤清修一室罄悬久依相门宾主俱贤贵名日起益壮益坚擢居掌故进司藉田享途伊始一疾弗痊荐绅嗟惜亲党涕涟兄我所畏猥先着鞭吾徒掌制媿在卢前极口赞扬未尝舍旃喜兄欲达而乃忽焉總帷咫尺欲酹无缘亟遣儿曹往陈豆笾矢哀以词历历究宣言不尽意老泪如川

攻媿集卷八十三

卷八十四

钦定四库全书

攻媿集卷八十四

宋 楼钥 撰

祭文

祭叔父彬州【代工部】

呜呼我父是生五子惟我与弟年差无几幼则同队长则共被矫矫三兄雍熙同轨岁星一周
沦谢相继雁序雕零门户亦替相与为命二人而已平生宦游动则千里晚食祠禄俱还桑梓
筑室比隣为终焉计弟室先成如跂如矢我家未就犹费经理寓止外舍相去密迩有景共赏
有酒同醉杖屦相过中有真味所期百年同此燕喜弟抱微疴时作时止我官于朝祖饯如礼
执手郊原勉进药餌时得安书亶亶盈纸犹子来调得官辟水弟虽卧病颇亦自慰归侍十日
遽已疲瘁医祷百端竟以不起呜呼哀哉才术之施十不一二两宰剧县一佐边圉精明絶人
所至可纪莅官行法治家处已内外斩斩无小不治谓宜进用以继先世天乎不淑遽已亡矣
吾之干禄聊复尔耳为饥所驱未免漫仕又谓小别不甚为意安知数旬便隔生死心摧肝裂
哀泪如洗使吾之心知其至是虽有万钟讵肯舍尔他时赋归浮湛闾里只影翩然宁忍念此
今也死不得抚其棺葬不得临其隧向风长号不知有生之为美旨酒嘉殽遣子以祭情伤不
文姑寓哀旨呜呼九京其有知乎犹以少见吾手足之义

祭安康郡俞夫人【蒋参议母代工部】

起于名门作配君子壺助之贤辉于彤史惟子惟孙斑衣盈庭子列朝行孙秀而文岁时上寿
簪笏相映家庆成图一时之盛年登八十胡不百年日月云吉将祔九原【某】等相与有连
事契不薄哀而送之奠此清酌

祭伯母冯恭人【同兄弟】

巨族之胄华宗是归婚好益缔室家具宜事夫如宾捧案齐眉抚族以和恩爱无亏秩秩子舍
兢兢孙枝抚循鞠育夫人是依季父游宦十年秉麾夫人从行鱼轩生辉方期来归慰此离思
亲戚团圞情话嬉嬉何意中途一疾溘危继以讦闻举宗伤悲灵輶西旋郊迎奔驰不覲温顏
徒瞻灵旗涕洒百行何悲如斯矧此仲春窈窕有期嘉殽在俎旨酒在卮情寓于文灵其听之

祭王枢密【刚中代仲舅】

猗欤王公生宋八叶身历四朝险夷一节贯穿百家艺苑耕猎其在江湖名已超躡出陈治安为天下甲道山峩巍金門岌嶱凤掖优处螭螭独摄大哉王言与典谟接坤维谋帅公论谁协帝曰汝谐往即功业蜀道之难扞参仰胁尊为忠臣叱馭不慑朝无顾忧威动边堞奉祠以归高卧乡邑东山雅志鸥盟不歃边尘忽惊骑 四匝羽檄星驰军书夜急尺一趣还承明再入首定国是终始坚执忠肝义胆越见眉睫臣主相遇神会气合樽俎折冲敌人震讐智略纵横关机开阖王师增气一月三捷侵疆复归信使响答遂登西府以赞调燮人皆谓公行矣爰立大厦梁栋巨川舟楫辅成太平光明炜燿天何不憖变生呼吸人之云亡孰不呜咽天子震悼为辍朝集见之恨晚用之无及存歿哀荣赠赙杂沓列官于朝莫拜马鬣灵輿啓途丹旌帖帖哀以送之千载一诀

祭郑衡州【若容代仲舅】

呜呼衡州才大屈宋笔擅雕龙调高吐凤妙年驰声出冠乡贡吾州多贤不利首送惟公开荒径挹晁董吏事精明万口归重亨途方辟八骏飞鞚谗口含沙巧发奇中退坠诸渊公不为动天定胜人复为时用惟公之文盍仪禁从清庙作歌追配雅□骥足方驰三刀形梦悠然漫仕无所修综闭合却扫胸次空洞至宝横弃称屈弥衆公乎云亡乡曲嗟痛来祖公丧为之一恸

祭赵路钤【不枯代仲舅同乡人】

惟公派出天潢生长昭代政宣隆平出入广内艰危奋忠脱身骑 卒归行阙官以寢大来归四明踰四十载待人谦恭处身静退莲社从游今为前辈樽酒相过雍容贵介扬清歌以欢洽谈中都而感慨盖今日宗室之遗老犹使人识承平王孙之故态也年踰七十风度不改郊庙侍祠峩峩冠佩属近行尊富贵未艾一疾困之遽至危殆呜呼安闲一堂真率高会忽焉陈迹乐不可再相与设奠以致哀尚英灵之如在也

祭徐少卿【子寅代仲舅同乡人】

惟公骨相奇麗德量汪汪和而知介圆而能方早继家声明习宪章旋自幕府径登朝行乃分左符乃奏明光留屯之策结知寿皇委寄日隆宠賚相望富贵逼人进用未央赋归十年林壑徜徉汉东天台尤称循良持节踰峽澄按南邦云胡不淑季子夭伤情鍾弗堪公亦云亡归途千里两旄飞扬行道賔涕而况州乡【某】等从游日望归艍兹登公门總帷在堂遗像如生奠此一觞相向失声尚其来享

祭赵恭人【王滁州之室代仲舅同乡人】

呜呼彤史不书女教不修闺门之间动多悔尤贤哉夫人独异辈流天予淑质婉嫕和柔不虐不妬不忤不求事姑以孝与物以周举无间言丰裕优游宜备五福益高春秋胡为累年心熏百忧使君既亡二子不留驯致末疾遂不可瘳【某】等辱在亲党具聆芳猷设奠一哀非为膳羞尚尔後人壺彝是收

祭袁通判【章代仲舅同乡】

呜呼惟袁氏四世五公盛于东都五世登科望于乡间惟吾叔平尤为耆儒少鸣胶庠文高行孤中年漫仕日着令誉晚益倦游有宅一区安贫乐道随时卷舒古所谓笃信好学守死善道居处恭执事敬与人忠者惟公兼之而有余寿登八帙皤鬓霜须出则舍车而徒字则蝇头细书外和内刚不可得而亲疎劳谦终吉矢死弗渝进不闻吕父之卜猎退不见申公之安车禄不及子二孙蚤孤养不至于列鼎仕不过于题舆人或不堪其忧而公处之则晏如也沈疴来侵水已浮肤天不慙遗奄归泉途识与不识闻者叹吁惟余齐年往来舒徐凡我同社视公步趋有几有杖有琴有壶载平时问字之酒奠今日一束之刍欲写余悲言与泪俱呜呼尚复有全德笃行博物洽闻之君子如吾叔平者乎

祭魏丞相【代王知道】

呜呼惟公盛德不可涯涘虽欲屡数莫究一二窃窥绪余盖本实地故其设施不诬不伪少而笃学寝食不置壮而从政动施实惠其奉太夫人也既备于色养又及手足之爱以承其意其事明天子也既尽于辅赞又罄啓沃之忠以顺于外敌再犯境淮甸鼎沸见大夫无可使者召从幕府张旌出使所谓飞矢在上行人在下而公神色不动讲解而归和议至今南北之人受公之赐者又不知其几也晚居碧溪不渝东山之志潭潭之居固已因其旧而山林日涉随其高下盖天作地藏以为公宴居之计益览载籍出入释老触物而咏遇客则醉其雍容萧散野老争席风流醞藉有晋宋之风度则又其余事也人皆望公再登端揆使其小却犹当出侯藩方使万物为之吐气不然处之林下尚可以典刑于善类天不慙遗奄弃尘世诗不云乎人之云亡邦国殄瘁其公之谓乎【某】等先祖诸父俱托夙契来官异县获拜簪履怜其孤?视犹子弟引而进之极力于嘘枯吹生之际头颅如许莫报洪施再拜公前俯伏流涕呜呼公乎尚歆此苹蘩之意

祭王令人【代陈阁学】

惟陈氏世家闽中我先少卿兄弟始徙鄞川叔父之外他无期功之亲族犹未大也乃岁在丙戌余得庶子是时年方壮而处贫不得已鞠于赵氏迨今十有九年夫人无恙时屡以为言谓赵氏有子可以归矣庚子之秋既哭子晁因念夫妇俱涉半百而子姓凋疎兹有意请于赵氏因仍至今夫人忽以疾亡而言犹在耳此子已不得逮事于生前岂应更缓于今日二子巩芾扶灵輦以东卒哭在迯且将卜葬以十二月戊午之吉命子归伏丧次使执丧如礼以成夫人之美意以广陈氏之嗣续又以全诸子手足之爱且俾无忘赵氏抚育之恩夫人有知尚临此言呜呼尚忍言之

祭刘宜人【代陈阁学】

呜呼夫人之德柔惠淳直夫人之福康宁戩谷相夫而夫闻于乡教子而子显于朝年益尊而无一事之遗家愈肥而无一毫之骄自奉至约以施则饶言无枝叶闻者意消母仪妇则真可

以表仪于闺闼盖八十四年处之如一朝晚岁尤盛贤侯宴喜安舆徐行去乡密迩干骑奉迎金章拱侍含饴弄孙斑衣济济乃开庆筵大集珠履欢谣杂然洋溢千里云何不淑祸福伏倚内外?伤几为罢市夫人之身固无憾矣他人为壻犹曰半子我壻王氏维子是似抚爱之辱今踰三纪室人云亡神伤未已夫人讣闻痛哭流涕效官词掖欲归无计丧不得摩其棺而一恸葬不得临其穴而尽礼敬状行事不敢溢美虽已大书特书而淑德懿行终有不能尽言之媿也二甥东归致奠甚菲东望长号灵其歆止

祭王参政【之望 代曾吏部】

惟公负卓犖不羣之才养刚大不屈之气富閎深自得之学奋经纶四海之志出其绪余十不一二盖文章直欲追两都之风而政事已足絶俗而惊世矣正色立朝官曰谏议明白贤佞公非公是振举纲纪使君子有所恃而小人有所畏督师淮堧长城千里雅歌投壶坐却敌骑进参政机人谓且相而翩然去之高蹈赤城视富贵如脱屣东坡先生称张文定公曰上不求合于人主故虽贵而不用用而不尽下不求合于士大夫故悦公者寡不悦者衆然至言天下伟人则以公为首者岂公之谓耶【某】登公之门俯仰二纪假守海邦猥继英轨欲一拜公于床下而公已属疾欲见不遂巍巍巨公何恙不已人之所以期公者未艾也而泰山其颓千丈松崩闻者为之流涕呜呼吏民方相与泣于甘棠之下亟遣薄奠以寓千里去思之意尚当力追公于步趋之余庶乎不为九京之媿也

祭刘衢州【朔 代曾吏部】

呜呼天之生贤其畀已甚鍾山川之灵委造化之和不为不靳予之以贤授之以才而独短其命伯牛之疾顔渊之夭岂独其身之不幸人物器业有如公者儻焉夺之苍苍者又何其太忍耶呜呼我公受天异稟当今人才在第一品处之孔门未必不升堂而在寢居之庙堂上可使藜藿之不采下可使斯民之奠枕南宫一鸣万口皆噤风节日新利害益深激贪立懦议论鲠挺不事孙刘身不得一日安于朝廷之上小试两州皆足以追龚黄之遗轸三仕三已重以疾病正路坦坦孤踪凜凜四方属心谓公之未达者天将降以大任孰知夫堂堂王佐之才百不一骋而遂至于陨乎呜呼公之纯孝温靖定省鹤髮在堂公必不瞑公之友爱不见畦町十年相望俱负重名于时忽相从于九原此尤荐绅韦布之所悲哽也【某】慕公风高岁月良远假守东嘉方视公以为绳准惟兹邦人崇仰最谨君子服道德之教小人怀抚字之政讎音一闻哀感万井诗不云乎人之云亡邦国殄瘁要当为天下惜尔何止为海隅之一郡耶

祭王詹事【十朋 代曾吏部】

惟公行出乎诚学根乎经高见远识特立独行射策论事仲舒贾生面折廷诤汲黯王陵功成羽翼政如神明人或一得公集其成公论之兴公为主盟事失其平公为权衡一有抑扬人为辱荣一有去就国以重轻人亡一监梦奠两楹明主震悼善类失声天亦惜之为之陨星【某】昔拜公履履以迎公去不回谁其典刑往哭不可郡绂是縈设祭道周酌公之灵精爽凜然尚其顾歆

又【代莫守】

呜呼【某】之于公殆有夙契稽山定交岁踰一纪晚寮青宫益敬益畏道义相勉草木臭味哭公之丧义如同气兹焉假守实公梓里九京不作何所则视公虽云亡道在百世尝录遗事上太史氏盛德大节略具是矣呜呼我公诗不云乎高山仰止景行行止奉以周旋未敢失坠视焉如生庶几无愧欲酌宿草相望一水驰奠告哀潜然出涕

祭薛士正【代曾吏部】

惟公学博而知约行高而不孤政严而无苛论正而不迂求之海内未见其比意者天生斯人其必将回狂澜于千载之絕学建功名于万里之亨途才小试而夺之苍苍者又何其忍乎公之守吴余在故庐我来剖符公归里居固尝服高风于践履之旧听宏论于警欬之余方将日亲直谅多闻之益尽读篋中未见之书曾不见于几几惊死生之顿殊寓哀情于短章洒衰泪于生刍呜呼吾老矣不知余生尚复见人物如公者乎

祭郑司法【颉同官】

呜呼德升止于斯乎早名荐书而不得上太常之一第晚历曹掾而不能脱七阶之选途欲试无所有衔不祛旁观者为之叹息而君处之则裕如也方其酺酒剧谈裁烛赋诗精神爽拔不见衰相谓当收功名于桑榆孰谓夫江风匱薄得疾肤腠一入膏肓而不可除方瞳了然强忽笑语凛如对面而盖棺事定青衫已上于画图矣呜呼倡酬之诗易而为哀挽之歌清饮之樽今而酌祖奠之刍德升尚能饮而听之否泪尽词殫空相与望君于路隅君则已矣有子是似古人所谓非在其身在其子孙者其在斯人欤

祭陈司户【僖】

惟君之家世笃儒学君之皇考尤号渊博噤不得施晚而君生谓兴吾宗教之以经韶黻秀发书无不读中童子科老生嗟服游学十年暮盐朝虀乃登上第乃瞻龙飞得官户曹千里跬步云何不淑至此大故君之于家孝友天成收恤孤露纠合宗盟君之于文亹亹不倦自公之余手不释卷君之于义勇于敢为亲旧有急匍匐救之积是三者宜其远到壮年长才废于中道峩峩闽山灵輶何归归旆翩然云何不悲惟我同寮周旋最久菲奠荐诚疚心疾首

又【路祭】

呜呼武仲学甚富而命甚奇也气甚高而位甚卑也天畀之以才而不与以时也又嗇其壽使不及四十之期也一疾困之遽成九原人皆悼其不幸而同寮之心又何其悲也诗盟文会书名居以为永好非君主之而谁也青衫画图宛宛乎君之芝眉也炎天赫曦道阻且长丹旆翩然君将安归也官则有守欲送不可惟君家暑行之无恙犹可慰我之思也祖奠于郊外向风长号不可及已呜呼武仲知乎不知也

祭汤宁海【烈】

惟君之资如玉之粹惟君之辞如绮之丽来宰宁川政尚平易惓惓无华弹琴而治兹方及瓜束担归计奇疾困之一旦长逝囊无裘衣室有孤累吏民兴哀几于罢市矧同王事休戚所系不图善人忽焉隔世虽有菲奠不得自致君其归乎望望挥涕

祭陈安人【詹事良翰女兄旌表门闾 同守倅】

台之着姓朱陈是推既生自陈朱子诚归一门孝友累世不亏夫人赞之室家具宜之死靡他面割耳髻夫人视之妇道与稽夫人之姑年登期颐孝养既勤壽祉孔齐夫人之弟名德峩巍同气是似为家门楣月评升闻宠光陆离旌表高门彤史有辉【某】兹叨假守钦叹壺彝思播清风以励幽闺爰设菲奠来瞻總帷节孝有闻过者式之

祭刘天台【孝宪同守倅】

名父之子徒劳州县惓惓无华夙宵不倦平易近民民罔怨咨生无赫赫死则痛之知君清贫赙赠加厚知君无归谋葬山阜更率同僚奠此一觞君而有知庶其来享

祭周侍郎【代侍从】

惟公惟识渊冲智略辐辏惓惓无华持心近厚趋事赴功力瘁心疚险夷屡更介然有守五溪深入四蜀奔奏给饷数年简在斯久擢主大计亨途方骤云何末疾遽啓足手位不称德年不及壽急义首功可以不朽信息从班于公何有天其或者欲昌厥後【某】等为僚属耳底蘊未究忽拜總帷孰不疾首乃陈斯殽乃酌斯酒矢哀以文公乎知不

攻媿集卷八十四

<集部,别集类,南宋建炎至德佑,攻媿集>

卷八十五

钦定四库全书

攻媿集卷八十五

宋 楼钥 撰

事略

高祖先生事略

楼某字子文其先婺人不详徙居之始居奉化县世以财雄于乡祖以选为县录事有阴德及人父某尤积善以古学为乡人所尊庆历中州县立学掌教县庠者数年郡学寻又延请至十余年遂居城中为郡人登皇佑五年进士第调舒州庐江主簿禄不及亲不欲出官以继母无以养弟妹未成立具见辞墓祝文既归遂致仕授大理评事其孝行节操如此自後又主郡庠十余年为州县士子师前後凡三十余年号楼先生四明五先生某其次也成就一时人物甚衆尚书稷舒中丞亶俞待制充袁知府穀等皆其门人又罗提刑适自天台来学诸公学业既成舒公试乡里袁公试开封罗公试台州一举三处皆魁选其亡也舒公为墓铭丰公书丹袁公篆额罗公以仕北方不得预後为浙东提刑拜墓下用阙里故事手植数木今有存者祭文见赤城先生集中郡邑学中皆立祠碑志登载甚备莫教授冠卿一书尤详子常光孙弁异五世孙鶚鉉钥鏞六世孙汶皆踵世科异受知佑陵仕都司大卿前後知泗秀苏州再典乡郡居昼锦坊宣和初盗发青谿攻陷旁郡一路惶扰异调兵守备军声甚振羣盗望风而退郡境独全以功进徽猷阁直学士诸孙以门荫入仕者又数十人有文集藏于家

行状

亡妣安康郡太夫人行状

亡妣姓汪氏讳慧通字正柔明之鄞人曾祖元吉不仕祖洙明州助教累赠正奉大夫父思温左朝议大夫仕为太府少卿直显谟阁累赠少师妣恭人王氏累赠越国夫人明今为庆元府亡妣生于大观四年岁在庚寅五月八日少师长女也先君讳璩曾以军器监丞兼权尚书工部郎官知处州终朝议大夫累赠银青光禄大夫先君之祖讳常朝议大夫累赠银青光禄大夫父讳异徽猷阁直学士朝议大夫累赠少师两家少师实为中表金紫无恙时始命缔婚年十九而归于我绍兴十六年封孺人二十三年封安人二十八年封宜人乾道三年封恭人淳九年十二月先君捐馆十二年钥该郊祀恩封太令人十三年高宗庆霈封太硕人绍兴五年壽圣皇太后庆壽恩封太淑人庆元五年光宗圣体清安天子行庆于下封信安郡太夫人六年明堂恩进封大宁郡嘉泰三年郊礼进封安康郡不及拜四年正月癸酉以疾薨于昼锦坊之第室享年九十有五子九人錫右迪功郎徽州绩谿县尉锡承议郎权发遣严州军州事

钥显谟阁直学士通议大夫提举江州太平兴国宫鎬登仕郎锵奉议郎知福州永福县事鎬
文林郎监淮东总领所镇江府太平惠民局兼户部大军仓鎬迪功郎温州司理参军鎬女
二人蚤夭孙三十一人灋澡迪功郎新泰州海陵县尉淑淦淳从政郎绍兴府上虞县丞蒙灋
从政郎绍兴府嵊县丞泐淦淦淦淦淦淦淦淦淦淦淦淦淦淦淦淦淦淦淦淦淦淦淦淦淦
女十二人【○此下长适次适云云百余字间空弗连属今?节去】曾孙男十六人栋机杓登
仕郎械枝樾樾格枚札桔樾栎机柯怪曾孙女十人第二人许适戴闾之第四人许适陈篚余
在室二兄及鎬锵淑蒙栋第二第六第八孙女皆先卒先君葬于奉化县金钟之原将以十二
月丙申奉亡妣之丧合焉亡妣幼而敏悟五岁从外祖教授雄州历历能道河朔所见及边上
风物骑射之详日在亲侧凡笺书往来皆能记其人之名字亲庭或有遗忘问之如响将嫁外
祖曰吾之绀珠往矣数岁已能作家书越国贤明口授诗语教以裁剪纫缝纂组之类不待习
而工平正端整皆可为法外祖为王府赞读敌犯京师事定携家南京以归亡妣及笄簪具遭
乱散失余又坏于漏舟不以为怵也先君自少清介亡妣实为合德事李氏姑及伯父伯母如
公姑之礼晓练世故谦抑逊顺被服寒素内外交称之先祖有幼女亡妣爱育如妹随事教
箱篚直与共之为择良配遂归王公正己仕至太府卿与之偕老王公之父提举时方宰长兴
而外祖知湖州挈往郡治相与为结缡之助罄所有以送之王氏初得贤妇致谢再三是时亡
妣年才二十有七祗此一节过人远矣自尔同先君宦游内助廉平言不出阃或有触怒必劝
使从宽有所馈予必赞予从厚故庐既碎于兵火先君仕不加进生计日削多寓外家亡妣因
得尽晨昏定省之敬二舅出仕参理家务上下欢服既遂终养执丧尽礼自以不逮事舅姑岁
时祭祀蠲洁诚至必躬必亲晚虽分命子妇犹临视之先君乳母刘氏本中原人惠爱子孙亡
妣待之甚厚卒老于家又以亡姑三人无後春秋皆预殮焉节序荐新未始少废竣事饮福必
欲家人俱集韶齿不遗暮年髮不胜冠或劝裹以乌纱则曰非所以为礼也谨守家法至于终
身澹于荣利素不蓄财有则缘手而尽不喜为时世妆冲靓雅正无珠玑之侈饮食有节靡务
精啗每言避寇时仅以涧水进脱粟饭有馈以豆豉者其甘如饴今日所享不翅足矣笃于教
子至质贷以供束修诸子粗有成立或问何以为训曰平生不曾对儿辈出一不义语故薰染
至此耳一视九子无嫡庶之间方授室时视家之有无以为丰杀平心处事自无间言其遣嫁
女孙亦然女孙有嫁及远适者多诵北方安夫人之诗有曰女长终为妇亲边不是家睦嫺存
古训勤苦是生涯之句以勉之先君有再从弟妹幼孤无依取而育之亡妣为毕其婚嫁其他
解衣为助者不能悉书也喜周人之急家藏夺命丹秘方岁营珍剂以为施治疾起死甚多先
君在乌镇时友婿陈公膏已自御史貳外府亡妣每闻有除目则为女弟赞喜遣贺惟恐後无
分毫羡慕及欲然之意少卿忽下世轻舟入都以慰之其达识类此尝在亲戚家闻从子过省
之报喜不自胜坐中以夫夫人之子也问得其详喟曰心地乃尔耶先君壽终固已难堪未半
载而严州兄又以毁卒亡妣年已高皆忧其不能处而旷度了达昼夜之哭哀至若不可解哭
已则胸次豁然起居不改其度人尤以为难钥守永嘉迎侍为八十之度暇时领妇孙周行郡
圃不假扶掖擷黄甘以分啗略无衰相钥亦仰体慈训不敢以严苛临民在後省尝以封駁久
不决跪以告曰朝夕且得严谴恐一有斥逐徒惊尊抱莫若先归故里脱不可逃宁身当之亡
妣曰我亦念归久矣尽室为之东下嗣岁复来时仕者间自引去同列或谓钥曰子有亲老可
明告于朝使子弟奉以归非他人比也钥亦以告亡妣曰吾两陷围城中还乡又脱寇厄以是
知生死真有定分在此则犹知事宜外方传闻多过徒乱人意钥竦而承命不敢复请闻者无
不叹服钥自吏部尚书谋补外亡妣闻之曰可去即去毋以禄位为累也既归见亲党道旧故

甚自适也越国生二女一子仲舅尚书讳大猷引经告老而陈氏从母之子讳居仁为中书舍人终华文阁直学士里有一舅二甥三学士之语从母及舅母亦皆封赠至夫人外门切邻亡妣年九十尚书公亦八十里之族姻孟春为庆既报之又合楼氏年过七十者男女二十余人别为一席以侈其盛仲春为尚书庆酬酢稠叠奉为重客季春又夫人生朝也箫鼓之声几无虚日未几圣朝推老老之恩亡妣授郡封尚书公进直学士郡太守致上命羊酒粟帛之赐焜燿两家先君在日固已赢八十口逮今二十许年未问纳妇及婿惟孙曾子女增四十有五人童卯满前爱抚惟均欢笑杂沓不以为厌问安直頷之而已晚岁备福诚世所鲜俚也奉佛素谨甫三旬已阅大藏经取龙龕手监以正奇字越国尝再诵及半又与二舅补之近年犹作梵呗时举因果以示人晨餐以前无非佛事寒暑如一昼静多观大字未见之书不问多寡必自首至尾而後已书传过目如素所习诸史举大端兴亡之际贤否之着者类能道之稗官小说所见尤衆性复善记非出强勉二族交婚如朱陈然亲连至多姓第之外姻娅宗派如烛照数计後生取质焉及见宣和盛时暨靖康间事言之皆有端绪如痛定泣血等书间能指其不然者後得梦华录覽之曰是吾见闻之旧且谓今之茶褐墨绿等服皆出塞外自开燕山始有至东都者深叹习俗之变也太师史文惠公丞相魏文节公见必加敬数年间遇举壽则大资赵公郡侯洎倅貳而下俱集或叹曰人间纵有此壽若斑衣珠履之盛则未之见也既倦于行或过诸院近则钥辈抱持稍远则子若孙亲扶板輿每过笑以为乐客或求升堂苟非有疾未尝不见问劳周悉旁及其近亲之安否谈旧事不少差咸仰神明之未衰也灯前则与诸妇为依经马之剧或至夜分不倦去年方觉顿弱虽齿豁体羸已久而耳聪目明如钥比蒙恩与郡以九十者家不从政力辞亡妣亦以为然疾既革元日犹自力危坐以待贺者钥痛念严州兄祿不及後郊恩以奏从子澡岁首受命亡妣犹能以手加额六日忽命浴且理发自此叩之则应不复出语面西侧卧时若微哂三日不动以至属纊殆善业之报也仁慈薰然待妾媵有恩人人怀感不待鞭朴而自驯服去者必使得所归闾巷匹妇有来者一以恩意接之故吊者无不尽哀闻者无不伤叹已而大资率乡之士夫近百人制帅尚书黄公郡县官及乡校正录而下各来致祭多有哀辞以形容甚美与哀荣终始之备且言上壽全福无可憾者呜呼人子之心岂有穷极况自父兄凋丧以来母子相倚为命年弥高惧弥甚不敢一日轻去膝下而天祸我家遽降酷罰不孝罪逆以至于此尚何以生为哉方忍死以襄大事追惟吾母淑质懿范着闻远迩若其容德广大孝敬淳笃高明谅直慈祥清粹曲尽人情而动依大义非惟闺闈之贤妇所不能及有烈丈夫名荐绅之所难能者不肖子钥自省事以来亲见实行闻格言旧矣是敢泣血具载以少伸哀痛孺慕之诚非不欲极意赞扬而屏伏苦块肝胆溃裂魂魄纷乱不能尽究始末以发潛德窅窅有时未敢求铭于当世大贤辄援曾文昭公亡妣之称效后山陈公先夫人行状之体敬刊之石以对先君之碑铭以示子孙使毋忘哀哉余生无母可事长号擗踊冀相寻于九原之下耳呜呼痛哉呜呼痛哉孝子楼钥泣血谨状

先兄严州行状

曾祖常故任朝议大夫累赠金紫光禄大夫妣翁氏赠永嘉郡夫人

祖异故任徽猷阁直学士朝议大夫累赠少师妣冯氏赠秦国夫人冯氏赠魏国夫人

父璩故任朝议大夫主管亳州明道宫母汪氏封恭人先兄讳锡字予善一字申伯世家明之奉化今居于鄞盖自我高祖正议先生始四明之楼实出于东阳不知所迁其可寻者自兄以上才八世先生以古学教授乡后来者又继之衣冠彬彬焉先公尝以军器监丞摄工部郎有忠厚廉平之称太保魏国史公为墓铭生九子兄其仲也兄天资颖悟精力绝人自幼从学迥出流辈年十三游郡庠三山陈公元裕典教事鉴裁甚精兄一试占高第祖居遭建炎之毁依外家以居先公摄事平江母氏携伯氏继往兄已能理门内如老成人自尔举业之余干蛊尤笃楼汪二族吉凶会集人夥事丛他人智力所不给兄为主办则应酬中度谈笑自若遇事有胆略不怯不躁委蛇曲尽无剧易必举故虽未冠而中外亲识已极口称其能而期用于世矣先公久欲问舍而无其资兄承亲意竭力图之铢积寸累以立堂宇先公怀太守章归寓奉川兄慨然曰亲年益高兹可缓耶入城谋度日以就绪落成奉二亲定居而後待行盖一力任事米盐靡密有无相通以全其家者几二纪隆兴二年以先公遇郊祀大礼奏补将仕郎乾道改元中铨授右迪功郎秀州司户参军先公赴处州兄率诸弟分掌家务鷄初鸣时左右至受谒听讼则俟于屏内公退候伺颜色承命惟谨书尺之繁委行李之往来一不以累先公之心故先公专意郡政无有内顾既赴户椽太守徐公藏曾公逢一见如故交事多资决纠曹懵甚守方委兄协济俄有旨使录事曹典狱漕使吕公正已行郡部民有诉狱冤者以诘纠曹喏不能答兄前曰兹事甚明是时新制未行锡预闻之因引姓名岁月与事之始末辩数明畅四座属耳吕公叹曰作吏不当尔耶顾吏一依兄所言纠曹得解而诉者伏辜会镇江有军校诉于朝且自言久掌军用力校贷钱以万计知其欲诉将杀以灭口脱身而来後必有追者出此门则不得生矣丞相虞公骇其言具奏于上先令郡置狱尽系所诉者欲遣理官以往今丞相梁公方参大政虑摇军心请敕漕臣择州县清强官许以理寺推狱行时胡公昉新为东漕与吕公合词荐兄吕言秀州事胡曰自淮南易节以来密访人物至秀称楼君者如出一口径取旨以檄兄二公使来见面趣之行兄曰事关军旅君相所属意锡试吏未半岁岂应预此二公不许曰隆暑不可久系狱吏已候于郊外数日以待子之来也请械军校以自随途中时与之语钩得其情比至桁杨满庭所系有官横行者兄以所诉贷钱之目诘之皆曰诚有此而悉已偿矣各以左卷来有须会问于军者颂系一二余即日纵遣复引诉者谓之曰尔妄明甚察尔之情欲逃而死耳上罔朝廷下骇军伍死有余责即吐实尚全尔生其人顿首感服一箠不用仅三日而竣事大理吏踞请曰事体甚重今遽已後必有悔兄曰我不知观望惟尽其情而已汝第为我行文书他日有责我当任之既出尚书蔡公洸为守握兄臂曰何其神也始得制书府庭为之震动非君来某亦无所逃责然尚疑兄年少气锐或有疎略因为备言之喏曰弗可及已归涂比文案该叙请密老狱吏所不能为二漕闻兄及门大惊既见道所以喜甚曰吾二人举士不谬矣亟呼吏草奏兄曰已具于此读之又大喜过望涉笔书名即携兄诣丞相府先入白相唯唯问安在自宾庖径以便服谒见色尚不怡曰折狱诚敏然诉者肯默乎亦得所谓伏辩者乎二漕相目兄曰伏辩有二如使吏曹附口语代书辞容有诬服今其亲笔也袖出囚辞数百言视首辞笔迹不少异又无一字揩改注乙者相始大称赏且曰使者诚知人翌日与梁公奏闻上为之嘉叹因共荐兄谓如此等人不应使沈州县请以中都官处之适左帑吏有巨蠹既正典刑以兄监都门相谓兄曰是何足愿子特不欲使子舍禄而迟次也既就职润色成法随请于上积弊浸销在法讥诃出入得其过失者赏有差故虽名同事而侦伺甚严或成仇隙兄曰吾侪为国主藏任责匪轻各谨攸司锡亦不愿得此赏也由是相处甚欢而事益集南库阙官朝旨命兄兼摄兄视宝货品日至繁而位置纷糅躬督帑吏彙分之各得其所列屋有定

数而总其凡于籍标识粲然未几上忽遣中使临视兄执籍取物如探诸囊使无以返命即取屋角敝缯将封以归奏官吏失色兄徐曰是非军衣所需盖裒以备赐花等用数实若干籍具在也神气湛然使无以诘尚书张公津曰某号典领初不得亲临胥辈又不任事微君吾其殆乎张公由此受赏兄不屑也任满主管都茶场会子库关陞右从政郎上方留意楮币兄服勤其中纖悉明备凡事皆立成规吏不得摇手日造万纸无不精好一日谒丞相曾公有同僚力言省罢之便兄立其後具闻之僚顾见兄蹶蹶而退兄亦不之便果罢已又进谒曰相君曰国家赖楮币以资用度今罢已何敢复言然度必复于後吏曹失业散之四方他日恐难遽集况作伪者他皆可为惟贯百例不能乱真故多败此曹无聊若冒为之智者不察也愿择可用者分隶官司使得以自活丞相曰子不谋身而远虑及此即白于上如兄言旋摄主管尚书刑工部架阁文字遂为真职最清简靖共自守垂满欲诣铨部时史魏公再相素以兄为可用力荐上前丞相赵公又举镇江狱事赞之且奏曰是时虞某即欲处以职事官今丞相虽知之尚避乡曲之嫌未敢遽言上曰朕犹记向时事信可用岂应顾小嫌耶遂除详定一司勅令所删定官以荐章及格改宣教郎时方修一司一路酬赏法取诸路专降指挥五千余项立条一千三百继又编类海行法兄夙夜疚心笔削损益多出其手书成奏篇转通直郎轮对首诵主上孝俭之德上曰朕之即位卿预观否对曰臣是时虽不及见今叨朝列冬至正旦亲见陛下拜太上皇壽真千古盛事也上顾而笑再奏请明诏有司议立科目凡是则是傲有一于此者令郡国察举以闻择其尤者尊显以风厉天下孝者举则忠臣可以求廉者进则臧吏不必治又论乾道修法久已奉行间有抵牾重加审核虽已出于睿断修定新书止缘颁降尚迟州县无所依?胥吏因得为奸反致淹延狱讼欲望颁行使得遵守续有陈请自编别敕仍下诸道且用旧法理断免致因循待报迁太府寺丞又以轮对论绍兴和买事谓会稽一郡赋额最重然经界之初物力及四万钱者始敷一绢今乃半之既无物力之增徒有科敷之倍止缘下户旧与免科圣朝优恤之恩反为豪户欺隐之地上焉者财力丰裕与吏为市莫可究寻尽以本户之田析以占籍五等分立砧基多至百本却致中产之家和买岁增偏重已甚乞以产钱均敷不复更问等第议者必曰始科不及下户盖恤之也今反加赋可乎是大不然今名为下户者实富室也真是贫乏十无二三若仍旧贯不为更张则必尽归五等之籍无复可敷之绢矣又言身丁钱者皆出于下户欲将所取之额总计为绢若干与和买绢数合为岁额止以产钱均开上户虽就和买敷身丁而和买之敷则顿减下户虽就身丁敷和买而身之免丁则甚优上下各得其利而官赋所入无亏钞书仍以和买身丁为名用防异时重叠倍敷之患若有丁无产之民则又可以全免而为太平之氓矣上褒嘉再四且曰卿所陈利害甚明朕即为?漕臣与郡守共措置而又论左帑权出之弊谓出入之吝具有科条物货权出势不能免此等既非正支止是私置文记遇出即注才入即销虽有据凭终难检柅万一久假不归因有重出不无奸弊欲从外府印给二簿付都中两门专记权出之物门者以时拘收太府每季稽考上曰其弊如此朕殊不知即命行下至今遵用之宣谕宰执天语甚宠兄前後再对所陈九事皆蒙睿獎今录其施行于时与其最着者迁大理寺丞狱人之司命廷尉又天下之平因所当谨兄尤恪意从事谓天狱追逮非他处比一夫所向闾里惊摇每见吏牒必详究其人择不可已者始稟卿长而行之既至则穷日之力亲加听察苟无用拘留则亟去之或先有案卷者豫审事节一问即得故囚之宿于狱者寡拷掠尤稀阔视之如伤情实俱露而犹有为廋隐者仅施十数囚徒至前未尝厉威以临之斥退吏卒使得尽其欲言遇有妇人孺子深以惊迫为戒适有大狱三数皆晦昧翻覆最为难事兄究见底蕴处断公平不为势力顾忌亦不诡法以惠奸军民鬬讼例

送寺中是非立决率皆厌服而去由是庙堂相知愈深士大夫则曰此真得人矣始至寺吏曰是为初官时能决诏狱者久之熟见兄官业咸谓未之见也兄久去亲庭力求外补九年四月差知严州时谒告归省拜命于家未几交代奉祠有旨趣行不俟临遣便道之官九月到任郡更早潦之余财用空匱陋不成邦逋负动以千万督责交至以郡计访寮属具诉煎熬困急之状先是曹掾筦库之官分往诸邑公吏五百又旁午于道日不暇给兄曰郡尚可为也何亟如是悉使归之一迹不留也诸邑既已肃然然後使来受要束尽取财赋本末审缓急之序与夫当蠲而未蠲已发而更催者人皆得以自言首尾七八日朝暮相处如父兄之诏子弟凡可蠲者落笔扫尽其他或为之倚阁或为之分限其应输者皆指期至郡倅贰以下争以为不可兄不为变邑无官吏之扰又罢无名之敛期会宽而信欣然承命以行且各置二历緘以紫囊公文之外守宰欲有所言亲题历上不时往还吏不得预闻其间脉络贯通了无壅滞文移简寡上下安便及期无一金之负寮吏聳服郡始少苏矣木柅出于歙郡由城下以趋钱塘郡帑赖此以济比岁苛取商贾不通兄为之简节疎目按旧额而寡取之会计甫毕牙佺一为保识即纵之顺流而下贾人更相告语来者益衆以故三閱月而钱之入大农者踰十万缗曾不倍征也版曹漕司差官相踵至则与之道其所以然甚悉又随所索而应之相与叹其通敏且曰下车几何时洞彻乃至此耶归语诸长故兄之誉益彰民讼多据案亲决各适其平受责者亦无辞举手加额称诵神明者相属也外邑番诉间取其甚者自处之必穷其情状而抑强扶弱不为己甚有诉丧衣囊于津亭者期以舖时必获已而果然学校颓圯所未暇及兄为之区处表里一新像设严整士类感叹人不知役或以疑事来谗从容响答动中要领而以爱民近厚为先务近城本场苦于潦水筑墙则善隕插篱则易坏或以请兄应声曰种木以环之则可久矣闻者以为难及大率迎刃而解庭无留事馭吏接物厨传宾庑下至舟子军士之差次具有方略人情翕然愁叹之声化为讴吟傍郡之诉于监司者亦求直于兄其感化流闻有非人力之所及者十二月丁先公忧徒跣扶丧哀感行路郡人如失慈父设祭于道者相望巷哭以送之在官仅八十余日人谓良二千石终更以去者未必得此户部侍郎曾公选当今吏师谓人曰试郡而办事者有之若楼严州为政平静百废具举虽老于治民者未易过也既归追慕摧割不可解于心力贫谋葬顔色深墨十年四月感疾去卒哭未远也阅七日至五月丁卯竟不胜丧以歿呜呼痛哉享年五十官至承议郎娶冯氏封孺人子男三人澡滌滌女一人适承务郎新知绍兴府余姚县蒋纶将以十一年八月壬午葬兄于奉化县龙潭正议先生之墓左澡录兄之行事以告于钥与之相抱持而哭语之曰吾忍言哉子之所不知者吾为汝书之呜呼兄之所以过人者天才之优也然人之有才者或量不足以容物或学不能以自将恃气而兀傲矜敏而怠惰察以为明严而近刻为已而嗜进计利以自丰者间有未免惟兄器度恢洪莫见涯涘受人之触傍观为之愤怒而辞色不少异朋友同寮所阅多矣无不得其叹心居家作吏几无暇日而学问不倦尤好说诗得风雅之深旨两荐漕台卒困于南宫笔力日进动翰如风对客作书真行俱精瞬息数函不见其劳尝见徐公兢作篆心顾好之下笔辄工好事者争求扁榜流传甚多晚更敛制稍寻斯冰之体近方考证说文仍集张氏复古与鍾鼎遗文从韵畧分欲为一书竟不就钱别庆贺间为诗词皆清新切当压倒坐人此其见于外者至涵养饫饩增益德性委运自适则又其所安也和气薰然无贵贱长少与之尽礼人有所求惟力是视告以急难必倾身以应之或就之谋事先?情实能道人胷中之欲言者为之致曲不翅已事人亦感其诚而许之故率能如请者之意济则如身得之喜否则介介若有失焉盖其资性笃厚雅存济物之心而才又足以行其志此所以为不可学遇有不可亦必曲为其言所以不可者以

晓之人亦不以为忤克勤小物略不苟简所居一日必葺船居旅次容膝之地亦务整洁创造器用巧思横出人取以为法终日矻矻有古人运甕之志每日勤则不匮一有自惰则不足以立身矣人之情伪丝发不能逃而自晦其明含垢匿瑕如弗闻者动有规矐不以己长望人人有弗及率归于怨徊翔筦库知已满前不一登权贵人之门昔人所谓性至通而自然有节者兄为近之心计有余使之利析秋毫有不足道而疏财尚义不问家之所有贫无告者时推以济其须俸入不足以给用而食客无虚日间遇士子就试亲宾坌集兄豫为馆谷之计帷帐器用咸备手行觴豆弥月无倦色少间又问劳其乏絶商?文义人人自以为亲已妇家寢寥辍衣食之资以助之外舅姑之丧及葬皆兄为之存歿无憾再从弟鏞幼孤求师所在兄曰是吾叔父子爱子也饮食教诲积数年遂入上庠东阳有族子曰溥以穷来归兄育其数口又为谋资身之策温饱至今少游西安与张元晦汝明厚善乙未张赴省闱兄取其新作读之曰君文诚工而久不售者正坐用意太深为取前三年程文数十通使熟观之曰是未必胜于子惟以笔端无滞碍耳张爽然悟场屋中一挥成篇既在选谓所亲曰吾沾一第益友之赐也其于故旧类此呜呼在私门为亢宗之子在公家为有用之才德之感人者深惠之及物者广况复容貌颀伟素少疾病谓必将建立事功为时闻人而止于此是可痛也故敛之日亲戚交游下至闾里耄穉皆相向恸哭搏膺尽哀传闻讣音交相惊悼久而後信之至今吊者尚未绝也兄亦自度抱负不凡抗志宏远绍兴和买之请既行郡民闻之无不鼓舞且曰不知是何官来惠吾州耶帅奏催科方急未易遽改上尤注意令候省限满日取旨近臣复有请者遂遣漕臣以行仅能蠲减?宫及寺观拨赐无名之额终未能尽如兄之言兄深惜上意之未究益访利害期申言之而无及矣兄之齎志于地下何止此哉呜呼兄之孝友笃矣伯氏丧于丹丘星驰护丧治葬抚孤甚有恩意第八弟鏐之生先公以多男子之故命兄育之抚爱如子以至成人澡之居丧鏐实同力以报焉方伯氏之亡而诸弟尚幼每与钥相语曰仰事俯育之类吾二人分任之钥自度才具智略去兄远甚一听命焉而悉以意佐其傍处宦从宦更为勉励欲寡其过以母贻亲忧官敕局丞外府适相後先连檐以居并轡以趋非敢以为荣父母俱存兄弟无故诚人间之一乐也先公七十同归拜壽壬寅属疾又同时省侍已而先公益安而兄得辅郡奉双亲西上乡曲艳其盛丞相史公魏公率里之士夫大合乐以送之兄曰当以一身服为郡之劳而使家女子子极奉亲之欢躬调旨甘又间以政事施設具言于庭闱以请益甚适也不幸天祸我家先公弃诸孤兄号慕深切大事未涯百口仰给忧苦郁结以殒其身天乎哀哉游宦许久不足以餬其口生事日废幸能以器业自奋改秩才四年而得郡绂卒不及泽其子竟何为哉竟何为哉今日之事固有能言之者岂真有定数不可逃耶世言阴德隐行有益壽之理未问兄之平生以棘寺数月治狱平允之心严陵一时临民循良之效亦宜得佑于神明而大祸之余复不自免福善祸淫岂又有时差耶不可晓也垂白之母昼哭之泪未乾而重以昼夜之哭门户责任之重以兄当之犹惧不能胜钥何以堪之呜呼不可活矣与澡等忍死以图窀穸之事又雪涕以书此或曰子之志虽切词不亦太繁乎钥泣曰吾兄之亡断吾手足不足以喻其痛且重悲夫人品才气如此而不得显于用特书屡书犹未能形容大槩以写吾之悲也吾暇文乎哉乃号号授澡而使之求铭焉谨状

卷八十六

钦定四库全书

攻媿集卷八十六

宋 楼钥 撰

行状

皇伯祖太师崇宪靖王行状

曾祖世将华州观察使赠太师福国公妣李氏封淑人赠商国夫人

祖令諲武略大夫赠太师益国公妣刘氏封宜人赠齐国夫人

父子偁左朝请郎秘阁修撰赠皇兄太师中书令追封秀王諡安僖妣张氏封秀王夫人

本贯玉牒所讳伯圭字禹锡年七十有八状

钥仰惟皇朝以忠厚仁泽涵养天下累圣家法相守一道本支繁衍日炽而昌亲睦九族恩礼隆备真足以度越千古恭考国史开国以来属近行尊贵穷人爵富溢万锺不知几人然皆生长宫邸专奉朝请虽威望彰明有如周王亦未尝着民庸于外自熙宁间稍就外补才业浸显各以所长自见为世豪英代不乏人曾未有位极人臣出处系海内重轻者若夫历事四朝宠光赫奕以间平之贤躬曾闵之行出为龚黄之政入有旦奭之望兼是数者而又寿考康宁子孙盛大始终无憾二百四十余年间其惟崇宪靖王乎钥四掌玉牒尝考福国公艺祖皇帝之元孙也建炎元年安僖为秀州嘉兴县丞孝宗实生于官舍安僖生不及进用歿有追封赐諡之宠寻又筑祠堂于行在所建园庙于莹域如濮安懿王故事又升秀州为嘉兴府所以宠赉之极矣王其长子也安僖被服儒雅由舍选擢宣和元年贡士第交游皆一时名公王在髫龄有成人风安僖肃重客必命王侍植立拱听长而弥谨安僖任子请以先外表张似之安僖大喜虽铨曹以法不许王之器识自少已不凡矣绍兴七年明堂恩奏补将仕郎十三年安僖薨王号恻哀毁见者陨涕有旨令秀州应办王倾橐以襄事一毫不取于公家十八年授迪功郎秀州华亭县尉邑苦多盗王周行境内以五家为甲一家警盗则四家应之一家容奸则四家同坐盗无所容焉有盐铁塘自金山海口属郡城二百里而近岁久淤塞盐运不通王建议疏凿卒赖其利齐国之丧以承重解官二十五年调宣州司法参军既至会常平帑廩事发兴狱逮系甚衆守将案前政王请寛假守不听王曰法固甚重然官劾吏窜则亡失者不可复得若少假岁月庶可偿纳惩治未晚也代者得以保全寻为补足有囚当死王疑而争之守是狱掾观望者随靡王辩愈力後加详谳罪止流役戚方出戍道郡境津险而梁敞檄郡为桴筏期会迫甚郡以属王且行且谋凡官地有林木皆默识之历津梁则度广狭材既周用驰诣军中劳

以牛酒且告戚云筏材已具役民恐不及事又非所习若调军士五百缮治之可立办也方既乐从王临视优犒士卒竞劝甫毕而师至民不知役守益叹服三十年孝宗自普安郡王为皇子封建王是冬以举主循从政郎明年夏添差两浙西路提刑司干办公事未赴特改宣义郎寻添差通判明州三十二年六月孝宗受内禅八月除集英殿修撰知台州隆兴元年十二月以职事修举擢敷文阁待制二年秋潦暴涨加以潮溢亟遣舟济溺者水将入城囊土塞门补苴罅漏水殆及女垣不尔则民几为鱼矣细民多以鬻盐抵罪王深念之谕巡尉使严讥逻获盐则归之官而纵其人狱讼为之衰息而岁课自若也以治行改知明州充沿海制置使敌再犯边严海道之备传檄不絶惊譟訥訥王命邀邮筒于远郊密受以入民始晏然乾道元年岁大歉饥民鬻至分处寺观发廩振救多所全活真里富国大商死于城下囊赆巨万吏请没入王曰远人不幸至此忍因以为利乎为具棺敛属其徒护丧以归明年金人致谢曰吾国贵近亡没尚籍其家今见中国仁政不胜感慕遂除籍没之例矣来者且言死商之家尽捐所归之赀建三浮屠绘王像以祈寿岛夷传闻无不感悦至今其国人以琛贡至犹问王安否六月以获海寇功陞敷文阁直学士二年冬以邦人举留再任益思所以惠民者定海有沈窖湖豪右侵筑民失其利开浚复旧蓄泄以时规模宏固抵今赖之又有茅砧硖与慈谿接畛定海居上流旱则足以溉灌水则以慈谿为壑纷争久不定王以帅事行县亲视其宜俾浚旧沟成两邑皆利而争者息矣三年秀王夫人寝疾药必亲尝衣不解带既遭内艰擗踊攀号绝而复苏溢米不入于口丧行邦人拥道送之面色深墨哀动行路四方赙礼日至自以俸余足以终大事悉辞之五年服除八月再知明州下车谒先圣顾瞻学宫颓敝大出缗钱葺之自大成殿御书阁稽古明伦二堂以至斋舍门庑为之一新增置书籍月课诸生所习以酒醴劝之宗子不遵防检者俾入学舍闲以规矩与生员同後多修饰取科级者于是相与立生祠于东序制司水军旧屯于城外之江东时得旨移定海军于平江之许浦王请于朝谓定海控扼之冲不可撤备移制司军以实之增葺旧营度容万竈又造铠甲器械甚备玺书褒焉归正拣汰军士来者无所归王为度地城隅为屋数十楹以处之顷岁胶西大捷之後海波不惊而降者言始谋本欲直犯吾境或譟传连结高丽者上下疑之王益治战舰严閱习以张军声遣郡人徐德荣覘之得要领以归遂寛东顾之忧六年陞学士海寇葛明张甚王以方略授将佐每遇必胜王曰兵不可久也遣人谕以逆顺祸福遂降罗拜于庭股栗莫敢仰视王为却兵卫霁威严以问始末明感泣悔惧愿自效又进其党诘之其胁从者纵使复业寮属谓明之罪不可贷且恐其饱则扬去王曰既怀来之反其锋以为用余孽不足平也奏请授以官有以佚罚为言者王复奏曰诱之降而杀之後日何以使人遂补将校又有倪德号倪郎尤为难制遣明禽捕人尤危之恐其合而为一也明感恩尽力德技穷亦从招服明年王以此转一官愿以分及将士复请以德为裨将自是贼之巢穴虚实动息皆知情见力屈奸党破散海道一清以王善抚二人而用之也八年陞显谟阁学士九年陞龙图阁学士皆以郡人借寇之请也岁饥籴价翔踊王曰此富者闭籴以幸灾治之则益甚乃出二十万缗遣人籴于浙西闭籴者计穷争先出粃米舟寻亦踵至其价大平饥而不害官无一金之失而行者又得其利王之虑事周密类此在郡前後十年政尚中和寛猛相济平易近民千里安之礼遇寮案人乐为用两造在庭必据案究其情实多劝谕使平之其抵于罪率从未减平反死囚至数十百人尝获铸铜者数辈谓曰汝欲希利而冒重禁耶人与钱二万使易业碎其器而书姓名于籍後犯决不贷也亦无敢再犯者每曰节用爱人不易之道与其苛取急征以资妄用孰若量入为出以求裕乎不饰?传不事包苴邻郡交馈尽归公帑行之既久沛然有余百废具举敛不及民以郡之西湖为放生池扁其

堂曰广生列石于侧刻采捕之禁待遇宾客不为豪侈而尊俎风流恩意周洽寓公寄客皆得其欢心而不敢干以私也自以久去松楸屡求闲退虽优诏狎至而归志不回淳熙元年十一月始得请除端明殿学士提举江州太平兴国宫去郡之日贵贱耄穉攀辕挽留出境不絕三年积官至朝奉大夫二月换授安德军节度使提举隆兴府玉隆万寿宫九月加开府仪同三司充万寿观使九年九月充明堂大礼桥道顿递使至是始见孝宗天顏感动清问款密王性素谨不敢以语人又朝于德寿宫高皇喜曰久欲见卿抚劳甚至礼成加少保封荥阳郡王高皇曰吾欲自见笃睦之恩赐以玉带十二年充郊祀别庙亚献十四年高宗登遐王奔赴见孝宗于素幄龙輶啓涂事大体重诏充总护使十五年六月加少傅八月充明堂礼顿使十六年二月光宗龙飞以皇伯加少师绍兴元年三月诏入覲加太保嗣秀王仍赐甲第于安僖祠堂之侧屡欲奉孝宗幸祠第王力辞宪圣慈烈皇后赐水月园堂曰瀛燕亭曰玉林湖州私第中又有堂曰庆远圃曰小隐楼曰溪山胜?扁榜皆三朝宸翰也绍熙中宪圣泊孝宗光宗皆同中闈屡尝临幸光赉林壑诏益其地并湖为复阁有司既度材矣王恐重费县官又固辞焉每侍清燕之闲两宫皆待以家人礼王执礼愈恭语不轻发一日孝宗宴私隆洽不觉前席密问潜龙时事王逊避良久徐奏臣老矣不复记省问至再三终不敢言孝宗笑曰何太谨也然以此益加爱重尝召王及诸子宴于北宫之静斋孝宗曰近者元夕箫鼓之声不絕斯民自得其乐不欲禁止然物戒太盛为之惕然是夕不饮酒仅啜一盃汤而已大抵人君不可不事节省若肆意所为将何所不至王对曰陛下兢业如此虽尧舜无以过自古人君诚能不溺于宴安则怠荒之念何从而起孝宗深然之二年六月判大宗正事宗司任法太过天族固赖以整肃而颇亏亲睦之意王处以平恕厉以廉耻鲜犯令者每言要当先教导而後齐之尝建议别立宗学月书季考以教天下之宗子请出余禄以助贍给又以减宫庙员阙之多请复增数以优之事虽不行识者赧之三年六月拜太师五年辞大宗正事七月主上登极加皇伯祖免奉朝请九月充明堂亚献诏加两镇于是兼崇信军节度使十一月充永阜陵?宫礼仪使庆元元年以复土拜中书令王以旷典五辞御笔答曰逊避莫回勉从所请可别议褒崇之礼乃诏赞拜不名嘉泰改元赐第为火灾延燔乞还湖州故居守园庙二年春趣召赐肩輿至殿门令子孙扶掖命有司复营旧邸四月王丐归九月癸亥薨于正寝遗奏讞闻上震悼辍视朝三日贈增加厚赐棺含以蟬冠朝服敛遣内侍押班左武大夫保康军承宣使吴思忠等五人护丧设祭之文甚宠曰艺祖造邦源深流长子孙绳绳百世其昌岩岩秀邸不显其光积久愈厚笃生贤王濯濯祥麟玉质金相允文孝宗则友其兄召繇外藩赐第于京乃分茅社于彼荥阳赤旗金节绚烂綏章文考念功曰笃不忘建祠秀园旧履是荒太师维垣袞衣煌煌爰暨冲人应龙初翔宣力百为调娛多方予嘉乃勲肱句不名紫微是令逊避勿遑贵极愈谦年耄益庄踰七望八炽昌寿臧子侍孙携蟬冕相望王比来朝精神方强谓当百年镇此宗盟不远伊迺降此弗祥维大父行生死哀荣王实无憾典刑云亡緘辞往尊寄哀一觴又遣太常博士钱易直等輶祭于都门外文曰我伯祖父标的宗英奉厘列邸隐然维城天胡忍予殲此老成爰飭邦典命使以行遥致奠簞以赉泉扃爰以量币清酌齐牲粢盛庶品用荐哀诚十一月癸卯诸孤奉王之丧葬于乌程县永新乡成山之原王娶安德帝姬之女信安郡主宋氏父保庆军承宣使驸马都尉邦光实徽宗皇帝外孙也封卫国夫人先二十四年薨追贈齐魏国夫人夙有懿范嫔德娠贤用肥王家子男十人长师夔兴宁军节度使开府仪同三司充万寿观使以王之襄奉哀毀而薨贈少师追封新安郡王諡恭恭次师揆检校少保奉国军节度使提举佑神观兼秀安僖王园令次师垂定江军节度使提举佑神观次师稷蚤亡次师离深州防御使提举佑神观

先五年卒贈昭慶軍節度使追封信國公次師禹慶遠軍承宣使提舉佑神觀次師臯保慶軍承宣使提舉佑神觀次師岩朝奉郎新權發遣通州軍州事次師彌奉議郎添差通判嘉興軍府事次師貢宣教郎添差通判廣德軍事師岩師彌師貢俱得旨除直秘閣未拜女三人長嘉興縣主適故朝議大夫直秘閣知蘄州軍州事鄭嗣宗蚤亡次永嘉郡主適故宣教郎添差兩浙轉運司主管文字張似續次新安郡主適朝奉郎直秘閣新權發遣高郵軍事史彌堅孫男二十四人希道朝散郎新權發遣嚴州軍州事希明承議郎新權發遣黃州軍州事希遠通直郎添差通判慶元軍府事希德通直郎添差權通判衢州軍州事希永武翼郎特添差兩浙西路兵馬鈐轄湖州駐劄希顏故儒林郎紹興府上虞縣主簿希行故將仕郎希古武翼郎特差行在點檢贍軍激賞酒庫所干辦公事希純奉議郎添差通判衢州軍州事希閔右千牛衛將軍權主奉秀安僖王祠事希忼右千牛衛將軍希訓太子右監門率府率權充秀安僖王園令希愷忠翊郎特添差兩浙西路兵馬副都監嘉興府駐劄希棐承事郎新差監臨安府糧料院希諤太子右監門率府率希呂忠翊郎希牴成忠郎希復忠翊郎希邛承事郎余五人未賜名補官孫女十人長永康縣主適通直郎知江陰軍江陰縣事胡元卿次適承務郎特改添差監兩浙轉運司造船塲范莘次適保義郎新差干辦御前中佐軍頭引見司吳璞次適從仕郎特添差婺州觀察推官林燮次適承事郎特添差通判嘉興軍府事韓杞次適承節郎新差干辦御前忠佐軍頭引見司吳珙余未行曾孫九人未賜名補官曾孫女十五人長適文林郎特改添差婺州觀察推官沈煜余尚幼嗚呼杜甫謂汝陽王為真天人謂崇王天人也其生也秀王夫人夢彩仗傳呼導朱袍而冕者直至寢所奏鈞天之樂既覺聲猶在耳免乳之際香霧滿室終日方散及為安僖卜宅兆銜哀走數百里惟烏程之菁山最佳卜之而吉然念力不能致裴回其處一叟忽前曰官豈姓趙而欲求葬地乎王矍然曰汝何以知之叟曰嘗夢神告我矣指所卜之地以售今寢園是也方丞郡時居湖心僧舍夢有形狀犖異而綉衣者乘小舟環繞數四伺問之則曰公他日當為地主故巡護爾既為守又嘗夢其人言有召公者過小橋人之憔悴與支體不具者紛紛求拯援甚哀尋見所召者曰適所得無動心乎此曹久不安居愿庇之唯而覺莫知何故後出郊過一橋恍如夢所見而道旁藁葬累累有暴露者王悟曰神豈以是望我耶悉為掩瘞之晚嘗率鄉人禱雨道士伏章王盛服端立左右見嶢峴久之暝而不跌頃之語人曰適覺神游帝所以閔雨告帝既許我矣翌日膏雨如注闔境告足翰林學士洪公邁載于夷堅志尤詳神異之事固為難言如王之交于神皆明白而又有驗于後故屬紆之日起處如平時夜尚觀書甫二鼓始覺體中有異集子孫告之曰時至矣了無怛化殆仙去矣嗚呼王真天人也王風姿秀挺襟度粹夷忠孝誠篤恭儉謙勤皆其天分加以好學善持論春秋二丁必具盛饌祭先圣于家塾率子孫拜之四十年未嘗廢每日熟讀論語一書平生受用不尽又喜誦孟子間舉二書之疑與客反覆論辯又摭其旨而為言曰食色雖重禮義以安之富貴可求非道則不處又旁取釋老二家而為之說曰愛欲煩惱對治法門又曰愿有情皆得度无情保長生書之坐隅以自警嘗有方外之士書廣大慈悲方便忍辱八字以獻其徒復為之辭凡數百言王書其旁曰广大圣之事也慈悲仁之用也方便智之功也忍辱謙之德也旨要在此奚俟多言其人愕而退盖其所存者如此喜玩法書字畫溫秀如其為人賦咏賡酬愈出愈新多記詩詞筆端富麗某品甚高皆其余事居聞則以此自娛也寬厚有余事秀王夫人尤謹迎養在官退食娛侍夫人必勉以恕服膺慈訓不嚴而治未嘗案一寮屬作尉時有部使者責以躬督人舟王无难色使者見王徒步亦悔之後其子將丞屬邑久之不敢進王趣之且曰何待我之淺也終為剡奏丞至感泣燕居自怡申申天天无疾言遽色侍側勝冠者眾童卯

纷如也皆假之色辞第戒以谨守儒素下至臧获未尝怒辱之不以贵盛自居尝见丞相魏文节公于山间先屏驺闥及门下车趋就宾庑吴兴太守旦日拜表仅毕而谒已入矣宾客至前少贱亦为之加礼总角朋游虽寒左皆能记忆至録其小字以示不忘乡人为真率之集以势位辽絶不敢有请王曰非所闻也竟与之周旋自奉至薄食不重味器不华饰衾襦用布浣濯纫补不弃也买屋而居稍加葺治詹事王公十朋为守叹曰某起书生筑屋尚穷事力意邸第必极轮奂之美今见之使人媿叹亲旧之贫者月有廩给嫁娶病故随高下济之雨雪日久则令人走闾里赈施婴孩遗弃则募乳者收育之盖用之以义者则所不吝也钥父子兄弟出入王门晚预班缀时得进拜眷抚有加焉王在朝端山立玉色貂蝉宝带进止有度照映班列固已增重朝廷绍熙末年往来两宫调虞密勿若不动声色而外廷属目倚王以为重造郤从容多有献替一语不露于人或有以传闻求质者但曰无之故莫得闻焉此钥所亲见者兼直禁林王之加恩两镇拜中令三制皆忝视草迨丐外而归隆暑中访别于官舍屏居海角不敢以姓名入修门王赐之书且致酒殽之馈若施于敌已者铭于心不敢忘也王之讬闻识不识皆有殄瘁之痛惟明之人去思最深至流涕相吊葬既不及为执紼之役亟走五诗以寓哀挽之私王之诸子自少保而下远寄事实俾状王之行将以求墓隧之碑钥不佞窃惟王之抱负非浅陋者所能究识爰自建节之後富贵逼人名位日尊而所蕴自是无由表见于外人但见其养威重保明哲而已盛德全美细事本不必书王自少涉历至多克勤小物持循有素故能善始以终为一代宗工重臣正以平时践履积而至此故亦不得而略也敢具列之告于太史氏以备采择谨状

攻媿集卷八十六

<集部,别集类,南宋建炎至德佑,攻媿集>

卷八十七

钦定四库全书

攻媿集卷八十七

宋 楼钥 撰

行状

少师观文殿大学士鲁国公致仕赠太师王公行状

曾祖本累赠太师鲁国公妣陈氏赠鲁国夫人

祖登故任承议郎累赠太师魏国公妣陈氏赠魏国夫人

父师德故任宣义郎累赠太师楚国公妣时氏封魏国太夫人

本贯婺州金华县大云乡安期里王公讳淮字季海年六十有四状

王氏系出太原五季避地至婺居义乌之凤林後徙金华遂占名数八世为儒至鲁公守道自晦始辟家塾延名士以训子孙政和二年魏公以科第起家知潭州湘潭县是生四子次曰师心继踵世科仕为吏部尚书终显谟阁学士其幼即楚公也偶傥有大志义风为乡里所敬故翰林学士何公溥志其墓公生于靖康元年六月七日幼颖悟粹温凝远寡言正色顾瞻步趋率有彝度力学善属文绍兴十五年由漕荐擢进士科调左迪功郎台州临海县尉郡守萧公振一见即以公辅期之郡事多委公裁决捕盗应格不就二十三年秩满循左从政郎萧公帅蜀辟以自随已而召还诸公争欲罗致公曰受萧公深知故奉亲为万里行讵为利禄计耶既归授国子监书库官改主管吏部架阁文字二十七年为省试点检试卷官知举汤公鹏举荐除枢密院编修官冬兼检详诸房文字二十八年改左宣教郎八月为秘书省校书郎二十九年兼吴王益王府教授既入馆屏远人事益读未见书假休亦入抵暮始归一时名臣汪公应辰史公浩虞公允文陈公俊卿刘公珙雅相器重三十年再考省试知举朱公倬尤知公诏举台察荐公及史虞刘四人四月擢监察御史六月迁右正言首论大臣矜势以养尊小臣持禄以遂私二三执政以括囊为智以引去为高愿陛下正朝廷以正百官体貌大臣勿假以权刑赏黜陟之柄一听于上使号令无纷更官吏无数易则其他将不革而自去上欣然嘉纳公自以不世之遇论事益切其大者论时宰初无素望偶中科目权臣引之要途致位公宰窃弄威权动循覆辙假封駁以行其意嫉风宪以沮其言既罢政又论其植党营私怀谗迷国竟镌其职又论大将刘宝之在镇江私殖货财陰交权幸方命掊克之罪而罢之此外遇事必言言之必尽时高宗更化之初兴滞补弊公所言无非经纶要务尝谓道揆正于上则法守明于下乃者用事之臣持己私以专国柄四方奏请有送部勘当看详措置之类当处以无心总要听成

以诏废置而已今乃均是事而有前批後批之殊同是法而有元降续降之别情法不相当则云更合取自朝廷指挥自知无法可行则云如朝廷特降指挥于本部成法即无所碍变旧章而惑观听有司失其守而名实乱矣欲望明诏大臣令各以成法来上尽去宿弊或依违迁就则坐以违制御笔令三省六曹遵守此实公之相业也眷遇日隆且将大用三十一年正月转左奉议郎四月丁楚国忧上闻之惻然因谏议大夫何公溥入对就令传旨慰问亟有金缯之赐隆兴元年服除孝宗励精政事妙选部使者是冬除直敷文阁福建路计度转运副使除科盐之宿弊洗滞讼之冤枉治最上闻乾道改元召赴行在陈责难之说必欲致君于尧舜又奏监司郡守数易及内治外治之策尤详上皆赏难且曰卿居言责有补治体四月除秘书少监又以公端厚诚慤五月兼皇子恭王府直讲六月兼国史院编修官未几皇孙降生申乞检照典故有沮之者与外任三年闰七月转左承议郎十一月起知江州四年奏事改建宁府仍旧职对祥曦殿陈择将备器简兵足食四事又言差役关征赋籍榷酤水旱义仓典狱御军之要既赴镇人熟公仁厚炷香以迎莅政尤以慈祥清简崇风教务节俭为先明年就迁转运副使寻有召命言者尼之公亦力辞而止始建谿用浮梁潦水则撤去行者告病公命以石为之既去而桥成榜曰平政生为立祠八月转左朝奉郎六年六月改两浙西路提点刑狱公事入奏闽中利病及建剑汀邵上供银悉施行之奏事毕上令一至东宫皇太子以师儒之重加以拜礼公于详献之际尤切哀矜直欲使无一人之狱又切戒豫借折帛之扰冬转左朝散郎七年天申节上寿奏浙右水灾欲令许浦水军任疏凿之役又言州郡任情或以轻罪编置失太宗奉法除奸之戒赐田之家或取民间已佃之田所当禁止县之推吏当行重禄盗贩榷货配隶加详上曰议论切当朕所简注八年十一月除太常少卿十二月兼权中书舍人九年闰正月兼权吏部侍郎二月兼太子左庶子四月兼权直学士院七月除中书舍人仍兼直学士院论军兴以来上下相沿事干机速则先施行而後书押朝臣除授亦有先次供职者望申旧制正救于未行使天下不见其过九月兼侍讲十二月兼太子詹事转左朝请郎封东阳县开国男食邑三百户淳熙元年陈觉民非随龙而援例转两官龙大渊已致仕而越例求恩数执政罪罢而犹除资政殿皆封还之训词深厚得王言之体十二月除翰林学士知制诰兼侍读依旧太子詹事二年知礼部贡举上俾择文学行谊之士荐郑伯熊李焘程叔达三人皆被进擢张说罢枢密除太尉在京宫观力陈其不可竟奉外祠三月以东宫讲易彻章转朝奉大夫四月兼修国史兼实录院修撰公在禁林昼接夜对退不以语家人无得而传焉闰九月除端明殿学士签书枢密院事进爵开国伯公恳辞上谓卿存心至诚学有渊源及倚用之意且戒以推诚待遇将帅同济国事有曰人臣须是徇公不当邀权古人有愿公无权之说又尝曰枢密每事详审有未合法度处必将上理会其善朕亦从容多暇又称遇事无私详练谨密深赖协济四川制置使范成大奏郭钧馭衆无术几致生变命龙霁体究上曰成大所陈则钧之罪大霁条奏亦有不然者公奏霁谓其留心军务但绳治弛堕甚严乃是称其所长然谓僻于自用克剥侵渔势不可复留因荐可代者六人又奏江西捕茶寇真是有功行赏太滥却须核实此皆大节目也其他应酬边事如湖北之夷人占城之劫掠皆因事制宜随即帖息高宗庆寿奉上尊号为篆宝官进爵东阳郡开国侯三年申议使汤邦彦使回上怒金人无礼公奏天下为度惟当讲自治之策以待之四月国史日历书成转朝散大夫八月授中大夫除同知枢密院事上又称公尽公无私裨益为多签书枢密院事赵公雄留身奏事上又语之曰王某难得卿宜同寅协恭傜人姚明敷已就禽而率逢原擅入多杀文州蕃部渐就安业而李昌祖诱杀降人公皆谓不足为武徒伤好生之德上皆令体究责罚上言中宫躬俭诚信太子温恭俭薄本

朝后妃多贤朕自以为幸所少者则是功业未成公奏功业虽中主可成齐家治国非上圣莫能及上曰然德行为本功业次之尝宣谕十年来欲令宰执进呈退将得旨文字再具熟状进入朕再行审阅批出然後施行既免专擅之嫌且无迁令之患参知政事李公彦颖奏曰此光武以吏事责三公之道也公奏唐制宰相奏事止是口奏曲折或赐茶而退即作圣旨施行国初范质等系前代旧人怀不自安始日具事日进呈退就殿庑批旨然後上焉今若再经审阅然後付外则事无过举人无可议亦保全大臣之一端也翌日又命进拟仍注乡贯于臣寮姓名之下公谓除授当论贤否不事形迹诚贤耶不敢以乡曲故旧而废苟曰非才亦不当以己私而庇之上曰善郊祀充仪仗使礼成进爵开国公四年六月除参知政事时宰席久虚公与李公同行相事五年三月知枢密院事十月拜大中大夫枢密使公在右府忧边思职约束诸军擅差白身人任职事拣汰筋力未衰屯驻离军人改陞等为合入差遣禁黎州所部邀功生事抚存草羌山招到作过人措置归正添差员阙及冒名承代之弊安边鄙以怀远人动中机会江西赖文政郴寇陈峒李接之变淮陰劫寇等公应酬羽书号令赏罚明审平当上亦称其毫厘不差又尝顾签书枢密院事钱公良臣曰王某临事至公遇事不曾放下卿宜協贊又曰向来大臣不知兵所以用兵多无成功今卿等究心军务朕复何忧钱公亦语公曰近郭棣尝云蒙宣谕王枢使在西府数年不曾错了一事六年四月日历书成转通议大夫八月会要书成转通奉大夫九月明堂充礼仪使或请主兵官置亲军者宰执谓主帅不可无此如韩世忠置背嵬卒能成功上欲令三衙建康主帅相度闻奏公独曰若令主帅相度孰不愿置此军恐内有肘腋之虞外有尾大不掉之患世忠等辈当艰难日握兵于外置背嵬等军以募死士今无事而置此他军必谓主帅自有私人不肯为用又请受赏给势须加厚怨望日生万一有警使之择勇敢出死力亦何不可上曰卿任腹心之寄长虑却顾如此真善谋者也尝论立贤无方而或言闽人不可用者公谓固有章子厚吕惠卿蔡京蔡卞然曾公亮苏颂蔡襄陈襄亦闽人也江浙固多名臣亦有王钦若丁谓辈顾人主所以用之如何尔上极以为然七年八月诏公今後垂拱殿及後殿奏事并免宣名赐宴隐秀上曰朕比来临事未尝苟且近欲按军法诛成光延等王枢使言平常寇赏格比北敌战功减半议罚亦宜如此朕释然而悟称獎久之公复奏曰败军之将罪固当戮圣恩溥博遂从寬宥臣何力之有十二月四朝正史书成进正议大夫食邑实封满万户封信国公公执政累年谨守成宪执内降之难行者张说之子荐以水教溺士卒褫官封还叙复诏命至于再三乃止守边统兵之官各当其才孝宗明见万里公区处军务率皆合宜眷意益厚公归美君上无一毫矜伐之色人望愈归之八年九月拜右丞相兼枢密使授光禄大夫封福国公累月亢旱至是大雨沾足人心闔悵公奏事力辞上曰卿直道自将知无不言朕所信用卿而不宜尚谁宜者又曰卿等朕所倚信当尽言无惮公对曰有君如此苟为緘默岂不辜任用之意右丞相赵公雄罢政朝中蜀士率有去意公曰若宰臣一出而引用之人相随以去是激之使为党也皆以次进迁于是始按堵矣大拜之初好进者蚁附踰月无所更易或问之公曰此正奔竞之秋若骤尔陞黜非惟有骇观瞻尤非平日所喜也旱势既广力贊荒政起李椿于休致以次对帅长沙知南康朱熹擢浙东提举以为郡国之倡两路出粟专济边郡归正之阙食者借贷二麦种子戒飭檢視官司甚严孝宗遴选从臣皆出独断版曹阙貳俾公择才因荐曾逮周嗣武皆从之尤见责任之意公为闽漕时侍御史李处全尝论公召命至是公谓处全久闲若不録用将有私憾之嫌奏起知处州同列皆服公之仁朝士有论朋党始闻五鬼七殇之目者上以为问公曰此乃不得志者所为示之以静则无事矣金使魏正吉朝见执书未进公谕以礼而正吉行欲退公即奏请皇帝还宫降旨别日引令

馆伴议之次日卒如仪而去枢密副都承旨王抃窃弄威柄招权纳贿军机边事辄用白劄子径作得旨行下朝廷又不预知士论籍籍无敢斥言公忧之已久至此颇甚造膝极陈上始为之动色既而欣然开纳曰非卿尽言朕不闻此当为卿斥之後数日上又及之公奏近习弄权人主鲜不以此受谤一旦斥去中外无不服陛下之明断既而宣谕欲改用文臣公曰救弊之初当有以新天下之耳目力荐萧燧以待制为之上尝谕丞相直谅无隐君臣之间正欲如此今後有合处分事只与丞相议之上曰朕欲奨用直言以起治道而好名之士至于以虚为实毁誉乱真岂朕所望公曰诚有此病然不可因噎废食必欲兴天下之大利除天下之大害非奨用忠言不能济也会章颙轮对上以为言涉沽激全无根蒂自王蔭以言进用一传而为刘尧夫此後如周洎郑建德辈妄肆臆说相师成风不少示以好恶则此风遂扇而章颙又有甚焉欲批与外任以卿前奏故留至今公奏顷以象纬失度陛下畏天求言搢绅当不讳之朝以言相高耻不相若虽入于激讦而不自知士风如此良亦可贺或加阻抑则有讳言之诤莫若奨其切于治道者好名无实置而不问以示优容则自各安其分矣上称善久之丰储仓蠹弊上闻有司请穷治公奏将有不治者欠数虽多历年亦深吏已随所犯流配官则更易已多难以令见任人独任其责上即蠲之知夔州林栗奏谭汝翼之罪而汝翼亦伏阙诉陈有旨索案而栗奏谭省劄上怒其擅格君命镌秩罢之大理当汝翼死罪公以其与夷人杀伤略相当又诣阙声冤欲贷命编管内地处以不死潜消奸宄之心又奏栗廉介有才学此亦无他上曰少俟复职除二广监司恭涪忠万饥公奏去岁荒政施行略备蜀远旱伤尤当賑恤乞就江陵及总所各拨万斛以济之职事官阙上令先及侍从荐举人公拔其尤如罗点陆九渊彭仲刚刘清之并与职事官莫叔光赵玠除删定官武臣邹诩乞大减任子之数以清冗官上付外集议公奏去郊尚远姑令熟议若行之当自大臣始遂定宰相十人执政八人侍从六人卿监四人带职员郎以上三人致仕遗表裁减有差上曰张大经说近日差除颇协人望亦欲卿知上又曰黄洽称成都除留正甚当以得人为贺朕谕以近日进拟莫非公道二人皆台谏也公奏圣主在上贤不肖较然稟受圣训庶几寡过敢不竭诚以图报尝因进拟宣谕曰选得甚当丞相于人物不苟如此公奏臣于人物恐不能尽记自有手记有繙閱十余过而不得其人者何敢轻也九年七月为明堂大礼使九月拜特进左丞相进封冀国公监修国史日历提举编修玉牒详定一司敕令制词有曰似不能言而智足以决天下之疑如不胜衣而勇足以任天下之重士林诵之是日梁公克家拜右丞相同心辅政上益倾任之公首以用人为己任以馆职及郎官多阙欲召试及选治郡高第者为之于于是荐召蔡戡谢师稷周颉尤袤林枹郑侨罗点郑愕等又以张杓傅淇徐诩王正己京镗等分为监司一时翕然称为得人户部申明赦文蠲阁税租之外其余赦所不载者欲起催则洵饥方苏恐致重困公奏尝令计之为缗钱三十七万有奇若朝廷补其经费方可蠲放上慨然从之明堂讫事上以任子减前郊几半公奏仁宗时韩琦等减任子犹不免纷纷陛下行之既尽人情後效不止此也十年以太夫人将八十久任机衡求退甚力上不许可行推排事公谓同列曰非不知其利以臣寮所请而行犹或可缓若作直旨则奉行过当利未及而害先之吾辈在此见民所苦当如疾痛之在身可不救乎天长水害七十余家或谓不必以闻公曰昔人谓人主不可一日不闻水旱盗贼礼曰四方有败必先知之可谓人之父母矣因拟周极安丰军公奏蹶之士缓急可用临难不顾其身小廉曲谨者未必能之平日爱惜人才正为此耳对境报金主归上京所差人使权止一年公既陈设备之详又谓接伴亦不须遣盖彼既止吾使之来亦难受彼之使上意恐啓争端已而敌又报使人更不差发上曰卿言乃验于今岂非真庙谟哉十二年十一月为郊祀大礼使高宗庆

八十议典礼赏赉甚详既被命撰尊号册文又为礼仪使礼成转两官力辞恩许回授十三年三月象纬告异求解机政章四上不允九月公丧长子求去愈力天语开勉又不敢去国史院进四朝国史列传秘书省会要为礼仪使玉牒又进书力辞官进封鲁国公十四年以旱又求去上一日以手札问枢密非古制晚唐不足法欲罢之人吏并归三省公奏庙谥雄断非臣下所及未敢轻对乞少俟筹度已而昼度夜思基命之地军中禀承号令习熟见闻一旦更张非所谓振士气又批贞观开元兵强天下其视唐末密院岂系轻重哉公又奏祖宗规模既定难以轻改上令促拟指挥且曰此于兵将别无利害公奏唐之盛时兵柄在外藩镇权重不无疑贰故置监军事从中覆後患其难制又建本兵之地谓之内枢天子临朝亲加裁决实收天下兵柄以制外重于军中岂无利害与其行而中辍孰若小忍以待大业之定其事遂已高宗不豫公诸依唐贞观四年典礼权不视朝以见不遑安之意速升遐扈从于德寿宫门外一时典礼皆参画成之充撰谥号册文官及陵名庙号充上册宝礼仪使公撰册文号大手笔称天定谥衆说竞进高庙之号公力主其议及定永思陵名因山之役事绪非一皇太子参决庶务于议事堂调护尤多兵部侍郎林栗乞增置遗补御笔欲除薛叔似许及之二人资序才望相当否密具奏来公复奏曰陛下方修废官遴选在廷难逃圣监虽非臣所敢预知然二人资序才望实与官职相当上乃出命盖孝宗无事不与公议如此者非一谨着其大者公又以亲年益高上章丐外议政复不苟同十五年高宗祔庙礼毕请益力五月除观文殿大学士判衢州内殿朝辞褒谕劳勉至于再三退辞东宫慰抚尤厚宰执百官郊饯奉版舆还乡极袞衣昼锦戏彩之盛又以便亲求闲秋提举临安府洞霄宫明堂大礼加恩积食邑一万五千户食实封五千七百户十六年岁旦谐乡校讲释菜序拜之礼齿于韦布间二月光宗受内禅以诏书咨询初政略曰卿曩以经术羽翼朕躬以德业股肱圣父周旋政地十有四年凡国家利害生民休戚与夫因革损益之宜可以裨朕者其悉以告朕将受而行之公奉诏感泣遂奏疏曰初诏求言中外之臣咸得条奏不遗旧臣复加特诏臣受国恩至深至厚此而不言臣则有罪天下之事莫难厥初历陈尽孝懋德奉天敬民用立政六事又言高宗寿皇如尧舜而以禹处陛下又力言禹之所以继舜者以对有旨建节开府仪同三司会魏国薨候服阕日降制公执丧孺慕悲泣无时不肯少近滋味仲秋中使传宣抚问赐内帑银绢七百匹两为贖公亲具表谢才数日忽语诸子曰六十有四卦气已尽而衰苦衰病如此其能久乎主恩未报母葬未举为恨耳遂乞休致口授遗表戒子孙忠孝无一语及他前一月大星陨于第至是神色不少变夜漏下一刻默然而薨实八月十二日也拜少保致仕遗表上闻两宫震悼辍朝二日赠少师赐银绢一千匹两亲属一人添差本路干官以护葬官其子若孙七人恤典甚备殄瘁之叹中外所同绍熙元年十二月甲申葬于婺城之北十里许隆寿之原绍熙二年赠太傅五年赠太师皆以诸子陞朝该大礼恩也娶何氏左奉议郎知温州瑞安县绅之女封冀国夫人後公十二年薨子八人长曰模通直郎监西京中岳庙次曰枢朝散大夫新知岳州军州事次曰机通直郎监西京中岳庙次曰朴迪功郎次曰栋朝散郎通判临安军府事次曰楫通直郎知绍兴府上虞县事次曰櫛朝散大夫新知辰州军州事次曰栻修职郎新监台州支盐仓模机朴皆先卒女三人长适故宣教郎通判平江军府事姚穎余皆蚤卒孙男十三人俨承奉郎仪伦俱承务郎亿将仕郎甫承奉郎修承务郎侑仍承奉郎必偃俦信倓孙女十一人长适迪功郎新建康府府学教授程秘次适将仕郎姚元特次适姚元哲次适从事郎信州贵溪县主簿赵汝鏊次适将仕郎丁嗣延余未行公神宇秀整雅有丰度清虚粹夷望之自是风尘表物加以问学邃深词藻赡丽蚤步清要輿望已属中虽遭回晚乃际遇孝宗皇帝以不世出之资直欲鞭笞四

夷以遂大有为之志一时进用多趋事赴功之人淳熙以来益务内治选任儒雅厚重经远好谋之士而公为之称首君臣相遇千载一时国家左右相之下则有参知政事右府则有使知枢密院同知签书凡七府公独遍历以王端揆近所未有也孝宗聪明果断临照百官公以宽厚精深调娱万务守法度行故事大纲小纪持守无失取人才则先器识治民事则务优容理财则不为苛急论兵则尤极周密赏不遗劳而裁其滥刑必当罪而归于宽中外之官各当其职方内又安君相儆戒上无骄盈之迹下无危溢之忧至今言治者必称淳熙之际焉天资谦谨辅赞弥缝而藏诸用者外人不得而见其所荐进能尽其才而避远名迹若不自己出盖有受恩而不自知者冲澹寡欲自奉至薄食不重味衣至十年不易素不喜酒外物一无所好屏绝声色之奉一意笃学聚书数万卷无所不观虽机务业委退坐静室饮食亦不释卷夜则使子弟读而听之制诰尤有体要一时文学之士皆出衡监上选词臣必以密访之有诗文制草奏议四十卷藏于家聚族余百口上奉慈亲既极其诚敬友爱诸弟任子恩先以及之抚息遗孤居无惰容家人不见喜愠之色不治生产门无杂宾功总之惨素服尽礼皆当于古人中求之钥不肖再点朝行负丞太府忽有容台博士之除上问班序反下若左迁者公奏议礼之地最当择人而近岁乃以序迁臣所以为此者欲重其选也钥何足以当之有以见公知遇之深虽以私讳不及就职至今不敢忘公之薨一纪钥之投闲亦久矣枢等以行状为属将以上于太史氏仰惟公之备道全美宏才远业钥何足以知之谨叙次爵里履历行实之大槩参以见闻而书之盖公之为善不可胜书徒恐辞费又不敢以溢美也呜呼高宗擢之言路不及大用孝宗眷倚最久经纶未究而乞身以去光宗以旧学之重待以为政而公不胜丧矣此搢绅之所重叹然自古称君臣遇合之难而善始以终者尤为罕遇如公之受知累朝哀荣终始士之致身至此者有几亦可以无憾矣谨状

卷八十八

钦定四库全书

攻媿集卷八十八

宋 楼钥 撰

行状

敷文阁学士宣奉大夫致仕赠特进汪公行状

曾祖元吉不仕妣何氏

祖洙皇明州助教累赠正奉大夫妣陈氏累赠太硕人父思温皇左朝议大夫直显谟阁致仕累赠少师妣王氏封恭人累赠越国夫人

本贯庆元府鄞县武康乡沿江里汪大猷字仲嘉年八十有一状

惟汪氏派出黄帝得姓尚矣然自历代以至本朝未尝有一显者宣城鄱阳上饶四明诸郡大率皆出于新安英济王庙食千载後裔繁衍宦路相遇多讲宗盟佑陵时大司成澥以耆儒名翰林学士藻以文章显尝谢司成荐举止用张衡思玄赋汪氏龙鱼及檀弓童汪跼事且曰遥遥谱牒之相传没没衣冠之不振虽更魏晋之远莫厠崔卢之间槩可知矣丞相伯彦首相高宗遂为佐命之臣绍兴间签书枢密院事勃枢密使澈俱至大位子孙宦达相踵端明殿学士尚书应辰以重名崛起虽不至公辅而道谊风烈足为一世师表此其尤盛者也公以文昌旧臣历仕四朝康宁耆艾独殿诸老抑其次焉今汪氏所在衆多几如王谢家岂族姓盛衰亦有待于时耶公之曾祖处约而有士君子之行受知范文正公王荆公正奉为乡先生文行淳备沾丐後学少师绍兴初为太府少卿两浙漕使风谊尤高搢绅推重生四子公其仲也始越国方娠公之从伯父梦应真受生产于叔父吏部鄞县丞之官舍生而岐嶷骨相穎异四岁诵孝经能对客问学中所讲论语孟子辄述口义以示同舍一日千里侪辈皆畏之绍兴七年以少师遇宗祀补将仕郎调右迪功郎衢州江山县尉公渐渍义方晓畅吏道若老于州县者所部百人默识姓名及干力之优劣辄得其用分乡警捕境内肃然钩考滞讼断之以理岁在甲子洪水稽天发廩为粥以食避水者又取盐商大舟救之存活为多时方申兼经之制以尝试南宫公余肄业再荐漕台遂中十五年进士乙科秩满关陞左从事郎为婺州金华县丞处事益明期限必信文引可以质钱至有以润其屋者豪民陆氏析产鬻讼案牘纷积公诘其要谓祖屋枕山长兄据其前而使诸弟由山蹊以出公曰此最其不平者按图更分已得要领又诉义逊及贍莹嫁姑之厚公曰尔父兄同力起家义逊有法奉先冢嫁诸姑岂得不厚一妇以衆钱买田托以嫁资公考妇家户籍不满半顷复取均之且谗之曰若送所司一门无全人至亲不复可相见汝家破矣命讲长幼之礼叹服而退时户部侍郎李公椿年建议行经界选公为龙

游县覆实官约束严峻已量之田隐藏亩步不以多寡率至黥配盛气临人无敢忤者公独曰愚民不识弓步不善度量若田少而所供反多须使之首复乃可并行李公问当何如公曰凡有不实许其自陈俟验实与改正悉皆施行受赐者已不知其几既至躬行阡陌唱弓量之目则已默计其广袤之实吏运筹久之无毫厘差观者以为神凡事俱有方略邑人鼓舞旁县皆取为法事毕躬纳图帐李公又欲以十保合为一图仍与邻都犬牙相入公曰一保之图用纸二百番已无地可展又从而十之不惟不能图画亦安所用之徒重劳费无益于经界也由是诸郡俱免催科办事谈笑而了不失忠厚二十年丁越国忧星奔哀毁悲动行路服除为严州建德县丞二十四年饥民啸聚炽甚守御调度多出规画以讫无事分都赈给衆中指一夫诘曰是某都某人也盖居两都之间而冒请者械系于前余多引去事已徐释之又尝逊荐牒辞受输皆人所难能明年用举者改宣教郎知平江府崑山县旋遭外艰既造朝有达官使献生财之说将用以为荐公曰财不可生也生财者必害于民宁甘心寸进耳遂谢之差总领淮西江东军马钱粮所干办公事金亮犯边馈饷王师高宗巡幸供亿百出公佐其长以办羣工扈从咸知公名三十二年赐绯鱼袋改干办行在诸司粮料院文书盈几目不给视公间摘一二无不切中老吏惊叹谓未有也或言榷货务左藏库有羡储朝旨以诿公躬自检校得其实以对隆兴二年四月参政钱简肃公宣谕淮东辟为干办公事九月改充参议官内裨幕府外按边陲海泗唐邓之弃钱公执以为不可公亦赞之虽不得尽行终免仓猝之变者宣谕司之力也迁大宗正丞乾道元年兼吏部郎官主管侍郎左选又兼户部右曹有蜀士理和采酬赏吏必欲以小节取会公曰在法有旁照可验许比类而行即取其同类者并上之省吏沮抑尤急公力争之自是始为定例六月轮对钱公先荐于上乞与之言察其人物公奏总核名实责任臣下因才而任毋违所长量能授官毋拘流品又乞表荐宗子随事録用止注目久之谓辅臣曰疏通详雅有议论今日有用之才也除礼部员外郎公自登第尝习宏辞科应用之文足以行意在州县时守将多委以笺奏南宫名表一出士林诵之此外无他职务同列言于庙堂谓公拨繁治剧有余而清简太甚丞相洪文惠公以此谕公七月遂兼吏部侍郎右选九月除吏部郎官主管尚书左选庄文太子初建东宫妙选僚案是月以公兼太子左谕德太子侍讲两日一讲孟子多寓规戒庄文深所钦重尝出龙大渊禁中所进侍燕乐章谕官僚同赋既退公谓同列曰燕既不预无以措辞若出于御制或储禁为之犹可赓和郑卫之音近习为倡非讲读官所当预也白于太子而止二年为省试参详官参政林公安宅以户籓同知贡举就除谏议大夫自言去场屋久以考校事属公公为之恊心焉讫事日欲邀公议论辞不往林既罢政独免于评议六月除秘书少监高宗圣政书成进读于紫宸殿德寿宫道山清高领袖名士职当修神宗以来会要而旷岁不举深惧典故散逸率属分纂上闻之为置局命宰臣提举书奏五朝之大典始备金国来贺四年正旦借吏部尚书为接送伴使上閲语録见公敏于酬对处事有体滋向之寻兼权刑部侍郎六月兼崇政殿说书八月兼权给事中孝宗厉精民事访问不倦宿直玉堂夜宣对选德殿赐坐从容导公使言时欲遣察官决狱畿邑公奏使果有滞囚亦且先次决遣事体太重徒扰诸县必又甚于监司之临按不得不谨于始遂改命通判以行公首以一言移主意自尔每遇夜对上多访以时事尝曰卿为侍从天下之事无所不当论朕每厌宦官女子之言思与卿等款语正欲知朝政阙失民情利病苟有所闻可极论之公悉进所欲陈者奏对明白曲尽情伪上多耸听而行之其造郤啓沃之际若讲义进故事论治道之要具有遗编亦或削藁而不传惟见于事功之实者谨书之以池饶信建水灾乞用澶州刘涣收买耕牛之法令州郡广收采以备赈糴论役法则陈一乡通差物力均差均钱雇人官户例

減限田之詳又別白里正則專主烟火盜賊耆長壯丁則催科承引今取耆長雇直撥入經總制司并緣法意里正承役之初抑使兼充役者受害為甚甚至死必爭又乞改定役法未可輕變廣求衆議而後可必須遲以歲月若欲寬其困苦當先嚴禁誅求又論亭戶不充役次以鹽折稅或有未嘗親熬波之勞居近場監貸錢取息射利為厚且三公尚有限田而此曹獨無定數反受官戶隱寄又均和買于編民欲將家產及二等以上依官戶充役又論給賜勲旧近戚以田一得指揮豪奪占据桀黠者妄指官之籍沒民之戶絕者以為獻藉勢陵軋州縣至不能誰何寧忍惠及一家而使人重罹其苦自今惟當錫以金帛使自求之又論籍沒財產止可行于強盜囊橐官吏犯贓之人然朝為富室暮為窮民流離凍餒已自可念至有仓库綱運負陷官錢而致破家者宜有以處此欲應以欠負拘產不在給賜出賣之數計其租入償欠既足則以給還使復故業以至廢鄉村私立稅鋪罷官監酒坊及陳萬戶酒之策嘗因輪對論銅器之害則曰產銅之地不發浸銅之水漸涸鼓鑄重費楮券弊深泄于邊境而法不嚴坏為器用而官不問若立用銅之罪重于銷銅之人居官而使人為器用者坐以贓私罪則法乃可行論捕酒之害則曰民戶遭劫盜者猶有官司可告盜既不敢肆毒鄰里亦得救應今捕酒者空人之家鄰里至前則誣以拒捕官司不復明白則是捕酒之暴甚于劫盜也殺人者罪止一身而老幼自若今一遇捕酒舉家拘繫非法受苦則是犯酒之罪重于杀人也大率公之論事皆深切着明考究詳備玉音嘉獎嘗曰卿前後所言皆今日可行之事臣僚所未及一一付外雖議有不同不盡見諸施用亦有遂着之甲令者五年再為參詳官四月除權刑部侍郎兼侍講職千秋官二年余孝宗垂意刑章哀矜庶獄公乞重修法令謂中興之初首立詳定一司自建炎四年六月以前着為紹興法今四十年多編集監學貢舉常平茶鹽等一司之法而一代條章因革損益迄無成書敕局官多吏繁俸優賞厚因減冗官遽行廢罷舉數十年之法一切不省建炎以後續降指揮二万余條若不刪其繁重定其當否有司率用新制而弃旧法日移月改輕重舛舛無所遵承使舞文之吏時出而用之以售其奸及今不為久益難考乞明詔盡行編纂命大臣典領而選廷臣討論庶几筆削必當以杜吏奸以一民听上極以為然即令條具仍差大理二卿本部三郎官寺丞司直各一員公遂兼重修敕令詳定官此四年之冬也他官去留不一惟公疚心修定以為己任推舉詳明通練之士以自佐訪求旧吏網羅故牒若一司一路專法不系海行者即厘送之一時申嚴或虽系統降尋即冲改者即刪去之于見行法中增損元文五百七十四條帶修創立者三百六十一全刪旧文八十三存留照用者百二十有八墨書旧文朱書新條年余書成進書之奏公所草也謂將前後續降參以累朝法意酌以四方人情考訂編入各有看詳案冊明言去取之因而例不以頒降欲申敕有司凡州縣于新書有所未曉許條具申所當以元修因依行下孝宗取進本列于選德殿之左右朝夕觀覽嘗宣問所疑隨即奏對上又取條冊指問與所奏俱合嘉賞再三曰文字繁拏不易盡記留意所職乃至于此對曰此法將與天下共之况屢承宣諭敢不尽心他日又問如初遂亟稱于宰執有忌公者遽入譖言賴聖明不以為信尔後屢更修定今凡再易矣其規畫大率循公之旧而精力不能逮也上又嘗問本职事刑罰黜陟豈無過差公因奏溫台大水郡不以聞使之具析以守臣王之望嘗為執政陳岩肖為从官特免違慢之劾乃移罪二漕各降一官上云亦覺未是待作一名目改正公又奏知其未是當明以示衆若別作緣故則前失仍在不若徑改之有旨改正又奏知信州趙師嚴補余前政所亏常平米方及半而坐擅用鑷兩秩永不得任親民提舉李庚已嘗申明送饒州取勘亦以不行檢察坐之且不得與監司虽欲示警而皆不當其罪案上皆得追改前命辯台民楊大任匿盜而能告捕不應坐以越訴即依條給賞仍免其罪論一案推

结之法屡变会问无期狱讼淹延即令别行立法时尚书周公执羔韩公元吉枢密刘公珙以强盗率不处死无所惩艾侍郎林公栗为右司谓今之强盗非亲下手已杀人者类皆不死请依太祖旧法赃满三贯者皆斩公恐遂行曰此吾职也遂具奏曰强盗岂可恕用旧法而痛惩之何为不可惟是天圣景佑宣和以来益用中典太上与民更始非以刃杀人者一切贷死远近归心循袭既久寢失禁奸之意今已议为法六项犯者依法处断非此而但得财惟再犯者死可谓宽严适中矣此辈虽愚岂无黠者为谋知有可生之路志在得财而已所全尚多若不分首从虽不杀伤悉皆抵死则凡得财鲜不及三贯者此法既立未必能禁其为盗彼先以死自处则被盗者将无噍类为盗者无复全人究其极而计之死者益衆矣陈公良佑为谏议大夫请取案例公以见定一案闻奏用六项法则死者十七人用见行法则才四人若如旧法则百七人俱死遂从公议借吏部尚书为六年贺金国正旦国信使归至盱眙得印榜云今後犯强盗并依祖宗旧法所有六项指挥更不施行到阙未及结局即以不得其职自列求去上闻其详即日复行六项之制至今遵用焉有请以大辟奏案如情理可悯即上朝廷若情法相当者止从刑部审覆行下公以为既经奏闻非有司所得自专当依旧例拟断降旨处分尤见详审钦恤之仁监司按发官吏不得送置司州军根勘绍兴之良法也久而寢紊为弊亦多公申严之使见有违戾者并行改送勘院翻异当究问其词具申监司有诏物价腾踊以绢定罪者每匹增为三贯公乞以钱定罪者亦如之其明罚敕法助圣朝好生之德者未易悉数也使金之役权要为辅行公在朝累年于人甚周而介然有守未尝与之通至是惟议使事相处亦不为异惟不能过为奉承事已又疎之衆服其裁正而其人自此不相乐矣时孝宗方欲经略中原使回者或承顺旨意过为大言公归首以为问因具陈经行所见闻者上曰如卿所言则未可为攻取计耶公顿首曰诚如圣训今日岂可轻动且须益务内治以俟机会耳玉色不悦公又曰臣不敢妄论迎合闻者以为名言七月除权吏部侍郎九月兼权尚书再置敕局兼详定一司敕令先少师尝为吏部郎仕者脱兵火亡失文书诉者日集躬为辨析吏不得蔽建请改官状五纸之外许令改举声绩卓然公少亲见之自为郎尝历三选以至长贰清通简要兼古人之长建明尤多率以先德为法或曰今日凡事从窄非曩时比盖有务为沮抑号能任怨而至显用者公曰方且鄙之何忍效尤乎调官陈词者多孤寒之人于此不为留意使不得其平尚谓之铨衡耶由是郁者得伸滞者得速求者得遂人人感悦亦未尝屈法以从人其有不可明以告之退无所恨辨宗室及阵亡人女夫不当在七色之数乞恩科权官选人愿致仕者请以历过岳庙为考修正川广定差之弊命官被诉不经勘正者免关刑寺注籍以妨差注县令臧否欲俟其任满奏闻案後收坐不当之人止就部检照免行下取会又条列部中留滞节目附赦施行皆欲去弊剔蠹使选法流通以为公私之便中使尝夜传旨学士院袖出资治通监一册指唐沈既济论选举事曰今日有无此弊其说可与不可行来蚤面对退即呼烛草奏既入先历陈数项谓事与今异弊虽似之其言则难行上曰卿言甚明更试一言因奏正恐言不能尽曾笔于纸深夜书写不谨上即令展读读毕不敢留中退至庑下又遣宣取且云更欲详观可遂留下宸眷日隆会当郊特差充卤簿使人知枋用有渐而忌者愈甚竣事力求外祠上亦知之七年正月除敷文阁待制提举江州太平兴国宫侍从馆阁诸公赋诗留题以饯行色今石刻存焉还乡四月起知泉州到郡遇事风生不劳而办郡实濒海中有沙洲数万亩号平湖忽为岛夷号毗舍邪者奄至尽刈所种他日又登海岸杀略禽四百余人殲其渠魁余分配诸郡初则每遇南风遣戍为备更迭劳扰公即其地造屋二百间遣将分屯军民皆以为便不敢犯境後左翼军狃于盗赏忽又报侵犯径捕至庭自以为功公曰毗舍邪面目如漆黥涅不

辨此其人服饰俱不类何耶察之乃真腊大商四舟俱行其二已到余二舟以疑似被诬公验其物货什器信然军人犹譊譊不已公谕其将曰使真是寇贼固不应纵舍既知其为商旅又岂得陷以深文始皆退听即使尽入来远驿所贩黄蜡偿以官钱命牙侖旬日间遣行军屯城外有入盗库银者踰垣而出为逻者所侦反执而归诬以为盗而上之郡公已得其情仍械逻者使参对失银十二铤得十而遗其二主将辩数甚苦公不为动已而军士首伏即其所窖取之皆伏辜微公明察善处则俱失其情矣蕃商杂处民间而旧法与郡人争鬪非至折伤皆用其国俗以牛赎罪寢亦难制公号于衆曰安有中国而用番俗者苟至吾前当依法治之始有所惮无敢鬪者三佛齐请就郡铸铜瓦三万片舶司得旨令泉广二州守臣监造付之公上疏极论其不可既犯中国之禁又为外夷所役独不与南外宗正司廩给岁广久以为病公撙节用度增价以衆民始免于苟取公再岁两求奉祠九年以治行尤异除敷文阁直学士再任赐衣带淳熙元年申前请始有兴国宫之命归次延平除知隆兴府兼江南西路安抚使赴阙奏事甫入国门即令引对临遣甚宠江上有篙师谋害主人而据其女因有资财女闻公威名密告县令公为究治得主人夫妇二屍于神祠之傍冤始获伸吉民王氏雄于财怒武尉之不容冒佃官地诬诉于州尉不屈夜归过其门使人折其足事達帅宪公同奏其事且谓父子皆以赏得官恐从末减无以惩奸乞先除其名孝宗閱奏震怒径下所勘建昌军皆黥配岭海并坐推吏之受赇者江右无不快之五月茶寇赖文政等起湖北自湖南向江西帅司即令境上防托江西所恃惟赣吉将兵亟遣未及而贼已入境与吉兵遇一使臣死之以湖南曾戕官军至此又小胜止为逃死之计遂据禾山洞公遣副总管贾和仲总数州之兵以讨之和仲老将意颇轻敌或已议其狠愎难任然兵官无踰此人者未及出门而得旨果以委之主帅调发而箠牧领兵职也武人谓朝廷专委凡事寢不相关一到贼垒暮夜驱迫将士入山反为所覆不可复用又遽遣约降至折箭为誓人知其为诈而不寤贼立旗帜为疑兵由鸟道竄去两日而後知之六月初有旨湖南令帅臣王炎节制如已入江西即令贾和仲统率四路人马讨捕是时犹未委公及和仲轻举妄发将兵已溃贼势日张则乞就委江州都统制月末始得金字牌令公节制大暑中兼程而进洪至吉七百里势不相及贼亡命习险阻常隐丛薄间弓矢所不及官兵驱逐接战十余杀伤相当多猝遇于阨隘之处交锋者不过数人余已遁去不知踪迹使荷戈被甲之士与之追逐虽欲列阵并力有所不可既逐入广而又复回初就招安列六百余人後止余百辈则知所丧已多势既已穷而有许拔身自首指挥间有禽获者亦言本非凶逆若开其生路必来降矣遂以小榜具载指挥募人入贼贼云望此久矣苟得晓事文官来即当随往提刑辛弃疾同议遣士人借补以行而公已罢尽复逃去未几兴国尉黄倬请行正合前说遂降公初以和仲败事自劾降龙图阁待制会有为和仲地者又降集英殿修撰後帅既以儻功受赏公遂落职南康军居住至四年自便十二年始得外祠十三年高宗庆霈复龙图阁待制十四年再奉祠十六年提举凤翔府上清太平宫绍熙改元尽复旧职二年致仕两朝即位之初皆有诏求言上又赐诏书抚问赐银合茶药公退闲既久无复用世拳拳忧国终不弭忘疏论天下事各数千言庆元五年十一月朝家优老特除敷文阁学士赐衣带鞍马六年秋初感疾七月庚辰薨于正寝遗奏上赠四官官一子娶楼氏封硕人先二十七年卒于隆兴男三人端中奉议郎两浙西路提举常平司干办公事立中宣教郎知婺州武义县丞沿檄归省弗可久留方将丐祠就养而公亡矣 中将以遗恩补官女四人三蚤夭一适奉议郎知福州永福县事楼鏐孙男四人之翰承奉郎监嘉兴府华亭县市舶务之干之辅之范硕人以淳熙五年葬于慈谿县石台乡龙潭之原诸孤将以十二月丙申奉公之柩合焉礼也呜呼公之为

人几乎全矣少而孝弟称于乡党长而声誉振于场屋入仕则公勤廉恕施惠于民立朝则忠谅精白结知于君用虽不尽退而居乡高谊特达四明素为义郡至公而忠厚之风益盛焉天性乐易于人无不容而风裁自高截然有不可犯者其在朝行史文惠公有同年之好钱公知獎最深魏成公少小相处如兄弟蒋丞相同为官僚王侍御伯庠实为姻家前後同时公乐于平进既无附炎之迹又不涉于指议公精敏而寬和处事有体其在禁路尤为梁文靖公陈正献公及今少傅周益公所知惟虞雍公与史魏钱三公不咸雅不相乐徐而避之孝宗察见隐微幸保终始方龙曾鼎贵一时诸公不事孙刘者盖寡龙在合门闻谕德之除亟称以为当有史官坐中问曰亦与之熟耶龙曰在此未尝往来某少为三衢兵官只见人说江山汪县尉之贤如出一口闻者益以此服公之介曾向有简驩之嫌隆兴之屡贬南康之久谪既归而八年不得祠多其力也时硕人未葬岂不念归史公风公通书修好谓求进则不可不尔恐梗归计公叹曰若能为此前必不致相失竟达空函貽羞千载老矣一听天命耳後得善脱史公深叹美此节每以语人谓不可及南康之行亲戚恐公未免撓怀或致摧沮公方挹送行者曰使某年近六十以恩科得官今赴星子一尉岂不为我贺其旷达类此既至乐庐山之胜杖履徜徉登临自适若将终身者借书郡庠益沈酣于史册上下数千载兴亡大槩下至稗官小说罔不该究涂中和渊明归去来辞平易精切视前辈无媿佳处或出其上遇觴容则使歌之王鲁公谓公不求复用公闻之曰求之庙堂而辞之君父非自欺乎既登七十即抗章引年求致其事朝论以为高又予之祠再申力请其後诸公相继得谢遂为清时美事实自公发之尚书郑公丙贻书曰公少某二岁先吾着鞭矣始少师以深仁厚义称于世尝曰事事上行方便物物上有利益此吾志也公又能推广之少师奉先莹素谨公之葬二亲皆力贫襄事规橰宏大纖悉周备乡人视以为式既毕窀穸假货经营久而冢舍方就庐居终丧拜埽之外讳日必亲荐羞于山间南城祖陇外家王氏奉川诸坟一一经理可为永久三妹尚幼竭力嫁遣俱得所归聚族寢衆辟先庐房宇百余楹皆身任之内外百口独当家务出私财以佐用者二十余年凡公所得尽为诸院公费又以及女弟之贫者二外孙既孤收养至今官赋输送皆亲为之不以累兄弟又得整办无一金之负少师既任诸子晚岁一以及伯氏长子行中次当及公位以伯氏子衆推以与次子积中寻又奏其二子得中稽中又及季弟江州之子敏中既拘限员将复与叔弟之子闾中而不果然终念之厥後江州沿公之意命以一官甚愜初志而公之孙今尚有白丁焉两宫圣节非有疾未尝谒告子弟之已仕者必使之俱行曰汝曹世受国恩终岁闲处独不能以顷刻之劳效後天之祝乎宗党有急以公为归产业素薄仅足自给纳禄之後用亦寢窘随力周施嫁人之孤女葬贫者之丧不知其几叙宗盟及累世外门姻党宗派条列号兴仁録以遗子孙使之不替亲好豫营美櫓尝辍以予人至于再三无靳色家有一池邻里来汲每叹曰安得有财如水以济人之欲乎力既不及遂率乡之人为义庄首割二十余亩以为倡衆皆竞劝至三百亩又得郡中益以絶产二顷凡贤士夫之清贫身後不给者量多寡周之买地立庄于城西门之阿亲为约束防闲曲尽可谓无穷之利庠校自兵火草创岁久寢圯劝率巨室且为之文谓崇释老之居以徼福不如新夫子之宫以助风化首创仪门闻者不约而趋黉舍一新冠于东南冬至岁旦序拜有规主盟斯事少长以礼推年长者为学宾遇释菜则为祭酒自编于布韦之间以为一乡矜式凡里中义事率自公倡之宾客造门必与钧礼不问远近必亲谢其门性不喜饮而好客觴豆不至过丰而情意周备岁讲寿席自为歌词皆安分知足之语人多传诵会者不下百客手自劝酬连夕不厌驰及僮仆无不沾给间赴宴集必尽主人之欢危坐笑谈虽达旦不先退真率之约觴咏琴奕未尝以爵齿自居此皆终身行之後生

之官多以卷轴求教公乐于训诱随所职一一以告能行公言者多着能称真一代之吏师也成就人固多矣而荐举非名士不预枢密大资政叶公翥方为掌故公一见识拔于稠人中尚书钱公象祖侍郎刘公孝黼史公弥大经略潘公畴屯田郑公镠签判沈公铢皆卓然者其他汲引光显于中外有知人之称晚更笃学如少年书生有适斋存藁二十册观书手抄曰适斋备忘十七册取唐宋名公诗集编为诗韵四十册又有漫录训鉴等书端中等方会粹俟他日镌木以传今藏于家钥曾祖金紫娶翁氏公祖母陈氏翁陈出也两家少师为表兄弟行又甚相好先君工部遂缔姻焉公之硕人又钥从伯父之女交婚至今如朱陈然先君依甥馆钥辈生长外家蒙外祖教育之赐事诸舅如诸父受知于公尤深且久公为礼部秘监时钥留侍侧护客使金皆许侍行晚而侥幸与表兄华文阁直学士陈公居仁继登从班居素切邻公既谢事而钥得奉祠六年之间有行必从有唱必和徒步往来殆无虚时剧谈倾倒其乐无涯去岁老母年九十公少十岁乡间合庆元夕之後箫鼓相闻暮春方止岁晚公既为真学士老母亦进封信安郡太夫人郡奉诏旨均致粟帛羊酒之赐皆为一时之盛平时慕白乐天之为人仕俱至尚书白以五十八归休犹一出为京尹公之归又先二年而寿过之以适名斋宜静名室画履道宅图于屏且书池上等篇于其颜後又易以无可奈何之歌诗造平淡能道人情曲折和达哉乐天行等篇置之集中殆莫能辨也钥尝与公同閱石林避暑录话论乐天事甚详公历言出处大槩慨然而叹谓吾非敢追配古人而大略偶似之钥遂录于册益公见之赋诗甚工以公比乐天尤切公曰虽不敢当然足为不朽之荣矣遂砉石寘适斋中公既有疾时间安否一日奉版輿过公笑语竟日不见少异才隔再宿有报公之疾变者亟走牀下则已不可为矣药石禳禳皆所不及呜呼公岂厌尘世而径仙耶何去之速也内行修饰名节纯全寿考令终几无可憾惟仙风道骨必谓上寿祸起非意最为惊痛闻公之亡者无问贵贱大小孩怛赴吊相向而哭俱为尽哀乡之达尊郡太守而下至庠校之士相与设奠而寓哀于文皆盛德之感也钥痛彻肺肝固已不堪若太夫人之悲恻采不忍闻行道之人所共叹也诸孤以葬日迫近未遑求铭于当世儒宗俾钥叙次行事窃自维念爱我抚我莫如吾舅而知舅之详者亦莫如钥公之名位至此小官时事不必屡书痛惟侍坐之次公历言入仕之初以至通显凡经区处者岁月姓名一一不忘闻见所及既不可胜书谨择其可法者备载之不嫌于详也他日定谥法秉史笔者庶有取于斯焉谨状

攻媿集卷八十八

<集部,别集类,南宋建炎至德佑,攻媿集>

卷八十九

钦定四库全书

攻媿集卷八十九

宋 楼钥 撰

行状

华文阁直学士奉政大夫致仕赠金紫光禄大夫陈公行状

曾祖砥故不仕妣林氏

祖嘉谟故赠右朝奉郎妣黄氏赠安人

父膏故任左朝奉大夫太府少卿累赠特进妣蔡氏赠安康郡夫人汪氏封咸宁郡太夫人赠新平郡夫人本贯兴化军莆田县崇业乡孝义里陈公居仁字安行年六十有九状

惟陈氏胄出姚虞为世著姓後汉文范先生以来世系蝉联皆可推考七世祖司直避五代之乱自光州徙于泉之莆田国朝陞邑为军至今衣冠不絶特进宦游联姻四明遂着籍庆元之鄞始特进来依甥馆公以建炎己酉生于奉化未及月而寇攘蠭起亲党窜伏穷山公在襁褓不作一声同行相与言曰此贵子也少长颖悟性不好弄厚重如成人十岁已学属文特进以文章气节望于朝始分教汾州佐延康张公克戡守城扞寇知惠州值曾袞之变径至贼垒譬晓之贼气夺而降为御史四明有僧法恩谋不轨而事觉或请屠城以示四方力论多杀非圣世事得旨赦不在法恩之籍者又争之谓籍余万人其实不足稽据况皆胁从愿悉寛宥两州皆赖之其大节如此宜其有子也公幼时侍立闻汾州事能愤然激烈特进为泣下且曰此儿当大吾家特进尝语之曰似闻欲以我使敌固不憚行汝能任家事乎公曰大人惠州见贼时未尝反顾今尚何念某虽幼敢不勉特进益奇之甫十四岁而孤执丧如礼新平夫人挈以依外氏誓终靡他公尤尽孝养相倚为命勉之学益自刻苦有一日千里之敏外祖少师外祖母王夫人抚爱如己子以特进遗泽补将仕郎调信州铅山尉连取漕荐绍兴二十一年登进士科特进旧与秦丞相投分至密时御史多由此大用尝风特进论一二大臣坚拒之而抗疏求外坐此左迁而弗能害也时秦公威柄方盛喜公取世科或劝一见可得美官公曰是有命焉终不自通铅山当孔道盗贼出没公设方略部分而厉使之盗不得发尝以公事忤泉使及行县以威胁公公请纳告辨白退束装以俟劾使者竟负媿去继之者翻以此知公授永丰令改监行在点检赡军激赏酒库所余塲隆兴元年孝宗修高庙圣政妙选僚属时参政范公成大为和剂局与公皆自筦库中兼检讨官二年考满当改秩既已进卷丞相寿春魏公使金公尝学事之辟公为书状官时和战未决敌兵在淮北人请恟惧公以身许魏公至境上议久不定突骑大至上下失据公欲上马犹从容举酒告魏公曰先生冒寒且酌此觴观者壮之既退京

口寻复北向真所谓飞矢在上行人在下遣谕敌兵开道而入皆引满以待魏公察公无惧色喟曰仁者之勇也卒遂成礼减岁币而还公之赞画为多改左宣教郎以奉使赏转两官差充诸王宫大小学教授时魏公日贵乾道元二年间进秉国均公方忍贫需远次闭门读书未尝求进初虞雍公一见奇公欲引以为用公不欲就六年始赴又导公言兵谢不能退以书抵之谓有定力乃可立事若徒为大言终必无成幸成亦旋败雍公为之动色踰年始为军器监主簿明年宗寺阙官竞谋摄事以希宝牒之赏俄得堂帖权丞宰执谓公曰求者纷然择不求者授之轮对奏立国之要在规模先定陛下非无可致之资而规模未立孝宗初颇不恠曰朕未尝不立规模公奏陛下銳意恢复继乃通和和战守三者迄今无定论不知何者为规模上曰此则随机而应公复奏发号施令使人必信可也今朝令夕改人得一阙临时更易尚不能保外间至有前降指挥更不施行已差下人别与差遣之类此不可以不戒以録本纳政府雍公曰适已见之规模即前日定力之论某今益知此言之当也迁将作监丞国子监丞秘书丞再对奏文武并用长久之术陛下獎进武臣深得持平救偏之道正恐未必得智谋勇略之士或多便佞轻躁之徒又非兼用之本意上曰只为文臣太胜要当扶而正之又奏圣虑甚至但又不可过恐复至于偏胜又奏边民盗马事宜谕直旨行下少蓬去位公专省事台察奏太史局生所学浅陋请增三二书以试之公顾同舍曰国家禁此等书严甚不应用此增试无敢忤御史者公入奏上称善即寝前议议者不乐公乞去相君坚却之且曰上方誉美未已将上则御史不安是年郊恩赐绯荐摄礼部郎中尝奏论台阁宜多用明习典故之士上曰知名之士试举一二公奏如周必大洪迈久在禁林不待臣言李焘莫济岂应弃之侯国上欣纳甫数日首召李公寻再请差知徽州时朝行三数人以故去皆乞免对公不欲为异亦乞免谢辞上指曰陈某无他可令陛辞而行临遣甚宠且曰方欲用卿乃遽求去卿其清省狱讼尽心民事政成当召又谓大臣曰陈某论事明练貌类汪大猷曾丞相曰是其甥也淳熙四年赴郡郡自五季杨行密割据刺史陶雅宿重兵赋入倍旁郡祖宗削平每下寛令又以山多田少米则输八折十绢匹当重十二两徽独止十两左帑忽加退剥守遽使如令民益不堪控诉彻闻上慨然欲蠲之出自睿断谓申旧制恐悍吏或能重为民病乃命并输十二两而举郡所输之数率十二匹而蠲其二以絶并缘之奸公适当其时官吏奉行过当拣择太精公即谕告而痛革之时版曹威严无敢忤之者公贻书谓天子节经费以惠俭瘠不能推广圣德吏则有罪自今苟中度程随至辄受敢豫以告已即自以名衔受输植二表于庭有中度而遭抑退者抱所输立表下老校抗声以告亲为分明之钞至随即批销人无留滞吏不得摇手实惠确乎及下秋苗益选良吏减加耗之甚者石可四五升民往往里羸以归徽之政甚休而得民之深多此类又连岁大稔米至不论钱民以为数十年所未有也郡有大溪岁晏民未病涉忽鳩工造渡舟数十艘莫测所用梅霖暴涨遂得以济始知公先事远虑之效自是岁一举行抵今赖之既新军资库造閱武亭复于郡庠创御书阁甚伟皆取于余财民不知役听讼明敏剖析滯事情法曲尽或至千言邻境有诣台省愿得公定断者御史府索案去官吏创见为之股栗公略不排比径以授之御史亟称于朝曰古之良二千石也既受代吏民遮留真有截镫断桥者公由他道去父老或送别数十里外生为之祠去郡十余年遇生日郡人必来拜寿後赴武昌取道郡中犹聚彩揭旗填拥道路亡虑千万人非素有以感其心顾能尔耶还朝入对褒谕再三首曰新安之政甚好从臣台諫屡为朕言且举卿所断水利之讼为之赏叹不已奏劄四篇皆依奏付出其一乞编类隆兴以来寛恤诏令有曰法久则易玩事久则易怠惟申加戒飭有以儆其观听则千万年犹一日也上读此数句至再曰可谓名言其二论绢赋匹数既减吏胥市例大有脔削

恐後日复有苛取重扰乞加告戒上曰变法之初赖卿尽力方成实惠正恐後人未能遵守寻即御批行下本路监司常切觉察如敢违戾具申尚书省取旨重作施行初在郡因奏五事末章极言归正忠顺过于优渥而战士反轻虽曰猥多固自有十三处战功之别此辈皆出万死策勲之人今老矣添差已罢廩稍牛给至丐于市军士叹恨有解体者乞明诏优恤以示终始念功之意坚後生图报之心上览之嘉叹会驾幸白石大閱即以是日出命再添差两任衣粮全给三军为之呼舞至是上又称向来五事中论战功事甚当此曹既曾为国尽死力岂应老不加恤卿于职事之外能用心采访尤见为国公逊谢玉色甚悦且曰便当用卿自是受知益深矣翌日谕大臣曰陈某详练敏达为政极有声奏论又切当且留为郎以俟用遂除户部右曹郎官会要书成奏篇适在除郎指挥之後特旨转行朝议大夫且语丞相曰治行方为天下第一官不足道尝兼摄度支贰卿欲援岁例从南帑借贷公曰用度方殷援例或不从则无策去岁明堂借拨左帑金帛莫若径乞拨还上初以借贷不可为例知为还拨即许之贰卿曰公之先见乃尔耶再兼礼部会枢属阙员方以着庭名进拟上曰陈某今何官对曰今为郎上曰岂有人才如陈某而可久为郎乎即除枢密院检详诸房文字二枢不受私谒差遣恩例悉令投牒送检详所公为之考令甲酌故实可否立决右选翕然归心年除岁迁徧历左右司三年至中书门下省检正诸房公事天下事上于政省者无不关都司公处事明审持心忠厚议论寛平咨白又为明畅执政晓然易从间有不可随事辨析终归于是乃已退亦不以语人诸公由是开心相予纲餽调拨展转失序谓如湘潭来赴昇润江西却上荆鄂之类道里回远费幸滋繁公尽搜故牒考閱程限择其便且顺者更之计岁省导行费等百余万缗赏典不预军屯得米既便且速尝因轮对及之上曰非卿忠于体国谁能及此又叹曰似此非一端本为贪赏如此郑重人乐因循故不能改耳荒政方急事有便民者立为禀行徽旱尤甚蠲放至八九万缗严婺亦且十万会有论徽饶二守掇荒无术又有言流移多二州之民上震怒皆至迫停自是守令罢者相踵公奏长吏不能奉行黜免为宜但送迎费重文书断絶职业且废今既罢去其太其者余或有闻请姑从鑄秩以责来效上深纳之先是文书之下六曹指定勘当者三日之限或逾月不报公撻其尤者绳之长贰径白宰府请从阔略公曰六卿虽尊事在有司安可慢令吾位固卑所以纠六曹者安得以尊挠法卒治之朝纲为肃刑房狱案如山翻閱不倦一以平心应之谓有罪幸免则冤者何告以故平反虽多而无失刑士夫陈理恩赏改正过名有所拘阂者一至都司鲜有克济公曰吾岂卖恩者若一切沮之则吏愈弄权失职者何赖躬自疏白不以属吏有任满赏为部吏所格者公诘之乃曰指挥中有自今後之文公曰前乎此後乎此者皆得之矣指挥本欲从寛今乃为汝辈舞文之具耶径为放行且请删此三字以絶吏奸又捕盗赏有执续降为言者公曰格改之法不可用乎吏骇服大礼之後埋雪纷至公为之裁订择取七一皆当改正丞相难之辩论数四艷然曰检正自将上则可公曰丞相以为多耶某于二百人中精核得此皆坐罣误而沈抑者愿推内沟之念而行之固争不可退各疏其冤状且欲引去丞相径以公手疏者将上上一閱之即曰陈某精审尚复何疑便与施行庙堂尝啓拟某人能文上曰朕但闻陈某能文尔是岁摄侍立者三尝因旱求言公应诏乞公卿务行寛大顷岁监察御史京镗极论从窄之弊已蒙开纳此风未革殊无和平气象闻者跼之仲冬上谓宰执曰欲令陈某奉使闻其有亲能为朕一行否试谕之公回奏有贱息可以奉老亲惟命之从遂借吏部尚书差淳熙十一年贺金国生辰国信使正初陛辞公尝兼领左藏三库上首曰每以繁剧相浼备见忠勤但非所以累贤者耳祖宗用人不拘清浊全才须详试乃见公奏每恨弩蹇不足以共烦使褒谕非所敢当也使还除起居郎入谢上曰卿端静自文将处

卿以清要久矣去岁欲用为谏官今日立螭不必多谢论圩田多势家所据使水无所潴复无所泄圩田未作岁多丰稔作圩以来水旱屡告利害甚明上称诵久之又曰卿今在迺班凡有所闻悉当忠告会西掖暂阙即令摄事曰朕亟欲观陈某词命兼同详定一司敕令上曰朝士中如陈某惟善是从所谓心平气定之人也明年春兼权中书舍人泛恩滥赏封爵无避有察官奏旅榱之殡寺院及十年无子孙祭省者许自与焚爇公即缴论谓如此则缙徒之无赖者得以藉口而子孙之不肖者亦得以挟诈请增为二十年必经涉郡邑为之勘验得实方许埋葬仍标识以待其家寻访上大悦从公之议曰台谏给舍多成一律如此方见和而不同同时金使不通人情多疑公因对上问卿比出使见其情状果何如对曰必不动自古敌国欲有为必匿其壮士健马今呈露无余又其上下习骄以兵为讳决不轻举顾在我不可不备臣以为外敌不足畏而内患不可忽也前郊祀四日除中书舍人人益知上眷之渥陞兼详定既谢上曰已将宿斋百穴中忽记得卿未为真岂应更过二郊耶公曾以足疾求去问劳尤笃且曰当自处一方赐卿须是就补中有去风药乃佳移时方得出奏劄论上有恩惠而小民不预名为宽逋负足以惠顽民耳名为赦宥罪足以惠奸民耳愿因庆赦尽放天下五等户身丁四等户一半上笑曰正合朕意乃于赦中之公在词掖最久论事不为苛细而诏令有不便事关国体人所难言公辄论奏率蒙报可安定郡王乞封妾为夫人公以葵丘同盟事缴奏他日入对上迎谓曰所论子彤事极痛快且是有补风教朕为之击节不已奏事乞求去上曰今气宇大胜前时何为及此对曰进退之义所当讲明况近列乎上曰朕用卿之意殊未艾又尝论朝廷之事失于好详君人之道贵在执要今陛下亲细故而忽远猷事末节而紊大体愿深思汉明帝黄老养性之言俯循唐刘洎多记多言之谏举纲要以御臣下省知虑以颐精神上曰迺亦自觉丛脞远近大小之臣未曾及此尤见忠诚次日语辅臣陈某之言甚忠卿等相与持守簿书细故可省即省不必繁琐自今亦当少降指挥中书务清方是朝廷之体全在卿等留意熟复其言可也後数日王丞相以外郡财赋事奏上曰前此方言之如此则又非陈某奏劄中意朕不欲自催几钱此当责之监司方说不可丛脞不应又尔丞相以下媿谢此事已编之圣政中阁老李公巖出疆以阙官奏上曰陈某一入足办不必更差他人内相洪公迈典贡举复命兼直学士院王言俱出公手应之不繁上临朝尝曰官欲择人信非虚语向来中书或用三人今内外制独陈某一入当之略不见其难时因选者兴狱公奏长吏帅属有赃不劾至烦陛下自用耳目既非执要之道又恐人不自安乞诏内外长吏各公心考察陛下端拱责成可也伺察之风诚不可长又论列圣德泽至深自熙丰变更崇观侈靡利源日以浚广脂血日以腴竭今赋入数倍于昔而大农调度略不少宽日以益甚圣心焦劳固欲省赋以宽之而养兵所仰有不可阙然今日曰养兵明日曰养兵是终不可为岂不深可虑哉愿诏大臣博议绝浮费汰冗兵以其可省之数定为蠲除之目所以续民命而寿天下之脉岂止召和致丰而已哉上皆是之一日从容谓辅臣曰陈某老成凝重可大用葛邲亦其人也又曰使是人坐庙堂自然安靖和平天下本无事庸人扰之耳秋复丐外上固留且曰卿忠厚而疏通朕大用之意已决切勿旷也冬高宗升遐医官王洺死有余罪止从鑾官编置公勃然必欲寘之极典率同僚俱入奏省吏谓无前此公曰台官既许全台省官独不许全省乎极论之得旨贷命杖脊于都市刺配筠州无不快之给舍久无连衔之举至是复振矣思陵之役台察漕臣相继以戒苛扰节冗费为言公独奏櫜官应办事重期迫不无繁扰议臣不得不上闻陛下不得不加申飭臣剡闻沿路八顿只作二顿翻滚酌献神幄亦欲转移酒果微物三日一易过为裁抑四方何观愿存大体毋至削弱以全送往之孝德寿宫官属兵卫宜与宽假上瞿然曰人但以浮冗当节不思

反失钦奉之意忽泣数行下曰向非卿言朕亦未悟尤见忠荃更降一诏明示朕意如何对曰不必降诏前日诏百费自内库支罢诸路州军贡献已自明白但乞持之以坚则圣孝有光矣上曰卿每事尽忠而知体久欲置卿于经筵适无阙近谏大夫有阙深欲处卿亟閱班簿在职已二年不应下迁少须径为中司可也公力辞不敢当上曰祖宗时必用淳厚忠直者为之卿正其选又固辞上曰别思所以用卿数日兵部尚书宇文公价对方及櫜宫事上遽曰若欲省费断然不可公与权礼部侍郎顔公师鲁俱久次宰臣奏各二年有半矣上曰顔某奉使回即与为真陈某则更欲少俟近及三年以其代言论事皆得体又甚尽忠俾久留後省须殊迁以报之十五年五月新平已被疾求对力丐外祠以便医药上却之且曰卿每要去可见易退即日当峻迁非平进也对曰臣岂敢以求去要进上曰尊亲寿几何何以致疾公对曰小人有母何敢当尊亲之称具以实对竟不许去公再拜复奏恳切上为之蹙额眷眷不已虽许留劄子退及家则不允之命已颁上方之药踵至次日旬休十一日欲下除日宰执奏已遭内艰矣上嗟恻久之亟赙以全帛公哭过于哀公卿吊者不惟惜公之去国而尤虑公之几于毁也服阙除集英殿修撰知鄂州鄂号难治唐崔郾所谓土沃民剽杂以夷俗非用威莫能治者在今日最为重镇三司鼎立尤费调娖及公为之从容泛应三司如一家军民帖服郡计仰商征公总大纲加惠行旅而课入倍蓰人情翕然尽心力为之三四月而领略江山得坐啸之适政誉流闻以为前後所无有宽赋劝耕旷土加辟筑堤扞江水患遂除兴国沔鄂之间私铸聚衆至数千人巢穴深阻寢成盗斂公闻之曰势已滋炽缓之则害大急之则事生诸司欲调兵公曰计必出此然民兵习知地理可使大军持重以为声援不足平也密召总首谕告纖悉俾图之不踰旬梟其魁以徇余皆纵使归业始以奏闻仍乞分戍以镇其地郡有案乐寮以养穷民病夫岁久渐隳公为增大之具器用给公田至者如归焉绍熙三年进焕章阁待制褒治行也秋大比计使以外郡士子附试公固持不可则径以势临考官公度其必致纷争五夜躬至棘闱之前叱外郡士毋得入譁者始定屯兵数万军民有讼平心而处随轻重曲直牒军中治罪主帅既乐其不相侵亦不轻贷由是感悦而知惮去郡数年人皆祠之不忘此岂驱之使然哉秩满移建宁府俗尤劲悍动辄杀人公始治鬪毆尤严于为首者环视不劝止亦且连坐鬪者为之衰息闻浦城有谋弄兵者戕一家数人邻里扰动公召左翼戍兵五十人授以方略计日擒之崇安又有因告余而杀伤者寻亦捕获今上覃霈公与二使者议此辈皆乱民苟赦之不惟死者含冤将复出为恶矣遂诛之而待罪自列境内肃然郡苦多讼盖有专以把持诬诉为业者家已致饶凿空造事吏因为奸日不暇给公亲笔数百言疏其情状示以法禁且戒属邑无轻受妄诉受者先坐之举必行之令严反坐之法自此龃讼顿清矣宽宿逋十余万又代输下五等蜚税民以生佛称之公在鄂渚政声行于江湖间建去行在所不远朝家益知公为详改知镇江府适当游饥请粟于朝谓郡有余赀不应公再疏曰旧将所留缗钱十有四万不能余三万斛以支兵食尚不足何以为振业计又不报直以书抵丞相曰丞相平昔以爱民称一旦得政岂应遽变所守畿甸之近尚委而不顾遐方远徼且将若何某愿乞身以归不忍千里之民徒为饿殍也始许称贷公分画详备讲究深切委遣僚属事无遗虑犹以为未尽乘扁舟屏驲卫时一到给散之所苟朝去而暮可还者皆不憚往有弊即惩有劳即劝至诚惻怛无不感励吏胥亦习知公劳瘁之意至不忍欺人人如使君临其旁阖境均及全活数万计他郡流移者亦及之邦人以为自昔赈荒未有如今日者也始米价翔甚虽给糴以平之正恐不继又告余于荆楚远商闻之曰是陈待制耶俱告于湘北计台愿以米就糴计使胡公瑒以书来曰公之恩信固有以孚于商贾此事殆古所未见米舟沓至价遂以平郡民不知饥之为害也前守

造闸于丹徒镇欲取江潮以灌漕河而地势高仰水终不登公为之撤去改造石?以泄霍潦父老因公按视罗拜谢曰固民所愿不谓使君虑及此也埭下巨艘连樯栉比江浒公问风涛猝起汝曹安得无患合词对曰沈溺时有之顾无策以避耳公访问旧有海鲜界港岁久湮塞亟往营度鸠工濬治民旅相贺谓自此可以无恐矣又造二巨舰以济扬子之险皆为永久之利尝有一僧投牒自言结庐濒江每为逻卒所侵扰愿行禁止公察其庸悍诘之曰距此几何曰在镇江江陰之间各数十百里公曰吾得之矣地僻而介于二境官府既远盗贼出没汝必为之囊橐僧惧甚立命尉曹掩捕果得盗数辈其中多为便房曲室即破坏之悉寘于理撤其屋以增养济院籍其田归焉吏民惊以为神咸曰此巨蠹也非迅雷不及掩耳未易鉏治自此奠枕矣饥民既苏帑庾赤立几不可支商旅久服公名愿出于涂课入增羨公不欲多积又代下户之输畧讼未息公自以向者三郡令无不孚此邦独未服是吾之过也乃罚俸以自咎百姓咸悦宪使何公异闻之曰韩延寿之闭阁复见于今具列政绩及此事闻于上三山谋帅公为首选加宝文阁待制邦人挽留不可迯吏至或诋之曰尔辈乃夺吾慈父耶赴镇过建上父老欢迎如过徽时喜公容貌不衰无不以手加额福之属邑十有二有去城数百里者豫戒令佐毋得诣郡专以静镇之推所以治建者行之八州初入境领帅事狂民有啸聚者公念攻之必散入旁郡分遣迯兵数路要截如指诸掌裨校奉成算以行贼计穷酋豪度不能脱皆自经余人定罪有差胁从者纵去奸盗为之屏迹治宗子之横暴申蛊毒之旧禁蠲买盐之宿逋优贡银之市估内侍干办啓运官忽折简相要公恶其桀傲劾去之庆元三年二月召赴行在长途冒雨得疾及关遽剧既平待对萧寺又为岚湿所乘疾复作力请外祠至再始进华文阁直学士提举江州太平兴国宫六月庚戌抵家甲寅疾势遽变遂薨于正寝甫归即语诸子吾之病病矣仕至禁从五绾郡组事君临民不敢有媿于心今日无可憾者惟先茔之碑未立义庄规矩未备汝曹其图之其为我上章休致寻有旨转一官致仕遗表闻赠金紫光禄大夫娶王氏赠朝议大夫居隐之女封令人先十三年卒赠硕人子男六人曰玠宣议郎曰革曰晷曰芾通直郎新知湖州武康县曰卓宣教郎新知绍兴府余姚县曰阜承奉郎玠先一年卒革暴未命女一人未嫁皆前卒孙男四人允協承奉郎允迪允修允谐女五人长适绍兴府乡贡进士石渠次许嫁王埜余尚幼硕人葬于鄞县丰乐乡横溪西奥之原诸孤将以十二月甲申奉公之柩合焉公性资浑厚风度凝远胸次洞然而临事甚密与物无忤而见义必勇和气袭人望之而意消至诚待物不能以形遁忠孝笃实始终不渝耻言人过寸善必取不以己长望人而喜人之胜己自奉如寒素而周人之急则不计有无善与人交久而逾敬道广而能周虽有强戾鄙俗之人一与之处自然降心非意相干恬不之较彼自悔忤待之如初推贤扬善不遗余力无一毫媚嫉之心人以为不可及而公出于中心不自以为长也自为小官所立已不苟出入朝行奏论一于纳忠知无不言言无不听推诚荐士有味其言一时推挽多名流有致身法从者林公栗夔州之罢上怒未已公力救之杨公万里由秘书监漕江东上疏留行皆人所难献替甚多而不自表暴故天子信之而士夫推服在都司尝以论事忤王鲁公久乃信服曰吾之益友也知院胡公晋臣同省尝曰旧闻名而未识面今自以为得师也给事中王公信每语人曰陈公一片心地所谓海内少双少以文受知于魏丞相汪端明应辰进学不倦文亦愈工尚书韩公元吉称之曰文词温润有制诰体异时必以名世正献陈公尝荐于上曰前御史陈某在太上朝挺然为名臣今其子贤而有文金玉之德絶似乃父文惠史公屡执手曰观公人物器业必当鼎贵在相位时恨不得相成尚书程公大昌曰陈同年文章今日之巨擘而政事则龚黄当反出其下待制杨公曰陈公海内名胜某平生之知己也周益公尤爱公之文时

以佳句诵于百僚上又荐之孝宗尝曰某交游多矣耐岁寒者惟公一人此相知之最深者也特进之徙于鄞田庐之在莆者悉与羣从鄞才有租四百斛仲氏蚤世尤爱其季每以自随特进捐馆新平命公中分以与叔父後以特恩补官卒老于贫公时自窘于用而周恤其家甚至试郡奉叔母与板輿俱行葬送婚嫁一力办集二子诸壻及甥又皆仰给久而弥笃二女弟适张氏王氏夫妇俱亡矣以张氏中女嫁曾严州集又嫁其季女王氏妹生一子曰澈新平尤爱抚之今上受内禅公在建命之奉表遂补文资莆中宗族生事死葬无不被赐从弟翟仕于南而歿其兄雅方教育其孤而雅又亡公取其季以来爱之犹子也遂联入太学兄子肇颇友爱而贫无以自存公以叩益公益公为感动遂官之公又命诸子斥田二顷略用范文正公义庄规矩以给宗嫗三山之行昼绣有光族党接踵至戏下待之如一捐俸以给之亲故有急无不周恤待安康之族不异汪氏义襟特达人有难及徽州招三衙军立表于门有愿行者躬閱之有一人疑其气度不类卒伍问姓名曰雍彦恭详问之则泣下曰有先人之遗泽可以仕厄贫故自弃为此公惻然既饮食之命取文书来为召保任奏上且给其费命下又抚养之至数年在都司有稚子诉其父官广中岁余不得俸竟死历券具在即堂白下左帑代支令本郡偿纳仍饬诸道小吏俸不以时给者劾长吏在建有姬自言前推官之家夫妇俱没二子乞食久矣求自便公访其实乃华亭柳氏即为辟官舍给常平之粟取布帛于私帑为之买田又教以学去又以属代者公之及物类如此者衆三事尤其着者公自宰掾以至禁从无岁不上丐外之请或劝止之则曰叨在要涂不可待君相厌薄而後去晚临四郡在外八年後來者多已得政或为公称屈则笑曰前辈有言人生五马政不恶与人处处为春风故能不薄其官奉职日谨精力德量皆不可及所至惠利及民水旱有祷率应如响若有相之者尤善因其俗以为政寬猛适宜锄奸无所顾忌抚恤善良若不可解于心去徽之後尚为长虑论夏税和买着在甲令两数有差更法以後臣既去郡乃悉输十二两是欲轻而反重请并从定制上从之徽人闻此感德深矣僚吏各尽其情乐为之用贤者推毂恐後间有按劾皆甚不得已而后发一吏一卒不至属邑各置一历守宰亲笔往复吏不得窥情实具见如对面语不待钩距出奇而政成于户庭矣未尝以私喜怒施一箠亦不妄用一钱非有疾故不谒告惜官物如己物治公事如私事每曰要当一日必葺而便坐萧然自谓凝尘满室澹如也遂以澹名室公退则读故书尤熟于班左摘其精要为一编名曰撝芳故公之文温厚尔雅有二书之风有奏议制藁二十卷诗文杂着十卷藏于家诸孤将版行以传世历任四朝出藩入从饬已甚严了无玷缺天下之言长者莫先焉钥亦汪出与公俱生长外家公见老母及舅氏尚书每兴如存之感待中外诸表俱厚钥既奉祠无时不过舅家闻公之归谓当春容里社乡人已有一舅二甥三学士之谣天乎何夺吾表兄之遽也始公荷孝宗隆眷垂上政涂而以忧归今春召还谓必枋用及门而病不能朝终不得究经纶之蘊岂非命耶呜呼姑无问此以公之仁原有余奇龐福艾意必享上寿而年不及七旬以卒尤为可痛也薨之日上而士夫下而儿童走卒识不识无不伤叹内外姻党哭之尽哀五郡吏民以次致奠且道其邦人闻讣涕泣几为罢市殆传记所罕见也诸子承公义方各以材器自奋巩尝魁国子监芾两以漕荐上礼部卓登绍熙元年进士科积善余庆其在兹乎将葬芾等泣拜求状公之行知公之详无如钥者又以旧所闻审于母氏舅氏谨书之将以告于太史氏而请謚于朝若处乡治家之法皆公之余事也不屡书谨状

卷九十

钦定四库全书

攻媿集卷九十

宋 楼钥 撰

行状

侍御史左朝请大夫直秘阁致仕王公行状

曾祖寂故任永静军东光县令累赠少傅妣赵氏赠成国夫人丘氏赠济国夫人

祖禔累赠少师妣张氏赠卫国夫人

父次翁故任资政殿学士左大中大夫致仕累赠太师妣赵氏赠秦国夫人

本贯济南府章丘县巨德乡巨人里王公伯庠年六十有八状

公字伯礼其先大名府人五世祖继文赠特进者以明经出身尝为河中府虞乡县令四世祖异赠太保者以甲科为尚书郎直史馆嘉岐王府翊善十余年请老而归避大河之患葬特进于济南因家焉少师古学精深兼通医卜工真行草篆尤邃于春秋既免少傅丧不乐进取携二子屏居青崖山之两河太师因教授其间以供甘旨名闻东州学者云集时号两河先生绍兴初执政凡四年力丐闲退已遂致其事居于四明西湖之阳今遂为鄞人公登绍兴二年进士科授左迪功郎吉州左司理参军试教官为第一改充明州州学教授十一年任满循左从事郎便亲自列主管潭州南岳庙时太师方在政府诏以诸将成却敌功皆二三大臣奇谋指纵之力可与一子职名改左宣教郎直秘阁显仁皇太后回銮太师充礼仪使辟公书写机宜文字寻主管台州崇道观十四年授两浙东路安抚司参议官太师薨服除二十二年通判平江军府夺职罢归三十年主管台州崇道观三十一年赐五品服通判镇江军府三十二年以覃恩转左朝请郎隆兴元年改两浙西路安抚司参议官二年省罢知兴国军乾道元年七月召赴行在除户部左曹郎官仍有旨复旧职明日兼皇子庆王府赞读寻改直讲二年南省试进士为参详官就院擢殿中侍御史五月迁侍御史八月罢四年主管台州崇道观十二月知阌州五年八月复直秘阁改知夔州兼本路安抚七年移知温州九年赴上才三月终于州治累官至朝请大夫公忠孝谦勤得之天资自幼刻意问学家素清贫太师教子甚力朝夕讲习至以楮衣御寒手种苜蓿以充饥及冠犹未知肉味父子易衣以出而抗志不凡慨然有立名当世之意手抄古书往往成诵太师守道州钦宗登位奉表者例当推恩公请以叔父次臯行既乃连中世科人益奇之分教四明人士仰慕适与名士相先後或以见在过去未来三佛名之初被延阁之命时宰欲擢丞列寺太师既不欲私其子公亦力辞焉平江当冠盖之冲毗赞

郡政声称甚美会以谗间遭论自此不复造朝安贫乐道十有余年若将终其身一旦趋召际遇圣明首论养人才裕民理财训兵以为不可胜之备又论考察荐举鬻爵积粟等事奏对明白音吐洪畅上意开纳陛楯亦属耳倾听为之咨叹即日除户部郎讲读王府究绎经旨词义俱胜帝子敛衽受之逮执法殿中进迁南牀自以起远外被异知益展尽底蘊谓强国在法制固国在人心然国势可振而易强人心难得而易失乘航之谕不可不知骇舆之言不可不监又奏方今之弊莫大于风俗苟且而苟且之弊生于士大夫议论之不公惟不以虚言先实用不以高论盖真才苟且之风或可少革是时宿将类以罪废公奏奔北固为可罪而战多有不可掩者不应以一眚而废之宜及此无事之日以次召还使备环卫抚之以恩折之以威庶可收效于後上深以为然稍稍録用沙田芦塲议起租税民以为病无敢言者公乃极论之其略曰沙涨之地未尝耕耨施工布种乃是务本之民既未能如汉置立田科以劝农而可扰之乎芦苇之生本非种植各以其力樵刈必非游手之徒既未能如古捐山泽之利以予民而可困之乎豪强坐据虽曰非法然怨不及上今朝廷遣官增税怨始有归矣上感悟即令罢去以便贫民废省两浙舶司简阅宿卫之士皆自公发之由是眷意愈厚尝奏事良久上肃容谓公曰卿所言一一可用议论全似唐王珪公平日耻言人过未尝臧否人物恩仇一视坦无城府既居敢言之地遇事辄发抨弹所及动涉仇怨无少分顾忌意或为公危之公正色曰言责所在顾忠于君者如何尔一有爱身之念纪纲何赖焉笔力素高作奏不能自休谏藁谨密子弟不得预论事尚多非施行于外者莫传也谏长率公论政府乞置诏狱已乃下其事临安一日太守请间公语之曰始得之风闻不容自嘿今既事在有司岂复当预狱具失实即上章自劾以故俱获谴而公止从罢免上亦知其非出于公念之不忘或言去国之後事有涉公所尝论者上必取元奏亲加省览而施行之且尝曰此真台谏也奉祠未几以閩风起公遂易夔帅夔部旷远夷夏杂糅公首图诸郡地理合而为一分别险要兽蹊鸟道纖悉毕见区处指授尽出于此人莫得而欺也抚夷人以寛养百姓以惠驭官吏以严夔以大治郡有巨刹既为嵩呼祝寿之地而祖宗讳辰荐修及三岁合五州人士羣试皆在焉公以为陋且陋命葺废寺分行香之所又建贡闈二区以其一与漕司土木之工皆有条理不日而成士民诵而歌舞之巴俗多略子女以为货公特严其禁有绵竹猺獠者捆载而来为瞿唐关所诘盖以此牟利者有年矣公立讯之皆遂寧潼川间人为给贖各还其家或请发其事公曰不可究也惟责而遣之城素无井觅水于山杜少陵所谓白帝城西万竹蟠接筒引水喉不乾者郡失于葺或课民以钱詹事王公十朋尝纵民取水曰义泉公修王公故事又增治焉市人欢呼相谓曰二公岂伯仲耶其他营缮非一先贤遗迹如子美高斋之属皆以余力一新之施黔珍三州与南平军地接生夷而思州则田氏世袭抚御尤难有何思明任鬼师杨震穆会等皆豪族动辄疑阻牒诉累兴公化之深得其道宣布威德譬晓祸福揭示要束至或亲致尺书思明投牒乞藏牒于家传示子孙杨震得书感泣饮血盟誓边境帖息公遇事敏明临机善断戢吏至严莫敢仰视听讼之际反覆究问诚意具孚无不退听者既而有伉俪之戚亟请祠禄遂移永嘉赴阙奏事上意欲留惜公已衰矣到郡笃志从事不少懈而疾已不起实二月二十五日也娶同郡成氏封宜人柔淑孝谨克配夫子男三人曰星郎未名而卒曰有大通直郎福建路提举市舶司干办公事後公九年卒曰正大文林郎新处州军事推官女三人长适朝请郎中书门下省检正诸房公事周舜元次适承事郎汪大有一幼亡孙男十一人坦域埴塲埴埴埴埴余未名坦埴将仕郎女八人其一适进士孙瑜余在室曾孙女一人淳熙元年正月九日葬公于奉化县忠义乡之瑞云山太师墓侧公事亲至孝少时所得成夫人衾具悉以奉太师居丧哀毁尽礼有人所

难及者记问絶人博览载籍当宣政间举子惟务金陵之学公独贯穿经史旁出入百氏至老未尝释卷宾客相对诸子侍立奥篇隐帙随意举似以探其学问之进否後生多亲附之舍人朱公翌尝问侍郎周公綰曰比见表中用一驴载都市事偶忘所出周公素简默仅举一二公适参坐又以目公公历诵臧质传中数十语二公叹赏不已又归以励其子焉作文雄奇操纸笔立就若不经意而语多警拔诸公铭志类出公手有历山集云安集奏议告蒙资治编年宏词集要夔路图经等藏于家其他不及属藁散落甚衆人虽以公不作文字官为恨然崇论宏议日月献纳亦有以少伸素志矣立朝典州威望凜然而待人接物卑牧已甚闲居客至应酬终日倒屣延纳惟恐其後朝章野服颠倒层叠人人与之倾写略无倦色士夫无不敬下至闾里闻风悦服疎财好义不计家之有无义所当为无所吝惜四明旧为义郡显谟汪公思温为之主盟汪公歿公实继之缓急叩门视所请曲为之经理故乡人尤归心焉廉节传家他无嗜好俸给之外一毫不以费公帑在夔首禁科买犍麝之类仍以公移镂版徧满山谷有以书求市者则以墨本寄之永嘉军卒百工咸具公一切罢遣服用所需必面与之直至或倍偿人谓其过而行之不疑故治温未久病告几半而丧行之日百姓巷哭以过车非德之感人者深乎僚属问疾卧内见公几案萧然镇纸以璧皆叹息而退初治入蜀之装于建康有以白金来售者曰以此西上当有倍蓰之获公曰不几于商乎止以缗钱行比归日轻舟而下以余钱自随人愈咨其清方家食时未尝忘国事凡所闻见必询究讲明务求可行之实盖其志尚如此及膺进用期不负所学以报主知去不以罪人犹望其再入也终不得究见德业朝野共惜之病且革二子以药进手格之去静默焚香宴坐自如上章休致处画家事若平时及属纊不但不乱翌日入斂肢体和柔如生皆积善之报也钥汪出因外家以拜下风自蚤岁辱知獎间置坐隅匪怒伊教殆非一日公将泝江钥以假吏之燕会别于金山客授永嘉公适来守尤得窥治行之详公之二子不鄙以行实见属自惟荒浅不足以称下笔复辍者屡矣壬寅之夏提干公一疾不起殊使人有愧于泉下今推官又以为言乃取所闻见叙次之以俟当世君子立言者采择云

国子司业王公行状

曾祖景章屯田员外郎赠金紫光禄大夫

祖真臣朝议大夫致仕赠银青光禄大夫

父俱左中大夫充敷文阁待制致仕赠光禄大夫公讳速字致君姓王氏上世居大名盖三槐晋公之别派会河决迁坟墓于洛高祖赠吏部尚书軫徙于陈之宛丘建炎南渡待制再为户部侍郎终工部尚书寓居越之余姚今遂为余姚人公幼警悟絶人书一读辄不忘建炎二年金人破宛丘公年十一被掳能以婉言脱祸至幽燕久之会调发骚动脱身走河朔复归宛丘日为南河计尝默写旧所记论孟六经尔雅教受汝颖间时作歌诗盖未尝一饭忘君亲也绍兴八年中原戍兵有自拔而南者公与之俱遂达行在所自是益耽玩书史一试入太学在诸生间已知名二十五年以尚书郊祀恩补登仕郎明年春中铨试第一循右修职郎特差两浙西路安抚司准备差遣未上丁尚书忧服除监行在杂货务杂卖场门枢密使汪公澈以御史中丞宣谕荆襄辟差充湖北京西宣谕使司准备差遣汪公素闻公名事必咨焉公亦不为苟

合尝坐中得蔡捷宾僚相贺公独叹曰蔡人涂炭矣闻者甚之公道所以然者已而果然汪公既归宴僚属亟称公论事不苟举一扈属之乞事特改右承奉郎干办行在诸司审计司隆兴改元中进士第明年赴计院上问北方人材于尹侍御穉尹以公对忽有旨引见公奏对雍容上喜曰早晚当用卿退除御史台主簿越七日迁监察御史时金人再窥淮甸朝廷旰食公与同列奏疏曰昔娄敬劝汉祖都关中张良一劝之是日车驾西都长安赵充国上书请先诛先零六月戊申奏七月甲寅玺书报从史臣书高祖事必曰是日书宣帝事必着日辰者皆表其从善之速也夫迁都大事也即日啓行金城去长安远甚玺书往返仅七日应机如此事何由而不成今天下事急矣臣僚所言不可用则置之或有可采愿陛下远法高祖宣帝断以必行不俟终日庶乎不失事机又尝奏论西边上流形势详陈备御之策凡五条大略为将帅不和务使辑睦士卒寒苦宜加劳赐益武昌舟师以张黄州之势分兵戍郢州以防荆襄之冲且请多方疑误敌衆使不得专意襄阳又奏疏条上急务愿下哀痛之诏以收人心选宰相之贤以任国事出令必由三省则命令专一旦絶奸人矫伪之萌诸将小衄不闻则必致误事寧开功过相辅之科因极论大江而上我军单弱乞诏沿江诸郡守臣从宜措画一面施行以一上下之力是时宿将如李显忠邵宏渊赵樽姚仲之徒犹有居闲者公一一条其才用有以贪残得罪者乞加擦拭以收其死力且言姚仲旧在川陕曾将燕北两河归正人号赤心军以保川蜀今江上归正人不无危疑宜令姚仲将之以听督府节制每一进说上皆嘉纳十一月擢右正言陛对之日首论择相之难且言专取亲旧排斥异议官义制之人于有初之地置循默之士于必进之涂枢密院之权反夺于机速房尚书省之事不关于左右司皆宰相之私也次论其衅未已科扰骚然羣盜根芽奸宄不禁宜诏守宰行寬政务实惠安固羣心以静邦本次论讲和有三可疑且请督师不专于持重诸将不专于分守悉遣锐卒以顺攻逆以主待客各为决战破敌之计此声一出虽未必交锋敌人闻之知吾有备和亦在其中矣次论陛下以愿治力行之心愤衆事之不理慨然更革令欲必行人情或有不安终至废格不若责当言者使之言择其当者明坐其人之奏请而举行之或有浮议责有所归若其可行利兴害除善听善用之功归于陛下矣是时晁公公武为侍御史一日与公同条具急务利害翌日得旨晁某理财之说最长除户部侍郎公入奏言臣就晁公武家同草奏疏同衔奏入内殿又同奏陈公武既因此改除揆之义分臣不应独留言路愿繁剧自劾上赐御笔曰卿方守谏职且朕亲擢不须引嫌辞避繁剧之任当俟异日勿复再有陈请上意隆渥且将进用会论馆职免召诏试非是忤执政遂除吏部郎官供职一日力求外补除直秘阁知鄂州寻以母老丐祠主管台州崇道观乾道三年除知台州会永嘉阙守执政以海溢之後艰其选拟试郡有绩效者五人上曰近尝令王某守台州未行此良吏也遂除知温州既至一意摩抚寬猛适中除积岁无名之求罢厨传不急之费公未尝更州县而公庭无留讼属邑无吏迹虽老于吏事者不逮也水利多废得内帑钱二十万尽心力而为之择县官之能者总其事召乡之士有才干者董其役如朱泲埭瑞安塘路石冈斗门功役浩繁皆不日而成民蒙其利灾伤流移之余岁事屡丰士民怡愉遂为乐土郡人画像于州之普觉寺祠之至今乐清县令顔大松邑事整办豪右不得逞相率诬诉于部使者公审其无罪辩之事至台省朝廷为差理官就郡讯鞫公又执前说使者愤其异已并按公党蔽贓吏人皆为公危之狱成令果无事始服公之守正不挠四年改荆湖南路提举常平茶盐公事丁内艰服除提举福建路常平茶事公奏陈常平以陈易新之法甚备上令先行之一路公乘传至部敷谕圣意约以检校之期亲行按观弊蠹随革从行不过数辈所至静谧遇僚属之贤者一见即荐之求者弗与也裁节浮费公帑积二万缗以其半入建宁府库

充常平本钱九年丐归主管台州崇道观淳熙改元除荆湖南路转运判官明年入对上迎问曰卿去国有十年否公对向蒙陛下擢从冗官俾任台谏分符察州十有二年恨无报効上曰毋往湖外且将用卿公奏天下之士口有至公之论而中有至私之情愿有以絶觊觎塞流竞举无遗贤効无佚罚则人无所容其私矣遂留为吏部郎官三年迁军器监尝因轮对奏言管子曰人君修官上之道而不言其中人臣比官中之事而不言其外又曰无代马走使尽其力无代鸟飞使弊其羽翼此言深责成效于臣下也愿陛下使羣臣各居其位职任分于臣下之所趋诛赏操于人主之独断日省其事岁考其成小大協心以张国势又奏绍兴以来军器先阅于本监官然後赴部旬终进呈近用御笔军器非进呈不得出所自此止是文移往来更不加考察臣以为职与事合则功罪可稽事职相离则诛赏竝废欲乞略依故事仍令监丞旬月就本所察其美恶不为虚文丞貳专主亲临监部总其大纲有不精详无敢逃罪十月差充大金贺生辰使接送伴使旧例宰执具郎曹而上姓名以进独遣公调护护使客了无间言往回奏对益称上意四年秋国子监试进士上舍考官以子弟预上舍试引嫌自列特旨别开院以公持文柄鉴裁精甚士论称惬至九月遂除国子司业公在学校久士子素所钦服人情翕然谨守规绳始终如一公尝得喝疾至是复作谒告未滿求致其事遂以五年二月二十八日终于官舍享年六十有二累官至朝奉郎娶张氏故知漳州麟之女子男一人中行迪功郎前明州慈溪县主簿孙男一人大临将仕郎女一人公性孝友尚书治家严整子弟小有不谨正色视之公一兄二弟相继蚤世公事尚书无阙者居丧尽礼後虽寢显輿轿出入不敢就厅所避尚书之旧也迺吏到门一不改度母文安郡夫人黄氏生公旬浹而歿痛念终身语辄泣下遇外家特厚继母河南郡夫人宋氏抚公于髫龄中以至成人人事之尤谨尚书捐馆之後率循家法加详悉事寡嫂孤侄内外斩斩无一毫之私遇父母讳日洁斋兼辰哀动左右奉莹域及四时之祭皆可法也少历艰苦通练世故慨然有大志不为无用之学?极事变着明利病动数千言初登第时张魏公方锐意进取公上书辩论以为无规模而决大计以天幸而希成功魏公不以为忤曰正欲各出所见後省率如公言既居言责当国家多事知无不言居宪台百日谏垣三旬而前後论奏数十上皆切中事几有人所难言者以遗补旧人再入为郎稍迁监长士论为鬱而公处之恬然出公门入私门贵近未尝识面旦望一见政府不请间也天资素高而力学至老不少衰黎明诵书数十过而後盥栉日常以六经羣书至文选韩柳李杜诗文大率成诵暇日正坐默诵左氏传一字不遗尤通贯汉史尝辩班固抵牾为西汉决疑三卷补注杜诗三卷編集南北战争事实为南北龟监诗文至多少作皆弃不取存者尚十卷为监门时姚令威寛尝有所遗忘折简问公答三百余字皆史传全文姚问所遣介云就笔挥答不见有所閼也姚大惊服尹晁同居台中一日有言蓄鹅于陆者入水辄沈下公曰是必以豆饲之客曰然因引嵇康养生论豆令人重之语二公叹曰公记问可谓精博姚与二公皆号该洽自以为不及也自少才气不凡方赴铨选时张公纲为礼部侍郎吏持铨榜来张公遽曰魁非王某乎吏曰唯同列怪问之张公因盛称公才学之懿非第一不可其为前辈所期待如此为文务极本源谓近世学者多苟肤浅其教子弟尝曰欲为文必自先秦文章欲为诗必自三百篇以及骚选唐人欲作字必自鍾王诸公故公之诗文皆高古字画有水墨积习之功尤精小楷手抄书盈溢巾衍首尾適整开卷粲然对宾客宴笑高谈雄辩援据详明率倾其座人晚颇务简嘿叩则应明理益深闻者悚叹居家自奉甚约间以其余赉宗亲之不给者春夏间倾困廩所有下其直以糴一邑米价赖以平乙酉大饥为粥以食饿者里人劝率全活甚衆考公之平生以世家子沦陷异域脱身而归力学自奋两荐上庠不上第又以上书得罪权臣闲废十八年

不预世赏年且四十才得一官暨登一科不两年居谏省未几去国更忧患浮湛久之一旦天子引以自近且贵矣曾不得一在言语侍从之列齎志而歿士大夫无不痛惜两学诸生哭之尽哀又相与祖祭于江干者数百人行道嗟呀以为未有也中行既以五月二十八日葬公于县之双林属钥状公行事将以求铭于立言之君子钥不肖公以兄之子妻之又为癸未同年进士公既抚兄子如己出且不以子壻遇我其敢以固陋辞谨摭平日所亲见闻于公者具如左谨状

直秘阁知扬州薛公行状

公讳居宝字云华世为明之鄞人曾祖弁故不仕祖唐累赠右朝议大夫父朋龟故任右朝奉大夫知衡州累赠通议大夫通议公以儒学起家纯明简静乡党尊敬之公自幼敏悟风骨魁梧通议公期以远到受致仕恩补将仕郎初任福州长溪县东尉任满循从政郎寻以监赏改宣义郎知湖州武康县始至延父老问疾苦一以仁厚遇之追科不扰而集庭讼益稀民方喜公之政而遭母淑人王氏之忧以归服阙差主管临安府城南右厢公事南厢户口十四万最为剧繁公手决讼牒了无滞碍有武弁安俨者其母尝充掖庭怙势横恣公曰此而不惩是箭张禁酒赵放复生于今日也列其奸状于府府上其事有旨鑕秩免官徙之他郡有府胥持公移造庭下肆言慢侮公以为如此何以助弹压杖而遣之吏部尚书薛公良朋时帅临安喜公临事静厚而能不畏强御贰车有阙必使摄事事多咨访焉工部侍郎姜公说为漕副当乾道初间都下大疫漕以上命遣府僚视民疾苦惟公倾罄家至议疾赋药罄不敢欺所活最多于是帅漕共以公绩上闻被旨候任满日陞擢初四明海多盗户部侍郎赵公子濡以龙学出守复制置司以乡兵分委士夫之里居者公曰是畦下也缓急何可用乃即远郊勒兵以法教之坐作进退之节是时舳舻云集而篙师辈无所用心日遨城市公独率所部与之期而肄习之一日赵公按视公所辖百艘沿泝奋迅余州为之辟易赵公亟称之及任都厢曰谏大夫尹公檣出使东浙措置海道雅知公谙练辟以自随焉授临安府通判未赴任间会曾丞相怀以户箠领榷酤始议并二十一库为七思得通敏静重之士为之属遂辟公为主管文字当并省之初羣失职者不乐浮议横出欲挽取之公洞究弊端随事更革不见其迹又能调娱上下以迄于成课入增倍至今行之公之力为多权发遣兴化军始至庭盗跖充斥吏或请分曹以治者公不听亲閱而审诘之往往得其情穷教令之党严妄诉之罚处决精当讼者悦服郡以办治兴化士子盛多而学宫隘陋弗称教养公为之建杰阁以庋御书崇斋宇以安学者广书籍备器用奕奕一新有浮屠自谓遇金僊得咒术有疾者饮其水或愈愚民相扇所在城市财施日积旬月间累百万公闻之曰执左道以惑衆罪不容死弗忍究也逐浮屠境外悉以其资归之学多士黉之郡圃岁入苧麻以为太守圭租公视地狭不足以出此则曰腴民以自厚非吾志也立罢之就除提举福建路常平茶事公以为监司自有体簿书期会固不可慢而非政之先颇以激扬为己任甌寧尉执盗谋赏会公摄宪疑其附会摘狱辞之隐以折之狱吏词屈具得尉曹奸利之状移官审究则良民也駁正其事而散遣之朝廷兴修水利公驱驰川谷不憚勤劳所在必集故老与乡之秀者考言遗迹一一疏濬吏受成规奉行惟谨循行诸郡约省骑从不以声势临人或不知为部使者也公除郡时少保陈公当国自喜为乡邑得贤二千石且道主上选择之意及少保帅闽公方持使节至三山余价翔踊公还建寧发常平粟万斛顺流而下少保公难其神速寻除广南东路转运判官力丐奉祠王管建宁府武夷山冲佑观秩满赴

都堂审察得旨内引公力言常平虚数水旱无备请尽洗宿弊与之更始又言闽中部纲公取夫力之费所至辄起夫骚扰以为常请一切禁止上嘉獎留为仓部郎官既而陞郎中漕粟都至有折閱者所司括责逋负之人聯以修垣百十为羣徒困笞箠而无所从出蓝缕枯瘠无复生意公悯其然为同长貳奏请令漕司下所属偿纳囚系一空鼓舞而去淮西漕阙有以公姓名荐者遂除淮南转运判官兼提刑提举即日独班对便殿临遣甚宠面諭两淮事宜委以城险要浚池隍又将立仓廩以丰塞下之粟且曰勉力办职朕不忘卿公感激受命即日引道至治所府库枵然公訝其已甚及会出入之凡则叹曰用之无节安得不匱吾知所以治之者矣于是汰冗吏罢不急补罅导源时取而约用之蠹弊之迹剗磔殆尽漕计始优一意屯田事修筑塘圩广募种艺又以其余貲修无为军庠校遂为淮右之冠兴利除害纖悉上闻主眷既渥随即罢行安丰军光州旧有忠勇军水寨不隸漕司上以公肃静有谋并以委公陞辞之日上亲语公漕司所造弓弩就令和州筑屋贮藏公检閱其目亏数尚多亟为奏审御笔仍令增造公不以纖毫扰州县而如期办集枢府上其劳特转一官淮东谋帅上因公奏陈边事深嘉之即以公知扬州淮地被边狗鼠之盗云合鸟散无所踪迹边民多苦之公设醴赏置耳目取其尤者明正典刑穷治囊橐之党疏其姓名而揭之市羣盗屏迹外户为之不闭淳熙庚子旱既太甚公以祷禱勤劳蔬素日久遂得下痢之疾郡民日到庭问公起居以安否为休戚閱两月竟终于郡之正寝十月四日也百姓为之悲恻士夫亦伤惜之累官至朝请大夫尝以职事修举除直秘阁娶朱氏封宜人男六人长扬祖迪功郎特充淮南东安抚司书写机宜文字次佑祖以国子入太学将受公遗泽次循祖怀祖延祖述祖女四人长适进士汪閎中次适承务郎新监两浙转运司明州造船场王克常次许嫁将仕郎刘安正次许嫁通仕郎徐晞夔公禀资寬亮而能济以严遇事明察而不流于刻自奉甚约而未尝嗇于人性不喜酒居官未尝夜宴视王事如家事惜官物历官三十年了无玷缺以缓急叩请者割俸以周之维扬公帑负民钱积数颇多公到郡捐私财先为偿之遇事有可疑而难辨或以非意相干必退而深坐思有以处俟其心平气定徐起而应之故未尝失色于亲旧事亦无不得其平者平生多巨公獎予更为汲引驯致宦达晚结主知亲擢阆寄士夫不惟以公之才业应有以得此且谓公奇龐沈毅福祿未易量也而年止五十有八不得尽其才用呜呼天耶诸孤以九年六月七日葬公于奉化县志义乡双各?之原从新卜也钥母于公为中表钥视公为诸舅行平时相与素厚公之诸子以公之行事属钥编次因纪其大者如右谨状

攻媿集卷九十

<集部,别集类,南宋建炎至德佑,攻媿集>

卷九十一

钦定四库全书

攻媿集卷九十一

宋 楼钥 撰

行状

文华阁待制杨公行状

曾祖端故不仕妣蒋氏魏氏

祖零故不仕妣邵氏

父涣故宣义郎致仕赠中散大夫妣徐氏赠令人本贯庆元府象山县政实乡美政杨公讳王休字子美年六十六状

杨氏世居郡城公之曾门始家象山遂为邑人累世以隐德闻于乡公生而奇麗邵夫人中年抱孙极爱抚于髫龄中已有成人气象庄重寡言乐然後笑相者以为必贵中散延儒士教之家苦无书倾貲买经史于胄监肄业蓬莱山僧庵中穷日夜之力至雪积于阶而不觉尤好词赋兼通春秋游郡庠名出诸生之右绍兴末年始名乡书再荐登乾道二年进士第调左迪功郎台州黄岩县尉首兴邑庠公自课督又獎拔其尤俊秀者其後登科相踵皆以为出于公也邑有豪民武断一方蓄雄狡数十辈分而为三曰大神者为之谋事曰中神者为之行貲曰小神者则无赖善鬪之人也官吏莫敢谁何公具得其奸状白于郡黥隶他州闻里懽伏称公为铁面少府遇略卖生口者痛惩而归其人请捕监立赏格计实而募于衆祷雨则神龙为之示现捕盗则鲸海为之肃清盖筮仕之初器业闻望过人已数等矣寻以赏典改左承务郎知庐州合肥县邵夫人年过九十方欲奉重亲之欢而邵夫人壽终公追慕含饴之爱不欲行中散同徐夫人执丧于家勉公前迈公携一仆自随昼至听事夜寢书室洛诵或至夜分尚书王公希吕为帅叹曰据案决是非此犹可及官舍如僧居二年如一日实有所不能也又爱公笔端笺奏皆属之帅漕不相能久不覲面僚吏无敢言者而皆敬公各致剡举公因得调娱其间二公为之释然置酒交懽而待公益厚淮民多为客户所侵地讼难决公亲行阡陌为之平章讼日息而野日辟至今赖之赋役均平一毫不扰民乐就役欲及公任内为之岁饥发防边马料运米给贷漕司诘之公疏艰食之状且已责其秋偿矣至期皆不督而集万弩手赴师司检閱多苦伤寒喉闭之疾公择方制药以给之病者多全活具不幸者官又敛之郡多草庐易致延燔公白于郡请易以瓦帅曰非君孰能办者公一力经画市木傍境教民陶瓦未几民居一新边方为之壮观淳熙四年磨勘转承事郎明年任满赏转宣教郎授南康军签判郡素号江东道院待制朱公熹时为守日课诸生讲书公亦相与发明事无巨细悉以委公自行经界以

来境内苦于赋重民不聊生流移者衆公与朱公力请于朝利害甚白虽幸少寛犹惜其不尽如所陈也庐山东南胜境官宇有吏隐堂正与五老峰相直娱侍双亲于堂上太守尤敬中散扁一亭曰敬老公余则奉安輿游名刹以尽其欢六年转奉议郎初有诏台谏给舍举察官王公已在西掖以公及丞相京公鎰应诏京公遂戕豸而公遭内艰以归矣扶护暑行悲感道路执丧甚苦九年又丁中散忧勉举大事家为之罄邑邻台州有盖苍山高絶人迹罕至公处僧室閱佛经一藏以资冥福人以为难服除造朝言士风奔竞皆上之人有以来之仍言海舶不可径造都下貳相王公淮梁公克家是其言有意留公自以五年忧患之余力求镇江府分司粮料院以归人尤高之十二年到官职务至简而少保吴公琚为总领一见公期以远到幕府事既为尽力吴公亦开心听可一司赖公为多明年转承议郎吴公召还首荐公才德之美孝宗命中书识之既满秩王丞相欲处以司农寺簿公又力请外郡除知洋州十五年转朝奉郎光宗时以皇太子参决庶务公辞于议事堂论淮甸撮课绍兴和买最为民害又论四川纲马利病光宗喜曰议论人物俱伟当为敷奏施行是冬赴镇洋本佳郡近岁有健讼者公剖决精明人不能欺坐以无事治赋期会信必不严而办征商榷酤亦皆沛然郡有丹渊二苏鲜于子骏四贤绘像旦望必率子弟拜之丹渊有园池三十咏公尽复故迹退食多赋咏其下又崇教化课农桑百姓安之才一閱月俄改知金州兼管内安抚前守一武吏居兴元席卷以归又尽焚其籍公至则?然且无所稽考为之节用度惩吏奸不能给一二诏置狱前守坐编置没其家赀公又极力经理仅能成邦西津两渡公帑征利病民首罢之创浮梁于西津以惠行旅人为立祠过者必祝处分西城汉阴平利三邑纲马以损均敷之费施竹木柴塲之利去受输倍征之害州有榷茶场其初止隶茶马总领三司抱纳息钱之外郡计亦藉其助守或乘势权取至移用系省以增本钱从官多售既已科扰园户深治私贩配隶者相属守亦或以自累公极白茶司欲卖引以便民葦年始有更引之命公力赞之俾官僚及谕乡之大夫士各陈其事酌取衆说罢茶场而鬻引一方无不快之帅守尚书宇文公价宪使朱公致知相与叹曰安康之政前所未有也条其政绩交荐以闻光宗登极转朝散郎郡之士风素陋乡举者二人其一又流寓也公为大兴学宫学者浸盛鼎新祭器春秋释奠如礼有雅歌投壶之风焉十六年为四川类试考官境内一水远通襄鄂行商不絶有鬼愁滩摧舟絶险公出钱募人平理之石坚不可破公临视之得古铁于沙中甚夥铸为鎚凿严醯炽炭以攻之石为之解以炮竿移去遂为安流郡宿重兵多以榷利启争公视如一家爱军士如爱吾民都统田公世卿固已交欢殿帅郭公棣奉祠里居相与从容无间尝猎近郊步骑俱从三公戎服竝驰公又素善射以一矢毙双兔二老将敬服之闲语同僚曰中兴之初余为均房镇抚使敌骑犯塞大将以金旧隶京师置不问止保洋州饶风关遂致此郡失守又乘胜击破饶风直捣汉中赖王师力御之遂由斜谷而遁今郡为西蜀喉襟上津县即商於之旧邑自商之丰阳西至洋之重阳关横亘一千三百里关隘六十四边面阔远而权轻财匱何以备仓猝乎听者竦然公曰向以大将为守与三边军府角立?传动有重费交贿通及四邻惟当痛絶旧习虽贾憎不暇恤也岁余以所积置防边器具增保胜民兵衣甲亲给支犒无侵渔之患时比箭赏革游惰之习休日则较禁卒事艺号令精明赏罚有差将官有夜饮于城外者私留门钥以俟公曰吾与敌画地而守其可弛乎恣閤者而军中亦治其骑将内外始肃旧有抚养库例与公使用等公曰此正以防边也自军用外不支一钱去之日为缗钱十余万绍熙元年转朝请郎二年除利州路转运判官自郡赴台几千里道遇讼牒随即受理御史甚严秋毫无扰考察吏治置籍大书明别淑慝二条区别贤否列城为之震悚利路属郡多在关外漕计入不支出适当浣饥西师除掌武门下增俸不赀

重以归正之蠹方左枝右梧之不给而暑雨为灾上烦宵旰又躬抚劳赈济之役金州大火几无子遗守卒仅以舟免公兼仓使即发米以救之漕司力不足寝食为废贰卿杨公辅方护饷四川与公同年气义相许公力请于杨公曰安康一艺甚矣军中有事力多使令犹可兴起公私赤立何以为州若请僧牒于朝万里难应顷罢本州安抚司有备边库钱二万万桩留使所前守拘没赃钱有旨输内帑二者皆本出于金州之民若以此建官府措居民于经费无所损而可以新此邦矣杨公慨然从之公既兼宪使闻关外六七月方食麦盗贼横行吏惰讼淹德意壅不宣冒暑虑囚历阶成文凤四郡调贫剖讼所至有恩行褒斜谷出武休关道不通车间用篮舆徒步以度险于中喝以文州地荒民稀而力役最重为奏罢其不急者数条西帅吴公挺久镇贵重待宾客尤厚公既深入边关吏曰当道武兴公曰此行正欲到轺传不到之地遂由文南以归吴公犹以例卷至司公力辞帅服其廉蜀人翕然称之有利州兵官告讐太守阴平知县以县庠为酒肆公以为犯名分败风教莫甚于此俱劾罢之嘉陵江暴涨漂坏栈道邮传隔绝公大为经理以其费上闻总司助其役由益昌至大安军修创栈阁二千余间视旧加辟今成夷涂明设条约补役兵之阙画疆分掌椽柱絢茭乘暇采取风雨侵蚀以时缮治期以勿坏自祥符皇佑元丰三为此役元丰尝纪用数今役不翅数倍而不以取于民有修桥阁记甚详蜀中皆歌咏之三年移成都路提刑兼常平事得旨护试外省公自向为考官固已具知蜀人多为廋语于程文中有容私而幸中者谓之牢笼公身率官僚力革旧弊寒俊获伸无不感服又详究试闈曲折参以南省规式关防备尽既施行之又编为成式申制司以为後举照川绵州岁市黄雀数十百万一切禁绝之药局岁久剂料陈腐焚而易之巨室责租至使耕夫自戕公治其甚者绵汉告饥亲至二郡主行荒政故饥而不害西蜀藉江水入堰灌溉旧率取竹木于民春犹未集水已大至积薪救急简陋重扰徒有倍费公豫于冬初收买岁始修筑又眉州蟆颐山下一堰岁苦冲决命伐石为之濬广沟畎谨视瀦泄又捐俸为汉嘉西门石梁郡人名杨公桥皆为永久之利台有平允斋聚狱案于中夜则阅之有疑则亲笔究问臧以紫囊亦令所问官亲笔批执吏不得预之故多得其平三年转朝奉大夫四年冬除本路漕黎州蛮獠青羌搅边州所遣兵为羌所围公适摄帅以策御之遂遁尝闻道旁儿啼声得婴儿于枯木中因籍城内外得遗弃者百余人悉加抚养俱遂生全剖决两司词讼迎刃而解酒禁素严有捕郭二十五私醢至庭下公询之郭乃一邑令公察其非涤器之徒治告捕者而慰遣之郭少城大族拥笏致谢三十余人府庠养士至千人每月必再入考閱程课旌其能文者庖饌丰贍士愈悦造吴蜀会子纸每界至六千万漕计始十七万缗偶会多事费倍平时或虑乏兴而公处之裕如遂积缗钱至四十余万两在漕台典外铨幸门尤衆一以公心行之量能授职多得实才人服鉴裁之明庆元元年覃恩转朝散大夫寻又以年劳转朝请大夫召赴行在七月除户部郎官湖广总领仍令奏事对便朝奏罢边民守关及非法役民者以军兵为之此安边恤民之急务又奏禁盗贼之法强盗已有六项指挥欲于杀人屍不经验而无证佐依大辟疑虑奏裁指挥下添入强盗杀人者非六字使盗贼有所惮且明示无惠奸之意又论钱弊甚悉谓货泉取其流通今自裂而三之东南则用行在会子两淮则用铁钱会子湖北会子则又异于二者是使商旅不通嗟怨相闻不若罢两淮湖北会子其在民间用行在官会收之俟收两处会子尽绝则官会通行实为利便总司金谷浩穰公首去八弊而总计为之日充详閱军用而核亏数之实亲临出入而究楮券之奸分钱交子为三而不容互用判军粮桩积为二而不许移易拒河支廊支之请而米纲无陈腐之忧绳兑支截支之扰而茶引有通行之便以至广储蓄之地两郡为屋百楹旧以芦荻藉米一易以板後遣使盘量惟湖广之数丰盈人益叹虑事

之周也循行边屯会襄阳火灾之余亟议拨钱五千缗瓦砾之场尽兴栋宇公又亲抚存之军中升差赴司按试公勉以忠节亲校武艺仍书公移置几上中选者即书其姓名手以授之进退既公军士感悦三年春就除司农少卿九月令赴行在供职十一月除太府少卿十二月三日除中书门下省检正诸房公事六日始入国门先次供职明年奏事陈备边之策谓金方与鞑靼相攻未知胜负然皆足以为吾患不可不虑也又列择将审势修戎器招勇敢士四事因荐统制而下内可为环列外可为将帅十人御笔籍记时中书积狱案甚多月日或有揩改之迹四月转对即奏曰奏案动关人命巾书岂能悉察吏得以为奸利以小节迂回而俟赦降或改移月日後先谓该恩宥乞以大理寺及四方案尽申御史台置籍月委察官一员稽考勾销已结絶者而催督其余或有淹延太久日月差殊则奏劾之庶无冤滞之民又论省部吏引任缌麻亲之弊国家以天下之务隶于六曹而总于三省故为吏者赏优而廩厚又为保引之法许录其子孙若异姓而今日脮杂殊甚习学守阙不知几人气习趋向非复旧风轻儆苟求诡秘百出反甚于州县之吏乞加澄汰止许保引子孙者许引同宗大功亲一名其异姓之人一切停罢庶少清吏选闻者皆韪之六月假显谟阁学士兼侍读为金国贺生辰使过泗州北书表初参索使副出笏公令掌仪以礼折之曰都管而下便服来参乃欲使者以盛服相见岂无差等耶竟受参如仪至真定谢酒果金之中使忽谓使副不当用皂背白领盖北方朝仪皆用紫也公曰本朝止用此服且泗州东京既用之仪正如此使以左衽至本朝岂为不恭即麾三节人退班终不能夺归而奏曰臣将命殊邻因得观民情之向背敌势之盛衰与夫士马之虚实财货之盈亏皆已可知此固已见天道好还今古不异然在我不可一日而不备又奏和采所以惠民而备兵今平采良法浸坏牙僧胥徒操其权而官受其敝乞置场收采听民商从便免致科敷可以絶奸利而价自平矣四年以劳迁转朝议大夫又以年劳转中奉大夫十一月迁太府卿转对论奉使三节人从近岁托请货取饶赏而已安有能覩人之国者欲乞除上节亲随等选辟如旧余悉取于三衙及江上诸军上自统领下至队兵轮转差拨已行者不许再差岁两遣使约不下百余人彼城壁之坚瑕地理之要害必有能覩之者因使士卒经行洪河太山激昂壮志转相传闻一旦用之必有助焉又论郡县拘到铜器或惮于解发而收贮不严窃取求售所在有之乞令尽发赴钱监仍申严禁戢五年差省试参详官五月除秘书监公性嗜学久从吏道未尝废书自谓平日欲见祕府书而不可得遂终日坐省沈观未见之书尤不喜趋竞同省赠以诗有九衢达宦方驰毂羣玉诗仙独下帷之句有以为後时者公笑不答九月兼实录院检讨官十一月除礼部侍郎兼修玉牒官六年进故事论监司广朝廷之耳目考州县之否臧以惠安斯民者也若罢软不择癯耄兼容徇苟且而略风节尚资历而混贤否亦何取于外台之寄哉因历陈高宗孝宗圣训愿深诏大臣除授之际虽不可废资历一当先择风力强济材具精敏之人使充此选则一路可以蒙福矣光宗玉牒书成公读于殿上以赏转中大夫四月兼工部侍郎夏早上封事请下罪己之诏修应天之实布之天下使内外之臣图弭天变五月有诏罪己仍诏侍从而下疏陈阙失又奏备论二税徵榷之扰和采先备之计尤详时慈懿皇后上仙两部事繁公尝病渴往来冒暑感暴下之疾力请外祠三请除文华阁待制提举江州太平兴国宫以归归而病寢革后手足之际色庄不乱命具纸笔曰吾将逝矣书一颂甫毕遂终于正寢寔九月壬申也病中乞致其事转大中大夫遗奏闻赠四官泽其後二人娶同邑史氏子二人燁将仕郎燁先半年卒女四人长适吴兴乡贡进士周俨次适承事郎新知常州宜兴县丞洪甫丞相之孙也二女皆先卒次适文林郎新绍兴府?县丞俞杭次许嫁未行後公一年卒孙男一人基登仕郎以嘉泰二年九月庚午葬公于鄞县通远乡金谷里四

明龙井山之原将葬燁请状公之行钥少与公同荐公自海上後至遇于途峩冠粹温即语同行者曰风度如许一第何足言且当以贤贵有闻于时遂定交焉今四十年矣中间离合不一公之贤誉日起人犹曰长者耳其使蜀也闻公不畏强御几危其舟尝按郡守有为之地者反欲相倾人为公惧公抗辩于朝不少屈中执法为直之而後定于是益壮公之为而加敬焉京丞相尝谓钥曰祖宗不以蜀人帅成都又多以东南士夫参错于诸路麾节间有深旨哉某帅蜀时固知蜀多名士求其晓畅吏事所至治办而不疎者无如杨嗣勲东南士夫入蜀者亦多可称求其最贤而有才者无如杨子美故某与之尤厚绍熙初诏内外从官荐可为卿监者首荐之公欲归而未得会京公趋召公命燁浮家依京公东归独处于蜀者又三年盖其清修约已一意公家如此前朝用人往往历偏远而後归主大计以至柄用公之宏才远业所莅不苟扬历最衆见其归而持橐意必由此而升姑未问经济事使其婆娑从班吐胸中之奇以见于论思之间亦何止此厄而不得骋岂非命耶逮其赋归已先卜城居栋宇闳敞犹望为老朋友以相依然公归而病病遂不可为一见亦不及也哀哉公厚重周密与人不为翕然熟久而敬之士无贤不肖入朝见嫉自古志之矣惟公之来而朝无间言犹谓其晚去而共惜之是必有过人者素少病闻归班时气貌尤充悦人咸以为富贵未艾也归自北方始觉稍衰而又连年有儿女之戚人所难堪使堂堂雅望奄至九京此尤识者之所共叹也着述甚多宦游名山随处题咏散落之余入川时有游岷漫笔一编又有东斋集五卷诸史阙疑三卷藏于家笃于孝友中散每憚航海之险屡谋入郡而不果公既贵遂问舍于湖上将赴洋州故庐先业尽以与二弟漕成都时以捧表恩任弟之子爓又携以出疆循从事郎今为台州支盐仓遗令燁曰吾家素寒微羣从多困其有以助之燁泣曰敢不承此志公在蜀中乐贤之衆多所荐引如今吏部尚书费公士寅前兵部侍郎赵公介俱尝与公同朝此其最表表者也其他大有建立是时燁已奉母而归不能尽记公又以为王事所当为不惟不夸于人亦鲜以归语其家恐尚有遗事未能备也谨摭其可记者为之状将以求铭焉谨状

直秘阁广东提刑徐公行状

曾祖义赠中奉大夫妣胡氏赠令人

祖佐赠宣奉大夫妣许氏赠硕人鞠氏赠硕人

考立之故任朝议大夫赠特进妣李氏赠安定郡夫人本贯登州黄县

公讳子寅字协恭世居文登特进以绍圣初元登进士甲科南渡先寓会稽建炎四年令人梁氏生公徙居四明今遂为庆元人特进家无儋石储而笃意教子公生而敏悟尤所鍾爱先意承志务进于学授诗于郑先生刚中累冠乡校绍兴十年以明堂大礼恩补将仕郎十八年春铨中选授右迪功郎监浑州南岳庙时法官多山东人与特进厚善勉公习法明年公方弱冠一试中其科二十一年丁特进忧遗训有云吾以孤寒自奋为正郎者三十年中遭兵毁仅能立家汝曹异时莅官内勿欺心外勿虐民公泣血书绅终身诵之服除授建州司法参军任满关陞右从政郎授潼川府路转运司主管帐司未赴以法科改福建路提刑司检法官审复囚牒累百凡駁正死罪七十九人吏部以闻减磨勘一年公曰法所当轻非敢纵囚以求赏也竟

存而不用隆兴元年以举主改宣教郎授两浙西路提刑司检法官改除大理评事乾道元年以鞫制狱除丞其词曰志业有立操修可观潜心于孔子孟轲之言兼遂于柱後惠文之事是于圣人之意其知之矣三年差充删修续降指挥所删类官四年轮对力以清刑为请上固已识之丐外补除知无为军十一月陛辞奏两淮议营田屯田久矣地有余而人不足每以为病比年归正之人甚衆分处州郡仰给大农徒有重费犹患不给臣尝因鞫勘归正人公事尝以诘问之皆以为饥寒所迫不得已而为此若得官备耕具使治淮上荒田以餬其口何苦犯法哉臣矜其言窃尝询究淮上治田之具盖每招一家必首给钱百二十缗以其二买牛一为室庐耒耜之资是知淮上不惟人稀牛亦艰得计道途之费固应倍于内地又缘经历商税费亦寢重臣恭覩仁宗皇帝国史凡鬻牛者免算税绍兴敕令云若以牛贩卖其过税勿收即遇灾伤放税及五分过往税亦免欲望遵仁庙之法申甲令之文并免贩牛过税至两淮者住税亦免耕牛辐凑则旷土日辟矣臣恭闻陛下方发内帑委守臣备耕具招归正人营田若更免牛税则必欣然从事于畎亩农隙閱以武事边备之至计也上大悦且曰牛税可免卿能保归正人乐于耕乎对曰臣岂敢为尝试之说盖诘以汝辈未归此时在北方亦耕夫耳咸曰然臣使手书欸状皆其真情因袖出旧辞以进上尤击赏玉音甚宠曰朕图此久矣未有利害较然如卿所陈者卿于讯囚之际乃能体国远虑及此耶卿未可试郡朕将用卿既退御批陈献可采先次差往淮南楚州相视措置条具闻奏公在朝行恂恂似不能言一旦对奏卓然动上听感激自奋始尽力于淮甸而眷宠日深矣公躬履阡陌募乐耕之人与之通情详议不以使者自居上尝念公之劳又未见图上事宜因中使至盱眙戒以访徐某所在宣谕催促公性简易方在田间议事语既久出盃酒与之分酌中使适至传宣既毕匿笑而去以其太简也归即奏之上曰孰肯将使旨而为朕究心如此者明年正月归奏上首褒谕此事公遂奏条目甚悉大略谓楚之淮阴乃沿淮极边之地监城沿海虽有间田未有以处归正人且于宝应山阳得空闲水陆田五百余顷劝谕到归正传昌等四百余名欲人给一顷五家为甲一为之长随处置庄仍给备耕牛农具屋宇等钱家与草屋二两牛并屋一种粮万钱并俟入庄日给付初年开荒免纳本钱次均五年还还足给其田为已业候满十年起纳税赋其劝谕等人獎劝有差诏可其奏淮东帅奏乞措置监城喻口两地守御上曰非徐某不可就俾措置公奏喻口当射阳湖入海之要监城筑垒不坚又无屯兵乞下楚州措置守御从之是月除大理正不候授告先次供职复往淮东御笔赐知扬州莫蒙览徐某所陈归正人给田利便甚有条理已令施行卿宜协力使一一就緒五月诏对奏诸庄水利有二古沟可泄水田夏潦循其旧而浚之因而賑给归正原耕之人实为两利又奏荒田及守令拊摩等事亦得旨行下并依所乞施行七月诏以莫蒙措置淮东山水寨及民兵总首并庄寨使效已及半年未曾审实委公按视激犒仍支舟师器甲等寻兼权尚书驾部郎官又奏仍旧置万弩营六年正月有旨徐某措置官田招集人民委有劳效除驾部告词有云司輿郎吏高选非曾把麾持节不以授今特命汝上曰徐某清贫不受馈遗继命中使赉白金五百两四月差知高邮军公奏措置官田节次劝谕到归正人及种田使效计一千四百余人共置五十庄屋宇牛具毕备缘诸庄散在扬楚高邮盱眙四郡今差知高邮切虑诸庄疑惑欲专委才吏措置两淮官田得旨径委公兼领许令每年一往诸庄激犒俄改知泰州又一月召奏事因陈盐场利害及扞海堰事甚悉遂兼权淮东提举御札令俞召虎与徐某同措置营田郤令徐某同措置盐场各宜协济以副朕使令之意十一月以职事修举除直秘阁七年赐绯衣银鱼四月奏事选德殿复条具盐事遂除提举淮东茶盐常平措置官田如故楚州申淮人陆梁恐开敌隙上令相度随即奏闻上喜御批卿无所避惮挺

身任责足见恪勤乃职朕甚嘉之当官处事正宜如此然淮民既已肃静郤当抚之以恩不可专用刑威也恐卿等或未之思故兹獎谕复示朕怀宜加体悉十二月以盐课增羨特转一官丞相虞公允文贻书谓一司治办前所未有钦叹不已是年以和籴最多而先办仍自行津运委见尽心国事又转一官八年坐不觉察所部私渡降一官後乃得实改正屡请外祠以盐司积压盐本降二秩卒以总领所申额盐亏失罢九年七月主管台州崇道观淳熙元年正月召赴阙奏对称旨除工部郎中仍旧措置官庄枢密院得旨列具淮东官庄已成之数总五部七县及楚州忠勇使效为五十四庄屋二千四百四十九间耕者一千二百有奇牛六百二十有五稼器六百二十五副老穉五千四百二十有七耕田九百一十四顷上见实效尤以为喜公蒙上异恩感激尽力尝叹曰古者专以屯田为养兵开边之计国无重费而可成功今讲和方坚无所展究将有见忘者矣已而果然淳熙二年官庄结局除将作监点校官庄三年四月除大理少卿六月罢十月主管建宁府武夷山冲佑观四年春除淮南运判不赴九月再命仍专一措置督修城垒五年兼权扬州于是瓜州城成六年五月除知扬州八月除运副时暂差知楚州九月修筑高邮兴化宝应县石閘斗门函洞堤岸可以固护民田约三千七百余顷特授中奉大夫封黄县开国男食邑三百户未几罢归两任提举武夷山冲佑观十三年转中大夫十四年除知随州十六年赐紫章服冬始赴郡绍熙二年任满尚书张公杓为帅荐于朝三年除知台州公至郡询访利病之实思欲不阙郡计而又裕民量入为出优有余地榷酤征税大率从宽阖郡熙然涂歌巷咏率有太平官府昔所未见之语明年版曹比较上供以台为优人谓既以利子民非天雨鬼输何以致此益以为不可及或问公则曰求弊当求其源台有二弊偶皆得之一曰秋苗为钞二曰军士虚籍有奸胥增改钞额照以仓籍伪增至八千余石至以十为百以百为十上下蒙蔽久矣公既发之而使输苗者每钞不过一石弊无所容至增万斛虚籍尤为重耗因立赏罚使之自陈置籍几案上亲为销注月余十去二三岁减数千斛财赋条尽较计精详节不急之费罢馈赂之私杜刺军之请是以能不扰而办属县宁川邑庠久废公为买田五百亩以振之剖决滞讼情法俱当人既悦服一毫使民则为之蠲积逋至十余万谣颂腾播远迩寮吏亦皆感叹倅贰贤者还朝语人曰郡太守职在便民政有不平则吾当正救之今徐使君专意抚摩如恐伤之吾无所用其力惟赞之而已宪使陈公杞行郡父老拥车请留太守者累数千牒陈公叹曰得民如许诸郡未见其比当以闻于上五年四月除广南东路提点刑狱公事郡人尤惜公不满秩而去立祠塑像以歌谣刻之石攀辕卧辙喧动千里几不容去公归此亦倦游矣力丐祠而促行之旨益严既抵所部详刑决狱务在宽平恩威兼行列郡皆耸庆元元年春夏之交欲徧历诸郡或谓瘴烟季春为甚姑缓之公谓职在澄按不能自已至五羊疾作而还第四子随侍自公得疾于道惊忧精禱愿以身代公既还而此子先以疾卒公采不堪遂相继而逝寔五月八日相去才五日尔痛哉享年六十有六娶汪氏累赠令人再娶陆氏封令人七子长曦臯通直郎先三年卒次晞益承直郎知台州宁海县丞次晞稷严州观察支使次晞夔儒林郎新鄂州观察支使即死于曲江者次晞垂将授公遗泽次晞契晞夷习进士女五人长适朝奉郎主管台州崇道观唐淮次适进士王然次适从事郎监温州在城商税阙琴次适承奉郎监台州在城商税汪立中次适史宣之寔太师之孙将以遗恩补官孙男十一人师顔师孟师周师偃师雍师锡师点师召师汲师夏孙女四人未行诸孤将以二年九月丁酉葬公于鄞县翔凤乡隐学之原从新卜且公志也公天性夷旷与人以诚实素嫺吏道晚益更练故台州之政尤为人所称孝宗知獎实千载之遇往来淮南数年详究精密论事上前如辨白黑动辄寤朝奏暮行间有飞奏亦皆响答故凡事皆见功绪人但见其宠渥

使藩成大家亦其才业勤劳有以取之公为漕时有扬州教官倚势援迫诸司求摄傍郡守皆俯从之来求于公公曰此非所以相爱悔吝必在旦夕边郡章奏动彻上前万一以为问何辞以对力郤之其人遂阴挤公坐此罢公不以为恨後数年其人以贿失官举者皆坐公盖尝谏之彼自不用故独免于罚仁者之报也一闲十余年筑屋湖上日以觴奕杖履自适尤善居乡未尝忤物宅欲成而东南寻丈之地或执不售公曰我亦何用此左庀止为前荣而缺其後久之求售终以善价酬之晚虽丰余而自奉如小官时兄子数人抚之有恩意调给惟均无有间言公在淮南乡人有被盗疑公之仆为囊橐追捕治掠甚苦公闻亦不为动已而得释伺公归而诉之公曰我以家事付汝累岁侵渔已多迨假手以治汝尚何诉其无竟类此闻者服之麾符所至前後荐士百二十余人其间有在从班者而公出入三朝受孝宗之知尤深官止列卿岂非命耶钥汪出早岁及与公同舍姨母既归公情亲寢厚丞相留公当国最重然诺钥一日见之坐中有语及公者留公曰此人有才钥因问曰相公何以知之曰朝廷每下边郡措置禁铜钱过界惟随州一奏甚明而可行因曰其人纯茂向来口语非其实也其後丹丘广东之除皆出其手钥不惟服公之知人而又喜公之为留公所知也诸孤请状公行并以所闻书之俾求铭焉谨状

攻媿集卷九十一

卷九十二

钦定四库全书

攻媿集卷九十二

宋 楼钥 撰

行状

观文殿学士钱公行状【代汪尚书】

曾祖暄故任中大夫宝文阁待制累赠太师镇国公妣陈氏赠国夫人

祖景臻故任少师安武军节度使累赠太师康国公尚仁宗皇帝女秦曹国贤穆明懿大长公主

父忱故任少师潼川军节度使累赠太师雍国公妣唐氏雍国夫人

本贯开封府钱公讳端礼字处和年六十九状

吴越忠懿王六世孙也高祖惟演以文章受知章圣掌内外制十有余年擢枢密使以襄钺镇盟津移洛阳欧阳文忠公修尹公洙谢公绦皆在幕下一时士靡不歆艳謚文僖镇公在庆历治平间号良二千石神宗朝王庄定公存领三司镇公为副使奕世光显至康公而愈大公雍公第三子以贤穆之孙政和初授宣义郎七年赐绯宣和三年赐金紫主管西京嵩山崇福宫靖康元年监登闻鼓院未几随侍重亲避地湖广累奉祠禄绍兴三年添差通判台州岁饥方议赈给饥民千余人集谯门下守欲设兵卫公曰是促之为乱也亟开仓俾以次受粟无敢譁者识其闲有猾吏数辈白太守尸诸市一境安堵公时方年二十余由是声名籍甚四年通判严州又改湖州皆不赴主管华州云台观七年通判明州太守尚书莫公将知公明敏郡政多决于公除直秘阁後政以苛敏自任僚吏重足而立公独以理折之不为屈又加敬焉十五年除提举淮东茶盐引对改除两浙转运判官时方缮治行阙增葺宫城公与临安守分任其役率先告办除直徽猷阁进宝文阁漕司有积镪近万万或劝公献之公曰此朝廷外府也何以献为时宰不乐遂罢归十七年除淮东转运副使时金使方通官吏希赏趣办过丰一切取给于民怨嗟相闻公日力言于朝人皆危之公曰目覩公私之害忍不言乎秦丞相亦察其诚遂为减入至今赖之漕计率耗于无名之费岁用多请于上公革去宿弊帑廩有余遂乞罢大农岁给又储三年之费为备用库明年进直龙图阁知婺州公入境闻岁方苦旱即斋素默祷首祈于星祠香火未收雨已大注邦人欢呼已而霖霪不已公度必有水患亟募客舟百余艘人或以为蚤计一夕水暴至城不没者才数版浮梁既漂去溪南市人求救者号呼震动公坐城上厚赏舟人竞载以济几数千人公分处僧舍计口给食悉遂全活去之日遮道挽留生立祠

至今奉祠三年丁雍国忧服除知衢州过婺阊境送迎近世所无也三衢大火公以民居侵据通途不因是时一正之害未艾也乃访古沟遗迹尽复其旧自是无火灾民方大以为便尝治一豪氏之无良者偶与漕有连以属公公必欲竟其狱漕阴中公而罢人皆冤之二十八年除知抚州抵玉山以病勾归是冬召赴行在次年陞对除太府少卿七月除秘阁修撰两浙转运副使公尝领浙漕事至是十四年再至人以为淹回而公曾不介意振举职事视昔有加居无何显仁皇太后上仙太上皇帝欲得典礼严备御笔委公专领办护公晨夕不少懈乞事进右文殿修撰三十年正月除知临安府府以应办积欠民户缗钱几数万公曰天府为郡邑首即售物不偿其直何以示天下尽还之明年七月除权户部侍郎先是御史中丞汪公澈论版曹阙官当遴选太上问谁可者对曰钱端礼可故有是命八月兼枢密都承旨九月兼权知临安府公尝建明用楮为弊至是专委公经画分为六格出纳皆有法几月已易见镪数百万三十一年八月丁雍公忧次年今上即位公取故谏议大夫忠肃陈公瓘所撰刍说中二十事事为之说号曰正论进之时边境方扰公言战守为尤详其略曰当今国家利害莫大于夷狄侵侮然图大之计不若从是而务实张虚声蹈实隐非国之福也去年诸军所可恃者独一刘錡而首不能支托疾退师其余或避舍宵遁或全军陷没或逗挠不进间取小捷以欺君上公肆大言然无成效幸而敌人自相残灭不然可为寒心今金主新立陛下嗣服之初所当讲聘睦邻修明政事训励士卒增理边要外与之和而不忘内修中原之民将见襁负而归王化矣上每为称善赐亲札曰卿世积忠孝姻联戚畹虽居忧于外乃心罔不在国家载阅奏篇备详忠说嗣有闻见无惮剡牍公又奏曰陛下训练甲兵申命将帅人人贾勇无如今日兵法曰倍兵不战盖众寡强弱既已不同纵有骁勇之兵忠义之将适足以饵虎口耳今彼势虽屈而事力尚强未可与之较胜负今日将帅非无忠勇之士恐为匹夫之勇乘危侥幸贪小利而忘大计使得一城一邑而旋得旋失既不能保持其民人又不能坚守其要害更相屠戮以激强敌不惟终无所益久致寇兵愿陛下审思利害而熟计之明诏诸将无妄出兵以蹈後患夫戎狄俗尚杀戮然两世俱遭篡弑矣报应之理各以类至是杀人岂有利哉艺祖不血刃而得天下尽除五代专杀之弊故四海之内归仁焉陛下若取法祖宗以仁政为先自可以鞭撻夷狄不在于战胜而後定也令彼杀我亦杀彼鬪我亦鬪诸将疲于奔命民困财竭而兵革不息意外之虞又有不可胜言者太上讲好息民二十余年今一旦欲以虚名招实祸献言之士徒以口打贼若将帅妄希功赏误国远图後虽孥戮之亦无及矣臣窃谓当修睦邻好以怀柔为务则安靖休息不妨固守边障遵养时晦上以奉两宫之欢下以安百姓之生仁及草木则中原不难图也隆兴元年冬外除召对内殿自符离失利之後南北相持和战未决公奏曰窃观注措施为可谓勤且劳矣且夫大功必立而未闻其效者岂非议论偏胜机事失宜未得其当耶中原之当复人皆知为不可缓恐须时至则可为耳今士多持以为进身之资揣摩上意所以施为之事未尝有成徒捐货财虚费民力有用兵之名无用兵之实是欲增重兵威而反弱国势岂不为邻人所侮哉至于招纳叛亡交结邻援此皆贾怨生事无益于国者又以江东守备未具及所用将帅未尽得人又奏臣闻金人数有文移取索俘掳人众是衅已开为兴师张本敌人犯边淮东必自清河淮西必自涡口两处当豫选梟将委之拒扞维扬六合和州当为声援须择有谋略三大将临之高邮僻在一隅三面阻水止可以处游兵水寨之属或可为间探不可专恃陆贄谓兵当居重以御轻盖谓以轻兵居前重兵居後为臂指之用淮上既固则大兵当屯于沿江如采石宣化镇江江池皆当严备又须选名将数人如前日有因事而罢者愿加收恤谕以恩意稍复官爵责之後效孰不愿尽死力仍须以威望素着怀忠善谋者使各护一路敌

知备御有方未必便敢轻犯若处之失宜反为所易故上兵伐谋不待战而定胜负也是日除户部侍郎兼枢密都承旨二年寓吏部侍郎上面谕前日劄子议论甚好朝臣皆不及时韩公仲通为尚书同对论及经费因奏所入有限兵食日增正恐此去或更有调发不易应办公奏曰臣顷在户部已见支用不足尝总一岁出入之数比较五年增损多寡为会计録上之後自度牒既行仅得八十万通约有四百余万内库取拨又不在此数而辛巳调兵为之一空今日匱乏实由于此今宿兵之久未见休息之期臣等所以夙夜惴恐未知救弊之道上云直须恢复中原了财赋须充足仲通奏曰恢复恐未可必且愿陛下经度目前所用公奏仲通之言甚是望陛下听纳上亦称善时左相汤公思退右相张公浚招户部长贰同到都堂右相问两淮兴兵用度钱粮公云未知合用多少右相云军中大费且备千万韩公欲退而议公云此事体大须与两丞相执政面议若非于经费内分拨必须飞泛措置经费既不自足飞泛必取于民民力困敝若无名横斂不惟不堪必致人言韩公云民间科斂甚难不知以何名取之惟有盐钞一事容试议之公曰盐事差可为然添起钞面则民食贵盐未必及千万之数改法亦重事若一切行之恐致中辍须先有定论然後有司可以奉行後再论盐事右相云不若卖度牒数万道寻有旨且给一万道然竟不施行时左相乞出公因对又奏今廷臣羣居窃议但以和战守三事为进身之资未尝权国之利害分朋植党牢不可破以惑上听万一事变奈何三说不必执一但度事力浅深知彼已当何如耳上极然之问今日当何如公即奏三代以至秦汉夷狄多得志于中国所谓王者不治夷狄非不治也以不治治之也因历陈秦皇汉武用兵之祸高帝和亲宣帝不用兵之利澶渊之盟为中国之福燕山之役致靖康之变又言太上讲解以致义安陛下欲成恢复之志此圣主之用心也然兵者凶器帝王之道以仁为本太祖灼见故以不杀为武应天顺人指顾而定中原破荡而四海独知有赵氏岂非仁恩之至乎非不知顺旨迎合可以保爵禄世受国恩蒙陛下非常之遇臣而不言谁当言者愿以符离之溃为戒早决国是为社稷至计上改容欣纳云卿论事甚详因赐卮酒且云卿可见汤思退谕朕旨令勿再请仍见张浚令早行退诣二相府宣谕右相遂行三月充淮东宣谕使王公之望使淮西公奏又详陈秦汉之事且言魏晋以下无术制夷狄以至于乱者多矣惟有唐制颉利得先後之序和吐蕃有终始之谋五代石晋之事尤不足言自完顔亮入寇于今四年天下不得休息杀伤不可胜纪疾疫者殆无虚日官爵不足以充赏钱穀不足以用内外急迫上下煎熬而议者不深维大计惟空言以永虚誉抵巇而要利权国何赖焉臣故历陈自古所以制夷狄者在德保人民者在仁愿躬行此道以致太平今两淮名曰备守守未必备名曰治兵兵未必精欲增兵则餉馈无所从出欲增备则人力有所不胜虽使敌不犯边但见日以自困今所以未长驱而来者盖完顔亮覆车未远虑挟弹者在後欲与臣下重兵恐有尾大不掉之患又河南困敝未易鳩集故委前日余兵付一元帅使自经理其意盖欲和耳故在今日和之为利南北均焉或以前日持用兵恢复之说者为勇为忠为刚以今日和议为懦为怯为弱此不明事机不计事实之甚也用兵而败岂不为懦连兵数战而无功岂不为怯与敌角逐而不能胜岂不为弱今断然行仁义之事修文德以来远人可不谓勇陈帝王之道以辅明主可不谓忠以柔克之可不谓刚又况古者兵交使在其间礼文之事安可遽絶前日敌帅九言四郡之地若使命得通庶几有可商榷未至遽行万一彼以重兵攻下四郡寇襄汉淮甸重相邀索和则退师不和则进兵不知其时议者何以处之昨小使之行自来无此体例为彼摧沮以自取辱盖缘事多轻发不思後图兹蒙选择俾宣德意于淮东及令经度事宜不敢隐默取误国之诛望察臣愚忠明诏大臣早定其议御笔付三省又奏向者经营山东得海州而终不能守中原之人非

不怀祖宗之德泽归陛下之仁圣然自出兵收复所至刳掠重扰其民既而又不能坚守为金人屠戮肝脑涂地生业荡散无余若此望箠食壶浆以迎王师难矣陈蔡顺昌壽春等处皆被此患如此招来适足以离人之心坚後日之敌也传闻道路或谓吴璘已失德顺秦州不守还保川口果尔则可见用兵无效虚费钱粮枉杀军士初无益也不徒无益正恐衅端再起兵连祸结养成大患虽有智者不能为陛下谋矣方今将帅兵强马壮未有如璘者力尚不敌况余人乎建康镇江之兵经王权李横败衄之後率皆伤残之余又且数易主帅士气未振江池襄汉之兵尤为乌合殿司一军为成敏破坏死损大半而东南诸郡起发之兵懦弱不堪披带缓急必致误事臣故曰和戎国之福也闻金人大军见屯虹县积粟粮秋冬必为边患两淮城邑半为丘墟虽欲坚守战备不具又无兵力以拒之或欲清野则是先自弃之万一彼留戍淮上俯视长江以久相困岂非危道哉虽欲与之连和彼必偃蹇邀索何以应之靖康议割三镇百官廷议举朝皆谓寸土不可与人後敌骑长驱事穷势迫则或言割地或言固守一时不能坚决金人径抵京师三镇平下遂成大变前日议臣相与太息而已真可为痛哭也臣所以堕肝胆吐情实愿陛下夷考前事永以为鉴早定和议遣使通诚以保国安民为计既和之後养勇以待时蓄积以富国待兵力既壮机会可乘惟陛下所欲为耳又奏专言用兵者尝谓敌人已弱可以恢复今止得一宿州而遽弃之则恢复之计复如何有用兵不胜侥幸行险轻躁出师大丧师徒者则必胜之说果如何有自献其说欲折服人使用敌国之礼者及从而遣之则辱命无所不至使至今和好未决则未见其折服使人之效也有称长安谈笑可取凤翔之虏如何可逃者今西师取一德顺尚不能有则未见其谈笑取长安之效也凡此数事皆可考验误国明甚不可掩愿听言则审其忠实立事则黜其浮议幸甚五月公至扬州颁诏劳赐诸军即申朝廷云虽未至楚泗淮上守备大略已见扬州城补葺破敝全无楼櫓何以容人借使有人须积粮为一城之计可也设敌人自天长径入瓜洲旷野约可容二十万则扬州岌然在後詎能坚守瓜洲两小城不过容五七千人岂足当其锋两处守御止如此泗州邈在淮北如敌兵渡淮不必取泗州远则光濠近则浮山一带皆可以济近日淮北贼过浮山寨却夺妇女驴马泗州恬然不知或敌人径渡及自清河口运粮而来泗州必先隔絶此不待图上灼然可见若自西路而入则海淮泗折北不支扬楚坐困前日刘錡之败是也今营屯备守皆严将士亦愿贾勇其如地势平旷分布难遍聚于一处则不能分守要害各守一方则临事难应大敌今刘宝一军分屯外在寨者不满二万自以为忧正以前出後空别无後继或谓轻兵在边重兵留屯江上则敌可直临大江小驻不去坐失两淮尤非策也至若军须调度粮馈犒赏金帛官爵计今日帑藏可充其用否今泗州姑少增兵以张声势移江阴一军亦可以安边民助军声尔若决欲守备如金汤之固前日盖尝大有所费矣皆徒劳而必不可恃若欲开拓以希大功万无一可故曰用兵难而守亦不易罢扬州牧马监塞楚州满浦闸增清河之戍兵积监本之赢贲皆公措置之大略也既至盱眙泗州宣诏犒师与守臣遍巡城上观览形势时准御笔云泗州可弃则弃今夏金人蓄銳秋必犯边彼以重兵得泗州即去则于我无利害不必与之争锋若守而不去则会重兵絶粮道是不战而胜也若彼得泗州而平其城郭而去则我亦平其城郭如淮阳军之类是也朕调发卿以前军屯楚州扼清河轻兵守泗王琪以殿司兵二万屯扬州郭振屯六合淮西自有王彦张守忠等敌兵虽衆何足忧止恐调发不及而来卿宜保江上朕便遣三衙兵至江上卿宜军往楚州别有所见即具奏来时审议官胡昉扬由义已回两月金人声言聚兵于近边有意连和而朝廷尚未通书遣使知扬州周淙提举茶盐吴巘谓彼计如此必有所待欲作本路帅臣一书鈎致彼帅之意然後审处其宜公为闻于朝谓两淮与

金人各为屯守之计彼既清野稍远其兵我亦宜休息少减屯戍其意各欲安静然彼此未絕关防欲休不得休欲静不得静则饷馈不减于前日战守相去能几何缘国是未有定论前尝有书往来今遂南北阻絕周淙等恐因循及秋敌情难料若彼趣和之意欲速则兴师之举必急兵一交锋所伤必大若待其无礼侵踰而後与之盟曷若先事通情可以欸其意因具以淙等书上之回至楚州又奏论前此屡通元帅书使命终不曾行议论久无果决所以致彼之疑必曰既不遣使又无礼币谓我通书止为欸兵之计持空言以相误也布萨忠义【按布萨旧作仆散今改後同】在边累年若成和解彼则无功今业已签军意欲一动力强则自取待其不可然後连和固执前谋以激功利今虽与之书彼必持此说沮格其议不若便遣信使直造燕山一则可见金主之意一则可伐布萨之谋仍调发诸军分屯江淮以备不虞或不纳我使纳而过有邀求则曲在彼而不在我兵以曲直为胜负不系强弱衆寡前日完顏亮之事正类此也又得御笔云比得陈敏奏泗州兵少欲增戍兵朕俟近秋调发设若七月敌人伺我不备冲突泗州轻则敌衆则避纵使得泗州终何能为卿当按兵持重图之六月归奏事纳劄子十二及六图一一指陈仍言守备疎略恐敌人入寇再对上问兵力险要具以实对改除吏部侍郎仍再令日近起发公又一再入奏乞早定和议及和议未决守备当严七月回至镇江被省劄住楚州以此体度应副北人登舟至江口得盱眙报北人未有来耗公具申朝廷谓来朝未可知若遽往而守待日久彼无来耗势必空回徒致衆疑俟报而动庶合事机又遣属官杨由义赴阙奏乞遣使发兵云北人来期皆是不定之辞未可信凭今又无耗敌情狡诈窃虑别生奸计其遣使发兵二事皆不可缓若只发兵以待其报则海泗二郡必先受兵中其阴谋若只遣使以俟其和则可否未决不可不虞惟当遣使与发兵并行使以尽其礼兵以防其变若使至北廷则坚决之语誓书一定然後抽回军马脱议论有变势必相侵则严兵固守与之力战是谓应兵臣虽不武实无所惧所以至于再三冒瀆天听者恐一失机会後必噬脐望速赐睿旨施行数日又申朝廷乞速遣使介以示信彼见使来必喜无有使行而兵来深入者兼使人见敌酋言必端的彼此可决使回即迁西城所有不过信宿事耳与其先堕其城不若速遣使介彼料吾重于遣使若使命既往信非空言其间设有小不相从至再至三议当定矣书中务存大体简严其文不必用前日来书中辨曲直之语卻恐引起不逊之言後复难处当少迁就之以济大议须兵与使同遣一则使敌人闻我有备和议早定二则安海内之心亦知吾本谋得和则和必不得已则战以和为先事以战备不虞如此则间言异议无从而入不必待其书来而後遣使书中或有见胁之语则不若先遣以释其疑以破其谋于计为得八月由义回自行在云到日得旨内引上云钱端礼所奏未是左相又面授劄子三十五道令亲纳宣谕劄子系奉圣旨令将海泗二州戍兵先次撤回便令奉行时丞相魏公杞为本司参议官是日招刘宝及参议官以下与由义会议公大言曰某屡于内殿奏和战之议未决且当固守边圉观敌情以待其成举动皆未可轻必不得已而为应兵曲不在我若与之和彼已求四郡之地前後虽已许之彼必候盟书约定而後退师今使命未遣虽敌帅通书本相未曾计割四郡若无故撤戍而回是弃之也彼乘虚据之自言收复不以为我之惠他时别有邀求或乘时侵軼孰任其责上不以某不肖付之一路事权一已去就至轻此事系天下休戚断之于心必不敢奉行须俟遣使或朝廷通书议定始可议之即具申奏力谕撤戍不便缘系北界回书未到之日承降指挥今北界回书已到本朝之书有续当遣使之文若所议之事北界书中悉已相从则目下撤戍便可交割或事有未定只撤戍占据之後余事难以商量纵欲备宣圣主示信之意他日亦难以口舌争也又虑未曾遣使交割撤戍之後敌帅据以要功自称收复又执卢仲贤之

语必愈费力兼两州撤戍合行事多难以申明待报恐致误事乞暂赴行在面奏曲折得旨边事未定未须求对别有事宜速具奏来遂上奏并牒北界官司检缴申未挟日金字牌至奉御笔览卿奏割欲遣使事朕初遣卿为宣谕意在肃军政明守备二者皆无所陈卿当与诸将严战守主和议非卿事也虽金人重兵屯于淮北亦须待许我议事方当遣使若因而侵犯则将帅之任安在哉撤戍可早关边无害不可迟疑即日便宜施行卿恐兵一动若彼不回书而发兵则当何如卿欲奏事边上未可关卿可频具奏来翌日又准金字牌魏杞令疾速赴行在奏事公亦乞罢遂请刘宝面付撤戍省割仍与议定候朝廷北界书先行然後抽兵庶敌人先得书知是以海泗与之不是白弃两郡日後免于邀索是日发下宰相与布萨书登时入递盱眙申齋书已过北界九月癸未朔得旨过淮上措置抚于军民以二州撤戍人民南奔也报差魏杞奉使康渚副之庚寅盱眙报撤戍人回辛卯招抚司申胡明兵马已回敌已薄海州而未入公申朝廷云自至淮上两具申禀又遣干官禀议乞发兵遣使二者兼之既而被旨撤戍即具奏合候使行议定之後正防奸诈寻蒙玺书切责已即恭依近北界射过榜文已相见欺未知厥後之意方今两州未受奉使未过正是危疑之时虽飭诸将严备窃恐兵力不加累乞王琦一军望早赐调发引疾求罢非敢规避诚恐死无益于国耳寻报金人有入寇之意盖遽得二州反以我无信具以闻望日敌骑已入泗州民有不及南渡者或刖其足海州归正人亦多被害两州积粮尚二十余万半为居民所焚余者皆为敌用壬寅得御笔已令王琪起发刘宝军马有分在他处者可尽抽回不可使兵分诏刘宝亦如之公奏敌人贪婪无厌既见撤戍遂启奸心虚张大言公肆迫胁陛下悯南北生灵俯从其议令大臣通书讲解撤戍以示大信彼宜应答如响而乃包藏异意自反其说此殆天亡之时也夫无事则深忧有事则不惧臣已谨戒边吏固守封疆不为祸先不可轻敌若取接使介则信义不可轻变或妄为阴谋别有窥伺臣当传檄六师奋励诸将坚壁以老其师持重以乘其敝絶其粮道挫其锐锋以逸待劳可以决胜甲辰王公之望除参知政事丁未报左相除都督戊申得省割除兵部尚书都督府参赞庚戌淮泗报金人侵庐州本州移治初顿遇守壽春金人系桥不敢御敌是夜南徙韩璉守庐谓敌已渡淮径入焦湖郡人奔迸致溺舟狼狈甚衆既而闻虚惊复还十月庚申公以督府既建宣谕司乞结局又申朝廷比得盱眙録到来书副本正缘先得四郡遂致猖獗如取俘掳等人决不可从事须斟酌不宜欲速若固守道理使知我不畏怯乃所以速之也癸亥差充大礼卤簿使十一月癸未探报敌骑已至濠梁盱眙守移治天长奉使楚州敌未渡淮而盱眙大火军民奔走一路震动因取所遗钱粮自燕馆郡治民间屋宇尽移泗州魏胜力拒于清河死之进据楚州初金人本不为渡淮计而一旦至此岂无自哉丙戌公赴阙既对上曰前後廷臣议论独卿不变兼户部尚书乙未上问欲遣杨由义持敌帅书而辞行甚力谁可遣者公奏臣闻王拚者虽不识其人前副卢仲贤行知事之详又亦密细自愿一行更望召见察其人而用之上欣纳数日遂行丁酉下诏亲征戊戌上宣谕卿议论实忠于国欲用卿为执政公控辞甚力辛丑除端明殿学士签书枢密院事赐同进士出身甲辰兼权参知政事时边报日至都下官民多谋移徙或传德壽宫亦有诸宫烧香之议人心愈摇太上宣问近事宜公奏金人必和但民间惊疑似闻陛下亦有所备所以日有妄传臣不敢少误陛下此岂小事愿陛下不可轻动太上开纳自是始定去者复还或议峻其法禁公曰朝廷镇静持重人当自宁岂可家至户晓也闰十二月乙卯得旨令执政等进呈文字以左丞相陈公康伯疾也公奏适见付出王之望奏金左副元帅见在滁州恐王拚径往都元帅处则于左副元帅情意不通乞将书本别写发往左副元帅处臣窃详之望尝建三策欲放彼处人至淮用兵掩击今既过淮之望又在江上若

见得可击必已击之久矣而乞再通左副元帅书可见之望亲临所见必不敢妄言以背前说乃所以尽忠望从而行之乙亥王拊到阙先是上尝宣问敌情如何有需索否枢密虞允文对必有之公曰若然是不欲和若只如卢仲贤约定方可议耳拊至书未启封上复问允文奏定有需索恐难应副公独以为今既驻兵不动又连来通书皆无不逊之言欲和本出彼意若必欲和定无意外或果有难应不足从也及见书止是欲世称侄国书用名後用再拜皆旧书元定项目内事余无他请上曰今既别无所需可如其式报之虞曰何必一如他说公曰而今正以未能制彼死命苟力可制又岂以一言半辞为轻重但权其事机而已虞曰且如和尚原最系川蜀襟喉岂可复与上曰他要辛巳年以前旧界为定若于内不与和定不成公奏固知险要我若求之而得彼却以求何以应之况与向来之和不同虞曰有何不同公曰今既以皇帝兼称则名位已正虽曰称侄是敌国与向日殊不同又减十万岁币此三事最大我执之已坚彼不能易此外若更力争是求衅也谋国当思远图姑与之和则我得休息以修内治若为忿兵未见其可恐欲为治兵亲征之计臣乞先罢专任能者争辩至漏下数刻方定虞已承命明日又奏王拊行只理会乞令奏使朝陵寝一事上曰不若且休待事定了别议公又入奏第一次遣使莫若安静庶几他日有事却可与言拊遂行十二月辛卯除参知政事兼权知枢密院事先是已得差遣人限五日出门奏除其令论馆职不当限员又论人才当须自外召三五人面论然後审择而用上皆从之奉使过界北军已回甲午降诏和议已定丙午上问改元事隆兴故叛臣赵谂尝用虞公以为载籍所不载自不必改公曰改元大典也签书王刚中奏事留身上以为问刚中奏此事具见曾布日录不当复用钱端礼欲改虞允文有不同之论臣以为当改御笔欲用乾统西北虏曾用别拟四号以进遂改乾道元年正月辛亥朔上亲祀圜丘公为礼仪使率百僚班贺于端诚殿庚申充德寿宫使丁卯公乞出不许丁丑殿中侍御史唐尧封论公以帝姻不可任执政公即再乞出尧封除太常少卿戊寅又申前请上云朕已宣谕尧封朕以公选用才即非?意公奏曰既移台谏愈不自安上曰决难请去己卯降诏不允不得再有陈请二月庚辰朔祥曦殿奏事虞公奏云钱端礼辅佐陛下方成和议恐未可去上曰和议出于朕意参政端不可去王公亦奏大臣进退所系非轻公又奏乞从台谏之言间陈累数百言退复入文字辛巳御笔朕念即位以来股肱鲜克胜任倘得其人不以私义废虽议者或有不容而曾无眚愆见于论疏抗章屡上丐去甚力方悯风俗之极弊嫉浮言之易兴卿宜竭节推诚亟安厥位毋以小嫌拂朕意也次诣德寿宫太上亦再三谕不当去位又云只如许大一件事非卿谁能了得丁酉寒食公奏欲上先世诸王冢上再三宣问因历叙家世上曰卿以才德选不缘私亲是日约族党具集表忠观焚黄两宫寿圣殿并赐酒果以为荣丞相陈公已病公为援典故以长子伟节为直秘阁次子安节赐同进士出身既薨于位以少师大观文致仕公奏逆亮内寇康伯以重德镇浮陛下践阼康伯以大忠翊戴宜优赠典遂赠太师已而王刚中薨公亦称其竭忠辅治引詹大方故事乞赠七官外更加赠一职以示优礼所以周旋二公之後备至公既行相事兼权提举玉牒监修国史八月乙酉诏立邓王为皇太子壬辰公入奏避亲嫌甲午除资政殿大学士在京宫观仍奉朝请踰月兼侍读公在经筵论事不少贬而勇退之志益坚七上章求外祠始改提举临安府洞霄宫辞日宣坐赐茶褒谕尤渥四年秋起知宁国府仍奏事而行公治尚简静幕府省文书蠲畸零税八万余缗一方为之鼓舞建炎初剧寇攻城故参政庄简李公光力却之奏为立庙境内有麻姑山地旷多藏奸盗公奏立砦仍置官徼巡百废具举不加鞭笞而租税如期郡以大治虽锄治奸猾终以恕行每日治道去太甚者尔六年四月丐祠六月知绍兴府力辞而归九年申前命辞不获免适修荒政不憚勤劳民

赖以安又劝种麦官与之种明年麦大熟收数倍决滞讼理经费吏民以为神明两郡皆为之修建贡闾且葺公宇废壤者率谈笑而办最闻除观文殿学士公在越凡有建明直达上前请无不从或以御笔批行忌者恐再用因以飞语中公既以祠归竟降资政殿学士以罢时淳熙二年四月也三年太上皇庆寿公以绍兴从臣特转通奉大夫六月再提举洞霄宫四年三月复资政殿大学士八月属疾请致其事复观文殿学士壬辰薨于正寝娶李氏中奉大夫直显谟阁庄之女赠文安郡夫人再娶高氏封郛国夫人先公一年薨男当故奉议郎女一人为主文太子妃孙象祖承议郎知处州军州事女三人修职郎监行在车辂院吴修年迪功郎新福州侯官县主簿王铎承务郎知常德府桃源县许軫其壻也曾孙二人曰云曰泽并登仕郎女一人尚幼公生而不羣居重庆下承颜干蛊曲尽孝道雍国尤所鍾爱亲教以诗书雍国父之间质肃公介之幼子尝仕馆阁以元佑党废娶晁氏济北先生补之实为羣从公承平时生长京师富贵中了无膏粱之习唐氏晁氏诸老尚无恙公从容其间因得以讲论文诣商?古今又先世自文僖公以来文献相继故公曰自少多识前言往行熟于典章由熙宁以至政宣间事世所不及知者历历能言之谓李德裕不应进士科以至宰相非力学乌能至是耽玩经史未尝一日去手少时尝手节十七史甚备晚又着史提要行于世尤通于左氏西汉率多成诵幼好为诗伯祖内相文肃公勰字穆父与苏文忠公游往来书尺唱和甚多公尤刻意慕效词翰得其遗风清癯如不胜衣而眸子了然如神仙中人尚气节功名虽在下位时闻国有大事必默为经画揣成败多中尝称子房貌若妇人乃能仇秦而兴汉盖自况也为政饰以儒雅不专事文法望之俨然即之也温寮史稟自使尽其词一言剖决是非立判公家之利知无不为不顾一己之私意所不欲迫之终不能动靖康用兵公亲见和战不决而致大患故力陈和议始终不变公规画甚远亦非苟于就和者但以内审国用外察兵力少休王师方可支吾以图大计崇深果决洞见敌情呜呼辛巳敌人之变无可奈何若甲申岁公揣事势谓金人弑亮之日以无名兴师骚动百姓为辞今新造之国又负篡弑之名必不肯效尤以取祸但欲偃兵以靖其国徒张为虚声实主于和故勤勤恳恳欲乞遣使以通好出兵以示备缓弃海泗以为惠至于执诏书而未出以当之使尽行公言则敌兵不动不至淮楚再遭蹂躪之苦公之言亦不为不用而用之颇失其机西则庐濠先遁东则刘宝不援魏胜以致败死岂不痛哉是时士气愈索几不可支而敌人似进而退似攻而缓公益探其欲和而已之说为是故王拚之行谕之曰此行有三一曰正位号二曰定名分三曰减岁币往往人不以为然谓如此何以郤敌至有面诘公者公笑曰事成是非乃定姑少待之拚回既皆如约金果退师人始服公能断大事自此南北晏然以至于今谁之力也公始至台吕忠穆公颐浩一见赏叹以公辅期之又为参政席公益所汲引中书舍人潘公良贵元枢贺公充中皆相友善尤有知人之监丞相史公浩魏公杞知院王公纶或交于布衣或取于宾僚推挽名士至辅弼禁从卿监台郎者甚衆一介之士苟所许可无不委曲荐达尝曰韩安国自谓所举皆天下士贤于己者诚窃慕之士之贤者恨未尽知耳好贤乐善如恐不及尝奏事德寿太上赏雪赐坐以玉盃宣劝不以名呼隆眷如此因问及闲居自号乃大书松窗以赐上亦赐忠实二字两朝宸翰光动一时公虽家居而恩数视政府其孙裒所着诗文奏议若干卷号松窗集藏于家初康公贤穆葬天台之护国山公以某年某月甲子从葬遂为台人公初归寓瑞严僧舍年余始卜筑于城之东北隅有林泉之胜立精舍繙经其中暇日幅巾野服与方外之士徜徉笑傲觴咏琴奕甚自适也及遇圆悟禅师?心内典超然自得视轩冕如无故出处死生之际絶人远甚得疾即屏去医药曰生则有死亦事之常大期将至待之而已疾革家人捧药泣告公曰汝曹岂解此大丈夫何可幸觐万一浮

屠氏或勉之亦笑不答第捐金分施以谢之前一日肩輿登所居山园瞻谒释道像如平时归即瞑目安坐至终神色自若岂苟然哉公薨之後象祖以书来曰先大父居官立朝之大节公知之最详愿为纪述将以告于太史氏钥窃惟参政德望勲业在家有牒在国有史搢绅知之士民诵之岂衰朽骫骳之辞所能发扬观公自隆兴以来与人主论天下事见于奏对者多矣皆本于忠实合于人情是非有考于前而所成败有验于後其先见如蓍龟之明其定力如金石之坚至如同太上烧香之行抑都人迁避之扰皆所目击而心服者载念钥自幼识公于三衢首蒙赏爱来倅乡郡钥初窃第以归及尉江山公方主漕事即收置门下公之守婺钥适丞金华知遇益深护慈宁之丧辟以为属後入为六院正隶版曹烦使必以见属宣谕之行亦备数幕下进参大政力荐于上前以钥之不肖叨寘从列实基于此四十余年所以挈提成就之者至矣而钥既无所効尺寸于公者矧公之门名人才士凋谢无几何敢以固陋辞谨摭其大者书之不敢隐不敢谀卒状如右

攻媿集卷九十二

<集部,别集类,南宋建炎至德佑,攻媿集>

卷九十三

钦定四库全书

攻媿集卷九十三

宋 楼钥 撰

神道碑

纯诚厚德元老之碑【奉敕撰 标题一作太师保寧军节度使致仕魏国公諡文惠追封会稽郡王史公神道碑据篇中亲洒宸翰云云则此为当日原题】

高宗皇帝以孝宗君德日就将属以社稷妙选天下学行端粹之士以辅导之绍兴二十有九年太师会稽郡王史浩以国子博士奏事殿中高宗一见契合属目送之谕大臣曰浩今日有用之才也除秘书省秘书郎粤五日兼普安郡王府教授受知高宗被遇孝宗实昉于此明年孝宗封建王迁司封员外郎兼直讲又明年为宗正少卿三十二年五月立皇太子擢起居郎兼左庶子六月孝宗受内禅迁中书舍人兼侍读十日为翰林学士知制诰八月参知政事明年正月拜尚书右仆射同中书门下平章事兼枢密使未几罢政再典巨藩淳熙四年春召为侍读五年三月复拜右丞相十一月罢仍侍经筵八年告归得请一再召见恩赉采渥每以老先生呼之孝宗移御重华宫以宴处清闲思见旧学太上皇为颁诏谕赐御札明年遣干办御药院杨舜卿抚问趣行命守臣以礼津发既入覲孝宗顾公曰卿辅朕初潜亲遇朕建朱邸陞储宫登大宝两居相位三入经帙逮今三十余年君臣相得殆非他人比也五年四月五日公薨于里第之正寝讣闻孝宗上皇震悼赙赠有加有旨以公身居极品又为壽皇潜藩旧学赠恤之典宜从优异可特追封自余赙葬恩数并如陈康伯例今皇帝登极赐諡文惠亲洒宸翰书纯诚厚德元老之碑以赐焉且命臣钥为之文臣以末学待罪北门乃得对扬明命敷述盛美以诏不朽臣虽甚陋何敢辞窃伏思自古君臣以遇合为难而笃眷不替善始以终殆千载而不一遇也方孝宗以艺祖统系之远承高庙付托之重时公以所学纠正赞弼自其缉熙光明推而至于事亲以孝事天以诚兵不轻用刑不妄施人才盛多夷夏乂肃孝宗继志述事之功承顏顺色之爱刑于四海光于万世而又惠顾帝师日笃日亲胙我太师福庆流衍光大显休追媿典谟孝宗奄弃慈极公先六旬以遗表闻呜呼岂偶然哉公讳浩字直翁世为庆元之鄞人曾祖简祖诏父师仲俱赠太师冀国公曾祖妣叶氏祖妣徐氏妣洪氏俱赠冀国夫人曾祖蚤卒母叶夫人有遗腹指天自誓愿得子以续史氏之祧是生公祖教之甚严以八行荐于朝积德垂佑寢大其家仲子才绍兴二十三年为签书枢密院事公又继登揆路衣冠盛事莫尚焉公性颖异记诵絶人少孤自力于学贯穿经史理致超诣措词持论出人意表年四十始登进士科授左迪功郎绍兴府余姚县尉寻为温州州学教授郡守张九成有重名待以国士诸生推崇之以中书舍人吴秉信荐除太学正迁博士改宣教郎自此六年以至相位近世未有也公智虑深长临机辄断平居若不胜衣而剴裁勇决毅然不可回推究经旨多先儒所未发引经处事动中要领完顏亮南牧边廷用兵建王抗疏请为前驱誓不与贼俱生公方以疾

移告闻之亟往问孰为大王计误矣国步方艰父子岂可须臾离使唐肃宗能随明皇幸蜀安得有灵武事建王大悔立俾公草奏请扈蹕以供子职辞意恳到高宗闻议出于公叹曰真王府官也庙堂方议以建王督师由是不果遂从视师之行而内禅之意决矣高宗将过德壽宫公议嗣皇当乘马扶辇高宗谕公曰执轡前导不足为法公对曰臣于肃宗何取父行而子随万世不易之道也孝宗竟用公议高宗数遣使邀还出皇城门而止既参大政召宴禁中公奏臣顷在翰苑虽暮夜宣召可也今居政地非有中使不敢前若恃恩奔命非大臣体孝宗深然之尝问当今施設何先公曰莫加保边境收人才前言辛次膺张焘人望所属即日召还又荐周葵任古胡铨张戒王十朋等以次收用公平时咨问天下人物有所闻密疏其实且识言者録为一编皆于此乎取又得金安节王大宝周必大等三十五人各书所长以闻并为时用尝对德壽宫高宗曰皇帝诚孝卿辅导之效居多今又得卿佐之朕心亦安又曰卿为皇帝亲臣凡有规正不可回忌赖卿悉力调护公既推谢次日又因奏事言之上封事者多乞减任子公请岁一试且损其额试者必习所业以应诏既不伤恩足以激励孝宗顾左相陈康伯议合公因奏凡有所陈皆先与丞相议而後言自是臣僚奏请更改政令必先以示公然後施行尝因諫击鞠事张焘共政退而曰相公爱君至矣焘又尝语人曰参政今之贤辅不可妄议向来柄臣得君多以威严脇人史则不然事多迎刃而解志于寬厚上前别白是非甚明宰相器也康伯乞罢政孝宗批问恩礼已尽当与何职意盖属公也公即奏康伯前朝老臣不可不留以为重若其请未已必得德壽圣谕可安其意是日高宗赐以御笔康伯乃安职寻密诏公曰朕粗勤庶政然军务民事未得其要若矿金璞玉方以卿为良工其毋怠焉公既相益思所以报上者首言前宰相赵鼎参政李光之无罪大将岳飞之久冤宜复其官爵録其子孙凡坐废者次第昭雪悉从之时外建都督府归正人及谍者日衆公虽忧之而深察其能否故拔皇甫倬于境外官胡昉于书生皆赖其用有滕忠信等八人还自山东自言已结集万五千人可为内应公诘问再三皆无其实语塞汗下而退初已借合门宣赞舍人遂令赴督府张浚亦以其无证仅补承信郎而已燕人刘蘊古该通古今谈辩如流一日濠州奏募到北方游手仅万人欲以营田蘊古力请以抗敌时欲许之公独谓此必奸人姑欲藉以反其国耳因诘之曰樊哙欲以十万横行匈奴季布犹以为可斩君得万人何以成功蘊古错愕不知所对曰此皆无家必不为朝廷留不如乘其未定而用之公曰其家不来宜无固志不知君家何在蘊古曰老幼皆在幽燕自知失言战灼久之後因刺探事宜私遣仆归燕仆以告遂伏诛吴璘以兵取德顺捷至方议行赏公奏诸葛亮出师必攻陈仓及郿即今之凤翔得之则可窥长安高祖出汉中正此道也姜维舍此而多出陇西狄道临洮得之无益今乃蹈维覆辙臣恐遂失蜀矣宜勉谕其归登命公即选德殿庠作诏令彻戎班师专保蜀口以俟大举斯须而就词旨明畅孝宗閱之曰他人必不能道朕意奇才也既而吴拱王彦奏敌已扼璘归路方募人往报璘亦势迫间道以归袁孚罢右正言公曰初政而遽去諫官何耶孝宗曰妄言德壽宫有私酤公曰陛下事亲可谓曲尽然宫中左右皆閹官有何知识若非言路时以正论折其萌则将有所甚此者上怒少霁又奏諫官无故而罢天下必以为疑若暴其罪恐启两宫之间愿少须之使其引去寻除直秘阁知温州自是益无纤芥之隙张浚屡奏欲取山东公曰宿师于外守备先虚我能出兵山东以牵制川陕彼独不知警动两淮荆襄以解山东之急耶惟当固守要害为不可胜之计必俟两淮无敌之虑然後可前若乃顺诸将之鋭气收无用之空城寇去则论赏于朝寇至则仅保山寨顾何益乎继而大将李显忠邵宏渊奏乞进兵公又奏二将辄乞战岂督府之命令不行耶浚继请入覲乞即日降诏幸建康孝宗以问公公陈三说谓若下诏亲征则无故招致敌

兵寇边何以应之若巡边犒师则德壽去年一出州县供亿重费之外朝廷自用缗钱千四百万今何以继若曰移蹕欲奉德壽以行则未有行宫若陛下自行万一敌人有一骑冲突则都城骚动何以处之孝宗感悟曰都督先往临边俟有功绪朕亦不憚一行浚言陛下当以马上成功岂可怀安以失事机公执不可退又以诘公公曰帝王之兵当出万全岂可尝试而图侥幸主上承二百年基业之托汉高祖起于亭长败亡之余乌可比也寻复论辩于殿上浚曰中原久陷今不取豪杰必起而收之公曰中原决无豪杰若有之何不起而亡金浚曰彼民间无寸铁不能自起待我兵至而为内应公曰胜广能以鉏耰棘矜亡秦彼必待我兵至非豪杰矣若有豪杰而不能起则是彼犹有法制维持之未可以遽取也今不审思将貽後悔又上疏力諫曰靖康之祸臣子孰不痛心疾首思欲喋血北廷以雪大耻恭想宸衷寢膳不忘然迺安则可以服远若大臣未附百姓不信而遽为此举安保其必胜浚老臣虑宜及此而溺于幕下新进之谋眩于北人诳惑之语是以有请耳德壽岂无报敌之心时张韩刘岳各拥大兵皆西北勇士燕蓟良马犹不能进今欲以显忠之轻率宏渊之寡谋而取全胜可乎惟当练士卒备器械固边圉蓄财赋宽民力十年而後用之则进有辟国复讐之功退无劳师费财之患此臣区区素志实天下之至计也督府乏用欲取之民公曰未施德于民遽重征之恐外贼未必至民贫将自为盗康伯与公相顾同奏曰必欲取于民臣等皆当丐退上为之给虚告五百道以庚费浚又奏归正人当优待之公以为不可浚康伯俱曰彼以善心至安可拒乎公又两入奏其一曰敌日为奸谋以挠我纵流民以困我而沿边方以招徕为功数年之後蚕食既多国用益乏彼将反有怨悔之心可不远虑乎固不可絕其内向之意其有至者当谕之使安土以俟恢复彼且无所归怨而敌亦知国之有人岂应先为自蹙之计其二曰弃实而务名舍近而谋远见利而忘害愿弃名取实以集大勲先近後远以安边鄙见利思害以杜乱萌言甚切至又与浚言平时愿执鞭而不可得幸同事任而数日议论不同不惟为社稷生灵计亦为相公计相公养成名望一旦失利岂不有损威重浚曰公言良是但浚老矣公曰杜预辈有平吴之功而晋归功于羊祜以祜立规模而预竟其功相公若先立规模後使人藉是有成亦相公之功也何必身自为之浚因内引奏曰史浩意不可回恐失机会乞出英断既而省中忽得宏渊出兵知禀状始知不由三省径檄诸将公语康伯曰吾属俱兼右府而出兵不得预闻则焉用相哉由是求去不已孝宗曰何苦至是公对曰道德元老无如陈康伯忠义慷慨无如张浚臣与之议论俱不合诸将出兵而臣不知近习积憾而臣不去尚何待乎因又言康伯欲纳归正人臣恐他日必为陛下子孙之忧浚銳意用兵若一失之後恐陛下终不得复望中原臣即日去国遂远清光然惓惓之忠不容緘默言讫拜辞而退遂以观文殿大学士知绍兴府公力辞提举临安府洞霄宫以归未及月而宿州失利丧士马甚衆军资器械不可计人心沮丧上降诏罪已而浚亦自劾去位矣初浚措置万弩营及他所建请公应之如响或问之公曰事力未备故止其进兵若边防扞御安可不从公既去其所奏请多不以时报浚亦悔之呜呼公本欲修政固圉裕民练兵虽不求近功而规模甚远议者不察以为独无意于事功惟知之者乃信其非苟为异也公卜居东湖之麓徜徉山水胜絶之地以奉亲欢岁时贺表外不以一字至行在所後除四川制置使知成都府以亲老辞月余改知绍兴府两浙东路安抚使孝宗见公首曰卿前所奏陈如龟兆数计无一不验从容赐坐访以治道公以求治太速听言太杂为对至镇为民兴利除害不可缕举越人至今德之进检校少傅领保宁军节度使会洪夫人属疾思归力丐祠不允乃许谒告迎侍未几罹内艰公性至孝平日奉母甚周孝宗素知之在王府时得上方珍饌必以分遗登位之後间问动静以正旦赐酒肴使为壽特于洪夫人生朝拜公为相又

尝以御笔径赐之曰丞相今日正谢赐酒果为太夫人之庆其归自帅阃旌旄行前公拥版舆于後人子之荣极矣至是悲毁骨立忍哀举葬纤悉周备世所难及前即吉数日除知福州兼福建路安抚使避魏王同镇改崇信军节度入对赐宴内庭劳问加优後三日除开府仪同三司公自言臣何功德叨此眷宠孝宗指心而言曰于此甚有功朕学力坚固心术明正皆卿之力也初过越老穉迎拜拥道有垂泣者时方滋为帅谓公曰公去此时有缗钱十六万米斛四万漕司取充羨余遂为岁例奈何公奏除之至闽甌山路七百余里葬旅櫟以千万计辟官舍以益贡闾每事立规四方传以为式建劔四州多不举子臧获则取于福与漳泉间公置田为庄贫妇孕育月有所给既使生齿益繁又免诱略之害淳熙元年秋丐祠提举洞霄宫後三年孝宗问执政久不见史浩无他否遂除少保观文殿大学士充醴泉观使兼侍读颇闻有尼之者至两降亲批三遣金字牌又取尚书省移文封以付公不得已而後起抵都城闻辅臣谪英州及见奏曰陛下未尝以大臣投岭南实国家忠厚之意此门恐不可开孝宗唯唯他日语近臣曰史浩厚德人盖深知前日事也进读三朝宝训及真宗正说事关治体及当法祖宗者必委曲援引开广上心尝宴澄碧殿酒数行步至清澈观机泉宣劝无算至二鼓孝宗携手登桥又赐三爵命宿玉堂夜参半引双莲烛以送且曰此游不可无纪是夕公进古诗三十韵孝宗和答之引陈襄故事荐石斗文等五人皆赴阙既再相孝宗曰自叶衡罢虚席以待丞相久矣与执政入谢德壽宫高宗曰卿再入相天下之幸也公以士夫留滞旅寓者凡八百人各随其分处之为之一清初相时蜀帅以缗钱献公谓宜以俭德风天下请以赐蜀郡复二税是年绍兴所献复倍此孝宗曰郤之必有散失姑令封椿如何公对曰郡方困于和买丁钱愿以代输其半孝宗欣然从之是年金历以八月晦为九月朔或言会庆节使人将先一日入境请治历官公曰天道难测未知孰是而遽治历官是自彰其失也但当谕接伴使若使人渡江则当语以晦朔尚可议皇帝生辰则不可改先一日乃是艺祖忌後若欲行庆礼当如旧期孝宗以为当後皆如公之言车驾既幸太学公因请幸秘书省三衙皆与坐乃奏合门舍人方以比馆职亦当列于西庑崇儒矫弊皆有深意孝宗谓公视文武如一为得大体十月诸军以多阙额又有逃亡请得自招捕许之而并缘强取被掠者或至断指以求免都下汹汹公飞奏尽释所捕又禽为首者送棘寺宣宰辅及枢密都承旨议罪欲取兵民各一人梟首以徇公谓未得其平兵士可斩百姓陆庆童当坐流罪上怒不以为然公曰陛下恐军人有语而百姓为可欺耶岂不闻等死死国可乎此岂是军人语上愈怒曰是比朕为秦二世也同列相顾失色公徐进曰如时日害丧予及汝偕亡岂二世事闻者缩颈而公不为动议罪既如初遂日求去位除少傅保宁军节度使醴泉观使兼侍读後有言庆童之冤者孝宗曰史浩盖尝力争坐此求去至今悔之赐第城中出御制长春花诗酬和至再以示眷留之意又荐薛叔似而下十五人叔似召用余以次收擢佑圣观故建邸也孝宗尝自北宫临幸语曰去此十七年今得与卿为丰沛故人之饮可谓盛事甘盘无此乐也公屡求归时陈俊卿已奉祠八年二月除判建康府公奏俊卿年未及七十而去臣以七十有六而往岂不媿见吏民耶孝宗尝自拟馆职策极言取士用人之弊大要谓国朝过于忠厚以示公公读毕奏曰太祖不忍杀一不辜以得天下累朝仁德至仁宗而大备夫忠厚岂有过耶乞改曰一于忠厚孝宗曰非卿不能为此言五月始许归除少师留至八月陛辞犹进八事十年请老除太保致仕公尝历永卫鲁三国公于是进封于魏仍如曾公亮例入谢明年先降旨候至国门百官郊迎见毕对御赐宴用文彦博故事道中具辞再三奉俞音乃絕江公晚治第西湖之左裒两朝所赐御书建阁以奉之因奏闻孝宗书明良庆会之阁以赐公谢不敢当孝宗曰古人愿为良臣卿辅朕之久日闻忠言深悟朕心尚何

慊乎敕後苑造扁榜命中使驰赐之上尝以旧学二字即政事堂赐公同列咸曰自古际遇莫盛于此请鑱诸石为省中荣观公又谢不敢既归以名其堂岁遇诞日锡以金器者十四年年八十又加器宝两宫使命相望高宗再举庆典诏公随班上壽进太傅赐玉带金鱼踰月乃东上皇御极进太师降诏求言首及故老公上封事数千言皆当世要务重华之召引辞甚切孝宗诰曰今与卿皆闲人当衣褐见何必求免耶诏乘肩輿入隔门仍命孙定之扶掖特改京官朝退次诣重华孝宗从容谓公曰与卿复得相见既无嫌疑足可为度暑计毋亟言归因奏陛下躬行三年之丧复见尧舜三代之盛孝宗曰此皆卿平昔所以语朕者今日得以行之正如滕文公尽哀戚之情而吊者大悦实自然友反命之一言盖公平时专以忠孝二者发明圣学谓父子天伦虽自有至性亦宜先意承志曲尽诚心後又屡奏欲报莫大之恩惟应尊事不倦使慈孝两尽为万古父子之懿范垂之子孙永永无极故孝宗不忘此言再对奏陛下召臣非徒使沾被宠光亦恐有一得之愚少裨继明之治敢为四说以献曰立天下之大本平天下之隐难收天下之人望伸天下之直气谓教皇子备夷狄举人才受尽言也太上垂听慰獎再三既归之次年长子弥大以疾不起公起居寢衰後感疾危甚呼诸子及孙戒曰吾受国厚恩欲报无所汝等惟当世竭忠节以图尺寸命左右取手藁遗表曰吾且死其以是进遂瞑享年八十有九娶贝氏追封魏国夫人先三十九年卒子四人弥大故通奉大夫充敷文阁待制新知宁国军府事赠银青光禄大夫弥正朝奉大夫复直秘阁主管华州云台观弥远朝奉郎主管建宁府武夷山冲佑观弥坚通直郎两浙路转运司主管文字弥大弥远皆登进士第弥正弥坚亦累举春官人以是服公之教也女五人长适朝请郎新权发遣永州军州事陆杞次适从事郎充江淮荆浙福建广南路都大提点坑冶铸钱司检踏官丰谦次适朝请郎前通判湖州军州事李友直次适迪功郎新荆湖北路提举茶盐司干办公事夏鼎次适承议郎签书宁海军节度判官厅公事王櫛孙十二人宗之通直郎改添差沿海制置司干办公事宜之宣教郎知临安府富阳县丞定之宣议郎新知婺州兰溪县守之承事郎前监平江府粮料院安之迪功郎温州瑞安县主簿实之修职郎监绍兴府和旨酒库宣之宪之寓之寬之密之宾之孙女十五人长适奉议郎新知建康府上元县方叔恭次适通直郎新知名州鄞县丞吴朴次适宣教郎前知湖州武康县丞秦钜次适宣义郎新监临安府仁和县临平镇税胡纲次适修职郎新秀州华亭县支盐官王友元余未行曾孙八人唐卿虞卿文卿夏卿商卿周卿汉卿显卿曾孙女十人皆幼以其年十二月庚申葬公于鄞县翔凤乡吉祥安乐山合魏国之兆公盛德絶人备福无比盖尝窃窥其大者性本至孝有不可解于心故为士时惟见其事亲事长笃朋友乡党之义及出而事君则尽其忠谋国则竭其虑接物则极其寬临事则务于恕匹夫孺子不失其懽心而义有不可不以死生祸福少变率自孝道发之君臣道合昭然无间盖近古人主躬行通丧自孝宗始而公又以此事之其能不胶漆而固岂无所自哉孝宗尝谓公曰卿所荐用人其间有负卿者亦知之乎公顿首曰此臣所以报陛下也臣所荐未尝以语人亦不受其私谢故人人自以为得上意荐贤者臣之责用贤者君之恩也尝拟知湖州陈之茂进职知平江孝宗知之茂尝毁公曰卿岂以德报怨耶对曰臣不知有怨若以为怨而以德报之是有心也莫济作詹事王十朋行状诋毁尤甚公荐济掌内制孝宗曰济非议卿者乎公曰臣不敢以私害公遂除中书舍人兼直学士院待之如初盖公之寬厚类此人虽有不悅然无物可以忤意古人所谓澄之不清淆之不浊雷霆破柱而神色不动者犹未足道也公既极贵处乡曲一如布衣时每以事亲为未足又推本史氏积德累行之原自为之文时节诵于家庙上以报祖考之施下以励子孙之习其用意笃矣事物之来不问剧易虽至难甚冗或连日夜废寢食

而精神酬应益有余裕考其克勤小物凡事精密园馆器用动出新意其在富贵中望之如神人而谦虚退然若无与者野服萧散皆不足以累其中此如万斛之舟容物有余不见其多而经济之业则用之犹未尽也而又居权之日少安佚之日长故举世无怨无恶惟以钜公大度推之生荣死哀无可憾者公属文多立就虽老表章犹自为之有文集五十卷外集二十卷论语口义尚书讲义周礼天官地官讲义传于世余皆公之细也不胜书铭曰

於皇高宗天开中兴巩宋基业思永继承艺祖七世有孙神武是用付托纘宋之绪高宗曰嘻帝命不易我仪图之谨厥辅翼孝宗武文实惟承之雍雍太师实维成之帝咨臣弼一本于学缉熙光明德修罔觉两辅予政毋轻黜兵毋过取民毋滥用刑言如蓍龟靡有差忒旁招多士宁我王国天地清夷中外晏然继志述事二十八年两宫燕娱天壽平格三奉玉卮四登宝册召对德壽嘉帝之孝又曰太师辅翼之效帝谓圣父教诲之功臣亦归美媚于高宗天用昌之蓍艾康宁帝用休之福祿宠荣孝宗乘云太师骑箕君臣始终虽恨莫追有赫景命汤孙是纂顾瞻遗烈于以追远锡之篆碑孝宗有臣报我天子诏尔後人

忠文耆德之碑【奉敕撰按此标题一本与後卷自撰者同在当日原题应只此六字】

嘉泰四年十月庚寅朔故左丞相少傅观文殿大学士益国周公年七十有九薨于吉州之里第十二月丙申葬于庐陵县斗冈之原至嘉定元年公之子纶告于朝曰先臣备位首相既葬而隧碑未立敢泣以请天子曰嘻此四朝之宗臣也諡以文忠御书忠文耆德之碑以赐且诏臣钥为之文臣钥不佞荷文忠公知獎之深屏居四明先已撰公隧道之碑矣圣恩起于告老之余待罪翰苑欲引前碑以辞纶又曰昔欧阳公修已铭程文简公琳之墓复以敕命为之碑故事甚切愿毋辞臣既共二史馆敢不敬承明旨以答孝子之请以扬公之休光用诏後世公讳必大字子充一字洪道世家郑州之管城曾祖衍朝奉郎妣郭氏祖洸左朝散大夫妣潘氏李氏张氏父利建左宣教郎大学博士妣王氏公既贵三世俱累赠太师秦国公妣俱赠秦国夫人宣和中祖通判吉州因家焉公幼而孤十三又遭内艰天资高亮记问絶人绍兴二十一年擢进士第授左迪功郎徽州司户参军改监行在和剂局门二十七年中博学宏词科建康府府学教授三十年除太学録召试馆职高宗见奏篇曰他日可掌制除秘书省正字次年改左宣教郎兼权国史院编修官明年五月除监察御史六月孝宗即位八月除起居郎直前奏事上曰朕旧见卿文可进近作兼编类圣政所详定官暂权给事中兼权中书舍人尝论翟婉容位官吏转行碍正法事上曰初止谓卿能文不谓刚正如此此其被眷注之始也应诏条上十事皆切时病其一严铨试之法又奏羣臣六参除朔望过宫外勿改旧制至今行之事有未便者不憚极论上亟獎叹公亦曰陛下有纳諫之资故臣辈各思自竭龙大渊曾覲除知合门事公与给事中金公安节同奏大渊罢副都承旨覲罢带御器械俱为知合若以攀附旧恩尚有可谏正以搢绅指目台谏有言外议方喧而除命遽加非舍己从人之义有旨罢剧就闲已允公论尚兹回缴可特依奏既而再除公曰前已反汗今复申命岂复但已格除目不下越三日不获命以迂奉请祠两任主管台州崇道观乾道四年权发遣南剑州未赴六年改福建路提点刑狱公事陞对留为秘书少监兼直学士院兼国史院编修官上改告词首尾公奏陛下取汉宣帝之意亲制赞书臣观汉社稷臣乃在周勃汲黯霍光之徒儒者公孙弘辈皆持禄保位故宣帝以为俗儒不达时宜使宣帝求真儒用之何至杂霸哉上曰卿学术精深记问该博

所蘊可以自见当曰夕与卿论文兼实录院检讨官加上德壽尊号公谓太上万壽而绍兴未议文及近上表用嗣皇帝为未安按建炎以後遥拜徽宗表及唐宪宗上顺宗尊号册文皆称皇帝议遂定七年奏四事重侍从以储将相增台谏以广耳目郎官专以旌外庸监司郡守皆当久任上称以为要务兼权兵部侍郎上云学士院湫隘公奏宫城不容增广陛下欲卑宫室臣等居此亦过矣若遴选名儒而信任之不在栋宇之丽也除权礼部侍郎仍兼直学士院陞同修国史实录院修撰有旨公与吏部侍郎王之奇太子詹事陈良翰对选德殿出御札引唐太宗魏徵问对以在位之久功未有成治效优劣苦不自知使各极陈其当否公退而条陈练兵以图恢复而用将之道未尽择人以守郡国而责实之方未至又指陈大将郡守数易之弊且言贞观政要四十篇既先之以魏徵论为君之道又着不克终之戒于篇末盖是时惟徵为善谏愿思太宗广谏诤之德使嘉言日闻治道日兴上嘉纳又奏谏官虚位愿蚤择正人先朝参用古制卑其品而厚其礼责其尽言使奸邪望风畏戢销患未形如近岁张松韩玉等使台谏无所顾忌蚤为力言岂至劳民费财始勤英断上曰朕自此知戒矣又奏曰人主无职事惟在察臣下邪正凡轻于任事速于求售者必至败事若疑儒者不足用而专用才臣今既累年其效可睹唐太宗之臣即隋之臣艺祖之臣即五代之臣非前愚而後智顾人主用之如何耳又论臣寮务为新说欲徼奇功王安石以尧舜之道告君实行管商之术指司马光苏轼辈为流俗尤当察之江湖亢旱上称龚茂良措置有理公请出缗钱二十万代民租乃不乏事非不知县官急阙然艰食则盗起盗起则调兵费可省乎上曰卿议论殊善使朕闻所未闻兼侍讲又奏近奉诏以仆射名官非古欲更其名周之太宰卿也小宰中大夫也中间所改非是上曰止欲为左右丞相如同中书门下平章事皆可削公遂奏前古沿革而退八年兼中书舍人固辞且言外制之设正欲谨于出令凡有未当欲其缴奏非专责以词翰也卒因缴奏而遂免兼张说再除签书枢密院公当草不允诏奏谓昨者举朝以为不可陛下欣然听纳曾未周岁复有此除贵戚预政公私两失臣未敢具草时权给事中莫济亦封还御笔遂俱与外祠九年除知建宁府再辞不许中道引疾提举江州太平兴国宫天下愈高之淳熙元年除右文殿修撰说罢召为敷文阁待制兼侍讲六月兼权兵部侍郎八月兼直学士院上尝称公持重不迎合无附丽除兵部侍郎兼侍讲进太上尊号诏草上曰此文难于言而温纯典雅无一字可议公奏初上光尧之号臣已预议庚寅之诏亦出臣手上愕然曰前诏亦卿所草耶兼太子詹事尝论用人惟上智与下愚不移中人惟上所御为官择人则引中人为君子为人择官则引中才为小人又奏闻陛下日御球场固知不忘閱武然太祖二百余年之天下属在圣躬可不自爱上作色曰卿言甚忠正以讎耻未雪不欲自逸耳尝奏闻金星近前星武士击球太子亦预臣甚危之上曰卿可语太子公曰太子人子也陛下命以驰驱臣安敢劝以违命陛下勿命之可也陞兼侍读郊祀禮礼执绥备顾问除吏部侍郎奏朝廷守至公之道有司持一定之法行以无私孰不心服四年除翰林学士奏自唐至本朝优待词臣以其无簿书之冗可以朝夕论思或有补于治道得人固多最可慕者陆贄欧阳修也五年为御试详定官得旨撰选德殿记及皇朝文监序上尤称之赐御书白居易七德舞墨犹湿也除礼部尚书兼翰林学士尝论本朝专以仁立国而又以禁暴安人为本上曰兵势似弱公曰仁故似弱实非弱也社稷灵长职此之由上曰所以并无祸乱耳公曰本朝似周秦兵虽强兴衰竟如何六年诏礼官详议明堂典礼公定圜丘合宫互举之议再执绥草赦明着古礼以示来世礼成献诗又进动天之戒上曰动天诚当以德惟知道乃可语此公曰皇天亲有德飨有道此岂聪明作为所能为哉除吏部尚书兼翰林学士承旨论六部长贰判依字改为从上谓公视草劳甚公奏臣素无汗马之劳

致此爵位宣力文字之间未为劳也上曰翰墨之功岂小补哉若大述作固当烦卿七年五月除参知政事上曰卿遇事殊不依违宰执自当和而不同公曰韩琦欧阳修殿上日有所争退则欢然最为可法大臣自应互相可否秦桧用事执政至不敢措一辞後遂以为当然陛下惟恐臣下不言人臣乃欲自是乎尝极陈民困之由上问其故公曰且以平江府论之二十年前归正添差等官岁用五万缗今已数倍民安得不困此特其一耳上为之怅然进呈湖北月桩钱数公曰固出于不得已亦须平时有以存恤去岁荒旱若非先事赈救禁戢苛暴何以免流殍之苦舒州汪革始谋不善若如前代失军民之心则乘灾唱乱必致蠭起亦安肯束身自归于司败所贵得民正为是耳此非仓猝所能成也上深以为然有恃长乐之援求为郎者上俾谕给舍缴奏公谓不可谕意不从则失体从之则坏法命下臣等自当执奏上曰卿等肯任怨如此公曰当与而不与则有怨不当与而不与何怨之云上叹曰所谓任责非任怨也九月知枢密院事上曰三省本未可辍卿每见难处之事卿以数语决之可谓敏矣上尝叹养兵费邦赋之八公奏自古未有五十年屯兵不解古者讲和则罢兵今既有岁币而兵不敢撤所以倍费上眷公益深尝奏事退御笔卿临事明敏而有决朕每嘉之又称公通练军政深副擢用之意公谢曰臣本以文墨受知岂晓武事误蒙任使不敢不勉十一年御笔欲移兴元义胜军于襄阳此军皆契丹渤海汉儿慕义来归者上以金商山险非用骑之地闻其营砦遗火因迁之公奏路经金洋当先计人马之数使郭杲于襄阳豫办更令彭杲具以此意深察衆情六月拜枢密使上曰卿在西府光前絶後若有边事宣抚使惟卿可为也先是金主避暑壽安过上京北牒以道远权止贺正生辰使一年宣谕卿尝料未必遣使今果不来可谓庙谟矣十二年金州谋帅公欲合侍从管军荐举上曰军帅当自上除授公曰舜用九官皆咨四岳与其私荐不若明扬若能考实孰敢妄举因论边报异同上獎谕云事无巨细卿皆究心昨密问一事条上数端深谋远虑朕所不及也上谓王藺论事颇偏公奏藺虽稍过然汲黯在朝淮南寝谋尽言而不顾身帝之左右岂可无此等人况以献纳为职若上下相蒙非国之福也御笔尝谓达实契丹欲加兵于金又谕结约夏国又有呼噜窃据上京之报【按呼噜旧作忽鲁今改後同】公奏但当严备随机应之未几上谕公所传皆妄真有先见之明矣十四年二月乙亥面谕卿在枢筦事皆经心更旬日拜相後人难继也丁亥拜右丞相寻兼提举国史院会要所敕令所上谕以委任之意公奏自古鲜有无事时今赖陛下勤政内外晏然殆将二纪此正可惧之时当思经远之计又奏舜禹君臣相戒唐太宗不存形迹臣等过失望随事戒勅免积罪戾臣有所见不敢废弼直之义日有论奏动系天下休戚比至给舍缴駁台谏论列已为後时不若致审于初又奏人才不失之虚夸则失之緘默凡冗宜求笃实为国者因旱求退甚力请依庆历中例降秩皆不许遂奏实惠及民莫若寬减夏税施德当自近始上方笃意救荒其所以贊寬仁之政不可胜纪封事多言宰执同异公奏要当各尽所见岂可尚同既是协心体国苟有未然虽面诘何害若人才邪正政事得失安危所系自应反覆论难止欲归于是耳陛下复祖宗密白之制使三省覆奏而後行正欲上下相维非止奉行文书也高宗升遐始末稽考制度奏置山陵五使贊成圣孝哀礼两备会贺生辰使至上在丧次议令馆伴使谕遣公奏贺礼固不可行但彼行人远来而朝无一辞于理未安遂口占数语使归报焉正旦使将至或请易淡黄袍御殿受书然後素幄见使者公力陈不可止以縞索引见使者果心服手诏讨论皇太子参决典礼初欲开资善堂公奏天禧故实恐不宜于今不若取西晋宣猷堂为议事堂十五年正月戊戌公请上特御延和殿令宰执奏事毕始过议事堂思陵发引公奏永熙典故吕端一相犹摄太傅亲往而欲用显仁旧例非是遂再拜请行乃以公摄太傅上虑使人坚欲上壽公奏

必无争执上欲先令侍从台谏集议公曰国之重事谋之帷幄有不必询衆者上尤称獎卿能如此国之幸也仲冬之初奏乞骸骨忽宣諭以病倦欲传位太子卿须少留公奏圣体康宁止是孝思稍过岂应倦勤上曰礼莫严于事宗庙而孟飧多以病而分詣孝莫重于执丧而不得日至德壽欲不退休得乎朕以此委卿公泣而退十二月壬申密賜绍兴传位亲札辛卯留身议定二月壬戌之吉又命公草诏专以奉几筵侍东朝为意十六年正月己亥拜左丞相壬子因奏事始諭二府旬日当内禪又令公独呈诏兼提举玉牒及监修日历二月辛酉朔降传位诏翼日上吉服御紫宸殿公奏陛下巽位与子古今盛典再见圣朝中外同庆臣等辅政无状自此无由日侍天颜无任依恋之至哽噎几不能言上亦泫然曰正赖卿等协赞新君光宗首问当世急务公奏用人求言二事寻即降诏公积阶至特进爵自管城县开国男至荥阳郡公历封济许二国公三月拜少保益国公公以三孤之官不应以覃霈而得力辞不可又乞回授至于四五不得已而始受之奏以朔望之次日朝重华宫五月求去方力而諫省有言请益切除观文殿大学士判潭州言者不已殿中助之遂以少保充醴泉观使而归孝宗赐金器劳问绍熙改元判隆兴府辞不赴二年除观文殿学士判潭州罢倍税牙契钱二十万缗郡事皆亲理之三年四月复元职七月坐所举官以贿败降荥阳郡公四年八月复旧封冬易镇隆兴力求奉祠主上登极求言于旧弼公奏圣孝敬天崇俭久任四事皆切于世用遣合门官赐少傅告控免至再始许貤恩庆元元年于是公年七十矣三表引年遂以少傅致仕嘉泰元年布衣上书及公姓名台评降一官明年乃复遗奏既闻上为震悼辍朝二日赠太师赙银绢各千累食邑一万五千六百户食实封五千八百户娶王氏监察御史葆之女封益国夫人先一年薨一子即纶也朝请大夫新知筠州军州事孙顥宣义郎新监饶州浮梁县景德镇兼烟火公事孙女五人长适承事郎监嘉兴府余纳仓萧彖余尚幼呜呼天之生公固授之以间气公之出仕亦可谓千载之遇矣自决科以至考终五十有三年始以文字受知高宗孝宗以至位极人臣晚辅光宗之初政退被主上之休宠孝宗在位二十有八年公实相为终始其中以十年出入翰苑时方承平极铺张扬厉之美以十年辅政秉钧尽辅赞弥缝之妙两以逆折奸锋深忤上意事定言验得眷愈隆致身元宰出处为时重轻几无纤瑕微纇之可指文章则追配作者论议则究极古今风度如张九龄谋谟如崔佑甫宋广平之守文杜如晦之善断公几兼之乃所愿则尤切切于陆宣公欧阳文忠此非臣之私言也平日着述为书十余种总为二百卷行于世校之前碑撮取其名节国事而略其余谨再拜特书以对扬休命铭曰

巍巍孝宗天锡勇智二十八年是为盛际猗欤益公善始以终始进以文终察其忠再折奸萌逆鳞以批事定言验表表忠规献纳论思知无不为弥缝辅赞百工惟熙三圣相授同守一道公实佐之家有宸藻忧边思职具存宏模临机辄断华夷謐如告老既休着书自若拳拳斯文以惠後学天不憖遗殄瘁兴悲既铭公墓又勒丰碑生荣死哀身美君显是为宗臣後庆其衍

卷九十四

钦定四库全书

攻媿集卷九十四

宋 楼钥 撰

神道碑

少傅观文殿大学士致仕益国公赠太师諡文忠周公神道碑【按前卷忠文耆德之碑作于此篇後二年原目以奉敕撰列前今仍之】

孝宗皇帝在位二十八年厉精求治久而不倦圣德日新先绍祖宗宰相凡十有五人明良会遇可谓盛矣求其相为终始全德备福亦未有如益国周文忠公者始公亲见龙飞御名之立已尝预议中间再以力排权幸沮其枋用忤旨去国略不少贬士大夫之过计者谓公不复用矣圣明洞照愈加褒擢遂至元宰任天下之重周旋密勿终赞与子之决以孝宗之实睿实聪公之明敏肃给真千载之遇而又事光宗于春宫夹辅初政功成身退既挂衣冠犹被主上宠光者十年呜呼其可谓圣朝之宗臣矣公薨之二年嗣子纶以书抵四明楼钥曰先公既葬而隧碑未立谓钥荷公之知晚而益深又尝待罪太史氏俾为之辞且示以今参知政事李公璧所作行状钥不佞谨摭其大槩泊平日见闻之实而书之公讳必大字子充一字洪道世为郑州管城县人曾祖衍朝奉郎祖诜左朝散大夫父利建以上舍魁登第终左宣教郎太学博士以公贵三世俱赠太师秦国公曾祖妣郭氏祖妣潘氏李氏张氏妣王氏俱赠秦国夫人宣和中祖为吉州通判因家焉外祖给事中觐知平江府靖康元年公生于郡治幼孤归信州外家从汭人陈持学太夫人躬督诵读率至夜分十三而太夫人卒公记诵絶人徒手入举场有问者应如响文又工致遂名荐书绍兴二十一年擢进士第授左迪功郎徽州司户参军改监行在和剂局门以邻火罢二十七年中博学宏词科循左修职郎建康府府学教授三十年除太学録召试馆职高宗称奏篇谓他日可掌制除秘书省正字循左文林郎三十一年改左宣教郎兼权国史院编修官三十二年五月除监察御史六月孝宗即位八月除起居郎直前奏事上曰朕旧见卿文有近作进来此眷注之始也侍立讲筵奏劝讲非为分章析句正欲从容访问以裨圣聪究治体兼编类圣政所详定官暂权给事中兼权中书舍人尝论边事上以蜀为忧对曰蜀民久困征求愿降诏抚谕许以事定寛其力又奏比岁史官不备故记注多阙欲先自六月十一日修纂前未备者并修之论翟婉容位官吏转行碍止法事上曰初谓卿止能文不谓刚正如此公奏前宰执侍从依赦复职亦有不合人望当缴奏者上曰固然卿论事但令适中朕无不从也应诏条上十事皆切中时病其一严铨试之法又奏羣臣六参除朔望过宫外勿改旧制至今行之安穆皇后追册祔飨公奏神主谒诸室前殿则不以钦宗服而废祖宗之乐别庙奉安则乞备而不作金人来邀旧礼诏从臣指陈定论公率同列奏向者佑陵未卜慈宁未返以讲好之故宁亲宁神两遂所欲礼虽屈而志则伸今而遽许之必谓我怯将有难塞之请使者之行当再用邻国之礼彼或有辞则告以通好于用兵之後以何名而屈以何名

而受耶事有当駁者皆极论其不可上亟加獎叹公亦言陛下有纳谏之资故臣辈各思自竭龙大渊曾觐除知合门事公同给事中金安节奏大渊罢副都承旨觐罢带御器械俱以合门处之实迁也若以攀附旧恩尚有可诿正以搢绅指目台谏有言外议方喧而除命遽加陛下于将相要官或罢或贬一付公论略无适莫独此二人乃为之迁就讳避殆非舍已从人之义也有旨罢剧就闲已允公论尚兹回缴可特依奏已而二相宣示御札谓给舍为人鼓惑议论羣起小事岂应如此公等奏言昧于事体专徇流俗轻渎天威居家俟罪再乞重赐窜责俱不允入谢上曰朕察卿务举职但朕欲破朋党振纪纲耳旬日二相又道上意已再除两知合且云後省想亦无他公曰前已反汗今复申命岂敢但已格除目不下右揆以闻越三日不获命以信州迁奉请祠两任主管台州崇道观乾道四年权发遣南剑州未赴六年改福建路提点刑狱公事陛对论帅臣有名而无其实将副具官而非其人又论杂举中外文武之才以备选用益县令之俸而责其廉及捕盗官候六考行赏执政奏拟秘书少监上可之仍令兼直学士院会草晁公武知扬州不允诏御笔改定公引故事乞罢不许兼国史院编修官初郑闻草公制上改首尾词公奏陛下取汉宣帝之言亲制赞书明示好恶敢因训词推广圣意臣观汉社稷臣乃在乎周勃之鄙朴汲黯之少文霍光之不学至于儒者持禄保位则公孙弘辈实为之故宣帝嫉之以为俗儒不达时宜盖有激而云尔使宣帝求真儒用之何至杂霸哉陛下以汉为监则士风趋向归于正矣上曰卿学术精深记问该博又尝曰平昔所蕴可以自见矣自此当日夕与卿论文兼实录院检讨官加上德寿尊号公谓太上万寿而绍兴末议文及近上表例用嗣皇帝为未安按建炎以後遥拜徽宗表及唐宪宗上顺宗尊号册文皆称皇帝议遂定赵丞相雄以中书舍人奉使贺金主生日宗室伯驩为介御札生辰使兼齎国书一封理会受书公立具草有云尊卑分定或校等威叔侄情亲岂嫌坐起後四日对秘殿上曰朕未尝谕国书之意而卿能道朕心中事可谓大才赐坐久之欲退而不记来路上指示之命内侍导而出七年奏四事重侍从以储将相增台谏以广耳目郎官专以旌外庸监司郡守皆当久任上称其为要务皇太子领临安尹公既草制因奏恐别无被受欲依诏书体式降付东宫兼权兵部侍郎上云学士院湫隘公奏官城不容增广陛下欲卑宫室臣等居此亦过矣若遴选名儒而信任之不在栋宇之丽也除权礼部侍郎仍兼直学士院升同修国史实录院修撰有旨公与吏部侍郎王之奇太子詹事陈良翰对选德殿袖出御札引唐太宗魏徵问对在位之久功未有成治效优劣苦不自知各极陈其当否公退而条陈练兵以图恢复而用将之道未尽择人以守郡国而责实之方未至又指陈大将郡守数易之弊且言贞观政要四十篇既先之以魏徵论为君之道又着不克终之戒于编末盖是时惟徵为善谏愿思太宗广谏诤之德使嘉言日闻治道日兴上嘉纳且曰方图力革二弊又奏谏官虚位愿早择正人先朝参用古制卑其品而厚其礼责其尽言使奸邪望风畏戢消患未形如近岁张松韩玉等使台谏无所顾忌早为力言岂至劳民费财始勤英断虽天纵濬哲安能尽见上曰如人奕碁当局多误惟旁观乃见之朕自此知戒矣又奏人主无职事惟在察臣下邪正凡轻于任事而速于求售者他日必至败事不可不察若疑儒者不足用而专谓才臣能趣辨今既累年其效可睹唐太宗之臣即隋之臣艺祖之臣即五代之臣非前愚而後智顾人主用之如何耳又论臣寮务为新说欲徼奇功王安石以尧舜之道告人主实行管商之术指司马光苏轼辈为流俗尤当深察之上曰苏轼却是流俗可谓颠倒尝奏江湖大旱上称龚茂良措置有理公请出南库缗钱二十万代民租乃不乏事非不知大农急阙然艰食则盗起盗起则调兵费可省乎上曰卿议论殊善使朕闻所未闻谢曰臣惟以不欺事陛下兼侍讲上以雨雪愆亢欲加精祷公奏洪范肃时雨

若此殆言路旷官之证台端一日不可阙今乃五旬不除上言未有人公奏百执事何至乏才兼御史台令殿中阙具察官姓名取旨差权苟未欲轻用人亦可举行此制上惊曰朕不知此遂宣谕宰相具上又奏近奉诏以仆射名官非古欲更其名周之太宰卿也小宰中大夫也中间所改亦未可用上曰太宰今吏部尚书尔止欲为左右丞相如同中书门下平章事皆可削公遂历奏前古沿革而退八年权中书舍人公奏西浙为今日根本之地而赋税供亿反重于他路且户部既理财朝廷又理财争肆渔取致以隐漏为名增无实之税上曰此漕臣之缪公曰陛下既知何不改正因辞西掖且言外制之设正欲谨于出令凡有未当欲其缴奏非专责以词翰也上曰正有望于卿因奏闽漕陈岷议变盐法恐扰民难行又奏曹耜除府推事上曰知其人才欲与寺丞公曰臣即有文字上意不悦退而缴词头愿别择俊寮协赞元良耜知严州公亦免兼矣张说再除签书枢密院王之奇赐出身并命公当草不允诏奏谓昨者举朝以为不可陛下欣然听纳尝云兹事诚误旋即改命曾未周岁复有此除贵戚预政公私两失若谓西府间以武臣愿择大将有威望者畀之臣非欲专任文吏也且当是时之奇亦曾论奏今乃与说同升恐亦未当遽受也臣未敢具草时权给事中莫济再封还御笔遂俱与外祠又趣公出门匹马便面翩然径行九年除知建宁府再辞不允中道引疾提举江州太平兴国宫天下愈高之淳熙元年除右文殿修撰说罢召还除敷文阁待制兼侍讲六月兼权兵部侍郎尝论改官举削到部放散之制後虽润色然自公发之八月兼直学士院上称公持重不迎合无附丽除兵部侍郎仍兼侍讲进太上尊号诏草上曰此文难于言而温纯典雅无一字可议公奏向者初上光尧之号臣已预议庚寅之诏亦出臣手上愕然日前诏亦卿所草耶兼太子詹事上论史事公奏李焘于史学如嗜饮食长编考证异同罕见其比尝论用人惟上智与下愚不移中人惟上所御为官择人则引中人为君子若为人择官则引中才为小人今不及数月已望迁擢後将无官可迁愿力革此风爱惜名器又奏兵将官刻削等事上曰今不如此且言王友直极廉安有刻下公曰昨闻殿司进羨余二十万缗此何从而得上曰朕已不受公曰虽则不受当思其所自来上曰统制官不治财赋统领却治之可相关防不致妄费公则曰此尤非也主将而下须令各得懽心今因小利更相猜察情既不通缓急何由得其死力又奏闻陛下日御球场固知不忘閱武然太祖二百余年之天下属在圣躬可不自爱上作色曰卿言甚忠得非忧銜檠之虞乎正以齟齬未雪不欲自逸耳又奏闻金星近前星上曰止是略近公曰天道高远当论人事武士击球太子亦预臣甚危之上曰卿可语太子公曰太子人子也陛下命以驱驰臣安敢劝以违命陛下勿命之可也陞兼侍读大札执绥备顾问除吏部侍郎奏朝廷守至公之道有司持一定之法行以无私孰不心服近乃有任怨之说法行以公人自无怨上曰朕每谕大臣弥缝人情无有是处四年除翰林学士奏自唐至本朝优待词臣以其无簿书之冗可以朝夕论思或有补于治道得人固多最可慕者陆贄欧阳修而已若乃进则有隐退则不密挤人而利己扬己以取名安能逃日月之照哉上曰学士宴见无时至为亲近五年为御试详定官屡乞去上问文士可代者闻吕祖谦能文公谓翰苑须用有学问者祖谦涵养既久习知典故史院甚得其力不但文字之工也得旨撰选德殿记又命书之後内直宣对别令中使引至碑下传旨记文词采赡蔚召卿观览既见上又有博美之称归至玉堂御书白居易七德舞赐之墨犹湿也後进呈皇朝文监序上曰卿之文在廷莫及真匠手也除礼部尚书兼翰林学士尝论本朝专以仁立国兵非不用而以禁暴安人为本上曰兵势似弱公曰仁故似弱实非弱也社稷灵长职此之由上曰所以并无祸乱公曰本朝似周彼秦兵虽强兴衰竟如何六年诏礼官详议明堂典礼公奏祀帝祀天以祖宗配此前朝已行之制世俗止诵孝经

之语未尝深考其义致以今日为疑由是定圜丘合宫互举之议公再执綏草赦引周汉故事有曰俶经路寝有皇佑之彝仪徧秩羣神有绍兴之近制盖明着古礼以示来世也礼成献诗又进动天之诚上曰动天诚当以德惟知道乃可语此公曰皇天亲有德飡有道此岂聪明作为所能为哉除吏部尚书兼翰林学士承旨论六部长贰判依字遂改为从尝奏祖宗涵养善类名卿才大夫相望自章蔡沮士气以坏风俗獎谗谄以植党与卒致播迁之祸中兴一洗前弊得人为多秦桧以患失之心济忌刻之资引庸人以充侍从对毕辄纳副封既出其门无所不有人才衰落貽患至今论思之职上规人主次及大臣下及四方安可纳副封耶愿博求文武之英布列中外上曰如曾开辈今岂易得又及舜之无为非皆无所为也特不为期会之屑屑耳又言自古上自人君下至士庶鲜有不为左右前後之人所牵制者上谓公视草劳甚公奏臣素无汗马之劳致此爵位正使宣力文字之间未为劳也上曰翰墨之功岂小补哉若大述作固当烦卿七年五月除参知政事上曰近见卿遇事殊不依违执政之于宰相事任非远自当和而不同公曰韩琦欧阳修殿上曰有所争退则懽然无间最为可法後又尝曰前此宰相议事执政更无语今乃肯各述所见公奏大臣自应互相可否秦桧用事执政至不敢措一辞後遂以为当然臣尝以绍兴初圣语示同列勉其协济况陛下虚心无我惟恐臣下不言人臣乃欲自是乎惟小事不敢有隐则大事何缘蔽欺八月以久旱御笔付三省求直言初回奏虑所在因是皆有賑济之请公言上明目达聪而吾侪不能将顺独不愧于心乎万一上自行之或以此奏示外岂不获罪公议相亟从之又奏圣明在上星变旱灾殆繇臣等所致上曰若封事及大臣朕须留中公曰付出何害未闻有过而人不知也昌化有箭谷得米相以上再三及此议宣示外廷公曰天若为瑞必无水旱乾道间有以九华山竹米为瑞而得罪者且宣和有此岂是休徵遂已有乞改常平不以赦原之法公奏绍兴中因孔括申请遂与谋叛等同科乞令削去只从海行法遇两赦或非次赦听原公尝极陈民困之由上问其故公曰且以平江府论之二十年前归正添差等官岁用五万缗今乃数倍支移折变之数日有所增齐民安得不困此特其一尔上为之怅然进呈湖北月桩钱数公曰固出于不得已亦须平时有以存恤去岁旱荒若非陛下先事賑救禁戢苛暴何以免流殍之苦舒州汪革始谋不善若如前代失军民之心则乘灾唱乱必致蠭起彼亦安肯束身自归于司败所贵得民正为是耳此非仓猝所能成其来有渐矣上大以为然上尝谓枢密非古官公奏在唐止司传导五代始置崇政院分宰相之权神宗亦有意废并圣谕可谓尽善但二百年官制难以骤改不若且令二府互领更加熟虑有恃长乐之援求为郎者上俾谕给舍公奏台谏给舍与三省相维持岂可谕意不从则失体从之则坏法命下之日臣等自当执奏上曰卿等肯如此任怨公曰当与而不与则有怨不当与而不与何怨之云上叹曰此所谓任责非任怨也上尝言唐监一书兴衰治乱之理甚明公奏祖禹着书皆可备乙夜之览篇篇即是諫疏九月除知枢密院事上曰卿才堪其任三省本未可辍卿每见难处之事卿以数语决之可谓敏矣上谓公如统制官之类可时与之接以观其才公因奏雷世贤说淮南地形缓急欲守滁臣谓不然庐和则当其冲滁沮山林可自守而不可以御敌楚州旧屯军八千雷世方乞止差镇江军五千人公奏山阳控扼清河口韩世忠实屯重兵今无故减戍他时或增必致敌疑扬州武锋军有衆八千本屯山阳若岁拨三千同戍诚为两便十年奏白气自西南亘天宜为兵备上曰日脚之气冬常有之公言此日官相寬之词然有备乃能无患上尝叹养兵费邦赋之八公奏自古未有五十年屯兵不解古者讲和则罢兵今既有岁币而兵不敢彻所以倍费文州蕃部刼杀二汉人吴挺止申照会公请督其根治使知朝廷事必留意不敢忽略日有万几不察于微弊不胜救上曰自昔多因

不防其微驯致祸败温州军士喧悖宪司欲先定汪义端刻削之罪仍正纪律公奏此风不可长恐兵愈骄郭杲请移江陵万二千人与其孥永屯襄阳公言止当以兵之半分戍杲谓襄阳为要地而江陵亦在江北为吴楚喉衿争辩甚力乃许万人且令骑兵尽行上眷公益深尝奏事退特命中使赐御笔卿临事明敏而有决朕每嘉之宣谕金主避暑寿安所徙器用倍多且分诸子出镇或谓欲至东都秋间议过上京公奏当豫为之备甚详上称公通练军政深副朕擢用之意公谢曰臣本以文墨受知岂能晓畅武事误蒙任使不敢不勉彼方恫疑虚喝正恐我或先动所当精择边将镇之以静上曰朕尝戒臣下以公心人自无说公曰所以私者欲收人情其来无穷得者寡不得者衆若不裁以公道恐誉者不若毁者之多以陛下圣明臣等智虑所不及则有之何敢有所欺也十一年奏广中盐法既更州县空乏事势可忧詹仪之胡庭直皆贤而才短故鋭乎革弊而不能计其後已而果然公言赵汝愚在福州百废具举孜孜国事殆不多得王希吕缓急可当一面彼小廉曲谨虽无瑕可指却恐误事上曰如赵雄汝愚希吕皆帅才也义胜军皆契丹渤海汉儿慕义来归屯于兴元御笔以金商山险欲移襄阳用骑之地闻其营砦遭火因以迁之公奏路经金洋当先计人马之数使郭杲于襄阳豫办方可议迁更令彭杲具以此意深察衆情御批卿谋虑深远良用嘉赏六月拜枢密使上曰卿在西府光前絶後若有边事宜抚使惟卿可他人不能也呈诸军陞差籍公奏已及一季欲间召一二虽不专用此取人亦因以察其能否使主将不敢容私上令赴枢密院审察後池州李思孝自言正将二人不能开弓乞与罢军上曰此皆枢使措置之效北牒以上京道远权止贺正生辰使一年宣谕卿等料未必遣使今果不来可谓庙谟矣王希吕乞增兵戍庐州上以万弩手民兵已多止可分数千人公奏须与万人盖当以正军为主则帅司可立帅司既立则沿淮归正山水寨民兵皆为我用矣十二年留正申西兵已免起二年今年取旨上以三衙不可阙欲令发来公奏襄阳兵少阎世雄欲得此人敌不得志于四川又尝送死淮南深恐睥睨荆襄遂与一年金州谋帅公欲令侍从管军荐举上曰大帅当自上除授公曰舜用九官皆咨四岳与其私荐不若明扬若能考实孰敢妄举因论边报异同上獎谕云事无大小卿皆究心公又曰天下安有不可措置之事上曰昨密问一事卿便条上数端深谋远虑朕所不及也上谓王藺论事颇偏公奏藺虽稍过然汲黯在朝淮南寝谋尽言而不顾身者陛下左右岂可无此等人况以献纳为职若上下相蒙非国家之福也先是御笔达实契丹欲加兵于金果有之在我岂得漠然固不可违誓或有衅端何以为词公奏彼一方小警何至移文宿泗若果有衅何患无词急在间探精审耳至是又谕结约夏国事公奏顷尝因任令公帛书通信金以示范成大夏国难保如此似未可也後又报呼噜大王据上京上问公公奏兹事体大当随机应之未几上谕公所传皆妄枢使真有先见之明矣广东帅潘畴以擅斩逃兵自劾上批无罪公奏帅无便宜之文不经録问详覆而斩四人虽鋭于除恶然人命至重不可轻许洪迈守婺诛首乱六人止是放罪後不妨旌赏十四年二月乙亥宣谕卿在枢筦凡事无不经心更旬日拜相後人难继丁亥拜右丞相寻兼提举国史院会要所敕令所上谕以擢用人才及委任之意公奏东府事繁非西枢比自古鲜有无事时今赖陛下勤政内外晏然殆将二纪此正可惧之时当思经远之计又奏舜禹君臣相戒唐太宗不存形迹臣等过失望陛下随事戒勅免积罪戾臣有所见不敢废弼直之义日有论奏动系天下休戚比至给舍缴駁台谏论列已为後时不若致审于初又奏人才不失之虚夸则失之缄默凡冗宜求笃实为国者大旱求退甚力上曰方赖卿等协赞若舍朕而去谁与共此又请依庆历中例降秩一等亦不许徧祷羣望下诏求言遂奏实惠及民莫若寛减夏税施德当自近始会稽和买诡避至多请权免一年徐议厘正秀州乞权

减大军总制钱二万余缗吏拟勘当公曰此岂勘当时耶奏蠲之上方笃意掇荒其所以赞宽仁之政不可胜纪封事多言大臣同异公奏岂可尚同要当各尽所见臣每谓同心体国苟有未然虽面相诘责何害止欲归于是耳若人才邪正政事得失安危治忽所系自当反覆论难陛下复祖宗密白之制使三省官覆奏而後行正欲斟量可否上下相维非止奉行文书也高宗上仙始末稽考制度奏置山陵五使赞成圣孝哀礼两备初欲用显仁例遣三使公固谓事体不同不当曲徇会贺生辰使至上在丧次议令馆伴使发遣公奏贺礼固不可行但彼远来朝无一辞于理未安遂口占数语使归报後正旦使将至或请权易淡黄袍御殿受书然後素幄见使者公力陈不可止以缟索引见使者果心服手诏讨论皇太子参决庶务典礼初欲开资善堂公奏天禧时仁庙尚幼始见辅臣恐不可用西晋有宣猷堂今作议事堂可也十五年正月戊戌公请上特御延和殿令宰执奏事毕然後过议事堂思陵发引公奏陛下既行三年之丧又用七月之制永熙典故吕端一相犹摄太傅亲往而有司欲用显仁旧例非是遂再拜请行乃以公摄太傅上虑使人坚欲上寿公奏引见受书即是成礼上寿时不过随班拜舞若奉觴致词皆无所预臣等保无争执上欲先令侍从台谏集议公曰国家大事谋之帷幄中有不必询衆者况事理晓然不必徒为纷纷上尤称獎卿能任责如此国之幸也仲冬之初留身奏臣归自陵下即欲求外缘京鎗使回圣虑来贺者求报复令臣少待人使已行愿乞体骨上獎劳再三忽宣諭比年病倦欲传位太子卿须且留公奏圣体康宁止因孝思稍过岂应遽尔勸勤上曰礼莫大于事宗庙而孟飧多以病而分詣孝莫大于执丧而不得日至德寿欲不退休得乎朕方以此委卿公泣而退十二月壬申密赐绍兴传位亲札辛卯留身议定二月壬戌之吉又命公草诏专以奉几筵侍东朝为意十六年正月己亥拜左丞相壬子始因奏事宣諭二府旬日当内禪又令公留身呈诏草兼提举玉牒及监修日历二月辛酉朔降传位诏翌日上吉服御紫宸殿公奏陛下巽位与子古今盛典再见圣朝中外同庆臣等辅政无状自此无由日侍天顔无任依恋之至哽噎几不能言上亦泫然曰正赖卿等协赞新君光宗问当世急务公奏用人求言二事寻即降诏公积阶至特进爵自管城县开国男至荥阳郡公历封济许二国三月拜少保益国公公以三孤之官不应以霈恩而得力辞不可又乞回授至于四五不得已而後受焉奏以朔望之次日朝重华宫五月求去甚力既而谏省有言请益切除观文殿大学士判潭州言者不已副端助之遂以少保充醴泉观使而归孝宗赐金器劳问绍熙改元判隆兴府辞不赴二年除观文殿学士判潭州亲理郡政不以简贵自居罢倍税牙契钱二十万缗三年四月复元职七月坐所举官以贿败降荥阳郡公四年八月复旧封冬易镇隆兴五年力求奉祠主上践阼诏求言于旧弼公奏四事曰圣孝曰敬天曰崇俭曰久任皆訐谟也遣合门官赐少傅告一再辞免始许貤恩庆元元年公于是年七十矣三上表引年遂以少傅致仕嘉泰元年布衣上书及公姓名台评降一官明年乃复四年十月庚寅朔薨年七十有九累食邑一万五千六百户食实封五千八百户遗奏闻上为震悼辍朝两日赠太师赠银绢各千仍命弟之子缜添差江南西路转运司主管帐司以护襄奉寻赐諡文忠娶王氏监察御史葆之女封益国夫人先一年薨一子即纶也朝请大夫行大理司直孙顥宣义郎新监饶州浮梁县景德镇兼烟火公事孙女五人长适承事郎监嘉兴府采纳仓萧彖余尚幼初益国夫人葬庐陵县斗冈之原十二月丙申奉公之丧合焉公在高宗朝已擢台察事孝宗最久始皆以词章受知可以平挹美官而秉心不欺遇事辄发不复顾身屡貶复奋上久而深察其精忠北门之官有四公徧为之前後十年两宫极孝治之盛讲庆寿加尊号亲祠赦宥立后升储过宫出郊无非盛事大典公皆在属车间铺张扬厉实有以佐宋之光明若水旱灾异夷狄寇盗之辞

咸无焉自参预枢筦以历二揆又涉十年榻前论事出入经史练习典章动有援据不为空言故天子聳听嘉獎而同列自以为不及以国事为己任进退人才一本公道养民择守忧边训兵仰赞睿谟虑周而敏被遇日隆数当大事典礼论议裁处曲当内禅尤为至重吉日徽称宫名母后孝宗独与公素定于数旬之前近将浹旬始谕宰执注意委任可谓不胶漆而固矣天资超颖非凡材可及而体夫子忠恕之道大易劳谦之义孝友淳笃事从兄如诸父自奉甚约絶声色之娱周恤族姻具有恩意官同姓者六异姓者五少自号省斋居士中年曰青原野夫既贵而闲曰平园老叟孝宗生于丁未一时辅相多在丙午丁未间公及丞相王公淮参政钱公良臣同为参枢人谓三府为丙午坊公尝作诗用文潞公同生丙午之韵告老之後犹引故等夷之齐年者遇生朝同会用韵赋诗者数年方其端委庙堂一介之善收拾如恐不及退而均逸汲引无虚日士类莫不归心焉以文苑英华及六一居士集讹舛太甚率同志者朱黄手校如老书生钁板家塾以惠学者卜筑贡院故基公实预荐此地故以充赋名堂作唐虞二典阁藏两朝内禅诏书泊崇陵宸翰又为玉和蜀锦二堂皆自为之记晚岁康强神明不衰天下犹望公之再起不谓天之不憖遗也呜呼殄瘁之痛四海所同有如钥之不肖素辱知遇假守东嘉屡有收用之意未满秩而公已归比忝代言公之除少傅暨加恩两预草制又四作不允诏书尝蒙摘句称赏投闲以来书函诗筒倍加獎予当世铭记多求于公间使钥书之公已书丹或径以贱姓名题盖此意甚厚皆非所敢当也尝窃谓公初入禁林自谓所慕者惟陆宣公欧阳文忠公公之始卒絶似二公者无事不言无言不尽而卒至大用上不负天子下不负所学既不媿于宣公而得时遇主无追仇尽言之患文忠晚居于颖望泷冈而不得归公乃优游平园使里人矜式是兼二公之美而又无遗恨者也若克勤小物诱掖後进皆公之细不胜书有省斋文藁别藁平园续藁掖垣丛藁玉堂类藁词科旧藁政府应制藁历官表奏奏议奉诏録承明集玉堂杂记龙飞録亲征録及闲居纪録等书总二百卷藏于家其行于世者已多属文之士传诵以为楷模公之文不待赞扬微至题跋之语考古证今岁月先後通彻明白读者叹服末为三忠堂记谓欧阳文忠杨忠襄胡忠简皆郡人也精确简严几于絶笔呜呼一代风流于焉尽矣钥何足以铭公铭曰世非乏才何谓才难有君无臣自古所叹吝骄平凡动则为己不合是忧安得奇伟直道而行无患失心一有遇合奚翅断金於皇孝宗才选于衆诞谩畏缩慨不足用堂堂益公负王佐才始以文名芸省兰台高文大册追配古作独步禁林不负所学二十八年相为始终屡跲而奋致身上公尧既授舜舜亦命禹首赞大议龙飞再覩功成身退乐哉平园晚陈四事不已于言既挂衣冠无与世道胡不百年遗此一老星隕于堂人之云亡不亡者存文章光芒惟子是似观行取则後其有兴视此铭刻

攻媿集卷九十四

<集部,别集类,南宋建炎至德佑,攻媿集>

卷九十五

钦定四库全书

攻媿集卷九十五

宋 楼钥 撰

神道碑

签书枢密院事赠资政殿大学士谥节愍王公神道碑

呜呼靖康之祸惨矣自古所未有也而一时伏节死义之士絶无而仅有之人皆以为祖宗涵养几二百年不应至是殊不思自熙宁时当国者惟务变更尚同忌前风俗大敝至章蔡用事日甚一日凡忠臣义士禁锢困苦不容立于世如是者有年矣一时攫取美官当事任者非谄佞奸宄则鬬茸贪黷之人祸变忽起搏手无策首尾衡决庙谟颠倒甚则卖国抵巇以图身利安知所谓主辱臣死之义哉当是时而有奋身犯难国尔忘家者自非豪杰之士不待文王而後兴者安能及此建炎以来募有能使絶域蹈不测之渊者冠盖相望然亦多以高爵重禄所诱若夫捐躯尽瘁机智勇辩忠义出于天性而又有以济国事及其事出仓猝执节抗敌卒徇以身如节愍公者比之前後诸公又其卓然者其可无传乎公讳伦字正道世为大名府莘县人六世祖祐以文章起家事太祖太宗为名臣是手植三槐者也终兵部侍郎赠太师尚书令兼中书令追封晋国公生三子仲子文正公旦相真宗而王氏益显始居京师季子讳从九从日官兵部郎中赠太尉则公之五世祖也曾祖端通议大夫赠太子太保妣李氏赠秦国夫人继李氏赠魏国夫人祖元朝请大夫赠太子太傅妣赵氏赠福国夫人继晁氏赠定国夫人父毅朝散郎赠太子太师妣李氏赠庆国夫人太师在政和间尝上疏论蔡京罪恶乞正典刑因是得罪然则公之气节有自来矣公生于礼义之门而少有大志不护细行喜立奇节轻财好施贫而无悔读书见古人义概事必慨然慕之往来京洛浮沉俗间颇以侠自任闻士夫之贤者倾心事之宣和之季知天下将乱欲入庐山为道士靖康敌犯京城公以太平日久官军骄惰不可用于于是上书言民兵之利欲使贫富相资以弭内忧书奏召对翼日授迪功郎充都大提举守御使司干办公事敌先攻通津门拐子城公说统制官郑建雄选健卒縋而出战敌失利小郤録立功姓名为之谒都太守御使孙傅傅欲置籍次第之公曰首战获捷行赏岂可缓耶愿以便宜从事傅从之士气十倍是以一拐子城敌攻之两旬不能下十二月戊申敌自宣化门入公往丽景门见统制官渠慥曰事亟矣请速分兵扈法驾上召见公宿禁中乞命慥将兵保东华门班直蒋宣等率衆声言奉皇帝夺万胜门以出入欲刦内帑公复乞以慥兵三百与左言俱入斩蒋宣等余皆股栗听命或云始公欲入而未得日扫李丞相邦彦之门会有旨前宰执赴殿廷议事公又恳曰此某效鸣之时也李攜以入忽于殿下嵩呼钦宗愕然使问之即大言曰臣真宗朝故相王旦之孙也有致君泽民之术无路自进比岁尝上书言大辽不可灭女真不可盟果如臣言今无他策京师豪侠臣皆识其人平日能服役之当募死士数万奉陛下侍上皇挟诸王决围南幸钦宗忠之慰劳甚厚解所佩夏国宝劔以赐命整齐六军召募

死士且以片纸批曰王伦事成可除尚书兵部侍郎既拜赐以出次日再对自言已得数万人悉愿效死幸陛下勿疑且请上御祥曦殿慰安中外时有劝上幸青城者宰相何?已主和议将用其说上以问公公曰此必误国非臣之所敢闻上悟曰伦之言是也?进曰万一误国臣当伏死公怒髮冲冠?叱曰若何人敢至此耶公亦叱曰尔何人乃至此耶又面斥其不材寡谋必误大计或至天子蒙尘虽诛相公数百辈何益?怒谓狂生言既不用恐为乱请上诛之且乞就令卫士执之上意未决公执御批立于从班中以免又次日?画旨送御史府将置之死地赖上全护获免用事者乞换公左武大夫吉州防御使带御器械公皆不拜止循修职郎已得间出都矣二圣北狩公见张邦昌问国玺安在何不齎迎大元帅康王同韦拱侍渊得玺遂行会闻大元帅已次南京即与渊倍道奉玺劝进高宗移蹕维扬公走行在上书自伸前志乞使沙漠问二圣起居时高宗正思择人即转朝奉郎借朝议大夫试尚书吏部侍郎河东大金军前通问使制词略云胄出公侯资兼智勇朕方俯同晋国命魏绛以和戎汝其远慕侯生御太公而归汉金帅尼雅满凶焰炽甚【尼雅满旧作粘罕今改後同】公与之抗辩旁若无人金帅愤怒留之云中从行者多不堪公谈笑自若勉以节义然尚未知两宫安否日祷于天以朝通夕死为言有商人陈忠告使臣杨永亨曰二圣太后在黄龙府公以语副使朱公弁及洪公皓曰此天所赞也即遣之金使達上意由是两宫始知本朝中兴而江南之信通焉一日尼雅满使乌陵思谋至驿尤为桀骜公藐视之语及契丹事公曰我道君皇帝与大金先大圣结盟海上约为兄弟大金与契丹相持师老粮尽使使告急即遣兵进援于委顿之时使成云中之功岂非有重恩于大金耶契丹已灭大金之臣屡请南下先大圣恐败盟约终身不从後忽称兵至使二圣北狩生灵涂炭但知贪目前之利天地神明安可欺也大金累年丧失人马不可胜计殆先大圣冥冥之中必有所不佑比渡江深入崎岖败衄可见我朝德泽深厚人未厌宋今主上法令一新贤才并用必图复讐盍为远谋归我二圣太母天眷复我土疆讲兄弟之好使南北赤子免肝脑涂地之苦幸为赞成大计思谋沈思曰侍郎言是也当达此意明年春尼雅满忽来盛陈兵卫延入问曰使人来者数辈于吾所问皆未知对今乃遽欲议和决非南朝实情直侍郎私意尔公曰主上临遣若非寻盟来复何人人衆能胜天天定亦能胜人惟公裁之尼雅满不知答绍兴改元乃以公归议事二年秋入境有旨趣覲具奏羈留曲折敌情底蘊天语劳獎特转右朝议大夫充右文殿修撰主管万寿观赐银绢二千匹两官其二弟一从子公之将归曰洪皓母老请以所议付之尼雅满不从遂携皓弁书归奏各授其家时刘豫犯边和战未决三年韩肖胄使还金遣李永寿王诩踵至骄倨不可告语上闻之曰非王伦不办此召问之公曰彼性贪但邀赂耳上问几何时在御书院奏曰但得案上物足矣上听取去凡笔格镇纸之属皆精金为之公袖之拜以出径入驿与道云中时事且曰主上喜公等远来故加劳赐宜拜以谢一人不自知?之屈也借左朝议大夫尚书吏部侍郎充送伴使庙堂拟除边帅公谓前在敌境知乌珠儿为我禽【按乌珠旧作兀术今改後同】山东河朔久望王师机不可失力陈进取大计词意剴切覲上亲征大臣难其请主管江州太平观居会稽七年春徽宗皇帝显肃皇后讣至除公徽猷阁待制借直学士左中大夫枢密都承旨充迎请梓宫使至南京伪齐授馆于鸿庆宫移文取国书及使指公曰国书当纳金主使指无他报谢讣音迎护梓宫而已明日又来曰大金与齐一也国书当赴齐相府验实递至军前俟得报然後可进公曰有死无二愿勿复言再三迫取不遂顿鑕饔廩增兵围守莫不失色公曰无能为也金遣接伴以九月渡河见金帅达兰于涿州【按达兰旧作挾辣今改後同】问过淮已久何来之迟公备言刘齐邀索住睢阳者数月因言豫在本朝曾擢台諫外朴内奸营私掊刻民怨神怒方欲乔噬两

朝能保他日不为大国之患乎恐妨远图敢布腹心问曰若将豫与南宋能制之否公曰皇帝圣孝神武卧薪尝胆志在恢复但以天下为度不忍轻以动兵豫之父子忘背国恩孰不愿食其肉倘欲驱除何难之有痛言利害泪满茵席达兰顾谓乌珠曰江南有忠臣如此何虑不能立国越夕使人导意云侍郎少休已驰奏矣是冬废豫使谓公曰归报皇帝强梗扫去自此和议无复间沮但有当议者须不倦以终之于是仗节来归上在建康嘉叹累日好赐特异径除所借职任明年又往见达兰于忻州出诸军招诱蜡弹旗榜八百余通诘公南朝欲和而沿边日获奸细文字语言无理奉使只是款兵相陷耳公曰奉命三至专以讲信修睦诸将徒见往返犹豫各欲乘时求尺寸之功若和议一定朝廷明降约束岂复敢尔二酋相视无语初公之族有留京师者季父存欲结太行义士径捣敌巢闻公拘云中密以书来公大喜报曰某自恨疲弩无以佐中兴辱示正惬素心幸竟斯事未及发而谋泄捕存党囚之地窖至是知为公之族押存付公存既还改合入官金遣张通古乌陵思谋报聘使者朝谒进止祥华曲尽臣礼上因赐之酒思谋从容进曰陛下知刘齐之废否始因王某极言遂了此事真口伐也北朝将相重之如山斗真社稷臣也上欣然领略于公益加信任御札令公筹度别以金器龙脑茶具赐思谋公亦拜赐复借龙图阁学士为迎奉梓宫使兼请太母渊圣祖宗山陵上念东朝之归尤切丁宁告戒曲尽圣情公泣拜以辞期于必济既见达兰具宣上旨愿亲见郎主敬请达兰曰非不欲侍郎至阙下但九州之外荒寒殊甚恐不堪疲劳公请益力明日遂行既见金主谢其废刘豫且伸祈请金主喜公之来抚存加厚且曰山川太远不易跋涉公曰今日获遂所请少效使臣之职虽死之日犹生之年讵敢以登顿为劳嗟异良久宴犒连三日遂决大议归奏上大悦除龙图阁学士侍读金遣萧哲石庆元来及境而不肯进扬言曰此非他使之比岂可用平时礼数相待邀索百端迓客者无如何副使蓝公佐密奏乞命公一行借端明殿学士侍读充计议使哲等闻之即日渡淮相见有慙色曰何烦端明远来既就馆舍公索副书及议朝见哲愕然既不肯道所以欲损朝仪公曰如此则当再诣河北军前议之退取旨欲行以足疮未能陛辞哲问馆伴使两日不见王端明来议事何耶上闻之即俾公力疾入令子弟扶掖赐坐命以调护哲问连日何不一见公曰签宣不遵故事已被命再行当少须回日议定二人作番语久之徐谓公曰不决于此远去何为公曰既不相听何惮一行哲方肯啓国书割地讲和许还两宫及梓宫既入见起居进书如仪上下喜怿九年春真除端明殿学士签书枢密院事赐进士出身充迎护梓宫奉还两宫交割地界使兼东京留守公既交河南宽恤疲民大发仓庾以赈穷乏乌珠留数百人取伪齐留犒名落後司公闻其纷扰尽逐之民始安堵乌珠一亲信人见公若欲有言公屏人问之遂言乌珠有害达兰之意公厚遣之即密奏乞令张俊守东京韩世忠守南京岳飞守西京吴玠守长安张浚建督府尽护诸将以备不虞上以示大臣持不行连促北去六月渡河北至会宁府闻向之主和者尽为乌珠所屠事皆变矣既见金主令耶律绍文作宣勘官传言问公还知元帅达兰等罪否答以不知又问交了许多疆界而略不及岁币却欲一一如请只知有元帅不知有北朝耶公曰前日萧哲等齎书至本朝许割河南归梓宫太母渊圣天下皆以金国不忘海上之盟庶几与民休息行人则往来通两朝之好耳岂有他哉是日风雪寒苦诘难数十反公忠愤激烈辞气不少沮见者为之丧胆归馆又遣绍文就驿受辞公对如初度必不得归通夕密语副蓝公佐曰前过汴都已知事变亟奏上矣知合若归乞检前奏急命诸将分守所归侵疆无令轻失中原敌至今日已如强弩之末乌珠不达时变贪而无亲将自取毙往回幽燕父老谈道本朝未始不泣下咸知君明臣良必大恢复忍死以待太平金之贵臣往往输诚相结衆叛亲离久矣他日若来请和当尽复土疆则可与议

又去年尝稟宰执乞不发归正人切无苟且以失後图自是四旬无所闻十一月庚辰绍文至驿传言问公向拘云中本无还期曾不知恩反贰我君臣今遣副归以待待报将分驿与公佐酌别云区区悉已前白无一语及其私留河间六年金以公为平蛮三路转运使公力拒之驱迫日甚公曰君命无贰臣之节也贰而苟官爵伦实耻之又胁以威且曰受命则生不受则死公乃振衣冠南望行阙再拜稽首厉声言曰先臣文正公旦勲业炳然臣为国将命猥被拘留复以伪命见逼敢爱一死上孤国恩以辱君命于是大恟斥骂使者听其绞死实十四年七月戊午也是日秋宇澄霁忽陰云晦冥风雹雨雪咫尺不相覩城郭内外地皆震裂数日不已河间人惧甚急立公祠家绘公像以奉之明年公之讞始闻天子震悼特辍视朝报其家赠左通议大夫赐银绢各千敕就平江府安葬仍令有司应办享年六十有一娶陈氏封安康郡夫人二子述朝请郎通判光州军州事赠奉直大夫逸朝请大夫主管华州云台观述之子五人朴承奉郎棣承直郎监三省枢密院激赏库杞修职郎监行在打套局枬中奉大夫守将作监兼知临安府主管两浙西路安抚司公事枢将仕郎曾孙五煥炎从事郎新监衢州都酒务炳郊剡女七逸之子四人梓通直郎机文林郎新临安府观察推官棠迪功郎新光州録事参军杓迪功郎新监常州薛堰犒赏酒库曾孙八焯从事郎隆兴府分宁县主簿煖煊燧燠熺燿燿燿女九公之亡也时相专和戎之功又忌公之死节令公家止称在金身亡故恤典有未尽孝宗淳熙初搜访知之始命杞枬机皆为将仕郎述自闻凶问擗踊号絶勺饮不入口者五日是冬冒万死与从兄遵同北方豪侠访得公之骨于河间归葬于长洲县阳山大石坞之原呜呼古之肤使止以专对为能若公前後五反乌珠尼雅满达兰等皆贪如狼暴如虎未易以口舌辩也性根忠义藐视凶酋随宜应对悉中事机以济大事投身鼎镬刀锯之间气不少讐智意横出他人莫及临死生之际又洞达勇决如此非烈丈夫能之乎述等摭公言动及使事始末惧祸久不敢出郎中鍾离公松尝为使属知公尤详乾道间始敢状公之行绍兴元年请諡于朝礼部尚书倪公思为太常博士议以节愍易名钥时在考功为之覆諡又二十有二年当嘉定之四年公之诸孙求铭距公之亡盖六十八年矣比岁权臣妄开衅端横挑强邻以为功在旬月兵连祸结始谋讲解无敢行者枬时为城南厢官帅臣言其有异才又自以大父之志未展被命辞母而行至再至三卒就和议可谓不忝其先矣擢帅淮西进尹京邑皆有声绩其进用未艾也于是列公之节请于朝特赠资政殿大学士庙号忠肃而公之名益显矣钥妻祖工部尚书侯实与晋公分派居宛丘公最後出疆之时语尚书曰此归当讲宗盟而竟不还两家寻此盟久矣闽舶淹公之从孙行也与钥締婚又助之请钥生晚窃慕公之节义有年矣谨摭行状之大概参以槐庭济美集中兴小历遗史雪溪王公銍所作御劔铭序与其子明清挥尘録及网罗旧闻以就此碑大惧骈散之文不足以发潜德之万一抑闻之韩信不顾郦生之烹李靖以唐俭为安足惜故使絶域者惟恐其用兵于後公每先以郦生唐俭自处将行必请戒飭诸将练兵备器脱有可乘之机不必以臣为虑虽闲居于外时时贻书宰相请措置两淮山水寨以陕西弓弩手法行之沿边以俟大举间有召命家人相贺则泣曰大将富贵俱极谁肯进讨见上必倾尽愚直又将触怒大臣未知死所何贺之有然则公之志岂专以求和为功哉呜呼天未悔祸强敌尚存九京之英必有遗恨此忠臣志士所以痛愤而不能自己也一时假吏必取通儒与之俱其有才智可与同患难者虽屠沽所不废自以品秩虽微事君以人不敢不勉闻有欲以货取者辄矣曰是岂所以遗子孙取及其被留士子十余人竞愿从公止许留七人有蜀士张大时者年最高且多病终不相舍其能得士心又如此乌珠之犯顺昌也逆风暴雨戎垒深泞大为刘公錡所破乌珠轻骑宵遯行一舍间知不雨始稽顙三叹曰小人不信王端

明说南朝国富兵强徒亏和好咫尺不雨是天不容南牧而小人违天也乃折箭誓不复敢轻举三日驰至韩州刘公後亲以语公之长子且曰画淮之约何遽如许苟绎公之言徐与之议则版图归复何止河南而已刘公之言必不苟呜呼此尤非人力之所能为也公初自奋于稠人中骤膺钦宗之眷後又身任南北之议其事日伟及其死节则虽有异议者至是翕然叹服惟公之终始天下喜闻而乐道之而登载于书者各诵所闻不能齐一今特表公之大节以厉世之为臣子者其间小有异同尚可略云铭曰

三槐之王族系繁昌衣冠鼎盛名德相望公生其间不扶而直少慕奇伟人未之识干戈云扰忽逼神都主忧臣辱颠倒庙谟奋由布衣亲上方略钦宗忠之赐劔予橐徒手一呼得数万人欲奉两宫决围南巡谋不及用出狩于北奉玺劝进求使絕域高皇圣孝五以节行凶酋虓暴望者震惊惟公忠勇以死自誓视之无如而夺之气随机肆辩出古入今得其要领以副上心事成功高忌其大用晚遭囚拘疑有陰中欲啖以官死生立分痛哭怒骂卒殉以身天作风雷地为震裂或者蔽之使不上彻有子死孝终归其骸恤典虽颁烈士所哀公之有行请益兵备机有可乘虽烹何畏分驿之际语不及私死轻鸿毛了无异辞公亦勤止万里往反全軀之臣尚蘖其短迨其执节无不心降鬼必厉贼公乎不亡孙有祖风捐軀将命屡探虎穴和议以定帅准尹京得请于朝隆名世祠宠数孔昭我作铭文会粹衆说万世臣子仰止忠烈

宝谟阁待制赠通议大夫陈公神道碑

嘉泰三年集英殿修撰陈公告老于朝天子叹曰此吾旧学且书命之臣也除宝谟阁待制遗奏闻赠四官録其後所以饰其终者如故典门弟子哭之失声里人聚而相吊四方士夫闻之无不?伤者盖非他人云亡之比也公讳傳良字君举其先自闽徙温州瑞安县帆游乡澍村里至公八世矣曾祖靖祖邦父彬皆不仕父以公贵累赠朝请大夫妣徐氏赠令人朝请遂于易教授乡里以笃行称公天分高胜其于学问心悟神解而苦志自勉精力亦絶人隆师亲友有不可解于心者兴化刘复之朔以南省第一人来为司户参军摄教官得公程文以为絶出公之年甚少也而名已高开门受徒于仙岩僧舍士子莫不归敬薛寺正士龙见公问所安公曰母不敬士龙曰比参倚如何公释然增进归心薛氏後又相从于漏上读书一日千里其为薛氏祭文云我昔自喜壁立倚天见兄梅潭忽若坠渊梅潭即仙岩也伊洛之学东南之士自龟山杨公时建安游公醉之外惟永嘉许公景衡周公行已数公亲见伊川先生得其传以归中兴以来言理性之学者宗永嘉惟薛氏後出加以考订千载自井田王制司马法八阵图之属该通委曲真可施之实用凡今名士得其说者小之则擅塲屋之名大可以行于临民治军之际公游从最久造詣最深以之研精经史贯穿百氏以斯文为己任综理当世之务考核旧闻于治道可以兴滯补敝复古至道条画本末粲如也本朝名公鉅卿不可缕数自韦布而名动宇内者不过数人公自为举子业其所论着如六经论等文所在流播几于家有其书蜀中文学最盛读之者无不动色文体为公一变至传入夷貊视前贤为尤盛乾道六年始入太学士无贤不肖敛衽下风八年公之高弟蔡公幼学为省元公次之徐公谊又次之薛公叔似鲍君瀟刘君春胡君时等皆乡郡人非公之友则其徒也尤为一时盛事既登甲科朝野想望风采授泰州教授以归参政龚公茂良帅江西以书币招之愿与定交公曰此古人羔雁之礼不行于世有年矣善辞之未赴会太学録阙求之者衆龚公实行宰相事奏孝宗曰待次不改阙初

官不堂除陛下良法也太学録一阙而睥睨者衆臣欲择取名儒为士林所推者越拘挛而用之则人自服矣上问为谁以公对上曰是朕所素知者除命一下果无异辞就职几月车驾幸学改承奉郎龚公既罢政亦寔有相嫉者添差通判福州帅相梁公克家得公喜甚以政委之公悉心裨赞不事形迹卒以专擅论罢时淳熙七年也寻主管台州崇道观起知桂阳军闲居八年始赴郡提举荆湖南路常平茶盐事就迁转运判官改两浙西路提点刑狱公在桂阳蠲除宿负罢弛斜科仓司则补余诸郡米至十万斛漕司亦蠲钱数万缗力讲荒政所及者广进登极银三千两属方救荒力不能办申请减额损三之二实惠遂及一方以服勤使事尝感寒疾至是以奏事再入修门须鬓如雪丞相留公正一见叹曰几年陈君举尚可使外补耶奏留为吏部员外郎初对上曰卿去国几何时朕欲见卿久矣知卿学问深醇有所着书进来时上临朝渊默罕有圣语公敬谢而退以周礼说进擢秘书少监训词曰朕日御便朝廷见郎吏有郎白首色夷而气温候者赞其名则汝傅良也朝列传诵实黄公裳之词也兼实録院检讨官皇子嘉王府妙选官寮以公兼赞读未几除起居舍人兼权中书舍人期年始迁起居郎绍熙末年龙楼问寝不以时自大臣而下更进说言从班多连名腾奏或同班叩请公自以受不世之遇必欲身任其责请对直前几无虚月剴切痛愤指陈利害无所不用其至盖尝赞嘉邸为中宫言之又尝奏疏谓臣等在王邸于古今父子君臣之际人之大伦天地之正义以开导贤王而会庆阙上觴之礼长至亏称贺之仪区区口耳之感必不能胜躬行之化纸上之习必不如家传之法今既上失三宫之欢则臣等讲读皆为空言矣其余骨鲠之言有敌已以下所不能堪者上终不加谴而言亦不用一日奏云陛下屡许臣以出又令传旨于庙堂而复不然臣贪恋厚恩未忍决去容臣遂思补过更图入奏若不垂听则有致为臣而去耳又从而草奏曲尽事节犯颜极论度上意不回遂上挂冠之奏上虽不受玉音赐可公即申省乞致仕宰辅留之不可既行授秘阁修撰嘉王府赞读皇上御极以中书舍人召还兼侍讲兼直学士院实録院同修撰谓可行素蘊矣而言者指其学术不正罢为提举江州太平兴国宫庆元二年复劾其在太上朝奏对狂率降三官罢祠嘉泰二年叙复元官再畀祠禄遂除泉州以病力辞除集英殿修撰病革谢事遂有次对之命十一月十有二日终于里第享年六十有七积官至朝议大夫爵永嘉县开国男食邑三百户娶张氏名幼昭字景惠主管礼兵部架阁文字孝愷之女以妇德着闻先公九年卒子男二人师辙迪功郎安丰军寿春县主簿师朴承务郎女七人长适迪功郎监镇江府淩口酒库潘子顺次适从政郎新福州连江县丞薛师雍次适迪功郎处州州学教授林子燕次适迪功郎新福州连江县尉徐冲次适进士张绍次适进士张畴一尚幼令人葬于前山开禧元年三月庚申二子奉公之丧合焉呜呼以公之抱负伟杰学博而精观书别有高识作文自出机杼类非今人所可企及求之古人亦未易多得也受知三朝掌内外制经帷史馆不为不遇而名高多忌卒不得究其经世之学为可痛也公行谊着于乡曲述作擅于当世不待屡书敢摭其论奏之大者列之然後知其非谀墓之词也公之赴郡免奏事而去归觐光宗以旧欲奏之孝宗者陈之盖公忧国之心泽民之具其说不易谓艺祖创业垂统无非可传之法而深仁厚泽裕我後人则专以爱惜民力为本考之故牒自建隆至景德四十五年间南征北伐未尝无事而金银钱帛粮草杂物七千一百四十八万计在州县不会古所谓富藏天下者也诸道上供随所输送初无定额留州钱物虽尽曰系省而不尽取大中祥符元年三司始奏立上供税额熙宁用事者始取艺祖之约束一切纷更之新法既行增上供之额一倍至崇宁遂增数倍此特上供耳其他杂物熙宁则有令项封椿元丰则有无额上供宣和之经制绍兴之总制月桩皆至今为额而折帛和买之类不预焉茶引尽归都茶塲盐钞

尽归榷货务秋苗以十之八九为纲运是皆不在州县于是取之斛面取之折变取之科敷抑配赃罚而民之困极矣方今之患何但夷狄盖天命之永不永在民力之宽不宽岂不甚可畏哉上曰莫急于此但以处置为难公奏第三劄子乃是处置之说既奏褒美再三其大略曰嗣位之初诏为宽民置局讲究而民穷如故盖以裁抑细微或蠲空张之数未有以称明诏慰民望也国家财力竭于养兵又莫甚于江上之军故每欲省赋朝廷以为可则版曹不可版曹可则总领不可总领可则都统司不可以谓之御前军马虽朝廷不得知谓之大军钱粮虽版曹不得预中外势分职掌不同事权不一施行不专虽欲宽民得乎使都统司之兵与向者在制置司时无异总领所与向者在转运司时无异事出一体而後可议宽民力矣转对又论艺祖治大而不治细以上书人文字令知制诰看详升降以闻次对章奏下尚书省参详人主所自择不过台省长官岂不甚易行哉又尝论役法谓免役钱者本以恤民使出钱雇役而逸其力也自罢募户长壮丁而取其钱今隸总制之类于是役者白着而法不得不坏保正长催科是以保甲法乱役法而行之也熙宁自有役法五等簿是也自有保甲法鱼鳞簿是也五等则通县计之鱼鳞以比屋计之保甲但以稽察盗贼与免役初不相关熙宁七年始以保丁充甲头催税而耆户长壮丁之属以次罢募利其雇钱而封椿之法起矣元丰遂着为令以甲头同大保长催科元佑匆匆复旧随即纷更至绍圣二年催科悉用大保长役法转而为保甲嘉佑以前固无此法至此又非王安石之旧特章厚为之今士夫耻言安石之为人指章厚为罪魁而方世守其变乱之余以为成宪万古设法一安石能改之章厚能力行之此斯民最大之害乃若出于三代之旧而莫敢议有议之者则付之有司不过检坐见行条法申严行下此臣尤所未喻也诚能不以保甲法乱役法虽未足以尽宽民力亦可谓至恩矣进故事以真宗诏两浙福建荆湖身丁钱并特除放其论尤详以为减折帛不如身丁切于穷民此皆公平时考古验今可举而行非若泛然美观之言卒不得见于用若其封还词头遇事辄发未易悉数如请还黄裳给事中则引唐吕元膺绍兴程瑀以为比论张子仁之建节则请先处分留正之去留吴挺之除代而其甚难者莫如陈源与率逢原二者源之贯盈幸不及诛忽除内侍省押班琐闥摄事者缴章五上人皆传诵大臣力请触雷霆之怒几不自全一为书行公议沸腾党与凶焰不可向迓而公独当之逢原龕暴恃有奥援所至凶横其在池阳几至军变为总领郑湜所发按其偏裨上命枢臣镌戒方待罪间自副统制陞都统公又论之源供职自如而词命不行终不得俸逢原先被宣劄已自书衔而公于二者执奏再三终不奉诏以至乞身而去公去未几而内禅子仁乞不得节钺源亦罢去逢原以病废惟此三事无敢婴其锋者公神色不动来则缴奏旁观者为之寒心而外间罕知之者钥与公同生于丁巳少我九日自分教东嘉为布衣交义兼师友後虽一同朝蹟而情义日笃一旦同在西掖同摄北门相与如弟兄然至于同寅协恭尤非他人之比艺祖东向宗庙大典集议至再始正百年之礼而台諫有异论钥极论之丞相赵公宣旨钥又执不可公从旁力赞其决而事遂定谢知合渊以太母之弟有旨请给等依禄格全支公已书行而钥駁之再命特与书行公上奏先具钥之駁章且曰楼钥委是允当始知臣失于点检不及论奏若更书行臣有三罪一则迎合圣意不敢执奏二则冲改旨挥使有司无所凭守三则耻过遂非无见善则迁之义欲望追寝御笔仍正臣卤莽之罪其事遂已呜呼孰有负重名于时致身至此而服义引愿同济公议如公者乎汲引人才如恐不及在湖南应诏荐宋文仲吴猎蒋砺杨昭在朝则荐朱熹叶适吴仁杰王明清修中苟知其贤不复以私嫌为忌其他成就延誉使就声名者不知其几也博极羣书而于春秋左氏尤究极圣人制作之本意左氏翼经之深旨着春秋後传左氏章旨二书盖经止获麟孔子卒传止韩魏反而

喪之之後殆未有此書也願見不可得則曰此吾身後之書近既得之誦讀不已不揣而為之序其門人遂以銘為請矧欲述公行事或恐有觸忌之嫌自以投閑十有三年已挂衣冠視之何知公為最詳若畏避而沒其實豈不負吾亡友會粹未集而病深恐湔先朝露不究此志小愈遂扶輿而畢之公風度高遠動輒過人詩律之精深字畫之遒媚登覽高致吟諷低昂親之則使人意消王謝韻度尚可想也方主上在宮邸時寮案以詩為壽惟翊善黃公與公之詩皆有諷諫上為置酒各親書所上詩謝之公後嘗奏知以御札登諸石而跋其下以其稿示矧未及刻而公歸訪求此藁不可復得猶記其略云季札觀樂歌頌而曰哀而不愁太史公讀虞書至于君臣相勅維是几安未嘗不流涕也成王作頌推己懲艾可不謂戰戰恐懼善守善終哉蓋頌者不專于美盛德之形容皆敕戒之義秦斯以來此義殆絕矧讀之為之感咽嗚呼此又先儒之所未發也銘曰溫居瀛壖儒學之淵間氣所鍾挺生斯賢舒向金玉游夏淵源羣書博極本末貫穿退然布衣名震八埏晚登周行帝席為前典刑具存訓詞是專王邸螭陛史館經筵獨當雷霆力欲回天經世澤民齎志終焉天之生才夫豈偶然儲神毓秀其必有年宦匪不达受才則全道之不行賴有遺編後有百載復見儒先哀哉止齋見此銘镌

攻媿集卷九十五

卷九十六

钦定四库全书

攻媿集卷九十六

宋 楼钥 撰

神道碑

宝谟阁待制致仕特赠龙图阁学士忠肃彭公神道碑

皇上践阼之十有四年十有一月乙亥诏楼钥林大中赴行在大中先至首言故吏部侍郎彭龟年之忠乞赐褒赠嘉定改元钥求对又以为请且録其谏草以进皇帝为之怆悼诏赠宝谟阁直学士仍与一子陞擢既又御批彭龟年系朕潜藩旧学当权臣用事之始首能抗疏折其奸萌褒恤之典理宜优异虽已追赠未称朕怀可特加赠龙图阁学士其子钦与寺监簿差遣三年礼部尚书章穎侍御史刘槩起居郎黄中就讲筵同进公家所被赐御书御制正邪论且言公之尽忠知无不言首论侂冑之奸为其沮抑抱恨以歿乞赐美諡上赐諡忠肃又云是肃敬之意恐有司行之迟缓当为批出八月三人又因晚讲奏谢上云彭龟年忠鯁可嘉宜得此諡使人人如此必能寘人主于无过之地先是绍熙五年七月甲子上受内禪公时以右史兼嘉王府直讲上在重华宫一时旧寮惟公最承睿眷宣召几无虚日未几由西掖迁贰卿方赵公汝愚决大策之初曾遣韩侂冑奏宪圣慈烈皇后有一日之劳至是寢以出入两宫始有窃弄威权之渐公极论之且乞去公除职与郡侂冑罢知合门等职事转一官内祠时钥为给事中大中为中书舍人同状缴奏上批彭龟年除职与郡已为优异韩侂冑无罪辞剧就闲可与书行钥与大中再奏龟年以贰卿得此若以为优异侂冑无故转承宣使非优异乎若以侂冑为无罪龟年以尽忠陛下直言无隐何罪之有龟年一去必不复来侂冑内祠日在左右若并使出外则人言自息矣钥遂为吏部尚书大中竟由给事中为吏部侍郎寻皆补外郡钥得婺不赴而奉祠公在荆南亦以疾丐闲林公在庆元罢归三人者镌职罢祠至于一再惟公之谪尤重侂冑擅权之久罪恶贯盈妄开兵端举世震动主上奋发威断加以诛殛中外称快故翌日而二人趣还独公不幸已成千古不及见更化之盛士大夫莫不痛惜之公字子寿世为临江军清江县人曾祖广祖愈考文通俱不仕考以公贵赠朝奉大夫妣杨氏累赠硕人公七岁而孤奉母尽孝如成人幼颖异读书能晓大义比长得程氏易读之至忘寢食年十八荐于乡三预计偕登乾道五年进士第授左迪功郎袁州宜春县尉时丞相赵忠定公将漕公以书言月桩钱病民赵公因计为缗钱七十万而无名者强半皆出于苛敛赵公首取最甚者如宜春麴引之类先罢之乃以闻获盗八人自以为非亲捕不就赏公方初筮而利民自立已如此关陞从政郎调吉州安福县丞县有寅陂灌田万三千余亩强宗锢其利岁以旱告按图疏治陂成而岁稔郡委檢察保甲而无其籍恍然曰是县之根本不务可乎乃以法聯合统纪又户别其老病强弱之丁士农工贾之业租税有无多寡之数调夫既均後有赈贷按籍立办他日检旱赖此尤得其要蠲放不及二分而民间欢服以为前此未有得实如此者请藏此牒以为後

法育婴儿救疫疾虽不禁巫覡之禴禴而各使勉病者以服药全活尤衆淳熙十二年用举主改宣教郎以母硕人年高丐祠便养主管建昌军仙都观自初第而归益笃于学以母自欺名斋以书问南轩张公中庸语孟大义至是义理愈明开发後进抠衣北面者日衆复与刘子澄清之往复问辩时相与折衷于晦庵朱公而学愈成矣再请祠未滿而丁内艰执丧尽礼诚信备极葬之日观者叹其可法以致敬致乐致忧致哀致严哀集格言类为一书名五致録晚又定祭仪行于家服除吏部尚书郑公侨兵部尚书张公杓同荐之得旨引见时光宗初即位内降颇多公首论正始之道愿以仁宗杜权要请属为法以崇宁御笔为戒公又言嘉王傅相少而侍御多请用司马光令伴读官提举左右之议使府寮之势重于侍御道义之训密于宴游光宗首肯久之且曰当世急务也又以开乐之初进逸豫之戒谓国家大難未复而内外宴安犹袭宣和之旧淫侈成习光宗曰风俗骄侈太甚至此极矣朕日夜思所以革之因奏陛下为之不难风俗之变未有不自上始也二月除太学博士时殿中侍御史刘公光祖因论带御器械吴端改太府少卿公上疏乞复其位又贻书宰相云祖宗尝改易差除以伸台谏之气不闻改易台谏以伸幸臣之私有谏大夫同知贡举欲大变文格下太学选经义诗赋论策各二百篇为式长以督课学官公独不可曰使士明经术熟古文则文格自正校文已为下策又使之习时文此非所谓教也虽忤谏官意然遂不复选二年兼魏王府教授六月除国子监丞郊礼遇雨祠于望祭光宗意郁郁不豫至展恭谢之日公具嘉佑中文潞公因设醺宿殿中故事白庙堂又言重华命押医官下都堂亦欲大臣共此忧责次日乃闻内引宰执三年许国公始朝参公为言保富贵之道无过恭俭又集礼记论孟子史中朝见之礼为朝参须知且言虽与嘉王同行在礼世子不可与同名非惟名不可同色色不当相似至生日又以恭俭惟德为韵作四诗寿之六月侍御史林公大中辟公充御史台主簿谓公操行坚正不为诡随遇事通明不事沽激八月以旧班对乞复经筵典故谓劝讲之臣当用明经之士人各有长经须素业不应不问所学例以序迁又谓宣召讲官多用昼接不如夜直之有益也光宗云亲儒生最有益十二月林公以论事除吏部侍郎公乞去张公叔椿代林再奏乞留卒不就四年正月除司农寺丞三月除秘书郎先是外传召姜特立公白丞相留公恐非虚传至是果然留公引李绛事乞退公率同馆论奏又勉枢廷争之遂寝五月兼嘉王府直讲论说经理精切明白裨益为多不胜书书其大者尝论梁焘辨邪正之奏公曰此正是元佑末年小人将进君子将退之时不可不详览王曰君子小人不可参用参用则小人胜公因具述元佑绍圣君子小人进退之大略王一日亲制邪正辨以赐公正指焘奏而发又尝赐所书瑶山诗乃光宗在东宫时作有雪诗云间阎多冻馁广厦媿膏粱公言人主当如是用心尝因讲诗王曰下以风刺上已是人臣委曲要知为君者须使人臣直言其事方是公曰愿大王无忘此意而推广之则善言至矣读曾肇奏议因言用人须先识邪正王亲题其说于奏议上赞读沈公有开讲三风十愆谓十不可有一王曰要是病根全在比顽童一比顽童何事不有公称赞不已亦请王题讲义上闻王宴居书知人难三字于坐右公质之于王王曰然毕竟人如何知君子以小人以小人小人亦以君子为小人正恐错看尔公曰尧舜亦以为难也光宗久不诣重华宫公与同馆入疏又以会庆节未举进香之礼自上封事力请俱不报十二月除起居舍人明年正月直前奏事光宗曰久欲见卿说话此官待有学识人方除公谢且进内治圣鑒奏以祖宗家法集为此书光宗曰祖宗家法最善汉唐所不及待外戚尤严不可容易坏了公对曰圣论及此天下之福祖宗不委以权乃是爱亲戚之道此书宦官女子之防尤严恐不得进御光宗云不至是三月直前奏起居注乃系日之书言动无不记者今一月四次书免到宫陛下半年不出如此已书三十余

次以貽後世实累圣德四月驾幸玉津园公言于宰相谓近舍聚景而远幸玉津不奉三宫而独出宴游宰执以公言乞恭请公亦入奏会被命祷雨因言两宫不和则天下不和天下不和则天地不和盖天地和则雨未有不和而雨者自是屡许过宫或仗集而不出侍从奏陈不效皆居家待罪公又独奏误以臣充嘉王府讲读之官正欲臣等教以父子君臣之道臣闻身教者从言教者讼陛下以身教臣以言教者也言岂若身之切哉五月重华不豫已奏告公与侍从台谏请对不果八日戊辰公缴纳告敕乞窜逐待命江浒戊寅寿皇服药赦下始入城癸未公念屡乞对及求去至今日不可不极谏拜讫独不离班位伏地敏额久不已血渍颧腮搢笏取劄子置龙墀上再拜欲辞出始传旨上殿光宗云知卿忠直理会何事公奏今日无大于不过宫事光宗云须用去公又极言陛下屡许羣臣一入则又不然内外不通祸乱不闻臣实痛心光宗为之惨然曰终当去六月戊戌寿皇升遐七月甲子主上受内禅是晚召公对于大堂圣容蹙额云前但闻建储之议亦自可息浮言岂知遽践大位泣辞不许至今怔忡公奏此乃宗庙社稷所系陛下亦不得而辞首乞奏知太上皇因拟劄本上即写入又问初政及人物明日再见犹云朕一日不曾食因泣下又言昨太匆匆参决可尔公奏今只得尽人子事亲之诚心再拟起居劄子乞日进一通又与翊善黄公裳同奏往朝南内因定过宫之礼乞先一日入奏率百官恭谢壬申擢中书舍人庚辰上朝泰安宫至则寝门闭矣拜表牋而退上尝问恐太上皇未肯过泰安如何公奏陛下本出于不得已必不以位为乐况宫室乎寿皇梓宫在殡且居丧次于礼为正旬日间三降旨经营泰安纷纷不定太上微疾未瘳不若且居南内以休息圣躬陛下少留重华以居丧听政从之代言之初李孝纯孝友转右武大夫带行遥刺公封还词头谓固当推恩母党然上事三宫礼有隆杀恩有後先乞候三宫戚属次第推恩内侍符滌得罪于太上而差干办泰安宫刘庆祖已带遥郡承宣使而以太上随龙人落阶官公皆缴奏上于刘庆祖事批可与书行公又奏曰庆祖无官可转止有建节若念其忠劝不若任之以事不必优之以官臣非为庆祖惜此一官盖为朝廷惜此一门陛下自登大宝听言如流忽于此事首降可与书行指挥夫可与书行乃近世敝令也使其可行臣即书矣何待再令使不可行岂敢因再令而书哉上尝言中宫未建圣节未立随龙人恩例之类直俟祔庙後施行公即极口称赞圣德後随龙命下封还再四且言祖宗随龙人止转一官元符中方转两官如徐积何执中除待制侍讲亦止转一官靖康以後方有四官之例诚是太优今于已分正当过为裁损酌中推恩命遂寝因对上语公曰朕尚未见父母如何敢恩及下人孰重孰轻且称缴章为是然公亦以此等故不久而迁矣上问讲筵所奏谅闇罢讲旧例公奏多故以来两三月不与儒生讲矣不可不以为急务上袖出二纸一具太上讲筵书目一具潜邸讲堂书目谓讲筵讲书太少公奏今有机务不比讲堂专一读书上云朝退亦无事恐自怠惰况酬应万务非多读书不可又奏人君之学与书生不同惟能虚心受谏迁善改过乃圣学第一事不在多也他日又出二纸一御书经史十件春秋礼记诗书孟子通监唐书三朝宝训奏议长编节本一书臣寮十人黄裳陈傅良彭龟年黄由沈有开朱熹李燾京镗黄艾邓駟公请圣意上云朕欠读书太上读许多书养德东宫垂二十年今欲添讲官至十员各专讲一件两日一次五人上讲早二件晚三件早依旧讲殿上晚只用小衫依讲堂例坐讲公曰讲学愈切此帝王之举也若少读而精庶几有益又曰十人充讲官否陛下若招徠一世之杰如朱熹辈方厌人望不可专以潜邸学官为之寻除侍讲而待制朱公中书舍人陈公俱以召至公引傅尧俞乞班苏颂之下以请继除侍读三辞而後受御笔举御史有不植党与之言公奏但当察君子小人不可问党与元佑党籍第一人是司马光小人陷君子变白为黑何所不有又言近差除多自中出此不足

为威断适为小人所卖耳九月除吏部侍郎公知事势渐变乃陈四太之说其略曰用臣太骤处臣太高臣迹太危臣分太满因震雷暴雨言近日好出不测之号令故天应以不测之风雷因极陈今日小人窃弄权柄皆起于号令之不测借吏部尚书充金国吊祭接送伴使至平江奏汉元帝时日青无光恭显指为堪猛用事之咎及斥堪猛复有日变始切责言者小人机心古今一辙楚州应诏一疏尤极剴切谓信任君子之意未孚于人而昵比小人之迹已见于外君子告陛下之言小人或得预闻而小人误陛下之事君子或不能知送伴至楚闻朱公奉祠又奏君子小人消长甚详皆不得报及归屡乞对不许自知不能久矣明堂礼成封清江县开国男食邑三百户公见庙堂之权日轻侂冑之势愈重言官又多出其门于是历数其奸大要云进退大臣更易言路皆初政最关大体者大臣或不能知而侂冑知之假托声势窃弄威福陛下总揽之权恐为此人所盗矣时十二月九日也上闻奏甚骇且曰只为亲戚故信之不谓如此奏事退已闻下之中书晚又闻复取以入知必不济再入一奏丞相以闻上云侂冑是亲戚龟年是旧学讲堂五人一死一忧去二人俱罢只有龟年在又性直肯言今当如何丞相陈两留之说已而侂冑虽罢职而予内祠公除职与郡给舍缴駁不能回也除焕章阁待制知江陵府荆湖北路安抚使公既去丞相竟论罢矣公至荆罢和籴以平米价罢沙市官买之敝治牙侖以宽商旅擢浮费以除鱼湖之输复奏修长堤教民兵乞支还备边库钱俱不报公遂以疾丐祠一请而提举江州太平兴国宫庆元二年六月以论列落职罢祠五年言者以蔡璘诬告公与赵丞相言政和中嘉王事乞加贬窜于是追三官勒停嘉泰三年秋复元官再奉兴国祠开禧二年起知赣州以疾力辞除集英殿修撰提举建宁府武夷山冲佑观俄以疾甚致其事除宝谟阁待制三月二十三日终于家享年六十有五遗奏闻特赠中奉大夫娶敖氏先三十年卒赠硕人生二子钦承事郎守司农寺主簿钜迪功郎新特差充荆湖北路提点刑狱司干办公事女四人长适进士陈复之次适乡贡进士胡梦得次适从政郎扬州江都县丞章瑑次适进士敖清之再娶燕王宫宣州位宗室潭州益阳县丞赠中大夫伯攄之女封硕人後二年卒生一子铉承务郎新监江州在城税务孙男二人滋沄孙女四人俱幼七月壬午诸孤奉公之柩窆于县之建安乡金家井之原从治命也公性资刚方学识正大而议论尤为简严劲直善恶是非务尽道理义所当为白刃可蹈正色立朝其爱君忧世之诚先见之识敢言之气皆人所难及故公议浩然归重晚既投闲专以养性读书为事扁所居曰止堂悠然自得几微不见于顔面宾客非亲与贤不妄交郡县吏乘时罗织公之亲党文致之罪潜窥陰伺欲捃摭细微以媚权幸公视之如无彼亦不得毫毛之隙自伪学之说兴鲜不变者公于关洛之书益加涵咏着止堂训蒙一书盖终始不变者也闻苏师旦为节度使曰此韩氏之阳虎也其祸韩氏必矣及闻用兵曰祸其在此乎皆如公言着内治圣鉴二十卷训蒙经解奏议外制并表牋杂着合为若干卷藏于家塾钥幸同朝一见如故相与日厚公之三子求铭谓知公之深者莫如钥偶然未死尚何辞铭曰

矫矫彭公天予刚介学问渊邃言议正大自其筮仕忧国爱民登朝屡奏心乎爱君嘉邸简寮极天下选遇事献规务纳于善重华违豫问寝有愆朝夕思虑不已于言螭陛直前龙墀敏额言虽不用忠节愈白圣主龙飞风云是依无日不召擢居纶闼开口论事略无顾避志欲回天侧目多忌权奸龁牙惟公先知抗疏逆折鸣鼓攻之上色为动公言益切闻者缩颈惊叹胆决一去一留消长遂分言者虽力无救丝棼声生势长附炎日盛太阿倒持窃弄威柄横挑强敌涂炭斯民赫然天诛公论复伸改弦之初与世更始曲突徙薪如公有几呜呼天乎不假之年

身不及见徒为知言恩光优渥施及其子公凛如生谁颺有泚九京可作非公谁归金井之原过者式之

宝谟阁待制献简孙公神道碑

开禧三年岁在丁卯余以衰疾引年幸而得谢因自念以凡才叨近列一时同朝多君子寮投闲以来相忘道术遂隔死生者多矣忽得故吏部侍郎孙公从之之子新瑞金西尉鏊之书寄示从之行述且曰先公不幸薨于庆元五年四月之丁丑葬未有铭因仍八九年重不幸二兄俱蚤世凛然门户之托惟先友有以碑于隧道以惠顾九京以少赎不孝之愆余执书以泣曰方公之薨余方遭严谴不得致生刍于前已而又自遭内艰忧苦无生意以至于今悲愧多矣老而学落本不足以铭公义激于中有不容已閱五年始克谨摭行实之大概序公平生而系以铭公讳逢吉从之其字也先世居南兰陵五季避地于吉之太和五世祖德弼奉其父银青霸之命徙名数于龙泉今为邑人曾祖文妣李氏祖叔遇通经博古倜傥有奇节雅不喜王氏学弃科举不就尤为里人所推晚以经旨授诸孙卒昌其家公以按行阜陵恩特赠承务郎妣李氏考宜文行尤高两上礼部而不及禄以公贵累赠奉直大夫妣罗氏赠令人奉直三子公居长次逢年终上犹令季逢辰终袁州守俱中儒科里人有三杰之称公生于绍兴五年时方俶扰学士解散公就学虽晚而资实俊迈课艺颺出父祖奇之自弱冠三荐于乡隆兴元年擢进士第调左迪功郎郴州司户参军乾道四年校试长沙塲屋喧动同列踰垣避之公谕以义理衆方帖息尚书沈公介为帅给事黄公鈞领漕计相与爱敬沈公留寘幕府御史刚严无敢违其意者公自以受知之深知无不言未始一语诡随始若难合终必垂听豪民匿罪越诉捕之不获吏执其子于岳麓书院沈公怒甚既得其父必欲并杖之公独不金书且曰父有罪子不知情何可从坐争之数日而後得因力辞摄事而归沈既荐公关陞既而又畀以京削或谓公未可用沈公曰但知举贤安知其他归欲力荐于朝而不果七年陞左从事郎黄公还朝荐于庙堂欲处以学官公以二弟游宦惧阙子职授常德府教授会侍郎李公焘出守常德以史局自随熟闻公之该洽先以书约见于公安倾盖之顷质以数疑公了辩如响恨得之晚且曰仪曹有京削留以待乡人今日不可失士亟以畀公枢密刘公珙少司成郑公伯熊刘公焞皆有重名荐章交上初不识面淳熙五年改宣教郎太令人春秋高不忍去左右閱两岁令人强之始授袁州萍乡县公以学道爱人为心不为赫赫名而惨怛惠利之政出于至诚值岁大禱待哺者数万荒政皆有实惠不为便文逃责事已而得雨又教民芟旱苗养禾孙是岁饥而不害例有添给别贮之久而盈溢辍四十万市谷创社仓以济贫乏择贤士主之民赖其利催科不亟不徐行雨露于膏火中民亦乐输县计既裕稍蠲其余还以予民邑之西北土瘠民窶受役甚苦公与钱市田教之义役县苗税素重为裁酌而损其额又以余力代贫民之赋为钱四百余万马驿三在境内岁有缮修刳藁之扰事又不集公既葺其陋又糴粟以给之遂有经久之计修学市书督课诸生身为之师士风大振公之政直可比古之循吏非有矫饰求名之心而邑当孔道謡诵蔼然起居舍人吴公燠出使湖陰过县贻书江西诸司曰部有贤令如此虽欲蔽贤可乎诸台竞列上治最有旨籍记士民亦至今歌之代还丁内艰服阕家居又久之十三年干办行在诸军审计司十五年九月迁国子博士十六年光宗覃恩转朝奉郎赐绯衣银鱼六月陰司农寺丞兼实录院检讨官绍熙元年五月徙秘书郎八月兼皇子嘉王府直讲二年二月雷雪交作诏求直言公疏八事以献一曰去蔽谀二曰亲讲读三曰伸论駁四曰崇气

节五曰省用度六曰惜名器七曰拔材武八曰饬戎备明白剴切深中时弊轮对论今岁初郊请遵用隆兴三年诏书节用惠民以当天心上谕公曰圜坛不尚华饬亦事天简素之意又曰中外支赐合从减省复劝上容纳狷直并论和买折帛之弊上喜悉可其奏会谏官邓駟请增谏员即擢公右正言首奏帝王经世之学根于一心大而阴阳寒暑之变化小而人民事物之统纪皆系于此心之运此心融彻发之政事则天地可位万物可育举无难者其言甚备时营繕浸广一第之建撤民居数百咨怨者衆公力言其弊公自以受天子特达之知思欲补报切磨治道七旬中章二十上多人所难言者期于不负所学无复顾忌故亦不得久居其职临安守潘景珪交结谋进邓公疏其罪反以计倾之邓移大匠公曰名为优迁而罢其言职後不可为矣两疏不报再对复论言路壅塞谏臣结舌天下利害无由上闻愿留神于逆心逊志之戒则虽失之于前尚可收之于後也并论景珪胁持台谏蔑视纪纲连章劾奏竟逐之未几公亦有迁官之命大臣奏践阼以来屡易谏臣非所以示中外若以二监处之必不肯留遂除国子司业辞不拜上谕旨曰士论所推此师儒之选也不得已就职而求去愈力公之初除或议其弱丞相留公正曰是有仁者之勇上之亲擢得人矣及是丞相曰某有献替上岂能一一垂听然不敢以是求去也公对曰宰相与谏官不同宰相平章国事不能无可否官以谏为名是专以言为职业也不得其言而不去人将狗彘我矣乌可与丞相比哉君相知其不可夺九月遂除荆湖南路提点刑狱公事两学之士数百人出祖关外人谓中兴以来才一再见公褰帷入境风采凛然守法度识大体不专按刺傅经决狱多所贷宥案牘盈几披閱参考决遣如流未数月文书为清民亦自以为不冤尤笃意人物太府卿项安世吏部吴镒方铨工部徐应龙皆所荐也五峯胡先生宏之子大时元城刘先生安世之曾孙孝昌俱隐衡岳公请官之以继贤人之世事虽不行闻者赓之两掇漕事通融有无深得计度之体衡之茶陵秋输特重公曰昔祠官使臣大军仰给于邑不免加赋今则咸无焉尚取赢可乎量出计入蠲十之三令下欢声如雷邑人相与作佛家道場三昼夜以报伐石刻词至今尸而祝之也爱惜公帑不以毫发自奉诸台月馈随以还之一无取焉参政陈公騄首疏六名士公在其中上亦念公久外尝曰孙逢吉好士人三年九月召为秘书少监训词有当今第一流人物之褒承上意也五年朝谒重华不以时公数具疏援引古谊深言之又率同馆列名以进七月主上受内禅登用旧学越三日擢公兼权尚书吏部侍郎初公入谏省翊善黄公裳曰孙直讲问学醇正劝讲多益今遂失助上曰言路得斯人尤可庆也又言所论有不乐者上曰既为言事官岂可不使之尽言盖上之在嘉邸知公已深至是首陈初政有曰陛下嗣膺大宝盖非得已愿起敬起孝数申温清抚接宗戚俾之开释太上推明陛下之本心乃若建立长秋推恩随龙人之属皆可缓也又请进学以养其明揆事以审其断凡立政造事皆明以先之断以辅之则守经事而得其宜遭变事而达其权天下可运于掌矣上欣然纳之覃恩转朝奉大夫九月除权尚书吏部侍郎赐金紫服明堂恩封庐陵县开国男食邑三百尝告丞相以和买折帛之价太重宜因初政稍议蠲减庶可固结民心丞相举行之然止限以三年非公之本意也十月擢兼侍讲公在嘉邸尝集羣经格言以献至是请讲论语盖公平日潜心此书有自得之趣欲以遂格君之志也差充孝宗?宫按行使朝方议撤秘书省以为寿康宫而以东宫为馆阁公毅然力争谓于理非顺地狭屋敝不可以奉慈极事亦竟止待制朱公熹在经筵持论切直忽奉祠而去公于上前争论甚苦因讲权輿之诗反覆紬绎以为讽上曰朱熹所言多不可用公曰熹论祧庙独与衆论不合他所说皆正理未见其不可施用愿留之以重经幄冬有震雷诏求阙失公言过失所当谨者二曰奉亲曰亲儒阙违所当讲者二曰谨爵禄曰节用度又论治体之要曰治化之原肇于宫壺

而达于外廷宫壺严则内外之禁肃外廷正则上下之职修后妃之家多啓私谒嫔御或养私身愿择老成宫嫔佐六宫之政内侍本备扫除自阁长而上愿遵旧制选年四十以上者知内省之事枢宰之职论道经邦愿万几之暇从容与之议政近习之臣职在禁密愿全其恩数勿使预事上深然之十二月假焕章阁学士提举万寿观兼侍读充馆伴金国贺正使金使需竹牛角之属期以必得公奏皆难得之物戎心无厌当遏之于初大璫王德谦典司国信所密请匪颂公卒却之庆元元年正月兼实录院同修撰使事毕入对因奏臣比缘馆伴刺求北事窃闻自孝宗上宾寢有轻视中国之心比年公卿习安将帅习媮士卒习惰风俗习侈上恬下嬉无复有枕戈复讎之意愿陛下拔材贤旌循良核名实蓄财用选将帅简精锐城要害备器械讲求孝宗内治外攘之策上尤嘉纳而公于是时已有不见容者矣待制朱公熹之去公力掇之侍郎彭公龟年补郡又论不应为近习而逐正人忤韩侂胄之意又尝扈蹕有马上回揖之者公独不顾彼又以为简驩也一日会食部中或报王喜除合门祗候公曰此乃优伶尝于内廷效朱侍讲容止以儒为戏者岂可以污清选当抗疏力争否则于经筵论之有飞语上闻五月内批与郡而王喜之命亦寢或以为出于误报而公忧国爱君之心亦云至矣潜邸恩转朝散大夫七月除知太平州累章丐祠九月提举江州太平兴国宫三年转朝请大夫五年三月起知赣州言者始疏前事沮之公素有德量未尝语人以去国之由杜门深居时事一不挂口书史自娱不以得丧介意至是以言者传播公之直节愈显而公已属疾上章纳禄矣终于里第寿六十有五五月除集英殿修撰致仕嘉定五年上以公旧学軫其遗忠特赠宝谟阁待制仍度越彝典赐諡献简娶李氏累封令人与公相继而卒子男三人録承奉郎监鄂州在城盐税务鎮迪功郎新临安府余杭县尉季即鏊也女五人进士李三聘李拓罗沂迪功郎前临江军司户罗晟通直郎前知南康军都昌县事胡杙其壻也孙男四人涣溱□□女一人尚幼六年十一月乙酉葬公于万安县龙泉乡縣津之原公资稟醇澹于外物一无所好惟刻意经史不可解于心自幼至老手不释卷务为有用之学尤精于国朝典章事物之源委宦族之谱系除拜之岁月与夫前代疆理卒乘之法封国行河之利参贯融液无不通流修世教植治道诚有志焉发为文词以理为主以意为先体制具备关键严密简而有法不为绮丽之习晚岁自号静閱居士有文集七十卷外集三十卷藏于家左规右矩言笑不妄恂恂似不能言遇人无贤愚贵贱少长咸接以礼平实诚慤表里如一修身践言乐于闻过逊贤达善心无媚忌喜怒不形于色而正大刚方之气有临大节不可夺之风以铜平昔之所见闻考之胡君之行述不隐不诬足以传远而瑞金必欲以铭见属老复病瘁岂敢言文念公之三子而失其二余亦视几何有不能已者与公为同年初未相知晚幸定交情义至笃为少司成则实为交承出入从班又为寮于讲读之官余与给事林公大中于晚讲之次论救吕祖俭之贬公从旁赞言尤力尝论日食事谓上即位未久多有陰翳一得明照必有背气等变三月朔去正阳之月一间先一日大雨谓必以陰云不见至朔日乃了然使万目见其剥蚀天之示戒如此公又奏曰至次日则又雨此虽片言为助多矣当绍熙庆元之间上既隆寬下亦多尽言余幸周旋其间固有激于忠愤不容不言惟公天与諒直事君不以犯顏为难与同列不以忤意为憚刘德秀为諫官以私意劾左史刘光祖公谓之曰人君寄心膺于宰相寄耳目于台諫皆当以天之心为心倘任私以害忠良如彼苍何愿自此三思而後行其尽言类此居之不疑惟义所在呜呼斯人而在諫争论思之列可谓天下选时非不遇位非不至而道卒不行任以史事尤为当才相与论修史之规模甚备汗青无日而身去矣呜呼殄瘁之悲识者所同孰知余心之悲有在于此乎铭曰

帝王之兴四门以辟无人不言犹恐不力官以谏名惟言是职视古已狭言又不得忧世之士所共太息孰为敢言为纠邪愿矫矫孙公古之遗直学为有用博闻多识其处友朋直谅三益幕中之辩不为婉画一登谏垣身任言责有犯无隐撻鳞之逆天姿则然不动声色鲠论日闻不容煖席召还蓬山上方御极首擢从班宠光赫奕经帷史馆人望丞弼遑遑靡宁期补君德飞语中人又成去国命非不通而道之塞不容何病为天下惜铭以昭之後人斯式

攻媿集卷九十六

<集部,别集类,南宋建炎至德佑,攻媿集>

卷九十七

钦定四库全书

攻媿集卷九十七

宋 楼钥 撰

神道碑

资政殿大学士致仕赠特进娄公神道碑

国家中兴八十余年四朝以圣继圣相守一道夫岂不欲复大雠归侵疆而申締邻好遵养时晦以俟天命盖其庙谟深矣比岁权臣窃弄威柄富贵已极犹以为未足假恢复之名以追危溢之祸其党又相与嗾之平章军国益无忌憚一旦妄发以债帅为方召以骄兵当犬羊人人知其必危竞进者方纵輿以苟爵位不在其位者固不容强聒仕于朝者虽面从而腹非无敢有诵言争之者时惟娄公机以直谅之资抗议无所回挠一为御史即上疏明辩之是时权臣虽倡此议犹未敢自任邓友龙初不知兵将漕淮右腾书投合妄荐大将既叨召还专主此议为侍御史为给事中公皆与为寮每语及此未始不奋然力诋以为必败国事友龙至不能堪曰不逐此人则异议者不已公亦自以不合丐归除职与郡竟求奉祠会泗州获捷友龙上表称贺自以为势当如破竹羣讜竞和谏大夫遂以诋公褫职罢祠此开禧二年之五月也已而延敌致寇涂炭数郡奸党失措始媿公之言八月再畀祠禄明年二月复职十一月元恶既诛大明黜陟天子思公之忠十二月除吏部侍郎兼太子左庶子嘉定改元正月到阙兼太子詹事五月除给事中兼权工部尚书七月除礼部尚书兼给事中八月擢同知枢密院事兼太子宾客十月参知政事盖公天资忠鯁不畏强御逆折兵锋言虽不用而後日皆验先见敢言人所畏服既坐庙堂不以词色假人相与维持和议密赞更化惜乎年高疾侵奉身而退居无何考终于家经济未究孰不兴殄瘁之悲诸孤以钥同宗同朝交情之厚既葬而求铭义不得以老退为解先书立朝之大节系以言行履历之详而铭之惟楼氏自武王封夏禹之後东楼公于杞而始得姓後有食采于娄者别为娄氏其实则一宗也建信侯在汉为刘蝉聯数十世至事吴越避武肃王嫌名始复为娄仕左千牛卫上将军占数嘉兴五传而至公之曾祖讳亿亿生乾曜俱为将仕郎父寿朝奉郎以公贵三世累赠少保少傅少师曾祖妣杜氏祖妣邓氏顾氏妣郭氏为谯国崇国荣国成国夫人少师庄重有家法教子甚严公其第三子也字彦发幼而穎悟日诵数百言能自刻苦长益奋励该贯经史百家之书作文直欲以左氏班马韩柳为标的或谓其持论太高公曰他日以此致君泽民要当自立讵可苟徇时好盖其立志已不凡矣两上乡书乾道二年赐进士出身授左迪功郎临安府盐官县尉丁成国忧服除主和之含山簿铜城有八十四圩遭夏潦大坏仅存其一郡以委公役工三千有奇设庖以处之优给庸直时犒酒炙器用材植一出于官民乐劝趋两旬告毕邑人欢服砬石以记七掇淮邑率以治办闻荐章交上寻丞於潜漕使檄公摄宰之阙潜川以蚕桑为命织纺贸易至于再税公首罢其一民甚德之酒坊县计所仰久废弗葺公大修酒政岁羨息钱近二十万日以寬裕先代输

贫民之奇税寢以及四等户所被广矣版籍既亡有产去税存之害公一新之狱讼几絕庭空圉虚治行称最邑素无学大比无应选之士公首建夫子庙啓庠序择师儒士有以养李廷光首预宾送擢贤科亲书桂枝坊以表其庐士益知劝政声上闻有旨都堂审察以少师得疾而归既遭外艰士民莫不借留匍匐奔慰缟素盈门公性至孝居丧尽礼手书华严法华等经以伸冥报免丧为江东提举司干办公事尝易淮东已而复旧淳熙十二年以举主改宣教郎知衢州西安县十六年光宗覃恩赐银绯县当舟车之冲号难治公以学道爱人自任不可干以私有腾谤者不为动巨室买地为莹域发地遇石复索元价公曰设得金将谁归守督赋峻厉公不忍施一箠课亦不乏亲閱案籍豫定役次民服其公绍兴二年通判饶州五年皇上践阼转朝请郎庆元二年到官事多阙决而无侵官之嫌滞讼随以清省一重囚狱具欲上察其诬白郡覆鞫之得不冤死又二人已经详覆以其可疑者同太守以闻俱得减等参政袁公说友帅蜀辟议幕不就摄州及南康诸台益称其能相率列荐内相洪公迈称道尤不容口谓公学有源委工词章身端行治既以叙公所辑汉隶字源又以监司科荐之丞相京公一见即除干办诸军审计司五年之七月也轮对奏祖宗盛时吏禄兵廩岁不过缗钱十数万熙宁月支四万南渡无岁不用兵月犹不及百万乾道已支百六十万欲请裁损经费又论刑名疑虑之弊六年十一月迁宗正寺主簿嘉泰元年为太常博士秘书郎请续编中兴馆阁书目又请宽恤淮浙被旱州县时皇太子以惠国公始就外傅遴选学官以公兼资善堂小学教授国公銳情学问公日陈正言正道又以累朝事亲修身治国爱民四事手书以献寘之坐右朝夕观省尝谓公曰今日甚热禁廷深邃尚尔闻阁细民岂能堪之公以奏之上问昨日与先生说何事国公具言之上喜曰唐文宗但云人皆苦炎热我爱夏日长更无一句及百姓此意过之远矣又尝语孝宗戒食蛤蜊事国公曰此无他只是广好生之意公随事开明多所裨益三年除太常丞仍兼资善旋兼右漕郎官五月为秘书省著作郎寻以民曹事烦改兼驾部以专训导都城大火命百官条具阙政公力言三弊谓朝臣务为奉承不能出己见以裨国论外臣不称其职至苛刻以困民财将帅偏裨务为交结而不知训閱以强军律时公年七十丐闲上以资善倚重不允周旋四载不懈益同寮予告公每当之首尾如一日国公睠顾最亲字画少差必求是正公深于小学辨析如响又着广干禄字一编国公得之尤喜命讲官戴公溪为之跋四年六月擢监察御史讲未退而除命已颁国公恋恋几不忍舍公亦为之感涕入台省论近时士风薄恶闻者耸然又论京官必两任有举主年三十以上方许作县又论郡守轻滥太甚贻害千里时小史苏师旦怙势妄作蒙蔽自肆语及者必罪去而独憚公尝与合门纳谒公于寒暄外他无所及师旦俛首不敢吐一词而去兵端方开惟公极口沮之谓恢复之名非不美亦孰不愿今士卒骄逸遽驱于锋镝之下人才难得财力未裕万一兵连祸结久而不解奈何权臣闻之不悦所议愈密外廷罔测公又上疏极论虽密谋人莫得知而羽书一驰中外惶惑友龙方为台端主议甚力公日以苦语劝之且曰今日大将为谁计臣孰任正使以殿岩当之能保其可用乎开禧改元六月除右正言兼侍讲首论广蓄人才乞诏侍从台谏学士待制三衙管军各举将帅边郡一二人召问甄拔优养以备缓急八月除太常少卿兼权中书舍人闰月真除今丞相史公枢密宇文公同省每会坐亲见公力诋友龙用兵之说会有旨令宰执侍从台谏集议公义形于色略不少变闻欲以公宣谕荆襄公昌言曰使往慰安人情则可必欲开边啓衅有死而已不能从也春初卒以此去四月闻诸道进兵谓吾老矣无所施力惟晨香致祷愿天佑国家以安边境及闻泗捷愈增忧危且曰若自此成功以摅高文之宿愤老臣虽死亦幸谪官尚何言但恐进銳退速祸愈深耳未几还朝德望益隆鸾鹤精神照映朝列人莫不想闻

风采见上首论三事谓至公始可以服天下权臣以私意横生败国殄民今惟当行以至公若曰私恩未报首为汲引私讎未复且为沮抑一涉于私人心将无所观感矣次论两淮招集敢勇不难于招而难于处若非绳以纪律课其勤惰必为後害仍请检柅权臣内侍等所籍家貲专为养兵之助天顔悦穆玉音嘉獎曰太子尚小烦卿教导待卿久矣公谢以衰暮耄昏恐无以补储德上曰昨已除詹事犹未知耶皇太子念公最笃尝亲书问安否以多事未果发闻公来归问信络绎仍致前书以示不忘之眷自是简注尤深而东宫愈加爱重矣公在选部守法革弊吏铨为清有里人故任天官丧未举而子赴调公谓彼既冒法禁而部胥不之问即挾数吏使之治葬而後来闻者赍之上望治甚切公奏古人为国之心顷刻不忘而望治之诚未尝以日月冀夫子无欲速之戒诚以维持成就非可亟图而骤致也又言贡举贵公乞下礼部具朝官亲族有赴廷对者并与免差御试诸位官以絶异议尝缴奏海巡八厢亲从都军头指挥使年劳转资恩旨太滥乞收寝未应年格之人年已及者予之上顾宰臣曰所缴极当庶不为小人欺隐又称至再三上以皇太子春秋鼎盛欲使预闻庙论谕知民瘼命曰侍昕朝宰执并兼官官仍时赴宫会议公为宫端益思所以裨助遂取旧所着历代帝王总要一书加以润色上下三千年间君道之污隆治效之优劣纲举领挈灿然毕陈俾钥为之序以备参决之余可用考订储局尤以为要览时以飞蝗求言公奏和议甫成先务安静葺罅漏以成纪纲节财用以固邦本练士卒以壮国威又谓台谏论奏以为月课若政有阙失人有非贤或除授之不当患在不知知之则恐去之不亟当随事辄言无嫌于数所论皆切于时既登两地当干戈甫定信使往来之始疮痍方深弊蠹纷然公弥缝协恭裨赞为多重惜名器持循法度进退人物直言可否不市私恩不避嫌怨有举员及格当改秩作邑而必欲内除公曰如此则有劳者何以劝孤寒者何以伸若至上前自应执奏堂吏寄资未仕而例以陞朝官赏陈乞封赠公曰士夫辛勤一第非通籍不能及亲汝辈乃以白身得之断不可行嘉定二年八月临轩行皇太子册命公摄中书令读册于廷百辟倾听九月明堂为礼仪使前导趋拜如少壮然储君与公俱生于癸丑虽相去一甲子而生日同在仲秋先後才五日赐生饩诏曰九秋风露之清袞时英气三吴山水之秀生我耆儒固已宠甚是年七十有七盛典縟仪适聚旬浹间都省後堂久不讲祝颂之礼公首当之贡闈方按鼓吹严更警塲五使同坐堂上正用公之生朝钥退而庆以诗公与诸公皆属和尤为晚景一段美谈冬再纳禄不允三年五月以祷雨感疾复四上告老之章诏曰太公既老犹起海滨留侯虽病强辅太子公弗敢复言孟冬分诣原庙疾又大作求归尤切上犹未许方形诏旨云年虽耄矣初未闻知虑之昏志方浩然亦未见精神之惫公复叙四说以进恳请不已皇太子又遣宫寮勉留而去意坚决除资政殿学士知福州力辞提举临安府洞霄宫以归延见亲故上冢燔黄寢复康强寻上休致之请忽感微疾犹取表奏展閱檢視命笔书偈顾诸子曰大期迫矣勿以药来是夕遂薨实四年十一月辛酉也享年七十有九累官正议大夫除资政殿大学士致仕爵至嘉兴郡开国公食邑二千六百户食实封六百户国史实录敕令会要皆尝提举纂修遗奏闻上为之震悼辍视朝赠金紫光禄大夫旋以东宫彻章加赠特进赏延恤典如制皇太子赙奠加厚可谓哀荣矣娶徐氏大晟府典乐申之曾孙封吴郡夫人先公四年卒子三人绍曾迪功郎绍彭从事郎绍聃承务郎以公参预俱监西京中岳庙女一人适故朝请大夫直焕章阁知庆元府程准孙二人续祖承务郎知於潜县丞同祖尚幼女三人长适进士史沾次适承务郎监两浙转运司庆元府造船塲程端节次适进士鲁之绩曾孙一楚孙女一五年三月甲寅葬公于嘉兴县履仁乡东州之原公天分素高加以笃学而家训尤严亲闻公言初第拜亲少师戒之曰得官诚为可喜然为官正自未易尔其谨

之义方类如此又禾兴辅郡绍兴间寓公寄客多时英贤朱少卿自号岩壑最为名胜次如董公弥大将方公景南云翼祝舜俞师龙鲍任道仔闻人务德滋皆源流前辈词章政事学问论议各有所长公从之游闻见益广所着诸书悉有功于後学既以此发身又自初筮历官所至可纪逢辰虽晚誉望已高擢用甚峻而士论迟之主眷日隆注意大用皇太子垂情宫寮虽在远外念之不忘惟公侍资善最久辅导最勤顾遇尤渥然方居急流而抗议以沮权奸翩然求闲不复顾忌一归若将终身焉忧国一心耿耿不少变再为圣主一出干霄直上建立愈伟老而益壮然用之太晚毫未及而疾困之性笃孝友少师嘱公以二弟模年貌相若爱之固深栋未冠而孤抚育训饬卒为善士近岁先卒貤恩赠官诏特从之尝命诸子以遗泽任二弟之子居乡以诚接物不事缘饰是非枉直判于语下不为後言人虽憚而服之周贫济急尤笃姻党生理素薄输送自同编民门无杂宾亦无敢干以私者故庐仅庇风雨既归辟丈室于左以东宫所书一轩榜以银题朝夕游处庭前殆不容旋马清裁若不可犯而乐善好贤称獎人才不遗寸长又访问贤能疏列姓名及其可用之实以备采取其所荐进亦不欲人之知也近时小学日微公素耽嗜字源干禄用意最深好之者始知其为工作字適美行草俱胜隶古小篆动皆有法尺牍人多藏弃扁榜亦所在宝之钥初未识公而同年李吏部圣俞嘉言同在宗寺出班马字类致公之意俾为序引则知公之相与有年矣既老复来公亦赐环而归会当集议倾盖于政事堂一见如平生欢同入两地协心无间议政余闲商?古今论文说诗亦时出法书名画清谈从容温然如春事有不可刚毅不回久而益敬真畏友也执别而归书问时往来墨犹未乾而讣闻云亡之痛固非稠人比既受铭文之托偶以多病心志凋耗笔砚尽废日过故府惕然于中乞身欲归仅能属稿既不能发明潜德终有媿于公云铭曰

娄之得姓实本东楼在汉为刘自建信侯後复厥初乃因避鏐累叶嘉禾义丰德修惟公国器河图天球文以发身仕学俱优立朝正色告后嘉猷寢登要津贵名日休权奸专国欲挑毡裘债帅总师妄人运筹衆莫敢言徒怀私忧公独抗论力遏狂谋六月出师石烁金流人厌綌絺士困囊兜仅取边垒捷书置邮自谓破竹期功于秋老师致寇气索语偷几如邓鹞欲弃凉州谓公立异屏居林丘一偃不容衆楚竞咻初谓沮军末乃思娄元恶既诛旧德是求四皓来汉二老归周间于两社克壮其犹同寅协恭厚德镇浮饥僅寇攘疮痍未瘳弥缝调燮相与咨諏势方向平公去不留哀荣虽备急景已適典刑已矣後孰与俦殄瘁悲深为铭诸幽尚尔後人先烈是侔

集英殿修撰致仕赠光禄大夫曾公神道碑

宋兴崇尚儒术振起一代之治直史馆赠太师密国公南丰曾公致尧以文鸣当世直道正言事太宗真宗为名臣是生博士赠太师鲁国公易占有文章政事材而仕不合为文十余万言又着时议十卷荆国王文公志其墓盖首称之六子皆登进士第达者三人曰巩为中书舍人以道德文章名世学者宗之号南丰先生曰布位宰相諡文肃曰肇终翰林学士諡文昭当元佑盛际徽皇初政再为词臣气节论议尤挺特卓伟名儒如上蔡龟山俱谓端严有大臣之风其後亦最盛後六十余年曾孙刑部侍郎炎与从弟吏部尚书?相继取世科同为天子从臣故家文献表表一时而南丰之曾益重于天下矣侍郎字南仲祖纁明春秋擢第奉使数道历知高邮军舒州甫强仕终承议郎赠左中奉大夫父协年十九以词赋魁胄监一上不第则考古

着书有云庄集行于世终朝奉大夫知永州赠正奉大夫自文昭三世皆娶强氏文宪公家永州始居湖之德清公幼警悟能言即知读书正奉语公曰吾家由密鲁二公至而祖虽皆取科第然师友渊源非止利禄而已汝当志其远且大者因铭其书室曰求己以勉之公服膺义方益自刻励从名儒授毛郑诗绍兴三十年入太学端明汪公应辰为司业深器之隆兴元年赐进士出身授左迪功郎泰州海陵县尉兼主簿时敌骑惊扰所在寇攘官吏多解散公曰巡徼职也吾其可去乎乃广为榜谕以安集之亲捕剧盗数十辈不以赏格介意而言于理官兵毁之後宜从矜贷类得未减台郡争论荐将罗致幕下竟守职不就秩满以关陞及酬獎循左儒林郎调徽州教授笃意教养更新学宫课试精审有自旁郡执经席下者奉二亲就养与其季燮俱公立三乐斋以见志丞相周文忠公必大参政李忠文公彦颖继为礼部侍郎与当路交上京削垂满丁正奉忧服除再为温州教授如所以治徽学者凡经指授皆为时名人淳熙八年改通直郎知建康府江宁县事转奉议承议郎江宁军民杂处治讼多牵制公不以利害回挠一意字民狱犴屡空催科无扰民感其惠皆先期乐输推排陞降悉得其实至役有不俟差而愿充者公先于暇时摭前辈贤令嘉言善行与法令之所当守者为邑政总类一书讲画既详故施于临民迎刃而解父老诣台府借留参政钱文惠公良臣帅江东偕监司上治最吏部侍郎沈公揆继将漕又请亟加獎拔以为天下治邑者劝任满命赴都堂审察十五年以明堂恩赐绯衣银鱼十一月干办行在诸司粮料院光宗覃恩暨年劳转朝奉朝散郎绍熙元年八月迁大理寺主簿以新制兼左评事究心详讞称为平允轮对请选剧县岁命近臣举历任二人以授之无拘资格随事旌赏治有殊绩则待以不次又请申飭榷酤征税之禁利害详明时论韪之二年八月除司农寺丞被旨和籴米石五十万选属吏之才者授以成算戒以苛取不趣而办三年转朝请郎九月丁母硕人忧五年十二月擢知温州庆元元年三月陞辞复申剧邑荐举为令之议又请稽版籍联保伍汰巡尉之罢輒者永嘉号多士素服公化故教令所下不诫用劝辟良田以贍学养济院以医廩其废疾无告者民产子弃而弗字月以公钱给乳哺者费全活甚衆二年秋未获飓风淫雨海溢为菑乐清尤酷具舟筏畚楬以济扞之极意賑恤奏蠲丁钱数千缗水退修筑瑞安石冈及平阳三斗门为东塘以杀其冲皆使可久至今人赖其利公正身帅下细大毕举戢吏拊民以循良称里社生为立祠且碑以纪其德丞相葛文定公邲镇越及诸使者皆以最列二年转朝奉大夫三年召赴行在所四月入对劝上垂意经术恪守祖训嘉纳忠谏斥远私昵杜絶用例之弊申严赃墨之科遴选边将久任帅守停印造以重楮券禁销泄以羨铜钱广和籴以厚邦储蠲逋负以寛民力皆当世急务除尚书户部郎中治左曹事躬理文案滞讼顿清九月充金国正旦国信使将行值宪圣慈烈之丧既越境谕使去乐接伴纳哈塔厚之以他辞解抵故京地前导奏胡伎公叱止之比押宴者至犹然公避席不拜引义诘责往复论难竟去口宣赐乐等语始就位授馆燕山凡命宴皆请去乐及罢燕射悉勉从使还未尝道其事惟以讲求内治谆谆为上言之始文昭尝使朔方增重国体及是有问公家世以南丰对称叹名家者再知典刑之所存也四年以竣事转朝散大夫六月复除户部郎中总领淮西江东军马钱粮诸郡赋不时入侵期移用其目实繁纲运弊蠹特甚缗钱失期者三百万余他物称是师不宿饱公奏请下诸路期以两月起发且议赏罚上可之公复手疏属部约以不多为文书不遣吏卒要束既定输送以时凡部运当进秩者面以奏剡授之竟知趋劝军给以饶五年转朝请大夫七月除直敷文阁福建路计度转运副使首廉所部疾苦民有被讼久系而讼者反匿不出乃戒郡县必两造俱集始得予决自是良愿无扰奸无容欺奉诏上便民事公奏请委部使者以翻诉之多寡当否为县令殿最详列赋税于契券之首以

革产去税存之患二税不许高价折估狱案以时奏报定物力选狱官多见施行又奏倚阁上四州积负盐本并免州县所负正税及亏收钱合十有六万缗累岁困于郡邑囚系者呼舞散去而漕计视始至增镪百万悉付来者以宽氓征嘉泰元年三月诏入奏计因论属县掊克之弊谓县有内外内县于州取给故苗税征商悉归于州若外县则俸给衣粮与凡支费不一而足今为郡者苗税或概输于州仓征商或使他官吏侵扰为县者反藉以旁征巧取肆行无忌小民赴诉郡不敢诘宜戒其交相规夺上嘉纳之除枢密院检详诸房文字历右司左司郎中兼删修勅令官二年三月迁中书门下省检正诸房公事岁中徧居宰掾裨赞为多四月除起居舍人因直前奏事请搜举遗逸长吏礼遣诣阙以备咨访九月敕令所修进庆元条法事类转朝议大夫十一月除起居郎兼权刑部侍郎同详定敕令十二月转中奉大夫寻改兼国史院编修官实录院检讨官三年四月除权侍郎赐服金紫经筵读两朝宝训终篇转中大夫公持心忠恕临事明审每谓刑狱为生民之命必使奸豪畏法吏不舞文乃可言政广右钜商虐死其弟流窜逃归辄从外台改正复有诉者下棘寺阅实权门诸用事者表里寺吏曲为道地缀补文书肆为诞嫚公察其奸执付京兆狱吏求解万端公持不少贷且并劾商人罪卒以是去六月提举江州太平兴国宫史院进孝宗光宗实录转大中大夫郊祀恩封曲阜县开国男食邑三百户开禧三年转通议大夫嘉定改元皇上更化尽起故老二月公被命守婺未几改姑孰暑行抵郡适师旅饥馑之后劳来流徙宽通节费政声彻闻至秋感晕眩疾会合肥择帅诏以集英殿修撰移镇公曰臣子事君东西惟命今既属疾焉可冒为丐免之章数上有旨辍行治姑孰如故虽整军息民为国远虑而疾日以侵求去益坚二年二月竟遂祠请复提举隆兴府玉隆万寿宫宗祀礼成进封开国子加食邑二百户四年自为奏述出处大槩乞骸骨诏以通奉大夫仍本职致仕越数日薨矣实正月二十日甲辰也享年七十有一遗奏闻以光禄大夫告第官其後如格八月丙午葬于临安府钱塘县钦贤乡西谿山先茔之次从所自卜也娶九江王氏封硕人克有令德善相夫子先十年卒子抡承务郎前监嘉兴府都税务女适承事郎新知婺州东阳县陈贵诚孙仲良登仕郎公资禀纯明器识凝远事亲尽礼谨守家法妙年决科安于平进自海陵赴调有同姓为聘使者金人问其氏族自言蜀人又问南丰後孰在班列既归以告于是朝廷始加搜访时相意属公而公方欲从校官卒故业遂为新安之行不复以姓名通未受代三十六日遭外艰既免丧或以铨制方严欲为图赏典以补余日公亦不顾竟迟次六年而前举者皆无恙恬于势利乃如是先世资产推与其季又以正奉遗泽及公郊恩任二从子内外族姻以至乡党邻里婚葬急难必赈而助焉待人接物谦抑有加而律己持正不可回夺敷历中外徊翔久之始登禁从既不得其职而去杜门却埽谿园数亩杖屦徜徉自号觉翁因以名庵晚年意象简默所造益深由少至老好学不倦六经子史手自校定且以诸史传记考释资治通监续于考异後短章大篇凡所述作率皆温润典雅而楷法行草见谓精诣尺牍书判好事者藏弃为荣有觉庵集与邑政总类藏于家公既葬抡以校书郎陈君贵谦之状来曰先君子于法当得谥将有请矣愿先为铭诗表于隧道慨念在昔先太师岐公初掌奏邸正奉接武周行一时列院有子若弟多为新进士钥于公事契既深襟期莫逆摄事西垣公丞大农俱奉亲舆升堂展敬两仕永嘉载笔左螭皆有在前之媿及钥起于挂冠公方奏最藩部同年生落落如晨星日俟公归以慰迟暮而公薨矣钥长于公四岁亦岂久于世者死生契阔抚事兴悲衰頼何足言文惟公不负文献之传故立本朝使邻壤挺挺有祖风烈诗云惟其有之是以似之非公之谓欤铭其可辞铭曰惟曾受氏曲列始封舞雩之传望于南丰有户部郎事我二宗博士继之显不在躬六子联芳弟上考功德望彰彻曰文昭公本厚源深

实生觉翁学以求己中积外充早挹世科奏最一同翱翔周行敷历西东仗节殊邻气讐夷戎
外庸既讫从上法宫进难退易先哲之风圣化更新起于闲中由畀鉅藩疾已内攻施弗尽才
奄其令终西谿之原父祖是从後來方兴铭诏无穷

攻媿集卷九十七

卷九十八

钦定四库全书

攻媿集卷九十八

宋 楼钥 撰

神道碑

签书枢密院事致仕赠资政殿学士正惠林公神道碑

开禧三年十有一月四日有旨楼钥林大中召赴行在先是平章军国事韩侂胄专国弄权妄啓兵端祸及南北生灵国势几殆主上赫然震怒俾诛殛之更化善治之始才一日而有此命公足以当此矣钥何以堪之公字和叔婺之永康人曾祖禄太子少保妣陈氏延宁郡夫人祖邦太子少傅妣姚氏高平郡夫人考茂臣太子少师妣李氏信安郡夫人皆以公贵追赠初少傅随母嫁卢氏再世承其姓公始复为林公少笃志问学文章自出机杼绍兴二十七年入太学文行俱高士论归重三十年登进士科调左迪功郎湖州乌程县主簿贫甚俸薄郡欲月有增馈卒谢之所立已如此乾道六年丞贵池用荐者改左宣教郎淳熙三年知抚州金谿县郡督财计太急公坚请宽以数月不敢有负又贻书至四三不听公取告敕纳之州求劾而去守媿谢许之邑民感公之深恐其受责竞输于郡已而视岁额反加焉差役尽公多端宽恤受役者无异词有先一年而豫定者丁少师忧役人泣曰反误我矣七年知湖州长兴县在浙右号难治公益究心官事民情孚洽若有相之者县境高于太湖岁旱河涸米价翔贵已有攘夺之患民寡盖藏官无赢蓄公方忧虑而无策夜半涌水自荻浦灌河声震数里米舟辐凑阖境以为神和买比经界前增四之三公必欲宽之推见衆弊获免者五千余户增输以实者帖然讼牒必竟曲直不许私和或谓恐益多事公曰此乃省事之法也以是觫讼曰稀期限宽而信可展而不可违去如始至所下文移无一纸遗于民间二邑遗爱迨今未泯也詹侍郎仪之力荐于朝十年干办行在诸司粮料院十二年冬求补外同拟者四人孝宗皇帝指公与计衡姓名曰此二人佳可除职事官遂除太常寺主簿十四年遭内艰十六年夏除诸王宫大小学教授时光宗皇帝初即位诏侍从举察官户部叶尚书翥等四人俱以公荐擢监察御史论事无所回挺绍熙改元三月御批赐公等曰台纲正则朝廷理委寄匪轻言事觉察各有旧制兹示朕意宜务遵承公谓台官不当踰越分守诚如圣训然居此当以抗直敢言为称职遂与同列答案又曰职有常守期各务于遵承言所当言庶不孤于委寄自是风采益振五月迁殿中侍御史二年八月除侍御史三年三月兼侍讲公之论事根于忠实上不求合于人主下亦不避嫌怨而爱君忧国务存大体毁誉皆有所试抨弹无不耸服在台首尾四年最为称职知静江府陈贾将奏事之任知潭州赵善俊得旨奏事皆极论而寝其命其论善俊也谓若欲收用宗室以强本朝当择其贤者善俊何人而可当特召上问孰贤公以知福州汝愚对退又申其说御批善俊与郡又两日遂召汝愚此谏行言听之始也邓司谏駟以忤旨移将作监公请曲加优容俾复旧职丞相留公正丐去公率同寮奏乞宣谕使安相位遂不果去身居言路而伸谏省

之气诵宰相之贤他人不敢为也有荐公入台而论其多可而无特操不可为执政与公旧故而论其回邪不靖不可典刑狱户箠督迫州郡太甚公上弹章上曰别易一部何如对曰昨为刑郡专为深刻易别部亦不可章至三上宣谕宰臣遣都司道上意公曰言事不行只有一去更无可商者此语既闻竟与郡而去监文思院常良孙以贿遭重劾公奏此人死有余责然其曾祖安民为元佑名臣高宗念其以忠直斥死擢其子同为中司愿特免其真决宁加远窜公勇于逐方用之从臣而拳拳于一累囚如此排击固多此皆其着者至其论议尤为切直而当理首论君子小人大槩曰趋向果正虽小节可议不害为君子趋向不正虽小有可喜不失为小人正者当益厚其养无责其一节之过差以消沮其直大之气不正者深绝其渐无以一节之可喜而长其奸伪之萌则君子得以全其美而小人无所容其奸又论今日之事莫大于讎耻之未复此事未就则此念不可忘然事变不常我有备而後可为彼有衅而後可乘恢复固未容轻议惟此念存于心则陵寝如见于羹墙故都如见其禾黍于以来天下之才作天下之气倡天下之义根本既立纲纪日张而治功可得而成矣雷雪求言公以事多中出疏曰雷电之後大雪继作则陰胜阳之明验也当毋使小人得以间君子夷狄得以窥中国女谒得以行于外尝论边事谓今之言备边者皆其细务当遴选行实才略之人付以江淮荆襄经理之任使文武合为一道庆历中分河北陕西各为四路悉用文臣为大帅武臣副之平时使之通情而共事则缓急可以协济而成功无事则同任抚养士卒之责有事则独当号令行营之寄久其任重其权则边防立而国势张矣又奏律有别籍异财之禁祖父母父母令别籍者减一等而令异财者无罪淳熙敕令所看详亦然今州县不明法意父祖令异财者亦罪之知美风教之虚名而不知坏风教之实祸欲申严律文疏议及淳熙指挥若止令其异财初不析开户籍自不应坐父祖之罪其非理破荡所异田宅者理为己分则不肖者不萌昏赖之心而其余子孙皆可自安实美化移风之大要也诏颁行之至今为便江浙四路以和买折帛重困公奏有产则有税于税绢而折帛犹有说也和买其初先支钱而後输绢中以钱与盐分数均给後遂白纳紬绢今又使纳折帛反成倍输全失立法之本意欲求对补之策以宽民力而固邦本于是减其输者三岁公初论版曹齟齬者几月仅能去之继论棘卿至四章不报遂明以姓名申尚书省而力求补外改除吏部侍郎丐外祠除直宝文阁与棘卿俱与郡後省同奏留公且言当与被论者有别公寻知宁国府改赣州而卿以祠去何正言异因对上谓曰林某好人朕甚念之已为易章贡见次矣赣为剧郡公一以平心处之文移期会动有成规裁断曲直不可动摇听讼初有数百後惟十余纸猾胥豪民为之束手所奏便民五事一论州之冗官无职事而糜廩禄者可罢二请添置土军弓兵三请以钱分给诸邑而禁科罚四乞禁广东之民诱致盗掠郡人卖为奴婢五谓赣县两武尉乞差文臣一员皆郡之急务五年七月主上登极趣召公还赣石至险公欲行不雨而水高数尺怪石尽没俗谓之清涨殆出神助赵清献公以後惟此时得之九月除中书舍人十二月迁给事中寻兼侍讲公代言得制诰之体而缴词批敕风裁如台中时侂冑来见公接之无他语因使人通问愿内交又笑却之会彭侍郎龟年抗论侂冑甚切有旨侂冑特转一官依所乞除在京宫观龟年除焕章阁待制与郡公尚在西掖钥在锁闥连名上疏谓次对不过在外之职序反下于贰卿廉车之升留务则宠之已至况一去一留恩意不侔去者不复得侍左右留者既曰内祠则召见无时终不能远请留龟年于经筵不然则命侂冑以外祠奉御笔龟年除职与郡已为优异侂冑初无过尤罢职奉祠亦不为过可并书行又同缴奏龟年以真侍郎除职与郡若以为优异则侂冑之转承宣使非优异乎若谓侂冑初无过尤则龟年论事乃出于爱陛下之诚心岂为过乎恐自此无敢为陛下出力论事者

龟年既已决去侂冑难以独留望予外任或予外祠以慰公议初赵丞相登政府汪义端为监察御史力攻之不得遂罢去至是侂冑引为右史公又駁之改除公吏部侍郎盖两以言事得此官竟不拜除焕章阁待制知庆元府时庆元元年钥素闻赣上之最庆元乡郡也奉祠家居公之善政实亲见之公清心寡欲无一物可以动其念日坐黄堂非二膳不入克勤小物如为长兴宰时剖决民讼是非立辨人固不敢干以私亦无可干者始居郡斋有盗若鬼神之状人人皇惑公以为此黠贼也必欲捕治已而果然前政所失器物亦皆得之由是奸人屏息公廉明敏皆安而行之不可屡数精力有余足以行其志城南有河而江浦抵堤下者数处河涨潮登几混为一行者病之间遇潮退堤决河水尽倾钥自幼即熟闻此害不知自旧几年矣向之有才知者屡谋而未遂公闻之初不以语人在郡才数月撙节浮费得赢貲二万缗一日委官置局命富室才力兼备者七人分董其役悉以石为之吏不得预民不知扰指日而成砥平绳直自甬水桥以至北渡凡二十五里有欲记者公曰何用而利及永久民用歌之二年求祠至于再三始得请郡人曰守有三林後林尤冠谓侍郎栗郎中枿皆在前有声也得守如此未闻有所褻进又不留以福吾州乃听其求闲耶未行银台駁论镌职罢祠而归耄穉攀留嗟惋如出一口公怡然而行五年四月提举武夷山冲佑观六年引经有请复元职致仕未几御史承风旨论列摭四明异政一二为最谬再落职公道安在哉嘉泰三年十月再复职一闲一纪退然一布衣也去邑居三里所得龟潭之胜作庄园其上最得一县胜处时挟书以往客至则撷杞菊取谿鱼以佐酒谈笑自适亭榭随意有独乐之风或谓公不以书入修门纵不求福亦欲免祸公则曰祸福皆天也岂智力所能移乎边衅既啓朝夕忧之叹曰恢复之名则不可议权臣之心则不可知今欲宗社再安非息兵不可欲息兵非去权臣不可既有召命令州军以礼津遣又促其行始到阙而吏部尚书之命已五日矣内引奏对玉音嘉獎公首论防微杜渐无求更化之名必务更化之实次历陈朱熹彭龟年吕祖俭以论击侂冑皆以贬死其他类此者量轻重旌表之以伸其冤且以为直言之劝末谓侂冑之窃权陈自强之贪沓官有定价乞严臧吏之罪是月除端明殿学士签书枢密院事嘉定改元闰四月命宰执并兼东宫官公兼太子宾客公抱负所学中外俱有声绩及在西府当侂冑残毒之余未易经理事之当为推诚以佐其长但论事之是否不顾身之利害亦不暇顾忌而後发尝在榻前议讲解事上曰朕为生灵不憚屈已事定之後亦欲与卿等作家计侂冑十三年敝政岂可不革公与同列谢且贺曰陛下之言及此国之福也退为所亲言年将八十岂堪劳勩独念和议未成未能体承圣训尽革敝幸为经久之计略遂此心则乞身以归然和使未回而公薨矣庐帅王柟初往通好金人谓之曰近报韩侂冑已就戮矣又问公与钥同日被召二人如何王以实对归诵其语公以语钥且益相勉不可忘也公孝于亲友爱诸弟既终信安夫人之丧悉以先畴分与之又官其从子二人自奉甚薄清俸之余以给宗党庄敬好礼不恶而严一言之出终身可复读书至老不倦郡斋公退躬督诸孙课程吏卒或闻洛诵声而不识其面悼亡之後自言子虽蚤歿而三孙足以承家清修几二十年尤人所难家居不以事干州县守令能访利病则极口告之接人深有恩意或浼以外事虽至亲不答也所居殊陋既贵不改出以二仆肩輿仅免徒行而已素不求人知人自服其名节朱待制尝贻书朝士有曰林和叔初不识之但闻其入台无一事不中的去国一节风谊凜然当于古人中求之後同在从班相得愈深公文词淳实如其为人未尝无用而作有奏议十卷外制三卷文集二十卷藏于家冒暑得病犹自力以趋朝谒六月壬申薨于位上为之震悼彻视朝三日赐水银龙脑及银绢各五百东宫亦致赙焉享年七十有八积官至朝议大夫爵东阳郡侯食邑一千一百户食实封一百户赠资政殿学士正奉大夫有

司将设輓祭力辞之以二年十一月己未葬公于县之长安乡南塘山之原有司定諡曰正惠特添差从子龠为婺之司户参军护其葬朝旨转运司应办可谓终始哀荣矣娶赵氏先十八年卒赠永嘉郡夫人至是合祔焉子简以公枢府恩例特赠登仕郎女七人长适从事郎新汀州州学教授陈黼次适进士胡一之王樾宣教郎新通判临安军府事应懋之国学生乔时敏里士赵逊孙栻孙三人楷枏竝迪功郎监西京中岳庙棫迪功郎新湖州归安县主簿楷实承重解官曾孙四人子熙子点并将仕郎余未名女五人尚幼公标矩自高望之俨然若不可以挹酌臭味苟同欢如平生始在官庠钥为考功郎一见倾盖公久在御史府钥入後省当绍熙间各欲维持公议往往不谋而同交情由是益厚已又同司论駁相随出关托芘桑梓别後俱堕百谪自谓此生不复再见矣赴阙之初握手笑且叹相语曰吾侪相逢此殆天也尝为龟潭赋大篇公见而喜寄乌丝栏使书之钥取友固多晚而出处略相似名位相上下未有如公者非所谓君子之交淡以成者耶天不憖遗丧此元老殄瘁之悲又非他人比楷等求铭义不容辞发挥幽光愧弗克称诗曰我心匪石不可转也我心匪席不可卷也范太史称司马温公曰其清如水而澄之不已其直如矢而端之不止呜呼林公其几于是乎铭曰儒者制行或流于偏猗欤林公行几于全喜怒未发公名斯得发而中节以表公德学以致身政能及民秉心无竞掇皮皆真具区灌河赣石清涨心与天通动有陰相谨终如始视险若夷非通非介不磷不缁遇事敢言独立不惧两貳天官不合则去号三不欺藹然吏师四明之政实亲见之风生柏台节着琐闥百谪横加清声四达归老龟潭若将终身更化之初首图旧人上喜见公俾貳宥府望尊朝廷名馨蕃部经纶未究胡不憖遗一监云亡殄瘁何悲子产遗爱叔向遗直孰其兼之视此铭刻

中书舍人赠光禄大夫陈公神道碑

公讳希点字子与处州青田人陈姓出于有妨其来远矣九世祖名师讷吴越王时为银青光禄大夫积勲上柱国曾祖圭赠宣奉大夫祖汝锡擢绍圣四年进士第仕至左朝请大夫秘阁修撰知绍兴府两浙东路安抚赠中奉大夫高宗驻蹕会稽朝廷草创赖弹压办护之力为多威名甚耸直道自将不能与时高下一斥不复士论惜之父棣笃学有贤行奉议郎通判潭州赠中大夫妣叶氏冯氏俱封孺人赠硕人公叶出硕人石林先生从兄之女也公承家训少有场屋声入太学再预荐连丁内外艰淳熙八年以南省第六人登甲科授从事郎平江府观察推官枢密丘公密为守屢以职事争辩丘公或凭怒折之公退立屏息俟其少霁执论如初至于再三竟不能夺自尔公所书拟望而许之枢密罗公点以浙西提举兼府事举两司事无大小悉以属公行荒政修水利决积讼皆公左右之除主管尚书吏部架阁文字再岁迁国子正日进诸生问难经史而严私谒所拔多宿学有行谊之士时重华寝疾光宗亦不豫省覲阔疏或夙戒而中止物论纷然公谓上实被疾而间其心者得以肆其邪说因疑成畏遂至猜阻上疏备言之读者以为辩而不激直而有礼深体父子之至情又尝代从班两疏反覆至数千言皆剴切出于衷诚言及则悲伤感泣不能自己爱君忧国其深切类此寻迁太学博士上即位之初轮对首陈三事曰畏天命曰法祖宗曰结人心敷叙详明用故事不纳副封时幸以公尝出其门不以间见固已不乐至是以为轻我且曰是不尊庙堂也奏令赴吏部铨上独喜公所奏迁大理寺主簿人为之愤公曰上知我矣欣然就职素不读律而原情引经法家自以为不及丞将作监又几年丞司农大农除江浙十一州运米外余仰和余中余以助岁计淳熙初州

郡岁额杂降本缗钱计一百六十八万是时年丰楮重未至迫蹙後又议寛减加以虚额及收马料等凡减去二十余万有奇中熟仅可支吾一或不登则廩廩有乏兴之惧公与同列究弊源权轻重为之少裕时权幸方张公不少屈迟回久之丐外知泰州陛辞陈农寺四弊三策且曰此其在有司者耳弊在朝家有大于此者乾道二年一岁除马军一司二十二万石之外实支一百三十八万余石马司既已移屯而绍熙以来不下支一百六十万此臣所未解也愿究昔之所以省今之所以多力图而痛革之然後采三策而去四弊庶几国计稍可为官吏亦得以任责上从公言方议施行而不乐者益衆言者有未作县不当守边为辞公上祠请改知衢州州当舟车之冲讼繁事夥将迎无虚日公谓财裕则可以行志首閱岁入之籍痛节浮费力裁厨傅用既不阙时有蠲减得以裕民寓公服其风裁军士犒给无阙而憚其严爱民如子惜官钱不啻己私或用至数十缗拊心叹息曰此皆民之膏血箠楚所取安可轻用耶秩满视帑藏元额余十四万缗吏请上闻公曰吾岂以羨余取世资者止以少过旧数申发留其赢以寛征取召赴行在首奏农寺和杂岁歉价增富商大贾反操其权以邀原利不若乘此粒米狼戾之时广行收贮积及三百万则可以备凶年之急矣又言役法之弊欲以限田视品秩为等限以止法三品以上自依旧法四品至六品止于曾孙七品至正八品止于孙从八品止于子八品而未尝历任与九品止于本身一依宣和旧法子孙自致通显者别计庶官户既有限节下户可以少寛诡寄之弊亦可渐革除户部右曹郎官嘉泰四年都市大火延燔省部家人进饌公辍七箸曰主上无失德皆奸邪致此言毕流涕会求直言遂极论弊事大略谓西汉之末人主无甚过行徒以上下偷安风俗脂韦寢成衰弱并论赃吏债帅及士风日偷州郡数易皆阙政之大者又言晋之南渡未尝主和故不弛备而战亦不憚今上下恃和为安将骄卒怨敌势虽衰未易乘也迁右司郎官时权臣专制政柄贪相浊乱朝纲公与今知枢密院雷公弥缝其间一裁以法虽尽所职而念去已深迂军器监平章之初方观衆情向背公一见首求外补旁观者为公危之公曰去意已久非容心于矫也遂以直宝谟阁为福建路提点刑狱讼诉萃于宪司明恕而行处决不倦人以不冤时方用兵征求益繁建有饥民钞略逮系百数公谓皆迫于乏食不足深治取为首数人寘之轻典余悉纵遣之召还论边事皆深长之思切中时务复归着着不数日元恶就诛遂除中书门下省检正诸房公事未几擢起居舍人兼太子侍讲进兼侍读兼左谕德公讲读之际至人道大纲治乱大端祖宗立国之本意必反覆陈述太子为之起敬听者耸然立螭之初首陈西蜀兵事谓重兵驻汉沔东南禁旅不能为之轻重成都者汉沔之根柢也今汉中三大军无虑十万而成都之兵不满百何以制未大之患逆曦之变至无敢抗者谓宜如扬庐帅司增置亲兵仍增募属县之卒庶足以镇一方缓急可以倚仗策无便于此嘉定初元当兵荒之余久旱飞蝗人情惶惑或谓成肃丧制未终主上不应亲出祷雨公直前奏谓出而于逸于畋于观则不可若循仁皇祷西太乙故事亲屈万乘为民一出则人人皆知陛下闵雨之切人心悦而天意解孚应必矣上为之感动越三日车驾祷于太乙宫甘雨随车都人欢呼岁亦中熟进起居郎未踰月兼权中书舍人寻为真公既代言词尚体要随职戒谕不为虚美遇有缴奏身任其责奏或未下不憚继入事关大体渐不可长者必痛抑一二以警其余末节细故亦不屑屑也诏求时政阙失公言太上知天其次畏天其下慢天知天者兴畏天者存慢天者亡请以周事明之文王知天故以之兴成王宣王以畏天而存厉王幽王以慢天而亡累圣继承祈天永命中更变乱而天命人心弥久弥固者在此也陛下即位十有六年恭俭之心敬畏之诚上通于天下信于民是陛下有其心矣夫有其心者必有其政有其政者必有其事苟德意未宣政事多阙是殆未知推其所为而已公前後论奏于天命人心

之际必反覆开说指切事情虽不尽见于施行而立论率可称述公素多疾至是以久次方拟进擢而公之病病矣二年十二月壬午卒于位享年六十有六积阶至通议大夫遗奏闻赠宣奉大夫以皇太子册宝恩赠光禄大夫爵青田县开国男食邑三百户先三日设榻正堂至是敛襟危坐而逝问以家事一无所答识与不识莫不伤正人之云亡上深惜之赙赠加礼赠官之制首引唐文皇之言曰收也若在当以中书令处之亦足以见眷遇之深矣皇太子尤为惻然三年二月诸孤奉公之柩以归十二月甲申葬于鸣鹤乡慈明之原公娶同邑朱氏封硕人子仲堪迪功郎福州罗源县主簿仲埴承务郎仲埶国学生先公九年卒仲垓仲坊将以公致仕遗表恩补承务通仕郎女二人文林郎新汀州州学教授孔梦符迪功郎镇江府延陵镇税兼烟火公事盛立礼其壻也孙男女五人尚幼公性素刚交际简淡其不为阿附人以为难公盖优为之慕王陵汲长孺为人少作见刚录以寓意其哭知枢密院胡公晋臣文曰朝有正臣其国乃重汉曰汲萧唐称魏宋谊形于色赍育其勇或招麾之亢立不动其抱负如此三登朝着二十余年终以落落不为当路所知自博士左迁远迹清要更化以来始遂向用以世道为己任尝曰世之不治非谓无法法乱之弊也救时之相固不易得苟得平心守法者其庶几乎盖自许也孝友勤俭得于家传硕人能承公意谨奉甘旨既毕葬送弟妹婚嫁谨奉先志事兄如事父春冬赐帛必先奉其兄而後入私室既又推所遗田宅悉以予兄弟自奉如未遇时所居才蔽风雨作诗虽多录其得意者文尤简古字画端方如其为人公静默严重出于天资儿时已如成人及长左右规矩风标益峻起居饮食之处终始如一喜愠不见于辞色虽家人莫窥其际笑语有度使人意消读书观大略苟有会心处则涵泳充广必使心通意解达于践履执丧哀慕之余一意探讨免丧始登东莱吕太史之门一见契合相与质疑辨惑由是闻见益明而所守愈定矣有淡斋笔谈淇绿遣兴壁水杂着西掖类藁经筵讲解及奏议各藏于家此皆右史王公介状公行之词也仲堪等求铭于钥自念及识潭州已服其贤厚与公同朝相好非一日挂冠复来恩及三世一岁间封赠至三四训词皆出公手知钥家世之详叙述委折使自为之亦不过是也殄瘁之叹倍于他人故不敢以固陋辞铭曰诵诗读书孰非儒雅悠悠千载未见刚者我重彼轻恶圆喜方祸福度外乃全吾刚惟公不羣尚友陵黯持志养气明目张胆天分既高学力尤深閱世多变秉吾一心进退以义落落难合更化始用论恩献纳西掖代言训词温淳东宫横经辅道谆谆折而不挠人望公辅一疾困之遂隔千古鹤溪之原父祖相从孰有如公一节始终

龙图阁待制赵公神道碑

孝宗皇帝在位之十三年吏部侍郎赵公粹中奏乞正太祖东向之位上考三代六经之制旁引汉魏晋唐之规近取本朝冯公京司马公光范公镇孙公固中兴以来董公弇王公普朱公震以下及公之叔父涣奏议参订其说集而成编谓太祖当居太庙第一室永为不祧之祖太宗居第二室永为不祧之宗遇祫飨当奉太祖居中东向尊无与二昭穆旁列以侍所尊实允万世公议久而未正愿陛下一定庙制上当天心光昭祖烈上极向之会有沮其议者公又为辟异一书尤为着明人以比唐之陈京而考论过之上既谦逊未遑公尝抚其书而叹曰兹事未明吾死不瞑後之君子谁能信之至上遗表犹曰推艺祖肇造之功早正东向之位念中原沈沦之久无忘北伐之图其志可哀也盖我宋之兴与商周不同契稷为始封之祖其下皆亲尽则毁汉魏祖庙凡曰太祖而上四亲之庙亦亲尽则毁礼之正也惟唐虽起于高祖而景皇

帝始封唐公故以比契稷为唐太祖建隆初元立僖祖顺祖翼祖宣祖四庙如汉魏之祀太祖造邦之主所以列于昭穆者以上有四庙也仁宗祔庙七世已备至英宗既祔祧僖祖于西夹室礼也神宗熙宁五年王安石异议请祔僖祖以为太庙始祖居第一室祫祭居东向之位故冯公司马公等引经争之安石强辩固执至欲以僖祖配天孙公欲救其已甚请以僖祖权居东向之位哲宗祔则宣祖当祧蔡京在徽宗朝又建九庙之议遂不祧宣祖而复奉翼祖于庙高宗中兴公之叔父以将作监丞对首陈其说时方明宣仁之诬谤除元佑之党籍皆足以快天人之愤故一闻此议慨然从之擢为御史俾廷臣共议议者十有七人皆合亦以横议而止光宗时太常少卿丘公密有请尽用公之说得旨集议又不果上嗣服将祔孝宗始议祧宣祖而少卿曾公三复又申此议吏部尚书郑公侨以下集于御史台无不以为当然而鲜有知其详者钥不肖素荷公之知尝授以全书得以备究始末时待罪琐闥羣公俾为之辞既又有旨使定祧庙之制再议而益定自熙宁至是一百四年而艺祖始居第一室正东向之位实自公发之而公之亡已八年不及见矣又十年钥方投闲四明公之子来请曰先公之亡既辱状其行而墓隧之碑未立且先公立朝建明之大者无如庙议又蒙力信其说卒正国家之大典先公死且不朽今之知此者几人哉愿有以诗之泣拜不已钥亦为之流涕敬列斯事以冠碑首又序而铭之公字叔达密州诸城人家世多以文发身号东西赵西有丞相清宪公而公则东赵也曾祖伸不仕祖公绰累赠右正奉大夫父濬左朝散大夫累赠通奉大夫通奉因官东南久寓会稽卒葬明之鄞遂占名数明今为庆元府公天资绝人书一览不忘厉志高迈自幼笃学不烦师傅下笔成章词锋锐甚通奉文高一时父子间自为知己谓此儿必大吾门绍兴二十四年与弟大猷同登进士科授左迪功郎南剑州顺昌县主簿乞免截盐充失收经制钱州与邵武虚认明谿寨兵请给乞正支官钱以宽民力盖初筮己不苟于其职如此三十一年关陞左从政郎监行在杂买务杂卖场门虽在筦库论当世事皆天下大计人已属望以为国器矣乾道元年用荐者改左宣教郎调吉州永丰县丞二年丁妣硕人高氏忧四年通奉公下世公抱负不凡声望已耸七年甫免丧除太常寺主簿公世明礼学用赞其长轮对奏乞辨雪岳少保飞之 録功定謚优恤其家以激厉将士又乞募人耕江淮荆襄荒田不税不役家出一兵如四川义士进恢复机密十论俾边帅招中原之人用奇以捣燕山又进制狄权监取书传制狄之说参考历代事迹总归条例为十六门四十卷又富强要策十卷专论屯田频年虽尝留意而未及前代者其说有三利害未尽爵赏未重委任未专三书既进送给舍看详咸云学问渊源议论详确八年冬迁太府寺丞再对极论文具之弊愿诏大臣崇尚实用明年春除秘书郎翼日兼权起居舍人闰月暂权给事中自後凡三摄此职论事无所回挺建康将佐以获盗转官承旨司主之公谓军律不修部曲劫盗曾无责罚反以捕获推赏何以示警权臣馆客夺官已久直赴殿试除倅临安公谓其无一日考第如此则其类进矣耶律科里乞其子合职又二子为额外统领乞寝罢使远人知朝廷之尊不敢妄有侥觊刘光祖滥以边功求厚赏条其不应格者五以駁之又论绍兴府会稽和买太重欲除子户之弊莫若以田亩均科仍下两省集议亦不拘臣之说上曰如此则利害详尽又奏选将于行伍中有才武智略者许自相推择更加考察上曰诚如卿言已试而显者多輒熟不足用对曰彼惟保守富贵不思报国自下拔擢人始奋励上以公诚实振职每加激獎不可屡书大将真俸从臣召命亦行缴奏上尤叹其正直且曰卿不沽激不求名封駁皆当正欲如此朕见卿有节概是以用卿公奏臣孤立惟陛下圣明是以容臣愚直後省维持纪纲封駁多则可见公朝臣屡摄琐闥无非务发明公道陛下总揽于上宰执图回于中臣辈扶持于下如此一心皆能守法则侥幸路塞小人道消

矣但以不避仇怨恐遭中伤上曰朕自照知无虑也五月迁起居郎冬兼太子左谕德尝奏讲求渡江以来用度酌定定制以赋入之数七为经费储其三以备水旱非常又命江东漕臣及此稔岁余米分贮诸郡郊祀先雪後霁愿益加兢业以答上天之眷州郡或献羨余请更加核实以代下户之输除权吏部侍郎暂权刑部侍郎淳熙元年金遣泛使梁肃富察守中来【按富察旧作蒲察今改】二月借朝请大夫试工部尚书充接送伴使待之以诚折之以理因论和好公曰炀王败盟送死为千古笑肃等唯唯且言其主遣使正欲再坚和好不肯举兵先举则曲有所归公曰皇帝守天下以仁尤以南北生灵为念岂肯容易言兵彼此从顺自然和好坚固肃等相顾云如此则济矣以尚书开怀见待略无疑忌是以尽布腹心不敢有隐事乞备奏上大悦曰卿可谓专对之才矣二年九月除吏部侍郎公久贰天官尽公革弊不遗余力乞将堂除架阁以下归部以开公道以清中书右选必候呈试方许参选免试恩例并不许用曾经堂除人及旧许压在部者请依次注拟以均寒素而待才能川广福建到任赏格轻重不等宜加裁抑以革冗滥选人有力者初任或并取京状有妨平进公请次任方许荐举改官条列铨试之禁甚密尝奏自入铨曹不敢苟简惟恐有负委任之意近惩数吏为之肃然上曰公生明卿既无私澄汰多矣公虽爱惜名器而持心近厚士夫受赐者衆有蜀士数人当改秩而吏以微文沮格累岁公立为申改有恩科得官而复衰病来赴铨量公慰藉周至或问之公曰一官姑以慰其蹉跎待次尚数年何忍沮之闻者感叹此皆本职大概若论思之际知无不言尝奏承平日久士风不振凡取人材当以气节为先论军政则乞遴选大将郡守申严艺祖阶级之法使分守益明一日又论四事一博访谄佞水利之人开震泽百渎以除壅塞二归正添差猥多难以赡养宜分给田庐以为两淮殿最三文武官欲换授者并试文艺四罢大学混补令方州于解试内取贡敷奏详蔚上曰似卿人材难得前後更无一人说卿尝论王安石及雋父子奸邪当罢从祀画像又乞崇獎直言谓人主能来天下之言则下情通下情通则君子有所恃小人有所畏近日褒赠魏谠之獎谕郑监足以风动天下监司郡守治状显着宜候任满召还或令因任过失苟非已甚且令镌降以责後效庶免数易之患宰执侍从岁举边帅一人堂察奏闻且与边方差遣以储将帅之才又论唐取武士以八科不试孙吴之书欲仿其制止以步射步弩步枪步刀四事招兵号武士科中者与免丁役如齐之内政唐之府兵农隙教閲以次犒赏择其出衆者为之长又请条具积欠钱物有名无实之数因行庆典咸赐蠲除寻遇高宗过南内宴赏坐出此奏两宫欢甚就宴降旨施行公前後四求外补上眷曲留求之愈力三年始得请十二月御批久典铨曹劳绩日着除敷文阁待制知池州时孝宗方以职名为重非有功不除公以简眷之深首得之四年三月赴镇临政勤敏寛猛相济布宣德意询访利病以简静不扰为本而赏罚必行吏畏民爱奸盗为之屏迹理财节用久而充溢既补积逋又代贫民之税决讼如流吏不得预秋税受输多取于民公深疾之至是使输者自槩事既彻闻有旨行之诸路增葺学校亲较诸生课程时加馈遗以勉之尝谓榷禁太严愚民抵冒者衆尝获私茶其数甚多但籍其物而薄其罪官醞价廉味醇私酤不禁而自戢有邑令侵渔官帑止令备偿其人慙甚引去公曰锢人圣世不忍为也大军分屯下车大閱以钱三百万犒之军士欢服营垒取水回远为创大池以便汲者百废具举兵民安之五年冬诏郡政修举实惠及民陞龙图阁待制民为立生祠六年春移知湖州挽留者系道不絶在池阳与监司互乞回避会有言者到任三日而罢凡四任提举江州太平兴国宫初递卒汪青私啓递筒实以匿名书至彻宸听狱成具奏公因言事关边徼此而不惩恐有甚于此者上深以为然遂处极典八年台评以为疑公坐镌职十三年高宗八十之庆尽复旧职十四年属疾浸剧自言厄运方迫必不可为

却药不进求致其事四月甲戌薨于寓舍公自持橐之年年劳赏格不用者二十余年故官止承议郎爵高密县开国伯食邑七百户遗奏闻特赠四官官其家二人娶钱氏朝议大夫亿年之女封硕人先公一年卒子四人长幼亡次端承事郎知平江府常熟县丞次端承奉郎後公十五年卒次蟠修职郎新吉州永丰县主簿女三长适迪功郎前温州司法参军辛劝次适修职郎监嘉兴府澈浦镇税曾晏次适承事郎知滁州清流县魏岷孙男七槃槃裴梁?杲棠女二尚幼硕人葬县之阳堂乡同輿之原通奉墓侧六月乙酉诸孤奉公之丧合焉公事亲尽孝居丧哀礼俱至先以通奉遗泽逊与长兄之子靖次兄以疾废又无後公经纪其家取从子竦为之嗣先以世赏及之崇笃外家养从母终身事乳母尤谨亲故有以缓急告者力周之孤忠亮直无所附离名公前辈多知己者不缘介绍自结主知器业蚤就年几五十始有朝绩乾道末年一岁几于九迁入从出藩睿简采厚人谓枋用而遽退闲居鄞十年夷然不以得丧芥蒂与太师史公丞相魏公尚书汪公为真率之集侨居僧坊仅芘风雨自号曰梅堂号燕坐曰意足曰乐静聚书万卷手不停披持身玉洁表里无异望之俨然即之甚和无贵贱疏戚均为尽礼愈贵愈谦俭素不啻寒士杜门寂寂郡邑几于相忘凝尘满席处之淡如暇日幅巾萧散猝遇之不知其为甘泉旧德也字有楷法水墨积习出入率更公权之间尺牍为人藏弃告身书名端重劲正见者敬之学有原本文有体要表章雅健追配前人尤喜论治道古今典章无不该贯论事剴切通畅能动人主之听诗律酷似唐人杜诗韩笔深造精诣刘白之作诵习无遗不为艰深奇涩之言矫激崖异之行貌若介而有容交虽淡而能久位既通显专以荐士为己任片善必欲扬之使达所举至多皆知名之彦有至公辅者文集十卷奏议二卷梅堂杂志五卷史评五卷及庙议诸书藏于家晚犹取历朝实录纂提纲目当世之志未衰也遗令诸子友悌守家法治葬以时亲戚之贫者廩给之或请祷曰吾素不欺无事于此呜呼公之所存可知也矣铭曰

艺祖造邦功冠万世庙立四亲如汉如魏庙曰太祖尊无二工室居第一祫则东向昔在五朝四亲未祧开基之主列穆与昭犹虚东向以俟後世既祧而复熙宁横议羣公争论百有余年惟公会粹集其大全神尧兴唐封始于虎陈京抗论为唐太祖公之为力倍过于京惜议之行不见其成孝宗圣明惟贤是柬问公安在何见之晚乾道末年几于九迁入从出藩声望赫然建明非一庙议为大自公发之礼正昭代惟兹大端足以不朽在天之灵其昌厥後我作斯铭不显幽光岩岩丰碑以贲其藏

攻媿集卷九十八

<集部,别集类,南宋建炎至德佑,攻媿集>

卷九十九

钦定四库全书

攻媿集卷九十九

宋 楼钥 撰

志铭

端明殿学士致仕赠资政殿学士黄公墓志铭

公讳裳字文叔其先出江夏唐晚徙梓之安泰六世祖曰文友者宝元康定间发粟赈梓剑阆三州饥民所活万计朝廷特官之文友生阜阜生??生桷是为公祖壻何氏始籍隆庆之普成考安中居县东郊顾公齿长恐无所见闻悉捐旧产居邑中不治他事笃于教子母郑氏绳之加严公未冠刻励激昂登乾道五年进士第调阆州新井尉未赴罹外艰邑子从授业公语以经义又为之讲解其後学益诣悉焚其稿服阕授巴州通江尉三年杜门潜究经传出入古今默而精思或达旦不寐人与语若无闻然于是剖微析幽宏深四达文词明畅动中律度始时人传其诗不知其学已成非复前日文叔矣总领赵公公说闻其名俾诸子从之游赖其束修葬父祖及其诸父两世九丧已而奉太夫人游青城无为诸山率赋诗以寄意其纯孝幽尚有古风于世澹如也後总领李公繁复招以往时边民苦和籴实不得一钱吏且督输旁午汉中尤以为病公作汉中行以讽与李公意合力奏罢之民大悦公又作罢籴行至今歌之公将之官经纪其昆弟亲族之家而後行放满用举主关陞为兴元府录事参军能以情求狱脱冤死伸无告甚衆终不讯一囚用举主当改秩制帅留公正荐五士公为之首召对论蜀兵民大计曰蜀中民贫兵困极矣臣愚其故有二恨焉关外四州边于敌境势便地饶兵火之余田莱多荒不用屯田积谷之策乃榷民以养兵岁月既深兵民俱困此一恨也边民仰给外府米运率指沿江若稍分边屯使就食诸郡外计费省今千里漕粟商因为利几以三石而致一石名为养兵十万实养三十万人兵困民穷职此之由此二恨也今屯田积谷势已难行分兵就粮事犹可及孝宗下其说卒不果行次论常平赈济其略曰古人救荒良法不过常平义仓见今官司岂无桩积以一州言之则少以一路计之则多水旱之灾决不常有不幸而有决不同同时苟甲乙相推逡相赈救则丰凶迭用可以无穷以此救荒似为良策又论关外义士人材骁劲缓急可使往年师出秦州鼓噪先登官军坐视不救遂皆?没自今苟遇调发宜令主将自作一军专攻守之谋任成败之责明日除国子录未几太夫人不幸宰相以阙官进拟孝宗怪问黄裳何在因奏其故特赐钱七十万甫除丧而趣召既至太上已登极公谓守成之主要在恢张志度为先因论大利害凡数千言大略以为古人论创业守成中兴谓之三难今陛下虽当守成之时而实任中兴之责守成之道必有能为陛下言之者若夫中兴规模则与守成不同出攻入守当据利便之势不可不定行都富国强兵当求功利之实不可不课吏治扞内御外当有缓急之备不可不立重镇因论都建康有五利天下大势终在建康及言方今官虽具而职实不修一当立品式以课其功二当计资考以久其任既建都邑课官吏根本固矣则又据要地

立名城环大兵以守之分大臣以镇之今吴蜀绵亘万里虽号为重镇宿师之地受兵之处率三年一易仅同列郡所谓国之藩篱门户者固当若是耶陛下即位之始所与共济中兴者宰相也陛下主其谋宰相任其责用之则勿疑疑之则勿用苟轻用之于始必轻弃之于终别奏国方有大讎大耻大害大忧而为人臣子乃狃于无事忽然忘之此风之成已非一日其要在陛下笃于躬行以感愧之而已矣又上奏曰今日之最弊兵多而食少一也吏多而官少二也变而通之惟当省兵省吏臣以为守备不阙则战兵可省窃谓沿边郡守宜悉除用武臣付以民兵责以军政无事则耕有事则守如此则藩篱固而边备实省兵之说始可言矣以民兵守虽多而无养兵之费以官军战虽少而有可用之实官军之食可以少增吾民之赋可以渐减岂非至计乎若夫省官之说则当以理论之纵有怨咨宁无曲直夫实边备则可以省兵执事理则可以省吏使即日行之其效犹将在十年之後苟又不然兵日以衆吏日以多他时虽欲逃怨于目前嫁祸于後日不可得矣公在忧中益熟观天下大势至陛对其言条达明切太上异之于是始被简记除太学博士不敷月改秘书郎又旬日亲擢公为嘉王府翊善曰黄裳善论事必能开益皇子公感主知遂以辅导为己任前後凡五年规切讽谏之语无虚日前朝号为能直言如姚坦辈皆所不及後来诸贤讲贯切劘亦皆自公发之公讲春秋初及王正月曰周之王即今之帝也王不能号令诸侯则王不足以为王帝不能统御郡镇则帝不足以为帝今之郡镇即古之诸侯也周之王惟其不能号令诸侯故春秋必书王正月所以一诸侯之正朔也今天下境土比祖宗时不能十之四然犹连跨吴蜀荆广闽越二百州兵与民分任任吾民者二百州也任吾兵者九都统也中兴以来三圣相授苟惟不能统御则何以服之上曰何谓九都统公曰唐太宗年十八起义兵平祸乱今大王年既过之而国家九都统之说岂容不知然则是可不汲汲于学乎公性真率而语疏达上大感悟恨得公晚及讲郑伯克段于鄢公曰段骄而有过郑伯乃以兵取胜使大王如郑伯之有段宜如何处之上思良久公曰大王独不见孟子载舜之事乎象舜弟也舜封之有庠不及以政凡亲亲之道但当富贵之不可使之预政事此舜与郑伯之得失也上曰善公因事启发大率类此他日有东宫旧人除带御器械诣王府谒谢上接之重轻中节左右咸大惊退以告公公翌日讲左氏礼有等衰因问上曰昨日闻大王待某人正得等衰之说有之乎上曰有之人不可无学前日临事胸中即有区处如有人在心腹间商度也公大喜曰大王之学正当见之处事今日等衰之说即是意也公大抵即某事则以某书言举某书则以某事合虽所泛论亦必曰前日某书云云或上所未喻又曰某日某书云云上意益向因作八图以献曰太极曰三才正性曰天文曰地理曰王霸学术曰九流学术曰帝王绍运而终之以百官文武各述其大旨陈之可谓该尽而宏远矣公每曰为学之道要当体之于身本之于心大王宜以心为严师于王心有一毫不安者皆所不可为也凡上所行有一善必诱掖称赞俾日进不已否则尽言无所讳上谓人曰黄翊善言语亦难堪惟我则能受之每至丧败危亡之事无不为上精言之上必倾听上尝侍宴宫中从容诵酒诰语太上喜曰翊善之功也一日轮对劝太上曰陛下有五美三戒何谓五美曰仁曰诚曰明曰公曰断公各指事如此如此曰此陛下之五美也何谓三戒曰立规模崇俭德受忠言时太上意主安静之说因循寢怠而用度赐予过多忠鯁之士相踵去国故以讽焉後命接伴金使因通两国名讳而高宗犹称帝名公曰高宗祔庙已久乃不称庙讳前实失之安可不改乎令典仪通意使者难之公曰前乎此在二十七朔之内故未遑及今已即吉当互传庙讳往返数四来使语塞然卒以前例不果从公还奏曰臣以理诘之其辞已顺事关国体後遣使人当力议改正太上纳其说绍熙二年二月雷雪交作公具封事其略曰谨按易帝出乎震震为雷君象

也震本坤体阳自外来交之有动乎情慾之象是以圣人于六十四卦之中凡涉震体者取义尤严在复则曰雷在地中先王以至日闭关欲其复之静也在随则曰泽中有雷君子以向晦入宴息欲其居之安也在颐则曰山下有雷君子以慎言语节饮食欲其养之正也复之静昼不可以郑声挠之居之安夜不可以慾心荡之养之正食不可以旨酒乱之夫人主起居动息人虽不知而天则知之变异之来岂容掩覆震之象曰洊雷震君子以恐惧修省修省云者谓省己之私也岂时政之谓哉公疏特切深皆人所难言者时求言之诏及館职郎省而不及公不果上四月擢起居舍人未几疮发于背告满百日甫出即直前奏事曰唐太宗最重魏徵一旦至欲杀之凡人主私心非必如好色好货之类然後谓之私也事苟不出于公而执以己见皆私也私心既生则以谏者为病必求有以胜之胜心既生则以谏者为仇必求有以逐之因私心而生胜心因胜心而生忿心是三物者为之蔽虽以太宗之于徵犹不免况其他乎陛下即位以来台谏之臣不得其职而去者几七八辈陛下亦知三蔽之所以然乎且如陛下之待某人本不甚厚徒以台谏攻之愈甚故陛下庇之愈力陛下之本心亦忽不自知其如此也望陛下静察吾心勿使有秋毫之私此心既公无所偏系则闻台谏之言必从何由以胜心临之待台谏之情必厚何由以忿心加之乎公久侍王邸一再迁官兼翊善如故见上为学日益因诞日作浑天仪舆地图以献皆以木为之因为歌诗勉上进取如天之运行而不息及念祖宗郡国大半陷为贼区乃王心所宜感愤者观公之志凡可以动悟王意者无不为之居数月除中书舍人制词坦明人多传诵公既擢禁从念国家日忘武备势浸削弱复劝太上以右武为事曰寿皇在位三十年待遇武臣拊循士卒恩意深厚三军之士至今言者无不感激恨天下无事不得效死以报君父愿陛下勿替此意又谓权拨鄂渚兵一二万人分屯襄汉张形势以备敌公心之素所存者然也天下方恬于宴安公策无所施用都人比日夜望车驾之出譁言纷纷公奏疏极论自今宜五日一朝以解中外之谤一疏之中凡六七致意焉寻除给事中同知贡举未几除侍讲公在琐闼甫一月封駁之章无虑数十上贵戚宦寺一限以法最後指侍臣进用不当缴论甚切翌日迁公兵部侍郎公不受命坚乞去久之王邸奏乞留公遂除显谟阁待制专为翊善公始就职未几疮复作转甚连丐去不许病稍差又上封事请车驾即日过两宫言极苦寻复除公侍讲引对便坐又为太上力言父子天性陛下于重华不应有他疑太上徐劳公曰近见嘉王学问殊进应对议论益非前日比皆卿力也公曰臣伎止此朱熹四十年学问陛下宜收召使备僚属且言王初就傅蜀士杨辅刘光祖相继在选可复充学官以广王之闻见太上悉嘉纳时太上久不过宫中外莫喻其故侍从同班抗论不已孝宗不豫中外忧危事势益急转臣交口谏不听公复抗声切谏至号泣随之宫门闭掩涕而出公自是疮复作连章请外又请归田里书再上不报即移疾关外待命兼旬闻孝宗遗诏亟入临疮遂大作上即位公病不能朝再除给事中上语辅臣此黄裳旧官宜改拟他职明日以权礼部尚书进上曰独不可真尚书乎且令兼侍读上意即欲大用数问公疾如何公力疾入谢出一奏谆谆数千言备极忠爱大略谓书传所载前古人君如尧舜禹汤文武寿皆百余岁在位之日多至五六十年而其所为之事自少至老只如一日至于後世之主享国之日率多不久其间如汉武帝梁武帝唐明皇此三君者得年稍高在位稍久而其平生所为是非美恶如出两人治乱安危亦全相反此非他故由其持心之一与不一也持心一则始终如一否则有始而无终陛下今日正如涉大川行万里固未知登岸税驾之期臣请略举已行之事谕之且陛下新即大位初临万几虚心忘我委任大臣政出中书万事坐理此正得人君好要之道使大臣得人常如今日则陛下虽终身守之可也臣恐数年之後陛下应酬日熟聪明日新亦欲出意作为

躬亲听断左右迎合之徒窃窥圣意因而献说谓陛下委任大臣意非不善然事皆决于外庭权不归于人主日积月累恐成乱阶陛下闻之能不介然于心乎臣恐是时委任大臣不能如今日矣若不委任大臣必须借助左右小人得志何所不为陰窃主权潜移上意引用邪党残害忠良其为祸患何所不至乎臣之所忧者此也陛下深鉴近弊獎用台諫每有弹劾无不听从善恶区分纲纪振立此正得祖宗设官之意使台諫得人常如今日则陛下虽终身守之可也然臣恐自今以往台諫之言日关圣听或斥小人之过使陛下欲用之而不能或暴近习之罪使陛下欲亲之而不可所言滋多不能无厌厌心既生不能无怒左右迎合之徒窃窥圣意因而献说谓陛下獎用台諫本以革弊然台諫得志遂使人主不能自由陛下闻之能不怫然于心乎臣恐是时獎用台諫亦不能如今日矣夫朝廷所恃以分别善恶使君子小人不相侵乱者专在台諫陛下苟厌其多言不复听用则为台諫者咋舌闭口无所论列君子日退小人日进而天下乱矣臣之所忧者此也此二事者朝政之大者也若自其切于陛下之身者言之又有大者焉因条举曰陛下笃于孝爱如是勤于学问如是薄于嗜好如是然臣亦恐陛下自不能保其常如今日也又曰天下之事不可胜言也人君之忧不可胜计也姑自臣所言数事思之其可忧者已如此其衆而臣安得不以为忧乎昔唐太宗老于世故在位日久魏徵犹以十渐戒之一谓其渐不寡欲二谓其渐不爱民三谓其渐不利物四谓其渐疎君子五谓其渐贵异物六谓其渐疑大臣七谓其渐好畋猎八谓其渐轻臣下九谓其渐倦朝政十谓其渐忽水旱使徵生于今时其所以为陛下忧者又当如何夫心者动物易纵难收人主之心又与常人不同溺于富贵放于安逸朝善暮恶固不可保陛下欲求所以持心之说臣请终言之自古及今有治则有乱有安则有危有存则有亡使人主之心常知乱知危知亡则又岂肯须臾自放于安逸之地书曰予临兆民凛乎若朽索之馭六马又曰栗栗危惧若将隕于深渊又曰心之忧危若蹈虎尾此圣人持心之法也世岂有馭六马临深渊蹈虎尾而安危存亡之念不关于心者乎凡首末皆主此意公絕笔之作也明日上复召公移坐与语从容良久後数日有旨充明堂礼顿使公疾寢羸不复可出时时独语曰五年之功无使一日坏之度吾必不可为矣後之君子必有能任其责者盖忧之深也公连三岁病疮至是以积忧故疮虽损而他疾乘之九月二十四日卒不起方疾亟命子弟秉笔口占遗表大抵不异前奏意曰陛下好为之上大惊詫伤悼即日批出除公端明殿学士致仕他恩礼悉依执政朝廷上下闻公死皆抚手相吊以为国之不幸也丞相为上言至泣下不能已遂赠公资政殿学士所以賻恤之加厚公寬简乐易不为拘拘平时于利害是非若不经意至忠义所激奋然忘身每论事人主前其气平其辞切其事核其理尽人但见其发于造次若天机之自然不知其燕居深念索之精而见之切也为人喜思虑乐辛勤而对客辄懽然言笑终日饮酒无算其为学耻一物之不知苟一家言无不与之交而究其说推贤獎善悯孤恤贫盖出天性外内仅书一十考积官至朝请郎公娶苏氏继王氏王氏既丧又连失二孙每语人曰富贵真博祸之具也既病客视公公嘻笑曰仆甚爱田间与耕夫为伍此时稻芋蓊然豆飫藜羹山中之乐真无央也倘得乞骸骨以归足矣呜呼公之立朝终始大节如此朝野望公即预大政而天遽夺之寿止四十有九惜哉皇考赠承议郎母妻皆赠硕人一子瑾承务郎女二人许适进士何鎰前进士何伯巽钥与公同在後省余年余相与甚厚抵掌谈世故言议多合各诵所闻终日不倦地相去万里而肝胆相照倾倒无不尽尝笑谓钥曰前後得制词数篇皆出君手思有以报未能也尚忍言之左史刘公光祖状公之行瑾以请铭于钥因尽得诵公遗文高处殆不可及平处亦自有一种风气至论事之书明白洞达夫入而能知之若其剴切精忠忧深而思远抚卷三叹使人流涕而不自已也惟

左史之作文实事核敬俾载于石而系之以铭铭曰井络之区为东西川鍾秀在人名士出焉有卿有云有武有渊三苏诸范踵登英躔岩岩剑门山险地偏势连关陇秀气弗宣涉历千载扶輿蜿蟺万山之中乃生斯贤英特雄迈高视八埏辅以学力穷探本源移孝为忠立朝卓然大放厥辞亶亶百篇惟我慈皇识之最先俾侍嗣圣设职惟专官虽屡进职终不迁公能尽忠左右累年引经据古指事陈前义所当为执之弥坚死生祸福咸委于天神会气合奉以周旋夹日以飞入侍细旃将降大任忽焉登仙上心震悼恩贲九泉炳炳八图今真经筵殄瘁之悲心折涕涟呜呼余尝评之先见如吕中丞勇决如范蜀公敢言如苏文忠盖司马公自以谓不及者公或过之而皆得其全呜呼尚何言哉惟知公之深者然後以余为知言

朝议大夫秘阁修撰致仕王公墓志铭

绍兴七年有旨王勲召赴行在所三十二年有旨王正已不畏强御节槩可称三省详加访问其人如在可与甄録寻召赴行在二人盖父子也先是公之父知湖州长兴县有治声高宗皇帝以广南舶政大弊命二府大臣择士人修洁者为之枢密沈公与求参政陈公与义俱以为荐既对擢提举市舶果以清裁着名岁大疫夫妇继歿贾胡哀之率钱二百万为赙公时才冠固却之且曰吾父以廉直闻吾虽贫旅犹能负丧以归不媿廉叔度也闻者叹服以为有是父而有是子公在海陵当孝宗皇帝厉精之初既有访问之宠至淳熙元年诏求廉吏以励末俗丞相叶公衡方在政府以公辞赙事为称首又复召用呜呼人亦有言廉者士大夫之所当为古者在位皆节俭正直故不以廉称然考之周礼天官小宰以听官府之六计弊羣吏之治一曰廉善二曰廉能三曰廉敬四曰廉正五曰廉能六曰廉辨说者曰弊断也既断以六事又以廉为本然则成周盛时亦以廉为难而况廉耻道丧之久惟王氏仍父子以廉显父不究于用而子卒为世名卿皆自此发之盛哉公旧名上字从小从真下字言以避孝宗嫌名改焉字伯仁父旧字正之至今以旧字行其先桐庐人六世祖仁鎬仕吴越为明州衙推因家于鄞之桃源曾祖说以学行为乡里所宗师实五先生之一也以季子宗正少卿珩赠银青光禄大夫祖玩赠朝奉郎父提举也终左朝散郎赠金紫光禄大夫母蔡氏元氏薛氏赠武陵永寧普宁郡夫人公蔡出也事後母尤谨幼警悟少长益嗜书史既免丧首以金紫遗泽奏长弟少卿尚无恙自欲任公又请与季弟必欲自取世科少卿谕勉再三始授将仕郎既而幡然曰仕行吾志不负所学足矣何必尔遂不复事举业而与信州王使君从相与通经考古务为有用至今二王为桃源之望焉为洪州丰城县主簿漕檄部纲方诣台受要束使者却谒叱铃下卒迫遣公不胜愤遽乞休致遂遭重劾公处之如平时使者罢乃免帅以公易理官有寓公为时相姻之先与一富民有他憾会冢舍失瑞香花以疑似诬之逮系郡狱讽公文致其罪公证其无他又忤帅意竟称疾而去游宦之始所立已然归而攻苦食淡左图右书饘粥几不继泊如也又二年始授婺州司法参军诏举县令会稽郡王史公浩为司封郎以公姓名进知泰州海陵县张忠献公浚募万弩手官吏畏怖奔走恐後公独以邑民方脱兵火之酷募既难从聚亦无用陈利害以献旁观为之股栗公亦谒告以俟忠献以书逊谢慰勉安职人始服公有守而叹忠献之乐善也隆兴改元正月对垂拱殿上意向纳改宣教郎干办行在诸军粮料院乾道二年诏荐监司郡守丞相魏公杞在琐闥荐对祥曦殿权司农寺主簿知江陰军在任得旨沿江郡籍民为兵防江守城为大军声援公抗疏列上徒扰良民无益备御者七条且言旧尝为山水寨骚动两淮竞进图册谓得胜兵数十万完顏亮深入乃无一人为用敌退起焚官寺声言欲烧

弃山水寨案牒以絶後害此最深切着明者公以此罢而他郡亦徒扰如公言起知饶州改严州复改饶州以事忤宪司劾罢主管台州崇道观以叶丞相之荐除尚书吏部员外郎权右司郎官遂为真叶公去国公亦遭论再奉祠除严州改婺州内引奏事尤加褒纳至漏下数刻治婺数月改荆湖北路转运判官移知湖州未半年罢而版曹以一全年逋欠奏公鑄两秩不辩也又为外祠除广南西路转运判官议臣请行客贩钞盐荐浙西帅属胡庭直至二广议可否公首贻书于胡又奏其事胡还朝尽变前说议臣亦駁公所陈金字牌踵至必欲施行公不为屈复辩析甚苦大略谓西路官卖诚非盐法之善然科折有弊尚可禁止若客钞有亏无法可救漕计立见空匮诸郡取办势必不胜弊而又变矣臣去替不远计任内决可支吾岂以利害不及身遂为诡随以欺陛下移公漕湖南而议臣帅桂林以庭直代公且领盐事行其说庭直身受其弊以忧死既而公私告乏民不聊生孝宗闻之震怒议臣坐严谴而法果变矣为江西提刑易节江东未到改运判又移淮南以职事修举直宝文阁江东运判俄除左司迁中书门下省检正诸房公事借礼部尚书接送伴金国贺正旦使正使者之非仪折俸者之踞肆无不聳服太上皇帝践阼赐金紫迁宗正少卿自以任子不当预玉牒史事力辞改太府卿丐外除秘阁修撰江东提刑俄改浙西以未疾求归主管建宁府武夷山冲佑观既再任绍熙五年八月乞致其事十月以今上覃恩转朝议大夫庆元二年三月二日属疾却药不进翌日终于正寝享年七十有八娶楼氏徽猷阁直学士赠少师之季女封宜人先七年卒赠人子男五人汲洌涣皆蚤世泽文林郎监绍兴府都税务潜登仕郎洌出继少卿为曾孙女六人文林郎镇江府金坛县丞延平陈大应武节郎合门舍人开封朱龟年同郡楼鏞将仕郎延平陈仲绂宣教郎新提领建康府户部赡军酒库所干办公事广汉张忠恕其壻也一幼亡今惟朱氏楼氏二女在孙男八颐之顒之颢之显之頔之颢之颢之颖之顒之先一年顒之卒孙女五长适同郡楼涤次适毘陵张簏余未行曾孙男四惟贤惟寅惟明惟清女三俱幼诸孙以五月丙申奉公之丧合于恭人之墓是为午岭之原公资不凡而自力于学多识前言往行晓畅事理立身立朝所守一定不可回夺尤安义命置祸福于度外始则不畏上官之严久益自强虽压以大君之命亦固执而明辩之仕以此多齟齬上下既信服亦以此踣而复振云平生惟是之行视人所难揆以古道谓彼亦人也吾何为不可人骇其不易而自处恬然亦不以此干名于时广东一节有孙伟奇甫者知名士自号七泽老渔作蒋周翰传具载始末公尝刻于金紫碑陰以彰先德而削去辞赙数十言则公岂干名者耶未尝求合于人而当世大贤相知甚衆孝宗擢公于下僚獎待尤渥漕淮南时或言镇江军帅张詔不法几中深文特命公竟其事公为辩明止坐薄责前此监司未有越所部而治事者眷倚之意可知然中外践馱终不得一登禁近非命耶身退之後闻朝论欲再起之笑曰少欲挂衣冠老乃强吾顔以进耶风力素高晚而益严絶不可干以私剖符数郡持节几半东南所至无聚敛之政省鞭扑之苛不徒以文法临宾属而有父兄教子弟之意荐举必公按刺至寡而端毅简默望风畏之及其即之也温洞见肺腑一善可取口之不置臭味苟同忘年忘辈行与之倾倒风流韵度如晋宋名胜又使人意也消藏书至二万卷手抄为多号酌古居士又以名其堂诗文似其为人少嗜山谷诗造诣已深为紫微王公洋所击赏晚又以杜少陵苏长公为标准石湖参政范公成大见公近诗喟曰不惟把降幡殆将焚笔砚矣有文集若干卷藏于家始孤抚养弟妹妹得所归二弟教之有成正功今为蕲州正民倖天邑钥不肖晚出以威姑之故辱在亲党省事以来蒙海予特异比点朝行闻公林泉甚适梦寐欲侍巾屨归而相得愈欢以为不负我所期也剧谈痛饮或连日不倦人之云亡有识共叹岂钥一夫之私哭之以诗曰槁梧谁共语空断伯牙弦呜呼尚忍铭公也哉铭曰

士为民瞻莫先于廉惟公父子持身特严父不究用子以是显终始一节百行俱善皇皇孝宗知公最深视公之心如日斯临风裁日高誉望日伟三仕三已蹈而复起毅焉而和介焉而通老成典刑今孰踰公人惜公归公自谓晚一丘一壑往而不返我铭斯阡匪哭其私繫尔後人尚其似之

攻媿集卷九十九

卷一百

钦定四库全书

攻媿集卷一百

宋 楼钥 撰

志铭

朝请大夫致仕王君墓志铭

吾乡五先生俱以文行师表士子惟桃源王先生暨我高祖之後皆大盖其啓迪後学德泽之及来裔者源深而流长矣先生之子宗正少卿珩孙广南提举市舶勲继登进士科提举疎财尚义以廉节着所积尤厚是生三子长太府卿讳正已次即君也朝请大夫讳正功季知安庆府讳正民三人以节谊政术能世其家尝一岁同奏子兴固未艾也呜呼昔者钥既铭太府之墓才八年而君与季相继下世既葬矣君之诸子以国子正袁君燮之状求铭惟王氏楼氏自二先生以道义定交至太府壻吾门姻好稠叠感今怀昔乃摭其大概为之书而系以铭君旧名上字乃摭其真下曰思字有之後以避孝宗嫌名改焉遂字承甫曾祖说先生也赠银青光禄大夫祖玩赠朝奉郎父赠金紫光禄大夫娶蔡氏元氏薛氏赠武陵永宁普宁郡夫人君薛出也家世之详已载于太府之志惟君生而不凡幼笃于学不待强教已如成人以金紫遗泽补将仕郎绍兴二十四年由铨选授右迪功郎抚州宜黄县主簿寻易处州青田有诉夫死于殴者君按视则更曰自经君察其必以贿故即用初情讯之具服隆兴初调筠州司理参军筠号道院而狱事亦繁精意推鞫狴岸屡空乾道二年循右从政郎四年为荆湖南路转运司主管帐司给事黄公钧主漕计以严明称寮属仅取充位君果于立事滞讼见属剖析无留难黄公举以厉同列之持两端者尚书沈公介为帅尤简贵威重裁决无敢辄经外台者理或未安君改之不疑沈公更加敬异不以为忤也二公争荐之又为延誉不朞月举削应格七年改宣教郎知兴化军莆田县县素难治始至牒诉数百惩其非实而决其久滞者遂寢以清省宋氏子怙势突入殴吏林公枬守信其从父太学诸生也喧竞于庭皆捕治使服而徐释之且戒曰後复尔不汝贷也感谢而去林公由是知君後为监司尝表荐之邑岸大姓鬻盐因为寇钞捕获数十人其党篡取杀伤卒徒篡官亦被数创救至得免而郡怒其生事君曰拒捕至此而赏罚不伸何以厉其後即穷治之而赏官兵焉又修陈霸斗门以永灌溉之利淳熙六年赐绯衣银鱼七年通判潮州推诚佐郡守贰无间言郡人有为宪属者武断乡曲征利于近郊君裁以法不胜慚怨挤之不遗余力君用是罢将归会剧寇沈师逼城民走依官寺君开门纳之力赞郡将修战守具甚悉贼知有备而退衆喟曰是已罢官而为民深切乃如此耶至其行多涕泣者九年签书武安军节度判官厅公事十一年改淮南皆以伯氏将漕引嫌十四年主管湖北安抚司机宜文字绍熙元年差知澧州陛辞论沙毛钱及杂卖场二事上亦深知其弊嘉叹再四三年到郡帑庾枵然廩禄累月不给君去其侵蠹之已甚者节浮费汰冗食补罅漏郡计无乏及暮而用颇裕乃从邦人之请即州治之前辟城通道建澧阳楼前俯大江巨丽轩豁遂为

一方伟观尝属钥记之由是人心闾阖士气振厉比举多决科者药园寺僧以稔恶闻邑令发其端谓罪不可赦而以贿缓其狱君诘之治始急复赇于上司之吏移文使先纵遣而以牒来君曰欲以势力求免耶即日杖之五年奉最还朝奏事重华宫行内深称上意遂知蕲州自私钱之废淮民多窶鲜有盖藏遇霖雨至絕市无余君以庆元四年视事急发廩而损其直且多邀米商许以蠲征舳舻辏凑又念岁收才能自给而巨商率先以他货来售禾始登塲厚取其赢君以为遏余固非古训而坐视民食之空咎将谁执力请于朝乞禁止商贩许之民相谓曰使君通变如此自尔有足食之望矣有言银矿发于山者君欲遏之而未得其说耆老诉云往岁尝有此事官不熟计而遽行之非徒无益治户以亏额坐深文鬻产以偿者数百家痛犹未定也君为奏罢之佛灯大师者自称威里挟权要书走州县攫取无艺人病其扰莫敢诘君出郊有诉者立捕之寮佐劝止不听比至一黥隶尔致之法六年除广南西路提点刑狱公事嘉泰元年赐四品服广右之俗轻于冒禁而上官以不按吏为从厚君深病之劾其贪暴之尤者请托一无所听始知悚惧而君亦寢危矣兴安令之子蹴小吏至死逮系郡狱令胁治狱者欲变之君怒曰台治所在可使死者抱冤乎劾令而移狱邻路令诬诉于言者公遭论而归自以无慊于中处之怡然二年冬主管建宁府武夷山冲佑观三年正初属疾癸未终于家享年七十有一娶同郡伍氏赠宜人先二十九年卒今宜人应氏子男六人深从事郎新无为军巢县尉迪功郎新池州青阳县尉洙迪功郎太平州芜湖县主簿登绍熙四年进士科泌将以遗泽补官女八人长适从事郎监绍兴府会稽县户部贍军上臯酒库毘陵张符女後君半年卒次适进士伍遵第五第六女蚤亡余与第四第五男俱有废疾孙男三人仁之仪之信之信之先一年卒二女一夭一未行先是伍宜人葬于鄞县桃源乡排隩之原诸孤以四月己酉奉君之柩合焉君资稟忠信不发一妄语妻子不见喜愠之色开心见诚吐露情素孩孺有问亦告以实不敢戏侮之田夫野老市井小人过而挹之俯接惟谨或遇机奔险巇之人一对以诚彼自意消以是善与人交终始不变筮仕之初或言邑令有心术亦当有以牢笼之太府问客言何如君曰以诚待之尔何术之可用卒与令甚厚至执手不忍别人但以君为恂恂自谨之人而遇事敢为毅然不可干以私每曰食君之禄徇情挠法以取悦于人自为计则得矣其如体国何廉洁守家法俸入非令所载者谢不受澧阳终更吏白有资送钱三百万悉拒之惟备舟浮家而归郡人叹服所至未尝饰治器用不市一物莆阳荔子最盛有以名品馈者坚辞之怡于仕进不求知于人而人自知之丞相赵魏公枢密使轩山王公每欲汲引丞相京公尤称其真淳力荐于上晚历麾节皆其力而君不自知也张侍讲枻风裁甚高在潭游从雅相爱重呼君为齐年兄清贫自处质贷以给奉已至薄得禄不足以偿逋负如是者三十年然持损有余补不足之说有义事亦勉为之後既稍裕亲故有求随力以应隆冬细民乏食赈与无倦色幼孤鞠于兄嫂少长省事自念孝养无及以事亲之礼事之嫂即钥先祖少师之季女也伍宜人亦顺适君志躬执妇礼既亡祔于庙以时奉祀太府诸女之行竭力以助簪具良厚皆人所难者性嗜学多録未见之书唐诸帝实录略备今写本及版行者各万余卷少喜为诗周旋太府与王信州之间佳句与之相下上暮年益造平澹有荆澧集行于时余藏于家呜呼书曰吉人为善惟日不足卷阿之诗言求贤用吉士也汉文帝初立召田叔问曰公知天下长者乎周家用人以吉士为首文帝之化几三王实基于此王氏父子兄弟皆有以自见于世惟君制行醇笃立身处家施于有政风谊耸然而其本体盖所谓吉人吉士长者人也故乡评卒以是归之使其得位而行可使鄙夫寛顽夫廉而风俗庶几于古小试绪余感化已多一区之宅始成求田足以卒岁天假之年亦可表率乡曲而遽已矣此钥平日敬叹每以语人者今也四子俱列

仕版家道肃穆天之敷佑如此为善者亦可以劝矣铭曰

恂恂王君家世儒雅君尤笃恭视如朴野周云吉士汉言长者君其人欤力行不舍蓝田皆真元规非假施于有政不言而化义所当为勇于施舍麾节倦游求田问舍谓宜上寿式是乡社云何不淑棣华凋谢高其门闾尚容驷马诗以扬之用慰泉下

叔祖居士并张夫人墓志铭

居士姓楼氏讳仪字元应明之鄞人也先世居奉川後徙焉曾祖杲不仕祖郁以古学全德为乡先生登第主庠江簿以禄不逮亲不复仕进终大理评事累赠正议大夫考肖正议之季子笃学晚不衰以特奏名补和州助教居士世其家者也读书敏而勤百氏之言无不该贯句读音训考证是否有先儒之所未发朱黄雠校学者取法焉小学尤精鄙流俗简陋手以古字写春秋左氏传礼记庄子以课其子用志如此然澹于荣利少举进士一再不遇已甚厌之遂不复为塲屋文而学问益高娶夫人张氏里人询之女勤俭静专克相夫子早岁居贫甚夫人心计有余而济之以识知所取予未始与人为怨二人同心而家益饶兄弟五人居士处其仲性孝悌和州病沈绵累岁下二弟二妹皆幼稚未立所以奉甘旨毕婚嫁者维力之尽夫人承其意无不周悉他日罄先世家产四分之独不取一金夫人亦无难色且赞其决正议好着书手泽盈篋兵火仓猝居士尤以为忧夫人捐金募人窖藏至今得为家宝居士中年益薄世故好浮屠氏之说名山古刹意有所寓假榻宴坐一鉢一衲或累岁忘返间过亲族所至如归为人乐易无少长与之无间豪饮剧谈衮衮竟夕道古今涉经史旁出入释老稗官之说如画一二坐客倾听不暇倦游还家屏处一室乾道癸巳岁于是年七十有五矣正月十有六日感疾以卒夫人既率诸孤以是年十二月二十有一日葬于阳堂乡梅湖之原持门户愈谨奉佛愈严平生自奉至薄见华靡之服至瞑目不观曰吾以俭之故不妄取不妄用虽不能甚富亦未尝困乏此夫人治家之要也至调人之急虽多不较病给以药死给以棺者日相踵寺观营缮随所求而应之晚益了悟叹曰吾焉能以垂尽之年尚较米盐耶聚族而谋尽以家所蓄分给子舍戒以自力毋轻费淳熙壬寅四月十有四日卒享年七十有八将以明年闰十有一月十一日啓居士之墓而合葬焉子男五人曰由仁曰行仁先居士卒曰城先夫人卒曰球曰琰俱业儒承居士之训书传如流女二人福州怀安县丞杜友直其壻也一早亡孙四人鋹镌铉锦女六人长适翁烜次适丰有基余未行曾孙一人呜呼楼氏自先生起家皇佑中衣冠相传六七世矣岂惟祖考积善所至盖先生教授乡校三十余年诸生皆当世名士一门书种赖以不絶有如和州居士虽不得施用而力绍世业流传典刑使後生犹得沾丐其所以维持之力为多後来者可无念乎居士实先祖少师之从弟葬之日夫人以墓铭见属钥自念生晚少见前辈每侍居士则爱诲良渥尚历历能记余论又为字钥以大防也尝为诔次行事未及成而夫人又亡矣乃以二叔之命并序而铭之铭曰

学焉甚博行也无阙穷通有命不系巧拙达人大观欣戚泯絶不亡者存厥有高节变彼贤配千载同穴孰发其潜视此幽碣

盛夫人墓志铭

孺人姓盛氏世为余杭人有曰蟠者仕吴越位通显钱氏纳土始居严之建德又徙嘉禾因家焉曾大父偕德兴令大父兑赠通直郎父师圣迪功郎尤户部经界所措置官德兴公且老犹提五子试場屋各明一经号六经家孺人年十有八归于洪氏夫曰怀祖今为通直郎赐绯鱼袋实吏部尚书文宪公之次子也元佑中孺人之伯祖侨以名儒为国子司业文宪公从之游雅相器重遂为忘年交既铭德兴之墓又缔婚焉孺人资凝重喜怒不见于色平居敛衽危坐一语不妄发有所问答唯而已笑才啓齿若惧有所闻阒内雍如也孺人厚货装娉大家舅又鼎贵而自处冲靓食不兼味裘葛无副未尝有所表襮姑文安郡夫人尤爱之通直夙登仕版而宦情甚薄兄升朝籍弟亦补京秩通直公固不屑意孺人亦安之也文宪多孙孺人之长子藏年始髻髻文宪爱其颖悟欲先奏补孺人力辞至泣下文宪为之嘉叹然卒先之遇下有恩意待子妇如宾客未尝见惰容妾媵有过告谕至再三不加鞭扑故有终身不忍去者淳熙乙未秋七月属疾藏官泉南孺人念之甚苦疾遂革以二十八日卒享年六十有三会通直引年休致明年以郊霈赠孺人子男八藏新处之松阳令□新建康府司法参军皆从政郎曰蘧先卒曰芹曰謁曰芸曰艺曰薰女四长适姑苏翁浩次适丹丘钱起二人未行孙男八伯景仲杲昭孙叔旦会孙皓孙曾孙?孙孙女六长适延平陈仲达余皆幼以其年十二月八日葬孺人于台州宁海县凤潭西之原通直与诸子哭之甚哀松阳一日过予泣曰藏不孝素为吾母所鍾爱宦学垂二十年輒不偶无以奉一日欢随牒远方又不得终养恨不得即死以从吾母于九京愿得子铭吾母之墓以塞无穷之悲予于洪氏有连又与松阳厚也不得辞铭曰予于善而寿不洪安于俭而报不丰夫与偕老而生不得被其封子既强仕而养不泊于千钟呜呼其命耶斯铭也尚以诏于无穷

江元适墓志铭

始余游柯山闻南塘徐诚叟先生之名其学本于伊川欲见而不得今二十余年乃闻其江徙君之贤于其乡之秀士且曰南塘之门显者固多而江君则得其传而不仕者也君讳泳字元适世居衢之开化大父以上潜德弗耀考沔从常山起家主饶之安仁簿辟泉司属以卒君其季子也束髮知读书一以为已为本手抄中庸大系置座右口诵心维寒暑不废弱冠有声庠序漳守陈公杲得君诸生中以其予妻之子盖张出是为右史文潜外孙绍兴初党籍解诏没者官其子孙一人无後者许授异姓亲右史与龚公夬俱无後龚氏以官予外孙壻臧珙陈公欲以右史之泽与君君辞焉乃及其友壻戚埃既欲奏以他官又不就至是君之年益壮学益明再应乡大夫举不利絶不为举子语既遭外艰庐墓毁瘠除丧因弗去遂不复谋仕而行其志于家号所居为西庄堂室轩馆下至器用悉有铭记以便观省创楼西偏揭先圣像朝夕瞻仰如亲见而师之榜家塾曰明善命其子震升谦蒙革肆业其中所训先德行後文艺絶口不以利达啓其心亦不使预家务而治家自有法中阃有亭以限仆妾细大条理择谨厚者董其凡不劳而办不事生产家业无所增益伯氏仲氏货息日倍人以百亩与之谢不取乐以所闻见告人愿学而力不逮者教且食之曰吾非养其口体养其才也常有小疾一日出就外寝焚香默坐间一讽咏不异平时惟励诸子以毋忘畴昔之训语毕而逝实乾道八年八月二十九日享年四十有九以其年十二月二十六日庚申葬于祿墩之原遗文曰西庄题意曰朋游讲习曰天籁编曰因心録易中庸有解他论述尚多藏于家未传也葬之五年始得以铭诸墓呜呼人孰不欲仕如君才足以取事足以得而其学又可见于用乃翛然自适以终其身余惟孔

内有用之学上可以为邦南面而其流亚皆可使从政观至人与点说漆雕之意则知乐道者之为高而以政学者皆自欺也余于道未有闻而仕仕而未能优也闻君之风有媿焉故为之铭铭曰

仕以行志而或害义孰若不仕以全吾气允矣南塘源由二程有派其流君挹其清德成行修不用于世淑诸人者抑君之细命维匪长後其炽昌铭以订之观者勿忘

知嵊县季君墓志铭

皇帝即位之六年五月壬戌有旨季光弼所献文字有补治道可与循两资制曰上书公车日以百计高则近迂卑则涉谄至于出入经史动含讽谏览尔奏篇朕甚嘉之进官一列不独尔私庶闻其风亦克用劝先是四月戊辰朔日有食之君摭光武十事备论以进曰美芹文简而旨深意笃而言婉训词既颁士夫相与传诵圣天子导人使谏盛德日新而君之名亦由此暴白于天下君居八年再上万言书敷绎前说又泛论当世之务不报一日闻西府除目愀然曰枢筦与中书并立系朝廷轻重其可忽诸遂考唐之宰相起自武德裴寂终于天佑杨涉作编年録论说二百五十有五去取抑扬皆有微意苟位之非据假以隆名虽元勋如郭子仪亦不得预读者为之耸叹呜呼才不得究齎志而歿着书一二亦足以不朽矣君字观国其先家处之龙泉七世祖超为吴越钱氏常侍始籍于温居平阳之桂源曾祖宗乔祖文莹俱不仕父敦习以君陞朝赠宣教郎妣林氏赠孺人宣教公早世君方在髫髻号慕如成人祖母犹无恙与林孺人自厘家务卑君一意问学君少颖悟痛自激昂于书无所不读诗礼左氏春秋及诸子古文皆手自编写寒暑不少变年十六授室益加刻苦视生产作业与闺房之私一不经意羣试庠校辄出其辈行而器识凝邃不见圭角阁学林公待聘待制萧公振里之先达少所许可咸器重之两荐于乡绍兴二十七年遂登进士第授左迪功郎调福州福清县主簿以祖母忧不赴服除授临安府盐官主簿秩满用荐者关陞左从政郎特旨授左儒林郎充邵州教授丁太孺人忧授福州宁德县丞改通直郎知绍兴府嵊县磨勘转奉议郎代者且至俄疾卒于县治享年五十有七时淳熙十年四月四日也呜呼君之抱负厚矣学行政术皆欲以古人自期而见于用者止于州县间所在皆着声绩而其甚可称者数端盐官邑庠久不振君召张横浦高弟于怨郎晬勉以身率士子课试皆临视之咸自奋励登巍科如张少良等数人邵阳僻远士无师承君遇诸生如朋侪程度甚悉邻郡县之士至者相属凡经指授多成美才如陈偕谢特起辈有声湖湘间此君之善教养者然也浙西漕河浅淤例调民运水以济往来岁旱民劳水愈不至君相地形凿河引潮以灌之至今为便闽有僊湖为豪右所田君按黄谏议之旧疏濬以广灌溉此君之善兴民利者然也君之听讼不为钩距一以至诚临之公而生明无不洞察罗源尉锻链平民为盗以希赏连帅丞相陈车公命君鞫治悉从平反公欲腾奏又力辞之有母改适而子有後言讼其不孝君曰不为汲也妻者是不为白也母安得以不孝坐之申公称其引经之决刻民张僖之子为盗所戕疑怨家黄氏为之黄无以自明君察其非杀人者故缓其狱得子之衣于东阳遂禽真盗又有王生与僧有隙匿田家之子使其交讼之旁引曲证僧自诬服君独以为疑求之竟得于其家告者遂伏辜焉君之救荒不为文具皆出于惻怛之意所至疚心受赐者衆隆兴之初畿邑大歉尚书薛公良朋尹京以事属君君列急务六条献之随即施行给事程公叔达以六察行县喜曰使诸邑皆如君尚忧饥民哉丞相史魏公闻

丞之才常下君所陈尽发常平裁价分糴民为之謡曰饥不忧与之庾儒林季公民之父寒不忧今有袴儒林季公民之母既为县又遭洊饥山谷穷民易致啸聚君加意拊摩豫令富室致吴中之米七千余斛丐于府得常平缗钱二万于邻邑始得按堵而嗣岁尤甚禾未登场民已菜色秘丞朱公熹力举一道荒政尤详于越君求哀诸司得米四万斛县有二十七乡凡为赈糴場賑济场养济坊三十余所戴星出入以课督之数月之後须髮为变朱公每贻书劳勉曰省刑缓赋以回天意非体国爱民之切不及此也君为丞贰则悉心以赞其长谋事甚详请于长而後行及为长则待寮友如兄弟莫不乐为尽力故所至皆有可纪而去辄见思卒之日剡中耄穉相持聚泣至巷哭以过车识与不识皆惜曰善人亡矣平日安于义命论说甚明儒林之命既下人谓君且通显君曰吾岂以此钓爵位耶竟客授湖外以去巨公知己甚衆亦有欲荐于朝亦或有尼之者君虽闻之不以介介至义所当为则奋然直前无所顾忌亲故以出位抗论得罪後当叙理无敢保任君方为簿领慨然许之有贵臣过县境冠盖相望或劝俱往君为诗曰不堪枉道依阳虎可是无心简子敖闻者黷之亦以是终不得为时用可哀也已娶同里周氏清俭端恪克相夫子先君十年卒後以明堂恩赠孺人男五人复之泰之蒙之俱习世业次兼善举善早世女二人长适进士林仲明次适陈权皆周出也君天资笃厚孝谨过人少小孤立奉祖母及母甚至未始暂去剡下有疾必躬治汤药执丧以毁闻与弟兄光度友爱诵书作文自为师友终身无间言无他嗜好惟以论着自娱奉养寡薄俸钱多以买书别有文集八卷藏于家为文浑厚典雅言皆有用庶几乎一饭不忘君者雅爱东山林泉之胜筑室其下楼曰双清轩曰静宁欲为晚岁归休之地竟不得一日之适顾非命耶诸子将以某年某月甲子葬君于邑之某乡某原以君之甥朱德成之状来求铭钥顷官东嘉一见辱定交尽得君之书读之相与益厚今其可辞铭然君志不负所学而见于行事者仅如许既已屡书于前惟所着之书当表其大者以示後世铭曰

惟君之生未为不遇位虽不丰朝有显誉章交公车君独进御美芹之书一言而寤唐三百年曰宰曰辅泛论其尤姚宋房杜君独究观一一论着忠邪畧分咸有旨趣位非其据勲如汾阳而不与事有责备德如晋公而不怨上可以发潜德而诛奸谀下可以垂世鉴而切时务细绎乎义命之说磊砢乎经济之具使用于世则必古人之与稽使之作史亦必大明于劝沮呜呼尚何言哉後之君子必有抚是书而太息者铭实昭之用以载君子名于不腐者也

攻媿集卷一百

<集部,别集类,南宋建炎至德佑,攻媿集>

卷一百一

钦定四库全书

攻媿集卷一百一

宋 楼钥 撰

志铭

朝散郎李公墓志铭

公讳宗质字文叔世家于濮六世祖文定公相真宗仁宗隐然为社稷臣子太子少师東之謚懿靖又以名德世其家徙洛中号西京房生中散大夫赠金紫光禄大夫孝孙则公之曾祖也金紫生朝奉大夫伟伟生晟承议郎知怀安军赠奉直大夫配曰刘氏赠恭人公八岁而孤未几而所生母展氏去嫡母四子又散于靖康之乱从兄提举宗臣携公入蜀闻叔父直阁旼亦在蜀中间关寻访至则已下世惟叔母刘氏在又公之从母也柔顺贤明抚之如已子竟以直阁延赏命公绍兴八年补将仕郎公有姊归司马文正公之诸孙与之俱诣行在所至江州水南始遇展氏于廛中物色良是司马氏姊见之而信抱持相哭人以为孝感别十余年而得奉色养者二十年赠安人赴调授右迪功郎监明州大嵩盐场九年到官惟李氏代有显人子孙目濡耳染为世吏师公年尚少筮仕筮庠临事极不苟秩满之日例袞花带钱五十万公悉谢遣之因家于僧坊晚卜居名塘遂为明之鄞人矣十七年为洪州新建县丞二十年关陞右从政郎就差处州遂昌县令饥寇作于傍郡或告豪民将率数百人侵昏犯邑者公亟捕首恶毙之杖下而後闻于州羣党帖息授湖州长兴丞遇主上登极恩循右文林郎隆兴元年改右宣教郎知绍兴府萧山县未赴给事吴公芾为帅以会稽剧邑非健吏不可为奏改命公既至剗裁有方政誉甚休赋租素重公思有以寬之先是以奉永佑?宫免三乡支移折变公请依永安祖宗陵寝仪制举邑皆免仍豁除折帛止输本色吴公具以闻亦浹日而得上旨父老欢呼拜诏至今纪之丁展氏忧服除权通判明州引寓居之嫌改隆兴府时江西大旱安抚龚公茂良垂意荒政多以事属公赈济尽力全活者衆倅厅有赢资颇丰致之公帑帅以助公之归不得已以其半分给吏卒义不受一钱龚公益嘉叹之提辖行在杂买务杂卖场改通判镇江府外台以清廉公勤列荐于朝差知台州陞辞上曰久闻卿才宜以节用爱民为务公只上命采自奋励听讼必先抑告讐惩奸恶郡有静镇堂退公不入私室危坐堂上吏抱案牒至前随即决遣庭无留事暇则默而观书治家尤严外人无识子弟面者内外斩斩人不能欺理财精察量入为出无一毫妄费帑庾为之充衍增田于学以养士者几百亩上下贍足凡事整办簿书器物位置粲然惟公之精力足以行之岁时按阅及调戍兵遣海舟咸设方略羣立庭下厉威以临之号令简明凜有风采举衆耸听无敢譁者伍符尺籍一阅而识其人间有廋隐随即擿发人以为神以故威名远闻寇不得发发亦辄得治狱虽以寬纵为戒而重囚苟有罪误之迹必求有以生之郡县吏重足承命而未尝轻用鞭撻每曰此曹但欲其不犯吾令然亦民也可鱼肉之耶有妇人讼前母之子不孝者亲子实使之公深得其情责以子不顺母弟不恭兄一等

绳治母不忍视求为母子如初淳复训谕使之改事而退闻者服其平允年余擢提举两浙东路常平茶盐公事始至库藏枵然八阅月而罢所蓄已四万缗盖公之俭勤过人食不兼味自奉至薄以其行于家者移于官真有古人竹头木屑之智所至不加赋而用以饶侵寻暮境倦游而归不复有当世意寻差主管建宁府武夷山冲佑观官五转至朝散郎淳熙十一年公于是年七十有三矣素少病俄致其事或劝止之不可拜命才数月遽感疾六月十五日卒于正寝若前知然娶夏氏朝奉大夫知徽州承之女能相其夫亡十九年矣赠安人以十二年十二月辛酉合葬于天童山南奥之原男四人长文铸通直郎通判临安府先公一年卒次文镇次文錡卒于隆兴次文监将受公遗泽文镇实逊之亦以成公之志也女二人长适姜处俊再适夏祖禹次适登仕郎王佑之孙男五人泽涇津潜源孙女三人尚幼公系出名门而遭时多故且以孤孽不得于亲挺身自立艰难险阻有人所不能堪者先世旧物不遗一簪致位部使者退而燕闲生理颇裕皆公刻苦以至此出其余以济人遇岁寒散廩以食贫者安分知足未病而挂衣冠可谓贤矣然惜其不究于用也先君工部久与公周旋钥赘倅丹丘以父执事公公相与殆忘辈行治郡之绩皆所亲见侍坐从容犹得窥中原故家典刑年来忧居公时时相劳苦庖饌有珍解必畀以奉甘旨方为林下游从之约而公亡矣公抗直有祖风不轻以词色假人不知者或以为忤独于钥拳拳如许使人不能忘二子求铭公之墓义不得辞铭曰矫矫李公文定之孙奋身孤藐思大其门事无剧易遇之辄办低徊宦涂惜用之晚丹丘之政尚有一可纪使其用大所立必伟未疾引年得终其天公乎不亡视此铭镌

洪子忱墓志铭

余故人洪子忱以名家子力官业而试邑之始横遭上官摧折心实念之事既白会余从兄编修作州摩抚扶持使得自见一旦闻子忱之讣乃道远不得摩其棺一恸其子以书来求铭言甚悲请甚勤纪遗事甚备怆然其不能自己也子忱讳繁姓洪氏其先丹阳人曾大父固赠特进大父拟绍兴初为吏部尚书终徽猷阁直学士左通奉大夫丹阳郡侯累赠左金紫光禄大夫諡文宪父光祖右朝奉郎通判湖州以君郊祀恩赠朝请郎妣王氏赠安人尚书晚居台之宁川君以妇家在南丰因家焉绍兴二十四年通判遗泽补将仕郎二十九年授右迪功郎监兴国军在城酒税未赴间以纲赏循右修职郎改监行在户部赡军余场君少孤有意自立一岁金谷出入以千万计幸门至多挟势行贿变乱色价君一切裁之以公无敢犯者枢密林公安宅时以户箠领余事庖人以緘题补吏君察其伪白林公公治庖人甚峻獎君于稠人中时人两贤之秩满陞右从政郎又以赏循右文林郎授镇南军节度推官属邑奉新有苗米五百余斛名存而实亡公私交病宰以书抵君君为阅簿书得其始末告于帅而蠲之参政龚公召还尚书汪公为代问寮吏能否大参言君首公任怨临事不苟尚书与君有连素知君者由是益善君督捕茶寇引以自随无一日不同艰难功未及成而罢君复还官次分宁宰谢君磐忤後帅意有妄诉者降摄旁县酒官囚系满狱君深知其诬会以漕檄行县中父老皆诣君讼冤归白漕使赵公汝愚始解一日帅俾君讯问即呼讼者究诘之皆无实状官吏俱按堵如故府西门火延燔数十家兵官五人捄焚甚力彻旦方止帅欲委罪兵官劾章已具君历道其焦灼勤劳之状始寢其奏五人者相率系谢君无德色淳熙五年改宣教郎知江州德安县始视事民以丞暴弱羣诉于漕台迹状昭晰丞竟罢去郡将芘之不可迁怒于君督责日峻君谋避之有以告守守益怒移德安丞吹毛锻链遽按以闻君时到官方月余人皆知其无他寻置狱筠

阳竟遂昭雪守去而君亦归矣邑素剧至是愈不可为逋负不赀君力请于郡吏责少寛始得整颓纲而一新之春霖暴涨田家无所得食斂手待尽君载米家至损直以柴间有无赀者以私帑偿之夏亢阳躬祷名山率家人蔬食逾月彻盖行烈日中或至忘食发廩蠲征弛刑缓逋以次举行无不极其至已而甘泽霏霏谣诵相闻疫疠继作饬医药谨护视赖以全活者衆崇饰县庠弦诵不辍有刲股以奉母者奖励有加邑人劝焉初癸卯岁旱民负官租七千余斛至是犹未及半君曲为之图余及三之二从漕司和余米以足上供期以年岁偿之可以寛箕斂之烦林公枏嘉其意俾郡给千斛未能尽行也君惓惓三请谓不及今为之他日必至重扰迨从其言而君不及见矣人尤哀之君自祷雨得疾犹勉亲细务寢不自堪顾孺人曰我父年五十三水浮肤而卒我年既及而疾又甚似殆不免矣遂以八月十七日卒于县治之正寝神色不乱三日而斂如生也娶曾氏封孺人吉州教授发之女男五人枏孙棣孙栝孙桂孙椿孙女二人长未行幼早卒孙男一人诸孤将以某年某月日葬于某乡某里君天资孝友推诚待物高谊过人自痛禄不逮亲且以蚤鞠于外家因仍未能还乡岁时祀享东望松楸追慕凄怆不能自胜幼妹未行举部纲所羸又益以曾孺人橐中物归李君司法顺之季兄芑为邵阳从事逢郡侯之怒捕击甚急君闻之垂涕径走湖外往来都下愿纳禄以赎其罪移狱江西又哀诉于当涂诸公卒脱吏议阅数岁始得官广州道由君家别三日而僨于道衔哀星奔护其丧归葬南丰又挈其孥于邵并育伯兄之子甘苦同之勉以学问弟葆聚首二十年使之有室周给无倦隆兴寓客胡峡州括挂冠家居贫不能堪县不加礼至以逋租没入其田君请计岁入以偿责还半俸以活其家南丰宰卢君孝孙与君定交尝以公事忤贰车既赖君解纷其死也又周之叶君大辩免官待命邑下君念其清贫饷馈无虚日且为求直于有司而君已病矣县主簿之妻以免乳暴卒君惊恻不已委曲调护其家遇人有急难惟力之视人或负之曾无怨言方窘辱时亦有下石者已而待之如初更覆护其所不及人以为难民有姓胡者险健好讼君治之鼠伏又善谕之絶迹不至公庭君之丧胡泣于前甚哀良民失所依至巷哭以过车君在官名为二年莅事之日才半其得人心乃如此洁廉自将禄粟圭租有升斗之赢必惩其人而归之然刚直自任胷中无留事一有不平空臆肆言不肯诡随以徇人虽以此故所在整办然亦以此寡合君殊不暇顾恤久而人亦亮之惜乎天不假之年见于事为者止是可悲已铭曰

惟文宪公策名中兴丹阳之洪藹然簪纓君志自立家训克承试邑九江罪罟是婴人皆谓君否终则倾齎志以歿闻者叹惊急谊首公尚有令名勒铭山阿以诏昆仍

蒋德言墓志铭

仕宦以作邑为难而又有甚难者姚江为越壮县户口繁庶士夫骈集令才而勤犹不暇给四明蒋君德言以便亲为之宰貌不胜衣年又尚少平时简易和同或虑其不能办吏民亦望而易之去乡近当舟车之冲毫发不及悔吝必至此其甚难者府主丘公密一世吏师威望赫然君一见白事已当其意退而视篆遇事风生曾未浹日声称流闻滞讼见则冰释两造至前或片言折之无不厌服得君书判者传播道路皆以为神明催科徭役纲目简明不妄施一箠而官赋夙办受役者俛首以听令丘公及部使者大称之以为今日之最则又以其余力修学校葺传舍讲序拜以崇义风歌鹿鸣以劝多士应酬曲当下情益通进见者人人自以为亲已殆无一人议其後才半岁而属微疾不阅月而不可为矣阖境相吊如丧所亲日相与聚哭于门

喪舟之行耄稚長號江汧雖古之循良久于其職者未必得民之深如是是豈可以力致哉蓋君家以詩書相傳父子自為知己者累世君少俊邁近歲尤刻意向學剝心好問進退未已故其敏于政如此以是知非作邑之難顧其人不見德久矣如君能變愁嘆為謳吟于旬月之間曾不得究見所蘊天遽奪之其不仁哉丹陽金壇蔣氏自東漢有封義興函亭侯者代為閩族君之曾祖猷事徽皇為中執法終徽猷閣直學士左宣奉大夫累贈少師忠言直道冠冕一時龍溪汪公志其墓曰至今論宣和賢者必曰蔣公嘗守明州靖康來避寇難卒于海山葬隱學山子孫遂為鄞人祖謨右朝散大夫贈金紫光祿大夫父台卿奉直大夫皆篤厚君子也母恭人張氏君諱綸德言其字也以乾道三年郊恩父任為將仕郎五年試銓闈六年授迪功郎饒州安仁縣尉淳熙三年之官八年以強盜賞改承務郎知信州貴溪縣丁奉直憂不赴十年授姚江十三年七月到任磨勘轉承奉郎三月丙寅卒于縣治六月癸酉葬于定海縣太丘鄉富都輿之原與父祖之藏相望也君之在安仁已能卓然有立當路名公知己甚眾盡力所職杀伤者驗視必親人以不冤盜賊不敢發發亦輒得改秩之後忧患相仍祖母安康郡太夫人俞氏既喪而父行三人俱以毀卒君性至孝執喪甚哀調娛上下內外嫺族了無間言君之志得行于其家而不得仕者七年性不喜治生而好周人之急客至必置酒不問家有无以是益匱得祿曾未信眉而已矣君之才有余而壽甚嗇又素多病見于用者止此豈造物者不能延其定數姑使之發名譽于是數月之頃乎使又不得此則君之所长益无以自見而人未必信其能過人也今邑人稱頌之于前几不容口追痛于後久而未忘是亦足以不朽矣君昆弟四人叔氏早喪君哭之不能自勝至于成疾與伯氏季氏友愛尤篤傍及羣從切磋學問觴咏相從甚適也去秋君以視篆之初不及秋賦伯氏季氏皆在選中又相繼之官搢紳以為榮太恭人首過姚江方將往來諸郎之間一旦禍起不堪晝夜之哭行道所不忍聞而況于親黨乎始余仲兄嚴州止一女為欲得快女壻戊子歲就試漕台歸而喜曰吾得壻矣有蔣氏子從其兄入場屋動翰如流取而讀之駸駸逼人父母少之未欲其覓舉上書請行氣宇爽甚閱三年成婚翁壻俱名荐書即德言也德言于余最厚既嘗為之狀奉直之行今忍銘君耶仲兄之亡相抱持而哭且曰外舅既不可見事公猶舅也今女侄既失終身之托君以兄子為後曰興仁晚得一女曰余拊之輒心折因君昆仲請銘于辭亦不忍也哀哉銘曰

君之往兮秋風蕩流聲兮與江俱東手摩兮瘡痍居無何兮民歌之忽不見兮何當歸父老頓足兮咨嗟涕洟君歸兮奈何風搖搖兮水揚波英爽兮如在托體兮山阿山可傾兮水可涸惟姚江之名兮不磨

太府寺主簿周君墓志銘

君諱元卿字景仁別字聖予舊諱冬卿字成甫世為處之遂昌人曾大父諱從諫不仕大父諱遯贈少傅父諱綰左大中大夫敷文閣待制致仕贈正奉大夫以君陞朝贈光祿大夫文學清裁有重名兩娶李氏尚書諱南公之女孫贈永嘉郡縉云郡夫人君縉云所出也年十三以郊恩補將仕郎既冠授右迪功郎池州建德縣尉光祿由祭酒遷吏部侍郎更今名奏承務郎監潭州南岳廟充福建路安撫使准差遣未赴丁縉云憂尋監左藏西庫又丁光祿憂服除差充兩浙西路安撫司干辦公事監左藏西庫提轄文思院提轄樵貨務都茶場行太府寺主簿淳熙十三年閏七月十三日以疾卒年四十有七積官至承議郎賜五品服娶樓氏封孺人伯

父淮东帅讳璘之次子讳镗之女子男二人长大受从政郎监泰州盐仓次未名而夭女三人长适叶相次适楼椅次蚤亡孙男三人文之前君半月卒迁之将受光禄遗泽次复之三女皆幼明年九月辛酉葬君于明之奉化县松林乡桃花西奥之原君性明悟过人光禄为当世儒宗教子甚笃会伯仲俱歿于壮岁叔氏寢长晚乃得君爱之尤切常抚之曰吾不患汝不能学然亦不强汝之苦学受命之後见叶氏甥肄业慨然曰吾舅也反不若耶遂发愤进学不半载下笔成文衆皆惊叹自尔手卷不释博贯经史雅有父风尤精班左二书前贤诗文稗官杂说动辄成诵鼓琴善自度曲挽弓能左右射舞剑击刺围碁投壶无不精到释氏教律禅宗之说道家符籙链养之法陰阳筮占推步之术一闻则心通类解记辄不忘发为文词笔不停缀饮酒余斗不乱席闻赋诗敏若风雨似不经意而语出惊人後或十数年间其故作历举不遗一字商?古今抵掌剧谈通畅磊落四座倾叹间出雅谑应口如响又莫不絶倒也加以临事能断有志于当世之务张魏公当国上书论十事皆国家大计魏公耸然异之欲擢置朝行而未果除左帑以旌其言又尝集汉唐事迹切于今日者着要监三十篇献于朝士友相期功名不足为君道长养成就当为一世伟人平时少病精力兼数人而小疾困之挟日而逝可痛也已帅幕多不以事物自婴君曰食焉而怠其事可乎帅知其才试以滞讼剖决如流有旨降神劲弓俾帅司制造以颁诸州君实董之且持檄徧阅于外工力精致至今为用西帑最为浩穰君处之裕如又以其余闲温习故业登名荐书间有纲运稽程调度偶阙上下搏手无策君临时制变动中事机一日郊赉甫毕而岁币迫期当市银七万余两君威信素著老吏巨胥无不厌服出钱才数千缗以次分授约期偿直不日登足版曹赖以无恐尤器重之任满增秩盖朱出墨入二年无纖毫诖误乃始得此同僚皆藉君以济文思杂用金玉宝贝绫锦之属尤难稽考君始创簿物以号别之至今遵用北使之来凡锡赉器皿下至徒御衣衾等物皆以职守次第按视至勤御览君以为此特分赐行人不应过礼以伤事体起部以闻上深然之支用余羨岁久积腐君请于部编估而鬻之得钱数万以给工费侍郎李公昌图赏叹不已力引于朝又以边郡荐之榷筦岁额八十万缗类多亏数君始就职皆曰君来则岁事无虑矣既视事密询访得数十条皆名数期会所当先吏辈匿之以以为奇货未始轻出间因白事君引类擿发旁通无余愕眙相顾莫知其所以然後虽有不在条中者亦不敢隐以是未尝汲汲趣办岁未终而额已溢矣乙巳南郊摄符宝郎先郊三日命宿八宝于奉常君谓宝国重镇也今先两夕置于外非便日者祀明堂设宝于殿左宜即其所俟驾兴以从会宰执取旨不及遂已然识者咸谓君知体焉勾稽外府方向于用左右揆知君素深自为筦库时皆略去东合苛礼见不以时君亦自喜有朝蹟将因是以见天子一吐胸中之奇使见于用当愈出而愈高孰谓其止是耶然上而受知于当世名公往往期以国士与人无高下贤愚又悉与之欢有以急难告辄倾身赴之匍匐救丧尤为周尽见有陷于罪者苟可以营护之无不至故位虽未甚显而声名已籍甚才虽未尽用而恩之及人者多歿之日朝列皆为之痛惜亲党乡曲下至闾里无不咨嗟相吊盖其得人心者如此括苍达官最盛皆与君至厚亦欲引而致之华途未能也光禄晚益清苦君性至孝奉承左右常时诵书以娱悦之父子兄弟自为知己谈经论文侃侃如也执丧哀毁过礼叔兄已先丧一力任门户之责襄奉劳苦人所难能自郡至莲峯葬所凡三百里水陆险絶又适大雪君徒跣露拜以祷丧行日光粲然道中滩水激舟几至倾覆君号呼入水负舟以出人共哀之初光禄与钥伯父俱将漕湖南始议締婚伯父由淮甸丐闲以归光禄入蜀道还使江东君乃就成于四明光禄自永嘉奉祠寓于鄞置田欲为终焉计後虽还乡治命俾叔氏之子守坟墓而俾君来依外舍然君未尝忘乡国也君与人甚周而待钥尤厚相从之日又久两

仕于朝复更为邻无一日不奉周旋顷钥遭外艰衔哀星奔委家不暇顾经纪其後君之力为多思欲一致泣谢未果而以讣闻矣间过君家有恸而不知所从也大受乞铭铭曰

括苍之周文献有传光禄大之世推儒先君济其美有志当世天分最高身兼数器中都十年始有朝蹟夷途发轫何壽之嗇千载之英閼此一丘尚尔後人有发其幽

鲍明叔墓志铭

友人鲍氏明叔将葬其子万里万石万容踵门再拜求铭于余余为之悲始余数岁时侍二兄从李先生若讷学明叔亦与其兄德光受业于门既冠矣余兄弟皆以兄事之明叔二十六而入太学犹时时相过友谊日笃隆兴改元试南宫明叔与乡人张伯玉璧王彦方敦义同邸余与从舅汪公删定求分□以处而舅甥偶在选中今又二十四年矣回首旧游德光与伯兄俱蚤世伯玉亦不禄彦方止于一尉淳熙十年春仲兄与余护先君之丧归自严陵明叔来吊甚哀未几闻明叔之讣为之失声又两月而仲兄不幸甲辰之冬删定亦亡矣忧苦之余亲朋凋丧俛仰感触尚忍言哉明叔之亡也余方在苦困中不得摩其棺一恸今其可铭君讳俊德字日新明叔其少时字也世居明之奉化曾大父遂良大父智俱不仕父璿以君故该庆典封迪功郎母江氏封孺人大父力穡起家迪功爱二子之敏入城就师友能相励勉洛诵声彻夜旦不休赋篇素工兼长于书多记经史子传之文喜为人讲说纚纚可听以其余力为诗词发语清丽倡酬无虚时君性端重简出自奉随力不为异三兄继歿独任仰事俯育之寄经理生事米盐靡密处之裕如与人交关务适其平门户虽大若无事者孝谨和易率子弟以学延名儒训督之皆疑疑自立君尤笃亲故见单寒者亲解衣以遗之无德色间有造门觴豆留连谈笑弥日不倦庠校二十年阅人甚衆交情终始无纖芥之间侪辈或致位通显曾不以毫末干请人尤敬爱之两上礼部竟以不售病且革戒其子母为禴禴事遗言琅琅有序三月六日卒享年才五十有六呜呼可哀也已娶丘氏女一人孙男二人长曰初幼未名孙女一人诸孤卜地于嵩溪王奥祖莹之侧以十四年正月己酉襄事铭曰

吁嗟明叔而止于斯少也笃学几忘寒饥足用皴瘃目侵脑脂励志愈确期用于时命之不淑十上空归孝友衆知月评则推有子克家尚其似之我作铭诗维後之诒

攻媿集卷一百一

卷一百二

钦定四库全书

攻媿集卷一百二

宋 楼钥 撰

志铭

朝奉郎主管云台观赵公墓志铭

公讳善誉字静之一字德广系出太宗皇帝後曾大父仲暹夔州观察使赠开府仪同三司少傅嘉国公大父士迨武翼郎考不晦忠翊郎四举进士以节行称赠通直郎公弱不好弄年十二三诵诗书属文如老成人未冠失怙恃固穷自立手不释卷足不越户不知饥渴寒暑之变两试胄监乾道五年试礼部俱为第一登进士第调明州昌国县主簿昌国邈在海屿公介然有守不鄙夷其人为辨曲直皆明达平允邑人相与爱服之或诉于郡多愿决于主簿今太师嗣秀王时为守俾摄邑事对易定海慈溪三年簿领而无抚字之寄踰二期三邑父老犹能道其惠政海盜窃发捕得全党郡欲奏以上赏公言摄令捕盜不足为功诚不欲以人命希赏典嗣秀王为奏贷羣盜殊死力荐之朝公未始闻也授两浙转运司干官忽报改秩知抚州临川县县在江西最为繁剧公始视事即为文徧谕乡井出于爱利之诚心告教既孚乃具为条目日限量地之远近以定期约里长月不过一再至讼事皆躬自予夺顷刻即释去牒诉日省县久困于豫借吏以岁例来白且谓不尔必不继公命取税籍阅之逋负实繁盖上下蒙蔽无有发此者按籍征催不扰而办有无额官地岁入颇多以资妄用公白罢之复请并罢诸邑类是者或议虚市比之私创税场请撤屋罢市公力沮之以从民便太守赵公晔葛公郊列治绩十数条奏之有旨中书籍记去邑五年人相与立生祠于县治邑宰陆侃之记可考也添差通判常州浙右饥饉躬行賑济一郡赖以全活仓使以荒政论荐太师丞相史公上章举士备言文学政事之美召审察差监都进奏院迁大理寺主簿秋旱下诏求言公草封事上之凡万余言其略曰陛下兼收衆善而言者志在投合搜抉隐微条目益广而奸伪益生甚者唱为任怨之说窃徇公不阿之名一切付之不恤下情安得不壅习俗安得不薄和气安得不亏乎天下之习日趋于褊狭机巧之域而无有优游舒泰气象士不畏义民不畏刑则是二十年来攘臂建议争以为功者果何补欤壽皇嘉纳为大理丞有以左帑宿蠹告者逮系天狱官吏重足以俟遣公察其无辜谓将自其作俑者罪之则不可胜诛若断以一二年来且有刑罚不均之叹上览奏开悟得未减平江民唐贊之狱皆以为凶恶无可矜之理公条可疑状十六谓?证无实情款抵牾卒释之十一年充省试考官六月除提举荆湖北路常平茶盐陞辞壽皇曰朕精择得卿公论士大夫为已之心重则爱民之诚必亏营私之念切则奉公之志必怠得失之虑深则伏节死义之风必泯上深然之先尝进南北攻守类考上曰卿向所进书可谓有志至是又进易说谓圣人以斯道寓之书又曰圣人以此寓之于书天何言哉易学要须兼通天人卿史学如此经学又如此及临遣又曰卿向来学优则仕今乃仕优则学朕得人矣数日有请荐擢

宗室人才上复言公经学文章虽士林中亦罕有之湖北大旱鼎澧尤甚入境一日躬走村落抚慰饥羸得户四万余口二十万通融诸郡常平之储尽以为用赈柴贷济三者并行动得其实疫者药饵兼之奏阁贫弱夏税是岁粟麦倍收禾稼丰盈民至扶老携幼来谢初行赈贷或谓游饥将无所取至是民争负以偿诸郡充足尝奏买扑税场十余河渡四十五岁入甚微而豪民大为民害尽罢之十三年除潼川府路提点刑狱重囚谏议州县鬬讼稽考平反细大不遗才三阅朔漕使阙上称公儒者可使治财就除转运判官公尝论国朝置转运使本以收藩镇之权絶妄用之蠹脱斯民于暴征苛敛之苦近时司漕计者特以赋敛为事号为材能者务趣办而事督迫州县之困弊民力之寛乏未始问也故其视州县如一体有无缓急皆得上达悉力以应之诸郡所贷缗钱至十余万俾守贰置籍约以期年优裕乃偿自是蜀东诸郡举无忧熬窘缺之状十四年诏诸路监司条陈民瘼公言赋役不均狱讼不平征敛繁急酒税苛暴四事且曰陛下延见牧守固将以观人才也而计臣请以奏劄之一陈上供之数郡守垂满者莫不督责旧逋宿负征商榷酤肆行苟虐以藉手求进近议者有刑轻之疑帅臣治盗辄先斩以自劾而求弹压之名使其皆当不过能速杀之而已倘归之有司按鞫亦不免于死万一愚诚不能自明冤恨之气岂不上干阴阳之和乎兼遂宁郡事闾郡熙熙民有争竞且曰公未始扰我其忍负之公措置常平深察宿弊择官就仓和籴石增百金市有增损亦随低昂听民随所有求售亦不限日籴之数实惠及民官储充积公私便之所至就郡庠立学以教宗子率知向学持节东蜀凡三年士民爱之如父母遂宁尤所归心寝疾二旬上章力丐归主管华州云台观百姓始则朝夕侦问相率祷祈及归輶稚奔送涕泣不肯去既达寓里屏絶家事独处一室图史自娱一日忽谓家人将归正寝且欲自为志翌日天将明燕坐榻上瞑然而逝十六年八月癸卯也娶钱氏仅再岁而亡赠孺人再娶杜氏祁国正献公之後封孺人子男五人汝傅修职郎新监舒州山口镇次汝汲以公遗泽补将仕郎次汝俨次汝何国子进士次汝仲一女许适承奉郎杨?孙男一人崇揆孙女二人以是年十一月甲申葬于绍兴府余姚县绪山之原通直墓左公天资高明识见超诣研精性命之说发为议论及所着易说明白简易晦庵朱先生一见叹赏以为扩先儒之未明颐正郭先生尝序易书谓贯三才之理于其中一诸儒之说于其外二公师表一世于公特厚晦庵屡以书来相期甚至颐正出一编书公以奏之上孜孜好学公退不少懈率夜分乃寐尝即国史所载深求艺祖开创之微意为书十四卷曰皇朝开基要览又为皇朝圣政类编不幸寝疾仅成数十卷其他如南北攻守类考晋载记年表皆行于时又有论语说尧歌鼓吹曲祝尧文等诗文六十卷号恕斋类藁藏于家公孝行根于天性自以禄养不及祭祀务极丰洁悲慕不少衰弱弟稚妹备殫鞠育教之有成仲弟善与同登科季善亦以取应得官女弟再适人皆竭力资遣遇母家桂氏特厚舅氏既卒访其遗腹子为之嗣且厚给之其他笃故旧抚姻族恩意称是廉靖自将一介不妄取行郡例册皆摈不使前按例馈遗者悉归公帑刺举尤所尽心苟贤矣不待其请举奏牍面授之其在他州则邮置以达人知其不可以有挟无敢以浼公者间有按劾不以强有力为惮所部肃然楚蜀之士夫类能称道之公抗志不羣砥节砺行不泥纸上之空言必欲施所学而见之行事尚友古人思与之齐人或疑其好异公不顾行愈力久而益安人益信之考求世故贯穿今古直欲立事业以传不腐少名斋以宗迂以励其操後名以恕其志将以及物也出而从宦苟有利于民图之甚于饥渴救荒施舍之外又所在为经久之计在昌国已能劝勉富室买田与山专为编氓嫁娶丧葬之资在湖外则率十四郡买田畀郡文学司之每三岁则以给士之预计偕者在潼川则以漕计之余使州县置举子庄孕者产者俱给之米皆至于今赖之使天假之年处以大位

益摭所蘊膏泽必将下于民而官止于员郎壽止于四十七识者痛惜之呜呼岂以多记损心愤世疾邪而至是抑果有数不可逃耶钥与公相见之日可数而相与特厚汝傳妙年跻世科大似其父率诸弟力学以守素业汝汲入太学盖前所未有义方之训可知汝傳会粹公行事来求铭采其可铭者书之余弗着铭曰

熙陵诸孙嘉国好文流传至公遂为儒门公起孤藐立志坚正尚友古人期与之并学贯经史仕更麾符学仕俱优彤于帝俞平心济民一变齐鲁志勤道远中道而阻齎志何言勒铭山阿有子继之尚其不磨

太府卿王公墓志铭

公讳卿月字清叔世居开封府祥符县曾祖坏左朝奉郎大理评事祖阜和安郎父思正翰林医痊累赠朝议大夫朝议辟地转徙寓居台州今为台人公生于顓上嫡母太恭人商氏梦月坠于前以裾承之仅得其半是夜陆宜人实生公故以名命焉公穎悟不凡未冠而失怙恃固穷自守必欲以学奋身隆兴改元试入右庠乾道二年中其科授承节郎德安府复州汉阳军都巡检非其志也益进于学五年遂登进士第调温州乐清尉到官值海寇充斥制司督捕甚急诸将皇遽公处之自若密使人扼其境路所出相继就擒以授诸将不自以为功尔後获盗不一公谓此曹虽有凶暴实以失业至此多为寬其狱识者知其为伟器宪使程公大昌奇其才荐于朝乾道七年十一月召对称旨改承奉郎守宗政寺主簿九年三月迁太府丞六月为秘书郎兼吴王益王府教授淳熙元年七月除起居舍人十一月除起居郎阅日兼权中书舍人二年兼直学士院公起尉曹不四年擢用为文字官制词温厚真若素宦尝草胡公铨词云吾宁身蹈东海独仲连不欲帝秦至今名重泰山微相如何以强赵人多称之论事尤不避权贵是岁为殿试编排官宣召之日缴奏池州守臣忤时宰之意因以帅才荐之五月除直秘阁知庐州时方年三十八在庐仅七旬而陆宜人年高婴疾请祠而归日侍盥药衣不解带五年春除荆湖南路计度转运副使八月丁内艰哀毁尽礼甫终丧起知静江府当李接陆梁之後专务摩抚八年秋阅先期有告效用将杀将官以叛公廷诘而叱之曰前帅平贼功赏有不明何预我事我待此曹如子弟汝乃诬之耶械以属吏且曰事毕当行军法监司遣僚佐来欲用他日公不为动阴部勒以制其变仍携家纵观以安衆心效用谋既泄而形格比讫事无敢譁者归即取告者谓当反坐汗喘不能言公曰妄人无知不足以膏吾斧钺叱遣之效用又率其衆诉曰前日诬枉已蒙辨明而市井讹言不已愿纳军器于库以释疑谤公善谕之罗拜而退为出钱五十万于市许告捕讹言者翕然而定其处事类此时臣僚有谓广西盐法不便于民欲罢官鬻而行钞法诏监司帅臣条具可否公力言钞法之害五千余言虽一时不能回卒如公所料十年七月移帅襄阳观览形势极论事宜致于元枢周公大要谓襄阳重地当屯三万人乞移荆南之屯并归襄阳仍以鄂兵万人隶荆南分荆鄂为二军以襄阳为都统荆南为副未几壽皇令条列边防利害公径以此书缴进才一年均州报金人侵地数里削木大书曰移封疆过此均人詢詢谓必开边衅公知其妄奋笔为檄告谕边民安业西府驰问所以公以家族保无他每岁敌骑多逼近境公与兵帅先期围猎于郊视旧加远敌骑遂不至又尝虚传有警为之出游岷首抵暮而归终以无事赴镇之初遭岁洊饥竭力賑济奏陈至于五六田里得免流徙十一年言者乃谓公恬不讲荒政十二月罢归十二年再主管建宁府武夷山冲佑观

十五年冬除利州路提刑既奏事进直显谟阁改帅泸州叙人与石门蛮互市纷争蛮被杀伤者三公谓蜂虿有毒不可不备奏易守臣练兵习武时忘战日久士卒骄惰分习劲弓强弩躬自教督军声大振其後石门蛮王特错果貽书邛部川都蛮王墨崖欲借兵以侵边又集蛮衆二十部兵事势甚急公虽已素备不忍戕民于兵令蕃汉耆长王文通父子谕以祸福蛮人坚欲得前叙守而甘心焉相持数月公谍知蛮中有郭万肆者最号桀黠为之主谋致此边患以厚赏生致之或请诛以示衆公曰此易尔恐复因此生事奏请縻以重役迄今役于神泉监蛮既失心腹之人始以印状设誓待命下吏边徼以宁绍熙元年进龙图阁再任明年召还三年正月始至行在所除宗正少卿寻兼中书门下检正诸房公事六月假吏部尚书为金国生辰使未行除太府卿已而疡发于背或劝其辞行公曰君命不可辞也七月壬午行次扬州卒于舟中享年五十有五积官至朝请大夫娶赵氏先公十年卒赠宜人子三人好谦迪功郎绍兴府诸暨县尉好问好生并将仕郎女二人在室孙男昙将受遗泽孙女二人尚幼诸孤以十月己酉葬公于临海县之牛极山合赵氏之墓公性警敏记诵絶人先以武举进既精习兵书武事又登儒科词章赡蔚随事立就议论通畅洒洒可听古事今事问无不知旁通释老之书百家之学游艺多能为士林第一医卜星历动皆精诣琴奕雅郑入手辄工仪表瑰伟神情洒落唱第之日壽皇属目良久简记盖有自矣从游玉津一发中的亟被金带之赐在泸南教士卒衆列两旁百矢出帐中蝟集帖上无不骇服至于考辨鼎彝古物游戏翰墨丹青一一造妙其他世故叩之无穷而又贯穿文法练习吏事恩威兼举所在办治心计有余秋豪可察而持心忠恕事率从厚僚吏有请度其可用虽忤公意幡然从之故人乐自尽公亦不劳而事集疏财容物尤所难及历官虽久用度之余随以散施亲旧无所计惜月给岁赋旁及邻里之鰥寡孤独者身後才有田六十余亩书画图籍之外储蓄无几暂摄检正于谏议之际务从寛典亦有讥其过甚者公不恤也居乡恭谨无贵贱与之均礼闭门省事而不絶物不以一毫之私干州县乡人以此益加敬爱筑圃北山之麓取孔德璋移文中语列为扁榜泊然若与世相忘者徜徉尽日望之者以为仙平日有志事功留意世务拥麾几遍东南所至观山川问风俗历历胸次独恨未识中原张旌有行欲周览洪河大山以赞国家规恢之略而齎志以歿荐绅痛惜之诸孤彙其遗藁仅得三十卷藏于家钥客授东嘉始以同寅相与特厚赘倅丹丘周旋二年见辄倾倒尝与之论兵公曰兵不易言也指授大略则又曰谨之戒之惟忍于杀人者可以言吾侪皆不忍也每叹服之公自蜀归一见即自言此行他无所得尝从康节先生孙曾传易数甚详以兼官玉牒时时相过论人穷达壽夭奇验甚衆许以传授久而弗得语其家人曰今年我当厄会万里之行其能免乎一日取其书细焚之而去未几遂下世岂偶然也哉好谦兄弟来求铭余亦痛公之不得行其志也遂为之铭铭曰

穆穆王公世家开封寓居赤城乃亢其宗始以武进旋以文显一尉讨贼赏谢彝典召对明光结知至尊不四三年西掖北门于庐于桂于襄于泸所至称最复归中都司宗司府拭圭北行望舒感梦卒止于卿人皆期公出入将相齎志以歿天乎不谅六尺之躯才兼百人死而可赎人百其身我志且铭辞无溢美以诏後人以慰孙子

知婺州赵公墓志铭

公讳师龙字舜臣太祖皇帝九世孙曾大父令蘧邕州管内观察使累赠少师追封昌国公諡

孝良大父子翔修武郎累赠武节大夫父伯述武翼郎改赠朝散大夫前母钱氏赠宜人继郭氏封太恭人建炎南渡公以绍兴十三年生于长兴先大夫宦游迁徙寻定居于绍兴府之余姚公幼颖悟疑如成人七岁听讲春秋能解其义太师史魏公初为邑尉二子与公同研席公日记千言下笔成章魏公奇之未习声律以古体着雪赋甚工三十年取应授承节郎监潭州南岳庙壽皇登极转保义郎隆兴二年以锁试登丙科改授左承务郎监建康府粮料院郡委受输庾吏以压案银来公正色叱去尽革宿弊俾自概量邦人已称之有民田在大江中流讼久不决官吏惮风涛之险无亲临者率不得其实公轻舟径至田所访之耆老曲直始明帅阅其辞称獎不已疑狱多以属公仍兼领狱掾帅漕交荐秩满调知武进县讼牒填委剖析如流落笔精当老胥耸服县为士夫渊薮豪民倚势纵横岁输殿诸邑送使缗钱负数万公谕以理而严其期会翕然乐输不费鞭箠先期以足乾道六年骑军徙屯旁郡属邑分造庐舍将校邀赂公不从徙之硖埭地倍费工力公躬自督工落成又先他邑爱民御史寬猛适宜而若老于吏事者而公年始及壮人尤服之守知其才事无小大皆与公谋年少行卑而俾兼尊长司摄郡博士宗子儒流又皆惊叹誉益闻部使者列荐于朝权知邵武军陛辞所奏皆郡邑利民事进止详华占对明辯壽皇嘉纳且曰秀王之孙与卿同名孰为长公对曰臣为兄行遂命幼者更名皇族更名实自此始郡以运盐为岁计积蠹殊甚用度益匱僚吏俸给至累月不支公剗磔百弊规画一新课入增衍去郡之日帑藏充溢至今赖之土俗慄悍至白昼以刃相残有手刃十余人者又多盗公重为之禁俗为衰止尝捕强盗至庭公一阅知其非纵释之邦人疑其太匆猝已而得真盗衆始骇叹以为神有富民兄子尚幼熏其目又寘毒食中幽囚以觐其死偶以他事到官须其兄子为证逾期不至俾搜其家得于僻舍髻废骨立非复人形公为析其产命医用药复为全人真生死肉骨之恩也兴郡县二学增其廩给鼎新贡闈士气益奋遂有以经学冠南宫者造铠甲承命最後而办集最早试于御前强弩不能彻而第赏乃次他郡上供溢额亦不自言郡人刻石以纪政绩监司入境耆艾遮道攀留不可数计宪使谢公师稷首以闻漕使柴公瑾钱公佃继之有旨审察还朝欲使持节峽南公辞以亲老除知滁州未上丁先大夫忧服阕除真州奏事睿獎尤宠仪真酒政废阙税课日亏公为之削酒价以便民蠲征取以通商用度顿饶会南北泛使交驰供亿数倍处之从容又以公帑之余助漕计前此未有也飭武备修社坛百废具举诸司争言治状归奏民兵及两准备御之策擢知温州温在东浙为剧郡人士尤繁公延见尽礼务以儒雅缘饰春秋释奠于学元日序拜皆宴以觴豆儒士归心焉阅牒诉数百纸不以属吏治豪猾雪冤诬或持短长器讼者得其情不欲已甚正色诘责之媿谢而去不敢复至庭下龺箠为清积逋残欠追逮日繁公悉蠲之四邑不下数万缗而公樽节有方不以乏告也吏有伪为符印以盗库金亦为印钞以欺乡民者公据法黥窜吏重足一迹无敢犯者会岁疫甚公尽力调护全活者不知几人年余以謡诵转闻徙知婺州首蠲宿逋减折苗以寬民力罢酒务敷卖之扰人尤乐之才阅月而公病一日谓家人曰吾数将尽平生不泥佛老不谄鬼神不好祿祥不信阴阳卜筮方术之书毋为禳禱使我为畏死恋生者名医四集皆以礼遣之又曰吾死无憾惟八十之母不得终养为吾大恨吾妇吾子能孝能养有加于前则吾死亦瞑矣易箦之际不但不乱以绍熙四年正月壬辰终于郡治之正寝享年五十一娶闻人氏封宜人子男四人希醇高邮军高邮县尉希一泰州如臯县尉希白湖州乌程县主簿皆迪功郎三人累荐胄监未上礼部希章尚幼受遗泽女四人长适文学应宗度及幼女皆先亡余未行孙男三人长与庆次俱未名女三人十二月庚申诸孤将葬公于县东石堰西之原以秘书省正字顏君棫之状来求铭余与公同登进士科相与素厚假守东嘉去郡数

月而公至如臯又娶舅氏汪韶州之女契好益厚正字尝在公幕下所载详实可考为掇其大者而序之呜呼公简重而周于物谦退而敏于事务清勤谨然诺事父母尽孝居父丧哀毁几不胜钱宜人早丧殡于青田公自幼闻之每深霜露之感卒迁奉以归以公遗命葬于先大夫之近山弟妹嫁娶身任其责门内专守礼法长幼进退有度事无巨细动有约内外肃然笃于教子虽吏道倥公退必使之环侍讲贯经史商榷人物或通夕不倦故皆有场屋之效家素窶忍贫如铁石食不重味衣无华采藏书外无他嗜好姚江一区之宅仅庇风雨观者若不堪而公以数十口处之泰然治移于官吏事心计有不习而能者故所至可纪廉介自厉而以恕待人方在郡时亲旧及寒士随力周恤各尽其意虽居闲亦以其余周人之急作文若不经意而援笔辄就尝采史传治乱成败之迹为博古摘华三十卷临江筑小室号翠霞有诗几千篇以名其藁他文称是呜呼惟我国家庆系繁衍贤才辈出进与寒畯并驱仕为朝廷重臣汉唐之盛不及也以公之才抗志尤高而进学不倦使遂登用必有以大表见于世天不假之年其所施設着于四郡而止君子以其所已为足以知其欲为者可铭也已铭曰周强以宗宋祚尤隆本支日繁人材日丰公生明时不为不逢惠洽四州声流南东然而宏博之习以早达而事不就远大之业以中壽而位不充家学有传余庆所鍾诗以扬之尚诏无穷

益阳县丞赵君墓志铭

绍熙四年冬余待罪西掖临江彭子壽龟年以秘书郎擢右史一日相与论近世皇族人物之盛余曰自元佑初子湜始见于进士题名至绍兴十五年有伯攄者登甲科余时已省事人皆言南渡以来所创见此入必遂通显矣後闻其沈滞选调而贤誉益高子壽曰子之论乃及此耶此吾之妇翁也其仲子兴化使君今夏遭母太宜人曹氏之丧以归将祔葬于吾乡清江县建安乡磐石之西宅原君之墓以君之行状来欲并求铭于朝士子其为我铭之君字德蘊艺祖皇帝七世孙也曾祖世统赠安化军节度使济阴侯祖令杳赠昭庆军节度使吴兴郡公父子晖武经郎君生于东都睦亲宅幼而颖悟不为儿嬉五岁诵书数千言俨如成人吴兴爱而拊之曰是儿必以诗书光吾门靖康避地徽之婺源武经赴调君年才十四干蛊有条道方梗踰年不闻问君昼夜泣祷一夕然臂武经心为之动投袂径归人以为孝感武经官临安母孺人王氏属疾君侍奉甚谨药非尝不进衣不解带居丧哀毁悲号感动行路儿有歌呼过门者长老呵止之汝不闻赵孝子之泣乎里巷肃然从祖令時以王爵司宗必欲官之君以愿学辞及随侍临江聚会数十人君尽力调娱羣从幼孤未立友爱备至躬率讲习其後聯名荐送有登科先于君者高宗尝谕宰臣曰朕阅取应宗子伯攄程文多引诗书良不易得可令赴正奏名及临轩放进士刘章以下至第九人见君名顾廷臣曰是能力学取高第诚可嘉也召见称獎欲加进擢君不屈于当国者止依格授左迪功郎徽州司户参军用特恩循修职郎太守初亦易君後知其廉勤而临事明敏叹曰平昔自谓善料人几失之赵掾殆未易量也经界法行君躬按阡陌抑强扶弱不容奸欺枢密何公铸继为守见君文体典雅牋奏悉以属焉汪公勃归自西府闻乡人誉君甚曰吾顷为廷试诸位官尝爱其策恨未识之会君沿檄至黟一见如平生欢即荐于朝秩满循从政郎为鄱阳县丞洪公兴祖守饶亟称之曰弃膏粱之习躬寒素之行宗室之标的也参政程公克俊方闲居与君论诗文或至终日二公俱荐之调柳州州学教授武经勉使之官不得已留家侍傍单骑以往至宜春慨然曰深入瘴乡重貽亲忧仕进非所急也遂乞侍养以归初陈文恭公康伯知贡举擢君为举首及登参预闻君赴调喜甚延誉

时宰欲振耀之会銓曹有南安教官阙君曰是可以便亲他何求焉陈公欲留之不可曰此非所以处贤者姑以成公美志尔将之官代者祈少缓君与之同年为迟迟几年而後进会陈公入相或劝申前日之语君谓方安于此苟求非吾愿也郡在庾岭下君训导有方士皆奋励弦诵寢广甫书考遭武经忧哀礼有余治葬惟按之礼经略阴阳拘忌之说曰葬者藏也卜宅兆而安厝之礼也亲丧分当即死敢徼福乎服除转为益阳县丞张公孝祥方师湖南邑事多以付君讼久不决君徐诘其情折以片言莫不悦服有求荐于提举范公成象者范曰非敢惜此章欲留以待一贤者君眎篆首以剡上盖与君尝寮知之尤深也乾道四年夏君以勤职而又祷旱重为暑气所乘疾如痢症屏去医药起居如平时七月四日晨起犹对问疾者已而不言但以手加额若诵佛然而逝家人环泣忽顾曰母扰我良久复瞑目既晡卒于官舍之正寝享年五十有五兴化通籍朝列累赠君朝奉大夫太宜人少君五岁开封人左宣教郎知海门县栋之女有贤行安其夫之贫故能保其家而又教子以有立君之葬以其年十一月壬申太宜人之卒以五月二十七日其祔也以九月庚午子四人师侗从义郎永州兵马监押师侠即兴化也官朝奉大夫师攸师翰俱为承信郎监潭州南岳庙女二人长适通直郎知文州军州事王沆次适子壽朝散郎试吏部侍郎兼侍读【子壽彭龟年之字因已见前是以此不书姓】孙六人希谏蚤世希谟承节添添差监永州在城税务希律希訖希询希许女七人长适王节之次许嫁王汝嘉次适承节郎胡晋余未行曾孙女一人抑闻君之为人诚以处已恕以接物寬以待下俭以居家尝教子弟曰人福力有分量当重惜之仕宦尽其在我不可苟求妄进与其有求于人不若无欲于已与其取贱于人不若以贱自安呜呼贤哉君以二弟少亡抚教诸孤不翅已出君之长女未笄武经久已许嫁文州君方遭外艰语所亲曰介弟诸女已长求配当先於吾女迨终丧则从子受室女出适又嫁一表妹然後毕王氏嫠事亲族之长者以礼待其幼以慈有疾或丧竭力赴之寒暑风雨不顾也未尝谈人之短闻人有善若已有之为人谋必长虑郤顾为经久计而忠告之性酷嗜书经史百家无不该究手抄者至数百卷动以书自娱曰老矣岂以求进但欲赖此收放心免为外事挠耳奉佛尤谨旦必课经终身不替世味冲澹不蓄长物其容退然而所存甚远使尽其才用于世必有大过人者厥後孝宗尤亲睦九族搜取人才中外进用不减周宗而君止于中壽墓木拱矣岂非命耶兴化能以才譚自见庶将大其家铭曰

猗嗟益阳宗姓之望也少登巍科中兴之倡也受知思陵迨文恭之相也竟沈下僚何天之不谅也道行于家而贤誉之畅也使尽其用几今之刘向也我问其贤而铭于既葬也後人勉旃尚惟宗之亢也

永宁郡夫人孙氏墓志铭

夫人姓孙氏池之石埭人世为大家曾祖某祖某父某夫人幼而警敏事父母以孝长归故中书舍人直学士院王公鉉公以一时名儒笃学洽闻典内外制光显于朝每语人曰我方穷约时刻意于学夫妇攻苦食淡久而愈相安及从仕以来尤能齐家治内宾祭省礼略不以累吾心所以得专意宦学者皆其助也以是人益知夫人之贤舍人书无不通尤精于易一日自卜卦顾家人曰吾殆将死矣遽捐馆舍年甫四十有三夫人不堪其忧时舅姑在堂幼孤满前舍人清贵无生业家道艰窘姑实继室性又严厉夫人身任一门之责娱侍阿姑率能当其意舍

人有弟为庐州録事参军亦早世孤嫠又衆夫人经纪其家抚爱其子女不翅已私忧乐与之同婚嫁与之均人尤以为难孀居十余年二子长立从仕则尽付家事不复介意且曰我辛苦教子幸尔辈能任事吾何求哉安輿往来两间优游自适专精佛课讽呗无倦色暇则歌酒为娱含饴弄孙如此几二十年长子宰鄂之崇阳迎侍满秩夫人以微恙卒于郡中头陀寺之寓舍淳熙二年九月五日也享年七十有三二子长曰漑朝请大夫直秘阁知平江军府事次曰渥故朝请郎守大理少卿致仕女五人承议郎新通判施州汤允德迪功郎临安府教授章纲进士李昌龄汪森李熙载其壻也孙男七人长木蚤卒次克昌从事郎充四川都大茶马司干办公事次伯昌迪功郎次东文林郎江州彭泽县主簿次梦昌次汝昌次楠迪功郎严州壽昌县主簿克昌暨东俱尝上礼部而梦昌两预首选孙女二人长适承事郎监建宁府大挺场叶延年次适承事郎监无为军崑山镇虞方简夫人始葬于石埭之黄龙山少卿尝位于朝方以才奋而遽下世东其子也痛其父齎志而歿日者又盛言黄龙山之不利绍兴三年后夫人之穴谋改卜焉平江时方将漕西蜀既归遂以五年九月望相与迁葬于九华山下钥少尝诵舍人之文三入修門不及识少卿及平江为户部郎一见如旧识庆元改元自吴门贻书以夫人之铭相属且示以巴之通江陈宰淇所状遗行而钥已得嫠而归今日又以书来曰子既得闲其遂成吾志惟夫人淑范懿行皆可得铭因平江之请勤甚敬书之铭曰

惟紫微公掌内外制谓将枋用而不永世二子克家以才致身熟知阃范自孙夫人夫人之贤用心均壹始任其劳终享其逸九华之麓千载是藏我扬以诗後其允臧

攻媿集卷一百二

<集部,别集类,南宋建炎至德佑,攻媿集>

卷一百三

钦定四库全书

攻媿集卷一百三

宋 楼钥 撰

志铭

高端叔墓志铭

余与端叔游旧矣宦游契阔而情好愈笃盖其清苦勤敏皆余所畏而与人薰然又不得而疏也投闲来归携变离骚一轴遗余曰试读之当相与论其当余退而读之击叹其精深而悲其志方将与之痛饮而极论之而端叔已病病久而不可为精爽犹前日也一日遣女奴来手札炳然以所藏欧阳公为进士时白襴及其史藁诗章见遗且曰吾将亡以此为永好辞之又至未几而亡矣实庆元三年九月癸丑也往而哭之哀将葬其门人来告曰先生葬有日愿得铭其墓余为之泣曰向固尝状其先君之行今又忍铭端叔耶卒叙而铭之君姓高氏讳元之端叔其字也韩国武烈王曾孙曰士擘朝议大夫是为君之曾祖祖公仔右宣教郎燕山府路宣抚使司主管机宜文字考世埴修职郎致仕母洪氏封孺人高氏家蓟门五代之乱徙濠梁又徙亳是为蒙城高氏後居京师建炎衣冠南渡修职始寓明州今日庆元府着籍于鄞安贫而喜教子君性颖悟絶人勤笃亦絶人居近市独处赭山萧寺顾无书得易一编昼夜诵不辍遂晓大旨邻士异焉稍借以书君下意质疑谨听强记执礼甚恭人亦乐告之饥寒寥落辛苦万状人或厌且怒至排摈不容濒死者屡矣而志愈厉夜依佛灯寒拥败楮或数月不盥栉由是博通经史诸子百家之书少未知名屯田郎三山郑公锷一见奇之俾训其子郑公为鄞士师表人以此加敬始寢得束修以奉亲且力于学今漳州使君傅公伯成为教授折节定交不以诸生遇之由是门人益衆殆数百人少读襄陵许公翰书及从沙随程公回故尤邃于春秋博采诸儒所长搜抉无遗闻人有书曾不憚远裹粮徒步而求之前後凡三百余家订其指归删其不合者会粹为一书间出己意号义宗盖十余年而後成晚多所更定专务明经自三传而下不尽以为可吾乡及旁郡之为春秋者多出君之门或其门人之弟子也尝病学者不务下学上达骤而求之太高故自天文地理稗官小说陰阳方技种艺之书靡不极虽庸人一技可取亦尽礼问焉佛氏大藏经五千卷读之再过他可知也含英咀华以昌其文困厄多故其思苦愤悱极故其得深真有别目鉅心穿天出月之工既乃日造平淡以几于古作诗数万存不能什一自谓乐府不媿前作尝谓离骚之学几亡矣为之九篇曰愍畸志曰臣薄才曰惜来日曰感回波曰力勲曰危衷曰悲婵娟曰古诵曰绎思深得三闾大夫旨意且曰变离骚者沿流于千载之後而探端于千载之前非变而求异于骚所以极其志之所归引而达于理义之衷以障堤于隕波之不反者也又者班固扬雄王逸刘勰顔之推扬之者或过其实抑之者多损其真宋玉贾谊东方朔严忌淮南小山王褒刘向之徒皆悲原意各有纂着大抵紬续绪言相与詹咏而已原之微旨不能有所建明噫君以为骚人之本意将亡君之意又将谁明之耶性

嗜书家藏数千卷手自点勘宝之如珠玉遇所未见解衣辍餐不计其直又好周人之急有古人内沟之心田不满半顷或割十畷以遗亲党事父母尽孝浣濯炊爨必身亲之初入郡庠一羹裁必以奉甘旨而食淡自如人设异饌不敢尝必归以遗亲平居无疾言遽色强力而忍詢薄之以患难而不可夺教导生徒勤慤尽诚如训己子贫者致货财则却之而训愈力有念其孤苦衣食教诲卒名于乡君无德色也婺士柳义老于逆旅君哀其穷率乡人供给之死为之棺敛至殡于家皆人所难乾道四年荐于乡淳熙改元又为第一凡五上春官卒不第仅得因庆霈以荣其亲去年当受特恩不就年才五十有六而卒疾既革不食者月余自分必死却药屏医而处之怡然区处身後事纤悉无遗独以不得终养母氏为痛修职葬奉化之察廉冈力疾作书以母氏他日事属其门人屠君槐以其居近察廉也且为书以别亲旧君子曰终岂不信哉岂不哀哉娶朱氏里士友闻之女先三年卒子男三人子高子高子文一女淑尚幼家贫无以葬门人相与经纪其家以十二月甲申葬君于桃源乡蒋山新盛隩之原始修职生名门实为殿撰睢阳刘公斐之甥君学问固有自来蚤受知于殿撰从子侍郎孝黻周公侍郎绾周公年八十有二为君记谦斋称君之刻苦虽聚萤积雪和胆刺股不能过也属文赡蔚咄咄逼人学益富文益进行益修此其志欲立于万人之上而以谦名斋可谓有志之士矣客游括苍吏部何公偁风裁最高爱君之才教以诗律其子参政公遇君尤厚至今不衰也礼部会稽陆公游文章少所许可以诗人称君君又好前辈遗墨故物对之则起敬如见其人得之则喜而不寐以遗余者一二也老校退卒与之语中原及兵家事抵掌忼慨有封狼居胥之志故论兵法尤精或得其一策以干时宰诸公为之惊叹使得少分自见且将着于事业而坎壈终身不得一官以死岂非命耶义宗百五十卷又有易论诗说论语传後汉历志解各一卷扬子发挥三卷诗三千杂着五百号茶甘甲乙藁藏于家尝结庐察廉在大小万竹之间着万竹先生传自言为人达生任性不拘拘儒者之节好学而未至于道好文而不中绳墨好闲而刳心于古澹苦吟而不能自己乡评亦谓君有不可晓者三贫而疎财貌古气严而乐易已甚衣冠垢敝望之如木鸡而胸次洒落绰有晋韵知君者以为然铭曰

君之生兮何为君之往兮何之学穷百氏兮五上而空归蓄书万卷兮竟死而何裨天不可问兮吾将谁诉君视如归兮吾又何悲志在乎鲁史之义宗文存乎楚人之骚词噫後有欲知万竹先生者其视诸斯

工部郎中曹公墓志铭【代汪尚书】

公讳耜字仲本姓曹氏世为开封府祥符县人曾祖之器宣义郎祖组由太学登宣和三年进士第晚因郊祀进祥光赋徽宗称赏召试中书省换授武阶兼合职仍给事殿中仕至道州刺史有箕颖集参政谢公克家为之序父勋得世父官历事四朝为昭信军节度吏开府仪同三司累赠太师諡忠靖三代皆赠至太师宣义为嘉国公道州为魏国公忠靖之亡也高宗皇帝在德寿宫悼念平昔赐以宸翰具言其尝从徽庙北狩亲被密旨持御札御衣以归俾予继续且达二后书信请梓宫太后之还盟乌珠而却其师【乌珠旧作兀木今改後同】使逆亮而得其情且曰终始一节夷险不渝厚其赙赠之礼因疏行事大概赐其後且见予不忘之怀搢绅读之无不感叹以为君臣之际古所未有也公为忠靖仲子幼而敏慧孝谨好学属文忠靖尤爱之绍兴十九年忠靖为保信军承宣使以郊恩奏补成忠郎二十六年添差干办翰林司

二十九年忠靖北使适当危疑之时高宗念其忠勤无以示宠遇之意乃召公赴中书後省试策深喜其才特改授右承奉郎差充奉使大金国信所亲属十月充显仁皇后宫总护使司干办公事三十年干办行在诸司审计司三十二年除军器监主簿隆兴元年知大宗正丞二年迁宗正丞乾道二年以便亲主管台州崇道观四年差通判绍兴府五年除太府寺丞俱不赴添差通判明州公未尝历州县而晓畅吏事通练人情如素宦者时嗣秀王出镇多以郡事委之公亦尽心裨赞相得甚欢八年太上皇帝时以皇太子尹京妙选寮案除公临安府推官尤被眷獎未几随府罢出知严州年未四十初试畿辅为治得宽严之中吏民安之尚书张公杓亦以妙年为别驾俱敏于政庭无留事至今相与如兄弟然钱塘江岸为风涛所坏大兴工役公进钱万缗石版五千片以佐其费朝廷嘉其不扰而事办特转一官以宠之淳熙元年秋丁忠靖忧执丧尽礼号慕毁瘠闻者称美始忠靖既奉梓宫太后以归功高眷渥见忌于权臣因丐外祠卜居天台至是奉丧归葬遂为台人四年起知徽州到官尤笃意民事剖决滞讼皆得其平山城民生甚艰下至薪炭微物必竭力而後得之公知其然因细民负重至城而不能售遂以官钱居之以俟严冬用元价以应民之须初非有规利之心故人皆感其惠因此乃反致繁言江东大饥公拊摩如不及荒政备举而百姓终以艰食未免流移孝宗皇帝深軫疲甿令言者以徽饶二州流民独多谓不峻其罚则无以励方国遂与饶守俱镌三秩停任于是列郡耸然民益受赐公退而安之不敢自辩寻主管建宁府武夷山冲佑观十三年差知衡州十六年冬陛辞奏事太上一见曰此吾尹京时贤寮也问劳甚宠留为尚书司封郎官以职兼司勲避父嫌名改工部郎中既出亲擢朝士不知所自或告之故且曰曹工部宦達最久今日卿相在小官或布衣时已尝丞宗正矣公以故家子雍容省户言议文采丰蔚可观人始翕然称之为宜有以得此也绍熙改元夏上章求外补差知常州未赴以谕罢明年复任冲佑庆元元年差知蕲州待次里第三年闰六月乙未卒于正寝享年六十有一积官至中奉大夫祥符县开国男食邑三百户服四品娶洪氏吏部尚书拟之孙通判明州光祖之女封令人子男二人恕承奉郎志忠翊郎改奏授迪功郎处州松阳县主簿俱先卒孙一人复将以遗泽补官是岁八月丙申葬公于临海县靖安乡小石保之原忠靖奉佛老甚谨即小石建精舍以延往来公奉先志又加葺焉先一年自营壽藏于其侧从新卜也公生长富贵而以儒素自将幼少无骄矜之色忠靖出入禁中手擅笔墨而谨畏无比有万石君之风避远权势辞谢宠荣高宗知公为爱子又閱其诗文故擢之朝列後受知于太上进登郎省然三十年更历内外才不见于施用迄止于此非命也耶忠靖乐桐柏山水筑庵于西偏高宗书冲嗇二字榜之傍有云壑尤胜公闲居日久增饰其旧徜徉于中意度萧散不复婴拂世故独好以余财为乡曲义事为邑中建西桥甃通途谷贵则损其直以平市价雪寒则散所积以賑贫民死丧者助以棺敛逆旅者济其空乏野有暴骸为之焚瘞建佑圣殿于松隐山为一方祈福之地水旱为沴必斋戒躬祷多获嘉应自邑入郛有三渡之险为置大舟以济不通民户无扰邑人德之故死之日士夫相率致祭历言其事乡闾无不嗟痛尝过越上见茶园路僻雨泞则不可行又天姥一岭尤巉岩难进皆捐金平治加之以石为利大矣官至六品赏延未及其子先以奏弟之子慙今为奉化县尉宗族亲党倚以自给者甚衆风谊出于天性非勉强为之者达于时变自以再世由文华际遇累朝亦欲以此自见既不得与寒畯争执每遇吏事必疚心图之观其所已见者如此使得尽其才设施必有过人者既感疾却药弗进嘿无一语及家事恬然而化又可知其所存矣修谨洁廉仕途略无玷阙新安虽坐严谴无有为之明白者及得毘陵言者止谓引疾丐去不应治剧当别与闲地然其中却称在徽之政掇荒自有条理而人或咎其有膏粱之习夷考其

迹乃大不然罢非其罪人多冤之由是知人有善可称者公论自不能掩也噫公今亦可以无恨矣【某】女弟为洪文宪公孙妇与公有连又素相好也公之将葬复在韶趾奉祖母洪氏之命求铭余既哀公之不究于用子皆蚤世不得详载行事姑掇其家所录参以平日见闻者为叙而铭之铭曰

有周振铎始封于曹参起相汉至当涂高中更累代达者盖鲜惟我国初武惠最显猗欤太皇门多侯王公家晚着奋于颍昌曰文曰章名驰宣政忠靖继起闾閻益盛公实鍾爱克世其家蚤登三丞荏苒岁华受知太上始在郎列卒不得施兰摧玉折二州遗爱一乡陰功孤孙秀颖其报必丰天台赤城父子仙去我惟铭之以诏不腐

孺人俞氏墓志铭

绍熙四年余为殿庐诸位官牖唱之日掌以甲乙科号名奏御时前五名婺人居其四君相以下皆动色以为一郡之盛乔君行简则第五人也余从父弟鏞尝与乔君兄弟同研席又与行简为同年生同以表牋事人期集所时相与见过故与乔君尤稔庆元改元余既丐外得婺而归乔君有书介鏞以来则知去载季冬之癸酉遭其母太孺人俞氏之艰矣未几又以教授李君诚之所为太孺人行状至且曰行简不孝不得以一日之禄奉吾母菽水愿求铭以贲九京余哀其言又知李君非溢美者遂摭其实而书之太孺人世家东阳曾大父羲大父咨益父嗣同年二十嫁同邑乔居士森时舅姑已歿恨不逮事事其神主于正寝如生问其平生所嗜如古人所谓昌歜羊枣者岁时祭祀必供焉见亲党之事舅姑者每加羡慕且曰宜善事之吾不及尽此礼矣治家严整内外肃然自奉甚薄时储酒肴以待居士之须宾至则奔走治具晤言燕语必以善道有犯者谕居士以不争居士深于黄帝岐伯之书乡有病者多即之颇厌其繁必勉之曰是可以济人不务规利何厌也由是所活滋多比邻以室庐求售成券已久忽欲复取人皆难之则赞其夫曰法不可复取矣然彼恋故栖而我必取之则非所安也居士即还之其人感悦终身居士忧二妹之嫠而贫孺人慨然曰吾未有以报舅姑况君之同气忍坐观其失所耶并其子挈以归抚养皆有恩意有子不责以营生惟勉之学里巷旧无学者乔氏独辟家塾延师儒以为之倡远来者馆谷之弦诵日相闻助成居士之美皆此类也寡居之後身任家事一毫不以累诸子子尝手揣轻重曰是犹足存耶既不得求师四方则合乡之秀士相励以学业当论文时往往立屏间倾听记其要处退必询究之不会于中不已也故士亦乐与其子游升堂进拜礼如家人春秋寝高子屡举不得志念无以慰母心则谕之曰吾欲汝为善士岂求必于进取乎行简以上第归乡曲歆艳孺人视之淡然徐省其私持身益谨不以骄人始为之喜及属疾既革则又曰吾生于宣和之三年至此不为不寿汝曹第求自见于世以显其亲禄养不及吾无憾焉人以是知孺人之教子真有义方非夫慕富贵以为悦者也子三人长德佐先三年卒次子骧业儒幼即行简也从事郎饶州州学教授女二人长适王元谕次适杜之琮孙男三人从龙次龙元龙女六人尚幼先是长子既丧孺人于妇孙慈爱有加至是冢妇郑氏以毁卒亦可以知妇姑之间矣十一月丙申将合葬孺人于居士之墓孺人尝该慈福庆寿恩故得封云铭曰

柔而寡识闺门则均爱而失教妇人之仁猗欤夫人乃异于是以义相夫以学教子子登甲科

喜犹未深察其所安始慰于心壺彝之懿莫此为盛我铭诸幽尚笃余庆

赵明道墓志铭

庆元二年赵共甫自丹丘来主鄞簿粹然佳士也已而其长兄见过晁仲俱贤意源流必有自一日共甫为余雪涕言曰先君之葬三十余年矣既不及铭愿有以表墓道庶几有传焉以赎不孝之罪且以行实来余悲其意矧共甫之言笃实必无溢美为次而书之昌陵皇子燕懿王德昭生彰化军节度使舒国公惟忠舒国生定州观察使博陵侯从实博陵生保康军节度使开府仪同三司房国公世强是为公之曾祖房国生皇兄昭庆军节度使安康郡公令碑是为祖武德郎子佑公之父也武德南渡转徙久之始寓于台公讳伯直字明道建炎二年三月诏宗室羣试于有司特授承节郎累转至训武郎初监南剑州沙县盐税历台州黄岩县酒税明州奉化县税婺州兵马监押以亲老不赴三任岳祠再调赣州兴化军兵马监押明州兵马都监又以外艰不赴遂主管台州崇道观乾道三年八月辛丑以疾终于家享年六十有五十有一月丙寅葬于临海县大固乡蔡岭之原去武德墓西少南三十步娶程氏以绍兴二十一年五月庚子朔卒殡于白龙潭之精舍至是合焉四男子师弦今为忠训郎添差充潭州排岸次师泉亡矣次师绦保义郎添差监婺州都税务次师修职郎共甫也各以科目进二女长适修武郎李蒙次适成忠郎张万孙男九人希鱼希珉希贺希渊希鲁希希猷希韶希挺女十人公生承平时习见富贵而天资端静庄谨自将长好儒学善属文治尚书博观史传尤习知国朝宪章性至孝兵毁流离事亲就养无阙武德晚婴未疾药必先尝而进十余年如一日居丧毁瘠兄弟和乐无间言介不絶物 and 不同流闻善则勇于必为见恶则避之若将浼焉居无缘饰动有典刑虽退然若不胜衣言如不出诸口至是非利害剖决明辨人以为不可及横逆或加未尝校也盖其质本夙成而历世故蹈艰险困心衡虑多识前言往行故能躬行如此居官廉恪御下多得其心在章贡日羣卒忽拥门告曰军且变恐并害公尽徙公家出城而後去公始谕之不从乃微服间道以入迨羣集郡庭则公从中出衆愕相顾因开譬祸福罗拜听命事遂息公虽不自言而郡人甚德之自奉虽薄而丰于祭祀教子严笃观其义方之训可知仲弟早世公善抚其孤卒使有成有子师鄮今为承节郎公恬于利禄北客之同寓居者如参政贺公钱公皆欲力挽其进公谢曰国家多难大父而上陪葬山陵悉沦异域痛心北望不如无生禄仕实非素志家贫亲老无以为养故未能自己而暇求荣耶二公皆怆其言不欲强也晚号老圃每爱欧阳公吾欲四时携酒去莫教一日不花开之句负郭卜居手种花卉时节互秀无日不徜徉其中带月荷锄临风曳杖微吟舒啸自适其适既不事生产禄又不足代耕因以别畦艺蔬日鬻以助用安分自足与物无竞超然独乐以终此生呜呼贤哉使其得试于用其志决不在富贵而已惜其终少见于世然胸次夷旷无毫发怨尤形于词色识者可以见其所存矣余以淳熙五年赘倅丹丘一介之善多与之接闻公之风已後之矣幸因其子之请得为公铭姑以致尊慕之意云铭曰

王孙翩翩旧闻其贤笃学自立词采灿然孝以事亲钦以奉先半生漫仕乐以穷年教子义方科目相传定交令子获聆绪言老圃之适吾将学焉为发幽光见此铭镌

奉议郎黄君墓志铭

君讳仁俭字约之姓黄氏本出建宁浦城谿东之族庆历皇佑间高祖银青仕于中原因家于陈之宛丘曾祖好谦朝散郎知颍州赠通议大夫祖宰承事郎特赠直秘阁累赠金紫光禄大夫父子游朝请大夫以君升朝赠奉直大夫母武氏赠恭人绍兴初奉直自度支郎出守台州遂居明之奉化县十三年之任补将仕郎次年监潭州南岳庙次调严州淳安县主簿秩满以奉直年高不敢去左右再奉祠未几遭外艰服除监台州支盐仓历处州青田县绍兴府余姚县永纲赏循从政郎孝宗覃恩循文林郎高宗庆典循儒林郎引年致仕授通直郎赐绯衣银鱼今上登极转奉议郎庆元二年四月丙子卒于黄岩长子官舍享年八十有三娶高氏建昌军通判公惕之女后族也先四十一年卒再娶陆氏处州通判康民之女实左丞诸孙先八年卒皆赠孺人子三人直行迪功郎监台州黄岩县盐监管押袋盐次直古早卒次直义女二人长未行而亡次适进士陈经孙男三人正蒙正需正师女四人长许适进士郑枢君先葬高氏于县之宝化山又自卜寿藏于禽孝乡车盘隩之原既葬陆氏今诸孤以十二月庚申奉君之丧合陆氏之墓君家世多名德性警悟长于记问史记两汉杜诗韩文默诵连数百言无遗忘及见前辈逮事直阁公典刑具存多记承平旧事谈之纚纚不倦内明而行以至诚不事外饰居家孝友端愿绝口不言人有过有德于人亦不道也确守官箴廉勤自将不为矫激沽名事韬晦恬淡不与物竞人莫窥其际淳安俗犷悍竞渡多致杀伤尉惧而在告君摄事处之以术帖然不譁邑人谓未有也严岁取米数万斛于婺多不得全数君被漕檄受米于兰溪去取以公吏不能欺婺既如约严乃得实用焉在台摄郡幕给军衣有纒薄者羣卒掉臂忿怨坐上仓惶失措君徐呼其长谕以祸福罗拜曰黄佛子有言安敢不听汔事肃然邑隶纵椎货受赇不盈尺而法当流君摄法官曰法重情轻可从轻乎吏以为不可君曰法本忠恕非尔所知请于守詹公仪之卒如君议赴青田日道由缙云今枢密叶公自户箠居丧一见道旧久之且曰青田铁阨钱多以促办害民今得长者为丞民其少苏乎君期会竟而信课反盈于旧永嘉遣海舟诣军前既籍篙师为兵乞取家属枢密院下其事帅司檄君核实小人凭势妄指怨家妻女以为其家人君悉究其实吏曰此军事恐有不可测者君曰如此何名核实彼岂不能径取之不为动人多怀其德始奉直公间关南渡聚族颇众身任其责君又从旁经纪之宦既不达家道益困未尝问也先世与二苏公为同年且通婚姻书尺甚多兵火之后所存无几君力贫悉刻之石君书法甚精源流二王而遒劲似欧率更至老不衰在黄岩年余真草行书几满屋壁见者惊叹临终初无疾苦对客歌笑如平时少焉就寝则已逝矣岂非善人君子之报乎妣妻祖尚书王公旧居宛丘娶君之祖姑奉川又为同郡识君诸父及昆仲甚稔二子求铭铭曰中原故家存者无几典刑尚在言议可纪惟君寿考龕眉儿齿上接前辈终殿余子旧事历历及闻正始灵光独存今焉已矣吉德之报手足为后其昌兮勒铭千祀

周伯济墓志铭

周氏为鄞闻族始庆历中殿中丞造以进士起家是生三子曰处厚温厚师厚伯季俱躋世科仲亦以特恩入官父子兄弟皆以儒奋家声卓然伯知建州永州季为荆湖两路转运判官终左朝散郎累赠银青光禄大夫娶范氏文正公之女二子皆有俊声鐸登元丰二年第以宏才直节有志当世坐党籍仕至左中大夫知南雄州而止公论叹息铢登崇宁二年第仕为邑令小不合弃官而归乡里尤高之中大夫长子冲任右迪功郎监潭州南岳庙忧患之余又更建炎兵毁慕叔父之节不复仕进优游终身盖自崇宁至淳熙相去八十有七年岁在屠维作噩

有煜荐于乡焯荐于漕台绍熙改元焯遂登第钥时待罪朝行问之乡人曰此周伯济之二子监岳之孙也惟周氏名士继出仕不甚达而多以退为高中大夫望最伟而不究于用伯济守家法有隐德不务进取乡人亦罕识其面故其二子能振发如许钥晚出及拜监岳下风而随侍游宦在都下尝见其二子而闻伯济之贤独未之识既而奉祠里居庆元四年二月壬申闻伯济之亡因往吊之二子一日率诸季泣以请曰先君虽不及定交而托契已数世先君尝卜通远乡金谷里银山之原去祖塋二里而近将以九月丙午襄大事愿有以铭君讳楫伯济其字也庄重刚简幼不喜嬉戏从济南刘寿夫学凜如成人扃户诵书率至夜分家人不得而入抄书用楷法既冠一举不售即弃举子业而耽翫书史以诗自娱好读杜工部韦苏州诗至忘寝食故下笔有二公之风对客清谈无一语及名利事监岳燕居好客日与贤士夫从容觴豆君无兼侍奉承惟谨朝廷搜访党籍之後欲加録用清敏丰公少尹夏公之家皆以此登仕版君为中大夫适长孙郡上于朝未报连遭内外艰遂不以介意又不事生产奉祀之余仅取自给田有逋租未尝讼于官公赋则先期而输间至质贷了无愠色寡言若讷不为谄谀克勤小物忧深虑远举足如蹈规矩遇人无少长与之均礼真有不欺閤室之意教子甚笃每以门户之重训饬之且曰吾家以清白相传使汝辈能自奋励贫非所患也延礼师儒意不少懈躬自督课始终如一乡校月书季考焯焯屡占前列君曰吾方以此卜汝之进否投卷必以实年两际庆霈?年不及或为惜之君更喜其不欺焯拜恩以归贺客满门君以为幸不失旧物继此有望矣亦不见其甚喜也焯之官请君御安舆以行曰吾方萧散物外宁能闭置车中自为局促耶晚益杜门简出入絶嗜好薄滋味康强少疾不近药石先一年忽以脾疾不喜食他皆如平时岁除祀先不改其度正旦微觉困惫疾遽侵矣诸子日奉盥禴不效竟卒于家享年七十善人云亡识与不识相与嗟悼是宜铭矣娶林氏子男九人焯晔焯煥?炤煜炜焯长子及炤煜早卒焯迪功郎台州临海县尉女三人壻孙輶刘佃纪櫬皆里士孙二人壻坦女四人在室铭曰

周为名门中有人豪世以学为业而仕以退为高猗欵夫君閱世滔滔哦诗拥书隐居以自邀
有子克家为时髦君则已矣後其有遭乎

知江州汪公墓志铭

外祖少师生于熙宁十年後自太府少卿为两浙转运副使年六十一季舅始生年丁巳时庚申皆与少师同深异之母氏归宁亦以是年生钥又长于外家与季舅草角嬉戏少长同研席年十三同冠而公已受世赏周旋二十余年相与不翅如同气中虽游宦南北见辄倾倒对酒剧谈几忘辈行不谓去岁一别遂成千古每拜總帷哭之未尝不尽哀也将葬内弟求铭何忍铭吾季舅又何敢不铭公讳大定字季应世为鄞人曾祖元吉有隐德于乡祖洙为乡先生以特恩补官赠正奉大夫父思温左朝议大夫直显谟阁赠少师母王氏封恭人赠越国夫人所生母沈氏赠宜人公性开爽宏达了无城府十四岁遭越国忧伯仲二舅未及归吊客盈门公哀毁擗踊如成人受吊尽礼宗党称之少师抚爱尤笃甫冠又丁外艰服除授右迪功郎特监潭州南岳庙未几沈宜人下世隆兴二年差两浙西路安抚使干办公事未赴省罢监行在排岸司乾道五年就充贺金国正旦国信所官属六年任满七年以奉使赏循文林郎监镇江府榷货务都茶场请两浙转运司文解九年到任务场岁课三百万公平时不屑会计至是躬亲简书乃以增羨受赏独厚淳熙元年循承直郎四年改通直郎知绍兴府上虞县以赏典用新

制对实历凡十年至朝请郎公在上虞政务平易吏民相安事日以理邑有寓公吏部丰公谊左司潘公峙皆清介之士相与如平生观魏王薨于四明将葬于越诏遣刑部尚书谢公廓然运副韩公彦质护丧使者旁午州县震动官吏股栗他邑不过供顿之劳惟上虞通明一堰最为高峻潮汐虽登仅过数舟则已涸矣公相视地形复兴旧闸增浚渣湖别于支港创小堰以通余舟募游手二百人别以旗色分列左右俟大舟入闸立栅既定引湖水灌之水溢堰平衆力掖丧舟以进略无欹侧舳舻相衔序进而不譁俄顷俱济二公惊叹称不容口至邑复见馆舍三十余区一一整办器用精明帟幕华焕祭饌顿食尤为珍腴上下翕然迨至府中贻书求假供张之具公又择新洁者七十袭以应之二公既归言于庙堂诸公以为一路之最故公之才益显赞府尝以县録事小忤其意不以关白径杖之吏来谢且诉公曰本县丞何为不可挞汝辈尚敢诉耶更加惩治丞始媿服闻者以公为善处事也九年郊祀大礼恩赐绯衣银鱼通判扬州大乡赵公子蒙为帅政事严明公谨事之而从容忠告开心相与裨赞为多间遇其怒徐而解之终为之平僚属恃公以无恐久而相知益深移宪浙右握手惜别时人两贤之税契一司有所谓导行费者吏引例以陷公公正色却之曰我知勾考簿书尽吾职而已他日代者以此得谴狱吏推寻根源公汔无一毫之累漕司交岁币于金遴选其人命公与干官权公安节俱行敌贪而愎齟齬万状至欲易白金四之一濡滞踰期虽已过淮北使者辞疾不出一日与权公誓曰今日不决断不可空回于是襆被为留宿计始相感叹遣人逊谢不待有请而事毕漕使以闻权公以是进擢公不自言也知韶州郡计惟仰诸邑常赋而令多掇官去来不一几不可考究旧者未足新者复积计逋缗钱三万公曰民贫可重困耶徒费文移且以饱吏贪尔尽蠲旧负惟新是图五邑欣然承命民亦乐输焉旧有漏泽园在光运寺之侧其废已久遗骸多贮以瓶罍垂之梁间累累无数公因劳农见之其间亦有游宦不能归者惻然兴念而未有以充费会曲江尉许君教老无妻子卒于官下公既为之经纪葬送篋中尚余数百千公悉举以办役掩骼埋胔各得其所曰以此为许君植福胜于他用远矣邦人尤德之幕官陈光祖为之记甚详经略赵公彦操漕使黄公抡仓使吴公昭夫各以所知荐漕又与宪车李公信甫仓使赵公不迂列于朝其略言以寛得衆行简临民勤俭公廉慈祥恺悌庶几古循吏之风代还朝廷用诸司荐书而嘉其才遂除知江州江素号名郡讼简财裕可以卧治及公之至大异故时帑藏不盈万缗而负诸司之钱几二十万官兵俸给亦积至万五千公为之矍然日与同寮图之盖征赋既弗办而游士耗之又特甚公曰浚民膏血而使往来者挹取之以邀虚誉吾不忍为也会有旨申游谒之禁公奉行尤严凡有挟而来者止以尊酒谢遣之或恐由此起谤公不为动剔蠹剗弊谨朱墨节浮费饰厨传称过使客之事一切略去属邑旧逋蠲贷之如曲江不三数月而用粗足补解诸司十七万缗吏俸亦以次支行民不加赋益安公之政而不得志者萋斐寢成矣公竟以此罢归郡人冤之相与语曰不知谁为飞语厚诬吾贤侯耶有曹官坐侵用郡帑吏乘为奸既下有司公曲为保全姑与易地以息衆譁彼更以为怨鼓倡游言巧为陰中人尤为不平二倅张君泌陈君邕总干王君兴翁皆一时名士情交意浹驩然莫逆有赖叶济数月政成公退觴咏相乐前此未有惜公之归尤眷眷不忍别二郡皆有大兵屯驻待军帅一以诚意敬公亦有加焉士卒有犯结证明白送军中使自惩戒了无间言两造至庭究问详尽俟其首服多归于恕惟奸恶盗窃之徒治必尽法为之屏迹则又仁者之勇也水旱有禱随辄响应旧祭社多委寮吏代行寢以弗?公曰社稷重事岂可惮劳乃躬修祠礼贰车有诗曰九江代拜嗟从昔五马亲祠始自今公自以由支郡升巨镇荷朝家选委之重洗手奉职采自畚厉又素着廉洁而横遭口语皆出风闻不能无怏怏去郡尚无他重罹风雪之苦将次池

阳忽得微疾一昔歿于舟中寔庆元四年正月丙辰也呜呼痛哉享年六十有二官朝请大夫娶陆氏故发运使寔之女明慧勤约内助甚饬相夫教子俱有可称先二十六年卒赠宜人子男五人敏中从事郎抚州军事推官教中將受公遺澤余幼亡女八人其三亦先卒一适陆森宜人弟之子其次迪功郎監鎮江府延陵鎮趙希一从事郎台州臨海縣丞趙師侁里士黃沐皆壻也一尚幼孫男一人之綱迪功郎臨安府富陽縣主簿始宜人葬于慈溪縣石台鄉龍潭之原敏中等將以十二月壬申奉公之喪合焉公之處家居鄉出而从宦表里如一明白空洞不問大小待之鈞禮故所至與人無所怨惡檢身謹密杜門省事又不治生產了無贏余婚嫁交迫俸入緣手而盡處故廬西偏欲少增辟竟莫之遂外家友恭之名聞于時仲舅尚書任兄弟之子猶子也叔舅運干蚤世澤不及子公奏闡中以官其篤于友愛有父兄之風焉訃音至鄉親故無不隕涕母氏泊仲舅皆以高年見公之亡傷悼尤甚公素少疾持心近厚孰謂其止于此耶公洊以臨遣奏事上動兩朝之听其一論韶州岑水場兵匠之弊甚悉謂諸路配隸之余選以應役或聚而為盜害及一方若从爐戶之便添認銅額可省廩給之費其到場及四年者照旧格給据縱遣余人以次归元配州軍實遠方經久之利敢書大概庶几後人或有取于斯銘曰猗欤汪氏積德數世先生淳篤文行兼備少師起家深仁厚義舅承其傳慈祥愷悌載擁州麾仕非不遂胡嗇其年歿而齎志公之為政慕古循吏害公客耶亦命之制龍潭之原往從伉儷有銜不祛庆在來裔

攻媿集卷一百三

卷一百四

钦定四库全书

攻媿集卷一百四

宋 楼钥 撰

志铭

知梅州张君墓志铭

龙游为浙东壮县号难治自绍兴间陶安世定有声之後历数政不以善罢四明张和卿由袁州万载尉以捕盗赏改右承务郎年壮气鋭往为之宰亲党或劝止之既至谒庙以廉勤公平自誓上不负于君下不欺于民终始如一神其临之闻者竦然首定规画凡听讼追科出纳简稽公吏抱案进退皆有程度乡胥奸弊智者不能尽察君左右参验甲乙相纠簿籍更川薄楮以防削改字画分明欺伪略尽有宗室子与强民为仇各聚衆至数百期操兵夜鬪于市尉趋告公曰安有是事命置酒尉股栗不敢饮吏又告将合矣君笑不答俄散去约明日复至迟明召二人者至庭谓曰汝自相仇彼衆何罪而使滥被杀伤乎不如挺身持刃决雌雄于前两人者相顾欲退公曰官府有法可容尔耶分囚庑下至累月始悔过求免邑衆为言愿相保任使自新即纵之俱媿惕感服君既归犹以时节致书问起居者数年设保伍之法绘为鱼鳞图居处向背山川远近如指诸掌又籍其家之长幼姓名年齿生业纤悉毕载其崛强无行邻里可以纠告或犯法未就捕而君已知其人私忿鬪殴邻不为劝止者与同罪牒诉诬妄必坐其教令者法令易行井若画一欲以献之朝通行天下未果也豪右竝大溪为舂磴以擅利久为舟行之害闻有废之仅能彻去浮屋君始并其基址去之初谒太守司谏施公元之迎谓曰邑大未易治盖以君尚少也君曰正恐上官以为易今知其难则可为矣守待寮属严一日令赋外别输四令奉命惟谨君独争曰使某左枝右梧月献缗钱千计未为甚难如貽患後人何守盛怒君辞益坚且曰宁弃官以归已束装矣守曰试子尔乃能刚果如此更荐之後日书问如待子姓家事亦或咨谋焉白革湖镇当水陆之冲戍兵经山不翅寇盗莫敢谁何君白帅府以军法齐之无敢譁者有一士笼禽于市为恶少年侵侮君责其不学送县庠从师受蒙谨其程课居数日而後杖其所侮者人皆悦服视事才三月有诉君于部使者核其言不根反以此受知又诉之朝泊付有司乃扳引前令事为言其人既伏辜君之治行益白久之謡诵杂然如十德诗能官赋十可喜歌颂钁木镂石几不胜数流闻四远境内多立生祠惟灵耀成志二寺至以神事之或致祷焉帅宪具绩效奏闻有旨候任满赴都堂审察淳熙初元既造朝干办行在诸军审计司俄改差权发遣均州制词有云风力敏强有声剧邑是时孝宗皇帝垂意民事由治县而擢为郡者不过数人如丞相叶公衡自於潜守毘陵卒至大用均有管内安抚之权人谓君自此升矣四年陛辞奏事称上意且属以有机密事奏来而台评以资浅论罢五年差知兴国军前论者又以为言改通判筠州遭所生母安人方氏忧服除通判衡州既授代而报罢绍熙二年主管台州崇道观四年通判广州几年适梅州阙守诸司奏辟未几而属疾庆元三年

十月丙子歿于郡之正寢享年六十有一官止朝散郎嗚呼命矣夫娶伍氏封安人子男五人度廩庠序廉度將以君遺澤補官孫男六人奇之湘之衡之環之次俱未名先一年奇之卒孫女三人尚幼君之入廣從行者多困于瘴疔第四子序卒于梅君念之切閱月而君亡安人來自富家善事其姑君既受命悉以祖產歸諸兄而又不事生產安人攻苦食淡閨助為多人無間言奉祭祀未嘗不躬親撫庶子不翅如已出初封孺人後得今封率諸孤扶君之喪遠歸悲苦勞勩人所難堪歸而治葬尋亦感疾五年三月乙巳不起始公卜壽藏于鄞縣清道鄉邵家橋祖塋之側既以四年十一月丙申大葬又以五月壬寅祔安人于君之墓嗚呼天之禍張氏何其酷耶先是君之諸子為君求銘以君既葬而遲之吊安人之喪又哭踊以請余于君有連又以齊年相好尚何辭惟張氏自仲以孝友稱衣冠代不乏人永嘉南渡始居于吳五季之亂避地東來有官于四明者因家焉君之曾大父綸累贈宣奉大夫大父寅贈朝散大夫父邦彥政和二年繇太學上舍擢進士第官左朝散郎贈朝議大夫自叔祖宏舉經明行修為吏部郎遂為鄉之望族君諱祖順和卿其字也生七歲而孤當紹興十四年以朝議致仕恩補將仕郎性資明悟執喪如成人長從鄉先生金判沈公銖游沈公愛之至育于家曉暢世務以氣義自許庶幾大其家者居官所至可紀萬載有盜竊發躬勒部伍禽得之念其窮無所衣食而致此以為案問自首盜得不死衡陽歲飢道殣相望君遽發廩賑給而後報監司不罪其專而以才具優長荐之提刑姚公恪轉運張公演提舉陳公傳良謂君敏強精勤廉平簡素不詭隨而失守不强梗以侵權嘗稽其簿書条目雖多撮為一編上收支日總其最簡當精密無所容奸委之決獄酌情參法隨手剖析人稱平允相率列其狀于上今諫議張公釜為廣帥以歲有登歉欲廣儲蓄以備緩急為經略司樁備倉創立未久專以委君為之條畫綱紀辦事既速了無遺策張公亟稱之梅在萬山間官舍民居率以茅竹為屋公慮火災更以木瓦自驛舍庫廩兩獄先以公帑為之民亦樂從郡計匱竭為之經理而用稍足又能葺學校為養士計汀贛接境歲晚輒百十為羣名曰負販實為剽掠松源石下為二州淵藪淳熙間有嘯聚者自是几無寧歲君下車即用龍游魚鱗比伍之法行之羣盜為之屏迹郡治之後茅葺彌望君令民築室兩傍者復其身遂為通途旧以土客戶社丁供州家之役各有科調為罷去之皆起來暮之嘆惜其見于用者止此也與人樂易持論平恕而勇于立事不顧強御毅然不可回奪居官廉約為令時鬻產以繼祿又好周人之急力竭而無倦色嫉吏奸如仇洞見肺肝人不能欺衡陽之効良以此也平居念當世利害擬為奏草以待施用久遂成編名愚見錄藏書教子尤所留意朝議有經解雜著數十卷大書編次寶藏甚飭對之輒泣下嗚呼古人以方六七十如五六十猶可以行志為邑宰而得名于史傳者衆如君龍游之政可以不朽故余表而出之家有治縣捷徑等書皆公見于已試者後來尚得以考其規撫云銘曰

張氏着姓孝友惟仲漢良晉華支派尤衆永嘉南渡始為吳人或官于明遂大于鄞君起孤藐以才自奮所至可紀芒刃不頓龍游之政絕後光前治聲炳然徹于帝前謂自此升欲起輒仆晚試于梅遂罹變故抱負有余齎志而亡哀哀賢助又不胜喪邑人尸祝足以不朽銘以表之尚啓厥後

黃仲友墓志銘

余從兄編修娶黃氏諸暨名族也嫂氏兄子定之又為編修壻定之佳子弟聞其父推官之賢

恨未识也一日以书来诉推官亡于上饶之官舍归葬而求铭为摭所録行实而铭之君讳宗谅字仲友世居洪之双井与豫章先生俱本于婺州之黄五季有避乱而居剡者又迁诸暨遂为县人七世而上失其谱矣曾祖舜卿赠正议大夫祖彦朝议大夫赠大中大夫父克寛朝散大夫赠中大夫君幼而孤刻意问学手卷不释绍兴初建太学以弱冠上优选月书季考屡占前列驰声二十余年秦申王当国之久士子习为谀言汉唐非七制三宗不道时文中不复及兴亡治乱事至不识资治通监为何书二十六年岁在丙子高宗更化之初公道大开申挟书之禁防闲甚密秋赋多趑趄其行君以素业贾勇而前登名荐书侪辈叹服时命不偶淳熙五年始以特恩补将仕郎明年中铨授处州遂昌尉年近六旬而劳苦不憚警捕之职甚举境接建安俗犷悍小歉则盗窃公行里正尝以啸聚闻君亟率所部操兵往逐之凶徒相顾骇曰黄佛出矣忍犯之耶相与遁去一境晏然十年任满调台州司法参军到官适岁大祲义仓出纳惟谨寻授信州军事推官庆元二年始入幕国正季君翔为守布衣交也郡事多以委君几于画诺君老而益壮剖析滞讼案牘山积推究无遗据法予夺不容一毫之私二年间类为四册近五百事四年之夏忽苦脾湿虽多在告竭力公务不见惰容痼疾复作遂求致其事转承事郎方将俶装东归放意林壑以乐余年未几疾革竟以十月戊寅卒于正寝享年七十有七娶赵氏融州观察使赠开府仪同三司润国公士筏之女联姻天族祖免亲法当补官君独不就识者高之四人先卒次即定之登仕郎次一之尚之皆业儒女二人长蚤亡次许嫁姚铨参政令宪之诸孙也孙男三季雅季文季野孙女四诸孤将以五年季秋某日葬君于县之孝义乡鲁墓之原合赵氏之墓君资强毅而与人谦和及见前辈源流有自他无嗜好惟教子甚力交游至多未尝失色遂昌邑庠草创二丁祭器亦不能备君悉力整办为之一新课试士子翕然悦服尚书王公佐方尹京邑贻书相贺有辟黉舍以延生员为斯文宗主之语在丹丘时直阁田公渭以仓使按郡一见喟曰老先生尚尔淹恤乃令吾徒冒乘传之寄自顾歉然即以举削来词曰学高前辈政有典刑允谓老成尚堪繁剧人以为知言礼部尚书尤公袤时居西掖以诗寄君有云金马玉堂慙我辈青衫白发念君迟三数公皆上庠故人故知君尤深推此可见君之为人垂絶不乱命诸子无他言惟以进业保家勉之自号隐退老人有文集二十卷藏于家铭曰

吁嗟黄君驰骋文囿少蜚隼声不为不售晚服官政感叹耆旧踰七望八不为不寿日月逝矣用不及究善积庆余尚啓厥後

赵深甫墓志铭

长兄绩溪尉蚤世三子五女以次婚嫁丘嫂最爱季女闻小溪寓居赵氏家法媒妁之言曰武德夫妇偕老杜门约居教子甚严诸子联中科第多有贤称其第三子师信既以淳熙二年赐进士出身得尉台之临海矣请婚审于乡评曰然遂以兄之子妻之後以近制改师得字深甫既壻于我与之游处被服儒雅略无膏粱之习庆元二年君既悼亡谋葬于通远乡白石里石营保之原而後之官甫四年而君亡矣哀哉母安人冯氏尚无恙一女二子哭声不忍闻石营去所居才里许将举深甫之丧合焉求铭于余忍铭君乎哉君实为艺祖之帝系孙赠保康军节度使高密郡公令儼君之曾祖也赠武义大夫子盖祖也主管台州崇道观伯?武德也武德生长承平南渡流落居四明之鄞县大抵居官廉俭谨蓄俸余以为待次计与邻里不以财交

故内外肃然深甫生而奇庞长服义方自力于学登第五年而後授室强敏自喜始调官或贺之曰临海尉多以捕盗改秩者君以为非吾志也在官果两得强盗一获私盐甚夥皆应受赏照验明备终不自言又达于吏事以此受知于诸公邑民自经而有伤又以移尸兴讼令受私谒谕君毋生事君正色曰事干人命今日正欲得实耳长揖而起终直其事人皆称平令慙且不乐时以职事相窘君弗恤也有士将雄狡无赖前政莫敢谁何偶有犯当治辄肆言曰尉欲治我不望改官耶君寘之理穷诘宿过卒逐之余皆耸服寻为衢州西安丞工部尚书谢公源明时为守趋召转运使潘公景珪问曰郡中有贤丞乎谢公以二人对而以君为优备言廉勤晓畅民事之详潘公曰得之矣俄列上谓才术优长可以作邑两易知严州桐庐县最号难治君为之谈笑而办才誉益显任满授绍兴府录事参军丁武德忧不赴服除会有旨侍从台谏各举宗子二人余在西掖荐君之兄师津今知枢密院谢公深甫台人也极知君恨举员已足未有以及之方为御史中丞而吏部尚书刘公德秀为监察御史问人于宪长谢公亟称君之贤刘公慨然荐之其词曰奥学有源素履无玷虽历官未久而声闻益彰并及辞盗赏事为远到之识乞以备朝廷选擢初不识面真公举也天族蕃衍人才衆多昆仲屏居山间忧患之余名彻天听照移狎至几于羔鴈成羣者乡人荣之本无意于干进仅以此俱得添差幕官君授建康府节度推官留守尚书张公杓多以滞讼属君处之当人情合法意衆议有未定者独招入郡斋议之或至夜分而後退大资赵公彥逾素知其才见其尽心赞画受输决事无不曲当首授京削参政又为之延誉诸司交荐仅二考而归既调严州节度掌书记为部胥所卖再往都下久之得疾逆旅遂以五年四月戊寅卒哀哉若人之不淑也始既辞盗赏而不用蹉跎至此知己方当路可以伸矣而止于儒林郎素壮强饭年五十有二何疾遽困之耶子希侃希□女未行君性质直忍贫自立职务之外进学不倦垂意经史同寮赓和往往倾其座人心计精密治公事如家事言不妄发持论甚正孝友勤谨自奉淡薄不务华饰思有以自见于世遂吞志而已矣方鼓盆时手记费用之目甚悉其子请曰何用尔君忽曰我且死汝辈从此为之兹闻讣音变起仓猝昆仲方议经纪之希侃等出旧所编按以从事适奢俭之中噫岂有知耶葬以六月某日铭曰

父子之贤闻于乡间兄弟之美彻于帝都君才甚优知己当涂谓进未艾而止斯乎兄子既殂又铭其夫尚惟诸孤承庆之余

安光远墓志铭

淳熙十二年余方怀东嘉之绶于家颇闻安君光远诗声一日褰长笈临门倒屣迎之貌甚伟文甚工与之语纚纚可听而忘倦也又六年过余于外府求跋其大父诗卷比余投闲里居故人罕不见者独光远未能相过已而闻其病遂不起寔庆元四年七月丙辰也六年诸孤将以四月丁酉葬君于鄞县之通远乡建隩南山其次子踵门以铭为请手编先集列载行实粲然可观余既哀光远之不遇爱其子之克家遂属笔焉惟安氏系出唐忠义传金藏五代後唐中书门下平章事金全之後国朝勲籍节度留後守忠即君之九世祖司徒忠果雄勇功臣习七世祖也曾祖希文崇信军节度使祖?武德大夫真定中山府路廉访使者父时从义郎三世皆娶赵氏家开封祥符县建炎避地着籍于明今为庆元府居小溪镇四十年矣君讳昭祖娶轩氏亳社左承议郎中美之孙子男四胜非辟强去华弃疾女二长归冯季参次未行孙男一女

三君世为名将至廉访始以文采受知佑陵与枢密宇文公虚中雍帅蔡公靖游尤与宝学刘公子羽厚善刘公状其行自谓急难之义天属莫加也从义仕不显而家学尤懿见于张公总得祁之帖正字士公衡之铭兄弟终鲜承父祖之传幼敏悟力学抗志高迈从义指物命题脱手成句见类书辄屏去曰此豫以不能待人者性端静衣或数岁一瀚繙书已熟若手未触者举动不苟絶无子弟过从义年踰四十得君笃爱之择师以教日益秀发父子短檠相对至十余载自为知己出入不能相舍既冠同客都下从义得疾委顿君忧惴愿以身代旋即东归竟至捐馆执丧哀毁悲感行路母素严重家政至是益肃君亦敬事尽其欢心及疾革医禴未效至刲股以进家人窃窥而後知之丧葬俱备哀礼自以世袭衣冠未有以文发身者扁其室曰观行朝暮激昂期绍先志蹉跎至五十始慨叹曰科举之不效命也遂一意于义理性命之学舍後筑圃中辟一径自号通村老子好为古文尤工于诗平澹敷腴不为艰深之词每日工夫到处却无奇特有文集二十卷名通村遗藁丞相寿春魏公退处碧谿山中之客惟雪窗张武子与君从容觴咏如裴迪之在辋川也郑黄中王德新龚养正薛清卿汤孙将诸君皆相与为文会酬倡之友致仕应君良弼一乡推为长者老而益高君尤与之厚尝铭其墓人以君为应之亚匹云与物无竞不见喜愠之色每戒子弟勿与人辨是非待其自释又曰横逆之来如在荆棘中徐行缓解而已礼法自将不识公府以诚待人久而相孚内外无间言喜事爱客客至趣备酒肴擷蔬买鱼陶然径醉气同志合或馆致累日室无长物惟好古不衰先世遗书残编断简皆手自整比书尺往来有可观者亦谨藏之笔札素工称其文肮脏高简莫窥其际客去则取所闻见者剧谈示训诸子不待出门而家传充然有得也自卜葬地无复世间意参閱内典旁接诸禅跌坐至深夜不动年才五十有七而疾病垂絶犹大书偈语词意超诣亦足以知君所存矣铭曰

穷亦乐困而亨奚其为政不言而行惟卒不施以昌其诗江山为助笔乃纵横优游田里以得此生彼其忧于心而毁于後虽曰得志未知与此孰重而孰轻安氏之积厚矣非此其身後其有兴者乎

朝奉大夫李公墓志铭

太师史文惠公两登相位其持论以求贤用吉士为先盖其天资寛宏务为忠厚家传孝谨以此教子以此择壻玉局李公删定其一也公讳友直字叔益世家绍兴府之余姚太师为尉与公之父游见公所为文奇之又喜其端粹遂缔姻焉公甫冠入上庠太师鼎贵公退然未尝自言同舍有不知其为丞相壻者其恬于势利自为诸生时已如此太师尤器重之既登科而太师再相孝宗垂意人物一日问太师子壻孰贤以公对即除详定一司勅令所删定官时淳熙五年二月也有以资浅为言者虽寝前命至七年再除始就职朝论翕然以为真吉士可谓冰清玉润矣公曾祖尚邕州太平寨主簿祖竑从事郎累赠奉直大夫父梓承务郎累赠朝请大夫妣茅氏赠宜人公幼警悟蚤已能缀文父祖奇爱之稍长益自刻厉主簿学行为里人所宗以贡入京师晚才得一官延师儒训子孙孙曾四人踵入太学公最以词赋得名屡占上游自名荐书後以恩免举将再上礼部俄遭外艰乾道初试上舍中优等又丁茅夫人忧淳熙改元该免省者五人公独不就遂登二年进士第授迪功郎明州慈谿县主簿易太平之芜湖未上而有勅局之擢才半载以修进条法事类特改承奉郎轮对便殿进止详雅敷奏明白历陈救

荒漕运附试三事孝宗嘉纳悉以付中书或讽公谒庙堂施行之公曰吾知尽愚忠尔後议者立附试之额卒如公言同列序迁方拟以客台博士处公言者又以为骤得旨外补丞相王鲁公谕使求倅谓杭则不失故步明则可以便乡公止勾祠鲁公深叹其远识也九年主管台州崇道观十一年通判婺州既至郡参正李公彦颖中丞蒋公继周为守皆知公贤厚每事咨焉公外宽内明政务大体而略苛细恂恂若不能言而从容裁决无不均当谦和乐易事上官以礼虽不为异亦不肯希意苟合惟是之从不可干以私僚属吏民敬而信之不忍欺也既归宦情愈薄去国且十年未尝以一字自媒于诸公居岁余复求郡丞遂倅湖州剧郡数易守公间行郡事辄称治吏引例卷以摄承当增俸叱去之一金不取也提刑陈公公亮提举黄公通将列荐于朝公力辞之赵公不迹来守强敏明察官吏严惮且谓公必不合公不改其度守为之降色辞公亦以吏师事之始终宾敬不可得而亲疎时人两贤之後守至未煖席劾去外台怒未释使逗日至符移旁午先是郡有旧胥为守家吏与之俱来已而颇肆籍其家得守与其壻数书戎官将发之公曰何忍发私书以隳人于险乎亟焚之止械其人以前使者闻之弗罪也後穷诘之守果无预事遂白微公几殆矣秋赋多鼓噪之患公为监试前期以访乡老具得其情为之区画无敢譁者考官以去取求决于公辞不可以词赋定取四人时预计偕者十一人独此四人擢上第人深服鉴裁之精也尚书程文简公大昌旧为司业素知公尝曰公澄之不清挠之不浊真渊乎似道者哉侍郎莫公叔光代公为删定郎尝贻书曰公如美玉固未尝掩瑕而粹粹之至无瑕可指此平昔之所敬慕未易及也其为名胜所重如此庆元改元制曾两任通判者方许拜州曾经擢用者方许除职事官交亲趣之起勉至修门谓公必留而一造相府即以小垒自诡丞相余公谓何取之廉耶许知临江军命未下已谒告归矣五年夏以疾求闲甚力今左丞相京公意谓憚远委曲勉谕既不可回又为之易广德且谕公曰地近事简可以卧治毋惜一行也时广德守已得祠需公之至公谓求闲居而得便郡辞远次而就见禄君相之恩诚厚非本志也复申前请改成都府玉局观後两月疾益侵求致其事竟以其年八月乙亥卒于正寝享年六十有六积官至朝奉大夫赐绯衣银鱼史宜人有贤操先二年卒盖宜人朝祥而公以暮捐馆舍人尤哀之子四人曰赓曰康迪功郎婺州浦江县主簿曰庸曰庠以公遗泽补官赓庸皆蚤世四女长适迪功郎临安府新城县尉赵师固而卒次适修职郎监绍兴府和旨酒库史实之实之亡矣余在室孙男三人该将仕郎謐诒女一人诸孤将以六年九月辛酉葬公于县之兰风乡新湖刘公隩之原合于宜人之兆呜呼公金玉人也简淡无嗜好经学邃于二礼属文长于骈四俚六间为人草笺奏谈笑成篇初若未始经意词旨明切号为得体他有碑志铭赞等出辄为人取去无留藁公既没仅哀二百余篇藏于家词气雄浑似其为人字画遒美乡有石刻必求焉凡公所长不以自衒也性至孝禄不及亲终身以为恨故于族党恩意有加训子若弟示以趣向使自知劝诱掖後进絶口不言人过杜门却扫或十余年不至城邑令佐歆其贤多就见之清修谦谨无贤不肖一接以礼犯者不校不见喜愠之色故哭公之丧者无不尽哀里闾耄穉亦咨嗟痛惜谓无复见若人矣康少而干蛊即委以家事俾毋关我筑堂曰竹隐一丘一壑不啻自足多焚香默坐得丧荣辱不以介怀疏财喻义不事生产而趋人之急成人之美恐力不及既无德色或莫之知也先卒一月忽告二子曰吾以进士起家仕至二千石将以善终无可憾者遽屏医药至属纊无一语乱肤色温润竟日无小异家人几不忍敛顾非寡欲积善之效耶钥父子出入太师之门识公甚久既又同朝妇王氏之侄归康与钥之次子实为僚壻稔知公平日大槩故康来求铭康谨愿克孝濡染有自来尝荐漕台进学不已是能世其家者铭曰

温良恭俭先圣规抚门人从事有无实虚猗欵李公浑金璞玉终始如一慊不自足施于有政如古循良进称于朝退淑于乡云胡不吊丧此吉士庆必有余昌尔来裔

知复州张公墓志铭

孝宗龙潜妙选寮案端明张忠简公与太师史文惠公实为赞读直讲内禅之际二公翊赞为多文惠既相忠简为工部尚书告老而归上意恨用之不尽恩数优渥视签书枢密院君臣相遇可谓盛矣公讳仲梓字才卿忠简次子也世为温之永嘉人曾祖稹祖忱赠中奉大夫忠简讳闾母卢氏累赠魏国夫人公资强敏少承义方力学博记年十四入上庠时中兴学校更新在选多名士已能与之相下上月书季考率在前列又两预荐书绍兴三十一年以明堂恩补将仕郎非公志也明年授右迪功郎监潭州南岳庙隆兴二年丁忠简忧乾道五年差监行在丰储仓九年史公以使相帅福州过阙力荐其才孝宗念旧学之子即日召对闰月改宣义郎三月除大理寺主簿淳熙元年迁太府寺丞四年乞外补知通州七月陛辞因论常平利病敷奏详明上为之嘉叹问阙在何时以实对即许改除且谕公曰他日莅职毋忘所陈遂改荆南路提举常平茶盐公事六年持节入境体临遣丁宁之意疚心区画利兴害除因劾寮吏之慢令者忤同事意?遭论罢公之仕进自此齟齬矣十年主管建宁府武夷山冲佑观後知江州再知通州俱不赴凡三授祠禄至庆元改元始为两浙西路安抚司参议官秩满知复州四年赴郡古号竟陵废置靡定旁枕襄沔地卑水汇间三四岁仅一熟富商岁首以鹺茗贷民秋取民口大觚捆载而去公至首访民瘼叹曰种未入土民已无所告余可无以处此乎腾书帅漕借所储粟禁止商贩又广为收籴之计仓廩充实邦人赖之野旷多盗重为民害公分置乡兵部分严整犯者痛惩以法盗为引去期年公感未疾视事不少懈未几寝革遂以五年十月辛酉卒享年七十有一积官至朝请大夫娶周氏朝议大夫奉先之曾孙视永嘉先生行已为大父行少公一岁先一年二月甲午卒封宜人男三人燾通仕郎既冠而亡次烜燠俱以公任补将仕郎女三人孙一人埴当授公遗泽孙女二人公蚤历艰苦忠简晚既贵家事赖公经理性介特不好华饰图史之外他无长物通经余暇诸子汉晋唐诸史鉤奇撮要手自抄録所为诗文盈帙简古邃深今藏于家既登仕版又再荐于外台四上礼部竟不偶中间困于烦言才不得试孝宗简记擢守九江亦不果出卜筑谢池陶然自乐终不见戚戚之色家传有自来矣宜人幼颖悟嫁时公家尚窶相与刻苦以奉忠简闺门无间言善相其夫者也二子将以六年十月甲申奉公及宜人之丧合葬于县之吹台乡西山法济院之右来求铭于公家为有连岁在癸未与公之弟尚书公春卿为同年进士获拜忠简下风迨官勅局公之季弟延卿为寮公方丞外府居又比邻客授公乡後又假守昆仲偶皆家居春卿同列从班公入议幕交情事契日益加厚公之在复春卿以华文阁学士守镇江延卿为濠州伯兄之子晦之为泰州一門四郡守诸孙秀发人皆叹忠简君子之泽夫何公与春卿继卒于郡远不能致束刍而骇悼实深故不得辞而为之铭铭曰

忠简深醇求之古人位嗇台辅望压荐绅君承义方蚤入太学尝显于朝卒困流落复政未报而乃忽焉哀哀介弟相随九原君子之泽其流未已我惟铭之以诏孙子

<集部,别集类,南宋建炎至德佑,攻媿集>

卷一百五

钦定四库全书

攻媿集卷一百五

宋 楼钥 撰

志铭

朝请大夫史君墓志铭

四明衣冠之族绍兴以来莫盛于史氏自八行先生以纯德奥学积善余庆是生枢密公吾乡之登政地者实自公始枢密兄之子是为太师会稽郡王文惠公位极人臣而史氏益大故君之高曾皆重叠追赠者四十年不惟赏延繁衍而决取世科者累举不乏人其兴又未艾也盛哉君枢密之子也讳浚字尧翁世为明州鄞人今为庆元府曾祖简祖诏俱赠太师冀国公曾祖妣叶氏祖妣徐氏皆冀国夫人枢密讳才尝任端明殿学士签书枢密院事官左朝奉郎致仕累赠金紫光禄大夫妣孙氏封齐安郡夫人累赠大宁郡夫人枢密以绍兴二十四年归休三十年致其事奏君将仕郎授右迪功郎监潭州南岳庙以便养三十二年丁枢密忧服除引孝宗登极恩循修职郎再奉祠乾道六年调福州古田县尉九年文惠公帅闽以避亲不赴崇宪靖王知明州辟为定海制置使司准备差遣淳熙四年秩满关陞从政郎用举主改宣教郎知绍兴府新昌县十三年差权通判婺州十六年光宗覃恩转朝散郎绍熙五年今上覃恩转朝散大夫余以年劳积官至朝请大夫嘉泰元年引年致仕三年九月旦卒于家享年七十有五呜呼君年三十而得官归自婺女才六十有三已无复宦情其见于施設者止新昌婺女两任而所至声绩可纪其奉亲立身处家居乡又皆以古人前辈自期是亦为政岂虚语哉枢密之归君已壮矣谓君曰吾之进退固自无歉第郊恩不能及汝耳公拱而对曰大人方欲全晚节岂当以某为念枢密喜曰吾姑试之而气貌泰然足以成吾志矣参政李庄简公守永嘉枢密为签幕待遇极厚君方就傅附学郡斋每旦必束书以俟户外寒暑如一李公奇爱之枢密赴余杭君侍大宁次长安埭时有数百艘相持旬余公犹总角为之登岸处分使往来之舟以叙而行已舟独殿不日遂通枢密被召将行吏有以白金遗仆夫者公侍侧奋然曰是将污我当发之枢密喜曰吾儿可谓清白吏子孙矣性笃孝大宁既下世枢密年益高父子相与为命娱侍左右药非亲尝不进未食不敢食执丧尽礼既葬结庐其旁舍城居而家焉致敬家庙旦旦集家人拜谒风雨不渝蔬菜之属未荐者弗敢尝祭祀备极诚洁涤濯烹饪必躬必亲将奉祀则衣深衣以寝讳日先期斋素哀慕涕洟如始丧生朝不为宴乐在官吏民无知者同气惟一女兄适周氏事之甚笃见其卜居以金谿别墅遗之制幕例得僦直君曰吾有先人之故庐在仆从亦以乡曲不当用悉辞之魏王来镇君以职事迎谒境上典客谓当庭拜君曰此必非王旨揖而出王首以此见重遂被论荐将校捕海寇几百人吏欲逮治匿赃事君曰彼出死力得盗以赃为赏亦不为过若以属吏是为贼报仇也谁复用命王为宽之皆感激尽力海道亦清幕寮蔡君大成廉明有守或污蔑之将寘于法君力辩其非辜及出又厚为之礼东钱湖积

葑胶輶王欲开治之有请于朝欲给钱谷及设醴赏且以属君君引嫌以不敏辞又白王曰今为民兴利所费非不多水军有舟楫畚缶之属优给军士当必乐趋第严为纪律毋令扰民足矣请列棹岸旁取葑积之日久自成堤矣若属之官吏必致烦扰民疲于奔命吏急于言功止得目下弥漫可观根蔓不除适滋後害尔已而皆如君言始至新昌待制朱公熹时为提学一见如旧即以滞讼委之天台有王乌头者中产之民以析户交讼三纪矣案牒山积君尽召其党谕之曰至亲终讼未有不破家者我非不能处断一有胜负汝必将复诉词意愿款察其感动遂与酒肴使交相悔谢明日俱拜庭下曰今不复讼矣朱公深为器重自是亲戚有讼率以此处之或使之拜起揖逊于前而去得罪于父母者轻重亦惟父母之听曰吾尽法则伤恩矣由是无不感厉自新盖平时乡邻有失孝弟之义者必谕之以礼晓之以法不悛者或媿辱之感悟则与以酒食之资使其奉父兄之欢乃已其有暴戾恣睢狠于鬪昌于货者亦诲之淳淳俾归于善故见于政者专以风化为本也君子于催科不扰而集尝曰寬之于粒米狼戾之时而迫之于半菽不给之际是罔民也乃为之晓谕谓及今不即输纳将来不免追催諒勤周悉无虑数百言读之者虽顽钝之夫亦知感悟租赋不待促而办部使者至以移示旁邑至今邑人犹传诵之邑在山间异时趣办役夫以称过使客近乡之民一月或至数四君令乡各置籍据籍点差出历为信自輶输官物之外一无所役三年间户不过再及之远者或终不及也大谿自天台而下溉田甚广旧有堤以障狂潦而善坏几无寧岁君曰人力不至尔出官钱属耆老督民修筑民竞劝趋其他陂隄经君修缮者无不坚久乡吏销钞不以时遇有点追扰及已输之民者多矣君深慰劳其人问其道里期会之费官为还之罚吏金以偿官吏困于输金其弊遂絕有士与民讼田君谓士直而牒未具士复来谒君曰兹事已决彼当无辞今见谕则成请求之私移丞佐决之後无敢有私请者僧讼一民负钱至数百缗君疑之问民妻安在曰近鬻于人矣即诘僧曰此人甚窶何屡贷之汝必私其妻妻鬻故讼尔僧出又有诉僧寺杀其子而屍亡者君念笋蕨方盛此必为盜被擒而窜尔责僧令?访而寬其期?获之一讯而服豪民以称贷获利倍徙偿者无所出则以钱百万献于官公问钱安在曰散于民间官取之易耳君曰以此饵我而欲自为计也即受其献而列名及数悉蠲之无不称快或杀人于野而未获尉两以他盜塞责君察其非是皆纵使去既而真盜乃见犹微服至其处核之与狱辞合县计初无百金之储而逋负以万计君考岁入之目穷蠹耗之原曰吏奸耳吾能裕之先是岁用一吏司出纳号场典羣吏表里假贷为奸君使日一易之凡一日之入暮归诸帑久而浸饶曰此理官钱法也规模既立上下浸以相安再岁所用益衍重门頽圯衆以为请区画自出一物不取之民有与官为市及就役者加与之庸直有献木者君曰官自足用此汝先垄中物或与族党不平将假手于我耶却之先尝籍诸乡之盜日饲之而拘焉民间无复犬吠之警既数月相率而诉曰某等失业为此然朝暮惕恐未尝得饱食安卧如今日也各已知悔且望少寬许其日就佣役夜必归宿及是皆执役于官元夕落成栋宇华焕乡民不知有役咸聚观以为神县庠久敝欲新之而前迫于民业一径几不容车马君谋辟地或曰其家富饶未易得也君召与议即以为献厚偿其直于是面势轩豁新殿庑列桀戟观者喟曰吾邑文风其昌乎其後名荐书取儒科者相踵元日为叙拜礼衣冠毕集为陈尊俎设介僎叙长少献酬雍與无敢譁者且曰乡饮之礼昔固尝行之未有济济如此者耄穉皆相与观礼焉君资明而健决两词至前情伪立见书判数百千言反覆切当每曰久讼废业实官司不决之过惟详尽不可转移则安居矣故一经予决虽宿奸巨猾无复异辞及君将去念一任所决滞讼幸无翻诉吾去之後猾吏或为奸利则贫弱必受其害乃许请断由以备于是请者日至一一给之或感泣者曰令君为我

长虑及此真父母也咸请立生祠君力止之既去民知其不可留扶老携幼前期出境数十百里俟于水滨泣且拜曰不复有此知县矣婺遭大水溪南之民登屋缘木以避者数千计守倅乘陴君首募善舟者救之令曰活一人者给钱五千竭貳厅之蓄继以私帑到者分处官舍既饮食之又列炬通夕以男女混处恐其淆杂也人尤伏其虑深盗入民舍觉而遁隐于桑间主人访求盗投以石几中主舂以矛盗坠而殒吏以盗徒手受矛当主人以杀人之罪君诘之曰石非仗乎虽非所持然中则主人死矣闇中偶伤于刃此为登时勿论可也守不能决交献以上棘寺卒从君议有毆伤保辜限日未滿而殒者吏坐毆者以重辟君已知伤者能邀于市饮啗自若偶以宿疾发而毙再讯如所闻吏民惊伏盖于狱事尤留意深思以得其情平反如此等者非一也妇人有欲弃其夫者诬舅以私舅不承而死于狱吏白无所考证守将从妇君曰使其有之乱伦之罪固不为轻使其无之厚诬其舅亦当反坐舅由此以死妇可已乎闻之宪台遂坐妇罪里妇独处恶少谗之不从夜诈称夫归妇痛无以自明泣告其夫而縊君闻而为葬之表曰义妇冢罪其为诈者君之莅政多此类尝祷用于龙潭冒险亲至其处肃然若有所感云出湫中得神物以归陰云隐隐及郡而霈然作邑时凡祷皆应如此岂人力哉守既行而新刺史之兵百余人未知所归君使尽集于庭探筹分管随即帖定三易郡将备尽礼敬事有利害必力争事已和好如初君在州县一时监司帅守多名公相知甚深然不为苟求终无有以姓名荐达者恬于仕进改秩之初文惠公在经筵欲以请于孝宗而君辞焉曰未更吏事且欲字民以行志耳晚年闲居岁久祠禄亦不复就庙堂闻其廉退亟称之以厉躁竞者山居萧然棊酒自适不以一事至公庭乡之太守或欲见而不可得居官以廉节自厉俸给之外凡有例者皆不取用度一切取贍于家岁计仅给均为十二每月一出之效东坡段作三十块之说治不治产业凡货利之事未尝为也好仁乐施闻亲戚之贫乏者以济之丧不能举女不能嫁多为成就为梁以济涉解衣以蔽寒涂潦者予以笠屨年凶则为粥以饲饿者疾疫之家既遗以药至量其所食昏暮潜送其家不使知也亲见义役之便民及归见乡邻有以争役破家者君谓受役之害小争役之害大劝率为之为请于邑大夫力主其说今赖其利焉近山有虎樵牧失业者几月募猎者许以厚赏猎具入山虎亦遁去晚益严重端庄守礼语不轻发居不杂交亲朋有过面折之有一善则獎借劝勉如自己出取司马公家范书仪约为冠婚丧祭之礼行于家子弟有惰容必正色以临之童穉笑语亦不敢妄衣服器用不追逐时好家人俱不敢为华靡之饰或见之则叹息世态之薄也尝在衆中服布衣乡先生沈公铢笑其激君曰某不知其为陋也淡然一室无他嗜好惟取礼记檀弓学记中庸大学祭义祭统儒行表记等篇通监唐监朝夕从事尤笃于教子招延名士宗族子弟之愿学者皆预勉以修身之要不徒望其取青紫也长子中第又二子入太学未尝以为喜盖所期望者不止此夜课童幼语孟为之讲大义每曰雒诵之声贤于丝竹远矣庄谈梵帙深究理趣病中区处家事秩秩有条医至嬉笑待之呼诸子曰我无所憾惟汝祖隐德实行太史纪载甚略我死则汝辈不复知矣口授数千言既革神观愈清自书一颂尤为旷远又书二纸戒毋受賻赠大略言生无益于亲故歿可扰之乎仍戒毋用緇流既毕盥手炷香奄然而逝其视死生真若旦昼耶君娶舒氏御史中丞亶之曾孙先君十四年卒赠宜人孝敬诚笃四德全备枢密方为国子监簿宜人未嫁而枢密超迁台諫大宁喜曰此妇其昌吾家乎未归登政地归享上寿康宁宴衍宜人未始一日不在侧也大宁性严事之至谨遂信爱之枢密久未有弄孙之乐宜人请君置妾君曰设心如此何患不昌既而得子今兹蕃衍盖不妒忌之效也新昌相传有白虎神为祟吏言请避正堂君弗顾宜人亦曰何物小鬼敢据公宇乎不为动而亦帖然族妹为邑士之室始至遣饋之及归则与之

酌别中间不时求见则谢之果有私请也在官未尝问榷外事俸入亦不举知其目君之清德所助为多凡君所为极意奉承君待之如宾言必称名有出入宜人必摄衣揖之子妇侍侧雍雍如也待婢使未尝谴怒詈言不出诸口衣必澣濯不事珠翠绮綉之饰年才五十有七卒于婺之官舍葬于阳堂乡包家山之原子男五人弥逊迪功郎绍兴府萧山县主簿弥迴迪功郎新台州临海县主簿弥遵先卒弥进将仕郎弥逮太学生女二人早夭孙男十三人麟之中之介之举之希之翬之阜之常之准之异之?之 之彝之女九人在室诸孤将以十二月壬寅奉君之葬合于宜人之墓来求铭钥托契非一日君之清介实所难及诸孤録君行实甚详且其施于政者皆可为後法又自言其母之贤尤痛其早没惧无以显于世愿并书之故为具载而系以铭用慰孝子之思云铭曰

史氏之贤德惟迈种衣冠之盛辅相我宋君生而秀弱不好弄父兄濡染以义折衷比宰百里始见于用廉白照人轻徭清讼人皆望君夷庚飞鞚仅乘贰车其退甚勇平生介然晚益严重闺门自养无所修综潭府不居归侍丘陇家庙时享极其钦奉动循礼度周旋勉中闺门化之无敢奢纵屏絶声乐喜聆雒诵谢去机事志甘抱瓮力行所知不牵于衆谁毁谁誉终不为动老成云亡乡党所痛君则了达如幻如梦我方卧痾向风一恸诗以扬之後人其讽

太孺人蒋氏墓志铭

卫世子共伯蚤死其妻守义父母欲夺而嫁之誓而弗许此栢舟之诗所为作也女不事二夫古之道也共姜独见于诗则知是时必有不能守者而况後世然共姜亦惟知守义不闻他美若从嫂太孺人蒋氏真有共姜之节而妇道壺彝则又过之其可以无纪乎蒋氏世着籍于明之鄞今日庆元府曾祖讳侃隐德不仕乡里称长者祖讳浚明赠金紫光禄大夫父讳琬朝请大夫赠宣奉大夫妣宜人周氏赠硕人方孺人儿时有善相者谓他日必领百口既归于我实伯父扬州讳璫之仲子也讳镗字仲宏绍兴十五年伯父提举福建市舶从兄以疾卒于官舍兄资孝谨事亲主于敬接物谦和遇臧获亦未尝失色伯父宦未达产薄累重或至乏食上不以病二亲下不以语妻孥经营弥缝以尽其欢间辍口腹以与儿辈犹叹曰人多不能报上但知报下尔壮益进学属文旧作止存一二手抄书皆有楷法虽米盐细事亦然在泉南尝受诗于柯先生宋英先生亟称之伯父与恭人冯氏尤所鍾爱哭之甚哀孺人年才二十有九一女六岁居长四子幼者生始半月时二兄一弟皆在仕途所生母杨氏太安人真欲夺而嫁之舅姑亦不能必其留也其伯父中奉璫谕之曰守志固美行顾汝年尚少能自保乎泣谢曰相待如宾诚所不忍抑不如是诸孤何以自存卒不为动扬州拥麾持节历十余年所在随侍虽舅姑存抚备至儿女子羣居间有人所难处者一切安之而妇职愈谨归自维扬恭人得疾就医于京口一力奉药餌非亲尝不进卧起必俱既卒执丧尽礼岁在辛巳扬州以廩橐均付子舍用稍裕矣即戒诸子曰父葬未安而当迁汝曹俱壮而当娶异时长穉猥衆何以待之吾性俭约有素汝其母徇侈习衣食之余铢积而寸累之後数年由奉化之长汀举从兄之柩改葬于松林乡报国山祖妣魏国夫人莹之右求姻家莲峯侍郎周公綰为之志诸子遂以次授室将析居默祷于先日未亡人愿守故庐也果得之厅宇不改余皆一新视旧不敢加濒湖仍存风月阁之号谓家法子孙所当世守命钥大书勤俭二字扁于正堂扬州略用范文正公义庄规约以贍宗族之不给者孺人思有以增益之戒诸子及从子节他费遇稔岁则储其赢今有端

绪焉延庆寺有十六观堂礼长忏僧未免乞食扬州欲卖田贍之始捐百斛孺人复用四十万钱以酬先志且为扬州立祠得龙眠李公伯时所绘五十三善知识于故家置广慧寺中有以乏告随力周恤盖义所当用者大率不吝至其自奉则衣杂布素不事华饰纤粟不轻用也诸子少小蒙训夜坐则谆谆然语昔者嫠孤艰棘与夫处已治家事上抚下之道一灯明灭泊如也每言今衣食登足不惟汝曹享其成我亦何力之有仅知守而勿失尔故凡牟利称贷等事未尝过而问惟计所入而蓄其出磨以岁月而至此亦不复详记多寡坐总其凡诸子干母之蛊无敢欺者子若孙今已九房孙会洗洗时节上寿斑衣满前遂成大家和气浹洽终孺人之世百口无间言内外姻戚莫不叹仰以为古之烈女无以过或谓节约已甚者至是皆心服焉然终不以此自满时以手加额曰非舅姑之赐不及此故于讳日及家庙香火四时祭享必躬亲之孀居几六十年执礼益恭吾母大宁郡太夫人间一过之奉之如姑未始少失礼于上下前数年尝至奉川凡楼氏蒋氏松楸一一躬拜之曰吾老矣恐不能再至也病中不喜服药区处家事甚详且谓家人曰汝既不能留我吾亦不复恋汝勿为哀毁能保家如今日足矣戒丧葬母侈以高侍郎夫人为法嘉泰二年四月辛巳终于家享年八十有六男子长曰渊承议郎知婺州浦江县赐绯鱼袋仲曰源皆先亡叔曰洪季曰深国学生女归故承议郎太府寺主簿周元卿孙十三人椅国学生桐国子进士棣梓?枅拱槐植根柅栝栢俱业儒桐梓拱槐植先卒女九人两浙转运司进士赵巘夫从政郎新差监行在太平惠民和剂局赵师固宣教郎建康府溧水县丞赵善潼国学上舍生宣缙高保孙吴燠之国子进士赵汝括皆壻也二未行曾孙六人仪伋僖储儒僎女六人俱在室明年将奉孺人之丧以十二月丙午祔于从兄之墓渊既陞朝赠父至宣教郎孺人先以高宗庆寿恩被封孺人寿考康宁安享备福如相者之言而子孙亦复多故渊最为可哀盖其资禀有父之谨承母之训而又充之以学问文辞蔚然乡评甚休历五任所至以贤称职事无不办受知于名公而未尝一与同寮相忤行已无毫髮之玷此宗族之所痛而况母子乎然孺人之丧洪深率妇孙哀礼俱至孺人为不亡矣铭曰

女教不兴彤史无称猗欤孺人妇道备成执节守义固女子之高致处事善断几烈丈夫之所不能盖孟光之洁顾妇之清轲亲之严笃陶母之贤明殆将兼而有之何止乎继柏舟之名耶

从妹楼夫人墓志铭

夫人姓楼氏名某字靓之曾祖常左朝议大夫累赠金紫光禄大夫祖异徽猷阁直学士左朝议大夫累赠少师父琚右朝散郎世为明之鄞人母安人陈氏朝散子女最衆及娶嫁者男五女六而家训素严绍兴二十三年知绍兴之新昌县夫人于是年十有公矢谨择所归石氏为邑中衣冠名族有娶吾乡金川冯氏者其子曰文朝散曰冯亦吾外家而又知文之贤遂以归之文字时亨生未晬而孤所生母太孺人某氏相与为命忍贫扶持备尝艰棘人视之蔑如也得夫人而家寢以立夫人性资晓慧容止端庄幼闲礼度动有仪矩尤勤妇功且精其能既归石氏仰奉其姑谨相夫子一以俭约职中馈事妇姑相安慈孝两尽若亲母子相处四十载怡愉如一日太孺人举家务付之年未侵而身得优逸遂以上寿被庆典之封加赐冠帔以华晚节时亨有志古学结交多名士客至则酒肴不待需而具或游他郡从师友一不以俗务婴拂之策名荐书贤誉日闻而夫人亦有内助之称焉时节烝尝必躬必亲严洁精专至晚不倦石氏族党最盛夫人承顺上下皆有礼而恩意加之遇有庆吊率先而往无不敬叹时亨尉罗源

道远单骑以行夫人与家人奉姑尤谨有疾则调药饵须臾不去左右既丧哀踊不胜棺槨衣衾既已孙备送终纤悉举出其手虽皆子妇之职亦云难矣时亨相待如宾夫人性刚气直习闻论议以及死生之说往往领解庆元六年年六十有四聪明如少壮髮无斑白又素少疾病一旦以下利奄然如蛻既敛面如生两手俱结释氏印信为善之报寔六月乙未也亲党哭之皆尽哀生四男子穉徠侗颙长先十二年卒次为太学生二女子长适里士黄日宣先八年卒次在室二孙顺孙兴孙将以嘉泰二年某月某日葬夫人于仙桂乡石谿之原祔祖莹金紫之兆次时亨不堪悼亡之戚来求铭钥诸父五院犹记少时惟伯父泊先工部多乡居两家往来最为亲密夫人与余齐年而後一月相与几如同气又念羣从兄弟及姊妹五十余人存者仅十数而夫人又亡矣时亨复雅与余以臭味相好两尝过其家登饱山阁举酒道旧故如昨日至是不胜怆悼而为之铭云时亨今为修职郎新严州桐庐县主簿铭曰

夫出名门孤立无朋夫人相之家道以成事姑克终睦族以礼子且有称遽悲陟屺窆而求铭伉俪之情吾有感焉引笔涕零

绩谿县尉楼君墓志铭

先光禄有十丈夫子惟伯兄绩谿尉生于绍兴二年仲兄严州生于四年至七年而钥始生二兄爱钥厚期待尤远砚席相从有师友之义伯兄年方三十有二而蚤世仲兄与钥不堪手足之痛祭之以文有云左琴右书一室环堵荧荧夜灯共几寒暑读者悲之葬送之余调护孤嫠不一而足仲兄不胜先公之丧五十而终钥益孤露上奉慈母以及二嫂下领诸弟从子幸不失雍熙之轨犹可乐也不幸丘嫂又亡矣哀哉兄卒于隆兴元年十月丙子以十二月庚申葬于奉化县长汀先祖冢舍之侧嫂卒于庆元六年七月辛巳嘉泰改元得吉卜于禽孝乡白石里徐隩之原二年二月甲申诸孤迁兄之藏以三月丙午朔奉夫人之柩合焉先葬泣以请曰溷淖不天父之葬不及铭今丧吾母忍死竭力以襄大事惟潜德懿行叔父知之为详请并登之石钥亦为之泣念吾伯兄抱负不凡不见于用不惟他人莫知诸弟生晚亦不及知也欲无为铭得乎兄讳錫字昭声世为明之鄞人为今庆元府曾祖常朝议大夫累赠金紫光禄大夫祖异徽猷阁直学士朝议大夫累赠少师父璩尝权工部郎出知处州终朝议大夫累赠光禄大夫母汪氏今为大宁郡太夫人兄生而英发少长风姿洒落从乡先生游自力于学举业之外哦诗结字遇其得意警拔清新无不称叹登览胜地好风佳月必倡率侪辈觴咏酣适未始虚度寓处室亦必随宜增葺拳石泓水昌阳兰蕙芬馥秀颖而燕居其中间作墨戏小山丛筱雅有思致及见杼山刘公慕用其人摹草书千文几于乱真又有干才先公筑室深入穷山取材董工身任其劳疎财好义笃于亲故恨力之不足宗族托以吉凶事未尝云难甚剧者亦谈笑而办人以远业期之岁在戊寅光禄丞溧阳以郊祀恩补将仕郎次年中铨选授右迪功郎徽州绩谿县尉未赴今嗣秀王方守丹丘檄监大田酒库勤于所职检柅弊蠹不扰而事集能令一方之人惜其去诣郡乞留未几以小疾不禄使假之年其自见于世者何止此而已耶嫂陈氏家番禺祖宗道父充登政和八年进士科止于发运司干官母太安人徐氏新城名族膳部公伟达之女也无子生三女嫂其季也光禄知乌戍镇事从姑之夫吏部孙公邦亦新城人与徐氏亲厚以膳部之壻为属遂缔姻焉素有母训归而家人宜之嫁十六年而兄亡嫂方盛年幼穉累累长女始及笄而吾家清贫又非今日比徐安人尚无恙欲嫁之自以幼更多难又

尔寡居命也奈何矢死靡他一意俯育人已服其守义自尔斥去铅华专静勤约心计精密铢积寸累五女遣嫁三子纳妇虽次第成立而嫂氏亦为之早衰年逾从心犹执妇道姑嫜娣姒欢然终身晚耽内典一丝不挂养痾自佚得寿七十有五中子澈後七月而卒女长适蒋与求次适奉直大夫知南剑州军事朱軾次适迪功郎绍兴府新昌县尉兼主簿孙逢吉次适儒林郎添差建康军节度推官赵师浚伍赵二壻及赵氏女亦俱亡矣孙七人曰栋年十三而夭曰机曰槭曰枝曰樾曰枚曰格孙女七人皆在室铭曰呜呼伯氏自立千仞齎志壮年其用勿尽变彼贤配厥有高节栢舟自誓以汔同穴俯仰畴昔首尾四纪称于宗姻光于彤史徐隩之藏舍旧从新我为诗之用启後人

攻媿集卷一百五

卷一百六

钦定四库全书

攻媿集卷一百六

宋 楼钥 撰

志铭

戴伯度墓志铭

绍兴三十二年钥叨荐于乡时二戴皆在前列曰机为词赋之冠曰樟以周礼选长字伯度次字伯臯戴氏世为鄞人居桃源乡曾大父侃以财雄大父冕以通经属文上礼部不及仕而卒父汝明能传家学见二子蚤岁竞爽尤笃意训教母夫人朱氏亦课督之一日俱擅场屋声父以二子故封至宣义郎赐五品服母封孺人而戴氏愈着伯臯擢乾道五年进士科终诸暨丞伯度至绍熙之元始以特恩补官乡党固已叹其晚暮才历金华簿待次铁冶而一疾已矣实嘉泰元年二月甲午也君之子燧以行状踵门泣且拜曰既已忍死治坟于乡之万隩将以十二日丁酉襄事敢求铭于先友余亦为之泣曰盖尝铭子之祖矣忍铭吾伯度耶读其状则袁和叔之文也和叔不轻许可又为伯度内弟知之尤深无一语溢美又念顷与昆仲定交晚与伯度益厚君之归余偶苦足疾竟不及一见遂备录所状益以见闻而系之以铭惟昆仲皆游郡庠朋侪敛衽畏之伯度尤长于赋俊逸而不肆妥帖而不局体物匠意有前辈风君初调迪功郎绍兴府萧山县尉未上丁宣义忧服除始为主簿官虽卑惟既厥心夜漏未尽而起旦即坐曹簿书鈎校不遗纤微皂吏莫不苦其勤憚其严而心敬服焉事不诡随亦不苟异每以出位近名为戒历事五太守或宽或严同列或未免少变君趣操自若曰吾知尽吾职尔田赋之入异时莅其事者有刻下奉上以溢数为能输者苦之累月而未毕漕以属君更前之为仅两月告具贫弱下户有积年未尽输者守俸督之君询究得实言于郡曰民畏法敢有不尽吏擅私隐欺尔郡计幸无乏奈何重困吾民守悚听亟命蠲减合七万余缗先是县吏轻侮士类被以恶名有赴愬者多沮挫不能自直而真为奸者庇之君处心公平于吏无所听沮者伸而庇焉者屏迹邑人称诵之守与宪交荐其词甚美既终更今丞相谢公一见深念之以为提点江淮湖北铁冶铸钱司检踏官踰年会属疾以承务郎致仕终于家享年六十有七娶汪氏二子长即燧也次炳女适严仲游伍玠方复严辅之皆里士孙男埴一女君风规峻整志尚卓犖耻与碌碌者伍平居介然未尝谄辞令色蘄悦于人非道义之契不与深语区别善恶若已甚者而德性温温胷怀四达不设防畛色养亲闱恪谨朝夕不敢少忤其意友爱诸弟于仲氏尤笃拊存孤嫠族党称述初师事乡先生高公开而深为先生之兄侍郎公所器重自是为学愈力有胜己者必从之研究讲切日进而不止根本诸经博采百氏喜史汉书叙事奋笔效之沛若泉涌英词丽藻出必惊俗愈出而愈新尤工偶俪之文如覩宝藏金珠象犀烂然溢目喜作七字诗多关风教有蛰斋集十卷盖庶几乎词人之秀一第易尔而困蹶若是人为慨叹君处之怡然无限获憔悴之色晚得一官稍见施設方为当路所知则又不幸而病病愈复作竟致

大故呜呼如彼其才发摭素蕴足以显于用顾若是而止乎然君之持身传後自有不可泯没者官金华也俸入至微而尉廩差厚守曰主簿尉官等尔而勤怠有间勤者薄而怠者厚可乎使均之固辞不许曰吾以惩劝官吏非为主簿也然卒不受其义利昭晰如此官事稍暇时从名胜相与讲贯有日新之益教诏二子朝夕谆谆无非切己曰吾平生所守不欺二字而已其子亦刻志自立亲炙师友将大其门君之培养根源顾不厚哉铭曰

昔吾乡兮兵毁求故家兮无几访戴氏兮故庐自熙宁兮经始叹古风兮犹在信不陋兮不侈川流兮无穷乔木兮高风忽不见兮伯度伊丹青兮德容嗟二隼兮齐名抱器业兮长终百不试兮一二泣遗稿兮焉从幸素业兮有传庶不悼兮土中表斯铭兮宿草尚过者兮必恭

骆观国墓志铭

易道不明久矣夫子之于易不可及已然读之至于韦编三绝是时十翼犹未作也近世通易者莫如康节先生亦写易一部贴屋壁间日诵数十遍今之学者未论明易能读者盖寡尝闻旁邑有骆君观国能凌晨暗诵全帙大寒暑如一日至老不废每叹以为难及而未之识近者叔父学宾与从子沐致郡博士杨君成己之意云有里士骆士宏与之有连求志其先人之墓既而沐又介以见泣拜且请就阅行实即观国也乃为序而系之铭骆氏统仕吴为偏将军封新阳侯姓苑曰东阳人又曰会稽乌伤人至唐有宾王以文章显贯义乌实乌伤也五季之末有友义延训者相继为台守自义乌徙宁海遂为邑人君讳季友观国其字也曾大父益大父全父恂世为着姓君于兄弟为季幼敏慧父奇爱之多买书而题其卷末曰留遗子孙君少长即感励力学未冠而父与长兄俱亡母项氏以悲忧感疾气如石鍼药弗及君创屋一区寛明温清娱侍无阙家人化之未期年而顿愈至九十以寿终乡党称孝事仲兄尤谨协力克家尝读佛书有感脱略世故逍遥林壑者数年俨若凝思专以达性为事闻儒士释子有理学明彻者不问远近必往叩请後果通悟幡然而归曰吾乃今知天地万物初无二致儒墨殊涂而同归求其体用具存者莫大乎吾圣人之事业精义入神所以致用由是求为有用之学家政益井井有条年近五十不复作出仕念读书必研究至极尝自叹曰若欲穷理尽性知时识势开物成务无出于易非圆机之士孰可与论是哉其子至前间取卦爻象辞以警之使之通贯而後已子虽鍾爱十岁即就外傅有名士必使从之远亦不憚归必使诵所闻士宏读孟子至引而不发跃如也君抚几三叹且令掩卷曰此正孟子警拔人处既不待发尚思其所跃如者何以得此此不可以口耳章句求之语至数四士宏耸然因名以跃而字以子发後始改焉淳熙间高宗庆霈封迪功郎致仕非其志也鰥居二十余年不复再醮独处一室植竹绕榻而读书其中雍容闲雅作诗如其人暇则风咏以自适日涉家圃好吟归去来辞其于声利澹如也性耿介事有曲直必为之辨析里人憚之感疾既革神闲气定不异平时至亲环立忽语之曰生必有死世间止如此尔初非异事命笔俾书四句顷之气绝庆元五年十月七日也娶同里魏氏生一男士宏也二女长适进士王夏国子监丞知信州及之堂弟次适杨考叔成己之从兄也孙男五人朝宗光宗儒宗可宗皆业儒开宗尚幼以嘉泰元年九月十四日葬君于县北大中山之原合孺人之墓余将属稿会阆风刘允叔次臯过余问以乡评曰此真吾邑之善士也赞余铭铭曰

君之于易日读一通百徧义见况终其躬学成不试得正而毙积庆之余尚后来裔

朝请大夫曹君墓志铭

绍兴李庄简公光以直道大节屹然为中兴元臣闻四明曹公粹中之贤妻以长女翁壻间自为知己学问大率以躬行实用为先真有冰玉之誉君其仲子也天资颖悟记诵絶人长而力学既有家传而又源流外门气节自许词章焕发落笔千言仕虽不显而见于政事有可纪者足为一世名士余里人也客授东嘉君时主平阳簿深叹其不可及交情日深三十年来君之文益工政益明操守益固方相期为世用而遽亡矣哀哉将葬君之子孝忠以行録泣求铭君讳盅字困明明之定海县人曾祖慎微赠宣教郎祖实赠奉议郎曾祖妣袁氏祖妣闵氏黄氏皆赠太孺人父朝散郎建宁府通判君既升朝累赠中奉大夫妣太宜人乾道三年君以中奉致仕恩补将仕郎明年铨试上等授迪功郎为平阳主簿次调江陵令遭内艰淳熙九年循从政郎监行在赡军激赏酒库十五年以举者改宣教郎知秀州嘉兴县既书再考引亲嫌改知福州长溪县庆元改元通判楚州六年授福建转运司主管文字积官至朝请大夫嘉泰二年九月朔以疾终于官舍享年六十有八娶陆氏封宜人子二人长孝忠也将仕郎次孝先当被遗泽一女尚幼十月还乡三年三月癸酉葬君于奉化县禽孝乡童隩先莹之侧宜人祔焉君兄弟竞爽而君尤俊迈不羣十二能作举子业未冠已博综经史百家之言天文地理与夫天下形势兵家之学靡不通贯诗章文赋命题立就动辄惊人少尝留题宁都金精山有曰手擎白日浴沧海气使列岳如羣儿中奉见之为失色且戒以力除此等气象见其留心诗文以为当究经术务为实学君自是日则干蛊夜则读书昏定率饮三盃君止求小盃置书灯上至四鼓酒温始一引而寝奉亲尽于敬爱不忍顷刻违膝下贫不足养恐貽亲忧至躬负米之劳中奉被疾衣不解带药必先尝既革许诵金刚经万卷诵之终身至于倍蓰自少攻苦食淡忍贫自克奉身至薄至用于义则不吝尤笃于友爱伯氏多女为嫁其二余又厚助之介弟寓江陵远宦相值情好尤笃见其子与能书不翅身得之喜幼弟早亡抚其孤为次子即孝先也其在平阳能声已着上司委以事几无虚日讼者亦多自请求决士民归心去而挽留殆不容行侍郎曾公逮自温除漕深知其才而荐之大卿辛公弃疾帅江陵治盗素严有盗牛者配江州吏缘其意欲沈之江君慨然禀白公改容叹赏卒俾如令寸金堤去城二里实扞大江冲突之患岁役人夫数千具文而徒劳君调夫均平躬自督课增卑培厚以为永利又以农隙修筑沿江官堤使前日巨浸冲决之地复为膏腴流移归业耕垦日辟诸司公举具载实迹南轩张公栻尤知君引置签幕其举词有云直论敢言不肯诡随有足嘉者榷酤余杭京尹尚书张公杓韩公彦质更荐之遂以更选公余任刀笔之须谈笑挥翰无难色嘉兴剧邑且当孔道牒诉山积君以五鼓秉烛治事迟明而毕人叹其敏既至长溪辛公帅闽以鬻盐来委君谓县为出产之地开国以来未尝与民争利持不可帅怒易纠曹比至帅已释然不使就职相与觴咏弥旬会贰车阙即以处君其在山阳尤悉边事帅漕总餉合词乞不次擢用尝论五事一乞令楚州守臣仍旧节制出戍军马二乞开寿河以为山阳馈餉之备三乞申严淮禁四乞止用官会不必再印两淮铁钱交子五乞开淮东荒田以实边储习边事者皆以为当思欲一登玉陛方寸之地以吐胸臆而所向不偶性素刚铨部偶有漕幕见次授之以归会闽中岁旱白使长此不可谓细故缙黄祷祈亦置勿论辩析滞讼疏决岸狱加以振贷庶可感格贰卿曾公炎悉从其说随获甘澍君位不称德其见于政事者止此中奉诗易皆有传先以诗传俾钥为序而刊之遗

藁自甲至辛凡八帙尚可传远也君之属文兼备衆体高宗七十之庆一时文赋表颂献于阙下者无虑千数君进赋篇无媿古作寻有旨付後省看详取文理优长者十人以闻给事王公希吕中书舍人郑公丙李公木以君为第六观者无不叹服其工开府吴公琚倅京邑监漕台试梦神人以黄牒书君之名者不能遽识明以语同事俱异之君时自平阳来试吴得君名而喜已而果在选中比为浙漕君引梦事为诗以见之吴公加礼焉君抱负不凡动以古人自期标致甚高不合于俗每谓与其取美以求合孰若行吾之志官虽不显而气不少慴所至放达不暇商计尝叹曰识真者少从古以然知我者希则我贵矣君御家严整居乡尚和父老童孺相为尔汝非意相干自能理遣晚卜筑奉川一区雅洁聚书万卷多手自雠校每言夜以一灯使妇奉姑别以一灯观书积学老不衰客至则讨论古今觴咏奕碁意殊不倦客去则凝坐一室多采释氏高胜之言可以警悟者书之坐右自号牧庵居士不喜杂交以傍人门为耻口脏兀傲自适其适既不能少贬以求进使得寿考为乡里老成夫岂不可中更游宦处此室庐仅十稔而夫妇俱以丧归可哀也已宜人世居台之宁海曾祖熙祖辰父之机起于富室而温恭勤俭无媚妒之私事姑相夫妇道惟谨君有幼妹寡居君欲夺而嫁之妹自以姑嫂相处无间不愿再适同居二十年此尤可称者君之成家出处无玷缺内助为多年才五十有二先君一年卒七月二十有一日也孝忠痛怙恃之继亡并求着其母之贤亦君平时之所称者牵聯书之以慰孝子之思云铭曰

矫矫困明天与令姿学有自来而文益奇骈四俚六笃论工诗奏赋明光大放厥辞见于有政精敏光辉才高位下知我者希胸中耿耿噤不得施吾徒掌制愧先于之伉俪同穴行道兴悲我铭其藏慰尔孝思

参议方君墓志铭

余为儿时先光禄知乌戍已知秀州使君方公之名既冠公守四明才三閱月而去民歌之至今乾道七年由永嘉郡文学为秀之考官公方奉祠居城中乞事始得一拜牀下侍德容聆教言从同事者各询其乡里官所之详故家意象寬弘叹仰前辈风度以为不可及公既云亡始识其子夷吾纳交虽浅而意甚亲後貳司府夷吾之子叔恭为打套局喜其有父祖之遗风遂荐之幸遂识方氏三世嘉泰元年闻夷吾以九月八日终于家二年叔恭等既以二月甲申葬君于临安县灵凤乡归长山之原祖祔莹次以书来求铭新浙西参议官王明清仲言实余所敬娶君之女弟既状其行又助之请仲言有史学书详备乃摭其实而系之铭君讳导夷吾其字也方氏自周之方叔以来远有世谱後居严之鸛原晚唐元英先生以诗鸣七世而楷以进士起家仕至驾部员外郎生蒙朝散郎尚书屯田员外郎贈银青光禄大夫君之曾祖也妣陈氏贈永嘉郡夫人祖元修朝请郎大名府主管机宜文字贈特进妣王氏贈余杭郡夫人父滋敷文阁学士通议大夫累贈少师妣李氏贈越国夫人少师未四十而专城拥麾几徧东南所至有惠爱晚登从班隐然为一代名臣及见正始源流深远所交皆当世名士在二广八年自赵忠简公鼎张忠献公浚洪忠宣公皓李庄简公光诸巨公皆为秦氏所摈斥流散湖广或在海外秦方兴罗织之狱急进者睥睨迁客以为奇货少师独一一以时存省饋遗济其乏絕不幸歿于烟瘴者又为津致北归旁观者危之曾弗之恤竟亦不能害此其最为世所称君忠屋孝谨目濡耳染之久故济物之心切因得师承侍郎横浦张公九成又从御史樊公光远三

山宗丞林公之奇游讲究精微达识宏度是以似之局于名位虽不得展布而平生出处有可书者绍兴十九年以郊恩补将仕郎?两该恩例循右从事郎二十一年差充总领淮东军马钱粮所干办公事改辟福建路安抚司主管书写机宜文字少师罢四明寓姚江不忍去侧自监潭州岳庙凡两任孝宗登极循右文林郎乾道初元少师出疆以亲属恩循右承直郎差充两浙西路提点刑狱司干办公事七年入幕冬遭内艰九年丁少师忧淳熙三年兼两浙运司造船场八年改通直郎知湖州武康县明年明堂大礼赐绯衣银鱼十二年差通判平江府十六年光宗覃恩授朝散郎绍熙二年到官五年差知沅州主上覃恩授朝散大夫请祠王管建宁府武夷山冲佑观三年差知黄州复请武夷之祠久之差淮南安抚司参议官而遂已矣享年六十有九积阶至朝请大夫娶常氏御史中丞同之女君之姑秦国太夫人所出封宜人相敬如宾动合法度闺阃视以为则子男三人长叔恭也朝奉郎新通判临安军府事次叔寛宣教郎淮南东路提举常平司干办公事皆赐绯鱼袋次叔敏继季弟後承事郎新监镇江府大军仓女四人长从释氏次适进士张淳厚次适计洗季尚幼孙男六人熙将仕郎点将以遗恩补官默熊照然女五人长未行次适承奉郎知常州晋陵县丞张佺龄次许嫁四明史文卿次许嫁进士李景藩余尚幼初君在宪幕王丞相淮为使长雅知君贤君亦疚心协赞多所平反德清县鞠茹菜者数十人请论如律君究其实乃邻邑乡民因售薪致竞为怨家诬诉两造俱毙案中皆牵连者又婺有倡家子规富室之产既已伏辜而囂讼不已君悉白使者平其狱鲁公大喜欲以论荐而君忧去矣船场在华亭造船本钱旧属五郡期会玩弛岁额侵亏君克勤细务额既登足异时阙廩贷物者俱偿之漕司于青龙镇翔许浦移屯寨屋三百余间久之未定君承檄定基既便于事请以所征商贩木植为用尅日而办仍为痛除重征之弊武康密迳行都易致越诉君律身既严剖决公平不科罚一钱寛猛得宜讼亦衰少县出丝纊赖以济税课郡利其美使别储以俟命县无所从出商人患苦倍征旁出山蹊公私交病君请于郡复旧规蠲宿逋申法禁减则例以招之曾不踰时来者辐辏并邑亦为之改观米运至丰储仓退却至数百斛典吏鬻妻子不足以偿君为于他州贱采取赢以补其数又以余赀代下五等畸税义役良法也行之或反以致害君更立规式劝谕诚笃民咸信之追科不事鞭扑间出郊野食用百须皆以自随无纤粟之扰于是争先就役他县至取以为法後有欲更张者老稚叩阊几二千人竟仍其旧尝久雨有怪民昌言水且大至人皆悚惧谋避亟捕至庭焚其书械系以俟期既不验杖而逐之有诉夫久出不还知其必死而迹不明者君为设方略得姓徐者一问即承境内盗贼帖息雨阳致祷多验洊值丰岁上下熙然寓客任公绅谏议古之从兄也靖康失母长斋泣血以求之金人归我河南徒步走北方奉之以归孝行上闻擢敕令所删定官改秩主管官告院母终庐墓事之如生与世相忘久矣君访其家列其高节于朝控恳备至遂赐金紫闻者钦叹风化之美提刑刘公颖行郡谓太守曰自苏至此惟武康无一词至前盖君专务行所学视四境如一家不表暴以取赫赫名而民受实惠便坐有梧桐瑞香一曰甘露降其上晶荧润液浹日不曦邑人聚观士夫形于歌咏者数十人其去也遮道挽留越境追送者不以数计此岂可力致耶吴门最号剧郡君关决闲暇贰卿沈公揆同里之旧相得甚欢外台多属公以事无不得其平两摄郡事尤为得体秩满久滞逆旅今丞相谢公深甫大资政赵公彥逾俱在起部亟称公始有沅州之命黄州陛辞乞铨择巡检以备不虞又论犯茶盐之禁多妄引仇怨与多藏之家乞不许淹延枝蔓敷奏详敏上甚悦皆见于施行逾年会言路申七十之制君官簿适及即为纳禄计再就祠禄又授议幕皆非其志也吴门苦旱尝躬祷于横山龙母祠有随车之应都城延燔之後人情未定秀亦连岁大旱公忧惴尤甚若任其责者率里人祷于道

官极其精诚至四昼夜雨为霤然既病犹以裕民之要闻于庙堂丞相击叹致谢少师在番禺罗致洪忠宣公长子适为属丞相文惠公也仍命君定交共处郡斋文惠入相然後引之退然惟循涂守辙而已入仕甚早重去亲侧居官之日可数若割股以救越国之疾执亲之丧号慕几致灭性皆人所难诵列子如流达其旨奥尤喜读通鉴策其治乱原委往往悬合尝论太湖高于运河当疏霅川浦漉之要者庶无饥岁後湖守得其说为之果有功焉少师歿历最久非令甲当给者悉不取闲居又戒与民争利君守遗训惟谨岁歉或食不足未始以语人也取友必端志趣相投一见如平生欢苟非其人虽强附弗与年甫弱冠夜闻有溺于江者竭力拯之从叔希文以穷来归少师解衣推食君又为毕其丧葬婚嫁事隆兴二年金人犯淮少师守镇江警檄交驰君日视烽火安危之报多至夜阑军士有失号者法当诛君默念之?访而还其人少师喜为似我也明年凶荒之後饥?盈路婴孩悲啼不忍闻君取道旁数十人育之皆遂全活既长男女各有所归或询访其家而还之好周人之急假贷亦随力而应之施药饵以济贫疾岁时酒炙以遗邻里先有小圃相羊其中客至称家有无欢宴终日不倦苏氏女兄既寡奉之尽礼晚年姊弟合处夫妇垂白子孙衆多簪绂满前雍睦之风乡闾称焉又以平日见闻为觉斋见闻録病中呼子弟戒以孝弟保家终制从约书四句偈以见志幼尝有得于佛书长从大慧宗杲游且死犹诵杲旧所遗法语而逝是皆可铭铭曰

惟方叔之在周兮以壮犹而为勇子孙蝉聯兮见衣冠之光宠元英出晚唐兮擅诗名而最重六传七传兮为名臣于我宋仰少师之深仁厚义兮有盛德之迈种祷祠求子兮感精神于吉梦君之初度兮信释氏之抱送宇量是似兮惟慈顔之是奉孝弟根于心兮利欲不为之动推是心以往兮仁将不可胜用源流老苍兮学无不综策千古之治忽兮寤冲虚而成诵小试虽不得骋兮着声望之已耸片言可以折狱兮几空庭而无讼蹇挽须与扣阍兮何不约而有衆致甘露之下坠兮着碧梧而流湏怀忧世之心兮不敢谏而以讽吐其二以自见兮言必有中悲长者之云亡兮非夫人之谁恻幸相从于九京兮依世上之丘陇诗以扬之兮顾何取于折衷尚後之人传业兮庶家风之接踵

知鍾离县姜君墓志铭

嘉泰元年春姜君子谦赴鍾离既饯之又为考濠梁古迹为大篇以赠别所以期之者甚远也明年冬初其兄钤辖子阳来见涕泣而言曰鍾离弟将亡矣以书来相报亟往赴之袖出其书言甚悲而不乱谓得疾之不可为而复苏殆不可免妇弱子幼非兄来不可其末犹曰见攻媿尚书为致永决之意钥为之失声而泣然犹冀其无恙也未几而讣至比闲阙扶丧以归往哭之哀见其遗书一卷甚备又曰求攻媿数语以表吾墓其友袁木叔燠又得书云欲恳攻媿求铭而孤介能自植立不肯颓堕惟子深知我望与发挥之呜呼子谦死生之际不乱如此而何拳拳于我之铭将葬木叔为述其平昔大槩文核而事实子阳又以见属余不得而辞也君讳柄子谦其字也家世汴京曾祖侁故右侍禁合门祇候赠武德郎祖寬故成忠郎合门祇候赠吉州刺史以靖康避地始徙鄞今为庆元府人父浩故武显大夫累赠和州防御使君既升朝改赠宣奉大夫母朱氏仁怀皇后侄也封宜人累赠硕人君初以世赏补承节监监潭州南岳庙秩满充枢密院准备差使淳熙十二年转保义郎监行在丰储仓丁宣奉公忧服除辟差监婺州兰谿酒库十六年覃恩转成忠郎绍熙四年转忠翊郎是年登进士科改授承务郎知临

安府於潜县丞五年覃恩转授承事郎庆元三年转宣教郎知濠州鍾离县五年转奉议郎以疾卒于县治十月四日也享年四十有九娶魏氏丞相文节公母弟知宁国府泾县栢之女封孺人男一熹女二长许嫁迪功郎新黄州黄冈县尉司马遂三年九月乙酉葬君于县之丰乐乡东山唐家隩之原从治命也初姜氏之富甲于京师而喜延名儒以立家塾宣奉记覽多闻教子弟尤力兵火流离赀财荡尽铢积寸累以立门户虽事力不及上世之一二而儒风寢昌矣宣奉之弟讳涛始登科于绍兴十二年终诸王宫大小学教授君与四兄皆朱出模四取漕荐械蒙孝宗召对特除合职朴虽抱疾不仕其子有场屋声桐即子阳也与君同升礼部君最幼一再垂翅南宫必欲以科第发身感慨奋发蚤夜力学不知饥渴寒暑蚊?嗜肤洛诵不辍谓事不成则无面目见先人于地下卒遂其志又与子阳之子光同登後六年光之弟燧复躋世科自尔兄弟之子荐漕台登胃监人太学者相继实自君兴之在密院时已名荐书不以官卑而辞劳近郡有禁卒犯阶级而主帅不以实闻君上书枢密使周益公谓军政不修缓急何以使人语苦切益公大奇之宣奉之丧或言可免解官者君曰吾忍为此哉倚庐三年哭不絕声不茹葷亦不入于家寺丞吕子约时仕于明见其居处容貌愀然动色遂相与讨论丧礼洗未俗之陋後数年贻书朋旧犹曰君执丧有礼足勉世俗士友所共钦也君资素警敏初止銳意举业年二十六七翻然自以昨非为悔有志于古人为己之学折节虚心亲近师友里社先达及四方贤士大夫遇之必敛衽求益反覆叩请其在兰谿与婺女诸贤尤稔陶染既久惩忿矫薄见于践履临事规规典刑中其进殆未已也於潜岩邑士风久不振君之邑庠为选士之秀者补弟子员每旦升堂讲书校艺皆有尺度口授指画与士日亲期年而向学者彬彬然乡举占名者三而登第者二尹光庭者名在第五邑人荣之相语曰赞府作成之倡也昌化为邻旧许民酿酒而输赋于官有议欲榷酤者衆诉于府尹以属君或谓出于朝旨且欲以裨郡计君曰此实民便安可渔夺卒免之老稚欢呼争绘像立祠君力止其议尹益重之檄入金幕赞助为多君本以鍾离事简而往而讼牒纷委不减内地君疚心剖析日力不足夜以继之内和外刚勇于为义人不能夺有狱吏罪恶贯盈而持吏短长不能去有盗牛马者就逮已得其情而辄翻异君曰必吏教之也一鞠而服白于郡甯之远近无不快之或言在君左右者皆其党恐有为之报者君不为动吏民耸服声闻炜然外台多以滞讼相委随即剖决总领韩公亚卿以文章政事科荐于朝郡太守尤加敬异应用之文又以属君体素弱抚字已劳而种学绩文略不少懈县事毕举而君病矣君生长膏粱而丰度高胜简澹清苦无声色之奉又不喜饮酒藏书数千卷凝尘满室萧然如物外人即所居超莲堂池西累石创亭名曰礪坞时从雅士徜徉其中坐无杂宾尤工小楷作诗清婉有思致文节公于诗少许可闲居惟雪牕张武子为山中客碧谿泉石胜絶君每至甥館遇游赏必参坐论诗善与人交同寮相与如至亲疾既侵至相率寝食于县斋医檣尽力前数日即命妻子治後事已而屏人危坐既为子阳书又书以与亲故人人致诀别之意作偈以寄禅衲之厚善者大书数纸以戒其子弟区处细故纤悉明白意象正大思深而见远皆平时薰染讲切见于躬行者如此可以信君之所存而推见其所未为者其亡也邑人为之聚哭丧归乡曲无不为之痛惜者哀哉铭曰

呜呼子谦是好名耶躬行自立疾没世而无称耶以其学力致其身起其家施于政事未而见于死生之际足以不朽矣而何待于余之铭耶余方畸于人无用于世吾何足为九京之重轻耶顾言犹在耳遗墨未乾余不得而默然悼痛之深将何时而卒耶

攻媿集卷一百六

<集部,别集类,南宋建炎至德佑,攻媿集>

卷一百七

钦定四库全书

攻媿集卷一百七

宋 楼钥 撰

志铭

林府君墓志铭

四明有善士林君讳硕字兴祖开禧二年十一月七日卒年七十有四力学而不见于用言议亦无以表暴于外躬行于家里闾敬之其亡也吊者尽哀明年三月丙申葬于鄞县通远乡金谷里之赤陇杨敬仲简既识其圻袁和叔燮又状其行楼钥纳交既久君之子若孙请铭铭曰

惟林之先着籍于青五季避地遂居四明曾祖曰简隐德自高祖晔漫仕韶司户曹财雄一乡积丰施厚植德名堂用昌厥後父嵩儒科晚仕不显节度推官官止清远母也冯氏贤如轸亲君少挺特笃于自信讲学至勤求友至切质疑请益甚于饥渴网罗百家博览强记或问所在开卷指示俭不苟费倾貲买书手不停披万卷有余?得目眚谓当佚我使人诵之竦听无惰君之读书根本经学久而愈明自详趋约恭敬诚慤检柅此身剧暑甚病饭必冠巾心若无倦形体自摄圣学之要正在兢业人灵于物知反为累吾有知哉道斯可致执丧尽礼水浆不入祭祀必斋箴规汲汲球人之失退无後言谋人必忠赴急必先清心窒慾不作无益闻过则喜改无难色嫠不恤纬惟时是忧贤否用舍如身戚休禹功万世予独何人究观圣心专在为民敬奉遗体不敢不惧涕唾不轻爪发藏去克勤小物动有彝则端劲小楷见之心画诵言行録自深愧怍咏康节诗如在伊洛躬行于家是亦为政恂恂二子处恭事敬伯曰惟忠叔曰惟孝字之以全义方之教叔既登科伯亦舍选人谓君家庆由积善伯也忽焉人疑于天宗一继进才阅三年夫人曰任克相夫子叔官从政司越之理孙主邑簿宣之旌德次传省任不渝淳则壻曰周焯仅试一尉次曰杨忻孙女惟二祖葬丰林远七十里愿依九京今从其志君疾病矣呼友执别神气泰定怡然不屑收视云久已无昼夜今忘生死安有怛化君则无憾士友□伤尚其不亡视此铭章

戴俊仲墓志铭

乾道七年余客授东嘉盖士夫之渊也职于学者多佳士而戴君俊仲为録以文行为乡先生着春秋经解数万言能为词章诗清婉有思致性质粹温不得而亲疎久处庠校与之议事详审而寡失故尤与之密君是时已尝荐于乡五上礼部至淳熙八年始以特奏名试补贺州文学寻授迪功郎婺州金华县尉光尧庆寿恩循修职郎余去官十五年而复假守真欲下榻以礼孺子避堂以舍盖公而君已得末疾监潭州南岳庙不可出矣徒有室迩人远之叹十六年

既以光宗覃恩循从事郎余以八月去郡闻君以十有一月甲申终于家享年六十有八娶陶山张氏相敬待如宾家无间言後君十五年卒寔嘉泰三年七月十二日也年八十男二人诚之为郡直学淇为太学生女六人长适张涣次适诸葛洗次适包暹次适迪功郎庐州州学教授张泳次为尼名法壽住处州回向院幼适王廷硕孙男三人櫛杖复孙女五人君之丧以绍熙元年三月辛酉殡于德政乡湖屿之原夫人以开禧元年仲冬合葬焉君方领袖诸生时诚之已能屡试上游淇虽幼亦秀爽可喜与余诸子同砚席虽叹君之滞留庶二子之奋发今诚之亦困于场屋淇在上庠尚可望也公之初丧二子来求铭久而因仍未就夫人既耐又以请余投闲多病又复许久杜工部既葬四十年其孙过江陵谒铭于元微之一日而成余既许君之铭二十年而不就有媿多矣君性孝友幼失怙恃语一及则痛自悯悼至饮泣不已弟一飞夫妇蚤没力贫治葬抚爱其子女如已出开门授徒席下多名士郡延之学後进皆知所矜式至今犹推渊源所自而卒不偶兹非命欤经解三十卷文集号横荡类藁五十卷藏于家後人尚犹因此以见君之大概云俊仲讳厚又字长文世为乡之着姓曾大父天休大父临父端夫俱隐德不曜後其有兴乎从兄之子溪闾之俱擢儒科溪有盛名今为兵部侍郎太子右庶子在君诸生中尤杰然者也铭曰

嗟嗟俊仲乡之胜流学博文优衿佩从游坎壈半生不忤不求命也奈何何所怨尤我铭虽缓尚铭诸幽後有知者其惟春秋

通判姚君墓志铭

四明自国初以来端拱二年至乾道末登进士科者几二百人矣淳熙五年姚君颖始以第一人及第实为吾乡之光又其才业足以称褒然之选意必远到而竟以不显可哀也已君字洪卿世家吴兴後徙于明明今为庆元府曾大父阜迪功郎容州司户轻财好施创必庆堂于城南延师以教宗族之子弟于是姚氏後又有曰太任曰持曰孚者相踵擢第遂为闻族孚即君之大父也尤号博洽三预计偕入太学宦情素薄再调和州録事参军遂致其事终左奉议郎父孝全封朝奉大夫致仕赐紫金鱼袋母宜人杨氏君在髫髻嶷然已有成人风五岁读书过目不忘十岁能属文试乡校占前列郡博士疑之别命题使试于前应手成章时号神童师事屯田郑先生鏐累年能自刻苦洛诵多至彻旦几忘寒暑饥渴经史百氏传记注疏下至稗官小说多所贯穿大书论语置几案间又取二程上蔡龟山之书仁义礼乐道德性命之说决择是非类聚成帙以便讲习文体简严自出机杼有以为後时者曰是有命焉由漕台试南宫参知政事范文穆公成大以宗伯知贡举得公文奇之及发策集英推明中庸大学之旨几千言未论敌国事宜尤备孝宗皇帝以其议论正大剴切亲擢首选而戒勿版行盖不欲传于外也闻喜宴御书旅獒篇以赐授承事郎签书宁国军节度判官厅公事特命员外置力祈寝免上嘉叹而许之皇子魏惠宪王镇吾邦欲侈其盛命以驹哄鼓吹迓君而扁舟已归郊居矣祖妣史氏盖太师文惠王之姑时文惠再相待立上前一闻牖传再拜谢恩丞相王鲁公方知枢密院问与公何物文惠道所以且盛称其贤鲁公鍾爱一女托文惠以缔婚焉鲁公後因对及之孝宗曰策中用赵逢坠马事甚佳乃知简眷之深也七年之官龙图郑公伯熊为守相得欢甚继之者治尚严君能济之以宽乘间语之曰催科之急郡有十之一则邑十之五吏曹以为利惧民之不堪也守感其言为之霁威适大旱榷酤之课不登逮治苛峻君缓其期而蠲其无

所从出者人心欢然甘澍随应邦人尤德之八年被召有旨引见以未经审察辞不敢当次日遂对便殿君首以数被异恩叙谢继论治体切于时者凡十有八条进读未终玉音琅然云道理当如是又论义仓等利病及守令久任上皆嘉纳除秘书省校书郎供职之日胥吏例以雌黄涂数字请书其上以应故事君不欲循袭非手校真有譌舛不下笔也时言路多选于馆中颇有馈遗君不啓书加以緘封而还之鲁公当国引嫌丐外周益公欲处以一郡君力辞添差通判平江府又辞厘务不果馆阁皆一时名胜惜君之去相与钱饮道山用风流半刺史清絶校书郎分韵赋诗以送之仲冬奉二亲以行会郊祀以曾任馆职恩封及亲吴门一都会地大事夥关决无壅吴江民交讼久不决部使者以属君邑以其人素不可追君曰张官置吏非以治贫弱正以制豪强耳穷竟党与卒究其狱一郡竦服君自念蚤以大魁丞辅藩敛藏渊靓若无所能为者间有所为亦不欲人之指目为能也不要名不混俗无所阿附名斋曰迂呜呼可谓深藏若虚者矣十年祷旱劳悴感疾以终年才三十有四官止宣教郎属纊之际语不及他惟以君恩未报亲养不终为恨寔十有一月十三日也二子元特四岁元哲二岁一女在二子之间君未第时欲卜筑于鄞之阳堂乡延壽山至是遂以其年十二月壬申归葬妻以丞相恩封孺人于时年二十有三泣告父母誓不背姚氏却铅华不御赋柏舟之诗抚教其子女大夫公夫妇至今壽且康岁时供妇礼无敢慢呜呼贤哉鲁公家训清肃孺人处昆弟无间言後诸昆弟遵秦国夫人之命以遗奏恩予元特未几朝家用故事命元哲以官今俱为迪功郎调饶州安仁福州连江县主簿皆壻于外家女适承奉郎新监临安府粮料院王俨又鲁公之孙新吉州通判檝之子也孙男女今各二人君性孝谨少居大父母之丧已能悲慕尽礼大夫素严重先意承志未尝少忤遇有愠色至闭户自挝屏息不敢喘母病疽衣不解带药非亲尝不进祈以身代友爱弟妹惟力之尽平日动以古人自期文词之作尤为精敏他人汲汲不能发舒者下笔辄过之掩抑覆护不欲衒耀而自不可掩真如其为人也哀为家集十卷方在甥馆时諄諄言宰相之职惟进贤退不肖昔王文正在位金壬岂能悉去不以为忧也惟多引诸贤使不为小人所胜耳因密疏贤才三十余人虽不及尽用终多为知名士君之志岂小哉体瘠神清人以为似文惠而与鲁公真有冰玉之誉出门轴折此识不识所共叹也开禧三年君之二子踵门泣曰先君之葬时兄弟穉幼未及铭墓念不可以无传又以通判贑州袁君燮所作行状为请余尤哀其意为之铭铭曰

人之生子惟恐不敏敏而好学乃善之尽既敏而学又或恃才浮躁衒露为身之灾猗欤洪卿实具才美蚤冠儒科一日千里抗志远古力行在躬文惠是似清如鲁公天胡不仁兰摧玉折二亲俱存共姜守节有子竞爽志于家传不在其身天其舍旃

王夫人墓志

大名王氏至晋公魏公益显占籍京师号三槐家魏公之兄讳懿仕秘书丞赠兵部侍郎曾孙为夫人之曾祖震吏部尚书龙图阁直学士赠少师妣潘氏越国夫人祖仰尚书金部员外郎赠大中大夫妣阎氏硕人唐氏淑人父从知信州赠正议大夫母金氏陈氏俱赠硕人大中建炎避地来明後遂葬于鄞正议定居桃源乡夫人生于绍兴八年十一月年十九归于向氏文简公八世孙钦圣宪肃皇后五世侄名公援字伯劭太府卿兼权兵部侍郎士伟之子也终修职郎徽州司法参军夫人金出也幼失所恃唐淑人鞠育以至成长淑人为质肃公之孙有家

法夫人习熟阡范动以为楷至疾革犹以祖母为言逮事侍郎之母游硕人者一纪曲尽诚敬寢疾历岁奉养无怠容侍郎季女适仇氏宝学愈之孙由尉颿之会昌夫妇俱丧一子伸孤立伯劭与夫人既经纪其家夫人又以幼妹归之以振仇氏之门侍郎之薨有女才七岁夫人拊爱教以妇德择曾文清公之孙樵以归之伯劭友爱素至介弟登仕郎公擢蚤世无嗣其妇高氏嫠居二女俱幼夫人承夫之志命仲孙大年为之继以其长女归高氏兄子锐赖其经理之助次归蒋兴邦亦名家子也伯劭晚有女甚爱之夫人笃于手足议以归仲弟涵之次子槃涵授乐清令而不禄资送加厚过于已出伯劭先娶括苍叶氏仅阅岁而亡寄葬山寺夫人为继室略无讳忌土冢修祀如奉其先伯劭将葬谓二子曰叶无子而又别葬若不举以同穴则後日必寢致废礼遂合祔焉此尤人所难能也伯劭嗜书手不释卷或忘寢食夫人时其寒煖不以俗务累其心及其亡也治葬送抚诸孤益谨家政米盐靡密井井有条平居凝重语笑不轻发阖门几百口内外肃然岁时姻族会聚始假借颜色虽诸院子弟亦知敬惮苟有过惟恐夫人闻之性明淑晓文义旁通医卜之说又善摄养少病疾年七十忽得疾遂不可为寔开禧三年二月戊午也二子之邵之翰二女长适甥王苍舒次即槃也孙男四人大成大卞大方大应女二人长许嫁苍舒之子将仕郎简次尚幼将以五月甲申祔于双鴈乡莲峯之原司法之墓始余妻祖尚书公侯上世由大名徙宛丘自晋公分派故南渡以来与三槐通谱二王氏向氏皆居明越间夫人之弟柯山使君淹又与余締婚焉于是使君哭女兄甚哀以书来曰自涵弟云亡与吾姊相倚为命幼而至老气同声应专以谨守学业不辱门户相勉罔敢怠忽今舍我而逝人皆谓其令终吾今独存何以善吾後冤乎痛哉吾姊夙佩慈训善学力行遇事处决有大丈夫所不及某实敬畏之与君姻连必亦稔闻为我志之以塞吾悲以慰诸甥之孝思可乎余姑之夫太府卿王公正已与信州为莫逆之友每称伯劭风度之佳记问之博一日见伯劭于鄞簿廨舍而不值夫人相见于碧梧轩纵谈家务世故及伯劭所职纒纒移晷卿退而语钥曰吾与信州通家如兄弟而又同姓知其女之慧亦不知其通晓如许虽嫺于辞令者所不逮也苍舒及简又尚书之孙曾余以故屡获升堂辱延遇益信卿公之言敢并叙之云

承议郎孙君墓志铭

淳熙五年余赘倅天台已而会稽孙君应时季和尉黄岩见其学行吏事词采翰墨动辄过人与之定交问其家世始知其父雪斋先生之贤甚悉方与四方士友期季和以远到开禧二年二月二十三日将赴邵武贰车忽一疾不起遂以朝奉郎致仕识与不识莫不痛之三年十月二十五日其母太孺人张氏继卒于家季和之兄应符遣其子祖佑来见余曰祖父雪斋之亡季父尝持故国子録沈君焕所状行实乞铭于晦庵朱公公许以铭曰古所谓志士仁人今复见之恨不及展龐公之拜铭文见属其何敢辞既而公亡迄不果铭今不幸祖妣继季父以逝顾当今孰能继晦庵者敢泣以请余以衰病挂衣冠而迫于上旨收置北扉震惧固辞不获命念季和之交谊又不可以固陋为解读其所示事实见雪斋七十岁时仿程公大中自志其墓有云雪斋野叟孙介字不朋越之余姚人也族绪寒微难援谱系但闻五代祖自睦州徙居此力田自业余曾祖讳亮生二子余祖为长讳政孝慈驯善乡党称之生四子长从释氏为昇师次为十伯父次为十三伯父次先考十七府君讳子全昇师持苦行而有高识兼通儒书喜听贤士大夫语归葬父母守冢三年则聚诸弟之子躬授语孟诗礼薪变其家为儒已而余生于政和甲午八月辛未实十三伯父之子命以为先考嗣四岁能离家入郡庠随兄壽朋读书日

数百言七岁学于乡先生胡定翁家闻本生伯母及先考之讣号噎奔丧哭临以时孝悌之端发于天性衆稍惊异其後兄常携寓乡馆侧听讲说文义粗通然退侣燕朋弛怠不进十四五潜喜哦诗兄使诵杜集颇费日寡益十八九始学举子赋遽罹兄丧哀痛之情如失乳哺如割肺肠依依无相几不自立因从畏友厉德辅肄业紫溪渐渍稍胜既冠迫于冻饥踵兄故步授书自给益发愤自课经史注疏且阅且抄不敢荒逸窃志古人务为实学时文非其所好而又无师屡试不利决意退藏尊拜先圣觐扶吾道晨诵孝经以致时思人多非笑不之恤也壮室张氏既得三子舍馆归训鬻田就竭人不堪其忧五十九岁始幸小子应时试入太学阅三载遂叨中进士科其後长子亦厕乡选余于是家居寡出诸儿分寓归办菽水今既七十已随应时满尉黄岩还乡闭门养痾不交人事挟策自适凡余自少至老备尝艰阻不可具言初侍所後母陈氏遭义兄陵暴慨然景念孤臣孽子窃以舜曾闵为师承意调谐各终其世绍兴乙丑仲兄有重罪余未谙律令以身援之几并坐縲紲偶值星变原赦俱免其他困厄危难苦心衡虑改过迁善迄能自持厥躬不见薄于乡里吾家父行享年多止五十今幸同产次兄七十有七与余白发相保夫妻儿妇欢聚无缺扪心感旧粗足乐矣然余所以行已立心不忘恭敬近而冠屨微而纸笔未尝辄轻易服用尝谓不能动天地不足以言诚不能正室家不可以为道故其在畎亩未始一日忽忘君民对妻子惟恐食息稍违礼教一言一事必求合于人情可无怨悔者而後出之其受人子弟之托教之不啻己子随才指授专事讲释至老不倦与人交不敢失信废礼受侮不敢争忿蓄怨平居确意安贫守分不萌非义之求闻人有善心恨弗及见人之恶口不忍言自信不移量力而动平生谨畏求寡乎愧怍而已噫使余少年微有依怙不历屯剥壮岁望于理性不明否泰未必能操心虑患固穷顺命亦何以至于今哉凡吾子孙勿坠家学推本源流念之敬之此吾之实录也余三复而叹曰呜呼其可谓躬行笃学乐道知命之君子矣凡君平生操履大槩已见于此而国録沈君所状尤为详备余复何所措其辞至于蓬藿之居陋甚玉川而门墻户庭咸有铭勒簞食菜羹终日不饱而洁斋整齐如对大宾子良妇教孙枝竞秀家法修明门雍户肃下逮僮仆举欣欣也其遗风余范至今藹然亦足以想见其典刑矣初君以淳熙十一年太上皇后庆壽恩封承务郎致仕十三年上皇再庆进承奉郎十五年正月二十八日甲子卒于泰州海陵县丞官舍享年七十有五後应时陞朝累赠承议郎张氏同邑人也曾大父嘉大父俨父日休封太孺人享年八十有六三子长曰应求後君四年卒次曰应符次即应时也一女未嫁而夭孙男三人祖佑祖诒祖开孙女五人长适文正范公五世孙克家次适宣教郎知婺州义乌县丞胡衍次适里士胡伯韶次许嫁四明沈严曾一尚幼曾孙男二曰珍曰珪君初葬于烛溪湖潘山之坞穴颇不安季和之亡得吉卜于新奥竹山始遂迁葬今将以嘉定改元某月某日奉太孺人之柩祔焉太孺人质性庄重雪斋动以古人自律孺人事之如宾终始若一日季和宰平江之常熟县号难治吏民欢服既满横为郡将所摭摭困厄两朞至开人使诉卒无一词犹被镌降孺人曰但不得罪于公论足矣穷达非所计也闲废累年方权臣用事不肯附丽求进菽粟不继族党姻旧皆勉以禄仕孺人独未尝一语及之曰使吾儿失节以为养不如粗粝之为甘盖不如此不足以配君子不足以生贤子孙不足以成礼法之家也季和不幸出门轴折不得究所抱负以彰积庆诸孙皆孝友以承先训後其有兴乎铭曰

德在陰报必明活千人後必兴天人间响应声有笃行出志诚子必贤家必名伟孙君真不朋动以礼善服膺不愧怍无亏成庙之琏壶之冰行于家森典刑噤不施閼幽局过者式视斯铭

攻媿集卷一百七

卷一百八

钦定四库全书

攻媿集卷一百八

宋 楼钥 撰

志铭

赠金紫光禄大夫姜公墓志铭

公讳浩建炎绍兴间来寓四明至十年岁在庚申公之弟涛以流寓名荐书十二年遂登进士第人争曰是东都大家能以举子业致身于兵火流离之余耶惟姜氏当承平时富盛甲京师婚姻多后妃侯王之家声势翕赫而最重儒学藏书筑馆延太学名士以训子弟礼意隆洽宾至亦留设盛饌参政简斋陈公及一时胜游皆求阅未见书或登科以去又请举其友若昆弟题名家塾多有显人如参政谢公克家侍御江公跻待制高公至临少卿汪公思温及其季吏部思齐皆在焉积而至此以起其家公尽室南来弟犹未冠公方急禄每以未能卒业为恨独任家事勉其弟力学抚育训导儒风益振二十九年其长子模中浙漕举至于三四讫不第又二十年曰桐曰柄曰焜曰焕曰光等相继累上礼部入太学而柄与光同以绍熙四年赐第?又继之皆公之子若孙也噫亦盛矣公字浩然曾祖德安杭州助教赠忠翊郎祖侁右侍禁合门祗候累赠武经郎父寛成忠郎合门祗候累赠武功大夫吉州刺史娶朱氏封宜人累赠和政郡夫人少师孝庄之女视钦成皇后为祖姑又仁怀皇后之侄也宣和四年少师以郊祀恩奏补承信郎调监平江府都税务福州盐税务改明州市舶务行在草料场严州在城都税务临安府比较务点检户部赡军酒库所采场行在左藏库再任京畿第二将荆湖北路安抚司准备将领改两浙东路兵马都监驻明州者四一改婺州?除兵马钤辖绍兴府驻劄陞马步军副总管驻明州秩满改福州踰年丐祠主管台州崇道观又任建宁府武夷山冲佑观未纳禄淳熙十二年十二月癸亥卒于家享年七十有七积官至武节大夫始夫人先公十年卒葬于庆元府鄞县丰乐乡东山之原明年二月庚申诸孤奉公之丧合焉男六人模故忠翊郎监建康府户部赡军酒库所采场赠通直郎棫以召对职宾赞终武经大夫合门宣赞舍人两浙东路兵马钤辖朴以疾不仕桐武翼大夫新权发遣郴州军州事柄故奉议郎知濠州鍾离县事林女六人长适故朝奉大夫知泰州司马俨次适武节郎新东南第四副将绍兴府驻劄董璆次适奉议郎知嘉兴府海盐县事史弥谨次适国子进士楼湊次适建昌军新城县主簿王深一蚤亡孙男一十人炳煜武经郎新特差充殿前司书写机宜文字焜故承节郎合门看班祗候监饶州在城商税焕故从义郎监两浙转运司婺州兰谿酒库光奉议郎新通判婺州军州事?文林郎监泰州角斜盐场焜国子进士剡国学生炜焜熠国子进士?燔焜磷熠熈炎承信郎孙女九人修武郎新监湖州在城都酒务宋克明太学生汪祥进士陆构迪功郎辰州司户参军司马遂奉议郎知江州彭泽县事赵希葵迪功郎新临安府仁和县主簿黄梦与史挺之承信郎新监抚州户部赡军酒库王坚迪功郎新严州淳安县主簿赵希怱其壻也余在室

曾孙二十人埏垓填屋堊墍塤坳壘坡塾增堂 墅基墉壁至 坚曾孙女十人适进士何冲朱中庸顾大声国子进士赵时古余在室公少警敏及见前辈笃志问学书传多成诵尤熟老庄之书人但知为佳子弟耳家在汴都外城一旦碎于兵毁至京口遇溃兵劫卤忽为妾人吉州旋即世聚食数十口皆仰给于公甫冠入仕厉志官业动有可称北兵将陷平江郡人惊奔而阇者阻之公叱使开关去者不胜计公殿後几不免人皆德之及掌樞酷请创采场以供酒事贷本钱于版曹要告身为质公以文书衔褻而进即命公为之定采价三等比时估为高初亦罔测未几米商辐凑价日以平岁终会其息至百万缗衆始叹服至今遵用焉孝宗登极婺以犒军稍缓口语籍籍公禽治数辈无敢譁者所至总戎有律阅武有程慢令者毫发不贷行之以公人自畏讐所事帅守魏惠宪王崇宪靖王丞相梁仪公克家参政周公葵给事吴公芾敷文阁直学士俞公俟龙图阁学士赵公子瀟皆深相器重枢密胡公松年守姑苏择官寮十人日供故事右列中惟公得预选所陈又能切中时病仕于明最久詹事周公操朝请莫公伯熔俱尝同寮相与素厚莫公诸子皆为清望官公至必使环立以待中书舍人济来为长史以父执致敬周公为御史露章推荐太师史文惠王丞相王鲁公周益公皆称于朝廷诸子出仕犹赖前数公提挈之力观其所与则其所存可知矣前後以见辞五对清光奏陈多合上意有老成更练之褒遂赐横带入仕几一甲子吏考十之七八终始无玷临机健决不问剧易遇事风生以智为乐谈论亶亶音吐洪畅听者忘倦此皆出于天资惟是生长富贵既更世故遽能率家人刻苦廉介有寒素之所不及田里细务详练通晓尤为难能少有至性母恭人郭氏疾革刲股以进友爱宗党初以铢积寸累渐为温饱计会从弟迫于官逋举以济之季父客死江西又无嗣公取其遗骨葬于先茔之侧岁时祭享族人之废祀必徧及之弟妹婚嫁身任其责一介不妄取予性实好施推其余以周人之急亦所不靳也宫教涛出继伯父既定居吾乡买地城北分东隅与之筑室比隣人美其雍熙之轨焉旧学不忘时有清新之句自为上梁之文思旧隐于夷门不堪回首筑新居于鄞水粗可容身此特其一班耳专意教子不以家务婴其心夜或焚香危坐使之诵习率二鼓而罢模柄之预荐栳之赐对公皆及见之其在婺时东莱吕太史未第公知其贤遣二子从游模与之同中漕荐既即世子孙益守遗训虽事力不及盛时一二而文风彬彬遂为儒家始以次子封武显大夫累至和州防御使柄升朝改赠宣奉大夫今至金紫光禄大夫足以信公之志于泉下後裔方兴殆未可量也奉佛素谨楞严法华诸经夫妇繙阅以千万计入闽积俸置大藏经归眞家舍结字端重虽薄遽中家书无一笔行草手钞内典数十轴首尾如一从妹归丞相壽春魏文节公平昔相好为堂西偏藕花盈池丞相名以超莲书扁以遗之既属疾挂衣冠杜门自颐家庭孝谨调娱药餌久而不倦多拱手默坐间乘安輿致敬家庙佛像一丝不挂迄以壽终可以无憾矣钥汪出也外祖少卿兄弟仕京师同为王府赞读既皆尝授馆通家如至亲先妣吴国时犹未笄能备言公家风范相依下汴初寓浙右数困寇攘其卒来鄞盖以外祖为归也外祖尤顾旧好经理不遗余力既命伯舅娶公之女弟而宫教洎文节公与伯仲二舅同在家塾训飭如一四人联捷荐书自尔姻娅如朱陈然钥以外门之故得从公游又与诸郎共学仲舅尚书状公之行盖尝助之属藁今二十余年母氏舅氏俱即世而械朴柄燬煥剡?亦皆亡矣郴阳泣谓钥曰先铭未立日夜痛心兄弟凋零汪氏中表亦无几舍君无有知先人之详者敢以请钥抚事感慨又尝铭其二兄及鍾离之墓不得辞铭曰

克荷克承艰难百罹既蹈而兴才有余刃仕一甲子黄金横带晚克知止积善余庆遗训有传踵登贤科儒风蔚然东山之原松柏斯兑铭以表之其兴未艾

司法晁君墓志铭

晁氏系出于西周王子朝汉有错为御史大夫元魏有清为乐陵太守唐有左补阙大夫杲或谓其家有刘元德起兵时钱券【此称蜀汉昭烈帝之字避宋朝始祖庙讳故书作元】则其传世远矣本朝文元公以清德雅望冠一时文庄公继掌内外制赐第京师昭德坊後益蕃衍散处汴郑澶济间南渡以来江浙蜀道所在寓居实皆出于昭德无他晁也君讳某字某生于济之任城曾祖仲参赠金紫光禄大夫祖端义奉议郎签书高邮军判官厅公事考巽之超然不仕妣间丘氏君资禀不凡少承家法笃于孝友尝刲股以起母及仲兄之危疾年踰强仕从叔侍郎济阳侯谦之以郊恩补君将仕郎授迪功郎监潭州南岳庙循从政郎调建昌军新城县主簿继为沅州司法参军君宦情素薄而临事殊不苟率有可称其在新城豪强犁人之墓冤诉莫直君为得遗骸于田中遂伸存亡之枉广昌令以匿寇事攘富人之赀骨肉骇散冻馁于外狱久不决君受责欲行令辄赂君拒之以实闻而还所籍其家优裕如初居沅才三月有冒官称者守意希赏抵以深文僚吏和之君独不可守数谕意不为动善善恶恶行其志类此俄感疾已而起居如平时忽跌坐而逝安静不但不惟积善之报殆有自得而莫知也君宜达而沉下位宜壽而止六十一寔乾道元年正月三日也娶姜氏蚤卒子五人子騫子与子思子游子冉文学才干俱有家法三女壻通直郎赵某沈忠恕杜隲皆世家也孙男八人百源百则百海百制百利百礼百扬百顺女六人曾孙二世黻世表七月朔归至寓居抚州金溪县十月二十六日葬君于临川县崇德乡嵯峨山之西敷文阁直学士公武君之弟行尝状君之行事至开禧三年凡四十三年矣君之子惟子游在孙亦亡二人矣百海游鄞求铭于钥老矣学落何足以发幽光独念中原衣冠故家日就凋零文献相传如昭德之晁则又鲜矣少时及识敷学风采服其该洽其诵君之贤如许以托名不朽为幸铭曰

王谢故家风气一种晁之在汉实配于董至宋益大名胜继踵法藏耄智读者皆竦济北嵩山词采泉涌恂恂法曹典刑庄重以君之才卒于流冗我思前良托名为宠

直秘阁徐公墓志铭

庆元二年有旨朝散大夫徐梦华除直秘阁盖异恩也始公生于靖康之初元岁在丙午是冬金人再犯阙海内云扰建炎二年寇躡江右叛将大盗蜂起公之生才四年母氏襁负走陂头刘氏家仅免于难公既省事自念生长兵间欲得尽见事之始末宦游四方收罗野史及他文书多至二百余家为编年之体会粹成书传闻异辞者又从而订正之号三朝北盟集编自政和七年海上之盟迄逆亮之毙上下四十五载间具列事实制敕诏诰国书奏疏记序碑志之文有正史所不及载者搜掇无遗成二百五十卷又有纲目一册并藏于家至是史官方修高宗皇帝实录修撰杨公辅率同寮十人奏乞取公所编之书仍下临江军给笔札抄录以进十一月史官又奏其书有补于史笔为多仍荐公之贤大略云廉静乐道好学不衰故有是命又奏所编书目内有百余家馆所未备复命录其全书诸公欲相挽一出与同笔削有谕公者答

曰此书本不为进身计力辞之後又得未见之书再編集补三帙所居辟一堂取词命褒语篇曰儒荣以侈上赐枢密刘公德秀为之记待制杨公万里为之铭少傅周公必大端明洪公迈而下赋诗者数百篇远迩流传而公之名愈显矣公字商老清江县人曾祖用和祖士稳俱不仕父世亨累赠通议大夫母杨氏赠硕人公俊敏笃学至忘饥渴寒暑读书过眼辄不忘通贯经史百家尤熟晋宋南北五代时事自熙丰元佑以来名公奏议及出处大致无不该综作文皆有根据用事精确绍兴二十四年登进士科授左迪功郎洪州新建县尉以外艰不赴调郁林州司户参军到官未几又以母忧而归後为江陵府司户任满关陞左从政郎乾道四年外移南安军教授以举主改宣教郎知潭州湘陰县次授广南西路转运司主管文字赐绯衣银鱼诸司辟知宾州到郡遭罢主管建宁府武夷山冲佑观华州云台观绍熙元年授荆湖北路安抚司参议官庆元初引亲嫌径归再奉冲佑祠引年致仕六年赐紫衣金鱼仕宦几五十年间居之日为多南安官舍素在城外请迁入以附校官建云汉阁以奉御书立濂溪二程先生祠于左刘元城张横浦先生祠于右自为之记参政龚公茂良时帅江西读而善之以讲筵官荐湘陰并湖少田多盗帅括盗耕湖田者悉输租号增耕税他邑或移别赋应命公恐重困吾民谓邑无新田税无从出帅盛怒移湘潭丞仍窘摭邑事无可疵瑕者卒免于行更加礼焉增葺学宫严设祠像祭器书籍以次而举选士主之湘陰于是始兴于学矣朝廷议更二广盐法遣浙西安抚司干官胡廷直衔命与二漕臣集议境上西漕王公正己以公审知利害邀至苍梧会所公谓二广事体不同使者徒见东路郡多濒江可通客贩固已非是若西路多山郡近江者少道阻运艰客贩不通价必腾踊郡计不给重为民害郡有兵吏可役民不告劳若止循官般旧法初无抑配等弊公私俱便可以经久衆不能夺胡亦是之议定而去将入奏为主议者所誅畏罪希进尽变其说擢为东路提举旋升西漕侍郎詹公仪之出镇桂林共行客贩之策虑公或以宾州奏事必撼成说武宪熊飞素不快于公二人从而甚之熊上悔举之章公遂罢不三年二广之害果如公言民食贵盐富商至破产丧生胡忧惧至死詹亦得罪复行旧制至今便之周益公当轴谓公前谩未直公答以事久自明不待辨也归而悼亡连丧子女宦情愈泊然矣杨诚斋挽使造朝荐进甚力庙堂将处内郡止求议幕荆帅枢使王公蘩移镇长沙以公可任帅事申省委公经时而侍郎袁公枢始来知公止请上幕俸给尽以三月帅俸归之又力辞尤叹其廉既而从母之子侍郎彭公龟年为帅公去替止半年法不用避公乞祠以去彭公餞以诗云法许公不许法不如公严年虽已高手不释卷有读书记忘集医録集仙後録各三册会録四册皆以儒荣冠其目家有万书阁籤帙甚整能视细字如年少时事亲尽孝祭器封鐫惟谨有家记一编载时祀礼式又揭百不忧堂以志义方之效阁前乱石森立石间多红薇花若张锦然号紫薇洞天胜日深衣坐阁下二鹤翔舞于前殆神仙中人也弟妹四人弟得之亦休官而归时节聚会子孙甥壻罗拜为壽竟觴卜夜无倦色从母昆弟七人时置酒款集韦济川楫黄仲礼琮彭子壽而下俱效之开禧元年亲党为八十之庆宴笑数日乃罢中婴小疾精明如故犹能课诸孙诵习三年八月浴出瞑目危坐而化二十有一日也娶丰城鄢氏先公二十一年卒封赠至宜人五男子简从事郎新邵州新化县令范迪功郎新袁州司理参军籀业进士次子符幼子节皆蚤歿二女长适免解进士曾三异次适进士邹埶亦前卒孙男十人长峯亡矣次嶢次金酉荐于乡崧峩崇嶷??一女适乡贡进士向公美曾孙二人郊郁二女尚幼诸孤以嘉定元年十一月庚申奉公之柩葬于县之修德乡古牛冈之原始钥屏居四明得子壽书俾为儒荣堂赋诗时虽抱疴为作古风寄之已而子壽与公俱以书来谢比闻子壽之讣固已不堪云亡之痛而公亦下世矣公既葬之二年简以赴调来见谓前诗恨未见

北盟全书尽錄以见遗又出其季父致政所作行状求铭致政尝着左氏国纪中书舍人陈公傅良为之序盖深于经者书事尤核敬掇其状而为之铭铭曰

靖康兵祸古所未有凡曰臣子痛心疾首公生初元以及己酉犬羊长驱荐食江右幼而得全实赖襁负少长读书志已不苟宦游四方谘访?究网罗旧闻编不停手二百余家笔下辐凑系日系年别记谁某有制有书有疏有奏衆说杂然考证是否名闻于朝六丁下取蓬莱汉阁宠数加厚儒荣名堂足以不朽才不尽用仕多不偶身退名尊二疏俱壽奄然仙去何憾何咎有子克孝庆流在後铭以发之尚照林藪

朝请大夫吴公并硕人姚氏墓志铭

仙居吴氏自龙图阁直学士给事中康肃公以儒术发身入从出藩为时名臣长子兴化使君首躋世科兄弟簪笏蝉联多至郡守族党中登贡籍擢科级者相望遂为巨族钥淳熙五年由敕令所删定官赘倅丹丘始拜康肃于湖山堂时居邑之石井既挂衣冠夫妇偕踰七十子孙洗洗坐享耆福谿山胜絶来者如游崑阆钥一见辱知獎良厚因得与诸子游今识其家四世矣兴化明锐奇麗谓必可接武夷路不幸嬰末疾止于中壽次子鄞丞壻四明史氏钥以第三子娶其女遂为姻家今知吉州公比为大理寺主簿同朝见过泣而言曰先君抱负不凡先妣妇德素着而葬之日兄弟尚未立未有铭文以传後介弟既亡繫谁之责援亲契以请余感念畴昔为之永慨乃掇括苍贰车郭君晞宗所为行状及兴化自为姚硕人行述大槩并为之铭君讳津字仲登世为台之仙居人曾祖允昭故赠武略大夫祖师锡故任右承议郎累赠光禄大夫考芾康肃公也官通奉大夫累赠少师妣郭氏赠鲁国夫人君幼嗜学强记博通羣书尤熟文选或覆诵终帙年十有五以词赋魁乡校尝从秘书郎王公衎颂台主簿胡公权殿中季公棠游三人皆名儒每器重之康肃为御史以郊恩任将仕郎为铨闈第二人授右迪功郎监潭州南岳庙侍旁益肆于学连荐漕台登乾道五年进士乙科充两浙东路安抚司干办公事改宣教郎知处州丽水县监行在都进奏院为亲求补外添差通判绍兴府淳熙九年赐五品服十年继丁内外艰执丧哀甚倚庐增慕灵芝产于楣人嗟其孝感纪以诗文服除权发遣江陰军未上改主管建宁府武夷山冲佑观?知广德军以足疾丐归改兴化军庆元二年属疾八月四日终于家享年六十有四累官至朝请大夫娶姚氏封安人先公六年卒葬之地曰西隩去先墓百步累赠硕人男四人机朝请郎知吉州军州事朴故通直郎知庆元府鄞县丞棻迪功郎福州福清县主簿标迪功郎衢州开化县尉兼主簿女一人适进士姚栋孙男四人华煜炜灼孙女九人长适承奉郎监西京中岳庙楼治次适从事郎新赣州司户参军叶言次适将仕郎卢樵次适承信郎新差都大提点坑冶司监辖铜钱金银场顾士龙余在室曾孙男一人诸孤以十二月辛酉葬公于郭但山东隩之原迁硕人之柩祔焉公志趣高迈不溺于膏粱之习种学绩文与寒畯争驰久在亲侧宦学增益小试于外动有可称初入帅幕丞相蒋公太师史公为帅属以文词以远器期之丞相葛公枢使黄公为僚相好号一时幕府之盛丽水试邑恪守家范夙兴冠带视事决讼如流庭无留牒严于治盗民以奠居邑社稷坛壝圯坏学宫尤不葺公谓非所以安士训民也乃筑三坛于学之东偏又彻学而新之岁祀月书如仪士民俱劝焉及官奏邸同知枢密院事谢公时在谏坡举公自代有曰治邑有声立朝无玷方向于用怀亲求归朝士叹其高致赋诗宴饯归娱剡下久之乃到官参政李忠文公多以郡事委之裁

决岁饥流殍盈路公请发圭租倡率劝分人遂乐从待制朱文公为提举官任以荒政躬走阡陌如怀隐忧有所措画俱从其言以文学渊源政事详练荐之广德久旱种不入土粟价翔踊公斋祷祠山随车沛然时米舟辐凑官兵得空券累月悉以给之积讼不决而两狱隘陋卑湿公曰不葺不决疫将兴矣先呼囚徒稽貌察辞随处以法轻系以片言折之谕狱官邑令日决数事旬余囹圄为清减商算损酒价访水利民听已孚而去矣遮道拥车至有泣者曰官何来之暮而去之速乎康肃轸惠隣里谷贵则损价以赈岁寒则赋粟以济散药给棺一方赖之公谨不敢废湖山亭馆以时整葺追慕不足筑祠于堂之隩又以隐居诗篇刻石时节撷芳荐新事之如生耆旧有为父母所厚者尊礼之如故时正旦合乡之士夫于邑庠谒先圣先师及先贤之祠序齿讲拜升堂举酒略如乡饮之仪为文平淡援笔成诗蔚有父风合诗文十五卷藏于家庄重恬静中无机心与人交久而弥亲不知者或以为简公不改其度寛裕容物无疾言遽色服用俭约而厚拊姻旧虽甚费不靳康肃尝以岁侵为忧公适归自稽山白曰顷年得禄储谷可数千斛举以均济亲顔大喜殆有前辈麦舟之余意使其得究于用可以及物可以亢宗而见于世者止此可哀也已硕人家黄岩承信郎义之女甫笄丧母已能任家政既归于吴舅始丞郡而家尚窶寓族长之家光禄泊夫人俱存家法素严鲁国病足已久矣夫子方从师友于外无娣姒之助以冢妇独任梱内之责人以为难光禄与夫人既丧用益窘小姑出适发奁具以佐之石井卜筑竭所储以庚费康肃素好宾客不问家有无先意治具以竣所需康肃以贤妇称之见于遗札其亡也夫子哭之甚哀吉州以作邑有声连岁进擢以至大郡可以知兴化义方之训鄞丞既亡而吉州求嫡母之铭甚切又可以见硕人鴈鸕之德是皆可铭也已铭曰括之阳兮仙所居伊石井兮公之庐堤万壑兮清流瀟夹明镜兮澄冰壶伟康肃兮蚤垂车谢轩冕兮天为徒君冢嫡兮如伯鱼传衣鉢兮邺侯书宦学富兮历仕涂见诸用兮直绪余归不改兮先规模终相从兮山之隅夫人德兮鴈鸕如义方壶彝兮葛里闾我维铭兮子刻诸慰孝思兮贲幽墟

直秘阁孟君墓志铭

君讳嵩字峤之孟姓也昭慈圣献皇后兄子信安郡王之次子也后以圣德母仪四朝信安勲在社稷密赞中兴贤德问学为戚閤之冠高宗宠遇如唐肃宗之待李邕侯无与比者公之高祖在安武军观察留後赠太师韩王祖彦衍中散大夫行开封府左司録赠太师豫章郡王信安讳忠厚少师保宁军节度使充万壽观使提举秘书省赠太师母秦鲁国夫人王氏世本汴人五世祖魏王徙居卫州共城後复居汴信安南渡家姑苏遂为长洲县人君十岁以祖?补承事郎性至孝不忍舍亲出仕奉祠膝下者数年绍兴二十七年任军器监主簿未几信安薨恳免临奠特恩除直秘阁赐绯鱼服除授浙西安抚司主管机宜文字幕府笑谈一坐尽倾事无巨细勤于关决使长多资决而後行未滿除监尚书六部门时隆兴改元之季冬也乾道初供职职事简寡而才地有余尚书郎或有假故长貳更委摄承几遍二十四曹遇事益练习而声誉日休轮对陈利害甚悉上嘉纳之六月始以制书摄仓部公自以骤进抗章请外二年通判楚州又力请祠再任主管台州崇道观满秩通判临安府七年瓜期将及会光宗以皇太子尹京易倅为府推八年始改浙西安抚司参议官淳熙三年八月到任盖家食者余十载淡然不复以仕进为意人皆期以远到而明年八月丙戌以微疾卒享年四十有四累官至朝奉郎五年四月癸酉葬于常州无锡县富安乡许岷山之原去先莹数百步娶仲氏左朝请大夫淮南

安抚司参议官并之女後公七年岁在甲辰卒有贤行克相夫子子男五人夔右宣义郎监秀州华亭县市舶务次曰曾俱先卒次曰猷朝请大夫主管建宁府武夷山冲佑观次曰导朝奉大夫权知严州幼曰翔故迪功郎信州司户参军女一人适朝奉郎知真州李大理孙五人继勲修职郎监镇江府大军仓门继华修职郎监行在点检赡军激赏酒库所都钱库继显迪功郎新镇江府丹阳县尉继勤将仕郎继勇两浙转运司进士惟信安谦恭威重有大功而不居逊远权势被服儒雅居第择穷僻处门宇卑陋以终其身至今不为势家所夺犹存其旧吴公械字才老仲公参议字弥性皆名士以女弟嫁吴而与仲为姻家其好贤类此故子孙多贤公自幼承义方问学有原委论议正平性又强记一经见闻辄不忘诗句清新有冰翁之风一时名公多与之游自奉寒素而好济人之急笃于教子刮磨豪习二子三孙俱联名荐书继显先登嘉定元年进士科藹然为儒家矣钥少随侍都下尝识风度而不及相接亲见公在部门丞相魏文节公为天官舅氏尚书汪公为郎与公相厚称美不容口冲佑漕淮浙为太府卿兼权刑部侍郎严州尝为大理正兄弟有贤誉俱得奉周旋钥比知贡举首阅榜帖一见公之孙姓名为之忻然知孟氏之方兴而未艾也得书以公之葬未有铭远以见属遂铭之以慰孝思云铭曰

昭慈之圣信安之忠辅成中兴盛德丰功公爲爱子余庆所鍾问津郎曹受知诸公位不称德壽弗及中积善旷达不于其躬子孙日兴益振家风我惟诗之表于幽宫

攻媿集卷一百八

<集部,别集类,南宋建炎至德佑,攻媿集>

卷一百九

钦定四库全书

攻媿集卷一百九

宋 楼钥 撰

志铭

周伯范墓志铭

周氏为四明望族不惟名宦相继而前辈源流其来也远孰不欲仕惟周氏之仕者多以壮年退休有四休堂则家风可知明今为庆元府周氏世为鄞人居城中西湖十洲之西君之高祖告赠正议大夫曾祖师厚登皇佑五年进士科娶范氏文正公之女忠宣公之姊也仕至朝散郎任荆湖南路转运判官赠银青光禄大夫次子曰锷元丰二年登科娶胡氏右丞宗愈之女两娶王氏翰林学士觐之女又娶陈氏正言伯强之女仕至中大夫才业尤高尝以忠愤上书遂陷党籍又以外家妻族皆一时名公俱在奸党动辄拘碍以经世之才仅知南雄小郡贤士大夫多痛惜之仲子讳渊亦有家声仕止右儒林郎娶俞氏君即儒林之子也讳模字伯范性敏悟承家世之传幼笃志于学如成人从济南刘夬游又学书于睢阳徐济甫有楷法年才十七而儒林下世兄弟终鲜四姊一妹俱未行亲党为之危虑君雅有心计沈静善谋既讫葬送女兄弟俱归里之善士皆人所难免丧之後一举不遂即弃举子业一意世学繙经阅史几不释卷以为名第有命不可强求不坠家声足矣建炎兵毁先庐荡然儒林所居湫隘以此事属之君君承先志大啓堂宇甲于吾乡奉累世丘垄随力葺理岁时修祀事物必亲临器必亲濯诸父既亡从兄伯济比隣君事之如同气榜所居曰怡怡堂以着其友爱之笃中大夫遗文甚多如承宣集等行于世文集仅二十卷君恐其久而坠失手加编校以千缗为钹版印造之费始得家有此书年登半百即以櫟榘施贫人之丧所济甚衆官道倾圯加以齷齪行者赖焉经理家务井井有条时出其余以周人之急姊妹既行及宗族之疎远者恩意有差居闲好客觴豆终日不倦晚又增葺後圃益以自适号得闲居士纵心之会乡里合庆以为君福壽未艾也明年是为嘉定元年三月二十九日以疾卒于家娶朱氏子男二人曰熺庆元四年为乡贡进士次曰烜先五年卒女三人长适汪之彦次适乡贡进士李梦龙幼在室孙男六壻垓圭垓堪垓女五人长适陈鋈余未笄先是朱夫人葬于通远乡银山熺将以十二月壬午奉君之柩合焉君素了达不以穷通死生累其心豫卜壽藏美槨之备已十余年吾邦旧有真率之集仲舅尚书汪公主盟斯事君实预焉余投闲一纪从容其间君少余一岁某品又相近在会中尤为亲密後虽以忧患疾疢寢废去冬西上君送于郊握手道别尚期余生为老伴闻君之讣?伤殊甚熺来求铭义不得辞余有表妹之夫子建植于君为疎族死无所归君呼其子某使葬于其先茔之傍某游学又任其扫松之劳是尤可书也铭曰

四明之周着名吾州家在十洲堂有四休君承其流抱才则优不伎不求无悔无尤家立身修

晚益夷犹棹觥筹里间沉浮积善未酌如穉有秋我铭诸幽後人其收

承奉郎致仕李君墓志铭

江口李氏钥及识其五世矣始秉义讳珂善富乐施乡称长者再娶王氏寔提举广东市舶勲之女兄太府卿正己之姑也卿为钥之姑之夫以是与李氏有连钥生长外门幼年外祖汪公少师外祖母越国王夫人过其家先妣吴国携侍行时李氏鼎盛夫妇偕老子孙满前宴乐连日侍御史王公伯庠铭秉义之墓谓其持心广大与造物者合三子长讳侑字子列一善干蛊奉亲有称仕为修武郎建炎三年寇残四明游骑向奉川出财力募乡兵守御邑境以全钥尝记其事甚详是生九子第四子讳充庭则君也字伯振资孝谨最为大父母鍾爱昆弟既衆家析而非旧矣君躬行善道刻意教子元白居长受学于舒貳车元彬归以淑诸弟既为大学上舍优选待年廷试弟及子俱有场屋声联翩科级诜伯中嘉定元年进士第迪功郎监绍兴府三江盐场诜伯乡贡进士训伯国学免解以称内舍生又中上舍选以制中开禧元年进士第迪功郎新绍兴府余姚县尉词伯在兄弟间才气实相上下虽进取未效而士友固已期之从子森同以舍法待年从弟之子海伯亦荐于乡于是文风大振遂为儒门乡里歆艳其兴未艾也君□澹与物无竞善处宗党周旋弥缝无间言父母既没抚弟妹毕昏嫁经理不遗余力亲族子弟不问贤否一家诲诱里人间有强犷之人遇君辄敛避教子以践履为先不专事举业诸子学成而不偶不以介意及其名第寢兴视之亦藐然人莫窥其际平居以书史自娱前言往行有契于心者必书之座右首曰有一言而可以终身行之者其恕乎如心之谓恕也又曰我必不忠不仁无礼皆自反之道也又曰一饭之德必报况其有甚于一饭之德者乎可以知君所存矣间作歌诗平淡如其人阅名臣言行録遇合意即作诗以记之至百余篇慈福宫庆典以二子在学封迪功郎嘉定二年郊祀恩转承奉郎就养三江以疾卒于官舍寔三年十月二十三日也娶张氏封孺人朝奉郎嗣良之女姑之子也六男子长即元白次诜伯诜伯词伯誠伯训伯惜诜伯誠伯先卒女四人黄直爱张复袁邦杰张绎其壻也孙男九以称以制以牧以豫以清以宁以生以似以翼孙女六人长适袁沂余在室曾孙女一人明年闰二月甲子诸孤葬君于鄞县塔岭之原书来求铭数年以来日见李氏昆仲奋发益叹积善余庆之盛闻君既亡家人始得遗言于篋中区处後事甚悉且戒丧葬俱循古制无徇世俗有曰家中遗产惟有一经教子而已又曰吾幸有子所欠惟一死不以讳也贤哉铭曰

祖开庆门父全乡邑君继以善子孙玉立或升于学或庆于乡儒风大振名第相望衣冠方兴所贵持久毋渝淳则用笃厥後

承议郎谢君墓志铭

余家世业儒五世祖正议始以乡先生决科起家五子俱传业而季子梦弼讳肖尤攻小学又传其五子其仲元应讳奔独殿诸老说文解字经典释文始末通贯几于成诵钥侍教累年故颇知字学客授东嘉与诸名士游独谢君季泽最为同好相与考订文字毫发必计後十五年复叨假守时过郡斋晤语甚乐也别後时见其笔画愈工余既投闲闻其亡矣亡又十五年当嘉定四年得其子有开书以铭为请既列君之行实又以张忠甫所作乃祖志铭陈君举序君

所着正字韵类五卷来抚其书为之伤叹此真季泽留意之书也因为掇其大槩而系以铭君讳雱季泽其字也温之永嘉人曾祖文渊祖君任有乡行父知柔尝居瑞安之乐善里里人称乐善先生君仕升朝赠承事郎母张氏赠孺人兄黔有声上庠君性颖悟承父兄之训博学强记自经子百家之书皆手自校定音训句读一一不苟以是文亦日进援笔立就不为艰深之辞绍兴三十年入太学乾道五年登进士科授左迪功郎福州连江县主簿丁母忧服除再调台州司户参军关陞从事部淳熙十二年为高邮军军学教授改宣教郎知福州宁德县主上覃恩转奉议郎赐绯衣银鱼庆元改元年劳转承议郎三年以疾卒于官享年六十有三娶万氏有妇道先君五年卒赠孺人十一月庚申合葬于西山广惠院先莹之後山二子有开有大孙四人师中师善师俞师心女三人君讲学务出于正早受知于舅氏端明忠简张公阐忠甫名淳君之内兄君举名传良又张氏壻龙图郑公伯熊毗陵薛使君季宣皆里之名公周旋其间不扶而直闻佛老巫覡之说必深排之既仕而知者益衆丹丘郡用不足取于民者多居尝受输为之搏额外之求宿蠹一空五邑称之朱公熹为庾使风裁甚高一见君如故交留语或至终夕属以荒政及滞讼以办集称祭酒李公祥为淮南提举荐四人于朝籍记中书高邮教官预焉钱公之望为帅旧与君同舍知其才访以民瘼君为论科买瓦甃薪芻泊差役工匠之害尤悉帅得书喜曰仁人之言其利溥哉下属郡尽蠲之及试邑日危坐听事事至立决故无留狱出储粟以赈之增学粮以养士闻有蛊毒法禁数严而奸民反以诬善良吏复鍛链或至诬服君察其诬白之部使者曰蓄蛊者固不可赦诬人者自应反坐卒平反之邻邑连江亦有是狱太师郑公侨复以委君又得其情无不感服故吏畏其明而民乐其寛焉死之日巷哭相闻有攀号輶车不忍去者士夫挽章盈帙祭文率数十百言且相与祠于老氏之宫平时勤谨礼法冠昏丧祭皆有典则律子弟尤严于拜跪举止之际衣冠服色斥去浮薄之饰君既亡其子行绞紵之制悉去世俗不经之文承君志也君性孝友二兄早世抚育诸孤为之毕婚嫁治室庐又勉之学勇于赴人之急惟力是视乐闻人善有过多面折之敏而善谋审度事宜往往中的惜乎不假之年其见于用者仅止此耳韵类一书援据精确不知者以为苟然惟好之者然後信其积学之工每谓使之在天禄校讐之职必有补于斯文然亦不及此余所以重叹也铭曰

古之设教学有大小六艺之目殆不为少幼而贞淳习之既成壮而用世足了一生惟此字学是为一艺後世忽之谓学之细礼乐既坏射御罕知数亦失传惟书可为我家有原余亦素嗜间亦语人鲜有同志顷仕东嘉日亲友朋惟此谢君时称笔精以文发身又敏于政笃意斯文字为之正亡年五十始得其书着之于铭以贲幽墟

赠银青光禄大夫宇文公墓志铭

宇文氏本居河南唐末入蜀遂为成都大家隆兴初元钥忝进士科与淮东总领子震兵部尚书价同登尚书尝幸同朝而总领以出入参差竟不及识三仕周行多见蜀士尤闻今贰卿及枢密之名恨未遇也告老复来枢密由京襄宣威召还文昌遂跻右府贰卿以棘寺奉使北归上从班皆一见如故交贰卿引嫌出守当涂钥既叨参预与枢密情好日隆一日亲携贰卿书以二亲银青及夫人之铭为委谢不敏至再三终不得辞谨摭所示行述书而铭之银青讳师说字德承曾祖宗象累赠太师魏国公祖邦彦故任朝奉大夫尚书屯田员外郎累赠太师齐

国公父时中故任左中大夫直龙图阁累赠通议大夫公之二伯父以文学被固陵深知迭掌翰苑继为丞辖枢廷家声临一时公少在富贵中而天资冲淡惟专意于学自为程度风雨不渝由伯父任补承务郎锐情举业两占荐书尚选父母既鍾爱之公亦不忍离膝下既冠三请祠禄以便养龙图勉以仕始为潼川府路转运司主管文字使长喜兴狱一道骚然州邑为之屏息凌忽官寮虽有言不屑也公气平而语劲遇事坚执未尝少屈下期于用己之学长为敛容狱亦寢息俄丁母硕人房氏忧父既奉祠公亦不调龙图服除又任常平司干办公事甫到官而以疾卒年止四十寔绍兴二十六年五月二十八日也官止奉议郎平时乡党搢绅品论世家子弟之贤必以公为称首至是相与嗟惜又不能自己也两娶房氏赠通议文安郡夫人四子绍猷故奉直大夫知汉州绍谔故文林郎知叙州南谿县次绍彭由权户部侍郎右文殿修撰知太平州次绍节以龙图治命继伯祖枢密太傅肃愍公後端明殿学士签书枢密院事兼太子宾客一女适承议郎新知简州杨思成孙五人景韩景修俱终于将仕郎景琦迪功郎监汉州商税景度儒林郎添差两浙西路提点刑狱司干办公事景厚迪功郎邛州安仁县尉孙女三人曾孙□人二子以郊恩累赠公银青光禄大夫以某年某月某日葬于广都县龙华山之原後三十余年文安夫人耐焉公既蚤歿诸子尚幼公之学行俱不得显于世文安每举公之遗烈以教之大略以为公之读书为文皆有绳准经史百家之言悉以次第繙阅沈潜反覆随疏坐右旦为某书夜为某氏之文手抄成诵若布衣初学之勤者喜与士友谈易时诵家人正家之道以勉我相敬如宾公退则闭阁弦诵哦诗缉文一不以家事介意此皆公之所安而道行于妻子之实也欧阳公幼失所怙罔知其父崇公之详其见于泂冈阡表者皆郑夫人之言也敢引以为比公之隐德所谓非此其身在其子孙貳卿方以名从臣出典藩方枢密先膺大用宇文氏之兴真未艾也天之报施岂不昭昭乎铭曰宇文之先其积已厚枢筦丞辖赫然华胄公居其间卓称孝秀天爵为贵多文为富学优入仕不渝素守出门轴折才不及究非此其身宜昌厥後我惟铭之用诏不朽

文安郡夫人房氏墓志铭

夫人姓房氏讳妙光其先显于唐广明中扈西狩因家于成都之华阳曾祖审能赠朝请郎妣安人宇文氏祖希参朝散郎赠通议大夫妣硕人张氏杜氏父永朝奉大夫通判嘉州妣宜人张氏夫人性明悟在羣儿中独若成人少长事亲知色难之义不但长于女工也宇文氏世有姻好嘉州先以次女归直龙图阁时中之子银青公师说又以第四女继室是为夫人夫人之姑姑也未几即世执丧哀慕扶护以归又谨视龙图次舍食饮之宜已而治阃内奉烝尝一如姑无恙时以寬龙图悼亡之悲银青为潼川漕幕夫人年才过笄恪守家法食不重肉而丰宾客之奉夫子尽职不苟退则耽书一不以事物自婴内助之力也尝侍龙图疾奉药餌甚谨少间曰吾妇孝敬他日愿汝子妇如此银青事兄如父夫人待长姒如姑百口无间言银青卒于潼川仓司夫人三十有二诸子皆幼送终治葬无一不尽自後专意教子昼夜不怠又举银青学行以为法故诸子益自刻苦相继预荐季子绍节遂登淳熙十四年进士第银青之兄赴合州夫人领诸子留里舍教愈力用愈俭岁入之余悉储以听一毫不自私合州晚岁闲适夫人与其姒分月主家务或客至纷沓供酒肴无倦色伯与姒皆敬叹之姒既寡居相好益笃事夫大小未尝先可否至不敢专席而坐若非辈行然二十年如一日亲党皆以为不可及姒止中壽四女未行悲恤抚摩不啻已出俱使之得所归长子绍猷得官成都张宜人年高喜于便亲

即听迎侍一二日必归母侧曲尽孝养宜人及见外孙以次授室相继出仕谓夫人曰汝父与舅皆称汝孝盛年守志不以悲哀乱所守固知其有今日矣送子之官戒飭尤备引隼不疑之母之语及谈上世官业以勉之且俾廉勤首公无躁进无诡随不以驰骛宠禄为急也肃愍公靖康奉使结约举义谋泄遭变尽室死之龙图命银青以绍节继伯祖为孙甫冠夫人即遣诣行在所以其事本末请于朝留十寒暑每以书戒其尽力母念我事既昭明恤典优渥乃俾追丧略无嫌忌人尤以为难平生动中准绳高见絶识有士大夫所不逮然语笑不妄发未尝以所长自为表襮调人之急如恐弗及故衾衣襦久而如新视世之纷华荣耀一无所累其中者淳熙九年六月十八日卒享年五十有九明年十一月甲子祔于银青之墓子女孙曾悉在银青志中呜呼夫人在家为贤女既嫁为孝妇妻道母道又皆兼尽可以为闺门之规范矣是宜铭铭曰

彤管不作傅姆无教孰能闺门惟敬惟孝猗欤夫人谨于三从事姒如姑又笃其终义方尤严绳绳孙子庆必有余川至云委典刑如存是为壺彝凡此妇道百世仰之

朝散郎致仕宋君墓志铭

隆兴改元永嘉进士得人最盛尚书木蘊之既在魁选一郡同登至二十七人余忝末科至乾道七年客授此邦三年间多与同年往还甚乐也後又假守则在者已寡矣今四十载惟余参议光远宋贰车正卿在钥亦偶未死故三人时以音问往来而正卿又亡矣明年其弟习之持书求铭正卿之墓擦涕之余为序其平生而系之铭且请光远篆其盖云君讳晋之正卿其字也旧名孝先字舜卿五季时处士靖自福之长谿徙温之乐清邑有张文君隐居筑室为邻而猴山僊人吹箫台峙其前真胜地也今八叶矣子孙繁衍为名族曾祖惟表祖世则俱晦德不耀考允修行义过人有声舍选而终不偶笃意教子既口授以尚书大义又力贫为之择师君既升朝生封承务郎後又赠至奉直大夫妣万氏继母张氏皆赠恭人由是邑人益励子于学君幼颖悟日诵数百千言弱冠从梅溪先生王公十朋游学徒数百人独君首出王公器之曾以诗赠别褒借甚至未几入太学登乙科授左迪功郎汀州司户参军王公又以诗送行期待尤远到官明锐任事不择剧易郡政待户曹乃决有霹雳手之名秋稼加耗病民君以郡命蠲之人皆讙服校文三山士踰二万杜君申有场屋声又尝名荐书文卷已遭摧剥君识于衆人中引义力争竟寘举首果以经魁南省人尤服鉴裁之明时丞相王公淮检正吴公龟年少卿郑公伯熊同为部使者皆欲出其门外移长谿丞县去福州数百里休戚几不相同丞相陈公俊卿为帅君言邑之利病多所开纳赞其长黄君藻和而不同相得尤深罢官祖饯挥涕而别海舟之隶于邑者数千艘君既被檄总籍其目分番以备调发舟人安之时造战舰期会趣迫君缓其期事亦随办伐木必亲相视而後取其免于斧斤者号宋公松丁奉直忧治丧诸费一金不仰于公家归营葬送仍自为壽藏于侧泣曰尚当供养于地下也除服调临海令以办治闻催科不扰圉圉屡空太守邀入签幕郡县视犹一体知无不为轺车行部士民遮道称德政者动数百人枢密丘公密为宪使率诸台荐于朝及去官壶浆攀恋旗帜咽道相望不絶前此未有也再调光化令乡人王公自中为守每称为老先生被边事简作亭丰山之颠遥望卧龙旧隐暇日相与登高吊古哦诗度曲不复以僚属相遇改奉议郎知奉化县君三更邑寄熟于纲目矧方为圜坐以无事民大爱之丞相谢公深甫临海人素知治行时在参预欲引之周行

君赴部授信州通判以归佐郡期月即引年求谢事谢公又却其请且勉留之秩满竟以朝散郎致仕或谓理赏可及正郎君曰不翅足矣翩然还家闻者愧服天资孝友奉直素为乡曲所敬憚以儒术自信黜释老之说每曰亲亡而藉緇黄以荐何待之薄也死欲速葬或溺于陰阳家之言以幸富贵至累年不入土者不孝为大其卓见类如此君之执丧一遵遗言追慕老而不衰岁时祭祀焄蒿凄怆如将见之言及则必泫然弟习之少君四十岁抚之如子捐祖产以畀之而不忍析爨弟亦恭谨好学事君犹父门内以礼法称护坟莹如护头目拜扫必躬必亲宗党贫者收恤经纪有孤女则为遣嫁之不惟子弟承教修饬厮仆亦能以生事相戒有古樟蔽甚广自号樟坡居士晚又筑亭其上榜曰可高赋诗赓酬者衆钥亦预焉嘉定四年八月属疾终于家享年八十有六娶孙氏继万氏皆赠安人二子长曰统迪功郎宁德主簿衢州比校务调邵武军司法姿稟端重居家临政绰有父风不幸先二年亡矣次曰纓孙四人?侨俶皆业儒幼曰宅孙女四人伯适进士刘颐仲适国学进士张复道叔从浮屠名法定季适进士万逵女孙三人习之与纓将以五年十月丁酉葬君于县盖竹山寔附先莹君志也君敏而静贯穿百家不为艰深之文明白丰赡诗辞高胜淡而实腴即席唱酬锋起泉涌人畏其捷而服其工所至留心风教勉厉後学长谿有隐君子林君维屏号榕台先生君屈致邑庠遇讲书与其长率邑之寓公听焉学者益励丞相梁文靖公闻之遂招入郡中一时政化之盛君实啓之忧居开义学来者辄受劝谕有文斋舍有铭深衣大带济济翼翼习俗益嫻临海官事整暇太守熊公克遇视学则请君为说春秋光化既为一新军学至奉化则又亲见之锐意兴作里士监南岳庙汪君汲与其弟份斥家财为之倡衆亦竞劝输貲鼎新照映山川举梁之文落成之记皆钥为之自尔累举得士为多家素贫孙安人初以田四顷自随伏腊粗给仕几四纪无一丘之益客至必留尽欢或假贷以续食人为不堪晏如也归老余年齿落复生发白更黑颀然为乡曲之望诗文甚多随有散佚今惟乾坤二卦中庸大学禹贡洪范讲义春秋十二公论各一卷历代中兴君臣论二卷拟进万言书一卷樟坡集三十卷藏焉铭曰

阜陵取士隆兴之春惟温?盛二十七人我幸同升洊官海滨相与往来久而益亲四十余年如星向晨惟宋与余壽踰八旬宋君忽焉而迹遽陈行义治政藹然弗泯难弟贻书其请甚勤哀怀易感勒铭翠珉

从兄楼府君墓志铭

我大父太师齐国公五子二十五孙惟九伯父五子皆钥之兄也诸兄凋零殆尽惟兄长钥一岁自幼少追逐晚益相亲钥投闲十三年时时步履相过山肴野?听琴观奕酒酣而归甚适也忧患之余既挂衣冠期与兄乐此晚暮严召还朝重惜此别初谓可以复?旧铭兄亦促使蚤归忽闻兄讣惊痛不自胜乞身未遂又闻将葬二子来求铭呜呼遂无兄可事矣雪涕书之兄讳鉉字少及吾家世为明之奉化人入城而着籍于鄞者至吾兄弟五世矣推而上之仅得八世积德有素至高祖先生讳郁决科起家一仕遽休仍教授乡里官止大理评事累赠正议大夫曾祖讳常朝议大夫累赠太傅祖讳异徽猷阁直学士累赠太师齐国公父讳琚朝散郎母陈氏封安人朝散儿女俱衆与安人勤俭治家尤笃意教子叔子鉉有场屋盛名以丙科仕至临安教官季子钜亦自太学晚为歙丞兄幼子也天姿谨恪读书之外竭力事亲于伯仲间急病让夷心计精密既不及禄仕一意守家法安分知足自奉至薄量入为用数十年如一日朝散

得齐公继绣堂故基为宅後既不足以容衆兄得田三亩力营筑室未几落成过者骇观入其家济济如禅房精舍地无一尘辟门临水得城南胜处内地才几弓花卉果蔬手植以供小摘之需真隐士之庐也朝而诵经昼则假寝暮止三酌陶然自适一呼烛则不复饮食故絶少疾病性谅直语辄见肺肝亲故有过忠告或面折之自谓爱人以德人亦谅而服之奉丘垄及致祭谨甚一物一器必出亲临尤好宾客至则谈笑欵洽小酌亦有恩义夫妇齐年俱至七十亲党合乐高会扁其堂曰双庆冬至元旦乡校有序拜之礼兄必夙戒子弟率先而往风雨不渝每自言曰吾无才术以发身赖祖先宗族之庇处夏屋三纪何以堪之生计素薄不足以卒岁斤斤自处人不见其际遂为乡里善人以终嘉定四年六月属疾初无他苦丙申卒于家享年七十有六娶宁海李氏克相夫子以齐其家二子浹洽一女适文林郎抚州崇仁县丞舒佑孙六人权柄校榴桤榘俱业儒柄出继为长兄主簿钰之孙孙女□人长适方楷次许适舒枢外孙也余尚幼将以五年八月丙申葬兄于通远乡金谷之原植德庵後兄所自卜欲从父兄于地下也兄虽出世家辛苦自立竹头木屑未始轻弃物多可为两用若琐琐者先具美櫝壽藏虽一日二日可为者亦皆豫办略无拘忌之嫌又可见兄之旷达矣二子事亲素谨兄亦以家务分委之继绣旧堂几不能保兄言之或至泣下浹力图而得之兄又喜甚将以故扁揭之未能也钥既不得归奉吾兄自念叨窃逾分上有忧责下困应酬每起伏波羨少游之叹今日东望尤为心折泪迸哀哉无及也已铭曰

齐公守乡始立锦坊五家聚处昆令季强兄之与我亲如同气期尽此生日夕陪侍病不及问丧不得归尚铭诸幽以写我悲乡里善人又以考终咨尔後來尚振素风

玫瑰集卷一百九

卷一百十

钦定四库全书

攻媿集卷一百十

宋 楼钥 撰

塔铭

径山涂毒禅师塔铭

径山为东南第一丛林非第一等人不足以居之淳熙十五年冬丈室虚席临安守臣奏请无锡华藏涂毒禅师壽皇素闻师名制曰可明年二月初吉方入寺遇今皇帝始登宝位诏就灵隐开堂中使斋御香以赐恩礼甚渥道俗辐凑惊叹未有且曰是为丛林一段盛事非师不足以当此也师名智策姓陈氏天台人自号涂毒岩生英敏颖异父母素奇之十岁护国僧楚光见之曰此子风骨嶮嶮有出尘之姿又六年遂祝发光授以经律理诣昭彻迥出流辈性刚简居处语默肃如也尤不喜泛交善则慕之有不善虽亲昵亦绝不与通年十九或告以定慧等学可以明见佛性即造护国请谒寂室光仅七日偶过门洒然有省寂室许之谓老于丛林者不能过也育王无示万壽大圆皆一时大名德无不肯可大圆问师甚处来曰天台曰见智者大师麼曰即今亦不少曰因甚在汝脚跟下曰当面蹉过圆曰上人不耘而秀不扶而直一日辞去圆送之门拊师背曰宝所在近此诚非宝师领之时豫章云岩游禅师号典牛声震江湖师往投之道由云居风雪塞路坐阅四十二日午初版声铿然豁尔大悟及造门典牛独指师曰甚处见神见鬼曰云居闻版声来曰是什麽师曰打破虚空全无柄靶牛曰向上事未在师曰东家暗坐西家厮骂牛曰崭然超出佛祖他日起家一麟足矣贞净老人若在见子亦当下拜遂领师至僧堂前撞钟大言曰侍者大彻矣牛机辩峻峭莫有婴其锋者师与之平章今古泉涌风驶闻者为之错愕踰年告别牛送以偈曰咄咄临济宗行行正在尔遂结庵于淮西乌崖之下典牛凡见浙客必曰识策公否客曰识之则欣然曰不虚生于浙江其器重如此大圆移大沕请居第一座秉拂之初衆已惊服尝问讯圆圆俛眉不语师曰何其瞋闷圆曰期子济济多衆如雪峯存沕山佑之流而谈天者谓子无徒子意如何师曰参学惟恐无本苟有本对泥像说法亦高出诸方圆曰吾子器识过人玄酒太羹非常流所能知味也东归又分座于国清此庵景元方住护国谓师曰公来归三峯景元即收卷波澜矣出世住黄岩普泽为典牛焚香是为黄龙四世孙历天台太平吉之祥符越之等慈及大能仁所至道价兴行旋自护国华藏来住此山而师已老矣力行祖道衆至千余每谓其徒曰来日无多岂久于此者弟子请建塔于东冈之麓绍熙三年秋毕工师曰生平言出没死生如适园观此言几户知之时节因缘乃在于此十六日升堂诀别举衆曰请偈赞者如市随叩即信笔应之二十五日门人宗惠问疾嘱以後事仍曰子以文祭我师整襟危坐倾听久之至酌茶尚飨为之盱衡一笑二十七日辰初汤沐已竟剃发更衣万衆云集说偈云四大既分飞烟云任意归秋天霜夜月万里转光辉俄顷泊然而逝八月二日举全身瘞于东塔壽七十有六腊六十夏得法弟子已出世者十

二人度四十三人【此下原本空缺十余字】余非学佛者未尝参禅又与师无半面而惠公余乡人録师行实求铭既适越贻书不已惟师之始末劲挺洞达无一毫回护意气于余心似有契焉乃具载所録而系以铭其实无此可也铭曰

临济正宗直下不絶杨岐积翠何有分别矫矫典牛付授亲切涂毒一声闻者脑裂云居版声风撼深雪径山一着霜夜秋月扫尽葛藤光明透彻我词赞扬慙媿饶舌

天童大休禅师塔铭

余家四明十禅刹错立名山中儿时未甚省事已闻人称老尊宿颇衆而大觉小珏之名尤着且久大则宏智正觉小则师也师名宗珏和州乌江人姓孙氏生不茹荤世业儒而性乐空门年十六白父母愿出家止之不可遂依贞州定山贞如住持德云十八进具长芦祖照道和声振东南师往叩谒照与语奇之留为侍者时真歇了公为座元师入室问云佛祖不到处是什麼境界歇竖起一拳师拟议歇挥之师即领悟遂云将谓无人到歇云放过一着宣和中歇主长芦学徒益集至千七百衆师代居第一座为衆说法建炎初元之蒋山入慈受深公室语契渊微尤相器重寻避地浙东侍歇居补陀岩道价愈高郡请住岳林布袋道场不就宠智时在天童视歇为兄邀归山间又命师挂牌领衆象山廷壽虚席使君延请再三始从之绍兴二年太守陆公长民仍迁师于岳林备礼开堂丞相范公宗尹自号退晦居士与师为方外交远来劝请参政孙公近时为部使者为范公草疏禅门以为美谈师即嗣真歇几三年退处翠山依宗禅师待制仇公愬迁之香山一住十八年衲子云趋寺为一新二十五年尚书王公俟请住雪窦二十九年真阁张公侂遂以天童招之师念太白名山实宠智之後一遵规式无所更改道俗益向之师容貌奇麗度量恢伟喜愠不见于色终日颓然无所修综亦未尝振厉风采而见地明白深造自得死生之际卓然过人人于是尤以为不可及也时城中湖心辩公宗师与师生之年月皆同三十二年八月上浣辩以遗书来师初无恙览书笑曰齐年既行吾亦逝矣翌日迎宾如平时晚欲小参侍僧以为暮矣即令集优婆塞衆人知其有异举寺咸会师从容普说多致垂别之意既归丈室濯足就座整容跏趺汨然而逝又八日学徒奉全身葬于南谷壽七十二腊五十四师等慈接物无贵贱之间侍制张公劭昆弟与师为中外亲舍人孝祥又视公为父行皆一时名胜师视之藐如也嗣法三十余人分领宗风而足庵智监为?显足庵住雪窦数年与余素厚绍熙三年余官後省忽得足庵垂絶之书专以先师大休塔铭为祝大休师自号也余幼钦师之名而不忍违足庵之祝为之铭曰

是释者流视生若浮生兮若浮死兮若休生既曰休死又何求足庵之求为铭诸幽

瑞岩石牕禅师塔铭

师讳法恭明州奉化人俗姓林母杨氏号佛光道人日诵莲经甚专一夕梦胡僧来谒既寤而生师父早丧年十五乃白母出家以栖真禅院僧则韶落发为师宣和七年受具戒习南山律于湖心寺继受天台教天童宏智觉禅师法席方盛师又更从之兄事自得晖昼夜危坐一日坐殿庑间忽傍有僧曰本自不生性无和合师一入耳根豁然开悟流汗浹体即见宏智反覆

问答机应如响智遂留侍傍久之再历江湖徧参石佛万年闲公室中尝一举似地擎山话经月不契他日再往闲日似地擎山作麽生师掩耳而出草堂清不许暂到入室师真造前清举拂日识得这个参学事毕师曰拈却这个唤作什麼清拟再举师夺拂子掷地上曰老汉拂子也不识一衆骇叹黄龙忠置界方槌拂于香案上师谓其侍者曰和尚此一络索作何用少顷一一拈起问过一机不来莫言不道侍者白忠乃尽撤去三年复归天童主藏事即分座说法遂为第一座智所举宗要师不为苟合智爱而畏之绍兴二十三年越之光孝虚席师移书于智求一本色人智以师参学行业始终明白荐之既往会应天塔壤或请舍去师曰非我尚谁为耶塔成始行未几复住能仁隆兴改元赵公侍郎出守四明命主报恩兵燹之余前人相继兴造凡所未备者如钟经一台等处皆师所建轩敞宏大遂为一城兰若之冠乾道六年退居小溪之彰圣明年茆阳郡王又起住瑞岩居山几周星辟舍宇以安衆开山田以足食又建圆通杰阁轮奂甚美皆师余事也大参范公请师于雪窦自得晖公归自净慈乃请雪窦还之复居瑞岩淳熙八年八月十三日感微疾谓弟子曰母以药石累我殆将行矣十九日以书招自得且促之越五日始至谈笑如平时付以後事作士大夫及道友书六緘已而诸山皆会以翌日迟明升座说偈而逝郡守谢公修撰得师遗书喟曰恨不识此老即以其座元如壁继之师壽八十腊五十九受度者四十三人嗣法者十人山之西偏凤号上方于是立塔以葬寔九月三日也师之从姑归余叔祖故自少时与师游璧求铭于余余非学佛者然窃谓桑门之法有三曰律曰教曰禅学者当先习律以检其身次听教以广其业然後参禅以求直指人心见性成佛一闻千悟世出世间法则为全人矣况是三者本无异途苟能贯通何所不可惟师天姿劲挺持律严甚而禅教并行直以古德自期爱身如冰玉终老不衰衾主大刹起居寢食无一日不与衆共不务缘饰无他嗜好自号石窠叟峭直骨骸未尝借人以词色见有道者虽坐下版必力加提引成就名誉郡命公定师略不容私或以赂得叱之不贷至白郡将汰遣之诸方异辞辄遭呵咄衲子慧而狂者至则摧折有僧自谓罢参指地曰人人唤作地我道不是汝唤作什麼僧未及对即斥去同行僧请代一转语遂举一拳师曰同坑无异土并逐之临安净慈人所愿得尝驰书请师乃航海以避命郡为申免皇子魏王作牧每加敬礼欲访师于山间辞曰路远而险徒劳民耳其严冷类此公卿名士为方外交者甚衆丞相魏公晚岁与师尤厚尝叹曰自得如深云中片石石窠则空门中御史也缙流以为名言师行解甚高不为夸诩以惊衆壬辰夏旱郡请说法即日甘澍次年又旱定海宰延之师曰前此偶尔非吾力也坚拒不受邑人固请即又雨焉呜呼禅林五枝盖出一本惟曹洞宗至芙蓉而大振石林叶公左丞称其与之严者得之必精传之必久河南邵公子文称其为特立之士二公皆名儒言必不苟一再传而至宏智尤光明俊伟而师得其正传卓立杰出确然自信末後一着照映今昔盛矣师机缘有三会録瑞岩後録壁立千仞不可挹酌丛林尤所尊敬读者尚自知之瑞岩古道场璧以师故出世即居之久而衆无异辞不负所托矣铭曰

此道本无二五派寢分别猗欵曹洞宗绵密更亲切稽首芙蓉师壁立蹊径絶还来一再传奇邹出丹穴石窠嗣宏智游方俱洞彻门庭晚益峻坐断衲僧舌如识滋味人啗土炭石铁醎酸甘苦辛开口了无说何以传不腐君其视兹碣表里无纖瑕瑠璃含宝月

雪窦足庵禅师塔铭

师讳智监滁之全椒人俗姓吴自儿时已喜佛书每以白纸为经跏趺端坐诵之琅琅然母尝与洗手疡因曰是什麼手忽对曰我手是佛手遂视母大笑少长日记经文千余言连遭亲丧决意出家誓修苦行以报罔极之恩真歇禅师方住长芦径往依投一见异之师勤苦精进终岁脇不至席大休小珏禅师领千七百衆为首座独指师为法器曰汝当振吾宗已而侍真歇来四明至补陀山遇羣盗蠡起避地之马秦骇浪翻空举舟惊惧师坐篷外独不沾湿真歇益异之会京城三藏道法师讲菩萨戒师受戒已背若负万金然道曰汝真得上乘戒之证也徐即身轻真歇住雪峯服勤三载虽日亲示诲终未超彻复回四明遯于象山县之郑行山乃海岸孤絶之处相传山有怪妖不可入入亦多以惊异逃归师曰吾为法忘形何惧耶乃即山中盘石缚茅为庵地高无泉脉师祷曰吾办道来此山神其惠吾泉因锄小坎移时而水溢食不继则啖松枝以疗饥时绍兴二年也一日有巨蟒入庵矫首怒视越数日复旋绕于牀师不顾而去夜闻庵後岩谷震响如霆击旦起视之有巨石飞坠越庵而立于门并庵大木皆为之摧拉变怪百出略可记者如此师不为动终不能害也明年正月十四夜于深定中豁然开悟师自念云威音王以前无师自证威音王以後无师自证者皆天魔外道遂下山见延壽然曰日来肚大无物可餐庵小无牀可卧若能与食展庵则住不然则去然与师反覆问答不能屈因叩师见地师云一坐四旬身心莹彻忽尔古镜现前非由天降不从地出自是本有垢净光通不劳心力自照也昔真歇尝于室中举门一物上挂天下挂地常在动用中动用中收不得是什麼物得恁麼而今照破方知天盖不及地载不起唤作古镜亦是谤他遂有颂云个镜光流遍刹尘监照无碍体难分羣灵巨德皆称妙凡圣无非里许身然云不易到者田地师至陈山欲航海或指曰此郑行山中肉身菩萨也人皆环遶求偈时天大风不可渡师谓篙人曰吾为汝借风泊登舟俄顷而济抵岸则逆风如故径至岳林见大休云久违尊顏即不无如何是同风不门底人珏云井底虾蟆吞却月师云宾主不立报化平吞珏云向宾主不立处道师云不辞道恐涉唇吻珏云只今将什麼抵对师云不借珏云佛祖不奈尔何师礼拜遂令受具闻翠山宗白头机锋峻峭往叩焉时师方为岳林行勾担二布囊随得即受备历艰勤人所不堪宗云为衆竭力不无其劳师云须知有不劳者宗云尊贵位中收不得时何如师云触处相逢不相识宗云犹是途中宾主作麼生是主中主师云丙丁吹灭火宗以手掩师口师拂袖出宗迁雪窦挽师偕行荷负衆事会法堂新饰且命师为衆普说宗叹曰吾生有耳未尝闻也丛林愈加敬焉宗乃宏智高弟师因造宏智室动辄深契二十四年遂举住栖真隆兴二年移定水侍郎赵公子瀟闻师名属侍御王公伯庠制疏备开堂礼嗣法大休寔曹洞十一世孙也乾道五年退席遂之天台八年嗣秀王来镇请住广慧淳熙四年皇子魏惠宪王请住香山七年参政范公移主报恩十年遂归西山为终焉计十一年雪窦虚席衆皆以师为请师念明觉知觉道场勉为起废一住八载所在道俗归仰至是尤盛随力葺理内外一新绍熙二年谢事止于寺之东庵太守林公枅稔闻道价命师再住不从必欲识面既见问道终日致请益坚力辞而归三年七月乙未示疾己亥亲笔遗书晦日以道具抄録八月哉生魄夜分戒其徒曰吾行矣送终其务简约勿用素服哀恻言讫书偈趺坐而化时暴雨疾风震动山谷人尤嗟异四远闻者奔赴尽哀于是相与建塔于山之左戊午奉全身以葬壽八十八腊五十三嗣法及受度三十余人师素与余厚在雪窦作锦镜以蓄飞雪上流为一山奇观尝为之记师且死手书遗余告别以大休塔铭为属余既铭之师之徒又以此请不忍拒也余不习释氏学然闻古德相与传授之际多藉导师有以啓发之惟师根器过絶人自誓不悟不为僧则识趣已不凡操心如铁石视身犹土芥又有人所不能及者初虽久依真歇郑行之居略无怖畏非有师传而遂得道

禪門少見其比是時自覺般若靈真有飢則一與之食寒則一與之衣之驗夜行深雪自然得路若有陰相自以為大千世界無如我者一見大休誦言所歷休徐曰但盡凡心勿為異解師為之漼然意消而歸心焉師天資朴厚見地真實業履孤峻苦行堅密至死不少變等慈接物法施不吝具大辯才浩博無碍為人說法或自曉至暮或自昏達旦至連日亦無倦色音吐洪暢晚亦不衰聞者聳服學徒每出衣資請師演說此尤禪林所未有也云深火冷尸居淵默有召之者雖祁寒隆暑不拒一毫施利悉為公用丈室蕭然故六主廢刹積逋動數千緡不過期月百廢具舉若禱雨陽揅疾苦其應如响神祠烹宰物命輒為易以素饌有藏其須發而得舍利者此皆世俗所創見師不欲人言之以為非此道之极致使其有之亦皆師之余也師既亡太師史文惠公祭之以文有曰了悟圓通如觀音大士隨機化俗如善導和尚人不以為過也師生于淮南而化緣獨在四明屢易法席名震江湖而終不越境自号足庵人以古佛稱之惟師可以無媿云銘曰

祖師西來乃始有禪燈相續皆有師傳師之得道几于神曜心境孤圓大千俱照曹洞正宗實艱其承十有二傳至師中興蛇虺之宅聞者怖恐惟師宴坐曾不為動振錫出山据大道場四眾歸仰广为津梁生于淮壩緣在甬東名震江湖卒老吾邦法施不吝辯才無碍行實堅苦而大自在人稱古佛師則無媿銘以表之用詔末世

瑞岩谷庵禪師塔銘

淳熙五年秋有旨以明州智門僧景蒙住台州瑞岩寺先是参政錢公請為坟院公既薨其孫今江東轉運判官象祖以大父治命辭于朝仍請敕差住持太傅史魏公再當國謂蒙可瑞岩台甲刹師一旦自海山膺敕命孤云野鶴雖无心于去來然空門之盛舉也魏公分教永嘉時與心聞賁禪師為方外交罷相里居夢如平生傍有僧曰景蒙貌古神清談笑久之覺而叩天童朴曰僧名頗異有斯人否朴曰是方為堂中第一座招之恍如夢所見與論出世法了辯如响問其師則心聞也大異之遂為延譽而得智門一住七年寺以寢興嘗葺古殿得瓦于脊有字粲然蓋建隆改元之秋語六言中有師名若言超進之意抑又異矣在瑞岩前後十夏道俗傾向寺居兩山間樓觀層出有溪自東北橫貫寺中一夕暴漲冲決堤防棟宇漂蕩强半為瓦砾之場人以為不复可興矣師曰吾當任此既而財力交施从容規畫曾不踰時輪奐一新壯麗反過其旧師才智超迈不以毫末自見因事而显无不叹服韜養之深从可知矣師姓邵溫之平陽人族姓甚眾多以儒自業母感异夢而娠英特开爽幼聞鐘梵則喜年十三从惠安淨覺大師惟梵着僧伽梨明习天台教觀自以名相之學不足了大事去游國清又参育王山佛智裕公裕問以宗門節目師不知所对嘗入室誤問乡里師曰永嘉人还识永嘉大師麼未及答批颊而出至于再兀然如痴寢食不安者累月行道次忽聞钟声而悟即造室中又問永嘉大師即今在什麼处師曰即日伏惟和尚尊体起居万福裕随問向上事如何師拟酬应又复逐去次日再入裕方发問師抗声曰老汉今日敗阙也一拍而出裕曰隼哉念母而归龙翔心聞一见深器之問曰言无展事語不投机承言者喪滯句者迷試向言詮不及处通个消息師以在手画一圓相聞以拂子击左師即画以右手击右師又画于中以两手托呈聞以拂子当中画兩画師禮拜而立聞大笑云三十年拣辨苗裔今日得此乌喙耶由是依止室中通彻无滯遂令执侍左右既归鹿园如在庵賢雪庵瑾唼庵監全庵存筠谷达还庵淳会下皆一时之

名流惟师妙龄杰出闻以谷名师庵且为之铭蒙侍者之名曰高矣又尝谒临安显宁志公志闻风壁立学者望崖而退独谓师曰先世遗风余烈若未坠者尚在汝躬吾且拭目观之名山法席聚衆千数师分座提唱诸方咸畏而仰之师孤高絶俗若不胜衣而严冷峻峭不可挹酌既坐道场槌拂所加龙象蹴踏长灵之道光焉十四年十月十有七日为施主说法似感微疾既归趺坐良久泊然而逝山林震动鸟兽鸣悲缙白奔凑如哀所亲越七日闍维舍利遗骨瘞于居禅师塔之右寔晦日也壽六十四腊五十一度小师四十嗣法者十余人钥齎倅丹丘草疏请师赴郡假道别未几时而师以讞闻亟遣茗奠其徒以魏公真翰来俾铭其塔且曰吾师生得公赞死又辱祭以文愿终惠之钥不敏敢不承相君之命铭曰

輓峯高高压千岭宝坊楼阁非人境大浸稽天夜溟滓世界变灭弹指顷金碧扫地谁复整谷庵若子一笑领发挥金粟旧光景手高妙絶风斤郢棱棱鹤骨双眸炯古庙香炉无波井栗棘横施发深省一超透出毗卢顶真隐神交锥脱颖声驾诸方增九鼎我游丹丘与三请再别几何俄奠茗石上主人呼不醒迷途多岐孰知警勿谓空言如缚影影与俱传久逾炳

延庆月堂讲师塔铭

吾乡延庆教院为东南诸郡之冠祖师建立不置佛殿所以待後人者不浅累代多得人如所期焉余不及见绍兴以前事矣余岁时见乡人尊重圆辨讲师道琛永嘉人初至说法是时宏智禅师诸大老拱手相顾曰此非闍黎也道价最高大兴此山继以觉去予尝铭其塔月堂惠询之住持在乾道五年之後然得圆辨之正传者也惠询字谋道月堂其自号也姓陈氏父安寔家昌国县蓬莱乡之响山母马氏梦僧倚门乞食而娠生有奇相甫八岁父母携入宝印院谒了印大师善隆摩其顶曰能出家否欣然愿留不肯去父母见其幼静不类凡儿每窃奇之不夺其志始授莲经两月而成诵无不骇叹十四为僧即造延庆依澄照子先法师学日勤讲业夜则坐禅迴与衆异或以飫食物玩游戏等试之一切谢絶独行独坐惟以参寻祖意为急衆目之曰询独立章庵道因法师高视衆作时居第一座骤加称赏亲炙数岁尽得其说欲徧见诸山问所先因曰天台能仁法照老人当今大善知识也且送之以序有曰吾子气貌温恭烈暑铄金而法服袜履望之俨然夜坐而不卧不与羣辈相狎戏又曰两山宿学皆吾故人盍行矣法照尤喜朝夕与处衆嫉之且曰吾曹久侍老师反不若新进耶夜堂讲习一呼而随者数人俱至师前遽曰教门多途丛杂非一欲从公以决之师正容徐曰吾学佛祖之大道壽量观法十境十乘三千三谛皆是也得之则见性成佛失之则殃坠无间有疑则问来若名相之学方困算沙非吾所知也一衆愕然不敢措辞而退或曰此学海义龙也安得以衆人待之独步于两山者三载圆辨方住延庆师曰百闻不如一见密入衆底窃听开演已自欣快偶闻提唱曰吾祖之道荆谿之後传者虽多不无小疵惟法智天资超悟不假传而自知用一性恶之旨大阐圆顿之谈论即论具岂待烦恼之转除约佛约心宁外婆娑之别旨一理贯通诸法悉舍师于言下洞然明白感发既深涕泪俱下遂造丈室自列辨曰子再来人也特吾之点示耳既日挈包在弟子列自尔左右逢源锋不可触入堂司有监寺以事忤衆衆欲卷堂负担于门矣师急止之吾当任责乃领衆白辨曰维那之言然即书片纸付堂司起监寺不共住衆遂帖然微师片言岂不殆哉辨亡为广严第一座偶择主僧郡以十名眞瓶中一索而得师或以年少为言师曰吾何求哉力辞之出世住海濒华云以省母之便欣然就之沙岸持鉢忽遇羣盜

刮尽所有将解师衣正色叱曰汝何为者我法戒贪嗔痴贪求何益于汝生有王法死有地狱眼光落地受极苦时悔将何及贫富有命强取之物岂为终身之乐幸自无事而作此业实可寒心盗曰我将杀汝师曰吾以寂灭为乐汝若杀我早归寂灭受大快乐有何不可盗相顾曰是善知识也安可害之尽还其物罗拜而退慈力摄持又能如此移住奉川之禅院又迁净居前田後江师曰此处可与鬼神说法夜必炷香暗坐讲法华经信宿间有飞萤一二遶于前後寻有百十乃至千万明于燃烛讲罢辄去尝夜出萤往来江上不入讲室夜分既归萤忽来迎如繁星然师见而笑曰是待吾讲耶自尔每见之师不以语人然自以为差适人意也移住普和问于草庵草庵曰僻在一隅大江横前峭壁对耸佛影岩也前辈聚徒之地吾子其当之学子云集钟鼓一新朝参暮请昼诵夜禅礼讲以时策筵有节乾道五年延庆虚席公定场中一举师名衆口翕然师气貌魁梧仪矩凝重未尝以词色假人精持律范动不踰矩法席谨严数百衆无敢犯者说法必穷蕴奥学者有不能解昏後坐起信堂一香一灯远在檐下僧徒毕集师乃挥尘纵辩夜静堂深言详理到境法俱胜随资发越直疑祖师之复生忘其久立之疲也至今旧人过其处遐想高风多至陨涕制帅秀王每日延庆人中凤也寺之西有蔬圃官欲以为贡院势甚急师怡然不顾方杜门终日禅定才信宿府主见招迎谓师曰贡院之扰得无动心乎今已得基址可以放怀矣师谢外护之庇盖有神现梦以为言也丞相魏文节公好内典法华中有是法住法位世间相常住稽疑以叩自得石窗终未有所契举以问师师曰此非大力量人不能致此问乃曰春生夏长秋凋冬落世间之相乎曰然非以其迁变而致疑乎曰然师曰四时迁变岁岁同耶异耶曰无以异也师曰非止今年明年无以异穷过去极未来亦无所异既无所异岂非世间之相常住哉以至君臣父子生息大小不动本位皆得究竟以至天地日月明暗色空海阔山高鹤长鳬短皆出自然莫不名体不转贞常圆极故曰是法住法位世间相常住了此法者不落阶梯随所见闻立地成佛文节有省叹曰经纶之妙还他教家魏惠宪王临镇来游独坐一榻俾师坐而问所传何道师曰天台教王曰恐不及禅家之直指师又曰禅教皆如在方便若就实知实见言之何为禅何为教妙悟之人一切扫除丝毫不挂然後龙菩提妙华徧庄严随所住处常安乐王大悦屡以金缁为斋施?尽出衣盂建雨华堂等又募缘一新两庑至于卧不解衣讲必更净非入浴走厠袈裟未始去体非赴斋啜粥莲经不曾离念?库诸司不一回顾工匠报作略不举目大纲整肃不事苛细然犯必不恕欺必照破中外井井无毫发之遗史文惠王曰能使教门增重今惟月堂一人而已师之传道直欲追配古人非徒塞责每曰以语之相似而证其言以资之善记而驾其说皆非所以说法也惟自悟心宗而宣演之庶得祖师之传吾求悟门切勿目画凡说教义不出私科惟着立宗解一卷以救时弊淳熙六年十月二十五日召门人曰吾觉背痛殆将不久矣越二日辛丑集衆讽十六观经经终而逝十一月庚申奉全身葬于崇法祖塔之侧师壽六十一法腊四十五聚发一器舍相无所葬于蓬萊先茔遵遗言也分舍利之半同法智顶骨塔于太悲阁郎中省庵陆公沅赞之甚详所度小师嗣法者六十人今柏庭善月其上足也余皆散处诸方灵龕即路之日緇素男女秉炉持花填郭溢郭几于罢市观者赞叹以为前此未有此岂人力也哉後二十有五年其徒请铭其塔余非学佛者尤昧于教乘以其请之勤而察其实行实谛为可敬为之铭曰

智者禅师祖天台教乃知禅教本无二道禅贵直指教若支离存乎其人统而一之圆辨之兴教门鼎盛奥惟询公传得其正如渊之淳如玉之洁入自悟门纵横演说辩才无碍脱落窠臼如老斲轮得心忘手月虽已堕孤老故躔柏庭之徒尚永其传

育王山妙智禅师塔铭【代魏丞相】

皇帝即位之十五年有诏明州阿育王山广利禅寺释迦文佛舍利宝塔诣行在所住持僧从廓侍行既至命入禁中观堂安奉上御素膳焚香瞻礼亲覩殊胜遂召廓对碧琳堂问舍利从何发见奏曰自陛下圣心发见上大悦亲洒宸翰大书妙胜之殿赐廓以妙智禅师号仍度僧五员颁钱万缗眷赉优渥前所未见由是宝塔之灵益显而廓之名愈彰矣廓姓林氏福之长溪人家世业儒踵登贤科生而颖悟不妄言笑羣儿强以聚嬉泊焉如不闻有以出世法语之则忻然解悟年十五依邑之建善寺祝发受具戒时闽中名利多有道之士悉往从之佛心才分室中举四大各离今身妄身当在何处有所感发述投机颂佛心首肯之而不自以为足也去之见懒庵需公为侍者复依大圆璞璞大慧果公之高弟门庭甚高始叩之若自失久之豁然有得服勤数载璞抚之以为类已然以未识大慧为恨不憚重趼见于衡之回鴈峯下大慧深加器重留三年告归送之以偈又以书属璞曰廓乃佳衲子可为成就使异日为吾家种子自此丛林争下之绍兴丙子大慧被旨来育王复来依焉大慧移径山璞以继之衆踰千数以为第一座制帅丞相沈公以庐山请出世大慧方名冠天下无不愿出其门以借重开堂日乃以瓣香嗣大圆诸方以此益高之已而育王虚席尚书韩公欲邀大慧而举以自代遂主此山禅衲云集以祖孙三人世继坐道场筑堂于丈室之东名以三秀遂为空门美谈才具素高以其暇日兴土木之工皆极其壮丽增庾入数千斛施者委金帛创为长生局五所百需皆备月施金钱飭僧以万计又造金塔以奉舍利此特其余事尔日本国王阅师偈语自言有所发明至迦国以从释氏岁修弟子礼辞币甚恭且以良材建舍利殿器用精妙庄严无比丞相史公帅七闽以鼓山趣其归荈阳郡王力挽无行魏王出镇一见其风仪目为僧中龙又闻其机辩峻发肃然加敬师晚以衣囊立庵于乌石山名以笑月为终焉计有偈云三峯敛却闲云海冷涵秋月庚子季春拂衣归庵杜门不与世接俄示微疾八月四日呼左右付以後事澡浴趺坐书偈曰掣断黄金锁凿碎玉楼钟腾身大虚外半夜日轮红掷笔而逝壽六十二腊四十七月五日葬于庵之寢室惟临济杨岐之宗至大慧而益震又得如师者为嫡孙上承圣天子之休宠下为帝子公相之所尊礼近焉道俗之归向远焉外夷之师仰可谓盛矣筹室所度未易悉数有宜意者得法最的住平江开元方有声于时而遽即世禅家惜之徒弟至百余人家法严甚尝以师语録萃为巨编师呵之曰汝辈随语生解去道益远矣固不许师既没乃始得百之一二刊之余投老山林与世相忘师谓可以语道往来无虚月警所未至相期岁寒一旦弃我而先怆念不已其徒求铭于余为之铭曰

杨岐千古栗棘蓬诸方谁敢婴其锋佛曰老子云梦胸呵佛骂祖一洗空子孙三秀玉几峯妙智杰出传家风碧琳一语开渊衷帝子谓是僧中龙三韩万里沧海东酋杰稽首礼益恭一声击碎玉楼钟日轮夜半通天红亭亭宝塔上凌空乌石与之俱无穷

延庆觉云讲师塔铭

浮屠氏法盛于东南而明为最兰若相望名德辈起予固不能尽知其人然采之公言其间虽一代宗仰者往往未免评议至问觉云师则同然无异辞余尤不能知也尝造焉修千古貌丹唇碧眼长松野鹤无一点世间气与之语愈叩而愈无穷名下士信不虚矣师既以隆兴癸未

岁十二月十有八日化叔祖居士语钥曰士之难其全久矣赵魏老犹不可为滕薛大夫矧释氏事寂灭而不免于应世二者冰炭谁能一之能使学佛者宗其教交游者服其人周旋酬酢无一可议殆鲜有觉云如者我与之方外交既已叙其行事汝铭之遂谨书而系以铭师讳志连字文秀觉云其赐号也俗杜氏世家于明州鄞县之宠山孕有祥生又不凡故母山氏笃志竺乾法令从礼寂公慧云为师肄业崇寿年十八受具戒明智目为僧中凤雏圆照授以天台教义後从智涌顿悟圆宗年登三十适延庆为第一座始开讲席辩才先放落落风生四衆耸服靖康以来更主五刹惟妙音不及煖席而迁余皆碎于兵火师一居之卒化瓦砾为宝所圆辩重建延庆于煨烬之余功未竟而死遗基废墟尚多有之虚席旷岁实难其人天童宏智禅师以师为首衆议是之遂徙居焉经营十年无有不备施利山积一毫不自奉悉以资建立事云栋雪脊杰然城隅望之如崑阆间物非大勤劳不易至此而师未尝足也或赞其新伽蓝者四当不媿智者师曰此有为功德耳岂敢以此比迹前哲深恐不能洪宣祖道为法门罪人故虽所至兴建而讲学不少休承学之徒翕然向风诚于祈祷感应响捷或欲记之必痛以妄语为戒秘监姜公守四明为师作真赞门人固请立石师终不以为荣其不求名闻类如此一时名士多乐与游望之则毅不可犯即之则和易温恭久益敬之终不得而亲疎也有达官与之剧谈贯穿禅律纚纚不倦惊曰师禅教并通师曰冰泮雪消固一水耳又问华严般若似过于繁师曰支离所以为简易也于是肃然尤敬异之丞相沈公来镇以僧职处师师以老疾固辞丞相遗手札曰师当表正一方纪纲诸刹毋退避以自洁且迫于诸方劝请始受命谦退谨愿不见有异然主盟衆事惟是之从或有私请虽大势力富檀那不能回也时度牒再颁受戒者僧吏邀取无艺师为立成规省十之九沙弥至于今德之有不远数百里求附坛者所革宿弊徐而不暴□□□□呜呼此皆人所难及者然师之所存心大而不密体卑而道尊恭而不伪博而不杂寂用之涯不可得也感疾既革衆以药进师曰十方无碍入一道出生死书偈毕抚掌大哂又以指弹屏风或问之曰我自幸至此不觉喜乐钟鸣当往矣已而信然师之所存果易识耶享年七十有六僧腊五十有八度弟子行丕等十有二人登门者甚衆传道者三十余人即以十二月二十有八日葬于城南祖塔之侧铭曰

舟不涂车不川离乎器用必偏惟寂灭释所先惟应酬世所?工与拙必一焉伟觉云几于全峻而通周而专得其得悟独圆出绪余应世缘识不识无间言教不吝道以传建塔庙崇人天定生慧无碍禅融一理逢其原金而玉岳而渊尊尊师岂偶然道既成如蛻蝉嗟後人视铭镌

攻媿集卷一百十

<集部,别集类,南宋建炎至德佑,攻媿集>

卷一百十一

钦定四库全书

攻媿集卷一百十一

宋 楼钥 撰

北行日録上【时待次温州教授随侍兗公守括苍受仲舅汪尚书大猷之辟】

乾道五年己丑十月九日辛卯邸报仲舅侍郎充贺正使曾总管【覲】副之

十日壬辰蔡兴以仲舅书来辟充书状官二亲许一行是日游南园微雨

十一日癸巳雨俶装

十二日甲午陰

十三日乙未雨

十四日丙申雨李器之以凤栖梧饯行

十五日丁酉雨周仁甫约同登途

十六日戊戌晴仁甫酌别于少微阁醉中唱和

十七日己亥晴

十八日庚子晴饭後别二亲径出城张子质一见于驿亭仲兄器之元声弟□相送至壽寧寺仁甫继至饮罢东行宿岩泉夏家店去城十五里

十九日辛丑晴行二十里饭午顿驿行二十五里宿荆山上方

二十日壬寅晴早登小楼眺望行十里饭蒋家店过缙云县少候仁甫即行道经放生潭山水秀发策杖纵观闻有赵侯庙乡人敬之石有如杖如履如甕如舟者皆以侯名双头岩白岩乌岩皆奇伟白岩峭立临溪松竹秀润乌岩下有石室端植如门渡溪入仙都玉虚宫路回顾南岸石笋森列有亭翼然仆夫曰此初阳谷也中有石鼓扣之有声以既济不复往路转山回已见独峯大松夹立清溪映带眇视林间有巨石屹据如雪且行且观遇道童问石之名云有洞名忘归既惩初阳之失遂回登焉洞中可容数十人四旁嵌空如出镌斲旁有小洞又一石横

陈如台松风清微俯和湍瀨是真使人忘归也下行里许益近独峯峯之上相传有鼎湖尝有巨莲叶因风而下石壁隐隐有车辙世言黄帝由此飞昇塘曰黄履言遗履之地地曰静乐言钧天至此而不闻峯後大山如屏奇石嵒峯始望之高列峯外自谓倘登其上必可俯瞰鼎湖下有锐石仅如一笋及即之後山靡迤而退听石笋亦不可跂及而此峯独上摩穹汉巍然削立无阶而升人有扪萝登後山之巔者犹觉未及强半是知此峯真衆山之宗非凡目所可窥测也後山有石空洞跻攀而上一窔通明昔刘先生于窔之外横木为床以居至今遗簣犹在号隐真洞高不可登恨望久之循峯而北又有仙水洞一名镜岩悬崖数十尺级石以上石罅有水仅如屋漏终古不竭下凿小泓贮之名公遗墨鑱满四壁迂叟介夫赵清猷公皆在焉携酒对酌清坐移时亦记岁月而还再至峯下大书姓字小憩宫前两亭顾瞻伟观兀不得去洞心骇目生所未见入据上方相与痛饮赋诗醉墨淋漓挥扫满壁秉烛朗诵傍若无人诗榜栢比盖自香山居士而下不知其几阅十之三四不能尽读也宫前有门书祈仙总真洞天是日行四十五里

二十一日癸卯晴早复笔诗于版各置醉墨高处谒黄帝祠宇李阳冰篆额今留县庠闻有上宫名妙庭相去三里而近他无胜槩有洞名金龙一窔通独峯下仅容小儿出入而其中甚寛宣和间尝以金龙镇之为睦寇盗去脚力既倦不得穷历出门相羊峯下絶溪而西数里间山川犹竞秀未已有徐氏小亭横跨练溪小憩而行三十里饭黄碧村醪醇醖不殊家酿二十八里宿和尚店去李溪犹二里会倅厅一兵杨靖自绍兴回因发家书第一封録所题仙都二诗寄仲兄

二十二日甲辰夜微霰早陰晴行二十七里饭诸应行三十余里至龙窟行五里宿尚书塘

二十三日乙巳晴行二十里饭杨溪仁甫由新塘路往四明分袂于此田间行久之犹能相望将入山举手一揖而别四十里宿横塘暮岭间张家店途中惟售溪坊酒颇佳然比之黄碧味不及而价又三倍深夜微雨即霁

二十四日丙午晴行十余里入东阳县先见同年姚尉【瀛】次见王宰【楫】为诸卒批旁小憩一店尉已先至再三留一饭力辞之行十里饭爱头孙家渡溪行五十里宿余店盖过苏谿八里矣夜微雨

二十五日丁未微雨作而复止行二十二里饭罗岭下篆坑何店行三十五里宿义井夏店过牌头十里二十六日戊申晴风过平历遇客将李濬等回发家书第二封行三十里饭高拥杨家行三十五里宿灰竈头於店

二十七日己酉晴行三十里饭溪口傅店行三十里宿渔浦镇上朱店东阳士人周忠厚同邸清话久之夜分小雨作

二十八日庚戌微雨辰巳间晴早作饭了同周君行数里三憩方到渡头装载既毕潮落舟胶监渡厉君以小舟般剥已又加一舟荡兀波间久之大舟既前复挈行李装载劳扰良甚又舡

棹食顷挽繹徐行近庙山始用橹潮上方急篙橹努力欲进为山石所激进寸退尺舟人失色少纵复上久方得过又挽行十余里雨霁风静一波不兴至六和塔下登岸已薄暮矣驱驰至嘉会门闭关已久宿俞家店是日又有松阳一士人姓叶同渡二十九日辛亥晴早起入城馆于仲舅家饭罢侍叔舅同去伪谒副使曾总管因登三茅山上步司教场观仲舅习射夜发家书第三封

三十日壬子晴同去伪见刘察院待范郎中【成大】久之竟不见客次遇蔡架阁【霖】去岁书状官也又遇留丞【正】臣饭季舅家发承局缪钦归以第三书行

十一月一日癸丑晴讲礼何季膺叶先生【宪平】闾丘监丞尤监簿【袤】访及仲舅赴副使会

二日甲寅晴同去伪习仪都亭驿部中见梁监门【叔玠】范丈吕郎中【正己】赴景孟舅晚饭

三日乙卯晴习仪驿中已不及习于参政府梁郎中访及

四日丙辰天明微雨即霁使副以下习仪驿中阅礼物授衣衫翟楫及承局翁叶行两发家书仲舅招副使饭五日丁巳晴习仪政府候黄御药甚久周邵州【伯骏】王智叟沈尉【德润】叶主管【翥】访及

六日戊午晴驿中大习仪使副以下备衣冠贾国信【竑】六知合【张说张抡宋钧宋直温康譔王拊】偕来归写奏藁

七日己未雨侍叔舅偕去伪赴何季膺陈叔强早饭于丰乐楼

八月庚申阴发行李上船

九日辛酉雨下递担笼

十日壬戌晴饭了登舟高伯定刘君任送出门张伯纯刘邦逵送过赤岸景孟舅姜子用沈泽远王智叟约送长河

十一日癸亥晴饭时过长河九十里遣第六书发周德归午过崇德苏彭年来迳水缩舟胶牵挽寸进更初遇士穎弟于官窑

十二日甲子晴饭时过永乐行二十七里至秀州仲舅入城回谒闸头登舟风作李同年【唐卿】相见

十三日乙丑晴四更行六十里过平望姚漕相访仲舅破睡见之行四十五里过吴江又行四十五里至平江仲舅入城回谒船由城外至阊门叔舅别去一夕行九十里

十四日丙寅晴早到无锡携刺谒孙饶州父子中途闻其入城遂谒喻郎中【樗】以谢去春先辱魏子师子智访及行九十里深夜去毘陵数里泊

十五日丁卯晴生朝作汤饼遣人访李表兄长卿已同王直甫候于门苏彭年亦来皆延入船相见王江陰【正已】惠茶并公醢苏李别于荆溪馆直甫同行十里待书而别徐协恭过船碁战三十六里过奔牛又十八里过吕城月明水深挽舟甚驶夜行五十四里过丹阳县约五更矣

十六日戊辰晴行二十七里小泊新丰又二十七里过丹徒镇行三十六里午後到镇江以水涩良久方抵丹阳馆沈抑强【中立】既迓于门又携具馆下协恭同集使人通问于王侍御

十七日己巳晴上馆盥栉仲舅欲同谒王侍御而侍御已在门侍季舅同沈抑强去伪别侍御闻泊舟金山因约同游穷览胜处主僧【宝印】首座【心监】皆嘉州人侍御方赴夔州不谓得见于此以小诗道别又辱和篇入船别其家遂归仲舅招副使早饭抑强复携具来严墨卿同集二鼓方散

十八日庚午晴四更起天微明即从使副到江干先登舟以待沈严二君相送晴和无风俄顷至瓜洲登岸未几风作胡抚干【仲文】俞尉【茂】先陆泰兴【况】相迓俟行李上坐船即行薄暮至扬州城中水涩更余方出城发第七书递达亲庭

十九日辛未晴三鼓报送伴锺尚书【世明】等回仲舅起相见前处州汤路分【逢时】为锺引接送狼头帽五指子各一副拂手香四贴为发亲庭第八书又以小舟来过仲舅方与胡漕【昉】对语因与汤略见于舟外少选锺尚书徐知合【本中】船到仲舅见之约四更方得行辰时到召伯埭去扬州才四十五里以夜来留滞故尔张帆而行三十里过露筋三十里到高邮仲舅入城回谒两岸然草如昼三十里夜过塘头

二十日壬申晴三十里过界首二十五里过范水三十五里至宝应夜风雨行三十里过黄蒲二十里过平柯桥

二十一日癸酉晴辰时到楚州仲舅入城回谒登熙台应山阳【藏密】晏判官【喆】一揖于舟次三十里过磨盘三十里夜过淮陰三十里过闻家峯

二十二日甲戌晴三十里到洪泽前去欧家渡极浅欲为般剥计使副借潮于渎头神东北风作欲候酉潮而申初已应开闸张帆三十里过渎头使副上庙挂幡又过数里舟胶而止

二十三日乙亥晴未明东北风大作潮亦先期而应谈笑过欧家渡去渎头十五里一行人欢

呼而行且感神颺之如响也行十五里至龟山以风大不可出淮摆泊山下见监镇王【九思】曾同舍

二十四日丙子晴早出淮三十里至盱眙泊燕馆下龚守【□】携具宴使副约季舅去伪分冬发家书第九封附递

二十五日丁丑晴冬至早起乘马陪使副天庆观朝拜归馆望拜两宫各展贺偕季舅去伪游第一山玻璃泉冰不可酌遍观磨崖石刻见周司法【深】谯提辖【熙载】王干办【茂】龚守就馆请使副早食军衙晚食

二十六日戊寅陰晴使副以下具衣冠习仪馆中依例就皇华馆犒三节人

二十七日己卯晴盱眙客将李宝渡淮探问接伴使副已到泗州使副赴龚守晚会偕季舅去伪赴王干办之招

二十八日庚辰晴掌仪引接等渡淮传衙少顷同北引接礼信司高琚等传到接伴使副名衔正使昭武大将军行尚书吏部郎中上轻车都尉彭城郡开国伯食邑七百户唐括安德副使朝奉大夫侍御史骑都尉广陵县开国男食邑三百户赐紫金鱼袋高德裕使副坐燕馆须其至犒以三杯而去移舟淮亭使副燕亭上偕季舅去伪赴谯提辖会发第九书遣吕葵张吉归

二十九日辛巳天明雪作使副以下巳时渡淮至泗州草馆望拜如仪各就幕次三节人互参使副使副互展起居状茶酒三行上马入城天色开霁和气翕然至馆分位是日与季舅别

十二月一日壬午晴车行六十里临淮县早顿县境有徐城本徐国嬴姓有徐君墓季札挂剑之所又八十里宿青阳镇驿临淮尉夺客牛以驾车为客所诉鞭条子八十金法士夫无免捶撻者太守至撻同知又闻宰相亦不免惟以紫褥藉地少异庶僚耳

二日癸未晴风车行八十里虹县早顿城门不容车乘马入驿市井多在城外驿之西有古寺大屋二层瓦以琉璃柱以石闻其上多米元章诸公遗刻三年前于寺中待使客饭後乘马行八十里宿灵壁行数里汴水断流人家独处者皆烧拆去闻北人新法路傍居民尽令移就邻保恐藏奸盗违者焚其居有一鹿起草间截马前西去两岸皆奇石近灵壁东岸尤多皆宣政花石纲所遗也虞姬墓在西岸荒草中横安二石板相去尺余隆兴间我得泗虹以此墓为界县外山上有丛祠汉高帝庙也淮北荒凉特甚灵壁两岸人家皆瓦屋亦有小城始成县道有粉壁云准南京都转运帖理会买扑坊场递铺皆筑小坞四角插阜旗遇贺正人使先排两马南去金法金牌走八骑银牌三木牌二皆铺马也木牌最急日行七百里军期则用之

三日甲申晴车行六十里静安镇早顿又六十里宿宿州自离泗州循汴而行至此河益堙塞几与岸平车马皆由其中亦有作屋其上州城新筑雉堞甚整闻是五月下旬上畔指挥重修限四旬毕工费一出于民城中人物颇繁庶麪每斤二百一十粟谷每斗百二十粟米倍之陌

以六十大寺数所皆承平时物酒楼二所甚伟其一跨街榜曰清平护以苇蓆市肆列观无禁老者或以手加额而拜有倒卧脚引书铺般贩官局汤药蔡五经家饼子风药去州二里许二郎庙前下有马亭即李显忠斩李福李保之地驿舍邻郡治显忠驻军于此破城之初每兵止犒以三饔士卒愤惋及逃归创残之士不能自力悉碎于敌手为数坑埋之中庭有井自投者尤多负郭县曰符离项羽破汉军于灵壁东睢水为之不流即此县界

四日乙酉陰晴风作车行四十五里蕲泽镇早顿又四十五里宿柳子镇晚小雪即止

五日丙戌霜寒颇力行人须发皆冰六十里永城县早顿驿中犹有灯县本芒敬丘二县地有芒山与碭山相接汉高帝隐于此汉更敬丘为太丘陈寔尝为长故城在今县西北又七十里宿会亭镇

六日丁亥霜晴车行四十五里沙山冈换驴三十五里谷熟县早顿县即商之南亳汤所都也县外有虹桥跨汴甚雄政和中造今两傍筑小土墙且敝损不可行絕河以入又二十二里至金果园果木甚多马行十八里入南京城市井益繁观者多闭户以窥夹道甲骑百余城外及驿前皆步兵大楼曰睢阳制作雄古倾圯已甚驿曰睢阳谷熟甲卒自言西人月请五百短钱闻本朝养兵之丰叹感不已南京城楼侧有亭名解慍承应人有自言姓赵者不欲穷问之云城中犹有徐太宰路枢密郑宣徽等大宅多为官中所占亦有子孙居者按此地即高辛氏子阍伯所居商丘也武王封微子启是为宋国後唐以为归德军节度本朝以王业所基景德四年升应天府祥符七年升南京金改曰归德府汉梁孝王所都兔园平台雁鵲池蓼堤皆在此春秋陨石五犹存

七日戊子晴车行六十里宁陵县早顿古葛伯国汤所征也魏信陵君无忌封于此又六十里宿拱州本襄邑县属开封崇宁四年建名辅州以为东辅又改拱州治襄邑本宋承匡襄陵乡也襄公所葬故曰襄陵金曰濉州

八日己丑晴车行六十里雍丘县早顿县故杞国武王封禹後东楼公故至今土人犹曰杞县祖逖镇此以御石勒圉城镇在东南本汉圉县属睢阳国王莽击翟义为京观于此汉外黄县故城在东又有葵丘齐桓公所会也承应人杜从自言邑手分邑有令簿尉酒税都监同监共五员二税输粟及米亦纳绢但薄而小此间只是旧时风范但改变衣装耳又行二十里过空桑伊尹所生之地也又里余过伊尹墓惟一大枯木在侧断碑卧其下曰汤相伊尹之墓又数里过三塚驾车人自言姓赵云向来不许人看南使近年方得纵观我乡里人善见南家有人被掳过来都为藏了有被军子搜得必致破家然所甘心也宿陈留县去雍丘六十里驿中有苍柏可爱县本郑邑为陈所并故名

九日庚寅晴车行四十五里道傍多陂塘路颇迂回古塚相望发掘无遗至东御园小亭少憩使副以下具衣冠上马入东京城改曰南京新宋门旧曰朝阳今日弘仁城楼雄伟楼櫓壕堑壮且整夹壕植柳如引绳然先入瓮城上设敌楼次一瓮城有楼三间次方入大城下列三门冠以大楼由南门以入内城相去尚远城外人物极稀疎有粉壁曰信陵坊盖无忌之遗迹城

里亦凋残街南有圣仓屋甚多望见婆台寺塔云城破之所街比望见景德开宝寺二塔并七宝阁寺上清储祥宫颓毁已甚金榜犹在皮场庙甚饰虽在深处有望柱在路侧各挂一牌左曰皮场仪门右曰灵应之观又有栾将军庙颓垣满目皆大家遗址入旧宋门旧曰丽景今曰宾曜亦列三门由北门入尤壮丽华好门外有庙曰灵护两门里之左右皆有阙亭门之南即汴河也故街南无巷街北即甜水巷过郑太宰宅西南角有小楼都人列观间有耆婆服饰甚异戴白之老多叹息掩泣或指副使曰此必宣和中官员也相国寺如故每月亦以三八日开寺两塔相对相轮上铜珠尖左暗右明横过大内前逆亮时大内以遗火殆尽新造一如旧制而基址并州桥稍移向东大约宣德楼下有五门两傍朵楼尤奇御廊不知几间二楼特起其中浮屋买卖者甚衆过西御廊数十步过交钞所入都亭驿五代上元驿基本朝以待辽使犹是故屋但西偏已废为瓦子矣

十日辛卯陰晴歇泊承应人有及见承平者多能言旧事後生者亦云见父母备说有言其父嘱之曰我已矣汝辈当见快活时岂知担阁三四十年犹未得见多是市中提瓶人言倡优尚有五百余亦有旦望接送礼数又言旧日衣冠之家陷于此者皆毁抹旧告为北兵驱役号闲粮官不复有俸仰其子弟就末作以自给有旧亲事官自言月得粟二斗钱二贯短陌日供重役不堪其劳语及旧事泫然不能已留守来谒接伴使副使副连一榻南向坐厅上留守设胡牀侍其左过盞劝酒翼而退接伴所得私覲物尽货于此物有定价责付行人尽取见钱分附衆车以北岁岁如此又金人浚民膏血以实巢穴府库多在上京诸处故河南之民贫甚钱亦益少涂中曾遇蒲婆数杠导之以旗殿以二骑或云其中皆交子也都管愠其主人贪墨以秽语诋之又有万福包待制之语承应人各与少香茶红果子或跪或喏跪者北礼喏者犹是中原礼数语音亦有微带燕音者尤使人伤叹

十一日壬辰晴赐宴既传衔使副率三节人具衣冠出接伴位前对揖而出就褥位与接伴天使对立三节人立使副後先引使副东北向开敕两拜天使乌库哩璋传口宣云卿等远持使节来会岁元适冒寒威宜加宴劳今遣具位璋赐卿等宴仍差南京留守耶律成押宴并赐教坊乐使副舞蹈五拜又开敕两拜再传口宣云卿等来朝岁旦远抗使旌爰增原隰之华宜有甘芳之锡今差璋赐卿等酒果使副搢笏跪左掣义手受赐五拜舞蹈如仪还立褥位对展次揖接伴退就幕次与璋茶酒三行再立褥位引接石旦侧跪捧表正使拜跪受表却以授璋仍送土物与之璋退即引押宴出与接伴拜舞谢恩押宴先升厅侧立使副拜舞讫与接伴对行升厅与押宴对展讫就座点汤端笏离位少立三节人东北向再拜呼噪升厅占位东向南上小立俟使副初盞罢三节方坐初盞燥子粉次肉油饼次腰子羹次茶食以大拌贮四十櫟比平日又加工巧别下松子糖粥糕糜里蒸蜡黄批羊饼子之类不能悉计次大茶饭先下大枣豉二大饼肉山又下?鱼鹹豉等五櫟继即数十品源源而来仍以供顿之物杂之两下饭与肚羹三下□子五下鱼不晓其意盖其俗盛礼也次饼餤三次小杂碗次羊头次燂肉次剗子次羊头假鼈次双下灌浆馒头次粟米水饭大簇釘凡十三行乐次箏笙方响三次升厅余皆作乐以送亦有杂剧逐次皆有束帛银碗为犒使副以下皆离立以待谢恩或云所赐初不及皆文具耳第十二行依例劝上中节酒罢三节先就班使副进第十三行茶罢与押宴接伴谢宴拜表庭下如仪再送璋土物与璋成互展辞状即与接伴对揖归位送押宴私覲往回自此每赐宴礼数准此食味乐次大同小异

十二日癸巳晴五更出驿穿御街循东御廊过宣德楼侧东角楼下潘楼街头东过左掖门出马行街头北过东华门出旧封丘门金改曰玄武新封丘门旧曰安远金改曰顺常河中有乱石万岁山所弃也北郊方坛在路西青城在路东面南中开三门左右开掖门西开一门以通坛皆荒墟也北门内外人烟比南门稍盛车行四十五里饭封丘又四十五里宿胙城县途中遇老父云女壻戍边十年不归苦于久役今又送衣装与之或云新制大定十年为始凡物力五十贯者招一军不及五十贯者率数户共之下至一二千者亦不免每一军费八十缗纳钱于官以供此费东京有千户二十一人各有三四百人共有八千兵耳有张千户者向来率其人战符离一败止存数十人至此除籍为民又言签军遇王师皆不甚尽力往往一战而散迫于严诛耳若一一与之尽力非南人所能敌符离之战东京无备先声已自摇动指日以望南兵之来何为遽去中原思汉之心虽甚切然河南之地极目荒芜荡然无可守之地得之亦难于坚凝也胙城之南有南湖去岁五月河决所损甚多河水今与南湖通冲断古路用柴木横叠其上积草土以行车马按东京春秋卫陈郑三国之境战国属魏东魏立梁州後周改汴州兴元为宣武军节度使後梁以州建国升为东京开封府後唐复为汴州晋汉周本朝因梁旧汴河古荥荡渠首受黄河水隋炀帝开浚兼引汴水开封县有浚沟即卫诗浚都也有沙海战国策顔率言大梁君臣欲得九鼎谋于沙海之上蓼堤自睢阳至此三百里吹台今日繁台本师旷作孝王增筑祥符县有夷门山夷门大梁城之东门侯嬴抱关于此蔡河古琵琶沟也寒泉阪诗所谓爰有寒泉在浚之下中牟县赵襄子时佛肸以叛有中牟台是为官渡城曹袁相持之所阳武县有博浪沙张良击始皇于此河决金堤亦此地长垣县卫之匡邑孔子畏于匡古之蒲邑子路为之宰鄆陵县克段之地也封丘县古封父国左传所谓周以封父之繁弱赐鲁县有黄池吴王夫差所会胙城属滑州故南燕国周公诸子所封左传富辰曰凡蒋邢茅胙祭周公之胤也

十三日甲午晴五更车行四十五里到黄河因河决打损口岸去年人使迂行数十里方得上渡今岁措置只就浅水冰上积柴草为路里余车马行其上策策有冰泮声遇深险处即有人跣立道傍指示使驱车疾行河心有沙潭甚阔盖河决时所淤积者一行人兵车马尽于此登舟渡舟底平无篷屋于船头品字用抄两傍又以大枋为桨并力喝号使副以下露坐其中分数舟以渡风静不寒上下冰合仅二寸许惟通舟处见水面数丈此李固渡本非通途浮桥相去尚数里马行三里许饭武城镇一名沙店车行四十五里宿滑州途中有土山夹道尘埃最甚咫尺不可辨俗号小灰洞盖前路有甚于此者路西有白龙潭傍有大碑盖亦是昔年河决所溺也滑即古豕韦氏之国春秋战国属卫负郭白马县本卫国曹邑狄灭卫立戴公以庐于曹袁绍遣顔良于白马关羽斩良以报曹公酈生所谓守白马之津皆此也有滑台本郑之廩延

十四日乙未晴五更车行二十五里至濬州城外乘马入城早顿东廊有大碑曰天成桥太师鲁国公蔡京奉圣旨书濬依山为州子城据山上故州在今郡城之北绍兴初河失故道荡为陂泽遗堞犹有存者旧河却为通途东有黎阳山因以名县闻上有大佛与馆相直桥之两岸也马行三十里过屯子河河出太行泝流而上可至燕山故金人又名清御河筑三桥以济行者望范公善化二山是日供黄河鳊鱼甚鲜而肥始作家饌道遇细车自北来先牌云蔡州都巡检使宅眷与接伴使有连各下车相见一姬一妇与正使皆屈膝拱手摇肘为礼然後立谈

良久而去复车行四十五里过伏道望扁鹊墓墓前多生艾功倍于他艾经伏道河伏道店入汤陰县县有重城自此州县有城壁市井繁盛大胜河南县属相州本二汉荡陰县羗里城在东南

十五日丙申晴四更车行三十六里至相州城外安阳驿早顿马入城人烟尤盛二酒楼曰康乐楼曰月白风清又二大楼夹街西无名东起三层秦楼也望傍巷中又有琴楼亦雄伟观者如堵大街直北出朝京门牌曰通远门皆瓮城相即河亶甲所居魏文帝後赵石季龙前燕慕容隼北齐皆都焉东南二十五里朝歌城纣所都也中出茜草取多故相纘名天下俗传漂杵余血所化也门外过安阳河至更衣亭有脊记大金正隆三年八月二十九日光禄大夫彰德军节度使开国公郑建元移建虽规模甚草草然所创见也至此从便马行每十里置一马铺及所过丰乐镇居民颇多皆筑小坞以自卫各有城楼西望太行颇为风埃所蔽土地平旷膏沃桑枣相望至漳河水缩沙出中多石子俗传可以煖腹南向循河行三四里于陋处作柴桥以渡层冰峨峨中有水甚驶载冰渐以东闻水盛时至与高岸平阔可数里土人号小黄河北行沙中又数里复渡一小桥即漳支流也回望邺镇有塔古都皆在其地闻魏铜雀台故基犹在昔为县金以为镇矣经讲武城犹有壁垒气象雄壮有将台甚高城外高丘相望号七十二塚世传曹公之葬以此惑後人使不至发掘或云其家数世所葬有庙屋甚雄即曹公祠也塚间又有螭首碑闻是晋碑六十里过滏河上有观鱼亭颇新壮少西百余步入磁州城门与州治相近篆牌字甚稳大定五年所立过惠政门入礼宾坊又有东溪在驿之东闻其中是郡庠有士人十余人夜宿滏阳驿之东北望见崔府君庙灵星门并庙栋使副以下焚香遥谒是日相州承应人状貌甚伟衣冠亦楚楚呼问之云姓马有校尉名目以少二百千使用一坐二十年不调非钱不行也既无差遣多只监本州酒税务又言并无俸禄只以所收课额之余以自给虽至多不问若有亏欠至鬻妻子以偿亦不恤且叹曰若以宋朝法度未说别事且得俸禄养家又得寸进以自别吏民今此间与奴隶一等官虽甚高未免箠楚成甚活路又本州以相纘百疋分献接伴十六日丁酉晴自南京来饮食日胜河北尤佳可以知其民物之盛否自是不必家饌矣车行七十里邯鄲县早顿有城及楼甚壮皆旧物也未至三里许有旧城战国赵都漳水相去三十里许汉高祖征陈豨至此曰豨不南据邯鄲而阻漳水吾知无能为也赵王丛台在县之北上有亭榭马行四十里宿临洺镇洺河出其下隶洺州永年县馆舍极寛洁前有大厅傍列三节位次厅後主廊方分使副位厅有脊记镇国大将军充洺州防御使护军开国侯食邑一千户食实封一百户吾古论萨哈重建吾古论意即乌库哩因语讹耳萨哈曾以兵部侍郎来泗州理会俘掳人又闻彼中有三等官汉官契丹女直三者杂居省部文移官司榜示各用其字吏人及教学者亦以此为别道傍数处卖酒皆掘地深阔可三四尺累块上风以御寒一瓶贮酒苕蓐为望石炭数块以备煖荡河朔之朴如此道中有一?尸棚其俗行有死者不埋立四木高丈余为棚其上以荆棘覆其户以防鸱梟狗鼠之害立一牌以记其名姓年月有人识认则从便葬埋否则任之

十七日戊戌晴车行三十五里过沙河县属邢州县有重城换驴行二十五里至邢州今榜曰安国军瓮城三重入门直对州衙东入邢台驿早顿过七教坊椽木巷立节坊成义坊熙晖楼市肆牌额多写般作□有大塔十三层寺宇亦雄壮北门外陂塘冰厚尺余齧叠岸上如柱础然青莹如菜石三里至柳溪唐柳公权遗迹亭榭数所引溪水载之高岸流觴曲水为邢台游

观之地东北有邢山出邢沙碾玉所用也过沙河数处春夏间皆不可徒涉四十五里宿内丘县沙河县汉襄国县地邢即春秋邢国卫灭之战国属赵汉常山王张耳後赵石勒皆都焉勒陷冀州张宾曰襄国因山凭险形胜之地可都也内丘亦属邢有干言山诗所谓出宿于干饮饯于言者

十八日己亥晴车行六十里柏乡县早顿旧日尧山即柏人也汉高祖心动不宿之地六十里宿赵州道中过汉光武庙有塑像坐而侍者四人云是宰相不着姓氏壁间画二十八将庙屋止一间廊庑故基甚广碑石露立者凡四一开元十九年本郡进士李云撰范阳卢规书一开元廿二年立皆对偶文也余皆本朝所立有二石人皆腰斩道傍俗云光武欲北渡滹沱有二人捧浆以进行数里恐追袭者得其踪复还斩之或云夜遇二人问途不应怒而斩之已乃石也行十里由王郎城纵广约数里去赵州五里使副以下观石桥桥有石栏高二尺余上分三道下为洞桥两马头又各为二洞傍为小亭板阁以入石理坚致题刻甚衆多是昔时奉使者有云连鹏举使大金至絶域实居首选宣和六年八月亦有天会中回谢大齐使人留题不能尽读桥上片石有张果老驴迹四遇一夫自言举人问所业云通三史试词赋论策然褐衣与阜隶无别上马入城外驿负郭曰平棘县今改曰沃州春秋属晋战国属赵後魏曰殷北齐曰赵隋曰栾为庆源军节度使临城县有泚水韩信斩成安君于此是日闻接伴使之兄左丞安礼罢为沧州刺史初安礼娶金主之妹妹死欲妻以女辞以不当复娶妻侄强之不可金主怒以抗敕坐之道逢重车三载铁余载板木欲修河桥

十九日庚子晴风车行三十里栾城县早顿晋大夫栾氏之邑又七十里宿真定府城外馆馆分东西道中见扫帚桑特起林中数尺枝条丛细宛如帚状稍指东南或谓此方有居民受其者过滹沱河由土桥以行河侧有开凌村以光武渡河未毕数车而冰陷俗传河冰随车而拆故以名自河以北每五里许必有小舍或在古塚上每夜轮保甲十人宿其中以伺察行者真定在春秋时属鲜虞国为晋所灭战国属赵汉为恒山郡文帝改常山本中山国之东垣陈豨将赵利守此高帝攻拔之改曰真定元和改镇州五代改曰真定府唐叛将李宝臣王武俊王廷凑等皆据此

二十日辛丑晴歇泊住驿

二十一日壬寅晴赐宴东馆口宣云来持使节远冒寒威宜颁在镐之恩以示礼宾之意又云远涉道途冲冒霜雪爰嘉劳勩宜锡芳甘礼悉如汴京但第三第四行及饭遍使乐人舞旋大茶饭中有沙糖熊白使副下食人趋进尤肃押宴下人李泉争执礼数语具语録泉挹条子六十其徒三人各三十每一下必令毒打十下易一人不惟三节人快之虽都管监门吏卒皆怒其生事无不称快俗虽好胜要可以礼屈也安德为开州刺史以治行闻道中颇读庄子故临事间有可观然贪狠愎不知何以有政声益知北方守令难得循良者二十二日癸卯晴四更车行七十里饭新乐县尤度庶古鲜虞国也又四十五里宿中山府靖康之祸真定中山皆固守不下中山城外犹有败城围之金所筑也此地尧所始封战国初为中山国魏文侯使乐羊伐取之以封太子击後燕慕容垂移都後魏为安州唐改定州城门曰昭化瓮城三里甚壮城濠有流水过信利鲜虞高阳三坊坊各有小楼又有明月楼道傍多重车有先牌云辅国新授

西京同知留守子城门亦雄伟曰中山门两傍亦有挟楼入门东行百余步入驿子城西门曰夕阳楼即望长安词所作之地北去又有仁教化原二坊负郭安喜县令姓夹谷酒名曰九醞曰琼酥

二十三日甲辰晴天气清寒方思近火四更车行五十里望都县早饭县有城楼又七十里宿保州城壕瓮城皆三里城约厚十余丈门曰鸡川负郭为保塞县驿曰金台燕昭王遗迹也驿西城上有亭曰富览御庄闻在西上四十里过鸿福院三门有楼崇积仓道西有小门榜曰教女直学州楼曰顺天军驿在州治西南驿分东西供张如法屋宇宽洁初至望都闻国主近打围曾至此自後人家粉壁多标写禁约不得采捕野物旧传为禁杀下令至此乃知燕京五百里内皆是御围场故不容民间采捕耳皇朝初置保塞军後升为州政和三年为清苑郡望都尧母庆都所居尧山在北庆都山在南登尧山见庆都山故名望都

二十四日乙巳晴五更车行四十五里至安肃军南城外上马由城中又入北城驿早食军本遂城县属易州皇朝置静戎军後改焉二城甚固南城南门三重北门一重为安肃县治有雄威营二所北城两门各二重二城之间有濠塹水柜积冰甚多方取以入窖又有祥光塔福善寺食罢又乘马出北门过一大庙或云北岳行宫车行二十五里过白沟河又五里宿固城镇人物衣装又非河北比男子多露头妇人多耆婆把车人云只过白沟都是北人人便别也

二十五日丙午晴五更车行三十里定兴县早食县本黄村近以为邑今岁九月方筑城四旬毕工雉堞甚整独门楼未起驿舍亦创造始待使客于此又六十里至涿州汉高帝立涿郡魏文帝更名范阳新县城有督亢陂溉田号为膏腴即太子丹所献督亢地图也入宣清门过释迦普贤堂商税务范阳县楼入子城城无门上有清风楼两傍土累为高台左曰迎月楼右曰栖霞楼州治在道西门庑陋甚馆驿尤湫隘天使高德亨传宣抚问虞友益赐银合汤药银合二十五两药十贴皆客路所资以红绫为贴有曰每服一榛子大如南方之比梧子也録其语如後敕某卿会朝岁旦蒙犯寒威眷惟将命之恭有加劳勩宜锡卫生之物迎致冲和今差入内侍御直郎虞友益赐卿汤药一银合往堂祇受故兹诏諭想宜知悉冬寒卿比平好否遣书指不多及二十五日敕某复名不书姓副使书姓名

二十六日丁未晴五更车行六十里良乡县早食因宿道中以瑠璃河【或云刘李河】堤岸为水所坏又迂行二十里方抵县县有城门二重衙在道左驿在北门墙下有大防山

二十七日戊申晴风大作抵暮不止四更初车行六十里过卢沟河至燕山城外去燕宾馆百余步使副上马三节具衣冠随入馆中亭子馆伴传衔正使起复正议大夫都水监上轻车都尉安定郡开国伯食邑七百户赐紫金鱼袋梁肃副使广威将军尚书工部郎中上骑都尉广平郡开国子食邑五百户图克坦子澄【图克坦旧作徒单今改】肃兼押宴白琮赐宴李显金赐酒果酒九行罢入城道傍无居民城濠外土岸高厚夹道植柳甚整行约五里经端礼门外方至南门过城壕上大石桥入第一楼七间无名傍有二亭两傍青粉高屏墙甚长相对开六门以通出入或言其中细军所屯也次入丰宜门门楼九间尤伟丽分三门由东门以入又过龙津桥二桥皆以石栏分为三道中道限以护辇国主所行也龙津雄壮特甚中道及扶栏

四行华表柱皆以燕石为之其色正白而镌镂精巧如图画然桥下一水清深东流桥北二小亭东亭有桥名碑次入宣阳门楼九间分三门由西门入会同馆馆在内廊之西南向入馆门使副与馆伴立马下节人从互声两喏传示讫分位张铉抚问琮口宣云远持使节已次近郊宜示宴慈以彰眷遇显金云远乘轺传已次国门宜有宠颁以休劳勩铉云会朝岁旦弭节宴亭爰念勤劳宜加省问

二十八日己酉晴风止赐酒果口宣云已休侯馆将造明庭方修进止之仪宜有甘芳之锡合门副使左光庆到馆说朝见仪

二十九日庚戌晴天明行司捧国书上马前行使副上马与馆伴并行入见馆之西有门门外皆民居宣阳门内街分三道中有朱栏二行跨大沟为限栏外植柳高丽人西夏人二馆在东与会同馆相对立马门外俟使副一行既过方相继而行长廊东西曲尺各二百五十间廊头各有三层楼亭护以绿栏杆廊有三路贯其中南路两门外皆民居中路无门而路甚阔左为太庙右为三省北路左门外有屏墙夹道中有官府南向右门入六部盖在三省之後也正门十一间下列五门号应天门左右有行楼折而南朵楼曲尺各三层四垂朵楼城下有检鼓院又有左右掖门在东西城之中两角又朵楼曲尺三层初出馆横过驰道皆却盖三节人至东廊北头下马使副至左掖门皆步而入左掖门後为敷德门其东廊之外楼观翬飞闻是东苑西廊有门即大安殿门外左翔龙门之後敷德後为集英门两门左右各又有门集英之右曰会通其东偏为东宫西有长廊中起高楼即大安殿前广佑楼也会通门内之西廊即大安之东荣为丽夏茶酒幕次其後为承明门北向相对为昭庆门东为集禧门西即左嘉会门之後相对有右嘉会门其中即大安殿後宣明门之前待班幕次在其西敷德之西门及会通承明左嘉会皆所由之路也入宣明门及仁政殿左门在隔门外当中立俟百官里见退即左入殿下大毡上上有一品至七品牌子盖是其朝着也毡中有大花凤使立凤花之中副在其右大殿九楹前有露台金主坐榻上仪卫整肃殆如塑像殿两傍廊二间高门三间又廊二间通一行二十五间殿柱皆衣文绣两廊各三十间中有钟鼓楼垂红缘金漆帘檐头皆挂绣额亭下有撮椒井亭二宣明门三仁政殿侧门二皆列戟殿门外卫士二百人分列两阶皆戴金花帽锦袍宣明门以外直至外廊下除丽夏幕次前皆甲士青绦甲居左执黄龙旗红绦甲居右执红龙旗外廊下皆银枪自左掖门以入皆金枪执枪者具装门以执弓矢者一被七分甲人依一柱以立每数人必以一女真衣皂紧丝衫者部之凡门屋下皆素队挟弓矢大门四十人小门二十人惟仁政左门用甲士皆自未明分立讫见退无有移动者是日高丽西夏使人同见高丽使三纲衣冠如本朝一为贺正一谢遣使一谢赐羊酒上节幘头犀偏带中节折上巾犀束带下节献顶巾犀束带皆紫衫西夏使二纲一贺正一谢遣使皆以正子为正使戴金冠制作甚工朱袍蹀躞状貌甚伟副使衣冠如高丽人三节皆不入见椎髻被发小巾尖帽皆夷服也西夏人进礼物十二牀马二十匹海东青七细狗五亦旅于庭马嘶狗吠颇乱朝仪隔门在殿门後檐下上以木雕为铜瓦小拱甚巧丽随门五间每间朱门四扇金钉粲然入见如仪受衣带而退就馆赐茶酒左宣徽使敬嗣晖押伴赐宴之礼押宴与正使对坐接伴使副坐押宴下副使对二者之中惟茶酒则小异本是殿上置酒多就馆安排必以两府为押伴押伴庙坐使副接伴对坐两傍立班及对揖位次必差向前嗣晖雍容庄重而善应接尝使于我尽记朝仪以归国中典章礼文多出其手旧为宣徽力谏亮南牧削籍为民新主立复用之

三十日辛亥晴賜宴館中完顏宗嗣賜宴烏庫哩璋賜酒果完顏彥押宴宴罷館伴送葡萄酒

攻媿集卷一百十一

卷一百十二

钦定四库全书

攻媿集卷一百十二

宋 楼钥 撰

北行日録下

乾道六年庚寅正月一日壬子晴使副率三节官从望拜两宫交贺礼毕上马与馆伴同入贺由应天东门步入东廊幕次中大安殿门九间两傍行廊三间为日华月华门各三间又行廊七间两厢各三十间中起左右翔龙门皆垂红缘帘庭中小井亭二幕次与高丽使相邻西夏仲相对客省茶酒罢已初锦衣卫士又益以青锦袍五十余人列立大安门庭下百官排班朝日太子为班首四拜约近三百余人既罢客省引使副由月华门随百官班入贺太子锦褥四镇以银猊出衆班中立次宰执亲王次有十余人皆金带紫袍使副立西偏肃与子澄亦在此列意是以馆伴之故不然郎官卿监不应如是之少也其後又有二百余人预宴者除亲王宰执四十余人余皆贺毕先退讫事凡五十七拜五次舞蹈二十五拜初入班并三次上御酒各再拜上壽罢喝与卿等同庆又四拜劝壽酒两次共四拜初登殿就坐致语宴罢各两拜酒七行第一行宣劝在坐两拜第二第四第六行独劝使副各两拜每宣劝必先离位而立搢笏受盞赴坐宴罢谢恩拜于殿上又拜舞于丹墀而退进御酒时却不起立余皆如本朝之仪卫士甲卒如入见时殿下砌?两道枪子郎君紫衫幘头执柱斧佩弓矢刀剑面殿分立凡五十人闻柱斧中藏枪刃皆军官子弟也大安殿十一间朵殿各五间行廊各四间东西廊各六十间中起二楼各五间左曰广佑後对东宫门右曰弘福後有数殿以黄琉璃瓦结盖号为金殿闻是中宫殿上铺大花毡中一间又加以佛狸毯主座并茶牀皆七宝为之卓帟以珍珠结网或云皆本朝故物卓前设青玉花六朵看果用金盃子高叠七层皆梨瓜之属其次皆低钉细果傍设玉壶以贮余酒未至时覆以真红绣衣既坐八人皆公裳舁以前分两翼郤行以退榻前服玉带者八人太子许王对坐次二丞相余不知何人其後各金带者六人使副与左右丞相对在玉带之南稍後自金带以下皆用银器榻後照屏画龙如本朝顶为大金龙盘其上余十间皆结毼顶小拱三层皆以金为小龙间置其中曲折皆钉以绣额壁柱衣绣帟中各有龙又有金香猊金龙山各二露台三层两傍各为曲水石级十四最上层中间又为涩道亦覆以毡上壽酒时太子独至涩道下捧盃以进者三山棚起十一峯号仁壽山山下栽松柏并装桃李各十余株大狮象各一背负七宝又以彩索系棚之前为小狮子二以蔽其杙弘福广佑之前又各为彩楼三间三节人宴东廊下高丽使次之西夏使与对二国三节人虽预宴不拜于庭其余廊屋皆垂黄沿帘伏甲其下殿前都副点检完顏仲乌库哩元忠二人各执柱斧率其徒十人立御榻两傍东西向榻後近侍八人各执其物终席不见宦者每上国主酒系宣徽使敬嗣晖等互进以金托玳瑁碗贮食却只覆以金扣红木浅子令承应人率尔持进其礼文不伦如此乐人大率学本朝惟杖鼓色皆幘头红锦帕首鹅黄衣紫裳装束甚异乐声焦急歌曲几如哀挽应和者尤可怪笑宴罢归馆

二日癸丑晴张铉赐分食图克坦通赐酒果【图克坦通旧作徒单通今改】分食二盘一盛大肉山以生葱枣栗饰之其中藏一羊头一盛茶食糖糯粥粟饭麦仁饭皆以枣栗布其上晚大风作

三日甲寅晴风益甚赴花宴于大安殿大率如元日加酒二行五行後四?国主先起百官出就簪花剪彩为之惟栾枝甚异或四或二长二尺许花为杂色状如锦带翘起幞头四角後垂柳四枝是日风既暴狂几不可行花叶飘坠者往往有之少顷六?国主复坐又四行而罢是早见黄土铺道中由左翔龙门出应天中门折而东向知国主以元日谒原庙云

四日乙卯晴射弓宴张倬赐生饩高蕙赐宴完顏高赐酒果完顏仲雄押宴仲雄于进趋酬应一无所能手有雕青细字盖以射选借官而来射虽不能命中而善于发矢人多服之酒七行各分位换窄衫束带将出射宰执遣右司张汝弼传语问俘掳人事既退使副及馆伴射弩仲雄射弓射垛设庭下上画火珠夹以小飞鹤二下画一彩架以承射帖夹以大立鹤二綠竹数竿帖上初为银碗五每头二矢少顷加四花二矢押宴馆伴国信使副知合五人以次执一矢起揖以射皆坐胡牀庭下分列锦衣金帽卫士五十人乐人立其左又卫士一人为押宴执弓矢二人为馆伴过弩一人端箭二人立垛侧喝箭射每中则面厅伛立撒手报覆乐使喝打着即乐作否则以擡捺後手见晓初中时先望阙拜赐卫士以元矢穿所中银牒引赐物过其前就坐共饮胜者酬酢必遍然後复射牒子重三两中角花者随所中而得中的者举九牒得之以其一与喝箭者初中亦如之使副拜赐之後但欲成礼即已伴使志在于得抵暮不肯休屡谢止之方已两厅过弩者各以二牒酬其劳易衣就座又二行而罢倬口宣云远将庆币来会春朝方休徒御之劳宜有饩牵之赐蕙云长途远届使事告成将观射御之容宜示宴私之宠高云已成使事将向归途宜有珍颁以彰宠遇

五日丙辰晴入辞仁政殿客省茶酒既罢引使副欲入而合副云合自下入辞遂复回幕次乃引三节人拜赐宣明门外次引高丽西夏二使及使副至隔门外夏使已出丽使方辞少俟至丹墀下面西立俟通班面殿方拜喝有敕两拜又喝赐衣带鞶马疋段等义手左跪受赐以赐目纳怀中就一拜舞蹈五拜再喝赐酒食又五拜升露台少立舍人两行各三人齐揖以入栏子内副使躬身使少前拜跪受书却行与副使齐立躬身俟传示讫复退行三步左下丹墀再面殿立躬身听喝好去由右而出赐茶酒五行于馆韩钢押伴

六日丁巳晴先发龕车行使副率三节人同馆伴出至燕宾馆赐宴完顏元赐酒果完顏宗安押宴仍差安德德裕送伴尽借回程私覲泛送从之车马欲行安德方呼其家人以细车般所得还家如木绵之类复载至汴京滞留至晚方行燕山本召公所封秦灭燕以为上谷郡武王封尧後于蓟即蓟县也二世时韩广自立为燕王项氏封臧荼高帝封卢绾皆都此太行燕山大防山绵亘千里隐然一都会金又以宫室侈大之古所未有也又改曰大兴府其守为尹车行六十里更尽宿良乡县

七日戊午晴五更车行八十里涿州朝食又六十里宿定兴县

八日己未晴五更车行六十里安肃军朝食又四十里宿保州

九日庚申晴陰风有雪意四更车行七十里望都县朝食又行五十里道中看大龙桑小龙桑宿中山府十日辛酉晴四更车行五十里新乐县朝食又行七十里宿真定府道傍老妪三四辈指曰此我大宋人也我辈只见得这一次在死也甘心因相与泣下

十一日壬戌晴赐宴张汝说口宣云复将使指少憩中途宜示宴慈以光行色又云使命改辕价藩弭节宜颁宠赐增重皇华同知真定尹田锺吉押宴

十二日癸亥晴三更车行六十里栾城易驴马三十里饭赵州城角树上有芦苇裹一人云是强寇李住儿自炀王时作梗劫人妇女以要财物至是以弓弦断为弓手所捕挑脊筋挂树上死矣直候支到赏给方取下埋殡又六十里宿柏乡县与去伪以马前行再读光武碑十三日甲子四更车行六十里饭内丘县天明雪作至晚方止又四十五里宿邢州北门曰拱德

十四日乙丑霪子下天明开霁四更车行二十五里至沙河县易驴马又三十五里饭临洛镇食後与去伪马行四十里宿邯郸县雪後尘清尽见太行山色邑中沿街作灯洞颇可观

十五日丙寅晴车行七十里磁州朝食灯火尤盛出门龕车有折轴者随使副乘马过漳河登车六十里至相州使副复上马入城灯洞不如磁州之多而工巧过之秦楼街尤繁华自北门至南门约七八里所士女多靓粧拥观有食店挂一灯上为胡羊中横一瓠下为经一卷盖河朔人语音以羹为经也宿城外安阳驿把车人言去年十二月方差使一番为年时被蒙子国炒旧时南畔用兵尽般军器在南京今却般向北边去三月中般用牛三千头般未尽间被黄河水涨後且休问驴马价云驴上有直四十千者马更高贵旧时家家有马炀王南征尽刷去不知几万匹後来都是行归而今又殃我等贵价买问绢帛价云好绢每疋二贯五百文丝每两百五十文【并六十陌】又有云越王不平其弟为储国主曾以女小底十人赐之逊谢不受云他日生出孩儿来亦无用处蒙古国作梗太子自去边头议和半年不决又且归今又遣莫都统提兵去军子云我辈三四口种少麻豆足了得吃旧时见说厮杀都欢喜而今只怕签起去彼此休厮杀也好又有云我见父母说生计人口都被他坏了应河南北钱物都般向里去更存活不得

十六日丁卯晴四更车行三十六里饭汤陰县又七十五里宿濬州安德暮夜叩门送私覲

十七日戊辰晴风三更车行二十五里三角路上换驴马一路可入滑州又四十五里武城镇早饭马行至黄河去程所行李固渡口以冰泮水深柴路不可行又稍上三四里先横过中潭上入水牵挽数里抛过南岸待车船至方行循河至浮桥边扫岸又行荒草陂泽中四十五里宿胙城县

十八日己巳晴三更行四十五里饭封丘短墙为城人烟牢落便远不及河北日未午又行四十五里抵东京北郊青城侧亭子换马具衣冠所过柔远馆但有断垣败屋入顺常元武二门

二门之间过五丈河菜市桥夷门山巷口百王宫乃炀王球场亲从第一指挥旧日御龙直也由竹竿巷口斜街入第二门土市马行街皇建院巷德胜桥转太庙巷口东行相国寺出御街历廊屋三十间过榷货务又廊屋七十间中有小门是国子监前後御廊尚多不知其数投西穿门由旧路入驿十九日庚午晴收银绢十足两赴宴完顏元赐宴酒果南京路都运梁錡押宴宴罢行四十五里宿陈留县二十日辛未晴车行六十里至雍丘县早饭临川驿又六十里渐行汴河中宿拱州襄陵驿城外客旅往来人家颇多入城旧有桥河流既断筑堤以行子城内旧是州衙今以屯军有三个千户约有千二百人

二十一日壬申晴四更车行六十里饭宁陵县永宁驿又六十里宿南京甲士数十甲马百夹道而陈城门去驿稍远马如来时之数而行甚疎意屯军亦不甚多也是日日有四背气又白虹贯日日在壬癸荆生言其应在北

二十二日癸酉晴四更车行四十里饭谷熟县又三十五里沙冈换驴又四十里宿下邑县会亭镇

二十三日甲戌晴四更车行七十里饭亳州永城县又六十里宿柳子镇闻有天使往山东签兵人不肯从执天使杀之

二十四日乙亥晴车行四十五里饭宿州临涣县蕲泽镇早顿又四十五里宿宿州汴河底多种麦

二十五日丙子陰晴车行六十里饭蕲县静安镇又六十里宿灵璧夜微雨作即止

二十六日丁丑陰晴三更车行八十里饭虹县又八十里宿青阳镇驿

二十七日戊寅晴四更车行八十里饭临淮县过县即见龟山塔及淮山一行已不胜喜跃矣又六十里宿泗州自临淮即依淮西行

二十八日己卯晴先发递担輦车即上马出城使副入草馆同去伪先乘马至河岸舟至首见季舅洪子度唐季润及吕葵张吉来收家问喜极涕下顷之俟行李装船了却具衣冠入草馆俟使副茶酒毕辞送伴即行是日大风拍岸良久方到盱眙谒胡漕龚守不值见王御干取所买物谯提辖司马尚书【汲】姜叔永司马季闻张伯淳皆往来交谒後纲官属也宿淮岸

二十九日庚辰微雪早离盱眙过龟山以新制行淮大风不可进宿淮岸约去龟山数里

三十日辛巳微雪天明欲舟行风又大作力行而前过渎头数里风正北驾浪益急又止宿

二月一日壬午後风力稍平衆舟齐行迫暮仅能入洪泽舟人交口相贺昔蒋鲁公开运河六十里以避长淮之险所活不知几人中间欧家渡最浅使人往还非借潮于神不可行官司憚

开河剥载之扰创议行淮使舟才四往返无不惊虞此行至三宿淮上波涛春撞有鱼腹之忧鲁公今丞相曾祖为发运使将入奏计自洪泽至龟山率一二里辄凿一井以测地之土石既得请遂开运河前辈用心至矣可轻改乎

二日癸未晴过淮陰夜过楚州

三日甲申晴过宝应

四日乙酉晴过高邮

五日丙戌雨以沿路水涩寸进甚艰夜宿木铺坝里季润过仪真俞县尉【茂先】相见甚款

六日丁亥雨晚晴昨晚以礼物船与前船舳舻相触毙一篙人至召伯埭使副捐金使瘞之晚过扬州是夜礼物船为暗桩所败漏发而人不觉同行杨刘罗三人蒙被登岸舟已沈矣抵瓜洲宿

七日戊子晴渡扬子宿丹阳馆下侍季舅同去伪见陈待制及魏子智其内子展参贺执礼甚恭金山印老相见渡船中

八日己丑晴城中水涩良久力出门夜过丹阳县及吕城闸

九日庚寅晴天明过奔牛闸午後过毘陵

十日辛卯晴天明抵无锡使副谒蒋丞相罢即行喻郎中访及任富来知诸舅来迓夜宿枫桥

十一日壬辰晴过平江城外午後过吴江久苦浅涩至是大风驾太湖水入港张帆而行陈表兄张子家丁表兄胡子渊相见

十二日癸巳晴天未明到秀州同去伪?见王江陰值送女陈宅未归见直甫于卧内谒郑景元判官同年不遇已闻仲兄见次到廨宇一观出门李同年主簿相见于邮亭王表弟泽同行数里而归读江陰奏状无不击节称叹夜过崇德抵长河闸

十三日甲午晴天明起见诸亲午後过临平赤岸晚泊闸头使副入仁和馆受传宣赐银合茶药因出所撰还醮青词宿税务下发家书附递

十四日乙未晴使副上马赴朝参船入北关以小舟般载归舅家一见至亲喜气自倍而归兴益勇矣是夜与诸亲剧饮醉甚仲舅有词走笔次韵二阙

十五日丙申晴侍季舅同去伪谢曾知合不遇又谒范丈甚款

十六日丁酉晴士穎弟摄萧山尉别去胡春自婺女来收景山兄书饭後出谒吴太博胡给事陆寺丞陈大谏薛国正芮司业张少卿林编修尤宗丞始闻铜坑之□十七日戊戌晴谒閭丘监丞欲问坑冶之详不值同去伪智叟侍叔舅陈表兄以小舟见陆子山留饭而归赴景孟舅晚饭被酒先归

十八日己亥晴饭罢赴梁参政呼召客次遇蜀士郭倅【甲】冯太丞【仲夷】

十九日庚子晴吴太博卢监簿连日招饭皆力辞之治叠行李雨作买船

二十日辛丑小雨即晴诸亲作醪泛湖五十余分以水浅不可傍岸?旋湖中抵暮醉归

二十一日壬寅雨赴范丈饭

二十二日癸卯雨侍仲舅往延祥观醮筵同上中节两焚香致敬斋罢各散与去伪小舟自涌金门归先遣承局吴盖行发家书

二十三日甲辰雨先发行行李下船两返方毕使吕葵张吉宿舟中期以来早啓行以舅家挽留又展一日二十四日乙巳晴去伪生朝仲舅与诸亲同作庆偷闲谒李恩州授般运法是夜大醉中拜辞诸亲

二十五日丙午晴早作襦被辞舅家轿行七十里出暗门由赤山出六和塔下至庙山登舟宿富阳雨作二十六日丁未晴雨作复止风逆寸进至三江口东风微动方理帆忽西风再起甚劲力挽至桐庐凡行九十里过青溪

二十七日戊申晴东风张帆过鸬鹚原钓台下伴伯原风止过乌石大浪滩十五郎滩大浪最可畏虽以水涨不见滩碛而岐头水怒良久方上居民以小舟来助刺船什伍为羣以舟轻止用一人方当湍流忽随篙坠水观者胆落而少年善泅如履平地复登舟助力犒以百钱而去宿东馆凡行九十里去严州二里

二十八日己酉雨大作午间加以西风水又盛长舟人疲于牵挽屡止复行晚雨止风静行至乌岐滩下宿小港中才行三十余里

二十九日庚戌晴风亦止但以水涨寸进遇一岐辄移时方能冒险以进悬崖飞瀑所在见之虽快览胜处至凌犯怒涛亦可骇也所过白雁二岐尤暴怒又过横流数处夜同衆舟宿桑林间隔岸望乡头终日惊险劳动止行三十余里夜水益长至五更方少退

三十日辛亥晴舟子早起候望前路黄泥岐不可上复回数里寻路避之泝流行乱林间半日方出大溪晚至兰溪先以劄子与李尉【由】悬雇五夫李以庚辰登科其子遂夫又癸未同年便访逆旅继往见之宿客舍三月一日壬子风雨早起束装饭後李尉来访即行又饭竹马

馆晚到婺州首见赵金华【子涛】不值径入郡学直舍省景山兄周教授【汝能】雍无锡【希稷】相访周与景山兄同官雍同舍也借周直舍安泊少选侍景山兄过周之五柳堂堂本萧侍御【振】所建诗牌尚多尽得双溪之胜王察推【栢】亦来访同饮剧谈至二鼓方归

二日癸丑雨侍景山兄见李使君【衡】留来日一饭客次遇解节推【延运】是日景山兄周赵雍王醪就五柳相招早饭又坐养原堂无尽藏台人陈文学【愿】周之故人也同坐解推又约晚饭六人径自五柳赴之李知録张义乌同集于西退轩琴棋投壶坐客皆醉李纠又约来日早饭

三日甲寅雨侍景山兄同周教授谢李使君客次遇唐正字【仲友】遂复还无尽藏同出梅花门过浮桥数里迓苏仓【峤】归见唐正字归学发五担付张吉先归侍景山兄赴李纠饭坐清远楼景物尤胜同会七人解张雍王酒三行李守速客即往赴之刘判院【藻】陈子厚同集小候自公堂坐半政堂劝酒移忠堂酒罢刘先归余四人复过五柳手谈清饮夜分乃散

四日乙卯陰晴微雨间作早别景山兄即行三十五里饭摩诃样又行数里遇丽水林丞【良】过婺鞠狱相见逆旅宿杨公桥永康界首行八十里

五日丙辰晴过永康数里饭至李溪遇承局持家书来接晚过黄壁【上卷乾道五年十月二十一日行三十里饭黄碧一十八里宿和尚店去李溪犹二里此云过永康数里饭至李溪晚过黄壁似黄壁与黄碧系一处而壁碧互异姑各仍原文】

六日丁巳雨过缙云邑官相迓皆谢之独见李同年又送过大溪而别县得四夫又荆山寺四夫轮番舁轿冒雨登冯公岭至天宁寺已昏黑仲兄器之仁甫不愚元声□张子质相接先行还家拜二亲灯下上下无恙欢声相闻喜可知也

攻媿集卷一百十二